

فهرس جلد ثالث من ترجمة تبيان

سورة الكهف ٢ صحيفه	سورة مريم ٤٠ صحيفه	سورة طه ٦٠ صحيفه
سورة الانبياء ٨٦ صحيفه	سورة الحج ١١٣ صحيفه	سورة المؤمنون ١٣٨ صحيفه
سورة النور ١٥٥ صحيفه	سورة الفرقان ١٨٩ صحيفه	سورة الشعراء ٢١٠ صحيفه
سورة النمل ٢٣٤ صحيفه	سورة القصص ٢٥٩ صحيفه	سورة العنكبوت ٢٨٦ صحيفه
سورة الروم ٣٠٢ صحيفه	سورة لقمان ٣١٦ صحيفه	سورة السجدة ٣٢٦ صحيفه
سورة الاحزاب ٣٣١ صحيفه	سورة سبا ٣٦١ صحيفه	سورة الملائكة ٣٧٨ صحيفه



مكتبة محمد زكي
١٣٢٤

مكتبة

T. C.
MILLÎ EĞİTİM BAKANLIĞI
RAGİP P. ŞAİRİ FLİĞİ
MÜDÜRLÜĞÜ
Sayı: 2068



مكتبة محمد زكي
١٣٢٤

R. Y
2365

وتاكه اعمال صالحه ايشلين مؤمنه جنت اولسيله تبشير ايديه (ما كشين فيه ايدا) انلر آنده بلا انقطاع مقيم اولدقلى حالده (ويندر الذين قالوا اتخذ الله ولدا) وتاكه الله تعالى ولد اتخاذايتدى دين كافرلى تخويف ايديه (ما لهم به من علم ولا بائهم) اول قوله انلرك ونه آبالرينك على يوقدر بلكه آنى ديملى جهل مفرط وتوهم كاذبندر ويا اوائلرندن ويا آبالرندن ايشتكارينه تقليدندن ناشيدر حالبوكه انلكه اراده ايتدكرلى معنابى بيلكسزنيكه انلر اب وابنى مؤثر واثر معناسنه اطلاق ايدرلردى اكر اول معنابى بيلسهلردى اكا اتخاذا نسبتن ايتزلردى (كبرت كلمة تخرج من افواههم) انلرك اشبو مقاله سى كفردنه عظيم اولديكه اول انلرك آغزلرندن چيقار زيراكه انده تشبيه وتشريك وار واكا امانه ايدر ولده احتياج ايهامى وار (ان يقولون الا كذبا) انلر قول كذب ديرلر (فلعنك باخع نفسك على آثارك ان لم يؤمنوا بهذا الحديث اسفا) يوخسه انلرك اشبو قرآنه ايمان كتورمدكارينه حزن وغضبه قانكدن كتدكلرندنصكره كندبكي هلاكى ايدرسن (انا جعلنا ما على الارض زينة لها) ريوزنده اولان حيوان ونبات ومعادننى يره وير اهلنه زينت قيلدق (لنبلوهم ايههم احسن عملا) تاكه تعاطيده انلرك قنغيسى عملده اصلح وذيابى اتر كدر اختصار ايدوز (وانا لجاعلون ما عليها صعيدا جرزا) نفخة اولى ده ير اوزرنده كى زينتى بزيه برابر ترابه دوندررز ونباتسز صعيد املس قيلورز (ام حسبت ان اصحاب الكهف والرقيم كانوا من آياتنا عجبا) يامحمد ظن ايتدكيكه اصحاب كهف ورقيم بزم آيتلرمزدن برآيت عجبیه اوله بلكه سموات وارض وما فيهما ده اولان عجائب اندن اعجبدر * كهف * جبلمه غار واسعددر ورقيم ايسه شول جبل ويا وادينك اسميدر كه كهف انده در ويا اصحاب كهفك قريه ويا كابلرينك اسميدر ويا خود لوح رصاص ويا جردر كه آنده آنلرك اسملى يازيلوب كهفك قپوسى اوزره قونوبدر * ديلديكه اصحاب رقيم قوم آخروندر كه آنلر اوچ كسه ايديلر اهلرچون حاجتلىرنيه كيدر كن انلرى يغمور طوتوب بر كهفه كيرديلر اول حالتده جبلمدن بر صخره قوپوپ كهفك قپوسنى بر كتدى انلرك برى ديديكه كلوك هر برىمى احسن عملنى ذكر ايتسون اميددر كه الله تعالى انك بر كتنه بزي بو ورطه دن خلاص ايديه * آنلرك برى ديديكه كونلرده بر كون بعض

الجلد الثالث

فِنْ تَرْجَمْتَنِيْ ذِيْكَ

بِسْمِ اللَّهِ الرَّحْمَنِ الرَّحِيمِ

سورة الكهف وهى مائة واحدى عشرة آية مكية

بسم الله الرحمن الرحيم (الحمد لله الذى انزل على عبده الكتاب) اول الله تعالى به جد اولسونكه عبرى محمد صلى الله عليه وسلمه جبريل عليه السلام واسطه سيله قرآنى انزال ايتدى * الله جل وعلا حده استحقاقنى قرآن انزالى اوزره ترتيب ايتسيله تنبيه ايتديكه اول قرآن انك اعظم نعماسيدر * زيراكه اول عبادك كالى اولان شينه هادى ومعاش ومعادك صلاحى منتظم اولان شينه داعيدر * ديلديكه انزال كتابده تحميد واسراده تسبيح ذكر اولندى زيرا مقام تسبيح انك كالى درجاتك مبديدر ومقام تحميد ايسه انك نهايتدر زيراكه بشرى كالى اول كتابله در (ولم يجعل له عوجا) اول الله تعالى قرآنده عوجدن برشى قيلدى لفظنده اختلال ومعناسنده تنافى اولق ايله ويا خود جانب حقه دعوتدن آنده انحراف قيلغله كه اول معانیده اعيانده كى عوج كبيدر (قيميا) مستقيم معتدل اولديغى حالده كه انده افراط وتفریط يوقدر ويا خود اول كتبك كلنى مصدق وشرابى ناسخ اولديغى حالده (لينذر بأسا شديدا من لدنه) تاكه كندى عندندن صادر اول كتابله اكا كافرلى عذابله تخويف ايديه (ويبشر المؤمنين الذين يعملون الصالحات ان لهم اجرا حسنا)

(وتاكه)

عمل ایچون اجیرلر استعمال ایتدم برر جل وسط نهارد کلوب بقیه یومده
اول سائرک کامل نهارد ایشلدکاری دکلو ایشلدیکندن سائرلرینه
ویردیکم اجر دکلو اکا دخی ویردم اول سائرلرک بری یاوزلنوب اجرینی
ترک ایتدی بن ایسه اول اجرله بر دیشی بوزاخی اشترا ایدوب حتی که
بیوتدم نسلاندیروب چون ماشاء الله ازمان ودهور مرورند نصکره
بریلدیکم پیر ضعیف بکا چیه کلدی بنم سنده حقم واردر ایستیم
دیدى وکندینک اول اجرینی ترک ایدن اجیر ایدوکنی بکا بیلدردی بندخی
نم دیوب انک اجريله اشترا ونسلاندیردیکم صغرلرک جله سنی اکا ویردم
الهی اگر بن اول فعلی وجه کریمک ایچون ایتدمسه بزى بوورطه دن
خلاص ایت * هماندم اول صخره بر مقدار کھفک قپوسندن آریلوب
آیدینلق کوردک * وانلرک ایکنجیسی دیدیکه بنم فضلله مالم واریدی ناسه شدت
ایروب بدن معروف دیلیو بکا بر مرأه کلدی دیدمکه نفسکی بکا تسلیمدن
غیری وجهله سکا برشی ویرمیزن اول ایسه اکا رضا ویرمیوب کتدی
بعده بروقتدن نصکره کیرو کلوب بدن معروف استدیکنده ینه اکا اولکی
تکلیفی ایتدم حتی اوچ کوره بو منوال اوزره کلوب کتدیکندن نصکره
آنی زوجنه ذکر ایتدیکنده زوجی اکا دیشکه اجابت ایت نه چاره ایدم
تک عیالمزه بر قوت تحصیلنه اغاثه ایت چون مرأه کلوب نفسنی بکا تسلیم
ایتدی بندخی انی کشف وقصد ایدیچک دتره دی دیدمکه سکا نولدیکه
دتررسن دیدیکه الله تعالیدن قورقارین دیدمکه سن بویه فقر وشدته
ایکن اندن قورقوب بن ایسه رخا وراحتده ایکن روامیدر که اندن
قورقیم اویله اولسه انی ترک ایدوب التماس ایتدیکی شیئی ویردم الهی
اگر بن اول فعلی وجه کریمک ایچون ایتدمسه بزى بوورطه دن خلاص
ایت * اویله اولسه اول صخره کھفک قپوسندن اولکبدن زیاده
آریلوب حتی که بری بریمزی کورر اولدق * آنلرک اوچنجیسی دیدیکه بنم
پیرلکه ایرشمش والدینم واریدی بن ایسه غم صاحبی ایدم انلری یدوروب
ایچورروب خدمتلرین کورمینجه غنمه کتمزدم برکون یغموردن انلرک قاتنه
واره مدم حتی که اخشام اولدی محلبده سود ایله انلرک قاتنه واروب
انلری اوپور بولدم انلری اویاندقمقدن کراحت ایدوب المده محلبله
صبحه دکن انلره منتظر اولدم حتی که اویاندقلرنده یدوروب ایچوردم

(الهی)

الهی اگر بن بو فعلی وجه کریمک ایچون ایتدمسه بزى بوورطه دن
خلاص ایت اویله اولسه صخره قپودن آریلوب اوچی دخی اول
شدندن قورتیلوب کتدیلر * محمد بن اسحاق ایدر وقتا که اهل انجیل
بیننده اختلاف عظیم اولوب عصیانلرینی کبیر ایتدیلر ملوکاری دخی
طغیان ایدوب نامی اصنام عبادته وطواغیت ایچون ذبحه اکراه ایتدیلر
جمله دن بری ملوک رومدن دقیانوس نام جبار نامی اول فعله اکراه
ایدوب مخالفت ایدنلری قتل ایتدی انلرکه مؤمنلر اولوب دین مسیح
اوزره ثابت اولدیلر انک عذاب وقلنی اختیار ایتدیلر چون دقیانوس
افسوس شهرینه نزول ایتدیکه اصحاب کھف انده اولدیلر انلری دقیانوس
قاتنه کتوردیلر انلر ایسه اشراف رومدن مؤمنلر ایدیلر حق تعالینک
وحدانیتنه ایمانلرین اعلان ایدوب دقیانوسک عذابن اختیار ایتدیلر
دقیانوس انلره امهال ایدوب دیدیکه وارک عقلکزی باشکزه دیرک شمعی
سزه امان ویرمیوب اولدرمکدن بنی نه منع ایدردی الایوکه شبابلغکز
ایچون سزی اسرکدم ایمدی واروب کیدک حیات ویا موتدن نفسلریکز
ایچون دیلدیکزی اختیار ایدک * ایمدی بن فلان شهره کیدوب کیرو
بونده کلورم امریه مطاوعت ایتزسکزاشد عذابه سزی هلاک ایدرین
چون بو منوال اوزره اندن آریلوب اولرینه کلدیلر بر مقدار زاد آلوب
دقیانوس کیرو آنلری استیو کلدین شهردن کتمکه یونلدیلر مکر شهرلرینه
قریب یخلوس نام جبلده بر کھف واریدی اتفاق ایتدیلر که
اکا کیره لر واندن الله تعالی یه عبادت وطاعته مشغول اولوب دقیانوس
کلدیکنده اراده الله نه ایسه انی کوره لر اول کھفه کیدرکن انلره برکلب
اویوب انی کرارا مرارا طرد ایتدکلرند نصکره باذن الله تعالی اول انلره
سویلیوب دیدیکه بدن اوشتمکز بن الله تعالینک دوستلرینی سورم
اویود یغکزده بن سزی بکلرم چون انلر اول کھفه کیدیلر دقیانوسک
کلمسنه انتظارله ذکر وطاعته یوزاوردیلر چون دقیانوس کیرو افسوس
شهرینه کلدی واصحاب کھفک کبیرینه یملیخا دینوردی تبدیل شکلله
شهره وارردی حاجتلرینی کورردی وکندیلر حقنده هر نه سویلنورسه
انلره خبر کتورردی برکون یملیخا شهردن اغلیه رق کلدی دقیانوسک
شهره کلوب کندولرک تفقد ایتدیکنی انلره سویلدی آغلاشوب سجده یه

واردیلر والله تعالیدن استغاثه ایدوب یلواردیلر اندن باشلرین قالدیروب
 آیا که بزه دقیانوسدن نه حالت ایرر دیوحیره دوشدیلر شمسک غروبی
 وقتی ایدی الله تعالی انلره نوم القا ایدوب جمعی اویخویه واردیلر
 بر وجانبده دقیانوس انلرک بابالرینی قاتنه کتورتدی بکا عصیان وتمرر ایدن
 اوغلر یکرزدن خبر ویرک قنده کتدیلر دیدی بابالری ایتدیکه انلر سنکا
 اطاعت ایتدیجک بزه می اطاعت ایدرلر اموالری آلوب شهرک سووقنده
 اهلاک ایتدیلر بعده ینجلوس طاغنه چیقوب کتدیلر * الله تعالی
 دقیانوسک قلبنه القا ایتدیکه اول کهفک آغزینی برکیده تاکه انلری
 عجائب آیاتندن بر آیت ایده دقیانوس دخی انجلین ایتدی والحال انده
 انلرک خبری اولیوب الله تعالی انلری وفات نومله توفی ایتدی کابلری ایسه
 کهفک قپوسنده ایکی ذراعنی باسط اولدیغی حالده یاتدی مکر دقیانوسک
 یاننده ایکی رجل وار ایدی ایمانلرینی کتم ایدرلر دی اصحاب کهفک اسماء
 وانسابلرین وقصه و اخبارلرین وزمان وتاریخلرین رصاصدن ایکی لوحه
 یازدیلر ونحاسدن بر صندوق ایچره قوبوب اول بنیان ایچنه کیرلدیلر
 شول رجائله کیم الله تعالی بر زمانده انلری قوم مؤمنینه اظهار ایدرسه
 انلرک احوال و اخبارینی بیلرلر * وهب بن منبه ایدر عیسی علیه السلامک
 حواریلرندن بری افسوس شهرینه کلوب دخول مراد ایتدیکنده
 بوابلرانی دخولدن منع ایتدیلر شهر قپوسنده برصنم وار اکا سجده
 ایتدیجکه کسه شهره کیرمز دیدیلر اولیه اولسه حواری شهره کیرمیوب کیرو
 دوندی مکر شهرک قربنده بر جام وار ایدی انک حاجیسنه حواری
 کندویی ایجار ایتدیکه اول جامده خدمت ایده حاجی انی استیجارندن
 جامنده برکت بوالدی واول حواری به شهر شبانندن برقاج کسه لر آشنا
 اولدیلر اول ایسه انلره سماء وارض اخبارین و آخرت احوال خبر ویرر
 انلر انی اینانورلردی و حاجی ایله شرط ایتشدیکه کیچه ده جام انک
 اوله انکله صلاتی بیننه حائل اولیوب عبادتنه مشغول اوله بو حالت
 اوزره برقاج ایام مرورندنصکره ملکک اوغلی بر مرآه ایله کلوب جامه
 کیردی حواری اکا دیدیکه سن ملک اوغلی ایکن سکا لایقیدرکه بویله
 ایدرسن دیو تعبیر ایتدی اول اندن اوتانوب کتدی * بعده ینه انجلین
 ایتدکده حواری انی تعبیر ایدیجک حواری بی اول سبب ونهر ایتدی

(واکا)

واکا التفات ایتوب مرآه ایله بيله جامه کیردی کیریجک ایکیسیدخی
 جامک ایچنده اولدیلر ملکه خبر ایردیکه حاجینک اجیری اوغلکی
 اولدردی دیدیلر چون حواری بی استیو کلدیلر اول ایسه قاجوب کتشدی
 اولیه اولسه انک اصحابی اولان شبانی استدیلر انلر دخی کندیلرک استندیکن
 ایشیدیکک شهردن چیقوب یوله کیردیلر * مکر ایمانده بر صاحبلی
 وار ایش بولده اکا راست کلوب بيله سنجه بر کلبه بيله کیچه بر کهفه
 کیردیلر بو کیچه بونده یاته لم ان شاء الله تعالی صباحن رأیمنه اقتضا
 ایدرسه انی ایده لم دیوب اول حالتده الله تعالی انلره نوم القا ایدوب انده
 قالدیلر ایرتسی ملک اصحابیله اول شبانی تتبع ایدرک کهفه کیردکلرین
 بیلدیلر الله تعالی قلبلرینه رعب ایر کوروب هیچ بری اوزرلرینه
 وارمغه طاقت کتورمدی ارالزندن بری دیدیکه انلره ایریشلیدیکی تقدیرجه
 مرادکز قتل اولیجق اوزرلرینه کهفک آغزینی محکم برکدک تاکه انده آج
 و صوسنر هلاک اولسونلر اول رأی تحسین ایدوب افک کبی ایتدیلر بعده ازمان
 ودهور مرور ایدوب اول بلادده بندوسیسی نام بر رجل صالح ملک اولوب
 التمش سکز ییل ملو کتده باقی اولدی لکن زماننده ناس احزاب اولدیلر کیملی
 الله تعالینک وحدانیتنه وبعثک حقیقتنه تصدیق و کیملی ایسه انی تکذیب
 ایدرلردی ومع ذلک اهل باطل کوندن کونه زیاده اولوب اهل حق اوزره
 ظهورده ایدیلر حیات انجق حیات دنیادر بعث انجق ارواحه اولور اجساده
 بعث اولمز دیرلردی * بندوسیسی بو حالتدن زیاده مهموم اولدی کیچه وکوندز
 الله تعالی به یلواروب حقک ظهورین دیلردی اولیه اولسه الله تعالی اکا
 اجابت ایدوب اصحاب کهفک شاننی تبیین ایله قیامتک اتیان وبعثک
 حقیقتن اظهار ایلدی * شول وجهله کیم افسوس اهالیسندن اولیاس نام
 رجلک قلبنه القا ایتدیکه اول کهفک آغزنده کی بنیانی هدم ایدوب قیونلرینه
 کهفی حظیره ایده اولیه اولسه اجیرلر طوتوب حتی که انی هدم وکهفک
 آغزینی آچدیلر * واول حالتده الله تعالینک اذنیله اصحاب کهف دخی
 اویخودن اویانور کبی کویا کیچه یاتوب صباحن طورر کبی اوتوری کلدیلر
 وجوه والوانلرنده تغیر اولماغله اوزلرندن یکن زمانی نه بیلدیلر ونه توهم
 قیلدیلر بلکه کما کان دقیانوسدن حاللری نیه ایرمه سی خوفنه دوشدیلر *
 ویلیخایه دیدیلر که عادت اوزره تبدیل شکلله شهره کیده وکندیلر ایچون

طعام اشترا ایدوب ونه سویلنور ایدوکن تجسس ایده چون یملیخا شهرک
قیوسنه ایردی کورسه که قپوده اول شهر اهلنک مؤمنین اولمری
علامتی وار * تعجب ایدوب بر آخر قپویه واردی انده دخی انک مثلنی کوروب
متحیر اولدی * بونه حالتدرکه دونکی کونده مسلمان استخفاده ایکن
بو کونده ظهورده واستعلاده درلر دونکی کونده عیسی اسمی خوف
واخفا ایله سویلنورکن بو کونده ایسه انک اسمنه عین ایدیلور * و برینه
دیدیکه بو شهره نه دینور ایتدیکی افسوس اولیه اولسه یملیخانک حیرتی
زیاده اولدی کوکلندن دیدیکه ایمدی عقله خلل اربویدر بکا لایق اولان
بودرکه ناس بنی بیلدین و کیمسه دن بکاضرر ایرمدین حاجتم کوروب کیدم *
اندن طعام اشترا سیچون بردکانه واردی و کیمسه سندن بر درهم چیقاروب
طعامه ویردی اول انی کوریچک ضرب و نقشنه تعجب ایدوب یاننده بررجه
صوندی اول دخی بر آخره بو منوال اوزره اول درهم تعجبله الدن اله
کتدکدنصکره بری برلریله بوکسه دفینه بولشدن دیو کیرلو سویلشمکه
باشلیدیلر * یملیخا ایسه انلر کندویی بیلدیلر دقیانوسه ایلتمک مراد ایدرلر
ظن ایدوب خوفه دوشدی درهم سزک اولسون طعامکز کرکز قوک بنی حمله
کیده بن دیدی دیدیلرکه ای یکت سن نه حالوسن کنزی قنده بولدک بزه
خبرویرکه سکا مشارک اولوب سنی کیرنیهلم اولسه سنی ملکه ایلتورزانی اندن
کیرنیه امکانک اولز خبر ویررسن * یملیخا ایسه انلره نه جواب ویره جکن
بیلچک سوروب انی مدبرلره ایلتدیلرکه انلر جل صالح ایدیلر برینه اریوس
و برینه اسطیوس دینوردی یملیخا ایسه کندویی دقیانوسه ایلتورلر
ظنیه قورقوب آغلردی انلری کوریچک بر مقدار قورقوسی کیدوب
لکن حیرتندن نه سویله جکن بیلزدی چون اول مدبرلر درهمی کوردیلر
ضرب و نقشنه تعجب ایدوب دیدیلرکه ای یکت بولدیغک دفینه قنده در *
یملیخا ایتدی بن دفینه بولسامشن بلکه بو درهمی بابامک مالندن آلمشن
بوشهرک ضرب و نقشیدر لکن بکا نه حالت ایردیکن بیلزین * زیرا بن کندیمی
بوشهرک اهلندن ایدوکی تیقن ایدرین حالبوکه دوندنبرونه بنی یلور ونه بن
بیلدیکم کسه قالمش بولورین دونکی کونده بوشهرک ملکی دقیانوس ایدی
اول حکم ایدردی شمدی ایسه سزی حکم ایدر کوررین * دیدیلرکه دقیانوسک
موتندنبرو چوق زمان پکوبدر نیچه ملوک کلوب بعده دنیادن کیدوبدر

سن ایسه هنوز تازه بریکتسن برسوز سویله که مقالک حالکه موافق اوله *
یملیخا ایتدی بز برقاج یکتلر ایدک دقیانوسک ناسی اصنام عبادتنه اکر اهلندن
بنم زعمده دونکی کونده قاجوب شهرک طشره سنده کی یجلوس طاغنده
برکفه کیرمشدک که الان انلر انده درلر بنی کوندردیلر که انلره طعام آلیویرم
ودقیانوسک بزم امریمزده مرادی ندر بیلوب انلره ایر کورم بن ایسه بونده
کلچک بو حالتلره ایردم ماجرام بودرکه اشته سزه خبر ویردم اینانز سکر
کلوک سزکه اول کفه کیدهلم که انده اصحابی کوره سز بنم صدقه اطمئنان
وتیقن ایر کوره سز نم دیوب اول ایکی مدبر اهل مدینه ایله آتلو ییاق
اصحاب کفه توجه ایدوب یوله کیردیلر * یملیخا اوکارینه دوشوب حتی که
کفهک قربنه ایردیلر برو جانیده اصحاب کفه وقتا که یملیخانک زیاده
اکلندیکن کوردیلر دقیانوس جانبدن بیلنوب اله کیردی ظن ایتدیلر
اولیه اولسه بری برلرینه وداع ایدوب نمازه طور دیلر کندیلرک اخذینه
نه زمان کورلر دیوانتظارده اولدیلر اول حالتده یملیخا اوزرلرینه چیه کادی
انلر انی کوریچک سکا نه حالت ایردیکه بویله تأخر ایتدک دیدیلر اول دخی انلره
ماجرای حکایت ایدوب اریوس و اصحابی و افسوسک اهلیمی انلری زیارت
ایچون کفهک طشره سنده منتظرلر ایدوکنی روایت ایتدی اولیه اولسه
کندیلرده ظاهر اولان حق تعالینک آیت و قدرترین بیلدیلر بودکلو زمان
اویخوده اولدقلرندنصکره اویانملری بعثک حقیقته علامت و قیامتک قیامه
دلالت ایدوکن تیقن قیلدیلر بعده یملیخانک اثرنجه اریوس و اصحابی کفهک
قیوسنه ایردیلر اول اصحاب کفهک احوالی یازیلو ایکی لوحی صندوقدن
چیقاروب کوردیلر اوقیوب ماجرالرین بیلدیلر الله تعالی به حد ایدوب
بعثک حقیقته مطمئن اولدیلر آندن اصحاب کفهک قاتنه کیردیلر و بری برلریله
سویلشوب اصحاب کفه دقیانوسله کچن ماجرالرین بالمشافهه آنلره خبر
ویردیلر بعده اریوس ملکاری بند و سیسه برید ایله نامه کوندردی و اصحاب
کفه احوالن اکا بیلدیردی اول انی ابشیدیکک الله تعالی به حد و شکر ایدوب
زیاده سوندی فی الحال اتباع و اعوانیه آتلبوب اصحاب کفهک قاتنه
واردی انلر اوتورر و بندوسیس طوررکن انلرک هر برینی اعتناق ایتدی
بعده انلرا کاستیداع و دعا ایدوب اول انلرک اوکنده قائم ایکن انلر کیرو او یخویه
واروب قبض اولندیلر ملک امر ایلدیکه انلرک هر بری التوندن تابوت ایچنه

قوله * ملك كجه منامنده انلری کوروب اکا دیدیلرکه بزنه التوندن ونه
کومشدن خلق اولتمشز بلکه تر ابدن خلق اولنوب ینه تر ایه عودت ایدیسر بزنی
کهفده تر اب اوزره بولدینگ حالتده ترک ایدکل تاکه الله تعالی بزنی اندن بعث ایده
وانلرک قاتندن ناس طشره چیقدرلی حیندن الله تعالی رعبله انلره حجاب
ایتدی من بعد هیچ کسه نکل انلر اوزره دخوله قدرتی اولدی بعده ملک اول
کهفک قیوسنده بر مسجد یایدیروب اول عبادتگاه وناسه زیارتگاه اولدی
(اذأوی الفتیة الى الکهف فقالوا ربنا آتنا من لدنک رحمة) یا محمد انلره ذکر ایت
شول وقتی که اشراف رومدن شول شبانی که دقیانوس انلری شرکه تحویل
اراده ایتدکده انلر اندن ابا ایدوب کهفه کیردیلر وانی مأوی ایدندیلر
یار بنابزه سنک عندکدن رحمت ورزق واعدادن امن ویردیو یلواردیلر
(وهی لنا من امرنا رشدا) وبزم ایچون اوزرینه اولدیغمز مفارقت کفار
امرندن رشدی تیسیر ایت تاکه انک سیبیله راشدین مهدین اولهوز
ویا خود امریمز کلنی رشد ایت (فضربنا علی آذانهم فی الکهف سنین
عددا) اوله اولسه بز انلرک مسامعی اوزره بر حجاب وضع ایتدک که
اول انلری ایشتمکدن منع ایدر یعنی بز انلری اول کهفده سنین معدوده ده
بر نوم ثقیل ایلله انامه ایتدک که انلره اصواتدن هیچ بر صوت تأثیر ایتیه
(ثم بعثناهم لنعلم ای الحزبین احصى لما لبثوا امدا) بز انلری اول کهفده
انامه ایتدی کمزدنصکره ایقاز ایتدک که تعلق حالی ایلله اولان علمز
اولده کی علمزه مطابق تعلق استقبالی ایلله تعلق ایده اکا که ایکی مختلف
طائفه نکل قنغیسی انلرک کهفده مدت لبثنده غایت اوقات ایشلرینی اضبطدر
(نحن نقص علیک نبأهم بالحق) بز سکا اول اصحاب کهفک خبرین
صدقله حکایت ایدرز که (انهم فتية آمنوا بربهم) انلر شول شباندی که
ربلری جل شانیه ایمان کتوردیلر (وزدناهم هدی) بز انلرک ایمان
وبصیرت لرین آرتوردق (وربطنا علی قلوبهم) بز انلرک قلوبنی وطن
واهل ومال مفارقتی صبرینه وحقی اظهارده ودقیانوسی رده جرأته
قوی قیلدق (اذقاموا فقالوا ربنا رب السموات والارض ان ندعو من دونه
الها لقد قلنا اذا شططا) شول وقتن که دقیانوسک اوکنده طوروب
اول انلری صنم عبادتن ترکلری اوزره عتاب ایتدیکنده دیدیلرکه بزم ربزم
سموات وارضک ربیسیدر اندن غیری براله آتایا ایدر کلرز آتایا ایدر سهوز جور

(وکذب)

وکذب دیمش اولورز (هؤلاء قومنا اتخذوا من دونه آلهة) قومز
افسوس شهرینک اهلی الله تعالی دن غیری اصنامی آلهه اتخا ایدوب انلره
عبادت ایدرلر (لولا یأتون علیهم بسلطان بین) اول اصنامه عبادت لری
اوزره برهان ظاهر ایلله نیه کلزلر کسه لر دی * زیرا که دین برهانله اخذ
اولنور اشبو دلیلدر که دیاناتدن اول شیء که اکا دلیل اولیه اول مردوددر
وانده تقلید جائز دکلدر (فن اظلم ممن افتری علی الله کذبا) شول کسه دن
اظلم وارمیدر که الله تعالی یه شریک نسبتیله افتر ایده (واذا عتر لثمومهم
وما یعبدن الا الله) اول شبان بری بر لرینه دیدیلر که اگر قومز می و معبود لرینی
ترک ایدوب عبادتی انجق الله تعالی یه ایتسیدیکز زیرا که اول قوم عبادتی هم
الله تعالی یه وهم اصنامه ایدر لر دی اشبونده دلالت واردر که زمانک فساد
عندنده ناسدن عزلت وجبال وغیرانده سکون و وحدت مشروع اوله
(فأوا الى الکهف ینشر لکم ربکم من رحمة) ایددی کهفه التجا ایدک که ربکز
جل شانیه رحمتدن سزه دنیاده و آخرتده بسط وتوسیع ایده (وبھی لکم
من امرکم مرفقا) و امریکزدن سزه بسرور فقی عائد اولور شیئی تسهیل ایده
(وتری الشمس اذا طلعت تزاور عن کهفهم ذات الیمین) یا محمد اگر سن انلری
کورسیدک کونش طوغدیغنده انلرک کهفندن جهت یمینه میل ایدر تاکه
شعاعی انلر اوزره وقوعله انلره ایداء ایتیه * زیرا که کهف جنوبی ایدی
(واذا غربت تقرضهم ذات الشمال) و کونش باتدیغنده انلری ترک ایدوب
جهت شماله عدول ایدر (وهم فی فجوة منه) انلر اول کهفندن مکان
متسعده یعنی انک وسطنده درلر بر حیثیله کیم انلره روح هوا ایرر وانکله
کربت غار انلردن کیدر (ذلک من آیات الله) اشبو ذکر اولنان انلرک شان
وحدیثی الله تعالی نکل عجائب صنع ودلائل قدرتندندر که انکله اعتبار
اولنور (من یهد الله فهو المهتد) اول کسه که الله تعالی اکا توفیقله
هدایت ایده اول مهتدیر که فلاحه ایردی * اشبونکله مراد انلره شادر
ویا تبیهدر که بو آیات امثالی کثیره در لکن انکله انتفاع اول کسه یه در که
الله تعالی انی تأمل واستبصاره توفیق ایده (ومن یضلل فلن تجدله ولیا
مرشدا) اول که الله تعالی انی مخذول ایده انکچون ولی مرشد
بولیمز سین (وتحسبهم ایقازا وهم رقود) سن انلری انفتاح عبون و کثرت
تقلبلر ایچون اویانق ظن ایدر سن حالبو که انلر اونور لر در (ونقلهم

ذات اليمين وذات الشمال) بز انلری يتاقلرنده صاغلرينه وصولرينه
دوندررز تاكه طول زمانله ارض بدنلرندن اكا ولى ايدن جانبي چوريتيه
(وكلهم باسط ذراعيه بالوصيد) حالبوكه انلرك كلبي بابده ويافئاء وياعبده ده
اويور اولديغى حالده ايكي ذراعن بسط ايدوبدر (لواطلعت عليهم) يا محمد
اكر سن انلرك اوزرينه واروب انلره نظر ايتسك (لوليت منهم فرارا)
انلردن خوف ايتديككدن كيرو دونوب قاچيدك (ولمئت منهم رعبا)
وانلردن رعبله صدرك طوليدى * زيراكه الله تعالى انلره هيبت لباسن
كيوربدر ويا اجراملرنده عظم ومكانلرنده وحشت اولوبدر * روايت
اولنديكه معاويه رضى الله تعالى عنه رومه غزا ايدوب اول كهفه
اوغراديغنده ديديكه اشبو اصحاب كهفه كيروب كورسيدك ابن عباس
رضى الله تعالى عنه انكاه بيله ايدى ديديكه اكا چاره يوقدر * زيراكه
الله تعالى سندن خيرلويي اندن منع ايدوبدر ديو اشبو آيتي ذكر ايلدى
معاويه ايسه انى دكلوب اتباعندن برقاج كسه لرى اكا كوندردى
كيردكلى كى بر ربح كلوب انلرى طشره چيقاردى (وكذلك بعثناهم
ليتساءلوا بينهم) بز انلرى كال قدرتمزه آيت اولسون ايچون اويوتديغمز كى
اوياردق كه برى برلرينه سؤالله حاللرينى والله تعالىنك انلره اولان صنعنى
بيله وانلرانك كال قدرته يقينلرينى آرتروب بعث امرينه مستبصر وانك
كنديلره اولان نعمتلرينه شاكر اولهلر (قال قائل منهم كم لبثتم قالوا لبتنا
يوما او بعض يوم) انلرك رئيسى مكسلىنا ديديكه نومكزده ندكلو زمان
لبث ايتديكز ديديلر كه بركون لبث ايتشمز * زيراكه انلر كهفه كونش
طوغاركن كيروب اويانلرى كونش باتركن ايدى بعده كونشدن بقيه كوريچك
ويا بركونك بعضنى لبث ايتشمز ديديلر اندن صاغلرينه وطرقتلرينه نظر
ايديجك بركوندن اكثر لبث ايتدكلرين بيلوب (قالوا ربكم اعلم بما لبثتم)
ندكلو زمان لبث ايتديكزده ربكز جل شاناه اعلمدر ديديلر وقتاكه اول امر
ملتبس اولوب انك علمنه چاره لرى اولمديغن بيلديلر مهملرى اولان امره اقبال
ايدوب ديديلر كه (فابعثوا احداكم بورككم هذه الى المدينة) ايمدى بريكزى
اشبو نفقه مز ايچون اعداد اولنان درهمله شهره كوندرك كه انك اسمى
الآن طرسوسدر زمان جاهليتده افسوس ايدى (فليظروا بها ازكى طعاما)
نظر ايتسونكه اول شهر اهلندن قنغيسنك طعامى احل واطيب واكثر وارخصدر

(فليأتكم)

(فليأتكم برزق منه وليتلطف) واندن بر رزقله كلسون ومعامله ده لطفى
تكلف ايتسون تاكه الدائميه وياخود ذهاب واياينده تخفيفده تكلف ايتسون
تاكه بيلتميه (ولايشعروا بكم احدا) وسزك بيلتمكزه مؤدى اولور شى
ايشلمسون (انهم ان يظهروا عليكم يرجوكم اويعيدوكم فى ملتهم وان تغفلوا
اذا ابدا) اكر انلر سزه مطلع اولور وياظفر بولور لرسه سزى طاشله اولدر لر
وياخود كرها كندى دينلرينه دوندر لر والحال اكر انلرك ديننه كيورسكز
ابدا فلاح بولمز سز (وكذلك اعثرنا عليهم) تنكيم بز اول اصحاب كهفى
اويوروب وواياردق ناسى انلرك حالنه مطلع قيلدق (ليعلموا ان وعد الله حق)
تاكه انلرك حالنه مطلع اولان ناس الله تعالىنك بعثله وعدى حق ايدوكنى
بيله * زيرا انلرك نوم وانتباهى وفات ايدوب بعث اولنانك حالى كييدر
(وان الساعة لاريب فيها) وقيامتك امكاننده ريب يوق ايدوكنى دخي بيله *
زيرا انلرك نفوسنى توفى ايدوب اوچيوز ييل بدنلرين تحلل وتفتدن حفظه
قادر اولان رب تعالى قادر دركه جميع ناسك نفوسن توفى ايدوب بدنلرينى
اعاده ايتد كد نصكره نفوسلرين كيرو اكا رد ايدى (اذ يتنازعون بينهم
امرهم) بز ناسى اصحاب كهفك حالنه مطلع قيلدق شول حينده كه انلر
دينلرى امرنده تنازع ايدر لر دى * بعضلرى ارواح مجرده بعث اولور
وبعضيلر ايسه ارواح وابدان معايعث اولور ديردى وياخود اصحاب كهف
امرنده تنازع ايدر لر دى شول حينده كه الله تعالى آنلرى ثانيا موتله اماته ايتدى
بعضلرى ديديكه انلر اولديلر وآخرون ديديلر كه اول مرده اويودقلى كى
اويوديلر * برطائفه ديديلر كه انلر اوزره بنيان ايدى كه انده ناس ساكن
اولهلر وانى قريه ايدينه لر * وآخرون ديديلر كه انلر اوزره مسجد بنا
ايدى كه انده نماز قيلنه * تنكيم حق تعالى انى ذكر ايلديكه (فقالوا ابنوا
عليهم بنيانا) انلردن بر طائفه ديديلر كه انلر اوزره بنيان ايدى كه تربى لرى
انلره ناس تطرقندن محفوظ اوله وناسه مسكن اوله الله تعالى انلرك امرينه
خوض ايدنلرى رد ايدوب ديديكه (ربهم اعلم بهم) ربلى جل شاناه
انلرك حالنه اعلمدر (قال الذين غلبوا على امرهم لنتخذن عليهم مسجدا)
انلرك حالنه مطلع اولنلر كه بند وسيس واصحابيدر ديديلر كه كهفك قپوسنده
مسجد بنا ايدى كه انده مسلمون تبركا نماز قيلهلر روايت اولنديكه اهل
نجران نصاراسندن سيد وعاقب وايكيسنك اصحابى پيغمبر يز عليه السلام

فأنته ایدیلر اصحاب کهف ذکر اولوب (سیقولون ثلاثة رابعهم کلبهم) سید و اصحابی که انلر یعقوبی ایدیلر دیدیلر که اصحاب کهف اوج رجل ایدیلر درنجیلری کابلری ایدی (ویقولون خمسة سادسهم کلبهم) وعاقب و اصحابی که نسطوری ایدیلر دیدیلر که اصحاب کهف بش رجل ایدیلر النجیلری کابلری ایدی (رجا بالغیب) انی دیملری حدس وظنله ایدی یوخرسه یقینله دکل (ویقولون سبعة و ثامنهم کلبهم) مسلون پیغمبریمز علیه السلامدن و اول جبریل علیه السلامدن اخباریله دیدیلر که انلر یدی رجل ایدیلر سکرنجیلری کابلری ایدی (قل ربی اعلم بعدتہم ما یعلمہم الا قلیل) یا محمد دیکل که انلرک عددینه ربم جل شانہ اعلمدر ناسدن انلری آزکمه بلور * علی رضی الله عنه ایدر انلر یدی رجل ایدی سکرنجیلری کابلری ایدی انلرک اسملری یملیخا و مکسلینا و مشلینا که ملکک اصحاب یمینی ایدیلر و مرنوش و دبرنوش و ساذنوش که ملکک اصحاب یساری ایدیلر که انلرک استشاره ایدردی و سابعلری راعی ایدیکه انلره موافقت ایدی اسمی کشف ططیوش ایدی و کابلرینک اسمی قطیر ایدی * دینلدیکه اقوال ثلاثه نک جبعی اهل کتا بکدر و قلیل دخی انلر دندر (فلا تمار فیهم الامراء ظاهرا) ایدی اصحاب کهف شانده جدال ایتکل مکر که جدال ظاهر ایده سن اکا تعمقسن شول وجهله کیم انلره قرآنده ذکر اولنانی بیان ایده سن یوخرسه انلری تجهیل وردنسن (ولا تستفت فیهم منهم احدا) ودخی اصحاب کهفک قصه سندن انلردن بر کسه یه مسترشد سؤلان ایتکل * زیرا سکا وحی اولنان سنی غیریدن مغنیدر مع هذا انلرک اکا علمی یو قدر ودخی متعنت سؤلان ایتکل که انکله سؤل ایتدیکک کسه بی تفضیح و عندنده اولان شیئی تزیف اولور حالبوکه اول مکارم اخلاقه خلل ویرر (ولا تقولن لشیء انی فاعل ذلک غدا الا ان یشاء الله) و بر شیئی ایرته ایشلکه عزیمت ایتسک بن انی ایرته ایشلرین دیمکل مکر که انی مشیة الله تعلیق ایده سن تکیم سبب نزولی سورة اسراده (و یسئلونک عن الروح) آیتنده سبقت ایدی (واذکر ربک اذا نسیت) ربک جل شانہ نک مشیتن ذکر ایدوب ان شاء الله دیکل چانکه آنی اونوتسک * ابن عباس ایدر اگرچه بر یلدنصکره ایدسده مادامکه حانت اولیه سن * پس بو اجلدن ابن عباس استثناء منطعی

(تجويز)

تجويز ایدی لکن عامه فقهاء انک خلافه ملابسدر * زیرا اکر استثناء منقطع صحیح اولورسه اقرار و طلاق و عتاقدن هیچ بری مقرر اولزدی و صدق کذبدن بیلمزدی و یاخود ربکی و عقابنی ذکر ایت چان انک امر ایتدیکی اشیادن برشی ترک ایده سن و یاخود نمازک برین اونودوب ترک ایتسک ذکر ایتدکده قضاء ایتکل (وقل عسی ان یهدین ربی لا قرب من هذا رشدا) و دیکل که قریب اولدیکه ربم جل شانہ اکا اقرب وارشد طریق اوزره بنی تثبیت ایده * دینلدیکه الله تعالی اکا امر ایتدیکه برشیئی اونوتدیغنده انی ذکر ایدوب اندن دیلکه اول اونوتدیغی شیئی تذکرندن خیرلو شیئی انی هدایت ایده * دینلدیکه وقتاکیم قوم مشرکون عناد وجهی اوزره اندن اصحاب کهف قصه سین سؤل ایتدیلر الله تعالی اکا امر ایتدیکه انلره خبر ویره انی کیم الله تعالی اکا ویرسدرر حججندن انیکه صحت نبوته اصحاب کهف قصه سندن انلره ادلدر * اولیه اولسه انی هدایت ایدی اندن اعظم اشیایه کیم شول زمانلری اندن متباعد انیسانک قصصین و غیوب اخبارین و اعصار مستقبلهده قیام ساعته دکن نزول ایده جک امور عظام ظهورین انلره بیان ایدی (ولبتوا فی کهفهم ثلاثمائة سنین وازدادوا تسعا) اصحاب کهف کهفلرنده احیاء نیام اولدقلری حالده اوچوز ییل لبث ایدی لکن اهل کتاب طقوز ییل زیاده ایتدیلر * علی رضی الله عنه ایدر اهل کتاب عندنده اصحاب کهف کهفده سنه شمسیه ایله اوچوز طقوز ییل لبث ایتدیلر * اما که حق تعالی انلرک مدت لبثی سنه قریه ایله اوچوز طقوز ییلدر دیو ذکر ایدی * ایدی سنه شمسیه ایله سنه قریه بننده تفاوت هر یوز سنهده اوچ سنهدر * اولیه اولسه شمسیه نک اوچوز ییلی قریه دن اوچوز طقوز ییل اولور * دینلدیکه سنه شمسیه اوچوز التمش بش کوندرو سنه قریه اوچوز الی درت کون ایله بر کونک ثلثیدر (قل الله اعلم بما لبثوا) دیکل که انلرک مدت لبثه الله تعالی اعلمدر (له غیب السموات والارض) سموات وارضده غائب اولان واهالیسنه خفی اولان اشیانک علمی اول الله تعالی یه مختصدر (ابصر به و اسمع) الله تعالی هر موجودی عجب کورر و هر مسموعی عجب ایشیدر وانک سمع و بصرندن برشی غائب اولمز اول کرکسه لطیف ویا کشفدر صغیر ویا کبیردر خفی ویا جلیدر

(مالهم من دونه من ولی) سموات وارض اهلك اول الله تعاليدن غيری
امررينه تولى ايدر ناصرلى يوقدر (ولايشرك في حكمه احدا) واول
قضاسنده انلردن هيچ كيمسه يي اشراك ويا انلر ايچون انده مدخل ايتدى
* ديلديكه حكمدن مراد علم غيبدر (واتل ماوحى اليك من كتاب ربك)
يا محمد ربك سكا وحى ايتديكى قرآنن تلاوت ايدوب ايچنده اولانه اتباع
ايت (لامبدل لكلماته) قرآنى تغير ايدر ويا انك اهل معاصى يه كلماتيله ايتديكى
وعيدلى تغير ايدر يوقدر (ولن تجد من دونه ملتحدا) اكر سن اول
قرآنه اتباع ايتزسك اندن غيرى ملتحا بولمىزسن كه اكا عدول ايدمسن
(واصبر نفسك مع الذين يدعون ربهم بالغداة والعشي يريدون وجهه)
يا محمد نفسكى حبس و تثبیت ايت شول قومله كيم مجامع اوقاتلرنده ويا نهارك
ايكى طرفنده ربلى جل شانته دعا ايدرلر ويا صلوات خمسى ويا صلاة
فجرله صلاة عصرى ادا ايدرلر وانك الله تعالينك رضا و طاعتن اراده
ايدرلر (ولا تعد عينك عنهم) وانلرك رثايت حالريچون نظركى انلردن
غيرى يه صرف ايتكل (تريد زينة الحياة الدنيا) كه انكله اغنيا
واشراف مجالستن واهل دنيا صحتن اراده ايدمسن (ولا تطع من اغفلنا
قلبه عن ذكرنا واتبع هواه) واطاعت ايتكل شول كيمسه يه كيم بز انك
قلبنى ذكرمزدن اغفال ايدوب طلب شهواتله هواسنه اتباع ايتدى
(وكان امره فرطا) وانك امرى حق اوزره تقدم وحق وراء ظهريه
نبد اولدى * اشبونده تنبيه واردركه انى اول استدعا يه داعى اولان
قلبنك معقولادن غفلتى ومحسوساته انهما كيدر حتى اكا شرف تحليه
نفسله اولوب زينت جسده دكل ايدوكى خفى اولدى واکا اطاعت ايدن
غباوتده انك مثلى اولدى * اشبو آيتك سبب نزولنده ديلديكه عينه بن
حصن الفزارى اسلامندن اول پيغمبريمز عليه السلامه كلى حالبو كه
قاتنده فقرادن بر جاعت وار ايدى ديديكه يا محمد بونلرك رايحه كريهه لرى
سكا ايندا ايتزمى زايسه مضرك سادات و اشرافيز بز اسلامه كلسهوز بزمله
يله ناس كثير اسلامه كلور بزى سكا اتباعدن منع ايتز الابونلرك صحبتيدر
بونلرى قاتكدن طرد ايت اولمىزسه بارى بر مجلس انلر ايچون و بر مجلس
بزم ايچون تعيين ايتكه سكا اتباع ايدموز * بو آيت نازل اوليحق پيغمبريمز
عليه السلام الله تعالى يه حد اولسونكه امتده بن انلركه صبر ايتكه امر

(اولنديغم)

اولنديغم كسه لريلوبدر ديدى (وقل الحق من ربكم فمن شاء فليؤمن ومن شاء
فليكفر) يا محمد انلره ديكلكه حق اولدركه الله تعالى جهنندن اوله يوخسه
هوى اقتضاسيله اولان دكل توفيق وخذلان وهدى وضلالت انك
يئنده در بنم يئنده اندن برشى يوقدر استيان مؤمن اولسون واستيان
كافر اولسون بن سرك هواكزه اتباعله انلرى قاتمدن طرد ايتم ايمان
وكفردن ديلديككزى اختيار ايدك (انا اعتدنا للظالمين نارا احاط بهم
سرادقها) بز كافر ايچون نار تهيه ايتشركه انك فسطاطى انلرى احاطه
ايدوبدر * ديلديكه اول سرادقله مراد شول حجره دركه فسطاط
حولنده اولور وياخود نارك دخايدر وياخود ناردن حاطدر پيغمبريمز
عليه السلام ايدر نارك سرادقى درت ديواردركه هر برينك قاليلغى
قرق يلاق مسافدر (وان يستغيثوا يغاثوا بماء كالمهل) چان انلر شدت
عطشدن اشتغائه ايدلر اغاثه اولنلر برماء غليظ ايله كيم اول زيتك
درديسنه بكمزه (يشوى الوجوه) اول شرب ايچون تقديم اولنديغمده
فرط حرارتندن يوزلرين كوينديره (بئس الشراب) اول نه چركين
شراب اولور (وساء مرتقا) و ناره چركين منزل و مجتمع اولور
(ان الذين آمنوا وعملوا الصالحات انا لانضيع اجر من احسن عملا) شونلركه
قرآن ومحمد ايمان كتوروب اعمال صالحه ايشلدلر انلردن عملى احسن
اولانك اجرينى ضايع ايتز بلكه جزاين ايدر (اولئك لهم جنات
عدن) ايدى انلر ايچون اقامت اولنه جق جنتلر وارد (تجرى من تحتهم
الانهار) كه انلرك تخندن صو وسود وسجى وبال ايرمقلى جارى اولور
(يحملون فيها من اساور) جنتده انلر سوارلردن تحليه اولنورلر (من ذهب)
التوندن وكومشدين واولؤ و يواقيتدن (ويلبسون ثيابا خضرا
من سندس واستبرق) ويشل ثوبلر كيرلر كه اول الوانك احسنى و طراوتده
اكثريدر * ديباجك رقيقتدن و غليظندن ايكى نوع بلى جمع اولندى
تااول دلالت ايدم كيم انده انفسك اشتها واعينك التذاذ ايتديكى حاصل
اولور (متكئين فيها على الارائك) انلر انده متنعين هيئنده جالده كه
عروس ايچون تزيين اولنور پيوتدر انده سريرلر اوزره اتكاء ايدر
اولدقلى حالده (نعم الثواب) جنت ونعيمى نه كوچك ثواب اولور
(وحسنت مرتقا) وسريرلر وجنتلر نه كوچك مجلس

لث (۲)

و مقر اولور (واضرب لهم مثلاً رجلین) کافر لره و مؤمن لر ایکی مقدر و یاموجود
رجلک حالنی ضرب مثل ایت * دیندیکه اول ایکی رجل بنو اسرائیلدن
ایکی قرنداشلر ایدیلر بری کافر اسمی قرطوس ایدی و بری مؤمن اسمی یهوذا
ایدی بابلاردن سکز بیک دینار میراث قالوب دردر بیک دینار اولشدیلر
کافر انکله ضیاع و عقار آلدی و مؤمن ایسه انی وجوه خیره صرف
ایتدی بعده ایکیسنک آخر امر لری الله تعالینک حکایت ایتدیکی حالته
ایردی * دیندیکه اول ضرب مثل قیلنان ایکی رجل بنو مخزومدن ایکی
قرنداشلر ایدی بری اسود بن عبدالاسد کافر ایدی و بری ابوسلمه عبد الله
بن عبدالاسد مؤمن ایدی پیغمبریمز علیه السلامدن اول ام سلمه رضی الله
عنهای تزوج ایتشدی (جعلنا لاهدهما جنتین من اعناب) اول ایکیسنک
بری ایچون اعنابدن ایکی بستان قیلدق (وحففناهما بنخل) و اول
ایکی بستانی خرما آغا جلریله احاطه ایتدک (وجعلنا بینهما زرعاً)
و اول ایکی بستان ارایسنده اکیلر ایتدک تا که اول ایکی بستاندن هربری
شکل حسن اوزره متواصل العماره اولوب اقوات و فواکهی جامع
اوله (کلنا الجنة آتت اکلها ولم تظلم منه شیئاً) اول ایکی بستانک هربری
ثمری کمال اوزره و یروب سائر بساتینده معهود اولان مقداردن نقص
ایتدی (و فجرنا خلاهما نهراً) و اول ایکی بستانک اورتاسندن نهر
آقتدق تا که شربی دائم اوله که اول اصلدر و انک بهائن آرتورر
(و کان له ثمر) و اول ایکی بستاندن غیری انک مالدن انواعی وار ایدی (فقال
لصاحبه وهو یحاوره انا اکثر منك مالا و اعز نفراً) و اول ایکی بستانک
صاحبی کافر کلامده مراجعت ایدر اولدیغی حالده صاحبی مؤمنه دیدیکه
مالده بن سندن اکثر و حشم و اعوانده و یا اولاد ذکورده اعزین (ودخل
جنته) و بستانه اول صاحبی مؤمنه کیردی (وهو ظالم لنفسه) حالبو که
عجب و کفریله نفسنه ظلم ایدیجی ایدی انی انده کز دیرردی و فخر و عجب
ایله انی اکا کوستردی (قال ما ظن ان تبید هذه ابداً) و دیردیکه ظن
ایتمزین که اشبو بستان ابدانی اوله زیرا که امل طویل و غفلت و اغتراری
متملای ایدی (وما ظن الساعة قائمة) و ظن ایتمزین که قیامت اوله (ولئن
رددت الی ربی لاجدن خیراً منها منقلباً) اگر سنک زعمک مقتضاسنجه بعثله
رب تعالی یه رجوع ایدر سم اشبو بستاندن خیر لو بستانی بکا انده و برر زیرا که

(بکا)

بکا دنیاده انی و یرمسی اکا اهلیت و استحقاتم ایچون ایدی اولیه اولسه
آخرته بکا اندن افضلن و برر (قال له صاحبه وهو یحاوره أکفرت
بالذی خلقک من تراب ثم من نطفة ثم سواک رجلاً) مؤمن اول کافر
صاحبنه کلامده مراجعت ایدر اولدیغی حالده دیدیکه کافر می اولدک
اول الله تعالی یه که اصلک ماده سنی ترابدن بعده ماده قریبه کی نطفه
خلق ایتدی بعده سنی انسان ذکر قیلوب رجال حدینه ایر کوردی * انک بعثه
کفرینی کفر بالله قیلدی زیرا انک منشئ الله تعالینک کمال قدرتنده شکدر
اول اجلدن انکاری انی ترابدن خلق ایتدی اوزره ترتیب ایتدی زیرا
انک بدأ خلقنه قادر اولان رب تعالی انی اعاده یه دخی قادر اولور
(لکننا هو الله ربی ولا اشرك بری احداً) سن اول الله تعالی یه کافر ایسک
بن اکا مؤمن موحدین بن سنک دیدیککی دیمزین بلکه دیرین که اول الله تعالی
بنم ربمدر اکا هیچ فردی اشراک ایتمزین (ولولا اذ دخلت جنتک قلت
ما شاء الله لا قوة الا بالله) اول بستانکه دخولک عندنده دیسیدک که
امر الله تعالینک دیلدیکیدر و یا انک دیلدیککی اولیسردر دیرسه
اول بستانکی ابقا و یا افنا ایدر و دخی نفسک اوزره عجزینه و الله تعالینک
قدرتنه اعتراف ایتسیدک * زیرا که بستانک عمارت و تدبیری امرندن
سکا آسان اولان انک معونه و اقداریله در * پیغمبریمز علیه السلام ایدر
برکسه که برشی کوروب بکندیکنده ماشاء الله لا قوة الا بالله دیسه انده
مکروه کورمیه (ان ترن انا اقل منك مالا و ولداً) اگر بنی مال و ولد
جهتندن کندکدن اقل کوروب اوزریمه تکبر و تعظم ایدرسک (فعسی ربی
ان یؤتین خیراً من جنتک) رجا ایدرین که ربم جل شانہ ایمانم اچلیچون آخرته
بکا سنک بستانکدن خیر لوسن و یره (و یرسل علیها حساباناً من السماء
فتصبح صعبداً زللاً) و سنک بستانک اوزره سمان عذاب و یانار و یابرشی
مهلت ایر کورب ارض ملساء قیله که انده اقدام متزلق اولور (او یصبح
ماؤها غوراً) و یا خود بستانکک صوینی یره باتوره (فلن تستطیع له طلباً)
بعده انی رد ایچون ترده قادر اولیه سن (واحیط بثمره) اول مؤمنک
توقع و اندازی حسبنجه عذابه اول کافرک بستانی اهلاک اولندی شول
وجهله کیم سمان بر آتش اینوب یاقدی و صوینی یره باتدی (فاصبح
یقلب کفیه علی ما انفق فیها) اولیه اولسه اول کافر بستانک اول حالده

کور یحک انک عمارتہ انفاق ایتدیکی ماله تلهف وتحسر له ایکی الن بری برینه اورمغه باشلادی (وهی حاویة علی عروشها) حالبوکه بستانک کرومی دعاهلری اوزره دوشوبدر دعاهلرک یره دوشمئندنصرکه (ویقول یالبتی لم اشرك ربی احدا) ویدیکه تولیدی بن ربمه هیچ احدی اشراک ایتیمدم کانه اول مؤمنک موعظه سین تذکر ایدوب اول مصیتک اکا ایرمسی شرکی قبلندن ایدوکنی بیلدی اوله اولسه تمنی ایتدیکه تولیدی شرک ایتیمدیکه بستانانی هلاک اولمیدی و احتمالدرکه اول شرکدن توبه وسبقت ایدن فعل سیئنه ندامت اوله (ولم تکن له فئة یصرونه من دون الله) وانکچون الله تعالینک عذابندن قورتارر ویا اندن غیری اکا نصرته قادر اولور احد اولدی کفر ایله خذلانه استحقاقی ایچون اول اکا نصرت ایتز (وماکان منتصرا) وکندی دخی قوتیله الله تعالینک انتقامندن امتناع ایدر اولدی (هنالك الولاية لله الحق) اشبو مقام وحالنده ولایت ونصرت یالکز الله تعالی به مختصدرکه اول حقدر (هو خیر ثوابا وخیر عقبا) اول الله تعالی اهل طاعته جزا ایتیمکه افضلدر واکا طاعتک عاقبتی غیره طاعتک عاقبتندن خیر لودر (واضرب لهم مثل الحیة الدنيا) یا محمد سن قومکه حیاة دنیانک زهره سنده وسرعت زوالنده ویا صفت غریبه سنده مثلن ذکر ایتکه اول (کاء انزلناه من السماء فاختلط به نبات الارض) شول مطر مثلیدرکه بز آنی سمدن ایندیروب انک سبیلله نبات ارض التفاف وتکاثفندنصرکه بعضی بعضنه محالط اولدی (فاصبح هشیا تذروه الیاح) بعده قوریوب اجزاسی متفرق اولغله ریاح انی صاورر اولدی (وکان الله علی کل شیء مقتدرا) الله تعالی انشا وافنادن هر شیئه قادر اولدی (المال والبنون زینة الحیة الدنيا) مال وبنون حیاة دنیانک زینتیدر انسان دنیاسنده اول ایکسبیلله تزیین ایدر لکن هیچ بری کندویه قالز کیدر (والباقيات الصالحات) واعمال صالحه که انک ثمره سی ابد الابد قالور اول کرکسه صلوات خس واعمال حج وصوم رمضان وسبحان الله والحمد لله ولا اله الا الله والله اکبر وکلام طیبدر (خیر عند ربک ثوابا وخیر املا) ربک جل شانہ عندنده اول مال وبنوندن ثوابی خیر لودر ومأمولنک خیر لوسبیدرکه صاحبی انک سبیلله دنیاده کی مأمولنه آخرنده نائل اولور (ویوم نسیر الجبال) ذکر ایت شول کونی که بزنده جبالی

(مکانلندن)

مکانلندن قلع ایدوب جووده یوریدرز بعده کیدروب هباء منشور قیلورز (وتری الارض بارزة) وارضی بارزه کوررسنکه اوزرندن شجر و جبال و بناء کیدوبدر (وحشرناهم) و بز انلری موقفه جمع ایده رز (فلم تغادر منهم احدا) انلرک هیچ برینی تحت ارضده ترک ایترز (وعرضوا علی ربک صفا) انلرب تعالی به صف اولدقلری حالده عرض اولنورلر هیچ بری برلینه حجاب اولزلر تا که شانلرنده امر الهی نه ایسه اجرا اولنه اول وقتده انلره دینور (لقد جئتمونا کما خلقناکم اول مرة) سز عراة وفرا دی وغرل اولدیغکز حالده بزه کلدیکز تکیم اول مرة ده بز سزی اول هیئتده خلق ایتشدک (بل زعمتم ان لن نجعل لکم موعدا) سز ظن ایتزدیکرکه بز بعثله وعدمزی تصدیق ایدهوز * بلکه زعم ایدردیکرکه اول وعدمز انجامزینه سز کچون وقت قلیهوز (عن ابی هريرة رضى الله عنه قال قال النبی علیه السلام یحشر الناس علی ثلاث طرائق راغبین وراهبین اثنان علی بعیر وثلاثة علی بعیر واربعة علی بعیر وعشرة علی بعیر وتحشر بقیتهم النار تقبل معهم حیث قالوا وتبیت معهم حیث باتوا وتصبح معهم حیث اصبحوا وتمسی معهم حیث امسوا) ابو هريرة رضى الله عنه ایدر پیغمبر یمز علیه الصلاة والسلام دیدیکه یوم قیامتده ناس اویچ حالت اوزره حشر ایدیلور برطائفه سی کرامته راغبیلدر و برطائفه سی اهیانت اولنلری خوفیله راهیلدر بر دویه ایکی کشی و اویچ ودرت حتی اون کشی بنمش اولدقلری حالده محشره کیده لر وانلرک بقیه سنی نار حشر ایده قیلوله و بیتوته لرنده بیله اوله انلرکه صباحلیه وانلرکه اخشاملیه (قال ابن عباس رضى الله عنه قال النبی صلی الله علیه وسلم انکم محشورون حفاتا عراتا غرلا) ابن عباس رضى الله عنه ایدر پیغمبر یمز علیه الصلاة والسلام دیدیکه یوم قیامتده سزیالن ایاق بدن چیلاق ختانسز اولدیغکز حالده حشر اولنور سز (ووضع الکتاب) صحایف اعمال ناسک ایمان وشمائلنه ویا میرانه وضع اولنور ویا خود اول بین یدی الله وضع ایدیلور (فترى المجرمین مشفقین مما فیهم) جرم ایدنلری کورر سنکه انده کی اعمال سیئه دن خائفدر (ویقولون یاویلتنما مال هذا الکتاب لا یغادر صغيرة ولا کبيرة الا احصاها) و دیه لرکه و یل وهلکه بزه کیم بو کتاب اعماله تولدیکه

صغیره و کبیره کنه اهلر یزدن هیچ برین ترک ایتمیوب جمعنی عدو اثبات ایتمش *
 دینلدیکه صغیره تبسم و کبیره قهقهه کبی و صغیره مس و قبله و کبیره زنا کبی
 (و وجدوا ما عملوا حاضرا) و خیر و شردن ایشلدن کبرین آنده حاضر
 بوله (ولا یظلم ربك احدا) ربك جل شانہ هیچ کسه به ظلم ایتمز یا عملنک
 ثوابنی نقصله و یا عقابن زیاده ایله (واذقنا للملائكة اسجدوا لآدم فسجدوا
 الا ابلیس) ذکر ایت شول وقتیکه بز ملائکه به آدمه سجده ایدک دیو امر
 ایتدک جله سی اکا سجده ایتدیلر الا ابلیس سجده ایتدی (کان من الجن
 ففسق عن امر ربه) زیرا که اول جندن ایدی یوخسه ملائکه دن دکل
 سجودی ترکه رب تعالینک امرندن خروج ایتدی اشبو دلیلدر که ملک
 البیه عصیان ایتمیه و ابلیسک عصیان ایلنده جنی اولدیغیچون اوله
 (أفخذونه وذریته اولیاء من دونی وهم لکم عدو) یا بنی آدم سز اول
 ابلیسی و ذریتنی بنیدن غیری اولیای ایدینور سز حالبو که انلر سزه
 اعدادر (بئس للظالمین بدلا) ابلیس و ذریتنی ظالملر ایچون الله تعالی دن
 نه چرکین بدل اولور که انلر انی استبدال ایدرلر (ما اشهدتهم خلق
 السموات والارض والخلق انفسهم) بز ابلیس و ذریتن سموات و ارض
 خلقنه و یا کندیلرک خلقنه احضار ایتدک تا که انلر که خلقه اعتضاد
 ایده وز (وما کنت متخذ المضلین عضدا) خلقی دیندن اضلال ایدنلری
 اعوان اتخاذا ایدر اولدم (ویوم یقول نادوا شرکائی الذین زعمتم
 یوم قیامتده الله تعالی مشرکینه دیه که ندا ایدک شول شرکائمه کیم انلری
 بکا شرکاء و یا شفعاء زعم ایدر دیکز تا که سزی بنم عذابدن منع ایده لر
 (فدعوههم فلم یتجیبوا لهم) اویله اولسه انلر اول شرکارلرینه ندا ایده لر که
 کندیلره اغاثه ایده لر شرکاء ایسه انلره نه اجابته ونه شفاعته قادر اوله لر
 (وجعلنا بینهم موبقا) اول مشرکینه شرکارلری بیننه مهلك قیلرز که
 اول نارددر انده اشتراک ایدرلر (ورأی المجرمون النار فظنوا انهم
 مواقعوها ولم یجدوا عنها مصرفا) وقتا که مشرکون ناره سوق اولنوب
 ناری کوره لر ایقان ایده لر که انلر اکا واقع اولورلر و اندن انصراف ایده جک
 مکان بولزلر (ولقد صرفنا فی هذا القرآن للناس من کل مثل) اشبو
 قرآنده بز ناس ایچون هراحتیاج اولدقلری شیء جنسندن مثل بیان ایتدک
 تا که تذکر و اتعاظ ایده لر (وکان الانسان اکثر شیء جدلا) انسان باطلده

(خصوصته)

خصوصته اکثر شیء اولدی * دینلدیکه آنکله مراد کفاردر لکن اصح
 اولان نوع انسانه عام اولمقددر (وما منع الناس ان يؤمنوا اذ جاءهم
 الهدی و یستغفروا ربهم) ناسه رسول داعی و قرآن منیر کلدیکند نصکره
 انلری ایماندن ورب تعالی به استغفارندن منع ایتدی (الا ان تأتیهم سنة
 الاولین او یأتیهم العذاب قبلا) الا انتظارلریکه ائم سابقه به اهلا کونده کی
 سنتمز ایریشه و یا انلره عذابمز آشکاره و یا آکسزین ایریشه (وما نرسل
 المرسلین الا مبشرین و منذرین) بز ناسه رسوللر ارسال دکل الا انکچوندر که
 مؤمنلره جننله تبشیر و کافرلری نارله تخویف ایده لر (و یجادل الذین
 کفروا بالباطل لیدحضوا به الحق) کافرلر معجزات ظهورند نصکره اقتراح
 آیات ایله جدال ایدرلر که آنکله حق ازاله ایده لر * مثلاً رسوللره سزدخی
 بزم کبی بشر سزوا کر الله تعالی دیلسه ملائکه انزال ایدردی دیملری
 کبی (واتخذوا آیاتی وما انذروا هزوا) اول کافرلر قرآنی و تخویف
 اولندقلری شیئی هزو ایدینورلر (ومن اظلم ممن ذکر بآیات ربه فاعرض
 عنها ونسی ما قدمت یداه) ظلمده اشدنه کسه در اندنکه رب تعالینک
 آیتلری قرآنله و عظم و تذکیر اولنوب اول ایسه انی تدبر و آنکله تذکر ایتمیه
 و تقدیم ایتدیکی کفر و معاصینک ماقبتن اونوده مسی و محسن لابد جزاء
 اولنور ایدو کن تفکر ایتمیه (انا جعلنا علی قلوبهم اکنه ان یفقهوه و فی
 آذانهم وقرا) بز انلرک قلوبی اوزره اغطیه قیلدق تا که انی فهم ایتدیلر
 و آذانلرنده ثقل و صمم قیلدق که انی اشمیدیلر (وان تدعهم الی الهدی فلن
 یهتدوا اذا ابدا) یا محمد اگر سن انلری هدایتده دعوت ایدرسک آنلرنه
 تحقیق ونه تقلید ایله اهتدا ایدر دکلردر * اشبو شول اقوام شاننده در که
 آنلر علم الالهده ایمانه کلیسرلردر (وربك الغفور ذو الرحمة) ربك جل
 شانہ مغفرتده بلیغ و رحمتله موصوفدر (لویؤاخذهم بما کسبوا لعجل لهم
 العذاب) اگر الله تعالی آنلری کسب ایتدکلری ذنوبله مؤاخذده ایتسه
 آنلره امهال سز دنیاده عذابنی تعجیل ایدردی لکن تعجیل ایتدی
 (بل لهم موعد ان یجدوا من دونه مؤثلا) بلکه آنلر ایچون موعد
 و ادر که اول یوم بدرده و یا یوم قیامتده انک غیریدن ملجأ و منجی
 بولزلردر (وتلك القرى اهلکناهم لما ظلموا) اصحاب قری که قوم نوح
 و عاد و ثمود و قوم لوط و آنلرک اضرا ایدر * وقتا که کافر اولدیلر بز انلری

اهلاك ايتدك (وجعلنا لمهلكم موعدا) وانلرك هلاكيچون وقت معلوم قيلدقكه آندن تأخر ويا تقدم ايتزلر * ايمدى اهل مكه دخي انلردن عبرت آلوب عذابلى تأخيرينه اغترار ايتسونلر (واذقال موسى لفتاه) ذكر ايت شول وقتيكه موسى بن عمران عليه السلام فتاسى يوشع بن نون ابن افرائيم بن يوسف عليه السلامه ديدى كه اول اكا خدمت ايدر و اكا اويوب كيدردي (لا ارح حتى ابلغ مجمع البحرين او امضى حقبا) زائل اولمز كيدردين حتى ايكى بحرك جمع اولديغى محله ايريشم كه بحر فارسله بحر رومك مشرق جانبنده التقا ايتديكى محلدلر ويا خود زمان طويل سير وسفر ايدردين وحقبدن مراد دهر وياسكسان يلدلر * روايت اولنديكه موسى عليه السلام قبطك هلا كند نصكره مصره داخل اوليحق بنو اسرائيله خطيب اولديغى حالده وعظ بليغ ايدوب انى بكنديلر اكا ديلديكه هيچ كسه ييلورميسنكه اول سندن اعلم اوله ديديكه بيلزين * وحى الهى كلديكه عېدم خضر سندن اعلملر مجمع البحرينده در * وخضر عليه السلام فريدون زماننده فارس ملو كندن ايدى ذوالقرنين اكبرك مقدمه سنه امير ايدى موسى عليه السلام زمانته دكين قالدى * ديلديكه موسى عليه السلام رب تعالى به ديديكه يارب عبادك قنغيسى سكا احبدر ديدى اولكه بنى ذكر ايدر اونوتمزينه ديديكه يارب عبادك قنغيسى اقضادر ديدى اولكه حقله قضا ايدر هوا سنه اتباع ايتمزينه ديديكه يارب عبادك قنغيسى اعلملر ديدى اولكه ناسك علمى كندى علمنه ضم ايتك ديلر شول رجائله كيم بركله به اصابت ايده كه اول انى هدايه اير كوره ويا اندن ردائى ابر غوره يته ديديكه يارب اكر عباد كده بندن اعلم وار ايسه بكا انى دلالت ايت ديديكه عېدم خضر سندن اعلملر ديديكه يارب بن انى قنده بولورين ديديكه اول ساحلده صخره عندنده در ايمدى مكتلكه بر حوت اخذ ايت انى قنده يتور رسك بيلكه خضر آنده در * اوله اولسه موسى عليه السلام مكتلنه بر حوت قويوب فتاسنه ديديكه اشبو حوتى يتورديكده بكا خبر ويركل اندن ايكيسى يوله كيروب كتديلر (فلما بلغا مجمع بينهما نسيا حوتهما) وقتا كيم ايكيسى اول ايكى بحرك جمع اولديغى محله ايرديلر آنده بر صخره ديلنده اوتورديلر مكر آنده عين الحياه وار ايدى انك صويي ميه ايرسه ديريلوردى * ديلديكه فتى

(اول)

اول حوتى صخره اوزره قودى وموسى عليه السلام اول محله ياتوب اويودى وفتى ايسه اول عين حياتدن آبدست آلغه مشغول اولدى آبدست صويندن اول حوته ايريشچك حوت ديرلدى ومكتلندن چيقوب بحره آتلدى بعده طوروب ايكيسى اول ارادن كتديلر فتى حوتى كتورمكى وموسى عليه السلام حوتدن سؤل ايتكى اونوتدى (فانخذ سبيله فى البحر سربا) حوت ايسه بحره كتديكى طريق كوه اولوب قالدى واول حالت موسايه ويا خضره معجزه اولدى (فلما جاوزا قال لفتاه آتنا غذاءنا لقد لقينا من سفرنا هذا نصبا) وقتا كيم ايكيسى مجمع بحرئين تجاوز ايدوب اول كچه واپرته اويليه دكين كتديلر موسى عليه السلامه جوع ونصب ايردى ديلديكه موسى عليه السلام اول سفرك غيريده عى ايرمش دكيدى فتاسنه ديديكه غدامزى كتور كه يدهم اول صخره به كيديكمز دنصكره ده يوربد يكمز دن بزه تعب ونصب ايرمشدر موسى عليه السلام آندن غذائى طلب ايديجك اولدخى حوتدن كورديكن تذكر ايدوب (قال أرايت اذ أوتينا الى الصخرة فاني نسيت الحوت) موسى عليه السلامه ديديكه كورديككه بكانه حالت ايردى صخره عندنده نزول ايتديكمزده حوتى آنده قويوب يتوردم وانى سكا ذكر ايتكه اونوتدم (وما انسانيه الا الشيطان ان اذكره) بكا اول حوت امرينى سكا ذكر ايتكى اونوتدين دكل الا شيطان ايدى (واتخذ سبيله فى البحر عجبا) واول حوت بحرده كتديكى محلى مسلك ايتدى بن اندن تعجب ايتدم (قال ذاك ما كنا نبغ) موسى عليه السلام ديديكه اشبو ذكر ايتديكك حوت امري بزم مطلوبمزدركه اول اكا علامتدر (فارتداعلى آثارهما قصصا) اندن كيرو دونوب كادكارى يوله كتديلر حتى كه آثارلرين تبسيع ايدرك اول صخره به ايرديلر (فوجد اعبدا من عبادنا) انده عباد مختصمزدن بر عبد بولديلر * ديلديكه جهور قولنده انكه مراد خضر عليه السلام ايدى اسمى بليان ملكان ويا اليسع ويا الياس ايدى خضر ديلسنه سبب اول بر فروه بيا اوزره جلوس ايديجك تحتنده اول اخضر اولوب اهتراز ايتدى ديلديكه اول نماز قلد يغنده حولنده كى اشياء اخضر اولوردى * روايت اولنديكه موسى عليه السلام انده خضرى كورديكه بر ثوبه بور نمشدى (آتيناه رجاة من عندنا وعلمناه

من ادنا علم) بزا کا عندمزدن وحی و نبوت و یردک و بزه مختص اولوب توفیق
ایله بیلنور علومدن اکا اوکرتدک که اول علم باطندرکه غیوبدن خبر و یرر
موسی علیه السلام اکا سلام و یروب اول دخی اکارده سلام سکا دخی
اولسون ای بنی اسرائیل پیغمبری دیدی موسی علیه السلام اکا دیدیکه بن
انلرک پیغمبری ایدوکی سکا کیم بیلدردی دیدی اول که سکا بنم مکانی بیلدر و بدر
(قاله موسی هل اتبعک علی ان تعلمن مما علمت رشدا) موسی علیه السلام
اکا دیدیکه سکا اتباعه کلشین که شول تعلیم اولدیغکدن بکا علم ذا رشد
تعلیم ایده سن * دیندیکه خضر علیه السلام دیدیکه سکا علمده تورا
و تبلیغده بنوا اسرائیل بتر موسی علیه السلام دیدیکه الله تعالی بکا بویله امر
ایدو بدر * موسی علیه السلام ابواب دینده شرط اولیان شیئی غیریدن
تعلیمی نبوته و صاحب شریعت اولسنه منافی اولمز زیرا رسوله لایق اولور که
مرسل الیه اولدیغی کسنه دن اعلم اوله هر شیئده که دینک اصول و فروغندن
انکه بعث اولمشدر حالبوکه انده غایت تواضع و ادب رعایت اولنه اول
اجلدن نفسنی استجهال و اکا تابع اولمغه استیذان و اندن ارشاد بنی سؤال
ایتدی (قال انک لن تستطیع معی صبرا) خضر علیه السلام دیدیکه سن بخله
صحبت استطاعت ایدیمز سن * زیرا که بندن امور منکره کورر سن انبیایه ایسه
منکراته صبر جائز اولمز اگرچه حقیقتده اول معروف ایسه ده مادامکه انک
باطن حالنی بلیه (و کیف تصبر علی مالم تحط به خبرا) اندن خضر علیه السلام
اکا عذر بیان ایدوب دیدیکه سن نبی ایکن نیچه صبر ایدرسن شول بنم توی
ایده جکم اموره کیم ظاهری منا کیردر باطننه ایسه سنک علمک
ایرمیو بدر (قال ستجدنی ان شاء الله صابرا ولا اعصی لک امرا) موسی
علیه السلام اکا دیدیکه ان شاء الله بنی سنک افعاله صبر ایدر
بولور سن سکا عصیان ایتزین * موسی علیه السلام کندیکن صبره
استطاعتی اولسنه و ثوقی اولدیغیچون و عذینی مشیة الله تعلیق ایتدی *
زیرا که خلاف معتاده صبر شدید در انکه خلف و عدا ایتش اولمز
و بو دلیلدرکه افعال عباد مشیة الله اوله (قال فان اتبعنی فلا تسألنی
عن شیء حتی احدث لک منه ذکرا) خضر علیه السلام اکا دیدیکه
چون بکا اتباع ایدرسن بندن سؤاله عجله ایتکل اول شیئدکنکه انی بندن

(کوروب)

کوروب انکار ایدرسن حالبوکه انک وجه صحتن بیلرسن بلکه صبر ایت
تا که بن سکا انک حقیقتن و وجه صحتن بیان ایدم (فانطلقا حتی اذا ركبنا
فی السفينة خرقها) اویله اولسه ساحل بچردن رکوب ایچون سفینه
استیو کتدیله بر سفینه بولوب اکار رکوب ایتدیله پیغمبریمز علیه السلام ایدر
بر سفینه انلره اوغرایوب بزى الاک دبیچک اهلی خضر علیه السلام
بیلوب انلری نول سز آلدیله بچرک ایچرو سنه ایردکارنده خضر علیه السلام
النه بر بالته آلوب سفینهک قبل بچردن ایکی تخته سنی خرق ایتدی
(قال آخرقتها لتغرق اهلها لقد جئت شيئا امرا) موسی علیه السلام
اکا دیدیکه اشبو سفینه بی خرق ایتدک که اهلی غرق ایده سن حالبوکه
آنلر بزدن نول آلامغله بزه احسان ایتدیله سن انکه شیء منکر ایتدک
روایت اولندیکه خضر علیه السلام سفینه بی خرق ایدبیچک ایچنه
صو کیرمدی بروایتده موسی علیه السلام انی کوربیچک ثویله انی
برکندی و برروایتده خضر علیه السلام برزجاجدن قدحله اول خرق
یمادی (قال ألم اقل انک لن تستطیع معی صبرا) خضر علیه السلام
اکا دیدیکه بن سکا دیمدیمیکه سن بخله صحبت استطاعت ایده مزسن
(قال لا تأخذنی بما نسیت) موسی علیه السلام دیدیکه اول مرده
بکا وصیتی ترکم سبیلله بنی مؤاخذه ایتکل (ولا ترهقنی من امری عسرا)
بنم امرمدن بکا عسری تکلیف ایتکل و یا متابعتی بکا تعسیر ایتکل
بلکه تیسیر ایت * زیرا که بن سنک صحبتی مراد ایدرین اکا ایسه چاره
عفو ایله و مناقشه بی ترکله اولور (فانطلقا حتی اذا لقيا غلاما فقتله)
بعده ایکیسی سفینه دن چیقوب کیدر کن غلمان چاعتنه اوغرایدر که
لعب ایدرلردی ارالزندن بر غلام ظریفی طوتوب بوغازلدی و یا الیله انک
باشین قوپاردی و یا طاش ایله باشین ازدی و یا باشنی دیواره اورمغله
اولدردی اکثر و دیدیلر که اول غلام حد بلوغه ایرمش ایدی وانک
طبعی کافر ایدی حبساتده قالسه ابویننی طغیان و کفره ایرکور یسردی
(قال ا قتلت نفسا زکیة بغير نفس لقد جئت شيئا نكرا) موسی علیه
السلام اکا دیدیکه قتل ایتدکی شول ذنوبدن طاهره نفسیکه قتل نفس
ایتماشیدی اویله اولسه شیء منکر ایشلدک که اول اولکیدن قبح
و شناعته اعظمدر * زیرا که تدارکی ممکن دکدر اولکی فعلک بونک

خلافیدر (قال ألم اقل لك ان تستطيع معي صبرا) خضر علیه السلام
 اكا دیدیکه بن سکا دیدیمیکه سن بمله صحبت استطاعت ایده مز سن
 (قال ان سألتك عن شيء بعدها فلا تصاحبني قد بلغت من لدني عذرا)
 موسی علیه السلام اكا دیدیکه اکر بودفعه دنصکره سکا برشیدن سؤال
 ایدرسم بکا مصاحب اولغل اکرچه بن سنک صحبتکی دبلرسمده * زیرا بنم
 قبلدن عذری نهایتیه ایرکوردک وصحبت واتباعکده اعتذار ایده جک
 برعذرملدی * زیرا که وصیتکی رعایت ایتیموب اوچ کره سکا مخالفت
 ایدم * پیغمبریمز علیه السلام ایدر الله تعالی رحمت ایده قرنداشم
 موسایه کیم استخیا سندن اول سوزی سویلدی اکر عجله ایتیموب
 صبر ایتسیدی خضر اکا اعجب اعاجیب کوستریدی (فانطلقا حتی اذا
 اتيا اهل قرية) اندن ایکیسی کیدوب حتی که بر اهل قریه یه ایردیلر که
 اول انطساکیه در ویا ایله در که اول ارضک سمدان ابعیدر (استطعما
 اهلها فأبوا ان یضيفوهما) اول قریه اهلندن ضیافت وجهی اوزره طعام
 استدیلر اهل قریه ايسه انلری ضیافتدن اباء ایتدیلر * ابوهریره رضی الله
 عنه ایدر انلری برمرأه اطعام ایتدیکه اول بربر اهلندن ایدی رجالی ايسه
 اندن امتناع ایتدی * او یله اولسه اول ایکیسی اول قریه ده اولان نسایه
 خیردما ورجاله بددما ایتدیلر (فوجدوا فيها جدارا یرید ان یتقض فأقامه)
 اول قریه ده بر دیوار بولدیلر که اول دوشمکه میل ایتشدی خضر علیه
 السلام انی الیله طوغرلندی ویا الیله انی مسح ایدیجک اول طوغرلدی
 ویا انی یقوب یاپدی (قال لوشئت لا تحذت علیه اجرا) موسی علیه
 السلام اكا دیدیکه اکر سن دیله سک اول عملک اوزره اجرا آوردک که انکله
 تعیش ایدیک (قال هذا فراق بيني وبينك) خضر علیه السلام موسی
 علیه السلامه دیدیکه اشبو وقت بری بریمزدن فراقک وقیسدر
 (سأنبئك بتأويل ما لم تستطع علیه صبرا) سکا خبر ویرهیم انک
 تأویلنی که ظاهر حیثیتدن منکر اولدیغیچون سن اكا استطاعت ایده مدک
 (اما السفينة فكانت لمساكين یعملون فی البحر) اما اول سفینه که بن انی
 خرق ایدم مساکیندن اون قرنداشک ایدیکه انلرک بشی زمی و بشی
 بجرده مؤاجره واکتساب ایدرلردی (فاردت ان اعیبها) دیلدمکه
 اول سفینه بی خرقله عیبلو ایدم تاکه غضب اولنیمه (وکان وراءهم ملک

(یاخذ)

یاخذ کل سفينة غضبا) حالبو که نلرک اوکنده جلندی ویا منوله دینور
 بر کافر ملک وار ایدیکه هر سفینه صالحه بی اصحابدن غضب ایدردی *
 روایت اولندیکه خضر علیه السلام اول قومده اعتذار ایدوب اول ملک
 غاصبک شاننی ذکر ایلدی انلر ايسه انی بیلزلردی و دیدیکه سفینه کز
 اكا اوغرا دیغنده عیبلو اولدیغیچون اول آتی آلیه و آتی یکدیگز دنصکره
 آتی اصلاح ایدوب کما کان نفعلنه ستر (واما الغلام فكان ابواه مؤمنین)
 واما اول قتل ایتدیکم غلام کافر ایدی ووالدینی ايسه مؤمنلر ایدیلر
 (فخشينا ان یر هقهما طغیاناً وکفرا) خوف ایتدک که اول غلام کافر
 انلره طغیان و کفری تکلیف ایده ویا اكا فرط محبتلرندن انک دیننه
 متابعت ایدلر * خضرک اندن خوف ایتسی الله تعالینک اكا انی اعلامیله
 ایدی * ابن عباس رضی الله عنهدن مرویدر که نجدة الحروری اكا نامه
 یازوب دیدیکه خضر انی نیچه قتل ایتدی حالبو که پیغمبریمز علیه السلام
 ولدانی قتلدن نهی ایدوبدر * ابن عباس رضی الله عنهما اكا جوابده
 یازدیکه اکر ولدانک حالندن خضرک بیلدوکن سن دخی بیلورسک سکا
 دخی جائز اولور که قتل ایده سن (فاردنا ان یدلهم ربهم خیرا منه زکاة
 واقرب رجلا) بز اراده ایتدک که اول ایکیسنه ربلی جل شانه اول
 غلامدن بدل بر ولد ویره کیم صلاح و تقواده ووالدیننه رحمت وعطفه
 اقرب اوله * دینلدیکه اول ایکیسندن بر قز وجوده کلوب انی بر نبی تزوج
 ایتدیکه اول نبی ایله قزدن بر نبی وجوده کلدیکه الله تعالی انکله امدن
 برامته هدایت ایتدی (واما الجدار فكان لغلامین یتیمین فی المدينة)
 واما اول طوغرلندیغ جدار مدینه ده اصرم وصریم دینور ایکی غلام
 یتیمک ایدی (وکان تحتہ کنز لهما) واول جدارک آتنده اول ایکی غلامک
 کنزی وار ایدی واول کنزده اختلاف اولندی * دینلدیکه النون
 ویا کومش ویا مال ویا کتب علم ایدی ویا النوندن بر لوح ایدیکیم کایازلشدی *
 عجیلرین اول کسه یه کیم موته یقینی وار ایکن نیچه سونور و قدره یقینی وار
 ایکن اندن نیچه برینور ورزاقنه یقینی وار ایکن کندیوه نیچه تعب ویرر
 وحسابه یقینی وار ایکن اندن نیچه غافل اولور و دنیا نلک زوالنه یقینی
 وار ایکن اكا نیچه قلبی یاتیشور لاله الا الله محمد رسول الله * وآنک آخر
 جاننده یازلشدیکه بن اول الله جل شاننه کله الوهیتده شریکم یوقدر

یا لکزین خیر وشری بن خلق ایتمشین سعادت اول کسه یه کیم انی خیر
ایچون خلق ایتمش اولوب انی خیرده استعمال ایدم وشقاوت اول
کسه یه کیم انی شر ایچون خلق ایتمش اولوب انی شرده استعمال ایدم
(وکان ابوهما صالحا) و اول ایکی غلامک باباری صالح ایدی اسمی
کاشخ ایدی انلر بابارینک صلاحیه حفظ اولندیلر * دینلدیکه اول
ایکی غلام ایله اب صالحلری بیننده یدی آباء یکمشدی اول سیاح
ایدی محمد بن المنکدر ایدر الله تعالی بر عبدک صلاحیه ولدنی وولد
ولدنی وعشیرتنی وحوالنده کی اهل دویراتنی حفظ ایدر اول انلرک
بیننده اولدیغنجیه انلر الله تعالینک حفظندن زائل اولزلر (فأراد
ربک ان یبلغا أشدهما) ربک جل شانہ دینلدیکه اول ایکی غلام بالغ
وعاقل اوللر ویا شدت وقوتلرینه ایرلر ویا اون سکز یاشنه کیرلر
(وبستخرجا کنزهما) واول کنزلرین چیقارلر (رحمة من ربک)
اول انلر ربک جل شانہ دن بابارینک صلاحی سیبیه رحمت اولسون
ایچوندلر * دینلدیکه اولده ارادتی خضر علیه السلام نفسنه اسناد
ایتدی * زیرا که تعبیه مباشر اولدی وثانیده الله تعالی یه ونفسنه
اسناد ایتدی زیرا که تبدیل اهلک غلامه وانک بدلن الله تعالینک ایجادیه
ایدی وثالثده یالکز الله تعالی یه اسناد ایتدی زیرا که غلامینک بلوغنده
انک مدخلی یوغیدی ویا خود اولکی نفسنده شرر و اوچنجی خیردر
وایکنجی ایسه مترجدر ویا خود وسائطه التفاتده حال عارفک اختلافیچون
ایدی (وما فعلته عن امری) یا موسی اشبو کوردیکلک اشیایی
بن کنیدی رأیله ایشلمشن بدککه الله تعالینک امریه ایشلمشن
(ذلک تأویل مالم تستطع علیه صبرا) اشبو سکا خبر ویردیکم اشیاشول
انکار ایتدیکلک امورک تأویلدرکه اکا صبره استطاعت ایدممدک اشبو
موسی وخضر قصه سنده کی دلائلندرکه استخدام لابأس اوله وسفرده رفیق
وخادم اتخاذی جائز اوله وطلب علم ایچون رحلت مستحب اوله وعالم
علمدن استزاده وسفر ایچون اتخاذ زاد جائز اوله واول توکله منافی اولیه
ونسیان وانک مثلی امور مکروهه مجازا شیطانہ نسبت اولنه ومتعلم معلمه
تواضع ایدیه اگرچه اول معلم رتبه ده اول متعلمدن دون ایسه ده وعالم
کنیددن اخذ علم مراد ایدنه شول طبعی متحمل اولمدیغی شیئی عدم

(تعلمنده)

تعلمنده اعتذار ایدیه وامرده مشیتی تقدیم ایدیه ومتبوع تابعه اشتراط ایدیه
ومشروطه وفاء لازم اوله وكشی نسیانله مؤاخذه اولنیه وتکرارده اوج دفعه
معتبر اوله وغریب ایچون طعام وضيافت طلبی لابأس اوله وصنع جلیل ترک
اولنیه اگرچه لثامه ایسه ده واعمال اوزره اخذ اجر جائز اوله ومسکینک
سفینه سی ویا آلت کسبی ویا کندویه کفایت ایتمز شیئی اولمغله مسکنتدن
چقمیه وغصب حرام اوله ومال غیرک بعضنی اتلاف وتعییب جائز اوله
چنانکه انکله باقینک بقاسی مرجو اوله مال مودع ومال یتیم کسبی
وایکی ضرر تعارض ایتدیکنده انک اعظمن دفع ایچون اهوونی تحمل
واجب اوله وولد باباسنک صلاحیه محفوظ اوله ودورک عمارتی واجب
اولوب خرابنه دکین اهمالی حرام اوله ویره مال دفنی جائز اوله واشبو قصه
علم حقیقتده اصل اوله وشرع مقتضاسی اوزه جاری اولدیغنجیه انکار
اولنیه (وما فعلته عن امری) قولی خضرک نبوتنه دلیل اوله * زیرا اول
اقتضا ایدرکه اول وحی اولنمش اوله وانی ولیدر دین دیرکه اول وحی الهامدر
والهامک حجتنه انکله استدلال ایدر * روایت اولندیکه موسی السلام
وقتا که خضردن مفارقت مراد ایلدی دیدیکه بکاو صیت ایت دیدیکه علمی
تحدیث ایچون طلب ایتکل بلکه عمل ایچون طلب ایت * خضرک وحی
ویا میت ایدوکننده علماء اختلاف ایتدیلر * دینلدیکه خضر والیاس
ایکیسی دخی حیاتده در هر سنه موسمه التقا ایدرلر * وخضرک حیاته
سبب اولدرکه ذوالقرنینله اول عین حیات طلبیچون ظلمته کیردیلر خضر
علیه السلام اول عینه راست کلوب اندن غسل وشرب ایتدی ذوالقرنین
ایسه انی بوله میوب کیرو دوندی * ابو العباس المرسی ایدر خضر
علیه السلام حی در اشبو کفله اکا مصافحه ایتمش وخضر علیه السلام
بکا خبر ویردیکه برکسنه کیم هر صباحن * اللهم اصلح امة محمد اللهم
تجاوز عن امة محمد اللهم اجعلنا من امة محمد * دیسه ابدالدن اوله
فقرانک بری آنی ابوالحسن شاذلی یه عرض ایدیجک ابوالعباس صدق
ایتمش دیدی خضر علیه السلام بکا کلوب کندویی بیلدردی واندن
ارواح مؤمنین یمینده منعیمه ویا معذبه ایدکاری معرفتن اکتساب ایتدم
اکر الان بکا بیک فقیه کلوب خضر علیه السلام میتدر دیسه لر انلر

رجوع ايدر دكان وانی میتدر دینلر استدلال ایدرلر انیکه (قال النبی علیه السلام بعدما صلی العشاء لیلۃ ارایتکم لیلتکم هذه فان علی رأس مائة سنة لا یتقی احد من هو الیوم علی ظهر الارض) پیغمبریمز علیه السلام بر کجه یتسو نمازین قیلدیغندنصکره دیدیکه اشبو کجه یی کوردیکزمی اشبو وقتدن یوزیل باشنه دکن الان ظهر ارضده اولاندن کیمسه حیاته قالمیسردر * ایمدی اگر خضر علیه السلام حی اولسه اول مدندنصکره یه قالمزدی لکن خضر علیه السلامی حیاته در دینلرک اشبو حدیثه جوابی اولدرکه پیغمبریمز علیه السلامدن حدیث مذکور صدورنده خضر علیه السلام ظهر ارضک غیری عوالمک برنده اولسی ممکندر (و یسئلونک عن ذی القرنین) یا محمد سنی امتحان ایچون بهود ویا مشرکون سکا ذوالقرنیندن سؤال ایدرلرکه اول اسکندر رومیدرکه فارس و رومه بر قولده مشرق و مغربه ملک ایدی اول اجلدن کا ذوالقرنین دینلشدی ویا انکچونکه اول نور و ظلمته کیردی ویا اول ذیانک شرق و غربنه ایردی ویا انک ایکی کوچک قرنی اولوب انی عمامه سیله اورتر ویا تاجنک ایکی قرنی واریدی * دینلدیکه انک اسمی مرزبان بن مرزبه الیونانی ایدی یونان بن یافت بن نوح علیه السلام اولاندن ایدی انک نبوتنده اختلاف اولندی * ابوالطفیل ایدر علی رضی الله عنه یه ذوالقرنیندن سؤال اولندیکه اول نبی ویا ملک میدی دیدیکه اول نه نبی و نه ملک ایدی لکن بر عبد صالح ایدیکه الله تعالی یی سوردی الله تعالی دخی انی سوردی روایت اولندیکه عمر رضی الله عنه بر رجلی ایشندیکه آخره یاذا القرنین دیو قیغیر دیدیکه اسماء نبی ایله تسمی یه راضی اولوب حتی که اسماء ملوکله تسمی ایتدیکز * دینلدیکه اول ملک عادل صالح ایدی الله تعالی انی ارضه ملک ایدوب اکاعلم و حکمت و هیبت و یردی واکا نور و ظلمتی تسخیر ایتدی سیر ایتدیکنده اوکنجه نور کیدوب آردندن ظلمت انی احاطه ایدردی (قل سأتلو علیکم منه ذکرا) دیکل که بن سزه انک حالندن الله تعالی عندندن خبر و یرین (انامکناله فی الارض) بز اکا یر یوزنده تصرف امرنی تمکین ایتدک * علی رضی الله عنه ایدر الله تعالی اکا سبحانی تسخیر ایدوب انک اوزره دینلدیکی یره کیدردی واکا اسباب مد اولندی و نور بسط اولوب لیل و نهار اکا مساوی اولشدی (و آتیناه من کل شیء سبیا) و بز اکا هر شیدنکه

(انی)

انی دیلرویا اکا توجه ایلر علم و قدرت و آلتدن انی اکا یر کورر سبب قیلدق ویا اکا اقطار ارضی قریب ایتدک (فاتبع سبیا) اندن مغربه بلوغ اراده ایدوب اکا یر کورر طریقہ سلوک ایتدی (حتی اذا بلغ مغرب الشمس و جدھا تغرب فی عین حمة) حتی که شمسک غروب یی محلته ایردی اول شمس بر قیرنمش سیاه باخقلو صو پیکار نه غروب ایدر بولدی (و وجد عندها قوما) و انک عندنده بر قوم بولدیکه لباسلری جلود و حشی ایدی و طعما ملری بحرك طشره بر اقدیغی ایدی * دینلدیکه انده اول قوم مدینه لرینک اون ایکی بیک قیوسی وار ایدی اگر اول قومک ضحیح و صیاحی اولسه شمسک غروب و وجبتی ایشیدیلوردی و اول قوم کفار ایدیلر (قلنا یاذا القرنین اما ان تعذب و اما ان تتخذ فیهم حسنا) دیدیکه یاذا القرنین مخیرسن دیلرسک اول قومی کفرلری اوزره قتل ایت اگر اسلامه دخول ایتزلرسه و یاخود ارشاد و تعلیم شرایعله انلرک امرنده حسن اتخاذ ایت اگر ایمانه کلوب مقتضاسیله عمل ایدرلرسه * دینلدیکه قتل و اسیر بیننده تخیر ایتدی قتل مقابله سنده اسیر حسن تسمیه اولندی (قال اما من ظلم فسوف نعذبه ثم یرد الی ربه فیعذبه عذابا نكرا) ذوالقرنین دعوتی اختیار ایدوب دیدیکه اما اول کسه کیم بن انی دعوت ایدوب اول ایسه کفری اوزره اصرار ایله نفسنه ظلم ایده بز آنی دنیاده قتلله عذاب ایدیسرز بعده الله تعالی اکا بر عذاب منکر ایدرکه مثلی معهود اولیه (و اما من آمن و عمل صالحا فله جزاء الحسنى) و اما اولکه ایمان و عمل صالح ایده آنکچون دنیاده و آخرته جنت ایله جزا اولور (و سنقول له من امرنا یسرا) و بز اکا امریمزدن آسان اولانی دیرز یوخسه صعب اولانی دکل (ثم اتبع سبیا) بعده انی مشرقه یر کورر طریقہ سلوک ایتدی (حتی اذا بلغ مطلع الشمس) حتی شول موضعه ایردیکه معموزه ارضدن شمس ابتدا اکا ایرر (و جدھا تطلع علی قوم لم نجعل لهم من دونها سترا) انی بر قوم اوزره طلوع ایدر بولدیکه انک حرندن انلری حفظ ایدر بنا قیلدق * زیرا انلر بر مکانده ایدیلرکه انک اوزره بنا قرار ایتزدی سوری و کسکین اولدیغندن اولیه اولسه انلر امر ایده ساکن اولورلردی شمس زائل اولیجق معاشرلرچون چیقارلردی دینلدیکه شمسک طلوعی عندنده انلر صویه کوروب ارتقا عنده اندن چیقارلردی و بهایم کبی او تلاغه کیدرلردی * دینلدیکه انلر بر قوم ایدیکیم عریانلر ایدی ایکی قولاقلرینک

لث (۳)

برین دوشنوب برین اورتنورلردی (کذلک) ذو القرنینک تخیر و اختیارده
 اهل مشرق شاننده امری اهل مغرب شاننده کی امری کبیر
 و یا خود شمس بر قوم اوزره طلوع ایدر بولدیکه انلر کفر و حکمده
 شول اوزرلرینه شمس غروب ایدن قوم کی ایدیلر (وقد احطنا بما لدیه خبرا)
 حالبوکه بز اول ذو القرنینک عندنده اولان جند وعده وآلات واسبابه
 ظواهر و خفایاسنه علمه احاطه ایتمشدر * یعنی اول کثرتده بر حده ایردیکه انی
 لطیف و خبیر جل شانده دن غیرک علی احاطه ایتزدی (ثم اتبع سببا)
 بعده مشرق و مغرب یلینده معترض جنوبدن شماله کیدر طریقه
 سلوک ایتدی (حتی اذا بلغ بین السین) حتی که اول ایکی جبل یلینه
 ایردیکه ذو القرنینک سدی انده بنا اولمشدی * دینلدیکه سدی سینک
 ضعیله اول شیدر که انی الله تعالی خلق ایده وسد سینک قحیله اولدر که
 انی ناس عمل ایده دینلدیکه اول ایکی جبل آخر شمالده ارض ترک
 منقطعنده اولوب یأجوج و مأجوج اول ایکی جبلک وراسنده قالمشدر
 (وجد من دونهما قوما لا یکانون یفقهون قولا) اول ایکی سدی امامنده
 بر قوم بولدیکه غرابت لغت و قلت فطنلر یچون قریب اولزدیکه سامعه
 کلاملرین افهام ایدرلردی و نه کندیلر غیرک کلامن فهم ایدرلردی الا
 اشارت و یا ترجمانه (قالوا یاذا القرنین ان یأجوج و مأجوج مفسدون
 فی الارض) انلرک مترجلری ذو القرنینه دیدیلر که یأجوج و مأجوج
 طائفه سی ارضزده قتل و تخریب و اتلاف زروعه فساد ایدیلردر *
 دینلدیکه انلر ایام ربیعه چیقوب یرده بریشل اوت قومزلردی بیرلردی
 و قوریمش کورتورلردی و بر قولده ناسدن بولدقلرینی بیرلردی *
 و دینلدیکه یأجوج و مأجوج ترکدن بر جیلدر یعنی بر جاعت یافت
 ابن نوح اولادندندر ترک یأجوج و مأجوجدن بر سریه در که ذو القرنین
 سدی بنا ایدیلرک سدن طشره قلانله ترک دینلشدر * دینلدیکه انلر
 یکریمی ایکی قبیلده در انلردن بر قبیلده سدن طشره ده ترک اولاند یغیچون
 ترک دینلشدر اهل توارنج ایدر نوح علیه السلامک اوج اولادی
 وار ایدی سام و حام ویافت ایدی اما سام عرب و عجم و رومک ایدر و حام
 ایسه حبشه و زنج و نوبه نک ایدر ویافت ایسه ترک و خوز و صفالیه
 و یأجوج و مأجوجک ایدر دینلدیکه یأجوج و مأجوجک هر بری دردر

(یوز بیک)

یوز بیک امتدر انلردن بر رجل صلبندن سلاحه قادر بیک اولاد ذکور
 کورمینجه فوت اولز انلر اوج صنفدر بر صنفک قامتلی یوز یکریمیشر
 ذراعدر و بر صنف ایسه طول و عرضلی برابرر یوز یکریمیشر ذراعدر
 انلره جبل و حدید قائم اولز و بر صنف ایسه قولقلرینک برینی دوشنوب برین
 اورتنورلر فیل و وحشی و خنزیردن بولدقلرین آخر زمانده اکل ایدیسرلدر
 مقدمه لری شامده ساقه لری خراسانده اولیسردر مشرق جانبده کی
 نهرلری و طبریته کی بحیره یی ایچلر * دینلدیکه بروقتده آدم علیه
 السلام اختلام اولوب نطفه سی ترابه قارشدی الله تعالی اندن یأجوج
 و مأجوجی خلق ایتدی ایتدی انلر اب جهتندن ناسه متصل اولورلر ام
 جهتندن دکل * وهب بن منبه ایدر ذو القرنین رومدن بر رجل صالح
 ایدی الله تعالی اکا دیدیکه بن سنی شول لسانلری مختلف اولان امتله
 کوندلرین انلردن ایکی امت طول ارضده در بری مغرب شمس عندنده در
 انلره ناسک دینور و بری دخی مطلع شمس عندنده در انلره منسک دینور
 و ایکی امت دخی ارضک عرضنده در بری قطر ایمنده در انلره هاویل
 دینور و بری ایسه قطر ایسرده در انلره قایل دینور و ام کثیره وسط
 ارضده اولور که انلر جن و انس و یأجوج و مأجوجدر ذو القرنین دیدیکه
 یارب بن انلره نه قوتله مکابره و نه جعله مکابره و نه لسانله مناطقه ایدرین الله
 تعالی دیدیکه بن سنک لسانکی بسط و عضدکی شدید ایدرین حتی که هیچ
 بر شیدن قورقیه سین و سکا هیبت لباسن کیوره بن حتی که سندن خلق
 قورقودورین و سکا نور و ظلمتی تسخیر ایدرین نور امامکده هادی اولور
 و ظلمت وراکدن سنی حارس اولور * او یله اولسه مغرب شمس کیدوب
 انده جمع کثیر بولدیکه عدین آنجق الله تعالی بیلور ظلمت ایله انلری
 مکان واحده جمع ایدوب توحید و عبادته دعوت ایلدی انلرکیمی ایمانه
 کلوب کیمی اندن اعراض ایتدی اعراض ایدنلرک اوزره ظلمتی ادخال
 ایدوب حتی انی انلرک اجواف بیوته کیردیردی انکله انلر انک دعوتنه
 اجابت ایتدیلر او یله اولسه مغرب اهلندن اکا جند عظیم جمع اولوب
 ذو القرنین انلره قائد و ظلمت سائق اولدی حتی که هاویل کلوب ناسکه
 ایتدیکی عمل مثلنی انلره ایتدی اندن یچوب مطلع شمسده منسکه ایردی
 او کدینکی ایکی امته ایتدیکی عملی انلره دخی ایتدی اندن ارضک قطر

ایسرندہ قاولہ واروب عمل سابقن انلرہ دخی اجرا ایتدی اندن وسط
ارضہ کی امتلرہ قصد ایدوب مشرق جانبندہ منقطع ترکه ایدی انسدن
برامت صالحہ دیدیلرکہ یاذا القرنین اشبو ایکی جبلت اراسندہ بهایم
اشباهندہ بر خلق واردرکہ دواب ووحوشی افتراس ایدرلر حیات
وعقاربی بیرلر وبالجمله یرده کی مخلوقاتدن هر جانلوی اهلآ کدن مبالات
ایتمزل وانلرک کبی هیچ بر خلق زیاده اولمز شک ایتمز که انلرکه دنیا طولیسر
وبالجمله یر اهلنه انلرک شری اریسردر (فهل نجعل لك خرجا علی
ان نجعل بیننا و بینهم سدا) سندن حاجتمز اولدرکہ اموالزدن سکا خرج
ومصرف ویره وزکہ بزملة انلرک بیننه سدا وحاجز قیله سن * ابن العربی
ایدر اشبو دلیلدرکہ اعمال اوزره خراج واجر اخذی جائز اوله وملك
اوزره خلقت مصالحنه قیام وفرجه لری سدا وثغوری اصلاح واجب
اوله **ا**کرچه رعیه نک اموالندن اخذله ايسهده وچانکه اکا احتیاج
اوله (قال مامکنی فیہ ربی خیر) ذوالقرنین دیدیکه اول شیکیم ربم
تعالی ملک ومالدن بنی اکا تمکین ایتدی سزک بکا بذل ایدہ جککمز خرج
ومصرفدن خیرلودر و بنم اکا احتیاجم یوقدر (فأعینونی بقوة) ایدی
بانیلر وصانعلر ایلہ وآلاتدن لازم اولان اشیا ایلہ بکا اعانت ایدک (أجعل
بینکم و بینهم ردما) تاکه سزکله انلرک بیننه حاجز حصین قیلم که اول
سددن اکبردر (آتونی زبر الحديد) ایدی بکا حدید قطعہ لرین کتورک
چون انی کتوردیلر بعده صویہ ایرنجہ اکا اساس قازدیلر وصخرملر ایلہ
طولدیروب اوزرینه اریدلش طینه نحاس دوکدیلر بعده بناسیچون
اول ارایہ برصف حدید و برصف حطب بومنوال اوزره صف صف
حدید و حطب بسط ایدرک اول ایکی جبلت رأسی برابریه ایرکوردیلر
(حتی اذا ساوی بین الصدفین) چانکه سدا اول ایکی جبلت اراسی
اعلاسنه دکین اشیا مذکورہ ایلہ مملو اولدیغی حالده مساوی اولدی
(قال انفخوا حتی اذا جعله نارا قال آتونی افرغ علیہ قطرا) بعده
عملیه امر ایلدی اول حدید اراسندہ کی حظبه آتش اوروب منافخله
انی نفخ ایتدیلر حتی که حدید نار کی اولیجق دیدیکه بکا اریمش نحاس
کتورک که اول قیرمش حدید اوزره دوکم چون انی ایتدی بعضی بعضه
ملتصق اولوب حدید ایلہ نحاسدن دوزلمش یکپاره حصار اولدی

(دینلیدیکه)

دینلیدیکه اول سدا عرضی الی ذراع وارتناعی ایکوز ذراع وطولی
یوز فرسخ ایدی (فا استطاعوا ان یظهروه) اولیه اولسه یا جوج
ومأجوج قومی اول سدا ملاست ورفعتیچون فوقه صعوده قادر اولیلر
(وما استطاعوا له نقبا) وانک شدت وصلاتیچون اسفلندن نقبه دخی
قادر اولیلر (قال هذا رحمة من ربی) ذوالقرنین دیدیکه اشبو
سدا وانک تسویه سنه اقتدار ربم جل شانہ دن عبادینه رجدر (فاذا جاء
وعد ربی جعله دکاء) چانکه ربم جل شانہ نک یا جوج ومأجوجک
خروجیلہ وعدینک وقتی کله اول سدا مذکور ی ارضه مستوی مبسوط
قیلور (وکان وعد ربی حقاً) وربم جل شانہ نک وعدی حق اولور
ابو هریره رضی الله عنہدن مرفوما مرویدرکہ یا جوج ومأجوج
هرکونده سدا قازلر حتی که شعاع شمسی کورمکه قریب اولور شول
اوزرلرینه تسلط ایدن کبیرلری اخشام اولیجق انلرہ دستور ویرر ایرته
فتح ایدلم دیو انلرکله مواعده ایدر والحال رب تعالی انی اولکی حالته
ایرکورر وقتاکه انلرک خروجی وقتی کله کبیرلری دستور وقتنده دیکه
ان شاء الله ایرته فتح ایدلم اولیه اولسه ایرته کلدکلرنده انی آلیقودقوری
هیئندہ بولر اندن قازوب ناس اوزره چیقلر صولری تتبع ایدلر وناس
حصنلرہ کیرلر وانلر سمایه اوقلرین رمی ایدلر اوقلری قانه بولاشق کلوب
اهل ارضه قهر ایتدیکمز کی اهل سمایه دخی قهر ایتدک دیکه بعده
الله تعالی انلرک قفسالرینه نغف علتی ایرکوروب جله سی هلاک اولر
ودواب ارض انلرک میتلرین پیوب سموره لر * برروایتده الله تعالی امریلہ
دوه بیونلری کی قوشلر انلرک جیفه لرین کتوروب الله تعالینک دیلدیکی
مکانه براغلر بعده الله تعالی یره یغمور یاغدیروب انکله یر یوزین پاک ایدہ
واکینلر ومیولر بتوروب خلقه نعمتلر ووسعتلر ایرکوره (وترکنا بعضهم
یومئذ یموج فی بعض) یا جوج ومأجوجک سددن خروجلری وقتنده
کثرتلندن بری برلرینه اخلاط ایدوب ماء کی تموج ایدلر ویاخود قیام
ساعت عنندہ خلق بری برلرینه ازدحام ایدوب انس وجن حیران
اولدقلری حالده تموج ایدلر (ونفخ فی الصور فجمعناهم جمعا) وقیام
ساعت ایچون صوره نفخ اولنوب حساب وجزا ایچون انلری محشره جمع
ایدہ وز (وعرضنا جهنم یومئذ للكافرين عرضاً) واول کونده

جهنمی کا فرلر ابراز ایدرز حتی که انی آشکاره کوررلر (الذین كانت اعینهم فی غطاء عن ذکرى) که انلر دنیاده بنم آیاتمه نظردن کوزلری غطاده ایدیکه اکا نظر ایله بنی توحید و تعظیم ایده لردی (وکانوا لا یستطیعون سمعا) وحقدن فرط صمملر یچون بنم ذکر و کلامی استماعه استطاعت ایده مز لردی * زیرا اصم کاهی اکا صمحه اولنسه استماع ایدر اما که انلر کانه مسامعلری بالکایه سماعت منع اولنشدی (أفحسب الذین کفروا ان یأخذوا عبادى من دونى اولیاء) شول بنم غیری عبادم عیسی و ملائکته یی معبودین اتخاذا لیدن کافرلر ظن ایدرلر میکه انلره اول عبادت ایتدکاری عبادم نفع ایده ویا انلره عذاب ایتیم ویا انلرک عذابدن نجاتلرینه کافی اوللر (انا اعتدنا جهنم للکافرین نزالا) بزکافرلر ایچون جهنمی ضیف ایچون احضار اولنور نزل کبی قلمشز (قل هل ننبئکم بالآخرین اعمالا) انلره دیکل که سزه خبر ویره یممی شول قومیکه اعمال جهنمدن قتی مغبولدر (الذین ضل سعبهم فی الحیاة الدنیا) شول کسه لردر که حیاة دنیاده عمل واجتهادلری ضایع و باطل اولدی (وهم یحسبون انهم یحسنون صنعا) و الحال انلر کندیلرک حق اوزره اولوب عمل حسن ایتش ظن ایدرلر * دینلرک انلر کله مراد ریا و سمعه ایچون عمل ایدرلر ویا معروفلری اوزره خلقدن منت و شکر طلب ایدرلر ویا یهود و نصارا در ویا را هبیلر در که کندیلرین صومعه لرده حبس ایتشلردر * شو فضل و نوال رجا ایتدکاری عملرله هلاک و بواره ایرلر (اولئک الذین کفروا بایات ربهم ولقاءه) ایدمی انلر ربلی جل شانهنک آیاتی قرآنه ویا توحید و نبوت اوزره نصب اولنان دلالتله و بعد الموت بعثله عذاب الله لقاسنه کافرلر اولدیلر (فحبطت اعمالهم) انلرک کفرلری سبیلله عملری باطل اولدی انک اوزره مثاب اولزلر (فلا نقیم لهم یوم القیامة وزنا) یوم قیامتده بز انلر ایچون قدر قیلرز ویا اعماللرین وزن ایچون میزان قورمز (قال النبی علیه السلام انه لیاتی الرجل العظیم السمین یوم القیامة لایزن عند الله جناح بعوضة وقال اقرؤا فلا نقیم لهم یوم القیامة وزنا) پیغمبریمز علیه السلام ایدر یوم قیامتده بر رجل عظیم سمین کتوریلور حالبوکه عند الله انک جناح بعوضه دکو قدری اولمز واکا بوآیتی دلیل اقامت ایتدی * ابو سعید الخدری رضی الله عنه ایدر یوم قیامتده

(بعض)

بعض ناس اعماله کله لری اول انلرک زعمنده عظمده تهامه طاغیر کبی اوله حالبوکه وزن اولندقدده حبط اولندیچون جدا قدری اولیه ایدمی اعمال کفار وزن اولمز دینلر اشبو آیتله استدلال ایدر (ذلک جزاؤهم جهنم بما کفروا واتخذوا آیاتی ورسلی هزوا) اشبو ذکر اولنان حبط اعمال و خست اقدار اهلینک جزالری جهنمدر * شول سببدنکه کافر اولدیلر و بنم آیتلری ورسوللری هزوا ایدندیلر (ان الذین آمنوا وعملوا الصالحات کانت لهم جنات الفردوس نزلا) شونلر که ایمان کتوروب اعمال صالحه ایشلدیلر الله تعالینک وعد سابق مقتضاسنجه انلره فردوس جنتلری منزل اولور (خالدین فیها لا یبعون عنها حولا) انده دائمین اولدقلری حالده اندن تحویل طلب ایتزلر * زیرا که اندن اطیب مکان بولزلر * پیغمبریمز علیه السلام ایدر الله تعالیدن آخرتده منزل استر اولسه کز اندن فردوسی استکز که اول جنتک اوسط و اعلا سیدر انک فوقی عرش الرحاندر جنتک نهرلری اندن منفجر اولور * کعب ایدر که انده امر معروف ونهی منکر ایدنلر ساکن اولور (قل لو کان البحر مدادا لکلمات ربی لنفد البحر قبل ان تنفذ کلمات ربی) دیکل که اگر جنس بحرک باسره صولری ربم جل شانهنک علم و حکمتی کلمات یازمغیچون خبر اولسه ربمک کلماتی توکنمدین جنس بحرک صولری باسره انی یازمقدن توکنیدی * زیرا که هر جسم متناهیدر اما که کلمات الهیه به نهایت یوقدر که انکله مراد اولیاسنه وعدی واعداسنه وعیدی وخلق اوزره حکمیدر (ولو جئنا بمثله مددا) اگرچه جنس بحر صولری مثلن انی یازمغیچون اولکی اوزره زیاده کتوررسه وزده اولدخی توکنوب کلمات الهیه توکنیدی زیرا که اکا حد وعد یوقدر * ابن عباس رضی الله عنهما ایدر پیغمبریمز علیه السلام حضر تلرینه یهود دیدیلر که یا محمد سن زعم ایدرسنکه سکا حکمت ویرلش اوله و الحال کتابکده (ومن یؤت الحکمة فقد اوتی خیرا کثیرا) اولکه اکا حکمت ویرله خیر کثیر ویریلوبدر دینلدی بوندنصکره دیرسنکه (وما اوتیتم من العلم الا قلیلا) علمدن سزه آزشی ویریلوبسنز اول سببدن بوآیت نازل اولدی (قل انما انا بشر مثکم یوحى الی انما الهکم اله واحد) دیکل که بندخی سزک کبی بشرین وحی اولندمکه الهکز اله واحددر ذاتده نظیری وصفاتده شریکی یوقدر (فن کان یرجو لقاء ربه) اول کسنه که رب تعالی به لقاسی حسن

حال اوزره اولمسين رجا ايدر ويا اسوء حال اوزره اولمسين خوف ايدر
(فليعمل عملا صالحا) انك رضاسن استيو عمل صالح ايشلسون (ولا يشرك
بعبادة ربه احدا) رب تعالينك عبادته كسمه يي شريك ايتسون ربا ايله
ويا مقابله سنده اجر طلب ايتكله (قال النبي عليه السلام ان اخوف
ما اخاف عليكم الشرك الاصغر قالوا وما الشرك الاصغر قال الرياء) پيغمبريمز
عليه السلام ايدر سزك اوزريكره معاصيدن زياده خوف ايتديكم شرك
اصغر دركه اول عملده ريادر (قال النبي عليه السلام يقول الله تبارك
وتعالى اني اغني الشركاء عن الشرك فمن عمل عملا اشرك فيه غيري فانا
منه بري هو الذي عمله) پيغمبريمز عليه السلام ايدر الله تبارك وتعالى
دير كه بن شركانك شركندن زياده غني ين اول كسمه كه اعمال دينه نك
برنده غيري بكا اشراك ايله بن اول عملدن بريئن اول عمل بدن غيري بكا
اشراك ايتديكي كسمه نك اولسون (قال النبي عليه السلام من حفظ عشر
آيات من اول سورة الكهف عصم من فتنة الدجال) پيغمبريمز عليه السلام
ايدر بر كسمه كه سورة كهفك اوتلندن اون آيت حفظ ايله دجال فتنه سندن
عصمت اولنه (قال النبي عليه السلام من قرأ اول سورة الكهف وآخرها
كانت له نورا من قدمه الى رأسه ومن قرأها كلها كانت له نورا من الارض
الى السماء) پيغمبريمز عليه السلام ايدر بر كسمه كه سورة كهفك اولني
وآخرني اوقويه قدمندن رأسنه دكين نور اوله واولكه كلني اوقويه
ارضدن سمايه دكين انكچون نور اوله

(سورة مريم وهي ثمان وتسعون آية مكية)

بسم الله الرحمن الرحيم

(كهيعص) دينلديكه اول اسماء اللهدن بر اسمدر ويا اسماء قرآندندر
ويا اسم سورده در ويا قسمدر كه الله تعالى انكله اقسام ايدوبدر * دينلديكه
اول الله تعالى خلقنه كافيدر عبادنه هاديدر يدي انلك يدرلي فوقنده در
بريه سنه عالمدر وعدنه صادقدر (ذكر رجة ربك عبده زكريا) اشبو تلاوت
اولنان ربك جل شاننه نك عبيدي زكريا به رجتي ذكريدر (اذنادي ربه
نداء خفيا) شول وقتن كه اول رب تعالى به نداء خفي ايله ندا ايتدي اكرچه
جهر واخفا عند الله مساويدر الابوكه اخفاده اخبات اشد واخلاص
اكثر در ويا تا كه كبري حالنده طلب ولد ايله لوم اولنميه ويا مواليسي اكا مطلع

(اوليه)

اوليه كه انلردن خوف ايدر دي ويا ضعف هرم انك صوتني اخفا ايتدي
(قال رب اني وهن العظم مني) واول نداسنده ديديكه يارب كوكم ضعيف
اولوب اينجلدي (واشتعل الرأس شيبا) وباشم قبلي آغار ديفندن اشتعال
ايتدي (ولم اكن بدعائك رب شقيا) هيچ بر كره سكا دعامده خائب اولدم
بلكه هر دعا ايتديكمده اجابت ايتدك يعني توسل ايتدي اني كه اجا بدن
كچوبدر وتنبيه ايتدي اني كه مدعو له اكر چه معتاد دكل ايسه ده لكن
اجابتي معتاده در واول الله تعالى اكا اجابتي تعويد واني اكا اطماع ايتدي
وكريمك حقند دركه اطماع ايتديكي كسمه يي كرمندن خائب ايتيه
(واني خفت الموالى من ورائي) وموتمد نصكره خلافتنه ولي ايله جكاردن
جور خوفن ايدر ين كه انلر انك بنو عيسى اولوب بنو اسرائيلك اشراي ايدبلر
(وكانت امرأتى عاقرا) وخاتونم ايسه طوغر من اولدي (فهب لي
من لدنك وليا) ايمدي سنك عندكدن وفضلكدن بكا بر ابن صالح باغشلغل
زيرا انك مشلي محض فضلكدن وكمال قدر تكدن رجا اولنور يوخسه
بن وخاتونم ولادته صلاحدن قالمشدر (يرثني ويرث من آل يعقوب)
كه اوبندنصكره بكا وآل يعقوبه وارث اوله اشبو ارثه اختلاف اولندي
لكن ابن عباسدن عطائك قولنده ايدر اول خوف ايتديكي انك بنو عيسى
دين الله ي اضاعه واحكامني تغيير ايدلر تنكم بنو اسرائيلدن اني مشاهده
ايتشدي اوليه اولسه رب تعاليدن بولد صالح ديلديكه امتي اوزره اول امين
اوله ونبوت وعلمنه وراث اولوب ديني ضياعدن حراست ايله (واجعله رب
رضيا) واني يارب برتقي مرضي ايلكل (يا زكريا اننا نبشرك بغلام اسمه
يحيى) الله تعالى انك نداسنه اجابت ايدوب ديديكه يازكريا بز سكا تبشير
ايدرز بر غلامه كيم اسمي يحيادر (لم نجعل له من قبل سميا) اندن اول
بر كسمه يي اول اسمله مسمي قيلدق اول اسمله تسميه اولنمسنه حكمت
زيرا كه اول ويرلديكي علم وحكمته حيات بولشدي ويا انكچونكه
اول شيخ فاني ايله عجوز عاقر دن وجوده كلشيددي ويا انكچونكه اكانظير
وشيه فيلنما مشدي شول حيثندنكه اول مدت عمرنده نه معصيت ايتش
ونه معصيته قصد قيلشدي (قال رب اني يكون لي غلام وكانت امرأتى
عاقرا وقد بلغت من الكبر عتيا) زكريا عليه السلام ديديكه يارب بنم
ايچون نيچه غلام اولور حالبوكه خاتونم طوغر من اولوبدر وبن ايسه

پير لکدن يېس وجفافه ايرمشين (قال كذلك قال ربك هو على هين)
 الله تعالى ويابشارتي تبلغ ايدن ملك اني تصديق ايدوب ديديكه امر
 سکا ديلان کبدر وياسنک ديدیکک کبدر ربک جل شانہ دیرکه یحییای
 سنک ایکیگزدن کبریکز حالده وجوده کتورمک بکا آساندر (وقد خلقتک
 من قبل ولم تک شیئا) والحال یحیادن اول سنی خلق ایدم سن ایسه اول
 وقتده برشیء دکل ایدک (قال رب اجعل لی آية) زکریا دیدیکه یارب
 بکا بر علامت قیل که انکله خاتونک حملی یلم (قال آتیک الاتکلم
 الناس ثلاث لیلان سويا) الله تعالى دیدیکه اکا علامتک اولدرکه صحیح
 الخلق اولوب خرس ومرضک یوغیکن اوج کیجه وکوندزده متابعاناس
 ایله کلامه قادر اولمیه سن اولیه اولسه اول کیجه خاتونه قربان ایدوب
 رحنه ولد واقع اولدی صباح اولیچق لسانی ناسله مکلمه دن معتقل
 اولدی ذکر الله اراده ایدیکنده منطلق اولوردی وناس وراء محرابدن
 اکا منتظر اولورلر دیکه اول نمازه چيقه (فخرج علی قومہ من المحراب)
 چون خاتونی حملک صباحنده محرابدن قومی اوزره چيقه واردی
 والحال لونی متغیر اولوب لسانی سويلزدی ديدیلرکه یازکریا سکا نه حالت
 ایردی (فأوحی الیهم ان سجوا بکرة وعشیا) انلره ایما ایتدی ویایر اوزره
 یازدیکه غداة وعشیه ده لله نماز قیلهر یعنی اول صباحده واخشامده
 قومنه چیقوب صلاتله امر ایدردی خاتونک حملی وقتی اولیچق کلامدن
 منع اولنوب چیقیدغنده صلاتی انلره اشارت ایله امر ایدر اولدی اندن
 اکا یحییای هبه ایدوب دید ککه (یا یحیی خذ الکتاب بقوة) یا یحیی توراتی
 جدله اخذ ایت (واتیناه الحکم صیبا) ویز اکا صباوتی حالده
 حکمت وفهم توراۃ ویانبوت ویردک حالبوکه اول اوج یاشنده ایدی
 (وحنا نا من لدنا) ویزدن اکا رحمت ویردک ویاخود انک قلبنده ابوینه
 وغیری به رحمت وتعطف قیلدق (وزکاة) ویزانی والدیننه واهل
 زماننه صدقه ویردک (وکان تقیا) واول مسلم مخلص مطیع ایدی
 رب تعالینک غیریدن معرض ایدی (وبرا بالديه) واول والدیننه
 اطاعت واحسان ایدیچی ایدی (ولم یکن جبارا عصیا) یوخسه
 والدیننه عاق ورب تعالی به عاصی اولور دکل ایدی (وسلام علیه يوم
 ولد ویوم یموت ویوم یبعث حییا) والله تعالیدن اکا سلام اولدی

(طوغدیغی)

طوغدیغی کونده که شیطاندن بنی آدمه ایریشن اکا ایرمدی واولدیکی
 کونده که عذاب قبردن امنده اولدی وبعث اولنمی کونده احوال
 قیامتدن سالم اولوب انعام واکرامه ایرر * دینلیدیکه انسانک زیاده
 وحشتی اشبو اوج حالده اولور طوغدیغی کونده انا قارنده الفت
 ایتدیکی حالتدن آریلور واولدیکی کونده کورمدکیرین کورر وبعث
 کونده کندوی محشرده مخاوفده بولور الله تعالی ایسه یحیی علیه السلامی
 اشبو مواظنده سلامتله تخصیص ایتدی (واذکر فی الکتاب مريم)
 قرآنده مريم قصه سنی ذکر ایت (اذ انبذت من اهلها مکانا شرقیا)
 شول وقتن که اول بیت المقدسده ویا دارنده قومندن مکان شرقی به
 اعتزال ایتدی * دینلیدیکه ایام شتاده بردک شدتده بر مشرقه ده
 اوتوروب باشی یاغلردی بر قولده حیضدن آرینوب غسل ایتدک کندی *
 پس بواجلندن نصاری مشرقی قبله ایدندیلر (فانخذت من دونهم حجابا)
 اهلنه قریب مکانده پرده ایدوب انلردن تستر ایتدی وانه اغتسال
 ایچون مجرد اولدیغی حالده اوتوردی (فأرسلنا الیها روحنا فتمثل لها
 بشرا سويا) واول حالده بزا اکا جبرائیلی کوندردک که اول شاب
 امرد سوی الخلق صورته ممثل اولدیغی حالده انک قارشوسنده طوردی
 (قالت انی اعوذ بالرحمن منک ان کنت تقیا) مريم رضی الله عنها غایت
 عفافندن اکا دیدیکه سندن الله تعالی به صیغنورین اکر مؤمن متقی ایسک
 بکا ظلم وتعرض ایتکل (قال انما انا رسول ربک لاهب لک غلاما زکیا)
 جبرائیل علیه السلام اکا دیدیکه بن اول استعاذه ایتدیکک رب تعالینک
 رسولین انک امریله کلشین که سکا برولد هبه ایدم که اول ذنوبدن طاهر اوله
 ویاخود خیر اوزره نامی اوله سنده سنه ترقیسی خیر وصلاح اوزره
 اوله (قالت انی یکون لی غلام ولم یمسسنی بشر ولم الک بغیا) مريم
 رضی الله عنها دیدیکه بکا ولد قندن حاصل اولور حالبوکه بکا زوج
 قربان ایتدی وبن فجور ایتامشن ولد ایسه یانکاحدن ویا سفاحدن اولور
 والحال بندن هیچ بری صدور ایتدی (قال كذلك قال ربك هو على هين)
 جبریل علیه السلام دیدیکه یا مريم حال دیدیکک کبدر لکن ربک جل شانہ
 دیدیکه بابامز ولد خلقی بکا آساندر (ولنجعله آية للناس ورحمة منا)
 بزاآنی ایدرز تا که آنی کمال قدرتمزه علامت وبرهان قیله وز

وانك دينه تابع اولنره آنی رحمت ایدیه وز (وكان امرا مقضيا) اول
ازلده امر محكوم ومفروغ اولدی اکا رد وتبديل اولمز اندن مريم درعنی
کينچك جبريل عليه السلام انك درعنه نفخ ايتدی (فحملته) اول
نخه دن فی الحال عیسی علیه السلام حضرتلرینه حامل اولدی
(فانقذت به مكانا قصيا) اویله اولسه اول قارنده کی جملله اهلندن
بعید وراه جبله ویا اقصای داره عزالت ایتدی تاکه زوجسر ولادته انی
تعبیر ایتیه لر * مفسرین انک مدت جلنده ووقت وضعنده اختلاف
ایتدیلر ابن عباس دیدیکه جل ولادتی ساعت واحده ده اولدی *
دینلیدیکه مدت حلی سائر نساء کبی طقوز آی اولدی برقولده سکز آی
حالبوکه سکز آید طوغان مولود اندن غیری تیر زمانده فوت اولشدر
برقولده مدت حلی الی آی اولدی * دینلیدیکه مريم آنی حامل اولمی
برساعتده وآنک تصویر اولمی برساعتده وآنی وضع ایتمی برساعتده
ایدی واول وقتده اول اون یاشنده اولوب عیسیاه حامل اولزدن اول
ایکی کره حیض کورمشدی (فأجاءها المخاض الى جذع النخلة)
ولادت وجعی انی برنخله جذعنه الجا ایتدیکه اول برنخله یابسه ایدیکه
رأس وخضرتی کتمشیدی قیش ایامی ایدی اکا التجاسی وجع ولادتدن
اکا استناد ایچون ایدی زیرا که قابله سی یوغیدی (قالت ياليتني مت قبل
هذا وكننت نسيا منسيا) ناسدن اوتانوب ولوملردن اوشانوب
دیدیکه نولیدی بو حالتدن اول اولمش اولیدم واونودیلوب کیدیدم
(فناداها من تحتها الا تحزني قد جعل ربك تحتك سريا) جبرائیل علیه
السلام مريم ندا ایتدی برمکاندنکه اول مريم مکاندن اسفل ایدی
زیرا که مريم اکه اوزره ایدی وجبریل علیه السلام ایه اندن اسفلده
وراء اکه ده ایدی ویاخود عیسی علیه السلام مريمدن طوغیچق انک
تحت ذیلندن اکا ندا ایتدیکه حزن چکمل رب تعالی تحت قدمینکده
نهر صغیر قیلدی ویا انی تحت امر کده قیلدیکه دیرسک انی ایدر دیرسک
طور غوررسین * دینلیدیکه عیسی علیه السلام عقبيله یره اوریحق
اندن برطتلو صوپکاری چقبوب آقدی وبرقولده اول اراده برنهر یابس
وار ایدی الله تعالی اندن صوآقندی واول نخله یابسه یی پیراقلندیروب
میوه ویردی (وهزي اليك الجذع النخلة تساقط عليك رطبا جنيا)

(ويا)

ویامريم اول نخله یابسه یی کندوکه اماله وتحريك ایتکه اوزریکه شول
کونیش تازه خرما دوشه (فکلی واشربی) ایددی اول خرمدان ییوب
نهرک صویندن ایچکل (وقری عینا) واول اوغلاک عیسی ایله قریرالین
اواوب حزنکی کیدر زیرا چسانکه ناس نهر یابسی جریان ایدر ونخله
یابسه یی یشلانوب وقتنده اول میوه لو کوره لر اکا قادر اولان رب تعالیدن
استبعاد ایتزلرکه سندن فلسز ولد خلقنه قادر اوله وسنک اهل عصمتدن
ایدیکک ییلوب سنی ریه دن تبرئه ایدلر (فاما ترين من البشر احدا
فقلی انی نذرت للرحن صوما فلن اکلم اليوم انسيا) اکر بشردن
برکیمسه کوررسک سکا ولد کدن سؤال ایتدیکنده اشارتله اکا دیکل که
بن الله تعالینک وجهیچون صمته نذر ایتشن اشبو کونده برآدمی به سولیزین
اشبو صمت صومی انلرک شریعتنده جائز ایدی بزم شریعتزده دکل
(فانت به قومها تحمله) اندن مريم رضی الله عنها عیسیای طوغردیغی
حینه کتوروب قومنه کلدی * دینلیدیکه یوسف النجار مريم وعیسیای
غاره ایلندی قرق کون انده مکث ایدوب نفاسندن طاهره اولیحق انکله قومنه
کلدی اهللی انی قوجاغنده ولده کوریحک یرینوب آغلشیدلر * زیرا که
اهل بیت صالحین ایدیلر (قالوا یا مريم لقد جئت شيئا فريا) دیدیلر که
یا مريم بدیع منکر شیئله کلدک (یا اخت هارون ما کان ابوک امرأ سوء وما کان
امک بغيا) یا اخت هارون باباک عمران زانی دکل ایدی وآنک حنه دخی زانیه
دکل ایدی بو ولد سکا قندن حاصل اولدی * دینلیدیکه اشبو هارون
بنو اسرائیلده بررجل صالح وعابد ایدی موتی کونده جنازه سنه قرق بیک
رجل تابع اولدیکه جله سنک اسلمی هارون ایدی سائر ناسدن غیری مريمی اکا
تشبیه ایتدیلر یعنی بزظن ایدردک که صلاحده سن انک مثلی اوله سن یوخسه
اندن مراد نسبه اخوت دکل ایدی * دینلیدیکه هارون مريمک لأب
اخى ایدی ویاخود انکله مراد موسى علیه السلام قرنداشتی هارون ایدی *
زیرا که مريم انک نسلندن ایدی ویاخود هارون بنو اسرائیلده
برعظیم الفسوق رجل ایدی مريمی اکا تشبیه ایتدیلر (فأشارت اليه قالوا
كيف نکلم من کان فی المهد صبيا) مريم رضی الله عنها انلره عیسیای کوستردیکه
انلر اکا سولیلوب جوابی اندن اخذ ایدلر وآنک جوابی مريمک کندویه
حجت اوله وقتاکه مريم انلره جواب ایچون عیسیای کوستردی بویله فعل

منكر کردن ماعدا بزی سخره دخی ایدرسن بز بشکده کی صبی به نیچه سویلرز
 دیدیلر (قال انی عبد الله) عیسی علیه السلام انلرك كلامن ایشیدیلجك
 رضاعی ترك ایدوب انلره اقبال ایتدی و بر قولده مریم انلره انی کوستریجك
 ثدی ترك ایدوب یساری اوزره انكا ایتدی و یمینله اشارت ایدوب
 دیدیکه بن الله تعالینك عبدین انك اول تکلمی نفسی اوزره الله تعالینك
 عبدی ایدوب كنه اقرار اولدی تاكه اله اتخاذا اولغیه (آتانی الکتاب
 وجعلنی نبیا) اول بكا کتاب ویریسر و بنی نبوتله اکرام ایدیسردر *
 دینلدیكه یعنی الله تعالی لوح محفوظده اكا کتاب ویرمسن وانی پیغمبر
 ایتمسن یازدیغن خبر ویردی تکیم پیغمبریمز علیه السلامه نه وقتدنبرو
 نیسن دینلده کده دیدیکه بن نبی ایدم حالبوکه آدم علیه السلام روح
 وجسد بیننده ایدی * اکثرن دیدیلرکه عیسیایه انجیل ویرلسی طفل
 وصغیر ایکن ایدی واول حالنده اكا رجال عقلی ویرلشدی * دینلدیكه
 اول اناسی قارنده ایکن اكا تورات الهام اولنشدی (وجعلنی مبارکا
 ایما كنت) وهر قنده اولسم بنی خلقه خیر تعلیم ایدر و بكا ایمان واتباع
 ایدنه نفع ایدر قیلدی (واوصانی بالصلاة والزكاة مادمت حیا) وخیاتده
 اولدیغیمجه بكا صلاة و زکاتله امر ایلدی یعنی ماله مالک اولورسم ویا
 رذائلدن نفسی تطهیر ایدم ویاخیردن استکثار ایدم (وبرا بوالدتی)
 وبنی والده محسن ورحیم قیلدی (ولم يجعلنی جبارا شقیا) واول بنی
 كندویه عاصی قیلدی * دینلدیكه شقی اولدرکه ذنب ایدوب توبه
 ایتمه (والسلام علی یوم ولدت و یوم اموت و یوم ابعث حیا) جنس
 سلام بنم اوزریمدر طوغدیغم کونده واولدیكم کونده وبعث اولسدیغم
 کونده امنده اولم * تکیم یحیی علیه السلامه سلامده معناسی یکدی عیسی
 علیه السلام اشبو کلاتی سویلیجك اول قوم مریمك برآتن بیلدیلر بعده
 صبیانك تکلمی حدیسه ایرنجیه دکین سویلیدی (ذلك عیسی ابن مریم
 قول الحق الذی فیہ یمترون) اشبو نعتی تقدم ایدن عیسی ابن مریمدر
 سویلیدی شول قول حقیکه نصاری انده اختلاف ایدرلر شول وجهله کیم
 انلرك کیمی انی ابن الله وکیمی هو الله دیدی ویهود ايسه انی ساحر دیدی
 (ما كان لله ان يتخذ من ولد) الله تعالینك نعتدن دکلدرکه ولد اتخاذا ایده
 (سبحانه) خلقك صفاتندن اول منزهدر (اذا قضی امرنا فانما یقول له

(کن)

کن فیکون) اولکه برشی اراده ایتسه کن دیمسیله ایجاد ایدر اوله منزه
 ومقدس اولدیكه ولد اتخاذه خلق کی احبال اناثه محتاج اوله (وان الله
 ربی وربکم فاعبدوه) والله تعالی بكا امر ایلدیكه اول بنم ربمدر وسنرك
 ربكزدر اكا عبادت ایدك دیم تکیم صلاة و زکاتله ووالده مه برله
 امر ایتدیکی کی (هذا صراط مستقیم) ربك جل شانہ بكا اشبو
 امر ایتدیکی دین صحیح وطریق مستقیم (فاختلف الاحزاب من بینهم)
 مریم فخرسز عیسانی ولادتچون عیسی شانده احزاب ناس اختلاف ایتدیلر
 یهود دیدیلرکه اول ولدزنا در ونصاری ايسه اوج فرقه اولدیلرکه
 اول نسطوریه و یعقوبیه و ملکائییه در نسطوریه دیدیلرکه اول حاشا
 ابن اللهدر اظهار ایدوب بعده انی رفع ایلدی یعقوبیه دیدیلرکه حاشا
 اول کندیلر یه اینوب بعده صعود ایتدی و ملکائییه دیدیلرکه الله تعالینك
 عبدی ونیسیدر (فویل للذین کفروا من مشهد یوم عظیم) ویل کافرله
 شول یومك شهودندنکه هول وحساب وجزاسی عظیمدرکه اول
 یوم قیامتدر ویا خود اول کونده ملائکه وانبیانك والسنة وجوار حنرینك
 شهادتندنکه انلرك کفر وفسوقلری انکله آشکاره اولیسردر (اسمع بهم
 وابصر یوم یأتوننا) انلر عجب ایشیدر وکوررلر یوم قیامتده که بزم
 درکا شمهز کلورلر جدیردرکه انلرك ایشترینه وکورملرینه عجب اولنه
 حالبوکه دنیاده حق ایشتمز وکورمز ایدیلر ویا خود یوم قیامتده انلرك کی
 ایشیدر وکورر اولمز شول وقتده که الله تعالی سورة مائده آخرنده ذکر
 ایتدیکی منوال اوزره عیسی علیه السلامه دیه که سن ناسه الله تعالیدن غیر
 بنی وانا می ایکی اله ایدینك دیدیکدی (لکن الظالمون الیوم فی ضلال
 مبین) لکن کفرله نفسلرینه ظلم ایدنلر اشبو کونده خطاء بینده در
 شول سبیدنکه استماع ونظرک نفعی اولسی وقتنده غفلت ایتدیلر
 (وانذرهم یوم الحسرة اذ قضی الامر وهم فی غفلة وهم لا یؤمنون)
 یا محمد انلری تخویف ایت شول کونله که انده مسی اسائننه ومحسن قلت
 احساننه تحسیر ایدر شول وقتده که حسابدن فراغ ایدیلوب اهل جنت
 جنته واهل نار ناره کیده لر حالبوکه انلر آخرنده ایریشه جکلری شدائد
 واهوالدن غافلدر انی تصدیق ایتزلردر * پیغمبریمز صلی الله علیه وسلم
 ایدر چنانکیم یوم قیامتده اهل جنت جنته واهل نار ناره کیره لر بعده

موت کتوریلوب جنت و نار اراسنده بوغازلنه و برمنادی ندا ایده که
یا اهل جنت سزه من بعد موت یوقدر ویا اهل نار سزه دخی من بعد
موت یوقدر اوله اولسه اهل جنتک فرحلی و اهل نارك تحلی زیادہ
اولہ پیغمبریمز علیہ السلام ایدر اهل جنتک هربری جنتہ کیرمزدن اول
اکا ناردہ کی مکانی کوستریلورکه اساعت ایتش اولسه اکا کیریسردی
تاکہ شکری زیادہ اوله و اهل ناردن هربری ناره کیرمزدن اول اکا جنتده کی
مکانی کوستریلورکه احسان ایتش اولسه اکا کیریسردی تاکہ حسرتی
زیادہ اوله (انا نحن نرت الارض ومن علیها والینا یرجعون) بزارضه
واوزرنده کی مخلوقاته وارث اولورز انلری افنا واهلاکله و آخرتده بزه
رجوع ایدرلر اعمالرینه کوره مجازات اولنورلر (واذکرفی الکتاب ابراهیم
انه کان صدیقاً نبیا) انلره قرآنده ابراهیم علیہ السلام خبرین ذکر ایتکه
اول صدقه ملازم واللہ تعالینک غیوب و آیات و کتب و رسلنه کثیر التصدیق
ونبی مرسل ایدی (اذقالایه) شول وقتن که باباسی آزرین تارخه
دیدیکه اول اصنامه عبادت ایدردی (یا ایت لم تعبد مالا یسمع ولا یتصر
ولا یغنی عنک شیئاً) ای بابا نیچون عبادت ایدرسن برشیئه کی سنک حالکی
بیلز ذکرکی ایشتمز و خضوعکی کورمز و نفع جلبنده و ضرر دفعنده سکا برشیئ
مفید اولمز (یا ایت انی قد جاءنی من العلم مالم یأتک فاتبعنی اهدک صراطاً سوياً)
ای بابا الله تعالیدن بکا طریق مستقیمه دلالت علمی حاصل اولوبدر که
اول علم سنده یوقدر بکا اتباع ایدوب تعلمدن استنکاف ایتکل که سنی طریق
ضلاتدن قور تارم و طریق مستقیم کوسترم (یا ایت لاتعبد الشیطان)
ای بابا شیطانک کفر و شرکدن سکا تزیننه اغترار ایله اکا اطاعت ایتکل
(ان الشیطان کان للرحن عصیا) زیرا که شیطان الله تعالی یه عاصی
اولوبدر و عاصی یه اطاعت ایدن دخی عاصیدر (یا ایت انی اخاف ان یمسک
عذاب من الرحن فتکون للشیطان ولیاً) ای بابا اگر کفر اوزره اقامت
ایدرسک بیلورینکه الله تعالندن سکا عذاب ایریشوب ناردہ شیطانہ
قرین اولورسن (قال أراغب انت عن آلهتی یا ابراهیم لئن لم تنته لارجنک
واهجرنی ملیاً) آزر اکا جوابده دیدیکه یا ابراهیم سن بنی اصنام عبادتندن
صرف ایتکی دیلرسن واللہ اگر سن بونک کی مقالاتله اصنامی تعیب
و تقبیحدن امتناع ایتزسک سنی سب و شتم ایدرین و یا حجاره ایله اولدیرین ایددی

(بندن)

بندن حذر ایت و برنیچه زمان بکا سو یلیوب قاتمدن کیت (قال سلام علیک
سأستغفرک ربی) ابراهیم علیہ السلام اکا تودیع و متارکه و سیئه یی حسنہ ایله
مقابله و جهی اوزره دیدیکه وار بندن سالم اولوب بندن سکا مکروه ایرمسون
بلکه سنکچون ربم جل شانہ دن دیلرینکه مغفرتکه سبب اولور ایمانی سکا
توفیق ایده (انه کان بی حفیاً) اول رب تعالی بکا بر و الطافده بلیغ اولدی
(واعترلکم و ماتدعون من دون الله) و سزی واللہ تعالیدن غیری معبود
اتخاذ ایتدیککز اصنامی ترک ایدرین اوله اولسه اشبو بلده کز کوئادن
ارض مقدسه یه کیدرین (وادعوا ربی عسی ان لا اکون بدعاً ربی شقیاً)
ویالکزر رب تعالی جل شانہ یه عبادت ایدرین یوخسه سزک کی انک عبادتہ
هیچ احدی اشراک ایتزین رجا ایدرینکه ربم جل شانہ یه دعامده خائب اولیم
(فلما اعترلهم و ما یعبدون من دون الله و هبناله اسحاق و یعقوب و کلا
جعلنا نبیا) وقتن که ابراهیم علیہ السلام انلری واللہ تعالیدن غیری عبادت
ایتدکاری اصنامی ترک ایدوب ارض مقدسه یه واردی بزا کا ولدی اسحاق
وانک ولدی یعقوبی هبه ایتدک و ابراهیم و اسحاق و یعقوبدن هر برینی نبوتله
اکرام ایتدک دینلدیکه برکسه که الله تعالینک رضاسین استیو هجرت ایده
الله تعالی اکا دنیاده و آخرتده اکرام ایدر (ووهبنالهم من رحمتنا) و بز انلره
رحمتزدن نبوت و اموال و اولاد و یردک (وجعلنا لهم لسان صدق
علیا) وانلر ایچون جمیع ادیان اهلی عننده ثناء حسن رفیع قیلدق که
هربری انلری تولی و انلره ثنا ایدرلر (واذکرفی الکتاب موسی انه کان
مخلصاً) یا محمد سن انلره قرآنده موسایی ذکر ایلکل که اول موحد
و عبادتده شرک و ریادن مخلص ایدی و یاخود الله تعالی انی دنسدن
خالص ایتشدی (وکان رسولاً نبیا) و اول الله تعالینک خلقه رسولی
اولوب انده انلره شرایع و احکامی ایر کورردی (ونادیناه من جانب
الطور الایمن) بز اسکا طور جانبندن انک یمینه ولی ایدر جهتندن
(انی انا الله رب العالمین) دیو ندا ایتدک و طور مصرله مدین اراسنده
برجبلدر که اسمی زیردر (وقربناه نجیاً) و دخی بز انی کنندیمزه مناجات
ایتکه تقریب ایتدک برحیثله که انک کلام از لیسن ایشندی * دینلدیکه
الله تعالی انی حجب اوزره رفع ایدوب حتی که قلمک صریحی ایشندی
(ووهبناله من رحمتنا اخاه هارون نبیا) و بز موسایه رحمتزدن قرنداشی

لث (۴)

هارون نبی هبه ایتدک که اول اکا معین اوله (واذکر فی الکتاب اسماعیل
انه کان صادق الوعد) یا محمد انلر قرآنده اسماعیلی دخی ذکر ایتدکه
اول وعدنده صادق ایدی اگرچه وعده وفا انبیانک هر برنده موجوددر
لکن غیریده معهود اولمیان وفا انده بولنوبدر که ذبح اولمغه صبره وعد
ایدوب وفا ایدی وبررجه برمکانده انک رجوعنه دکن انتظارده وعد
ایتدیکند نصکره اول رجه انتظار ايله انده اوچ کون بر قولده بریل
اقامت ایدی (وکان رسولاً نبیاً) واول قومنه رسول ونبی ایدی
اشبو دلیلدر که هر رسولک صاحب شریعت اولسی لازم اولیه زیرا که
ابراهیم علیه السلام اولادی انک شریعتی اوزره ایدیلر (وکان یأمر
اهله بالصلاة والزكاة) اول اهل دینه ویا قومنه صلاة وزکاته
امر ایدردی (وکان عند ربه مرضیاً) اول رب تعالی عندنده هر قول
وفعلنده استقامتیچون مرضی ایدی (واذکر فی الکتاب ادریس) وكذلك
قرآنده انلره ادریسی ذکر ایت روایت اولندیکه اکا اوتوز صحیفه نازل
اولدی اسمی اخنوخدر کثرت در سیچون اکا ادریس لقب ویرلدی اول
قلله کتابت ایدن واول ثیاب دیکن واول دیکلمش ثیاب کین واول سلاح
قوشانن واول کفاره قتال ایدن واول علم نجوم وحسابه نظر ایدن ادریس
علیه السلام ایدی (انه کان صدیقاً نبیاً) واول الله تعالیدن اخبارنده
صادق نبی ایدی (ورفعناه مکاناً علیاً) بزانی مکان عالییه رفع ایتدک *
دینلدیکه جنته ویا اسماء سادسه یه ویا رابعه یه رفع اولندی انک سبب
رفعنده کعب وغیریدن روایت اولندیکه اول برکون کونشک اسیسنده
بر حاجتیه کیدوب انک حرندن متأذی اولدی دیدیکه بن انک مجرد حرندن
متأذی اولیجق انک عظم جرميله برکونده بشیوز یلاق مسافه یی
انی کتورمکه قطع ایدن ملک نه مرتبه ده متأذی اولیسردر الهی اول
ملکدن انک ثقل وحرینی تخفیف ایت دیو دعا ایلدی الله تعالی اکا اجابت
ایدوب ملک انک ثقل وحرنده خفت بولدی دیدیکه یارب بونک ثقل وحری
خفتنده حکمتک ندر بیورلدیکه عیدم ادریسک دماسنه اجابتدر دیو اکا
بیلدردی اندن اول ملک الله تعالیدن دینلدیکه ادریس علیه السلامی
زیارته اذن ویره حتی که اذن اولوب ملک ادریس علیه السلامی زیارته
کلدی ادریس علیه السلام اکا دیدیکه بکا علم ایردیکه سنکله ملک الموت

(بیشنده)

بیشنده صداقتک وار ایش دیلمکه بنم اجلم تأخیری ایچون اکا شفاعت
ایده سن تاکه شکر وعبادتیم آرتورم ملک نعم دیوب ملک الموته انی شفاعته
وعد ایتدی وادریسی کندی ايله بيله آلوب مطلع شمس عندنده کنديک
مکانده قودی وملك الموته واروب حاجتن سويلدی ملک الموت دیدیکه
اما اجلی تأخیرینه چاره یوقدر لکن موتی نه وقتده اولور ایدوکن سکا خبر
ویره بن ملک نعم دیوب ملک الموت انک عمری دیوانه نظر ایتدیکند نصکره
دیدیکه اول صاحبک آدمی یه ظن ایدرینکه ایدا موت ایرمیه * زیرا انک
موتی کونشک مطلعی عندنده سنک مکانده اولدیغی حینده ایکن تقدیر
اولمشدر ملک ایتدی الان بن انی کندی مکانده قویوب سکا کلشن ملک
الموت ایتدی اویله اولسه اول انده قبض اولمشدر اندن ملک مکانه
رجوع ایدوب ادریسی انده میت بولدی * دینلدیکه انبیادن درت کیمسه
حیاتده درلر ایکسی یرده درکه اول خضر والیاسدر وایکسی کوکده
درکه اول ادریس وعیسادر * وهب ایدر ادریس علیه السلام ایچون
هرکونده زمانده کی جمیع اهل ارضک عبادتی دکلو یالکز انکیچون عبادت
رفع اولنوردی ملائکه انی تعجب ایدوب ملک الموت انی زیارته الله تعالیدن
استیذان ایتدی اذن اولیجق اکا آدمی صورتنده کلدی وادریس علیه السلام
صائم الدهر ایدی افطاری وقتده انی طعمنه دعوت ایتدی اول ایسه
انکله اکلدن ابا ایتدی اوچ کیره بویه ایدیک ادریس علیه السلام
اکا دیدیکه دیرینکه نه حالو کسه سن بکا کندوکی بیلدره سن دیدیکه
بن ملک الموت اذن الهی ايله زیارتکه کلشن ادریس علیه السلام اکا ایتدیکه
سندن حاجتم وار دیرینکه روحی قبض ایده سن تاکه موت کر بتن ذوق
ایدم بعده روحی کیرو بدنه رد ایده سن که موته زیاده مستعد اولم اذن الهی
ایله انی ایتدی بعده ادریس علیه السلام اکا دیدیکه سکا ایکی حاجتم دخی
واردر که اول بنی ناره ایلنوب ورود ایتدیره سن اندن نصکره جنته ایلنوب
کیدیره سن اذن الهی ايله اول انی ناره ایراد واندن جنته ادخالند نصکره
ملک الموت اکا چیققل که سنی کیرو مکانکه ایرکورم دیدی ادریس
علیه السلام حضرتلری انده بر شجره یه تعلق ایدوب بن بوندن چیقمزین
دیدی الله تعالی اول ایکسی بیسنده حکم اولمغیچون بر ملک کوندردی
ملک اکا دیدیکه کیردک نیچون چیقمز سن دیدیکه الله تعالی دیدیکه

(كل نفس ذائقة الموت) هر نفس موتی ذوق ایدیدر بن ایسه انی ذوق
ایتدم ودخی دیدیکه (وان منکم الا واردةا) سزدن هیچ برکسه یوقدر
الا اول ناره ورود ایدیدر بن ایسه اکا ورود ایتدم ودخی دیدیکه
(وما هم منها بمخرجین) اهل جنت جنته کیردکارنده اندن چیقارلزلر اول
اجلدن بندخی کیردم چیمزین ملک الموته وحی الهی کلدیکه اول جنته
بنم اذغله کیردی بنم امرمله چیقار * ایددی اول انده حیاته در
(اولئك الذين انعم الله عليهم من النبيين من ذرية آدم ومن حملنا مع نوح
ومن ذرية ابراهيم واسرائيل) اشبو سوره اولندن بومحله دکن
ذکر اولنان زکریا ویحیی وعیسی و ابراهیم واسحاق و یعقوب و موسی
وهارون و اسماعیل و ادریس علیهم الصلاة والسلام نبیندن شونلردر که
الله تعالی انلره دین و دنیا نعمتلیک انواعیله انعام ایلدیکه انلرک
بعضی آدم ذریتندندر که اول ادریسدر و بعضی نوحله سفینه ده کوتوردیکمز
کسه ذریتندندر که اول ابراهیمدر که سام بن نوح اولادندندر و بعضی
دخی اسرائیل ذریتندندر که اول موسی و هارون و زکریا و یحیی و عیسا در *
اشبونده دلالت وارد که اولاد بنات ذریتدن اوله (ومن هدینا و اجتبینا)
اشبو ذکر اولنانلر بزم طریق حقه ارشاد و نبوت و کرامتله اصطفای
ایتدکاریمزدن ایدیلر (اذا تتلى عليهم آيات الرحمن خروا سجدا وبكيا)
چان انلره الله تعالینک آیتلی تلاوت اولنسه سجده یه واروب اغلرلردی
ایمدی سزدخی انلر کبی اولک (قال النبي عليه السلام اتلوا القرآن
وابکوا فان لم تبکوا قتبوا کوا) پیغمبریمز صلی الله علیه وسلم ایدر قرآنی
اویوقوب اغله کز اگر کوزلریکز اغلرزه تحزنله اغلر کبی اولک (فخلف
من بعدهم خلف) اول ندیلر دنصکره قوم سوء کلدیکه انلر یهود
و لاحقریدر و یابوامندن بر قومدر که (اضاعوا الصلاة) انلر صلاة
مفروضه یی ترک و یا وقتندن تأخیر ایتدیلر (واتبعوا الشهوات) نفسلرینک
شهواتن طاعت الله اوزره ایشار ایتدیلر (فسوف یلقون غیا) انلر آخرتده
شره ملاقی اولیسرلردر * وهب ایدرغی جهنمه برنهردر که قعری بعید
طعمی خبیثدر * ابن عباس رضی الله عنهما ایدر اول جهنمه بروادیدر که
سائر اودیله انک حرنندن الله تعالی یه استعاذه ایدرلر اول اعداد
اولنشددر زنا یه و شرب خمره و اکل ربایه و عقوق والدینه و شهادت

(زوره)

زوره اصرار ایدنلره که توبه ایتمدن اولهلر (الا من تاب وآمن وعمل
صالحا) مکرکه اندن توبه ایدوب ایمان و عمل صالح ایشلیله (فاولئك
یدخلون الجنة ولا یظلمون شیئا) ایددی انلر جنته ادخال اولنوب اعمالاری
جزاسندن برشیء نقص اولنزلر (جنات عدن التي وعد الرحمن عباده
بالغیب) شول اقامت جنتلریکه الله تعالی انی انلره وعد ایتدی حالبوکه
اول انلردن غایبه در (انه کان وعده ماثیا) اول الله تعالینک وعد ایتدیکی
جنتی وعد اولنسانلره کلوب ایریشور اولدی (لا یسمعون فیها لغوا
الاسلاما) انلر انده فضول کلام ایشتمزلر بلکه بر قول ایشیدرلر که
انده عیب و نقیصه دن سالم اولورلر سلام هر خیری جامع اسمدر یعنی اهل
جنت جنتده انلری وباله ایرکورر شیء ایشتمزلر بلکه انلرک ایشدکارلی بری
برلینه سلامدر و یا ملائکه دن کندیلره سلامدر و یا خود الله تعالیدن
سلامدر (ولهم رزقهم فیها بكرة وعشیا) انده انلره متنعیم عادتق اوزره
بکره و عشیده رزقلی کلور اهل تفسیر ایدر جنتده کیمجه یوقدر که انده
بکره و عشی اوله بلکه انلر ایدا نوردده در بلکه رزقلی نهاریک ایکی طرفی
مقدارنده کلور * دینلدیکه انلر نهاریک وقتنی حجابلر رفعلله و لیلک وقتنی
حجابلرک ارخاسیله بیلورلر * دینلدیکه انلرکه مراد رفاهیت عیش و سعت
یرزقدر (تلك الجنة التي نورث من عبادنا من كان تقيا) اشبو شول جنتدر که
انی عبادمزدن هر تقی اولانه و پررزوارته موروثک مالنی و یرمز کبی *
دینلدیکه متقیلر جنتده شول مسکنلره وارث اولورلر که اهل نار اکا
کیریسرلردی اگر اطاعت ایتسه لر * وقتناکه پیغمبریمز علیه السلام
اصحاب ککف و ذوالقرنین و روحدن سؤال اولندقدده ایرته خبر
و یره یی دیوب ان شاء الله دیمدی اندن وحی اون بش و یا قرق کون منقطع
اولوب زیاده مهموم و محزون اولدی حتی که مشرکلر محمدی ربیبی
ترک ایتدی دینلر بعده وحی ایله جبرائیل علیه السلام اکا کلدیکنده
دیدیکه یاخی جبرائیل نه سبیلله اکنوب کلدک جبرائیل علیه السلام ایتدیکه
(وماتنزل الابرار ربک) بز عبد مأمورز سکا نزولز دکل الابرار
جل شانک امریله در یعنی جبرائیل علیه السلامه الله تعالی امر ایلدیکه
محمد علیه السلامه بویله جواب و یره (له ما بین یدینا و ما خلفنا و ما بین ذلک)

اول الله تعالى به مختصردر هراماكن واحاطتلك على بر مكاندن بر مكانه كه انتقال ايدرز وبر زمانده كه نزول ايدرز وبر زمانده كه نزول ايترز الا انك امر ومشيته در * دينلديكه يعنى او كيمزده اولان امر آخرت وثواب وعقاب وآردمزده اولان امر دنيا وايكيسى اراسنده اولان ايكي نفخه بينيكه قرق يلدز وياخود او كيمزده كي دنيا دن قلان وآردمزده كي دنيا دن قلان وايكيسى اراسنده كي مدت حيات اوله * وياخود خلق اولنماز دن اول وايكيسى اراسنده كي مدت حيات اوله * وياخود او كيمزده كي ارضدر چنانكه اكا نزول مراد ايدوز وآردمزده كي سمار چنانكه اندن نزول ايدوز ايكيسى اراسنده كي هوادر (وماكان ربك نسيا) يا محمد ربك تعالى سنى ترك ايدر اولدى يعنى بزم عدم نزولز نزوله امر اولنمديغز ايجوندر يوخسه الله تعالى سنى ترك ايتسچون دكلدر بلكه بر حكمت ايجوندر كه اول انى اراده ايتدى * دينلديكه اشبو آيتك اولى متقبلك قولنى حكايه اوله چنانكه جنة كيره لى يعنى بزم جنة نزولز دكل الا الله تعالى انك امر ولطفيله در اول جيع امورك مالكيدر اول كرك سالف ويا حاضر ويا مترقيدر اولكه انى بولدق وبولورز انك لطف وفضلنددر * بعده الله تعالى انك اول قولنى تقرير ايدوب ديديكه رب تعالى عمل اهلنك اعمالنى وانك اوزره انلر ايجون وعد ايتديكى ثوابى اونودر اولدى (رب السموات والارض وما بينهما) اول سموات وارضه وايكيسى پيننده كي خلقك ريسيدر اكر اكا نسيان جائز اولسه ربوبيتى مستحيل اولوردى ايمدى اول نسيان دن منهدر (فاعبده واصطبر لعبادته) اويله اولسه اكا عبادته اقبال وانك اوزره اصطبار ايت يوخسه بر مدت وحيك احتباسندن ويا شمس اعدادن ضيق الصدر اولمغل (هل تعلم له سميا) اول الله تعالى به مثل وعديل ويا هيچ احدى الله اسميله تسمى ايتش بيلور ميسن * زيراكه مشركين اكرچه صملىينه اله ديو تسميه ايدملر لكن جدا الله اسميله تسميه ايتما مشردر (ويقول الانسان ائذا مامت لسوف اخرج حيا) يعنى منكر اولان جنس انسان ديركه چنانكه بن فوت اولوب دفن اولنم قبردن حى اولديغ حالدده چيقارمير (اولايدكر الانسان انا خلقناه من قبل ولم يك شيئا) اول انسان تذكر وتأمل ايتزميكه بو حالتدن اول اول هيچ برشى دكل ايكن بزاني خلقله وجوده كتوردك يعنى اكر اول نشاة اولايي تذكر ايتسه نشاة اخرايى انكار

(ايتزدى)

ايتزدى * زيرا بدأ خلق اعاده دن اعجب واغريدر خالقك قدرته دلالتله اقربدر شول حيثيدنكه اعاده بدأ دن اهوردر (فوربك لنحشرنهم والشياطين) ربك جل شانہ حقيچون اول بعثه انكار ايدنلري معادده شول دنيا ده كي قرينلري شياطينله حشر ايدرز زيرا هر كافر آنى اغوا ايدن شياطينله برزنجيره اوروليسردر (ثم لنحشرنهم حول جهنم جثيا) بعده بزاتلري جهنمك حولنده ديزلري اوزره چوكش اولدقلى حالدده احضار ايدرز تاكه سعدا انى كورب كنديلك نجاته غبطه وسرورلري زياده اوله واشقيا ايسه معادلرچون ادخار ايتدكلري عديه نائل اولوب سعدانك انلردن دار ثوابه رجوعلرينه ودخى كنديلر اوزره شمتلرينه غيظ وحسرتلري زياده اوله (ثم لنزعن من كل شيعة ايهم اشد على الرحمن عتيا) بعده هرامتك كفارندن قنغيسى الله تعالى به جرأت وكفرده اشد وجرمده اكر اولانى آروب ناره ادخالده انلري تقديم ايدرز * بعض آثارده ايدر انك جيعى مسلسلين مغلولين اولدقلى حالدده جهنمك حولنه احضار اولند قلدند نصكره جهنم ادخالده الا كفر قال كفر تقديم اولنورلر (ثم لنحن اعلم بالذين هم اولى بها صليا) بعده انلردن ناره دخوله احق اولانه اعلمكه انك كفر وعتوده رياستلرچون ضال ومضل اولدقلىچون عذابلرين مضاعف قيلورز (وان منكم الاواردها) والله سزندن بر كسه يوقدر الا اول ناره ورود ايدر (كان على ربك حتما مقضيا) سزك اكا ورود كز رب تعالىنك اوزريكره انى قضاسى مقتضاسنجه امر لازم اولدى (ثم ننجى الذين تقوا) بعده متقيلري اندن انجا ايدرز (ونذر الظالمين فيها جثيا) وكافرلري اول ناره ديزلري اوزره چوكش ترك ايدرز * اشبو ورودك معناسندن مفسرون اختلاف ايتديلر ابن عباس ايدر كه اول اكترون قوليدر بر وفاجر ناره كيرر بعده الله تعالى اندن متقيلري چيقارر وبر قوم ديديلر كه اول ورودله مراد حضور ورؤيتدر يوخسه دخول دكلدر * زيراكه مؤمنلر ابدا ناره دخول ايتزلر (ان الذين سبقتم لهم منا الحسنى اولئك عنها مبعدون) دلالتيله كه سورة انبياده كلور لكن قول اول اصحدر كه اهل سنت اكا ذاهبلردر شول دليل ايله كيم (قال النبي عليه السلام لا يموت لمسلم ثلاثة من الولد فيلج النار الا تحلة القسم) پيغمبريمز عليه السلام

ایدر برمسلم که انک اوج ولدی وفات ایدر انک ناره دخولی (وان منکم الاواردها) قول شریفنده کی قسم تحله سیچون اولور جابر رضی الله عنه ایدر پیغمبریمز علیه السلامی ایشتمکه دیر ورودله مراد دخولدر ابوککه مؤمنله برد و سلام اولور ابراهیم علیه السلامه اولدیغی کی و کافرله ناره اولور روایت اولندیکه اهل جنت دیه لر که رب تعالی قسم ایشتمدیکه بزنی ناره ایراد ایده دینله که سز ناره ورود ایتدیکز ابوککه اول خامده ایدی اما که (اولئک عنها مبعدون) قولیه مراد انلر ناره عذابدن ابعاد اولمشلردر دینلدیکه اول ورودله مراد صراط اوزرندن عبوردر * زیرا که اول ناره اوزره ممدود جسردر (واذناتلی علیهم آیاتنا بینات) چنان انلره بزم آیتلیمز تلاوت اولنسه که اول بنفسها ویا رسول الله علیه السلام بیاتیله مبینه در ویاخود واضحات الاعجازدر (قال الذین کفروا للذین آمنوا ای الفرقین خیر مقام و احسن ندیا) اهل مککه صحابه نکه فقراسنه دیدیلر که حالبو که انلرده قشافت و عیشلرنده خشونت و شایبلرنده رثاوت اولوب مشرکون ایسه صاحبلرین طرارلر و باشلرین یاغلرلر و فاخر لباسلر کیرلردی ایکی فریقدن مؤمنین و کافریندن قنغیسی منزله خیرلورد و مجلس و مجمعه احسندر و قتا که مشرکون آیات واضحات ایشتمدیلر واکا معارضه و دخلدن عاجز اولدیلر حظوظ دنیادن مالاريله افتخاره باشلدیلر و دنیاده حظلرینک زیاده سن عند الله فضل و حسن احوالارینه استدلال ایتدیلر * زیرا که نظرلری حیاة دنیانک ظاهری اوزره قاصر ایدی اولیه اولسه اول زعم فاسدلی رد اولنوب * دینلدیکه (وکم اهلکنا قبلهم من قرن هم احسن اثا و ریا) قرون ماضیه دن نیچه قرن اهلنی بزاهلاک ایشتمز که انلر اشبو کفره دن مالد اکر و منظر وزینته احسن ایدیلر (قل من کان فی الضلالة فلیمدله الرحمن مدّا) دیکل که اول کسه کیم کفرده اوله الله تعالی انی طول عمر ايله امداد و امهال ایدر که اول اکا استدراج اولوب انکله معاذیری منقطع اوله (حتی اذا راوا ما یوعدون اما العذاب واما الساعة) حتی چنانکه اول کفره وعد اولندقلرین کوره لر یا دنیاده مسلمون انلر اوزره غالب اولوب قتل و اسرلری عذابنه ایردلر ویاخود یوم قیامتده خزی و نکاله ایردلر (فسیعلمون من هو شر مکانا و اضعف جندا) اول وقتده بلورلر که ایکی فریقدن قنغیسی منزله شرلو

(واعوانده)

و اعوانده اضعفدر که انلر نارد و مؤمنلر جنتده اولورلر (ویزید الله الذین اهتدوا هدی) و الله تعالی اهتدا اید نلرک ایمان و یقین آر تورر و قتا که حق جل و علا کافر و امهال و حیاة دنیا ايله تمیعی فضلیچون دکل ایدیکن بیان ایلدی دینلدیکه مؤمنک دنیادن حظده قصوری نقصیچون دکل ایدیکن بیان ایده ایددی الله تعالی انکله اکا اندن خیرلوی تعویض اراده ایدوبدر ویاخود معنی الله تعالی ضلالتده اولانک ضلالتن و هدایتده اولانک هدایتن زیاده قیلور (و الباقیات الصالحات خیر عند ربک ثوابا و خیر مردّا) طاعتکه انک مائده می صاحبیچون ابد الابد قالور اول کرک صلوات خمس ویا (سبحان الله و الحمد لله و لا اله الا الله و الله اکبر) ویا غیریدر ربک جل شانہ عندنده ثوابده و عاقبت و مرجعه خیرلورد شول نعم فانیه دنکه کفره انکله تمیعی اولندقلرینه افتخار ایدرلر (أفرايت الذی کفر باياتنا و قال لا و تین مالا و ولدا) خباب بن الارث رضی الله عنه صایغ ایدی حاص بن وائل نام کافر بعض حلی دوزوب اندن اجر تن استیو واردیغنده حاص اکا محمد کافر اولینجه و الله اجر تنکی ویرمزین دیدی خباب ایدی و الله بن محمد کافر اولمزین نه حیاتمه و نه مماتمه و نه بعثمه حاص ایدی بن مومند نصکره بعث اولنور میم خباب دیدیکه نعم حاص ایدی اولیه اولسه بنم انده مالم وولدلم اولیسردر انده بکا کلدیککده سکا اجر تنکی ویرمین اول سبیدن بو آیت نازل اولدیکه یا محمد خبردار میسن شول کسه یه کیم بزم آیتلیمزه کافر اولوب بعث اولندیغمه بکا مال وولد ویریلور دیو تحقیق ایدر (اطلع الغیب) اول عظم شانندن عالم غیبه می ارتقاء ایدی حتی که الله تعالینک تفرد ایتدیکی علم غیبه مطلع اولوب آخرته اکا مال وولد ویریلور ایدیکنی ادما اوزرینه تألی ایدی (ام اتخذ عند الرحمن عهدا) ویاخود عالم الغیوب رب تعالی عندنده عهدی اتخاذا ایدی حتی که اول اکا انی بیلدردی * زیرا اکا تو صل اشبو ایکی طریقک بریله اولور ویاخود اول کله توحیدمی سویلدی ویا عمل صالحی تقدیم ایلدی * زیرا الله تعالینک اول ایکیسی اوزره ثوابله وعدی عهد کیدر (کلا) اول کافر ایسه نه علم غیبه مطلع اولوبدر و نه الله تعالی عندنده عهد اتخاذا ایدوبدر (سنکتب ما یقول) بز آنک اول اقوالنی اوزرینه کاتبین ملکریمزه یازدیروب یوم قیامتده انک اوزره اکا حساب و جزا

ایدرز (ونمذله من العذاب مدًا) و بزاکا عذابى طويل ایدرز و یاخود عذابى زیاده و مضاعف قیلورز شول سیدنکه کفر و افتراء و استهزای جمع ایلدی (وزنه مايقول) وانك عندننه کی مال و ولده انی اماته ايله غیرى وارث قیلورز و یاخود انك زعججه آخرته کندویه و یریلور دیدیکن مؤمنلرک برینه ایراث ایدوب دیدیکنك غیرى اکا نارد و یررز (ویأتینا فردا) و یوم قیامتده اول بزه مال و ولدنسز یالکز کلور (واتخذوا من دون الله آلهة لیکونوا لهم عزا) مشرکون اصنامی الله تعالیدن غیرى آلهه اتخاذ ایتدیلرکه انلرکه تعزز ایدرلر شول حیثیتله که اول اصنام انلری الله تعالی به ایر کوره وانك عندننه شفا عتلى ایره (کلا) حال انلرک زعم ایتدیکی منوال اوزره اولمز (سیکفرون بعبادتهم ویکونون علیهم ضداً) اول اصنام انلرک عبادتن انکار ایدوب انلره اعدا اولیسرلردرکه مابدلرینه لعنت ایدلر و عذابده اوزر لرینه اعوان اولور لر که نارلری انلرکه ايقساد اولنور (قال النبی علیه السلام من یطلب رضى المخلوق فی معصية الخالق عاد الحامد ذامًا) پیغمبریمز علیه السلام ایدر برکسه که خالقک معصیتنده مخلوق رضاسن طلب ایده انك حد ایدیحیسی ذم ایدر اولور (ألم تر انا ارسلنا الشیاطین علی الکافرین تؤزهم ازا) یا محمد سن خبر و یرلدیکیکه بز شیاطینی کافرلر اوزره تسلیط ایتدک که انلرک طاعتدن معصیتده اغراء و سوق ایدلر (فلا تعجل علیهم) ایمدی سن انلرک هلاکنه عجله ایتکل تاکه سن و مؤمنلر انلرک شرورندن استراحت ایده وارض فسادلرندن طاهر اوله (انما نعدلهم عداً) بز انلرک لیالی و ایام و شهر و اعوامن بلکه دنیا ده تنفس ایتدکلری انفاسن عد ایدرز آجال مقدره لرین استیفاء ایدلر نه انك اوزره زائد و نه اندن ناقص اولور بعده هلاک اولوب شرلرندن استراحت ایدرسز (یوم نحشر المتقین الی الرحمن وفدا) ذکر ایت شول یومیکه بز انده متقیلری قبرلرندن و یا حسابدنصکره ناقهلر اوزره را کبین اولدقلری حالد جهنمه جمع ایدرز * حضرت علی رضی الله عنه ایدر والله انلر یاق حشر اولنلزلر بلکه ناقهلر اوزره که رحلاری آلتوندر و نجائب اوزره که سرجلری یواقیتدر دیلدکلرنده یور یدرلر و دیلدکلرنده طیران ایتدیرلر (ونسوق المجرمین الی جهنم وردا) و مجرملری عطاش اولدقلری حالد شول مایه سوق

(اولنور)

اولنور بهایم کبی جهنمه سوق ایدرز (لا یملکون الشفاعة الا من اتخذ عند الرحمن عهداً) شفاعتده مالک اولزلر مکر اولکه دنیا ده الله تعالی عندننه ایمان و عمل صالحه عهد اتخاذ ایده و یا شفاعتده الله تعالیدن اذن اتخاذ ایده (وقالوا اتخذ الرحمن ولداً لقد جئتم شیئا اداً) یهود و نصارادن ملائکه بی بنات الله زعم ایدنلر دیدیلرکه الله تعالی ولد اتخاذ ایتدی یا محمد سن انلره دکل که سز قول عظیم منکر و یا کذب و زور سویلدیکز (تکاد السموات یتفطرن منه) انلرک اول قولندن سموات قریب اولور که منشق اوله (وتنشق الارض و تخر الجبال هداً) وارض منصدع اولوب طاغلر اوزر لرینه دوشه یعنی اول کله نك هول و عظمی بر حیثیتده درکه بر صورت مخصوصه ايله تصور ایتسه اشبو اجرام عظام انی تحمل ایتیب انك شدتدن تفتت ایدیدی و یا انك فظاعتی الله تعالینك غضبن مجلبه در اگر انك حلمی اولمسه انی تفوه ایدنه غضبندن عالم خراب اولوب تبدل ایدیدی (ان دعوا للرحمن ولداً) شول سیدنکه الله تعالی به ولد نسبت ایتدی (وما ینبغی للرحمن ان یتخذ ولداً) والله تعالی به مستقیم اولمز که ولد اتخاذ ایده * زیرا انك اکا نه حاجتی و نه بر شیئه مجانستی واردر (ان کل من فی السموات و الارض الا انی الرحمن عبداً) سموات و ارضده هیچ احد یوقدر که الا اول یوم قیامتده رب تعالی به خاضع و ذلیل و عبودیتنه مقر اولدیغی حالد کلور ملائکه و عیبی و عزیر و غیر کبی که انك ربوبیتنه التجا و انقیاد ایدرلر عبیدک ملوک ایتمی کبی اوله اولسه انکچون انلردن ولد اتخاذی نیچه لایق اولور (لقد احصاهم وعدهم عداً) انلری حصر و احاطه ایلدی بر حیثیتله که انك حوزة علم و قبضة قدرتندن خارج اولزلر و انلرک اشخاص و انفاس و اعمالی عد ایلدی * زیرا که هر شیء انك عندننه قدر ایلدر نه انی مجاوز و نه اندن ناقص اولور (وکلهم آتیة یوم القیامة فردا) انلرک هر بری یوم قیامتده یالکز کلور بیله سنجه اتباع و انصاردن کسه اولمز (ان الذین آمنوا و عملوا الصالحات سیمجعل لهم الرحمن وداً) شونلر که ایمان و اعمال صالحه ايله متصف اولدیلر الله تعالی انلر ایچون قلوبده مودت احداث ایدر انلرک اول مودت اسبابنه تعرضی اولمقسزین (قال النبی علیه السلام اذا احب الله عبداً یقول لجبریل احببت فلانا فاحبه فیحبه جبریل ثم ینادی

فی اهل السماء ان الله قد احب فلانا فاحبوه فيحبه اهل السماء ثم يوضع له
المحبة في الارض) پیغمبر میز صلی الله علیه وسلم ایدر یقان الله تعالی
بر عبدی سوسه جبریل علیه السلامه دیرکه بن فلانی سودم سندی
انی سوکل اولیه اولسه جبریل علیه السلام انی سوب سماء اهلنله ندا ایدرکه
الله تعالی فلانی سویدر سزدخی انی سویکز اولیه اولسه اهل سماء دخی
انی سورلر بعده اهل ارض قلوبنده اکا سوکو وضع اولنور * دینلدیکه
بر عبد کیم الله تعالی به قلبیه اقبال ایده الله تعالی اکا اهل ایمان قلوبله
اقبال ایدر حتی که انی انلره سودرر (فانما یسرناه بلسانک لتبشربه
المتقین وتذریه قوما لدا) یا محمد بز سکا قرآنی کندی لغتک اوزره انزال
ایتدک تاکه انکله متقلری تبشیر وشدید الخصومه کسه لری انذار ایدمن
دینلدیکه الد لغتده اول کسه در که حتی قبول ایتوب باطلی ادما ایده
ویاشول ظالمدر که مستقیم اولیه ویا اولدر که حتی اصم اوله (وکم اهلکنا
قبلهم من قرن هل تحس منهم من احد او تسمع لهم رکزا) اهل مکهدن
اوکدین بز نیچه قرن اهلنی اهلاک ایتشیر انلردن هیچ برین کورر
ویاصوت خفی ایشدر میسر

سورة طه وهی مائة وثلاثون آية مكية

بسم الله الرحمن الرحيم

(طه) دینلدیکه اول قسدر ویا اسماء الاهدن براسمدر ویاخود سریانجه
یارجل دیمکدر ویا عک لغتده یا انسان دیمکدر ویاخود الله تعالینک
طول وهدا یتله اقسامیدر ویاخود طا طاهر اسمیه وها هادی اسمیه
افتتاحیدر * دینلدیکه پیغمبر میز صلی الله علیه وسلم مکده وحی نازل
اولیحق عبادتده شدت اجتهادندن ایاقلری یوریلوب ایاغذک کاهی
بری وکاهی بری اوزره طورر انک ایله ایاقلرین دیکندرردی * زیرا
کیجه نک کلنی صلاتده قیامله کچورردی اولیه اولسه اشبو طه لفظیه
نفسنه تخفیف ایتکه امر اولندی (ما انزلنا عليك القرآن لتشتقی) بز سکا
قرآنی انزال ایتدک که نفسکی اتعاب ایده سن * دینلدیکه مشرکون انک
عبادتده اجتهادین کور بچک دیدیلر که یا محمد سکا قرآن نازل اولدی الاشقاک
ایچون اولیه اولسه اشبو آیت نازل اولدی (الاتذکرة لمن یخشی)
بلکه انی تذکره وعظه انزال ایتدک هرکسه به که قلبنده خشیت

(ورق ت)

ورقت اولوب انذارله تأثر ایده ویا اول کسه به که الله تعالی انک تخوینله
قلبیه خشیت ایرر ایدیکنی بیه (تنزیلا من خلق الارض والسموات العلی)
تنزیل اولدیغی حالده اول الله تعالیدنکه ارض وسموات علایی خلق ایلدی
(الرحمن علی العرش استوی) که اول رحان جل شانهدر که عرشی اوزره
استیلا ایتدی (له ما فی السموات وما فی الارض وما بینهما وما تحت الثری)
انک ملک مخصوصیدر هر شیئکه سمواتده وارضده وایکیسی اراسنده
هواده وثرانک وراسندهدر ابن عباس ایدر یدی قات ارض نون ظهرندهدر
ونون ایسه بجردهدر نونک رأسی وذنبی عرشک التنده بری برلینه ملتقی
اولور واول بحر ایسه صخره خضره اوزره در که سمانک خضر تی اندندر
واول صخره قرن ثور اوزرهدر وثور ایسه ترا اوزرهدر که اول تراب ندی در
وثرانک تحتنده نه وار ایدیکن الله تعالیدن غیری کسه بیلز واول ثور آغزن
آچوبدر اگر الله تعالی جمیع بحاری بحر واحد قیلوب اول ثورک جوفنه آقسه
جوفنه واقع اولدیغی کبی قوریوب کیدیدی (وان تجهر بالقول فانه
یعلم السری واخلی) اگر سن ذکر الله ودعایی جهر ایدرسک بیل که الله تعالی سنک
جهرکدن غنیدر زیرا که اول سر واخلایی بیلور که اول ضمیر نفسدر
دینلدیکه سر اولدر که انی نفسکده اسرار ایدمن و سردن اخلی اولدر که
الله تعالی انی قلبیه القایدر ویاخود سر اولدر که انی ابن آدم اسرار ایدر
واخلی اولدر که اکا خفی اوله که عمل ایتزدن اول انک فاعلی نه ایدیکنی بیه
ویاخود سر اولدر که انک ناسدن اسرار ایدرسن واخلی ایسه وسوسه در
ویاخود سر عزیمتدر واخلی ایسه قلبیه خطوط ایدوب اوزرینه عزم
اولنمیاندر * دینلدیکه آیتک معناسی الله تعالی عبادک اسرارینی بیلور
وکندی سرینی عبادندن اخفا ایدر انی کنیدین غیری احد بیلز *
اشبو آتده تنبیه واردر که ذکر ودماده جهرک مشروعیتی انی الله تعالی به
اعلام ایچون دکدر بلکه نفسک ذکر تصویر و انک انده رسوخچوندر
ونفسی انک غیریه اشتغالدن منعچوندر وقتا که بونکله الله تعالینک صفاتی
الوهیتی مستجمع ایدیکی ظاهر اولدی ایمدی اول انکله متفرد ومقتضاسیله
متوحد ایدیکن بیان ایچون دیدیکه (الله لا اله الا هو له الاسماء الحسنی)
الله تعالی شول معبود بالحقدر که ارض وسماده مثل ونظیری یوقدر انکچون
صفات علی واردر که انکله ربوبیتده وعبادته مستحق اولوبدر اسماء

شريفه سنك حسنده سائر اسماء اوزره فضلى شول سببندركه معانيسى
تقدیس و تمجید و تعظیم و ربوبیتہ دلالت ایدر ودخی شول افعاله کیم حسنده
اول نهایتدر (و هل اتیک حدیث موسی) یا محمد سکا موسانک خبری کلدیمی
تا که اعباء نبوتی تحملمده و مقاساة شدائده صبرده اکا اقتدا ایدوب عندالله
فوز عظیمه و مقام محموده نائل اوله سن * روایت اولندیکه موسی علیه السلام
قاین اتاسی شعیب علیه السلامدن استئذان ایتدیکه والده سی و اختی
زیارتیچون مدیندن مصره کیده اولدخی اکا اذن و یریحک اهل و مالیه
یوله کیردی شام ملوکی خوفیله طریق قویوب بریه یه کتدی زوجه سی
ایسه وضع حله منتظره ایدی و زمان ایسه ایام شتا ایدی برلیله مظلمه
شدیده البرد مثلجه ده طریق بیلدیکنندن طور غربی ایمن جانبنه سیری
الجا ایدوب کیدرکن زوجه سنی طلق اخذ ایتدی چاقغین چاقوب آتش
طوتدره مدی (اذا رآی ناراً) اول وقتده اراقده برآتش کوردی
(فقال لاهله امکشوا انی آنست ناراً) زوجه سنه و بیله سنجه اولانله
دیدیکه سز بواراده طورک که بن آتش کوردم (لعلى آتیکم منها بقبس
او اجد علی النار هدی) رجا ایدهرینکه اندن سزه شعله نار ایله کلم
ویا خود اونار عندنده بکا طریق کوستر کسه بولم (فلما اتاها) وقتاکه
موسى علیه السلام اول نار قاتنه واردی کورسه که برشجره خضره در
اسفلندن اعلاسنه دکین بریاض آتش انی قوشادوبدر طوتوشوب کیدر
نه آتشک ضوئی شجره نك خضرتن تغییر ایدر و نه انک خضرتی انک ضوئن
تغیر ایدر اهل تفسیر ایدر موسی علیه السلام کوردیکی نور ایدی یوخسه
نار دکل ایدی * دینلدیکه اول حجب الهیه نك بریسییدی (قال النبی
علیه السلام حجابہ النار لو کشفها لاحرقت سبحات وجهه ما انتهى الیه
بصره من خلقه) پیغمبریمز صلی الله علیه وسلم ایدر الله تعالینک حجابی
ناردر اگر انی کشف ایتسه سبحات وجهی خلقندن بصری ایدیکی
شئیته دکین احراق ایدیدی * بعده موسی علیه السلام حشیش یابسدن
برشی * آلوب اول شجره دن یکا یونلدی هر بار که اول ناره قریب اولدیغجه
نار اندن تبعدایدردی موسی اندن بعید اولسه اول نار اکا قریب اولوردی
متحیر اولوب طوردی ملائکه نك تسبیح ایشیدوب اوزرینه سکینه
القاء اولندی (نودی یا موسی انی انا ربک) اول شجره دن برندا کلدیکه

(یا موسی)

یا موسی بن سنک ربکن موسی سرعتله اکا اجابت ایتدی لکن بیلدیکه
اکا ندا ایدن کیم ایدی * دیدیکه صوتکی ایشیدرین لکن مکانکی بیلزین سن
قنده سن * دینلدیکه بن سنک فوقکده و امامکده و خلفکده و قاتکده بن سکا
سندن اقربن اولیه اولسه موسی علیه السلام بیلدیکه اول حالات الله تعالینک
غیری یه لایق دکل ایدیکن تیقن قیلدی (فاخلع نعلیک) ایددی ایاغک
قابنی چیقارغل دینلدیکه زیرا اول حجار میت جلدندن ایدی دباغت
اولندیغی اجلدن * دینلدیکه انک خلعلیه امر اولنسنده حکمت تا که
قدیمی ارض مقدسه ترابنه مس ایله اول ارضک برکتی اکا ایریشه اولیه اولسه
موسى علیه السلام انی قدمانندن خلع ایدوب وراء وادی یه القاء ایتدی *
دینلدیکه انی خلعلیه امر اولندی * زیرا که حافیا مشیده تواضع و ادب واردر
خصوصا که مساجد و بقاع شریفه ده اوله اول اجلدن سلف صالحین
اکا معتادلردی (انک بالواد المقدس طوی) زیرا که سن طوی نام وادی
مطهرده سن (وانا اخترتک فاستمع لما یوحی) بن سنی رسالتیم ایچون اصطفای
ایتمشن * ایددی سکا وحی اولنان شیئی ایشکل (اننی انا الله لا اله الا انا
فاعبدنی) بن اول الله جل شانہ ینکه خلقک بندن غیری معبود بالحق
الهی یوقدر * ایددی بکا اطاعت و بنی توحیدده استقامت ایشکل
(واقم الصلاة لذكری) صلاتی اقامت ایتکه بنی انده ذکر ایدهن
ویا خود تا که بنی انده خاصه ذکر ایدهن بندن غیرینک ذکرینی دکل
ویا خود ذکر اوقاتیچون انی اقامت ایتکه اول اوقات صلاتدر و یا خود
بر صلاتی ترک ایدوب صکره ذکر ایتسک ذکر ایتدیکنده انی اقامت ایت
(قال النبی علیه السلام من نام عن صلاة او نسیها فلیصلها اذا ذکرها
فان الله یقول اقم الصلاة لذكری) پیغمبریمز صلی الله علیه وسلم ایدر
برکسنه که صلوات مکتوبه نك برین قیلدین او یوسه و یا انی قیلغی اونوتسه
ایمدی انی ذکر ایتدیکنده قیلسون بعده اشبو آیتی اکا دلیل کتوردی
وبو آیتک عمومیه استدلال ایدر اولکه اوقات مکروهده صلاة قضاسنی
تجويز ایدر یوخسه ایرته یه انک وقتی مثلنه تأخیر ایتز ابو العالیه دن
روایت اولندیکه قحان برنمازی اونودوب قیلسک نوقتده ذکر ایدرسک
انی قضا ایت اگرچه شمسک طلوع و یا غروبى عندنده ایسه ده زیرا که
الله تعالی (اقم الصلاة لذكری) دیدی (ان الساعة آتیة اکاد اخفیها

تجزی کل نفس بما تسعى) قیامت البتہ اولی سر در دیلرینک بن انک وقتی
 اخفا ایدم * زیرا که انک وقتی بیلنمچک خلق هر وقتده اندن حذر
 اوزره اولورلر و یا خود دیلرینک انی اظهار ایدم تا که هر نفس خیر و شردن
 ایشلدیکیله جزا اولنه (فلا یصدنک عنها من لا یؤمن بها و اتبع هواه فتردی)
 یا موسی قیامت ایماندن سنی صرف ایتسون شول کسه که انی تصدیق ایتز
 و هواسنه اتباع ایدوب امر الله مخالفت ایدر شویله که اکا ایماندن
 صرف اولنه سن هلاک اولورسن (و ماتلک بیمینک یا موسی) الله تعالی
 موسانک وحشتن ازاله و عصاسی منافعه تبیه وانک عصا ایدیکنی
 تقریر ایچون تا که اول ثعبانه تحویل اولندیغنده قورقیه دیدیکه یا موسی
 الکنده کی نه شیدر (قال هی عصای) دیدیکه اول بنم عصامدر دینلیدیکه
 انکله نه عمل ایدرسن دیدیکه (اتوکؤ علیها) یوریدیکمه و یورلدیغمه
 و و شبه عندنده اکا اعتماد ایدرسن (واش بها علی غمی) وانکله قیومنه
 اغاجدن پیراق سلکرینک یه لر (ولی فیها ما رب اخری) و بنم ایچون
 انده اشبو مذکوردن غیری حاجات و منافع اخری واردر که اول یورسه
 انی عاتقی اوزره قویوب ادواتن اکا تعلیق ایدردی وانک شعبه سی اوزره
 ایکی زندینی ارقوری قوردی و اوزرینه کیسه سن قویوب انی کولکه
 ایدینوردی و اکا ایپ باغلیوب قیودن صو چیقاردی و غمه سباع
 تعرض ایتسه انکله دفع ایدردی و حیات و عقاربی اولدرردی کا نه
 موسی علیه السلام فهم ایتدیکه اول سؤالدن مقصود اول عصانک حقیقتن
 و یا اندن کوردیکی منافعن تذکیر اوله حتی اندنصکره اول حقیقتنک خلافتن
 کور یچک و یا اندن عادت خارقه و منافع آخره ظهور ایدیچک تنکم انک
 ایکی شعبه سی کچمه ده شمع کی اشتعال ایدردی و استسقا عندنده اکا دلو
 اولوردی و قیو درین اولدیغنده اول اوزانوردی و عدو ظهورنده
 اول انکچون محاربه ایدردی وانی یره رکز ایتسه اندن صو قیناردی
 نزع ایتسه قینامسی کسینوردی میوه اشتها ایتسه پیراقلنور و میشلنوردی
 اویله اولسه انک آیات باهره و معجزات ظاهره ایدیکن بیلوردیکه الله
 تعالی انک اجلچون احداث ایدوبدر (قال القها یا موسی قالها
 فاذا هی حیه تسعی) الله تعالی اکا یا موسی انی الکندن یره براقل دیدی
 براغیچق عصانک غلظنده برصاری ییلان اولدی بعده شیشوب

(پوردی)

پوردی بدایت حالنه نظرله اکا جان دینلیدی و نهایتنه نظرله ثعبان
 دینلیدی و اول ثعبان ضخامتنده و جان جلا دتنده اولدیغیچون اکا اول
 کا نه جاندر دینلیدی موسی علیه السلام اکا نظر ایدوب کورسه که اول
 برحیه عظیمه اولدیکه کوزلری آتش کی اشتعال ایدر اوغرا دیغی حجر
 و شجری یودر و اسنانیله اشجار عظیمه یی قطع ایدر ولسانیه اصلیق
 چالقدده صریف عظیم ایشیدیلور و سرعته قارنی اوزره یورردی
 موسی علیه السلام اندن زیاده خوف ایتدی (قال خذها ولا تخف
 سنعیدها سیرتها الاولى) الله تعالی اکا دیدیکه انی اخذ ایدوب اندن
 خوف ایتکل بزانی اولکی سیرتنده عصا قیلورز اویله اولسه موسی
 علیه السلام اکنده کی مدرعه سنک طرفن الینه صاردی امر الهی
 اولدیکه البنی کشف ایده برروایتده برملک اکا دیدیکه اگر اول حذر
 ایتدیکنه الله تعالی اذن و یرسه اول مدرعه نك سندن برضرر دفعنه
 مفید اولورمیدی دیدیکه اولزدی الالبوکه ضعیفن ضعفدن خلق اولنیشن
 اندن البنی کشف ایدوب اول ییلانک اغزینه صوقیچق ینه اولکی هیئتنده
 عصایه تحویل اولندی حالبوکه الی انک ایکی شعبه سنده بولندیکه
 توکا ایتدیکنده اکا یاپشوردی مفسرون ایدر الله تعالی دینلیدیکه اکا
 اشبو و یردیکی آیتی کوستره که اکا مخلوق قادر اولمز تا که اول انی فرعون
 عندنده القا ایدوب ییلان اولدیغنده اندن خوف و فزع ایتبه (واضم
 یدک الی جناحک تخرج بیضاء من غیر سوء آیه اخری) البکی قولتغکه
 صوققل که عیسز اولدیغی حالده نیره مشرقه چیقکه که اول عصادن
 غیری صدقکه دلالت اخری اولور (لزیك من آیاتنا الکبری) تا که سکا
 آتلیرمزدن آیه کبری کوستره وز * ابن عباس ایدر موسی علیه السلام
 ید شریفلری اکبر آیات ایدی * زیرا که انک نور ساطعی و ارایدیکه
 لیل و نهارده شمس و قر کی ضیا و یرردی (اذهب الی فرعون انه طغی)
 فرعوننه کیتکه اول عصیان و تمردده حدی تجاوز ایدوبدر وانی بنم عبادتمه
 دعوت ایله (قال رب اشرح لی صدری) وقتسا که موسی علیه السلام
 خطب عظیم و امر جسم ایله امر اولندی دیدیکه یارب صدرمی شق
 و ککش ایت که حق و مشاقه تحمل ایده فرعون و اتباعنک سوء اخلاقنه
 صبر ایدم * زیرا که موسی علیه السلام فرعوندن قتی قورقاردی

لث (٥)

شول سببدنکه شوکتی شدیده و جنودی کثرتده ایدی و اول انکه مقاومت
یا لکز تکلیف اولندیغنه ضیق الصدر اولدی اویله اولسه اندن دیلدیکه
انی حقه توسیع ایده تاکه الله تعالیٰ اذنسر کسینه انک مضرته قادر
دکل ایدیکن بیه و فرعوندن خوفی کیده (و یسرلی امری) و فرعون
رسالتکی تبلیغده مشاقه صبری آسان ایت (واحلل عقده من لسانی
یفقهوا قولى) و لساندن عقده بی حل ایتکه فرعون و قومی کلامی فهم
ایده لر * روایت اولندیکه موسی علیه السلام صغری حالده اول برکون
فرعونک دیزنده ایکن فرعونک یوزینه برطبانجه اوردی و صقالنه یاشوب
چکدی اول اکا یاوزلنوب انی قتل ایتک دیلدی خاتونی آسیه رضی الله عنها
اکا اول صبیدر عقل و تمیزدن خالیدر دیوب فرعونک اکا غضبن تسکین
ایتدی بروایتده موسی علیه السلامی اناسی سوددن کسچک انی کیرو
فرعون و آسیه یه ایلتمشدی اول ایکیمی انی بسلیوب بیوتدیلر حتی که
انی اوغل ایدندیلر برکون اول فرعونک اوکنده اوینار ایکن النده
برقضیه فرعونک باشنه اوردی فرعون اکا یاوزلنوب انی اولدرمک
دیلدی آسیه دیدیکه ای ملک اول برصبی لایعقلدر نفع و ضرری تمیز
ایتمردر حتی تجربه ایت که انی بیه سن قولک صدقنه مطلع اوله سن اویله
اولسه ایکی طشت کتوردوب برینه قورلو آتش و برینه جوهر قودی
بعده ایکسن موسایه عرض ایدیچک دیلدیکه جوهری اله جبرائیل
علیه السلام موسی علیه السلامک الی قور اوزره قودی حتی که قوری
آلوب موسی علیه السلام کندی اغزیه قودی اول سببدن دیلی یانوب
کلامنده عقده اولدی دینلیدیکه النده دخی بیاض اول قورک یاقسنندن
اولدی فرعون انی کیدرمکه چوق علاج ایدوب چاره بولدی بعده موسی
علیه السلام انی حقه دعوتده اول دیدیکه بنی قنغی ربه دعوت ایدرسن
موسى علیه السلام ایتدی اول رب تعالیٰ یه که المده کی بیاضی کیدردی
حالبو که سن انی بندن ازاله یه قادر اولدک و اول عقده نک کمال اوزره
زوالنده اختلاف اولندی بعضیلر دیدیکه (قد اوتیت سؤلک) دلالتیه
زائل اولدی و بعضیلر ایه (هو افصح منی لسانا) هارون لسانده
بندن افصحدر دیو قولنی احتجاجله اول عقده اندن زائل اولیوبدر دیدی
واولکیندن جوابده دیدیکه موسانک سؤالی مطلقا اول عقده نک زوالی

(دکل)

دکل ایدی بلکه افهامه مانع عقده نک زوالی ایدی اول اجلدن
یفقهوا قولى دینلیدی (واجعل لی وزیرا من اهلی هارون اخی) و بکا
اهلندن قرتدشم هارونی وزیر ایتکه بکا معین اوله و بندن بعض ثقلی
تحمل ایده هارون علیه السلام موسی علیه السلامدن درت ییل بیوک
ایدی و لسانده موسی علیه السلامدن افصح ایدی (اشدیده ازری)
اول هارون ایله ظهرمی قوی ایت (واشركه فی امری) وانی
نبوت و تبلیغ احکام رسالت امرنده بکا شریک ایت (کی نسجک کثیرا
وندکرک کثیرا) تاکه سنی هر حالده تقدیس و بزه و یردیکک نعمتک
اوزره سکا جد و ثنا ایدرز (انک کنت بنا بصیرا) زیرا که سن بزم
احوالزه عالمسن که تعاون بزی اصلاح ایدر و هارون ایه امر شریفک
اقامتنه نه کوچک معین اولور (قال قد اوتیت سؤلک یا موسی) الله تعالی
دیدیکه یا موسی مسؤلک سکا و یرلیدی (ولقد مننا علیک مرّة اخری)
یا موسی بزسکا اشبو مرّه دن اوکدین انعام ایتدک (اذ اوحینا الی امک
مایو حی) شول وقتن که بزسک اناکه الهامله و یامنامنده و یازمانک
نبیسی لسانده و یامک اخبار یله وحی ایتدک انی که اول وحی ایله بیلنور
لکن نبوت وجهی اوزره دکل (ان افذیه فی التابوت فافذیه فی الیم)
که انی تابوته قویوب بعده اول تابوتی موسی ایچنده ایکن بحر یله براقفل
(فلیلقه الیم بالساحل) بعده نیل انی کناره براقسون (یاخذہ عدوّ لی
وعدوّ له) تاکه انی بنم عدوم و هم انک عدوسی فرعون السون *
ایمدی اول وحی الهام موجبجه امّ موسی بر تابوت دوزدیروب ایچنه
آتش پنبه قودیغند نصکره موسی علیه السلامی انک اوزره وضع ایلدی
بعده اول تابوتی محکم برکیدوب شقوقنی زفتلکله ایچنه صو کیرمز ایتدی
بعده انی نیله براقدی مکر اول نیلندن فرعونک دارینه اوغرار برنهر کبیر
وار ایدی بر وقتده اول خاتونی آسیه ایله برکه باشنده اوتوررلردی
کورسه لر که اول نهردن بر تابوت کلور امر ایلدی غلمان و جواری
انی چیقاروب کتوردیلر تابوتک قیاغن آچوب ایچندن موسایی الدیلر
فرعون انی کور یچک الله تعالیٰ (والقیّت علیک محبة منی) یا موسی
بندن سنک اوزریکه محبت القا ایتدم دیو بیوردیغی قول شریفی
مصدقجه ناچار فرعون اکا محبت ایتدی * ابن عباس ایدر یعنی
الله تعالی اکا محبت ایتدی و خلقنه دخی انی تحبیب ایتدی * عکرمه ایدر

هر کیمسه که انی کورسه لابد اکا محبت ایدردی (ولتصنع علی عینی)
 تا که بزم مرأی و منظر مزده تربیه اولنه سن و یاخود عملک بنم نظر مده
 اولوب امرمه مخالفت ایتیه سن (اذتمشی اختک فتقول هل ادلکم علی
 من یکفله) شول وقتده که اختک مریم سنک خبرک تعرف ایچون
 چقمشدی فرعونک اوینه کلچک کورسه که موسی انلرک الله ایرمشدی
 هیچ بر مرأک ثدینی قبول ایتدیکندن انکیچون بر مرضعه استرلردی
 دیدیکه سزی اول صبیکی ارضاع ایدر کیمسه یه دلالت ایده یممی
 دیدیلر که نعم اولیه اولسه انلره موسانک اناسین کتوردی ثدینی و یردیکی کبی
 قبول ایتدی (فرجعناک الی امک کی تقر عینها ولا تحزن) ایددی یاموسی
 سنی کبرو انا که رد ایتدک تا که لقا کله طیبه النفس اولوب سنکیچون
 حزن چکمه (وقلت نفسا) و یاموسی سن بر کافر قبطی بی قتل
 ایتدک * دینلرکه اول وقتده موسی علیه السلام اون ایکی یاشنده ایدی
 (فجیناک من الغم) سنی انک قتلی غمندن تنجیه ایتدک عقاب اللهدن
 خوفکله و فرعونک قصاصی خوفندن مغفرتله و مدینه هجرتکله
 (وقتناک فتونا) بز سنی اختبار و ابتلاء و اخلاص ایتدک و یا بز سنی محنتدن
 محنته اوغراتدیغمر دینصرکه هر برندن سنی خلاص ایتدک که سنی اناک
 شول سنهده حامل اولدیکه انده فرعون اطفالی ذبح ایدردی بعده
 سنی انا که تابوت ایچنده نیله براغوردی بعده سکا انا کدن غیرینک سودینی
 حرام ایدوب حتی که سنی اناک امرردی بعده فرعونک لحیه سنه
 یا بشغله اول سنک قتلکه قصد ایتدی بعده جوهردن بدل سکا چره
 تناول ایتدیردی بعده قبطی کافری قتلکله خائف اولدیغک حالده سنی مدینه
 کوندردی (فلبثت سنین فی اهل مدین) اهل مدینه شعیب علیه السلام
 عندنده بکرمی سکزیل مکت ایتدک انک اون ییلی شعیب علیه السلام
 قزی صفرائک مهریچون ایدی و اون سکزیل ییلی ایه محض اقامت ایدی
 (ثم جئت علی قدر یاموسی) بعده شول موعده اوزره کلدک که بن انی تقدیر
 ایتدکه سکا انده سویلیم و نبوت و یردم و یاخود سنک قرق سنه یه ایردیکنده
 کلدک که انده انبیایه وحی اولنور و رسالت و یریلور (واصطنعتک لنفسی)
 و سنی وحی و رسالت ایچون اختیار ایتدم تا که اراده و محبت اوزره تصرف
 ایده سنکه اول انک رسالت قیامیدر و یاخود سنی حجتله قیام ایدر و بتله خلقم

(بیننده)

بیننده مخاطب اولور قیلدم کانه انلر اوزه حجتی بن طور غریب
 و انلره خطاب بن قیلرم (اذهب انت و اخوک بآتانی) ایددی یاموسی
 سن و قرنداشک هارون بنم دلائلم و معجزاتمله کیدک (ولا تلیا فی ذکری)
 و بنی تسبیح و تقدیسدن و بکا التجادن اوصانم کز و اوشانم کز (اذهب
 الی فرعون انه طغی) ایکیک فرعون کیدک که اول تکبر و ادما ربوبیتله
 طغیان ایتدی (فقولاله قولالینا) اکا رفق و لطفله سویلکز یوخسنه علف
 و زجر ایتدک * دینلرکه اکا کنیه سیله یا ابا العباس یا ابا الولید دیو خطاب
 ایلکز و یاخود دیکر که میل ایدر میدک که کفر و طغیانندن تطهر ایده سن و بن
 سنی ربک معرفتنه ارشاد ایدوب انک واجباتی اداسنه کیده سن * روایت
 اولدیکه موسی علیه السلام اکا دیدیکه اکرا ایمانه کلور سک رب تعالیدن
 دینلرکه شهابک کتیه و ملکوتندن غیری وجهله یتیه و مطعم و مشرب
 و منکح لذتی موتک حیننه دکن سکا باقی اوله و موتکده مدخلک جنت اوله
 فرعون اشبو مواعیددی ایشدیکک موسی علیه السلامه اطاعته
 میل ایتدی * ایددی هامانله مشورت ایدیم دیوب کتدی هامان اکا
 دیدیکه بن سنی صاحب عقل و رأی ظن ایدردم * ایددی سن رب ایکن
 مربوب و معبود ایکن عبد اولقمی دیلرسن دیوانی اول رأیندن تحویل
 ایتدی (لعله یتذکر او یخشی) شول رجا و طمعک اوزره که اول سنک
 قولکزله اتعاظ و خشیت ایده قضاء الله ایه انک و راسنده در اگر دینورسه
 الله تعالی انک ایمانه کلز ایدیکن بیلور کن موسی و هارونی اکا رسالده
 فائده اولور دینور که انکله اوزرینه حجت لازم اولور و عذری کس یلور
 و اول سبیدن ظاهر اولان آیاتله متحقق اتعاظ ایدر و متوهمه خشیت ایرر
 بر رجل یحیی بن معاذ عندنده (فقولاله قولالینا) آیتن او قوی یحیی
 دیدیکه الهی بن الهن دینه رفقک بویله اولیحق سن آلهسن دینه برک نیچه
 اولیسردر (قالا ربنا اننا نخاف ان یفرط علینا او ان یطغی) موسی و هارون
 دیدیلر که یاربنا قورقارز که اول بزه عقوبتله تعجیل ایده دعوت تمامنه
 و معجزه اظهارنه صبر ایتیه و یاخود بزه اساءتده حدی تجاوز ایدوب
 تبلیغ رسالتدن عاجز اوله وز (قال لا تخافا انی معکمما اسمع واری)
 الله تعالی انلره دیدیکه سز اندن قورقکز بنم حفظ و نصرتم سز که در
 و سز که انک بیننده جاری اولان قول و فعلی ایشیدر و کوررین هر حالده

سزدن انك شريفى صرف ايدوب نصرتم ايجاب ايدر شىء احداث ايدرين
 (فأتياه فقولاً انا رسول ربك) ايمدى ايكيكز اكا واروب ديكز كه بز سنك
 ربك جل شاننه نك سكا كوندر لمش رسولارى يز (فأرسل معنا بنى اسرائيل
 ولا تعذبهم) بزمله بنو اسرائيل صاليوير تكاليف شاقه و قتل ولد ايله انلره
 تعذيب ايتكل * اشبو دليدر كه مؤمنلرى كفره دن تحليص كفره يي ايمانه
 دعوتدن اهم اوله (قد جئناك باية من ربك) بز سكا رب تعالىدن صدقزه
 دلالت ايدر آيتله كلكشز * ايمدى اول آيتى كوروب ربوبيت ادعاسين ترك
 ايلكل فرعون ديديكه اول آيت ندر موسى عليه السلام اكا لين چيقار ديكه انك
 كوش كبي شعاعى وار ايدى (والسلام على من اتبع الهدى) ملائكه نك
 وياخزانه جنتك سلامى هدايته اتباع ايدنلر ايجوندر وياخود دنياه
 و آخرته سلامت انلر كدر (انا قد اوحى اليها ان العذاب على من كذب
 وتولى) بز وصى اولنديكه الله تعالىنك آخرته دوام اوزره عذابى رسولارى
 تكذيب ايدوب حقندن اعراض ايدنلر اوزره در (قال فن ربكما يا موسى)
 فرعون ديديكه يا موسى سنى وقرنداشكى بكا ارسال ايدن ربكز نه وصفلوردر
 (قال ربنا الذى اعطى كل شىء خلقه ثم هدى) موسى عليه السلام ايتدى
 بز زم ربم جل شاننه شول و صفلوردر كه هر شيئه صلاحن و يروب انى اصلاح
 ايدر شيئه هدايت ايتدى وياخود هر شيئه صورت و شكل و يرديكه اول
 انك كالنه مطابق اولور وياخود خليفه سنده هر شىء و يرديكه اكا احتياج
 اولوب انكه ارتفاق ايدرلر بعده اكا تعريف ايتديكه اول و يريلان
 شيئه نيچه ارتفاق ايدر وانكه بقا و كالنه نيچه توصل ايدر اول كرك
 اختيارى ويا طبيعيدر وياخود هر شيئه زوجنى و يردى يعنى انسانه مرأه
 و بعيره ناقه و فرسه رمكه و حاره اتان و يروب بعده هر برينه ذكر ك
 اثابه كيفيت اتيان الهام ايتدى (قال فا بال القرون الاولى)
 فرعون ديديكه قرون ماضيه و اتم خاليه نك موتلرند نصكره سعادت
 و شقاوتدن حاللرى نيچه در كه انلر اوئانه عبادت و بعته انكار ايدرلردى
 (قال علمها عند ربى فى كتاب) موسى عليه السلام ايتدى انلر احوالى
 على ربم جل شاننه عندنده لوح محفوظده مکتوبدر (لا يضل ربى ولا ينسى)
 و بنم ربم جل شاننه خطا ايتز نه اندن بر شىء و نه اول بر شيئن فائب اولور
 وانلر امرندن بر شىء اوتمز بلکه هر برينه اعمالرينك جزاسين ايدر

(دينلديكه)

دينلديكه موسى عليه السلام انك علمنى الله تعالى به حواله ايتدى
 زيرا كه تور انك نزولندن اول انى اول بيلمزدى تورات ايسه فرعون و قومنك
 هلا كند نصكره نازل اولوبدر (الذى جعل لكم الارض مهذا)
 ربم جل شاننه شول اله قادر در كه ارضى سزه فراش قيلدى (وسلك
 لكم فيها سبلا) وسرك ايجون انده جبال و اوديه و برارى بيننده سبيللر
 قيلديكه بر ارضدن بر ارضه سلوك ايده سركه منافعه ايره سز (وانزل
 من السماء ماء) و سمدان يغمور ايندردى * اشبونكه موسادن اخبارى
 تمام اولدى بعده الله تعالى كنيدن خبر و يروب ديدى (فاخرجنا به
 ازواجا من نبات شتى) اول يغمور ايله بز يردن نباتدن اصناف مختلفه
 بتورر زكه انك كيمى ناسه و كيمى بهائمه صالح اولور (كلوا وارعوا انعامكم)
 ايمدى اندن كنديكزه صالح اولانى كنديكز ييكز و بهائمه صالح اولانى
 اكا علف ايلكز (ان فى ذلك لايات لاولى النهى) اشبو مذكورده
 عقول كامله صاحبلى چون آيتلر واردر انكه قبايح و معاصيدن منتهى
 اولورلر (منها خلقناكم) بز سزى اول ارضدن خلق ايتدك كه تراب اول
 آبائكرك اصل خلقيدر و مواد ابدانكرك اوليدر (وفيه نعيذك) وسزى
 موته و تفكيك اجزا ايله ينه اول ارضه اعاده ايدهرز (ومنها نخرجكم
 تارة اخرى) وبعث عندنده سزى بر كره دخی شول ترابه خلط اولمش
 اجزاء مفتحه كزى صورت سابقه ده ارواحكزى ردله اول ارضدن اخراج
 ايدهرز (ولقد أريناه آياتنا كلها فكذب و ابى) بز فرعونه آيتلر يمزك
 كليسن كوستروب صحت بيلدردك اول ايسه فرط عنادندن موسابى
 تكذيب و اكا ايمانندن ابا ايتدى (قال أجهننا لتخرجنا من ارضنا بسحرك
 يا موسى) و ديديكه يا موسى بسحركه بزى ارض مصر دن چيقار مغه مى
 كلكدك (فلنأتينك بسحر مثله فاجعل بيننا وبينك موعدا لا نخلفه
 نحن ولا انت مكانا سوى) ايمدى بز دخی سكا سنك بسحرك مثلى بسحرله
 كه لم اويله اولسه بزمله سنك بينكده اجل و ميقات تعيين ايتكه
 بر مكان مستويده بز و كرك سز حضورده خلف ايتيه وز (قال
 موعدكم يوم الزينة و ان يحشر الناس ضحى) موسى عليه السلام
 ديديكه موعديكز يوم الزينه اولسونكه اول انلر يوم عيدى ايدى كيم
 هر سنده انده تزئين و اجتماع ايدرلردى بر قولده اول يوم نيروز وياخود

يوم عاشورايدي وناس اول يوم زينه نك وقت ضحاسنده موعده بولسونلر تاكه ريبدن وشبهه دن ابعداوله (فتولي فرعون فجمع كيده ثم اتى) فرعون اهلينه رجوع ايدوب مكر وحيله وسحره سنى جمع ايتدكدنصكره اتباعيله محل موعوده به كدى (قال لهم موسى ويلكم لا تقفروا على الله كذبا فيسختكم بعذاب وقد خاب من افترى) موسى عليه السلام انلره ديديكه الله تعالى ويل عذابن سزه الزام ايدو الله تعالىنك آياتنى سحر در ديمكزله اكا كذب وافترا ايتكزكه سزى عذابيله اهلاك ايتيه حالبوكه افترا ايدن مغبون اولدى (فتنازعوا امرهم بينهم واسروا النجوى) وقتاكه سحره موسى عليه السلامك كلامن ايشتديلر انك امرنده تنازع ايدوب برى برلرينه ديديلر كه بوكلام سحره كلامندن دكلدر وفرعونندن خوفله كلاملرين اسرار ايتديلر كه اكر موسى بزه غالب اولورسه اكا اتباع ايدو لم ويلخود اول سحره موسى عليه السلامه اعتراض ايدو جكلرى شيئده تنازع واختلاف ايدوب سردن تشاور ايتديلر * ديدليكه اول تنازع واسرار ايدنلر فرعون وقومى ايدى (قالوا ان هذان لساحران يريدان ان يخرجاكم من ارضكم بسحرهما ويذهبوا بطريقتكم المثلثى) فرعون وقومى ديديلر كه اشبو موسى وهارون ايكي ساحرلر دركه سحرلريله سزى ارضكز مصر دن چيقاروب كنديلر سزك افضل مذاهب اولان مذهبكزه كتمك ديلرلر * ديدليكه سحره نك اسرارلرى اشبو كلامك تلفيق وتزويرنده ايدى زيراكه موسى وهارونك حق اوزره ايديكن بيلديلر تاكه ناسى انلره اتباعدن تثبيط ايدو لر چنانكه انلر معجزه ايله كنديلرلر سحرلرين ابطال ايدو لر (فاجمعوا كيدكم) ايدى موسى وهارونه قادر اولديغكز هر مكر وحيله وسحر يكزى كتورك وياخود جيعكز اختلافن سز مجتمعين اولديغكز حالده كيديكز اوزره عزم ايدك (ثم اتوا صفا) بعده صف اولوب كللك كه هيتكز اشد اوله * ديدليكه سحره يمش يك كشى ايديلر هر برينك النده جبل وعصا اولوب دفعة جيعى موسى عليه السلام اوزره يونديلر (وقد افلح اليوم من استعلى) اشبو كونده غالب اولان مطلوبنه فائز اولور ديديلر * ديدليكه بوقول فرعونك سحره بى موسى عليه السلام اوزره غلبه به تحريضدر (قالوا ياموسى اما ان تلقى واما ان تكون اول من القى) سحره الله تعالىنك

(الهاميله)

الهاميله تأدبا موسى عليه السلامه ديديلر كه عصا كى او كدين يره سمنى القا ايدرسن يوخسه عصاسين او كدين القا ايدن بزى اوله لم (قال بل القوا) موسى عليه السلام انلرك ادبى مقابله سنده ادبى اختيار ايدوب ديديكه سز او كدين القا ايدك مع هذا انده انلرك سحرينه عدم مبالات اولور تاكه انلر اقصى وسعيلرين استنفاد دنصكره الله تعالى سلطاننى اظهار ايدوب حق احقاق وباطلى ازهاق ايدو وقتاكه سحره القا ايتديلر (فاذا حباهم وعصبيهم يخيل اليه من سحرهم انها تسعى) سحرلرندن حبال وعصيلرى موسايه ظاهرده يورر كوزكدى * زيراكه انلر اول سحر آلاتيه زييق سور مشلردى اوزرلرينه كوشن طوقنيچق اضطراب ايتدى اوليله اولسه موسى عليه السلام انى تحرك ايدر تخيل ايتدى (فاوجس في نفسه خيفة موسى) موسى عليه السلام انك اول حالتندن جبله بشريه مقتضاسنجه نفسنده خوف اضمار ايتدى وياخود قومه امر ملتبس اولوب انك امرنده شك ايتريله اكا عدم اتباعلرندن خوف ايلدى (قلنا لا تخف انك انت الاعلى) موسايه ديدك كه قورققل سن انلر اوزره غالب وقاهر سن (وألق ما فى يمينك تلقف ماصنعوا) وينده كى عصا كى القايت انلرك حبال وعصيلرى كترته واجراملرى عظمتنه مبالات ايتكلك كه سنك عصا نك اثرى انلرك آلاتى اثرندن اعظمدر كه انلرك صنيعى اولان اشيا بى التقام وابتلاع ايدر (ان ماصنعوا كيد ساحر) انلرك صنيعى اولان شىء ساحر سحرينك كيديدر (ولا يفلح الساحر حيث اتى) ساحر قنده اولور وقجرويه اقبال ايدرسه فلاح بولر * جند بن عبد الله دن مرفوع حديثدر كه (اذا وجدتم الساحر فاقتلوه) ساحرى بولديغكزده قتل ايدك بعده اشبو آيتى اوقودى يعنى ساحر قنده بولنورسه قتلدن امان ويرلز وقتاكه موسى عليه السلام عصاسين القا ايدوب سحره نك حبال وعصينى يوتدى سحره عندنده انك آيات الله دن بر آيت ومعجزاتدن بر معجزه ايديكن محقق اولوب سحر دكل ايديكى متيقن اولدى (فالتقى السحرة سجدا) اوليله اولسه سوه صنيعلرينه توبه به توفيق اولنوب كوردكلرى آية الله تعظيم ايجون سجده به القا اولنديلر * ديدليكه اول سجده لرنده جتده كى منازللرى كوسترلديلر بعده اندن باشلرين قالدريچق (قالوا آمنارب هارون وموسى)

بن هارون وموساك ربى جل شانہ ۛ ایمان كتوردك دیدیلر (قال آمتم له قبل ان آذن لكم انه لكبيركم الذى علمكم السحر) فرعون سحره ۛ دیدیکه بن سزه اذن ویرمدین اكا ایمانی كتوردیکز زیرا اول سزك سحر علمده وفتنده عظیمكز واعلمكز در كه سزه سحر تعلیم ایدوبدر (فلا قطعن ایدیكم وارجلکم من خلاف) سزك صاغ الاریکزله صول ایا قریكزی قطع ایده ین (ولا صلبنكم فی جذوع النخل) وسزی خرما بوداقرینه صلب ایدین (ولتعلمن انا اشد عذابا وابق) بيله سزكه قنغیز عذابده اشددر اكا ایمانكز اوزره سزه اشد عذابى بنی ایدرین یوخسه اكا ایمانی ترككز اوزره موساك ربیسی می ایدر وقنغیزك عذابى ادومدر (قالوا لن نؤثرک علی ما جاءنا من الیبنات والذی فطرنا) سحره فرعونہ دیدیلر كه سنی اختیار ایتز موساك كتوردیکی معجزات واضحاتی و بزى خلق ایدن الله تعالینك رضاسی اوزره (فاقض ما انت قاض) ایدى بزم شانزده نه شیء قضا ایدرسك ایت (انما تقضى هذه الحیاة الدنیا) سن قضا ایتدیکك تقدیرجه هوا ورايك مقتضاسنجه اشبو حیاة دنیاده قضا ایدرسن حالبوكه آخرت ابقادر (انا آتمنا ربنا لیغفر لنا خطایانا وما اكرهتنا علیه من السحر) بز ربمز جل شانہ ۛ ایمان كتوردك كه اول بزدن صدور ایدن كفر وعصیانى ودخی معجزه معارضده سحرردن شول فعلنه بزى اكره ایتدیکكز شیء مغفرت ایده (والله خیر وابق) الله تعالی ثوابده سندن خیرلو وعذابده ابقادر ویاخود الله تعالی اطاعت اولمغه سندن خیرلو واکا عصیان ایدنه عذابى ابقادر اشبو قول فرعونك شول ذكرى یکن (ولتعلمن انا اشد عذابا وابق) قولنه جوابدر اكر دینورسه كه سحرهك (وما اكرهتنا علیه من السحر) قولارى نیچه توفیق اولنور حالبوكه انلر موعده مختارین اولدقلى حالده كلدیلر فرعونك عزتیچون بز غالبلز دیو یمین ایتدیلر * دینلديكه فرعون بر قومه سحر تعلمنه اكره ایدردیکه سحر ك اصلی اونودیلوب كتمه مقاتل ایدر سحره یتش ایكى كسه ایدیلر ایکیسی قبطدن ویتشى بنوا سرائیلدن ایدی فرعونك اكره ۛ بنوا سرائیلدن اولانلره ایدی روایت اولندیکه سحره فرعونہ دیدیلر كه بزه موسایی او بودیغنده کوستر اولدخی نعم دیوب انی انلره او یورکن کوستردی کورسه لر كه

(عصاسی)

عصاسی انی حراست ایدر فرعونہ دیدیلر كه بوسحر دكلدر زیرا ساحر او بودیغنده سحرى باطل اولور فرعون ایسه انلرك اول قولنه التفات ایتوب كرها انلره سحرى ایشلندی (انه من یأت ربہ مجرما فان له جهنم لا یموت فیها ولا یحی) برکسه كه یوم قیامتده رب تعالی ۛ مشرك وعاصی اولدیغی حالده كه اكا مأوی جهنم اولور انده اولمز كه عذابدن استراحت ایده وشول حیاته دخی اولمز كه اول حیات اكا نفع ایده (ومن یأته مؤمنا قد عمل الصالحات فاولئك لهم الدرجات العلی) واولكه یوم قیامتده رب تعالی ۛ مؤمن اولوب عمل صالحه كه * ایدى اول وصفلو كسه لره درجات عالیه واردر (جنات عدن تجرى من تحتها الانهار خالدين فیها) كه اول جنات عدنر كه اشجارى آلتندن نهرلر جاری اولور انلر اول جناتده دائمین اولدقلى حالده (وذلك جزاء من تزكى) اشبو ذكر اولنان فضائل شول كسهك جزاسیدر كه كفر ومعاصی ادناسندن تطهر ایده اشبو آیات ثلاثه احتمال اولور كه سحره كلامندن اوله ویاخود الله تعالیدن ابتداء كلام اوله (ولقد اوحینا الی موسی ان اسر بعبادى فاضرب لهم طریقا فی البحر یسلا لا تخاف دركا ولا تخشى) بز موسایه وحی ایتدك كه عبادم بنو اسرائیله کیجه مصردن کیدوب عصاکی بحره اورمغه انلر ایچون انده طریق یابس قیلغل كه انده فرعونك سزه ادراکی وبحرك سزی اغراقی خوفن ایتیه سن (فاتبعهم فرعون یجنوده فغشیهم من الیم ما غشیهم) فرعون جنودیه بنو اسرائیله ایریشیچك بنو اسرائیل اول بحرى یكدیكند نصكره فرعون وجنودینی بحردن شول قصه سین ایشیدوب کنهنی بیلدیکك شیء قاپلدى (واضل فرعون قومه وما هدی) فرعون قومنى اغواؤه هلاك ایدوب طریق رشاده هدایت ایتدی بعده الله تعالی بنو اسرائیله اولان منتلرین ذكر ایدوب دیدیکه (بابن اسرائیل قد انجینا کم من عدوكم) سزی عدو كز فرعون وقومندن انجا ایتدك (وواعدنا کم جانب الطور الایمن) وموسایه مناجات ایچون واکا توراتی انزال ایچون طور جانبنده موساك جانب یمینده سزه مواعده ایتدك (ونزلنا علیكم المن والسلوی) وتهده سزه من وسلوی ایندردك وسزه دیدك كه (كلوا من طیبات ما رزقناكم) سزه ویردیکمز هر مأكولك لذائذ ویا حلالندن یكز

(ولا تطغوا فيه فيحل عليكم غضبي) واول سزه وريدكمز شيئده طغيان
 ايتكمز شكرنده اخلاصه وانده حدود الهي تجاوز ايله اول كرك
 سرف ويا بطر ويا مستحقدين منع ويا غيريدر شويله كه انده طغيان
 ايد سز اوزريكزه عذابم لازم اولور (ومن يحلل عليه غضبي فقد هوى)
 واول كسه كه اوزرينه عذابم لازم اوله هلاك اولور ويا خود اول هاوليه
 دوشر (واني لغفار لمن تاب وآمن وعمل صالحا) بن مغفرتده بليغن
 اول كسه يي كه شر كدن توبه ايد وهر تصديق واجب اولور شيئي
 تصديق ايد و فرائضي ادا ايد (ثم اهتدي) واني الله تعالىدن توفيق
 ايد كن بيله ويا خود مونه دكين اسلامه ملازم اوله ويا خود انكچون ثواب
 اولديغن بيله ويا علمي تعلم ايد كه عملك كيفيته عالم اوله ويا استقامت ايد
 ويا سنت وجماعت اوزره اقامت ايد (وما اعجلك عن قومك ياموسي)
 وقتا كه موسي عليه السلام توراتي اخذ ايچون قومندن يتش رجل اختيار
 ايتديكه كندى ايله بيله طوره كيدلر كيديجك موسي عليه السلام
 رب تعالى يه اشتياقندن انلردن آريلوب ايلرو كتدي وانلره سز كلوب
 بكا ايريشك ديو امر ايتدي الله تعالى اكا ديديكه ياموسي سني نه شئي اعجال
 ايتدي حتى كه قومي كيرو قويوب سن انلردن ايلرو كلدك (قالهم
 اولاء على اثرى وعجلت اليك رب لترضى) موسي عليه السلام ديديكه
 يارب بن انلردن برقاج خطوه ايلرو كلشن كه اول دكوتقدم عادتده معتدبه
 اولمز بنمله انلر بيننده اولان مسافدهده رفته برى برلرين تقدم ايدلر
 بن ايسه يارب سكا عجله ايتدمكه بدن راضى اوله سن زيرا كه امتثال امره
 ووفاي عهده مسارع رضاكي ايجاب ايدر (قال فانا قد قضا قومك من بعدك
 واصلهم السامري) الله تعالى ديديكه سن قومك آراسندن چيقيجك
 هارونله تخليف ايتديكك قومي كه انلر التيوز بيك كسه ايدلر عجله
 عبادتله ابتلا ايتدك سامري اتخاذه عجله وانلري اكا عبادته دعوتله اضلال
 ايتدي اول جله دن انجق اون ايكي بيك كشي سامري يه اطاعت ايتيويوب
 اول بليه دن نجات بولدى (فرجع موسي الى قومه غضبان اسفا)
 اوليه اولسه موسي عليه السلام قومه كلوب غضبان وفعلا رينه حزين
 اولديغي حالده رجوع ايتدي (قال يا قوم ألم بعدكم ربكم وعدا حسنا)
 ديديكه يا قوم ربكمز جل شانده سزه وعد صدق ايتديمكه سزه توراتي ويره

(ويا)

ويا اول وعد قرق ككون ايتديكه ذى القعدة نك اولندن ذى الحجة نك
 اوننه نك ايدى (أفطال عليكم العهد) يوخسه بنم سزدن مفارقم مدتي
 سزه طويلي اولدى (ام اردتم ان يحل عليكم غضب من ربكم فأخلفتم
 موعدي) ويا خود ديلديكمز ميكه ربكمز جل شانده دن سزه غضب ايره
 حتى كه خلف ايتديكمز شول ايمان بالله اوزره ثباته وامر اولنديكمز شيئه
 قيامه كيم اني بكا وعد ايتشديكمز (قالوا ما اخلفنا موعداك بملكنا)
 ديدلر كه بز سنك موعده كه اختيارمزه خلف ايتدك (ولكننا جلنا
 اوزارا من زينة القوم فقذفناها) بلكه مصردن چيقار اولديغمزده عرس
 نامنه قبطدن حلي استعاره ايدوب كتورمشدك بر قولده عيد ايچون
 استعاره ايدوب بعده خروجلرنده بيلغلي خوفيله رد ايتامشردى و بر قولده
 اول قبطك غرقندنصكره حليدن بحرك ساحله القا ايتديكي اشيا ايتديكه
 بنواسرايل اني آلمشردى اني اوزار تسميه لرينه سبب زيرا كه غنائم انلره
 حلال دكلدى ويا خود انلر مستامن ايدلر مستامنه ايسه حربنك مالى
 اخذ جائز اولمز * ايمدى اول حلي يي آتسه براقديق (فكذلك التى السامري)
 بزم كبي سامري دخی كنديده اولان حلي يي آتسه براقدي * روايت
 اولنديكه موسي عليه السلام اول يتش مختارى كسه ايله طوره كيديجك
 هارونله قلان سائر بنواسرايل موسانك كلسمنه تعيين ايتديكي عدت كامل
 اولدى ظن ايتديلر سامري انلره ديديكه موسانك ميعادنه خلف ايتسمنه سبب
 اولدر كه قبطدن الديغمز حلي سزه حرامدر اني كنديمزدن اخراج ايدلر
 اوليه اولسه رآيم اولدر كه برچقورقازوب اول حلي يي انك ايچنه براغهوز *
 بعده اكا آتش ايدوب ياقه وز چون اني ايتديلر مكر سامرينك بيله سنجه
 جبريل عليه السلام فرسي باصديغي يردن برقبضه تراب وارايدى عمامه سنده
 صاقلردى اني اول چقورده اريمش حلي نك اوزرينه صاچدى (فاخرج لهم
 عجلا جسدا له خوار) اوليه اولسه سامري انلره اول اريمش حليدن برعجل
 چيقارديكه اندن صوت عجل ايشيدلردى (فقالوا هذا الهكم واله موسي فنسى)
 سامري واتباعى ديدلر كه اشوسنرك و موسانك الهيدر موسي اني اونودوب
 طورده استيو كندى ويا خود سامري ايمان اظهارندنصكره صددنده
 اولديغي شيئي ترك ايتدى الله تعالى ديديكه (أفلا يرون الا يرجع اليهم قولا)

انلر بيلزلر ميكه اول عجل انلره سويلز وسويلسه لر انلره جواب ويرمز
 (ولا يملك لهم ضرا ولا نفعا) وانلردن مضرت دفعنه ويا منفعت جلبنه قادر
 اولمز (ولقد قال لهم هرون من قبل يا قوم انما فتنتم به) حالبوكه موسانك
 طوردن رجوعندن اول هارون عليه السلام انلره ديمشديكه اشبو عجله
 ابتلا اولنديكز زنه ار اكا عبادت ايتكمز (وان ربكم الرحمن) بلكه سرك
 ربكز اول الله تعالىدر كه رحانيله متصفدر (فاتبعوني واطيعوا امري)
 دين اوزره ثباتده بكا متابعت وامريمه اطاعت ايدك (قالوا لن نبرح عليه
 ما كفينا حتى يرجع الينا موسى) ديديلر كه موسانك بزه رجوعنه دكين بز
 اول عجلك عبادتي اوزره اقامتدن زائل اولمز وقتاكه موسى عليه السلام
 طوردن رجوع ايتدي (قال يا هارون مامنك اذا رأيتم ضلوا الاتبعن
 افعصيت امري) ديديكه يهارون چون انلري عجله عبادتله اشراك ايتدكلرين
 كوردك بنم امر وو صيتمه اتباعدن سني نه منع ايتدي نيچون انلره قتال ايتدك
 وال حال بيلور سنكه بن انلر آراسنده بولنسم انلره اول كفرلري اوزره قتال
 ايدردم يوخسه دينده صلابت واني حايه ايله اولان امرمه مخالفتمى ايتدك
 بعده يمينيله هارونك صاچنه وشمالييله صقالنه ياشوب چكدى (قال يا ابن ام
 لا تأخذ بلحيتي ولا راسي) هارون عليه السلام استعطاف وترفيق ايچون
 اكا ديديكه يا انام اوغلي بنم صقاله و صاچنه ياشمغل (اني خشيت ان
 تقول فرقت بين بني اسرائيل ولم ترقب قولي) قورقدمكه اكر سنك امرك
 مقتضاسنجه انلره قتال ويا انلردن مفارقت ايتسم انلر احزاب اولوب
 برى برلرینه قتال ايدرلردى اويله اولسه بكا نيچون بنو اسرائيل بيني
 تفريق ايدوب بنم و صيتمى رعايت ايتدك ديردك حالبوكه سن بكا (اخلفني
 في قومي واصلح) سن بنم قومده خليفهم اولوب انلري اطاعته دعوتله
 اصلاح ايت ديمشيدك (قال فاخطبك يا سامري) بعده موسى عليه السلام
 سامريه اقبال ايدوب ديديكه اول صنيعهكه سني نه جل ايتدي
 (قال بصرت بما لم يبصروا به) بنو اسرائيلك بيلديكن بن بيلدم وتقفن
 ايتدكلرين بن تقفن ايتدم اول رسول كه سكا كلدى روحاني محضدر اثرى
 هر نه شيئه مس ايتسه اول شيء حيات بولوردى وياخود انلرك كورمديكن
 كوردمكه اول جبرائيل عليه السلام سكا فرس حيات اوزره كلدى *

(دينلديكه)

دينلديكه انك جبريل عليه السلامي كوروب بيلسنه سبب اولدر كه اول
 فرعونك اولاد ذكوري قتل ايتديكى ييلده طوغچق اناسى انى بر مغاره يه
 ايلتوب براقشدى انك يديله ظهور ايديجك فتنه اجلچون الله تعالى
 انى جبريل عليه السلامه تريبه ايتدير مشدى (فقبضت قبضة من اثر
 الرسول فنبذتها) اويله اولسه اول رسولك فرسى باصديغى يردن
 برقبضه تراب آلوب اول اريمش حليتك اوزرينه وياخود عجلك جوفنه
 القا ايديجك اول حيات بولدى (وكذلك سوت لي نفسي) اشبو سكا
 تحديت ايتديكم كبي نفسم بكا تزيين وتحسين ايتدى (قال فاذهب فان لك
 في الحياة ان تقول لامساس) موسى عليه السلام اكا ديديكه وار آرمزدن
 مطرود اولوب كيت حياتده اولديغجه نه سن كسه ايله ونه كسه سنكله
 مخالط اولسون وموسى عليه السلام بنو اسرائيله امر ايتديكه انكله خلطه
 ايتمه لر ويانه وارميه لر اول چقان بر كسه يه ملاقي اولسه (لامساس)
 يعنى بكا قريب اولمغل بنى مس ايتكل ديردى * دينلديكه چقان اول
 كسه يه ويا كسه اكا مس ايتسه ايكيسن بيله ستمه طوتاردى حتى كه بوخلصت
 ذرينته دخی سرايت ايتشيديكه انلرك برينه آخردن بر كسه مس ايتسه
 ايكيسى بيله محجوم اولوردى * پس بواجلدن سامري بر يه يه كيدوب
 وحش وسباعله اولوردى اشبو خصلت اكا دنياده عقوبت ايدى (وان لك
 موعدا لن تخلفه) و بو دنياده كى عقوبتدن غيرى آخرته دخی عذابكچون
 موعد واردر كه سن اندن غائب اولمز وتاخر ايترسن بلكه الله تعالى اول فعل
 سيئك اوزره جزا كى ايدر فوت اولمزن (وانظر الى الهك الذي ظلت عليه
 ما كفا لحرته ثم لنسفنه في اليم نسفا) ياسامري نظر ايت شولز عننده كى
 الهكه كه اكا عبادته مداومت ايتدك بزاني آتسه احراقزدنصكره كولنى
 درياهه صاوررز روايت اولنديكه موسى عليه السلام اول عجلي كتوروب
 بوغازلدى اندن قان اقدى * زيرا كه اول ات وقان اولمشدى بعده ياقوب
 كولن درياهه صاوردى (انما الهكم الله الذي لا اله هو) بلكه عبادته
 مستحق الهكز اول الهدر كه اندن غيرى خلقك الهى يوقدر (وسمع
 كل شىء علما) على هر شيئه واسع ومحيط اولوب اندن هيچ بر شىء خفى
 اولدى (كذلك نقص عليك من انباء ما قد سبق) يا محمد بنو اسرائيل
 اخبارندن سكا ذكر ايتديكمز كبي امور ماضيه وائم دارسه اخبارندن

ويا عملناك حسنه سي ابطال اولنه (وكذلك انزلناه قرآنا عربيا) اشبو وعیدی متضمن آیاتی انزال مکی اول وتیرهده سکا قرآن عربی انزال ایتدک (وصرفنا فيه من الوعيد) واول قرآنده بزوعیدی تبیین وتکریر ایتدک (لعلهم يتقون او يحدث لهم ذكرا) تاکه معاصیدن صافقوب تقوايه ملکه ایدینهلر ویاخود قرآن انلره عبرت وعظه احداث ایده شول وجهله کیم ائم ماضیه یه اولان عقابی ذکرله معتبر ومتعظ اوله لر (فتمالی الله الملك الحق) الله تعالی ذات وصفاتده ممثله مخلوقیندن عالی اولدی کلامی انلرک کلامنه ممائل اولمز ذاتی انلرک ذاته ممائل اولمديغی کبی اول بر ملکردرکه امر ونهی نافذدر وحقدرکه وعدی رجا اولنوب وعیدندن خوف ایدیلور (ولا تعجل بالقرآن من قبل ان یقضی الیک وحیه) قرآنک سکا قرآنی تأدییه اولمزدن اول سن انی قرآته عجله ایتکل * روایت اولندیکه جبریل علیه السلام قرآنله نزول ایتدیکنده پیغمیریز صلی الله علیه وسلم جبریل علیه السلامک ابلاغندن اول انکله بیله قرآته مبادرت ایدردیکه اندن برشی اونوتیه اوله اولسه اشبونکله اندن نهی اولندی * ویاخود مجملی تبلیغ ایتکل مادامکه اول سکا تبیین اولتیه معناسی بیلدرلیه (وقل رب زدنی علما) دیکل که یارب قرآنه ومعانیسنه علمی زیاده ایتکل یعنی استعجالکدن بدل الله تعالیدن زیاده علم استکل * زیراکه سکا وحی اولسانه البته نازل اولورسن (ولقد عهدنا الی آدم من قبل فنی) شول بنم عهدی نقض وبکا ایمانی ترک ایدلردن اول آدمه امر وایصاء ایتشیدککه شجره معهوده دن یمیه اول ایسه بزم عهدمزی اونوتدی (ولم نجدله عزما) بزآدمه نهی اولساندن صبر وامر اولنانی حفظ ایدر بولمدق ویا انده رأی معزوم بولمدق شول حیثیتدککه عدوی ابلیسه موافقت ایتدی اگر دینورسه که آدم علیه السلام شجره دن اکل حیننده امر الهی ناسی اولدیمیدی * دینورکه ناسی اوله حالبوکه اول وقتده انسانده نسیان جائزدرکه مرفوع دکبیدی بلکه مؤاخذ ایدی رفع اولنسی بوامتک خصیصه سیدر دینلديکه آدمک نسیانی الله تعالینک عقوبته ایدی ظن ایتشیدیکه اول نهی تنزیهی اوله (واذ قلنا للملائکه اسجدوا لآدم فسجدوا الا ابلیس ابی) ذکر ایت شول وقتی که ملائکه یه آدمه سجده ایدک دیوب

(سجده)

سجده ایتدیلر الا ابلیس تعظم ایدوب سجده ایتدی (فقلنا یا آدم ان هذا عدو لک ولزوجک فلا یخرجنکما من الجنة فتشی) دیدیککه یا آدم ابلیس سکا وزوجک حوایه عدودر اندن حذر ایدک که سزی جنتدن چیقارمیه تاکه دنیاده معاش طلبنده تعب ونصبه اوغرامیه سز (ان لک ان لا تجوع فیها ولا تعری) اول جنتده سکا آج وچلاق اولق یوقدر (وانک لاتظمأ فیها ولا تضحی) سن انده صوسز اولمز وکونش صباغن چکمزسن (فوسوس الیه الشیطان قال یا آدم هل ادلت علی شجرة الخلد وملك لا یبلی) شیطان اکا وسوسه ایدوب دیدیکه یا آدم سنی بر شجره یه دلالت ایده ینکه اندن اکل ایدرسک انده مخلص قالور وشول فنا یرمز ملکه نازل اولورسن (فأ کلامنها فبدت لهما سوا نهما) چون آدم وخوا اول شجره دن اکل ایتدیلر بدنلردن لباسلری دوکیلوب عورت یرلری آچیلدی (وظفقا یخصفان علیهما من ورق الجنة) جنتک انجیری پیراغندن آلوب انکله عورتلرینی سترایتدیلر (وعصى آدم ربه فغوى) آدم اول شجره دن اکل ایله رب تعالی یه عصیان ایدوب مطلوبن یتوردی ویاخود عدو نک قولنه اغترار ایله مأمولندن خائب اولدی (ثم اجتباه ربه) بعده رب تعالی انی توبه یه حل واکا انی توفیقيله اصطفا وتقریب ایتدی (فتاب علیه) وتوبه ایدیکک توبه سین قبول ایتدی (وهدی) وتوبه اوزره ثباته هدایت ایتدی (قال اهبطا منها جیعا بعضکم لبعض عدو) الله تعالی آدم وحوایه ویا آدم وابلیسه دیدیکه ایکز بیله جنتدن یره اینک امر معاش ایچون بری بریکزه عداوت ایدک که انکله مراد ذریتی بیننده کی عداوتدر که بری برلریله تجارب وتجادب ایدرلر ویاخود ذریت آدمله ابلیس بیننده کی عداوتدر (فاما یأتینکم منی هدی) چنانکه بندن سزه کتاب ورسول کله (فن اتبع هدی فلا یضل ولا یشتی) اولکه بنم کتاب ورسوله اتباع ایده اول دنیاده ضلالتنه وآخرته شقاوته یرمز * ابن عباس رضی الله عنهما اشبو آیتی استدلال ایدوب دیرکه الله تعالی قرآنه اتباع ایدنی دنیاده ضلالتدن وآخرته شقاوتدن اجاره ایدر (ومن اعرض عن ذکری فان له معیشتة ضنکا) اولکه بنم هدامدن اعراض ایده که اول بنی ذاکر وعبادته داعیدر انکیچون معیشت ضیق اولورکه اول عذاب قیبردر انده اضلاعی بری برینه کیردیریلور ویاخود نارد اکا زقوم وضریع وغسلین

ویریلور ویا حرام ویا کسب خبیث اولور ویا اندن قناعت سلب اولنور*
 ابن عباس ایدر هر مالکه اول عبده ویریلور اول کرکسه قلیل ویا کثیردر
 انده اتقاء ایلدیه انده خیر یوقدر اول معیشتده ضنکدر بعض قوم اولور که
 دنیاده مکتربن ایکن حقدن اعراضلری سببیه معیشتلرنده ضنک اولور
 الله تعالی به سوء ظنلرندن انفاقلرینک خلقن رجا و اعتقاد ایتدکار یچون
 معاشده کندیلره شدت ایدرلر (ونحشره یوم القيامة اعمی) یوم قیامتده
 بز آتی اعمی البصر و اعمی القلب حشر ایدرز (قال رب لم حشرتني اعمی
 وقد كنت بصیرا) دیه که یارب بنی نیچون اعمی حشر ایتدک حالبو که
 بن دنیاده بصیر ایدم (قال كذلك اتتک آیاتنا فنسیتها وكذلك الیوم
 تنسی) الله تعالی اکا دیه که بز سکا شول نفسکه ایتدیکک فعلک جزا سن
 ایتدک سکا دنیاده آتلیز کلدیکنده انکه عملی ترک ایتدک
 ویا انی تعلم ایتش ایکن اونوتدک * ایددی دنیاده آتلیزله عملی
 ترک کبی اشبو کونده عملک اوزره ناردی ترک اولنور سن * دینلیدیکه
 انلر انده خیردن اونیلر لکن عذابدن اونودیلر (و كذلك یجزی
 من اسرف ولم یؤمن بآیات ربه) شول بزم آتلیزدن اعراض ایدنه
 ایتدیکمز جزاء کبی شهواته انهماک و اشراک ایدوب ربک جل شانہ
 آتلیزیه تصدیق ایتیانلرینه دخی جزا ایدرز (ولعذاب الآخرة
 اشد و ابقی) انلرک دنیاده و قبرده کی عذابلرندن آخرتده کی عذابلری اشد
 وادومدر (أفلم یهدلهم کم اهلکننا قبلهم من القرون یمشون فی مساکنهم)
 مکه نك کفارینه قرآن ارشاد ایتدی که انلردن اول نیچه قرون اهلک
 ایتش مسافرت ایتدکارنده شامه کتدکارنده انلرک دیار و منازلنه مرور
 ایدرلر اصحاب حجر و ثمود و قرای قوم لوطی کوررلر (ان فی ذلک لآیات
 لاولی النہی) ایددی انلرک هر بری برنوع عذابله هلاکندن عقول کامله اربابنه
 عبرتله و تذکره لر واردلر (والاولی کلمة سبقت من ربک لیکن لزاما و اجل مسمی)
 اگر بوامتدن عذاب تأخیریه سبق حکم الهی و اجل مسمی که یوم قیامتدر
 اولسه انلره عذاب دنیاده لازم اولوردی قرون ماضیه کافره به لازم
 اولدیغی کبی (فاصبر علی ما یقولون) ایددی یا محمد اهل مکه نك سنک
 حقکده دیدکارینه واذلرینه صبر ایت (وسبح بحمد ربک) و نماز قیل
 ربک جل شانہ به هدایت و توفیق اوزره حامد اولدیغک حالده ویا انی

(شرکدن)

شرکدن و سائر نقائصدن تنزیه ایت هدی ایلله سنی تمیز ایتدیکی اوزره
 اکا حامد و نعمت کلنی سکا ایلاء اتم ایتدیکنه معترف اولدیغک حالده
 (قبل طلوع الشمس و قبل غروبها) کونش طوغمزدن اول صباح نمازینی
 و کونش باتمزدن اول یعنی اولیله وایکندی نمازینی قیل و یاخود یالکز
 ایتدیدی یی قیل (ومن آناء اللیل فسیح) و کجه نك ساعاتده
 اخشام ویتسو نمازینی قیل (واطراف النهار) و نهاریک اطرافنده
 اولیله نمازینی قیل * زیرا انک وقتی زوال عندنده درکه اول نهاریک
 نصف اولنه نهایت و نصف ثانیه بدایتدر (لعلک ترضی) شول
 طمعه کیم انک سببیه الله تعالی عندنده نائل اوله جغک کراماته راضی
 اوله سن و یاخود الله تعالی سندن راضی اوله (ولا تمدن عینک الی مامتغابه
 ازواجهم منهم زهرة الحیاة الدنیا لنفقتهم فیه) نظر ایتدیکل کفره ده
 شول کسه به ویردیکمز دنیانک اصناف زینته و بهجتنه که بز انلری انکه
 ابتلاء قیلشز که اکا شکر ایتدکارنده آخرتده انلره عذاب ایدیه وز *
 وابی بن کعب ایدر اول کسه که الله تعالی نك عزاسیله تعزی ایتیه انک
 نفسی حسراتله کسیلور و اولکه ناسک ایدنده کی متاع دنیا به رغبتله
 نظر ایلسه انک حزنی طویل اولور و اولکه الله تعالی نك نعمت مطعم
 و مشرب و ملبسندن مقصود ظن ایلیه انک عملی قلیل و عذابی حاضر
 اولور * روایت اولندی که پیغمبریز صلی الله علیه وسلم برضیف نزول
 ایدوب عندنده طعامدن بر شیء بولنجیق بر یهودی به خادمی کوندردیکه
 مؤجلا اکا طعامدن بر مقدار شیء بیع ایدیه یهودی دیدیکه رهسز و بر مزین
 اولیله اولسه پیغمبریز علیه السلام اکا حدیددن درعنی رهن کوندردی اندن
 طعام آلدی اول سبیدن الله تعالی بوآیتی انزال ایلله انی تعزیه ایتدی (ورزق
 ربک خیر و ابقی) ربک جل شانہ نك سنکچون آخرتده ادخار ایتدیکی کرامات
 و یاخود دنیاده سکا اعطا ایتدیکی نبوت و سعادت انلره دنیاده ویردیکی
 زهره دنیادن خیرلو و ابقادر (وأمر اهلک بالصلاة و اصطر علیها) یا محمد
 اهل بیتکه و امتکدن سکا متابعت ایدنه صلاة ایلله امر ایت و ضیق معیشت
 عندنده انی ایتانه سن و کرک انلر صبر ایدک یوخسه رزق امرینه اهتمم ایتیه
 (لانسألك رزقا نحن نرزقک) بز سندن استمزز که کندیکه و یا اهلکه رزق
 ویره سن بلکه سکا و انلره رزق بز ویررز * ایددی قلبی آخرت امرینه

تقریغ ایت (والمأقبة للتقوى) عاقبت محمود اهل تقوى ایچوندر
 (وقالوا لولا یا آتینا بآیه من ربّه) مشرکون دیدیلرکه نولیدی محمد ربندن
 برآیت کتوریدیکه اول انک نبوت اتماسنده صدقنه دلالت ایدیدی * ویاخود
 تعنت وعنادلرندن کلان آتلی انکار ایدوب برآیت مقترحه استدیلر *
 او یله اولسه الله تعالی انلری قرآن اتیانیه الزام ایلدیکه اول معجزاتک
 اعظم وابقاسیدر زیرا حقیقت معجزه نبوت اتما ایدنه خارق عاده وجهی
 اوزره علم ویا عملدن برنوعله اختصاصیدر وشک یوقدرکه علم عملک اصلیدر
 وقدرده اندن اعلا وارنده ابقادر اول اجددن مشرکینه جوابده بیورلدیکه
 (أولم تأتئهم بینه ما فی الصحف الاولی) تورا و انجیل وسائر کتب سماویده
 اولان عقائد واحکام کلیه نک بیانی آنلره قرآنده کلدیمی حالبوکه انی کتورن
 امی اولوب انلری کورمش وکسه دن تعلم ایتامش اوله * ویاخود اول کتب
 سماویده اقتراح آیات ایدن ائم کافره نک اخباری کلدیمیکه اول اقتراح
 ایتدکاری آیات آنلره کلوب تصدیق ایتدکارنده عذاب وهلاکاری نیچه تعجیل
 اولنشدیدی * او یله اولسه مشرکون نیچه خوف ایتزلرکه اقتراح ایتدکاری
 آیات کلدیکنده اول کچن ائم کافره یه ایریشن عذاب وهلاک آنلره دخی
 ایریشه (ولو انا اهلکنهم بعذاب من قبله) اکر بزاول مشرکینی ارسال
 رسول ویا انزال قرآندن اول عذابله اهلاک ایتسه ایدک (لقالوا ربنا لولا ارسلت
 الینا رسولا فنتبع آیاتک من قبل ان نذل ونخزی) یوم قیامتده انلر دیه لردیکه
 یاربنا اکر بزه آیاتله رسول ارسال ایتسیدک که اشبو کونده بزه هوان وفضاحت
 ایرمزدن اول اکا اتباع ایدیدک (قل کل متربص فتربصوا) یا محمد
 آنلره دیکل که بزدن وسزدن هر بریمز مال امره منتظرز * اهل مکّه
 دیرلر دیکه محمدک موتته منتظر اوله لم اکا موت ایردیکنده اندن خلاص
 اولورز * محمد علیه السلام ایسه آنلره عذاب نزولنه منتظر ایدی * ایدی
 سز محمدک موتته منتظر اولکز (فستعلمون من اصحاب الصراط السوی ومن
 اهتدی) یوم قیامتده صراط مستقیم اصحابی واهتدا ایدنه فی بیلورسز

سورة الانبياء مکیه وهی مائة وخمس آیات

بسم الله الرحمن الرحيم

(اقترب للناس حسابهم) ناسه حساب اولنلری وقتی قریب اولدیکه
 اول یوم قیامتدر انک قریب اولسی الله تعالی عندنده در (انهم یرونه

(بعیدا)

بعیدا وراه قریبا) انلر انی بعید کوررلر بزایسه انی قریب کوررزقولی
 دلالتیه زیرا اول وعدینه خلف ایتز (ویستجملونک بالعذاب ولن یخلف الله
 وعده) انلر عذابی استجمال ایدرلر الله تعالی وعدینه خلف ایتز لابد اول
 عذاب موعودی انلره ایر کورر اکرچه برزماندنصکره ایسه ده * زیرا
 هر آتی قریبدر اکرچه زمان استقبالی اوزانور سدهده بعید اولورکه
 منقرض وماضی اوله وزیرا دنیانک سالفنه نسبتله باقیسی اقصردر * پیغمبریمز
 صلی الله علیه وسلمک خاتم الانبیاء اولسی دلالتیه یعنی بعضی انکار ایدنلر شانده
 نازل اولوبدر (وهم فی غفلة معرضون) حالبوکه انلر حسابدن غفلتده
 انک امرینی تفکردن معرضلردر (ما یأتئهم من ذکر من ربهم محدث الا استمعوه
 وهم یلعبون) رب تعالیدن آنلره شول نزولی محدث سنه غفلت وجهالتدن
 اویندیرر ذکر کلسه تناهی غفلت وعواقب اموره نظردن فرط
 اعراضلری سیبیه انی استهزاء واستحقار ایدر اولدقلری حالده استماع ایدرلر
 (لاهیة قلوبهم) قلبلری انی تأمل وتبصردن غافله اولدیغی حالده
 (واسرّوا النجوى الذین ظلموا) ارالنده تناجیلرین اخفا ایدرلر انلرکه
 تناجیده ظلم ایدرلر (هل هذا الا بشر مثکم) اشبو محمد دکل الاسزک
 کبی بشردر بشر ایسه رسولی اولور (أفتأتون السحر وانتم تبصرون)
 سز سحره حاضر اولوب انی قبول ایدر میسز حالبوکه انک سحر ایدیکن
 کورر و بیلورسز * کأنه انک بشر اولسنی رسالت اتماسنده کاذب
 ایدیکنه استدلال ایتدیلر * زیرا که اعتقادلرنده رسول ملکک غیریدن
 اولمز دیرلر او یله اولسه کتوردیکی خوارق ومعجزاتی سحردر دیدیلر *
 اکا بناء انک امرینی هدم وفسادینی عامه ناسه اظهار ایدر شی استنباطنده
 تشاورلرین اسرار ایتدیلر (قال ربی یعلم القول فی السماء والارض)
 یا محمد دیکل که بنم ریم جل شانه سماده وارضده قولک سرّینی وجهرینی
 بیلور قولی بلیجک انکله فعلک دخی بلنمی اظهار اولور (وهو السميع العليم)
 اول الله تعالی انلرک اقوالن ایشیدر احوالن بیلور اسرار واصمارلری
 اکا خفی اولمز (بل قالوا اضغات احلام) انلر قرآنی سحردر دیدکلرندنصکره
 خلط کلام ایدوب اخلاط احلام کاذبه درکه انی منامده کورر
 انک تأویلی اولمز (بل افتراء) بلکه انی تلقاء نفسندن اختلاق ایدر
 (بل هو شاعر) بلکه اول شاعر در دیدیلر * یعنی مشرکک پیغمبریمز

صلى الله عليه وسلم قرآن شائنده قولارين اقتسام ايتديلر انلرك كيمي
اني اضغات احلام وكيمي فريه وكيمي سحر درر وكيمي شعر درر ديديلر
(فليأتنا بآية كما ارسل الاولون) ايمدى اكر محمد رسالت دعواسنده
صادق ايسه بزه آيت كتورسن نيكيم رسل اولون آيات كتوردكاري كي
الله تعالى انلره جوابده ديديكه (ما آمنت قبلهم من قرية اهلكناها أفهم
يؤمنون) اول مشركيندن اول هيچ برقریه اهلی که اقتراح ايتدكاري
آياتی رسوللری كتوردكارنده ايمانه كليب بز انلری هلاك ايتشيدك اشبو
مشركين ايسه انلردن اطغادر اقتراح ايتدكاري آياتك كلسيله ايمانه می
كولرر حالبوکه بز انلری استئصاله هلاكارين مراد ايترز * زيرا که بوامت
قيام ساعته دكين استئصال اولنماغله موعوده در اول اجلدن انلر اقتراح
ايتدكاري آياتی كتورمز * بعده مشركينك اشبو محمد سزك كبی بشردر
ديورسالته انكارلرينه جوابده دينلديكه (وما ارسلنا قبلك الا رجالا نوحی
اليهم) يا محمد سندن اول امم سابقه يه كوندرديكمز رسوللر رجال ايديلر که
بز انلره وحی ايدر دك يوخسه ملائكه دكل ايديلر (فاسألوا اهل الذکر
ان كنتم لاتعلمون) ايمدى اهل كتاب علماسنه سؤال ايدك رسوللرك بشر
ايديكی سزه خبر ويرلر اكر انی سز بيلز سكرز زيرا انلر انی انكار ايتزلر
اكر محمد عليه السلامك نبوتن انكار ايدرلر سده الله تعالى مشركينه
امر ايلديكه رسل متقدمه نك حالندن اهل كتابه سؤال ايدرلر تا که شبهه لری
زائل اوله * زيرا که مشركون پيغمبريمز صلى الله عليه وسلمك امرنده
اهل كتابه مشورت ايدوب قوللرينه اينانورلردی زيرا که جم غفیرك
اخباری علم ايجاب ايدر اكر چه كفار ايسه لرده (وما جعلناهم جسدا
لاياكلون الطعام) و رسل متقدمين بز اجساد قيلدق که ملك كبی اكل
وشرب ايتيلر (وما كانوا خالدين) و دنياده دخی دائمين اولمديلر
(ثم صدقناهم الوعد فانجيناهم ومن نشاء واهلكنا المسرفين) بعده انلره
وعد مزده صدق ايدوب انبيای و مؤمنلر دن ديلديكمز كسسه لری انجاء
و مشركينی اهلاک ايتدك (لقد انزلنا اليكم كتابا فيه ذكركم) بز سزه
بركتاب انزال ايتدك که عز و شرفكز و ياموعظه كز و يامكارم اخلاقدن
مطلوبكز اولان حسن ذكر كز انده در (أفلا تعقلون) فهم ايتز ميسز که
اكايمان كتوره سز (وكم قصصنا من قرية كانت ظالمة وأنشأنا بعدها قوما

(آخرين)

آخرين) چوق قری اهليکه ظالملر ايديلر بز انلری قصم ايدوب
انلردنصكره قوم آخرين انشا وانلرك مكانلرينه اسكان ايتدك
(فلما احسوا بأسنا اذا هم منها يركضون) وقتا که اول ظالملر بزم عذابمزی
حاسة بصرله كورديلر هماندم سرعتله اول قریه لرندن قاچيديلر
(لا تركضوا وارجعوا الى ما اترقم فيه ومساكنكم لعلكم تسألون)
انلره ملائكه لسان حال ويا لسان مقالله استهزاء طريقی اوزره ديديلر که
سرعتله قاچوب كتمكز بلکه رجوع ايدك نعم وتلذذدن اكا که انكله
بظر ايدرديكز ومسكنلريكزه که انده ساكن اولورديكز تا که اعمال
خبيثه كز سيبيله سزه نازل اولان شدائددن سؤال اولننه سز (قالوا
ياويلنا انا كنا ظالمين) وقتا که انلر عذابی كوروب وجه نجاتی كورميجك
ديديلر که ويل بزه كيم بز ظالملر ايدك (فازالت تلك دعواهم حتى جعلناهم
حصيدا خامدين) اشبو كلامی ترديددن زائل اولمديلر حتى بز انلری
زرع محضود كبی سيوفله ميتين اولدقلى حالده حصيد قيلدق دينلديكه
اشبو آيات يمنده حضور انام قريه نك اهلی شائنده نازل اولوبدر که
انلر عرب ايديلر الله تعالى انلره برنی كوندروب انلری دينه دعوت ايديجك
انی تكذيب و قتل ايتديلر اويله اولسه الله تعالى اوزرلرينه
بخت نصري تسلط ايدوب اول انلرك كين قتل وكين اسير ايتدی
منهزم اولوب فراره يوز طوتديلر ملائكه انلره استهزاء طريقی اوزره
ذكر اولنان كلامی سويلديلر بخت نصر آردلرينه دوشوب انلری قلیچدن
چكوردی جو سمادن برندا كلديكه اشبو انبيای قتلكرز جزاسيدر ديو
ايشيدلدى اول حالتده كناهلرينه اعتراف ايتديلر والحال اول انلره
نفع ايتيوب خائب وخاسر كتديلر (وما خلقنا السماء والارض وما بينهما
لاعبين) سماء وارضی وايكيسی اراسنده کی خلائق عبث وباطل خلق
ايتدك بلکه مصالح دينيه و دنيويه ايجون خلق ايتشركه عبادمز انكله
و حدانیتزه استدلال ايدرلر و انده کی منافع و مرافقه ضرورت و احتياجلرين
دفع ايدرلر (لو اردنا ان نتخذ لهوا لاتخذناه من لدنا) اكر لهو اتخاذه
اراده ايتسهوز بزانی خضرتمزه لائق مجردادن اتخاذه ايدر دك يوخسه
اجسام مرفوعه واجرام مبسوطة دن دكل سقوفك رفع و تزويقنده
وفرشك تسويه و تربينه کی عادتكرز كبی * دينلديكه لهو يمن لغتده

و اددر و بر قوله زوجه در مراد نصاری بی رددر (ان کنا فاعلین)
اگرانی ایدر اولسه وز لکن ایتز (بل نقذف بالحق علی الباطل فیدمغه
فاذا هو زاهق) بلکه شانزدندر که شول جدک جله سندن اولان حق
لهوک عدادندن اولان باطل اوزره تغلیب ایدوب اول حق باطلی محو ایدر
کور سکه اول باطل هالک و زائلدر (ولکم الویل مما تصفون)
یا معشر کفار ویل و شدت عذاب سزه کیم الله تعالی بی اکا لائق اولیان
وارضده اولان خلقک کلیدی اول الله تعالی نیک خلق و ملکیدر (ومن
عنده لایستکبرون عن عبادته ولا یتحسرون) اول الله تعالی عندده
کرامتله مقربین منزلنده کی ملائکه اکا عبادندن تعظم ایتزل و یورلزلر
(یسبحون اللیل والنهار لایفترون) کچمده و کوندزده الله تعالی بی
تسبیح و تقدیس ایدرلر انلره اندن فتور کلز * زیرا که ملائکه به تسبیح
بنی آدمک نفسی منزلنده در (ام اتخذوا آلهة من الارض هم ینشرون)
یوخسه انلر جواهر ارضدن آله می اتخاذا ایتدیلر که انلر امواتی دیر کورر
زیرا که الوهیه مستحق اولز الا اولکه احیایه و عدمدن ایجاد قادر اوله
(لوکان فیهما آلهة الا الله لفسدتا) سماء و ارضده الله تعالی بدن غیری
آله اولیدی اول سماء و ارض ایکسی بیله باطل اولیدی و ایکسی بیننده کی
اشیایه فساد ایدی آله بیننده تمنع اولدیغچون * زیرا بر امر که ایکیدن
ویا اکثردن صدور ایده انده انتظام اولز بعده الله تعالی کندوی تنزیه
ایدوب دیدیکه (فسبحان الله رب العرش عما یصفون) الله تعالی که
عرشک ربیسیدر مشرکک اکا لائق اولیان شیء ایله و صفرلندن منزله
وعالی اولدی (لایسئل عما یفعل) اول الله تعالی ایشلیدیکندن سؤال
اولمز * زیرا که اول مالک حقیقیدر خلقنده دیلدیکن ایشلر اما که
اندن استکشاف وجهی اوزره سؤال اولسه جاثر اولور (قال رب
انی یکون لی غلام) دلائله (وهم یسئلون) اما که خلق اعمال
و افعاللندن سؤال اولنورلر زیرا که ممالیک و عبیددرلر (ام اتخذوا
من دونه آلهة) الله تعالی نیک غیری آله می اتخاذا ایتدیلر (قل هاتوا
برهانکم هذا ذکر من معی و ذکر من قبلی) یا محمد انلره دیکل که اول
قولکز اوزره عقل و یانقلدن برهانکزی کتورک زیرا که دلیل اولیان

(شیء)

شیء ایله قول صحیح اولز حالبو که سنک قولکز بطلانده دلیل عقلی
و نقلی تطابق ایدوبدر ایشو قرآنکه ربمندن بکا نازل اولوبدر بمنله
دینم اوزره اولانلرک و بندن اوکدین کچنلرک و الله تعالی بدن نازل اولان
کتیابلرک خبریدر نظر ایدک که انلرده توحیدله امر ونهی اشراکدن
غیری بولور میسر وقتا که توحید بعثت رسالت صحتنه و کتب انزالنه
متوقف اولدیسه انده نقلله استدلال صحیح اولدی (بل اکثرهم لایعلمون
الحق فهم معرضون) بلکه انلرک اکثری حق بیلزلر که حقله باطل بیننی
تمیز ایدرلر اوله اولسه انلر توحیددن و اتباع رسولدن معرضلدر
(و ما رسلنا من قبلك من رسول الا نوحي اليه انه لا اله الا انا فاعبدون)
یا محمد سندن اول ناسه هیچ بر رسول کوندردک که الا اکا وحی ایدردک که
بندن غیری معبود بالحق اله یوقدر * ایدی بنی توحید ایدک هیچ احدی
بکا اشراک ایتکز (وقالوا اتخذ الرحمن ولدا سبحانه بل عباد مکرمون)
بعض کفار الله تعالی ولد اتخاذا ایدی دیدیلر * تکیم خزاعه ملائکه
بنات اللهدر دیو افترا ایتدیلر الله تعالی انلرک اول و صفتدن منزهدر
بلکه ملائکه انک عباد مکرمیندر عبودیت ايسه ولادته منافیدر
(لایسبقونه بالقول وهم بامرہ یعملون) الله تعالی به قوله سبقت ایتزلر
اول امر ایتینجه برشیء تکلم ایتزلر بلکه قول و فعلده انک امریله عمل
ایدرلر (یعلم ما بین ایدیهم و ما خلفهم) الله تعالی انلرک عمل ایتدیکن
و عمل ایدجکن بیلور (ولا یشفعون الا لمن ارتضى) اول ملائکه
شفاعت ایتزلر الا اهل ایماندن شول کسمه ایچونکه الله تعالی انکچون
شفاعت ایتلرینه رضاسی اوله (وهم من خشیتہ مشفقون) ومع ذلك
انک هیئتندن خاشلدر در انک مکرندن امانده اولزلر (ومن یقل منهم انی اله
من دونه فذلک نجزيه جهنم كذلك نجزي الظالمین) ملائکه و سائر
خلایقندن اول کسمه که الله تعالی بدن غیری بن الهن دیه بز اکا جهنمی
جزاء ایدرز شول الوهیت و عبادتی غیر موضعنه وضع ایدن ظالمله
بز بویه جزا ایدرز (اولم یرالذین کفروا ان السموات والارض کانتا
رتقا ففتقناهما) کافرلر خبر و یرلدیلر میکه سموات و ارض بر برینه منضمه
و ملتحمه و یا حقیقت متحده ایدی ایکسی بری برندن تفریق ایتدک و هوائله
ارالربن فصل ایتدک و یا خود سمواتک جیعی متحده ایدی تحریکات

مختلفه ايله فتق ايدوب افلاك ايدلدى وارضون دخی متحده ایدی کیفیات واحوالی اختلافیله طبقات ویا اقالیم قیلندی ویا خود سما امطار ایتز وارض انبات ایتز دی اویله اولسه سممطرله وارض نباتله فتق اولندی (وجعلنا من الماء کل شیء حی) حیواندن هر شیئی بزمان خلق ایتدک انده نبات وشجر داخل اولور زیرا که ماء هر شیئیکی حیاته سببدر * مفسرون دیدیلر که هر شیئیکی انده حیات اوله اول مادن خلق اولنوبدر یعنی ماء انک اعظم موادیدر اگر دینورسه که الله تعالی حیاتک بعضی مائک غیریدن خلق ایدوبدر دینلدیکه انکله مراد ارضده اولان اکثر احیاء ماء دن خلق اولنوبدر ویا خود بقای مائله در (أفلا يؤمنون) بونک کی آیات ظهوریله انلر ایمانه گلزلرمی (وجعلنا فی الارض رواسی ان تمید بهم) و بز ارضده جبال ثوابت قیلدیکه اول انلر که میل ایتیه (وجعلنا فیها فجاجا سبلالعلمهم یهتدون) و اول جبالده کیکیش یولار قیلدق تاکه ناس مصالحیرینه کیدر (وجعلنا السماء سقفا محفوظا) و بزسمای برسق قیلدق که سقوطدن محفوظدر ویا شیاطیندن شهله محفوظدر (وهم عن آیاتها معرضون) والحال کفار اول سماءه خلق اولسان شمس وقر و نجوم وسائر آیاتدن معرضلدر انده تفکر ایدوب انکله معتبر اولزلر (وهو الذی خلق اللیل والنهار والشمس والقمر کل فلك یسبحون) اول الله تعالیدر که لیل ونهار وشمس وقری خلق ایلدی اول شمس وقردن هر بری فلککک سطحنده سرعتله سیر ایدرلر سابحک سطح ماء اوزره سرعت سیری کی (وما جعلنا لبشر من قبلك الخلد أفان مت فهم الخالدون) یا محمد سندن اوکدن بکثره دنیاده خلود تقدیر ایتدک سنکچون تقدیر ایتدیکمز کی * ایمدی سنک موتکه انتظار ایدنلر غفلت وجهالت ایدرلر سن اولوب انلر دنیاده قالورلرمیکه سنک موتکه سوبنلر (کل نفس ذائقة الموت) هر نفس جسدندن مفارقت مرارتن ذوق ایدرلر (ونبلوكم بالشر والخیر فتنة) بز سزى شدت ورخاء وصحت وسقم وغنا وفقرله وبالجمله سزى محبوب ومکروهکز اولان اشیايله اختبار ایدرلر تاکه محبوبکزه شکرکز ومکروهکزه صبریکزه نظر ایدرلر (والینا ترجعون) بوندنصکره بزه رجوع ایدرلر شکر وصبردن وجوده کلان حالاتکز اوزره سزه جزا ایدرلر * اشبونده ایما واردر که حیاته مقصود اولان ابتلادر وثواب

(وعقابه)

وعقابه تعریضدر قضاء سابق تقریر ایچون (واذا رآك الذین کفروا ان یتخذونک الالهوا) کافرلر سنی کورد کلرنده هزؤ اتخاذا ایدرلر و دیرلر که (أهذا الذی یدکر آلهتکم) اشبوندر که آلهه کزی سوء ايله ذکر ایدر (وهم یدکر الرحمن هم کافرون) حالبوکه انلر الله تعالینک وحدانیتنی وبعث رسل وارسال کتبله خلقک ارشادینی منکرلدر * ایمدی هزؤ اولمغه انلر احقدر (خلق الانسان من عجل) انسان فرط استعجال وقلت تأییدی اولدیغیچون کائنه عجله دن خلق اولنوبدر حالبوکه انسانده عجل خلق اولنوبدر روایت اولندیکه وقتاکه آدم علیه السلامک باشنه وکوزلرینه روح داخل اولوب جنتک ثمارینه نظر ایلدی وروح جوفنه دخولنده طعام اشتها ایلدی وروح ایاقلرینه ایرمدن صیغرادیکه جنتک ثمارینه ایریشه قادر اولوبوب دوشدی وبرقوم دیدیلر که معناسی الله تعالی آدمی تعجیلدن خلق ایلدی * زیرا که اول هر شیئیکی نصکره جمعه کونک آخرنده کونش باتمزدن اول خلقنده اسراع اولندی باشی روحله حیات بولجق دیدیکه یارب کونش باتمزدن اول بنی خلقه تعجیل ایت دیورجا ایلدی * دینلدیکه یعنی آدم علیه السلام ترتیسز سرعت و تعجیل اوزره خلق اولندی یوخسه سائر آدمیین کی نطفه وعلقه ومضغه وانک غیری اشیاده ترتیب رعایتله دکل وبرقوم دیدیلر که عجله دن مراد طیندر (سأریکم آیاتی فلا تستعجلون) یا مشرکین سزه نعماتی دنیاده یوم بدرده و آخرنده نارد کوسترین * ایمدی بکا استعجال ایتکز و یوم قیامتک وقوعک استعجال ایتدیلر (ویقولون متى هذا الوعد ان کنتم صادقین) و دیدیلر که وعد ایتدیککز یوم قیامت نه وقتده اولور بزه خبر ویرک اگر وعد کرده صادقلر ایسه کز دیو پیغمبریمز صلی الله علیه وسلمه واصحابنه خطاب ایتدیلر (لویعلم الذین کفروا حین لایکفون عن وجوههم النار ولا عن ظهورهم ولا هم ینصرون) اول وقت موعدی استعجال ایدن کافرلر بیلسه لردی شول وقتک نار هر جانبلرندن احاطه ایده اوکلرندن واردلرندن انی دفعه قادر اولمیهلر وانی انلردن منع ایدر ناصر بولمیهلر کفرلری اوزره اقامت ایتزلردی واول وقت موعودک کلکسین استمزلردی (بل تأتیهم بغتة فیهتم فلا یستطیعون ردها ولا هم ینظرون) بلکه اول موعود انلر فجأة کلوب انلری مبهوت ومتحیر ایدر حتی که انک ردینه قادر اولزلر ومهلت دخی

ویرلزلر (ولقد استهزیٰ برسل من قبلك فحاق بالذين سخروا منهم ما كانوا به
یستهزؤن) یا محمد سندن اول پکن رسولاری قوملری استهزاء ایتدیلردی
انلره استهزازی مقابله سنده سوء جزالری نازل اولدی * ایمدی سندنخی
قومکک استهزاء واذالرینه صبر ایلککل که ربک جل شانہ انلره جزالرین ایدر
(قل من یکلؤکم باللیل والنهار من الرحمن) یا محمد مستهزئین اولانلره دیکل که
کچمده وکوندزده الله تعالینک بأسندن سزلی کیم حفظ ایدر اگر اول
انی سزه اراده ایتسه (بل هم عن ذکر ربهم معرضون) بلکه انلر رب
تعالینک ذکرندن معرضلردر قلبلرینه اول خطور ایتز قنده قالدیکه انک
خوفندن خوف ایدلر (ام لهم الهة تمنعهم من دوننا) یوخسه انلرک الهه لریمی
واردر که بزم عذابمزدن انلری منع ایدیلر (لا یستطیعون نصر انفسهم ولا هم
مناصحون) بلکه اول الهه لری کندیلرینک نفعنه قادر دکلردر فکیف که
عابدلرینک نفعنه قادر اولر و نه انلر بزم عذابمزدن اجاره اولورلر (بل متعنا
هؤلاء واباهم حتی طال علیهم العمر) بلکه اول کفار و آبالرینه بزم استدرج
وجهی اوزره نعم عاجله ایلر تمنیع ایدوب اعمار مقدره لری ایلر امهال ایتدک
حتی ظن ایتدیلر که اول حالت انلردن زائل اولیه و اول انلره صد دنده
اولدقلری سوء افعالری سببیلر اولر * ایمدی انلره اول امل کاذبلر
(أفلا یرون انانأتی الارض نقصها من اطرافها) اهل مکه کورمزلمیکه
ارض کفره یی بزایدی * مسلمین ایلر اخذ وفتح ایدوب مکه نک اطرافندن
اراضی کفره یی اکسلدیرز مسلمین دیارینی آرتوریرز (أفهم الغالبون)
انلرمی غالبلردر یوخسه بزهی بلکه غالب الله تعالیدر انلرمغلوبدر (قل انما
انذرکم بالوحی) دیکل که بن سزلی بکا نازل اولان قرآنله انذار ایدرین
(ولا یسمع الصم الدعاء) حالبوکه انذار آیتلریله اولان ایمانه دعوتی
ایشتمز اولکه حق استماعدن تصامم ایده (اذا ما یأذرون) شول وقتکه
انذار اولندلر (ولئن مستهم نفحة من عذاب ربک لیقولن یاویلنا انا کننا
ظالمین) اگر ربک جل شانہ نک عذابندن انلره ادنی شیء مس ایتسه
نفسلری اوزره وبلله دعا ایدوب ظلملرینه اعتراف ایلیرلردی (ونضع
الموازين القسط لیوم القیامة فلا تظلم نفس شیئا وان کان مثقال حبة من
خردل آتینا بها) یوم قیامت ایچون بز عدل میرانلرین وضع ایده رزکه

(انده)

انده صحائف اعمال وزن اولنه هیچ بر نفس حق مقدارندن برشی ظلم اولمز
اگرچه حق بر خردل دانه سی اغرنجه ایتسه ده بز انی احضار ایدر ز
(وکفی بنا حسبین) حساب واحصایه بز کفایت ایدر ز (ولقد آتینا
موسی وهارون الفرقان وضیاء و ذکر لى للمتقین) موسی وهارونه
بز کتاب ویردک که اول حق و باطل بیننی فارقدر و عبرت وجهالت ظلماتنده
ضیادر انکله استضائه اولنور و ذکر در که متقیر انکله اتعاظ ایدرلر
ویاشرایعدن احتیاج اولدقلری اشیانک ذکریدر (الذین یمخشون ربهم
بالغیب) که انلر ربلرین کورمزلمز ایکن اندن خوف ایدرلر و یاخود خلوتلرنده
الله تعالیدن خوف ایدرلر جلوتلرنده کی خوفلری کبی (وهم من الساعة
مشفقون) ومع ذلك احوال قیامتندن خائفلردر (وهذا ذکر مبارک
انزلناه أفانتم له منکرون) اشیو قرآن ناسک دین و مصالحلرنده احتیاج
اولدقلری امورک ذکریدر مبارکدر و خیر کثیردر که بز انی محمد انزال ایتدک
یا اهل مکه سز اکا انکار ایدرمیسز (ولقد آتینا ابراهیم رشه من قبل)
بز ابراهیمه وجوه صلاحه اهتدا و معرفت ویردک بلوغندن اول شول حینده که
صغیر ایکن اول سربدن چیقدی و یا موسی وهاروندن اول اکا نبوت ویردک
(وکنابه عالمین) حالبوکه بز انک ویردیکمزه اهل ایدیکن و یاخود محاسن
اوصاف و مکارم خصالی جامع ایدیکن بیلوردک (اذ قال لابیة وقومه ما هذه
التمائیل التي انتم لها عاکفون) شول وقتکه اول باباسنه وقومه دیدیکه
اشبو تصاویرندر که سز اکا عبادته مقیملر سز (قالوا وجدنا آبائنا لها عابدین)
دیدیلر که بز بابالریمزی اکا عبادت ایدر بولدق بز دخی انلره اقتداء و اتباعله
اکا عبادت ایدر اولدق (قال لقد کنتم انتم و آبأؤکم فی ضلال مبین)
ابراهیم علیه السلام انلره دیدیکه سز و آبالریکز خطاه بینده اولدیکز که
اول هیچ بر عاقله انک خطا ایدیکی خفی اولمز ایکی فریقک دخی دبیلر
استنادی اولدیغیچون تقلید جائز اولدیغی تقدیر اوزره شول کسنه یه
جائز اولور که فی الجمله حق اوزره ایدیکی بیلنه (قالوا أجنثنا بالحق
ام انت من اللاعبین) قومی بابالرینک تضلیلنی استبعاد ایتدکلرندن
ظن ایتدیلر که ابرهیم علیه السلامک اول قولی ملاعبه وجهی اوزره
اوله اولیه اولسه اکا دیدیلر که بوسوز کده جدی ایدرسن یوخسه
او یئارمیسن (قال بل ربکم رب السموات والارض الذی فطرهن وانا

علي ذلكم من الشاهدين) ابراهيم عليه السلام ديديكه بلکه ربكز جل
شانه سموات وارضك ريسيدركه اول انلری خلق ايتدی و بن اشبو
توحيد اوزره محققين و مبرهنيندم (وتالله لا كيدن اصنامكم بعد ان تولوا
مدبرين) والله بن سرك اصنامكزي كسر ايدرين سز انلری قویوب
عید کاهکزه کتديککزه * دیندیکه ابراهيم عليه السلام بوقولی قومندن
کیرلوده سويلشدى وانی انلردن انجق بر رجل ايشيدوب سائرینه افشا
ايتشدی * روايت اولنديکه انلرک عید کاهی وار ایدی اکا کيدر
اولدقلنده طعاملرين اصناملری اوکارینه قویوب انده تبرک زعم ايدرلردی
عید کاهلرندن رجوعلرنده اول اصنام اوکنده کی طعاملری آلوب بیرلردی
چون اول سنه ده عیدلری اولديغنده انک کبی ایدوب عید کاهلرینه
کتدیلر ابراهيم عليه السلام بیت الاصنامه کیردی و اوکلرنده کی طعاملری
کوردی استهزاء طریق اوزره ديدیکه يتزميسن يکز جواب کليہ جک
نيچون سويلز سز دیوب الله بر بالطه آلدی انکله صنم اکبردن غريسن
پاره لیوب بالطه یی انک بوینه آصدی (فجعلهم جذاذا الا کبیرا لهم لعلمهم
اليه يرجعون) اول اصنام جيعن صنم کبیردن غیر بسن پاره پاره ايتدی
تا که اول کفره صنم کبیره مراجعت ایدوب سائرینی کسر ایدن کیم
ایديکنی اندن سؤال ایدلر و غرضی اول اصنامک نفع و ضرره قادر دکل
عاجزلر ایدیکن انلره تبیین ایدی و یاخود تا که اول اصنامک عجزی تحققلنده
شرکدن توحیده رجوع ایدلر و قتا که عید کاهلرندن رجوع ایدوب
بیت اصنامه کیردیلر و اصناملرینه ایرن اهانتی کوردیلر (قالوا من فعل
هذا بالهتنا انه لمن الظالمين) بری برلرینه ديدیلر که کیمدر که اشبو فعلی
بزم آلهم مزه ايتدی کندوی هلاکه توطین ایدلردندر (قالوا سمعنا
فتی ینکرهم یقال له ابراهيم) ابراهيمك والله بن اصنامكزی کسر ايدرين
دیویمین ایشیدن رجل ديدیکه اسمنه ابراهيم دینور برفتابی ایشتمکه
اصنامی تعیب ایدردی (قالوا فأتوا به على اعين الناس لعلمهم يشهدون)
نمود و اتباعی ديدیلر که انی ناسک کوزلری اوکنده کتورک که اندن
بیلدکری شیئه شهادت ایدلر بینه سز انی اخذ ايتش اولیه لم * چون
حضرت ابراهيم عليه السلامی نمود و اتباعی قاتنه کتور دیلر

(قالوا)

(قالوا أنت فعلت هذا بالهتنا يا ابراهيم) ديدیلر که یا ابراهيم آلهم مزه
اشبو فعلی سمنی ايتدک بزه خبر ویر (قال بل فعله کبیرهم هذا) ابراهيم
عليه السلام ديدیکه بلکه انی زعمکزه اشبو اله عظیمکز ايتدی انک
وجوديله اشبو صغاره عبادتکزه اینجنوب انلری اوروب پاره لدی
(فاسئلوهم ان كانوا ينطقون) ايتدی اول صغاره ماجرایي سؤال ايدک
اکر نطق ايدرلرسه یعنی اکر نطقه قادر اولورلرسه فعله دخی قادر اولورلر
والافلا * انکله انلره آلهم لرینک نطقدن عجزینی کوستردی و عاجز ايسه
عبادت اولمز والوهيته لائق اولمز (فرجعوا الى انفسهم فقالوا انکم
انتم الظالمون) اولیه اوليسه قلدیلرله تفکر و عقللرینه رجوعله بری برلرینه
ديدیلر که اشبو سؤاله و یا نطق ايتز و نفع و ضرری ایدمه من شیئه عبادتله
سز ظالملر سز یوخسه سزک اول آلهم کزه تعدی ایدنه ظالم دیو ظلم
ايتدیککز کسه دکل (ثم نکسوا على رؤسهم لقد علمت ما هؤلاء ينطقون)
نفسلری اوزره ظلملرله اعترافلرندنصکره کفره رد اولندیلر و یاخود
اوزرلرینه حجت لازم اولوب حیا و نجالتلرندن باشلرین اکدیلر و ديدیلر که
بیلورسنکه بونلر سويلزلر اولیه اولسه بز بوتلره نیچه سؤال ایدرز و قتا که
حجت ابراهيم عليه السلام ایچون محجه اولدی (قال أفتعبدون من
دون الله مالا ينفعکم شیئا ولا یضرکم) ديدیکه الله تعالیدن غیری
شول سز بهرشی نفعی اولمز و ضررندن قورقيلز شیئه عبادت ایدرميسز
(أف لكم ولما تعبدون من دون الله أفلا تعقلون) بین و قدر سز و الله
تعالیدن غیری عبادت ايتدیککز هر شیئه در صذیعکزک قبحتی
عقولکزله فهم ايتزميسز و قتا که اوزرلرینه حجت لازم اولوب
جوابدن عاجز اولدیلر (قالوا حرّ قوه وانصروا آلهمکم) ديدیلر که
انی آتشه یاقک که اول عقابک اهلیدر و آلهم کزه نصرت ايدک انکچون
اکا انتقامله (ان کنتم فاعلین) اکر آلهم کزه ناصرین ايسه کز
دیندیکه انی انلره القایدن اکراددن هیزان دینور بر رجل ایدی
الله تعالی انی ره پکوردی و بر قولده نمود ایدی و قتا که نمود و قومی
حضرت ابراهيم عليه السلامی احراقه اجتماع ايتدیلر انی بریتیه قویوب
چوره سن حظیره کبی یاپدیلر بعده بر مدت حطب جمع ايتدیلر حتی انلرک
بری خسته اولسه الله تعالی بکا عافیت ویرسه ابراهيم ایچون شو دکلو
حطب کتورهین دیردی و رجل موتی حیننده وصیت ایدر دیکه شو

لث (۷)

د کلو حطب اشترا اولنوب اکا القا ايديله و مرأه عزليه حطب اشترا
 ايديوب اکا القا ايديرلدي * روايت اولنديکه وقتاکه مراد ايتد کاري دکلو
 حطبي جمع ايتديلر هر جانبدن طوتشديروب يا قديلر لکن بيلزلر که
 ابراهيم عليه السلامي بيتدن چيقاروب اول آتش ايچنه نيچه براغدر
 ابليس پرتلبيس لعنه الله انلره منجنيق علمن تلميم ايتدي اوليه اولسه ابراهيم
 عليه السلامك مبارك النى واياغنى بغليوب منجنيقك ايچنه قوديلر ملائکه
 اکا امداد ايچون رب تعاليدن استيدان ايتديلر ياربنا سکا معلومدرکه
 ريوزنده اندن غيرى سنى برليوب سکا عبادت ايدر يوقدر ديديلر وحى
 الهى کديکه اول بنم خليلدر انک بندن غيرى خليلي يوقدر اکر سزدن
 استغاثه ايدرسه اکا اغاثه ايدک اما که اول بندن غيريدن استغاثه
 ايترسه بئله انک اراسنه کير مکر بن انک حالن بيلورين انى کسه يه احتياجنم
 حاجتن بتوررين وقتاکه انى آتسه براغده مراد ايتديلر صورل خازنى کلوب
 ديدیکه ديلرسک سنکچون آتشی سيونديرم ويلار خازنى کلوب ديدیکه
 ديلرسک اول آتشی طاغيدم ابراهيم عليه السلام ديدیکه بنم سزدن
 حاجتم يوقدر (حسبي الله ونعم الوكيل) الله تعالى بکا کافيدر
 اول نه کوچک و کيل اولور * روايت اولنديکه ابراهيم عليه السلام بغلوب
 آتسه براغلدیغنده ديدیکه (لا اله الا انت سبحانک لک الحمد ولک الملك
 لا شریک لک) چون اول منجنيق له آتيلوب هوا يوزنده آتسه کيدر کن
 جبريل عليه السلام اکا قارشو کلوب يا ابراهيم حاجتک وارميدر ديد کده
 ابراهيم عليه السلام ديدیکه حاجتم وار لکن سکا دکل ديدیکه ايمدی
 ربکدن انى ديلکل ابراهيم عليه السلام ديدیکه (حسبي من سؤالی
 علمه بحالی) اول بنم حالمى بيلسى بنم سؤاله کافيدر * ديلنديکه
 هرشي اول آتشی سيونديرمه چالشوردی الا وزغ انى اوفوروب
 طوتشدردی اول اجلدن پيغمبريمز صلى الله عليه وسلم وزغک قتيله
 امر يوردی (قلنا يانار کونی بردا وسلاما على ابراهيم) ديدک که يانار
 ابراهيم اوزره برد وسلام اولغل آتارده کديکه اول کونده ريوزنده
 جميع آتشر سيوندی و اول کونده عالمده هيچ بر آتسه انتفاع اولمدي
 اکر ابراهيم اوزره سلاما ديلمسه ابدًا صوق قالوردی اوليه اولسه
 ملائکه ابراهيم عليه السلامي هواده ايکن ايکی ضلعنه ياپشديلر

(اول)

اول آتشک اورتاسنه ايند يروب رفقله يره قوديلر حضرت ابراهيم
 عليه السلام اول ارايه نزول ايديجک انده بر طلمو صوپکاري چيقدی
 و قرمزى کولر و زرجسلر آچيلدی ابراهيم عليه السلام انده يدي کونمکت
 ايديوب اول ايامده کی نعم و صفایي عمرم ايچنده کورمدم ديدی حق جل
 و علامک الظلي ابراهيم عليه السلام صورتده کوندروب ابراهيم عليه
 السلامک ياتنه اوتوروب اکا مؤانسه ايدردی * روايت اولنديکه
 الله تعالى اکا جنت حريرندن قيص و بر طنفسه کوندردی قيصی کيوب
 طنفسه نك اوزرينه اوتوردی و جبريل عليه السلام ياتنده انکه تحدث
 ايدردی و ديرديکه ربک جل شانہ سکا ديرکه يا ابراهيم بيلدکی که
 احبامی آتش ياقز مکر اول ايامده نمرود صرحندن چيقوب ابراهيم
 عليه السلامه نظر ايدر کورسه که اول بر روضه در بر ملک ياتنده اوتوروبدر
 چوره سنده ايسه آتش شدتله ينار اعلى صوتله ندا ايديوب ديدیکه
 يا ابراهيم الهک نه عظيم اله اولور قدرتيله سکا مضارينه حائل قيلور اول
 آتشدن چيقمغه قادر اولورميسن ديدیکه نعم اندن يوريه رک آتش
 ايچندن چيقوب کندی نمرود ديدیکه يا ابراهيم ديلرينکه منک الهکه
 درت بيک صغر ذبحيله تقرب ايدم ديدیکه اول انى قبول ايتز مادامکه
 اولديغک دين باطلدن چيقوب بنم دعوت ايتديکم دين حقه کيرميه سن
 ديدیکه ملت و ملکمی ترک ايدمزين لکن اول نذرمی يرينه کتورم
 ديوب ايتدی و ابراهيم عليه السلامه من بعد تعرضی ترک ايتدی *
 ديلنديکه ابراهيم عليه السلام آتسه براغلدیغنده اون التى ياشنده
 ايدی (وارادوا به کيدا فجعلناهم الاخيرين) انلر ابراهيم عليه
 السلامه مکر واضرار قصد ايتديلر هر خاسردن انلرک خسارتن زياده
 قيلدقکه سعيلى کنديلرک باطل اوزره ايدیکنه برهان اولوب
 و ابراهيم عليه السلامک حق اوزره ايدیکين ظاهر و عيان اولدی
 ابراهيم عليه السلامک مزید رفعت درجاتنى و انلرک شدت شقاوتنى
 موجب اولدی * ديلنديکه يعنى الله تعالى نمرود و اهلى اوزره بعوض
 ارسال ايديوب انلرک لحومن اکل و دمائى شرب ايتدی انلرک برى نمرودک
 دماغنه کيروب هلاک ايتدی (ونجيناہ و لوطا الى الارض التى بارکنا
 فيها للعالمين) بز ابراهيمي نمرود دن و لوطی قومندن خلاص ايديوب ارض

شامه رحلت ايتدر دك كه اول ارضه بز طامينه بركت قيلدق و بركات عامه
سندندر كه اكثر انبياء انده مبعوث اولديلر كه شرائعلى عالمه منتشر اولديكه
كالات و خيرات دينيه و دنيويه نك مباديسيدر * و دينلديكه دنيايه كي
هر ماء عذبك اصلى بيت المقدسه كي صخره شريفه نك التندن چيقار *
روايت اولنديكه عمر بن الخطاب رضى الله تعالى عنه كعب الاحبارى شامدن
مدينه يه هجرت ترغيب ايتدكده كعب ديديكه بن كتاب اللهه
بولشن كه (ان الشام كنز الله من ارضه و بها كنزه من عباده) ارض شام
ارض دنيا دن الله تعالى نك كنزيدر عباد مختصيندن كثير و انده
مكنوزلدر (قال النبي عليه السلام انها ستكون هجرة بعد هجرة فخير الناس
الى مهاجر ابراهيم) بغير ميز صلى الله عليه وسلم ايدر بنم هجرتدن نصكره
هجرت اوليسدر * ايدى اول زمانده خيبر ناسك هجرتى ابراهيم
عليه السلام مهاجرنه ارض شامه اولور * روايت اولنديكه ابراهيم
عليه السلام آتش برد و سلام اولغله قومندن بر جاعت كوريجك اكا اجابت
ايتديلر و انكله بيله ارض عراقدن ارض شامه رحلت و هجرت ايتديلر
و ابراهيم عليه السلامى اول تصديق ايدن و اكا متابعت ايدن لوط عليه السلام
ايديكه اول ابراهيم عليه السلامك قرنداشى هاران بن تارخك
اوغلى ايدى و اكا عم اكبرى هارانك قزى ساره رضى الله عنها دخي تصديق
ايدوب ابراهيم عليه السلام انى تزوجدن نصكره ابراهيم و لوط و ساره
دينلرني حراست و عباد الله عنايت قصديله هجرت ايدوب حرانه نزول
ايتديلر انده ماشاء الله مكشدين نصكره مصره اندن شامه هجرت ايدوب
ارض فلسطيندن سبع نام موضعه نزول ايتديكه اول شام بربه سندندر
ولوط عليه السلام ايسه مؤتفكه نام موضعه نزول ايتديكه اول سبعمدن
بركون بر كچه دكاو مسافدر (ووهبناله اسحاق ويعقوب نافله)
بز اسحق ويعقوبى ابراهيمه فضل و عطا وجهى اوزره هبه ايتدك
(و كلا جعلنا صالحين) ابراهيم و اسحاق ويعقوبدن هر برينه صلاحى
توفيق و صلاح اوزره انلرى جل ايتدك حتى كه صلاحده كاملين
اولديلر (وجعلناهم ائمة يهدون بامرنا) و امرن ايله ناسى حقه
دعوت ايدر و خيرانده ناس انلره قندا ايدر ائمه قيلدق (واوحينا اليهم
فعل الخيرات) و بز انلره خيرات فعلنى وحي ايتدك كه نامى اكا حث ايدر

(واقام)

(واقام الصلاة و ايتاء الزكاة) و صلاتى اتمام و زكاتى ايتاء ايدر
(وكانوا لنا عابدين) و انلر توحيد و عبادتمزده اخلاص ايدر اولديلر
(ولوطا آتينا حكما و علما) و ذكر ايت لوط عليه السلامى كه بز اكا حكمت
و نبوت و يا خصوص بيننده حكم و دخی انبيايه لايق اولور علم و يردك
(ونجينا من القرية التي كانت تعمل الجبائث) و بز اكا نجات و يردك
سدوم نام قريه دنكه انك اهلى اعمال قبيحه ايشلردى و لوطه و مكس كى
وناسه رمى بندق و طيور ايله لعب و سائر افعال منكره كى (انهم كانوا
قوم سوء فاسقين) انلر قوم سوء فاسقين ايديلر (وادخلناه فى رجتنا)
و بز انى اهل رحمت زمره سنه ادخال ايتدك كه انلر دنيايه اهل طاعتدر
(انه من الصالحين) اول صالحلردندر كه بز دن انلره حسنى سبقت ايتدى
(ونوحا اذ نادى من قبل) و ذكر ايت نوح عليه السلامى كه ابراهيم
و لوطدن اول قومى اوزره هلاكه دعا ايدلى (فاستجبنا له و نجيناه و اهله
من الكرب العظيم) انك دعا سنه اجابت ايدوب انى و اهلى طوفاندن
ويا قومى اراسندن خلاص ايتدك * دينلديكه نوح عليه السلام انبىانك
عمرده طولى و بلاده اشدى ايدى (ونصرناه من القوم الذين كذبوا بآياتنا)
و بز انى منع ايتدك شول قومدنكه و يا اكا نصرت ايتدك شول قوم اوزره كه
بزم نوح لسانيله انذار ايتديكمز اشياىي تكذيب ايتديلر (انهم كانوا قوم
سوء) انلر قوم كافرين ايديلر (فاغرقناهم اجمعين) بز انلرك جيعنى
طوفان ايله غرق ايتدك (وداود و سليمان اذ يحكما فى الحرت اذ نفشت
فيه غم القوم) ذكر ايت داود و سليمان عليهما السلامى كه حكم ايتديلر شول
وقت كه زرعه و يا كرمده كه عناقيدى تدلى ايتشدى كچه اكا بر قومك
قيونى كيروب افساد ايتدى (وكننا الحكمهم شاهدين) بز انلرك حكملرينه عالم
ايدك روايت اولنديكه ايكي رجل خصوصتله داود عليه السلامه داخل
اولديلر كه انك برى صاحب حرت و برى صاحب غم ايدى صاحب حرت
ديديكه اشونك قيونى كچه بنم حرثه كيروب افساد ايتدى ديواندن حقن
طلب ايتدى داود عليه السلام قيون صاحبنه انك حرثى و يردى بعده چيقوب
سليمان عليه السلامه اوغراد قلزنده داود عليه السلامك حكمى بعد
السؤال حكاييت ايديجك سليمان عليه السلام ديديكه اكر بن تحكيم اولنم
ايكى فريقه ارفقله حكم ايدر دمكه قيونى حرت صاحبنه و يردمكه سود

وصوف ونسلبه ففعلنه وغنم صاحبه امر ايدر دمه حرث صاحبچون
حرثی مثلنی بذر ایدہ چنانکہ اول حرث اولکی حرثک اتلاف اولندیغی
کونده کی حده ایدہ اتی حرثی تلف اولانہ ویرہ وغنم ایسه غنم صاحبه ایدہ
داود علیه السلام اکا حکم سنک حکمکدر دیوب انک حکمنہ رجوع ایدی
اما حکم اسلام اولدرکہ ماشیه مرسله نک نهاردہ مال غیریدن افساد
ایتدیکی ماشیه صاحبه تضمین اولمز اما کیجه افساد ایتدیکی اکا تضمین
اولنور * زیرا کہ عرف ناسده زرع صاحبی نهاردہ زرعی حفظ ایدر
ومواشی ایسه صالیویریلور کیجه مراجه رد ایدیلور ائمه حنفیه عندندہ
چنانکہ ماشیه ایله مالکی بیلہ اولمیه اول ماشیه نک اتلافی ضمان اولمز
اول کرکسه کیجه ده ویا کوندزده اولسون (فقهمنها سلیمان) بز اول
حکومت وفتوایی سلیمانه تفهیم وتعلیم ایتدک (وکلا آئینا حکما وعلما)
داود و سلیمانن هر برینه بز حکم وعلم ویردک * حسن ایدر اگر بوآیت
اولسه حکامی هالکین کورردک لکن الله تعالی برینی صوابه اصابتله
وبرینی اجتهاد ایله ثنا ایدی علما اختلاف ایتدیلر که داود علیه السلامک
حکمی اجتهاد ایله ویانص ایله میدی سلیمان علیه السلامک حکمی دخی
کذلک * بعضیلر دیدیکه ایکسینک دخی حکمی اجتهادله ایدی اولیه اولسه
انبیایه اجتهادی تجویز ایتدیلر تا که اجتهاد ثوابنه نائل اوله لرابوکہ
داود علیه السلام خطا و سلیمان علیه السلام اصابت ایدی و دیدیلر که
انبیایه خطا جائز اولور لرابوکہ انک اوزره قرار ایتزلر اما که علمایه حوادثده
اجتهاد جائز اولور چنانکہ کتاب وسنتدن نص بولمیه لر اولیه اولسه
خطا ایتدکارنده آثم اولزلر (قال النبی علیه السلام اذا حکم الحاکم
فاجتهد فاصاب فله اجران واذا حکم فاجتهد واخطا فله اجر) پیغمبریمز
صلی الله علیه وسلم چان بر حاکم اجتهادله ایتدیکی حکمده اصابت ایدہ
انکچون ایکی اجر اولور واکرانده خطا ایدرسه انکچون بر اجر اولور
وبر قوم دیدیلر که داود و سلیمانن هر برینک حکمی و حیلہ ایدی لرابوکہ
سلیمانک حکمی داودک حکمنی نسخ ایدی * ایدی بوقائل انبیایه اجتهادله
حکمی تجویز ایتز زیرا که انلر وحیک وجودیلہ اجتهاددن مستغنیلردر
وانبیایه خطایی تجویز ایتزلر انلر که هر مجتهد مصیدر دیدیلر آیتک
ظاهریله احتجاج ایتدیلر وحديث مذکورله حکم مجتهد ایچون

(خطاسی)

خطاسی اوزره ثواب وعد اولندیکه اول ائمه حنفیه قولیدر وبرجاعت
دیدیلر که هر مجتهد مصیب دکلدر بلکه چنان بر حادثه ده مجتهدینک
اجتهادلری مختلف اولسه حق بلا تعین اولور انلرک هربری
مصیب اولسه تقسیمک وجهی اولزدی پیغمبریمز صلی الله علیه وسلمک
مجتهد اجتهادنده خطا ایدرسه انکچون بر اجر اولور دیمسبله مراد خطاسی
اوزره اجر لنور دیمک دکلدر بلکه مراد حق طلبنده اجتهادی اوزره
اجر لنور زیرا که اجتهادی عبادتدر واجتهادده کی خطا ده اثم مرفوعدر
چنانکہ جهدلرنده تقصیر ایتیه لر پیغمبریمز صلی الله علیه وسلمدن
مرویدر دیمشکه ایکی مرأه نک بیلہ لر نهجه بر طفل ابنلری وار ایدی بر ذنب
کلوب اول ایکی طفلک برینی قودقلری یردن آلوب کتوردی اول ایکی
مرأه نک هربری صاحبه سنه ذنبک کتوردیکی سنک طفلک ایدی دیو داود
علیه السلامه تحاکم ایتدیلر داود علیه السلام اول حاضر اولان طفلی مرأه
کبرایه حکم ایدی اندن چیقوب سلیمان علیه السلامه واردیلر وزاعلرین
اکا خبر ویردیلر سلیمان علیه السلام دیدیکه بکا بر بچاق کتورک طفلی
ایکی شق ایدوب هر بریکزه بر رشقی ویرمین مرأه صغری دیدیکه یانبی الله
حق تعالی سکا رجت ایدہ اتی ایتکل طفل انکدر اولیه اولسه اندن اول
قولک صدوری شفقت ولاددن ایدیکنه استدلال ایدوب طفلی
اول صغرانک ایدیکنه حکم ایدی (وسخرنا مع داود الجبال یسبحن
والطیر) بز داوده طاغلری وقوشلری تسخیر ایتدک که داود ایله بیلہ
تسبیح ایدلر * دینلدیکه داود علیه السلام حجر وشجرک تسبیح
فهم ایدردی * وهب ایدر جبال وطیور انک تسبیحنه جواب ویرردی
ویا خود اول نماز قیلدیغنده جبال وطیور دخی انکله بیلہ نماز قیلوردی
دینلدیکه داود علیه السلامه تسبیحدن فتور کلسه الله تعالی اکا جبال
وطیورک تسبیحن ایشدرردیکه انکله تسبیحه نشاط کله واکا مشتاق اوله
(وکنا فاعلین) ذکر اولنان تفهیم وایته حکم وتسخیری بز ایشلدک ایدی
(وعلمناه صنعة لبوس لكم تحصنکم من بأسکم فهل انتم شاکرون)
وبز داوده سزچکون درع عملنی تعلیم ایتدک که انکله سزی سلاحک
شدت وتعبندن حفظ ایدلر و اشو نعمته شکر ایتزمیسز (وسلیمان الريح
عاصفة تجری بأمره الى الارض التي بارکنا فيها) و سلیمانه بز ریخی شدیدہ

الهوب اولديغي حالده تسخير ايتدك كه انك امريله اول ريح اني اولديغي
مكندن مدت يسيره ده ارض شامه ايركوره كه بزنده برکت قيلدق (و كونا
بكل شئ عالمين) بزم هر شئيه علمز دائم و مستمر اولدى * وهب بن منبه
ايدر سليمان عليه السلام مجلسنه خروج ايتديكنده قوشلر هواده اكا
سايمان اولوردى و جن و انس اكا قارشو طورردى و انك امراسى
وارايدى قانده كه بر ملك جبار ايشيدر ايسه اني كتوردوب ذليل و مقهور
ايدردى و چنانكه بردياره عزم مراد ايتسه خشيدن دوزلش معسكرى
وارايدى انك اوزره ناس و دوابى بندرردى و آلات حرب و سائر لوازم
اكا يوكلدردى بعده ريح عاصف انك امريله اول معسرك آتته كيروب
ديلدېكى دياره كتوردردى لكن اول ريحك معسكرى فوقنده مرورى
شول كيفيت اوزره ايديكه زرعى تحريك ايتز و ترابى صاورمز
و قوشلرى اينجتمز ايدى * مقاتل ايدر سليمان عليه السلام ايچون
شياطين بر بساط نسج ايتشلر ايديكه اول ذهبله ابريشمدن اولوب طولى
و عرضى بر رفرسخ ايدى اول بساطك اورتته سنه سليمان عليه السلام
ايچون التوندن بر منبر قونوب اول انك اوزرينه اوتوردردى و انك حولنه
التون و كومشدن اوج بيك كرسى قونوب التون كرسيلره انبياء و كومش
كرسيلره علماء اوتوردردى و انلك حولنده ناس و ناس حولنده جن و شياطين
طورردى و قوشلر قناد آچوب انلرى كوشدن قورردى و اول حالده
ريح انلرى صباحدن اويله يه دكين بر آيلق مسافه يه و اويله دن اخشامه
دكين اول قدر مسافه يه ايركوردردى (ومن الشياطين من يغوصون له)
و كذاك سليمان ايچون شياطيندن شول طائفه يي بز تسخير ايتدك كه انلر
دريابه كيروب قعرندن انكچون جواهر چيقارلردى (و يعملون عملا
دون ذلك) و انكچون اول شياطين غوصدن غيرى انك ديلديكى
اعمالى ايشلرلردى مدينه لر و قصر بنا ايدرلردى و محاريب و تماثيل
و جفسان و قدور دوزلردى (و كونا لهم حافظين) بز اول شياطينى
حفظ ايدر اولدقكه سليمانك امرينه انقياد ايدوب عمللرين افساد ايتمه لر
زيرا كچه اولدن بر عملدن فارغ اولوب عمل آخره اشتغال اولمشلر اولكى
عمللرين افساد ايدرلردى (وايوب اذنادى ربه انى مسنى الضر و انت
ارحم الراحين) ذكر ايت شول ايوب عليه السلامى كه عيص بن اسحاق

(اولادندن)

اولادندن بر رجل روى ايدى الله تعالى انى نبوتله اصطفيا ايتدى * ابل
و بقر و غنم و خيل و حير و سائر اصناف ماله اكا دنيايى بسط ايتشيدى
واكا اوج كسسه ايمان كتورمشدى برى يمن اهلندن وايكيسى كندى
بلندن ايدى انك اهلى و اولادى وار ايدى صالح و نقي ايدى مسكينلره
مرحتلو اولوب انلره و قونقره اطعام و اكرام ايدردى و ايتام و اراملك
حاجتلىرينه كيدردى و الله تعالى انك نعمتلىرينه شاكر اولوب حقوقى
ادا ايدردى بوندنصكره الله تعالى انى انواع بلالايه مبتلا قيلدى
صديقلىرى ابتلاسى كبي كه اول انلره سخت و هووان دكلدى بلكه كرامت
و سبب احسان ايدى اولادى اوزرلىرينه بيتلىرى هدمله هلاك ايتدى
واملاك و اموالى كندى و بدننه مرض ايروب اون سكرز ييل و بر قوله
اون اوج ييل و يايدي ييل ايدى آي ايدى كون اكا صبر ايتدى روايت
اولنديكه مرأه سى ماخير بنت ميثا بن يوسف و يا خود رجه بنت افرائيم
ابن يوسف بر كون اكا ديديكه الله تعالى يه دعا ايتسيدك كه اوزر كدن
بو بلايى رفع ايديدى ديديكه ندكو زمان رخاده اولدق ديديكه سكسان
ييل ديديكه بن ريم جل شانهدن اوتانورمكه اكا دعا ايدم حالبوكه بلامك
مدتى رخامك مدتبه ايرميه بو دكلو مدت بنو اسرائيلك كناسه سنده
مطروح ياتدى مرأه سى رجه دن غيرى ياتته كلور اوليوب ناسك جيعى
انى ترك ايتدى بروقتده ابليس رجه يه بر رجل صورتده كلوب ديديكه
يا امة الله قاتى زوجكك نعيم و مالى و شباب و جالى جله كيدوبدر * ايدى
بو حالت اندن زائل اولمز مكر كه بنم سوزم طوته سن و بر سخله كتوروب
اكا ويردى ايوبه ديكل كه بلا سندن خلاص ديلرسه بو سخله يي نچون
بوغازلسون اويله اولسه رجه ايوب عليه السلامه كلوب ديديكه رب تعالى
نه وقتده دكين سكا عذاب ايدر اولادك و مالك يتدى حسن و جلال كندى
بو سخله يي بوغازلعل كه بلا كدن قورتله سن يته اولكى حالته ايروب صحت
و راحت بوله سن ايوب عليه السلام اكا ديديكه ابليسك مكرينه اوغرمشسن
بكا اول مال و ولد و صحتى كيم ويردى ديديكه الله تعالى و انكله ندكو
زمان بنى متاعلندردي ديديكه سكسان ييل ايوب عليه السلام ايتدى
انصافك يوقيدر كه بلانك مدتى رخامز مدتى دكلو اولمدين صبر ايتيوب
ابليسك امرينه اطاعت ايدرسن و الله تعالى انك غيريچون ذبح ايتكه

بكا امر ايدرسن شمدنكيرو بكا كتورديكك طعامي يمهين حرام اولسون
والله تعالى بكا شفا ويررسه سكا يوز جلده اورمق عهد واوزيمه الزام
اولسون قاتمدن كيت بكا كلمه خدمتك كركر كنديكى بدن ايراغ ايلكل
بعده اطرافنه نظر ايدوب طعام وشرابدن برشي بولدى وصدىق وانيسدن
بركسسه كورمدى سجده يه واروب رب تعالى يه يلواردى قرآنده ذكر
اولنديغى اوزره بكا ضرر وشدت ايروبدر سن ايسه راجلرك ارجيسن
ديدى (فاستجبنا له فكشفنا ما به من ضرر) الله تعالى ايدركه بز انك
دهاسنه اجابت ايتدك واندكى ضرر وبلايى كيدر دك شول وجهله كيم
اكا سورة صادده ذكر اولنديغى منوال اوزره اياغك يره اورغل دينلدى
اوريجق اندن برصو پيكارى قينادى اندن امر الهى ايله غسل ايديجك
انكله ظاهر نده كى دائى كتدى بعده قرق خطوه يور يوب اول
موضعي دغى اياغيله اوريجق اندن برصو پيكارى چيقوب اندن ايجدى
انكله باطننده كى دائى كتدى حتى كه الله تعالى انى رجالك اصبح واجلندن
ايتدى (واتيناه اهلهم ومثلهم معهم) وبز اكا اهل واولادنى احياء
ايتكله ويردك وانلركله بيله انلر امشالنى ويردك * ابن عباس ايدر
الله تعالى انك مرأه سنه شبابنى رد ايدوب حتى كه ايوبدن يكرمى التى
اركك اوغل طوغوردى * دينلديكه ايوبك ايكي انبارى وار ايدى
برينه بغدادى وبرينه ارپه قوياردى الله تعالى ايكي صحابه كوندروب
بغداى انبارينه التون وارپه انبارينه كوش ياغردى حتى كه برين
التونله وبرين كوشله طولردى * روايت اولنديكه الله تعالى اكا برمك
كوندروب ديديكه ربك جل شانه صبرك سبييله سكا سلام ايدوب ديركه
انباركه واروسن واريجق الله تعالى اكا التوندن چكركه ياغردى مكر انك
برى انباردن طشرميه دوشمش ايوب عليه السلام انك اردنجه كيدوب
حتى كه انى انباره قودى ملك اكا انبار كدمكى سكا يتزمى ديدى اول ديديكه
ربم جل شانه نك بر كاتدن بريدر انك بر كاتنه ايسه طويمزين پيغمبريمز
صلى الله عليه وسلم ايدر بروقتده ايوب عليه السلام عريان اولوب
غسل ايدردى اوزرينه التوندن چكركه ياغدى ايوب عليه السلام
انى ديرمكه باشلدى رب تعالى بدن برندا كلديكه يا ايوب بن سنى اندن غنى
ايتدمى ديديكه بلى يارب الابوكه سنك بر كتكدن بكا غنا كلز (رحمة

(من)

من عندنا وذكرى للعابدين) تاكه اول بزم عندمزدن دنياده ايوبه رحمت
وعابله تذكره وموعظه اوله كه انك كى صبر ايدوب صبر ثوابته ايره لر
اكر دينورسه كه الله تعالى ايوب عليه السلامى صبرله وصف ايلدى
حالبوكه اول يارب بكا ضرر مس ايتدى ديو جزع وشكوى ايلدى دينوركه
شكوى وجزع اولدركه بلاسنى الله تعالىنك غريه عرض ايده يوخسه
بلاسنى الله تعالى يه عرض ايدرسه اول اكرچه شكوا در لكن جزع وترك
صبر دكلدر بلكه (فاستجبنا له) دلالتيله دعا در ودغى يعقوب عليه السلامك
(انما اشكو بثى وحزنى الى الله) شهادتيله الله تعالى يه تضرع والتجار
سفیان بن عيينه ايدر بر كسه كه الله تعالىنك قضا سنه راضى اولنديغى حالده
شكواسنى ناسه اظهار ايتسه جزع اولمز * روايت اولنديكه جبريل
عليه السلام پيغمبريمز صلى الله عليه وسلم مرضى حالنده كلوب يارسول الله
كنديكى نيچه بولورسن ديديكندمه مغموم ومكروب بولورين ديدى *
ومائشه رضى الله عنها وارأساه ديديكندمه بل انا وارأساه ديدى
(واسماعيل وادريس وذا الكفل) يا محمد ذكر ايت اسماعيل بن ابراهيم
وادريس كه اخنوخدر وذا الكفل كه الياس ويا يوشع ويا زكريا
عليهم السلامدر (كل من الصابرين) بونلرك هر برى تكليفك مشاقفه
ونوابك شدا ننه صابرلردن ايديلر (وادخلناهم فى رحمتنا) وبز انلرى
نبوته ويا نعمت آخرته ادخال ايتدك (انهم من الصالحين) انلر انبيا
ايكن ينه صلاحده كاملردن ايديلر * زيراكه انبيانك صلاحى فساد
وكدوراتدن معصومدر * ذوالكفلك اول اسمله تسميه سنده اختلاف
اولندى * روايتدركه انبيادن برينه وحى الهى كلديكه عمرك آخره
ايروبدر بنواسرايله خلافتكى عرض ايت هر كسه كه على الدوام كچه ده
صلاته قيام وكوندزده صومه اهتمام ايده وناس يئنده قضا ايدوب غضب
ايتيه خلافتكى اكا تفويض ايت برشاب طوروب بنانى تكفل ايدر
ديوب وفا ايديجك عندالله مشكور اولدى واول نبيك مقامنه نبى اولوب
اول اسمله تسميه ايدلدى (وذا النون اذ ذهب مغاضبا) ذكر ايت يونس
ابن متاي كه ارسال اولنديغى قومه انجنوب شدت غضبيله ارالردن
كتدى * ابن عباس رضى الله عنهما ايدر يونس عليه السلام وقومى

فلسطينه ساكن اولورلردى بركلك انلره غزا ايدوب اون ايكي سبطدن
طقوز بچق سبطى اسير ايدوب ايكي بچق سبط ديارده قالدیلر * شعيا
عليه السلامه وحى الهى كلديكه اول ملكلى حرقيايه امر ايدكه كيم شول
بنى اسرائيلى اسير ايدن قوم كافرينه برنبى قوى كوندركه بن انلك قلوبنه
رعب القا ايدرين حتى كه اسير ايتدكلى بنوا اسرائيلك جيعن كوندركل ملك
اكاشعيا سن كيمى كوندركلى رأى ايدرسن ديدى حالبوكه انك مملكته
انبادن بش كسنه وارايدى شعيا عليه السلام ديديكه يونس عليه السلامى
كوندركل كه اول قوى امين كسنه در اويله اولسه اول ملك يونس
عليه السلامى چاغروب مخصوص مذکور ايچون اول قومه كتمكه
امر ايلدى يونس عليه السلام ديديكه الله تعالى بنى اسمله ذكر ايدوب
اول قومه كتمكه بنى معين ايتدى ملك ديديكه معين ايتدى يونس
عليه السلام ايتدى * ايمدى مملكته بندن غيرى دخى انبياء اقويا
وار انلك برنبى كوندركل وقتا كه ملك وشعيا وقوم اكاشعيا ايتديلر
ياوزلوب آرارندن چيقوب كتدى وبرقوم ديديلر كه انك انجنوب كتمسى
رب تعالى يه ايدى شول سبيدككه قومه عذاب وقوعيله وعدندنصره
انلردن انى رفع ايتدى كراحت واستحياء ايتديكه انلك ببنده خلف وعد
ايله معروف اوله واكاشعيا كاذب دينله حالبوكه عذابك رفعنه سبب نه ايديكى
بيلدى يوخسه الله تعالىنك حكمنه كراهندن دكل * بعض اخبارده
ايدر انك قومى عادتدن ايديكه كذبى ظهور ايدن كسنه يي قتل ايدرلردى
وقت موعودنده عذاب كشمچك خوف ايتديكه كندوبى قتل ايدلر
اكاشعيا ياوزلدى * حسن ايدر رب تعالى اكاشعيا ايديكه قومه باسنى
ايركوره اول ايسه مهلت ايتديكه اكاشعيا حاضرله * ديديكه امر الله
اندن اسرعدر حتى نعلنك اخذينه مهلت ايتيوب اول دكلو زمان دخى
مهلت ويرليچك خلقنده ضيق اولغله ياوزلوب كتدى * وهب بن منبه
ايدر يونس بن متى برعبد صالح ايدى وخلقنده ضيق اولوب ائقال نبوت
اوزرينه حل اوليچق تختنده تفسخ ايتدى واندن قاچوب كتدى اويله
اولسه الله تعالى انى مرسلينك اولوا العزمى زمره سندن چيقاروب پيغمبر
صلى الله عليه وسلمه (فاصبر كما صبر اولوا العزم من الرسل) رسوللردن
اصحاب عزائمك صبرى كيمى سندن دخى صبر ايدكل (ولا تكن كصاحب الحوت)

(صاحب)

صاحب حوت يونس بن متى كيمى اولغل ديلدى (فظن ان لن نقدر عليه)
يونس ظن ايتديكه براكا عقوبتى قضا ايتيه وز * ويانده قدرتمز اعمال ايتيه وز
روايت اولنديكه يونس عليه السلامه ذنب اصابت ايتديك رب تعالى يه
مغاضب اولديغى حالده قومى اراسندن كتدى حتى ظن ايتديكه براكا عقوبت
تقدير ايتيه وز وشيطان انى استرلال ايدوب لكن سلف عبادتى اچليچون
الله تعالى انى شيطانه ترك ايتدى بلكه انى بالق قارننه براغوب انده قرق كون
ويايدى كون ويا اوج كون حبس ايلدى (فتنادى فى الظلمات) يونس
عليه السلام ظلمت ليلده وياظلمت بجرده وياظلمت بطن حوته ندا ايتديكه
(ان لا اله الا انت سبحانك انى كنت من الظالمين) يالهى سندن غيرى معبود
بالحق اله يوقدر سنى تنزيه ايدرين اندنكه ارادت ايتديك شئى تفيددن
حاجز اوله سن مغاضبتله نفسه ظلم ايدنلردن اولشم * روايت اولنديكه
الله تعالى يونس عليه السلامى يوطان بالغه امر ايلديكه انك لحنى رتميه
وكوكن قيرميه چون بالق انى بجرده مسكنه اسفل بحره ايركوردى انده
صوت ايشدوب نفسنده ديديكه آيا كيم بوصوت نه اوله وحى الهى
كلديكه اول دواب بحرك تسبيحيدر اويله اولسه يونس دخى انلك بيله
بالق قرنده تسبيحه باشلدى ملائكه انك تسبيحك ايشديك ديديلر كه ياربنا
ارض غريبه ده برصوت ضعيف ايشيديلور ويا مكان مجهولدن برصوت
معروف كلور اول نه صوتدر بيورلديكه اول بنم عېدم يونسك صوتيدر كه
بكا عصيان ايتديكيچون انى بالق قرنه حبس ايتشن ديديلر كه ياربنا
اول عبد صالحيدر كه هر كونه كچه ده انك عمل صالحى صعود ايدردى
بيورديكه نعم اندن ملائكه انكيچون شفاعت ايدوب بالغه امر اولنديكه
انى بحرك ساحلنه براغه اول دخى انى امر اولنديغى كيمى ايتدى * تكيم
قصه سنك بقيه سى سورة صافنده كلور (فاستجباله ونجياه من الغم)
اويله اولسه براكا دعاسنه اجابت ايدوب ذكر اولنان ظلمات ثلاثه دن
خلاص ايتدك (وكذلك ننجى المؤمنين) انك كيمى مؤمنلى دخى كربات
وشدائدندن خلاص ايدرز قحانكه بزم دعا ويزدن استغاثه ايدلر (وزكريا
اذنادى ربه رب لاتدرنى فردا وانت خير الوارثين) ذكر ايت زكرياي كه
اول رب تعالى يه دعا ايدوب ديديكه يارب بنى ولدسنر بالكر ترك ايتكل كه
وارثم اوليه حالبوكه سن وارثلك خيرلى وافضلين (فاستجباله ووهبنا له)

يحيى) بز انك دعاسنه اجابت ايدوب يحيى اكا به ايتدك (واصلحنا له
 زوجة) و بز انك چون زوجه سنى عقيم ايكن ولود قيلدق وياسية الخلق
 ايكن حسنة الخلق قيلدق (انهم كانوا يسارعون في الخيرات) شول
 ذكر لى سبق ايدن انبياء وياخود زكريا و مرأسى و يحيى اعمال صالحه به
 مبادرت ايدر لردى (ويدعوننا رغبا ورهبا) و بز م عند مزده كى
 ثوابه رغبت و عذاب زدن رهبت ايدوب بز دعا ايدر لردى (وكانوا لنا
 حاشعين) و بز متواضعين و خوفه دائمين ايدلر (والتي احصنت
 فرجها فنفضنا فيها من روحنا) و ذكر ايت مريم رضى الله عنها ي كه
 فرجنى و طئدن حفظ ايتدى و جبريله امر ايتدك كه انك درعى جيبه نفخ
 ايتدى و اول نفخه بطنده عيسى ايتدك (وجعلناها وابنها
 آية للعالمين) و بز اول مريمى و اوغلى عيسى عالينه علامت و عبرت
 قيلدق اولكه اول ايكسنى خالى تأمل ايدم الله تعالىنك كال قدر تن
 تحقيق ايدر (ان هذه امتكم امة واحدة) اشو ملت توحيد و ياملت اسلام
 ملت زدر كه انك اوزره اولمكز اوزريكزه واجب اولور شريعت واحده
 اوزره اولديغكز حالده كه انده اختلاف اوليه كه اول سبب فلا حكزدر
 غيرى دكل (وانا ربكم فاعبدون) بن سرك ربكزين بسدن غيرى ربكز
 يوقدر * ايمدى بكا عبادت ايدك غيرى به دكل (وتقطعوا امرهم بينهم)
 دينلرين بيشلرنده تفريق ايدوب فرق و احزاب اولديلر يهود و نصارى
 كى برى برلرينه مخالفت ايتديلر (كل الينا راجعون) انلرك كليسى
 آخرتده بز رجوع ايدرلر دينده اتفاق ايتيوب افتراقلرينك جزاسين
 ايدوز (فنعمل من الصالحات وهو مؤمن فلا كفران لسعيه) اما اول
 كسه كه مؤمن اولديغى حالده اعمال صالحه دن استطاعتى اولديغن ايشليه
 انك سعيه جمعد و ثوابه نسيان اولمز (وانا له كاتبون) بز انك سعيى
 صحيفه اعماله يازوب يوم قيامتده جزاسين ايدم رز * ديتديكه الله تعالىدن
 اولان شكر و كفرانك معناسى مجازات و ترك مجازاتدر (وحرام على قرية
 اهلكناها انهم لا يرجعون) شول قرية اهلى اوزره واجبدر كه انلر
 دنياه رجوع ايتديلر و ياخود هلاكن حكم ايتديكز قريه نك اهلى اوزره
 حرامدر كه انلرك اعمالنى قبول ايدموز * زيرا كه انلر توبه ايتملر (حتى
 اذا فتحت يا جوج و ما جوج) انلرك رجوع لى امتاعى زائل اولمز ساعتك

(قيامته)

قيامته و اماراتك ظهورينه دكين اول قحانكه يا جوج و ما جوجك سدى
 آجيلوب انلر اندن چيقه لر (وهم من كل حذب ينسلون) اول يا جوج
 و ما جوج و ياخود قبور دن بعث اولسان خلائق هر نشز وتلدن و مكان
 مرتفعدن ذبك سرعت مشى كى نزولده سرعت ايدم (واقرب الوعد
 الحق) الله تعالىنك يوم قيامتى اقامته اولان وعد حقنك وقت ظهورى
 قريب اولدى (فاذا همى شاخصة ابصار الذين كفروا) اول وقتده كفارك
 كوزلرى شدائد احواله نظردن و كال حيرتنن يوليوب آچق قاله ديه لركه
 (يا ويلنا قد كنا في غفلة من هذا بل كنا ظالمين) ويل بز كيم بوكوندن بز غفلتده
 اولدق حق ايديكن بيلدك بلكه رسلك الله تعالىدن بز كتورد كلى
 اخبارى تكذيبه ظالمردن اولدق الله تعالى انلره ديه كه (انكم و ما تعبدون
 من دون الله حصب جهنم) يا مشركين سز والله تعالىدن غيرى
 معبود ايدنديكز اوثن و ابليس و اخوانى جهنمك ايقاد اولنه جقتلرسز *
 وقتا كه پيغمبر مزم صلى الله عليه وسلم اشبو آيتى مشركينه تلاوت ايتدى
 انلرك بعضى ديديكه يهود عزيزه و نصارى عيسايه و بنو الميخ ملائكه به
 عبادت ايتملر لى اويله اولسه انلرك دخى اشبو معبودلرى حصب نار
 اولمغى ايجاب ايدر پيغمبر مزم عليه السلام ديديكه بلكه انلر شياطينه
 عبادت ايدرلر كيم اول شياطين انلره انكاه امر ايدوبدر والله تعالى
 (ان الذين سبقتم لهم منا الحسنى اولئك عنها مبعدون) آيتن ازال
 ايتدى (انتم لها واردون) اول جهنمه سز دخول ايدر سز (لو كان
 هؤلاء آلهة ماوردوها) اكر اول اوثن حقيقتده آلهه اولسه لر انلرويا
 انلره عبادت ايدنلر ناره داخل اولمز لردى (وكل فيها خالدون) حالبو كه
 اول عابدون و مبعودون نارد خالدر در (لهم فيها زفير) انلرك نارد
 انين و تنفس شديدى اولور (وهم فيها لا يسمعون) و الحال نارد انلر
 زفيرلرين و صوت آخرى ايشتملر شول سيبديكه نار شدتله غلبان
 ايدر و ياندنكه احوال و آلامدن انلره ايرر و ياخود قولاقلرينه ناردن
 مسمارلر اور ييلور و يا انلر آتشدن تابوتلره قونوب بر كيديلور * ابن مسعود
 ايدر قحانكه نارد مخلصين قاله لر هر برى ناردن تابوتلره قونور بعده
 اول تابوتلر بر آخر تابوتلر ايچنه قونور حتى اوج تابوت برى برينك
 ايچنه قونلديغند نصكره اوزرلرينه ناردن مسمارلر اور ييلور

حتى که هر بری برشی ایشتمکدن قالور ونه ناردنه کنیدن غیرى هذاب
اولنور وار ایدیکن کورر (ان الذين سبقت لهم منا الحسنى اولئك عنها
مبعدون) شونلر که انلر ایچون بزدن خصلت حسنی سبقت ایتدیکه اول
سعادت ویا طاعته توفیق ویا جنتله بشارتدر * ایمدی انلر اول ناردن
ابعاد اولمشلردر * دینلدیکه انلر که مراد هر معبوددر که الله تعالی به
طائعدر وعبادت اولندیغنه کارهدر عزیز وعیسی وملائکه کبی
(لا یسمعون حسيسها) انلر چانکه جنتده منازلارینه نزول ایدلر نارك
صوتن وتلهی حرکتن ایشتمزلر (وهم فيما اشتهت انفسهم خالدون)
وانلر انده نفسلری اشتها ایتدیکی شیئده دائمدر (لا یحزنهم الفزع
الا کبر) فزع اکبر انلری محزون ایتز که انکه مراد نفخة اخیره در ویا اهل
نارك ناره وقت انصرافیدر ویا انلر اوزره نارك وقت انطباقیدر ویا موتک
وقت ذبحیدر (وتلقیهم الملائكة) وابواب جنتده ملائکه انلره
تهنیه ایدر اولدقلری حالده قارشو کلوب دیرلر که (هَذَا يَوْمُكُمْ الَّذِي
کنتم توعدون) اشو سزک ثوابکز کونیدر که زیاده وعد اولنوردیکز
(یوم نطوی السماء کطی السجل للکتب) شول کونده که بز سمایی طی
ایدرز طومارک لاجل الکتابه طی کبی (کابدانا اول خلق نعیده)
اول خلق ایتدیکمز اشیایی ابتداده کی خلقمز هیئتده اعاده ایدرز اول کرک
عدمدن ایجاددر ویا خود اجزاء متبدده بی جعدر وانکه مقصود ابدایه
قیاسله اعاده نک صحتی بیاند * زیرا ابداء واعاده نک شول مقدور بی
مصحح اولان امکان ذاتی شمولی وقدرت قدیمیه تناولی علی السویه در
(وعدا علینا) بز اعاده بی وعد ایشتمز که اوزر یمزه انجازی واجب اولور
(انا کنافاعلین) بز لابد انی ایشلمز (ولقد کتبنا فی الزبور من بعد
الذکر) بز تورا ویا لوح محفوظدنصکره داود زبورنده ویا سمدان نازل
اولان کتب الهیه نک جیعنده یازدقکه (ان الارض یرثها عبادى الصالحون)
ارض جنتی ویا ارض مقدسه بی بنم عبادمک صالحلری وارث اولور
(ان فی هذا لبلاغا لقوم عابدين) اشبو ذکر اولنان اخبار ومواعظ
ومواعیدده کفایه ویا بلوغ مطلوبه سبب واردر شول قومه
که همتلری عبادتدر (وما ارسلناک الا رحمة للعالمین) یا محمد بز سنی
عالمره رحمت کوندردک زیرا انک کتوردیکی شی انلر که سعادتده

(سیدر)

سیدر ومعاش ومعادلرینک صلاحنی موجبدر * دینلدیکه انک کفارده
رحمت اولسی شول حیثیتله در که انک سیبیله خسف ومسح وعذاب
استئصالدن امینلردر (قل انما یوحی الی انما الهکم اله واحد) دیکل که
بکا وحی اولنان دکل الا اولدر که اله واحددن غیرى الهکز یوقدر واولیه
(فهل انتم مسلمون) اولیه اولسه سز الله تعالی به عبادتکزی شول
جنتله مصدق وحینک مقتضاسنجه مخلصلمیسز (فان تولوا فقل اذنتکم
علی سواء) اگر توحیددن اعراض ایدرلر سز دیکل که بن امر اولندیغ
شیئی سزیه علی السویه اعلام ایشدم (وان ادری اقرب ام بعید
ماتوعدون) بیلزین که وعد اولندیغکز یوم قیامت قریب ویا بعید میدر
(انه یعلم الجهر من القول ویعلم ما تکتمون) اول الله تعالی سزک اسلامه
طعنده جهر ایتدیککزی و مسلمینه احقاردن کتم ایتدیککزی بیلور
(وان ادری لعله فتنة لكم ومتاع الی حین) و بیلزینکه جزا کر تأخیری ظن
اولور کیم سزیه استدر اراج واقفانکره زیاده ویا امتحان اوله نیچه عمل ایدر
ایتدیککزه نظر ایدیه ومشیئة الهیه اقتضاسنجه اجل مقدرکره دکن تمیع اوله
(قال رب احکم بالحق) یا محمد دیکل که یارب بزمله اهل مکه بیننی عدلله
قضا ایت که اول انلر که استیجال عذابن ویا اوزرلرینه تشدید اقتضا ایدر
اولیه اولسه یوم بدرده عذاب اولنوب مسلمون انلره غلبه ایتدی (وربنا
الرحمن المستعان علی ماتصفون) ربمز جل شانه خلقنه رحمتی کثیردر
اندن معونه طلب اولمشدر کفارک وصف ایتدیکی اوزره که شوکت انلرک
اولوب اسلام مقهور اوله

سورة الحج وهی ثمان وسبعون آية مكية

الا آتی آیت دکل که اول هذان خصمان دن الی صراط الحمیده دکدر

بسم الله الرحمن الرحيم

(یا ایها الناس اتقوا ربکم) یاناس ربکز جل شانه نک عقابندن حذر
ایدوب امرینه اطاعت ایدک (ان زلزلة الساعة شیء عظیم) ساعتک
اشیایی تحریکی امر هائلدر * زلزله وززال حال هائله اوزره شدت
حرکتدر اشبو زلزله ده اختلاف اولندی * دینلدیکه اول اشراط
ساعتندر که ساعتک قیامندن اول ظهور ایدیسردر و دینلدیکه اول
زلزله یوم قیامتده اولور * ابن عباس رضی الله عنهما دیر که زلزله ساعتله

لث (۸)

مراد ساعتك قيامت که اول انکله بيله ظهور ايدر (يوم ترونها تذهل كل مرضعة عما أرضعت) شول کونده کی اول زلزله یی کوره هر مرضعه یی ارضاع ایتدیکی ولدن اشغال ايدر یعنی اول زلزله نك هولی بر مرتبه ده اوله که مرأه ثدینی رضیعنه القام ایتشیکن دهشتندن انی انک اغزندن نزع ایده (وتضع كل ذات حل حملها) وهر حامل حملنی وضع ایده حالبوکه مدت حملی تمام اولوبدر * اشبو دلالت ایدر که زلزله مذکوره دنیاده اوله زیرا که بعثدنصرکه حل اولمز وانی يوم قیامتده اولور دین دیر که اول قول شریفده ورودی ساعت امرینی تعظیم وجهی اوزره در یوخسه حقیقی مراد دکلدر (وترى الناس سكارى وما هم بسكارى) اول کونده ناسی کورر سنکه کانه سکرانلدر و الحال انلر حقیقته سکران دکلدر (ولکن عذاب الله شديد) الا بوکه الله تعالینک عذابی شدیدر انک هولی انلرک عقولن اوچورر وتمیزدن یکورر * ابوسعید الخدری رضی الله عنه پیغمبریمز صلی الله علیه وسلمدن روایت ایدر دیدیکه الله تعالی يوم قیامتده آدم علیه السلامه ديه که یا آدم اولادکن ناره کوندریله جکری آیرغل آدم علیه السلام ديه که یارب اکا کوندریله جک ندکلو کسه لر در بیوریه که هر بیکده طقوز یوز طقسان طقوز کسه در اول وقتده مولودلرک صاچی آغارر وذات حل حملنی براغور و ناس سکرانلر کی کوریلور و الحال انلر سکران دکلدر بلکه الله تعالینک شدت عذابندن قورقیلور صحابه دیدیلر که یارسول الله اول بیکنک بری قنغیز اولور پیغمبریمز علیه السلام دیدیکه اول طقوز یوز طقسان طقوز یا جوج و ما جوجدن اولوب بری سزدن اولیسردر صحابه سرورلندن تکبیر ایتدیلر * پیغمبریمز صلی الله علیه وسلم ایدی رب تعالیدن رجام بودر که سز اهل جنتک ربی اوله سز بلکه ثلثی اوله سز والله رجام بودر که سز اهل جنتک نصفی اوله سز صحابه ینه تکبیر ایتدیلر * پیغمبریمز علیه السلام ایتدیکه سز اول کونده ناسک کفاری کثرته نسبتله مثلکز نور اسودده شعره بیضا کی ویا نور ابیضده شعره سودا کی اولور * حدیث آخرد ایدر * پیغمبریمز صلی الله علیه وسلم دیدیکه اهل جنت یوز یکرمی صف اولوب سکسان صفی بنم اتم اولیسردر * يوم قیامتده کفارہ نسبتله مسلمونک قلنده مثلی جنب بعیده شامه کبیر

(ویاذراع)

ویاذراع دابه ده رقه کبیر بلکه نور ابیضده شعره سودا ویا نور اسودده شعره بیضا کبیر بعده دیدیکه اتمدن یتش بیک کشی جنته حسابسز کیرر عمر رضی الله عنه دیدیکه جنته حسابسز کیرر انجق یتش بیکمیدر دیدیکه نعم وانک هر بریه یتش بیک کیرر (ومن الناس من یجادل فی الله بغير علم ویتبع کل شیطان مرید) ناسک بعضی الله تعالینک توحید و کلامنده حجت ودلیلسز خصومت وجدال ایدر واول مجادله سنده وعامه احوالنده هر شیطانہ اتباع ایدر که اول فساد ایچون تجرد ایدوبدر * اشبو آیت نصر بن الحارث شاننده نازل اولوبدر که اول کثیر الجدل ایدی وملائکته یی بنات اللهدر وقرآن اساطیر اولیندر دیردی وبعثی انکار ایدردی (کتب علیه انه من تولاه فانه یضله ویهديه الى عذاب السعير) شیطان اوزره قضا اولندیکه هرکسه کیم انی تولى واکا اتباع ایده اول شیطان کندویه اتباع ایده فی اضلال ایده واکا عذاب سعیری مؤدی اولان شیئه دلالت ایده (یاایها الناس ان کنتم فی ریب من البعث) یا کفار مکه اکر بعثک امکانشندن ومقدور یتندن شکده ایسه کز (فانا خلقناکم من تراب) نظر ایدک بدأ خلقکزه کیم اول شککزی کیدر که اول اصل اولکز آدمی ترابدن خلق ایتدک (ثم من نطفة) بعده انک ذریتن منیدن خلق ایتدک (ثم من علقه) بعده دم غیبط منجمدنکه اول منی دم غیبط غلیظ بعده لحم اولور (ثم من مضغة مخلقة وغير مخلقة) بعده لحمه قلبله دنکه اول مضغ اولنده جق دکلو اوله اول کرک مسواتدر که انده نقص وعیب اولیه ویا غیر مسواتدر ویا خود اول مصوره ویا غیر مصوره در ویا خود وقتنده وضع اولنور ولددر ویا وقتسز ولددر * ابن مسعود رضی الله عنه ایدر قحانکه نطفه رجده قرار ایده بر ملک انی کفنه آلوب دیر که یارب اشبو نطفه مخلقه ویا غیر مخلقه می اولیسردر اکر غیر مخلقه اولور دینورسه اول رجده دم اولوب نسنه اولمز واکر مخلقه اولور دینورسه ملک دیر که یارب ذکر ویا انشامی اولیسردر شقی ویا سعیدی اولور اجل وعمل ورزقی ندر وقنی یرده فوت اولور اکا دینور که لوح محفوظه نظر ایت بوجه یی انده بولور سین اولیه اولسه لوح محفوظه وارر اشبو اموری اندن یازینور (لنبین لکم) تاکه بوتدر یجله سزه قدرتمزی تبیین ایدهوز واول شی که تغیر وفساد وتکوئی

مرّة قبول ایدہ مرّة اخراده دخی انی قبول ایدر واولکھ اوّلا انی تغییر
وتصورہ قادر اولہ ثانیاً دخی قادر اولور (ونقر فی الارحام مانشاء الی اجل
مسمی) ووز ارحامہ ثبوتن دیندیکمزی وقت وضعہ دکن تثبیت ایدرز کہ
انک ادناسی آلتی ایدر واقصاسی درت یلک آخریدر (ثم نخرجکم طفلاً)
بعده سنک ہر بریکزی انالریکز قارنندن طفل چیقاریرز (ثم لتبلغوا
اشدکم) بعدہ قوت وعقلدہ کالہ ایرہ سنک اول وقت تمیزدر * دیندیکہ
اول اون بش یاشنہ ویا اون سکز یاشنہ ایرمکدر تا اوتوز ویا اوتوز
آلتی یاشنہ ایرنجیہ دکن (ومنکم من توفی) سزدن کیمیکز قوت وعقلدہ
کالہ ایردیکندہ ویا ایرمزدن مقدمہ توفی اولنور (ومنکم من یرد الی ارض
العمر لکیلا یعلم من بعد علم شیئاً) وکیمیکز ایسہ عمرک اضعف واخسنہ رد
اولنور کہ اول هرم وخرقدر تاکہ عقل اولہ برشیئی بیلور کن ییلز اولہ
یانسیان عروضیلہ ویا عقلنک تغییریلہ بوندنصرکہ بعثک حقیقتنہ دلیل آخر
ایراد ایدوب دیدیکہ (وتری الارض هامدة) سن ارضی نباتسز یابسہ
کوررسن (فاذا انزلنا علیہا الماء اهتزت وربت وانبتت من کل زوج
بہیج) چنانکہ بز اکا یغور ایندیرہ وز اول نباتلہ تحرک ایدر وآرتوب
یوجہ لور واندہ هر صنفدن حسن رائق بترکہ انی کورنہ سرور وبہجت
ایرر (ذلک بأن الله هو الحق) اشبو مذکور اتکہ اللہ تعالینک انسانی اطوار
مختلفہ دہ خلق ایدوب احوال متضادہ یہ تحویلیدر وارضی موتدنصرکہ
احیایدر شول سبیلہ در کک اللہ تعالی اولوہیتندہ حقدر انککھ
اشیاء متحقق اولور (وانہ یحیی الموتی) واول یوم قیامتندہ موتایی
دیر کورر نطفہ یی وارض میتہ یی دیر کورمسی کبی (وانہ علی کل شیء
قادر) واول ہرشیئہ قادر در (وان الساعة آتیة لا ریب فیہا)
ویوم قیامت کلیسدر عقلی وزہنی اولان عنندنہ انک حقیقتندہ رب
یوقدر (وان الله یبعث من فی القبور) واول اللہ تعالی قبوردہ کی موتایی
بعث ایدر وعدی مقتضاسنجد کہ اول خلقی قبول ایتمز (ومن الناس
من یجادل فی الله بغير علم ولا ھدی ولا کتاب منیر) ناسک بعضی دین الہمدہ علم
عقلیسز وحتسز ووحینسز جدال ایدر (ثانی عطفہ) اول کبرندن صالنور
ویا عنقنی لوی ایدر ویادعوت اولندیغی شیئندن اعراض ایدر ویاتعطفن
منع ایدر اولدیغی حالده (لیضل عن سبیل الله) تاکہ ناسی دین الہدن

(صرف)

صرف ایدہ (لہ فی الدنیا خزی) انکچون دنیادہ عذاب وھوان واردر کہ
اول انک بدردہ صبرا قتل اولتمسیدر (ونذیقہ یوم القیامة عذاب الحریق)
ویوم قیامتندہ اکا نار عذابن اذاقہ ایدہ رز یوخسہ دنیادہ اکا اصابت
ایدن ذنوبنہ کفارت اولز ویوم قیامتندہ اکا دینورکہ (ذلک بما قدمت یداک)
اشبو عذاب سکا کفر وتکذیبک سبیلہ درکہ انی اشبو کون ایچون تقدیم ایتمشدک
(وان الله لیس بظلام للعبید) واللہ تعالی عبیدنہ ظلم ایدر دکلدر
(ومن الناس من یعبدا الله علی حرف) ناسدن بعضی واردر کہ اللہ تعالی یہ
عبادتی دیندن برطرف اوزرہ ایدر کہ انک اندہ ثباتی اولز شول کسہ کبی کہ
جیشک طرفندہ طورر ظفر حس ایدرسہ قرار ایدر والا طورر من کیدر
(فان اصابہ خیر اطمان بہ) اگر اکا جسمندہ صحت ومعیشتنندہ سمعت
اصابت ایدرسہ اکا راضی اولور وسکون ایدر اشبو دین اسلام نہ کوچک
دین اولور دیر (وان اصابہ فتنۃ انقلب علی وجہہ) واکر جسمندہ بلا
ومعیشتنہ ضیق اصابت ایدرسہ مرتد اولوب اردنہ دوز کفری جہننہ
کیدر * دیندیکہ اشبو آیات اعرابدن برقوم شانندہ نازل اولدیکہ انلر
مہاجرین اولدقلری حالده بادیدہ دن مدینہ یہ قدوم ایدوب اسلامک صحتی
اعتقادنسز مسلمان اولدیلر انلردن اولکھ مدینہ یہ کلدیکندہ جسمی
صحیح اولدی وفرسی مہر حسن انتاج ایتدی ومرأسی اوغل طوغوردی
ومالی چوق اولدی بن بودینہ کیرہ لودنبرو خیرہ ایرشدم دیدی واما اولکھ
مدینہ یہ کلدیکندہ جسمی مریض اولدی وقصر اغی کبہ اولدی
ومرأسی قیز طوغوردی ومالی اکسلدی بن بودینہ کیرہ لودنبرو بکا شر
ایرشدی دیوب دینندن کفرہ رجوع ایتدی (خسر الدنیا والاخرة)
اول مغبون اولدی دنیادہ مأمولنک فواتیلہ وآخرتندہ دیننک ذہابی
وناردہ خلودیلہ (ذلک هو الخسران المبین) بو ذکر اولنسان ایسہ
خسران ظاہر در انک مثلی خسران اولز (یدعو من دون الله مالا یضرہ
وما لا ینفعہ) اللہ تعالیدن غیری برجسادہ عبادت ایدر کہ اکا عصیان
ایدوب عبادت ایتمسہ ضررندن خوف ایدلز واکا اطاعت وعبادت
ایتمسہ نفعی رجا اولمز (ذلک هو الضلال البعید) اشبو فعل ایسہ
ھدایتدن بعید برضلالدر کہ زوالی رجا اولمز (یدعو لمن ضرہ اقرب

من نفعه) عبادت ايدر اكا كه معبود اولسييله ضررى كه دنيايه قتل و آخرته عذاب ايجاييدر اكا اقريدر نفعندكه اكا عبادتله اندن شفاعت و اول انگچون الله تعالى به وسيله اولسن توقع ايدر (لبئس المولى ولبئس العشير) اول نه چركين ناصر و نه چركين صاحب اولور (ان الله يدخل الذين آمنوا و عملوا الصالحات جنات تجري من تحتها الانهار) الله تعالى اكا ايمان ككتوروب اعمال صالحه ايدن عبادنى ادخال ايدر شول جنتله كيم اشجاري التندن نهرلر جارى اولور (ان الله يفعل ما يريد) الله تعالى ديلديكن ايشلر موحد صالحه ثواب ويرر و مشرك و كافره عذاب ايركورر انى اندن منع و دفع ايدر اولمز (من كان يظن ان لن ينصره الله في الدنيا والاخرة فليمدد بسبب الى السماء) الله تعالى رسولى محمد صلى الله عليه وسلمك دنيايه و آخرته ناصريدر اول كسه كه غيظندن انك خلافتن ظن و توقع ايده بيتنك سقفته بر حبل شد ايدوب انكه اختناق ايتسون (ثم ليقطع) انك اختناقندنصكره حبل دخي قير لسون (فليظن هل يذهبن كيده ما يغبط) اندن نظر ايتسونكه اول كيد و حيله سى غيظنى كيدررمى * اشبو زجرده مبالغه در شول ظن فاسدندكه الله تعالى رسولنه نصرت ايتيه * ودينليكه سماء ايله مراد سماء معروفه اوله يعنى اول سمايه بر حبل مد ايدوب اكا صعود ايتسون و محمد كنان وحيي اصلندن قطع ايتسون * زيراكه انك اصلى سمادندر بعده نظر ايتسونكه اول فعلله غيظنى كيدر مكه قادر اولور مى * دينليكه نصرتله مراد رزقدر يعنى اول كسه كه الله تعالى اكا دنيايه و آخرته رزق و يرمز ديو الله تعالى به سوء ظن ايله بر حبل بيتنك سقفته مد ايدوب كندويي انكه خنق ايتسون بعده نظر ايتسونكه اول فعلى انك غيظنى كيدررمى * دينليكه اشبو آيت اسد و غطفاندن بر قوم شاننده نازل اولوبدر پيغمبريمز صلى الله عليه وسلم انلرى اسلامه دعوت ايتدكه ديدلر كه بزمله يهود بننده حلف واردر قورقارزكه محمد نصرت اولمز و امرى ظهور بولزسه بزايسه اسلامه كلش بولنورسهوز بزمله يهود بننده كى حلف كسيلوب بزه طعام ويرمز اولورلر (وكذلك انزلنا آيات بينات) آيات قرآندن تقدم ايدن كى بز اكا قرآنك كلنى آيات واضحات انزال ايتدك (وان الله يهدي من يريد) والله تعالى اول قرآنله ديلديكن

(هدايت)

هدايت ايدر ويا هدايت اوزره ثابت ايدر (ان الذين آمنوا) شونلر كه الله تعالى به ورسولنه ايمان كتورديلر (والذين هادوا) و شونلر كه اسلامدن عدول ايتديلر يهود كى (والصائين) وديندن دينه عدول ايتديلر (والنصارى) ودين عيساده اختلاف و ضلاله دوشديلر (والمجوس) و آتسه طايديلر (والذين اشركوا) والله تعالىدن غيرى اوثنائى معبود ايدنديلر (ان الله يفصل بينهم يوم القيامة) الله تعالى يوم قيامته انلرك بيننى حكومتله و محقق مبطل اوزره اظهارله و ياهر برينه لايق جزا ايله فصل ايدر (ان الله على كل شىء شهيد) الله تعالى هر شئيئه عالم و احوالنه مراقبدر (الم تر) يا محمد سكا خبر و يرلديمى (ان الله يسجد له من فى السموات ومن فى الارض) الله تعالىنك سموات وارضده اولان مخلوقاتى انك قدرتنه تسخر ايدرلر انك تدبيرندن ابا ايتزلر ويا هر برى ذليله مدبرنك عظمتنه دلالت ايدر (والشمس والقمر والنجوم) وشمس وقر و نجوم الله تعالى به سجود ايدر انك امرينه انقياد و منازللرنده دورانله (والجبال والشجر والدواب) و جبال و اشجار و دواب اكا سجود ايدر هر برينك ظلى تحويلله (وكثير من الناس) و ناسك كثرى اكا سجود ايدر جبهه لر بنى يره قومغله (وكثير حق عليه العذاب) و ناسك كثرى ايسه اوزرلر يره عذاب واجب اولوبدر كفرلر يله و طاعتدن اباريله (ومن يهن الله فانه من مكرم) اول كسه كه الله تعالى انى شقاوتله ذليل ايده سعادتله انى كريم ايدر اولمز (ان الله يفعل ما يشاء) الله تعالى اهانه و اكرامدن ديلديكن ايدر سعادت و شقاوت انك مشيئت و ارادتيله در (هذان خصمان اختصموا فى ربهم) ايكى فريق مؤمنون و كافرون الله تعالىنك دين و امرنده ويا انك ذات و صفاتنده اختصاص ايتديلر * دينليكه يهودله مؤمنلر تخاصم ايدوب يهود ديدلر كه بز الله تعالى به احق و كتابنده سزدن اقدم و پيغمبريمز سزك كيدن مقدمدر و مؤمنلر ديدلر كه الله تعالى به احقزكه پيغمبريمز محمد صلى الله تعالى عليه وسلمه و سزك پيغمبريكزه ايمان كتورمشز و سز بزم كتابيمزى و پيغمبريمزى بيلوركن حسديكزدن اكا كافر اولديكز اويله اولسه انلرك خصوصتلىر فصل طريق اوزره نازل اولديكه (فالذين كفروا قطعتم لهم ثياب من نار) شونلر كه دين اسلامى انكار ايتديلر انلر ايجون جشه لرى مقدارنجه آتشدن ثوبلر

تقدیر اولنور وانلره کیدیر یلور (یصب من فوق رؤسهم الحیم) انلرک ققارلی تیموردن مقیمه ایله دنلوب ایچنه شول حرّی نهایته ایرمش صو دو کیلور (یصهر به ما فی بطونهم والجلود) اول ققارینه دو کیلن صو ایله بطنلرنده کی احشاء و امعاری پاره لنوب اریدیکندن ماعدا ظاهرلرنده کی دریلری دخی صویلوب دو کیلور (ولهم مقامع من حید) وانلر ایچون تیموردن سوطلر دخی اولور که انکله انلر ضرب اولنور * خبرده کلدیکه اگر اول سوطک بری یره قونوب انس و جن انک قالدلمسینه جمع اولسه لر قالدلمسینه قادر اولیه لردی (کما ارادوا ان یخرجوا منها من غمّ اهدوا فیها) هر بار که اول نارك غومندن خروج مراد ایتسه لر کیرو اول ناره رد اولنلر (وذوقوا عذاب الحریق) وملائکه انلره دیه لر که ذوق ایدک شول نار عذابن که احراقده مبالغه در اشبو ایکی خصمدن برینک جزاسیدر بعده خصم آخرک جزاسنده دینلدیکه (ان الله یدخل الذین آمنوا وعملوا الصالحات جنات تجری من تحتها الانهار) الله تعالی شول ایمان و اعمال صالحه ایله متصف عبادینی جنتلره ادخال ایدر که انک اشجاری آلتندن نهرلر جاری اولور (یحملون فیها من اساور من ذهب ولؤلؤا) انلر اول جنتده التوندن سوارلری ولؤلؤ ایله تحلیه اولنورلر (ولباسهم فیها حریر) وانلرک انده لباسی حریر اولور که انک دنیاده رجاله لبسی حرام ایدی (قال النبی علیه السلام من لبس الحریر فی الدنیا لم یلبسه الله فی الآخرة وان دخل الجنة لبسه اهل الجنة ولم یلبسه هو) پیغمبریمز صلی الله علیه وسلم ایدر برکسه که دنیاده حریر کیه الله تعالی آخرتده اکا انی کیدرمیه اگرچه جنته کیرسه ده اهل جنت انی کیوب اول کیمه (وهدوا الی الطیب من القول) انلر قولت طیبینه هدایت اولنلر که اول کلمه توحیددر و یاخود (الحمد لله الذی اذهب عنا الحزن) قولیدر (وهدوا الی صراط الحمید) وانلر دین الله هدایت اولنورلر که اول اسلامدر وحید الله تعالیدر که افعالنده محموددر (ان الذین کفروا ویصتّون عن سبیل الله) شول کسه لر که کافر اولوب ناسی دین اسلامدن صرف ایدرلر (والمسجد الحرام الذی جعلناه للناس سواء العاکف فیهِ والباد) ومسجد حرامدن دخی صرف ایدرلر که بز انی ناسه قبله ومنسک ومتعبد قیلدق اندن مقیم وخارجدن

(ورود)

ورود ایدن مساوی اولدیغی حالده * یعنی انک حرمتن تعظیمده وانده نسک قضا سنده مساویلردر و یاخود کعبه بی تعظیمده ومسجد حرامده صلاة فضلنده و بیت شریفی طوافده مساویلردر و یاخود مقیم وبادی اکا نزولده مساویلدر ایکیسندن بری اولدیغی منزله آخردن احق دکادر الا بوکه ایکیسندن قنغیسی برمنزله سبقت ایدرسه آخرانی اندن ازعاج ایتز (ومن یرد فیهِ بالحاد بظلم ندقه من عذاب الیم) برکسه که مسجد حرامده ارادتی ظلمه الحاد ایتک اوله بز اکا عذاب الیمدن اذاقه ایدرز * اشبو الحادده اختلاف اولندی دینلدیکه اول شرک والله تعالینک غیری یه عبادتدر و یاخود اول شیئدر که قول وفعلدن منهی اوله اگرچه خادمی شتم ایتسه ده و یاخود حرمه محرم اولمدن دخولده و یا محظورات احرامدن برشی ارتکابد و یاخود مکده طعمی احتکاردر ابن مسعود ایدر اگر برکسه بر خطیئه یه قصد ایتسه اول انک اوزرینه وبال یازلز انی ایشلدیکه اما برکسه عدنده و یا بلده اخراجه ایکن مکده بررجلی قتل ایتکی قصد ایتسه الله تعالی اکا عذاب الیمدن اذاقه ایدر مکرکه اندن توبه ایده ابن عمر رضی الله عنهما حج ایتدیکنده ایکی خیمه قوراردی برینی حلد و برینی حرمدن یچان اهلندن برینه عتات مراد ایتسه اول حلد کی خیمه سنده ایکن ایدردی و دیردی که بز اصحاب بنسند تحث ایدردک که کشینک حرمدن لا والله بلی والله دیمسی الحاددن اوله (واذ بوآنا ل ابراهیم مکان البیت) ذکر ایت شول وقتی که ابراهیم ایچون مکان بیتى مباءه قیلدق * زیرا که کعبه طوفان زماننده سمایه رفع اولمشیدی وقتا که حق جل وعلا ابراهیم علیه السلامه بیت شریفی بنایه امر ایلدی ابراهیم علیه السلام انی قنده بناء ایدر ایدیکن بیلدی الله تعالی بریج کوندردی حتی که بیت شریفی اساسندن کشف ایتدی بر روایتده الله تعالی بر صحابه کوندردیکه اول بیت مقدارنده و حبالنده ایدی یا ابراهیم بنم مقدارمده بنا ایت دیو سویلدی اول دخی اکا کوره بنا ایتدی و ابراهیم دیدک که (ان لا تشرک بی شیئا) بکا برشی اشراک ایتکل (و طهر بیتى للطائفین والقائمین والركع السجود) و بنم بیتى اوئان و اقداردن تطهیر ایت انی طواف ایدنلر وانده اقامت ایدنلر و نماز قیلنلر ایچون (واذن فی الناس بالحج) وناسی حجه دعوتله وانی ادایه امرله

ندا ایت ابراهیم علیه السلام دیدیکه بنم صوتم ایردیکی نه اولسه کرک
 یورلدیکه یا ابراهیم سندن نداء بزدن ابلاغدر اولیه اولسه ابراهیم
 علیه السلام مقام اوزره چیقدی اولدخی اطول جبال دکلو یوکسلدی
 ایکی پارمغین قولاغنه صوقوب یمین و بيسارینه و شرق و غربه یونلدی
 اکاه اولک ربکز جل شانه بریت بناایدوب انی حج ایتکی سزه فرض
 ایلدی ربکزه اجابت ایدک دیو سویلدی اولیه اولسه یوم قیامتہ دکن
 کلوب حج مقدر اولان کسینه لر اصلا ب آباء و ارحام امهاتدن لبیک اللهم
 لبیک دیو اجابت ایتدیلر اکا اجابتده اول اولان اهل یمین ایدی اول
 اجلدن انلر حجه ناسک اکثری اولدیلر * بر روایتده ابراهیم علیه السلام
 اباقیسه چیقوب ندا ایتدی * ابن عباس ایدر اشبو آیتده کی ناس ایلہ
 مراد اهل قبله در * حسن ایدر (واذن فی الناس بالحج) دیو تأذینله
 مأمور محمد علیه السلامدر که حجة الوداعده انکله امر اولندی
 (قال النبی علیه السلام ایها الناس قد فرض علیکم الحج فحجوا)
 پیغمبریمز صلی الله علیه وسلم دیدیکه یاناس اوزریکره حج فرض قیلندی
 من بعد حجه استطاعتی اولانکز حج ایتسون (یا توبک رجالا) سسکا یساق
 یوریوب کله لر (وعلی کل ضامر یا تین من کل فج عمیق) ودخی اوراق
 یوللرک هر برندن آریق دوه لر اوزرنده کله لر (لیشهدوا منافع لهم)
 تا که انلر کسندیلر ایچون منافع دینیه و دنیویه به حاضر اوله لر
 (ویدکروا اسم الله فی ایام معلومات) و تا که عشر ذی الحجه ده
 ویا ایام نحرده هدایا و ضحایا اعدادی و ذبحی عندنده الله تعالینک اسمنی
 ذکر ایدلر (علی مارزقهم من بهیمة الانعام) انک اوزره که اول انلره
 هدایا و ضحایا ایچون ابل و بقر و غنم و یردی (فکلوا منها) ایددی
 اول هدایا و ضحایا کزدن یککزکه اول سزه مباحدر یوخسه اهل جاهلیت
 کی ایتکزکه انلر نسکارندن یزلردی (وأطعموا البائس الفقیر) واندن
 شول بؤسی شدید فقیره یدرک * جابر بن عبد الله رضی الله عنه ایدر
 پیغمبریمز صلی الله علیه وسلم حجة الوداعده یوز بدنه سوق ایدوب التمش
 اوچنی پیغمبریمز علیه السلام کندیسی و باقیسنی علی رضی الله عنه نحر
 ایتدی پیغمبریمز علیه السلام امر ایتدیکه اول بدنه لک هر برندن بر پاره لحم
 آلنوب بر قدرده پشور یله انجلین ایدیلد کدنصکره ایکیسی اندن اکل ایتدیلر

(ومرقتدن)

ومرقتدن ایچدیلر اما شرعله واجب اولان هدیده اختلاف اولندیکی
 مهدینک اندن اکلی جائز اولور میکه اول دم تمتع و دم قران و دم
 واجب کی که حجی افساد و یا فواتیله در و جزاء صیددر * بر قوم دیدیلرکه
 اندن برشی اکلی جائز اولمزرکه اول امام شافعی قولیدر و نذرله نفس اوزره
 ایجاب اولنسان دخی انجلیندر ابن عمر رضی الله عنهما دیدیکه جزاء
 صیددن و نذردن اکل اولمزر انک ماعداسندن اکل اولنورکه اول احد
 واسحق قولیدر امام مالک ایدر هدی تمتعدن ینور و دخی هر هدیدیکه
 اوزرینه واجب اوله الافدیة اذادن و جزاء صیددن و منذوردن دکل
 ائمه حنفیه ایدرلر دم تمتع و دم قراندن ینور بو ایکیسنک غیری
 واجباتدن دکل (ثم ليقضوا تقضهم) بعده و سخلین ازاله ایتسونلر
 قص شارب و قلم اظفار و نتف ابط و استحداد کی * دینلدیکه قضاء تقضله
 مراد حلق و قص شارب و نتف ابط و استحداد و قلم اظفار و لبس
 ثیابه احرامدن خروجدر و یاخود مناسک حجت کلبدر و یاخود رمی
 جارددر (ولیوفوا نذورهم) و نذرلرینه و فاء ایتسونلر * دینلدیکه
 انکله مراد حج و هدی نذریدر و هر شیئدر که حجه نذر اولنور ایددی
 انی قضاء ایله اتمام ایتسونلر و یاخود مراد هر نذرلرینه و فاء ایتسونلر
 مادامکه شرعه مخالف نذر اولیه و یاخود اوزرینه واجب اولان
 شیئدن خروج ایتسونلر کرکسه اول منذور و یاغیر منذوردر (ولیطوفوا
 بالبيت العتیق) و بیت قدیمی طواف ایتسونلر که اول ناس ایچون اول
 وضع اولنان بیتدر و یا جباریه تسلطنندن معتقد دینلدیکه اشبو طوافله
 مراد طواف واجبدر که اول یوم نحرده رمی و حلقدنصکرده کی طواف
 افاضه در * معلوم اوله که طواف اوچ نوعدر اولکیسی طواف قدومدر
 هرکسه که مکبه قدوم ایده بیت شریفی یدی کره طولانور و هرکرده
 حجر اسوددن بدأ ایدوب ینه انده اتمام ایدر اوچ اولکی کره لرده رمل
 و درت صکره کیده مشی ایدر اشبو طواف سنتدر ترک ایدنه برشی واجب
 اولمز * عائشه رضی الله عنهما دن روایت اولندیکه پیغمبریمز صلی الله
 علیه وسلم مکبه قدومی حیننده آبدست آلوب آنده اول فعلی بیت شریفی
 طواف اولدی * اول طوافک ایکنجیسی یوم نحرده رمی و حلقدنصکره طواف
 افاضه در که اول واجبدر انی ادا ایتینجه احرامدن تحلل حاصل اولمز *

او چنجیسی طواف و داعدر بر کسه که صلاتک قصری جائز اولور مسافیه
دکین مکهدن مفارقت مراد ایده اکا رخصت یوقدرکه طواف وداعی
ایتمدین اندن مفارقت ایده اولکه طواف وداعی ترک ایده اکادم
واجب اولور مکرکه مرأه حائض اوله انی ترک جائز اولور (ذلک ومن یعظم
حرمت الله) امر اعمال جدن ذکر اولنادر اول کسه که الله تعالینک
احکامنی وسائر هتکی حلال اولیان شیئی ویاخود حرمی ویاچه
متعلق تکالیفی ویاخود کعبه و مسجد حرام و بلد حرام و شهر حرامی
تعظیم ایده (فهو خیر له عند ربه) اول تعظیمی انکچون رب تعالی
عندنده ثوابه خیرلوردر (واحلت لکم الانعام) سزه ابل وبقر
وغنم اکلی حلال قبلندی چقان انی ذبح ایده سز (الا ما یبلی علیکم) مکر
اولکه سورة مائده اولنده (حرمت علیکم المیتة) آیتنده تحریمی
تلاوت اولنوبدرکه اول عارضه حرام اولان اشبادر میته ولغیر الله اهلل
اولنان کبی یوخسه الله تعالیدن غیرینک تحریم ایتدیکي دکل بحیره
وسائبه کبی (فاجتنبوا الرجس من الاوثان) شول رجس اولان اوثان
عبادتندن و تعظیمندن اجتناب ایدک انجاسدن اجتنابکز کبی
(واجتنبوا قول الزور) کذب و بهتاندنخی اجتناب ایدک اشبو
تخصیصدنصکره تعمیدر زیرا که عبادت اوثان زورک رأسیدر * دینلیدیکه
انکله مراد شهادت زوردر (قال النبی علیه السلام عدلت شهادة
الزور الاشرک بالله ثلاثا) پیغمبریمز صلی الله علیه وسلم ایدر شهادة
زور الله تعالی به اشراکه عدیل قبلندی اویج کره یوقولی دیدیکندنصکره
اشبو آیتی تلاوت ایتدی (حنفاء لله غیر مشرکین به) الله تعالی به
شرك ایتیبوب اکا اخلاص ایدر اولدقلمری حالده (ومن یشرك بالله
فکانما خر من السماء فتخطفه الطیر) اول کسه که الله تعالی به اشراک
ایده کانه اول اوج سمدن دوشوب انی قوشلر استلاب ایده *
زیرا که مشرک اوج کمال ایماندن حضیض کفره دوشر اهواء مریدیه ایه
انک انکارینی توزع ایدر (اوتھوی به الريح فی مکان سمیق) ویاخود
ریح انی بر مکان بعید متلفه کوتوره یعنی مشرکک حقندن بعدی سمدن
دوشوب انی قوشلر کوتورندن ویاخود ریح انی مکان بعیده ارکورندن
ابعدرر هیچ بر حاله حقه واصل اولمز یعنی مشرکون ایکی نوعدر

(بر نوعنه)

بر نوعنه اصلا خلاص یوقدر و بر نوعی ایه توبه ایله خلاصی ممکن
اولور لکن بعد اوزره (ذلک ومن یعظم شعائر الله) اشبو امر مذکور
بر کسه که دین الله ویا فرائض حج و مواضع نسکی ویا هدایای تعظیم ایده
انک سمان حسانی وغالبه الاثمانی اختیارله * روایت اولندی که
پیغمبریمز صلی الله علیه وسلم یوز بدنه اهدا ایتدی ارالرنده بر جل
وار ایدیکه یوزنه التون بره طاقلمشدی * وعمر رضی الله عنه ایه
برنجیه اهدا ایتدیکه اندن اوچ یوز دینار طلب اولنمشدی (فانها
من تقوی القلوب) زیرا که تعظیم شعائر الله تقوای قلوب صاحبینک
افعالندندر (لکم فیها منافع الی اجل مسمى) سز چکون اول اهدا
ایتدیکنر بدنه لرده نحری وقتنه دکین در ونسل و صوف وظهر لرنده
منافع واردر (ثم محلها الی البیت العتیق) بعده اول بدنه لرك منحری
بیت عتیق عندنده در * دینلیدیکه حرمت کلیسی منحردر اما اولکه
شعائرله مراد مناسکدر دیر معنی اولور که ناسک احراملرندن حلولاری
بیت عتیقه دکرکه یوم نحرد طواف زیارتی ادا ایدر (ولکل امة
جعلنا منسکا) هر جاعت مؤمنه ایچون اهراق دماء و ذبح قرابین ایچون
موضع قیلدق (لیذکروا اسم الله علی مارزقهم من بهیمة الانعام)
تا که الله تعالینک اسمنی ذکر ایدر انک انلره ویردیکي ابل وبقر و غنمک نحر
و ذبحی عندنده (فالهکم اله واحد) الهکر اله واحد ذبا یحکزک ذبحی
اوزره یالکز انک اسمنی ذکر ایدک (قله اسلموا) اکا انقیاد و اطاعت
ایدک (وبشر المحبتین) یا محمد تبشیر ایت متواضعلره ویا مخلصلره (الذین
اذا ذکر الله وجلت قلوبهم) که انلرک عندنده الله تعالی ذکر اولنسه
انک جلال و هیبتندن قلبلری دتر (والصابرین علی ما اصابهم) وانلره
ایریشن کلف و مصائبه صبر ایدر (والقیی الصلاة) وهر صلاة
مکتوبه بی وقتلرنده ادا ایدر (ومما رزقناهم ینفقون) و بزم انلره
ویردیکمز مال و نعمندن وجوه خیره انفاق ایدر (والبدن جعلناها لکم
من شعائر الله) بز ابل وبقردن بدنه لری شعائر اللهندن قیلدق
(لکم فیها خیر) انک نحرد سزه دنیاده نفع و عقباده اجر واردر
(فاذکروا اسم الله علیها صواف) ایتدی اویج قائمسی اوزره نحری
عندنده قیام اولدیغی حالده الله تعالینک اسمنی ذکر ایدک یعنی (الله اکبر)

لا اله الا الله والله اكبر اللهم هذا منك واليك (ديوب ذبح ايدك وياخود
لوجه الله خالص اولديغي حاشده اسم الله ايله اني ذبح ايدك) فاذا وجبت
جنوبها (چان اول بدنلر نحر دئصكره جنبلى اوزره يره دوشه
(فكلوا منها وأطعموا القانع والمعتز) ايمدى اندن كنديكز بيكز ويديرك
شول كسنيه كيم عندنده اولانه ومسئله سز وريبلنه راضى اوله ودخى
اكا كه سؤاله وياسؤالنسر اعتراض ايد (كذلك) بدنه لرى قيساما
نحرينى وصف ايتديكمز كى (سخرناها لكم) سزه انلرى تسخير ايتدك كه
عظم وقوتيله اني اخذ ايدر وجبس وشد ايدوب بوغز لسز (لعلكم
تشكرون) تاكه بزم سزه اول انعامز اوزره تقرب واخلاصله
شكر ايد سز * روايت اولنديكه اهل جاهليت بدنه لرينى بوغازلسه
دمائى الله تعالى يى تقرب زعميله بيت الله بولشد يرلردى مسلمون دخى
انلره تشبه مراد ايتدك رنده نازل اولديكه (ان ينال الله لحوماها
ولا دماؤها ولكن يناله التقوى منكم) اول بدنلر ك تصدق اولنان
لحومى ونحرله اهراق اولنان دماى الله تعالىنك رضاسنه اصابت واندى
موقع قبوله واقع اولمز بلكه اكا اصابت وواقع اولان اعمال صالحه وتقوى
واخلاصدر ووجه الله اراده اولنان شيئدر (كذلك سخرها لكم)
اشبو ذكر اولنان كى سزه بدنلرى تسخير ايتدى (لتكبروا الله
على ما هداكم) تاكه اول بدنلر ك تسخيرى طريقنه وانككه تقرب
كيفيتنه سزى ارشادى اوزره اول الله تعالى يى تعظيم ايد سز يعنى
ديه سزكه (الله اكبر على ما هداكنا والحمد لله على ما اولانا)
(وبشر المحسنين) تبشيرايت انلريكه فعل وترك ايتدك رنده الله تعالىنك
رضاسن طلب ايدلر (ان الله يدافع عن الذين آمنوا) الله تعالى
مؤمنلردن مشركينك اذاسنى دفعنده مبالغه ايدر (ان الله لا يحب
كل خوان كفور) الله تعالى سومز هر كسه يى كه انك امانته
خيانت ايد نعمته كفران اوله * دينديكه اول كسه كه ذبحه سيله
اصنامه تقرب ايد وانك اوزره الله تعالى اسمك غيرى يى ذكر ايد
اول خوان كفوردر (اذن للذين يقتاتلون بأنهم ظلموا) شول
مشركلره قتال ايدن مؤمنلره جهاده اذن ويرلدى شول سبيله كيم ظلم

(اولنديلر)

اولنديلر * روايت اولنديكه مكه نك مشركلرى صحابه يه ايذا ايدرلردى
كىمى مضروب وكىمى مشجوج بيغميريمز صلى الله تعالى عليه وسلمه شكوايه
كلچك اول انلره صبر ايدك كه بن قتاله امر اولنماشم ديردى اوليله اولسه
بو آيتله قتاله اذن ويرلدى اشبو اول آيتدر كه اول امرده نازل اولوبدر *
دينديكه بو آيت بر قوم معين شائنده نازل اولوبدر كه انلر مكه دن
مدينه يه هجرت مراد ايتدك رنده مشركلر انلرى هجرتدن منع ايدرلردى
اوليله اولسه انلرى هجرتدن منع ايدن مشركلر ايله قتاله اذن ويرلديلر
(وان الله على نصرهم لقدير) الله تعالى اول مؤمنلره نصرته قادردر اول
انلره نصرى وعد ايتدى انلردن اذاي كفارى دفعه وعدى كى (الذين
اخرجوا من ديارهم بغير حق الا ان يقولوا ربنا الله) كه انلر ناحق يره
ديارلردن چيقارلديلر شول قوللر بچونكه ربمزالكز الله جل شانهدر ديديلر
(ولولا دفع الله الناس بعضهم ببعض) اكر الله تعالىنك ناسى برى برليله
مؤمنلرى كافرلر اوزره تسليطله دفعى اولمسيدي (لهتمت صوامع)
يقلدى صومعه لر كه انده راهلر تعبد ايدر (وبيع) وبيعه لر كه
نصارانك متعبدلر (وصلوات) كه اول يهودك كنائسيدر (ومساجد)
كه اول مسلمونك مسجديلر (يذكر فيها اسم الله كثيرا) كه اول
مواضع اربعده وياخود خاصة مساجده الله تعالىنك اسمى چوق
ذكر اولنور يعنى الله تعالى ناسى برى برليله دفع ايتمسيدي هر نينك
شريعته مكان صلاتلرى منهدم اوليدى موسى عليه السلام زمانده
كنائس وعيسى عليه السلام زمانده بيع وصوامع ومحمد صلى الله تعالى عليه
وسلمك زمانده مساجد منهدم اولوردى (ولينصرن الله من ينصره)
الله تعالى نصرت ايدر هر كيمسه يه كيم انك ديننه نصرت ايد *
ايمدى اول بارى تعالى جل شانهدر اشبو وعدينى انجاز ايچون مهاجرين
وانصارى صناديد عرب واكاسره عجم وقباصره روم اوزره تسليط
ايدوب ارض وديارلرين انلره ميراث ايتدى (ان الله لقوى عزيز)
الله تعالى انلره نصرته قوى وامرنده غالبدر (الذين ان مكناهم فى الارض
اقاموا الصلاة وآتوا الزكاة وامروا بالمعروف ونهوا عن المنكر) اول
ديارلردن ناحق يره چيقارلارلر بر قومدر كه اكر بز انلرى يريوزنده تمكين
ايدرسهوز عدولرى اوزره نصرتله ويامدينه يه انزالله كه انلر كه مراد

اصحاب محمد و یا ہوامندر صلوات مکتوبہ بی اقامت ایدرلر و مالارندہ کی زکات مفروضہ بی ویررلر و معروفہ امر و منکر دن نہی ایدرلر (وللہ عاقبة الامور) آخرتہ ثواب و عقابدن امور عبادک ماقبتی اللہ تعالیٰ بہ رجوع ایدر بعدہ پیغمبریمز صلی اللہ تعالیٰ علیہ وسلم تسلیہ ایچون بیورلر دیکہ (وان یکذبوک فقد کذبت قبلہم قوم نوح و عاد و ثمود و قوم ابراہیم و قوم لوط و اصحاب مدین) یا محمد اگر قومک سنی تکذیب ایدرلر سہ تکذیب اولقمقہ سنن یا لکزدکلسن بلکہ انلردن اول کچن امتلر پیغمبرلرین تکذیب ایتدیلر دی نوح علیہ السلامی قومی و ہود علیہ السلامی عاد قومی و صالح علیہ السلامی ثمود قومی و ابراہیم علیہ السلامی نمرود قومی و لوط علیہ السلامی قومی و شعیب علیہ السلامی اصحاب مدین تکذیب ایدوب صبر ایتدیلر دی (وکذب موسیٰ) و موسیٰ علیہ السلام تکذیب اولندی یعنی انی فرعون و قبط تکذیب ایتدیلر (فاملیت للکافرین ثم اخذتهم فکیف کان نکیر) بن اول کافرلرہ آجال مقدرہ لر ی انقطاعہ دکیں امہال ایدوب بعدہ عذابہ انلری اخذ ایتدم نظر ایتکہ بنم انکارم نیچہ اولور نعمتی محنتہ و حیاتی ہلاکہ و عمارتی خرابہ تغیر ایدرین (فکاین من قریة اهلکناھا وھی ظالمة) نیچہ قریہ کہ بز انک اہلنی اہلاک ایتدک حالبوکہ انلر ظالمہ ایدیلر (فہی حاویة علی عروشہا) کہ انک سقفلری دوشد کدنصرکہ اوزرینہ دیوارلری یقلوبدر (و بئر معطلہ) و نیچہ بئر کہ بوادیدہ صوبی و آلاتی وار ایکن اربانک ہلاکبلہ اندن استقاء اولمز خالیہ قالوبدر (وقصر مشید) و نیچہ قصر مشید بخصص مرتفع کہ سکاندن خالی اولوبدر * دینلر دیکہ اشبو بئر معطلہ و قصر مشید ایکسیدخی یمندہ در اما قصر برجبلک قلعہ سندہ و بئر ایسہ اول جبلک سفحنده در ہر برینک اربابی نعمتہ ایکن اکا کافر اولدقلمچون اللہ تعالیٰ انلری ہلاک ایدوب اول بئر و قصر خالی قالدی * روایت اولندیکہ اول بئر حضر موتہ حاضورا دینور بر بلدہ دہ ایدیکہ صالح علیہ السلامہ ایمان کتوروب عذابدن نجات بولان درت بیک کیمسہ صالح علیہ السلامہ بیلہ اول حضر موتہ کلدکرندہ صالح علیہ السلام وفات ایتدی اول اجلدن اکا حضر موت دینلدی واندہ حاضورایی

بنا ایتدیلر و اول بئر اوزرہ قرار ایدوب تناسلہ کثرت بولدیلر * بعدہ اصنامہ عبادت ایدر اولوب کافرین اولدیلر اللہ تعالیٰ انلرک اوزرہ حنظلہ بن صفوان نام رجلی پیغمبر کوندردیکہ اول انلرک جالی ایدی انلری توحیدہ و دین حقہ دعوت ایدیچک سوقدہ ایکن انی قتل ایتدیلر اول سبیدن اللہ تعالیٰ انلری ہلاک ایدوب بئر و قصرلرین خالی و معطل ایتدی (أفلم یسیروا فی الارض) انلر بریوزندہ سیر ایتلرلر میکہ ہلاک اولان اقوام کافرینک مصارعن کوروب اعتبار ایدلر اکرچہ مسافرت ایتملر ایسہ دہ لکن اول قصد اوزرہ مسافرت ایتملرلر (فتکونلہم قلوب یعقلون بہا) تاکہ قلبلرینہ تیقظ کلوب اللہ تعالیٰ نک وحدانیت نظر و اعتبارلہ بیللر (واذان یسمعون بہا) و یا آذانلری اولوب انکہ قرون ماضیہ اخبارینی ایشتمکہ تذکر و اتعاظ ایدلر (فانہا لاتعمی الابصار و لکن تعمی القلوب الی فی الصدور) دین امرینہ عمای بصبر ضرر ایتمز بلکہ اکا ضرر ایدن صدوردہ اولان قلوبک عماسیدر * زیرا کہ بصر ظاہر بلغہ و متعہ در اما کہ بصر قلبدر کہ دینہ نفع ایدر * دینلر دیکہ سورہ اسرادی مذکور (ومن کان فی ہذہ اعمی فہو فی الآخرة اعمی) آیتی نازل اولیچق ابن ام مکتوم پیغمبریمز صلی اللہ علیہ وسلم کلوب یارسول اللہ بن ذبیادہ اعمام آخرتہ دخی اعمامی اولوزم دیدی اول سبیدن بوآیت نازل اولدی (ویستجملونک بالعذاب ولن یخلف اللہ وعدہ) مشرکون وعدہ اولندقلمی عذابک استعجالن ایدرلر و الحال اللہ تعالیٰ وعدینہ خلف ایتمز * زیرا انک خبرندہ خلف اولمز البتہ انلرہ ابعاد ایتدیکی شیئی ایر کورر اگرچہ مدت مدیدہ دنصرکہ ایسہ دہ لکن صبور در عقوبتندہ عجلہ ایتمز (وان یوما عندربک کالف سنۃ مما تعدون) وانلرک استعجال ایتدیکی عذابلری کونک ربک جل شانہ عندندہ طوادیہ مقداری دنیا یلارندن سنک عد ایتدیکی بیک ییلجہ در و یاخود انلرک استعجال ایتدکلمی عذابلری ایامندن بریوم ثقل و استتطالہ و شدتدہ بیک سنہ مقدار نیچہ در اولیہ اولسہ انلر اکا نیچہ استعجال ایدرلر * شکم دینلر دیکہ ایام هموم طوالدر و ایام سرور قصارددر و یاخود رب تعالیٰ عندندہ بر کونلہ بیک ییل امہالده مساویدر * زیرا اول دینلر دیکہ وقتدہ انلری اخذہ قادر در تأخیرلہ برشی فوت اولمز (وکاین من قریة

امليت لها وهى ظالمة ثم اخذتها والى المصير) نجه قريه اولديكه انك اهلى كافره اولوب بزائلره امهال ايتديكمز دنصكره دنياهه عذابه اخذ ايتدك آخرته ايسه مصيرلى بزه در انده عذاب اكبر له عذاب ايده رز (قل يا ايها الناس انما اتاكم نذير مبين) ديكل كه ياكفار مكه بن سزه الله تعالىدن نذير ينكه انذار ايتديكم شئي سزه ايضاح ايدر ين (فالذين آمنوا وعملوا الصالحات لهم مغفرة ورزق كريم) شونلر كه ايمان واعمال صالحه ايله متصف اولديلر انلر ايچون ذنوبلرينه مغفرت ورزق لاينقطع وار دركه اول جنتدر (والذين سعوا فى آياتنا معاجزين اولئك اصحاب الجحيم) شونلر كه بزم آيتلر بزم ابطالنه سعى ايتديلر ناسى ايماندن تليط ايدر وياخود هر برى صاحبك عجزي اظهار مراد ايدر اولديغي حالده * ايمدى انلر نار موقده اصحابيدر (وما ارسلنا من قبلك من رسول ولا نبى) يا محمد سندن اول هر رسولكه اكا جبريل عليه السلام وحيله آشكاره كلور وهر نبي كه اكا الهام ومنامله بيلديريلور (الا اذا تمنى) اول بر شئي سوسه وياشتها ايتسه ويا امر اولنيمان شئي نفسنده تحديث ايتسه (الى الشيطان فى امينته) شيطان انك حديثه القا ايدر و اكا يول بولور واكثر مفسرين ديديلر كه يعنى چقان اول رسول ويا نبي كتاب الهى تلاوت وقراءت ايتسه شيطان انك تلاوته القا ايدر (فينسخ الله ما يلقى الشيطان) الله تعالى ايسه اول شيطانك القا ايتديكى ابطال واذهاب ايدر (ثم يحكم الله آياته) بعده الله تعالى امر آخرته استغراقه داعى اولان آياتنى تثبيت ايدر (والله عليم حكيم) الله تعالى ناسك احوالى بيلور فعلنده حكمتن اظهار قيلور * ابن عباس رضى الله عنهما وانك غيرى بعض مفسرين ديديلر كه وقتا كه پيغمبر بزم صلى الله عليه وسلم قومك كنديدن توليسن كوردى نفسنده تمنى ايتديكه الله تعالىدن اكا بر شئ كوندريله كه انكله قومي بيننى تقريب ايده اوليله اولسه بركون اول قريش ايله بر مجلسده ايدى والنجم سوره سى نازل اولوب انى انلره او قودى (أفأنتم اللات والعزى ومناة الثالثة الاخرى) قولنه ايريشچك شيطان انك لسانه القايدوب (تلك الغرائق العلى وان شفاعتهن لترتجى) ديدى قريش انى ايشيديچك سونديلر * پيغمبر بزم صلى الله عليه وسلم اندنصكره سوره يي آخريته دكين اوقيوب سجده يه وارديلر اندن مشركون سرورله اول

(مجلسدن)

مجلسدن طاغديلر محمد بزم آلهه مزى احسن ذكرله ذكر ايتدى بلدك كه الله تعالى احيا واماته وخلق وارزاق ايدر وبزم آلهه مزى انك عندده شفاعت ايدر چون محمد بزم آلهه مزى ايچون نصيب قيلدى شمدنكرو انكله اولورز ديديلر اخشام اوليحق جبريل عليه السلام اكا كلوب ديديكه يا محمد نه ايشلدك الله تعالىدن سكا كتورمديكم شئي ناسه تلاوت ايلدك اندن پيغمبر بزم صلى الله عليه وسلم زياده خوفله حزين اولدى اوليله اولسه الله تعالى بوآيتى انزالله انى تعزیه قيلدى (ليجعل ما يلقى الشيطان فتنه للذين فى قلوبهم مرض والقاسية قلوبهم) تاكه الله تعالى شيطان القا ايتديكى شئي فتنه قيله شول كسه لر كه قلوبلرنده شك ونفاق اولوبدر وقلبلرى حقى قبولدن قالوبدر كه انلر مشركوندر (وان الظالمين لى شقاق بعيد) منافقون ومشركون بر خلافة در كه اول حقندن ويا رسول ومؤمنلردن بعيددر (وليعلم الذين اتوا العلم انه الحق من ربك فيؤمنوا به فتحت له قلوبهم) وتاكه علم توحيد وعلم قرآن ويريلانلر بيله لر كه قرآن حقدر كه من عندالله نازل اولوبدر وياخود شيطانى القا يه تمكين الله تعالىدن صادر اولوبدر * زيراكه آدم عليه السلام بزو جنس انسه عاده الله انك اوزره جاريدر اول الله تعالى يه ويا قرآنه تصديق ايدر واسكا قلبلرى انقياد وخشيت ايده (وان الله لهادى الذين آمنوا الى صراط مستقيم) الله تعالى مؤمنلرى اشكال ايتدكلرى شيده طريق قويمه هدايت ايديجيدر (ولا يزال الذين كفروا فى مريه منه) وكافرلر قرآنندن ويا رسولدن ويا شيطانك امرندن انك امنيه سنه القا ايتديكندن شكده اولقندن زائل اولزلر (حتى تأتيم الساعة بغتة) تاشول وقتنه دكين كه انلره فجأة موت ويا قيامت كله (اويأتيم عذاب يوم عقيم) ويا انلره يوم بدر عذابى كله اكا عقيم ديلدى * زيرا اول كونده كفاره خير اولدى ريح عقيم كبي كه اول محاب ومطرله كلز وزيركه اول كونده كچه يي كورمديلر كچه اولمدين قتل اولنديلر (الملك يومئذ لله يحكم بينهم) يوم قيامته ولايت وحكم بالكرز الله تعالىنك اولور اكا منازع اولمز مؤمنلر وكافرلر بيننده حقله حكم ايدر (فالذين آمنوا وعملوا الصالحات فى جنات النعيم) شونلر كه ايمان واعمال صالحه ايله متصف اولديلر انلر جنات نعيمدر (والذين كفروا وكذبوا بآياتنا

فالولئك لهم عذاب مهين) شونلر كه كفرله و آيتلر عيزي تكذيبيله متصف اولديلر انلر ايجون عذاب شديد واردر كه انده اهانته اولنورلر (والذين هاجروا في سبيل الله ثم قتلوا اوماتوا ليرزقنهم الله رزقا حسنا) شونلر كه الله تعالىنك طاعتنده هجرت ايتديلر او طمان وعشارلرندن آيرلديلر اول حالتده قتل اولنديلر و ياخود حتف انفله اولديلر الله تعالى انلره رزق جنت ويرر كه اول انلردن ايدا كسلر و ياخود ربلى عندنده احببا اولوب رزقنورلر (وان الله لهو خير الرازقين) الله تعالى رازقلى خير لوسيدر كه ديلديكنه رزقى حساسر ويرر (ليدخلنهم مدخلا يرضونه) انلرى بر مدخله ادخال ايدر كه اكا راضى اولورلر كه اول جنتدر كه انده استيوب ديلدكارين بولورلر (وان الله لعليم حكيم) الله تعالى انلرك نياتنى بيلور اساءت اهلنه حلم ايدر عقوبته عجله ايتز (ذلك) امر سزه ذكر ايتديكمز ككيدر (ومن عاقب بمثل ما عوقب به ثم بغى عليه لينصرنه الله) بر كسه كه ظالمنه جزا ايده انك اكا ظلمى مثليه بعده انك اوزره تعدى اولنه الله تعالى اكا اول ظالمى اوزره البته نصرت ايدر * اشبو آيت مشركلردن بر قوم شاننده نازل اولوبدر كه انلر شهر حرامده مسلمندن بر قوم اوزره قتاله كلديلر مسلمون ايسه شهر حرامده قتالدين كراهت ايدوب انلرى منع ايتك ديلديلر مشركون ايسه ممنوع اوليوب مسلمينه قتال ايتديلر الله تعالى مسلمينه نصرت ايدوب حتى كه مشركين اوزره غالب اولديلر لكن مسلمونك قلوبنده قتاللى شهر حرامده اولمسنه كراهت وملالت اوليحق اشبو آيتله دفع اولندي (ان الله لعفو غفور) الله تعالى انتصار ايدنه عفو غفوردر انتقامده هواسنه اتباع ايدوب الله تعالىنك دينندن اعراض ايتشيكن زيرا (ولمن صبر وغفران ذلك لمن عزم الامور) مقتضاسنجه صبر و تجاوزى عزم اموردن ايكن ترك ايلدى اشبونده عفو ومغفرت ايدر اوليحق انك غيرى اكا اولى اولور (ذلك بان الله يولج الليل في النهار ويولج النهار في الليل) اشبو مذكور شول سبيله در كه الله تعالى شمسى تغيبيله كچه نك ظلمتن كوندرك ضوئى مكانه ادخال ايدر و ياخود كچه و كوندرك هر برندن نقص ايتديكى دكلو آخرده زياده ايدر (وان الله سميع بصير) الله تعالى معاقب ومعاقبك اقوالنى ايشيدر و افعالنى كورر (ذلك بان الله هو الحق) اشبو كمال قدرت وحمله وصف

(شول)

شول سبيله در كه الله تعالى نفسنده ثابت وذاتنده وحيد واجبدر زيرا وجودينك وجوبى و وحدتى اقتضا ايدر كه مبدء كل اوله (وان ما يدعون من دونه هو الباطل) والله تعالىدن غيرى هر شيكه مشركون اكا عبادت ايدر اول باطلدر حد ذاتنده معدومدر و يا الوهيتى باطلدر (وان الله هو العلى الكبير) الله تعالى جميع اشيا اوزره غالبدر و اكا شريك اولمقدن كيدر (الم تر ان الله انزل من السماء ماء فتصبح الارض مخضرة) كورمز ميسنكه الله تعالى سمانن يغمور اينددر انكله اولتر بتوب ير يوزى يشلانور (ان الله لطيف خبير) الله تعالى لطيفدر كه علمى جليل ودقيقه اير تدابير ظاهره و باطنيه خبرداردر (له ما فى السموات وما فى الارض) سموات وارضده اولان هر شى * انك خلقى و ملكيدر (وان الله لهو الغنى الحميد) الله تعالى هر شيئن غنيدر ذات وصفاتيله جدى مستوجبدر (الم تر ان الله سخر لكم ما فى الارض والفلك تجرى فى البحر بأمره) كورمز ميسنكه الله تعالى ير يوزنده كى دوابى سزه تسخير ايتديكه اكا برده ركوب ايدر سز و درياده سزه فلكى تسخير ايتديكه انك امريله انى انده بوريدرسز (ويمسك السماء ان تقع على الارض الا باذنه) و سماي امساك ايدر كه ير اوزره دوشميه مكر كه يوم قيامتده انك امريله دوشه (ان الله بالناس لرؤف رحيم) الله تعالى ناسه رافتلو و رحمتلودر كه انلر ايجون اسباب استدلالى تهيه ايتدى و ابواب منافعى انلره قبح ايتدى و اسباب مضاررى انلردن دفع ايتدى (وهو الذى احياكم ثم يميتكم ثم يحييكم) اول الله تعالى سزى عدمدن وجوده كتوردى و آجالكز منقضى اولديغنده سزى اماته و آخرتده احيا ايدر (ان الانسان لكفور) جنس انسان الله تعالىنك نعمتلىنه كفوردر (لكل امة جعلنا منسكاهم ناسكوه) هر اهل دين ايجون بر متعبد و يا شريعت قيلدقكه انكله تعبد ايدرلر و ياموضع قربان قيلدقكه انى انده ذبح ايدرلر (فلا ينازعنك فى الامر) ايمدى سائر ارباب ملل دينده و يامناسكده سكا نزاع ايتسون * زيرا انلرك كيمى جاهل و كيمى معاندر و ياخود سنك دينك امرى نزاعى قبولدن اظهاردر * دينديكه اشبو آيت كفار خزاعه شاننده نازل اولوبدر كه انلر صحابهيه ديدلر كه سزه نولديكه الكزله قتل ايتديككزى اكل ايدوب الله تعالى قتل ايتديكنى

اکل ایتمزسن (وادع الی ربک انک لعلی هدی مستقیم) ناسی ربک جل
شانه نک توحید و عبادتہ دعوت ایته سن حقه ایرکورر طریق
سوی اوزره سن (وان جادلوک) اگر امر ذیایحده و یا امر دینده
سکا جدال ایدرلر سه حالبوکه حق ظاهر و حجت لازمه اولوبدر
(فقل الله اعلم بما تعملون) دیکل که الله تعالی مجادله و سائر امور
باطله دن ایتدیکنزه اعلمدر یوم قیامتده جزا کزی ایدر (الله یحکم
بینکم یوم القيامة فیما کنتم فیہ تختلفون) الله تعالی یوم قیامتده
سزدن مؤمنلر و کافرلر بینتی امر دیندن اختلاف ایتدیکنز شیئی ثواب
و عقابه فصل ایدر دنیاده حجج و آیاتله فصل ایتدیکی کبی (ألم تعلم
ان الله یعلم ما فی السماء والارض) بیلدکی که الله تعالی سماده و ارضده
اولان اشیانک جمیعن بیلور اکا هیچ شیء خفی اولز (ان ذلک فی کتاب)
اشبواشیانک جمیعی لوح محفوظده ثابتدر (ان ذلک علی الله یسیر)
انی لوح محفوظده اثبات و یا بیکزده حکم الله تعالی یه آساندر زیرا
انک جله معلوماته علمی علی السویه در (و یعبدون من دون الله
ما لم یزل به سلطانا و ما لیس لهم به علم) انلر الله تعالیدن غیر
برشیئه عبادت ایدرلر که اکا عبادت جوازینه دلالت ایدر نه حجت و دلیللری
ونه علم معقوللری وارددر (و ما للظالمین من نصیر) اشبو ظلم مثلنی
ارتکاب ایدنلره مذهبلرین تقریر ایدر و یا انلردن عذابی دفع ایدر نصیر
یوقدر (و اذا تلی علیهم آیاتنا بینات تعرف فی وجوه الذین کفروا المنکر)
چکان انلره آیتلریمز تلاوت اولنسه که اول عقائد حقه و احکام
الهییه و اضمحاحات الدلالة در اکا کافرلرک وجوهنده انکاری
یلورسن * زیرا که انده کراحت و عبوس کوررسن (یکادون بسطون
بالذین یتلون علیهم آیاتنا) قریب اولورلر که شول اوزرلرینه
آیتلریمز تلاوت ایدنلری قهر و عنقله بطش ایدر (قل أفأنبئکم بشر
من ذلکم النار) دیکل که سزه خبر ویریم می انی که شول آیتلریمز
تلاوت ایدنلره اولان غیظ و سوء قصدیکزدن شر و اشد اوله که اول
نارددر (وعدھا الله الذین کفروا) که الله تعالی انی کافرلره وعد ایتدی
(و بئس المصیر) اول نارنه چرکین قرارگاه اولوز (یا ایها الناس ضرب
مثل فاستمعوا له) یا ناس سزه بر حال مستغربه و یا قصه رائقه تبیین

(اولندی)

اولندی * ایدمی انک شاننی تدبر و تفکرله استماع ایدک (ان الذین تدعون
من دون الله لن یخلقوا ذبابا) شول اصنام که الله تعالیدن غیر اکا عبادت
ایدرسن بر ذباب خلقنه قادر اولزلر (ولواجمتعوا له) اگر چه انک خلقنه
اجتماع ایدرلر سهده (وان یسلبهم الذباب شیئا لایستغذوه منه) و اگر
ذباب اول اصنام اوزرندن برشیء سلب ایتسه انلر انی انقازده قادر اولزلر *
روایت اولندی که مشرکون اصناملرین زعفرانله طلاردی قورودیغنده
ذباب انی استیلاب ایدردی و دخی اصناملری اوکنه طعام قویوب ذباب
اکا اوشردی و دخی اول اصناملری انواع جواهرله تزین ایدر والوان
طیبله تطیب ایدرلر اول طیبیدن دوشنی طائر و ذباب استیلاب و اخذ
ایدیچک اول اصنام هیچ برشیئه قادر اولزدی * ایدمی بونلرک غایت
جهالتن بیاندر که شول مقدور انک کله قادر و موجود انک بأسرها ایجادنده
تقریر ایدن الله تعالی یه اشراک ایدرلر شول تمثیلی که اعجز اشیادر شول
حیثیتدنکه احیانک اقل واذلی خلقنه اجتماعلری ایلله قادر اولدقلرندن
ماعد اول اقل اذله مقاومتہ دخی قوتلری اولیه بلکه کندیلردن انی دفعه
و عندنده کی شیئی اندن استغاذه قادر اولیدر (ضعف الطالب والمطلوب)
بووصفلو عابد و معبود ضعیف اولدی * دینلدی که طالب ذبابدر که صمدن
طیبی سلب ایتک دیر و مطلوب صمددر که ذباب اندن سلبی طلب ایدر
و یا خود امر عکس اوزره در که طالب صنم و مطلوب ذبابدر (و ما قدر و الله
حق قدره) مشرکون الله تعالی بی عظمتنه لایق و جهله تعظیم ایتدیلر
وانی حق معرفتیه بیلدیلر و حق صفتیه وصف ایتدیلر شول حیثیتدنکه
ذبابدن امتناعه قادر اولیان شیئی اکا اشراک ایتدیلر والوهیتدن ابعده
اشیاء اولان شیئی انک اسمیه تسمیه ایتدیلر (ان الله لقوی عزیز) الله تعالی
جمیع ممکناتی خلقه قویدر اکا هیچ شیء غالب اولمز انلرک اصنامی ایتسه
اقل مخلوقاتدن عاجزه و مقهورده در (الله یصطفی من الملائکة رسلا
ومن الناس) الله تعالی ملائکه دن رسوللر اختیار ایدر که انکله انبیا
بیننه و صله توسط ایدرلر و ناسدن دخی رسوللر اختیار ایدر که سائر ناسی
حقه دعوت ایدرلر و کندیلره نازل اولانی انلره ایرکوررلر کانه رب تعالی
الوهیتده وحدانیتن تقریر و صفاتنده غیرک مشارکتن نفیدنصکره

بیان ابتدیکه رسالت ایچون اصطفی اولمش عبادی واردر که ناس انلره اجابت وافتدا ایله عبادة اللهه توسل ایدرلر که اول اعلاى مراتب ومنتهاى درجاتدر وقتناکه مشرکون پیغمبریمز صلی الله تعالی علیه وسلم حسدرندن (ءازل علیه الذکر من بیننا) اول بزم اکبر واشرفز دکل ایکن ارامزدن قرآن نزولنه اولمی مختص اولدی دیو انکار ایدیجک اشبو آیتله خبر ویرلدیلر که اختیار الله تعالیکندر رسالتنه عبادندن دیلدیکن اختیار ایدر (ان الله سمیع بصیر) الله تعالی انلرک مقاتلتی ایشیدر ورسالتنه اختیار ایتدیکن کورر (یعلم ما بین یدیهیم وما خلفهم) الله تعالی انلرک تقدیم وکرتک تخلیف ایتدیکن یلور ویاخود عمل ایتدکارینی وعمل ایده جکارینی یلور ویاخود ملائکه ورسلی خلق ایتزدن اولکی احوالترین وانلرک فناسندفصکره کی احوالن دخی یلور (والی الله ترجع الامور) امورک کلیسی اکا رجوع ایدر که اول بالذات انک مالکیدر حکم وتدبیر و اختیارندن سؤال اولمز و آخرتده عبادک ثواب وعقابدن عواقب اموری اکا حائد اولور (یا ایها الذین آمنوا ارکعوا واسجدوا) یا مؤمنلر صلاتکرده رکوع وسجود ایدک اول ابکیسیله امر اولندی * زیرا که اول اسلامده رکوع وسجود یوغیدی ویاخود نماز قبلک رکوع وسجود انک اعظم ارکانی اولدیغیچون اول انکله تعبیر اولندی ویاخود الله تعالی به خضوع وسجود ایدک (واعبدوا ربکم) وربکز جل شانہ بی توحید وسائر اصناف عبودیتله اکا عبادت ایدک (وافعلوا الخیر) فعل وترککرده سزه خیر واصلاح اولان اشیای تحری ایدک نوافل طاعات وصله ارحام ومکارم اخلاق کبی (لعلکم تفلحون) امور مذکورہ نک کایسین ایشلکز فلاحی رجا ایدر اولدیغکز حالده یوخسه انی تیقن ایدر ویا اعمالکره وثوق ایدر اولغله دکل * اشبو آیتک تلاوتی عندنده سجود تلاوه وجوبنده علما اختلاف ایتدیلر برقوم دیدیلر که انده سجده واجب اولور شول دلیل ایله کیم (قال عقبه بن عامر رضی الله عنه قلت یارسول الله فضلت سورة الحج بان فیها سجدتین قال نعم ومن لم یسجدهما فلا یقرأهما) عقبه رضی الله عنه ایدر دیدمکه یارسول الله

سورة حج انده ایکی سجده اولغله تفضیل اولندی دیدیکه نعم اول کسه که اول ایکی سجده بی ایتک مراد ایتیه اول سجده آتترین او قومسون اشبو عمر وعلی وابن عمر وعلی وابن مسعود وابن عباس رضی الله عنهم قولیدر ابن المبارک وشافعی واحمد واسحق اکا ذاهبلردر و برقوم آخرون ایسه انده سجده یوقدر دیدیلر بلکه اول سجده ایله مراد سجده صلاتیهدر رکوعه افتراقی دلاتیه که اول سفیان ثوری وائمه حنفیه قولیدر (وجاهدوا فی الله حق جهاده) الله تعالیکن سیلنده استفراغ طاقتله انک اعداء ظاهره سنه اهل زیغ کبی به واعداء باطنه سنه هوی ونفس کبی به جهاد ایدک دیندیکه حق جهاد اولدر که نیت صادق ایله خالص الله اولمقدر ویا اکا اطاعت ایدیلوب عصیان اولنماقدر ویا نفس وهوا به مجاهده درکه اول جهاد اکبردر * روایت اولندیکه پیغمبریمز صلی الله علیه وسلم تبوک غزاسندن رجوع ایدیجک دیدیکه (رجعنا من الجهاد الا صغر الی الجهاد الاکبر) جهاد اصغرندن رجوع ایدوب جهاد اکبره کلدک یعنی کفار جهاددن دونوب نفس جهادینه کلدک (هو اجتنابکم) اول الله تعالی سزی دین ونصرتیچون اختیار ایتدی اشبو نده جهاده مقتضی وداعی به تنبیه واردر (وما جعل علیکم فی الدین من حرج) الله تعالی دین اسلامده سزه حرج ایتدی یعنی چقان مؤمن ذنوبدن برشیئه مبتلا اولسه اکا اندن مخرج قیلدی کیم رد مظالم وقصاصله وکیم انواع کفاراتله وبالجمله دین اسلامده برذنوب یوقدر که عبدآنک عقابندن خلاصه چاره بولیه ویاخود الله تعالی فروضکز اوقاتنده ضیق قیلدی هلال رمضان وهلال فطر ووقت حج کبی که چقان بری سزه ملتبس اولسه تیقن ایدنجیه دکن سزه وسعت ویرلدی ویاخود سزه ضرورات عندنده رخصتله من ایتدی سفرده قصر صلاة وصو بولندیغنده یتیم وضرورت عندنده اکل میته وسفر ومرض حالنده صومی افطار وصلات ایچون قیامه عجزنده قاعدا ادایه رخصت ویرلدی ویاخود بنو اسرائیل اولان تکالیف شاقه بی بوامندن رفع ایلدی (ملة ایکم ابراهیم) الله تعالی سزه دینکره وسعت ویردی باباکز ابراهیم علیه السلام ملتبه ویردیکی وسعت کبی ویاخود انک ملتبه اتباع

ایدک * زیرا که اول ملت محمدیه به داخلدر ابراهیم علیه السلام جمیع مسلمین اب قیلینک معناسی مسلمین اوزره انی احترامک وحقنی حفظک وجوبی اب احترامک وجوبی کبدر (هو سماکم المسلمین من قبل وفی هذا) اول الله تعالی سزی اشبو قرآندن اول کوندردیکی کتابلرنده وبوقرآنده مسلمین تسمیه ایتدی ویاخود ابراهیم علیه السلام سزی زمانده اشبو وقتدن اولده وبوقته مسلمین تسمیه ایتدیکه قرآنده انک لسانیه (ربنا واجعلنا مسلمین لك ومن ذرینا امة مسلمة لك) دیو بیورلدی (لیكون الرسول شهيدا علیکم) تا که یوم قیامتده رسولکیز محمد علیه السلام اوزریکزه شاهد اوله که اول سزه رسالتن تبلیغ ایدوب سزدخی انی تصدیق ایتدیکز (وتكونوا شهداء علی الناس) وسز ايسه مرسلین ایچون سائر امتلر اوزره شاهدلر اوله سز که انلرک هر بری رسالتن امتنه تبلیغ ایتدیکنه شهادت ایده سز (فاقموا الصلاة وآتوا الزكاة) ایمدی الله تعالی سزی ذکر اولن ان فضل وشرقله تخصیصه شکر ایچون اقامت صلاة وایتاء الزكاة وانواع طاعاتله اکا تقرب ایدک (واعتصموا بالله) ومجماع امورکرده اکا وثوق ایدوب اغائه ونصرتی انک غیریدن طلب ایتکز (هو مولاکم) اول سزک ولی وناصر کز اولور (فنعم المولى ونعم النصير) اول نه کوبجک مولی وناصر اولور صفات مذکوره ايله متصف اولوب انجق مولی وناصرم اللهدر دینلره

سورة المؤمنون وهی ثمان ومائة آية مكية

بسم الله الرحمن الرحيم

(قد افلح المؤمنون) الله تعالینک وحدانیتن تصدیق ایدنلر سعادتیه ایروب ایدا جنتده قالدیلر (الذین هم فی صلاتهم خاشعون) که انلر صلاتلرنده الله تعالیدن خوف واکا تذلل وتواضع ایدرلر ویاغض بصر وخفض صوت ایدرلر ویایمین وشمالرینه التفات ایتزلر ویایمین وشماللرنده اولان کسهلری بیلزلر (قالت عائشة رضی الله عنها سألت النبی علیه السلام علی الالتفات فی الصلاة فقال اختلاس یختلسه الشیطان من صلاة العبد) عائشه رضی الله عنها ایدر پیغمبریمز صلی الله علیه وسلمه نمازده التفاتک حکمندن سؤال ایتدم دیدیکه اول بر اختلاسدرکه

(شیطان)

شیطان انی عبدک صلاتدن اختلاس ایدر (قال النبی علیه السلام لا یزال الله عز وجل مقبلا علی العبد مادام فی صلاته ما لم یلتفت فاذا التفت أعرض عنه) پیغمبریمز صلی الله علیه وسلم ایدر الله تعالی عبیدنه اقبالدن زائل اولمز مادامکه صلاتده اولوب التفات ایتیه قحانکه التفات ایده اول اندن اعراض ایدر * دینلریکه خشوع سکون وحسن هیئهدر ویابصرینی موضع سجوددن رفع ایتماکدر * ابو هریره رضی الله عنه ایدر صحابه رضی الله عنهم نمازده کوزلرین سمایه رفع ایدرلردی بو آیت نازل اولیحق کوزلرین موضع سجوده وضع ایدر اولدیلر (قال النبی علیه السلام ما بال اقوام یرفعون ابصارهم الی السماء فی صلاتهم لیتنهن عن ذلك او لیخطفن ابصارهم) پیغمبریمز صلی الله علیه وسلم ایدر شول کسهلرک حالی ندر که نمازلرنده کوزلرین سمایه رفع ایدرلر اول فعلدن منتهی اولسونلر یوخسه بصرلری خطف اولنور * دینلریکه اول جسدندن بر شیتله او ینامقدر (روى ان النبی علیه السلام ابصر رجلا یعبث بلحیته فی الصلاة فقال لو خشع قلب هذا لخشعت جوارحه) روایت اولندیکه پیغمبریمز علیه السلام بر رجلی کوردیکه نمازده صقالیله اوینار دیدیکه اکر بونک قلبنده خشوع اولسه جوارحی دخی خشوعده اولوردی * دینلریکه صلاتده خشوع جمیع همت و صلاتک ماسو اسندن اعراض اولساننه جاری اولان قراءت و ذکریتدیردر (والذین هم عن اللغو معرضون) ومالایعنی قول وفعلدن اعراض ایدرلر (والذین هم للزکاة فاعلون) ومالارنده اوزرلرینه واجب اولان زکاتی ادا ایدرلر ویاخود عمل صالح ایشلرلر (والذین هم لفر وجهم حافظون) وفرجلرینی حرامدن حفظ ایدرلر (الاعلی ازواجهم او ماملکت ایمانهم) الاتزوج ایتدکلری زوجات اربعه دن وملاک یمینله مالاک اولدقلری سراریدن دکلر (فانهم غیر ملومین) ایمدی انلر فرجلرینی زوجات وسراریلرینه بذل ایتلریله لوم اولنملر قحانکه شرعک اذن و یردیکه وجه اوزره اولان حیض ونفاس حالنده اولیه (فن ابتغی وراء ذلك قالوا لک هم العادون) اول کسه که اشبونک ورائن طلب والتماس ایده اول وصفلو کسهلر حلالدن حرامه متجاوزلردر اشبونده دلالت واردرکه یدله استثناء حرام اوله * عطاء ایدر ایشتمکه بر قوم یوم قیامتده یدلری

جبالی حشر اولور ظن ایدرینکه انلر یدله استثناء ایدنلر اوله * سعید بن جبیر
ایدر الله تعالی بر قومه عذاب ایتدیکه انلر مذاکیر یله اوینارلر دی
(والذین هم لا مائاتهم وعهدهم راعون) و اموال واسرار دن اثمان
اولند قلی شیئی حفظ ایدرلر حق و یا خلق جهنندن اولان معاهده لینه
وفا ایدرلر معلوم اوله که امانات مختلفه در ایکیدن خالی دکدر یا الله تعالی
انی عبادی اوزره ایجاب اید و بدر و یا خود عبدالله عید بیننده در ودائع
و بضائع کبی * ایددی عبد اوزره جیعنه وفا واجب اولور (والذین هم
على صلواتهم يحافظون) و صلاتر لینه مواظبت و اوقانی رعایت ایدرلر
(اولئک هم الوارثون) اشبو صفاتی جمع ایدن کسسه ل وارث دینلکه
احقر در (الذین يرثون الفردوس هم فيها خالدون) که انلر فردوس جنته
وارث اولورلر انده خالدلر در (قال النبي عليه السلام ما منکم من احد
الاوله منزلا ن منزل فی الجنة و منزل فی النار فان مات ودخل النار ورث
اهل الجنة منزله) پیغمبر یمز صلی الله علیه وسلم ایدر سزدن بر کسه
یوقدر که الا انک ایکی منزلی وارد بر منزلی جنته و بر منزلی نارد در چنانکه
فوت اولوب ناره کیره اول جنته کی منزله اهل جنت وارث اولور
* دینلکه مؤمن و کافر دن هر برینک ایکی منزلی وارد بری جنته
و بری نارد در اما مؤمن جنته کی منزلن پیار و اما کافر جنته کی منزلن
یقار و نارد در کی منزلن پیار (جاء فی الحديث ان الله تعالى خلق ثلاثة
اشياء بیده خلق آدم بیده و کتب التوراة بیده و غرس الفردوس بیده
ثم قال وعزتی وجلالی لا یدخلها مدمن خمر ولا دیوث) حدیثه کلدیکه
الله تعالی اوچ شیئی ید قدر تیله خلق ایتدیکه اول خلق آدم و کتب
تورات و جنت فردوس ایدی بعده دیدیکه عز تم و جلالم حقیچون اول
فردوسه مدمن خمر و دیوث کیر مسون (ولقد خلقنا الانسان من سلاله
من طین) بز ولد آدمی صفوت مادن خلق ایتدک اول طیندن سل
اولنو بدر و یا خود نطفه دنکه اول طیندن سل اولندی طینله مراد آدم
علیه السلامدر و یا خود انسانله مراد آدمدر که اول هر تر به دن سل
اولنو بدر (ثم جعلناه نطفة فی قرار مکین) بعده ولد آدمی یعنی سلاله یی
نطفه قیلدق بر مستقرده که اول سلاله انده تمکین اولندیکه اول رحدر
(ثم خلقنا النطفة علقه) بعده نطفه بیضایی علقه جرایه تحویل

(ایتدک)

ایتدک که اول قطعه دندر (فخلقنا العلقه مضغة) بعده اول علقه یی
مضغة لحم قیلدق (فخلقنا المضغة عظاما) بعده اول مضغه یی کککار
ایتدک (فکسونا العظام لحما) و اول کککاره اول مضغه دن قلان لحمی
کیوردک و یا اول کککار اوزره اکا متصل لحم بتوردک (ثم انشأناه خلقا آخر)
بعده انی خلق آخر انشاء ایتدک که اول اکا روح نفخ اولنمسیدر و یا اسنان
و شعر بتسیدر * دینلکه انکه مراد انک حالدن حاله تحویلیدر که
اول استهلال و ارتضاع و قعود و قیام و مشی و فطام و اکل و شرب
و بلوغ حلم و تقلب فی البلاد و انک مابعدیدر (فتبارک الله احسن الخالقین)
الله تعالی قدرت و حکمتن شانی عالی اولدیکه اول مقدرینک احسنیدر
(ثم انکم بعد ذلک لمیتون) بومنوال اوزره خلقکز تمامدنصکره آجالکز
انقضاسنده جیعکز میت اولورسز (ثم انکم يوم القيامة تبعثون) بعده
یوم قیامتده محاسبه و مجازات ایچون بعث اولورسز (ولقد خلقنا
فوقکم سبع طرائق) فوقکزده یدی سماء خلق ایتدک که اول ملائکه یه
و یا کواکب سیاره یه طرائقدر (وما کننا عن الخلق غافلین) اشبو سمواتک
و یا جمیع مخلوقاتک حفظندن بز غافل دکلر بلکه زوال و اختلالدن حفظ
ایدر و امرینی تدبیر ایدرز حتی که حکمت و مشیئة ازلیه من مقتضاسنجه کالدن
تقدیر ایتدیکمز نهایتنه ایره (وانزلنا من السماء ماء بقدر فاسکنناه فی الارض)
بز سمان یغمور ایدر دک شول دکلو که نفعی کثیر و ضرری قلیل اولور
و یا شول دکلو خلقک صلاحلری انکه ایدوکن بیلورز بعده انی غدیرلرده
و مستنقعلرده اسکان ایدرز که ایام صیفده یغمورک انقطاعی زمانده ناس
انکه نفعلندر و یا خود بز اول یغموری بر ایچنده اسکان ایدرز بعده اندن
بر یوزینه پیکارلر چیقاررز * ایددی یرده کی صولرک کلیمی سماندر
(وانا علی ذهابه لقادرون) و بز انی ازاله یه دخی قادرز افساد و یا تصعید
و یا تعمیقله ازالنه قادر اولدیغمز کبی * خبرده کلدیکه حق جل و علا جنتدن
بش نهر انزال ایدو بدر که اول جیحون و سیحون و دجله و فرات و نیلدر الله
تعالی اشبو نهرلری عبون جنتدن اسفل در جهده عین واحده دن جبریل علیه
السلام ایکی جناحی اوزره آلوب بر یوزینک جبالنده ایداعدنصکره بر یوزینه
اجرا ایتدی و انده ناسه منفعتلر قیلدی چنانکه یا جوج و ما جوجک خروجی
وقتی ایریشه الله تعالی جبرائیل علیه السلامی کوندرر حتی که یردن قرآنی

وعلمك كلني وجراسودی و مقام ابراهیمی و تابوت موسایی ایچنده اولان اشیائله
و ذکر اولنان بش نهرلری سمایه رفع ایدر چنانکه بواسیاء رفع اولنه یراهلی
دین و دنیا نك خیرینی یتورر (فانشأنا لكم به جنات من نخيل واعناب)
و بز اول صو ايله سز چكون نخيل و اعنابدن چنتلر ايجاد ایدرز (لكم فيها
فواكه كثيرة ومنها تأكلون) که اول چنتلرده سز چكون فواكه كثره
واردر که صیف و شتاده اندن اكل ایدرز و یا خود اول نخيل و اعنابك
ثمرنده انواع فواكه واردر که اول رطب و عنب و تمر و زبيب و عصير و دبس
وانك غیر ایدر (وشجرة تخرج من طور سيناء) و سز چكون شجرة ايجاد
ایدرز که اول طور سینادن چیقار که اول جبل موسادر مصرله مدین
اراسنده در و یا فلسطینده در و اول شجرة ايله مراد زیتوندر (تثبث بالدهن)
اول دهنله یشلنور و اندن دهن چیقار (وصبغ اللاكلين) و اكل ایدر چیلره
اندن ادم بتر و بالجمله اول شجرده برشی بتر که اول ادهان اولنور و سراج
ایدیلور و اكله ادم اولور (وان لكم في الانعام لعبارة) سز چكون ابل
و بقر و غنمه عبرت واردر که انك حاليله اعتبار و انكله استلذاذ ایدرز
(نسقيكم مما في بطونهما) انك بطوننده علفدن تگون ایدن الباندن
سزه ایچوررز (ولكم فيها منافع كثيرة) و اول انعامك ظهورنده کی
اصواف و اشعارنده سزه منافع كثره واردر (ومنها تأكلون)
وانك لحومندن یرسز (وعليها وعلى الفلك تحملون) اول انعامدن
ابل اوزره برده و سفائن اوزره بجرده یوكلنور و بضاعكزی یوكلدر سز
(ولقد ارسلنا نوحا الى قومه فقال يا قوم اعبدوا الله مالكم من اله
غيره أفلا تتقون) بز نوحی قومنه رسالتله كوندر دك اول انلره دیدیکه
یا قوم الله تعالی بی توحید ایدك اندن غیری معبود بالحق الهكزی یوقدر
قورقزمیسز که سزدن نعمتلرین ازاله ایده و كندیکزی هلاك ایده
و اكا عبادتی ترككز و نعمتلرینه كفرانكز سیبيله سزه عذاب ایده
(فقال الملا الذين كفروا من قومه ما هذا الا بشر مثلكم يريد أن يفضل
عليكم) نوح علیه السلامك قومندن اشراف عواملری دیدیکه
بونوح سزك کی بشردر دیلر که اوزریكزه تفضل ایده رئیس اوله
(ولو شاء الله لانزل ملائكة) اكر الله تعالی بزه رسول كوندرمك دیلسه
ملائكه دن رسولار كونده رردی (ما سمعنا بهذا في آبائنا الاولين)

(اشبو)

اشبونك سوبلیدیکی نبوت دعواسنی و عبادة الله حثنی و اندن غیری آلهه
نقیبنی بزدن اول چكن آباءمزدن ایشتمك اشبو قوللری یا فرط عنادرلندن
و یا فطرت متطاووله ده بولندقلرندن اوله (ان هو الا رجل به جنه فتر بصوا به
حتى حين) اول نوح دكل الابر جلدركه انده جنون اولدیغندن بونك کی
سوزلری سوبلر * ایددی انی متحمل اولوب جنوندن افاقته منتظر اولك
(قال رب انصرني بما كذبون) نوح علیه السلام انلك ایمانندن
مأیوس اولیچق الله تعالی یه اقبال ایدوب دیدیکه یارب قومك بنی تكذبلی
سیبيله انلره وعد ایتدیکك عذابی انجازله بكا نصرت ایت (فأوحينا
اليه ان اصنع الفلك باعيننا ووحينا) بز نوحه امر ایتدك كه بزم
حفظمز و امر و تعلیمز ايله برسفینه دوزه سن سن انده خطا ایتدن و یا اكا
مفسدك فسادی ایرمكدن بزانی حفظ ایدرز (فاذا جاء أمرنا وفار التنور)
چنانکه اول سفینه یه ركوبله و یا نزول عذابله امریمز كله و تنوردن
صو چیقه * روایت اولندیكکه نوح علیه السلامه دینلديكکه تنوركدن
صو قینادقده سن و اتباعك سفینه یه كيرك وقتاكه اندن صو قینادی
نوح علیه السلامك مرأسی انی خبر و یردی فی الحال سفینه یه ركوب
ایتدی و محلی مسجد كوفه ده باب كنده یه داخلك یمیننده در و بر قوله شامده
عین ورده در و بوقصه نك تفصیلی سورة هودده چكوبدر (فاسلك
فيها من كل زوجين اثنين) ایددی اول سفینه یه هر حیواندن برر اركك
و برر دیشی قویغل (واهلك) و دخی اهل بیتکی و سكا ایمانه كلنلری
قویغل (الا من سبق عليه القول منهم) الا انی دكل که انلردن عذاب
اولمسنه قولز سبقت ایتدی (ولا تخاطبني في الذين ظلموا انهم مغرقون)
بكا خطاب ایتكل شول كسه ل نجاتیچونكه انلر كفرله نفسلرینه ظلم
ایتدیلردی انلر غرقله هلاك اولیسرلردر (فاذا استويت انت ومن معك
على الفلك فقل الحمد لله الذي نجانا من القوم الظالمين) چنانکه یانوح سن
و بلکجه اولان اهل ایمان سفینه یه ركوب ایده سز دیکل كه اول
الله تعالی یه جد اولسونكه بزى شول شرك و عصیانله نفسلرینه ظلم ایدن
قومدن خلاص ایتدی (وقل رب انزلني منزلا مباركا) و چنان
سفینه دن بره نزول ایده سن دیکل که یارب بنی نزول مباركله انزال
ایتکه اول غرقدن نجاتدر (وانت خير المنزلين) كه سن انزال

ایندلرک خیر لوسیسن (ان فی ذلک لآیات) نوح قومنک کفاری هلاکنده
و مؤمنلری نجاتنده استبصار و اعتبار اهلنه عبرتله واردر (وان کننا
لمبتلین) و الحال بز نوحی انلره ارسال و انک وعظ و تذکیرله اختصار
ایتدک که عذاب نزولندن اوکدین اعمال سیئه لرینی اوزر لرینه حجت
ایده وز (ثم انشأنا من بعدهم قرنا آخرین) انلری اغراقدنصکره قرن
آخرینی انشاء ایتدک که انلر عاد و ثموددر (فارسلنا فیهم رسولا منهم)
بز انلره کندیلدن هود و صالحی رسول کوندردک رسوللری انلره
دیدیلرکه (ان اعبدوا الله ما لکم من اله غیره أفلا تتقون) الله تعالی بی
توحید و اکا عبادت ایتدک که اندن غیری معبود بالحق الهکزی یوقدر
قورقزمیسزکه اکا اشرا ککزله سزله عذابن ایرکوره (وقال الملاء من قومه
الذین کفروا و کذبوا ببقاء الآخرة) انک قومندن کافر اولوب آخرتک
ثوابی و عقابی لقاسن تکذیب ایدنلرک اشرافیکه (وأترفناهم فی الحیاة
الدنیا) بز انلری حیات دنیا ده کثرت اموال و اولاد ایله تنعم ایتدک
دیدیلرکه (ما هذا الا بشر مثلكم یا کل مما تأکلون منه ویشرّب مما
تشرّبون) بودکل الا صفت و حالده سزک کبی بشردر سزک یوب
ایچدی ککزدن یروایچر (ولئن أطعتم بشرا مثلكم انکم اذ الخاسرون)
اگر سز کندی کز مثلی بشره سزله امر ایتدیکی شیئده اطاعت ایدر سکر
کندی کزی اذلالکز حیثیتله مغبونلردن اولور سز (أیعدکم انکم اذا تمتم
وکنتم ترابا و عظاما انکم مخرجون) اول سزله وعد ایدر میکه سز فوت
اولوب تراب و عظامکز لحوم و اعصابدن مجرده اولدقدنصکره قبوردن
چیقه سز و یا خود عدمدن برکره دخی وجوده کله سز (هیهای هیهای
لما توعدون) اول قولی صدق اولدیغی تقدیر اوزره قتی بعیددر که
اول وعد اولندی کز ظهوره کله (ان هی الا حیاتنا الدنیا نموت و نحیی
و ما نحن بمبعوثین) حیات اشبو دنیا حیاتدر بعضمز فوت اولور و بعضمز
ایسه ولادتله وجوده کلور یوخسه موتدنصکره تکرار حیات بولور
دکلر (ان هو الا رجل افتری علی الله کذبا و ما نحن له بمؤمنین) اشبو
کسه بر رجلدر که رسالت دعواسنده و یا موتدنصکره بعثله وعدنده
الله تعالی یه کذب افترای ایدر بزانی اول قولنده تصدیق ایدر دکلر
(قال ربی انصرنی بما کذبون) رسوللری دیدیکه یارب بکا انلر اوزره

(نصرت)

نصرت ایت و بنم ایچون انلردن انتقام ایت شول سیدنکه بنی تکذیب
ایتدیلر (قال عما قبل لیصحن نادمین) الله تعالی دیدیکه آز زمانده
سنی تکذیب لرینه نادم اوله لر چچانکه عذاب کادیکن کوردر (فأخذناهم
الصیحة بالحق) انلری جبریل علیه السلامک صحیحه سی وجه ثابتله
اخذ ایتدیکه انی دفع ایدر اولدی * دینلدی که جبریل علیه السلام
بر صحیحه هالله ایتدیکه انکه قلبلری یاریلوب میتین اولدیلر (فجعلناهم
غشاء) هلاکارندنصکره قوریوب بز انلری نبات ارضدن حیل سیل
کبی قیلدق (فبعدا للقوم الظالمین) الله تعالینک رجندن بعد شول
قومه کیم شرک و عصیانله نفسلرینه ظلم ایتدیلر (ثم انشأنا من بعدهم
قرونا آخرین) انلردن صکره اقوام آخرینی انشاء ایتدک (مانسبق من امة
اجلها و ما یستأخرون) هیچ بر امت هلاکنه حد اولان وقتی نه
تقدم ونه تأخر ایدرلر (ثم ارسلنا رسلنا تتری) بعده امتله رسوللری
بری برلرینک آردنجه مترادفین اولدقلری حالده ارسال ایتدک (کما جاء
امة رسولها کذبوه فأتبعنا بعضهم بعضا) هر بارکه بر امته رسوللری کلدی
انی تکذیب ایتدیلر بز دخی انلری هلاکده بری برلرینه اتباع وارداف
ایتدک (وجعلناهم احادیث) و انلری اسمار و قصص قیلدقکه انلردن
صکره امر و شانلری ناس پیننده تحدث اولنور یعنی انلردن انجق
حکایه لری قالدی غیری دکل (فبعدا لقوم لا یؤمنون) الله تعالینک
رجندن بعد شول قومه درکه انک قولنی تصدیق ایتدیلر (ثم ارسلنا موسی
واخاه هارون بآیاتنا و سلطان مبین الی فرعون و ملائنه فاستکبروا و کانوا
قوما عالین) بوندنصکره موسی و قرنداشی هارون طقوز آیتله و حجت
واضح ایله فرعون و ملائنه ارسال ایتدک انلر ایسه ایمان و متابعتدن
تعظم ایدوب قوم متکبرین اولدیلر (فقالوا أنؤمن لبشرین مثلنا
و قومهما لنا عابدون) و دیدیلر که کندیمز مثلی ایکی بشری بز تصدیقمی
ایدرز حالبوکه ایکیسنک قومی بنو اسرائیل بزم خادملریز اولوب
عبیدمز کبی بزه منقادلردر (فکذبوهما فکانوا من المهلکین) اوله
اولسه اول ایکیسنی تکذیب ایدوب بحر قلزمه غرق ایله مهلکیندن اولدیلر
(ولقد آتینا موسی الکتاب لعلمهم بهتدون) بز موسایه توراتی و یردک تا که
بنو اسرائیل انکه اهتدا ایدلر (وجعلنا ابن مریم و امه آیه) بز عیسانی

لث (۱۰)

واناسى قدرتمزه دلالت ايدر آيت قيلدقكه اول مريمك اكا رجل مستسز
عيساي ولاديدر (و آويناها الى ربوة ذات قرار ومعين) واول
ايكيسن انزال ايتدك برمكان مرتفعه كه اول ارض مستويه ومنبسطة
ويا ثمار وزروعنده وفرت ووجه ارضه ظاهر صولرى اولغله انده
سكون وقرار قيلوب رغبت ايدرلكه اول دمشق ويارمله ويا بيت المقدسدر
(يا ايها الرسل كلوا من الطيبات) يامرسلين طيباتدن ييكر * اشبوندا
وخطاب جميع انبيايه دركه هر برى زمانده بونككه خطاب اولمشدر
اشبونده تنبيه واردركه انبيايه طيباتك اباحتى شرع قديم اوله وطيبت
مباحاتدن هرشيئدركه انككه استلذاذ اولنه وبر قولده اول حلالدركه
صافى القوام اوله ايمدى حلال اولدركه انده الله تعالى به عصيان
اولتميه وصافى اولدركه انده الله تعالى اونودليه وقوام اولدركه
انده نفس امسك وعقل حفظ اولنه (واعملوا صالحا) وعمل صالح
ايشلكزكه اول سزدن مقصود وربكر جل شأنه عندنده نافعدر
(انى بما تعملون عليم) بن سرك اعمالكزى عليم اكا كوره سزه جزا
ايدرين (وان هذه امتكم امة واحدة) اشبو سرك ملتكزدر عقائده
واصول شرايعده ملت متحده وياخود جباغتكز ايمان وتوحيد اوزره
متفق جماعت واحده اولديغى حالده (وانا ربكم فاتقون) وبن سرك
ربكزين كه آنى سزه ايجاب ايتدم * ايمدى بدن خوف ايدك وياخود سزدن
اول كچن مرسلينه امر ايتديكم شيئى سزه دخى امر ايتدم امر ييكر
واحددر وربكر بنم بدن حذر ايدك (فتقطعوا امرهم بينهم) انلر ايسه
دينلرى امرينى تفريق ايدوب اديان مختلفه قيلدبلر يهود ونصارى ومجوس
اولدبلر (زبرا) كتابلره اختلاف ايدر اولدقلى حالده كيمنى تصديق
وكيمنى تكذيب وكيمنى تحريف ايتلريله (كل حزب بما لديهم فرحون)
متحزبيندن هر حزب صددنده اولديغى دين باطله اعجاب وسرور ايدرلر
وانى حق اعتقاد ايدرلر (فذرهم فى غمرتهم حتى حين) انلرى غماره
وجهالترنده موتلرينه دكين ترك ايلكل (ايجسبون انما نعمتهم به من مال
وبنين نساغ لهم فى الخيرات) ظن ايدرلرميكه بزم انلره مال واولاددن
ويرديكمزله انلر ايجون خيروا كرامد عجله ايتمش اولهوز (بل لايشعرون)
بلكه انلر بهاييم كبيدر فطنت وشعورلرى يوقدركه شول انلره ويرديكمزى

(استدراج)

استدراج ايتديكنى بيله (ان الذين هم من خشية ربهم مشفقون) شول
مؤمنلر كه خشية اللهدن صددنده اولدقلى اعمال صالحه ايله بيله انك
عقابندن صاقنورلر (والذين هم بايات ربهم يؤمنون) وربلرى جل
شانهك ايتلرينى تصديق ايدرلر (والذين هم برهم لايشركون) ورب تعالى به
شركك نه جليس ونه خفيسن ايتزلر (والذين يؤتون ما آتوا وقلوبهم
وجلة انهم الى ربهم راجعون) وصدقاتدن ويردكلرينى ويرلر حالبوكه
قيلبرى قورقركه اول انلردن قبول اولتميه وياخود ويرمى وجه لائق
اوزره اولديغچون مؤاخذ اوللر * زيراكه مرجعلرى ربلرينه در اكا
ايسه برشىء خفى اولمز (اولئك يسارعون فى الخيرات) اشبو صفاتله
متصف كسه لر اعمال صالحه به مبادرت ايدرلر وفوتندن خوفله اكا زياده
رغبت ايدرلر (وهم لها سابقون) اول خيراته ناسى سبقت ايديجيلر در
(ولانكف نفسا الا وسعها) هيچ برنفسه وسعى وطاقى اولميان شىء
تكليف ايتمز (ولدينا كتاب ينطق بالحق) بزم عندمزده لوح محفوظ
واردركه صدقله تبين ايدر يعنى الله تعالى هيچ برنفسه تكليف ايتز
الاعمالدن آنى كه اكا طاقت كتورر حالبوكه بز انك عملنى لوح محفوظده
اثبات ايتشزدر اول انى حقله نطق وتبين ايدر * دينلديكه انككه مراد
كتب اعمالدركه حفظه انى كتب ايدر (وهم لا يظلمون) حالبوكه انلر
زياده عذاب وياقصان ثوابله ظلم اولمز (بل قلوبهم فى غمرة من هذا)
بلكه كفارك قلوبى اشبو قرآندن غفلت وجهالترنده در (ولهم اعمال
من دون ذلك هم لها عاملون) واول كفار ايجون اعمال مؤمنيندن غيرى
اعمال خبيثه واردركه لابد انى عمل ايديسرلر در وانك سبيله ناره كيريسرلر در
(حتى اذا اخذنا مترفيهم بالعذاب اذا هم يحأرون) حتى چنانكه انلرك
متنعلرينى عذاب ايله اخذ ايتدك كه اول يوم بدرده قتل اولملىدر *
ويايغمبريمز صلى الله عليه وسلمك انلره بددعاسيله قحطه ايرشملىدر
برمرتبه ده كه انده لحوم كلاب وجيفه لرى يديلر اول حالتده كورسك كه
جزع واستغاثه ايدرلر انلره دينلديكه (لا تجأروا اليوم انكم مننا
لا تنصرون) جزع واستغاثه ايتكز اشبو كونده اول سزه نفع ايتز *
زيراكه سزبزدن منع اولمز و بزم جهتمزدن سزه نصرت ومعونت
ايرشمزدر (قد كانت آياتى تتلى عليكم فكنتم على اعقابكم تنكصون)

سزہ بنم آیتلرم تلاوت اولدیغنده انی استماعدن وموجبيله عملدن ادبار واعراض ایدردیکز (مستکبرین به) بیت حرام ایله استکبار ایدر اولدیغیکز حالدہ شول سببدنکه بز حرم الله اهلیر وانک جیرانیر بزہ هیچ احد غالب اولمز و هیچ براحددن بزہ ضرر ایرمز دیوب سائر ناس خوفده ایکن انلر امنده اولور لردی و یاخود قرآنی و یارسول اللهی تکذیب ایدر اولدقلری حالدہ * زیرا که قرآنی ایشدتد کارنده و یا محمد صلی الله علیه وسلم کور دکارنده تکذیب ایدوب کبرلرین آرتور لرلردی (سامرا) کیجه مجالس لرندہ قرآن ذکر یله واکا طعنله مسامره ایدر اولدقلری حالدہ (تهجرون) اول قرآندن اعراض و یاشاندہ هذیان ایدر لردی (أفل یدبروا القول) انلر قرآنی تدبر ایتزلر میکه انلرک ر بلرندن حق ایدیکنی یله لردی لفظنک اعجازی ومدلولنک وضوحیچون (ام جاءهم ما لم یأت آباءهم الاولین) یوخسه آباء اقدملرینه کلیمان رسول و یا کتاب و یا عذابدن امن انلره می کادی حتی که انی اول سببدن انکار ایتدیلر (ام لم یعرفوا رسولهم فهم له منکرون) یوخسه رسوللری محمدی امانت و صدق و حسن خلق و کمال علم و بونک غیری خصال حیدده ایله بیلدیلر میکه اشبو وجوهک بریچون دعواسنی انکار ایدرلر (ام یقولون به جنة) یوخسه انده جنونمی وار دیرلر * والحال انک کنیدلرندن عقلمده رجحانی ونظرده امعانی اولدیغن بیلورلر (بل جاءهم بالحق) بلکه اول انلره صدقله و بر قولله کلوبدر که صحت و حسنی هر عاقله خفی اولمز (واکثرهم للحق کارهون) والحال انلرک اکثری حقندن کراهت ایدرلر * زیرا که شهوات واهوالرینه مخالف اولور (ولو اتبع الحق اهواءهم لفسدت السموات والارض ومن فیهن) الله تعالی و یا قرآن هوالرینه اتباع ایتسه شرابعک وضعی و یا قرآنک نزولی مرادلرینه موافقت ایتسیله سموات وارض و ایچلرندہ کی مخلوقات باطله منقلب اولورلردی * زیرا که الله تعالیدن غیری اله یوقدر که اول ایکیسنی زوالدن امساکنه قادر اوله * تکمیل زیادہ تقریری (لوکان فیهما آلهة الا الله لفسدتا) آیتنده یکدی (بل ایتناهم بند کرهم فهم عن ذکرهم معرضون) بلکه بز انلره بر کتاب و یردک که اول انلرک ذکر و وعظ و وصیتیدر انلر ایتسه اول ذکرندن اعراض ایدرلر اکا التفات ایتزلر (ام تسألهم خرجا فخرج ربک خیر) یوخسه اداء رسالت اوزره

(انلردن)

انلردن اجر می استرسن * ایددی ربک جل شانہ نک سکا دنیاده و یردیکر رزق و یا عبادہ کی ثواب خیر لودر (وهو خیر الرازقین) که اول رازقلرک خیر لوسیدر (وانک لتدعوهم الی صراط مستقیم) یا محمد سن انلری صراط مستقیمه دعوت ایدر سنکه عقول سلیمه انک استقامتنه شهادت ایدر انده عوج یوقدر (وان الذین لا یؤمنون بالآخرة عن الصراط لنا کبون) شونلر که آخرته ایمان کتورمز لر صراط سویدن عدول ومیل ایدیلر بدر * زیرا که آخرت خوفی حق طلب وطریق حقه سلوک بواعشک اقواسیدر (ولورجناهم وکشفنا ما بهم من ضرر الجوا فی طغيانهم یعمهون) اگر بز انلری اسر کیوب صعدندہ اولدقلری ضرری کیدر سه وز انلر کیرو کفرده افراط وحقندن استکبار ورسول اللهه ومؤمنلره عداوتلرینه تمادی ایدر لرلردی * وقتساکه پیغمبریمز صلی الله علیه وسلم قریش اوزره قحط ایرمه سنی الله تعالیدن دیلوب انلره قحط ایردی ابوسفیان کلوب دیدیکه الله تعالینک حقیچون و پیغمزده کی رحم حقیچون سن کنیدیکی رجة للعالمین بعث اولتمش زعم ایدرسن حالبوکه آباءلری سیقله و ابنا یی قحطله قتل ایدیورسن دعا ایتکه الله تعالی بو قحطی اوزریمزدن دفع ایده * پیغمبریمز صلی الله علیه وسلم دخی اکا بناء دعا ایدوب کشف اولیچق بو آیت نازل اولدی (ولقد اخذناهم بالعذاب فاستکانوا الربهم وما یضرعون) بز اول کفار یی یوم بدرده اسر و قتل عذابله اخذ ایتدک انلر ایتسه ربلر یچون استکانه ایتدیلر واکایلوارمدیلر بلکه استکبارلری اوزره اقامت واصرار ایتدیلر (حتی اذا فتحنا علیهم بابا ذا عذاب شدید اذاهم فیہ مبلسون) حتی قحطانکه انلر اوزره شدتلو عذاب قیوسن آچدق که اول جوعدر اسر و قتلدن اشد در متحیرین و هر خیردن آیسین اولدقلری حالدہ سکا استعطاف ایده کلیدلر (وهو الذی انشأ لکم السمع والابصار والافئدة قلبلا ماتشکرون) اول الله تعالی سزہ سمع وبصر خلق ایلدی تاکه آیات اللهی ایشیدوب کورده سز و قلبله منافع دینه و دنیویه یی بیله سز سز ایتسه اشبو نعمتلره شکر قلیل دخی ایتز سز (وهو الذی ذرأکم فی الارض والیه تحشرون) اول الله تعالی سز یی رده خلق ایلدی آخرتده بمعند نصکره اکا حشر اولنور سز (وهو الذی یحیی ویمیت) اول الله تعالی احیاء و اماته ایدر (وله اختلاف الیل والنهار) لیل ونهارک

تعاقي اکا مختص اولور اکا انک غیری قادر اولمز ویاخود اول ایکیسندن
برینک انتقاصی آخرک ازدیادیه اکا مختص اولور (أفلا تعقلون)
نظر و تأمله بیلزمیسز که کلیسی بزدر و قدرتمز ممکناتک کله عام اولور
(بل قالوا مثل ما قال الاولون) بلکه کفار مکه آباء اولینلری دیدیکن دیدیلر
(قالوا أنذا متنا وکنا ترابا و عظاما أئنا لمبعوثون) دیدیلر که چنان بزفوت
اولوب تراب اوله وز ککلیرمز لحوم و اعصابدن مجرد قاله بزکیرو
دیریلورمیز (لقد وعدنا نحن و آبائنا هذا من قبل) اشبو وعدی بز و آبائمز
محمدن اول وعد اولتمشز (ان هذا الا ساطیر الاولین) بودکل الا اکاذیب
اولیندر که آتی یازمشلردر (قل لمن الارض ومن فیها ان کنتم تعلمون)
یا محمد اهل مکه به دیکل که ارض وارضده کی خلق کیمکدر اگر بیلورسکز
(سیقولون لله) الله تعالینکدر دیسرلردر * زیرا عقل صریح ادنی
نظرله اکا اقراره مضطر اولور چنان انی اقرار ایدر (قل أفلا تذکرون)
انلره دیکل که تذکر ایتزمیسز که ارضی و ایچنده کی مخلوقاتی ابتداده
خلقه قادر اولان رب تعالی ایکنجی کرده دخی اکا قادر اولور *
زیرا که بدأ خلق اعاده دن اهون دکدر (قل من رب السموات السبع
ورب العرش العظيم سیقولون لله قل أفلا تتقون) انلره دیکل که سمواتک
وعرش عظیمک ربی کیمدر دیسرلردر که انلرک جیعی الله تعالینکدر
سن انلره دیکل که ایمدی انک عقابندن قورقمیسز که بعض مخلوقاتنی اکا
اشراک ایدرسز و بعض مقدوراتی اوزره قدرتنی اقرار ایتزمسز (قل من بیده
ملکوت کل شیء و هو یحیر و لا یحسار علیه ان کنتم تعلمون سیقولون لله
قل فانی تسحرون) دیکل که هر شیئک ملکی کیمک یئنده در اول دیلدیکنی
سوءدن منع ایدر و سوء اراده ایتدیکنی اندن منع ایتمز بکا جواب
ویرک اگر بیلورسکز دیسرلردر که اول الله تعالینکدر سن دیکل که اولیه
اولسه سنر شیطان و هوایه نیچه آلدانورسز و الله تعالی به ایمان
وطاعتدن آریلورسز (بل اتیناهم بالحق و انهم لکاذبون) بلکه بز انلره
حقله کلشز که اول کرک توحید و وعد بالنشوردر انلر ایسه کاذبلردر
شول حیثیتدکه انی انکار ایدر (ما اتخذ الله من ولد و ما کان معه من اله
اذا لذهب کل اله بما خلق) الله تعالی ولد اتخاذا ایتدی * زیرا هیچ
احد اکا مماثل دکدر و انکله بیه آله یوقدر که الوهیتده اکا مساهم اوله

اگر انکله بیه اله اولسه هر بری خلقنده تفرد ایدوب خلق و انعامنک
غیره مضاف قیلندیغنه راضی اولمیدی و خلقی اوزره استیلادن اله آخری
منع ایدیدی (ولعلا بعضهم علی بعض) وینلرنده تحارب اولوب بعضی
بعض اوزره مغالبه یی طلب ایدیدی * شکم اول حالت ملوک دنیا بیننده
جاری اولور (سبحان الله عما یصفون) الله تعالی منزله اولدی آندنکه
مشرکون انی ولد و شریکله وصف ایدر (عالم الغیب والشهادة
ففعالی عما یشرکون) اول الله تعالی غیب و شهادتی سر و علانیه یی
یلور * ایمدی اول عالی و منزله اولدی آندنکه شول غیب و شهادتی بیلان
شیئی اکا اشراک ایدر (قل رب اما ترینی ما یوعدون رب فلا تجعلنی
فی القوم الظالمین) دیکل که یارب اگر انلره ايعاد ایتدیکک عذابی بکا
کوسترسک عذابده بنی انلره قرین ایتکل * اشبو قولی دیمسی هضم نفس
واظهار عبودیت ایچون اوله وزیرا ظلمه نك شومی آرالنره اولانلره دخی
ایریشور (وانا علی ان نریک مانعدهم لقادرون) بز انلره ايعاد ایتدیکمز عذابی
سکا کوسترمکه قادرز لکن بز آتی تأخیر ایدرز شول سیدنکه کندیلرینک
ویا عاقبلرینک بعضی ایمانه کله جکن بیلورز و یاسن انلرک آراسنده ایکن
انلره عذابمز ایرکورمز (ادفع بالتی هی احسن السیئة) خصالت احسنی
اولان خصلتله سیئه یی دفع ایت که اول صفح و اعراض و صبردر و یاخود
اول سیئه مقابله سنده احسان ایت بروجله که دینه و هنی مؤدی اولیه
ویاخود اول کلمه توحیددر و سیئه ایسه شرکدر و یاخود اول امر بالمعروفدر
و سیئه ایسه منکردر (نحن اعلم بما یصفون) بز اعلمز اکا که سکا
انی وصف ایدرلر و یاسنی خلاف حالت اوزره وصف ایدرلر بز ایسه انلر
اوزره جزایه اقدرز * ایمدی انلرک امرینی بزه حواله ایت (وقل رب
اعوذ بک من همزات الشیاطین و اعوذ بک رب ان یحضرون) دیکل که
یارب شیاطینک و ساوسندن سنکله امتناع و سکا اعتصام ایده رین و دخی
اندنکه اول شیاطین احوالدن برشیئده بکا حاضر اوله لخصوصا که
حال صلاتده و قراءت قرآنده و حلول اجلده کی اول آخر احوالدر که اندن
قورقیلور (حتی اذا جاء احدهم الموت قال رب ارجعون) حتی چنانکه
انلرک برینه کافر اولدیغی حالده موت ایریشه دیه که یارب بنی دنیایه
رد ایت و یاخود خطاب ملک الموت و اعوانه اوله (لعلی عمل صالحا

فما تركت رجاء بودر که ترك ايتديكمده عمل صالح ايدم اول ترك ايتديكمده مراد يا ايمان و يا مال و يا دنيا اوله * پیغمبر میز صلی الله تعالی علیه وسلم ایدر چنانکه مؤمن ملائکه بی کوره انلر اکا دیلر که سنی دنیایه ردایده لمی دیه که دار هموم دار احزانه می بن آتی استمزم بلکه استدیکم الله تعالی به قدومدر اما که کافر بنی دنیایه ردایدک دیه (کلا) اکا دینور که سن دنیایه رجوع ایدر دکلسن (انها کله هو قائلها) انک رجعه بی سؤالی برکله در که تقریظه تحسرندن آتی دیر لکن نائل اولمز (ومن ورائهم برزخ الی یوم یبعثون) حالوکه اوکارنده برزخ واردر که انلر کله رجعت بیننه حائلدر یوم قیامته دکن که اول انلره اقناط کلیدر من بعد دنیایه رجوع ایدر دکلدر * زیرا که یوم بعثده رجوع دنیایه اولمز بلکه بر حیاته اولور که اول اخرویه در انک صاحبی یاجنده و یا ناردده اولور (فاذا نفخ فی الصور فلا انساب بینهم یومئذ ولا یتساءلون) چنانکه قیام ساعت ایچون صوره نفخ اولنه بیلرندده تقع ایدر انساب بولنیه فرط حیرت واستیلاء دهشتدن بری برلرینه تعاطف و تراجلری کیده بر حیثیله که (یوم یفر المرء من اخیه و امه و ابیه) قوی فخواستنجد بری برلرندن فرار ایدلر و حیم حمیدن سؤال ایدشمیلر بلکه هربری کنندی حالنه مشغول اوله اشبو آیت مناقض اولمز شول قول شریف که (واقبل بعضهم علی بعض یتساءلون) بری برلرینه اقبال ایدوب سؤال ایدیشه لر * دینلدیکه زیرا اول سؤال ایدشمیلری نفخه عنندنده در سؤال ایدشمیلری یا محاسبه دنصکره در و یا اهل جنت جنته و اهل نار نارده دخولدنصکره در (فن ثقلت موازینهم) شول کسه کی عقائد و اعمالنک موزوناتی ثقیل کله زیرا هرکسه که انک عقائد و اعمال صالحه سی اوله انکچون عندالله وزن و قدری اولور (فاولئک هم المفلحون) ایددی انلر نجات و درجاته فازلدر (ومن خفت موازینهم) و اول کسه که وزن و قدری اولور اعمالی اولیه که انلر کفار در * زیرا که (فلا نقیم لهم یوم القیامة وزنا) قوی مصداقجه انلرک اعمالی وزن اولمز (فاولئک الذین خسروا انفسهم) ایددی انلر کنندیلره زیان ایدیمیلر در که ازمان استکمال واستعمارلرین ضایع ایتدیلر (فی جهنم خالدون) جهنمده دائمدر

(تلفح)

(تلفح وجوههم النار وهم فیها کالحون) یوزلرینی جهنم آتشی احراق ایدیه حالوکه انده شدت احراقدن دوداقلری قیوریلوب اوست دوداغی باشنک اورتیه سنه ایره و آلت دوداغی کوبکنه ایره * ابو هریره رضی الله عنه ایدر کافرک ناردده بیوکلکی یدی کونلک مسافه اوله و دیشی احدطاغی دکلو اوله (ألم تکن آیاتی تتلی علیکم فکنتم بها تکذبون) و انلره دینور که سزه بنم ایتلرم تلاوت اولنمدیمیکه آنده اشبو کونک اهوالی ذکر اولنمشدی سز ایسه انی تکذیب ایدردیکز (قالوا ربنا غلبت علینا شقوتنا و کنا قوما ضالین) دیلر که یاربنا بزه شقاوتمز یعنی لوح محفوظده یازیلان سوء عاقبتمز اوزریمزه غالب اولوب طریق هدادن ازمش قوم اولدق چنانکه ناره ادخال اولنلر دیلر که (ربنا اخرجننا منها فان عدنا فانا ظالمون) یاربنا بزی بو ناردن چیقار غل اکر من بعد کفره عودت و سکا مخالفت ایدر سزه وز نفسلریمزه ظلم ایدرز ابن عمر رضی الله عنهما ایدر اهل جهنم قرق ییل جهنم خازنی مالکله بلوارده لر که (لیقض علینا ربک) ربک بزی اماته ایدیه اول ایسه انلره جواب و یرمیوب مدت مدیده دنصکره (قال انکم ما کثون) سز بو ناردده خالدلر سز نه موت و نه غیری حاله سزه اندن خلاص یوقدر دیو جواب ویره بعده رب تعالی به مراجعت ایدوب یارب بزی بوندن چیقار غل اکر من بعد سکا مخالفت ایدر سزه وز کنندیمزه ظلم ایدرز دیو دنیانک ایکی عمری دکلو زمان یلواردقلرندنصکره (قال اخسؤا فیها ولا تکلمون) الله تعالی انلره دیه که جهنمده اذلاء اولدیفکز حالده رحمتدن بعید اولک عذابکز رفیعچون بکا سوتیلکز زیرا بنی انی سزندن رفع ایدر دکان بوندنصکره رجاری کسلوب بری برلرینه قارشو زفیر و شهیق ایتکه طورملر (انه کان فریق من عبادی یقولون ربنا آمننا فاغفر لنا وارحنا وانت خیر الراحین) زیرا که عباد مؤمنیندن بر جاعت یاربنا سکا ایمان کتورمشز بزه مغفرت و رحمت ایتکه راجلرک خیرلوسیسن دیرلردی (فاتخذ تموهم سخریا حتی انسو کم ذکری و کنتم منهم تضحکون) سز ایسه انلری مسخره ایدینوب حتی که اول حاله اشتغال ایله بنم ذکریمی اونوتدیکز و انلری ضحکه ایدینور دیکز اشبو آیت بلال و عمار و خباب و صهیب و سلمان و فقراء صحابه شاننده نازل اولوبدر که

کفار قریش انلری استهزاء ایدرلردی (انی جزیتهم الیوم بما صبروا انهم هم الفاضلون) انلر دنیاده سزک اذا واستهزاء کزه صبرلری سبیلله اشبو کونده انلره مجامع مراداتلرینه فائز اولملریله جزا ایتدم (قال کم لبثتم فی الارض عدد سنین) الله تعالی یوم قیامتده کفاره دیکه دنیاده وقبورده ندکو زمان لبث ایتدیکز (قالوا لبثنا یوما او بعض یوم فاسأل العادین) صد دنده اولدقلری عذاب دهشتندن آنده کی مدت لبثلرین اونودوب برکون ویا برکوندن آز لبث ایتشز دیوب ناردده خلودلرینه نسبتله انی استقصار ایدلر ویاخود انلرک دنیاده کی مدت لبثلری ایام سرورلری ایدی ایام سرور ایسه قصادر * ویاخود اول مدت منقضی اولدیه معدوم حکمنده در واکر انک حقیقتن مراد ایدرسک انک ایامی عدینه تمکین ایدنلردن سؤال ایت * زیرا که صد دنده اولدیغمز عذاب انی تذکر واحصادن بزى اشغال ایدوبدر ویاخود شول ملائکه به سؤال ایتکه انلر ناسک اعمارلرین عد واعماللرین احصا ایدرلر (قال ان لبثتم الا قلیلا لو انکم کنتم تعلمون) الله تعالی انلری مقالارنده تصدیق ایدوب دیکه دنیاده وکرک قبرده آز زمان لبث ایدوبسز اگر مدت لبثکزی بیلورسه کز (أخسبتم انما خلقناکم عبثا) ظن ایتدیکز میکه بز سزی لعب وباطل وجهی اوزره خلق ایتش اولهوز که انده حکمت اولیه بلکه سزی خلق ایتشز که بزه عبادت ایدوب بز دخی سزه اعمالکز اوزره جزا ایدموز (وانکم الینا لاترجعون) ودخی ظن ایتدیکز میکه سز بزه رجوع ایتیمه سز که جزا ایدموز اندن الله تعالی کندوی مشرکونک وصف ایتدیکی شیئندن تنزیه ایدوب دیدیکه (فتعالی الله الملك الحق) الله تعالی خلقدن تعظم ایتدیکه اکا اول ملک حق اولدی انک ماعداسی مملوک بالذات مالک بالعرضدر (لا اله الا هو) که اندن غیرى معبود بالحق اله یوقدر (رب العرش الکرم) عرش کریمک ربیسیدر که اول عرش اجرامی محیطدر افضیه واحکامک محکماتی اندن نزول ایدر (ومن یدع مع الله الها آخر لا برهان له به) برکسه که الله تعالی ایلله بیلله اله آخری اقرار ویا اشراک وجهی اوزره معبود ایدینه انکچون اکا برهان اولز * زیرا که باطل شیئه برهان اولز (فانما حساباه عند ربه انه

(لا یفلح)

(لا یفلح الکافرون) انک رب عندنده جزاسی کافرلرک عدم فلا حیدر سورة فلاح مؤمنینی تقریرله بدأ ایدوب کافرلردن فلاحی نفیله ختم ایلدی * بعده پیغمبریمز صلی الله علیه وسلم استغفار واسترحامله امر ایدوب دیدیکه (وقل رب اغفر وارحم وانت خیر الراحین) دیکل که یارب بنی ومؤمنلری مغفرت ورحمت ایتکه سن راجلرک ارجیسن اشبونده مغفرت ورحمت بیدنی جمع ایلدی زیرا کاهی مغفرت رحمتسز اولور * تنکیم اصحاب اعراف اعرافده اولدقلرنجه اولور

سورة النور وهی اربع وستون آیه مکیه

بسم الله الرحمن الرحيم

(سورة انزالها وفرضها) اشبور سورة درکه انده کی احکامی بز ایجاب وانکله عملی سزه الزام ایتدک ویاخود انده کی حدودی بز تقریر ایتدک (وانزلنا فیها آیات بینات) وبز بو سورة ده آیتلر ایندرد ککه مقصوده دلالتی واضحه در (لعلکم تذکرون) تا که انکله متعظ اولوب محارمن برجله به واقف اوله سز (الزانیة والزانی فاجلدوا کل واحد منهما مائة جلدة) زانیه وزانی قچانکه ایکسی بیلهره بالغ مائل بکر اولوب محصن اولزلر ایسه ایکسیندن هر برینه یوزر جلده اورک وشرايط احصان ابوحنیفه عندنده آتیدر اسلام وحریت وعقل وبلوغ ونکاح صحیح ودخولدر قچانکه بوشرطلرک بری بولیمه اول محصن اولز وشافعی عندنده اسلام شرط دکلدر زیرا که * پیغمبریمز علیه السلام بر یهودی ایلله بر یهودیه بی زنا ایتدکلر یچون رجم ایتدی * وابوحنیفه نک اکا جحتی که (من اشرك بالله فلیس بمحصن) اولکله الله تعالی به اشراک ایده اول محصن دکلدر دیو بیوریلان حدیث نبویدر لکن مراد اول احصان زانیله محصن دکلدر دیمکدر (ولا تأخذکم بهما رأفة فی دین الله) اول ایکسینه حدود استیفاسنده سزی مرحمت وشفقت اخذ ایتسون بلکه پیغمبریمز علیه السلامه اقتداء دینده تصلب ایدک * زیرا اول دیدیکه قیرم فاطمه سرقه ایتسه الینی کسردم (ان کنتم تؤمنون بالله والیوم الآخر) اگر الله تعالی به ویوم آخرته مؤمنلر ایسه کز * حدیثده کلدیکه یوم قیامتده حددن بر سوط نقص ایدن والی وحاکم کتوریلوب نیچون اندن نقص ایتدک دینلده دیکه یارب عبادکه مرحمت ایتدم الله تعالی اکادیه که عبادمه سن بندن زیاده مرحتلومی اولدک واتی ناره کوندره بعده بروالی

آخر كنوريله كه اول حدده بر سوط زياده ايتشيدى نچون زياده ايتدك
دينللكده ديه كه يارب تا كه عبادك معاصيدن منزجر اوله ل اتي دخي ناره
كوندره (وليشهد عذابهما طائفة من المؤمنين) اول ايكيسنك عذابنه
مؤمنلردن بر طائفه حاضر اولسونكه انك اقلي اوچدر ويا بر ويا ايكيدر
ومراد بر جمدركه انكه تشهير حاصل اوله * زيرا كاهي جنابت ايدن
كشي به تشكيل تعذيبدن زياده تفصيله اولور (الزاني لا ينكح الا زانية
او مشركة والزانية لا ينكحها الا زان او مشركة وحرّم ذلك على المؤمنين)
زاني مرأه صالحه نكاحنه رغت ايتز بلكه مشاكلي اولان زنا ويا مشرکه
ايله فاسقيه رغت ايدر وزانيه دخي كذلك فاسق نكاحنه رغت ايدر
وبو نكاح مؤمنلره حرام قيلندى * زيرا كه زانيه مائل كمسنه
صالحلر نكاحنه رغت ايتز وزانيه دخي صالحلره رغت ايتز *
زيرا كه مشاكه سبب الفت وتضامدر ومخالفت ايسه سبب نفرت
وافتراقدر * ايمدى بو نكاح مؤمنلره حرام قيلندى * زيرا كه فسادنه
تشبه وتهمته تعرض وسوء مقاله به تسبب وبونك غيري مفاسده مؤديه در
اول اجلدن تزيهده مبالغه اچون تحريمه تعبير اولندى * اشبو آيتك
معناسنده مفسرون اختلاف ايتديلر بر قوم ديدلر كه مهاجرون مدينه به
قدوم ايدچك انده باغيه نساء كوريجك نفسلرين كرايه ويرلردى
اول وقتده انلر مدينه نسا سنك احسنى ايديلر فقراء مسلميندن بر جماعت
انلرك نكاحنه رغت ايتديلر * پيغمبر عز صلى الله عليه وسلمدن اتي استيذان
ايدچك اشبو آيت نزوليله اول باغيه لري تزوج مؤمنلره حرام قيلندى
زيرا كه مشرکه لر ايديلر * ابن مسعود رضى الله عنه ايدر كه زانيه نك
نكاحي حرامدرا كر بر زاني بر زانيه بي نكاحلنسه اول ايكيسي ابدان ايدلر *
يزيد بن هارون ايدر اكر اول زانيه بي مستحل اولديغي حالد جـاع
ايدرسه اول مشركدرا كر اتي تحريم ايدر اولديغي حالد جـاع ايدرسه
اول زانيدر * حسن ايدر زاني مجلود زانيه مجلوده بي نكاحلنسون وزانيه
مجلوده نكاحله زاني مجلوده وارسون * سعيد بن المسيب ايدر اشبو آيتله
زانيه نكاحي حرام ايدى (وانكحوا الايامي منكم) آيتيله نسخ اولندى *
زيرا كه زانيه دخي ايامي مسلمينده داخلدر وزانيه نك نكاحنى تجوز
ايدنلر احتجاج ايتدى شـول حديثله كيم جابر رضى الله عنه ايدر بر رجل
پيغمبر عز صلى الله عليه وسلمه كلوب ديدى كه يارسول الله زوجهم

(لامسك)

لامسك يدينى رفع ايتز * پيغمبر عز عليه السلام ديديكه تطليق ايت اول
ديديكه نه چاره ايدى نكه بن اتي سورم اندن مفارقه صبر ايدمزم پيغمبر عز
عليه السلام ايتدى اويله اولسه تطليق ايتكل امساك ايت (والذين يرمون
المحصنات ثم لم يأتوا بأربعة شهداء فاجلدوهم ثمانين جلدة) شونلركه
مسلمات حرار عفافى زنا ايله قذف ايدرلر بعده اول محصناتك زنا لرينه
شهادت ايدر درت شاهد كتورميه لر * ايمدى اول قذف ايدنلرك هر برينه
سكسان جلده اورك اكر اول قذف ايدن حر ايسه واكر عبد ايسه قرق
جلده اوريلور واكر مقذوف محصن دكل ايسه قاذف تعزير اولور *
وبونده شرائط احصان بشدر اسلام وعقل وبلوغ وحرية وعفت
عن الزنا در * ايمدى بر كسنه اول بلوغنده بر كره زنا ايدوب اندن توبه ايتسه
وحسن حال وصلاح اوزره عمرى تمتد اولديغند نصكره اتي قذف ايدنه حد
لازم اولمز واكر مقذوف نفسى اوزره زناى اقرار ايتسه ويا خود قاذف
انك زناسى اوزره درت شاهد اقامت ايتسه اول قاذفدن حد ساقط اولور *
زيرا انك اوزره واجب اولان حد فريه ايدى اول ايسه قاذفك صدقيه
ساقط اولدى (ولا تقبلوا لهم شهادة ابدا) وانلرك شهادت لرين قبول
ايتكز آخر عمر لرينه دكين * ابوحنيفه عندنده توبه ايتدكر نجه *
شافعى عندنده اول شهادت هر نه خصوصه ايسه زيرا كه اول
مفتريدر * دينللكه شهادت لرينك عدم قبولى قذفه مختصدر واول
جلدك استيفاسنه متوقف دكلدر ابوحنيفه دير كه اكا متوقفدر *
زيرا كه جلد ايله امر وقبولدن نهى شرطه جواب واقع اولمده ايكيسى
مساويدر بيلرنده ترتيب يوقدر كه انك اوزره مرتب اوله لر * والحال
جلددن اولكى حالى جلد د نصكره كيدن اسوءدر (واولئك هم
القاسقون) وانلر فسقلرينه حكم اولمش فاسقلردر (الا الذين تابوا
من بعد ذلك فاصلحوا) الا شونلركه قذف وحد قذف د نصكره توبه
ايدلر واعمال لرين تداركه اصلاح ايدلر اول تداركك جله سندنلركه
كندويى حد اچون مقذوفنه تسليم ايدى ويا اندن حلالق دليله
(فان الله غفور رحيم) اويله اولسه الله تعالى انلره مغفرت ورحمت
ايتكده بليغدر * علما اختلاف ايتديلر كه قاذفك توبه سندنلركه
شهادتى قبولنده بر قوم ديديلر كه قاذفك نفس قذفه شهادتى رد

اولنور چنانكه قاذف توبه وندامت ايده و حالتي تحسين ايده شهادتي قبول اولنور كركسه توبه سي اوزرينه حد اقامتدنصكره و كرك اوكدن اولسون وديديلر كه استنارد شهادته وفسقه راجع اولور اويله اولسه توبه دنصكره شهادتي مقبول اولور وفسق اسمي اندن زائل اولور كه اول ابن عباس و عمر بن مرويدر و تابعيندن برجاعت قوليدر و مالك و شافعينك مذهبيدر و بر قوم ديديلر كه قذفه محدودك شهادتي ايدا قبول اولنمز اكرچه توبه ايدرسه ده اويله اولسه استثناء فسقه راجع اولور كه اول نخعي و شريح قوليدر * و ابو حنيفة مذهبيدر و ديديلر كه نفس قذفه شهادتي رد اولنمز مادامكه حد اولنميه شافعي ايدر كه اول حد اولنمزدن اولكي حالي شر در حد اولنديغند نصكره كي حالندن زيرا كه حدود كفارتدر اويله اولسه انك شهادتن ايكي حالنك احسننده رد ايدوب شرنده قبول ايتش اولورلر * شعبي ايدر حد قذف توبه ايله ساقط اولور اويله اولسه استثناء كله راجع اولور عامه علما ديديلر كه حد قذف توبه ايله ساقط اولمز مكر كه مقدوف عفو ايده اويله اولسه حد ساقط اولور قصاص كي كه عفو ايله ساقط اولور توبه ايله دكل اكر دينورسه كه قاذفك توبه سندنصكره شهادتي قبول اوليجق ايدا قولنك معناسي نه اولور دينور كه يعني انك ايدا شهادتي قبول اولنمز مادامكه قذفي اوزره اصرار ايده * زيرا كه هر انسانك ابدى حالنه لائق اولور مدتدر * تكيم كافرك ايدا شهادتي قبول اولنمز دينور يعني كافر اولديغنجيه (والذين يرمون ازواجهم ولم يكن لهم شهداء الا انفسهم) و شونلر كه زوجه لريني قذف ايدرلر حالبو كه صحت مقاله لرينه كنديلردن غيري شاهدلري اولسه (فشهادة احدهم اربع شهادات بالله انه لمن الصادقين) واجب اولان انلردن برينك درت كره شهادتيدر كه بالله اول زوج زوجه سنه قذفده صادقلردندر (والخامسة ان لعنة الله عليه ان كان من الكاذبين) بشنجي شهادتده اول زوج ديمسيدر كه الله تعالىنك لعنتي اوزريمه اولسون اكر زوجه مي قذفده كاذبلردن ايسم اشبو آيتك حكمنده دينلديكه چان بر رجل مرأه سني قذف ايتسه انك موجبي اجنبي قذفك موجبيدر كه اوزرينه حد واجب اولور اكر مرأه محصنه ايسه ويا تعزير واجب اولور اكر محصنه دكل ايسه الابو كه اول ايكي سندن مخرجه اختلاف اولنمشدر * ايمدي اكر اول بر اجنبي

(قذف)

قذف ايتسه اوزرينه حد واجب اولور اكر مرأه محصنه ايسه * ايمدي اكر اول بر اجنبي قذف ايتسه اوزرينه حد اقامت اولنور مكر كه اول مقدوفه نك زناسي اوزره درت شاهد اقامت ايده ويا خود مقدوفه زنابي اقرار ايده اويله اولسه قاذفدن حد ساقط اولور و اكر اول زوجة سني قذفده كذلك زناسي اوزره درت شاهد ويا اندن زنابه اقرار بولنورسه ويا خود اول زوج قاذف لعان ايدرسه حددن قورتيلور زوجه قذفده لعان بينه منزلتنده در * زيرا چان رجل مرأه سني رجل آخرله كورسه نه انك اوزره بينه اقامته ونه اول عار اوزره صبره امكاني اولور اويله اولسه الله تعالى اكا لعاني صدقنه حجت قيلدي و اكر زوج انك زناسي اوزره بينه اقامت ايدرسه ويا خود زوجه زنا ايتديكنه اقرار ايدرسه اول زوجدن حد و لعان ساقط اولور مكر كه انده بر ولد اولوب زوج انك نفيني مراد ايتسه اني نفى ايچون لعان ايدر چان امام اول ايكي سنه لعان ايتدر مك مراد ايتسه ابتدا رجلى اقامه ايدوب كلمات لعاني اكا تلقين ايدوب ديه كه ديكل كه شهادت ايدر ينكه بالله بن فلانه يي قذفده صادقلردنم و اكر رجل معينله قذف ايتش ايسه لعاننده اني اسميله ذكر ايده و اكر بر جاعته قذف ايتش ايسه لعاننده انلري اسملريله ذكر ايده و زوج امامك تلقين ايتديكي كي ديه و اكر ولد ويا چل نفين مراد ايدرسه ديه كه اشبو ولد ويا چل زنادندر بندن دكلدر بشنجيده ديه كه الله تعالىنك لعنتي اوزريمه اولسون اكر بن فلانه يي قذفده كاذبلردن ايسم اكر قاذف كلماتدن بريني حاكمك تلقينسز سويلرسه محسوبه اولمز چنانكه رجل لعانندن فارغ اوله انكله زوجه سي بينه فرقت واقع اولور و اول مرأه ايدا اكا حرام اولور و انندن نسب منتفي اولور و انندن حد قذف ساقط اولور و مرأه اوزره حد زنا واجب اولور محصنه ايسه رجم اولنور محصنه دكل ايسه جلد ايديلور اشبو بش حكمدر كه كليسي لعان زوجه متعلق اولور (ويدرأ عنها العذاب) و مرأه دن حدي دفع ايدر (ان تشهد اربع شهادات بالله انه لمن الكاذبين) و اول مرأه نك درت كره شهادتيدر كه بالله زوجم بكا قذفده كاذبلردندر (والخامسة ان غضب الله عليها ان كان من الصادقين) بشنجي كره ده اول مرأه ديه كه الله تعالىنك غضبي اوزريمه اولسون

اگر زوجه بکا قذفده صادقردن ايسه * ايمدی چنانکه زوج لعان ايد
مرأه اوزره حد زنا واجب اولور اگر اول حدی اسقاط مراد ايدرسه
اولدخی طوروب حاکمک تلقینی ايله منوال مشروح اوزره لعان ايدر
ومرأنک لعاننه انجق حکم واحد متعلق اولور که اول مرأنک کنديدن
حدک سقو طيدر و اگر زوج انک زناسی اوزره بينه اقامت ايدرسه
اول مرأه دن لعانله حد ساقط اولمز * ائمہ حنفیه عندنده زوجہ سنی
قذف ایدن اوزره حد واجب اولمز بلکه واجب اولان لعاندر لعان ايدنجه
حبس اولنور و آخرون عندنده لعان زوجک صدقنه حجتدر چنان قاذف صدقنه
حجت اقامتدن قعود ايتسه حبس اولمز بلکه حد اوريلور * تکيم اجنبی قذف
ایدن بينه اقامتدن قعود ايتسه حد اوريلوریدی و ابو حنیفه عندنده لعانک
موجبی وقوع فرقت ونفی نسبدر بوايکيسي ايسه زوج وزوجه نکل لعانيله
حاصل اولور و فرقت لعان علمادن کثير عندنده فرقت فسخر که
اول شافعی قوليدر و اول فرقت مؤبدہ در حتی زوج کندویی اکذاب
ايتسه قبول اولنوب اوزرينه حد لازم و ولد منفی اکا لاحق اولور لکن
تأيد تحریم مرتفع اولمز * و ابو حنیفه عندنده فرقت لعان فرقت طلاقدر
چنان رجل نفسی اکذاب ايتسه اول مرأه بی تزوج اکا جائز اولور و اگر
کلمات لعانک بعضی اتيان ايتسه اکا حکم متعلق اولمز * و ابو حنیفه عندنده
کلمات لعانک اکثرینی اتيان ايتسه حکم تعلقده اول کل مقامنه قائم اولور
و هر کسه که يمينی صحيح اوله لعانی دخی صحيح اولور اول کرک حر
ويا عبد مسلم و يادھی اولسون اشبو شافعی و اکثر علماء قوليدر * ابو حنیفه
و بر جاعت دیدیلر که لعان جاری اولمز الا ايکی مسلم بيننده که حر اولوب
محدود اولمه لر و اگر زوج وزوجه و یا ايکيسندن بری رقيق و يادھی
ويا محدود اولورسه بينرنده لعان جاری اولمز لکن ظاهر قرآن حجتدر
مطلقا ايکيسي بيننده لعان جاری اولور دينلره کوره زيرا که آينده
حرله عبد و محدودله غير محدود بينی فصل اولنماشدر و لعان صحيح اولمز
مکرکه حاکم و یا خليفه عندنده اوله و لعان درت شئله تغليظ اولنور که
اول تعدد الفاظ و مکان شريفده و زمان شريفده و جاعت حضورنده
اولمقدر اما تعدد الفاظ لازمدر اخلاقی جائز اولمز و اما مکانک شرفی مسجد
و جامعده منبر عندنده اولمقدر و اما زمانک شرفی صلاة عصر دنصکرده

(اولمقدر)

اولمقدر و اما جاعت اقلی درتدر اشبو جعله تغليظ مستحبدر حتی اگر حاکم
لعانی ايکيسنه تنهاده ايدرسه جائز اولور اما مکان وزمانله تغليظک واجب
ويا مستحب ايدیکنده ايکی قول واردر (ولولا فضل الله عليكم ورحته)
اگر الله تعالىنک فضل ورحتی اولسه عقوبتن تعجيل ايدردی لکن
سزی ستر ايدوب لعانله سزدن حدی رفع ايلدی (وان الله تواب حکيم)
اول الله تعالى تو ايدر معاصيدن رجوع ايدنه رجته عودت ايدر حکيمدر که
سزه لعانی ايجاب ايتدی (ان الذين جاؤا بالافك) شونلر که کذبک
ابلاغيله عائشه رضی الله عنهايه افترا ايتديلر * قصه سی اولدر که پیغمبر
صلی الله تعالى عليه وسلم بعض غزاوتنده عائشه رضی الله عنهايه بيله
کتورردی بر کيچه قفولده رحلنه ندا اولندی عائشه رضی الله عنها ايسه
قضاء حاجته کيدوب بعده رحلنه عودت ايلديکنده ايله صدرینی لمس
ايدیچک عقدينی قيراش بولدی فی الحال انی التماس ايجون قضاء حاجتدن
کلديکی يوله کيرو کتدی وانک رحلنه خدمت ایدن ظن ايتديکه
عائشه هود جنده اوله رحلی آلوب کتدی عائشه رضی الله عنها ايسه
کيرو اول منزله کلدکده جميع ناس اول آرادن کتمش آنده کيسه بولدی
کندویی استيو کلورلر بولورلر ديو رجائله انده اوتوروب قالدی مکرکه
صفوان بن معطل السلمي جيشک وراسنه قالمشدی صياحن اول منزله
کلوب عائشه رضی الله عنهايه انده بولدی و بيلدی و راحله سن
اکا چو کردوب حتی که عائشه رضی الله عنها اکا بندی و صفوان يباق
اول راحله بي يده رک جيشه ايرکوردی اويله اولسه اکا اتهام ايتديلر
(عصبه منکم) سزدن بر جاعت که اول اوندن قرق عده دکرکه
انکله مراد عبد الله بن ابی وزيد بن رفاعه و حسان بن ثابت و مسطح
بن اثانه و حنه بنت جحش که طلحة بن عبد اللهک زوجہ سيدر و دخی
بونلره مساعد اولانلر در (لا تحسبوه شر الکم) سز اول افکی
کندیکزه شر ظن ايتکز اشبو خطاب رسول الله صلی الله تعالى عليه وسلم
و ابو بکر الصديق رضی تعالى عنه و عائشه رضی تعالى عنها و صفوان
رضی الله تعالى عنهمک جيعنده در (بل هو خير لکم) بلکه اول سزه
خير ايدر که انکله ثواب عظيم اکتساب ايدرسز و انکله عند الله کرامتکز
ظاهر اولديکه براشکزده و تعظيم شانکزده و سوء کلام ايدنلرک تهويل

لث (۱۱)

وعیدنده وسزه خیر ظن ایدنلرک شاندن او ن سکرز آیت نازل اولدی
 (لکل امرئ منهم ما اکتسب من الاثم) اول عصبه کاذبه دن هر کیمسه
 اوزره اول افکه خوض ایتدیکی دکلو ذنبدن اکتساب ایتدیکنک
 جزاسی واردر (والذی تولى کبره منهم له عذاب عظیم) افکه خائضلردن
 اولکه انک معظمه تولى ایتدیکه اول عبد الله بن ابی درکه ابتدا انی اول
 سویلوب رسول الله صلی الله تعالی علیه وسلم عداوتن اذاعه ایتدی ویاخود
 انکله بيله حسان و مسطح ایتدی * ایدى انلره آخرته عذاب نار واردر
 ویاخود دنیاده عذاب واردر که هر بری حدقذف اورلدیلر * وابن ابی
 مطرود و نفاقله مشهور اولدی و حسان ایسه اعمی و ایکی یدی شلاء اولدی
 و مسطح ایسه مکفوف البصر اولدی (لولا اذ سمعتموه ظن المؤمنون
 والمؤمنات بانفسهم خیرا) اول افکی ایشیتدیکیکزرده نیچون انلره خیر
 و حسن ظن ایتدیکز مؤمنلر و مؤمنات نفسلرینه و اهل دینلرینه خیر
 ظن ایتلری کبی که اول ایمانک مقتضاسیدر (وقالوا هذا افک مبین)
 و شول حاله مستیقن مطلع کبی بو قذف افک ظاهر در دیسه لردی
 (لولا جاؤا علیه باربعة شهداء) اول قذف ایدنلر درت شاهد کتورسه لردی
 (فاذلم یأتوا بالشهداء فاولئك عند الله هم الکاذبون) چون انلر درت
 شاهد کتورمیه لر انلر الله تعالینک حکمنده کاذبلر دندر * ایدى سز
 انلری الله تعالینک امریله تکذیب ایدک (ولولا فضل الله علیکم ورحته
 فی الدنیا والآخرة لمسکم فیما افضتم فیہ عذاب عظیم) اکر الله تعالینک
 سزه دنیاده انواع نعمله فضلی و آخرته عفو و مغفرتله رحتی اولسه
 شول خوض ایتدیکنکز افک مقابله سنده سزه عاجلده عذاب عظیم
 ایریشیدیکه انک جنبنده لوم و جلد استحقار اولنه ایدی (اذ تلقونه
 بالسنتکم) اول افکدن سؤالی بری برلریکزدن اخذ ایدرسز ویاخود انی
 بری برلریکزه القا ایدرسز (وتقولون بافواهم ما لیس لکم به علم)
 و سویلرسز شول کلامیکه افواهم مختص اولور قلوبدن اکا مساعده اولز
 (وتحسبونه هینا) سز ظن ایدرسز که اول سهل اولوب انده وبال اولیه
 (وهو عند الله عظیم) حالبوکه اول عند الله وزرده و استجرار عذابده
 عظیمدر اشبو اوج آثم مرتبه درکه اکا عذاب عظیم تعلق ایدو بدرکه اول
 السنه لریله افکی تلقیدر و تحقیق سز انی تحدیثدر وانی استصغار لریدر (ولولا

(اذ سمعتموه)

اذ سمعتموه قلتم ما یكون لنا ان نسکلم بهذا) انی ایشیتدیکیکزرده نیچون
 دیمدیکنکزه بزه لائق اولز که بوسوزی بوسویلیهوز (سبحانک هذا بهتان
 عظیم) یارب سنی تنزیه ایدرز اشبو کلام پیغمبریمز صلی الله علیه وسلم
 خاتوننه عجب بهتان عظیمدر (يعظکم الله ان تعودوا لمثله أبدا ان کنتم
 مؤمنین) الله تعالی سزه وعظ ایدر که اکر مؤمنلر ایسه کز من بعد بوئک
 کبی سوزه عودت ایتیه سز * زیرا که ایمان اندن منع ایدر (وبین الله لکم
 الايات) الله تعالی سزه شرائعه و محاسن آدابہ دلالت ایدر آیتلرینی
 تبیین ایدر تاکه اتعاض و تأدب ایدر سز (والله علیم حکیم) الله تعالی
 احوالک کلنی بیلور و تدابیرنده حکمتن اجرا قیلور (ان الذین یحبون
 ان تشیع العاجشہ فی الذین آمنوا لهم عذاب الیم فی الدنیا والآخرة)
 شونلر که مؤمنلر بیننده فاحشه منتشر اولدیغن مراد ایدرلر انلره دنیاده
 حد و آخرته نار واردر (والله یعلم وانتم لاتعلمون) الله تعالی ضماژده
 اولانی بیلور سز انی بیلرسز * ایدى سز دنیاده ظاهر دلالت ایتدیکی
 اوزره عقاب ایدک قلوبده اولان حب اشاعة فاحشه اوزره الله تعالی
 عقاب ایدر (ولولا فضل الله علیکم ورحته) اکر الله تعالینک سزه
 فضل و رحتی اولسه دنیاده عذابکزی تعجیل ایدردی (وان الله رؤف
 رحیم) الله تعالی عبادینه رأفتلو و رحمتلوردر (یا ایها الذین آمنوا
 لاتبعوا خطوات الشیطان) یا مؤمنلر اشاعة فاحشه ایله شیطانک تریننه
 اتباع ایتکز (ومن یقع خطوات الشیطان فانه یأمر بالفحشاء والمنکر)
 برکسه که شیطانک تریننه اتباع ایدر اول شیطان قبايح افعاله و شرعک
 انکار ایتدیکی شیئله امر ایدر (ولولا فضل الله علیکم ورحته مازکی منکم
 من احد ابدا) اکر الله تعالینک ذنوبی محو ایدر توبه یه توفیقله وانی
 تکفیر ایدر حدود شرعله فضل و رحتی اولسه سزدن هیچ برکسه
 آخر دهره دکن اول دنسدن طاهر اولور کسه اولیه ایدی (ولکن الله
 یزکی من یشاء) لکن الله تعالی دیلدیکی کسه بی اندن تطهیر ایدر انی
 توبه یه حل و توبه سنی قبوله (والله سمیع علیم) الله تعالی انلرک
 اقوالنی ایشیدر و نیاتنی بیلور (ولا یأتل اولوا الفضل منکم والسعة
 ان یؤتوا اولی القربی والمساکین والمهاجرین فی سبیل الله) سزدن
 دینده فضل و مالده وسعت صاحب لریکه مراد ابو بکر الصدیق رضی الله

عنه ويرمكه يمين ايتسون شول ناسه كه انلراكا قرابت ومسكنت وفي سبيل الله مهاجرته متصرفدر كه انكله مراد يالكز مسطحدر كه اول مسكين ومهاجر وبدرى اولوب ابوبكر الصديق رضى الله عنهك ابن خاله سى ايدى عائشه رضى الله عنها نك شانده افكه خوض ايتديكيچون ابو بكر الصديق رضى الله عنه اكا انفاق واحسان ايتمكه يمين ايتشيدى (وليغفوا وليصفحوا) بلكه انلردن صدور ايدن تقرىطاقى عفو وصفح ايتسونلر (الأتجون ان يغفر الله لكم) سومز ميسزكه اول عفو وصفحكز وسزه اساءت ايدنلره احسانكز اوزره الله تعالى سزى مغفرت ايدى (والله غفور رحيم) الله تعالى كمال قدرته غفور ورحيمدر * ايمدى انك اخلاقيله تخلق ايدك روايت اولنديكه پيغمبريمز صلى الله عليه وسلم اشبو آيتى ابوبكر الصديق رضى الله عنه به قراءت ايديك ابوبكر رضى الله عنه ديديكه بلى مغفرت اولنمازى سورز واندن مسطحه كبرو انفاق ايدر اولدى والله من بعد انى اندن انزع ايتزم ديدى (ان الذين يرمون المحصنات الغافلات المؤمنات) شونلر كه قذف ايدرلر شول نسايتكه انلر عفائف وقذف اولندقلرنده غافلات والله تعالى به ورسولنه مؤمناندرلر تاكه انلرك عرضلرين استباحه ورسول الله ومؤمنلره طعن ايدلر (لعنوا فى الدنيا والاخرة) انلردنياده حدله وآخرته نار ايله تعذيب اولنورلر (ولهم عذاب عظيم) ودخى انلره عذاب عظيم اولور ذنوبلرى عظيم اولديغيچون * دينديكه اشبو هر قاذفك حكيمدر مادامكه توبه ايتيه بر قوله اشبو حكم زوجات نبى به مخصوصدر (يوم تشهد عليهم السنتهم وايديهم وارجلهم بما كانوا يعملون) يوم قيامته اول قاذفلر ديللرى واللى وياقلرى شول دنيايه ايشلدكلرى اعمال سيئه به شهادت ايدر الله تعالىنك انطاقيه ويا نك اوزره آتارى ظهوريله (يومئذ يوفيه الله دينهم الحق) اول كونده الله تعالى انلره مستحق اولدقلرى جزاى توفيه ايدر (ويعلمون ان الله هو الحق المبين) وامرى معاينه ليله بيلورلر كه الله تعالى ذاتيله ثابتدر الوهيتده ظاهر در اكا غيرى مشاركت ايتز وانك غيريك ثواب وعقاب قدرتى ايتز وياخود اول عدلى ظاهر عادلدر اولكه شانى بو اوله مظلوم ايجون ظالمن انتقام ايدر (الخبثات الخبيثين والخبثون للخبثات والطيبات للطيبين

(والطيبون)

والطيبون للطيبات) قول و كلامدن خبيثات ناسك خبيثلريچوندر و ناسك خبيثلرى قولك خبيثايتچوندر وكذلك قولدن طيبات ناسك طيبلريچوندر و ناسك طيبلى قولك طيبايتچوندر يعنى قولك خبيثى ناسك خبيثلرينه لائق اولور وقولك طيبى دخى ناسك طيبلرينه لائق اولور * ايمدى عائشه رضى الله عنها طيبه در اكا طيبات كلامدن ثناء حسن لائق اولور وياخود كلمات خبيثه يى سويلز مكر اولكه رجال ونسادن خبيث اوله وكذلك كلمات طيبه يى سويلز مكر اولكه رجال ونسادن طيب اوله اشبو عائشه رضى الله عنها يى قذف ايدنلرى ذمدر وانى براءت وطهارته وصف ايدنلرى مدحدر وياخود نسايتك خبيثلرى رجالك خبيثلريچوندر ورجالك خبيثلرى نسايتك خبيثلريچوندر ونسايتك طيبلرى رجالك طيبلريچوندر يعنى الله تعالى عائشه طيبه يى رسول طيب ايجون تقدير ايدوبدر (اولئك مبرؤن مما يقولون) رسول الله صلى الله عليه وسلم وعائشه وصفوان افك ايدنلرك افكندن مبرالدر * زيرا اكر انلرك اول قولى صدق اولسه عائشه رسول الله صلى الله عليه وسلمك زوجه سى اولزدى (لهم مغفرة و رزق كريم) انلر ايجون مغفرت وجنت واردر الله تعالى درت كسه يى درت شئله نهمندن برى قيلدى يوسف عليه السلامى زليخا اهلندن شاهده وموسى عليه السلامى قول يهوددن ثوبى كوتورن حجرله ومريم رضى الله عنها يى ولدنى انطاقيه وعائشه رضى الله عنها يى اشبو آيات كريمه ايله بودكل الارسلو الله صلى الله عليه وسلمك منصبن اظهار و منزلن اعلا ايجون ايدى * روايت اولنديكه حضرت عائشه رضى الله عنها بعض اشيايله افتخار ايدرديكه اول انك غيرى به ويرلماشدى جبريل عليه السلام انك صورتن بر خرقة حرير اوزره پيغمبريمز صلى الله عليه وسلمه كتوروب بوسنك زوجه كدر ديدى وپيغمبريمز صلى الله عليه وسلم انجق انى بكر تزوج ايتدى * وپيغمبريمز صلى الله عليه وسلم باشى انك ديزينه قومشكن قبض اولندى وانك بيتنه دفن اولندى * وپيغمبريمز صلى الله عليه وسلم انكله بيله ايكن اكا وحى نازل اولوردى وانك براءته بودكلو آيات نازل اولدى واول رسول الله صلى الله عليه وسلمك خليفه وصديقنك قزى ايدى واول طيبه خلق اولندى ومغفرت وزرق كريمه وعد اولندى (يا ايها الذين آمنوا

لا تدخلوا بيوتاً غير بيوتكم حتى تستأنسوا وتسلموا على أهلها (یا مؤمنان) ساکن اولدیغکز بیوتک غیری بیوته داخل اولمکز حتی کشی ایجار ویا اعاره ایتدیکی بیت ایسه ده اکا کیرمسون مکرکه اول بیت اهلندن استئناس وانلره سلام ویردیکندنصکره اوله (ذلکم خیر لکم) اشبو استئناس وتسلمیم سزه خیرلودر شوندنکه اکا بغته ویا تحیه جاهلیه ایله کیره سز (لعلکم تذکرون) تاکه اتعاط ایدوب سزه اصلح اولان شیئله عمل ایده سز استئناسله مراد استئذاندر ویا خود طلب انسدرکه انکله اول بیتده انسان اولدیغن بیلله واکا دخوله اذن ویرله * دینلدیکه اول تسبیحه ویا تکبیره ایله تسکیمدر ویا تخنجرکه اهل بیت انی بیلوب دخوله اذن ویرله اشبو آتده حکم اولدرکه غیرک بیتنه سلام واستئذان ایتدین کیرمه * مفسرون استئذانی تقدیمده اختلاف ایتدیلر بر قوم دیدیلرکه استئذان تقدیم اولنور و دینورکه کیره یممی سلام علیکم لکن اکثرشون دیدیلرکه سلام تقدیم اولنور و آتده تقدیم وتأخیر وارددر تقدیری (حتی تسلموا علی اهلها وتستأنسوا) در تکیم ابن مسعود رضی الله عنک محففده بویله یازیلودر * کسده بن حنبلدن مرویدر که ایدر پیغمبریمز صلی الله علیه وسلمه سلام واستئذان سز دخول ایتدیکمه بکا دیدیکه وار کیر و کیت سلام علیکم دیوب دخول ایده یممی دیو استئذان ایت بعضیلر دیدیکه اگر بصری بر انسانه واقع اولورسه سلامی تقدیم ایتسون والا استئذان ایدوب اندن سلام ویرسون * ابو موسی ایدر کشی ذوات محارمدن استئذان ایتسون اگر دار واحده ايسه لر تخنخ وادکنی تحریک ایدملر (قال النبی علیه السلام اذا استأذن احدکم ثلاثاً فلم یؤذن له فلیرجع) پیغمبریمز صلی الله علیه وسلم ایدر چقان بریکز اوج کیره استئذان ایدوب اکا اذن ویرلیه رجوع ایتسون * حسن ایدرانک اولکیسی اعلام سلام ایکنجیسی مؤامره اوچنجیسی رجوعه استئذاندر * روایت اولندیکه بر رجل پیغمبریمز علیه السلامه دیدیکه انامک بنیدن غیری خدمتکاری یوقدر اکا کیردیکمه استئذان ایده یممی دیدیکه هر کیردیکمده استئذان ایت استریسنکه انی عربان کوره سن (فان لم تجدوا فیها احداً فلا تدخلوها حتی یؤذن لکم) اگر بیوته سزه اذن ویرر کسه بولرسه کز تاسزه اذن ویرر کسه کلنجه اکا کیرمکز * زیرا که دخوله مانع

(انجق)

انجق عوراته اطلاع دکدر بلکه غیرک ملکنده اذنی یوغیکن تصرف حرامدر مکرکه اکا حرق ویا غرق عارض اوله ویا انده منکر مثلی شی بولنه (وان قیل لکم ارجعوا فارجعوا) واکر دخوله استئذانکز عندنده سزه رجوع ایدک دینورسه رجوع ایدیکز یوخسه بایده طوروب الحاح ایتکز (هوازی لکم) رجوعکز سزه اطهردر اندنکه الحاح ویا بایده وقوفدنکه اول کراهه وترك مروتن خالی اولز (والله بما تعملون علیم) الله تعالی سزک اعمالکزی بیلور انک اوزره سزه جزا قیلور * قتاده ایدر چقان اکا دخوله اذن ویرلیه قیوده اوتوروب قالمیه زیراکه ناسک نیچه حاجتی اولور واکر قیویه کلوب استئذان ایتکسزین صاحب بیتک خروجنه انتظار له قیوده اوتورسه جائز اولور * ابن عباس رضی الله عنهما بعض انصارینک قیوسنه حدیث تعلمنه کلوب اوتورردیکه چیه یوخسه استئذان ایتزدی چیقدیغنده نیچون بکا خبر ویرمدک که چیقایدیم دیسه علم طلبنده بزبونکله امر اولتمشز دیردی وقیوده طوردیغی تقدیرجه ارالقندن ایجرویه باقیه (قال النبی علیه السلام لو ان امرأ اطلع عليك بغیر اذن فحذفت حصاة ففقت عينه ما کان عليك جناح) پیغمبریمز صلی الله علیه وسلم ایدر اگر برکسه اذن سز بیتک داخلنه نظر ایتدکه بر حصات آلوب کوزین چیقارسک سکا انده جناح اولز وقتاکه آیت استئذان نازل اولدی دیدیلرکه شول بیوته نیچه ایدرز که یولارده اولور ایچنده ساکن کسسه اولز رباط وخانات وحوانیت کبی اوله اولسه نازل اولدی (لیس علیکم جناح ان تدخلوا بیوتاً غیر مسکونة فیها متاع لکم) سزه جناح یوقدرکه استئذان سز دخول ایده سز شول بیوته کیم انده کسه ساکن اولیه که سزیکون انده منفعت اولور حر وبردن استکنان وایواء امتعه ومعامله ایچون جلوس کبی دینلدیکه اول بیوتله مراد بیوت خربه ومتاعله مراد انده بول وغازطدن قضاء حاجتدر ویا خود هر بیوتدرکه آتده ساکن اولیه (والله یعلم ما تبدون وما تکنتمون) الله تعالی سزک ابداء وکرک کتم ایتدیککزی بیلور (قل للمؤمنین یغضوا من ابصارهم) یا محمد مؤمنلره دیکل که کوزلرین منع ایتسونلر هر شیئه نظر دنکه اکا نظر حلال اولیه (ویحفظوا فروجهم) وفرجلرین حفظ ایتسونلر تاکه اکا غیرک بصری

واقع اوليه الا اني ازواج لرندن وجواري مملوكه لرندن دكل * ديدليكه
 جميع قرآنده مذکور حفظ فرجه مراد زنادن حفظدر الا بو محمله کی
 حفظله مراد استتاردر (ذلك ازکی لهم) اشبو غص بصر وحفظ
 فرج انلره انفعدر ویا اطهردر که انده ربه دن بعد واردر (ان الله
 خبير بما يصنعون) الله تعالی انلرک افعاله خبردر پیغمبریمز علیه السلام
 دیدیکه (لا تتبع النظرة النظرة فان لك الاولى وليست لك الاخرة) نظری
 حرامه نظره که نظره بی اتباع ایتمکل * زیرا که شول قصدنسر واقع
 اولان نظره اولی سکا عفودر اندنصرکه قصده واقع اولان نظره دكل
 (وقال النبي عليه السلام لا ينظر الرجل الى عورة الرجل ولا المرأة
 الى عورة المرأة) پیغمبریمز صلی الله علیه وسلم ایدر بر رجل رجل آخرک
 عورته نظر ایتمسون وکذلک مرأه مرأه اخرانک عورته نظر ایتمسون
 (وقل للمؤمنات يغضضن من ابصارهن) ومؤمنلره دیکل که کوزلرین
 منع ایتمسونلر هر شیئه نظردنکه اکا حلال اولیه (و يحفظن فروجهن)
 وفرجلرین حفظ ایتمسونلر تاکه اکا غیرک بصری واقع اولیه * روایت
 اولندیکه ام سلمه ومیمونه رضی الله عنهما ایکسی پیغمبریمز صلی الله علیه
 وسلم قنده ایدیلر ابن ام مکتوم طشره دن کلدی * پیغمبریمز
 علیه السلام اول ایکسنه احتجاب ایدک دیدی دیدیلر که اول اعمی
 دکلیدر دیدیکه سزدخی اعمار میسر آنی کورزمیسر (ولایبدین زینتهن)
 نامحمرله زینت خفیه لرینی اظهار ایتمسونلر زینت ایکی نوعدر خفیه
 وظاهره در اما انک خفیه سی خلخال وخضاب وسوار وقرط وقلاده
 مثلیدر واول زینت ایله مراد مواضع زینتدر * ایدمی نسایه جائز اولمز که
 مواضع زینتن اجانبه اظهار ایده ویا اجانب اکا نظر ایده (الا ماظهر منها)
 مکرکه زینتدن ظاهر اولانی اظهار ایدلر اشبو زینت ظاهرده علما
 اختلاف ایدیلر * دینلیدیکه اول وجه وایکی کفدر ویا ثیابدر
 ویا کل وخاتم وخضاب کفدر * ایدمی مرأه نك زینت ظاهره سنه رجل
 اجنبینک نظری جائز اولور اگر قنه وشهوت خوفی ایتمزسه واکر خوف
 ایدر سه اندن غص بصر ایده مرأه نك بدندن اشبو مذکور انک اظهاری
 رخصت ویرلدی * زیرا که عورت دکلدن صلاتده کشفی جائز اولور اندن
 ماعداسی عورته ستر ایدیلور (ولیضربن بخمرهن علی حیوینهن

(قناعلرینی)

قناعلرینی جیلری وصدورلری اوزره القا ایتمسونلر که انکله شعور
 وصدور واعناقلری ستر اولنه (ولایبدین زینتهن) زینت
 خفیه لرینی اظهار ایتمسونلر که اول وجه وکفلرک ماعداسیدر که
 انی نه صلاتده ونه اجانبه کشفی مباح اولور (الایبعواتهن) مکرکه انی
 ازواجلری ایچون اظهار ایدلر که اول ازواج زینتله مقصودلر در کیم
 زوجه لرینک جميع بدننه حتی مع الکراهه فرجلرینه دخی نظر ایتملری
 جائز اولور (او آبآهن او آباء بعولتهن او ابنائهن بعولتهن
 او اخوانهن او بنی اخوانهن او بنی اخواتهن) ویاخود اظهار زینتلری
 کندی بابالرینه ویا ازواجلرینک بابالرینه ویا کندی اوغلارینه
 ویا ازواجلرینک مرأه اخرا دن اولان اوغلارینه ویا کندی قرنداشلرینه
 اول کرکسه لأبوين ویالأب ویالأم اولسون ویا کندی ارقرنداشنک
 اوغلارینه ویا کندی قرنداشلرینک اوغلارینه اولسه جائز اولور *
 اشبور جالاک اول نساء اوزره مداخله سی کثیر وانلر قبلندن قنه توقعی
 قلیل اولدیغیچون * زیرا که طباعده مماسه قرأبدن نفرت واردر * ایدمی
 اشبور جالاک نساء مذکوراته نظرلری جائز اولور بدنلرندن اکا که مهنت
 وخدمت عندنده ظاهر اولور اعمام واخوال ذکر اولنمدی زیرا که انلر
 اخوان معناسنده در ویاخود احتیاطا انلردن استتار ایده شول حذر ایله کیم
 انلر اول نسائی اوغلارینه وصف ایدلر (اونسائهن) ویا نساء مؤمناته
 اوله یعنی مرأه نك مرأه اخرى بدندن سره ایله رکه بدندن ماعدایه
 نظر جائز اولور اگر مرأه مسلمه ایسه واکر کافره ایسه مسلمه نك اکا
 انکشافی جوازنده علما اختلاف ایدیلر بعضیلر دیدیکه مرأه مسلمیه
 انکشافی کبی اکا دخی انکشافی جائز اولور زیرا کافره دخی جله نسادندر
 وبعضیلری دیدیکه انکشافی جائز اولمز زیرا که الله تعالی (اونسائهن)
 دیدی کافره ایسه بزم نسامزدن دکلدن زیرا که اول دینده اجنبیه در اوله
 اولسه رجل اجنبیدن اید اولور * پس بواجلدن عمر بن الخطاب رضی الله
 عنه ابو عبیده بن الجراحه نامه کوندنر مشدیکه اهل کتابک نساثن مسلماته
 یله برحامه کیرمکدن منع ایده (اوما ملکیت ایمانهن) ویاخود مکر
 اظهار زینه لری عبید واما لرینه اوله * برقوم دیدیلر که مرأیه عبیدی
 محرمدر عقیف ایسه مولاتنک سره ورکه سی بدندن غیری جميع بدننه

نظری جائز اولور * روایت اولندیکه پیغمبریمز صلی الله علیه وسلم
فاطمه الزهرا رضی الله عنہا به بر عبدله کلدیکه مقدما انی اکا هبه ایتشدی
حضرت فاطمه نك اکنده بر ثوب وار ایدیکه انکله باشین اورتسه ایاغی
آچیلوردی ایاغن اورتسه باشی آچیلوردی پیغمبریمز علیه السلام انک
تسترامرنده اول اضطران کور یحک دیدیکه یافاطمه سکا کلان باباکله
عبد کدر ستری ترک ایتکده سکا باس یوقدر و بر قوم ایسه دیدیلرکه مرآه به
عبدی اجنبی کبدر و آتده کی ملک عینله مراد اماء در یوخسه عبید دکدر
ابن جریج ایدر مرآه مسلمه به حلال اولمز که مرآه مشرکه قتنده تجرد
ایده مکرکه اول مشرکه انک امه سی اوله (او الثابعتین غیر اولی الاربه
من الرجال) و یاخود اظهار زینه لری شول خدمتلیچون کندیلر تبعت
ایدن رجاله اوله که انلر رجالدن اولی الاربه نك غیریدر که انلر بر قومه تابع
اولورلر که انلرک فضل طعامنه نائل اوله لر همتلری انک غیری دکدر
ونسایه حاجتلی یوقدر * دینلدیکه غیر اولی الاربه ایله مراد احق
عنیدر و یا اولکله اتیان نسایه استطاعتی اولمز وانی اشتها ایتز
و یامعتوه و یا محبوب و یا مخنث و یا شیخ هر مدر * عائشه رضی الله عنہا ایدر
بر رجل وار ایدی مخنث ایدی پیغمبریمز علیه السلام ازواجی اوزره
دخول ایدردی انی غیر اولی الاربه دن عدا ایدرلردی بر کون اول پیغمبریمز
علیه السلام بعض نسائی قتنده ایکن پیغمبریمز علیه السلام اوزرینه
چیقده کلدی اول ایسه بر مرآه بی وصف ایدوب دیردیکه اول انی اقبال
ایتسه درت ایله اقبال ایدر ادبار ایتسه سکر ایله ادبار ایدر * پیغمبریمز
صلی الله علیه وسلم دیدیکه روا کورمزینکه بورجل بواراده اولانی بیله
شمذکیر و اوزریکزه کیرمسون اوله اولسه اندن احتجاب ایتدیلر
(او الطفل الذین لم یظهروا علی عورات النساء) و یاخود زینتلی
شول اطفاله اوله که انلر عورات نسایه اطلاع ایتدیلر و عورتی بیلیدلر
و یا حد شهوته ایرمیدلر (ولا یضربن بارجلهن لیعلم ما یخفین من زینتهن)
و یا قترین بری برلینه اورمسونلر که زینتلرندن اخفا ایتدکلی بیلنه
* انلردن بری یوریدیکنده ایاغن بری برینه اورردی تاکه خلخالنک
صوتی ایشیدیلر و یا خلخالی اولدیغی بیلنه اشبو نکلر اول فعلدن نهی
اولندیلر (وتوبوا الی الله جمیعا ایہ المؤمنون لعلکم تفلحون) ای مؤمنلر

(جمیعکمز)

جمیعکمز الله تعالی به رجوع ایدک هر تقصیر دنیکه انک امر ونهینده سزدن
صدور ایدر * زیرا که سزدن هیچ بریکز تقریطدن خالی اولمز
خصوصا که شهواتدن کفده اوله و یاخود جاهلیتده ایتدیکمز افعالدن
توبه ایدک اگرچه اول اسلامه خط اولور لکن اگر اکاندامت قرین
اولورسه و هر ذکر اولندیغنده توبه به عنیت اولورسه تاکه دنیا و آخرت
سعادتنه نائل اوله سز * معلوم اوله که رجل رجلک عورتنه نظری جائز
اولمز که اول سره ایله ر کبه مابیندر مرآه مرآه ایله دخی انجیلندر
اما سائر بدنه نظر لا بأسدر چنان قتنه خوف اولمزسه اما مرآه نك
رجلله حکمی اگر حره اجنبیه ایسه جمیع بدنی اجنبی حقنده عورتدر
اندن بر شیتنه نظر جائز اولمز الاوجه و ایکی کفنه * واکرامه ایسه رجالدن
عورت اولان اندندخی عورتدر محارمک بری برلینه نظرلری حکمه
انجیلندر و مرآه رجل اجنبی به نظرده حکمی رجلک مرآه اجنبیه به نظرک
حکمی کبدر و رجل ایچون جائز اولور که مرآه سنک و کندویه و طئی حلال
اولان امه سنک جمیع بدنه نظر ایده الا فرجنه دکل اکا نظر مکروه اولور
چنان رجل امه سنی تزویج ایتسه انک عورتنه نظر حرام اولور (و أنکحوا
الایامی منکم) رجال و نسا کزدن زوجی اولیا نلریکزی تزویج ایدک انلر کرک
بکر و یا ثیب اولسون (و الصالحین من عبادکم و امائکم) و عبید
و جواریکزدن حقوق نکاحی اقامته صلاحی اولانلریدخی تزویج ایدک *
اشبو امر ندیدر و استحبابدر ایدی تزویج مستحب اولور شول کسه به کیم
نفسی نکاحه توقان ایده و تزویجه قدرتی اوله و اولکله تزویجه قدرتی
اولیه شهوتنی صومله کسر ایتسون (قال النبی علیه السلام یا معشر الشبان
من استطاع منکم الباءة فلیتزویج فانه اغض للبصر و احصن للفرج
ومن لم یستطع فلیصم فان الصوم له وجاء) پیغمبریمز صلی الله علیه وسلم
شبانه خطاب ایدوب دیدیکه سزدن اولکله نکاحه استطاعتی اوله
تزویج ایتسونکله اول کوزی نامحرمه نظر ایتدیرمز و فرجی حرامدن
حراست ایدر اولکله نکاحه استطاعتی اولیه صائم اولسون * زیرا که
صومک کسر شهوته تأثیری واردر (قال النبی علیه السلام تناکحوا
تکثروا فانی اباهی بکم الامم حتی بالسقط) پیغمبریمز علیه السلام ایدر
تناکح ایدک که کثیر اوله سز * زیرا که یوم قیامتده بن سائر امتلر اوزره

سرك كثير تكزله مباحات ايدر بن حتى سقطله ده (قال النبي عليه السلام من احب فطرتي فليستن بسنتي ومن سنتي النكاح) پیغمبر میز صلی الله علیه وسلم ايدر برکسنه کیم بنم فطرتم سوه سنمله استنان ایتسون وسنتک بری نکاحدر اما اول کسه که نفسی نکاحه توقان ایتیه والحال اول اکا قادر در شافعی قنده انک عبادته اشتغالی نکاحدر افضلدر وائمه حنفیه قنده اکا نکاح افضلدر شافعی استدلال ايدر که انکه الله تعالی بر عبد اکر من (وسیدا وحصورا ونبیا من الصالحین) دیو ذکر ایلدی حضور اولدر که نسیاه ایتانه قادر ایکن انی ترک ایده اشبو آیتده دلالت واردر که نساء ایامانی تزویج اولیایه مفوض اوله * زیرا که الله تعالی نکاحی انلره امر ایتدی عبید و اماء تزویجن ساداته امر ایتدی کبی که اول صحابه و تابعیندن اکثر علما قولیدر شافعی واجدا کا ذاهلدر در * امام ابوحنیفه مرأه نك نفسی تزویجن تجویز ايدر * مالک ايدر اکر مرأه ذیه ایسه نفسی تزویجی جائز اولور شریفه ایسه جائز اولمز نکاحده ولینک رضاسی شرط ایدیکنه اخبار جهنندن دلیل اولدر که (قال النبي عليه السلام لانكاح الا بولی) پیغمبر میز صلی الله علیه وسلم ايدر نکاحک صحتی دکل الا ولینک رضاسیله در (وقال النبي عليه السلام ایما امرأه نکحت بغير اذن ولیها فنکاحها باطل ثلاثا) پیغمبر میز علیه السلام ايدر قنغی مرأه که ولیسی اذنسر نکاح اولنه انک نکاحی باطلدر باطلدر باطلدر (ان یكونوا فقراء یغنهم الله من فضله) اکر فقرا ایسه لر الله تعالی انلری فضلندن غنی ايدر * دینلدیکه اشبو غنا ایله مراد قناعتدر ویاخود زوجان رزق لیسک اجتماعیدر (قال النبي عليه السلام التمسوا الرزق بالنکاح) پیغمبر میز صلی الله علیه وسلم ايدر سز نکاحله الله تعالی بدن رزق التماس ایدک (والله واسع علیم) الله تعالی وسعت صاحبیدر نعمت لینه نهایت اولمز عبادینه رزقنی قبض وبسطنده حکمن بیلور (ولیستعفف الذین لا یجدون نکاحا حتی یغنیهم الله من فضله) شونلر که اسباب نکاحی بولزلر زناده عفنده ودفع شهوته اجتهد ایتسونلر حتی که الله تعالی انلره رزقنده وسعت ویره تزویج ایده جک شی بوللر (والذین یبتغون الکتاب مما ملکتم ایمانکم) ملک یمینکرده اولان عبید و اماءدن شونلر که سزدن مکاتبه طلب ایدرلر که اول رجل

(مملوکنه)

مملوکنه دیمسیدر که مالندن شول دکلو شیئهنه سنی مکاتب قیلدمکه انی شود کلو زمانده بکا ادا ایده سن ادا ایتدی که کده آزاد اوله سن عبدایسه انی قبول ایده * ایدمی چقان اول عبد تعهد ایتدیکی مالی ادا ایده آزاد اولور و اول عبد عقد کتابه دن صکره کسب ایتدیکی ماله احق اولور و چقان اداء ماله آزاد اوله یدنده فضله قلان مال انک اولور و حال کتابتنده حاصل اولان اولادی اکا تبعیتله آزاد اولور و چقان بدل کتابتی ادادن عاجز اوله مولا سنه جائز اولور که انک کتابتن فسخ ایدوب انی رقه رد ایلله و یدنده کی مالی مولا سنک اولور * ابن عمر رضی الله عنهما دیردیکه مکاتب عبیدر مادامکه کتابتندن عهدده سننده بر شی قاله (فکاتبوهم ان علمتم فیهم خیرا) ایدمی سز انلری مکاتب قیلک اکر انلرده امانت و اداء ماله قدرت بیلور سه کز * بعض علماء قنده اشبو امر ایجابیدر اولیله اولسه مولی اوزره واجب اولور که عبدینی مکاتب ایده چقانکه انده خیر بیلله اکر اول عبد کتابتی قیمتی و یا قیمتندن اکثر اوزره طلب ایدر سه و یا قیمتندن اقل اوزره طلب ایدر سه واجب اولمز * روایت اولندیکه سیرین مولا سی انس بن مالک رضی الله عنهدن دینلدیکه کندیوی مکاتب ایده انس ایسه اندن امتناع ایدوب سیرین اندن عمر بن الخطاب رضی الله عنده شکایت ایتدکده حضرت عمر انی دره ایله اوروب انی مکاتب ایتدیردی و اکثر علما قنده بوا مر ندبی واستحبایدر (وآتوهم من مال الله الذی آتاکم) و اول مکاتبلره و یرک شول مالندنکه الله تعالی انی سزه و یردی اشبو مؤمنلره امر ندیدر * دینلدیکه مؤمنلره واجب اولور که مکاتبلره اعانت ایدلر و یا موالی یه ایجابدر که مکاتبلر کتابه لر مالندن حظ ایدلر ایتزلر سه جبر اولندر که اول شافعی مذهبیدر علی رضی الله عنه ایدر که ربع کتابتن حظ ایدر * ابن عباس ايدر اکا کتابتندن بلا تعیین بر مقدار شی حظ اولور (ولا تکرهوا قیتانکم علی البغاء ان اردن تحصنبا) وجواریکزی زنایه اکراه ایتکز زیرا که انلر زنادن تعفف طلب ایدرلر * روایت اولندیکه عبد الله بن ابی نام منافقک معاذه وسیکه نام ایکی جاریه سی اولوب انلری زنایه اکراه ایدردی شول ضریبه ایچونلر که انلردن آلوردی اسلام کلچک معاذه وسیکه دیدیلر که اشبو فعلکه بزانی ایشلر ایکی وجهک برندن خالی اولمز اکر خیر ایسه خیر میزی اکشار ایتدک

واكر شر ايسه وقتى ايرديكه انى ترك ايدى وز اول سببدن بوآيت نازل اولدى * روايت اولنديكه اول ايكي جاريه نك برى بركون بررد ايله وبرى بر دينار ايله كلوب ديديلر كه اسلام كلوب زنا حرام اولدى شمدنكرو والله بزنا ايتمز مولا سى ايسه انك اوزره اكراه مراد ايدىچك ايكيسى پيغمبرى صلى الله عليه وسلمه كلوب شكاييت ايتدكارنده اشبو آيت نازل اولدى (لتبتغوا عرض الحياة الدنيا) ايمدى دنيا اموالن طلب ايدوب انلرى زنايه اكراه ايتكز (ومن يكرههن فان الله من بعدا كراههن غفور رحيم) اول كسه كه انلرى زنايه اكراه ايدرسه الله تعالى انلرى اكراه اولمغله ايتدكارى اول فاحشه لر بنى مغفرت و ظلم اولندقلر چون كنديلره رحمت ايدىچيدر (ولقد انزلنا اليكم آيات مبينات) بز سزله آيتلر انزال ايتدك كه اول حلال و حرامى تبين ايدر وحدود واحكامى تفصيل ايدر (ومثلا من الذين خلوا من قبلكم) وسزدن اول كچنلردن بعضيلر ك قصص وامثاللرين انزال ايتدككه انلر ك قصه سى كى عائشه رضى الله عنها قصه سين انزال ايتدككه اول يوسف ومريم قصه لرينه بكرز بر قصه عجبيدر (وموعظة للآتقين) ومتقيلره موعظه انزال ايتدك (الله نور السموات والارض) الله تعالى سموات وارض اهلنه هاديدر انك نوريله حقه اهتدا ايدرلر وهداسيله حيرت ضلالتدن نجاته ايرلر وياخود اول سمواتى ملائكه ايله وارضى انبياء ايله منوردر وياخود سموات وارضك امور بنى مدبردر وياخود سمواتى شمس وقر ونجومله وارضى انبياء وعلماء ومؤمنينه ويا نبات واشجار ايله مزيندر وياخود انوارك كليسى اندندر (مثل نوره) الله تعالى نورينك قلب مؤمنده مثلى كه اول شول نوردر كه انكله اهتدا ايدر وياخود مؤمنه ويرديكى نورك مثلى * دينلديكه يعنى قلب مؤمنده كى نورك مثلى ويا قرآنك ويا محمد عليه السلامك ويا طاعتك مثلى اشبو انوارى تفضيلا نفسنه مضاف قيلدى (كشكاة فيها مصباح) اول جدارده شول كوه مثليدر كه انده سراج ثابت اوله (المصباح فى زجاجة) اول سراج قنديلده اوله (الزجاجة كأنها كوكب درى) اول قنديل ايسه كانه ضوه تلالؤنده كوكب دريدر كه اول كواكب خمسة عظامك يعنى زحل ومريخ ومشتري وزهره وعطاردك بريدر (يوقد من شجرة مباركة زيتونة) اول مصباح

(وزجاجة)

وزجاجة بر شجرة زيتونة مباركة زيتندن يا قيللور يعنى اول شجرة كثيرة المنافعدر كه اول ادام وفا كههدر استخراجنده عصارته احتياج اولمز بلكه انى هر كشى استخراج ايدىيلور * حديثه كديكه اول باسوره نفع ايدر اول بر شجره در كه اعلا سندن اسفلنه دكين پيراقلنور (قال النبي عليه السلام كلوا الزيت وادهنوا به فانه من شجرة مباركة) پيغمبرى صلى الله عليه وسلم ايدر زيتى ييكز وانكله بدنكزى يا غلذكز كه اول شجرة مباركة دن استخراج اولنوبدر (لاشرقية ولا غربية) اول شرقيه دكلدر كه شمسك زوالند نصكره سنده اكا شمس اصابت ايتيه و غربيه دخى دكلدر كه نهارك اوائلنده اكا شمس اصابت ايتيه بلكه اول طول نهارده اكا شمس اصابت ايدر شول شجره كى كه قله اوزرنده اوله ويا بر صحراء واسعه ده اوله وياخود اول ارضك نه شرقيه معموره ونه غربيه معموره سنده ثابتدر بلكه وسطنده در كه اول شامدر انك زيتونى اجوددر (يكاد زيتها يضىء ولولم تمسسه نار) قريب اولور كه زيتى فرط صفا سندن ضياء ويره اكرچه اكا آتش ايرمديسه ده (نور على نور) نور مصباح نور زجاجة اوزره زياده اولوبدر * علماء اشبو تمثيلك معناسنده اختلاف ايتديلر كعب ايدر اشبو مثل محمد صلى الله عليه وسلم ايجوندر مشكاة انك صدريدر وزجاجة قلبيدر ومصباح انده كه نبوتدر كه شجرة نبوتدن ايقاد اولنوبدر قريب اولور كه محمدن امرى متبين اوله اكرچه نبى ايدىكنى سويلز ايسه ده * ابن عمر ايدر مشكاة جوف محمددر زجاجة انك قلبيدر ومصباح شول نوردر كه الله تعالى انى انده قيلوبدر اول نه يهودى ونه نصرانييدر اول اكا ابراهيمدن ايقاد اولنوبدر بلكه انك نورى قلب ابراهيم نورى اوزره زياده قيلنوبدر * محمد بن كعب القرظى ايدر مشكاة ابراهيمدر وزجاجة اسماعيلدر ومصباح محمددر كه اول شجرة مباركة ابراهيمدن ايقاد اولنوبدر ومبارك اولمى اكثر انبياء انك صلبندن كديكيدر نه شرقيه ونه غربيه اولمى ابراهيم عليه السلامك نه يهودى ونه نصرانى اولوب حنيف مسلم اولديغيدر * زيرا كه يهود نماز لرنده مغربه ونصارى مشرقه استقبال ايدرلر قريب اولور كه محمد عليه السلامك محاسنى وحى اولنزدن اول ناسه ظاهر اوليدى نور اوزره

نور ایدیکه نبی نسلندن نبی ایدی نور ابراهیم اوزره نور محمد ایدی * ابی
 ابن کعب ایدر اشبو مؤمن مثلیدر که مشکاة نفسیدر وزجاجة صدریدر
 ومصباح ایه قلبنده کی ایمان وقرآندر وشجرة مبارکه دن ايقاد اولغسی
 لله اخلاصیدر مثلی شول شجرة خضره ناعه مثلیدر که انی اشجار التفاف
 ایتدیکندن اکا شمس اصابت ایتیه نه طلوعنده ونه غروبنده کذلک مؤمن
 احتباس اولوبدر که اکافتندن برشیء اصابت ایتیه * زیرا اول درت
 خصال حسنه بیننده در اکا نعمت ویرسه شکر ایدر بلا ایرسه صبر ایدر
 حکمنده عدل قولنده صدق اوزره در قریب اولور که قلبی حق بیل اول
 اکا تبیین اولغزدن اول زیرا که اول حقه توفیق اولوبدر نور اوزره
 نوردر که اول بش نور ایچنده قلب ایدر قوی نور وعلی نور ومدخلی نور
 ومخرجی نوردر و یوم قیامتده مصیری نوره در * ابن عباس رضی الله
 عنهما ایدر اشبو قلب مؤمنده الله تعالی نور وهداستک مثلیدر تکیم رب
 تعالینک قدر تیل زیت صافی اکا نارمس ایتزدن اول قریب اولور که ضیاء
 ویره چقان اکا نارمس ایده ضوء اوزره ضوئی زیاده اولور کذلک مؤمنک
 قلبی قریب اولور که اکا علم کلزدن اول هدی ایل عمل ایده چچانکه اکا علم
 کله هدی اوزره هداسی ونور اوزره نوری زیاده اولور * کابی ایدر نور
 اوزره نورله مراد مؤمنک ایمان وعملیدر سدی ایدر که اول نور ایمان ونور
 قرآندر * حسن ایدر اشبو قرآنک مثلیدر مصباح قرآندر مصباحه
 استضاء اولندیغی کبی قرآنله اهتدا اولنور وزجاجة قلب مؤمندر ومشکاة
 انک فم ولسانیدر وشجرة مبارکه وحیدر قریب اولور که قرآنک
 جحی متضخ اوله اگرچه اوقونمزسه ده وقرآن الله تعالیدن خلقه نوردر
 وقرآنک نزولندن اول دلائل واعلامدن اقامت ایتدیکیل بیل اوله اولسه
 انکله نور اوزره نورلری زیاده اولدی (یهدی الله لنوره من یشاء) الله
 تعالی اشبو نوره دیلدیکی کسه بی هدایت ایدر (ویضرب الله الامثال
 للناس) الله تعالی ناسه امثالی تبیین ایدر تاکه فهم ایدوب تصدیق ایدر
 زیرا که مثل مرآت بکزر که انده حقیقت ظاهر اولور (والله بكل
 شیء علیم) الله تعالی هر شیئی بیلور معقول ومحسوس ظاهر وباطندن هیچ
 برشیء اکا خفی اولمز اشبوننده وعد ووعید وارد اول کسه یه کیم انی تدبر
 ایلیه واکا اکثر ایلیه (فی بیوت) اول مصباح بعض بیوته ايقاد

اول نور که انکله مراد مساجددر * ابن عباس رضی الله عنهما ایدر مساجد
 یر یوزنده الله تعالینک بیوتیدر اهل سمایه ضیاء ویرر نجوم اهل ارضه ضیاء
 ویرمسی کبی ابو یزید ایدر اول بیوتله مراد درت مساجددر که هر برینی
 بر پیغمبر بنا ایدوبدر بری کعبه در که ابراهیم واسماعیل علیهما السلام بناء
 ایتدی و بیت المقدسدر که داود وسلیمان علیهما السلام بناء ایتدی ومسجد
 مدینه در که پیغمبر یمز صلی الله علیه وسلم بناء ایتدی ومسجد قبادر که تقوی
 اوزره تأسیس اولغشدر انی دخی پیغمبر یمز صلی الله علیه وسلم بناء ایتدی
 (اذن الله ان ترفع) الله تعالی امر ایلدی که اول بیوت تعظیم اولنه
 وقادوراتدن تبرئه ایدیله (ویدکر فیها اسمہ) واول بیوته انک اسم
 شریفی ذکر اولنه اشبو عامدر هر شیئه که انک ذکرینی متضمن اوله اگرچه
 اول انک افعالنده مذاکره واحکامنده مباحثه ایه ده اشبوننده دلالت
 واردر که مساجدده ذکر الله وصلاة مستحب اوله (یسبح له فیها بالغدو
 والاصال) اول بیوته غداة وعشیده اول الله تعالی تنزیه ویا انکچون صلاة
 مفروضه ادا ایدیلور (رجال لاتلهیهم تجارة ولا بیع عن ذکر الله) اول
 بیوته الله تعالی بی شول رجال تنزیه ایدر که انلری ذکر اللهدن تجارت راجحه
 وبيع اشغال ایتمز رجال قولنده اشارت واردر که نسیایه افضل اولان صلاتی
 قهر بیوتلرنده ادا ایدر ونسیایه مساجدده جماعت واجب اولیه و (لاتلهیهم)
 آیتنده دلالت واردر که تجارت صلاته منافی اولیه * زیرا مفهوم آیت
 اولدر که انلر تعاطی ایدرلر ومع ذلك اول فعل انلری صلاتدن وحضور
 جماعتدن الهاء ایتمز (واقام الصلاة) وصلاة مفروضه بی اوقات
 مستحبه لرنده ادادندخی اشغال ایتمز * روایت اولندی که ابن عمر سوقده
 ایدی صلاة اقامت اولغیچق ناس طوروب دکانلرین برکتیدر وسرعتله
 مسجده کتیدر * ابن عمر اشبو آیتی اوقیوب بویله وصفلو قوم شاننده
 نازل اولوبدر دیدی (وايتاء الزکاة) وزکاتلرک وجوبی عندنده مستحقینه
 ادادندخی اشغال ایتمز ویا خود اعمال صالحه ایشلرلر (یخافون یوما تغلب
 فیه القلوب والابصار) ومع ذلك خوف ایدرلر شول کوندنکه انک
 اهوالنندن قلوب وابصاره تغلب واضطراب ایرر * دینلدی که یعنی قلوب
 دنیاده اوزرینه اولدیغی شرک وکفر حالندن تغلب ایدر وابصاردن

اغطيه كيدر وياخود قلوب خوف ورجاء بينده تقلب ايدر خوف ايدر که
هلاک ايره رجا ايدر که الله تعالى فضلندن اکا نجات ويره و ابصار دخی تقلب
ايدر که قنغی ناحیه دن اخذ اول نور ذات یمیندنی یوخسه ذات شمالدنی
وکتب اعمالری قبل ایماندنی ویا قبل شمالدنی ویریلور ویاخود قلب
جوفده تقلب ایدوب خنجره یر ارتقاع ایدوب نه نزول و نه خروج ایده
وبصر ایه هول وشدندن تقلب ایدوب شاخص اوله (لجزيهم الله
احسن ما عملوا) ذکر اولنان اعمال صالحه یی ایشلدیلر که الله تعالى انلره اعمال
حسنه لریک جزاسین ایلده (ويزيدهم من فضله) وانلره اعماللریله مستحق
اولدقلری ثوابی فضلندن زیاده ایلده (والله يرزق من يشاء بغير حساب)
الله تعالى دیلدیکی کسه یه حسابسز ویرر اشبو زیاده یی تقریردر و الله تعالینک
کال قدرته و نفاذ مشیتنه و وسعت احسانه تبیهدر (والذين كفروا
اعمالهم كسراب بقیعة) شونلر که کافر اولدیلر اعماللری ارض منبسطة
واسعه ده سراب مثیلدر که اول براریده شدت حرده نصف نهاده ماء
جاری کبی کورینور قربنه واردقده لاشی بولنور (يحسبه الظمان ماء)
صوسنر انی کوردیکنده صوظن ايدر (حتى اذا جاء لم يجد شيئا) چآنکه
اول سراب موضعنه که انی برشی بولر کذلک کافر ظن ايدر که عمل اکا
نفع ایده چآنکه ملک الموت کلوب عمله محتاج اوله عمل کنده برشی
نفع ايدر بولر (ووجد الله عنده) واول عملی عندنده الله تعالینک عقاب
ویازبانه سین بولور ویاخود انی کنده محاسب بولور (فوفاه حسابا) اندن
استعراض ویا مجازات وجهی اوزره انک حسابن توفیه ايدر (والله سريع
الحساب) الله تعالى حسابده سریعدر انی هیچ فردک حسابی آخرک حسابندن
اشغال ایتمز یوم قیامتده خلق حساب ايدر اولدقده جیعن دفعه
واحدده حساب ايدر حتی هربری ظن ايدر که انجق کنده حساب
اولنوبدر (او کلمات فی بحر لجی) ویاخود کافر اولنلرک اعمالی
بحر عمیقده لچ بحر و امواج و سحابدن حاصل اولمش ظلمات متراکبه کیدر
ویا انلرک اعمال حسنهلری سراب کیدر و اعمال قیجهلری ظلمات کیدر
ویا اول دنیه ده ظلمات کبی و آخرتده سراب کیدر (بغشاه موج من فوقه
موج من فوقه سحاب) که اول بحری موج قاپلیه اول موجک فوقندن

(موج)

موج آخر وانک فوقندن سحاب قاپلیه (ظلمات بعضها فوق بعض)
اشبو ظلماتکه ظلمت سحاب و ظلمت موج و ظلمت بحر بری برینک
فوقنده در * دینلدیکه ظلماتله مراد اعمال کفارددر و بحر لجی قلبیدر
و موج قلبی غشی ایدن جهل و شک و حیرتدر و سحاب قلبی اوزره ختم
و طبعدر * ابی بن کعب اشبو آتیده ايدر کافر بش ظلمنده تقلب ايدر
کلامی ظلمت و عملی ظلمت و مدخلی ظلمت و مخرجی ظلمتدر و یوم قیامتده
مصیری ظلمات ناره در (اذا اخرج يده لم يكدريها) چآن اول یدینی
چیقارسه شدت ظلمندن انی کورمکه قریب اولمز (ومن لم يجعل الله له نورا
قاله من نور) اول کسه که الله تعالى اکا دین و ایمان و یرمیه انک دینی اولمز
ویاخود اولکه الله تعالى انی هدایت ایتیه انک ایمانی اولمز و هیچ کسه
انی هدایتیه قادر اولمز * دینلدیکه اشبو آیت عتبه بن ربیع شانه
نازل اولوبدر که اول جاهلیتده دین التماس ایدوب مسوح کیردی اسلام
کلچک کافر اولدی اکثرن دیدیلر که اشبو جیع کفاره عامدر (ألم تر ان الله
يسج له من في السموات والارض) یا محمد بیلدیکیکه سموات وارضده کی
مخلوقات الله تعالى یی تسبیح ايدر (والطير صافات) و طیر دخی انی
تسبیح ايدر قنادلرین هوا یوزنده بسط ايدر اولدقلری حالده (کل قد علم
صلاته و تسبیحه) تسبیح ایدنلرک ویا طیران ایدنلرک هربری صلاة
و تسبیحی بیلور مجاهد ايدر صلاة بنو آدمک و تسبیح سائر خلقکدر
* دینلدیکه طیورک قناد اور ملری صلاتلری و تسبیجلری ویاخود معنی
الله تعالى هر مصلی و مسجک صلاة و تسبیحی بیلور (والله عليم
بما يفعلون) الله تعالى اول مخلوقاتک ایشلدکارینی بیلور (والله
ملك السموات والارض) سموات وارضک واول ایکسینک ایچنده کی
ذوات و صفات و افعالت جیعی الله تعالینک ملکیدر (والی الله المصير)
آخرتده مرجع اکادر (ألم تر ان الله يزجي سحابا) یا محمد بیلدیکیکه
الله تعالى بولنلری سوق ايدر (ثم یؤلف بینه) واول بولنلرک اجزاسنی
ضم ایدوب بری برینه ایرکورد (ثم یجعله ركاما) بعده انی بری برینک
فوقنده متراکم قیلور (فترى الودق یخرج من خلاله) کوررسنکه یغور
انک اراقلرندن چیقار (وینزل من السماء من جبال فیها من برد)
و سمدن کثرتده برددن جبال دکلو ایندیرر (فیصیب به من يشاء)

اول بر دی عبادندن دیلدیکی کسه یه ایر کوروب هلاک ایدر زروع و اموالی هلاک ایتسی کی (وبصرفه عن من يشاء) و دیلدیکی کسه دن انی صرف ایدوب ضرر ایر کور من (یکاد سنا برقه یذهب بالا بصر) قریب اولور که اول سحاب برقنک ضوئی شدت نور یله ابصری اختطاف ایده (یقلب الله الليل والنهار) الله تعالی لیل و نهاری تقلیب ایدر بری برینک عقبنده کتور مکه و یا برینی آرتوروب برینی اکستمکه و یا احوال برینی حر و برده تغییر ایتمکه و یا برنده ظلمت و برنده نور کتور مکه و یا اشبواشیانک جیعن انده ایراد ایتمکه (ان فی ذلك لعلرة لاولی الابصار) اشبو ذکر اولنان اشباهه عقول و بصر اهلنه الله تعالیکن و حدایت و کمال قدرت و احاطه علم و نفاذ مشیئت و حاجتدن تنزهنه دلالت واردر (والله خلق کل دابة من ماء) الله تعالی پر یوزنده یورر حیواناتک اکثرینی ماء مخصوصدن خلق ایتدی که اول نطفه در * دیندی که مراد هر حیواندر که دنیا ده مشاهده اولنور اوله اولسه ملائکه و جن انده داخل اولر * زیرا که بز انلری مشاهده ایترز دیندی که جیع خلقک اصلی مادندر زیرا که الله تعالی مائی خلق ایدوب انی درت شیء قبلدی ریح و نار و طین ریچدن ملائکه بی و نار دن جنی و طیندن آدمی خلق ایتدی (فمنهم من یمشی علی بطنه) اول حیوانلرک بعضی قارنی اوزره یورر حیات و حیطان و دیدان کی (ومنهم من یمشی علی رجلین) وانلرک بعضی ایسه ایکی ایاق اوزره یورر بنو آدم و طیور کی (ومنهم من یمشی علی اربع) وانلرک بعضی دخی درت ایاق اوزره یورر بهایم و سباع کی درت ایاقدن اکثر اوزره یوربین ذکر اولندی حشرات ارض کی * زیرا که صورتنده درت ایاق اوزره یورر کبدر و یاخود یوریدیکنده اعتمادی درت ایاقه در (یخلق الله ما يشاء) الله تعالی ذکر اولنان و ذکر اولنمیانندن دیلدیکن خلق ایدر صور و اعضاء و هیات و حرکات و طبائع و قوی و افعالده اختلاف اوزره مع هذا عناصر متحد ایکن (ان الله علی کل شیء قدیر) الله تعالی هر شئیته قادر در دیلدیکن ایشلر (لقد انزلنا آیات مبینات) بز آیات انزال ایتدیکه انواع دلائله حقائقی تبیین ایدر (والله یهدی من یشاء الی صراط مستقیم) الله تعالی دیلدیکی کسه بی آیاته نظر و معانیسی تدبیرینه توفیق یله دین اسلامه هدایت ایدر که اول

(درک)

درک حقّه و فوز جنته موصلدر (ویقولون آمنا بالله وبالرسل و اطعنا ثم یتولی فریق منهم من بعد ذلك و ما اولئک بالمؤمنین) منافقنر دیرلر که بز الله تعالی یه و رسولنه ایمان کتوروب امرلرینه اطاعت ایتدک بوقوللرند نصکره انلردن بر فریق الله تعالی یه و رسولنه اطاعتدن اعراض ایدر حالبوکه انلر مؤمنلر دکالدر * روایت اولندی که بشر منافقنه بر رجل یهودی بیننده بر ارضده خصومت اولوب یهودی دیدیکه محمد تحاکم ایده لم منافق ایسه کعب بن الاشرفه تحاکم ایده لکه محمد حیف ایدر دیدی اول سبیدن بوآیت نازل اولدی (واذا دعوا الی الله ورسوله لیحکم بینهم اذا فریق منهم معصون) چقان اول منافقنر الله تعالی یه و رسولنه دعوت اولنسه لکه رسول علیه السلام انلرک بیننده الله تعالیکن حکمیه حکم ایده کورر سنکه انلردن بر فریق اوزرلرینه حکم اولنقی خوفیه سکا کلکدن اعراض ایدرلر (وان یکن لهم الحق یأتوا الیه مذعنین) اگر انلرک غیر اوزره حقنری اولسه انک حکمنه منقاد اولدقنری حالده سرعته کلورلر * زیرا اکا و ثوقنری وار ایدیکه انلر اوزره حقه حکم ایدر اولدیغی کی انلر ایچون دخی حقه حکم ایدر (أفی قلوبهم مرض ام ارتابوا) یوخسه قلوبلرنده کفر و یا ظلمه میلی وار و یاخود سنده تهمتی کوردیلر که سنک صدقکده شک ایتدیلر (ام یخافون ان یحیف الله علیهم ورسوله) و یاخود خوف ایدرلر میکه الله تعالی ورسولی انلر اوزره حکومتده ظلم ایده (بل اولئک هم الظالمون) بلکه انلر حقندن اعراض ایله نفسلرینه ظلم ایدیجیلر در (انما کان قول المؤمنین اذا دعوا الی الله ورسوله لیحکم بینهم ان یقولوا سمعنا و اطعنا) مؤمنلره لایق قول بو اولدی که چقان بینلرنده حکم ایچون کتاب الله و سنت رسوله دعوت اولند قنلرنده دیه لکه قولکی ایشتدک و امر که اطاعت ایتدک (واولئک هم المقلمون) اشبو آدابی رعایت ایدنلر مرادلرینه ظفر بولنلر در اشبو آتده دلالت واردر که شرعه دعوت اولنانه حضور واجب اولور امتناع حرام اوله و اول دعوت اولند قده سمعنا و اطعنا دیمک مستحب اوله (ومن یطع الله ورسوله) اول کسه که الله تعالی یه و رسولنه فرائض و سننندن امر ایتدک لرینه اطاعت ایده (و یخشی الله ویتقه) و کنیدن

صدور ایدن ذنوب اوزره الله تعالی بدن قورقه و باقی عمرنده اندن صاقنه
 (فالولئك هم الفاترون) ایدنی انلر نعیم مقیمه فائزدر (وأقسموا بالله
 جهد ايمانهم لئن امرتهم لخرجن) منافقن محمد صلی الله علیه وسلم
 حکمندن امتناعلرین انکار ایدوب جهد ايمانله الله تعالی یه قسم ایتدیلر که
 اگر سن انلره امر ایتسیدک که دیار و اموالارندن چیقهلر مخالفت ایتوب
 اطاعت ایده لردی (قل لاتقسموا) انلره دیکل که کذب اوزره قسم
 ایتکز (طاعة معروفة) سزدن مطلوب اولان طاعة معروفه در
 یوخسه یمین و طاعت نفاقیه دکل و یاخود نیت خالصه ایله اولان
 طاعت معروفه افضل و امثلدر یمین لساندنکه اکا فعل موافقت ایتیه
 (ان الله خبير بما تعملون) الله تعالی سنک اعمالکزه خیبر در سرار کر
 اکا خفی اولمز (قل اطيعوا الله واطيعوا الرسول) دیکل که الله تعالی یه
 ورائضده و رسول الله سننده اطاعت ایدک (فان تولوا فانما عليه
 ما حل وعليكم ما حلت) اگر رسول الله اطاعتدن اعراض ایدرسه کر
 اکا ضرر ایتز سن بلکه ضرری کندیکره ایدرسنر اکا واجب اولان
 امر و تکلیف اولندیغی رسالتی تبلیغدر و سنره واجب اولان ایسه انک
 امرینه امثالدر (وان طيعوه تهتدوا) اگر انک امرینه امثال و اطاعت
 ایدرسنر حقه اهتداء بولورسنر (وما على الرسول الا البلاغ المبين)
 رسول اوزره واجب اولان دکل الاسره تکلیف اولندیغکر شیئی تبلیغ
 موضحدر اول ایسه انی ادا ایتدی و سنره واجب اولان امور قالدی اگر ادا
 ایدرسه کر ثواب بولورسنر اعراض ایدرسه کر عقاب کورر سنر
 (وعدا الله الذين آمنوا منكم وعملوا الصالحات ليستخلفنهم في الارض)
 سزدن ایمان کتوروب اعمال صالحه ایشلینلره الله تعالی وعد ایتدیکه
 انلری یریوزنده خلفایله کیم ملوکک ممالکارنده کی تصرف کی انلر دخی
 انده تصرف ایدلر * اشبو خطاب رسول الله صلی الله علیه وسلم
 و امتنه در و یاخود اکا وانکله بیله اولنلره در (کا استخلف الذين
 من قبلهم) انلردن اول بنو اسرائیلی جبارده دنصکره مصر و شامه
 استخلاف ایتدیکی کی (وليمكن لهم دينهم الذي ارتضى لهم) وانلر ایچون
 اختیار ایتدیکی دین اسلامی تمکین ایده شول وجهله کیم انلر ایچون
 بلادی توسیع وانلره تمکین ایده و دین اسلامی سائر ادیان اوزره اظهار ایده

(وليدلهم)

(وليدلهم من بعد خوفهم امنا) وانلری اعدادن خوفلر دنصکره
 اول حالتی امنه تبدیل ایده (يعبدونني لا يشركون بي شيئا)
 امین اولدقلری حالده بکا عبادت ایدلر بکا برشی اشراک ایتیلر
 (ومن كفر بعد ذلك فالولئك هم الفاسقون) اشبو وعد دنصکره
 برکسه که ارتداد ایده و یا بونعمته کفران اوله اول و صفلو کسهلر
 فاسقلردر * اشبو آیتک سبب نزولنده دینلدیکه پیغمبریمز صلی الله علیه
 وسلم وحید دنصکره اصحابیله مکده اون ییل مکث ایتدی اذای کفاره
 صبرله امر اولنوب صباح و اخشاملرین خوفله کچور لرلردی بعده مدینه یه
 هجرت ایدوب قتاله امر اولندقلرنده صباحده و اخشامده سلاحدن
 مفارق اولزلردی حتی انلرک بری دیردیکه بز ایشول کونه ایریشور میرکه
 اوزریمزدن سلاحز قویوب امن و راحتله یورویه وز او یله اولسه
 الله تعالی بو آیتله انلره ذکر اولسان اموری وعد ایتدیکن دنصکره انجاز
 ایتدی دین اسلامی اظهار ایدوب اولیاسنی اعداری اوزره منصور
 قیلدی و خوف دنصکره انلری امنه وارضده بسطه ایرکور دی اشبو آیتده
 خلفاء راشدینک امامنه دلالت واردر (قال النبي عليه السلام الخلافة
 من بعدی ثلاثون سنة ثم تكون ملکا) پیغمبریمز صلی الله علیه وسلم
 ایدر که بندنصکره خلافت اوتوز ییل اولوب بعده ملکه منقلب اولور
 اول قول شریف مصد اقتجه خلافتده ابوبکر الصدیق رضی الله عنه
 ایکی ییل * و عمر رضی الله عنه اون ییل * و عثمان رضی الله عنه
 اون ایکی ییل * و علی رضی الله عنه الی ییل قرار ایتشدی (واقموا الصلاة
 واتوا الزكاة واطيعوا الرسول لعلکم ترحون) اقامت صلاة و ایتاء زکاة
 و اطاعت رسول ایدک که رحمت اولنلره سنر (لاتحسبن الذين كفروا
 معجزين في الارض) یا محمد سن کفاری ظن ایتکل که برده الله تعالی بی
 انلر ادراک و اهلا کدن اعجاز ایدلر (وماواهم النار ولبئس المصير) انلرک
 قرار کاهی جهنمدر اول ایسه نه چرکین مکان اولور (ياايها الذين آمنوا
 ليستأذنکم الذين ملکت ايمانکم والذين لم يبلغوا الحلم منکم ثلاث مرات)
 یا مؤمنلر ملک یمینکر اولان عبید و اماثکر و احرار یکزدن حد بلوغه
 ایرمیان صبیانکر سزدن اوچ وقتده دخوله استئذان ایتسونلر (من قبل
 صلاة الفجر) صلاة فجر دن اوکدین که زیر اول مضاجعدن قیامکر

و ثياب نومی طرح کر و ثياب يقظه یی لبس کر و قنیدر (و حین تضعون ثيابکم من الظهيرة) و وقت ظهر ده که انده قبلوله ایچون ثيابکزی وضع ایدرسز (و من بعد صلاة العشاء) و صلاة عشاء دنصکره ده زیرا اول لباسدن تجرد ایدوب لحافله التحاف و قنیدر (ثلاث عورات لکم) اشبو و قنلر سزه اوچ عورتدر که انده تستر و تحفظ مختل اولور (لیس علیکم ولا علیهم جناح بعدهن طوافون علیکم بعضکم علی بعض) اشبو اوقات ثلاثه دنصکره سزه و **ک**رک عبید و اما نکره و صبیانکره جناح یوقدر که استئذانسر دخول ایدلرسز انلره استخدام ایچون واره سز و انلری قانکره کیر دیره سز (کذلک بین الله لکم الايات) الله تعالی سزه احکام آیتلرینی بونجیلین بیان ایدر (والله علیم حکیم) الله تعالی احوالکزی بیلور سزه تشریعنده حکمتن اجرا قیلور (و اذا بلغ الاطفال منکم الحلم فلیستأذنوا کما استأذن الذین من قبلهم) چقان احرار کزدن اطفالکز احتلامله بلوغه ایریشه جمیع اوقاتده استئذان ایسو نلر * تکم احرار دن انلردن اوکدین بالغ اولنلر استئذان ایدرلردی (کذلک بین الله لکم آیاته) الله تعالی امر ونهیدن سزه احکامنی بونک کبی بیان ایدر (والله علیم حکیم) الله تعالی عبادینه صالح اولانی بیلور هر شیئی حکمتله وجوده کتورر عبث فعلی یوقدر (والقواعد من النساء اللاتی لا یرجون نکاحا) نسادن شول عجز که حیض و عملدن قاعدلردر کبیره السن اولدقلر ایچون رجالی اراده ایتمزل * دینلدیکه انلر شول عجزدر **ک**ه رجال انلری کوردکلرنده انلردن استقدار ایدلر اما اولکه انده بقیه جال اوله اول محل شهوتدر اشبو آتیده داخل اولمز (فلیس علیهن جناح ان یضعن ثيابهن) انلره جناح یوقدر **ک**ه رجال عندنده بعض ثيابلرین وضع ایدلر جلباب کبی و ثياب فوقنده کی ردا کبی و خار فوقنده کی قناع کبی اما خارینی وضع جائز اولمز (غیر متبرجات بزینة) شول اخفاسی امر اولنان زینتی اظهار ایتمز اولدقلری حالد و تبرج اولدر **ک**ه مرأه محاسنندن اظهار ایده انیکه ستری لائق اولور (وان یتعففن خیرلهن) و انلرک تبرج و وضع ثيابدن استعفافلری انلر ایچون خیرلوردر * زیرا که تهمتدن ابعدر (والله سميع علیم) الله تعالی

(اول)

اول عجزتک وضع زینه لری حالنده رجاله سوبلدکلرین ایشیدر و مقصودلرین بیلور (لیس علی الاعمی حرج ولا علی الاعرج حرج ولا علی المریض حرج) اعمی واعرج و مریض اوزره حرج یوقدر که افعال آتیه الذکری ایشیلیدلر اشبو آتک سبب نزولنده علماء اختلاف ایستیلر * ابن عباس رضی الله عنهما ایدر و قناکه الله تعالی (لا تأکلوا اموالکم بینکم بالباطل) آیتن انزال ایتدی مسلمون مرضی و زمینی و عیمیان و عرجانله معا مواکلهدن تخرج ایدوب دینلدیکه طعام افضل اموالزدر و الحال الله تعالی بزى وجه باطلله مالمزی اکلدن نهی ایتدی اعمی طعام طیب موضعن کورمز واعرج جلوسه تمکن ایتموب طعام اوزره مزاجیه استطاعتی اولمز و مریض ايسه ضعیف اولدیغندن طعامدن استیفا ایدمز اول سبیدن بو آیت نازل اولوب دینلدیکه سزه حرج یوقدر **ک**ه اعمی واعرج و مریضله بیله طعام ییه سز * سعید بن جبیر رضی الله عنه ایدر عرجان و عیمیان و مرضی اصحاء ایله بیله مواکلهدن تنزه ایدرلردی * زیرا که ناس انلردن تقذر و مواکلهدن کراحت ایدرلر اعمی دیردیکه احتمالدر که کورمز لکله بن انلردن اکثر اکل ایدم واعرج دیردیکه بن مجلسده ایکی کشی یرین طوترم اول سبیدن بو آیت نازل اولدی * مجاهد ایدر اشبو نلره رخصت ویرلدیکه اشبو آتیده تسمیه اولنانلرک بیوتدن اکل ایدلر انلردن بری طعام استیو بر رجله واردی اول رجلاک کندیده طعام بولمديغنده انی اطعام ایچون اشبو آتیده تسمیه اولنانلرک برینک بیتنه ایلتوردی اول فقیر معذور ايسه بنی غیرک بیتنه ایلتدی دیو اول غیرک طعامنی اکلدن تخرج ایدیجک بو آیت نازل اولدی * سعید بن المسیب ایدر مسلمون غزایه کندکلرنده زمنا لرینی تخلیف ایدوب قیولری مقتضاحن انلره ویرلردی بیوتدزدن یدیکلریکز سزه حلال اولسون دیرلردی اولیه اولسه بو آتله انلره رخصت ویرلدی (ولا علی انفسکم ان تأکلوا من بیوتکم) و کندیکزه دخی حرج یوقدر که شول بیوتدن اکل ایده سز که انده ازواج و عیالکز اولور اشبو نده بیوت اولاد داخل اولور * زیرا کشی به ولدنک بیتی کندینک بیتی کبیدر پیغمبریمز صلی الله علیه وسلم دیدیکه (انت ومالك لا یتک) سن کندک ومالك بابا ککدر و دخی دیدیکه (ان اطیب ما اکل

الرجل من كسبه وان ولده من كسبه (كشيتك اطيب مأكولى كسبتدن حاصل اولاندر وكشيتك ولدى كسبتدنر) (اوپوت آبائكم اوپوت امهاتكم اوپوت اخوانكم اوپوت اخواتكم اوپوت اعمامكم اوپوت عماتكم اوپوت اخوالكم اوپوت خالاتكم) ويا ابا كز واجدادكز پوتندن ويا ام وجداتكز پوتندن ويا اخوانكز پوتندن ويا اخواتكز پوتندن ويا اعمامكز پوتندن ويا عماتكز پوتندن ويا اخوالكز پوتندن ويا خالاتكز پوتندن اكل ایده سز (او ما ملكتكم مفتاحه) ويا مفتاحرینه مالک اولدیغكز كسه نك پوتندن اكل ایده سز * ابن عباس رضی الله عنهما ایدركه انكله مراد كشيتك ضيعه و ماشیه سنده و كیل و قییدر * ایدى اول و كیل و قینه لابسدركه یدلرنده و تحت تصرفلرنده كى ضيعه نك ثمارندن اكل و ماشیه نك لبندن شرب ایده جل و ادخار ایتكسزین * ضحاک ایدر كشی عبید و مالیكى پوتندن اكلى لابس اولور * زیراكه سيد عبدك منزله مالک اولور (او صدیقكم) ويا صدیقكز پوتندن اكل ایده سز صدیق اولدركه سكا مودتده صادق اوله * ایدى انك مالندن اكلى حسن و قتاده عندنده جائز اولور اگرچه استئذان ایتز سده چانكه یدلرنده انبساط اوله اب ايله ابن بینه كى وایكى اخ بینه كى انبساط كى * روايت اولنديكه حارث بن عمرو رضی الله عنه پیغمبریمز صلی الله علیه وسلم ايله غزایه كیدوب مالک ابن زید رضی الله عنه بی اهلې اوزره تخلیف ایدى حارث رجوع ایدیجك انى مجهود بولدى حالندن سؤال ایتدكه اول دیديكه اذنكسز طعامكى اكلدن تخرج ایدم اول سیددن بوآیت نازل اولدیکه (ليس عليكم جناح ان تأكلوا جميعا او اشتاتا) سزه حرج یوقدركه طعام اكلنده كرك مجتعیين ويا متفرقین اولك * روايت اولنديكه كنانه دن بنوليث بن عمرو طعاملرینی يالكز يكدن تخرج ایدرلردى بلكه كندیله بیله اكل ایدر بر ضیفه منتظر اولوردى حتى انلك برى طعامى او كنده صباحدن رواحه دكین ینلز قالوردى * ابن عباس رضی الله عنهما ایدر چان برغنى بر فقیر قریب ويا صدیقن زیارت ایدوب اول فقیر انى طعامه چاغرسه اول غنى اكا دیردیکه والله بن غنى سن فقیر ایكن سنكله بیله طعام اكل ایتم اول سیددن بوآیت نازل اولدى * عكرمه ایدر انصارندن

(برقوم)

برقوم چان كندیله ضیف نزول ایتسه اول ضیفسز اكلدن تخرج ایدرلردى اول سیددن بوآیت نازل اولوب دیلدكاری كفیت اوزره اكله رخصت ویرلدیلر (فاذا دخلتم بیوتا فسلموا على انفسكم) چان اشبو پوتندن بر بیوته داخل اولسه كز انك اهلنه سلام ویرك كه انلردین وقرابتده سزدن در (تحية من عند الله مباركة طيبة) حق تعالیدن سزه تحیت اولدیغى حالده كه انكله زیاده خیر و ثواب رجا ایدرسز و مستعك نفسى تطیب ایدرسز قتاده ایدر چان بیتكه داخل اوله سن اهلكه سلام ویركه انلر سلام ویردكار يكت سلامه احقیدر وچان بر بیته داخل اولسك كه انده كسسه اولیه (السلام علينا وعلى عباد الله الصالحين) دیکل كه ملائكه رد سلام ایدر (قال النبي عليه السلام لانس رضی الله عنه متى لقيت احدا من امتي فسلم عليه يطل عمرك واذا دخلت بيتك فسلم عليهم يكثر خير بيتك وصل صلاة الضحى فانها صلاة الاوابين) پیغمبریمز صلی الله علیه وسلم انس رضی الله عنه دیديكه امتدن بر كسه به ملاقی اولدیغكده اك سلام ویركل كه عمرك طویل اوله و بیتكه دخول ایتدیکكده انده اولان اهل و عیالكه سلام ویركل كه بیتك خیری كثیر اوله و ضحی نمازنى قیلغل كه اول صلاة اوایندرد * ابن عباس رضی الله عنهما اشبو آیتك تفسیرنده ایدر پوتندن مراد مساجد در * ایدى مسجده كیردیکكده (السلام علينا وعلى عباد الله الصالحين) دیکل (كذلك يبين الله لكم الايات لعلكم تعقلون) الله تعالى اشبو بیان كى سزه امر و نهیده آیاتنى تبیین ایدر تا كه فهم ایدوب موجبیه عمل ایده سز (انما المؤمنون الذين آمنوا بالله ورسوله) ایمانده كامل انلردر كه الله تعالى به ورسولنه صمیم قلبه ایمان كتوره لر (واذا كانوا معه على امر جامع لم يذهبوا حتى يستأذنوه) چانكه انلر رسول الله ايله بر امر جامع اوزره اولسه لر جمعه و اعیاد و حروب و مشاوره كى تاندن استئذان ایتینجه قنندن كتمزل * مفسرون ایدر چان رسول الله علیه السلام جمعه كوئنده منبره صعود ایتسه و بر كسه بر حاجت ایچون مسجدهن چیقق دیلسه پیغمبریمز علیه السلامك قارشوسنه واروب طورردى اولدخی انى استئذان ایچون طوردیغى بیلوب دیلدیکنه اذن ویرردى * ایدى هر امر ككه مسلمون امامله بیله انك اوزره اجتماع ایدر

انلردن هيچ برينك اكا مخالفتي ويا اندن رجوعى جائز اولاز الا انك اذنيه
 چقان بريكز كه امامدن استئذان ايده امام ديلرسه اكا اذن ويرر ديلرسه
 اذن ويرمز (ان الذين يستأذنونك اولئك الذين يؤمنون بالله ورسوله)
 انلر كه سندن استئذان ايدرلر ايمدى انلر الله تعالى ورسولنه ايمانلرنده
 كامللردر (فاذا استأذنونك لبعض شأنهم فأذن لمن شئت منهم) چقان
 بعض مهاملر چچون سندن استئذان ايده لر انلردن سن ديلديكه اذن وير
 (واستغفر لهم الله) واندنصكره انلر اچچون الله تعالىدن مغفرت طلب
 ايت * زيرا كه استئذان اكرچه عذر اچچون ايسه ده ينه قصوردر * زيرا
 امر دنيابي امر دين اوزره تقديمدر (ان الله غفور رحيم) الله تعالى
 عبادنك فرطانتى مغفرت ايدر وانلره تيسير ايله رحمت ايدر (لاتجمعوا
 دعاء الرسول بينكم كدعاء بعضكم بعضا) رسول الله عليه السلامك دعاسندن
 حذر ايدك انى استخاط ايتكز * زيرا انك دعاسنى برى بريكزه اولان
 دعا كى ظن ايتكز زيرا انك دعاسى مستجابدر وياخود سز انى اسميله
 چاغرمكز برى برلر يكزى چاغرمكز كى يا محمد يا ابن عبد الله ديمكز بلكه
 توقير وتواضع وخفض صوتله يارسول الله يانبي الله ديو تعظيم وتفخيم
 ايلكز (قد يعلم الله الذين يتسللون منكم لواذا) الله تعالى بيلور سزدن
 انلريكه برى برلر يكزه كيرلنه رك چيقوب كيدر وياخود اذن ويريلنه
 تابع كى انلكه بيله چيقوب كيدر ديلديكه خندق حفرنده منافق
 پيغمبريمز عليه السلامدن اذنسز مخفين اولدقلىر حالده چيقوب
 كيدرلردى ويا انلره مسجدده مقام واستماع خطبه ثقييل اولوب بعض
 صحابه التياذ ايله خفيه مسجددن چيقارلردى (فليحذر الذين يخالفون
 عن امره ان تصيبهم فتنة او يصيبهم عذاب اليم) ايمدى انك امرى
 مقتضاسنى تركه امرينه مخالفت ايدنلر وانلرك كنديكى سمك خلافته
 كيدنلر حذر ايتسونلر كه انلره دنيا ده محنت ويا آخرته عذاب اليم اريشور *
 اشبو دليلدر كه امر وجوب اچچون اوله زيرا مقتضاي امرى ترك
 ايكي عذابك برينى مقتضى اولسى اكا دلالت ايدر واندن حذرله امر انك
 حسننه دلالت ايدر كه اول مقتضى كه قيامله مشروطدر اول ايسه
 وجوبى مستلزمدر (الا ان الله ما فى السموات والارض) آگاه اولك كه
 سموات وارضده اولان اشيا جيعى الله تعالىنك ملك وعبيددر

(قد يعلم)

(قد يعلم ما انتم عليه) مخالفت وموافقت ونفاق واخلاصدن نه حال
 اوزره اولديغكزى بيلور (ويوم يرجعون اليه) ومنافقرك جزاء اچچون
 اكا رجوعلىر كوننى دخى بيلور (فينبئهم بما عملوا) اويله اولسه
 سوء اعمالدن ايشلدكاريى انلره بيلدير (والله بكل شىء عليم) الله تعالى
 هر شئي بيلور اكا هيچ بر شىء خفى اولمز (قال النبي عليه السلام لا تنزلوا
 النساء الغرف ولا تعلموهن الكتابة وعلوهن الغزل وسورة النور) پيغمبريمز
 صلى الله عليه وسلم ايدر نساكزى غرفله چيقارمكز وانلره كتابت
 اوكرتمكز بلكه انلره ايلك اكرمكى اوكردك وسورة نورى اوكردك

سورة الفرقان وهى احدى وثمانون آية مكية

بسم الله الرحمن الرحيم

(تبارك الذى نزل الفرقان على عبده) كثير الخير اولدى وصفات
 و افعالنده هر شيئدن عالى اولدى اول الله تعالى كه حق وباطل بينى
 فرق ايدر قرآنى عبدى محمد صلى الله تعالى عليه وسلمه تنزيل ايتدى
 (ليكون للعالمين نذيرا) تاكه اول عبد وياقرآن جن وانسه منذر اوله
 (الذى له ملك السموات والارض) كه سموات وارضك خزائنى اكا
 مختصدر (ولم يتخذ ولدا) اول ولد اتخاذا ايتديكه ملكنه وارث اوله
 زيراكه اول حى لايموتدر (ولم يكن له شريك فى الملك) وملكنده اكا
 شريك اولديكه اكا نزاع ايده (وخلق كل شىء) ووجدانى لايق
 اولور هر شئي اول احداث ايتدى (فقدره تقديرا) بعده انى تسويه
 و تهيشه ايتدى اكا صالح اولور شىء اچچون انده خلل وتفاوت يوقدر
 وياخود هر شىء اچچون اجل ورزق تقدير ايلدى مقادير دخى خلق
 اولنديغى منوال اوزره جارى اولدى وياخود انى تهيشه ايتدى اندن
 اراده ايتديكى خصائص و افعال اچچون * تكيم انسانى ادراك وفهم
 ونظر وتدبير وصنائع متنوعه يي استنباط و اعمال مختلفه يي مزاوله اچچون
 تهيشه ايتدى (واتخذوا من دونه آلهة) مشركون اصنامى الله تعالىدن
 غيرى آلهه اتخاذا ايتديلر (لا يخلقون شيئا) كه انلر بر شئي خلقه
 قادر اولزلر (وهم يخلقون) بلكه كنديلر خلق اولنورلر كه عبدهلى
 انلرى طاشدن وسائر اشيا دن دوزرلر وتصوير ايدرلر (ولا يملكون
 لانفسهم ضرا ولا نفعا) وكنديلر اچچون دفع ضرره ويا جلب نفعه مالك

اولزلر (ولا يملكون موتا ولا حياة ولا نشورا) واماته واحياه وبعد الموت
بعثه دخي مالك اولزلر * زیرا که عاجز در او یله اولسه عبادت اولمغه
نیچه لایق اولورلر (وقال الذين كفروا ان هذا الا فلک افتراه)
کافرلر دیدیلر که اشبو قرآن دکل الا کذبدر که انی محمد اختلاق ایتدی
(واعانه علیه قوم آخرون) وانی اختلاقه اکا قوم آخرون اعانت
ایتدی یعنی یهود که اکا امم سابقه اخبارنی القایدرلر و یا خود جبر
ویسار و عداس که قصه سی سورة نخلده (انما یعلمه بشر) آیتنده یکدی
(فقد جاؤا ظلما وزورا) ایتدی انلر ظلم و زور ایلر کلدیلر شول حیثیتله که
کلام معجزی یهوددن متلفف افک مختلفدر دیدیلر و اندن برینه
انی نسبتله زور ایتدیلر (وقالوا اساطیر الاولین اکتبتھا) ودخی
مشرکون دیدیلر که اول قرآن متقدمینک سطر ایتدی یکدر انی کاتب
محمد یازدی و یا محمد انی یازدردی (فهی تملى علیه بکرة واصیلا)
اول اکا صباحده و اخشامده دائما اوقنور که اول انی حفظ ایده * زیرا
اول اکا قادر دکلدر که کتابدن از برلیه و یا انی کتب ایلله (قل انزلہ الذی
یعلم السر فی السموات والارض) دیکل که اول قرآنی انزال ایتدی
اول الله تعالی که سموات وارضده کی سرتی بیلور که اول سزی فصاحتیه
اعجاز ایتدی ودخی مغیبات مستقبله و اشیاء مکنونه دن اخباری
متضمن اولدیکه انی عالم الاسرار دن غیری احد بیلز او یله اولسه سز
انی نیچه اساطیر اولیندر دیه بیلور سز (انه کان غفورا رحیما) اول
الله تعالی غفور و رحیم اولدی اول اجلدن اول قولکز اوزره مستحق
اولدیغکز عقوبتی تعجیل اتمز (وقالوا مال هذا الرسول یأکل الطعام ویمشی
فی الاسواق) و دیدیلر که اشبو رسالت زعمن ایدن کشی به نولدیکه بزم کبی
طعام یرو معاش طلبیچون بزم کبی اشبو اسواقده یورر اگر دعواسی
صحیح اولسه حالی بزم حالمزه مخالف اولوردی و الحال بو حالتک
اول کافرلر دن صدوری نظرلری محسوسات اوزره قصورلر یچوند
بیلزلر که رسوللرک سائر ناسدن امتیازی امور جسمانیه ایلر دکلدر بلکه
احوال نفسانیه ایلر در تکیم (قل انما انا بشر مثکم) قول شریفی
اکا اشارت ایدر (لولا انزل الیه ملک فیکون معه نذیرا) نولیدی
اکا بر ملک انزال اولنسه که انکله بیلر نذیر اوله اول ملک تصدیقیله

(انک)

انک صدق بیلنه (اویلقی الیه کنز) و یا اکا بر کنز القا اولنسه که
انی حوائجنه انفاق ایدوب تحصیل معاشدن استغنا ایدی
(او تکنون له جنة يأکل منها) و یا انک بر بستاننی اولوب انک
حاصلندن یسیدی (وقال الظالمون ان تتبعون الا رجلا مسحورا)
اول کفر و شرکه نفسلرینه ظلم ایدنلر بری برلرینه دیدیلر که اگر
سز بو رجله اتباع ایدر سه کز رجل مسحوره اتباع ایدر سز (انظر کیف
ضربوا لك الامثال) یا محمد نظر ایتکه انلر سنک شانده نیچه اقوال شاذه یی
ایراد و احوال نادره یی اختراع ایدرلر (فضلوا) انلر خواص نبی
معرفتنه موصل طریقدن لزدیلر (فلا یستطیعون سبیلا) ایتدی انلر
ضلالندن چیقوب هدایتیه ایر کورر یوله کیرمکه مجال بولزلر (تبارک الذی
ان شا جعل لك خیرا من ذلك جنات تجری من تحتها الانهار و یجعل لك
قصورا) عالی اولدی اول الله جل شاننه که دیلسه دنیاده سنکیچون انلرک
دیدیکلرندن خیرلو بستانلر قیلوردیکه اشجاری التندن نهرلر جاری
اولیدی و سنکیچون بیوت مشیده قیلیدی لکن انی آخرته تأخیر ایلدیکه
زیرا اول خیر و ابقادر * پیغمبریمز علیه السلام ایدر ربم جل شاننه بکا
عرض ایتدیکه بطحاء مکه یی بنیچون التون ایده دیدمکه یارب
انی ایستزم بلکه ایستدیکم بودر که بر کون طوق و بر کون آج اولم آج
اولدیغمده سکا تضرع ایدم طوق اولدیغمده سکا جد و شکر ایدم
(بل کذبوا بالساعة) بلکه انلر قیامت اولسنی تکذیب ایتدیلر نظرلرین
حطام دنیایه قصر ایدوب کرامتی مال کثرتنده ظن ایتدیلر اول اجلدن
فقر که طعن ایدوب نبوتکی تکذیب ایتدیلر (واعتدنا لمن کذب بالساعة
سعیرا) قیامت تکذیب ایدنه بز نار شیده اعداد ایتدک (اذا رأتهم
من مکان بعید سمعوا لها تغيظا وزفیرا) چنانکه نار انلری اوراق یردن
کوره اندن غلیان غضب و صوت جار کبی صوت ایشیده لر یعنی غلیانی
صوت مغتاضه و زفیری صوت جوفه بکزه یه (و اذا القوا منها مکانا ضیقا
مقرنین دعوا هنالك ثبورا) چنان انلر اول ناردن مکان ضیقه القا اولنده لر
الاری بیونلرینه تیمورلشمش و یا خود شیاطینله بر زنجیره قوشلمش اولدقلری
حالده و یل و ثبورله اول حینده کندیله اغلشوب فریاد ایده لر
(لاتدعوا اليوم ثبورا واحدا وادعوا ثبورا کثیرا) انلره دینله که اشبو کونده

ثبور واحده اکتفا ایتکز بلکه ثبور کثیر ایستکز * زیرا که عذابکز بر نیچه نوع اوزره در هر نوع ایسه شدتدن ثبور اقتضا ایدر و یا خود هر دائم عذابری متجدد اولور هر کره ده ثبورل دخی متجدد اولور (قل اذک خیر ام جنة الخلد التي وعد المتقون) یا محمد کفارہ دیکل که اشبو ذکر اولنان نارك صفت و اهلیبی خیراودر یوخسه شول جنت خلدیمیکه متقیله وعد اولندی (کانت لهم جزاء ومصیرا) که اول انلره ثواب و مقر اولدی (لهم فيها ما يشاؤون خالدين) انلر اول جنتده دائمین اولدقیری حالده انلر ایچون هر دیلدکاری شیء اولور (کان علی ربک وعدا مسئولا) ربک جل شانہ نک فضلی مقتضای سنجہ مؤمنلر ایچون مطلوب وعد اولدیکه انکله مراد سورة آل عمران آخرنده مذکور مؤمنلرک (ربنا وآتانا ما وعدتنا علی رساک) اشبو دنیاده طلب ایتدکاریدر و یا خود سورة حم المؤمن اولنده مذکور ملائکه نک مؤمنلر ایچون (ربنا وادخلهم جنات عدن التي وعدتهم) دیو طلب ایتدکاریدر (و یوم یحشرهم وما یعبدون من دون الله فبقول ء انتم أضللتم عبادی هؤلاء ام هم ضلوا السبیل) یوم قیامتده بز اول مشرکاری والله تعالیدن غیری معبودلر بی جمع ایدره ز اول کرک انبیاء و ملائکه و یا اصنامدر و اول معبودلره دیرز که بنم اشبو عبادمی سز می آزدر دیکز یوخسه کندیلر می طریق حقدن آزدریلر نظر صحیحی اخلال و مرشد نصیحتدن اعراض ایچون (قالوا سبحانک) انلر کندیلره دینلاندن تعجب طریق اوزره الله تعالی بی تنزیه ایدلر کندیلر بر شیئه قادر اولیوب بلکه انک تسبیح و توحیدیه مؤمنلر ایدکارین اشعار ایدلر و دیه لر که (ما کان ینبغی لنا ان نخذ من دونک من اولیاء) بزه لایق اولدیکه سندن غیری هیچ فردی تولی ایدلر و عصمتی و یا عدم قدرتلیچون (ولکن متعتهم و آباهم حتی نسوا الذکر و کانوا قوما بورا) لکن یاربنا سن انلری و آباهلر بی انواع نعمله تمتیع ایتدیککدن شهواته استغراق ایدوب ذکر کردن و آلائی تذکردن و آیاتی تدبردن غافل اولدیلر و قضا کده قوم هالکین اولدیلر (فقد کذبوکم بما تقولون) اندن الله تعالی اول عبهیه دیه کیم ایشته معبودلر یکز سز می انلری آلهه دیدیککز ده تکذیب ایتدیلر (فا تستطیعون صرفا و لانصرنا) اول معبودلر یکز سزدن نه عذاب

دفعنه و نه سزیه عونه قادر اولورلر (ومن یظلم منکم نذقه عذابا کبیرا) سزدن اول کسه که محمد و یا قرآنی تکذیب ایدلر بزا کانا عذابن اذقه ایدرلر (و ما ارسلنا قبلك من المرسلین الا انهم لیا کلون الطعام و یمشون فی الاسواق) یا محمد سندن اول ارسال ایتدیکمز رسوللر طعام یلر و اسواقده یورلرلر (و جعلنا بعضکم لبعض فتنة) و بعضکزی بعضکزه فتنه قیلدق * ایدمی غنی فقیره و صحیح مریضه و شریف و ضعیفه بلیددر که اول دون حالودر که نیچون بندخی اول بدن فوق حالو کبی اولدم * ابن عباس رضی الله تعالی عنهما ایدر یعنی بعضکزی بعضکزه بلاء قیلدقکه انلردن ایشته ایتدیککزه صبر ایدوب هدایه اتباع ایدلر سز دینلدیکه اشبو قصه شریفک و ضعیله ابتلاسی شانده نازل اولوبدر که شریف اسلامه کک مراد ایتدیککنده و ضعیفی کندیدن اول اسلامه ککش کور یچک بن اندنصکره اسلامه کاورسم اسلامه انک بنم اوزریمه فضل سبقی اولور دیو اسلامه ککز کفری اوزره قالور * دینلدیکه اشبو قراء مؤمنینک مستهزئین قریشله ابتلاری شانده نازل اولوبدر که اول مستهزئین دیرلر دیکه نظر ایدک محمد اتباع ایدلره کیم بزم موالیم و ارادلز دندر اولیه اولسه الله تعالی اول مؤمنلره دیدیکه (أتصبرون) اشبو حالته صبر ایدر میسز (و کان ربک بصیرا) ربک جل شانہ بصیر اولدی صبر ایدنه و کرک جزع ایدنه هر برینه عملنه کوره جزا ایدر (قال النبی علیه الصلاة والسلام اذا نظر احدکم الی من فضل علیه فی المال و الجسم فلینظر الی من دونه فی المال و الجسم) پیغمبریمز صلی الله تعالی علیه وسلم ایدر یچان بریکز مال و جسمده کندی اوزره تفضیل اولنمش کسنهیه نظر ایتدکده مال و جسمده کندیدن دونه دخی نظر ایتسون که کندیده کی نعمته اهانت ایتیه (و قال الذین لایرجون لقاءنا لولا انزل علینا الملائکه اوزری ربنا) لقامز می خیرله اولسن تأمل ایتینلر بعثه کفرلر یچون و یا لقامز می شرله اولسندن خوف ایتینلر دیدیلر که تولیدی بزه ملائکه انزال اولنوب بزه محمدک صدقتی خبر و یریدیلر و یا بزه رسل اولدیلر و یا خود ربمزی کورسیدک که بزه محمدی تصدیقله و یا اکا اتباعله امر ایدیدی (لقد استکبروا فی انفسهم و عتوا عتوا کبیرا) اشبو مقاله ایله نفسلرنده تعظم ایتدیلر و ظلمده تجاوز ایدوب اقصای مراتبه ایردیلر شول

حيثما له كه مجزات قاهره بي كوررلر ايكن اعراض ايتديلر (يوم يرون الملائكة لا بشرى يومئذ للمجرمين) ذكر ايت شول كونيكه انده موت ويا عذاب ملائكه سن كوره لر اندن بشارت مؤمنلره مختص اولوب كافرله بشارت اولمز يعني يوم قيامتده ملائكه مؤمنلره جنتله تبشير ايدوب كافرله سزه بشارت يوقدر ديرلر (ويقولون حجرا محجورا) وملائكه ديه لر كه حرام محروم اولديكه لاله الا الله دينك غيري جنته كيره (وقدمنا الى ما عملوا من عمل فجعلناه هباء منثورا) و كفارك كفرلري حالنده ايشلدكاري قرأى ضيف وصله رحم واغاثه ملهوف كي مكارمه بزعد ايدوب ابطال ايدرز (اصحاب الجنة يومئذ خير مستقرا واحسن مقيلا) اصحاب جنت جنتده استقرارلري كونده مستقر جهنندن خير لوردر كه انده تجالس وتحدث ايدرلر واحسن مقيله درلر كه اول ازواجه استراحه وتمتع ايچون انده قرار ايديلور يعني يوم قيامتده اهل جنتك محشرده وقوفلري اول نهاردن قيلوله وقتنه دكين دكلو زمان اولور حتى كه هر برى جنتده مسكنلرينه ايريشوب قرار قيلورلر * روايت اولنديكه يوم قيامت مؤمنلره بر مرتبه قصير اولور كه ايكنديدن غروب شمسه دكين دكلو زمان اولور (ويوم تشق السماء بالغمام) واول كونده سماء منشق اولوب اندن غمام چيقار كه اول برغيم رقيق ايبضدر كه سموات سبعك فوقنده در انده ملائكه اولور كه الارنده صحايف اعمال عبادي طوتوب نزول ايدرلر كه (ونزل الملائكة تنزيلا) قوليله مراد اولدر (الملك يومئذ الحق للرحمن) اول كونده ملك حق تعالينك اولوب منازعي اولمز وياخود يوم قيامتده الله تعالبدن غيري قضا ايدر ملك اولمز (وكان يوما على الكافرين عسيرا) ويوم قيامت كافرله يوم عسير اولور اشبو خطاب دلالت ايدر كه اول مؤمنلره يوم عسير اوليله حديثده كلديكه يوم قيامت مؤمنلره بر صلاة مكتوبه اداسندن اخف اولور (ويوم بعض الظالم على يديه) ذكر ايت شول كونيكه ظالم فرط حسرتدن ايكي الارين ييه حتى كه ايكي مرفقلرينه ايره بعده بتوب بومنوال اوزره اول بتديكه اول اني ييه الى ماشاء الله بونوع اوزره عذابى تمتد اوله دينلديكه عقبه بن ابي معيط پيغمبر عز صلى الله عليه وسلم ايله چوق مجالسه ايدردي بركون اول پيغمبر عز عليه السلامي ضيافته چاغردى

(پيغمبر عز)

پيغمبر عز عليه السلام اكا واروب ايكي شهادت كلمه سن سويلميجه طعام كدن يزم ديدى عقبه دخي اني سويلوب پيغمبر عز عليه السلام انك طعامندن ييدى مكر ابى بن خلف عقبه نك صديق ايدى عقبه يه ديديكه نيچون بويله بيلزلك ايتدك عقبه ديديكه اول بيلمه كلوب طعام اكلندن اباه ايتدى بندخي استحييا ايتديكمدن اكا موافقتله شهادتين كلمه سين سويلدم ابى ايتدى سندن راضى اولزم مكر كه واروب قفاسن چكنيه و يوزينه تو كوره سن عقبه دخي نعم ديوب پيغمبر عز عليه السلامي دار الندوه ده ساجد بولدى ديديكن ايتدى پيغمبر عز صلى الله عليه وسلم اكا ديديكه مكهدن طشره ده سنى بوليم الاسيفله باشكى كسم اوليه اولسه يوم بدرده عقبه اسير ايديلوب پيغمبر عز عليه السلام عني رضى الله عنه امر ايدوب حتى كه اني اول قتل ايتدى واحد غزاسنده پيغمبر عز عليه السلام ابى تي كندى اليه قتل ايتدى ضحالك ايدر عقبه پيغمبر عز عليه السلامك يوزينه تو كوريجك تو كر كي يينه عقبه نك يوزينه دونوب اندن ايكي يناعي ياندى اول يانغك اثرى اندن كتمبوب تاموته دكين قالدى * ايمدى اشبو آتله مراد عقبه در كه يوم قيامتده اكا ايريشه جك حسرت وندامتي حكايت بيورديلر (يقول ياليتنى اتخذت مع الرسول سبيلا) ديه كه نوليدى دنيا ده محمد اتباع ايدوب انكاهيله هدايه سبيل اتخا ايديدم (ياويلتاليتنى لم اتخذ فلانا خليلا) ويل بكا كه نوليدى فلانى يعني ابى ابن خلفي صديق اتخا ايتيديم (لقد اضلنى عن الذكر بعد اذ جاءنى) اول بنى ذكر الله ويا قرآن ويا موعظة رسول ويا كلمة شهادتن اضلال ايلدى اول بكا كلوب اكا تمكندنض كره (وكان الشيطان للانسان خذولا) خليل مضل ويا ابليس انسانله موالات ايدوب حتى اني هلاكه ايردريجك اني ترك ايدوب نفع ايتدى اشبو آياتك حكيمى عامدر هر ايكي محبت ايديشنلره كيم معصية الله اوزره اجتماع ايدر (قال النبي عليه السلام مثل المجلس الصالح والسوء كحامل المسك ونافع الكبير فحامل المسك اما ان يذلك واما ان تبتاع منه واما ان تجد منه ريحا طيبة ونافع الكبير اما ان يحرق ثيابك واما ان تجد منها ريحا خبيثة) پيغمبر عز صلى الله تعالى عليه وسلم ايدر جليس صالحك مثلي حامل مسك مثليدر كه اول سكا يامسكندن ويرر وياسن اندن صاتون آلورسن وياريح

طیبه بولورسن و جلیس سوئک مثلی نافخ کیر مثلیدرکه اول یا ثیابی احراق
ایدر و یا اندن ریج خبیثه بولورسن (قال النبی علیه السلام لا تصاحب
الا مؤمنا ولا یأکل طعامک الا اتقی) پیغمبریمز علیه السلام ایدر مؤمنک
غیریه مصاحب اولغل و طعامکی تقینک غیری یمسون (وقال النبی علیه
السلام المرء علی دین خلیله فلینظر احدکم من یخالل) پیغمبریمز علیه
السلام ایدر کشی خلیلنک دینی اوزره در * ایمدی کشی کنیدنک
و یا دیلدیکی کسینه نک حال باطنه سن بملک مراد ایدرسه خلیل ایدندیکی
کسینه نک حاله نظر ایتسون (وقال الرسول یارب ان قومی اتخذوا هذا
القرآن مهجورا) محمد علیه السلام اول کونده دیه که و یا اول دنیاده
شکایت ایدوب دیه که یارب قوم قریش اشبو قرآنی ترک و ناسی اندن صد
ایتدیلر (قال النبی علیه السلام من تعلم القرآن و علق مصحفه ولم یتعاهده
و لم ينظر فیہ جاء یوم القیامة یقول یارب عبدک هذا اتخذنی مهجورا
اقض بینی و بینہ) پیغمبریمز صلی الله علیه وسلم ایدر برکسه که قرآنی
تعلمدنصرکه مصحفی تعلیق ایدہ یوخسه انی او قویوب ایچنه نظر ایتیه
یوم قیامتده قرآن اکا خصومت ایدوب دیه که یارب اشبو عبدک بنی
مهجور ایتدی بئله انک بیدنی قضاء ایت و یا خود معنی انلر انی هذیان
وقول سیئی منزلنده قیلدیلر انی شعر و یا سحر زعم ایتدیلر الله تعالی رسولانی
تسلیمه ایدوب دیدیکه (و کذلک جعلنا لکل نبیّ عدوا من المجرمین)
یا محمد قومک مشرکاردن سکا اعدا قیلدیغیمز کی هر نبی به دخی قومک
مشرکاردن عدو قیلدیق انلر ایسه بنم امرمه صبر ایتدیلردی
سن دخی انلر کی امرمه صبر ایلکل (و کنی ربک هادیا و نصیرا) ربک
جل شانه انلری قهر طریقنه سکا هادی و انلر اوزره قاهریت (وقال الذین
کفروا لولا نزل علیه القرآن جلة واحدة) کافرلر دیدیلر که نولیدی
اشبو قرآن کتب ثلاثه کی دفعه واحدهده انزال اولیدی (کذلک)
بز آنی مفرق انزال ایتدک (لنثبت به فؤادک) تا که انی تفریقه فهم و حفظه
قلبکی قوی ایدوز زیر محمد صلی الله تعالی علیه وسلم حالی موسی و داود
وعیسانک حالنه مخالف ایدی شول حیثیتدیکه انلر کتابت و قراءت
ایدرلردی و محمد علیه السلام ایسه امی اولوب کتابت و قراءت
ایتمزدی اگر اول اکا جلة القا اولنسه حفظی اکا آسان اولمزدی

(و تعلقف)

و تعلقف ایسه شیئا فشیئا اولور و انک وقایع حسبنجه نزولی مزید بصیرت
و معنایه خوض ایجاب ایدر و انی هر معارضه جواب وجهی اوزره انزالده
معارضی تعجیز اولور و انی تفریقه ناسخ و منسوخ یلنور و قرآن حالیه
دلالات لفظیه به منضم اولور (ورتلناه ترتیلا) و بزسکا انی بکرمی و یا بکرمی
اویچ یلده اناه و مهل اوزره تبیین و تفریق ایتدک (ولایاتونک بمثل الاجتماع
بالحق و احسن تفسیرا) یا محمد هر بار که مشرکون سنک امرک ابطالنده
بر مثل ضرب ایتدیلر بزسکا انی دفع ایدر حقله و احسن بیانله جواب ملزم
ایراد ایدرز (الذین یحشرون علی وجوههم الی جهنم) که انلر جهنمه سوق
اولنوب یوزلری اوزره سوریدیلورلر * پیغمبریمز صلی الله علیه وسلمدن
مرویدرکه یوم قیامتده ناس اویچ صنف حشر اولور بر صنفی دواب اوزره
و بر صنفی اقدام اوزره و بر صنفی دخی وجوه اوزره کیدرلر (اولئک شر مکانا
واضل سبیلا) ایمدی انلر آخرتده مکان و منزلتده اشر و طریقده اخطأدرلر
(ولقد آتینا موسی الکتاب و جعلنا معه اخاه هارون وزیرا) بز موسی به
توراتی و یردک و اکا قرداشی هارونی دعوتیه و اعلاء کلمه به معین قیلدیق
(فقلنا اذهب الی القوم الذین کذبوا بآیاتنا فدمرناهم تدمیرا) و اول ایکسینه
دیدک که شول بزم آتلیرمز تکذیب ایدن فرعون و قومنه و ارووب انذار
ایدک انلر دخی و ارووب انذار ایتدکرنده اول ایکسی انلری تکذیب ایدیچک
بز انلری هلاک ایتدک (وقوم نوح لما کذبوا الرسل اغرقناهم) و نوح
قومنی دخی طوفانله اغراق ایتدک وقتا که نوح علیه السلامی و اول یکن
انبیای تکذیب ایتدیلر و لیکن یالکرز انی تکذیبله کلمنی تکذیب ایتش
اولدیلر و یا خود مطلقا رسالت بعثن تکذیب ایتدیلر براهمه کی
(وجعلناهم للناس آية) و انلرک اغراق و قصه لرین بز ناسه عبرت قیلدیق
(واعتدنا للظالمین عذابا الیما) بز اول ظالملر ایچون دنیاده کی عذابلرندن
ماعدنا آخرتده دخی عذاب و جمیع اعداد ایتدک (وعادا و ثمود و اصحاب
الرس) و دخی عاد و ثمود و اصحاب رسی اهلاک ایتدک * اصحاب رس حقهده
علماء اختلاف ایتدیلر * وهب بن منبه ایدر انلر شول ایچی یا یلدیق قیو اوزره
مقیم اصحاب مواشی اولوب اصنامه عبادت ایدر قوم ایدیلر الله تعالی انلره
شعیب علیه السلامی کوندروب انلری اسلامه دعوت ایتدیکنده شعیب

عليه السلام اذى و طغيانلر نده تىمادى ايتديلر اوليله اولسه قبولرينك حوانده ايكن بروقتده فجأة كنديلر ديار و اموالريله يره يكديلر * دينلديكه اول فلج يمامده بر بئردر كه اصحابى نيلرين قتل ايدوب الله تعالى انلرى اهلاك ايتدى و ياخود انلر بقيه ثمود اولوب سورة جده مذكور و بئر معطله اهلى ايديلر و ياخود انلرك حنظلة بن صفوان نام نيلرى اولوب قتل ايتدكلر يچون الله تعالى انلرى هلاك ايتدى * و ياخود اول انطاكيه ده بر بئر ايدى اصحابى حبيب النجارى قتل ايتديلر كه قصه سى سورة يس ده مذكور در * و ياخود اصحاب اخدود در رس ايسه اول حفر ايتدكلرى اخدود در * و ياخود بر قوم ايديكه نيلرين بر بئر ايچنه قويوب اوزرينه طپراق دو كوب اولدرديلر (و قرونا بين ذلك كثيرا) و عاد و اصحاب رس بيننده قرون كثيره اهلاك ايتدك كه انى الله تعالى بدن غيرى احد بيلز (و كلا ضربنا له الامثال) هلاك اولسانلردن هر صنف ايچون بز قصص اوليندن قصص عجيبه تبين ايتدك كه اول انلره انذار اوله انلرايسه كفرو عصيانلرى اوزره اصرار ايديجك انلرى هلاك ايتدك (و كلا تبرنا تقيبرنا) و انلرك هر برين تكذبلر ندينصكره هلاك ايتدك (و لقد اتوا على القرية التى امطرت مطر السوء) قريش كافرلى شامه تجارت ايچون ذهاب و ايايلرنده مرارا مرور ايدرلر شول قريه يه كه اكا سمانن حجاره امطاريله هلاك ايديلديكه اول قوم لوط قراسنك اعظمى قريه سدومدر * دينلديكه قوم لوط بش قريه ده ساكن اولورلردى اول قرادن برينك اهلى فاحشه ايشلدكلر يچون نجات بولوب ماعداسى ايسه انى ايشلدكلر يچون هلاك اولديلر (افلم يَكُونُوا يَرُونَهَا) انلر مرورلرنده انده الله تعالىنك آثار عذابن كورمزلميكه انكه اتعاظ ايدلر (بل كانوا لا يرجون نشورا) بلكه انلر كفره در بعضى توقع ايتزلر اول اجلدن اكا نظر و انكه اتعاظ ايتزلر (واذا رأوك ان يَخْذَوْكُ الْاَهْزَا) يا محمد اهل مكه سنى كوردكلرنده هزؤ اتخاذا ايدوب ديرلر كه (اهذا الذى بعث الله رسولا) اشبوميدركه الله تعالى انى رسول بعث ايلدى تاكه اول اوزريمزه حجت اثبات ايدى (ان كاد لِيُضِلَّنَا عَنْ آلِهَتِنَا) اول قريب اولديكه توحيدده جد دعوتيله حجج و معجزاتدر ديو ايراد ايتديكى شيئك كثريله آلهه من

(عبادتدن)

عبادتدن بزى صرف ايدى (لولا ان صبرنا عليها) اكر بز آنك اوزرينه ثابت اولسه و آلهه من عبادتن استمساك ايتسه ايدك (و سوف يعلمون حين يرون العذاب من اضل سبيلا) انلر يوم قيامتده اوزرلرينه عذاب نزولن كوردكلرنده سبيل جهنندن قنقى فريق اضل ايديكنى بيلورلر مؤمنلرى يوخسه انلرمى اشبونده وعيد و دلالت واردركه انلر اهمال اولمزلر اكرچه امهال اولنورسه ده (أرأيت من اتخذ الهه هواه) خبر وير اول كسه يى كه هوا سنى معبود ايدينه اكا اطاعت ايدوب دينن انك اوزره بناء ايدى حجتى ايشتميه دليله نظر ايتيه * روايت اولنديكه مشركلرك برى بر چجره عبادت ايدردى چقان اندن احسن بر چجر آخر كورسه اوليكى چجرى براغوب اول صكره كى چجره عبادت ايتكه باشلردى * ابن عباس ايدر يعنى كوررميسز شول كسه يى كه الله تعالىنك عبادتن ترك و اكا مخالفت ايدى و بر چجرى معبود ايدينوب اكا عبادت ايتكه كيده بنم عندمده انك حالى نيچه اولور (أفأنت تكون عليه وكيلا) يوخسه سن انى شرك و معاصيدن منع ايدر حفيظمى اولورسن * ايمدى سن اوليله دكلسن بلكه سكا واجب اولان انجق انذاردر غيرى دكل (ام تحسب ان اكثرهم يسمعون او يعقلون) يوخسه ظن ايدر ميسنكه انلرك اكثرى سنك قولكى فهم ايچون استماع ايدر و يا حج و اعلامدن كوردكلرين تعقل ايدر اوللر (انهم الا كالانعام) انلر دكل الا انعام كبيدرلر شول حيثيدنكه آيات ايشتمكه نفعلمزلر و مشاهده ايتدكلرى دلائل و معجزاتى تدبر ايتزلر (بل هم اضل سبيلا) بلكه انلر سبيل جهنندن انعامدن اضلدلر * زيرا كه انعام كنديلرين تعهد ايدن كسه يه انقياد ايدر و كنديلره احسان ايدنى اساءت ايدندن تميز ايدر و نفعلوي استر و ضررلبدن اجتناب ايدر اما كه كفره ربلرينه انقياد ايتزلر و انك احساننى شيطانك اساءتدن تميز ايتزلر و اعظم منافع اولان ثوابى طلب ايتزلر و اشدد مضار اولان عقابدن صاقتمزلر و انعام اكرچه حق اعتقاد و خيرى اكتساب ايتزدلر لكن باطلى اعتقاد و شرى اكتساب دخی ايتزدلر اما كه كفره انك خلافى اوزره در و انعامك جهالتى هيچ احده ضرر ايتزدلر اما كه كفره نك جهالتى فتن ظهورينه و ناسى طريق حقندن صده مؤدى اولور و انعام كال طلبينه

تمکني اولديغیچون انده نه تقصیر ونه ذم تصور اولنور اما که کفره مقصر لر در تقصیر لری اوزره اعظم عقابه مستحق لر در (ألم ترالی ربك كيف مّد الظل) ربك جل شانہ نك صنعنه نظر ایتزمیسنکه طلوع فجرله طلوع شمس بینده ظلی نیچه مّد وبسط ایتدیکه اول اطیب احوال در زیر اظلّت خالصه طبعی تغیر ونظری سد ایدر وشعاع شمس ایسه هوای قزیرر وبصره ضعف ایرکورر اول اجلدن جنت ظل ممدوده وصف اولندی (واو شاء لعله ساکننا) اکر الله تعالی دیلسه انی دائم وثابت قیلور شمسله کتیز قالور ایدردی (ثم جعلنا الشمس علیه دلیلا) بعده شمسی اول ظله دلیل قیلدق زیرا اکر شمس اولسه ظل بیلنزدی ونور اولسه ظلّت بیلنزدی * زیرا که اشیاء اضداد ایله بیلنور (ثم قبضناه الینا قبضا یسیرا) بعده اول ظلاک موقعنه شمسی ایتقاع ایدوب آز شمسک ارتقاعی حسب نیجه انی ازاله ایدرز تا که انکله مصالح کون منتظم اوله ومنافع خلقدن امور لایحصى حصول بوله * دینلدیکه حق جل وعلا وقتا که سمایی نیرسنز بناء وانك آتنده ارضی بسط ایتدی انك اوزره سمانك ظلنی القاء ایلدی اکر الله تعالی دیلسه انی اول حال اوزره ثابت ایدردی بعده شمسی انك اوزره تسلیط ایدوب ظلاک اکا تبعیت دلیل قیلدی دلیل مدلولک تبعیت دیلمسی کی اول ظل شمسک حرکتیله متفاوت وتحویلیله متحول اولور بعده اول ظلی شیئا فشیئا غایت نقصانه ایرنجه قبض یسیر ایتدی * دینلدیکه اکر اول دفعه واحده قبض اولسه ناسک اکثر منافی معطل اولوردی * ایددی قبض یسیرده منافع لایحصى واردر (وهو الذی جعل لکم اللیل لباسا) اول الله تعالی سزه کیجه بی ستر قیلدیکه انکله استتار ایدرسنز یعنی انك ظلنی هرشیئی غشی ایدر شول لباس کی کیم لایسنی غشی وستر ایدر (والنوم سباتا) واولخوی ابدانکزه راحت وعملکز انقطاعه وقت قیلدی ویاخود انی موت قیلدی (وجعل النهار نشورا) وکوندزی وقت انتشار قیلدیکه ناس انده معاشیچون منتشر اولورلر ویاخود بعث اموات کی انی نومدن بعث ایتدی * اشبونده اشارت واردر که نوم ویقظه موت ونشوره نمونه اوله لقمان علیه السلامدن مرویدر دیدیکه ای اوغل اویوب اویاندیغک کی اولور ودریلورسن (وهو الذی ارسل الیراح

(بشرا)

بشرا بین یدی رحته) اول الله تعالی یراح مطری اویجه ارسال ایتدیکه اول سخابی نشر ایدر (وانزلنا من السماء ماء طهورا) ویز سماندن ماء طهور انزال ایتدک * طهور اولدر که نفسنده طاهر وغیری مطهر اوله (قال النبی علیه السلام فی البحر هو الطهور ماؤه الحل مینته) پیغمبر یمز صلی الله علیه وسلم بحر حقنده دیدیکه انك مائی طهوردر میتهمی حلالدر و آیتده کی طهورله مراد مطهردر * زیرا که اول انسانی حدث ونجاستدن تطهیر ایدر * ائمه حنیفه دیدیلر که طهورله مراد طاهردر * پس بو اجلدن مائعات طاهره ایله نجاسات ازاله سنی تجویز ایتدیلر اول خل وماء ورد وریق وامثالیدر اکر انکله نجاست ازاله سی جائز اولسه حدث ازاله سی دخی جائز اولوردی وبعضیلر دیدیلر که طهور اولدر که اندن تطهیر متکرر اوله که اول مالک قولیدر حتی بر کره توضى ایدیلن ماء ایله وضوئی تجویز ایتدیلر واکر ماء برشی واقع اولوب طعم ویالون ویاریجنی تغیر ایتسه اکر اول واقع مائک اندن صیانتی ممکن دکل شی ایسه طین وتراب واوراق اشجار کی انکله طهارت جائز اولور تکیم طول مکثله متغیر اولسه واکر مائک اندن صیانتی ممکن شی اولوب اکا مخالفه اولسه خل وزعفران وامثالی کی انکله طهوریتی زائل اولوب انکله وضوئی جائز اولمز واکر احد اوصافی متغیر اولمزسه نظر اولنور اکر اکا واقع شی طاهر ایسه طهوریتی زائل اولوب انکله طهارت جائز اولور کرکسه اول ماء قلیل ویا کثیر اولسون واکا واقع شی نجس ایسه نظر اولنور اکر ماء ایکی قله دن اقل ایسه اول ماء نجس اولور ویا ایکی قله دکلر ویا اندن اکثر ایسه اول طاهر اولوب انکله وضوء جائز اولور وایکی قله نك وزنی بشیوز رطلدر شول دلیلله کیم پیغمبر یمز صلی الله علیه وسلم فلاتده کی مادن سؤال اولندقدده که اکا سباع ووحوش ورود ایده دیدیکه (اذا کان الماء قلتین لیس یحمل الخبث) چنانکه مائک مقداری ایکی قله اوله اول ماء خبثی قبول ایتز که اول شافعی واجد واسحق واهل حدیثدن بر جاعتک قولیدر دیدیلر که چنان ماء ایکی قله یه ایرسه اکا نجاست وقوعیله اول نجس اولمز مادامکه طعم ویاریج ویالونی متغیر اولمه که اول قول حسن وعطاء ونحی وزهری مذهبدر ابو سعید الخدری رضی الله عنه ایدر پیغمبر یمز صلی الله علیه وسلم حضرت ترینه

دیند بیکه یا رسول الله بئر بضاعه دن توضع ایدہ لمیکه اول بئر در که
اکا حیض خرقلری ولحوم کلاب و نتن براغیلور پیغمبریمز صلی الله
علیه وسلم دیدیکه (ان الماء طهور لا ینجسه شیء) ماء طهور در انی
هیچ شیء نجس ایتز (لنجی به بلدة ميتا) تا که مطرله بلدة میتی احیاء
ایدهوز انده نبات و اعشاب انباتیله (ونسقیه مما خلقنا انعاما و اناسی کثیرا)
و اول مائی اسقا ایدهوز انعامه و اناس کثیره کیم انلر اهل بوادیدر زیرا که
مدینه و قریه لری اهل یسنی انهار و منابع قربنده اقامت ایدرلر اویله اولسه
انلر و حوللرنده کی انعام ماء مطردن غیلدر اما که سائر حیوانات ماء
طلبنده بعید اولدقلرندن غالبده انلر شربه کلزلر (ولقد صرفناه بینهم
لیذکروا قابی اکثر الناس الا کفورا) اشبو قولی یعنی (هو الذی ارسل
الریاح) آیتن ناس بیننده قرآنده و سائر کتبد و یاخود مطری انلرک
بیننده بلدان مختلفه ده و اوقات متغایر ده و طل و وابل و غیره صفات
متغایر ده صرف ایلدک تا که تفکر ایدوب الله تعالینک کمال قدرتن
وانده کی حق و نعمتی بیلوب شکرینه قیام ایدلر و یا انی انلردن غیر یلره
و غیریدن انلره صرفیله اعتبار ایدلر اکثر ناس ایسه اندن امتناع ایدوب
کفران نعمتی اختیار ایتدیلر * ابن عباس ایدر هیچ بریل بریلدن یغمورلی
دکدر لکن الله تعالی انی پر یوزنده دیلدیکی مکانه صرف ایدر تکیم
مر فوعا روایت اولندیکه کچه ده و کوندزده هیچ بر ساعت یوقدر که
انده یغمور یاغیه الا بوکه الله تعالی انی دیلدیکی مکانه صرف ایدر * ابن مسعود
رضی الله عنه ایدر هیچ بر سنه سنه اخردن یغمورلی دکدر الا بوکه الله
تعالی اشبو ارزاقی سماء دنیاده اشبو یغمور ده قیلدی هر سنه اندن
کیل معلوم و وزن معلومله یره ایندیرر چقان بر قوم عصیان و مخالفت
اوزره اولسدر الله تعالی انی انلردن قوم آخرینه تحویل ایدر چقان جله سی
عصیان اوزره اولسدر انی چوللره و کوللره و دریالره و طاغلره یاغدرر *
زید بن خالد الجهنی ایدر پیغمبریمز علیه السلام حدیبیه ده ایدی بر کچه
یغمور یاغدی انک صباخنده نمازدنصکره ناسه اقبال ایدوب دیدیکه
بیلور میسز که ربکز جل شانہ ندیر دیدیلر که الله تعالی ورسولی اعلمدر
(قال قال الله تعالی أصبح من عبادي مؤمن بي وكافر بالكوا کب فاما من
قال مطرنا بفضل الله ورحمته فذلك مؤمن بي كافر بالكوا کب واما من

(قال)

قال مطرنا بنوء کذا وكذا فذلك کافر بی و مؤمن بالکوا کب) پیغمبریمز صلی الله
علیه وسلم ایتدی الله تعالی دیر که عبادمک بعضی بکا مؤمن کوکبه کافر
اولور اولکه بزه یغمورک یاغمی الله تعالینک فضل و رحمتیله در دیه اول
بکا مؤمن و کوکبه کافر در اما اولکه انک یاغمی فلان یلدزک نویله در دیه
اول بکا کافر و کوکبه مؤمندر لکن برکسه که اعتقادنده امطاری خلق
ایدن الله تعالیدر یلدزک نوی اکا دلائل و اماراتدر دیه اول کافر اولز
(ولو شئنا لبعثنا فی کل قریة نذیرا) اگر دیلرسک هر قریه به برنذر کوندردک
انک اهلنی انذار ایددیکیه اعباء نبوت سکا خفیف اولیدی لکن سکا اجلال
و شانکی تعظیم و سنی سائر رسل اوزره تفضیل ایچون امری سنک اوزریکه
قصر ایتدک * ایددی انک اوزره ثابت اولوب دعوت و اظهار حقه
اجتهاد ایتکل (فلا تطع الکافرین) ایددی کافرله اطاعت ایتکل شول
مراد لرنده کی ابلاغی ترک ایدوب انلره مداهنه ایدسن (وجاهد هم به
جهادا کبیرا) و قرآنله انلره جهاد شدید ایت یعنی انلر حقکی ابطالده
اجتهاد ایدرلر * ایددی سندیخی انلره مخالفنده و باطللرین ازاله ده جهاد
شدیدی مقابل ایت زیرا که سفهایه حجه مجاهده اعدایه سیفله اولان
مجاهدده دن اکبردر (وهو الذی مرج البحرین) اول الله تعالیدر که ایکی
بحرک برینی آخر اوزره افاضه ایتدی و یاخود اول ایکسینی مجرالرینه ارسال
ایلدی (هذا عذاب فرات) اول ایکسینک بری فرط عذوبتدن عطشی
کیدرر (وهذا ملح اجاج) و بری ایسه بلیغ الملوحة و مررر (وجعل بینهما
برزخا) و اول ایکی بحرک اراسنه قدرتیله حاجز قیلدی بری اول برینه قارشیمه
(و حجرا محجورا) و ستر ممنوع و یا حده محدود قیلدی دجله کبی که بحری
شق ایدوب خلانده برقاج فرسخ کیدر حالبوکه طعمنه خلل و تغیر ایرمز *
دینلدیکه بحر عذبله مراد نهر عظیمدر نیل کبی و بحر ملح ایله مراد بحر کبیردر
و برزخله مراد اول ایکی بحر بینده حائل اولان ارضدر اویله اولسه قدرت
فضلده و اختلاف صفتده اولور مع هذا هر عنصر اجزاسنک مقتضای طبیعتی
تضام و تلاصق و کیفیتده تشابه ایدی (وهو الذی خلق من الماء بشرا)
اول الله تعالیدر که طینه آدمی تخمیر ایتدیکی ماءدن بشر خلق ایلدی
و یاخود مائی ماده بشردن جزء قیلدی تا که انده سلاسه و انقیاد اوله

واشكال و هياتى سهولته قبول ايد و ياخود ماه منيدن بشر خلق ايلدى
 (فعله نسبا و صهرا) و انى ذكور قيلديكه انلره نسبت اولنور و دخی
 اناث قيلديكه انلره مصاهرت حاصل اولور * ديلديكه نسب اولدرکه
 نکاحی حلال اوليه و صهر اولدرکه نکاحی حلال اوله * ايمدى نسب حرمتی
 ايجاب ايدر صهر ايسه انى ايجاب ايتز و ياخود نسب قرابتدن صحيح النسبدر
 و صهر ايسه قرابت بکزر خلطه درکه انکله نکاح حرام اولور سورة
 نسا (حرمت عليكم امهاتکم) آيتنده نکاحی حرامک يديسى نسبيله
 و يديسى سبيله ايدىکنى الله تعالى ذکر ايلدى (وكان ربك قدرا) ربك
 جل شانہ قدرتمده بليغ اولدى شول حيثيتدکه ماده واحده دن بشر خلق
 ايلديكه اول اعضاى مختلفه و طباع متباعدى جامعدر و انى ايکى قسم
 متقابل قيلدى و کاهى نطفه واحده دن ايکز بر ذکر و انش خلق ايدر
 (ويعبدون من دون الله مالا ينفعهم ولا يضرهم) مشرک الله تعالىدن
 غيرى شول شيئه عبادت ايدرلرکه انلره نفع ايتز عبادت ايتلرله و ضرر
 دخی ايتز اکا عبادتى ترك ايتلرله زيرا هيچ بر مخلوق يوقدرکه نفع و ضرر
 ايردirmekده مستقل اوله (وكان الکافر على ربه ظهيرا) کافر رب تعالىيه
 عصيانله شيطانه معين اولدى و ياخود کافر رب تعالىيه حقير و ذليل
 اولدى شول شئ کي که خلف ظهريه براغيلوب اکا التفات اولتميه
 (وما ارسلناک الا مبشرا و نذيرا) يا محمد بزسنى الله تعالىيه ايمان و اطاعت
 ايدنلره جنتله تبشير ايدر و اکا کفر و عصيان ايدنلره عذاب نارله انداز
 ايدر ارسال ايتدک (قل ما اسألكم عليه من اجر الا من شاء ان يتخذ
 الى ربه سبيلا) دیکل که يا مشرکين بن سزه رسالتى تبليغ اوزره
 اجر استمزين اول کسه که رب تعالى عندنده مرجع صالح اتخاذين
 ديليه که اول جنتدر ايمانه کلسون و ياخود اول کسه که لوجه
 الله تعالى مالندن انفاقله اکا تقرب ديليه ايتسون (وتوکل على
 الحى الذى لا يموت) وانلرک شرورين استکفاده و يا اجورلرندن
 استغناده حضرت حى لا يموت جل شانہيه توکل ايتکه توکل اولتمغه
 اول حقيقدر بوخسه شول احيايه دکله انلره موت ايرر زيرا انلره
 موت ايرچک متوکللى ضايع اولور (وسبح بحمده) وانک حديدنى ملابس

(اولديغک)

اولديغک حالده صفات نقصاندى انى تنزيه ايت (وکفى به بذنوب
 عباده خيرا) اول الله تعالى عبادنک ذنوب ظاهره و باطنه سنه مطلع
 اولغه کافی اولدى هر برينه جزاسن ايدر (الذى خلق السموات
 و الارض وما بينهما فى ستة ايام) که اول سموات و ارضى و ايکيسى
 اراسنده کي کاشاقى آلتى کونده خلق ايلدى حالبوکه اول انى لحظه
 واحدهده خلقه قادر ايدى لکن عبادينه رفق و ثبتي تعليم ايتدى
 و دخی حکم آخر ايجونکه علميله اول تخصص ايتدى (ثم استوى
 على العرش الرحمن) بعده عرش اوزره استيلاء ايتديکه اول رجائيله
 متصفدر (فاستل به خيرا) ايمدى ذکر اولنان خلق و کرک استوان
 عالمه سؤال ايت که اول سکا انک حقيقتن خبر ويره که اول الله
 تعالىدر و يا جبريل عليه السلامدر و يا کتب مقدمهده انى بولان کسه در
 (واذا قيل لهم اسجدوا للرحمن قالوا وما الرحمن) چنانکه مشرکينه
 رجن جل شانہيه سجده ايدک ديلسه ديرلر که رجن نه شيندر بزرجن
 يمامه دن غيرى رجن بيلرز که انکله مرادلى مسيله کذاب ايدى
 زيرا که انلر رجن اسمنى الله تعالىيه اطلاق ايتزلردى و ياخود الله تعالىنک
 غيرى اراده ايدر ظن ايدوب ديديلر که (انسجد لما تأمرنا) سنک بزه
 امر ايتديکک شيئه عرفانمز يوغيکن سجده مى ايدرز (وزادهم نفورا)
 و رجانه سجوده امر انلرک دين و ايماندى نفورلرينى آرتوردى (تبارک الذى
 جعل فى السماء بروجا) عظمت و علوله متصف اولدى اول بارى
 جل شانہ که سماده اون ايکى برج قيلديکه اول کوا کبدن سبعة سياره نك
 منازليدر که اول برج حل و ثور و جوزا و سرطان و اسد و سنبله
 و ميزان و عقرب و قوس و جدى و دلو و حوتدر اما حل و عقرب
 مريخک ايکى بيتيدر و ثور و ميزان زهره نك ايکى بيتيدر و جوزا و سنبله
 عطاردک ايکى بيتيدر و سرطان قمرک بيتيدر و اسد شمسک بيتيدر و قوس
 و حوت مشتري نك ايکى بيتيدر و جدى و دلو زحلک ايکى بيتيدر و بروج
 طبائع اربعهيه مقسومه در اول طبائعدن هر يته اوچر برج نصيب
 اولور که اکا مثلثات دينور اما حل و اسد و قوس مثلثه ناريه در و ثور
 و سنبله و جدى مثلثه ارضيه در و جوزا و ميزان و دلو مثلثه هوايه در
 و سرطان و عقرب و حوت مثلثه مايه در (وجعل فيها سراجا و قرا

منیرا) واول سیماده سراج یعنی شمس خلق ایلدی کوندزده ضیاء ویرر
 وقریکه اول کیمده ضیاء ویرر (وهو الذی جعل اللیل والنهار خلفه)
 اول الله تعالی لیل ونهار بری برینه خلف وعوض قیلدیکه برنده
 فوت اولان عمل آخرده قضاء اولنور ویاخود ایکیسندن هر برینی صاحبیه
 مخالف برینی اسود وبرینی ایض قیلدی ویاخود بری کتسه اول
 بری کلور ضیاء وظلامله وزیاده ونقصانله برینی اول بری تعاقب ایدر
 (لمن اراد ان یدکر او اراد شکورا) شول کسه ایچونکه الله تعالی نیک
 آلائنی تذکر وصنعتنی تفکر ایدوب انکچون برصانع حکیم واجب
 بالذات رحیم بالعباددن لابد ایدیکنی بیک دلیله ویا اول کسه ایچونکه
 الله تعالی نیک اکا ویردیکنی نعمتله شکر ایتک دلیله ویاخود اول لیل ونهار
 ذاکرین وشاکرینه ایکی وقت اوله برنده وردنی فوت ایدن کشی اول برنده
 تدارک ایده (وعباد الرحمن الذین یمشون علی الارض هونا) الله تعالی نیک
 افاضل عبادی شول کسه لدرکه سکینه ووقارله یوررلر (واذا خاطبهم
 الجاهلون قالوا سلاما) چان سفها انلره کراحت اولنور شیثله خطاب
 ایتسلر دیرلر کسه سزدن تسل ایدرز سزدن نه خیر ونه شر دیرلر
 ویاخود قول سدیدله اذی واثمدن سالم اولورز * ایمدی مراد سفهادن
 اغفاء وکلامده انلرکه مقابله یی ترکدر (والذین یبیتون لربهم سجدا
 وقیاما) شونلرکه ربلری جل شانله ایچون صلاتده ساجدین وقائمین
 کیمهلر ابن عباس رضی الله عنهما ایدر برکسه که عشاء اخیره دنصکره
 ایکی رکعت ویانندن اکثر نماز قیله لله ساجد وقائم کیمهلر و برکسه که
 کیمه نمازنده قرآندن برشی اوقوسه کچره قلیل ایتسه ده لله ساجد
 وقائم کیمهلر (قال النبی صلی الله علیه وسلم من صلی العشاء فی جماعة کان کقیام
 نصف لیل ومن صلی الفجر فی جماعة کان کقیام لیله) پیغمبریمز علیه السلام
 ایدر برکسه کسه یتسو نمازین جماعتله قیله کیمه نیک نصفنی قیام کبی
 اولور واولکه صباح نمازینی جماعتله قیله اول کیمه یی قائم کبی اولور
 (والذین یقولون ربنا اصرف عنا عذاب جهنم ان عذابها کان غراما)
 وشونلرکه خلقله حسن مخالقه وعبادت حقده اجتهادلیله بیلله الله تعالی دن
 قورقوب دیرلرکه یاربنا زدن جهنم عذابنی صرف ایت که اول هلاک وخسران
 لازم اولور انک صرفیله الله تعالی یه ایتها لاری واعماللرینه اعتدالری

(واستمرار)

واستمرار احواللرینه وثوقلری اولدیغیچوندر (انهاساءت مستقرا ومقاما)
 اول جهنم قرار واقامتیه نه چرکین موضع اولور (والذین اذا انفقوا
 لم یسرفوا ولم یقتروا وکان بین ذلك قواما) وشونلرکه نفقهده اسرافله
 حدی تجاوز ایتزلر وتضییقه قتردخی ایتزلر بلکه انفاقلرین اسراف
 وقتریننده وسط ایدرلر * علماء اسراف واقتراده اختلاف ایتدیلر بعضیلر
 دیدیکه اسراف اولدرکه معصیته انفاق اولنه اگرچه قلیل ایتسه ده واقتر
 حق اللهی منعدر پس بواجلدن اشبو آیتک تفسیرینده حسن دیدیکه یعنی
 ماللرین معاصییه انفاق ایتزلر وفرائضدن امساک دخی ایتزلر وبر قوم
 دیدیلرکه اسراف انفاقده حدی تجاوز ایدوب تبذیره ایرکورمکدر
 واقتر ایتسه لابدمنده تقصیردر بر رجل رجل آخره دیدیکه اسرافده
 خیر اولمز اول دیدیکه خیرده اسراف اولمز پس بواجلدن دینلرکه
 اگر برکسه نیک ابو قیس طاعی دکلو التونی اولوب سبیل اللهه انفاق
 ایتسه مسرف اولمز واما که اندن بر درهمی معصیته انفاق ایتسه مسرف
 اولور * یزیدبن ابی حبیب اشبو آیتده ایدر صحابه کرام رضی الله تعالی
 عنهم اجمعین طعاعی تنعم ولذت ایچون یملردی وثوبی جمال ایچون
 کیمزلردی بلکه طعامله مرادلری جوعلرین سد ایدوب رب تعالی نیک
 عبادته قوی اولهلر وثیابله مرادلری عورتلرین انکله اورتهلر واسی
 وصوقدن بدنلرین قورویهلر عمر بن الخطاب رضی الله عنه دیردیکه
 کشی یه بواصراف یتزکیم هراشتهاه ایتدیکنی شیئی اشترا واکل ایده
 (والذین لا یدعون مع الله الها آخر ولا یقتلون النفس التي حرم الله الابالحق
 ولا یزنون) ودخی شونلرکه الله تعالی ایلله بیلله اله آخر ادعا ایتزلر والله
 تعالی قتلنی حرام ایتدیکنی نفسی قتل ایتزلر مکرکه اوچ خصالک بریله اوله
 یاردت ویا زنا ی احصان ویا قضاصله اوله وزنا دخی ایتزلر * ابن عباس
 رضی الله عنهما ایدر اهل شرکدن برجاعتکه قتل وزنا ده اکثر
 ایتشلردی پیغمبریمز صلی الله علیه وسلم کلوب دیدیلرکه سنک سوبلیدیکت
 ودعوت ایتدیکت نه کوچک اولور لکن بزم اشبو اشلدیکمز قتل وزنا یه
 کفارت وارمیدر بزه خبرویرسیدک اولله اولسه انلره جوابده بوآیت ودخی
 (یا عبادي الذین اسرفوا) آیتی نازل اولدی حق جل وعلا افاضل
 عباد ایچون اصول طاعاتی ایتاندنصکره امهات معاصی یی نفی ایلدیکه

انكاه انلرك كال ايمانلرين اظهار واجر مذكور اشبو امور بيني جامع اولنره موعود ايدىكنى اشعار اوله وانك اضدادى كفرهيه اولمىنى تعريض اوله اوليه اولسه انلرى تهديد ايجون وعيدله تعقيب اولنوب دينليكه (ومن يفعل ذلك يلق اثمًا) بر كسه كه اشبو مذكور اتدن برشئ ايشليه اول اثمك جزاسنه ملاقى اولور * دينليكه اثم جهنمه بر بزرگه اكا اهل نارك صديدي سيلان ايدر (بضاعفاله العذاب يوم القيامة ويخلد فيه مهانا) يوم قيامته اكا عذاب تضعيف اولنور وعذابده مهان اولديغى حالده دائم قالور * زيراكه مشرك هم شركى وهم معاصيسى اوزره تعذيب اولنديغى سببدن عذابى مضاعف اولور (الامن تاب وآمن وعمل عملاً صالحاً فأولئك يبدل الله سيئاتهم حسنات) مكر اول كسه كيم كناهنه توبه ايدو و الله تعالى به ورسولنه ايمان كتوره وتوبه دنصكره كنيله رب تعالى بينده عمل صالح ايشليه * ايمدى اول صفاته متصرفلر الله تعالى سيئاتلرين حسناته تبديل ايدر سوابق معاصيرلرى توبه ايله محو ايدوب مكانه لواحق طاعتلرى اثبات ايدر وياخود نفسلرندهكى ملكة معصيتى ملكة طاعته تبديل ايدر وياخود اذن سبقت ايدن شيك اضدادنى اكا توفيق ايدر وياخود هر عقابك يرينه ثواب اثبات ايدر (وكان الله غفوراً رحيمًا) الله تعالى انلرك توبه دن اول ايشلدكلى ذنوبى مغفرت ايدر وتوبه دنصكره انلره رحمت ايدر پيغمبريمز صلى الله عليه وسلم ايدر يوم قيامته حضور حقه بر رجل كتوريلوب ملائكه به دينله كه اكا ذنوبك صغائرلرى عرض ايدوب كبايرلرى كيرلر اوليه اولسه اكا دينله كه فلان كونده شونك وشونك كى ذنب ايشلدكى اول ايسه انكار ايتيوب اقرار ايله حالبو كه اول كبايرى ذكر اولمىندن خوف ايدو اذن الله تعالى ديه كه انك هر سيئه سى يرينه حسنه ويرك اوليه اولسه اول رجل ديه كيم بو ذكر اولناندن غيرى بنم ذنوبم وارد كه انى بو محله كورمزم پيغمبريمز صلى الله عليه وسلم انك بو قولنى حكايه ايتديكنده ضحك ايتدى حتى كه نواجد شريفه سى ظاهر اولدى (ومن تاب وعمل صالحاً فإنه يتوب الى الله متاباً) بر كسه كه معاصيدن توبه ايدو انى ترك و اكا ندامتله عمل صالح ايشليه * ايمدى اول كسه كه الله تعالى به رجوع ايدر انك عنده مرضى وخطالى مكفر و ثواب حاصل

(اولديغى)

اولديغى حالده * ايمدى اولكى توبه شركدن رجوعدر وبو ايكنجى توبه الله تعالى به جزاء ومكافات ايجون رجوعدر (والذين لا يشهدون الزور) وشونلر كه شهادت باطله بى اقامت ايتزلر وياخود محاضر كذب حاضر اولزلر * زيرا مشاهده باطل باطلده شركتدر وياخود نوحه به ويا اعياد مشركينه ويا لهو وغنايه حاضر اولزلر ويا اهل باطلك باطلنه مساعد اولزلر وزورك اصلى برشئى خلاف صفتيله وصف وتحسيندر كه اول باطلى تمويهدر برشئله كيم انى حق ايهام ايدر (واذا مروا بالغومروا كراماً) چقان العا وتركى لابق اولور برشئله اوغراسلر اذن معرضين ونفسلرينى اكا توقله واهل لغو معاشريله تدنيسدن منزله اولدقلى حالده مرور ايدرلر * زيراكه حضور ومشاهده اكا رضايه دليلدر * ايمدى فواحشدين اغفاء وذنوبدن صفح وتصريحى مستهجن شيدن كناهيه بوقيلدن اولور (والذين اذا ذكروا بايات ربهم لم يخروا عليها صماً وعمياناً) وشونلر كه رب تعالينك آيتلرله وعظ وتذكير اولنسلر اكا قولاق طوتمز و اكا نظر ايتز اولدقلى حالده قيام ايتزلر بلكه اذن واعيه ايله سامعين وعيون داعيه ايله انى مبصرين اولدقلى حالده انك اوزره اكباب ايدرلر (والذين يقولون ربنا هب لنا من ازواجنا وذرياتنا قرة اعين) وشونلر كه رب تعالى به تضرع ايدوب ياربنا ازواج وذريتمزدن ابرار صالحين قيلكه انلر كه كوزلر يمز شن اوله زيرا چقان مؤمنك اهلى طاعة اللهده اكا مشارك اوله قلبى اكا سوينور وكوزى شلنور شول سببدنكه دينده انلرك كندويه مساعده لرلن كورر وجنده انلرك كندويه لحوقن توقع قيلور (واجعلنا للمتقين اماماً) وبزى متقيله امام قيلكه امر دينده بزه اقتدا ايدلر * دينليكه اشبو مقلوبندلر يعنى بزه متقيلرى امام قيل وبزى متقيله اقتدا ايدر قيل (اولئك يجزون الغرفة بما صبروا) ايمدى انلر مضض طاعات ورفض شهوات وتحمل مجاهدات مشاققه صبرلرى سبيله جنتك اعلاى مواضعنده درجه ايله وياخود جنده در و زبرجد ويا قوتدن دوزلمش غرقلر ايله جزا اولنورلر (ويلقون فيها تحية وسلاماً) وانلر انده تعمير وسلامتله دعا اولنورلر ملائكه انلره تحيه وتسليم ايدرلر وياخود تحيه وتسليمى برى برلرينه ايدرلر وياخود رب تعالى انلره سلام كوندرلر

(۱۴)

لث

(خالدین فیها) انده دائمین اولدقلری حالده (حسنّت مستقرّا و مقاماً)
 اول نه کویکک موضع قرار و اقامت اولور (قل ما یعزّبکم ربی لولا
 دعاؤکم) یا محمد اهل مکّه و یا عامّة ناسه دیکل که الله تعالی سزى نیردی
 و یا انک عندنده قدریکز نه شی ایدی اگر اکا دعا کز و یا عبادتکز
 و یا ایمانکز و یا انک سزى ایمانه دعاسی اولمسه چنانکه ایمانه کله سزى
 قدریکز ظاهر اولور * زیرا که انسانک شرف و کرامتی معرفت
 و طاعتله در والا اول سائر حیواناته مساویدر * دینلدیکه یعنی ربم جل
 شانه سزى خلق ایدوب نیردی اگر اکا عبادت و طاعتکز اولمسه
 زیرا که اول سزى (وما خلقت الجنّ والانس الا ليعبدون) قول
 شریفی فخواستجه اکا عبادت ایتکز ایچون خلق ایدوبدر و بر قوم دینلرکه
 یعنی دیکل که ربم جل شانه سزى مغفرتدن مبالغات ایتزدی اگر انکله بیله
 آلهه ادعاء ایتسیدیکز * دینلدیکه سزى عذابدن مبالغات ایتزدی
 اگر شدانده اکا دعا کز اولمسه و یا خود بنم سزى حاجتم اولدیغندن سزى
 خلق ایتامیشن بلکه انکچون خلق ایتیشنکه بکا سوال ایده سزى مسئولکزی
 ویرم و بسندن مغفرت دلیله سزى بندخی سزى مغفرت ایدم (فقد کذبتم
 فسوف یكون لزاماً) ای کافر لر الله تعالی سزى رسولی ایله توحید
 و عبادتنه دعوت ایتشیکن سزى انی تکذیب ایدوب دعوتنه اجابت
 ایتدیکز * ایدم اول تکذیبکز سزى عذاب لازم اولیسردر و یا انک
 اثری عذاب لازم اولوب یوم بدرده قتلدنصکره روحلرینه عذاب نار
 تعجیل اولندی

سورة الشعراء وهی اثنتا عشرة ومائتان آیه مکیه

اشبو سوره مکیه در الاسوره آخرنده (والشعراء يتبعهم الغاؤون) دن
 سوره تمامنه دکن دکل

بسم الله الرحمن الرحيم

(طسم) دینلدیکه اشبو قسم و یا اسم سوره در * دینلدیکه الله تعالی
 طور وسینا و ملکيله قسم ایتدی ابن عباس رضی الله عنهما ایدر پیغمبریمز
 علیه السلام ایدر الواح موسادن بدل بکا (طه و طواسین) ویرلدی
 (تلك آیات الكتاب المبين) اشبو آیتلر شول اعجازی وصحتی ظاهر سوره

(و یا قرآن)

و یا قرآن آیتلریدر (لعلک باخع نفسک الایکونوا مؤمنین) یا محمد نفسکله
 اشفاق ایتکه قومک اسلامه کلدکرینه حسرتله کنیدیکی قتل ایتکل
 سکا واجب اولان انجق تبلیغدر غیری دکل (ان نشأ نزل علیهم من السماء
 آیه فظلمت اعناقهم لها خاضعين) اگر دیلسه وزانلر اوزره سمادن ایمانه
 الجاء ایدر علامت تنزیل ایدرد که رؤسالی اول علامته انقیاد
 ایدرلر (وما یأتیهم من ذکر من الرحمن محدث الا كانوا عنه معرضین)
 هر بارکه انلره رحن جل شانه طرفندن محمد علیه السلامه وحیله انزالی
 مجدد قرآندن موعظه و تذکیر کلسه انلر اندن اعراض ایدر اولدیلر
 (فقد کذبوا فسیأتیهم انباء ما كانوا به يستهزؤن) انلر تذکیردن
 اعراضلری عقینده انی تکذیب ایدوب تکذیبلرنده امعان ایتدیلر
 بر حیثیتله که ضمناً مخبربه اولان قرآنی استهزایه مؤدی اولدی * ایدم
 استهزاءلرینک اخبار و عواقبی کلیسردر اول وقتده انک حق اولوب
 تصدیق اولمغه حقیق ایدیکن بیلورلر (أولم یروا الی الارض کم انبتنا فیها
 من کل زوج کریم) انلر ارضک عجایبنه نظر ایتلرلمیکه بز انده هر نوعدن
 محمود کثیر المنفعه نبات خلق ایتدک که انک بعضی منفعتده منفرددر
 و بعضنک ایسه منفعتی غیریه در (ان فی ذلک لآیه) ایدم اول
 انواعی انباتده و یا هر برنده آیت وارد که انی انبات ایدن رب تعالی قدرت
 و حکمتنده کامل و نعمت ورحمتی سابقدر (وما کان اکثرهم مؤمنین)
 حالبو که الله تعالینک علم و قضا سنده انلر اکثری مؤمن دکلردر اول
 اجلدن بو آیات عظام امثالی انلره نفع ایتز (وان ربک لهو العزیز الرحیم)
 ربک جل شانه کفره نک انتقامنه قادر و غالبدر و رحیمدر که انلره امهال
 ایتدی و یا خود کافردن انتقامنده عزیز و توبه ایدنه رحیمدر (واذ نادى
 ربک موسى ان ائت القوم الظالمین) یا محمد ذکر ایت شول وقتیکه ربک
 جل شانه موسایه ندا ایتدیکه واروب کیتکل شول قومه کیم کفرله
 و بنو اسرائیلی استعباد و اولادلرینی ذبحله نفسلرینه ظلم ایتدیلر
 (قوم فرعون) که انلر فرعون و قومی قبطدر (الایتقون) بسندن خوف
 ایتلرلمیکه بنم غیریه عبادت ایدلر (قال رب انی اخاف ان یکذبون)
 موسی علیه السلام دیدیکه یارب قورقرینکه بنی تکذیب ایدلر (و یضیق
 صدری) وانلرک بنی تکذیلری سبیلله صدرم ضیق اوله (ولا ینطلق

لسانی) ولسانده کی عقده سیبیه سویلکه قادر اولیم (فأرسل الی
 هارون) ایدی قرنداشم هارونه رسالت ویرکه بکا وزیر اولوب
 رسالتم تبلیغنه بکا مظاهرت ایده (ولهم علی ذنب فاخاف ان يقتلون)
 انلرک بنم اوزرمده دعوا ی ذنبی واردر که اول موسی علیه السلام
 برقبطی قتل ایتدیکدر قورقرینه رسالتی تبلیغ ایتدین بنی قتل ایدر
 (قال کلا فاذهبا بآياتنا انا معکم مستمعون) الله تعالی دیدیکه انلرسنی قتل
 ایدر دکلدردن اندن اوشمکل قرنداشک هارونی سکا وزیر ایدم ایدی
 ایکیز بنم آتیرمله فرعون واریک بز سزک ایکیزله فرعون بیننده جاری
 اولان کلامی سامعلرز ایکیزکی انک اوزره غالب قیلورز (فأتيا فرعون
 فقولا انا رسول رب العالمین) ایدی ایکیز فرعون واریک دیکز که
 بز ایکیز رب العالمین جل شأنه نیک رسولی یز (ان أرسل معنا بنی اسرائیل)
 بزمله بیله بنو اسرائیلی فلسطینه ارسال ایت یوخسه انلری استعباد ایتکل
 حالوکه فرعون انلری درتوز یلدنبرو استعباد ایدردی اول وقتده
 بنو اسرائیل آتوز اوتوز بیک کمسنه ایدی اشبو امر الهی وروندنصکره
 موسی علیه السلام مصره واردی هارون علیه السلام مصرده ایدی
 حالوکه موسی علیه السلام اکننده بر جبهه صوف وینده
 عصا و مکتلی عصانک باشنه تعلیق ایشیدیکه زادی انک ایچنده ایدی
 کندی اوینه واریک هارونه امر الهی یی خبر ویردی هماندم
 هرون علیه السلام سمعا و طاعة دیوب کیجه ایچنده ایکیزی فرعونک
 قپوسنه واردیلر ودق باب ایدوب بوتابلر بلکلشدیلر سز کیسز که
 بو وقتده ملک قپوسین دق ایدرسز دیدیلر انلر ایسه بز رب العالمین
 جل شأنه نیک رسولی یز دیو خبر ویردیلر چون بوتابلر فرعون واریک
 ایکی مجنون قپویه کلش بز رب العالمین رسولی یز دیو زعم ایدرلر دیدی
 فرعون بوتابلر ترک ایدک ایرته کوره لم دیدی بر روایتده اول ایکیزی
 اکا بر ییل ملازمت ایتدیلر حالوکه کیرمکه چاره ایده مدیلر چون آخر امرده
 کیروب رسالت الهیه یی اکا ایرکور دیلر فرعون موسی یی کور یجک بیلدی
 (قال ألم نربک فینا ولیدا) فرعون اکا دیدیکه سن بزم منزلزده صبی
 بسلیمدکی (ولبت فینا من عمرک سنین) وسنی عمرکدن نیچه ییلار کیجه
 بزده لبت ایتدک * دینلرکه انک انده مدت لبتی اوتوز ییل ایدی (وفعلت

(فعلتک)

فعلتک التي فعلت وانت من الکافرين) وایشلر دیکک ایشی ایشلرک که
 اول قبطی یی قتل ایتدک شمدی ایسه اول فعلکی ستر ایدرسن ویا بنم
 نعمته کافرلر دینسکه بنم بعض خواصم قتلنه سعی ایتدک * زیرا اول
 فرعونک خبازی ایدی (قال فعلتها اذا وانا من الضالین) موسی علیه
 السلام ایدی بن اول ایشی ایشلر دیکمه ایشلدم حالوکه بکا الله تعالی دن
 برشی کلدیکی سیددن جا هللردن ایدم ویاخود طریق صوابدن نعمد سز
 آزمشلردن ایدم (فقررت منکم لما خفتمکم فوهب لی ربی حکما وجعلنی
 من المرسلین) وقتا که سزدن خوف ایلدم فرار ایدوب کدیجک ربم جل
 شأنه بکا علم وفهم ونبوت ویردی وبنی مرسللردن قیلدی (وتلك نعمة تمنها
 علی ان عبادت بنی اسرائیل) اشبو تربیه بر نعمتدر که انی ظاهرده بکا
 امتنان ایدرسن حالوکه اول حقیقتده بنو اسرائیلی تعبدک وایشلر یی
 ذبحله قهرکدر * زیرا که اول سیددن بن سنک دیدیکه تربیتکه دشمن
 اگر سن انلری استعباد واولادلر یی ذبح ایتسک اهلدن بنی تربیه ایدر
 بولنوردی ویاخود تربیتک بکا نعمتدر که انکه امتنان ایدرسن شول
 حیثیتدیکه بنو اسرائیل غلمانن قتل ایدوب بنی قتل ایتدک وبنو اسرائیلی استعباد
 ایدوب بنی استعباد ایتدک ویاخود تربیتکی بکا امتنانمی ایدرسن حالوکه
 قومی استعباد ایتدک برکسه که قومی اهانت اولنه اول ذلیل اولور *
 ایدی بنو اسرائیلی استعبادک بکا اولان احسانکی حبط ایتدی (قال فرعون
 وما رب العالمین) فرعون ایدی یاموسی رب العالمین نه شیئدر که سن
 کندیکي انک بکا رسولی زعم ایدرسن شیئک جنسندن سؤال ایتدی الله
 تعالی ایسه جنسیتدن منزهدر (قال رب السموات والارض وما بينهما
 ان کنتم موقنین) موسی علیه السلام اکا جوابده الله تعالی نیک شول
 افعالنی ذکر ایلدیکه خلق انک مثلنی ایتاندن عاجز اولور دیدیکه
 اول سموات وارض وما بینهمانک رب سیدر اگر اشبو کورینن اشیایی ایقان
 ایدرسه کز جله خلائقک الهی الله تعالی ایدیکنه دخی ایقان ایدرسز
 موسی علیه السلام انی دیکک اکا جوابده فرعون متحیر اولوب (قال
 لمن حوله ألا تستمعون) حوانده کی اولان اشراف قومنه دیدیکه
 موسانک جوابن ایشیدرمیسز که بن اکا ربنک حقیقتدن سؤال ایدرم
 اول ایسه بکا انک افعالن ذکر ایدر ویاخود انی رب سموات زعم ایدر

اول ايسه ذاته واجب متحرکه در تنکيم اول دهریه مذهبيدر
وياخود انک مؤثره احتياجي معلوم دکلد (قال ربکم ورب آبائکم
الاولين) موسى عليه السلام بيانده زياده ايدوب ديدیکه اول سزک و آباء
اولينکزک ريسيدر تعميد نصکره انفس و آباريله تخصيص ايتدی *
زیرا که عاقل کشي به اقرب منظور نفسی و واليدر فرعون کنديک
مغلوب اولديغن بيلوب (قال ان رسولکم الذی ارسل اليکم لمجنون)
جليسلرينه ديدیکه اشبو سزه ارسال اولنان رسولکز مجنوندر بن اکا
برشيئن سؤل ايدر اول ايسه بکا آخردن جواب ويرر واکا رسول
ديمی سخریه طريقی اوزره در وياخود اول برکلام سويلرکه بزانی
تعقل ايترز وصحتنی بيلرز حالبوکه انلرک عندنده اعتقادی انلرک
اعتقاده موافق اوليان کشي عاقل دکلد موسى عليه السلام بيانده
زياده ايدوب (قال رب المشرق والمغرب وما بينهما ان کنتم تعقلون)
ديدیکه اول مشرق ومغرب وما بينهما انک ريسيدر هرکون کورر سزکه
اول شمسی مشرقدر کتورر واولکی کون مدارنک غیری مدار اوزره
تحريک ايدر حتی که مغربه اير کورر بروجه نافع اوزره که انکه
امور کائنات انتظام بولور اگر عقلکز وار ايسه بونک فوقنده سزه
جواب اولديغن بيلورسز بعده فرعون کنديک مجتله ملزم وجوابده
عاجز اولديغن کوردی جباريه طريقی اوزره عقوبته ميل ايدوب
(قال لئن اتخذت الها غیری لاجعلنک من المسجونين) ديدیکه
اگر بدن غیری اله اتخاذ ايدرسک سنی مسجونيندن قيلورم بنم سجوننده
اولنرک حالتي ايسه بيلورسن * دينلديکه انک سجنی قتلدن اشد ايدیکه
اول مسجونلرين برهوه عميقه به براغور تاموته دکن انده اليقوردی
وانک الوهيه ادعاسی ظن اولنورکه اول دهریه اعتقادنده ايدیکم
برکسنه قوه طالعيله برقطره مالک اولوب امرنه تولى ايد اول انلرک زعمنده
اول قطرک اهلی اکا عبادت ايتکه مستحق اولور (قال اولوجئتک بشی
مبين) موسى عليه السلام ايتدی بکا اول فعلی ايدر ميسن اگرچه صدق
دعوايی مبین شی کتورر سنده اول معجزه درکیم صانعک وجود و حکمتنه
دلالتله مؤدی نبوت صدقنه دلالت بينی جامعدر موسى عليه السلام
انی ديدی زیرا که اخلاق ناسک شاندندر که انصافه سکون وحقه بعد

(البيان)

البيان اجابت ايد (قال فانت به ان كنت من الصادقين) فرعون ايتدی
ايمدی اول شی کتوررکل اکرنی اولديکده ويانبوت دعواسنده صادقردن
ايسک * زیرا که نبوت دعواسنه مجتهدن لابددر (قالقي عصاه فاذاهي
ثعبان مبین) موسى عليه السلام نعم ديوب الندن عصاسن يره برافدی
کورلسه اول ثعباندر که ثعبانتي ظاهر ايدی يوخسه سحرله
صورته ثعبانه بکزمش صورت دکل * روايت اولنديکه اول برميل دکلو
سمایه مرتفع اولوب فرعونه هجوم ايتدی فرعون موسى عليه السلام سنی
ارسال ايدک ربک حقيچون انی اخذ ايت چون موسى عليه السلام انی
اخذ ايتدی نه اولکی هيئننده عصايه تحويل ايتدی فرعون ايتدی اشبو
کوريلندن غیری دخی برشيئک وار ميدر نعم ديوب الن کوستردی فرعون
ديدیکه بونده نه وار (وزع يده فاذاهي بيضاء للناظرين) اويله اولسه
موسى عليه السلام الن قولتغي التذه صوقوب کيرو چيقاردی
کورسدر که اول بيزادر قريب اولديکه شعاعی ابصاری غشی وافقي سد
ايد (قال للملا حوله حوله ان هذا لساحر عليم) فرعون حولنده اولان
اشراف قومنه ديدیکه اشبو سحر علمنده فائقدر (يريد ان يخرجکم من ارضکم
بسحره فاذا تأمرون) مراد ايدرکه سحريله سزی ارضکز مصردن
چيقاره بکانه اشارت ايدرسز که انی ايدم سلطان معجزه اکا قهر ايدوب
دعوايی ربو بيلدن انی حط ايتدی حتی که قومنک مؤامره سنه وانلرايله
ايتاره وموسادن تفسيره وانی ملکی اوزره ظهورک استشعارنی اظهاره
احتياج ايتدی (قالوا ارجه واخاه) ديديلر که موسایي وقرنداشنی تأخير
وياحبس ايله (وابعث في المداين حاشرين) مدینه لريکه شرطيلر کوندرکل که
بولدقلى سحره يي حشر ايدلر (يا توك بكل سحر عليم) هر ساحری
کتوره لر که سحر فنده انلراندن افضل اولدر (فجمع السحرة لميقات
يوم معلوم) يوم معلومه سحره جمع ايديلديکه انلر يتش ايکی برروايتده
يتش بيک ايديلر يوم زيننده ضحی وقتنه کيم اول تعيين اولندی
(وقيل للناس هل انتم مجتمعون) واهل مصره دينلديکه جمع
اولنديکز ميکه ايکی فريقک فعلنه نظر ايد سز (لعلنا نبع السحرة
ان كانوا هم الغالبين) تاکه سحره به اتباع ايدوز اگر موسايه غلبه
ايدرلسه * دينلديکه انلرک مقصود اصليلری موسايه اتباع ايدی

یوځسه سحره ده دکل اویله اولسه کلامین مساق کنایه ده سوق ایتدیلر
 (فلما جاء السحرة قالوا لفرعون ائن لنا لاجرا ان کننا نحن الغالبین) سحره
 کلچک فرعونه دیدیلرکه بزه جعل وارمیدر اکر موسایه غالبین اولورسه وز
 (قال نعم وانکم اذا لمن المقرین) فرعون دیدیکه نعم اوزریمه سزچکون
 جعل اولورسه اکر موسایه غالب اولورسه کز بنم قتمده جلوسده
 مقر بلرمدن اوله سز بکا ناسدن اول کیروب صکره چیه سز (قال لهم
 موسی القوا ما انتم ملقون) موسی علیه السلام سحره ده دیدیکه القا
 ایده جککز شیئی القا ایدک حالبوکه سحره اندن ابتدا سمنی القا ایدرسن یوځسه
 بزهی القا ایده لم دیو مقدا تادبا استئذان ایتدیلر * موسی علیه السلام دخی
 انلره تادبلی مقابله سنده تقدمه اذن ویردی (فألقوا حبالهم وعصیهم
 وقالوا بعزة فرعون انا نحن الغالبون) اویله اولسه سحره اهل جاهلیه طریق
 اوزره فرعونک عزته اقسا ملرند نصکره آلات سحر لری اولان حبال
 وعصیرین القا ایدوب تفاسولا بزموسی وهارونه غالبلر دیدیلر (فالتقى
 موسی عصاه فاذا هی تلقف ما یأفکون) انلرد نصکره موسی علیه السلام
 دخی عصاسین القا ایدچک کوردیلرکه شول تمویه وتزویل ناسه حیات
 تخیل ایتدکری حبال وعصیرین * موسی علیه السلام عصاسی
 ثعبان اولوب یوطدی (فألقى السحرة ساجدين) اویله اولسه سحره
 الله تعالی یه سجده ایتدکله القا اولندیلر (قالوا آمنا برب العالمین)
 طالمک ربیسی جل شانیه ایمان کتوردک دیدیلر (رب موسی وهارون)
 که اول موسی وهارونک ربیسیدر (قال آمتم له قبل ان آذن لکم انه
 لکبرکم الذی علیکم السحر فلسوف تعلمون) فرعون سحره ده دیدیکه سزه
 بن اذن ویرمدین اکا ایمان کتوردیکز اول سزک کیریگزدرکه سزه سحری
 تعلیم ایلدی بعضی تعلیم ایدوب بعضی کیزلدی تا که علم سحر قوتیه سزه
 غلبه ایده سزایسه اکا اغترار ایدوب اتی معجزه ایلله سزه غلبه ایتدی
 ظن ایتدیکز حالبوکه امر اول ظنکز کی دکلدر * فرعونک بوقولیه
 مرادی قومنه تلبیس ایدی تا که انلر سحره نک ایمان بصیرت وظهور
 حق قوتیه اولسین اعتقاد ایتدیلر * ایددی اول فعلککز وبالنی
 بلیسر سز (لا قطعن ایدیکم وارجلکم من خلاف ولا صلبنکم اجمعین)

(ایددی)

ایمدی هر بریکزک صاغ ایلله صول ایاغن کسوب جیبعزی شاطی بحرده
 صلب ایدرم (قالوا لاضیرانا الی ربنا منقلبون) سحره اکا دیدیلرکه سنک
 بزه اول فعلکده ضرر یوقدرکه زیرایمزل جل شانیه رجوع ایدرز اکا
 ایمان سبیلله بزایمزه ایدر (انا نطمع ان یغفر لنا ربنا خطایانا ان کننا اول
 المؤمنین) زیرا بزطمع ایدرزکه ریمزل جل شانیه سزک وسحردن ایتدیکز
 خطا لیمزی مغفرت ایده زمانمزه سنک اتباعکدن موسایه اول ایمان
 کتوردیکز ایچون (واوحینا الی موسی ان اسر بعبادی انکم متبعون)
 بزموسایه وحی ایتدککه عبادم بنو اسرائیلله کیچه مصردن چیقوب
 کیت که فرعون وجنودی سزی خروجدن منع ایچون اردیکزه دوشوب
 کیدیسرلدر * ابن جریج ایدر الله تعالی موسی علیه السلامه وحی
 ایتدیکه بنو اسرائیلدن هردرت بیت اهلی بریته جمع ایده بعده قوزیلر
 بوغزیوب قانلرندن قیولرینه سورملر وملائککه یه امر ایدرینکه اول قانن
 قپوسنه بولاشمش بیته کیرمیلر وملائککه یه امر ایدرینکه فرعون وقومک
 کندیلرندن ومالارندن ابکاری قتل ایدرین ودخی بنو اسرائیل خبر فطیر
 پشورسونلر وکیچه سنکله یوله کیروب تابخره ایرنجه کتسونلر * بعده
 امرم نه اولور کوره سن اتی بنو اسرائیلله ایرکوره سن چون موسی علیه
 السلام وبنو اسرائیل امر اولندقلری کی ایتدیلر وکیچه یوله کیروب
 کتدیلر صباح اولیچق فرعون وقوی کوردیلرکه کندیلرندن ومالارندن
 شود دکلر ابکار قتل اولنوبدر وموسی بنو اسرائیلله مصردن کیدوبدر
 (فأرسل فرعون فی المداثر حاشرین) هم اندم فرعون مدینه لرینه
 شرطیلر کوندردیکه عسا کرین جمع ایدلر تا که بنو اسرائیلک اردنجه
 کیدلر * دینلدیکه اول زمانده مصر مملکتده بیک مدینه واون ایکی
 بیک قریه وارایدی چون عسا کر جمع اولوب کدیلر فرعون انلره دیدیکه
 (ان هؤلاء لشر ذمة قلیلون) اشبونلر طائفه قلیلدر حالبوکه التیوز بیک
 ویاتمش بیک کشیدیلر فرعونک قومی ایسه لایحصى ایدی * ایددی انلری
 قلیلدر دیمسی کندی عسا کرینه اضافتله ایدیکه مقدمه سی یدییوز بیک
 ایدی مؤخره سین اکا قیاس ایت ویا خود انلرک قلیل اولمی اسباط
 اعتبار یله درکه انلردن هر سبط قلیلدر (وانهم لنا لغائظون) وانلر افعال
 فاسده لر یله بزایمزل کتوردیلر و بزم عادتیمز ایسه مفسدینک فسادنی حسمه

امراءدر (وانا لجمع حاذرون) و بز اقویا وآله حربله مستعدلرز (فاخرجناهم من جنات و عیون و کنوز و مقام کریم) اوله اولسه اشبو داعیه ایله فرعون و قومنی مصردن چیقاردق شول بستانلردنکه نیلک ایکی طرفنه مبسوطه و ممتده ایدی و انهاردنکه اول بستانلری ایچنه جاری اولوردی و التون و کومش کنوزندنکه اول ظاهره ایکن حق الهی اندن ادا ایتدکلریچون اکا کنوز دینلدی * دینلدیکه فرعونک سکر یوز بیک غلامی و ارایدیکه هر بری برفرس عتیقه بنزدیکه هر برینک بوینده التون طوق و ارایدی و منازل حسنه و مجالس بهیه دنکه اول مقام کریمله مراد اولدر * دینلدیکه فرعون سریری اوزره جلوس ایتدیکنده قارشوسنه التوندن اوچبوز کرسی قویوب اوزرلرینه اشراف اوتورر و فوقلرینه دیباجدن قبهلر قوریلوردی (کذلک واورشاهای بنو اسرائیل) اشبو منوال اوزره بز انلری مصردن چیقاردق و اموال و منازللرین بنو اسرائیله ایراث ایتدک (فاتبعوهم مشرقین) وقتا که موسی علیه السلام و بنو اسرائیل کیچهدن کتدیلر فرعون و جنودیه انلره طلوع شمس وقتنده ایردیلر (فلما تراى الجمعان قال اصحاب موسى انالمدرکون) وقتا که بنو اسرائیل و قوم فرعون بری برلرینه مقابل اولوب کورشدیلر موسانک اصحابی یعنی بنو اسرائیل دیدیلرکه بز ایریشلدک و یاخود انلرک یدلرنده هلاکه ایریسرز (قال کلا ان معی ربی سیهین) موسی علیه السلام دیدیکه انلر سزه ایریشور دکلدردر * زیرا که الله تعالی سزی انلردن خلاصی وعد ایدوبدر ربم جل شانهنک علم و حفظی بخله در طریق نجاتی بکا هدایت ایدر * وقتا که موسی و بنو اسرائیل بحره ایردیلر ریخ و بحر هیجان ایتدی طاغیر کی امواجنی طشره براغوردی یوشع علیه السلام دیدیکه یا کلیم الله قنده کتمکه امر اولندک حالبوکه آردیمزدن فرعون ایردی و او کیمزه ایسه بحر حائل اولوب طوردی موسی علیه السلام دیدیکه اشبو بحره کیرمکه امر اولنشم هماندم یوشع علیه السلام بحره کیردی و جانب آخره ایردی حالبوکه ماء دابه سنک حافرنی اورتمدی * برروایتده موسی علیه السلام دیدیکه بواریه امر اولندم لکن بیلزم که نیچه ایدم (فاوحینا الی موسی ان اضرب بعصاک البحر فانقلب فکان کل فرق کالطود العظیم) اوله اولسه بز موسایه

(وحی)

وحی ایتدککه عصاکه بحر قلزمی و یا بحر نیلی اورغل اور یحقی بحرک مائی اون ایکی فرقه اولدیکه ارالقلری مسالک ایدی و هر فرقه سی سمایه مرتفع جبل عظیم کی ایدی (وازلقنا ثم الآخرين) و قوم آخرینی یعنی فرعون قومنی بنو اسرائیله قریب ایتدک و یاخود ایکی فریقی اول بحرک فرق اولندیغی محله جمع ایتدک و یاخود فرعون قومنک جیعن بحره کیردردک که انلرک هیچ بری قورتلیسه (وانجینا موسی ومن معه اجمعین) موسایی و بیله سنجه اولان بنی اسرائیلی غرقدن قورتاردق (ثم اغرقنا الآخرين) بعده فرعون و قومنی اول بحره غرق ایتدک (ان فی ذلک لآیه و ما کان اکثرهم مؤمنین) اشبو مد کورده اعتبار اهلنه عبرت واردر لکن انلرک اکثری انی تصدیق ایتدیکه انلر مصرده قلان قوم فرعوندر و بنو اسرائیلک نجات بولانلرندن بحله عبادت ایدنلردر و موسایه بز سنی تصدیق ایتدک مکرکه الله تعالی بی آشکاره کوره وز دینلردر * دینلدیکه قوم فرعونده انجق اوچ مؤمن واردیکه اول خربیل و آسیه امرأه فرعون و مریم بنت ناموسا ایدیکه اول مصردن خروجده یوسف علیه السلامک بحرده عظامنه دلالت ایتدی (وان ربک لهو العزیز الرحیم) یا محمد سنک ربک اعداسنه منتقم و اولیاسنه رحیمدر (واتل علیهم نبأ ابراهیم) یا محمد مشرکله ابراهیم علیه السلام خبرین ذکر ایت (اذ قال لآیه و قومہ ماتعبدون) که اول باباسی آزره ودخی قومنه دیدیکه نه شیئه عبادت ایدرسز تا که انلره عبادت ایتدکلری شیء عبادته مستحق دکل ایدیکن بیلدیره (قالوا نعبد اصناما فنظّل لها عاکفین) دیدیلرکه اصنامه عبادت ایدرز که اکا عبادته مقیمین اولدیغمز حالده دائملرز اول فعل باطلرینه اقتخارلرندن جوابلرینه شرح حاللرین دخی الحاق ایتدیلر * دینلدیکه انلراکا کوندزده عبادت ایدرلردی کیچهده دکل (قال هل یسمعونکم اذ تدعون) ابراهیم علیه السلام دیدیکه اول اصنامه دعا ایتدیککزدده دعا کزی ایشیدرلرمی و یاخود دعا کزه سزه جواب ایشیدرلرمی (اویفعمونکم اوبضرّون) و یا انلره عبادتکزمقابله سنده سزه نفع ایدرلرمی و یا عبادتلرندن اعراض ایدنلره ضرر ایدرلرمی (قالوا بل وجدنا آباءنا کذلک یفعلون) دیدیلرکه اول اصنام نه ایشیدر و نه اندن نفع و ضرر توقع ایدیلور الابوکه آباءمزی

بولد که اشبو بزم ایتدی کمز کی ایدر لر دی اشبو دینده تقلیدک ابطالنه
 دلیلدر (قال أفرأیت ما کنتم تعبدون انتم و آبائکم الا قدمون فانهم عدوی)
 ابراهیم علیه السلام دیدیکه کوررمیسنر شول اصنامیکه اکا سنر و یکن
 آباءکیز عبادت ایدر لر دی اول بنم عدومدر یعنی کندی امر می فکر ایدوب
 بیدم اصنامه عبادت عدویه عبادتدر اولیه اولسه اندن اجتناب ایدم
 اول اصنام بنم عدومدر دیدی تاکه اکا نظر ایدوب دیه لر که اول
 نفسیچون اراده ایتدیکن بزم ایچون دخی اراده ایدوبدر تاکه اول انلرک
 قبولنه ادعی اوله وانی اندن ایشیدن ایمانه کله (الا رب العالمین) الیوکه
 رب العالمین جل شانہ بنم ولیدر و یاخود هر عبادت ایتدیکنر شیئکه
 رب العالمینک غیریدر اول بنم عدومدر * زیرا که انلر اصنامه عبادتدر لیه
 بیله الله تعالی به دخی عبادت ایدر لر دی و یاخود اول اصنامه عبادت
 ایدنلر بنم عدومدر الا رب العالمین عبادت ایدنلر دکل بلکه انلر بنم
 ولیدر (الذی خلقنی فهو یهدین) که اول بنی و هر مخلوق خلق ایدوب
 معاش و معاد امورندن ما خلق له سنه هدایت ایدر که اول جله انسانه
 نسبتله مبدئی جنینک رحم امدن دم حیض امتصاصنه هدایتیدر و منتهاسی
 طریق جنته و لذائذ ایلہ تنعمه هدایتیدر (والذی هو یطعمنی ویسقین)
 واول بنی طعامله و شرابه رزقندیرر اول بنم رازقدر رزق انک
 عندندندر (واذا مرضت فهو یشفین) خسته اولسم اول بکا شفا
 ویرر * ابراهیم علیه السلام مرضی کندویه نسبت ایتدی زیرا که مقصودی
 تعداد نعم ایدی اما که امانه بی اکا اسنادله نقص ایجاب ایتمز * زیرا که
 موت موت اولدیغی حیثیتدن کرچه حسن دکلدر لکن انده ضرر دخی
 یوقدر بلکه ضرر انجق مقدمانده در که اول مرضدر بلکه موت اهل
 کاله شول محابی نیلنه و سبیلہ در که انک جنبنده حیات دنیویه استحقار
 اولنور و انواع محن و بلیه دن خلاصدر وزیرا مرض غالب امرده مطاعم
 و مشاربده تقریط سبیلہ و دخی اخلاط و ارکان بیننده کی تنافی و تنافر ایلہ
 حاصل اولور صحت ایسه انک اجتماعی استحقاظله و یا مخصوص اعتدالی
 قهرا جلاله حاصل اولور (والذی یمیتنی ثم یحیی) که اول بنی
 دنیاده اولدر و آخرتده دیرکورر (والذی أطعم ان یغفر لی خطیئتی

(یوم)

یوم الدین) که اول بنم یوم قیامتده خطیئہ می مغفرت ایتسنی رجا ایدرین
 انک بوقولی نفسنی هضم و امته تعلیم ایچون ایدیکه معاصیدن اجتناب
 و حذر اوزره اوله لر و کندیلردن صدور ایدن تقریطلرینک و صغائر دن
 نوادر لرینک مغفرتن دیلیسه لر * دینلر دیکه اول خطیئہ ایلہ مراد انک
 (انی سقیم) و دخی (بل فعله کبیرهم) قولیدر و دخی زوجہ سی ساره
 حقنده اول بنم اختمدر دیمسیدر لکن اکثرن بولکاتی معارضیدر دیدیلر
 * زیرا که انبیا خطایادن معصوملردر * اشبو جله سی ابراهیم علیه
 السلامدن قومی اوزره احتجاج و اخباردر که اشبو افعالی ایشلمکه
 قادر اولیان الوهیتہ صالح اولز (رب هب لی حکما) یارب بکا
 حدود و احکامک معرفت و یافهم و علم و یانبوت هبه ایت و یاخود علم
 و علمده کمال ویر که انکله خلافت حقه و ریاست خلقه مستعد اولم
 (وألحقنی بالصالحین) و علمده کالی بکا توفیق ایتکه انکله صلاحده کاملر
 عدادینه منتظم اولم که انلرک صلاحنده ذنبک نه کبیری ونه صغیری
 شائب اولز (واجعل لی لسان صدق فی الآخنین) و بندنصکره
 کلور املرده بنم ایچون ثناء حسن و ذکر جیل و قبول عام قیل * اول
 اجلدن اهل ادیانک کلیسی اتی توبی و اکا ثناء ایدر لر و یا ذریتمدن
 صادق قیلکه بنم اصل دینی تجدید ایدوب ناسی بنم دعوت ایتدیکم
 شیئہ اولدخی دعوت ایده که اول محمد صلی الله تعالی علیه
 وسلمدر (واجعلنی من ورثة جنة النعیم) و بنی آخرتده جنت نعیم وارثلردن
 قیل واول وراثتک معناسی ایسه برقاج موضعه بکدی (واغفر لابی
 انه کان من الضالین) و بابامی ایمانه توفیق و هدایتکله مغفرت ایتکه
 اول طریق حقدن آزمشردن اولدی اشبو دعا انک موتندنصکره اولدیغی
 تقدیر اوزره اتی دیمسی نمروددن قورقوب ایمانی اخفا ایدر ظنیله در
 اول اجلدن اکا ایمانه کلکی وعد ایتدی و یاخود اول وقتده کفار ایچون
 استغفاردن منع اولنممشدی (ولا تخزنی یوم یبعثون) عباد قبورلردن بعث
 اولندقلری کونده بنی افصاح ایتکل تقریطم اوزره معاتبه ایلہ و یاخود رتبه می
 بعض وارث رتبه سندن تفضیله و یاخود و الدمی تعذیله و یا انی ضالین عدادنده
 بعثله (یوم لا ینفع مال ولا بنون الا من اتی الله بقلب سلیم) شول کونده که

انده مال و بنون كسه به نفع ايتز مكر اكا كه مخلص اوله و كفر و ميل معاصي و سائر آفاتدن سليم القلب اوله و ياخود اول كونده مال و بنون نفع ايتز مكر شول كسه نك ماليكه سييل بره اتفاق اولنه و بنويكه حقه ارشاد و خيره حث اولنه و انلك الله تعالى به عباد مطيعين اولوب يوم قيامته شفعا اولمري قصد ايديله (و ازلفت الجنة للمتقين) متقيله جنت قريب اولنور * زيرا كه يوم قيامته جنت موقف سعديه قريب اولوب اكا نظر ايدرلر اكا و ارز ديو سوينورلر (و برزت الجحيم للغاوين) و دين اسلامدن آزغونلره نار جحيم كشف اولنور * زيرا كه يوم قيامته نار اشقيانك كوزلري او كنده آشكاره اولوب اكا سوق اولملري ذكريله حسرت و ملالته اولورلر (و قيل لهم اينما كنتم تعبدون من دون الله هل ينصرونكم او يفتخرون) و انلره دينور كه قني شونلر كه دنيا ده سز الله تعالىدن غيري انلره عبادت ايدرديكز و انلري كنديكزه شفعا زعم ايدرديكز كورك كه سزه نصرت ايدم يلو رلر ميكه عذابكزي دفع ايدم و ياخود كنديلرين عذابدن قورتارم * زيرا كه انلر و آلهه لري ناره كيريسرلر در (فليكبوا فيها هم والغاوين و جنود ابليس اجمعون) اول ناره براغيلورلر آلهه و كرك عبده لري و ابليسك ناس و شياطيندن اتباعي انده جمع ايديلورلر حتى انك قهرينه اير شجحه مره بعد اخري متكبين اولدقلى حالده كيرلر (قالوا وهم فيها يختصمون) اول ناره داخل اولنلر عابدون معبودينه اختصام ايدر اولدقلى حالده ديرلر كه (تالله ان كنا لفي ضلال مبين) تالله بز ضلالت بينده اولمشز (اذ نسويكم رب العالمين) شول سببدنكه بز سزى عبادته استحقاقده الله تعالى به مساوى اعتقاد ايتدك (وما اضلنا الا المجرمون) بزى ضلالت ده دعوت ايتدى الاشول مجرملر كه بز انلره اقتدا ايتدك ابليس و قابيل و سائر شياطين انس و جن كبي اندن انبياء و ملائكه و مؤمنون اصدقاليچون شفاعت ايدم اول حالته مشركون تأسف ايدوب ديهلر كه (قالنا من شافعين) بزم ايچون ملائكه و انبيادن شفاعت ايدر كسه مز يوقدر (ولا صديق حميم) و اصدقادن دخي كسه مز يوقدر كه مؤمنلك كبي بزه شفاعت ايدم و ياخود بر مهلكه به دوشدك كه بزى اندن نه شافع و نه صديق تخليص ايدم يلو ر * صديق اولدركه

(سنى)

سنى مهموم ايدن شى انى دخي مهموم ايدم و حميم ايسه قريب خاصدر (فلو ان لنا كرتة فنكون من المؤمنين) نوليدى بر كره دخي دنيا به رجوع ايتسيدك كه مؤمنلر دن اوليدق (ان فى ذلك لآية و ما كان اكثرهم مؤمنين) اشبو ذكر اولنانده الله تعالىنك غيريه عبادت ايدنلره عبرت وار در كه معبودلري يوم قيامته انلردن تبرى ايدر حالبو كه انلك اكثرى انى تصديق ايدر دكلردر (وان ربك لهو العزيز الرحيم) ربك جل شانته انلردن انتقامن تعجيله قادر عزيزدر و رحيمدر كه انلره امهال ايدر تا كه كنديلرو ياخود ذريه لرندن برى ايمانه كه (كذبت قوم نوح المرسلين) نوحك قومي مرسلينى تكذيب ايتديلر * زيرا كه رسول واحدى تكذيب جميع رسلى نكذيبدر (اذ قال لهم اخوهم نوح ألا تتقون) كه نسبدد قرداشلري نوح عليه السلام انلره ديديكه الله تعالىدن قورقميسز كه انك غيريه عبادت ايدرسز (انى لكم رسول امين) كه بن سزه رب تعالىدن رسولكه ارا كزده امانت ايله مشهورم (فاتقوا الله و اطيعون) الله تعالىدن قورقوب توحيد و طاعتدن سزه امر ايتديكمه اطاعت ايدك (و ما اسئلكم عليه من اجر ان اجرى الاعلى رب العالمين) شول صددنده اولديغم دعوت و نصيحه اوزره سزدن اجر استمزم بلكه بنم اجرم حضرت رب العالمين جل شانته نك وعد كريمى مقتضاسنجه عهده سندهر (فاتقوا الله و اطيعون) ايمدى الله تعالىدن قورقوب امرنى سزه تبليغمده بكا اطاعت ايدك (قالوا أنوء من لك و اتبعك الارذلون) ديديلر كه بز سكا ايمانى كتوررز حالبو كه سكا جاه و مالد اقل كسهلر اتباع ايدوبدر * ايمدى بو حالت انلره سخافت عقل و حطام دنيويه اوزره قصور رأيلردن ناشى ايدى حتى كه اول حطامدن مقلينك اتباعنى كنديلر كه اتباعنه مانع قيلديلر و انلك دعوت اولندقلى شيئه ايمانى اول شى مدعوك بطلانسه دليل ايدنديلر كانه انلك اتباعنى نظر و بصيرتله دكل ايديكه اتباعدن مقصود توقع مال و رفعت جاه اولمن ظن ايتديلر (قال و ما علمى بما كانوا يعملون) نوح عليه السلام ديديكه انلك اعمالنه بنم علم يوقدر كه انى ايشملري اخلاصله ميدر و يا حطام دنيويه دن برشيئه طمعه ميدر انجق بكا واجب اولان نسبه ظاهر حالرينه اعتباردر

ان حسابهم الاعلى ربى لو تشعرون انلك بواطئلى حسابى
 الله تعالىنك اراده كريمه سنه راجعدر كه اول اكا اعلمدر اكر شعوركز
 وار ايسه انى بيلورسز لكن جهالت ايدوب بيلديككزى سويلرسز
 (وما انا بطارد المؤمنين) بن سرك شهواتكزه اتباعله مؤمنلى
 طرد ايدر دكل تاسكه انلى طردله سرك نفوسكزى تطيب ايدم
 (ان انا الانذير مبين) بن دكل الا برر جملكه مكلفينى كفر ومعاصيدن
 انذار ايچون بعث اولئشم كركسه انلر اعزاء وياذلاء اولسونلر
 اويله اولسه بكا نيچه لائق اولور كه اغنيايى استماع ايچون فقرائى
 طرد ايدم وياخود بكا واجب اولان برهان واضحه سزى انذار ايدم
 يوخسه سزى ارضا ايچون انلى طرد ايتك دكل (قالوا لئن لم تنته يانوح
 لتكونن من المرجومين) ديدلر كه يانوح اكر بوقولكدن منتهى اولزسك
 شتم اولنور ويا طاش ايله اوريلنلردن اولورسن (قال رب ان قومى
 كذبون) نوح عليه السلام ديديكه يارب قوم بنى تكذيب ايتديلر اشبو
 قوله نوحك مرادى انلك تكذيبى اخبار دكلىدى * زيرا كه اكا برشى
 خفى دكلدر بلكه مرادى انلره بددا ايتسك سبين اظهار ايديكه
 اول حق تكذيلريد يوخسه انلك انى تخويف واستخفافى دكل (فاقبح
 بينى وبينهم قححا ونجنى ومن معى من المؤمنين) اويله اولسه بئله انلر
 بينى حكم ايت وبكا و بئله اولان مؤمنلره انلك قصد وشوم عمللرندن نجات
 وير كل (فانجيناها ومن معه فى القللك المشكون) اويله اولسه انك دعاسنه
 اجابت ايدوب انى وانكاه اولان مؤمنلى انجا ايتك شول سفينه ده كه
 اول انساندن رجال ونسائله وهر نوع حيواندن بررچفت اركل وديشيله
 طولشدى (ثم اغرقنا بعدالباقين) انلك ماعداسن كه سفينه ده
 كير مينلردر افراق ايتك (ان فى ذلك لآية) اشبو ذكر اولنان خبرده
 حقى قبولدن استكبار ايدنلره عبرت واردر (وما كان اكثرهم
 مؤمنين) نوح عليه السلامه قومك اكثرى مؤمن دكلىدى
 * ديلديكه اكا ايمانه كلان رجال ونسادن سكسان كشى ايدى (وان
 ربك لهو العزيز الرحيم) ربك جل شاناه اعداسنه قهر واولياسنه رحمت
 ايديجيدر (كذبت عاد المرسلين) عاد قومى رسوللى هود عليه السلامى
 وسائر مرسلينى تكذيب ايتديلر (اذقال لهم اخوهم هود لاتقون)

(انلك)

انلك نسبده قرد اشلى هود ديديكه الله تعالىدن قورقميسز كه انك
 غيريه عبادت ايدر سز (انى لكم رسول امين) بن سزه الله تعالىدن
 رسولنكه ارا كزده امانتله معروفم (فاتقوا الله واطيعون) الله تعالىدن
 قورقوب توحيد وطااعتدن سزه امر ايتديكم شئيده بكا اطاعت ايدك
 (وما اسألكم عليه من اجر ان اجرى الا على رب العالمين) دعوت
 ونصم اوزره سزدن اجر استمزم بلكه اجرم حضرت رب العالمين جل
 شانك عهده سنه در (أتبنون بكل ريع آية تعبثون) هر مكان مرتفعده
 ماره ايچون علامتى بنا ايدر سز كه سزه مرور ايدنلى سخره ايدم سز
 وياقصور بنا ايدر سز كه انكاه اقتخار ايدم سز ويا اول بنيانكز مسافرينه
 مهدى اوله حالبو كه انلر اسفار لرنده نجومله اهتدا ايدوب اكا احتياج
 اولزلر (وتخذون مصانع لعلكم تخلدون) وماخذ ماء وياقصور
 مشيده ويا حصون اتخاذا ايدر سز شول رجائله كيم دنيا ده خلود
 ايدم سز (واذا بطشتم بطشتم جبارين) چقان بر كسبه ي اخذ ايتسه كز
 جبارين عادى اوزره قتل وياضربه عقاب ايدر سز يوخسه انكاه قصد
 تأديب ونظر عاقبت ايترسز (فاتقوا الله واطيعون) ايمدى الله تعالىدن
 قورقوب اشبو افعالى ترك ايدك وسزى دعوت ايتديكم شئيده بكا اطاعت
 ايدك اول سزه انفعدر (واتقوا الذى امدكم بما تعلمون) اول الله تعالىدن
 قورقك كه هر خيردن بيلديككزله سزه امداد ايتدى (امدكم بأنعام
 وبنين وجنات وعيون) سزه انعام وبنين وجنات وعيونله امداد ايتدى
 (انى اخاف عليكم عذاب يوم عظيم) قورقرينكه سزه دنيا ده ويا آخرته
 يوم عظيم عذابى ايريشه * زيرا كه انعامه قادر اولان رب تعالى انتقامه
 دخی قادر اولور (قالوا سواء علينا أوعظت ام لم تكن من الواعظين)
 هود عليه السلامه ديدلر كه بزه مساويدر كرك بزى عذابه تخويف ايت
 وكرك تخويف ايتمه اشبو صددنده اولديغمز حالاتدن تحوّل ايدر دكللر
 (ان هذا الا خلق الاولين) اشبو بزه كتورديكك شىء دكل الا كذب
 اوليندر وياخود اشبو بزم خلقم دكل الا خلق اوليندر ديريلورز واولورز
 بعث وحساب اولمز اعتقاد قيلورز وياخود اشبو بزه كتورديكك دكل
 الاعادت اوليندر كه سنك كبي تزوير ونسطين ايدرلردى وياخود اشبو بزم
 اوزرينه اولديغمز دين اولينك خلق وعاديدر بزايسه انلره اقتدا ايدرز

لث (١٥)

وياخود اشبو صد دنده اولد يغمز موت و حیات عادت قدیمه در ناس
انك اوزره اولقدن زائل اولزلر (وما نحن بمعذبين) صد دنده اولد يغمز
حالت اوزره عذاب اولمزلر (فكذبوه فاهلكناهم) اويله اولسه هود
عليه السلامي تكذيب ايتديلر بز دخی اول تكذیبری سبيله انلری ریج
صر صرله هلاك ايتدك (ان في ذلك لآية) بزم انلره بو فعلزده جبارین
عملن ایدنلره عبرت وارددر (وما كان اكثرهم مؤمنين) والحال
انلك اكثری مؤمن دكلر ایدی اكر اكثری مؤمن اولسه ایدی بز انلری
هلاك ايتزدك اشبو آیتده بو امته تخویف وارددر که انلك عملی کبی عمل
ایتمیلر (وان ربك لهو العزيز الرحيم) ربك جل شانہ اكا عصیان ایدنه
عزیز واکا توبه واطاعت ایدنه رحیمدر (كذبت ثمود المرسلين) قوم
ثمود رسوللری صالح علیه السلامی و سائر مرسلینی تکذیب ایتدیلر
(اذ قال لهم اخوهم صالح ألا تتقون) انلك نسبه قدداشلری صالح
عليه السلام انلره دیدیکه الله تعالیدن قورقز میسرکه انك غیریه عبادت
ایدر سنز (انی لکم رسول امین) بن الله تعالیدن سنزه رسول امین
(فاتقوا الله واطيعون) ایمدی الله تعالیدن قورقوب سنزه تبلیغ ایتدیکم
انك اوامر و نواهیسنده بکا اطاعت ایدك (وما اسألكم عليه من اجر
ان اجرى الا على رب العالمين) اول تبلیغ اوزره سنزدن اجر استمزم بلکه
بنم اجرم مغفرت ایتکه حضرت رب العالمین عهده سننه در (أنترون
فیما هاهنا آمنين) شول صد دنده اولد يغمز خیرده اشبو حیات دنیاده
موت وزوال و عذابدن امن اوزره مخلد ترك اولنغی زعم ایدر میسر
(فی جنات و عیون و زروع و نخل طلعهها هضيم) که جنات و عیون و زروع
و نخلده ترك اولنه سنز که اول نخلک طلعی لطیف لیندر تمرینک لطفیچون
وزیرا که نخل اشادر و انات نخلک طلعی ايسه الطفدر (وتختون
من الجبال بیوتا فارهين) و طاغلرده بیوت نقب ایدر سنز اول عملکرده
ناعمین فرحین اولد يغمز حالده (فاتقوا الله واطيعون) الله تعالیدن
قورقوب امریمه اطاعت ایدك * زیرا که بنم امریمه اطاعت اكا اطاعتدر
(ولا تطيعوا امر المرسلين) یو خسه مشرکین امریمه اطاعت ایتکز که
انلر طقوز کسننه ایدیکه ناقدی عقر ایتدیلر (الذين یفسدون فی الارض
ولا یصلحون) که انلر ریوزنده شرك و عصیانله افساد ایدرلر الله تعالینک

(امرینه)

امرینه اطاعت ایتزلر (قالوا انما انت من المجرین) صالح علیه
السلامه انلر دیدیلر که سن شول قومدن سنکه مرارا سحر اولنغله عقلرینه
خلل ایروبدر و یاخود طعام و شرابه معلل مخلوقیندنسن (ما انت
الا بشر مثلهنا فأت باية ان كنت من الصادقين) سن دکل الیزم کبی
بشرسن یر و ایچرسن ملک دکلسن * ایمدی اکر بزه الله تعالینک رسولی
اولد يغمزده صادق ايسك قولك صحتنه بزه بر علامت کتورکه سنی تصدیق
ایدهلم (قال هذه ناقة لها شرب و لکم شرب يوم معلوم) اويله اولسه
انلك اقتراحيله اشارت ایتدکاری صخره دن بر ناقة عشاء اخراج ایدوب
عظمده انك مثلی ولد ولادتند نصکره صالح علیه السلام انلره دیدیکه
اشبو اقتراحکز سبيله الله تعالینک بنم صدقه دلالت ایدر اظهار ایتدیکی
ناقه درکه انکچون ماعدن نصیب وادرکه انك جیعن شرب ایدردی
و سنزچون دخی يوم معلوم شربی وارددر * ایمدی کندی شربکز اوزره
اقتصار ایدوب اكا شربنده مزاجه ایتکز (ولا تمسوها بسوء فإحدكم
عذاب يوم عظيم) و اول ناقدی زینهار سوله كرك ضرب و یا عقرله مس
ایتمکز که سزی يوم عظیم عذابی اخذ ایدر * روایت اولندیکه فصده
نام بر رجل شقی بر مضیقدن براوق آتوب ناقدنک ایاغنه ایرکوردی ناقه
اندن دوشیچك ثمودك رجال و نسا و صبیانی رضاسیله قدار نام شقی انی
عقر ایتدی (فاعقروها فاصبحوا نادمين) چون ناقدی صالح علیه السلامه
مخالفت ایدوب عقر ایتدیلر کندیلره عذاب نزولی خوفندن و یا عذاب
نزولنی کوردکارندن جیعی نادم اولدیلر لکن اول ندامت توبه ایچون دکل
ایدی (فأخذهم العذاب) اويله اولسه انلری عذاب موعود اخذ ایتدی
(ان في ذلك لآية) اشبو مذکورده اعتبار اهلنه عبرت وارددر (وما كان
اکثرهم مؤمنين) حالبوکه انلك اكثری صالح علیه السلامه مؤمن
اولمدی اشونده اشارت وارددر که اکر انلك اكثری و یا نصفی مؤمن اولسه
انلری عذاب اخذ ایتدیدی (وان ربك لهو العزيز الرحيم) ربك جل
شانہ اكا مخالفت ایدنه انتقام ایدیبیدر و اطاعت ایدنه رجعت ایدیبیدر
(كذبت قوم لوط المرسلين) لوط علیه السلامی قومی و سائر
مرسلینی تکذیب ایتدیلر (اذ قال لهم اخوهم لوط ألا تتقون) شول وقتکه
نسبا قدداشلری لوط علیه السلام انلره دیدیکه الله تعالیدن قورقز میسرکه

انك امرينه مخالفت ايدرسن (اني لكم رسول امين) بن سزه
 الله تعالىدن رسول ووحينه امين (فاتقوا الله واطيعون) ايمدى
 الله تعالىدن قورقوب اوامر و نواهيسنى تبليغمده بكا اطاعت ايدك
 (وما اسألكم عليه من اجران اجرى الاعلى رب العالمين) واني تبليغم اوزره
 سزدن اجر استمزين بلكه اجرم حضرت رب العالمين عهده سنده در (اناتون
 الذكران من العالمين) اولاد آدم ينندن ذكورى و طى ايدرميسن انائى
 كثرته ذكورينه غالب ايكن وياخود بوفاحشه ايله سائر انسان وحيوان
 بينده تخصصى ايدرسن (وتذرون ما خلق لكم ربكم من ازواجكم
 بل انتم قوم عادون) وربكز جل شانه سزه استمتاع ايچون مجانسكز
 انانندن خلق ايتديكنى ترك ايدرسن بلكه سز حد شهوتدن متجاوزلر سز
 شول حيثيتدكه سائر ناس بلكه حيوانات اوزره زياده مى اولديكز
 وياخود اشبو جريمه ي ارتكابكز ايچون عدوانله وصف اولمغه
 احقاسن (قالوا لئن لم تنته يا لوط لتكونن من المخرجين) ديديلر كه يالوط
 اكر بزم فعلزى انكاردن منتهى اولمزشك قريه دن اخراج اولسانلردن
 اولورسن (قال انى لعنكم من العالمين) لوط عليه السلام ديديكه
 بن سزك عملكزه بغض شديد ايدنلردنم اكا انكاردن ابعادكزه ووقوف ايدر
 دكان (رب نجنى واهلى مما يعملون) يارب بكا واهله انلك شوم
 وعذابندن نجات وير (فنجينا واهله اجمعين) اويله اولسه
 بن انك دعاسنه اجابت ايدوب انى واهل بيتى ودينده اتباعى عذابدن
 انجا ايتك چنانكه لوطك قومنه عذاب ايردى (العجوزا فى الغابرين)
 الا لوطك مرأسى عذابدن باقيلرده تقدير اولديغندن انجا اولمدى
 شول سببدنكه فاحشه يه معينه وراضيه ايدى (ثم دمرنا الآخرين) بعده
 آخرينى اهلاك ايتدك (وامطرنا عليهم مطرا) انلك بلادلردن طشره
 بولسانلرينه سمدان طاش ياغدردق (فساء مطر المنذرين) اول انذار
 اولسانلرك يغمورى نه چركين اولور (ان فى ذلك لآية وما كان اكثرهم
 مؤمنين) اشبو مذكورده اعتبار اهلنه عبرت واردر والحال انلك اكثرى
 لوط عليه السلامه مؤمن دك ايدى (وان ربك لهو العزيز الرحيم)
 ربك جل شانه اعداسى اوزره قهرله غالبدر واولياسنه رحيمدر (كذب
 اصحاب الايكة المرسلين) اصحاب ايكه شعيب عليه السلامى وسائر

(مرسلين)

مرسلينى تكذيب ايتديلر * ايكه مدين قربنده غيظه در انده ناسدن
 بر طائفه اولوردى شعيب عليه السلام انلردن اجنبى ايكن انلره بعث
 اولندى مدينه بعث اولنديغى كى (اذ قال لهم شعيب ألا تقون) شعيب
 عليه السلام انلره ديديكه الله تعالىدن قورقز مزميسركه اكا عصيان
 ايدرسن (انى لكم رسول امين) الله تعالىدن بن سزه رسول امين
 بعث اولندم (فاتقوا الله واطيعون) الله تعالىدن قورقوب بكا
 اطاعت ايدك (وما اسألكم عليه من اجران اجرى الاعلى رب العالمين)
 انك اوامر و نواهيسنى سزه تبليغم اوزره سزدن اجر استمزين بلكه اجرم
 حضرت رب العالمين عهده سنده در * اشبو ذكر اولنان بش قصه ي
 امور مذكوره ايله تصديرنده دلالت واردر كه مرسلينك بعثنى مقصوده
 اوله اكا كه حق تعالى ي ناسه بيلديرلر و اكا اطاعتله ثوابه ايرلر
 وعقابندن ايريلرلر وبوامورده انبياء متقين ايديلر اكرچه بعض تفاربعده
 مختلفين ايسلرده مطامع دنيه واغراض دنويه دن مبرئين اولدقلى حالده
 (اوفوا الكيل ولا تكونوا من الخسرين) كىلى اتمام ايدك يوخسه
 تطفيله حقوق ناسى اخسار ايدنلردن اولمكز (وزنوا بالقسطاس
 المستقيم) وميزانى عدلله وزن ايدك (ولا تبخسوا الناس اشياءهم)
 وناسك حقوقدن برشى نقص ايتكز (ولا تعثوا فى الارض مفسدين)
 يريوزنده قتل وغارت وقطع طريقله فساد سعى ايتكز (واتقوا الذى
 خلقكم والجيله الاولين) اول الله تعالىدن قورقك كه
 اول سزى و خلائقدن سزى تقدم ايدنلرى خلق ايتدى (قالوا انما
 انت من المسحرين) ديديلر كه سن مرارا سحر اولمغه عقلكه خلل
 ايرمشلردنسن (وما انت الا بشر مثلنا) والحال سن بزم كى بشر سن
 ملك دكلسن (وان نظنك لمن الكاذبين) وبزسنى دعوا كده كاذبلردن
 ظن ايدرز (فأسقط علينا كسفا من السماء ان كنت من الصادقين)
 ايمدى سمدان اوزریمزه قطععه يعنى عقوبت ايندر اكر دعوا كده
 صادقلردن ايسك (قال ربى اعلم بما يعملون) شعيب عليه السلام
 ديديكه ربم جل شانه سزك كىل ووزنى نقص ايتديككز عمله وكرك
 مستحق اولديككز عقابه اعلمدر حكم ومشيئت انكدر ديلر سه سمدان
 اوزر يركزه عقوبت اينديرر ويا عذاب اخرله جزا قيلور (فكذبوه

فأخذهم عذاب يوم الظلة) انلر ايسه انى تكذيب ايتديلر اويله اولسه
 اقتراح ايتدكلرى شىء مثلنده يدى كون اوزرلرينه حر تسليط اولنوب
 حتى كه نهزلى غلبان ايتدى اول حالتده بر سحابه انلره ظله اولدى
 جبعى انك تحتنه اجتماع ايتدكده اوزرلرينه آتش ياغوب يانديلر يوم
 ظله عذابله اخذ اولنديلر (انه كان عذاب يوم عظيم) اول عذاب
 يوم ظله يوم عظيم عذابى ايدى (ان فى ذلك لآية) اشبو مذكوره
 كيل ووزنى نقص ايدنلره عبرت وموعظه واردر (وما كان اكثرهم
 مؤمنين) انلرك اكثرى شعيب عليه السلامه مؤمن دكلىدى (وان ربك
 لهو العزيز الرحيم) ربك جل شاناه عاصيلره عزيز ومطعيلره رحيمدر
 الله تعالى اشبو يدى قصه بى اختصار وجهى اوزره ذكر ايلديكه
 پيغمبريمز صلى الله عليه وسلمه تسليه ومرسلينى تكذيب ايدنلره تهديد اوله
 (وانه لتنزىل رب العالمين) اشبو قرآن عالملى خلق ايدن رب تعالينك
 تنزىل ايتديكيدر (نزل به الروح الامين على قلبك لتكون من المنذرين
 بلسان عربى مبين) كه آنكله امين وحى اولان جبريل عليه السلام
 يا محمد سنك قلبك اوزره نزول ايتدى تاكه مخوفندن اوله سن هرشيئدنكه
 فعل وياتركى عذابى مؤدى اولور شول معناسى واضح لسان عربيله
 كيم قومك انكله ملزم اولوب عدم قبوله عذرلى قالمه وياخود لغة
 عربيه ايله تخويف ايدن انبيادن اوله سنكه انلر هود وصالح واسماعيل
 وشعيب ومحمد عليهم السلامدر (وانه لى زبر الاولين) اول قرآنك
 ذكرى ويامعناسى ككتب متقدمه ده ثابتدر (اولم يكن لهم آية ان يعلمه
 علماء بنى اسرائيل) قرآنك صحتنه ويامحمد عليه السلامك نبوته علامت
 اولديميكه بنو اسرائيل علماسى كتابلرنده مذكور نعتيله انى تعريف ايدلر *
 روايت اولنديكه اهل مكه مدينه بهودينه پيغمبريمز صلى الله عليه
 وسلمك نعتندن سؤال ايجون رسول كوندر دكلرنده يهود ديديلر كه انك
 خروجى وقتى كلشدر ونعتنى ذكر ايتديلر اكا بناء الله تعالى ديديكه
 محمد عليه السلامك شاننده شكى ايدرلر انلر ايجون علامت اولديميكه
 علماء بنى اسرائيل انى انلره كتابلرنده ذكر اولنديغى منوال اوزره خبرويرديلر
 ايمدى اول انك صدقنه كفايت ايدر (ولو نزلناه على بعض الاعجين
 فقرأه عليهم ما كانوا به مؤمنين) اكر بز اول قرآنى اعجينك برينه انزال

(ايتسيدك)

ايتسيدك كه اول لساننده عجم اولديغندن كلامنى تبين ايتياندر
 واول اعجى قرآنى لغة عربيكه غيرى اوزره انلره اوقوسه فرط عناد
 واستكبار ويا عدم فهم ويا عجم اتباعدن اعراض واستكبارلندن اكا
 ايمان كتورميهلردى (كذلك سلكناه فى قلوب المجرمين) اشبو منوال
 اوزره شرك وتكذيبى عربك مشركلى قلوبنه ادخال ايدوز (لا يؤمنون به
 حتى يروا العذاب الاليم) اويله اولسه عذاب اليمى كورمينجه اول قرآنى
 تصديق ايتزلردى (فيا تيهم بغتة وهم لا يشعرون) اول عذاب انلره
 دنياده ويا آخرنده فجأة كلور حالوكه انك كلمسهنه انلرك شعورى اولز
 (فيقولوا هل نحن منظررون) تحسر وتأسفلندن ديهلر كه نوليدى
 بز تعذيبدن تأخير وامهال اولنسيدك كه ايمانه كلوب تصديق ايديدك
 (أفبعذابنا يستعجلون) بزم عذابمزه استعجالى ايدرلر شول قولريله
 كيم اوزريمزه سمدان طاش ياغدر ودخى بزه ايعاد ايتديكك شىء
 كتور ديو استزلردى عذاب نزولنده نولديكه استمهال ايدرلر (أفرايت
 ان متعناهم سنين ثم جاءهم ما كانوا يوعدون ما اغنى عنهم ما كانوا يمتعون)
 يا محمد كوررميسنكه اكر بز انلرى نيجه ييللر نعيم طويلله تمنيع ايتسهوز بعده
 انلره وعد اولندقلرى عذاب كلسه اول نعيم طويللى اول عذابلى دفعنه
 ويا تخفيفنه مفيد اوليه ايدى (وما اهلكنا من قرية الا لها منذررون)
 هيچ برقریه اهلنى اهلاك ايتدك الا انك رسوللى وار ايديكه ازام
 حجت ايجون انلرى انذار ايدرلردى (ذكرى وما كنا ظالمين) اشبو انلره
 تذكره در بز ظالمردن دكلرزه ظالمرك غيرى ويا انذاردن اول كسه بى
 اهلاك ايدوز (وما تنزلت به الشياطين) اول قرآنله شياطين تنزل
 ايتدى * تنكيم مشركين زعم ايدرلر كه اول شياطينك كه نهديه القاسى
 قبيلندن اوله (وما ينبغى لهم وما يستطعون) اول شياطينه هيچ
 صحيح اولمزه قرآنله نزول ايدلر واکا قدرتلى دخى اولز (انهم
 عن السمع لمعزولون) زيراكه انلر اهل سما كلامنى استماعدن محجوبلدر *
 زيراكه اول مشروطدر كه صفات ذاته مشاركت وفيضان حق قبول
 وصور ملكوته انتقاش بولنه نفوس شياطين ايسه خبيثة ظلمانيه
 شريرة بالذات اولديغندن انى قبول ايدر دكلدر والحال قرآن حقايق
 ومغيباتى مشتملدر كه ملائكهكك غيريدن تلقيسى ممكن اولز (فلا تدع

مع الله الها آخر فتكون من المعذبين) ايمدى الله تعالى ايله بيله اله آخر
اتخاذ ايتكل كه معذبون اولورسن اكرچه انك عندنه كريم ايسكده
ابن عباس رضى الله عنهما ايدر الله تعالى اشبو نكله غيرى تحذير ايدر
زيرا كه يا محمد سن بكا اكرم خلقسن اكر بدن غيرى اله اتخاذ ايتسك
سكا عذاب ايدر دم فكيف كه سنك غيرى اوله (وانذر عشيرتك الاقربين)
وعشيرتكى الاقرب فالاقرب انذار ايت زيرا انلك شاننه اهتمامك
اهمدر * روايت اولنديكه اشبو آيت نازل اوليحق پيغمبريمز صلى الله
عليه وسلم طوروب ديديكه يامعشر قريش نفسليركزى الله تعالىنك
عذابندن اكا ايمان وامرينه اطاعتله قورتاريكز والا بكا قرابتكز سزه
برشى مفيد اولز يابنى عبد مناف يا عباس بن عبد المطلب يا صفية عمة
رسول الله يا فاطمة بنت رسول الله هربريكز نفسليركزى عذاب اللهدن
تخليص ايديكز يوخسه اكا مخالفتله بكا انتسابكز برشى مفيد اولز
(واخفض جناحك لمن اتبعك من المؤمنين) مؤمنردن سكا اتباع
ايدنله الانه جانب وتواضع ايت يعنى انله كيم ايمانه داخل اولغه مشارف
اولورل ويا لسان ايله سنى تصديق ايدرل (فان عصوك فقل انى برى بما
تعملون) اكر سكا عصيان ايدوب اتباع ايتزلرسه ديكلك سرك
ايشلديككز شرك وعاصيدن بريئ (وتوكل على العزيز الرحيم) توكل
ايت اول الله تعالى به كيم اعداسنه قهره واولياسنه نصره قادر اولور تاكه
سكا عصيان ايدنك وغيرينك شرنى سندن كف ايد (الذى يراك حين
تقوم وتقلبك فى الساجدين) كه اول سنى تهجده ويا جميع مهامكه
قيامك حيننده وصلاتنه قيام وركوع وسجود وقعودله تقلبكى كورر
ويا خود احوال متعبدن تصفحنده ترددكى كورر شول وقتكه قيام
ليلك فرضيتى نسخ اوليحق اول كيمه اصحابك بيوتن طواف ايتديكه انلك
طاعاتى كثرته حرصندن نه ايشلدكارين كوره ذكر الله وتلاوتله بيوت
زنا بيرده كى كى دندنه لرى ايشيديلور بولدى (انه هو السميع العليم)
اول سنك مقالتيك ايشيدر ونيتكى بيلور (هل انبئكم على من تنزل
الشياطين تنزل على كل افك اثم يلقون السمع واكثرهم كاذبون)
سزه خبر ويره نيكه شياطين نه حالو كسه به تنزل ايدر * ايمدى انلر
هر كذاب فاجره تنزل ايدرلر كه انلر كهنه در ملائكه دن استراق سمع

(ايتدكردن)

ايتدكردن نصركه كهنه به القا ايدرلر والحال انلك اكثرى كاذبلر در
* وقتا كه قرآن شياطين تنزلندن اولمى صحيح دكل ايديكنى بيان ايلدى
انى تا كيد ايچون انلك محمد عليه السلامه تنزلى صالح اولمديغن ايكي
وجهله اظهار ايلدى * برى بوكه انلك تنزلى شرير كذاب كثير الاثم
اوزره اولور محمد عليه السلام ايسه انك خلافتى ملاسدر * برى دخی
بوكه اول افاكون كه كهنه در سمعى شياطينه القا ايدرلر وعلمده
نقصانلر ايچون اول شياطيندن ظنون و امارات تلقى ايدوب تخيلاتلرى
حسبنجه اكا شول اكثرى واقع مطابق دكل اشياى ضم ايدرلر * تكيم
حديثه كديكه (الكلمة يحفظها الجنى فيقرؤوها فى اذن وليه فيريد فيها
اكثر من مائة كذبة) شول كلمه كه جنى انى ملائكه دن حفظ ايدوب ولىسى
كاهن قولاغنه او قور كاهن ايسه اكا يوز كذبندن اكثرى زياده ايدر
محمد صلى الله عليه وسلم ايسه انجلين دكلدر * زيرا اول مغيبات كثيره
لايحصادن خبر و يرويدر كه جيعنك حقيقتى ظاهر اولوبدر و يا خود
اول شياطين ملائكه دن مسموعلر بى اوليالرينه القا ايدرلر حالو كه انلر
اكثر اقواللرند كاذبلر در * زيرا كه ايشلدكلى ملائكه نك سويلديكى
نصف اوزره دكلدر يا اول شياطينك شرارتلر ايچون ويا فهم ويا ضبط
وافهامده قصورلر ايچون (والشعراء يتبعهم الغاؤون) شعرايه
غاويلر اتباع ايدرلر كه انلر مشركون ويا شياطين ويا سفها ويا شطار
قريشدر محمد صلى الله عليه وسلم اتباعى ايسه انلك بى دكلدر اشبو آيت
شول شاعرلر حقنده نازل اولوبدر كه شعر سويلوب محمد صلى الله عليه
وسلم سويلديكى كى بزخی سويلرلر ديرلردى * وپيغمبريمز صلى الله
عليه وسلمى هجو ايدوب انلرى استماع ايچون قوملرينك سفهاى انلر
قته جمع اولوردى (ألم تر انهم فى كل واديهيمون) كورمز ميسنكه
انلر كلام اوديه سندن هر واديه حيرت اوزره كيدرلر * زيرا اكثر
مقدماتلرى خيالاتده كه حقيقتى اولز واغلب كلياتلرى تمزيق اعراض
وقدح انساب ووعد كاذب واقطار باطل ومدح من لا يستحقده در
(وانهم يقولون مالا يفعلون) وانلر شعرلرند ايشلدكلى شئى ايشلدك
ديو او كنورلر (الا الذين آمنوا وعملوا الصالحات وذكروا الله كثيرا
واتصروا من بعد ما ظلموا) الاشول شعرايه غاويلر اتباع ايتزلر كه

خوف ایدلر (الامن ظلم ثم بدل حسنا بعد سوء فانی غفور رحیم) مکرمر سلیندن
 اول کسه که اندن صدور ایش ذنب سببیه نفسنه ظلم ایده آدم و یونس
 و داود و اخوة یوسف کبی صلوات الله علیهم اجمعین و اول ظلمند نصکره
 توبه ایلیه ایدمی بن انی مغفرت و رحمت ایدرین (و أدخل یدک فی جیبک
 تخرج بیضاء من غیر سوء) و الکی درعک جیبینه قویوب چیقارغل که انی
 بر صبر بیضاء اولدیغی حالده چیقار هسن (فی تسع آیات الی فرعون و قومه)
 فرعون و قومنه طقوز آیتله و یا اول ایکی آیه مقارن طقوز آیتله بیله مرسل
 اولدیغک حالده کیتکل که اول عصا و یددن غیر ی بحرک انفلاقی و طوفان
 و جراد و قمل و ضفادع و دم و ماللرینک طمسی و بوادیده جذب و مزارعه
 نقصاندر (انهم کانوا قوما فاسقین) زیرا که انلر قوم عاصی اولدیلر (فلما جاءتهم
 آیاتنا مبصرة) وقتا که موسی بزم طقوز آیاتمزی ظاهره و بینه اولدیغی
 حالده انلره کتوردی (قالوا هذا سحر مبین) دیدیلر که اشبو بر سحر در که
 سحریتی آشکاره در (و جحدوا بها) و اول آیاتی بیلدکارند نصکره انکار
 ایتدیلر (و استیقنتها انفسهم ظلما و علوا) انک صدقنه و الله تعالیدن ایدو کنه
 استیقان ایدرلر ایکن اول انکارلری نفسلرینه شرکه ظلم و ایمانندن
 ترفع ایدر اولدقلری حالده (فانظر کیف کان عاقبة المفسدین)
 نظر ایتکه مفسدلرک عاقبتی نیچه اولور دنیا ده اغراق و آخرتده احراق
 اولور (ولقد آتینا داود و سلیمان علما) بز داود و سلیمانه علمدن
 بر طاقفه و یردک که اول علم حکم و قضا در (وقالا الحمد لله الذی فضلنا
 علی کثیر من عباده المؤمنین) و اول ایکیسی دیدیلر که الله تعالی یه
 جد اولسونکه بز نبوت و کتابله و تسخیر جن و انس و شیاطینله و فهم
 کلام طیر و بهایم و ملکه عباد مؤمنیندن کثیر اوزره تفضیل ایتدیکه
 انلره بو خصال و یرلدی * اشبو آیت علمک شرفنه و اول اجل نعمدن
 ایدیکنه دلیلدر و علم و یریلن کشی عباد مؤمنینک کثیری اوزره مفضل اوله
 (و ورث سلیمان داود) سلیمان علیه السلام باباسی داود علیه السلامک
 نبوت و یا ملک و یا علمنه وارث اولدی اشبو اشیاده انک مقامنه قائم اولغه
 سائر اوغلاری دکل حالوکه انلر اون طقوز کشی ایدیلر * دینلدیکه سلیمان
 علیه السلامه داود علیه السلامه و یریلانندن زیاده ریح و شیاطین

(تسخیر)

تسخیر ایدلدی و سلیمان علیه السلام ملکده داوددن زیاده و اندن
 اقضی ایدی و داود علیه السلام تبعیدده سلیمان علیه السلامدن اشد ایدی
 و سلیمان علیه السلام نعم الله داوددن اشکر ایدی (وقال یا ایها الناس
 علمنا منطق الطیر) و سلیمان علیه السلام الله تعالینک نعمتی تشهیر
 و اکا اعتراف و معجزه ذکر یله ناسی تصدیقه دعوت ایدوب دیدیکه
 یا ناس بز منطق الطیر تعلیم اولندق * و منطق تعارفده هر لفظدر که انکله
 ما فی الضمیردن تعبیر اولنه اول کرک مفرد و یا مر کبدر و اصوات حیوانیه
 تخیلاته تابعه اولدیغی حیثیتدن عبادات منزلنده در ظن اولنور که
 سلیمان علیه السلامک بر حیوان صوتنی ایشتدیکنده قوت قدسیه ایله
 انک تصویت ایتدیکی تخیلی و طلب ایتدیکی غرضی بیلوردی اشبو
 قیلنددر که اول بر بلبله مرور ایتدیکه اول تصویت و هم رقص ایدردی
 دیدیکه اشبو بلبل دیر که (اذا اكلت نصف تمره فعلى الدنيا العفاء)
 چون نصف تمره یدم دنیا اوزره دروس و ذهاب اولسون و فاخته یی
 تصویت ایدر ایشدوب دیدیکه اشبو فاخته دیر که (لبت الخلق لم یخلوا)
 نولیدی بو خلق یراد لیدی ظن اولنور که بلبلک آتی دیسی شبع و فراغ بالندن
 ایدی و فاخته نک مقاسات شدت و تألم قیلندن ایدی (واوتینا من کل
 شیء) و انبیا و ملوکک و یرلدیکی هر شیئدن یعنی انلرک و یرلدیکی اشیانک
 کثیر ندن بز دخی و یرلدک (ان هذا لهو الفضل المبین) اشبو بزه و یریلن
 نعم کثیره بز دن غیریه و یریلن اوزره زیاده ظاهره در سلیمان علیه السلامدن
 اشبو قولک و رودی شکر و ثنا وجهی اوزره ایدی یوخسه فخر وجهی
 اوزره دکل * روایت اولندیکه سلیمان علیه السلام یدینوز ییل و الی آی
 اهل دنیا نک جیهنه جن و انس دواب و طیر و سباعه ملوکک ایتدی و هر
 شیء نطقنک علمی و یرلدی و زماننده صنایع عجیه احداث اولندی
 (وحشر سلیمان جنوده من الجن و الانس و الطیر فهم یوزعون)
 سلیمان علیه السلام ایچون جن و انس و طیر دن جنودی جمع ایدلدی
 بر مسیرنده که اول انک صد دنده ایدیکه انلر سوق و هم جمع ایدیلور لر دی
 یعنی ایلرو کیدنلری منع اولنور دیکه کروییه قلانلری انلره ایریشه تا که
 مجتمین اولوب انلردن کسه تخلف ایتیه * روایت اولندیکه سلیمان
 علیه السلام معسکرینک طولی و کرک عرضی یوزر فرسخ ایدی و انک

ذهب و ابريشمى طولى و عرضى بر فرسخ بر بساطى و اريد يکيه انى اکا
جنيل نسج ايتشيدى انک وسطنه سليمان عليه السلامک التوندن منبرى
وانک حولنه التون و کومش کرسيلر قونوردى اول منبر اوزره سليمان
عليه السلام و التون کرسيلره انبياء و کومش کرسيلره علماء اوتورلردى
وانک حولنه ناس و ناسک حولنه جن و جنک حولنه شياطين طورلردى
و سليمان عليه السلامک باشى بر ابرنده هواه قوشلر قناد آچوب کولکه
اولوردى کونشک حرندين انى قورردى وانک بساطنى امريله باد صبا
کتورردى صباحدن اويلهيه دکن بر آيلقى مسافهيه و اويله دن
اخشامه دکن اول دکلو مسافهيه ايرردى * روايت اولنديکه سليمان
عليه السلامک طولى و عرضى يوز فرسخ معسکرينک يکرمى بش فرسخنده
انس و يکرمى بشنده جن و يکرمى بشنده و حوش و يکرمى بشنده طيور
اولوردى و اول معسکر اوزره قواريردن بيک بيت دوزلمشديکه اوچيوزنده
حره خانولرى يديوزنده سريه لرى اولورلردى ريح عاصف اول معسکرى
قالدير و ريح رخاء يورودردى بروقتده اول هواه معسکرنده جنوديله
کيدرکن اکا وحى الهى کلدیکه سکا ملو کتکده زياده ايلدمکه خلايقدن
هرکه سنک شانکده برسوز سويليه الا اول سوزى سکا ايرکورم ديلديکه
سليمان عليه السلام اول معسکرنده تيوردن تورلر و مطبخلر اتخاذايتشيدیکه
انده اتمکلر و آشلر پشورلردى قدور عظاملرى و اريد يکيه هر برينه اون
جزور قونوردى (حتى اذا اتوا على واد النمل) حتى قچانکه وادى
النمله ايرديلر که اول طائفه ويا ارض شامده بروادى کثير النمل ايدى
* ديلديکه اول واديه جنيلر ساکن اولور و انده اولان نمل اول جنيلرک
مراکبدر و اول وادينک نملی ذئاب امثالنده ايدى لکن مشهور اولان انک
نملی معروف اولان نمل صغير اوله (قالت نملة) اول نمل طائفه سنک
ملکى ايکى قنادلو ايدى بر قولده عرجاء ايدى اسمى طاحيه ويا جزمى ايدى
اول نملة ديدیکه (يا ايها النمل ادخلوا مساکنکم لا يحطمنکم سليمان
وجنوده وهم لا يشعرون) يا نمل طائفه سى مسکنلريکزه داخل اولک که
سليمان و جنودى سزى کسر ايتسون حالبوکه سزى کسرلرينه شعورى
اولز زيرا که شعورلرى اولسه انى ايدر دکلردر اول نملة نکل قولنى ريح
سليمان عليه السلام سمعنه اوج ميل مسافه دن ايرکوردى اويله اولسه
سليمان عليه السلام جنودينى حبس ووقف ايتدى حتى که اول طائفه

(نمل)

نمل بيوتلرينه دخول ايتديلر (فتبسم ضاحکا من قولها) سليمان عليه السلام
انى ايشيديمک انک حذر و تحذيرينه ويا قومنک مصالحنه اهتداسنه تعجب
ويا حق تعالينک انى نملة هممنى ادراکله تخصيصنه سرورندن ضحکه
شروع ايدر اولديغى حالده تبسم ايتدى بعده سليمان عليه السلام رب
تعالينک اکا انعامنه حمد ايدوب (وقال رب اوزعنى ان اشکر نعمتک
التي انعمت على وعلى والدي) ديدیکه يارب بکا الهام ايتکه نعمتکه شکر
ايدمکه انى بکا ووالدينه انعام ايتک سليمان عليه السلام انده والدينى
ذکرىنى درج ايلدى نعمتى تکثير ويا نعميم ارادتيه زيرا که والدينه
اولان نعمت اکا دخى نعمتدر وولده اولان نعمت والدينه اولان نعمتدر
خصوصا که اول ولدتقى اوله انک دما وشفاعتيله نفعلنور (وان اعمل
صالحا ترضاه) و عمل صالح ايشليکه سن اکا راضى اوله سن (و ادخلنى
برحمتک فى عبادک الصالحين) و رحمتکه بنى جننده عباد صالحينک
جمله سنه ادخال ايت (وتفقد الطير فقال ما لى لا ارى الهدهد ام كان
من الغائين) سليمان عليه السلام طيورى تطلب ايتدیکه هدهدى کوره که
اول هدهدک رئيسى ايدى انى انلرک اراسنده کورمچک ديدیکه بکا
نولديکه طيورک جمله سنده هدهدى کورمز مکه محب نه اولدى يوخسه
اول غابلردنيدر وقتا که هدهدک غيبتى سليمان عليه السلامه محقق اولدى
ديدیکه (لا عذبه عذابا شديدا) والله بن اول هدهده عذاب شديد ايدم
ریش و ذنبن يولوب کونشه قويم بروجهله کيم نمل و هوامدن امتناعه مجالى
اويله ويا انى قطرانه بوله يوب کونشه قويم ويا انى قفصه قويم ويا انى
مالوفندن آيرم ويا انى ضديله بريره حبس ايدم (اولاذبحنه) ويا خود
انى بوغازليم (اولياتينى بسلطان مبين) ويا خود بر برهائله کله کيم اول
انک عذربنى تبين ايدم * مفسرون هدهدک سبب غيبتنده ديديلر که سليمان
عليه السلام بيت المقدس بناسندن فارغ اوليحق عزم ايتدیکه ارض حرمة
خروج ايدم اويله اولسه انس و جن و شياطين و وحوش و طيورى
معسکرينه بند يروب حتى که ريح انلرى حرمة ايرکوردى سليمان عليه السلام
ماشاء الله حرمة اقامت ايتديکنجه هر کونده بشيک دوه و بشيک صغر
ويکرمى بيک قيون قربان ايدردي بعده بر صباحن جنوديله مکهدن چيقوب

وقت زواله دکن صنعایه ایردیکه اول مکه دن بر آیلق مسافه در انده
بر ارض حسنا کوردیکه حضرت وزهره سی جانه صفا و پرردی
دیلدیکه اول ارایه اینه نماز قیلوب انده غدالنه اول نزوله مشغول ایکن
هدهد عزم ایلدیکه هوایه صعود ایده و اطراف دنیایه نظر ایدوب
سلیمان علیه السلام اشغالی تمامنده یاننده بولنه چون هدهد هوایه
صعود ایدوب یمین و شماله نظر ایدیکه بلقیسک بستان کوردی انک
خضرتنه میل ایدوب فی الحال اکا هبوط و نزول ایتدی انک اسمی
یعفور ایدی انده برهدده ملاقی اولدیکه اسمی عنفیر ایدی اول یعفوره
قاندن کلور قانده کیدرسن دیدی یعفور ایتدی صاحب سلیمان بن داودله
شامدن کلورینکه اول انس و جن و شیاطین و وحوش و طیور و ریاحک
ملکیدر عنفیر ایتدی کرچه سنک صاحبکه ملک عظیم ویرلش لکن
بودیار یمین ملکه سی بلقیس اندن دون دکدر زیرا تحت یدنده اون ایکی
بیگ قانیدی اولوب هر قانید یوزر بیگ مقاتله موکدر کل سنی انک
مملکتنه ایلته ینکه کورده سن یعفور ایتدی قورقرینکه نماز وقتنده سلیمان
علیه السلام صویه محتاج اولوب بنی تفقد ایده عنفیر ایتدی اشبو مملکه نک
خبرین اکا کوتور یچک انی مسرور ایدرسن اولیه اولسه یعفور اکا
مواقفت ایدوب کتدی حتی که بلقیس و مملکتنه نظر ایتدی اندن رجوع
ایدوب سلیمان علیه السلام قتنه کتدی حالبوکه اولیه وقتی چیقوب
ایکندی وقتی کیرمشدی وقتاکه سلیمان علیه السلام اول منزله نزول
ایدوب نماز وقتی داخل اولدی و الحال اول صومسزیر ایدی انس و جن
و شیاطینه صودن سؤال ایدوب انلردن بیلور بولمندی اولیه اولسه
هدهدی تفقد ایدیکه اکا صودن سؤال ایده * زیرا که اول سلیمان
علیه السلام صویه دللی ایدی یر التنده کی صویی زجاجه ده کوریلن
صوکبی کورردی قریب و کرک بعید ایدیکن بیلور و صو اولدیغی
موضعی اکا خبر و پرردی اول دخی اول موضعی شیاطینه صو چیقجه
قازدیرر ایدی * برکسه ابن عباس رضی الله عنهما یدیکه هدهد
بوخصلته مختص ایکن کوررسنکه بر صبی طوزاق قورروب انی آز طیراغله
اورتر هدهد کلور اول طوزاغی کورمز بوغازندن طوتیلور حکمت ندر
ابن عباس رضی الله عنهما دیدیکه لجان قضا و قدر ایرر بصر کورمز

(عقل)

عقل کیدر * چون سلیمان علیه السلام اول حینه هدهدی بولدی
غضب ایدوب حکایت بیورلدیغی منوال اوزره وعید ایتدی وسید
الطیر اولان عقابی چاغردی بوساعتده هدهدی بولوب قائمه کتور
دیو بیوردی هماندم عقاب هوایه اوچوب هدهدی کوردی سوق
ایدوب سلیمان علیه السلام قتنه کتوردی هدهد اکا قریب اولیجق
تواضعاً باشنی قالدیروب قویرق و قنادلرین سوربو انلردن یکا یوریدی
سلیمان علیه السلام انک باشنه یاپشوب انی کندویه چکدی واکا تهدید
ایتدی هدهد دیدیکه یانبی الله حضرت رب العالمین جل شانیه حضورک
وقتنی ذکر ایت سلیمان علیه السلام انی ایشیدیکه دتره یوب انی عفو
ایلدی (فکثت غیر بعید) چون هدهد آز زمان مکث ایدوب رجوع
ایتدیکنده سلیمان علیه السلام بو کونده قنده ایدک دیو سؤال ایتدی
(فقال احطت بما لم تحط به) هدهد دیدیکه یانبی الله سنک بیلدیکک
شیئی بیلدم سن و جنودک ایرمدیکی محله بن ایردم (و جئتک من سبأ نبأ
یقین) وسکا ولایت سبادن خبریقینه کلام دیدی سبأ اسم بلده و یا اسم
قبیله در * روایت اولندیکه پیغمبر یمز صلی الله علیه وسلم سبأدن سؤال
اولندقده دیدیکه اول بر رجل ایدیکه انک اون اوغلی و ارایدی التیسبیه
تیامن و دردیله تشاؤم ایدردی (انی وجدت امرأة تملکهم) بن برمرأه
بولدمکه قومنه ملکه اولوبدر که اول بلقیس بنت شراحیلدر که یعرب
ابن قحطان نسلندن اولوب باباسی بر عظیم الشان ملک ایدی ارض یمک
کلنه ملوکتی ایرشدی بلقیسدن غیری ولدی اولمیدغندن اندنصرکه
ملوکتنه اول وارث اولمشیدی اناسی جنیه ایدی (واوتیت من کل شیء)
و اول بلقیسه ملوکله لایق اولور اموال و جنود و سائر اشیادن ویرلشیدی
(ولهاعرش عظیم) وانک ابنه جنسنه نسبتله سریر ضخمی وار ایدی
دینلیدیکه اول سریر التیوندن اولوبدر و یا قوت حجر و زبرجد
اخضرله ترصیع اولمشدی اوزرینه بری برینک ایچنده یدی بیت بناء
اولمشدی طول و عرض و ارتفاعی اوتوز ذراع و بر قولده سکسان
ذراع ایدی (وجدتها و قومها یسجدون للشمس من دون الله) بن
اول بلقیسی و قومی الله تعالیدن غیری کونشه عبادت ایدر بولدم
(وزین لهم الشیطان اعمالهم) شیطان انلره کونشه عبادت لرین و سائر

لث (۱۶)

اعمال قیجهرلین تزیین ایتدی (فصدتم عن السبیل فهم لا یهتدون) و اول انلری طریق حقندن صد ایتدی اولیه اولسه انلر طریق حقه کتیزلر سلیمان علیه السلامه بلقیسک حالی خفی اولدی بر حکمت ایچونکه الله تعالی انی اراده ایتدی یعقوبدن یوسفک مکانی خفی اولسی کبی هدهد انک شمسسه سجودنی و معرفه الله عدم اهتداسنی انکار ایلدی * زیرا که الله تعالی اکا انی الهام ایتدی سائر طیور و حیواناته معارف لطیفه الهام ایتدی کبی قریب اولمکه عقلا اکا اهتدا ایده (الایسجدوا لله) شیطان انلری صد ایتدی که الله تعالی به سجده ایتدیلر ویا انلره اعماللری تزیین ایتدی که اکا سجده ایتدیلر ویا اهتدا اولنلر که اکا سجده ایدیلر ویا اول حینده هدهد انلره دیدیکه یا قوم آگاه اولوب الله تعالی به سجده ایدک (الذی یخرج الخبأ فی السموات والارض و یعلم ما تخفون و ما تعلنون) که اول سموات وارضده اولان غیبی اظهار ایدر و اول ایکیسی اهلنک سرلرین و جهرلرین بیلور (الله لاله الا هو رب العرش العظیم) که اول الله جل شانهدن غیری اله یوقدر وعرش عظیمک ربیبیدر عرش عظیم اجرامک اولی و اعظمیدر ویا انک جله سنی محیطدر اشبو محلهده هدهدک کلامی تمام اولدی (قال سننظر اصدقت ام کنت من الکاذبین) سلیمان علیه السلام هدهده دیدیکه تأمل ایدلکه بزه خبر ویردیککه صدقی ایدلک یوخسه کاذبلر دیمسن بعده منوال آتی اوزره بلقیسه نامه یازوب خاتمیه ختم و مسکه طبع ایتدی اندن هدهده دیدیکه (اذهب بکتابی هذا فالقه الیه ثم تول عنهم فانظر ماذا یرجعون) اشبو نامه ایله بلقیس و قومنه کیدوب انلرک انی کوره جکی بر موضعه بر اقل بعده انلردن بر مکان قریبه تنخی ایدوب انده توارى ایت بعده نظر ایتکه نه وجه اوزره رد جواب ایدرلر اولیه اولسه هدهد نامه یی آلوب بلقیسه واردیکه اول صنعادن مأرب نام ارضده کندویه مخصوص قصرنده ارقه سی اوزره یاتمش اوپور بولدی و اول قصرک کونشه قارشو بر پنجره سی وار ایدیکه بلقیس کونشک طلوعن اندن کورچک اکا سجده یه و ارددی هدهد کلوب اول پنجره یی قنادیله قیادی اول سبیدن بلقیس کونشک طلوعک بیلدی اندن طور دیکه کونشه نظر ایده اول حالتده هدهد نامه یی انک اوکنه بر اقدی بلقیس دخی نامه یی آلوب او قودی خاتمن کورچک

(دتره یوب)

دتره یوب خضوع ایتدی زیرا که سلیمان علیه السلامک ملکی خاتمنده ایدی و اول نامه یی کوندن ملکه کنیدن اعظم ایدیکنی بیلدی و هدهد بر مقدار تأخر ایدوب طوردی و بلقیس سریر ملکنه چیقوب اوتوردی و قومنک اشرافی اوچوز اون کسه ایدی انلری حضورینه جمع ایلدی (قالت یا ایها الملا انی القی الی کتاب کریم) دیدیکه یا اشراف بکا بر کتاب کریم القا اولندی انک کریم اولسی یا مضمونک ویا مرسلنک کریمچون ویا مختوم اولدیغی ایچون انده یازلمش دیکه (انه من سلیمان وانه بسم الله الرحمن الرحیم الانعلوا علی و اتونی مسلمین) کتاب ویا عنوان سلیماندر و اول مکتوب ویا مضمون الله رحن رحیمک اسمنه مقارندر اشبو کتابله مقصود اولان بنم اوزریمه تکبر و تعظم و ترفع ایتکز ویا بکا اجابتدن امتناع ایتکز زیرا که ترک اجابت علو و تکبر دندر و مؤمنین منقادین اولدیغکز حالده بکا کلک * اشبو کلام غایت و جازتیه مقصوده دلالتی نهایتده در زیرا که اول بسمله یی مشتملدر که اول صانمک ذات و صفاته صریح و التزامله دالدر و ترفعندن نهیدر که اول ام رذائلدر و اسلامله امردر که اول جامع امهات فضائلدر و رساله سی اوزره حجت اقامتدن اول انقیاده امر ایتدی که تقلیده دعوت اولیه (قالت یا ایها الملا أفقونی فی امری ما کنت قاطعة امرأ حتی تشهدون) بلقیس قومنک اشارته و آراری اطلاعنه و قلبری تطبیینه واکا معاونته قیاملرینه راغبه اولدیغی حالده دیدیکه یا اشراف اشبو امرمه استصواب ایتدی کز شی بکا ذکر ایدک هیچ بر امری بن سز حاضر اولمینه قطع ایدردکلم اشبو قولیه انلردن استعطاف ایتدی که اجابتده اکا موافقت ایدیلر (قالوا نحن اولوا قوّة واولوا بأس شدید و الامر الیک فانظری ماذا تأمرین) انلر اکا جوابده دیدیلر که بز اجساد و آلات و عدد و دخی نجات و شجاعت صاحبیلرین و مع ذلک امر سکا موکلدر و بز سکا مطیعلر اوزریکه بر شیئله حکم ایتکز کور که بزه نه امر ایدرسن مقاتله و صلحدن قغیسنی دیلر سکا امر که اتباع ایدرز مخالفت ایتکز و قتا که بلقیس انلردن مقاتله یه میلی احساس ایتدی اول ایه صلحه میل ایدوب قوللرین تزییف و رأیده خطالرین اراءت وجهی اوزره (قالت ان الملوك اذا دخلوا قرية افسدوها وجعلوا اعزة اهلها اذلة) دیدیکه

چنان ملوک بر قریه یه قهر ایله کیرسه لر اول قریه اهلنک عزیزلرین نهب اموال و تخریب دیارله ذلیل ایدرلر اشبو نکلہ انلره حربک عاقبتن ذکر ایلدی حق تعالی بلقیسک قولنی تصدیق ایدوب دیدیکه (و کذلک يفعلون) فی الحقیقه اول ملوک بویله ایدرلر و یاخود بوبلقیس کلانندن اولوب انکله ارادتی سلیمان علیه السلامی مملکتنه دخولدن دفع اوله (وانی مرسله الیهم بهدیه فناظره بم یرجع المرسلون) و بن انلره رسولارمله هدیه کوندر مکه انکله انی اختبار ایدم اگر ملوکدن ایسه هدیه یی آلوب کیرودوز و اگر انبیادن ایسه هدیه یی آلمز اندن بلاد مزه خلل ایرر بعده نظر ایدرینکه رسولارنه شیئله رجوع ایدر هدیه یی آلورمی و یادوندرمی * و هب و غیره ایدر بلقیس هدیه ایچون بشیوز غلام و بشیوز جاریه احضار ایدوب غلما نه جواری لباسن و جواری به غلمان لباسن کیدردی و التوندن بشیوز لینه و کومشدن بشیوز لینه و برحقه ایچنده دلمنک بر دره ثمنه یتیمه و بر خرزه که اول اگری دلمشدی و بواسیایی قومنک اشرافندن مندر بن عمرو نام رجله ویردی و قومندن عقل و رأی اصحابی بر نیچه رجالی اکا ضم ایتدی و کوندر دیکه هدایایی بر کاغده دفتر ایتدیکند نصکره اکا یازدیکه اگر نبی ایسک اشبو کوندر یلان غلمان و جواری یی بری برلرندن تمیز ایت و حقه ده کی دره یی دل و خرزه یه ایسک پکور و بلقیس اول غلما نه امر ایتدیکه نساء صوتنه مشابه صوتله و جواری ایسه رجال صوتنه مشابه صوتله سویله یلر و رسولنه دیدیکه چنان اول رجله دخول ایدم سز کورکه اگر سکا غضبه نظر ایدر سه بیلکل که اول ملکدر اندن اوشتمکل زیرا که بن اندن اعزم و اگر بشاشت و لطفله نظر ایدر سه بیلکل که اول ملک دکلدر آنجق اول نبی مرسلدر سوزنی فهم ایدوب نه در سه بکا اندن خبر کتور چون رسول هدایا ایله یوله کیردی هدهد اندن اول سلیمان علیه السلامه ایردی ذکر اولنان ماجرانک جیعنی بربر و قوعی اوزره اکا خبر ویردی هماندم سلیمان علیه السلام جنیلره امر ایلدی حتی که التوندن و کومشدن دیدیکه دکلو لینه دیزدیلر بعده شول کنندنک اولدیغی طقوز فرسخ میداننه اول لینه لری بسط ایدوب دیزدیلر و اول میدانک حولنه دیوار یا پوب اکا التون و کومش شرفدر ایتدیلر بعده بر و بخرده اولان حیوانانک

(انواع)

انواع عجائبندن کتوروب اول میداننه صف صف ترتیب و تزیین ایتدیلر بعده سلیمان علیه السلامک سریری وضع اولنوب اوزرینه چیقوب جلوس ایلدی یمین و یسارینه دردر بیک کرسیلر قورلادی اهل مراتبدن هر بری رتبه سنجه کرسیسنه نزول قیلدی انس و جن و شیاطین و وحوش و سباع و طیور و اصناف خلایق صف صف اولوب طور دیلر و قتا که بلقیسک رسولاری اول میداننه ایردیلر سلیمان علیه السلامک ملکته نظر ایتدیلر شول کورمدکاری حیوانلر التون و کومش لینه لره روث ایدرلر کتوردکاری هدایایی تحقیر ایدوب براقدیلر * بعض روایاتده ایدر سلیمان علیه السلام و قتا که اول میداننی التون و کومش لینه لره فرشه امر ایلدی اول رسوللرک کله چکی طریقه شول بیله لرنجه اولان لینه لر دکلو مواضعی لینه سز آلیقودیلر چون رسوللر لینه لر موضعن خالی کوردیلر حالبوکه انک ماعداسی مفروشه ایدی اول کتوردکاری لینه لری اول خالی موضعدن چیقار مغله اتهامدن خوف ایدوب انی اول خالی موضعده براقدیلر اندن اصناف خلایق کروهنه اوغرادیلر هر صنفده درلو عجائب کوردیلر حتی که آخر ده سلیمان علیه السلامه ایردیلر اول انلره طلاق و بشاشتله نظر ایلدی و لطف و فصاحت و بلاغته سویلدی اول رسوللرک رئیس مندر بلقیسک نامه سن اکا و یروب هدایایی عرض ایلدی او یله اولسه سلیمان علیه السلامه غلمان و جواری بیننی تمیزده صوکتوروب یوزلریکزی و قوللریکزی یوکز دیدی جاریه اولان صوی بر الیه آلوب اول بر الینه قود یغندنصکره انی یوزینه اوردی و قوللرین یومقده صوی قوللرینک ایچ یوزینه دوکدی اما که غلام اولان صوی انانندن آلدیغی کی یوزینه اوردی و قوللرین یومقده صوی قوللرینک دیش یوزینه دوکدی و ارضه یه امر ایتدی آغزینه بر شعره آلوب اول کتور یلان دره یی دلوب ایپی پکوردی و صفصافده اولور بر دره بیضا اول اگری دلمش خرزه یه ایسک پکوردی بعده سلیمان علیه السلام هدایادن اشبو اشیایی و سائرینی قبول ایتوب رد ایلدی (فلما جاء سلیمان قال ائمدونن بما لفا آتانی الله خیر مما آتیکم بل انتم بهدیتکم تفرحون) و قتا که بلقیسک رسولی و یا اهدا ایتدیکه شیء سلیمان علیه السلامه کلدی سلیمان علیه السلام اول رسوللره دیدیکه

بكا ماله امدادى ايدر سز الله تعالىنك شول بكا وريدكى دين ونبوت وحتك
 وملك سزك كتورديككز اشيا دن خير ليدر هدايا كزه بنم احتياجم يوقدر
 وعندمه وقعى دخى اولور دكلدر بلكه سز هديه كزه سوينور سز زيراكه
 سزك عملكز حيات دنيا دن ظاهره مقصودر سز هديكزه سوينور سز
 زيراكه انكله مالكز زياده اوله واهدا ايلديككز اشيا به دخى سوينور سزكه
 اول سز چكون امثالكز اوزره اقتخار اوله اما بنم مقصودم و حاجتم
 قومكز ايمان مجوسيتى تركاريدر (ارجع اليهم فلنأتينهم بجنود لا قبل لهم
 بها ولنخرجنهم منها اذله وهم صاغرون) ايمدى يارسول شول كتورديكك
 هدايا ايله بلقيس وقومكه كيتكل اكر مسلمين اولدقلى حالده بنم قتمه
 حاضر اولزلر ايسه انلره برجنودله وارزكه انلرك اكا مقاومته طاقتى
 ومقابله به استطاعتى اوليه وانلرى سبادن ذليل اولدقلى حالده
 چيقاررز مع ذللك انلر اسير ومهانلردر وقتاكه رسول منذر سليمان
 عليه السلام خبريله بلقيسه رجوع ايتدى انك ملك اوليوب نبى ايديكنى
 بيلدى يدى بيتدن ايجرويه سريرينى قويوب قبولرين بر كشدى واوزرينه
 حارسر تعيين ايدوب جنوديله سليمان عليه السلامه كشدى انك
 قدومندن او كدين سليمان عليه السلام بر كون سريرى اوزره چيقوب
 اوتوردى كورسه كه ايراقدن بر جمع كشيركلور بوكوريلن سواد عظيم ندر
 ديو سوال ايتدكه ديدلركه بلقيس و جنوديدر كه سزه اطاعت وانقياده
 كلور اويله اولسه سليمان عليه السلام ديلديكه الله تعالىنك عظيم
 قدرته دلالت وكندينك دعواى نبوتده صدقنه اشيات ايدر علامت
 كوستره وبلقيسك عقلمده رتبه سن كوره (قال يا ايها الملا ايكم يا تينى بعرشها
 قبل ان يا تونى مسلمين) سليمان عليه السلام جلساسنه ديديكه يا اشراف
 قنغيكز بكا بلقيسك سريرين كتورر اول وقومى مسلمين اولدقلى حالده
 بكا كلزدن اول زيراكه مسلمه اولديغند نصكره انى اخذ حلال دكلدى
 تكيم شرعزده دخى انجلىندر مكر كه رضاسيله اوله (قال عقرت
 من الجن انا آتيتك به قبل ان تقوم من مقامك وانى عليه لقوى امين)
 جندن بر خبيث ماردكه اسمى كوزى ايدى قدمنى منتهاي طرفى عندمه
 وضع ايدر دى ديديكه بن سكا اول سريرى مجلس حكومتك دن قيام
 ايتدين كتورين سليمان عليه السلام ايسه نصف نهاره دكين مجلس

(حكومتده)

حكومتده اوتورردى وبن اول سريرى كتورمكه قوى بن واندهكى جواهر
 وغيره امين برشى نقص وكسرنسز سكا انى كتورين سليمان
 عليه السلام ديديكه بن انك اندن اسرع وقتده كلمنى ديلرين (قال الذى
 عنده علم من الكتاب) شول عندمه كتاب منزلدن ويالوح محفوظدن علم
 اولان ديديكه انى اول دين جبريل عليه السلام ويا ملائكهدن بر ملكدر
 كه الله تعالى انكله سليمان عليه السلامى تأييد ايتدى ويا خضر
 عليه السلامدر ياسليمان عليه السلامك كنيدير لكن اكثر مفسرين ديدلركه
 اول آصف بن برخيادر كه الله تعالىنك اسم اعظم ييلوردى صديق
 ايدى سليمان عليه السلامه ديديكه (انا آتيتك به قبل ان يرتد اليك
 طرفك) بن سكا انك سريرين كتوريم طرفك سكا ارتدادندن اول
 اول سريرى او ككده كوره سن سليمان عليه السلام ديديكه اكر انى
 ايدى بيلورسك قى سرعت ايدر سن آصف اكا ديديكه ايمدى طرفكى
 عين جانبه ارسال ايت سليمان عليه السلام انجلىن ايدوب آصف دما
 ايتدى هماندم الله تعالى اكا ملائككه كوندروب حتى كه يك التندن سريرى
 رى يارارق كتورروب سليمان عليه السلامك او كنه قوديلر سليمان عليه
 السلام طرفنى دوندرمدين سرير او كنده بولندى حالبوكه انكله سريرك
 مابينى ايكي ايلق مسافه ايدى (فلما رآه مستقرا عنده قال هذا من فضل
 ربى ليبلونى ءأشكر ام اكفر) وقتاكه سليمان عليه السلام بلقيسك
 سريرين قتمده حاصل كوردى الله تعالىنك عباد مخلصينى طريقه سى
 اوزره نعمتى شكرله تلقى ايدوب ديديكه اشو ربم جل شانهنك بكا محض
 فضلنددر يوخسه بنم استحقاقله دكلدر تاكه بنى اختبار ايدى كيم انك
 بو نعمته شكرى ايدر بن حول وقوتسنز انى اندن فضل كوروب حقنه
 قيامله ويا كفرائمى اولورم كنديمى اراده بولوب اداء واجبه
 قصورايله (ومن شكر فانما يشكر لنفسه) اول كسه كه شكر ايدى
 انى نفسچون ايدر زيراكه انكله نعمتك دوام ومزيدنى استجلاب
 ايدر وانى وصمه كفراندن حفظ ايدر (ومن كفر فان ربى
 غنى كريم) واولكه شكرى ترك ايدى بنم ربم انك شكرندن غنيدر
 شاكر وكافره انعامله كريمدر (قال نكروا لها عرشها ننظر أتهتدى
 ام تكون من الذين لا يهتدون) سليمان عليه السلام ديديكه انك

سریرینی اولکی هیئتندن تغییر ایدک اعلاسنی اسفل و مقد منی مؤخر
 و اخضر مکنه اجر و اجر مکنه اخضر قیلغله کوره لمکه سریری
 معرفته اهتدا ایدرمی یو خسه اکا ویا جواب صوابه اهتدا ایتزمی ویا الله
 تعالی به ورسولنه ایمانه اهتدا ایدرمی ویا ایتزمی * وهب بن منبه و غیره
 ایدر شیاطین خوف ایتدیلرکه سلیمان علیه السلام بلقیسی تزوج ایدوب
 بلقیس اکا اسرار جنی افشا ایده واندن بر ولد وجوده کلوب ایدا
 تسخیردن منفک اولمه اولیه اولسه اکا شاده اساءتله اندن سلیمان علیه
 السلامی تنفیر قصد ایدوب دیدیلرکه انک عقلنده خلل وارد ویاغی چارک
 حافری کیدر و ساقلری قلیدر اکا بناء سلیمان علیه السلام دیلدیکه
 سریرینی تغییرله عقلنده اختار ایده وصرح بناسیله ساقلرین کوره
 (فلما جاءت قیل أهکذا عرشک قالت کانه هو) چون بلقیس سلیمان
 علیه السلام قتنه کلدی اکا دینلدیکه سریرک بویله میدی
 دیدیکه کانه اولدر نعم دیدی کذب خوفیه انکله سلیمان علیه السلام
 انک کال عقلنی بیلدی زیرا که نه اقرار ونه انکار ایلدی * دینلدیکه
 اکا سریرینک امری مشتبیه اولدی زیرا که اول انی بریتده یقومشیدیکه
 انی بیوت چوره آلمشدی و قیولری برکیدوب کلیدلشمشدی اکا دینلدیکه
 بوسنک کندی سریر کدر بلقیس دیدیکه (واولنا العلم من قبلها
 وکننا مسلمین) اشبو حالتدن اول الله تعالینک کال قدرته و سناک صحت
 نبوتکه بزه علم ویریلوب اکا طائعین اولمشدق * دینلدیکه اشبو سلیمان
 علیه السلام وقومی قولندندرکه انی بلقیسک جوابنه عطف ایتدیلرکه زیرا
 انده انک الله تعالی به ورسولنه ایمانی اولدیغنه دلالت وار شول حیثیتدیکه
 اول انک سریری اولسن و احضار اولنسن تجویز غالبله تجویز ایتدی
 ودخی شول معجز اتدن اولسن که اکا الله تعالیدن غیری احد قادر اولیه
 وانی انبیاء یدیه اظهار ایلیه (وصدتها ما کانت تعبد من دون الله انهما
 کانت من قوم کافرین) و انک کونشده عبادتی انی اسلامه تقدمدن منع
 ایلدی و یاخود الله تعالی اکا ایمانی توفیقیه کونشده عبادتدن
 انی منع ایلدی بلقیسک الله تعالینک غیریه عبادتن زیرا که نشوی
 اظهار کفار بیننده ایدی وقتا که شیاطین بلقیسک ایاقلری چارک
 حافری کیدر و ساقلری قلیدر دیو سلیمان علیه السلام ذم ایتدیلر سلیمان

(علیه)

علیه السلام دیلدیکه بلقیسه ایاقلری و ساقلری کشفنی سؤالنسر بیله
 شیاطینه امر ایلدیکه انکچون برصرح بنا ایدلرکه اول زجاجدن بر قصر
 و یا بیت ایدیکه بیاضلغندن صوکی کورینور ایدی * دینلدیکه اول
 صرح صحن دارده ایدی انک الله صو ایدوب ایچنه دریا دوا بندن
 سمک و صفادع و غیره صالیو یردی بعده سلیمان علیه السلام سریرینی
 انک صدرینه قویوب اوزرینه اوتوردی و عادتق اوزره جن وانس
 و طپوری یرلی برلرینه طور غردی (قیل لها ادخلی الصرح فلما رآته
 حسبه لجة و کشفته عن ساقیها) و بلقیسه اول صرحه کیرکل دینلدی
 بلقیس انی کور یچک ماء عظیم ظن ایدوب ایکی ساقنی کشف ایتدی
 حتی که سلیمان علیه السلام انک ایاقلرینی کوردیکه اول عضوده
 احسن ناسدن ایدی ابوککه ساقلری قللی ایدی سلیمان علیه السلام اندن
 بصرین صرف ایدوب (قال انه صرح ممرّد من قواریر) دیدیکه اول
 ماء ظن ایتدیکک زجاجدن دیزلمش صرح ملسدر یو خسه ماء دکلدن اندن
 سلیمان علیه السلام انی اسلامه دعوت ایتدی بلقیس دخی اکا اجابت
 ایدوب (قالت رب انی ظلمت نفسی) دیدیکه یارب نفسه ظلم ایتدم سنک
 غیریه عبادتمله ویا سلیمان ظلمله زیرا ظن ایتدمکه اول بنی ماء عظیمه اغراق
 مراد ایتمش اوله (واسلمت مع سلیمان لله رب العالمین) و سلیمانک یدیه
 و یا دینمی توحیده اخلاص ایتمکه عالمک ربیسی الله جل شانیه اسلامه
 انقیاد ایتدم * بلقیسک اسلامدن نصکره کی امرنده مفسرین اختلاف ایتدیلرکه
 انی سلیمان علیه السلام کندی تزوج ایتدی یو خسه همدان ملکی ذاتبع
 رجه می تزویج ایتدی اما انی سلیمان علیه السلام کندی تزوج ایتدی دینلن
 قول اوزره انک ساقلری قللی اولدیغندن کراحت ایدوب شیاطینه انک
 کیدر مسنه علاج سؤال ایتدکه دیدیلرکه بزانی سکا فضة بیضا کی ایدلم
 اول سبیدن نوره و جام احداث ایتدیلر وقتا که سلیمان علیه السلام انی تزوج
 ایتدی ینه ملوکتی اوزره انی تقریر ایدوب ارض یمنده انکچون جنیلره
 اوچ حصن بنا ایتدردیکه اول سلحین و بینون و غمداندر و سلیمان علیه السلام
 هر آیده بر کره صباحن شامدن قلقوب اخشام اولمدن اکا واررو اوچ کون
 انده قالوب بعده کبرو شامه کیدردی واندن بر اوغلی اولدی و بعضیلر دیدیکه

بلقیس اسلامه کلچک سلیمان علیه السلام اکا دیدیکه قوم کدن
بر کسه بی اختیار ایتکه سنی اکا تزویج ایدم اول دخی همدان ملکی ذاتبعی
اختیار ایدوب بلقیسی اکا تزویج دصکره کیرویمنه کوندردی وزوجنی
یم اوزره تسلیم ایتدی (ولقد ارسلنا الی ثمود اخاهم صالحا ان عبدوا الله)
بزئوده قرنداشلی صالح علیه السلامی ارسال ایتدک که انلری الله تعالی بی
توحید و طاعتنه دعوت ایده (فاذا هم فریقان یختصمون) انلر ایسه ایکی
فریق اولدیلر بر فریقی مؤمن وبر فریقی کافر اولوب هر فریق حق بزمله در
دیو فریق آخرله اختصاص ایتدیلر (قال یا قوم لم تستعجلون بالسیئة
قبل الحسنة) صالح علیه السلام دیدیکه یا قوم نیچون عقوبته استعجال
ایدوب بزه ایعاد ایتدیک شئی کتور دیر سز توبه دن اول که انی
عقاب نزولنه تأخیر ایدر سز شول اعتقادله کیم انک ایعادی صدق
اولدیغی تقدیر اوزره عقابک نزولی عندنده توبه ایدرز اول بزه نفع ایدر
دیو کفرلری اوزره اصرار ایتدیلر صالح علیه السلام انلری اول اعتقادده
جهل و خطا ایتدک رینه اشارت ایدوب دیدیکه (لولا تستغفرون الله
لعلکم ترجون) سز عذاب نزولندن اول توبه ایله الله تعالی دن مغفرت
طلب ایتسه کز که رحمت اولنه سز زیرا که عذاب نزولنده توبه قبول اولمز
(قالوا اطیرنا بک و بمن معک) دیدیلر که یا صالح بز سنکله و یاسکا تابع اولنلرله
تشاؤم ایدرز اشبو دینی اختراع ایدلنبرو شدائدن قور تملدق
(قال طائرکم عند الله) صالح علیه السلام دیدیکه خیر و شردن سز
ایریشن الله تعالی نیک امر یله در اول تقدیر ایدوب در (بل انتم قوم تقنون)
بلکه سز بر قوم سز که سز و ضراء و ضرراء تعاقبله اختیار اولنور سز
(وکان فی المدينة تسعة رهط یفسدون فی الارض ولا یصلحون) مدینه
ثموده که اول حجر در اشرافلری ابناسندن طقوز کسه وار ایدیکه
یر یوزنده شانلری شوب اصلاحدن خالص افساد ایدیکه انلر نافع نیک
عقرینه اتفاق ایدلر در که رئیسلی قدار بن سالف ایدی * روایت
اولندیکه اول طقوز مفسدلر دن قدار بن سالف و مصدع بن دهر نافع نیک
عمری اوزره طوروب مصدع بر اوق ایله نافع بی دوشردی و قدار
بوغازلدی بعده درین صویوب اتنی اولشدیلر اوله اولسه صالح
علیه السلام انلر هلاکله و عید ایتدی والوانلری تغیری اکا علامت

(بیان)

بیان ایتدی (قالوا تقا سمو بالله لنبیننه واهله ثم لنقولن لولیه ماشهدنا مهلت
اهله وانا لصادقون) اول بری برلرینه دیدیلر که متقاسمین بالله اولدیغکز
حالده توافق ایتدک که کجه اولدیغنده آکمزین صالحی واهلنی باصوب
اولدیره لم بعده انک دمنی طلب ایدنه دیه لکه بز انلرک هلاکی موضعنه
حاضر اولدق فکیف که بز انلری هلاکله تولی ایتش اوله وز بز اندن خبریمز
یوقدر سوز مزده صادق لر (ومکروا مکرا و مکرونا مکرا و هم لایشعرون)
اشبو طریق مذکور اوزره صالحی بغته قتلنه قصد ایله مکر ایتدیلر بز دخی
انلر مکر لرینک جزاسین ایتدک انی هلاک رینه سبب ایتدکله و الحال انلرک کاشعوری
یوغیدی ابن عباس رضی الله عنهما ایدر حق جل و علی اول کجه صالح علیه
السلامک دارینه حراست ایچون ملائکه کوندردی چون اول طقوز
کسه یالن قیلجلرله صالح علیه السلامک دارینه کادیلر اول ملائکه انلر
اوزره طاش یاغدر دیلر طاشی کوردر ملائکه بی کورمز لردی حتی انلرک
طقوزی پیله قتل اولندیلر * روایت اولندیکه صالح علیه السلامک
حجرده شعبده مسجدی وار ایدیکه انده نماز قیلوردی دیدیلر که صالح
زعم ایدر که اوچ کونه دکن بز دن فارغ اوله * ایدی اول اوچ کون
یکمیدین بزندن واهلندن فارغ اوله لم دیو اول شعبده اتی قتل و ایدیلر
اوزر لرینه بر صخره اینوب انلری باصددردی انلرک باقیسی ایسه
اما کنلرنده اهلاک اولندیلر (فانظر کیف کان عاقبة مکرمهم انا دمرناهم
وقومهم اجمعین) نظرایتکه مکر لرینک عاقبتی نیچه اولدیکه انلری و قوم لرینی
جیمینی اهلاک ایتدک یا صیحه جبریل علیه السلامه و یانار احراقیله کیم اول
یر التندن چیقیدی (فلک بیوتهم خاویة بما ظلموا) اشبو خبره انلرک بیوتیدر که
ظلملری سببیه خالیه در و یاساقطه منهدمه در (ان فی ذلک لآیة لقوم یعلمون)
اشبو مذکورده عبرت واردر شول قومه که بز هر شیئه قدرتمز اولدیغن
یلوب متعظ اولورلر (وانجینا الذین آمنوا وکانوا یتقون) و صالحی و انکله
اولان مؤمنلری انجا ایتدک که انلر کفر و معاصیدن اتقا ایدر لردی (ولو طأ
اذ قال لقومه أأتأتون الفاحشة وانتم تبصرون) و بز لوطی دخی قومنه
ارسال ایتدک اول انلر دیدیکه سز لواطه بی ایشلر میسز حالبو که سز انک

فخشي بيلورسز وقبايحي بيلور كشييك اقترافي اقبندر وياخود اول
 فاحشه بي ايشلكده بري بريكردن صاقمز آشكاره ايدر سز اول ايسه
 الفخشد وياخود سز دن اول يكن عصاتك آثاريني كورر كن منتهى
 اولمز سز (انكم لتأتون الرجال شهوة من دون النساء) سز نسادن غيري
 رجاله شهوته ججاع ايدر سز وسزه حرث ايچون خلق اولنسان نساى
 ترك ايدر سز حالبوكه ججاعله مراد اولان طلب نسلدر يوخسه قضاء
 وطر دكلدر (بل انتم قوم تجهلون) بلكه سز بر فعل ايدر سز كه انك سوء
 عاقبت تأمل ايتمز سز (فما كان جواب قومه الا ان قالوا اخرجوا آل لوط
 من قريتكم انهم اناس يتطهرون) لوط عليه السلام قومك جوابى بواولديكه
 لوط واهلى قريه كز دن چيقار ككه بزم افعلالز دن ويا اقداردن
 تنزه ايدر لر بزم فعلز ايسه انلرك زعمنده قذر در (فانجيانه واهله الا امرأته
 قدرناها من الغابرين) اويله اولسه لوطى واهلى انجا ايتك الا
 مرأه سنى عذابده باقيلردن اولسن تقدير ايتك (وامطرنا عليهم مطرا فساء
 مطر المذرين) واول قومك اوزرينه ججاره امطار ايتك شول رساله
 انذار اولنوب ايمانه كليترك مطرى نه چركين اولور (قل الحمد لله وسلام
 على عباده الذين اصطفى) الله تعالى شول كال قدرته وعظمة شانته دلالت
 ايدر قصه لرى حكايه ورسول كرامنى تخصيص ايتدى آيات كبرايى تذكار
 واعدارى اوزره نصر قى اخبار دنصكره رسولى محمد صلى الله عليه وسلمه
 امر ايلديكه اكاجد وخيار خلقنه سلام ايده تاكه اول شكر اوله اكاه انلره
 انعام واحواللرندن بيلديكى اكاه اعلام ايلدى وتاكه انلرك فضلنه وحق
 وتقدملرينه ودينده اجتهادلرينه عرفان اوله وياخود لوط عليه السلامه امر
 ايلديكه قومك كفره سنى اهلاكى اوزره اكاجد ايده وفواشدين عصمتله
 وهلاك دن نجاتله اصطفاء ايتدى عبادينه سلام ايده اشبو تعليم حسندر اول
 كسه يه كيم بر علم مستفاد وموعظه وخطبه بيانته شروع اراده ايده وكذلك
 هر حادثه وامر ذى خطر ده تحميد وسلام ذكريله تبرك ايده بعده استفهام
 وفعللرنده تجهيل وحاللرينى استهزاء طريقى اوزره دينلديكه (الله خير
 اما بشركون) الله تعالى مى خير ليدر يوخسه اكاه اشراك ايتد كلى
 آله لرى معلومدر كه اول اشراك ايتد كرنده خير يوقدر * ايمدى

(الله)

الله تعالى كندويه عبادت ايدنلره عذاب نزولنده برشى مفيد اولمز بعده
 الله تعالى آثار رحمتى اولان خيرات ومنافعى عدايدوب ديديكه (امن خلق
 السموات والارض) اصول كائنات ومبادئ منافع اولان سموات وارضى
 خلق ايدن الله تعالى مى خير ليدر يوخسه اكاه اشراك ايتد كلى آله لرى
 (وانزل لكم من السماء ماء فأنبتنا به حدائق ذات بهجة) وسز يكون
 سمادن مطر انزال ايتدى وانكله سزه حدائق بهيه انبات ايتك كه اول
 مختلفه الانواع متباعدة الطباعدر (ما كان لكم ان تنبتوا شجرها) اول
 حدائقك اشجارى انبات الله تعالى دن غيرى سزه وكرك اشراك ايتديك كز
 معبودلريكزه صالح ولائق اولدى (واله مع الله) الله تعالى دن غيرى اله
 وارميدر كه اكاه قرين وشريك قيلنه حالبوكه اول خلق وتكوينده متفرد در
 (بل هم قوم يعدلون) بلكه انلر بر قومدر كه حقدن عدول ايدر لركه اول
 توحيددر (امن جعل الارض قارا) ارضى انسان ودواب ايچون قرار كاه
 خلق ايدن الله تعالى مى خير ليدر يوخسه اكاه اشراك ايتد كلى (وجعل
 خلالها انهارا) واول ارضك واسطنده انهار جاريه قيلدى (وجعل لها
 رواسى) واول ارض ايچون جبال ثوابت قيلديكه انده معادن تكون ايدر
 وانك حضيضندن منابع نبعان ايدر (وجعل بين البحرين حاجزا) بحر عذبله
 بحر مالخ وياخليج فارس وخليج روم بيننده سد قيلديكه برى برينه قارشيمدر
 (واله مع الله) الله تعالى يه قرين اله وارميدر كه انك صنعنه معين وظهر اوله
 (بل اكثرهم لا يعلمون) بلكه انلر الله تعالى نك وحدانين بيلد كرنندن
 اكاه اشراك ايدر لر (امن يجيب المضطر اذا دعاه) شول مرض ويافقر
 ويا بر حادثه سبيله التجا ودا ايدنه اجابت ايدن الله تعالى مى خير ليدر
 يوخسه اكاه اشراك ايتد كلى (ويكشف السوء) وضرر ويرر
 شئى انساندن كيدرر (ويجعلكم خلفاء الارض) وسزى ريوزنده خلفا
 قيلور سكتناسى وانده تصرفى سز دن او كدين پكنلردن توريشله
 (واله مع الله) الله تعالى يه قرين اله وارميدر كه اشبو نعم عامه
 وخاصة ايله سزى احاطه ايده (قليلا ماتد كرون) انك آلائينى ذكر
 قليل ايله تذكر ايدر سز (امن يهديكم فى ظلمات البر والبحر) شول
 كچه ظلماتنده بر وبحرده نجوم ايله وعلامات ارضله سزه هدايت

ایدن الله تعالی می خیرایدیر یوخسه اکا اشرک ایتدکریمی (ومن یرسل الیاح
بشراین یدی رحته) ویغموری اوکنجه یلار کوندر (ءاله مع الله)
الله تعالی یه قرین اله وارمیدر که بونک کبی اموره قادر اوله (تعالی الله
عما یشرکون) جمیع اشیایی ایجاد ایدن الله تعالی خالق شول مخلوق
ماجز مشار کنندن منزله و عالی اولدی (امن یبدأ الخلق ثم یعبده) اولکه
خالق عدمدن وجوده کتوروب آخرته انی اعاده یه قادر اولان الله
تعالی می خیرایدیر یوخسه اشرک ایتدکریمی (ومن یرزقکم من السماء
والارض) وسزی اسباب سماویه وارضیه ایله رزقلندیرر (ءاله مع الله)
الله تعالی یه قرین اله وارمیدر که اشبو اشیایی ایشلیه (قل ها تو ابرها نکم
ان کنتم صادقین) دیکل که الله تعالی دن غیری اشبو اشیادن برینی
ایشلکه قادر اولور ایدیکنه برهانکزی کتورک اکر اشرک ککزده
صادق ايسکز زیرا کمال قدرت الوهیتک لوازمندندر * اشبو آیاتده کی
استفهام توبیخ ایچوندیر یوخسه استرشاد ایچون دکل (قل لایعلم
من فی السموات والارض الغیب الا الله) سموات وارضده غیبی الله تعالی دن
غیری احد بیلر (وما یشعرون ایاں یبعثون) حالبو که نوخته بعث
اولنه جعفرین بیلر اوله اولسه غیبی نیجه بیلورلر پس بواجلدن عائشه
رضی الله عنها دیدیکه برکسنه که محمد صلی الله علیه وسلم ایرته ده
اوله جق اشیایی بیلور زعم ایده الله تعالی یه افتراء عظیم ایدر (بل اداریک
علمهم فی الآخرة) علمری کامل اولوب آخرت حدوثه دخی لاحق
اولدیمکه نوخته اولور ایدیکن بیلر (بل هم فی شک منه ابل هم منها
عمون) بلکه انلر آخرتدن شک اوزره درلر یقینلری یوقدر کاهی انی
اولور وکاهی اولمز دیرلر بلکه انلر اعمی القلبدر بصیرتلیک اختلا لیچون
انک دلائل ادراک ایتلر (وقال الذین کفروا اننا کننا ترابا و آباءنا انما
لخرجون) یعنی انکار ایدن کافرلر دیدیلر که بزوکک آباءمز تراب
اولدیغمز دنصکره قبور دن چیقارمیز حال فسادن حال حیاته ایررمیز
(لقد وعدنا هذا نحن و آباءنا من قبل) اشبو بعثی بز و بزدن اول آباءمز
وعد اولتمیز (ان هذا الا ساطیر الاولین) اشبو دکل الا اولینک احادیث
واکا ذیبدر کیم الریله یازمشلدر (قل سیروا فی الارض فانظر واکیف
کان عاقبة المجرمین) دیکل که یر یوزنده سیر ایدوب شول تکذیبله جرم

(ایدنلرک)

ایدنلرک عاقبتی نه حاله ایردیکن عین بصیرتله کورک انلری مجرمینله تعبیرده
مؤمنلره جراثم ترکنه لطفله تنبیه واردر (ولا تحزن علیهم) انلرک تکذیب
واعراضنه محزون اولغل (ولا تکن فی ضیق مما یمکرون) انلرک مکر وکیدندن
صدر کده حرج اولسون زیرا که الله تعالی سنی انلرک مکرندن عصمت ایدر
وانلر اوزره سکا نصرت ایدر (ویقولون متى هذا الوعد ان کنتم صادقین)
کافرلر دیرلر که اشبو عذاب موعود نوخته اولور بزه خبر ویرک اکر قولکزده
صادق ايسکز (قل عسی ان یكون ردف لکم بعض الذی تستعجلون)
دیکل که شول استعجال ایتدیککز عذابک بعضی قریب اولدیکه سزه لاحق
اوله که اول یوم بدردر (وان ربک لذو فضل علی الناس ولکن اکثرهم
لایشکرون) ربک جل شانه ناسه فضل وکرم ایدیبیدر معاصی اوزره
عقوبتترین تأخیرله تا که توبه ایده لر لکن انلرک اکثری اکا شکر ایتلر
(وان ربک لیعلم ما کنن صدورهم وما یعلنون) ربک جل شانه انلرک
صدورلرنده اخفا ایتدکری سکا عداوتی ولسانله اظهار ایتدکری کفری
بیلور (وما من غائبة فی السماء والارض الا فی کتاب مبین) سماء وارضده
عباددن مستور هیچ برشی یوقدر الا اول لوح محفوظده مستوردر
(ان هذا القرآن یقص علی بنی اسرائیل اکثر الذی هم فیہ یختلفون)
اشبو قرآن بنو اسرائیله تبیین ایدر دین امرندن اکثریکه انده اختلاف
ایدلر حتی که اول سبیدن فرقه فرقه اولوب بری برلرینه لعنت ایتدیلر
اکر انصاف ایدوب قرآنه مراجعت ایتسه لر اول اختلافده خطالرین
بیلورلر وقرآنی تصدیق ایدوب ایمانه کلورلردی (وانه لهدی ورحمة
للمؤمنین) واول قرآن مؤمنلره هدی ورحتمدر که انکله انلر نفعلورلر
(ان ربک یقضی بینهم بحکمهم) ربک تعالی یوم قیامتده دینده
مختلفین بیننی عدلیله فصل ایدر (وهو العزیز العلیم) اول الله تعالی
عزیزدر قضاسی رد اولمز قضاء و حکمنک حقیقتنه علمدر (فتوکل علی الله
انک علی الحق المبین) ایددی امرکی اول الله تعالی یه تفویض ایدوب
انلرک معاداتنه مبالات ایتکل اول سنک انلر اوزره ناصر کدر زیرا که سن
دین واضح اوزره سن اکا شک تعلق ایتمز (انک لا تسمع الموتی) شول موتی
مثابه سنده اولان کفار معاندینه اسماع ایده مز سن زیرا انلرک سماعی

سماع دکلدر انکله انتفاعلری اولدیغیچون (ولا تسمع الصم الدعاء اذا ولوا
مدبرین) و سن اصلره آیات قرآنله ایمانه دعوتی ایشیتدیره مزسن چنانکه
انلر تکذیبله حقدن معرضین اولدقلری حالده منصرف اولهلر * زیرا که
اول حالده استماعلری ابعدر (وما انت بهادی العمی عن ضلالتهم) و سن
شول آیات قرآنیه دن بصیرتلی عیسانی شرکدن ایمانه هدایت ایدر دکلسن
سکا واجب اولان دعوتدر الله تعالی دیلدیکنه هدایت ایدر (ان تسمع الامن
بؤمن بآیاتنا فهم مسلمون) سن اسماع ایده مزسن مکر اکا که اول قرآنی الله
تعالیدن اولدیغنی تصدیق ایدر اوله که انلر ایمانلرنده مخلصلردر (و اذا وقع
القول علیهم اخرجنا لهم دابة من الارض) چنانکه ناس اوزره وعد
اولندقلری بعث وعذابک وقوعی قریب اوله بز انلره ارضدن جساسه نام
دابهی چیقاررز * روایت اولندیکه انک طولی التمش ذراع اولور
وقائمهلری اوفق وایری توپلری وایکی قنادی اولور اندن هارب قورتلز
واکا طالب ایرشمز * دینلدیکه انک اوچ کره چیقیمی اولور اول کره سی
اقصای یمندن اولور بعده برزمان کیزلنور ایکنجی کره چیقیمی مکهدن
اولور بعده دهرطویل کیزلنور اوچنجی کره چیقیمی ناحیه مسجد حرامدن
رکن اسودله باب بنی مخزومدن اولور اول خروجی ناسه هیبت ایرکورر
برقوم اندن اورکوب کیدر و برقوم ایسه طوروب اکا نظر ایدر * روایت
اولندیکه اول دابه چیقیدیغنده بیله سنجه موسی علیه السلامک عصاسی
وسلیمان علیه السلامک خاتمی اولور عصا ایله مؤمنک الننه مس ایدوب
انکله یوزینک بیاضی آرتر و خاتمله کافرک یوزینه ختم ایدوب انکله کافرک
یوزینه سواد ایرر (تکلمهم ان الناس کانوا بآیاتنا لا یوقنون) اول لسان
عربیله سویلیوب انلره دیه که ناس بزم ربمز آیتلرینه ایقان ایتمزلر که
انک خروجی و سائر احوالی الله تعالینک آیتلریدر * دینلدیکه انک
سویلسی ظالملره لعنت اولور و یاخود دین اسلامدن غیری ادیانک بطلاننی
بیلدیرر بعده اول کبرو مکانه عودت ایدر بعده اول کونده اتی ساعت
زلزله اولور اول خوفله کیمه یاتورلر ایرته سی دجال چیقدی دیو فریادی
کلور (و یوم نحشر من کل امة فوجا ممن یکذب بآیاتنا فهم یوزعون)
یوم قیامتده بز هر امتدن بزم آیتلریمزی تکذیب ایدلردن جماعت

(کثیره)

کثیره بی حشر ایدرز حالبوکه انلرک اولی آخرلریچون حبس اولنور تاکه
رؤسارلی اتباع اوکنجه موقفه سوق اولنهلر (حتی اذا جاؤا قال اکذبتم
بآیاتی ولم تحیطوا بها علما ماذا کنتم تعملون) حتی چنانکه انلر محل
حسابه کلهلر الله تعالی انلره دیه که بنم آیتلریمی اول وهله ده تکذیبی
ایتدیکز حالبوکه انک تصدیق و یا تکذیبینه لائق ایدیکنه نظر وفکرله
علمکز احاطه ایتدی بوندنصکره نه عمل ایتدیکزدی و یا قنغی عمل سزی
ایماندن منع ایلدی و الحال آیات و رساله ایمان یرینه تکذیبدن غیری
عمل ایتدیکز اشبو توبیخ طریق اوزره استفهامدر و حجتله تبکیتر
وانلره اعلامدرکه الله تعالی انلرک تکذیب آیاتدن غیری ذبیاده عمل
ایتمدکیرینه علیدر اوله اولسه بز سنک آیانکی تصدیق ایتدک ایدی
دیمکه قادر اولمیوب تکذیبلری متعین اولور (و وقع القول علیهم بما ظلموا
فهم لا ینطقون) وعذاب موعود شول آیات الهی تکذیبله اولان
ظلملری سبیلله اوزرلرینه واقع اوله انلر ایسه حجت واعتذار ایلله نطقه
قادر اولیهلر عذاب موعود انلری نطقدن اشغال ایتسیله و یا اغزلری
مهرلنسیله (ألم یروا انا جعلنا اللیل لیسکنوا فیه و النهار مبصرا)
اهل مکه اعتبارله نظر ایتزلریمیکه بز کیمه بی خلق ایتدک که انده نوم
و قرارله سکون ایدهلر ونهاری خلق ایتدک که انده کسب و تجارت
طریقن کورهلر تاکه بو آیاتله انلره توحید متحقق اوله و حشرک جوازینه
ورسلک بعثتنه ارشاد اولنهلر * زیرا که نور و ظلمتک وجه مخصوص غیر
متعین بذاته اوزره تعاقبی اولمز الاقدرة قاهره ایلله اولور و اول الله تعالی که
ماده واحده ده ظلمتی نوره ابداله قادر اوله مواد ابدانده موتی حیاته ابداله
قادر اولور (ان فی ذلک لآیات لقوم یؤمنون) اشبونده عبرتلر واردر شول
قوم ایچونکه تصدیق و اعتبار ایدهلر (و یوم ینفخ فی الصور فترفع
من فی السموات ومن فی الارض) ذکر ایت شول کونیکه انده صوره نفخ
اولنه اوله نفخک هیبتدن سموات و ارضده اولان مخلوقات فزع و خوف
ایده دینلدیکه اول موتانک انبعاثنی جیشک انبعاثنه تمیلدر چنانکه بوق
نفخ اولنه * دینلدیکه اشبونکله مراد فزع موتدرکه نفخه اولی
شدتدن جمیع خلایق تسلیم روح ایدهلر (الا من شاء الله) الا الله تعالینک
دیلدیکی کسه لر دکلکه قلبلری ثابت اولوب اندن فزع ایتمزلر * دینلدیکه

لث (۱۷)

انلر جبرائیل و میکائیل و اسرافیل و عزرائیل علیهم السلامدر و یاخود
خزنه و حله عرشدر و یا شهدادر و یا موسی علیه السلامدر زیرا که
اول بر کره صعقه ایتشدی انکله اکتفا اولندی لکن ظن اولنورکه بونکله
مراد بونلرک جیعنه عام اولقدر دیمشدر (وکل اتوه داخرین) جمیع
خلائق نفخة ثانیه دنصکره الله تعالینک امرینه صاغریں اولدقلری
حالد کلوب اجابت ایدلر (وتری الجبال تحسبها جامدة) اول کونده
طاغری کورسنکه یرو یونده ثابتدر (وهی تمر مر السحاب)
حالبوکه اول طاغر ارضدن قلع اولنوب هوا یوزنده بولنلرکی سرعتله
یورر * زیرا اجرام کبارک سمت واحده حرکتی قریب اولمز که متبین
اوله (صنع الله الذی اتقن کل شیء) اشبو صنیعی ایتدی اول الله تعالی که
هرشیئی علم و حکمتله احکام ایتدی (انه خیر بما تفعلون) الله تعالی
افعال عبادک ظواهر و بواطنه وانک اوزره استیجاب ایتدکاری جزایه
عالمدر (من جاء بالحسنة فله خیر منها) برکسه که برحسنة ایله کله انکچون
اول حسنه دن خیری اولور * زیرا که الله تعالی انک عمل خسیسنه
جزاء شریف و عمل فانیسنه جزاء باقی و عمل واحدینه یدیوز مثلن جزاء
ایدر و یاخود انک جهتندن حاصل اولور خیر واردرکه اول جنتدر
(وهم من فرح يومئذ آمنون) حالبوکه انلر یوم قیامتده عذاب خوفندن
آمنلر در (ومن جاء بالسيئة فكبت وجوههم في النار هل تجزون الا
ما كنتم تعملون) واول کسه که الله تعالی به شرکله کله یوزلری اوزره
ناره القا اولنورلر وانلره دینورکه جزاء اولنمزسز الا انک سبیلله که شرک
و معاصیدن دنیاده انی ایشلر دیکز حق جل و علا مبدأ و معاد واحوال
یوم التنادی بیاندنصکره رسولی محمد صلی الله علیه وسلم امر ایلدیکه
توحیده رغبت و شرکدن رهبت ایدوب دیه که (انما امرت ان اعبد رب
هذه البلدة) بن امر اولندمکه اشبو بلده مکه نک ربیسی جل شانیه
عبادت ایدم اشعار ایچونکه اول دعوتن تمام ایتدی اندنصکره اکا
واجب قالمدی الا انک شانته اشتغال و نفسنی انک عبادتنه استغراق
واعمال ایده و بواسطه مکه بی تخصیصده انی تشریف و شاننی تعظیم
و تکریم وارد (الذی حرّمها) که اول رب تعالی که اول بلده بی تحریم
ایتدیکه انده دم انسان سفک اولنمز و صیدنه تعرض ایدلر و نباتی یولنمز

(وشجری)

وشجری کسلز (وله کل شیء) وهرشیء انک خلق و ملکیدر (وامرت
ان اکون من المسلمین) و امر اولندمکه اکا منقادلردن و یا ملت اسلام
اوزره ثابتلردن اولم (وان اتلو القرآن) و امر اولندمکه قرآن عظیم
تلاوته مواظبت ایدم تاکه بکا شیئا فشیئا انک حقائق ظاهر و منکشف اوله
و یا قرآنه اتباعله امر اولندم (فن اهتدی فانما یهتدی لنفسه) اول
کسه که اسلام و توحید و تلاوت قرآن و عملده بکا اتباعله اهتدا ایده
اول نفسیچون اهتدا ایدر زیرا که منافعی اکا عائددر (ومن ضل ققل
انما انا من المذنبین) اول کسه که اشبو امورده بکا اتباع ایتیه اکا
دیكل که بن دکل الا انذار ایدن رسوللردنم انک ضلالتی و بالندن بکا برشیء
راجع اولمز * زیرا که رسول اوزره واجب اولان انجق تبلیغدر بن ایسه
تبلیغ ایتدم (وقل الحمد لله) الله تعالی به حمد ایلکل که سکا نبوته انعام
و یا قرآنی تعلیم وانکله عملی توفیق ایتدی (سیریکم آیاته فتعرفونها)
الله تعالی سزه دنیاده آیات قاهره سنی کوستر و قعه بدر و خروج
دابة الارض کبی و یا آخرتده کوستر سز دخی آنک آیات الله ایلدیکنی
یلورسز حالبوکه اول وقتده بیلدیککز سزه نفع ایتز اولور (وماربک
بغافل عما تعملون) ربک جل شانته انلرک اعمالندن غافل دکلدر * ایدمی
عذابلرینک تأخیر اولنمی رب تعالینک انلرک اعمال سیئه لرینه غفلتندن ظن
ایتمونلر زیرا که عالم بالذاته غفلت جائز اولمز

سورة القصص وهی ثمان وثمانون آية مكية

دینلدیکه (الذین آتیناهم الکتاب) قولندن (لانتغی الجاهلین) دکن
مکيه دکلدر و دینلدیکه (ان الذی فرض علیک القرآن) آیتی مکه
ومدینه بیننده نازل اولوبدر

بسم الله الرحمن الرحيم

(طسم) معناسنده کلام سورة شهراده یکمشددر (تلك آیات الکتاب
المبین) اشبو سورهنک آیتلری کتاب مبین آیتلیدر (تلوه علیک من نبأ موسی
و فرعون بالحق لقوم یؤمنون) بز سکا موسی و فرعون خبرینک بعضنی
محققین اولدیغمز خالد جبریل لسانیه قراءت ایدرز شول قوم ایچونکه

علم از لیمزده انك ايمانك كلى سبقت ايتدى * زيرا انكه انتفاع ايدجك انلردر (ان فرعون علا في الارض) فرعون ارض مصرده تجبروتعظم ايتدى (وجعل اهلها شعبا) واول مصر اهلنى فرق مختلفه قيلمديكه انك اراده ايتديكى شيدده اكا متابعت ايدرلردى ويا انك طاعتنده برى برلرني اتباع ايدرلردى ويا انلرى استخدامده اصناف قلوب هر صنفى بر عمده استعمال ايدردي ويا انلرى احزاب قيلمدي بيلرنيده عدوات القاسيله تاكه اتفاق ايدوب اوزرينه هجوم ايتيدر (يستضعف طائفة منهم) انلردن بر طائفه ي استتهار ايدرديكه انلر بنواسرايلدر شول وجهله كيم (يذبح ابناءهم ويستحي نساءهم) طوغان اولادلرينك ار ككارين اولديرر وديشيلرين البقوردى (انه كان من المفسدين) اول مفسدلردن ايدى اول اجلدن تخيل فاسدله اولاد انبيادن خلق كثيرك قتلنه جرأت ايتدى (وزيدان نمى على الذين استضعفوا في الارض) ارض مصرده فرعون وقبط ايدنده استضعاف اولنان بنواسرايله ديلدككه انلردن انقادله تفضل ايدوز (ونجعلهم ائمة و نجعلهم الوارثين) وانلرى خيروه اقتداء اولنور قاده قيلمهوز (ونمكن لهم في الارض) وبنواسرايلى ارض مصر وشامه تسليط وتوطن ايدوز (وزى فرعون وهامان وجنودهما منهم ما كانوا يحذرون) وفرعون وهامان وايكيسنك جنودلريله بنواسرايلدن حذر ايتدكاريني كوسترهوز كه اول بنواسرايلدن برموالدييله ملكلرينك ذهابي وكنديلرك هلاكيدر (واوحينا الى ام موسى ان ارضيه) بز موسى عليه السلامك اناسى يوحنا بنت لاوى بن يعقوب عليه السلامه وحى الهام ويا منامله وحى ايتدككه ولدك موساي ارضاع ايت (فاذا خفت عليه فآلقيه في اليم) چنانكه انك صياح وبكائى سبييله بيلنوب قتل اولنمى خوفن ايدوسن انى بحر نييله براق (ولا تخافي ولا تحزني انارادوه اليك وجاعلوه من المرسلين) انك اوزره ضيعه وشدت خوفن ايتمكل وانك فراقنه حزن چكمكل بز سكا انى زمان قريده رد ايدهرز وانى مرسلندن ايلرز * ابن عباس رضى الله عنهما ايدر وقتاكه ام موسى عليه السلامك ولادنى وقتى ايردى مكر انك برقابله آشناسى وار ايديكه اول فرعونك بنواسرايل حبلاسى اوزره تسليط ايتديكى قابلهلك برسيدي ام موسى اكا ديديكه اشته بنم شدت ولادتم وقتى ايروبدر

(آشنالغك)

آشنالغك ظهورى كونيدر ديو آندن امتداد ايتدى اولدخى نعم ديوب اكا كلدى حتى كه موسى عليه السلام يره دوشيك موسى عليه السلامك النندن برنور ظاهر اولدى قابله انى كوريجك اعضاسى دتريوب موسانك محبتى قلبنه القا اولندى ام موسايه انى خبر و يروب ديديكه بن كلديكده عزم اشبو ولديكى قبل ايدى لكن بكا ايريشن حالت قلمدن اول عزمى كيدردي قابله كديچك اثرنجه فرعونك جاسوسلرى كديلر ام موسى خوف ايدوب دهشتندن موسايى بر قزمش تنورك ايچنه صوقدى جاسوسلر كيروب كورسهلكه انده بر قزمش تنور طورر وام موسايه تغير كلامش ومملرينه سود اينمامشدر ديديلركه اول قابله سكا نه حاجت ايچون كمشدى ديديكه اول بنم آشنالردن اولوب بنى زيارت ايتلدى اوليله اولسه جاسوسلر اندن چيقوب كتديلر بعده موسى عليه السلام بكا ايدوب ام موسى انك قتنه واردى كورسه كه قزمش تنورده ضرر كمش بلكه الله تعالى اكا انى برد وسلام ايتلش بعده فرعونك ولدان طلبنده اهتمام كوروب موسايه اندن ضرر خوفيله قبط نجارلردن برينه وارديكه بر تابوت صغير اشترى ايدو نجار اكا بوتابوتى نيلرسن ديدى اول كذبندن كراحت ايدوب مقصودينى حقيقتى اوزره ذكر ايلدى نجار دخى اكا ديلديكى كى تابوتى ويروب بعده ذباحينه كتديكه انى خبر ويره وارد يغنده ديلى طوتيلوب سويلككه مجالى اولدى وذباحيندن دخى هيچ برى انك اشارت ومرادين بيلدى آخراى اورديلر وقتلندن سورديلر چون نجار كير ومزانه ايردى الله تعالى اكا سويلنى ويردى هماندم ذباحينه اخبار ايچون كتدى واريجق الله تعالى انى سويلز وايشتمز ايتدى انلره مرادينى افهامه قادر اولميجق انى دو كوب وقتلندن سورديلر اول حيرت ايله كيدر كن يولن يتوردى اول حالتده قلبنه الله تعالى ندامت كتوردى اشبو كورمز وسويلز لكدن خلاص اولور سم من بعد اول ولده ضرر قصدين ايتيم بلكه امكانم اولدجه انى كيرليم ديو اخلاص اوزره الله تعالى ايله عهد ايلدى اول عزم صادق حرمته فضل الهى ايله كوزى كوروب ديلى سويلدى * روايت اولنديكه ام موسى موسايى طوغرد يغند نصكره اويج آى سجرنده ارضاع ايتدى بعده اكا ضرر ايرمك خوفيله انى بر تابوته قويوب نييله براقدى مكر فرعونك

بر سوکلی قزی وار ایدی هرکون اکا اوج حاجت عرض ایدوب
فرعون دخی رد ایتمز روا ایلردی واول قزک برص شدیدی اولوب اطبا
اکا علاجدن عاجز اولمشلردی فرعون انک امرنده کاهنلری جمع ایدوب
سؤال ایتدکده دیدیلر که بوکا علاج بحر قبلندن اولور که انده انسانه بکزر
بر حیوان بولنور انک ریقندن آلنوب بوقزک برصنه سورلدکده برص
کیدوب اندن عافیت بولور * ایمدی فلان کونک شمسى اشراقده
اول حیوان نیلدن فلان موضعه کلور اوپله اولسه اول کونده فرعون
خواص اتباعیله اول موضعه واردیلر اول وقت معینه نیلدن بر تابوت
کلور کوردیلر امواج انی براغاجه ایلشدردی فرعون ایتدی غالباً
اشبودر که کاهنلر بزه انی بیلدردی هر جانبدن اکا سفینه لرله ایردیلر
آلوب فرعون قتنه کتوردیلر لکن هیچ برکسه انک نه قتنه ونه کسرنه
قادر اولدی حتی که آسیه بنت مزاحم اکا ال اورچک فی الحال آچلدی
(فالتقطه آل فرعون لیكون لهم عدوا وحزنا) اوپله اولسه آل
فرعون انی اخذ ایتدیلر تا که اول انلره عاقبت امرده عدو اولوب
رجاللرین قتل ونسارلرین استعباد ایده (ان فرعون وهامان وجنودهما
کانوا خاطئين) ایمدی فرعون وهامان وایکیسنک جنودی خطا ایدر
اولدیلر زیرا که اول موسی اجلچون ولداندن الوف قتل ایتدکارند نصکره
انی آلوب بیوتدیلر تا که حذر ایتدکاری شیئ اول انلره ایشلیه ویاخود
مذنبین اولدیلر که عدولرین انلره تربیه ایتدرمکه حق تعالی انلره عقاب
ایتدی * وهب ایدر وقتا که تابوتی فرعون اوکنه قویوب آچدیلر
فرعون موسایی کورچک دیدیکه اعدامزدن برعبرانیدر نه سبدن بونی
ذبح ایتمشلر دیو یاوزلندی مکر انک مرأه شی آسیه بنت مزاحم
بنو اسرائیلدن ایدی خیبار نسادن وبنات انیادن ایدی ام مساکین
اولوب انلره مرحمت وتصدق ایلردی فرعونک یاننده ایدی دیدیکه
بو ولد بریاشندن زیاده یه بکزر سن ایسه ولدان ذبحنه امر ایتدیکنک
بویلدده در ودخی احتمالدر که بنوا اسرائیلدن اولیوب قوم آخریندن اوله
بووجهله انک غضبن اسکان ایتدی (وقالت امرأة فرعون قرّة عینی لی
ولت) وآسیه فرعونه دیدیکه اشبو ولد بنم و سنک قرّة عینم اولسون
الله تعالی انی انلره سودردی وریقندن اول قزک برصنه سوردکاری کبی

(برصی)

بر صی زائل اولدی * حدیثده کلدیکه فرعون آسیه یه دیدیکه بولد
سنک اولسون بن استمیزن اکر بنم دخی اولسون دیمش اولسیدی الله تعالی
آسیه یه هدایت ایتدیکی **کبی** اکا دخی هدایت ایدردی (لاتقتلوه
عسی ان ینفعنا او نتخذہ ولدا وهم لایشعرون) انی اولدرمکز امیددر که
اول بزه نفع ایده انکله نفعلنهور ویاخود انی ولد ایدنهور و الحال
بیلزلر که انلر انی التقاطده ویا اندن نفع طمعنده ویا انی تبئده خطا ایتدیلر
زیرا که اول انلری هلاک ایدیسردر (واصبح فؤاد ام موسی فارغاً)
ام موسانک قلبی موسانک هم و ذکرندن غیرى هر شیئدن خالی اولدی ویاخود
اونوتدی الله تعالینک شول وحبینی که انی بحره القائله امر ایتدیکنده خوف
وحزن چکیمه وشول عهدینی که اکا موسایی رد ایده و مرسلیندن ایلله اکا
شیطان کلوب دیدیکه ولدکی فرعون قتل ایتسندن کراحت ایتدک حالبوکه
اندن سکا اجر وثواب حاصل اولوردی بلکه انک قتلنه کندک تولى ایدوب
بحره القاء واغراق ایتدک وقتا که اکا ولدینک نیلدن فرعون یدینه ایردیکی
خبرین ایشندی شیطان اکا دیدیکه اشته اول عدو یدینه دوشدیکه سن
انی اندن قاچورردک اوپله اولسه عظیم بلاء اکا عهد الهی اونوتدردی
(ان کادت لتبدی به) ام موسی فرط ضجرت ویافرحنندن قریب اولدیکه
موسانک امر وقصه سی سرنی واول انک اوغلی ایدیکنی اظهار ایدیدی
(لولا ان ربطنا علی قلبها لتکون من المؤمنین) اکر بزاتک قلبی اوزره صبر
و ثباتی ربط ایتسیدک تا که الله تعالینک وعدینه مصدقیندن اوله ویا انک
حفظنه واثقیندن اوله یوخسه فرعونک تبئی وعطفنه دکل (وقالت لاخته
قصیه فبصرت به عن جنب وهم لایشعرون) ام موسی موسی علیه
السلامک اختی مریم رضی الله عنها یه دیدیکه موسانک اثرنجه کیتکل که
انک خبرین آلوب بکا ایرکورده سن اولدخی نعم دیوب موسانک تابوتی قنده
کیدر ونه محله ایردیکنی اوزاقدن ویانیل کنارندن کوزتدی و الحال فرعون
وقومندن هیچ کسه اول انک اختی اولوب تابوتک قنده کیدر ایدیکن
کوزتمدن بیلزدی (وحرمتنا علیه المراضع من قبل) مریمک موسی اثرنجه
کتمسندن اول بز موسایی مرضعه لری ارتضاعدن ویا اناسندن غیرى
هیچ بر مرأهک لبئی شربدن منع ایلدک آسیه نک ایسه دنیادن اکبر همی
اکا مرضعه بولق ایدی هر قنغی مرضعه یی اکا کتوردیلر سه ثدینی

المدی بوحال اوزره سکز کون پکوب موسی ایسه صحیحہ ایتکدن زائل اولدی انلر ایسه مرضعه طلبنده اولدی (فقالت هل ادلکم علی اهل بیت یکفلونه لکم وهم له ناصحون) موسانک اختی مریم انلره دیدیکه بن سزه بر اهل بیتی دلالت ایدمینکه اشبو ولدی سزیکون ضم وارضاع ایده حالبوکه انلر ولدیکزی ارضاع و تربیه ده تقصیر ایتزلر بلکه ناصحردر اول بر مرأه درکه ولدی قتل اولندیغندن اکا احب اشبا ارضاع ایده جک بر صغیر بولق اولمشدر مریم بوکلامی سویلیجک انی اخذ ایدوب دیدیلرکه سن ولدی بیلورمیسین ایدمی بزه انک اهلنی دلالت ایت دیدیکه اول بنم انامدر دیدیلر که انانک اوغلی وارمیدر دیدیکه هارون نامنده بر اوغلی واردرکه ولدان قتل اولمز ییلده طوغمشدر دیدیلرکه کرچکسن ایدمی بزه انانکی کتورکل اندن مریم اناسنه واروب موسانک حالن اکا خبر ویردی واناسن انلره کتوردی وقتاکه ام موسی کلدی اول حینده موسی علیه السلام فرعونک النده اولوب آغلر و فرعون ایسه انی اویالردی اناسی انی الینه الدیغی کی ثدینی قبول ایلدی و طوینجه اندن امدی فرعون دیدیکه سنک بوولده مناسبتن نوجهله درکه سنک ثدیکدن غیری ثدینی قبول ایتدی دیدیکه مناسبتم شول وجهله درکه بن طیبه الريح و طیبه الالبتم هر صبی که بکا ویرلدی الا اول بنم ثدیمی قبول ایتدی اولیه اولسه فرعون اکا هر کونده بر دینار اجرته موسایی اکا ارضاعه ویردی اول کونده موسایی آلوب اوینه کتوردی الله تعالی انی رده وعدنک انجازی مقتضاسنجه (فرددناه الی امه کی تقرعینها ولا تحزن) بز موسایی اناسنه رد ایتدک که موسی ایله کوزی روشن اولوب فراقیله حزن چکمی (ولتعلم ان وعد الله حق) والله تعالینک وعدی حق ایدیکنی علم مشاهده ایله بیله (ولکن اکثرهم لا یعلمون) لکن انلر اکثری انک وعدی حق ایدیکنی بیلیوب انده اریتاب ایدرلر و یاخود رددن غرض اصلی الله تعالینک وعدی حق ایدیکنی ام موسانک بیلمی اولوب ماسواسی بالتبع ایدیکنی انهادر (ولما بلغ أشده) وقتاکه موسی شول سنه ایردیکه نشوآنک اوزره زیاده اولمز اول اوتوز یاشندن قرقه دکندر انده عقل کالان بولور * دینلیدیکه هر نبینک بعثتی رأس اربعینده اولمشدر (واستوی) وقدی ویا عقلی مستوی اولدی (آتیناه حکما وعلما) بز اکا نبوت و علم و دین و یردک و یاخود انی استنبادن

(اول)

اول حکما و علمانک علم و سمیت و یردک حتی که استجهال اولنور شیئی نه سویلدی ونه ایشلدی اشبو نظم قصیه موافقدر که انک استنبائی هجرتدنصکره مراجعتده اولمشدر (وکذلك نجزي المحسنين) موسایه واناسنه ایتدیکمز کی محسنلره احسانلری اوزره جزاء ایدرز (ودخل المدينة علی حین غفلة من اهلها) موسی علیه السلام قصر فرعون ویا منف ویا خابین ویا عین شمس نام موضعدن کلوب مصره داخل اولدی بر وقته که انده مصره دخول اهلنه معتاد دکل ایدی ویاخود اول وقته انک دخولنی توقع ایتزلردیکه اول وقت قبلوله ده ویاخود اخشامله یتسو اراسنده ایدی (فوجد فیها رجلین یقتلان هذا من شیعته وهذا من عدوه) اول داخل اولدیغی بلده ده ایکی رجل بولدیکه بری برلریله اختصام و تنازع ایدرلر دی انک بری بنو اسرائیلدن و بری قبطدن ایدی (فاستغاثه الذی من شیعته علی الذی من عدوه) بنو اسرائیلدن اولان رجل قبطدن اولان رجل اوزره موسادن استمداد ایتدی (فوکزه موسی فقضی علیه) اولیه اولسه موسی علیه السلام جیع کفیله قبطینک ککوکنه اوروب اولدردی (قال هذا من عمل الشیطان انه عدو مضل مبین) موسی علیه السلام دیدیکه اشبو قتل مضل شیطان عملندندر که اول کفار قتلنه امر اولنماشدی ویا موسی علیه السلام انلرک بیلنده مأمون ایدی اول شیطان الله تعالینک خلقنه ظاهر العداوتدر (قال رب انی ظلمت نفسی فاغفر لی مغفرله انه هو الغفور الرحیم) موسی علیه السلام دیدیکه یارب اول قبطی بی قتلله نفسه ظلم ایتشم بنی مغفرت ایت رب تعالی دخی انی مغفرت ایتدی زیرا که اول عبادنک ذنوبنه غفور وانلره رحیمدر (قال رب بما انعمت علی فلن اکون ظهیرا للمجرمین) بعده موسی علیه السلام توبه سنی تأکید ایدوب دیدیکه یارب بکا مغفرتله انعامک حقیچون بنی عصمت ایت شول معاونتم جرمه مؤدی اولور کسه لره معین و ظهیر اولیم و یاخود بکا انعام ایتدیکک قوت حقیچون انکله اولیا که امانت ایدم یوخسه اعدانک مظاهرتنه انی استعمال ایتیم (فأصبح فی المدينة خائفا یتربص) موسی علیه السلام قبطی بی قتل ایتدیک بلده ده نفسی اوزره خائف اولدیغی حالده منتظر اولدیکه اول استقاده اولنه (فاذا الذی استنصره بالامس یستصرخه) کوردیکه

دو نکی کونده اندن نصرت طلب ایدن اسرائیلی ینہ بر قبطی آخرله قتال ایدوب موسی علیه السلام دن انک اوزره دخی استمداد ایتدی (قال له موسی انک لغوی مبین) موسی علیه السلام اول اسرائیلی ینہ دیدیکه سن شول غوایتی ظاهر رجلسن زیرا که سن بکا برجلن قتلنه سبب اولمشیکن شمدی بر رجل آخرله قتال ایدوب ینہ بدن انک اوزره دخی استمداد ایدرسن اول اسرائیلی ینہ غضب ایتدکنصکره ینہ اکا ترجم ایتدی (فلما ان اراد ان یبطش بالذی هو عدو لهما) وقتاکه موسی علیه السلام کندویه واول اسرائیلی ینہ عدو اولان قبطی ینہ بطش ایتدکن دیلدی زیرا که اول انلرک دینی اوزره دکایدی اسرائیلی ظن ایتدیکه موسی علیه السلام انی قتل ایتدکن دیلر (قال یاموسی اترید ان تقتلنی کما قتلت نفسا بالامس) دیدیکه یاموسی بنی قتل ایتدکنمی دیلرسن ننکیم دونکی کونده بر نفس قتل ایتدکن اسرائیلی موسی ینہ بویه سویلدی زیرا که موسی اکا سن غویسن دیو عتاب ایتدیکندن موسی نک قصدی کندیسنی قتل ایتدکنه اولسن ظن ایلدی (ان ترید الا ان تكون جبارا فی الارض وما ترید ان تكون من المصلحین) یاموسی سن دیلدیکت دیلرسن الا انکچونکه ارض مصرده ظلمله قتال اوله سن یوخسه ناس بینهی اصلاح ایدنلردن اولق دیلرسن که انکه مخاصمی دفع ایدهن وقتاکه اول قبطی اسرائیلینک سوزین ایشندی بر کون اول قبطی ینہ قتل ایدن موسی ایدیکن بیلدی فی الحال فرعون واربو انی خبر ویردی اوله اولسه فرعون موسی نک قتلن امر ایلدی (وجاء رجل من اقصى المدينة یسعی) اول بلده نک وسطندن بر رجل مشینده سرعت ایدرک موسی علیه السلامه واردی دینلدیکه اول رجل مؤمن آل فرعوندن ایدیکه فرعونک ابن عمی اولوب اسمی خریبل ایدی (قال یا موسی ان الملائماتمرون بک لیقتلوك فاخرج انی لک من الناصحین) دیدیکه یاموسی قوم فرعونک اشرافی سنک امرنده مشورت ایدرلر که سنی قتل ایدلر ایدمی بوبلدهدن چیعوب کیت بن سکا خیر اراده ایدنلردنم (فخرج منها خائفا یترب) اکا بناء موسی علیه السلام بلدهدن چیقدی قورقرکه یولده طلب وتعرض اولنه نه زاد ونه ظهري وارکه سیرینه عون بولنه حتی سکر کون کندی برشی بولمیدنلر اغاج پیراغیله تعیش ایتدی (قال رب نجنی من القوم الظالمین)

(و دیدیکه)

و دیدیکه یارب بنی اول قوم ظالمیندن تخلص ویاخو قنلردن حفظ ایت (ولما توجه تلقاء مدين قال عسی ربی ان یهدینى سواء السبیل) وقتاکه موسی علیه السلام مدين جاننه قصد ایلدیکه اول شعيب علیه السلام قریه سیدر دیدیکه رجام بودر که رجم جل شانه بنی اوسط طریق هدايت ایده زیرا که اول طریق بیلزدی اکا اوج طریق ظاهر اولوب اول ايسه اول طریق یقنرک اوسطنه کندی انک عقبنجه انی طالبلر ایکی طرف یوللر توجه ایتدی * دینلدیکه موسی علیه السلام دعا ایدیک اکا بر ملک فرس اوزره النده عنزه ايله کلدی حتی انکه بيله مدینه واصل اولدی (ولما ورد ماء مدين وجد علیه امة من الناس یسقون) وقتاکه موسی علیه السلام مدين بئرینه کلوب واصل اولدی واول بئر یاننده ناسدن بر جماعت بولدیکه اول بئردن حیوانلرین صوارلردی (ووجد من دونهم امرأتین تذودان) واول ناسدن اسفل مکانده ایکی مرأه بولدی غمترین انلرین اغنامندن کف ایدرلر که اختلاط ایتدیلر انلرکه بيله سقیدن عجزلرچون (قال ما خطبکما) موسی اول ایکی مرأه دیدیکه شانکزدنر کیم ناسله بيله غمکزی صوارمیبوب بئردن غمکزی منع ایدرسن (قالنا لانسق حتی یصدر الرعاء) اول ایکی مرأه دیدیلر که بز صوارمزتا که راعیلر حیوانلرین صواروب کیده لر شول حذرله کیم رجاله مزاجه ایتدیلر انلر کتدکرنده بزواروب اغنامزی صواررز (وابونا شیخ کبیر) و بابامز ايسه چوق یاشلو بر پیردر اغنامزی سقچون چیغمه استطاعتی اولمیدنلر اضطرار له اکا بزی کوندهدر (فسق لهما) اوله اولسه موسی علیه السلام انلر غمترین صواردی مع هذا یالن ایاق یوریمکدن ایا قنرینک در یسی صویلش و آجلقدن بو کالوب ضعیف اولمشدی دینلدیکه موسی علیه السلام انلرک اول قولنی ایشدیکت مرحمت ایدوب اول محله قریب بر بئر آخر وار ایدیکه اغزی بر بیوک طاشله قیامشدی انی یدی ویا اندن اکا کثر رجال قالدردی موسی علیه السلام یالکز قالدیروب اغنامی اندن صواردی (ثم تولى الى الظل) بعده براغاج کولکه سنه واردی (فقال رب انی لما انزلت الی من خیر فقیر) و دیدیکه یارب دین خیرندن بکا انزال ایتدیکت ایچون دیساده فقیر اولدم زیرا که اول فرعون عندنده ایکن وسعتده ایدی ویاخود یارب

بن خلقه خبره محتاجم که انکه صلبی طور غم شول بکا انزال ایتدیکت
خیر دین اجلچونکه اول علم و حکمتدرو یا ظالمیندن نجاتد و قتا که اول ایکی
مرأه بابلرینه ناسدن اول رجوع ایتدیلر حالبوکه غمغری طوقلر صویه
قائمشدی بابلری شعیب علیه السلام انله دیدیکه نه سبیدن تیز کلدیکز
معتاد وقتکزه قاتلمدیکز دیدیلر که بر رجل صالحه راست کلدک بزه
مرحت ایدوب غمغری می صواردی شعیب علیه السلام اول ایکیسندن
برینه دیدیکه واروب بکا اول رجلی چاغرک (بجاءه احدیهما تمشی
علی استخیا) انک بریسیکه حیاسندن درغک کنی یوزینه طوتوب
موسی علیه السلامه کلدی * دیندیکه اول کلان اول ایکیسنت
صغراسی ایدی بر قولده کبراسی ایدی اسمی صفورا ویا صفراء ایدیکه
موسی علیه السلام انی تزوج ایتدی (قالت ان ابی یدعوک لیجیزک اجرما
سقت لنا) دیدیکه بابام سنی چاغرکه بزه اغنامیزی صواردیغک
مکافاتن ایده * موسی علیه السلام اندن اول کلامی ایشیدیکک کتمک
دیددی لکن قتی آج اولدیغندن کتامکه چارهسی اولدی اولیه اولسه
مرأه اوکنجه وموسی علیه السلام اردنجه کتدی لکن روزگار مرأه انک
آردندن کلوب ثوبی ردفته ضم ایتکله ردفتی وصف ایدیک موسی
علیه السلام اکا نظردن کراحت ایدوب مرأه بی اردنجه یورتدی
واکا دیدیکه اگر یولده خطا ایدرسم بکا دلالت ایت نم دیوب اول منوال
اوزره ایکیسی کتدیلر موسی علیه السلام شعیب علیه السلامه داخل
اولدیغنده شعیب علیه السلام اکا طعام کتوروب اوکنه قودی موسی
علیه السلام انی اکلدن امتناع ایدوب بزاهل بیتز دینزی دنیا به بیع
ایتمز دیدی شعیب علیه السلام ایتدی آج دکلسن دیدیکه بلی آجم لکن
قورقارینکه بو طعام اول صواردیغمه عوض اوله شعیب علیه السلام
دیدیکه بو بزم عادتدرد هر که بزه نزول ایده بز انی اطعام ایدرز
وبرکسه که بر فعل معروف ایدوب اکا برشی اهدا اولنه انک اخذی حرام
اولز اولیه اولسه موسی علیه السلام اول طعامدن اکل ایلدی (فلما جاءه
وقصّ علیه القصص قال لا تخف نجوت من القوم الظالمین) وقتا که
موسی علیه السلام شعیب علیه السلامه کلوب طعامندن یددی ومقصوصی
اکا خبر ویردیکه اول قبطی بی قتلی وفرعونک انی قتله قصیدر شعیب

(علیه)

علیه السلام اکا دیدیکه قورقفل که اول قوم ظالمیندن نجات بولدک
زیرا که فرعونک مدین اوزره تسلطی یوقدر (قالت احدیهما
یا ابت استأجره) اول ایکی مرأه انک بریکه انی دعوت ایتشدی دیدیکه
ای بابا انی اغنامیزی رعی ایچون استیجار ایت (ان خیر من استأجرت
القوی الامین) زیرا سنک استعمال ایتدیکت خیرلوسی اول کسه درکه
عمله قوی وامانته مؤدی اوله شعیب علیه السلام اکا دیدیکه انک قوت
وامانندن نه شی بیلدک مرأه ایتدی اما قوت بوکه فلان بئرک اغزنده کی
جری قالدردی حالبوکه انی یدی سکر کسنه کوجلله قالدیرردی واما
امانتی بوکه بنی اردنجه یورتدی تاکه بدتم وصفنی کورمیه (قال انی
اریدان انکحک احدی ابنتی هاتین) اولیه اولسه شعیب علیه السلام
موسی علیه السلامه دیدیکه دیرینکه اشبو ایکی قزیمک برین سکا تزویج ایدم
(علی ان تأجرنی ثمانی حجج) شول شرطله کیم بکا سکرز ییل اجیر
اوله سن (فان اتممت عشرا فن عندک) اگر اون ییل تمام ایدرسک
اول فعلک سندن تفضل وتبرعدر یوخسه واجب دکل (وما اريد
ان اشق علیک) مراد ایتمزینکه سکا مشقت ویرم اون ییل تمامنی الزامله
ویامراعات اوقاتده مناقشه ایله (ستجدنی ان شاء الله من الصالحین)
حسن معامله ولین جانب ووفاء معاهده ده ان شاء الله بنی صالحردن
بولورسن (قال ذلک بینی و بینک ایما الاجلین قضیت فلاحدون علی)
موسی علیه السلام دیدیکه اشبو شرط بتمله سنک ارامزده در ایکی اجلک
قنغیسین قضا ایدرسم کرک اطولنی ویا اقصرنی زیاده طلبیله اوزریمه اعتدا
اولتمسون اون ییل ایله زیاده مطالبه اولتمیم سکرز ییل اوزره زیاده مطالبه
اولتمدیغم کبی (والله علی ما نقول وکیل) اشبوسویشدیکمز مشارطه به
الله تعالی شاهد وحفیظدر * ابوذر رضی الله عنهدن مرفوعا روایت
اولنورکه موسی علیه السلام ایکی اجلک قنغیسین قضاء ایدوبدر دیوسؤال
اولندقدده دیکل که اون ییل قضاء ایدوبدر واول ایکی مرأه انک قنغیسین
تزویج ایدوبدر دیوسؤال اولندقدده دیکل که صغراسنی کیم اول موسی
علیه السلامه کلشدر وباباسنه انی استیجار ایت دیمشدر * وهب
قولنده اول انلرک کبراسنی تزویج ایدوبدر * روایت اولندیکه شعیب
علیه السلامک آغلقدن کوزلری اعی اولدی الله تعالی اکا بصرنی
رد ایلدی اوچ کره اعی اولوب بصری رد اولندیغندن صکره

الله تعالى هر شئيّه عليم ايكن اكا ديديكه بواغلق ندر جنه شو قكدن
ويا نار خوفك دنيدر شعيب عليه السلام ديديكه يارب اول دكل الالقاكه
شوقندروحي الهى كديكه اويله اولسه ياشعيب لقائم سكا تهيه اولسون
اول اجلدن كلیم موساي سكا خدمتكار ايتدم * روايت اولنديكه شعيب
عليه السلام قزنى موسى عليه السلامه انكاح ايديچك قزينه امر ايتديكه
موسى عليه السلامه برعصا ويره تا كيم انكله غمندن سباع كلورسه كيدمره
دينلديكه اول عصا جنت اغاجندن اولوب آدم عليه السلام اتى جنتدن
چيقارمشدى اتى انبياء برى برلرندن توارث ايدرك حتى كه شعيب عليه السلامه
ايرمشدى اولدخى اتى موسى عليه السلامه ايداع ايتمشدى قزى اكا
اول عصايي كتوريجك شعيب عليه السلام اكا بونى ايتوب بونك غيرى
برعصا كتور ديدى زيرا انبيالرك عصالري شعيب عليه السلام قنده ايدى
قزى دخی اتى الوب يرينه قودى بعده انك غيرى برعصا آلقى مراد ايتدكه
الينه ينه اول عصا كلدى اتى باباسنه كتوروب اوچ كرهيه دكين بويله
واقع اوليچق اول عصايي موسيه ويردى موسى عليه السلام دخی اتى
الوب كتدكدنصكره شعيب عليه السلام اتى ويرديكنه نادم اولدى زيرا كه
اول كنديده وديعه ايدى موسانك اثرنجه كيدوب اندن اول عصانك
رديني ديلدى موسى عليه السلام اتى ويرمزينكه اول بنم عصامدر ديدى
بونزاعله ايكيلى اول ملاقى اولدقلى رجل حكمنه راضى اولغه
عهد ايتديلر اويله اولسه رجل صورتده برملكه ملاقى اولوب
اتى نزاعلرينه حاكم ايتديلر ملك موسايه ديديكه عصاكي الكدن
يره برافعل بعده اتى هر قنغيكز رفع ايدى بيلورسه اول عصا انكدر
چون موسى اتى الندن برافدى شعيب عليه السلام اتى اخذ ورفعه چاره
ايدى ميوب موسى اتى رفع ايدوب اخذ ايتدى * روايت اولنديكه موسى
عليه السلام اجلن تمام ايدوب شعيب عليه السلام اكا قزيني تسليم ايديچك
موسى عليه السلام مرأه سنه ديديكه بابا كه سويله كه غمك بعضنى بزه ويره
چون اول اتى باباسنه سويلدى شعيب عليه السلام ديديكه اشبو ييلده
اغنامدن هر طوغان ابلق و بلقا جدى سنك اولسون موسى عليه السلامه
منامده دينلديكه اغنامك مسقاسى اولان مائى عصا ايله اوره اويله اولسه
موسى عليه السلام مسقايه واروب عصاسيله مائى اوردى بعده اول مادن

(اغنامي)

اغنامي صو اردى اويله اولسه اول ييلده طوغان جدك جيعي
آبلق لونده اولوب شعيب عليه السلام وعدى مقتضاسنجه انلري
موسى ايله زوجه سنه ويردى (فلما قضى موسى الاجل وسار باهله)
وقتا كه موسى عليه السلام اجلك اكلن قضاء ايدوب اندن فارغ اولدى بعده
اون ييل دخی شعيب عليه السلام قنده اقامت ايتدى اويله اولسه موسى
عليه السلامك شعيب عليه السلام قنده مدت اقامتى يكرمى ييل اولدى
بعده اهليله مصره رجوعه شعيب عليه السلامدن استيذان ايدوب اذن
ويردكدنصكره اهليله مصر جانبنه توجه ايتدى (آنس من جانب الطور
نارا قال لاهله امكثوا اتى آنست نارا) طوره ولى ايدر جهتدن نار
كوروب اهلنه ديديكه سز مكانكرده وقوف ايدك * زيرا بن نار كوردم
(اعلى آتيكم منها بخبر) تا كه سزه اول نار قبلندن طريق خبرين كتورم
(او جذوة من النار لعلكم تصطلون) ويا اول ناردن قطعه ويا شعله
كتورم كه ايصنه سز * زيرا كه اول بريده ليله مظلمه ده برد شديدده
اولوب مرأه سنى طلق اخذ ايتمشدى (فلما اتاها نودى من شاطئ الوادى
الايمن فى البقعة المباركة من الشجرة ان يا موسى اتى انا الله رب العالمين)
وقتا كه موسى عليه السلام اول ناره واردى وادى ايمن جانبندن
بقعة مباركه ده شجرة عناب ويا عوسجندن اكا ندا اولنديكه ياموسى بن اول
طالينك ربيسى الله جل شاننه ين (وان الق عصاك) و دخی عصاكي
يره برافعل ديوندا اولندى (فلما رآها تهتز كأنها جان ولى مدبرا ولم
يعقب) اتى يره برافديغنده كورسه كه اول تحرك ايدر كأنه حية صغيره دركه
اضطرابى چوق اولور خوفندن آردينه دونوب قاچدى اكا التفات
ايتدى (ياموسى أقبل ولا تخف انك من الآمنين) اكا ندا اولنديكه ياموسى
اكا اقبال ايدوب خوف ايتكل كه سن مخاوفدن آمنلردنسن زيرا كه بنم
قتمده مرسلار خوف ايتزلر (اسلك يدك فى جيبك تخرج بيضاء من غير
سوء) يدكى جيبكه ادخال ايتكه اتى بر صنسز شمس شعاعى كبي بيضاء
چيقارمسن (واضم اليك جناحك من الارب) چقان يدك امرى واندن
كورديكك شعاع سكا خوف ويره اتى جيبكه ادخال ايتكه اول اولكى حالتده
عودت ايدى وجناح ايسه يدك كليدر ويا عضددر * ابن عباس رضى الله
عنهما ايدر الله تعالى اكا امر ايتديكه يدنى صدرينه ضم ايدى تا كه حيه يي

کور دیکنده ا کا ایریشن خوف کیده ایمدی بر خائفکه یدنی صدرینه وضع
ایده انکه خوفی زائل اولور دینلدیکه ضم جناحله مراد سکوندر یعنی
روحک تسکین و قلبک اضطرابی تلین ایت (فذا نك برهانان من ربك
الى فرعون وملائه) اشبوید وعصا ربك جل شانهدن فرعونه وقومك
اشرافه ایکی حجتدر (انهم كانوا قوما فاسقين) زیرا که انلر قوم فاسقین
اولدیلر احقاد لر که انلره رسول ارسال اولنه (قال رب انی قتلتم منهم
نفسا فاخاف ان یقتلونی) موسی علیه السلام دیدیکه یارب بن انلردن
نفس قتل ایتشم قورقرینکه اول نفس مقابله سنده انلر دخی بنی قتل ایدلر
(واخی هارون هو أفصح منی لسانا) وقرنداشم هارون لسانده بندن
ابین واحسندر وموسانك لسانده ایسه عقده اولمشیدی شول ناردنکه
صباوقی حالنده انی آغزینه صوقشیدی تکیم قصه سی سوره طهده
یکمشیدی (فأرسله معی رداً یصدقنی) ایمدی هارونی بمله بیله بکا
معین ارسال ایتکه اول بنی تصدیق ایده تخلیص حق و تقریر حجت و تزییف
شبهه ایله زیرا که محاجه عندنده لسانم بکا مطاوعت ایتز (انی اخاف
ان یکذبونی) زیرا قورقرینکه فرعون وقومی بنی تکذیب ایدلر (قال
سنشد عضدك باخیک) الله تعالی دیدیکه قرنداشکله سنی قوتلندیررز زیرا
کشی قرنداشیله قوتلنوریدك عضدله قوتلنمی کبی وعضدایسه مرفقله
کتف مابیندر (ونجعل لکما سلطانا) وایککز ایچون حجت وبرهان
ویاغلبه وتسלט قیلورز (فلا یصلون الیکما) ایمدی انلر سزه استیلاء
وحججه ویاقتل وسوء ایله واصل اوله مزلر (بآیاتنا) ایکیکز بزم آیتلریمز
ایله انلره کیدك ویاخود آیتلریمزله سزی انلره تسلیط ایدرز (انما
ومن اتبعکما الغالبون) ایکیکز واتباعکز فرعون وقومنه غالبلر سز
(فلما جاءهم موسی بآیاتنا بینات قالوا ما هذا الا سحر مفتری) وقتا که
موسی انلره ربو بیتمزه دلالتده علامات واضحه ایله کلدی دیدیلر که
بو بر سحر مختلقدر که اندن اول مثلی نقل اولنموبدر ویانی تعلم ایدوب بعده
انی الله تعالی یه افترا ایلوبدر (وما سمعنا بهذا فی آبائنا الاولین)
اشبو سحری ویاتما نبوقی آباء اولینزک زمانلرنده اولدیغن ایشتمشز
(وقال موسی ربی اعلم بمن جاء بالهدی من عنده) موسی دیدیکه ربم جل
شانه اعلدر اول کسه بی که انك عندندن رسالتله کلدی اول محق سز

(مبطلر سز)

مبطلر سز (ومن تكون له عاقبة الدار) ودخی اول کسه بی که دار دنیانك
عاقبت محموده سی که عبدك رحمت ورضوانله وعند الموت بشارت ملائکه
ایله ختم اولمسیدر اول کسه ایچون اولور * زیرا که دنیا آخرته ممر
خلق اولنوبدر وآخرته بالذات قصد اولنسان ثوابدر وعقاب قصدی
بالعزدر (انه لا یفلح الظالمون) کذب وسحر وکفر وسائر فساداتله
نفسلرینه ظلم ایدلر دنیاده هدایه وعقباده حسن عاقبتیه نائل اولزلر
(وقال فرعون یا ایها الملاء ما علمت لکم من الهه غیری) فرعون اشراف
قومنه دیدیکه وجود ده بدن غیری الهکز اولدیغن بیلزین موسایه اطاعت
ایتمکز (فأوقدلی یا هامان علی الطین فاجعل لی صرحا لعلی اطلع الی الهه
موسی) ایمدی یاهان ابنه اوزره آتش یاقوب انی آجر ایتدیککدنصرکه
بنمچون برقصر عالی طویل بنا ایده کور که ا کا صعود ایدوب موسانك
الهه مطلع اولم کانه توهم ایتدیکه اول جسم اولوب سماده اوله واکا
ارتقاء ممکن اوله (وانی لاظنه من الکاذبین) ومع هذا بن ظن ایدرمکه
موسانك بدن غیری الهی اولمق ادعا سنده کاذبلردن اوله * اهل سیر
دیدیلر که فرعون وزیری هامانه صرح بناسیله امر ایدچک هامان
عمال وفعله دن الی بیک بناء جمع ایلدی اتباع واجرادن واجر وجص
طبخ ایدر واغاج یونار وسمار دوزر طوافدن غیری حتی که صرحی
رفع وتشید ایتدیلر طولی بر حده ایر دیکه بنار انك فوقنده طور مغه
قدرتلی اولمز اولدی دینلدیکه طولی بشیک ذراع وعرضی اوچبیک
ذراع ایدی وقتا که بنادن فارغ اولدیلر فرعون انك فوقته چیقوب
برنشابه بی سماء جانبته رمی ایتدی اول ا کا قانه بولاشق کلوب موسانك
الهی حاشا که قتل ایتدم دیو سوندی او یله اولسه جبرائیل علیه السلام
امر الهی ایله اول صرحه برکز قنادیله اوریحق اوچ قطعه اولدی برقطعه سی
عسکری اوزره دوشوب نیچه بیک کشی اندن هلاک اولدی وبالجمله اول
صرحه عمل ایدلردن هیچ بری قالدی و برقطعه سی دریاه و برقطعه سی
مغربه دوشدی (واستکبر هو وجنوده فی الارض بغیر الحق وظنوا انهم
الینا لایرجعون) اول فرعون وجنودی ارض مصرده استحقاق سز
استکبار ایدوب کندیلرین موتله بزه رجوع ایتز ظن ایتدیلر (فاخذناه
وجنوده فنبذناهم فی الیم) آتی وجنودنی اخذ ایدوب دریاه برافندق

لث (۱۸)

(فانظر كيف كان عاقبة الظالمين) يا محمد نظر ايتكه شرك وكفرله نفسلرينه ظلم ايدنلرك عاقبتى نيجده اولدى وانك مثلى فعلندن قومكى تحذير ايت (وجعلناهم ائمة يدعون الى النار) وبز انلرى خذلانمزله جهاله رؤسا قيلدق كه كفر ومعاصيدن نار ايجاب ايدر اعمال سيئهيه دنياهه انلرى دعوت ايدلر (ويوم القيامة لا ينصرون) ويوم قيامتهه انلر عذابدن قورتلزلر (واتبعناهم في هذه الدنيا لعنة) واشبو دنياهه رجندن طرد وابعدادى بز انلره اتباع ايتدك (ويوم القيامة هم من المقبوحين) ويوم قيامتهه ايسه انلر تعذيب واهلاك اولتلاندن اولورلر (ولقد آتينا موسى الكتاب من بعد ما اهلكنا القرون الاولى) بز موسايه توراني ويردك اندن اول نوح وهود وصالح ولوط اقوامى اهلا كزدنصكره (بصائر للناس) اول تورا ناسك قلوبنه انوار اولديغى حالده كه انكله حقائق كورلر وحق وباطل بينتى تميز ايدرلر (وهدي ورجة لعلمهم يذكرون) ودخى اول سبيل الله اولان شرايعه هدايت وانه اولانه عمل ايدنه رجحت اولديغى حالده تاكه انلر تذكر ايتملرى رجا اولنور حاله ايرلر (وما كنت بجانب الغربى اذ قضينا الى موسى الامر) يا محمد سن موسانك طورده كى مقامندن جانب غريده دكل ايدك شول وقتكه بز موسايه تعريفن اراده ايتديكمز امرى وحى ايتدك (وما كنت من الشاهدين) وسن اول مقامده حاضرلر دن دخى دكل ايدك انلر تقبادر كه موسى عليه السلام انلرى ميقات ايجون اختيار ايتدى (ولكننا انشأنا قرونا فتناول عليهم العمر) لكن سكا وحى ايتدك انكچونكه موسادنصكره بز قرون مختلفه انشا ايتدك كه اوزرلرينه وحيك زمان انقطاعى طويل اولديغندن عهد الهى اونودوب امرينى ترك ايتديلر (وما كنت ثاويا في اهل مدين تلو عليهم آياتنا) وسن مدين اهلى شعيب ومؤمنين قنده دكل ايدك كه انلرك قصه سن انلردن تعلمدنصكره انى مكه اهلنه ذكر ايدنه سن (ولكننا كنا مرسلين) لكن بز سنى رسول ارسال ايدوب اشبو اخبارى مبين كتاب انزال ايتدك كه انى اهل مكه يه تلاوت ايدنه سن اكر حال بوموال اوزره اولمسه نه سن آنى بيلور ونه قومكه خبر ويردك (وما كنت بجانب الطور اذ نادينا) وسن طور جانبده دكل ايدك شول وقتكه بز موسايه (انى انا الله رب العالمين) ديوندا ايتدك (ولكن

(رجة)

(رجة من ربك) لكن ربك جل شانهدن سكا رجت اولوب انى سكا تعليم ايتدك (لتذر قوما ما اتاهم من نذير من قبلك) تاكه انكله برقومى يعنى اهل مكه يي انذار ايدنه سنكه سندن اول انلره نذير كلدى سنكله عيسى بيننده فترنده واقع اولدقلمچون اول بشيوز الى بيل ايدى وياخود سنكله استعيل بيننده انلره نذير كلدى * زيراكه موسى وعيسانك رسالتى بنو اسرائيله وانلرك حواليسنده اولنلره مختصه ايدى (لعلمهم يذكرون) تاكه انلر انكله اتعاظ ايدوب ايمانك كهلر (ولولا ان تصيبهم مصيبة بما قدمت ايديهم فيقولوا ربنا لولا ارسلت الينا رسولا فنتبع آياتك ونكون من المؤمنين) اكر انلره كفر ومعاصيلرى سيبيله عقوبت ايركور ديكمزده ياربنا بزه رسول ارسال ايتش اولس ايتدك كه اول بزه ايتلريكى تبليغ ايتديكندن بزاكا اتباع ايدوب مصدقيندن اولوردق ديملى اولمسه سنى ارسال ايتزدك * ايمدى سنى انلره ارسال دكل الا عذرلرين قطع وچتمزى اوزرلرينه الزام ايجوندر (فلما جاءهم الحق من عندنا قالوا لولا اوتى مثل ما اوتى موسى) وقتاكه انلره بزم عندمزدن رسولز محمد صلى الله عليه وسلم معجزاتدن برنوعله كلدى ديديلر كه نوليدى محمد موسايه ويريلن آيات مثلى ويريله ايدى توراتك جلة ويرلسى كى ويد بيضاء وعصا كى (اولم يكفروا بما اوتى موسى من قبل) الله تعالى ديديكه حالبوكه قرآندن اول رأى ومذهبهه ابناء جنسلى موسى عليه السلام زمانك كفره سى موسايه ويريلنه كافر اولمديلرى (قالوا سحران تظاهرا) ديديلر كه موسى وهارون وياموسى ومحمد اشبو خوارقى اظهارله وياايكى كتاب توافقيه تعاون ايدشديلر (وقالوا انا بكل كافرون) وديديلر كه انلرك كلنه وكرك كتابلرينه كافرلر (قل فأتوا بكتاب من عند الله هو اهدي منهما اتبعه ان كنتم صادقين) يا محمد سن انلره ديكل كه ايمدى قولكزده صادق ايسه كز بكا بر كتاب كتورك كه اول موسايه وبكا انزال اولنان كتابلردن اهدي اوله تاكه بن اكا اتباع ايدنه سن (فان لم يستجيبوا لك فاعلم انما يتبعون اهواءهم) اكر كتاب اهدي كتورميبوب دعوتكه اجابت ايتزلرسه بيل كه كفرلرنده هوالرينه اتباع ايتشيلردر (ومن اضل ممن اتبع هواه بغير هدى من الله) شول كسه دن اضل كيمدر كه الله تعالىدن هدايت هواسنه اتباع ايدنه زيراكه

هوای نفس کاهی حقّه موافق اولور (ان الله لا يهدي القوم الظالمين)
 الله تعالى هدايت ايتز شول قومه کيم اتباع هواده انهما کله نفسلرینه ظلم
 ايتدیلر (ولقد وصلنا لهم القول لعلهم يتذكرون) بز قرآن آيتلرینی انزالده
 بری برینه اتباع ايتدک تاکه تذکیر متصل اوله ویاخود نظمده اتباع ايتدک
 تاکه دعوت حججه ومواعظ مواعیدله ونصایح عبرله مقرر اوله شول
 عبرله کيم تذکر ایدوب ایمانه کلهلر (الذين آتيناهم الكتاب من قبله هم به
 يؤمنون) شونلرکه بز انلره قرآندن اول کتاب ویردک انلر محمده ویاقرآنه
 ایمان کتوررلر * دینلديکله اشبو آیت اهل کتاب مؤمنلری شانده تازل
 اولوبدر ویا اهل انجیلدن قرق کشتی شانده درکه اوتوز ایکیمی حبشه دن
 جعفر رضی الله عنه ایله کلدیلر وسکزی ايسه شامدن کلدیلر (واذنا تیلی
 عليهم قالوا آمنابه انه الحق من ربنا انا كنا من قبله مسلمين) چقان انلره قرآن
 تلاوت اولدسه دیرلرکه بز انک کلام الله ایدیکنی تصدیق ايتدک اول بزم
 ربزدن حقدیر اول قرآنک نزولندن اول الله تعالى بی توحیدده مخلصلر
 ونحمد نبی حق ایدیکن مصدقلر ايتدک (اولئك يؤتون اجرهم مرتين بما صبروا)
 ایددی انلره اجرلری ایکی کره ویریلور بری کندی کتابلرینه ایمانلریچون
 وبری قرآنه ایمانلریچون ایکی ایمانه صبر وثباتلری سببيله ویاخود قرآنه
 نزولندن اولده وصره ده ایمانه صبر وثباتلریله (ويدرؤن بالحسنة
 السيئة) وطاعتله معصیتی دفع ایدرلر شهادت کلمه سبيله شرکی دفع ایدرلر
 ومشرکیندن ایشته کلری اذی وشتی عفو وصفحه دفع ایدرلر (ومما
 رزقناهم ينفقون) وبزم انلره ویردیکمز اموالدن سبیل خیره انفاق
 ایدرلر (واذنا سمعوا اللغو اعرضوا عنه) چقان لغو کلام ایشتهلر تکرر
 ایدوب اندن اعراض ایدرلر (وقالوا لنا اعمالنا ولكم اعمالکم) واول
 لغو ایدنلره دیرلرکه بزم اعمالز وافعالمز بزم وسزک اعمالکز سزک اولسوک
 (سلام علیکم) اولدیفکز حالتدن الله تعالى سزه سلامت ویره (لانتبغی
 الجاهلین) بز جاهلار صحبتن طلب واراده ایتز (انک لاتهدی
 من احببت) یا محمد سن استدیکت کسه بی اسلامه کتورمکه قادر
 اولمزنسن * زیرا که قلبی اوزره مطبوعی بیلزن مادامکه بن سکا
 انی بیلدریم زیرا که اول علم غیبدنر (ولكن الله بهدی من يشاء)

(لکن)

لکن الله تعالى دیلدیکی کسه بی اسلامه کتورر * زیرا که اول عالم الغیبد
 قلبی اوزره مطبوعی غیبدن تمیز ایدر (وهو اعلم بالمهتدين) اول الله تعالى
 اسلامه استعدادی اولنلری بیلور جهور عندنده بوآیتک سبب نزولی
 ابوطالبدرکه حال احتضارنده پیغمبریمز صلی الله علیه وسلم اکا دیدیکه
 (اشهد ان لا اله الا الله) دیکل که یوم قیامتده اول قولکه سنکچون
 شهادت ایدیمکه عذاب اولنمیه سن دیدیکه اگر قریش بنی تعبیر ایدر
 اولسه انکله که انی اول قوله موت عندنده جزع حل ایتدی دیرلر
 سکا موافقتله سنی قریرالعمین ایدردم (وقالوا ان ندع الهمدی معک نتخطف
 من ارضنا) کفاردن خوف ایله اسلامه کلینلر پیغمبریمز علیه السلامه
 دیدیلرکه بیلورزکه سن حق اوزره سن لکن قورقارزکه اگر سکا متابعت
 وعربه مخالفت ایدرسه وز بزى ارض مکهدن چیقارلر الله تعالى
 انلره توبیخ وجهی اوزره دیدیکه (اولم نمکن لهم حرما آمنایحی
 البهائمات کل شیء) بز انلرک مکانن حرم ذا امن قیلدقی بیت شریف
 حرمتنه حولنده کی عرب تناصر ایدیشورلر انلر ايسه انده آمندرلر
 الوان ثمراتدن هرلون نواحیدن اول حرمه جلب وجع ایدیلور (رزقا
 من لدنا) بزم عندمزدن ثمرات مخصوصه ایله مرزوق اولدیفی حالده
 ایددی اهل مکه عبده اصنام ایکن حاللری بو اولیحق انلره تخوف
 وتخطف نیچه عارض اولور چقانکه حرمت بیته حرمت توحیدی ضم
 ایدرلر (ولكن اکثرهم لا یعلمون) لکن انلرک اکثری جهله در تقطن
 وتفکر ایتزلرکه انی بیلهلر ویاخود انلردن آذرکه تدبر ایدوب اول
 انلره الله تعالى عندندن رزق ایدیکن بیلهلر * زیرا که آتی بیلسهلر انک
 غیبدن قورقزلدی بعده الله تعالى بیان ایتدیکه انلرک خوفی صددنده
 اولدقلری کفردن اولمغله احقادرلر شول قولله کیم بیورلدی
 (وکم اهلکننا من قرية بطرت معیشتها) چوق قریه اهلککه بز انلری
 تدمیر و دیارلرین تخریب ایتدک حاللری امنده وخفض عیثده اهل مکه نیک
 حاللری کیمیدی الله تعالی نیک رزقن بیوب انک غیری به عبادت
 ایتدیلرلر (فتلک مساکنهم لم تسکن من بعدهم الا قلیلا) اشبو بیوت
 خالیه انلرک مسکنلریدر شوم معاصیلرندن انلردن صکره انده ساکن اولور
 اولمدی مکرکه مسافریندن آز کسه برکون ویا اندن آزمان انده ساکن

اولیدی (وکننا نحن الوارثین) و بز اول مسکنلره مسا کنلرندن وارث اولدق * زیرا هیچ کسه انلره خلف اولدیکه دیارلرنده و سائر متصرفاتلرنده انلرک کبی تصرف ایدی (وما کان ربک مهلک القرى حتى یبعث فی امها رسولا یتلو علیهم آیاتنا) ربک جل شانہ شول قری اهلنی اهلاک ایدر اولدی که انلر کافرلردر الا شوندنصکره که اول قرآنک اکبر واعظمنه رسول کوندردیکه انلره خبر ویره کیم ایمانه کلزلر ايسه انلره عذاب نازل اولور و قرآنک اعظمی رسول کوندرلمسنه تخصیص یورلدی * زیرا که رسول اشرافه بعث اولنور و اشراف ايسه مدینهلرده و شول مواضعده ساکن اولورلر که اول حولنده کی اما کنک ایدر (وما کننا مهلکی القرى الا واهلها ظالمون) بز هیچ قریه لر اهلینسی هلاک ایدر اولدق الا انلر تکذیب رسل و کفرده عتوله ظالم ایدی (وما اوتیتهم من شیء فتضاع الحیاة الدنیا وزینتها) اسباب دنیادن برشیئکه سزه اول ویرلدی حیات دنیانک اول متاع وزینتیدر مدت حیاتکز انقضاسنه دکن انکله تمتع و زین ایدرسز (وما عندالله خیر وابقی) والحال الله تعالی عندنده اولان ثواب اشبو مذکوردن خیر لیدر زیرا که اول لذت خالصه و بهجت کامله در ودخی ابقادر زیرا که اول دائم لایفنادر (أفلا تعقلون) تدبر ایتمیسز که باقی فایندن خیر لیدر تا که ادنایی اعلایه استبدال ایدرسز (أفمن وعدناه وعدا حسنا فهو لاقیه) شول کسه که بز اکا جنت وعیدن ایده وز که اول اکا لایب ملاقیدر (کن متعناه متاع الحیاة الدنیا) شول کسه کیمیدر که بز اکا حیات دنیا متاعنی تمتع ایده وز که اول آلامه مشوب و متاعبله مکدر و انقطاعی تحسریله مستعقیدر (ثم هو یوم القيامة من المحضرن) بوندنصکره اول یوم قیامته حساب ویا عذاب ایچون احضار اولنلردن اوله (ویوم ینادیهم فیقول این شرکائی الذین کنتم تزعمون) ذکر ایت شول که و نیکه رب تعالی انلری چاغروب دیه که قنی شول شرکاء که انلری بکا شرکاء زعم ایدر دیکز (قال الذین حق علیهم القول ربنا هؤلاء الذین اغوینا اغویناهم کما غوینا تبرأنا الیک ما کانوا ایا نایعبدون) رؤساء اضلاء که اوزرلرینه عذاب واجب اولدی دیه لر که اشبو اتباعز که بز انلری اضلال ایتدک بزم انلره

(تسویل)

تسویل و وسوسه منزله ضلالتی اختیار ایتدیلر ضلالتده بزه عدیل اولدیلر یاربنا انلردن و کفر و عبادت لرندن سکا تبری ایتدک انلر بزه عبادت ایتمزلر بلکه هوالرینه عبادت و شهواتلرینه اطاعت ایدرلردی (وقبل ادعوا شرکاءکم فدعوهم فلم یتجیبوا لهم) وانلره دینله که شرکاکزی چاغرک که سزی عذابدن تخلص ایدرلر انلر دخی فرط حیرتلرندن شرکاکلرین چاغره لر شرکاء ايسه اجابت ونصرتدن عجزلری اولدیچون اجابت ایتیه لر (ورأوا العذاب لو انهم کانوا یهتدون) اول حالتده عذاب موعودی کوره لر اگر انلر دنیاده اهتدا ایتسه لر اول وقتده عذابی کورمزلردی ویا خود دنیاده انلره اتباع ایتمزلردی ویا خود عذابی کوردکارنده نولیدی مسلمین کبی دنیاده مهتدین اولدق دیو تمی ایدرلر (ویوم ینادیهم فیقول ماذا اجبتم المرسلین) ذکر ایت شول کونیکه رب تعالی کفاری چاغروب دیه که بزم رسوللریمه توحیدده نه کیفیت اوزره اجابت ایتدیکز (فعمیت علیهم الانبیاء یومئذ فهم لایتساءلون) اول کونده انلره حجج ملتبس و طرق اخبار منسد اولوب اعتذارله اخباره اهتدا اولنیه لر بلکه حیرتلرندن سکوت ایدرلر یوخسه ناس دنیاده مشکلاتدن بری برلرینه سؤال ایتسی کبی سؤال ایدشیمه لر که مسؤل سائله حجت تلقین ایلله زیرا که جوابدن عجزده جمعی مساوی اولور (فاما من تاب و آمن و عمل صالحا فعسی ان یکون من المقلمین) اما اول کسه که کفردن توبه ایدوب ایمان و عمل صالح بیننی جمع ایده حق اولور که اول عندالله سعدان اوله (وربک یخلق ما یشاء ویختار) ربک جل شانہ دیلیوب اختیار ایتدیکی شیئی خلق ایدر زیرا که انک اوزره برشیء ایجاب ایدر ویا انی اختیار ایتدیکی شیئدن منع ایدر یوقدر وقتا که مشرکار نولیدی اشبو قرآن ایکی قریه اهلندن بررجل عظیمه تنزیل اولنیدی دیدکارنده که انکله مرادلری ولید بن مغیره ویا عروه بن مسعود الثقفی ایدی اکا جوابده اشبو آیت نازل اولدی یعنی ربک جل شانہ رسوللرین شول ارسال اولنه جق اقوامک اختیار ایتدک لرینی بعث ایتمز بلکه رسالتنه اول دیلدیکن اختیار ایدر (ما کان لهم الخیرة) یوخسه انلر ایچون برشیء اختیار ایتک یوقدر ویا خود الله تعالی اول شیئی اختیار ایدر که انلر ایچون انده خیر وصلاح اوله (سبحان الله) الله تعالی منزله اولدی اندنکه اکا هیچ

احد منازع ويا اختيارينه مزاجه اوله (وتعالى عما يشركون) انلرك
اشراكدن ويا اكا اشراك ايتدكلى شىء مشاركشدن على اولدى
(وربك يعلم ما تكن صدورهم وما يعلنون) ربك جل شانہ پيلور انيكه
انلرك صدورى اضممار ايدر رسول الله صلى الله عليه وسلمه عداوت وحقه
كبي وانيكه اعلان ايدرلر انك شانده طعن كبي (وهو الله لا اله الا هو)
معبود بالحق اول الله تعالى ايدر انك غيرى دكلدر (له الحمد فى الاولى
والآخرة) جد آنكچون ثابتدر دنياده كلفت وجهى اوزره و آخرته
لذت وجهى اوزره زيرا كه نعمك كلنى عاجل و آجلنى اول ويرر مؤمنلر
اكا انده جد ايدرلر دنياده كى جدلرى كبي ديرلر كه (الحمد لله الذى
اذهب عنا الحزن الحمد لله الذى صدقنا وعده الحمد لله رب العالمين)
(وله الحكم) وهر شئده قضاء نافذ دخی آنكچون ثابتدر (واليه ترجعون)
و آخرته اكا رجوع ايدر سز اعمالكزك خير وشريله سزه جزا ايدر
(قل أرايتم ان جعل الله عليكم الليل سرمدا الى يوم القيامة من اله غير الله
يأتاكم بضياء) يا محمد مكه نك كفارينه ديكل كه بكا خبر ويرك كه اكر
الله تعالى يوم قيامته دكين كچه يي اوزريكزه قائم ايتسه الله تعالى بدن
غيرى اتخاذا ايتديككز آلهه دن هيچ برى قادر اولور ميكه انى كیده روب
سزه كوندز كتوره تاكه انده معاشكزى طلب ايدسز (أفلا تسمعون)
بزم مواعظمزي سماع تدبر له استماع ايتز ميسز كه انكله منتقع اوله سز
زيرا كه سماعك منافعى ذكرنى وفوائدى وصفنى بصر ادراك ايتديكى
سمع ادراك ايدر (قل أرايتم ان جعل الله عليكم النهار سرمدا الى
يوم القيامة من اله غير الله يأتكم بليل تسكنون فيه) يا محمد ينه انلره
ديكل كه بكا خبر ويرك كه اكر الله تعالى يوم قيامته دكين كوندزى
اوزريكزه قائم ايتسه الله تعالى بدن غيرى آلهه كز دن هيچ برى قادر
اولور ميكه انى كیده روب سزه كچه يي كتوره تاكه انده سكون واستراحت
ايدسز (أفلا تبصرون) الله تعالى نك قدرتنى كورمز ميسز كه
اكا ايمان كتوره سز (ومن رحمة جعل لكم الليل والنهار لتسكنوا فيه
ولتبتغوا من فضله ولعلكم تشكرون) اول الله تعالى نك رحمتندركه
سزچون ليل ونهارى خلق ايلدى تاكه ليده سكون واستراحت ايدسز
ونهارده انواع مكاسبه فضلندن طلب ايدسز والله تعالى نك بونعمتيرين

(پيلوب)

پيلوب اكا شكر ايليه سز (ويوم يناديهم فيقول اين شركائى الذين كنتم
ترعون) ذكر ايت شول كونيكه الله تعالى مشركاره ديكه قنى شول
آلهه كز كه انى بكا شركاه زعم ايدر ديكز اشبو آيتى تكريرده ايدان واردركه
حق تعالى نك غضبن جلب ايدر شركدن زياده شىء اوليه انك رضاسنى
جلب ايدر توحيددن زياده شىء اولديغى كبي (ونزعنا من كل امة شهيدا
فقلنا هاتوا برهانكم فعملوا ان الحق لله وضل عنهم ما كانوا يفترون)
واول كونده هرامندن پيغمبرلرين انلرك دنياده شرك و تكذيب رسلندن
اولدقلى حالات قبيحه لرينه شهادت ايدر اخراج ايدرز وامتله ديرزكه
الله تعالى به شركه تكذيبكز صحتنه برهانكزى كتورك انلر ايسه برهاندن
ماجز اولوب الوهيت انحق الله تعالى نك اولديغى بيله لرو الوهيتده اكا غيرى
اشراك ايله افتزالرى كذب وباطل دعوالرين يتورلر (ان قارون كان من قوم
موسى) قارون موسى عليه السلامك قومندن ايدى ابن عمى اولوب اكا
ايمان كتورنلردن ايدى حسن صورتيچون منور ديو ملقب ايدى توراقى ظهر
قلبندن او قوردى لكن سامرى كبي اولدخى منافق ايدى فرعونك بنو اسرائيل
اوزره حاملى ايدى (فبغى عليهم) بنو اسرائيل اوزره ظلم وكفر وكثرت ماله
تكبر ايتدى وموسايه مخالفتله تكبر ايتدى (وآتيناه من الكنوز ما ان مفاتحه
لتنوء بالعصبة اولى القوة) بزاكا اموال مدخره دن شول دكلو ويردك كه
انك صناديق ويا خزائنك مفتاحلرى شول قوت صاحبلى جاعت
كثيره به ثقل اولوب كتور مكده انلرى ميل ايتد يرردى اول جاعتك
عدنده اختلاف اولدى اوچدن اونه ويا اوندن اون بشه ويا اوندن قرقه
دكيندر ويا قرق رجل ويا يتش رجلدر * دينلديكه انك خزائنى مفتاحلرين
التمش قاطر طاشردى هر خزانه نك بر مفتاحى وار ايدى وهر مفتاح ايسه
جلوددن اولوب بر پارمقدن زياده دكليدى (اذ قال له قومه لاتفرح
اكا قومى بنو اسرائيل ديدلر كه حطام دنيا ايله فرح ايتكل كه اول مطلعا
مذمومدر زيرا اول فرح دنياه محبت ورضانك نتيجه سيدر حالبوكه لذا نذ
دنيويه البته زائل ايديككك بيلتمى رح ايجاب ايدر (ان الله لا يحب الفرحين)
زخارف دنياه فرحانلرى الله تعالى سومز زيرا كه اول محبة الله مانعدر
اول اجلدن الله تعالى (ولا تفرحوا بما آتاكم) سزه ويريلن متاع دنياه
فرحان اولمكز ديواندن نهى اولدى (وابتغ فيما آتاك الله الدار الآخرة)

الله تعالینک سکا و یردینکی غنا و ثروت ایله دار آخرتی طلب ایله که انی طاعته صرف ایله زیرا که انکله مقصود دار آخرته و وصولدر (ولا تنس نصیبک من الدنیا) و دنیادن نصیبکی اونو تمغل یعنی دنیاده آخرت ایچون عملی ترک ایتمکل و یاخود صحت و قوت و شباب و غناکی اونو تمغل انکله آخرتکی طلب ایده سن و یاخود دنیادن کندکک و اهلک قوتنی اونو تمغل (و احسن کا احسن الله الیک) و عباد الله احسان ایت الله تعالی سکا انعامیله احسان ایتدینکی کبی و یاخود شکر و طاعتله احسان ایتکه الله تعالی سکا انعامیله احسان ایده (ولا تبغ الفساد فی الارض) ظلم و بغیه علت اولور امرله یر یوزنده فسادی طلب ایتمکل (ان الله لا یحب المفسدین) الله تعالی افساد ایدنلری سوز سوز افعالریچون (قال انما اوتیته علی علم عندی) قارون دیدیکه اول مال بکا و یرلدی شول علم اوزره کیم اول بنم عنده در * دینلدیکه اول علم تور ایدرکه اول انده بنواسرائیلک اعلمیدی و یاخود علم تجارت و مکاسب ایدی و یاخود علم کیمیا ایدیکه موسی علیه السلام اول علمک برثلثنی یوشع بن نون علیه السلام و برثلثنی کالب ابن یوقانه و برثلثنی قارونه تعلیم ایتشیدی * بعده قارون اول ایکیمسینی آلدایوب انلرک اول علملری دخی کندی علمنه ضم ایدی اموالک کثرتنه اول سبب اولدی * دینلدیکه اول یوسف علیه السلام کثرتنه مطلع اولمشدی (اولم یعلم ان الله قد اهلك من قبله من القرون من هو اشد منه قوۃ و اکثر جمعا) اول بیلدیمیکه الله تعالی اندن اول قرون متقدمه دن شول کیمسه لری هلاک ایلدیکه قوتده اشد و جعده اکثر ایدیلر * اشجو انک قوت و کثرت مالله اغترارینه تعجب و توبیخدر مع هذا کندی حالو کیمسه لرک عاقبتی نیچه اولدیغن تور ائده او قومش و توارنخ حفاظندن ایشتمشدی و یاخود اول بر علم آدما ایلدی و الحال کندوی هلاکدن صیانت ایدر علمی بیلدیکه اول علم نافعدر که نفوسی مصارع هالکیندن وقایه ایدر انک آدما ایتدینکی علم ایسه انک خلافنی ملاسدر (ولا یسأل عن ذنوبهم المجرمون) یوم قیامتده مجرمون ذنوبلرندن سؤال اولنلر زیرا که الله تعالی انلرک حالنه عالمدر بلکه سؤال و حسابنلر انلری نارله عقاب ایدر و یاخود انلر ذنوبلرندن سؤال نجاتله سؤال اولنلر بلکه سؤال تعذیبله سؤال اولنلر (فخرج

(علی)

علی قومه فی زینته) برکون قارون عرضیچون زینتده قومی اوزره چیقدیکه اول بغله شهبایه بنمشدیکه اوزرینه التون سرچ اورلشدی و کندی زینتده بیله سنجه درت بیک عبید اویدرلشدی بر قولده کندیلرینک و خیللرینک اوزره دیباج اجر کیدرلشدی و صاغنده اوچوز غلام و وصولنده بیاض اوچوز جاریه اولوب اکیلرینه هر بری حلی و دیباج کیمشدی (قال الذین یریدون الحیوة الدنیا یالیت لنا مثل ما اوتی قارون انه لذو حظ عظیم) مسلمیندن چون حیات دنیا مراد ایدنلر یساره رغبت طریق اوزره دیدیلرکه مالدن قارونه و یریلن مثلی بزه دخی و یرلسیدیکه اول دنیادن حظ عظیم صاحبدر حسدن حذر ایدوب مثلی تمنی ایتدیلر یوخسه عیننی دکل (وقال الذین اوتوا العلم و یلکم ثواب الله خیر لمن آمن و عمل صالحا) دنیاده زاهد اولوب اشیایی ماهیتی اوزره عارف اولنلر اول تمثیلره دیدیلرکه ویل سزه کیم الله تعالینک ثوابی خیرلدر شول کیمسه یه کیم ایمان و عمل صالحی جمع ایده قارونه و یریلندن بلکه دنیا و مافیها دن (ولا یلقیها الا الصابرون) زاهدلرک اول کلمه سنه و یا اول مشوبته و یا اول سیرته توفیق اولنلر الا انلرکه معاصیدن صاقنوب طاعته صبر ایدرلر (فخسفنا به و بداره الارض) بز اول قارون و دارنی یره کچوردک * روایت اولندیکه قارون هر وقتده موسی علیه السلام ایدر ایدردی * موسی علیه السلام ایسه قرابتیچون اکا مدارا ایدردی حتی که زکاتک وجوبی نازل اولدی اولیه اولسه موسی علیه السلام قارونه زکاتله امر ایدوب مالک بیکده برینی و یرمسی اوزره صلح اولدی قارون انی حساب ایدوب استکثار ایتدی قصد ایلدیکه موسایی بنو اسرائیل بیننده رسوای ایده تاکه انلر موسادن کراحت ایدوب ترک ایلیدلر اولیه اولسه بر مرأء فاجر یه رشوت و یردی تاکه موسی علیه السلام انکله فجور ایتدی دیو افترا ایده * وقتا که یوم عید اولدی موسی علیه السلام طوروب ناسه امر و نهی ایلدی و دیدیکه هر کیمسه که سرقه ایده انک یدنی قطع ایدرز و اولکه زنا ایده اگر محصن دکسه اکا جلده اوریرز محصن ایسه رجم ایدرز * قارون دیدیکه اگرچه سن ایسه کده بو حکمی کندی اوزریکه اجرا ایدرمیسن دیدیکه نعم اجرا ایدرین قارون ایتدی ایددی بنو اسرائیل زعم ایدرلر که سن فلانه

فاجره ايله فجور ايتمشن اندن فلانه اول موضعه كتورلدی حضرت موسی
اکا دیدیکه الله تعالینک حقیچون اولسون اشبو امرده صدق ایت
اول دیدیکه قارون بکا شو دکلو مال ویردیکه سن بمله فجور ایتمشن
دیو سکا افترا ایدم هماندم موسی علیه السلام سجده یه واروب رب تعالی یه
قاروندن شکایت ایتدی وحی الهی کلدیکه یا موسی یره دیلدیکک
شیئی امر ایت اول سکا اطاعت ایدر دیدی اول دیدیکه یا یر قارونی
اخذ ایت فی الحال یر آتی دیزلرینه دکن یوتدی ایکنجی کره اخذ ایت
دیدیکنده بلینه دکن یوتدی اوچنجی کره اخذ ایت دیدیکنده بوغازینه
دکن یوتدی دردنجی کره اخذ ایت دیدیکنده یره باتوب یتدی هر کرده
ایسه قارون اکا یلوارر اول ایسه اکا مرحت ایتوب یره اخذ ایت دیو
بیورردی وحی الهی کلدیکه یا موسی عجب فظاظت و غلظت ایتدک که اول سندن
مرارا مرحت دیدی سن ایسه اکا مرحت ایتدک عزتم حقیچون
اگر اول بکا بر کره دعاء ایتش اولسه بن اکا اجابت ایدردم بعده
بنو اسرائیل دیدیلر که موسی بو فعلی قارونه ایتدیکه مال و دارینه
وارث اوله اوله اولسه دعاء ایلدی حتی که مال و داریدخی یره یکدی ایددی
اول هر کونده بر رجل قامتجه اشاعه کیتمکده در یوم قیامته دکن
برک قهرینه ایرر (فاکان له من فئة ی نصرونه من دون الله وما کان
من المنتصرین) قارون ایچون اعوان اولدیکه الله تعالینک عذابن اندن
دفع ایدلر و اول کنیدیخی اکا نازل اولان عذابن امتناع ایدلردن
اولدی (وأصبح الذین تمنوا مکانه بالامس یقولون ویکان الله یبسط
الرزق لمن یشاء من عباده ویقدر) شول زمان قریده قارونک
منزلتن تمنی ایدنلر خطالرینه متنبه اولوب سویلر اولدیلر که عجب بزه
امر مشته اولدیکه الله تعالی عبادندن دیلدیکنه بسط و بعض دیلدیکنه
ایسه تضییق ایدر (لولا ان من الله علینا لحسف بنا) اگر الله تعالی
بزه دیلدیکمزی ویرممکله من ایتسیدی بزدخی قارون کبی یره یکردک
(ویکانه لا یفلح الکافرون) عجب حال مشته اولدیکه الله تعالینک
نعمته کافرلر و یار سولارینی مکذبلر خلاصه نائل اولزلر (تلك الدار
الآخرة نجعلها للذین لا یریدون علوا فی الارض ولا فسادا) بز دار آخرتی
قیلورز شول کسهلر ایچونکه یر یوزنده ایماندن استکبار ایتزلر و یا ناس

(اوزره)

اوزره استطاله و انلره تهاون ایتزلر و یا ارباب سلطنتلری عندنده
عز و شرف طلب دخی ایتزلر * علی کرم الله وجهه ایدر اشبو آیت ولات
واهل قدرندن متواضعلر شاننده نازل اولوبدر و دخی یر یوزنده فساد دخی
مراد ایتزلر الله تعالینک غیر یه عبادته دعوتله و یا ناسک اموالی بغیر حق
اخذله و یا معاصی ایشلمکله (والعاقبة للمتقین) عاقبت محموده **که**
جنتده قراردر الله تعالینک اوامرنی ادا و معاصیدن اجتناب ایدوب
عقابندن خوف ایدنلر ایچوندر (من جاء بالحسنة فله خیر منها)
برکسه که حسنه ايله که انکچون ذات و قدر و وصفده اول حسنه سندن
خیرلو اولور (ومن جاء بالسيئة فلا یجزی الذین عملوا السیئات الا ما کانوا
یعملون) و اولکه سیئه ايله که * ایددی سیئه یی ایشلنلر انجق ایشلدکری
سیئه مثیلله جزاء اولنور (ان الذی فرض علیک القرآن لراذک الى معاد)
اول الله تعالی که سکا قرآنک تلاوت و تبلیغ و مقتضاسیله علی ایجاب
ایتدی سنی معادینه رد ایدر که اول مکهدر * وقتا که پیغمبریز صلی الله
علیه وسلم غاردن چیقوب مدینه یه یونلدی طلب اولنمی خوفیله
یولدن صاپدی اول خوفدن امن اولیجق کیرو یوله کیروب مکه و مدینه
بیننده جحفه نام منزله نزول ایتدی و مکه یولنی یلوب مکه یه مشتاق
اولدی جبریل علیه السلام اکا کلوب یا محمد بلد و مولدکه مشتاقی اولدک
دیکه نعم اول سبیدن بو آیت جحفه ده نازل اولدی و یاخود الله تعالی
شول سکا وعد ایتدیکی مقام محموده رد ایدر وقتا که مشرکالر پیغمبریز
صلی الله علیه وسلم سن ضلالده سن دیدیلر الله تعالی اکا دیدیکه
(قل ربی اعلم من جاء بالهدی و من هوفی ضلال مبین) دیکل که ربم
جل شانه اعلمدر اول کسه یه که هدا ايله کلوب ثواب و نصرته مستحق
اولور و دخی اکا که ضلال مبینده اولوب عذاب و اذلاله مستحق اولور
(وما کنت ترجو ان یلقی الیک الکتاب الارحمة من ربک) یا محمد سن
رجا ایدر دکل ایدک که سکا قرآن وحی اولنه لکن ربک جل شانه سکا
رحمت ایدوب قرآنی و یردی (فلا تکونن ظهیرا للکافرین) ایددی
کافرلر معین اولقل انلره مدار ايله و اذالرینه تحمله و طلبلرینه اجابتله
* اشبو آیت شول حینده نازل اولدیکه انی آباءنی دینه دعوت ایتدیلر
اوله اولسه الله تعالی اکا نعمتترین تذکیر ایدوب انلره اولدقلمی شی

اوزره مظاهرتدن نهی ایتدی (ولا یصدنک عن آیات الله بعد اذ انزلت الیک) سنی قرآنک قراءت و موجبیه عملدن صد ایتسون اول سکا انزال اولنسی وقتدنصکره (وادع الی ربک) نامی ربک جل شانہنک توحید و عبادتہ دعوت ایت (ولا تكونن من المشرکین) و مشرک کردن اولغل انلره مساعدہ ایلہ (ولا تدع مع الله الها آخر لاله الا هو) الله تعالی ایلہ بیلہ اله آخر دعا ایتکل که زیرا اندن غیری اله معبود بالحق یوقدر * ابن عباس رضی الله عنہما ایدر اشبو آیاتہ ظاہرہ مخاطب پیغمبریمز صلی الله علیہ وسلمدر لکن مراد اهل دیندر (کل شیء هالک الا وجهه) هرشیء هالکدر یعنی اکا که هلاک و فناء جائز اوله اول جد ذاتند هالکدر الا الله تعالینک ذاتی دکل * زیرا که اول باقی لایفنادر و یا خود الاعملمدن اول شیء که انکله وجه الله مراد اوله اول فانی اولمز زیرا که ثوابی باقیدر (له الحکم) خلقی بیننده قضاء نافذ انکچون ثابتدر (و الیه ترجعون) آخرتده اکار رجوع ایدرسز

سورة العنكبوت وهی تسع وستون آية مكية

بسم الله الرحمن الرحيم

(ألم أحسب الناس ان یترکوا ان یقولوا آمنا وهم لا یفتنون) ناس ظن ایتدیلر میکه بز ایمان کتوردنک دیمیلرله ترک اولنملر حالبو که اموال و نفسلرنده امتحان اولنمیلر بلکله الله تعالی انلری مشاق تکالیفلله امتحان ایدر مهاجره ورفض شهوات و وظائف طاعات و انواع مصائب کبی تاکه مخلص منافقندن و دینده ثابت مضطربدن ممتاز اوله و اکا صبرله عوالی درجاته ایریله زیرا که مجرد ایمان اگرچه خلوص قلبله ایسهده عذاب محملمدن خلاصک غیربی اقتضاء ایتز * دینلدیکه بخان الله تعالی برعبدی سوسه انی بلایه عرض قیلور روایت اولندیکه صحابهدن بر جاعت مشرکینک اذاسنندن جزع ایدیحک بو آیت نازل اولدی بر قولده مشرکون و اهل کتاب شول احد غزاسنده مصاب اولان مسلمینی تعبیر ایدیحک اندن زیاده متأذی اولدقلرنده بو آیتله تسلیه یورلدی (ولقد فتنا الذین من قبلهم) و الحال انلردن اول یکن انبیاء و اولیای بز انواع بلایا ایلہ امتحان ایتدک انلرک کیمی عذابله قتل و کیمی منشارله نشر و کیمی امشاط حدیدله مشط اولوب هیچ بری دینندن عدول ایتدی * ایتدی بو حالت

(امتلک)

امتلك کلنده جاری اوله کلمش سنت قدیمه در لائق دکلدرکه انک خلاقی توقع اولنه (فلیعلمن الله الذین صدقوا و لیعلمن الکاذبین) تاکه الله تعالی از لده هر مخلوقدن صدور ایدجک حالاتی بیلورکن امتحانله ایمانده صادقلری کاذبلردن تمیز ایدوب صادقلره ثوابله و کاذبلره عقابله جزاء ایدر (ام حسب الذین یعملون السيئات ان یسبقونا) کفر و معاصی ایلہ اساءت ایدنلر ظن ایتدیلر میکه بز انلره انتقامدن عاجز اوله وز (ساء ما یحکمون) نه چرکین حکم اولدی اولکله انلر انی حکم ایدرلر (من کان یرجو لقاء الله) اول کسه که جنسده الله تعالینک لقاسن رجا ایدر و یا انک ثوابنه و صولی رجا ایدر و یا موت و بعث و حساب خوفن ایدر (فان اجل الله لات) انک لقاسیچون مضروب اولان وقت کایسردر * ایتدی اول وقته مستعد اولوب اعمال صالحه یه جهد ایتسون (وهو السميع العليم) اول الله تعالی عبادک اقوالی ایشیدر عقائد و افعالی بیلور (ومن جاهد فانما یجاهد لنفسه) برکسه که طاعات مشقتنه و شهواتدن کف شدنه صبرله جهاد ایده اول نفسیچون جهاد ایدر زیرا که انک منفعتی ینه نفسنه عائد اولور (ان الله لغنی عن العالمین) الله تعالی عالینک طاعتندن غنیدر و انلره تکلیفی رحمت و صلاحلرینی مراعات ایچونددر (والذین آمنوا و عملوا الصالحات لنکفرن عنهم سيئاتهم ولنجزینهم احسن الذین کانوا یعملون) شونلرکه ایمان کتوروب اعمال صالحه ایشلدیلر بز انلرک کفر و معاصیلرین ایمان و طاعتلرله تکفیر ایدرز و احسن اعماللرله انلره جزاء ایدرز و یا خود ایشلدکلری اعمال صالحه دن اکثر و احسن و یررز (و وصدینا الانسان بوالدیه حسنا) بز انسانه عهد و امر ایتدک که والدیننه فعل حسن ایده (وان جاهدک لتشرک بی مالیس لک به علم فلا تطعهما) واکر والدینک سکا شول الوهیت بیلدیکنک شیئی بکا اشراک ایتک ایچون جهد ایدرلرسه اول امرده انلره اطاعت ایتکل * اشبونده اشعار واردرکه صحتی بیلنمیان شیئته اتباع جائز اولیه اگرچه بطلانی بیلنرسهده فکیف که بطلانی بیلنه (الی مرجعکم فأنبئکم بما کنتم تعملون) سزدن مؤمن و مشرکک و والدیننه باز و کرک عاقل مرجعی بکادر هر بریکزه عملنه کوره جزاء ایدرین * اشبو آیت و سورة لقمانده و سورة احقافده کی سعد بن ابی وقاص رضی الله عنه و انامی جنبه شاتنده نازل

اولوبدر سعد اسلامه كلجك جنبه يمين ايتديكه تااول مرتد اولينجه كونشدن
كولكهيه وارميه واكل وشرب ايتيه بوحال اوزره اوج كون لبث ايتدي
سعد اكا ديديكه اكر سنك يوز جاتك اولوب برر برر چيقسه بن ديني ترك
ايدر دكلم نه ديلرسك اني ايت اشبو امرده سكا اطاعت ايتزم جنبه انك
موافقتدن مأيوس اوليحق كولكهيه كلوب اكل وشرب ايتدي (والذين
آمنوا وعملوا الصالحات لندخلنهم في الصالحين) شونلكه ايمان وعمل صالح
ايتديلر بزانلري صالحين جله سنه ادخال ايدرز وصلاحده كال ايسه درجات
مؤمنينك منتهامي وانبياء ومرسلينك متمناسيدر وياخود صالحين مدخلنه
ادخال ايدرزكه اول جنتدر (ومن الناس من يقول آمنا بالله فاذا اودى
في الله جعل قنقه الناس كعذاب الله) ناسك بعضي بز الله تعالى به ايمان
كتوردك ديرلر چاتكه في الله ايداه اولنسهلر كفره انلره ايمانلري اوزره
عذاب ايتكله ناسك اذي وعذابني الله تعالينك آخرتده كي عذابي كي قيلور
يعني ناسك عذابندن جزع ايدوب صبر ايتلر حتى كه ناسه اطاعت ايدر الله
تعالى به عذابندن خائفك اطاعتي كي كه اول منافقدر في الله ايداه
اولنسه دينندن دوزر كافر اولغه كيدر (ولئن جاء نصر من ربك ليقولن
انا كنا معكم) واكر ربك جل شانهدن مؤمنلره فتح وغنيمت ايرسه
ديرلر كه دينده بز سزكه بز نائل اولديغكز غنيمته بزى اشراك ايدك (أليس
الله بأعلم بما في صدور العالمين) الله تعالى صدور عالينده اولان ايمان
ونفاقه اعلم دكيدر (وليعلمن الله الذين آمنوا وليعلمن المنافقين) تاكه الله تعالى
حقيقتده مؤمنلري وايمانلرنده منافقلري تمير ايدوب وجزالرين ايد
(وقال الذين كفروا للذين آمنوا اتبعوا سبيلنا ولنحمل خطاياكم) مكه نك
كافرلري انلردن ايمانه كلنلره ديديلر كه بزم دينلره وآبائز ملتسه اتباع
ايدك يوم قيامتده بز سزك خطايريكز ائمني كتورهلم بزه اتباعكز
خطيئه اولديغي تقدير اوزره (وما هم بمحاملين من خطاياهم من شيء
انهم لكاذبون) والحال اول كفار انلرك خطالرندين برشي كتورر دكلردر
ايمدي انلر اول زعلرنده كاذبلردر (وليعلمن ائقاليهم وائقالا مع ائقاليهم)
بلكه انلر ككفر ومعاصيليله اقتراف ايتدكلري اوزاري وكنديلرك
اول اوزاريله بيله اتباعلرينك اوزارندنخي كتوررلر اني كه
انلرك اضلال ومعاصي به حليله ايشلشردى اول اتباعك اوزارندن

(برشي)

برشي اكسلسزين (وليسئلن يوم القيامة عما كانوا يفترون)
ويوم قيامتده تقريع وتبكيت وجهي اوزره سؤال اولنور شول
اباطلدينكه اتباعلرين انكله اضلال ايتديلردى (ولقد ارسلنا نوحا
الى قومه) بز نوح عليه السلامي قومنه ارسال ايتدك كه انلري ايمانه دعوت
ايد (فلبث فيهم ألف سنة الاخسین عاما فأخذهم الطوفان وهم ظالمون)
اول قومي بيشنده يك ييل لبث ايتدي الا الى ييل دكل * روايت اولنديكه
اول قرق ياشنده بعث اولنوب طقوز يوز الى ييل قومي توحيد دعوت
ايتدي بعده انلري طوفان اخذ ايتدي حالبوكه كفرله انلر ظالمرايديلر
وطوفاندنصكره دخي الشمس ييل معمر اولدى (فأنجيناه واصحاب
السفينة) بز نوحى وسفينهده انكله اولان مؤمنلري طوفاندن انجاء
ايتدك كه انلر يشمس سكر نغرايديلر نصفي ذكور ونصفي اناث ايدى نوحك اوج
اوغلى حام وسام ويافت ونسالى اول جله دن ايدى (وجعلناها
آية للعالمين) بز اول سفينه ويا واقعدي عالملره عبرت قيلدككه انكله
اتعاظ واستدلل ايدلر (وابراهيم اذ قال لقومه اعبدوا الله واتقوه
ذلكم خير لكم ان كنتم تعلمون) وابراهيمى بز قومنه ارسال ايتدك اول انلره
ديديكه الله تعالى به عبادت ايدوب اندن قورقكز بويله ايتكز سزه
خيرلوردر اندنكه كفر ومعصيت اوزره اولورسز اكر خير وشرى بيلور
وياخيرى شردن تمير ايدرسكز ويا اموره نظر عملله نظر قيلورسه كز (انما
تعبدون من دون الله اوثانا وتخلقون افكا) الله تعالينك غيرى به
عبادتي اوثانه ايدرسز واول اوثاني آلهه والله تعالى به شركاء تسميه كز
ايله كذب اختلاق ايدرسز ويا اني افك ايچون دوزرسز (ان الذين
تعبدون من دون الله لا يملكون لكم رزقا) شول اوثانكه الله تعاليدن
غيرى اكا عبادت ايدرسز سزه رزق ويرمكه قادر اولزلر (فابتغوا
عند الله الرزق) رزقك كلنى الله تعاليدن طلب ايدك (واعبدوه
واشكروا له) واكا عبادت وشكر ايدك اكا عبادتله مطالبكزه توسل ايدر
واكا شكرله نعمدن سزى احاطه ايدن شيئي تقيد ايدر وياخود اكا عبادت
وشكرله لقاسنه استعداد ايدر اولديغكز حالده (اليه ترجعون)
زيرا كه بعدالموت اكا رجوع ايدرسز اعمالكز اوزره سزه جزا كزي ايدر
(وان تكذبوا فقد كذب امم من قبلكم) اكر بنى تكذيب ايدرسكز سزدن

(۱۹)

لث

اول پکن امتلر رسوللرين تکذيب ايتديلر حالبوکه تکذيبلري کئنديلره
ضرر ايتدي شول حيثيدنکه اول هلاکارينه سبب اولدي سزک
تکذيبکز دخي انک کبدر (وما على الرسول الا البلاغ المبين) رسول
اوزره واجب اولان شول ابلاغدرکه آيات الله اقترانله انک صدق ظاهر
وسامعک شکی زائل اوله غيری دکل (اولم يروا كيف يبدى الله الخلق
ثم يعيده) اهل مکه نظر ايتزلر ميکه الله تعالى انلری نيچه خلق ايتدي
ابتداده نطفه اندن علقه اندن مضغه اندن شخص سوي اندن ميت ايدر
ويوم قيامته دير کورر (ان ذلك على الله يسير) اشبو خلقک بدأ
واعاده سي الله تعالى به آساندرکه فعلنده بر شيئه احتياج اولمز
(قل سيروا في الارض فانظروا كيف بدأ الخلق ثم الله ينشئ
النشأ الآخرة) يا محمد اهل مکه به دکل که ير يوزنده سير وسفر ايدوب
عبرتله نظر ايدک که الله تعالى اشبو خلقی اختلاف اجناس واحوال اوزره
امثالسر نيچه خلق ايتدي بوند نصکره جزاء ايچون بر کره دخي انک خلقی
اعاده ايدر * ايمدی بر کسه که انک بدأ قدرتن بيله لابق اولورکه
اعاده به دخي قدرته حکم ايدر زيرا که اعاده ابدان اهنودر (ان الله على
کل شیء قدير) الله تعالى هر شيئه قادردر زيرا که قدرتی لذاته در
وذاکک جيع ممکناته نسبتی على السويه در اعاده قدرتی ابدیه
قدرتی کبدر (يعذب من يشاء ويرحم من يشاء) الله تعالى
ديلدیکنه عذاب وديلدیکنه رحمت ايدر هيچ احد اکا اعتراض ايتز
(والیه تقلبون) واکا رد اولنورسر اعمالکز اوزره جزا کزی ايدر
(وما انتم بمحجزين في الارض ولا في السماء) رب تعالى بي کنديکزه
ادرا کدن اعجاز ايدر دکلر سز نه ارضه ونه سماده اکرا انک قضاء و حکمندن
فرار ايدر سکز قنده اولور سکز اندن سز نه مفر و مخلص يوقدر (ومالکم
من دون الله من ولي ولا نصير) الله تعالى انک عذابندن قورتارر سز نه
قريب ويا ناصر اولمز (والذين كفروا بآيات الله ولقاءه) شونلر که
الله تعالى انک دلائل وحدانيتنه و کتابلرينه ويوم قيامته اکا لقايه
کافر اولديلر (اولئک يئسوا من رحمتي) ايمدی انلر يوم قيامته
اکا لقايه کافر اولديلر بنم زحمتدن مأیوس اولورلر (اولئک لهم
عذاب اليم) وانلره کفرلری سبيله عذاب اليم اولور (فاکان جواب

(قومه)

قومه الا ان قالوا اقتلوه او حرقوه فاتجاه الله من النار) ابراهيم عليه السلام
قومنی ایمانه دعوت ايتديکنده انلر بری برلرينه ديديلر که ابراهيمی قتل
ويا ناره احراق ايدک اوليه اولسه انی ناره القاء ايتديلر الله تعالى ايسه اکا
ناری بردوسلام ايدوب اندن اکا ضرر ايرديرمدی (ان في ذلك لايات
لقوم يؤمنون) الله تعالى ابراهيمی ناردن انجا ننده انک وحدانيتنه ايمان کتورن
قوم ايچون عبرتله واردرکه اول نارك اذاسندن حفظ واول نار زمان يسيرده
منجهد اولوب يرينه روض انشايدر (وقال انما اتخذتم من دون الله اوثانا
مودة بينکم في الحياة الدنيا) ابراهيم عليه السلام ديدیکه سز الله تعالى دن
غيری اوثانی بينکرده سبب مودت اتخاذ ايتديکز ويا خود اول شیء که
الله تعالى دن غيری انی اوثان اتخاذ ايتديکز اول بينکرده مودود در حیات
دنياه انک عبادتی اوزره بری برلريکزه تواد وتواصل ايدر سز (ثم يوم
القيامة يكفر بعضکم ببعض ويلعن بعضکم بعضا) بوند نصکره يوم قيامته
بری برلريکزه انکار ولعن ايدر سز اوثان عبده دن وقاده اتباعدن تبری ايدر
واتباع قاديه لعنت ايدر (وماؤا کم النار وما لکم من ناصرین) جله کزک
قرارگاهی ناردن سز نه نصرت ايدر اولمز که شفاعت ويا قوتله سزی اندن
تخليص ايدلر (فأمن له لوط) ابراهيم عليه السلامه لوط عليه السلام
ايمان کتوردی شول حينده که انی نار احراق ايتديکن کوردی اول ابراهيم
عليه السلامک قرنداشی اوغلی اولوب اکا ايمان کتورنلرک اولی اول ایدی
(وقال انی مهاجر الى ربی) ابراهيم عليه السلام ديدیکه بن قومندن ريم
جل شانه نک امر ايتديکی مکانه هجرت ايدرین (انه هو العزيز الحكيم)
اول عزيزدر اعدای بدن منع ايدر حکيمدرکه بکا صلاح ايجاب ايدر
شیء بيورر * روايت اولنديکه ابراهيم عليه السلام لوط عليه السلامه
ومرأه سی ساره ايله که اول انک بنت عميدر کوفه سوادندن کوئی نام
قریه دن حران نام قريه به بعده اندن شامه هجرت ايتدي ابراهيم
عليه السلام هجرت ايتديکنده یتش بش ياشنده ایدی هجرتی ابتدا اول
سنت ايتدی (ووهبنا له اسحاق ويعقوب) ابراهيم بز هجرتنه اکراما
اسحاق ويعقوبی ولد نافله ويردک شول حينده که مرأه سی عجوز عاقر
اولديچيون انک ولادتدن مأیوس اولمشدی (وجعلنا في ذرية النبوة

(والكتاب) وانك ذريتندہ بز نبوت وكتاب قيلدق اويله اولسه ابراهيم عليه السلام نصكره هر بعث اولنان نبى انك ذريتندن اولدى و جنس كتاب منزلى انك ذريتندن اولنلره انزال ايتدك (وايتناه اجره في الدنيا) و اكاشول بزه هجرتك اجرني دنياده و يردك اول وقتسنز اكا ولد و يرلسى و ذريتندن نبوت مستقر اولسى و ملتلك كليسى اكا اتما ايتسى و ثناء حسنله ذكر ايدلسى و آخر دهره دكين اكا صلاة اولمسيدير (وانه في الآخرة لمن الصالحين) و اول آخرتده صلاحده كاملر عدادنده در (ولو طأ اذقال لقومه انكم لتأتون الفاحشة ما سبقكم بها من احد من العالمين) و بز لوط عليه السلامى قومنه ارسال ايتدك اول انلره ديديكه سز ايشلرميسز شول فعله يي كه قبحده بالغه در سز دن اول عالميند بر كسه اكا اقدام ايتدى فرط قباحتى ايجون سز ايسه طبعكز خباثتندن اكا اقدام ايدر سز (انكم لتأتون الرجال و تقطعون السبيل) سز رجاله اتيان ايدر سز و سبيلي قطع ايدر ميسز زيرا كه انلر مسافريندن كنديلره مرور ايدنلره قتل و اخذ ماله و يافاحشه ايله تعرضلرى سبيله قطع طريق ايدر لردي و يانساءدن اعراضله سبيل نسلى قطع ايدر سز (و تأتون في ناديكم المنكر) و مجالس خاصه كرده افعال منكروه يي ايشلر سز كه انلر برى برلرينه جصاع ايدر لردي و يولدن بچنلرى حصاتله اورر لردي و مسخره ايدنور لردي ديديكه انلر مجالس لرنده هر رجل او كنه بر قصعه ايجنده حصى قوردي يولده كيدنلره انى اتار لردي هر قنغيسنك حصاتى كه انلر برينه اصابت ايدر سه اول اكا اولى در ديو فعل قنجلرين حصاة صاحبي اكا ايدردي و مجلس لرنده شرطه ايديشور لردي و بر برلرينك يوزلرينه توكر يشور لردي * روايت اولنديكه قوم لوط اخلاقندندر كه ساقز چينك و پارمقلى اوجنه حناء اورمق و ازارنى حل ايتك و آغز يله صفي ايتك و خمر ايجمك و پارمقلى چاتلمق و سب ايدشمك و كوكر جينله لعب ايتك و فعل قبايچدن مبالات ايتامك (فاكان جواب قومه الا ان قالوا اثنتا بعذاب الله ان كنت من الصادقين) لوط عليه السلامه قومك جوابى استهزاء طريق اوزره بو اولديكه الله تعالىدن بزم ايجون وعد اولنان عذابى كتور كل اكر بزه صددنده اولديغمز فعلاك استقباحنده و يا خود نبوت دعواسنده صادقردن ايسك

(قال)

(قال رب انصرني على القوم المفسدين) لوط عليه السلام ديديكه يارب انزال عذابه اشبو قوم اوزره بكا نصرت ايتكه انلر ابتداء فاحشه ايله و كنديلر دنصكره كلنلره انى تسنيله مفسد لدر (ولما جاءت رسلنا ابراهيم بالبشرى) وقتا كه رسوللر يمز ملائكه ابراهيمه اسحاق و يعقوب بشارتيله كلديلر (قالوا انا مهلكوا اهل هذه القرية ان اهلها كانوا ظالمين) اول ملائكه ديديلر كه اشبو قرية سدوم اهلنى اهلاك ايدر زيرا كه كفر و معاصيلرينه اصرار و تماديلر ايجون ظالم ل اولديلر (قال ان فيها لوطا) ابراهيم عليه السلام لوط عليه السلام شاننده مجادل اولديغى حالده ملائكه يه ديديكه لوط انلر كله اول قريه ده بيله در حالبو كه اول انلر ظلمندن بريدر (قالوا نحن اعلم بمن فيها لتنجينه و اهله الا امرأته كانت من الغابرين) ملائكه ديديلر كه بز اول قريه ده اولنلر مصلحين و مفسدينه سندن اعلمز لوط و اهلنى انلره ايريشور عذابدن انجا ايدرز الا مرأسى عذابده و يا قريه ده باقيلردن اولور (ولما ان جاءت رسلنا لوطا سى بهم و ضاق بهم ذرعا) وقتا كه رسوللر يمز ملائكه لوط عليه السلامه كلديلر لوط عليه السلام انلر كلديكنه زياده مغموم اولدى و طاقت كتورلن شىء تحملندن ذراعى قصير اولدى زيرا كه اول انلر ملائكه ايديكنى بيلديكندن قومى انلره فاحشه ايله تعرض ايتلرى خوفن ايتدى (وقالوا لا تخف ولا تحزن انا منجوك و اهلك الا امرأتك كانت من الغابرين) ملائكه لوطك انلر اجليچون ضجر و المن كور يچك ديديلر كه قومك بزه تمكئلرينه خوف و حزن چكسه بز سنى و اهلنى هلاك كن قورتاررز الا مرأهى دكل اول هالكيندن اولور (انا منزلون على اهل هذه القرية رجزا من السماء بما كانوا يفسقون) اشبو قريه نك اهلى اوزره الله تعالى يه عصيانلرى سبيله سماندن عذاب يعنى حجاره انزال ايدرز (ولقد تركنا منها آية بينة لقوم يعقلون) قوم لوط قراسندن بز علامت ظاهره ترك ايلدك كه اول خراب اولان منزلرينك آثاريدر و يا سماندن نازل اولان حجاره دن بقيه در كه بوامتك اوائلنى كورديلر و يا وجه ارض اوزره ماء اسود ظهوريدر شول قوم ايجونكه عقللرين استبصار و اعتبارده استعمال ايدرلر (والى مدين اخاهم شعيبا فقال يا قوم اعبدوا الله و ارجوا اليوم الآخر و لاتعشوا في الارض مفسدين) و بز مدين

اهلنه نسبه قريش اشري شعبي رسول كوندردك اول انلره ديديكه
الله تعالى بي توحيد ايدك وشول آخرته ثوابي رجا ايديلور شيئي ايشلكز
وكيل ووزنده نقصله ير يوزنده فساد ايتكز كه عذاب اولنجه سز
(فكلذ بوه فآخذتهم الرجفة فاصبحوا في دارهم جائمين) انلر ايسه
شعيب عليه السلامي تكذيب ايتديلر اول سبيدن انلري زلزله شديده
ويا صيحة جبريل عليه السلام اخذ ايدوب دابرلنده ويا بلدرنده ديزلري اوزره
چوكش اولدقلى حالده ميتن اولديلر (وعادوا ثمود) وعاد وثمود
قوملريني دخي هلاك ايتدك (وقد تبين لكم من مساكنهم) حالبوكه
يا كفار مكه انلره عذاب نزولي مسكنلري جهندن سزه ظاهر اولدى
چنانكه اسفار كرده اكا نظر ايدسز (وزين لهم الشيطان اعمالهم)
وشيطان انلره كفر ومعاصيدن اعمال سيئه لريني تزيين ايتدى (فصدهم
عن السبيل) واول انلري شول رسوللرينك تبين ايتديكي طريق سويدن
صرف ايتدى (وكانوا مستبصرين) حالبوكه انلر بصيرت وعقل صاحبلري
اولوب نظر وافتكاره متمكن ايديلر لكن اني استعمال ايتيوب هلاك
اولديلر ويا خود رسوللرك اخباريله كنديلره عذاب لحوقى متبين اولمشيكن
كنديلرك رايلىرنيه عجله رسوللره لج ايدوب حتى كه هلاك اولديلر
(وقارون وفرعون وهامان ولقد جاءهم موسى بالبينات فاستكبروا
في الارض وما كانوا سابقين) وقارون وفرعون وهاماني دخي هلاك
ايتدك حالبوكه موسى انلره علامات واضحه ايله كلكده انلر ارض مصرده
استكبار ايتديلر بزم عذابز انلره ايريشوب اندن قورتلديلر (فكلما اخذنا
بذنبه) اشبو مذكوريندن هر برين كندى ذنبيله مؤاخذه ايتدك
(ففهم من ارسلنا عليه حاصبا) انلرك بعضى اوزره شول ريحى ارسال
ايتدك كه اول حصباء صغار كتورديكه انلر قوم لوطدر (ومنهم من
اخذته الصيحة) وانلرك بعضى صيحة اخذ ايتدى اهل مدين وثمود كي
(ومنهم من خسفنا به الارض) وانلرك بعضى يره پكوردك قارون
واصحابي كي (ومنهم من اغرقنا) وانلرك بعضى غرق ايتدك قوم نوح
وقوم فرعون كي (وما كان الله ليظلمهم ولكن كانوا انفسهم يظلمون)
الله تعالى انلره ظلم ايدر اولدى * زيرا عادتي دكلدر كه هيچ كسه يه جرم سز
اعقاب ايدو لكن انلر نفسلريني عذابه تعريضله ظلمى نفسلرينه ايتديلر

(مثل)

(مثل الذين اتخذوا من دون الله اولياء كمثل العنكبوت اتخدت بيتا وان
او هن البيوت لبيت العنكبوت لو كانوا يعلمون) شول كسه لره كه الله تعالىنك
غيري بي اولياء اتخاذا ايتديلر انلره اعتماد واتكال ايدوب نصرون فكلرين رجا
ايدر اولدقلى حالده انلرك مثلى شول اور مجك مثليدر كه بريت اتخاذا ايدو
كيم اني كندويه مأوى ايدينه حالبوكه انك بيتي غايتده ضعف ووهنده در
اكر بيلور سكر زيرا كه اول حر و برده وقايه اولمز كذلك مشركينه اصناملري
برشيئي مالك اولمز نه عابدلرينه عبادتلىرچون نفعلرينه ايرر ونه انلره
مخالفتلىرچون ضرر لرندن قورقيلور (ان الله يعلم ما يدعون من دونه
من شيء) يا محمد كفره يه ديكل كه الله تعالى اندن غيري هر نه شيئه كه عبادت
ايدرسز اول اني بيلور انك اوزره جزا كرى قيلور (وهو العزيز الحكيم)
اول هر شيئي اوزره عزيز وقاهر در و حكيدر هر فعلنده حكمت وتدير ايدر
(وتلك الامثال نضربها للناس) اشبو مثل ونظائريني ناسه تبين ايدر زكه
افهاملرندن بعيد اولان شيئي اكا تقريب اوله (وما يعقلها الا العالمون)
اول امثال حسن وقبحنى بيلز الا علماء بالله بيلور كه اشياي لايق اولديغي
وجه اوزره تدبر ايدرلر (خلق الله السموات والارض بالحق) الله تعالى
سموات وارضى غرض صحيح ايچون خلق ايتدى تاكه اول عبادنه
مساكن وكندينك وحدانيتنه وعظم قدرته دلائل اوله (ان في ذلك
لاية للمؤمنين) اشبونده مؤمنلره عبرت واردر * زيرا كه انكله نفعلنور
انلردر (اتل ما وحي اليك من الكتاب) قرآندن سكاوحي اولناني تلاوت ايت
تاكه قراءتيله الله تعالى به تقرب والفاظنى تحفظ ومعانيسنى استكشاف ايدسز
زيرا كه قارى متأمله تكرارله كاهى منكشف اولور اولكه اول كرده منكشف
اولمشدى (واقم الصلاة) صلاة مفروضه يي مواقيتنده تمام اركانيه ادا ايت
(ان الصلاة تنهى عن الفحشاء والمنكر) زيرا كه صلاة خشوع وتقوا ايله
ادا اولنور توبه نصوح دنصكره صاحبنى فحشاء ومنكردن نهى ايدر
صلاة وغيرى يه اشتغالى حالنده معاصيدن انتهايه سبب اولمسيله شول
حيثيتدنه صلاة اكا الله تعالى بي تذكير ايدر واندن نفسنه خشيت ايرر *
روايت اولنديكه انصاردن برقتى صلوات خسي پيغمبر يمز صلى الله عليه
وسلم ايله قيلوردى ومع ذلك فواحدن برشيئي ترك ايتزدى ايشلردى
پيغمبر يمز صلى الله عليه وسلم انك حالى وصف اولنچي ديديكه انك صلاتى

انی فواحشیدن نهی اید بسردر فی الحقیقه چوق زمان یکمدی توبه ایدوب
حالی حسن اولدی (ولذکر الله اکبر) الله تعالینک ذکرى طاعتک
افضلیدر (قال النبی صلی الله علیه وسلم ألا انبشکم بخیر اعمالکم وازکاهاعند
ملیککم وارفعها فی درجاتکم وخیر من اعطاء الذهب والورق وان تلقوا
عدوکم فتضربوا اعناقهم ویضربوا اعناقکم قالوا وماذا یارسول الله
قال ذکر الله) پیغمبریمز صلی الله علیه وسلم ایدر آکاه اولک که سزه خبر
ویرهیم انیکه اول اعمالکک افضلی وازکاسیدر ودرجاتک زده اول ارفعیدر
والتون وکومش تصدقندن وعدویه ملاقی اولوب سز انلرک وانلر سزک
بویئن اورمسندن خیریدر دیدیلرکه یارسول الله اول توصفلو عملدر
دیدیکه ذکر اللهدر (روی ان اعرابیا قال یارسول الله ای الاعمال افضل
قال ان تفارق دنیا ولسانک رطب عن ذکر الله) روایت اولندیکه
براعرابی دیدیکه یارسول الله اعمالک قنغیسی افضلدر دیدیکه دنیادن
مفارقتک لسانک ذکر اللهدن رطب اولدیغی حالده اولمقدر (قال النبی
علیه السلام لا یبعد قوم یذکرون الله الا حفتهم الملائکة وغشیتهم الرحمة
ونزلت علیهم السکینه و ذکرهم الله فین عنده) پیغمبریمز علیه السلام
ایدر بر قومکه بر مجلسه اوتوروب الله تعالی بی ذکر ایدلر ملائکه انی چوره
آلور ورجت انلری قاپلر واوزرلرینه سکینه اینر والله تعالی انلری
ملائکه مقربینه ذکر ایدر وبعضیلر آیتک معناسنده دیدیلرکه الله تعالینک
سزی ذکرى سزک انی ذکر ایتسندن افضلدر ویاخود ذکر الله اکبر درکه
انکله عفو اولمقد معصیت قالمیه (والله یعلم ما نضعون) الله تعالی
خیر وطاعتدن صنیعکزی بیلور مقابله سنده سزه احسن جزاء ویرر
(ولانجادلوا اهل الکتاب الابالتی هی احسن) اهل کتابله مجادله ومخاصمه
ایتمکز الاشول خصلتله کیم اول احسندر خشوته لبتی وغضبه کظمی
ومشاغبیه نصی مقابل ایتک کبی * دینلدیکه اشبو حکم آیت
سیفله منسوخدر زیرا که اندن اشد مجادله اولمز و دینلدیکه انکله مراد
اهل کتابک معاهدلیدر (الا الذین ظلموا منهم) الا انلردن ظلم ایدلره
خصلت احسنله جدال ایتمکز بلکه غلظت ایدک یعنی انلر جزیه ویرمکدن
امتناع وحربه عزیمت ایدرلرله انلرله جدالی سیفله ایدک تاکه اسلامه کلهلر
ویا جزیه ویرهلر (وقولوا آمنا بالذی انزل الینا وانزل الیکم والهناء والهکم

(واحد)

(واحد ونحن له مسلمون) چان جزیه بی قبول ایدن اهل کتابک بری کتابلرنده
اولان اشپادن برشیئی خبر ویرلرله انلری نه تصدیق ونه تکذیب ایدک
بلکه دیکنز کیم الله تعالی دن کلان کتابلرک جیعنه ایمان کتوردک اول کزک
بزه وکزک سزه نازل اولمشر پیغمبریمز صلی الله علیه وسلم دیمشدرکه اهل
کتابی سز نه تصدیق ونه تکذیب ایدک بلکه دیکنزکه الله تعالی یه وکتابلرینه
ورسوللرینه ایمان کتوردک اگر دیدکارى باطل ایسه تصدیق ایتش
اولمز سز واکر حق ایسه تکذیب دخی ایتش اولمز سز ودخی دیکنزکه
بزم الهمز وسزک الهکمز واحدر بزا کامطیعلرز (وکذلك انزلنا الیک الکتاب)
اشبو انزال کبی سکا قرآنی انزال ایتدک اول سائر کتب سماوییه بی مصدقدر
(فالذین آتیناهم الکتاب يؤمنون به) شولکه بزا انلره کتاب ویردک اکا
ایمان کتورلر عبدالله بن سلام واصحابی کبی ویا اهل کتابدن
پیغمبریمز صلی الله علیه وسلم عهدنی تقدم ایدلر کبی (ومن هؤلاء
من يؤمن به) عرب ویا اهل مکهدن ویا پیغمبریمز صلی الله علیه وسلم عهدنده
اولان اهل کتابدن بعضی واردرکه اکا ایمان کتورر (وما یحجد بآیاتنا
الا الکافرون) بزم آیتلریمز ظاهر اوزرینه حجت قائم ایکن انی انکار ایتز
مکر انلرکه کفره توغل ایدلر کعب بن الاشرف واصحابی کبی زیرا کفره
جزملری انک صدقنی افاده ایدر شیئی تأملدن منع ایدر * زیرا که اول
پیغمبریمز صلی الله علیه وسلم اضافله معجزهدر (وما کنت تلو من قبله
من کتاب) یا محمد سکا اشبو قرآن نزولندن اول کتب منزله دن هیچ بر کتاب
اوقومش دکل ایدک (ولا تخطه یمینک) ودخی یمینکله کتابت ایدر اولمک
* ایدمى اشبو قرآنکه انواع علوم شریفه بی جامعدر شول قراءت وتعلمه
معروف اولمیان امی یه ظهوری خارق عادهدر (اذا لارتاب المبطلون)
اکر سن قراءت ویا کتابت ایدر اولسیدک مشرکون اریاب ایدوب
دیرلر دیکه اول انی تعلم ایتش ویا کتب اقدمیندن التقاط ایتشدر ویاخود
یهود اریاب ایدوب دیرلر دیکه انک نعتنی تور اتمه امی بولوب قراءت وکتابت
ایتز بولشز بوايسه اول نعتله منعوت دکادر (بل هو آيات بینات
فی صدور الذین اتوا العلم) بلکه اول قرآن آیات بینات الاعجازدر شول
کسهلر صدورنده که انی عالم وحافظ اولدیلر * ایدمى قرآنک معجز ومحفوظ
اولمى انک خصائصنددر * زیرا که امم سابقه کتابلرینی نظرله اوقورلردی

چنان اطلاق ایتسه لر انبیلرندن غیرستی اندن برشی بیلور اولمزدی
 (وما یجحد بایاتنا الا الظالمون) بزم آیات واضحه مزی انکار ایتز الا انلر که
 اول آیاتمک دلائل اعجازی وضوحند نصکره مکابره ایلر ظلمه توغل
 ایتدیر (وقالوا لولا انزل علیه آیات من ربه) مشرکر دیلر که نولیدی محمد
 ربندن انک نبوته دلالت ایدر بر علامت نازل اولسیدی ناقه صالح
 وعصای موسی ومائده عیسی کی (قل انما الایات عندالله) انلر
 دیکل که آیاتک نزولی الله تعالینک قدرته متعلقدر دیلدیکی وقته دیلدیکی
 کیفیت اوزره انزال ایدر یوخسه بنم یدمده دکلدر که اقتراح ایتدیکی کز
 شیئی سزه کتورم (وانما انا نذیر مبین) بلکه بن تکلیف اولمشنکه انذار
 ایدم ودلائل واضحه ایلر انی اظهار ایدم (اولم یکنفهم) انا انزلنا علیک الکتاب
 یتلی علیهم) انلر کفایت ایتدیکی بزم سکا قرآن انزال ایتدک که اول انلر
 علی الدوام تلاوت اولنور سنی تصدیق وحتکی اثبات ایدر واول اعظم
 آیاتدر سائرندن اول غنا ویرر وسائر آیات مضمحل اولسه اکا زوال
 ایرمز قالور (ان فی ذلك لرحمة و ذکر لی لقوم یؤمنون) اشبو قرآند
 اکا ایمان کتورن قومه نعمت عظیمه وتذکره واردر * روایت اولندیکی
 مسلمیندن بر طائفه پیغمبریز صلی الله علیه وسلم بر صحیفه کتور دیلر که
 انده یهودک بعض اقوالی یازلمشدی پیغمبریز علیه السلام دیدیکه
 بر قومه ضلالت بترکه پیغمبرلری کتوردیکندن اعراض ایدوب غیرک
 کتور دیکنه اقبال ایدر (قل کفی بالله بنی و بینکم شهیدا) دیکل که
 بنله سزک بیکزده الله تعالی شاهد بترکه اول بنی معجزاته تصدیق ایتدی
 ویاخود بنله ارسال ایتدیکی شیئی سزه تبلیغه وسزک تعنتکره وبنی
 تکذیبکره اول شاهد یتز (یعلم ما فی السموات والارض) سموات وارضده
 اولان جمیع اشیا بیلور اولیه اولسه بنم حالمندن وسزک حالکزدن
 اکا برشی خفی اولمز (والذین امنوا بالباطل و کفروا بالله اولئک
 هم الخاسرون) شونلر که الله تعالیدن غیری معبودلرینه ایمان
 کتوروب الله تعالی به کافر اولدیلر انلر صفقه لرنده زیان ایتشدر شول
 حیثیتدکه ایمانی کفره دکشدیلر (و یستعجلونک بالعذاب ولولا اجل
 مسمى لجا هم العذاب ولایاتینهم بغتة وهم لا یشعرون) مشرکون سندن
 عذابی استعجال ایدرلر اگر عذابلرینه لوح محفوظده وقت معین

(اولسه)

اولسه که اول موت ویا یوم قیامتدر انلر عذاب تأخیرنسر عاجلا
 کوردی * ایدم عذابلرینه تعیین اولسان وقت ایردیکنده اول انلر
 فجأة کاور حالبوکه انک کادیکنه انلر شعوری اولمز (یستعجلونک
 بالعذاب وان جهنم محیطة بالكافرين) انلر سندن عذاب نزولن استعجال
 ایدرلر حالبوکه کافرلری جهنم محیطه در چنانکه انلر عذابک وقتی ایرر
 ویاخود الآن انلری جهنم احاطه ایتش کبیر انک اسبابی اولان کفر
 ومعاصی احاطه ایتدیکی چون (یوم یغشیهم العذاب من فوقهم
 ومن تحت أرجلهم ویقول ذوقوا ما کنتم تعملون) اول جهنم احاطه
 ایدر انلری شول کونده که عذاب انلری فوقلرندن وتحتلرندن یعنی
 هر جوانبدن احاطه ایدر الله تعالی ویا انک امریه ملائکه انلر دیر که
 اعمال سیئه کزک عقوبتن ذوق ایدک (یا عبادى الذین آمنوا ان ارضی
 واسعة فایای فاعبدون) یا بنم مؤمن قولرم چنان بر بلده ده سزه
 عبادت آسان اولسه بنم ارضم واسعه در اول سزه آسان اولان موضعه
 هجرت ایدوب هر قنده اولور سکز بکا عبادت ایدک * دینلدیکه اشبو آیت
 مکده ده مقیم ضعیفاء مسلمین شبانده نازل اولوبدر یعنی اگر مکده
 ایمانکزی اظهاردن ضیقده ایسه کز اندن چیقوب مدینه یه کیدک که
 اول ارض واسعه آمنه در * دینلدیکه چنان برارضده معاصی ایشلنسه
 اندن کیدک که بنم ارضم واسعه در پس بواجلدن هر کسنه که معاصی
 ایشلنور بلده ده اولوب تغییرینه قادر اولیه اکا واجب اولور که اندن
 هجرت ایدر بریره که انده اکا عبادت آسان اولور (کل نفس ذائقة الموت
 ثم الینا ترجعون) هر نفس موتی ذائقه در بعده بزه رجوع ایدر سز *
 ایدم اولکه ماقبتی بواوله لایق اولور که انکچون استعدادده اجتهاد
 ایدر (والذین آمنوا وعملوا الصالحات لنبوا نهم من الجنة غرفا تجری
 من تحتها الانهار خالدين فیها) شونلر که ایمان واعمال صالحه بینن جمع
 ایدر بز انلری جنتده غرقه لرزه انزال ایدر انک التندن نهرلر جریان ایدر
 انلر انده دائم اولدقلری حالده (نعم اجر العاملين) اعمال صالحه
 اهلنک ثوابی نه کوچک اولور (الذین صبروا) انلر که دینلرین صیانت
 ایچون شدائد ومفارقت اوطانه صبر ایدرلر (وعلى ربهم یتوکلون)
 ورزقلری امرنده وغیرده رب تعالی به توکل ایدرلر (وکاین من دابة

لا تحمل رزقها الله يرزقها واياكم) دوايك كثرى ضعيف اولديغچون
 رزقن **ك**تورمكه طاقت كتورمز ويا ادخار ايتز صباح واخشامده
 ياننده رزق اولمز بويله ايكن اول دوايه ضعف وتوكلريله وسزه قوت
 كسبه اجتهاد كزله جلهيه رزقي ويرن الله تعاليدر * زيراكه كلنك رزقي
 اسبابله در واكا مسبب يالكز الله تعاليدر * ايمدى هجرتله معاشكز اوزره
 خوف ايتكز وقتاكه صحابه هجرتله امر اولنديلر انلك بعضيلري ديديلر كه
 نيچه قدوم ايدرز بر بلدهيه كيم بزم انده معيشتز يوقدر اول سبيدن
 بوآيت نازل اولدى (وهو السميع العليم) اول الله تعالى اقوال كزى
 ايشيدر وصدور يكرده اضممار ايتديككزى بيلور (ولئن سألتهم من خلق
 السموات والارض وسخر الشمس والقمر ليقولن الله فأنى يؤفكون)
 اكر سن اهل مكهيه سؤال ايتسك كه سموات وارضى كيم خلق
 ايتدى وشمس وقرى كيم تسخير ايتدى ديه لركه الله تعالى * ايمدى
 بو اعترافلرند نصكره انك توحيد وطاعتدن نيچه اعراض ايدرلر (الله
 يسط الرزق لمن يشاء من عباده ويقدرله) الله تعالى عبادندن ديلديكى
 كسهيه رزقي كاھى توسيع وكاھى تضيق ايدر (ان الله بكل شىء عليم)
 الله تعالى هر شئي علميدر مصالح ومفاسدلين بيلور (ولئن سألتهم من نزل
 من السماء ماء فأحيا به الارض من بعد موتها ليقولن الله) اكر سن انلره
 سؤال ايتسك كه سمادن مائى كيم انزال ايدوب انكله ارضى موتند نصكره
 احياء ايتدى ديه لركه الله تعالى (قل الحمد لله) اشبو اشبيانك فاعلى
 الله تعالى ايديكنه اقرارلرينه واوزرلرينه حجت لزومنه الحمد لله ديكل
 (بل اكثرهم لا يعقلون) بلكه انلك اكثرى ديدكارين فهم ايتزلر *
 زيراكه بو اشبيانك خالق الله تعالى ايديكنه اقرار ايدرلر ايكن وحدانيت
 انكار ايدرلر وياخود انلك مقالهلرئ عننده سنك تحميدله مرادك
 نه ايديكنى بيلزلر (وما هذه الحياة الدنيا الالهو ولعب) اشبو حيات
 دنيا دكل الالهو ولعيدر * زيراكه اول اهلندن سرعت زوالى
 وانلك موتله اندن ذهاب وارتحالى صبيانك لعيلرينه بكزركه بر ساعت
 اكا اشتغاللرند نصكره متفرق اولوب كيدرلر (وان الدار الآخرة
 لھى الخيوان لوكانوا يعلمون) ودار آخرت ايسه دار حيات حقيقه در
 زيراكه انده موت طرياني ممتعدر اكرانى بيلورلرسه انك اوزره ايشار

(ايتزلر)

ايتزلر شول دنيايى كه اصلى عدم حياتدر وانده كى حيات ايسه عارضه
 وسريعه الزوالدر (فاذا ركبوا فى الفلك دعوا الله مخلصين
 له الدين) انلك برده دائما شركه متصفلدر چانكه بحرده سفينديه
 ركوب ايدوب غرق خوفن ايتسه لر دينده مخلصين صورتده الله تعالى به
 يلوادرلر * زيراكه اول ورطه دن انلرى انك غيرى انجايه قادر دكل
 ايديكنى بيلورلر (فلما نجاهم الى البر اذا هم بشركون) وقتاكه اول انلرى
 بره ايصالله اول ورطه دن انجاء ايدو كوررسنكه شركه عودت ايدرلر
 (ليكفروا بما آتيناكم) تاكه شركريله نعمت نجاته كافراوله لر (وليمتنعوا)
 وعبادت اصنام اوزره اجتماع وتوادلر تعيش وتلذذ ايدلر (فسوف
 يعلمون) انك عاقبت اوزرلرينه عذاب نزولنده بليسرلرلر (اولم يروا انا
 جعلنا حرما آمنا) اهل مكه كورمديلر ميكه بز انلك بلدهلرين نهب
 وتعيدن مصون وكنديلرين قتل وسبيدن آمن قيلدق (ويتخطف
 الناس من جولهم) حالبوكه انلك حولنده كى ناس قتل وسيله اختلاس
 اولنورلر (أفبالباطل يؤمنون) اشبو نعمت مكشوفه دن صكره صنم
 ويا شيطانه ايمان كتورلر (وبنعمة الله يكفرون) والله تعالى انك
 نعمتى قرآن واسلام ومحمد صلى الله عليه وسلمه كافر اولورلر (ومن اظلم
 ممن افترى على الله كذبا او كذب بالحق لما جاءه) شول كسه دن اظلم
 وارميدركه الله تعالى به اشراكه كذب اختلاق ايدو ويا اكا الله تعاليدن
 رسول وكتاب كلديكسندو تكذيب ايدو (أليس فى جهنم مثوى للكافرين)
 اشبو كافرلر ايچون جهنمه مأوى يوقيدركه انلر بو جزايى ايتديلر
 (والذين جاهدوا فىنا لنهدينهم سبلنا) شونلركه بزم رضامن طلبنده
 اعادى ظاهره وباطنهيه جهاد ايدو بز انلره بزه سير وجنايمزه وصول يوللرين
 هدايت ايدرز وياخود انلره سبيل خيره هدايتز واكا سلوكه توفيقمز آرتوررز
 وشونلركه طلب علمه جهاد ايدلر بز انلره عمل طريقن هدايت ايدرز
 وشونلركه علملرى اولديغى شيئده جهاد ايدلر بز انلرى بيلدكلرى شيئ
 هدايت ايدرز دينلديكه افضل جهاد جهاد نفسدر كه اول الله تعالى انك
 رضاسنده هوايه مخالفتله بذل نفسدر وصدق مجاهده اولدر كه الله
 تعالى به انقطاعدر هر شيئدنه انك غيريدر * شيخ اكبر قدس سره
 فتوحاتده ايدر مجاهده ورياضتدن صكره فتح امرى لازمدر اندن

مفارقت اولمز * زیرا که اعمال انی طلب ایدوب اکا نائل اولور لکن اول قحک ظهوری نوقته اولور دنیاده می ویا آخرتده می اول الله تعالینک علم وارادته راجعدر ایمدی یحان بر کسه بی عملده صدق ایدر کوره سن ویا اول حالته نفسی ایر کوره سن والحال باطنکده قح کورمه سن شول کسه بی اولان قح کبی که عملده انی کندی صورتده کوررسن اکا غم چکمه بیلکه اول سنگچون ادخار اولوبدر نفسکدن تهمتی طرح ایت اهل تهمتدن اولغل زیرا برکسه که دنیاده همتی بذل مجهودله معالی طلبنه تعلق ایدوب دنیاده اکا ذوق وکشفله واصل اولیه لابد یوم قیامتده اول اکا نائل اولوب اشبو دنیاده انی ذوق ایدن کبی اولور (وان الله لمع المحسنين) الله تعالی احسانله عمل ایدنرله در دنیاده نصر ومعونتیه وعقباده ثواب ومغفرتیه در

سورة الروم وهی ستون آية مكية الا فسبحان الله دکل

بسم الله الرحمن الرحيم

(الم غلبت الروم في ادنى الارض) روم مغلوب قیلندی ارض عربک رومه اقرب موضعنده ویاخود ارض رومک عربه اقرب موضعنده که اول اطراف شامدر (وهم من بعد غلبهم سیغلبون فی بضع سنین) والحال روم مغلوب اولدقلرند نصکره اوچ یل ایل طقوزنجی یله وارنجه اول اراده حصملرینه غلبه ایدیسرلردر * روایت اولندیکه فارس رومه غزا ایدوب اذرعائله بصره بیلنده ویاجزیره ده بری برلینه قاوشدیلرکه اول ارض رومک فرسه اقربدر واندی قتال ایدوب فارس رومه غلبه ایتدی بو خبر مکه یه ایریشیچک مشرکون زیاده سوندیلر و مسلمینه انکله اشعات ایدوب سز ونصاری اهل کتابلسز وبز وفارس امیلرز بزم اخوانمز سزک اخوانکز اوزره غلبه ایتشلردر * ایمدی بز دخی سزک اوزریکزه غلبه ایدرز دید کلرنده بوآیت نازل اولوب ابوبکر رضی الله عنه انلره دیدیکه الله تعالی سزی قریر العین ایتمز والله بضع سنین ده روم فارس اوزره غلبه ایدیسردر ابی بن خلف اکا دیدیکه کذب ایدرسن ایمدی بو قولک ظهورینه دکین برزمان تعیین ایتکه انک اوزره سنکله مناحبه ایدلم اولیه اولسه زمانی اوچ یله تعیین ایدوب قنغیسنک قولی صادق اولورسه آخر اکا اون قلووس

(ویرمک)

ویرمک اوزره مناحبه ایتدیلر بعده ابوبکر رضی الله عنه انی پیغمبریمز صلی الله علیه وسلم خبر ویریمک دیدیکه بضع اوچدن طقوزه دکدر ایمدی خطرکده زیاده ایدوب زمانی مد ایلکل اولیه اولسه مناحبه لرینی یوز قلووس ویرمک اوزره زمانی طقوز ییله دکن مدایتدیلر اشبو مناحبه مدتی تمامندن اول ابی بن خلف احدده پیغمبریمز علیه السلامک جرحندن بعد القفول فوت اولدی ویوم حدیده ده روم فارس اوزره غلبه ایدوب ابوبکر رضی الله عنه اول خطری ابی بن خلفک ورثه سندن الدی وانی پیغمبریمز علیه السلامه کتوریمک انی تصدق ایت دیو اکا یوردی (الله الامر من قبل ومن بعد) غالبیت ومغلوبیت امری الله تعالینک قضاء ومشیتیه در فارسک غالبین اولمرندن اولده که اول رومک مغلوبین اولمری وقیدر وکرکسه فارسک مغلوبین اولمرند نصکره که اول رومک غالبین اولمری وقیدر (ویومئذ یفرح المؤمنون) رومک فارسه غالب اولدیغی کونده مؤمنلر سونورلر (بنصر الله) الله تعالینک رومی فارس اوزره نصر وتغلبینه که انده انقلاب تقاول مشرکین و مسلمینک مشرکینه اخبارلرینک صدق ظاهر و مسلمونک مناحبه ده انلره غالب و یقینلری زیاده اولمسیدر (ینصر من یشاء) الله تعالی دیلدیکنه نصرت ایدر کاهی اهل کتابه کاهی امینه (وهو العزيز الرحيم) الله تعالی عبادینه نصرتله اعداسندن انتقام ایدر وکاهی اعداسنه عبادی اوزره نصرتیه فضل ایدر (وعدا الله لا یخلف الله وعده) الله تعالی اشبونی وعد ایتدی اول وعدینه خلف ایتمز (ولکن اکثر الناس لا یعلمون) الا بوکه ناسک اکثری انک صحت وعدنی بیلزلر جهللری وعدم تفکرلریچون (یعلمون ظاهرا من الحیاة الدنیا وهم عن الآخرة هم غافلون) انلر حیات دنیادن کیفیت معاشرین بیلورلر کسب وتجارت نیچه اولور فدان نوقتن دیکیلور اکین نیچه اکیلور بیچیلور بنانیچه استحکام ایدیلور حتی انلرک بری بر درهمی طرفی اوجیه آلدیغنده وزنی بیلور حالبوکه انلر حیات دنیانک غایت ومقصود منها سندن غافلدر بالارینه خطور ایتمز دنیانک ظاهرین بیلکله مقصود اولان انک حقائق وصفات وخصائص و افعال واسبابی واندی کیفیت تصرفی بیلکدر وانک باطن بیلکله مقصود اولان اول آخرته مجاز اولوب اندکی کراماته نائل اولغه وسیله

واحوالنه نمونه در یو خسه ظاهر دنیا به مختص اولان عمله عدم علم بیننده
 فرق یوقدر (أولم يتفكروا في انفسهم ما خلق الله السموات والارض
 وما بينهما الا بالحق) انلر نفسلرنده تفكری احداث ایتزلرمی ویا خود
 نفسلری امرنده تفكر ایتزلرمی زیرا که نفسلری انلره غیریدن اقربر واول
 بر مرآتدر که ممکناتک جیعنده اولان اشیاء انده مستبصرینه منجلی اولور
 تا که انی مبدع جل شاننه ک ابدائه قدرندن اعاده سنه دخی قدرتی
 متحقق اوله ویا خود تفكر ایتزلرمیکه دیلر ویا ییلر که الله تعالی سموات
 وارضی وایکیسی بیننده کی اشیایی حقی ملتبس اولدیغی حالده خلق ایلدی
 یو خسه غرض صحیح و حکمت بالغه سنر عبث و باطل خلق ایتدی (واجل
 مسمی) و اجل معلومه کیم اشیاء مذکوره اکا منتهی اولوب اندنصکره
 قالمز (وان كثيرا من الناس بقاء ربهم لكافرون) و الحال ناسک کشری
 اجل مسمانک انقضاسنده ویا خود ساعتک قیامی عندنده رب تعالیدن
 جزاری لقاسنه جاحدر در ظن ایدرلر که دنیا ابدیه اوله و آخرت اولیه
 (أولم یسیروا فی الارض فینظروا کیف کان عاقبة الذین من قبلهم)
 اهل مکه ریوزنده سیروسفر ایتزلرمیکه اندن اول هلاک ایدیلن امم عاتیه نک
 آثارینه نظر ایدوب معتبرین اوله لر (کانوا اشد منهم قوّة) که اول امم عاتیه
 قوتده انلردن اشد ایدیلر (واثاروا الارض وعمروها اکثر مما عمروها)
 واول امم ارضی زراعت ایچون اهل مکه دن اکثر سور دیلر و عمارت ایتدیلر *
 ایدمی اهل مکه به نظر ایت که دنیا حالده اول امم اضعف ایکن ینه
 دنیا ایله نیچه اغترار و افتخار ایدرلر زیرا دنیانک مدار امری بلادده تسلط
 و عباد اوزره تسلط و انواع عمارت ایله اقطار ارضده تصرفدر اهل مکه
 ايسه بر بلوک ضعیفادر کیم بر منفعتسنر وادی به الجا اولمشلردر (وجاءتهم
 رسلهم بالبینات) و انلره رسوللری معجزات و آیات واضحاتله کل دیلر انلر
 ايسه اول رسوللرین تکذیب ایدیچک الله تعالی انلری هلاک ایتدی
 (فاکان الله لیظلمهم ولكن کانوا انفسهم یظلمون) الله تعالی انلری
 اهلاکله ظلم ایدر اولمدی زیرا که اول عدلله موصوفدر که اول ظلمه منافیدر
 بلکه انلر هلاکلرینه مؤدی شیء ایشلمکله نفسلرینه ظلم ایتدیلر (ثم کان
 عاقبة الذین اساءوا السوای) بوندنصکره اساءت ایدنلرک عاقبتی عقوبت
 سیئه اولدیکه اول جهنمدر (ان کذبوا بایات الله وکانوا بها یستهزؤن)

(انکچون)

انکچونکه الله تعالینک آیاتی تکذیب ایدوب استهزاء ایدرلردی
 (الله یدؤ الخلق ثم یعیده ثم الیه ترجعون) الله تعالی اشبو خلقی ابتداء
 انشاء ایدر و موندنصکره بعث ایدر بعده جزاء ایچون اکا ارجاع
 اولنورسنر (ویوم تقوم الساعة یبلس المجرمون) قیامت قائم اولدیغی
 کونده مشرکالر متحیرین وهر خیردن آسین اولدقلری حالده سکوت
 ایدرلر ویا کلام وحتلری منقطع اولور ویا مقتضی اولورلر (ولم یکن لهم
 من شرکائهم شفعاء وکانوا بشرکائهم کافرین) الله تعالی به اشراک
 ایتدکری ملائکه و اصنامدن انلری عذاب اللهدن اجاره ایدر شفعا اولیه
 اول آللهلرندن مأیوس اولیچق انلره کافر اوله لر ویا خود اول آللهلری
 سبیلله دنیاده کافرین ایدیلر (ویوم تقوم الساعة یومئذ یتفرقون)
 ساعت قائم اولدیغی وقتده اهل جنت اهل ناردن متمیز اولور ویا حسابدنصکره
 مؤمنلر کافرلردن آریلوب مؤمنلر جنته کافرلر ناره کیدرلر من بعد
 اجتماع ایتزلر (فاما الذین آمنوا و عملوا الصالحات فهم فی روضة یحبرون)
 اما شونلر که ایمان و اعمال صالحه بی جمع ایتدیلر انلر شول نضارتی
 نهایتده بستانده نعمت و حبور و کرامتده اولورلر (واما الذین کفروا
 وکذبوا بایاتنا ولقاء الآخرة فالولئک فی العذاب محضرون) واما شونلر که
 کافر اولوب بزم آتیلر یمزی ویوم قیامتده بعث اولنلرینی تکذیب ایتدیلر
 ایدمی انلر جهنم عذابنه ادخال اولنوب اندن غائب اولزلر دائماً تعذیب
 اولنورلر (فسبحان الله حین تمسون و حین تصبحون) الله تعالی بی تنزیه
 ایدک یعنی انکچون نماز قیلک اخشامه داخل اولدیغک زده صلاة مغرب
 و عشا بی قیلک و صباحه داخل اولدیغک زده صلاة صبحی قیلک
 (وله الحمد فی السموات والارض) سموات وارض اهلنک حمد و صلاتی
 اول الله تعالی به مختصدر غیر بی دکل (وعشیا و حین تطهرون)
 و عشیده صلاة عصری و ظهریه داخل اولدیغک زده صلاة ظهری قیلک
 اشبو ایکی آیت الله تعالی بی تنزیه واکا ثنیه امر معنا سنده اخباردر
 اوقات مذکورده انک قدرتی ظاهر و نعمتی متجدد اولور
 ویا دلالتدر اکا که الله تعالینک تنزیهنی وحده استحقاقنی ناطق
 شواهد اول اوقاتده حادث اولور هر کسه دنکه سموات وارض
 اهلنندن تمیزی اولور * تسبیحی صباح و مسایه تخصیص ایتدی

لث (۲۰)

زیرا که آثار قدرت و عظمت اول ایکی وقتده اظهر در وحیدی عشایه که
 آخر نهار در وظهیریه که اول وسط نهار در تخصیص ابتدی زیرا که
 اول ایکی وقتده تجدید نعم اکثر در * ابن عباس رضی الله عنهما به صلوات
 خست ذکر فی قرآنده بولور میسن دیو سوال اولندقدده نعم دیوب اشبو
 ایکی آیتی او قودی علماء اختلاف ایتدیلر که صلوات خمس مکه ده می
 فرض اولدی یو خسه مدینه ده می اکثرن دیدیلر که مکه ده فرض
 اولدی عائشه رضی الله عنها ایدر صلاة ابتدا مکه ده ایکیشر رکعت
 فرض اولدی پیغمبر میز صلی الله علیه وسلم مدینه قدوم ایدیچک صلاة
 سفر کما کان ایکیشر رکعت اوزره تقریر اولنوب حضرده عصر وعشا
 دردر رکعت قلندی (یخرج الحی من المیت) اول الله تعالی میتدن حی
 اخراج ایدر انسانی نطفه دن و طاری بیضه دن اخراجی کی (و یخرج
 المیت من الحی) وحیدن میت اخراج ایدر نطفه فی انساندن و بیضه فی
 طارندن اخراجی کی (و یحیی الارض بعد موتها) و ارضی بیسندن صکره
 نباتله احیاء ایدر (و كذلك تخرجون) اشبو اخراجی کی سز دخی
 قبور کردن اخراج اولنور سز پیغمبر میز صلی الله علیه وسلم دن مرویدر
 برکسه بی که ثواب قفیز اوفی ایله کیل اولنمی مسرور ایده (فسبحان الله
 حین تمسون و حین تصبحون وله الحمد فی السموات و الارض و عشا و حین
 تظهرون یخرج الحی من المیت و یخرج المیت من الحی و یحیی الارض بعد موتها
 و كذلك تخرجون) دیسون پیغمبر میز صلی الله علیه وسلم ایدر برکسه
 اشبو ذکر ی صباحن دیسه اول کیچده فوت ایتدیکنه ادراک ایده
 و اولکه انی اخشا من دیسه اول کونده فوت ایتدیکنه ادراک ایده
 (ومن آیاته ان خلقکم من تراب ثم اذا انتم بشر تنثرون) الله تعالی نیک
 قدرت و وحدانیتنه دلالت ایدر دلائلدندر که اصلکز آدمی ترابدن خلق
 ایتدی بوندن صکره بشر اولوب ریوزینه منتشر اولدیکز (ومن آیاته ان
 خلق لکم من انفسکم ازواجاً لتسکنوا الیهما) اول دلائلدندر که
 اول الله تعالی سز یکون کندیکز دن ازواجکزی خلق ایتدی زیرا که
 حوا آدم علیه السلام ضلعندن خلق اولنوبدر و سائر نساء ایسه رجال
 نطفه لرندن خلق اولندیلر و یا خود نساء رجال جنسندندر تا که اول
 ازواجه میل ایدر و انلر که الفت ایده سز زیرا که جنسیت ضمه علتدر

(و جعل)

(و جعل بینکم مودة ورحمة) و رجال و نساء بینده و یا افراد جنس بینده
 مودت و ازواج و ساططیله شبق و غیر ی حالده بینکرده رجت قیلدی تا که
 انکله امر معاش منتظم اوله زیرا که انسانک تعیشی تعاون و تعارفه
 متوققدر اول ایسه تواد و تراجه محتاجدر * دینلدیکه مودت جاعدن
 و رجت ولدن کنایه در (ان فی ذلك لآیات لقوم یفکرون) اشبو نده
 آیاتلر واردر شول قوم ایچونکه انک صنعنده تفکر ایدوب انکله انک قدرت
 و عظمتنه استدلال ایدرلر و اکا ایمان کتوروب عبادتنه کیدرلر (ومن آیاته
 خلق السموات و الارض) وینه اول دلائلدندر که سموات و ارضی خلق
 ایتسیکه سزانی بیلور و اکا مقر اولور سز (و اختلاف السنکم و الوانکم)
 و لغاتکز اختلافی که هر صنفک بر نوع لغتی وار و یا انک وضعنی سزه الهام
 وانی تکلمه سزی اقدار ایتدی و یا نطقکز اجناس و اشکالی که ایکی منطقی
 کیفیتده متساوی بولور سز و دخی الوانکز اختلافی که بعضنک جلدی
 ابیض و بعضنک اسود و یا بو ایکی لونک غیر یدر تا که انکله تعارف
 و تمایز اوله حتی ایکی توأمی کوررسنکه مواد و اسبابده متفقلر ایکن امور
 مذکور نیک برنده مختلف اولورلر اگر اشکالده متفق اولوب ضرب واحد
 اولسه لر بینلرنده تجاهل و التباس اولوب انکله مصالح کثیره معطل
 اولوردی (ان فی ذلك لآیات للعالمین) اشبو نده آیتلر واردر که ملک و انس
 و جندن هر مافله خفی اولز (ومن آیاته منامکم باللیل والنهار و ابتغواکم
 من فضله) وینه اول دلائلدندر که کیچده و یا کوندزده قوای نفسانیه به
 راحت و قوای طبیعیه به قوت ایچون او یورسز و اول ایکی زمانده معاشکز
 طلب ایدرسز و یا کیچده ده او یورسز و کوندزده معاش طلب ایدرسز
 (ان فی ذلك لآیات لقوم یسمعون) اشبو نده آیتلر واردر شول قوم ایچونکه
 سماع تفهم و استبصار ایله استماع ایدرلر (ومن آیاته یریکم البرق خوفاً و طمعا)
 وینه انک آیتلرنندر که سزه برق کوسرتر صاعقه دن خوف ایدر
 و غیثی طمع ایدر اولدیغکز حالده (و یزول من السماء ماء فیحیی به الارض
 بعد موتها) و سمدان یغهور ایندیروب انکله یرک بیسندن صکره اندن
 نباتاتله انی دیر کورر (ان فی ذلك لآیات لقوم یعقلون) اشبو نده
 آیتلر واردر شول قومه کیم انک اسبابی استنباطنده و تکوینی کیفیتده

عقلین استعمال ایدرلر که انلره صانع جل شأنه نك کمال قدرت و حکمتی ظاهر اوله (ومن آياته ان تقوم السماء والارض بأمره) وینه اول دلائلندر که سما فوقکزده وارض تحتکزده طورر شول وقته دکنکه اول انی تعیین ایدوبدر مجرد انک امریله یوخسه مقیم محسوسله دکل (ثم اذا دعاكم دعوة من الارض اذا انتم تخرجون) بعده اول سزى قبوردن برکه یاموتی چیقک دیو اسرافیل علیه السلام لسانیه دعوت ایتدیکنده اول جینده سرعتله توقفسز چیقارسز (وله من في السموات والارض كل له قانون) سموات وارضده کی خلقک اول موجد وربدر کلیسی اکا مطیع و متقادر در اندن امتناع ایتزلر (وهو الذي بدأ الخلق ثم يعيده) اول الله تعالی آدمی ابتداء خلق ایدوب بعده اندن ذریتن وجوده کتوردی حالبوکه انلر برشی دکل ایدیلر وانلری اماته دنصکره یوم قیامتده قبرلندن بعث ایدر (وهو اهوون علیه) سزک عقولکز مقتضاسنجه الله تعالی یه اعاده بدادن اسهلدر که صحیحه واحده ایله جیبی طورى کلورلر اما که الله تعالینک قدرته اضافتله ابداء و اعاده ایکسی مساویدر (وله المثل الاعلى في السموات والارض) اول الله تعالینک سموات والارض وما فیهماده وصف اعلاسی واردر که دلالت ونطقله اندن وصف اول نورکه اول صفات محدثندن تنزهیدر وهر شیئه قادر اولوب انشاء و اعاده و غیریدن عاجز اولمدیغیدر (وهو العزيز الحكيم) اول الله تعالی هر مقدوره قادردر وهر فعلی حکمت مقتضاسی اوزره جاریدر (ضرب لكم مثلا من انفسكم هل لكم مما ملكت ايمانكم من شركاء فيما رزقناكم فانتم فيه سواء تخافونهم كخيفتكم انفسكم) الله تعالی سزه اقرب امور اولان انفسکز احوالندن منتزع مثل ضرب ایدر که شول سزه ویردیکمز اموال و غیریده راضی اولور میسز که بعض ممالکز سزه شرکاء اوله سز وانلر اول اموالده حر و عبد بیننی تفضیلنسز مساوی اوله وانی اول ممالککزله مقاسمه ایده سز حرك شریکی حرله مقاسمه ایتسی کی واول ممالککزدن قورقه سز که اول اموالی تصرفده مستبد اوله لحرارک بری برلندن قورقسى کی معلومدر که اکا راضی اولمز سز اولیه اولسه معبودلریکزی الوهیت و عبادتده بکا شرکاء قیایغه نیچه راضی

(اولورسز)

اولورسز والخال معبودلریکز بنم عبیدمدر (كذلك تفصل الآيات لقوم يعقلون) اشبو تفصیل کی بزآیاتی تبیین ایدرز زیرا که تمثیل معانی یی کشف وایضاح ایدر شول قوم ایچونکه عقولارین امثال تدبرنده استعمال ایدرلر (بل اتبع الذين ظلموا اهواءهم بغير علم) بلکه اشراکه نفسلرینه ظلم ایدلر هوالرینه اتباع ایدرلر جاهلین اولدقلى حالده انلری اندن برشی کف ایتز اگر عالین اولسه لر هوالرینه اتباعلری جائزدر که علملری انلری اندن منع ایدر (فن يهدي من اضل الله وماله من ناصرين) الله تعالینک اضلال ایتدیکنی کیمدر که ارشاد ایده وانلری ضلالتدن تخلص و آفاندن حفظ ایدر ناصرلری اولمز (فأقم وجهك للدين حنيفا) یا محمد دینکی الله خالص ایت و یادینه اقبال ایدوب امر ونهیله عملده استقامت ایت انده مخلص اولدیغک حالده (فطرت الله التي فطر الناس عليها) اتباع والتزام ایدک فطرة الله کیم ناسی انک اوزره خلق ایتدیکه اول حق قبول وانی ادراکه تمکنلیدر حتی تخلیه اولسه لر انک اوزره مستقر اولورلردی زیرا بودینک حسنی عقولده موجوددر اندن عدول ایتز الا اولکه نشو وتقلید آفاته واقع اوله اولیه اولسه یهود ونصارى اولاد و اتباعلرین آباءلری دینه اماله ایدوب انکله فطرة سلیمه و حجة مستقیمدن زائل اولورلر * برقوم دیدیلر که اول فطرتله مراد الله تعالینک (ألسنت بربکم) دیو عالم ذرده بنی آدمدن سؤال ایتدیکنده بلی دیو جوابلریله اولان عهدک ظهوریدر * ایمدی عالمده هر مولود اول اقرار اوزره در که اول حنیفیه در که خلقت انک اوزره در اگرچه الله تعالینک غیر یه عبادت ایدرسه ده * تکیم قرآنده بیورلدیکه (ولئن سألتهم من خلقهم لیقولن الله) اگر سن انلره سزى کیم خلق ایتدی دیو سؤال ایتسک دیدلر که الله تعالی خلق ایتدی * ودخی حکایت بیورلدیکه (والذين اتخذوا من دونه اولياء مانعهم الا لیقربونا الى الله زلفی) شونلر که الله تعالینک غیر یی آلهه اتخاذ ایتدیلر دیرلر که بزم انلره عبادتمز دکل الا انکچوندر که انلر بزم ایچون الله تعالی یه شفاعت ایده لربزی اکا تقریب ایده لر لکن احکام دنیاده ایمان فطریه عبرت یوقدر بلکه عبرت ایمان شرعی یه در که مأمور به در ارادت وفعلا مکتسبدر (لا تبدل خلق الله) الله تعالینک دینه لائق

اولز که تبدیل و یا تغییر اوله و یا هیچ کسه قادر اولز که انی تغییر اید * دیندیکه اشبو خبر در نهی معناسنده در یعنی دین الهی تبدیل اتمکز بلکه دین الهی ملازم اولوب اکا متابعت ایدک و یا خود معنی الله تعالینک انسانى مجبول ایتدیکی سعادت و یا شقاوت تبدیل اولز * ایمدی نه سعید شقی اولور و نه شقی سعید اولور (ذلک الدین القیم) اشبو دین مأمور و یا فطره دین مستویدر که انده عوج یوقدر (ولکن اکثر الناس لا یعلمون) لکن ناسک اکثری تدبرلری اولدیغیچون انی بیلزلر (منین الیه) الله تعالی به توحید و طاعتله راجعین اولدیغکز حالده (واقیوا الصلاة) وانک امر ونهیینه امتثالله عذابندن صافکنک (واقیوا الصلاة) و صلاتدن هر مکتوبه بی ارکانی اقامتله وقتنده ادا ایدک (ولا تكونوا من المشرکین) دینلرنده شرک ایدنلردن اولمکز (من الذین فرقوا دینهم) شول قومدنکه دینلرینی ادیان مختلفه ایتدیلر امر اولندقلری دینی ترک ایتدیلر که انلر یهود و نصارادر و دیندیکه انکله مراد اشبو امتدن اهل بدعدر (وکانوا شیعا) طوائف مختلفه اولدیلر * دیندیکه یهود یتش بر فرقه و نصاری یتش ایکی فرقه و مسلمان یتش اوج فرقه اولدی (کل حزب بما لیدهم فرحون) اول فرق ضاله دن هر فرقه صدندن اولدقلری دین باطلی حق ظنیله آلدانوب اکا سونورلر (واذا مس الناس ضرر دعوا ربهم منین الیه) چن ناسه شدت ایرسه مرض و قحط کبی الله تعالی به اقبال ایدر اولدقلری حالده انک دفعیچون دعایه مشغول اولورلر (ثم اذا اذاقهم منه رحمة اذا فریق منهم برهم بشر کون) بعده الله تعالی انلری اول شدندن خلاص ایدوب مطر و صحتدن انلره نعمتک اذاقه ایتسه انلردن بر فریق کوررسنکه رب تعالی به اشراک ایدرلر (لیکفروا بما آتیناهم فتمتعوا فسوف تعلمون) تاکه بزم انلره ویردیکمز نم سبیلله کافر اولرلر * ایمدی دنیاده برقاج کون تمتع ایدک اول تمتعکزک آخرتده جزاسنی بیلورسز (ام انزلنا علیهم سلطانا فهو یتکلم بما کانوا به بشر کون) بز انلره سمادن برهان و یا کتبی انزال ایتدک که اول انلره سوبلیه انی که نه سبیلله الله تعالی به اشراک ایتدیلر دی (فاذا اذقنا الناس رحمة فرحوا بها) چان بز کفار صحت و وسعت ویرسه وزانک سبیلله بطر ایدرلر (وان تصبهم سیئة بما قدمت ایدهم اذا هم یقنطون)

(واکر)

واکر انلره تقدیم ایتدکلری اعمال خبیثه سبیلله ضیق و شدت ایرسه الله تعالینک رحمتدن مأیوس اولورلر (أولم یروا ان الله یبسط الرزق لمن یشاء ویقدر) انلر کورمرلر میکه الله تعالی رزقنی دیلدیکی کیمسه به توسیع و تضییق ایدر اولیه اولسه نیچون انک رحمتدن یأس ایدرلر صدندن اولدقلری معاصیدن تابین اولوب اکا تضرع ورجا ایتزلر که اول رحمت کیر و انلره ایرکوره (ان فی ذلک لآیات لقوم یؤمنون) الله تعالی رزقی عبادنه بسط و قبضنده آیتلر واردر شول قومه کیم الله تعالینک قولنی تصدیق ایدوب انکله انک کمال قدرت و حکمتنه استدلال ایدرلر (فات ذا القربی حقه و المسکین و ابن السبیل) ایمدی ذوقربانک حقنی ویرکل بر و صله ایتکله و مسکینه و ابن السبیلله زکاتدن توظیف اولنان شیئی ویرکل (ذلک خیر للذین یریدون وجه الله) ایمدی اشبو معروفات فعلی خیرلیدر شول کیمسه لره کیم انکله الله تعالی به تقرب جهتن قصد ایدرلر (واولئک هم المفلحون) و آخرتده انلر دخول جنتله مقصودلرینه فائزلدر امام ابوحنیفه اشبو آیتی احتیاجله کشینک اوزره ذی رحم محرملری نفقه سین ایجاب ایدر چنانکه احتیاج اولرلر (وما آتیتم من ربا لیربو فی اموال الناس فلا یربوا عند الله) اول شیککه معاملهده زیاده محرمه دن و یا مزید مکافات توقع اولنور عطیه دنکه ویررسز تاکه اموال ناسده زیاده اوله * ایمدی اول الله تعالی عنندن نه زیاده و نه انده برکت اولور (وما آتیتم من زکاة تریدون وجه الله فاولئک هم المضعفون) و اول شیککه زکاتدن انی و یروب انکله الله تعالینک جهت تقربن قصد ایدرلر یوخسه انکله مکافات و یاریا و یا سمعه قصدین ایتزسز * ایمدی اول و صفلو کیمسه لرک حسناتلری مضاعف قیلنور (الله الذی خلقکم ثم رزقکم ثم یمیتکم ثم یحییکم هل من شرکائکم من یفعل من ذلکم من شیء) الله تعالی سزنی خلق ایتدی سز ایسه هیچ بر شیء دکل ایدیکز بعده دنیاده اولدقچه رزقکزی ویردی بعده آجالکز انقضاسنده سزنی اولدرر بعده حساب و جزا نیچون یوم قیامتده سزنی دیرکورر الله تعالی به شرکاء اتخاذا ایتدیککزک هیچ بری افعال مذکورده دن بر شیء ایشلمکه قادر اولورمی (سبحانه و تعالی عما یشرکون) اول الله تعالی انلرک اشراکندن منزّه و عالی اولدی (ظهر الفساد فی البرّ و البحر بما کسبت

ایدی الناس) ناسک کسب ایتدکاری معاصی شومیله برك بوادی
ومفاوزنده و بجرک سواحلهنده کی قراده فساد ظاهر اولدی جذب
ونقص معاش و تجارتده قلت ربح وزراعاتده قلت ربح وناس ودوابده
وقوع موتان و کثرت مضار و قلت منافع و محو برکات کبی * دینلیدیکه یعنی
شورور و قتل ظاهر اولدی دینلیدیکه بحمله مراد حقیقه بجرور یغمورک
قلتی برده تأثیر ایتدیکی کبی بجرده دخی تأثیر ایدر زیرا که اصداف یغمور
یاغدیغنده صویک یوزینه چیقوب آغزلرین آچرلر اول صدفکه یغمور دن
اغزینه دوشه اول انجو اولور * دینلیدیکه آدم علیه السلام زمانده ارضک
جبعی مخضره و موقوفه ایدی هر قنغی شجره یه وارلسه انده میوه بولنوب
اکل اولورودی و بجرک صویکی طئلو ایدی و سباع حیواناتی انجتمزدی
تاشول و قته دکن که قابیل هابیلی اولردی من بعد آخا جلد دیکنلندی
و بجرک صویکی آجیلندی و حیواناتک بعضی بعضه ضرر ایدر اولدی
(لیدیقهم بعض الذی عملوا لعلهم يرجعون) تا که ایشلدکاری خباثتک
بعض عقوباتن انلره دنیاده اذاقه ایدوز تمامی ایهه آخرتده اولور تا که
صددنده اولدقلری معاصیدن رجوع ایدر (قل سیروا فی الارض فانظروا
کیف کان عاقبة الذین من قبل کان اکثرهم مشرکین) یا محمد مکهم مشرکیرینه
دیگل که یوزنده سیر و سفر ایدوب نظر ایدک که سزدن اول چکن ام
عاتیه نک عاقبتلری نه حاله ایردی کنیدلر هلاک اولوب مسکنلری خرابه
ایردی انلر اکثری سزک کبی مشرکین ایدیلر (فاقم وجهک للدين القيم)
ایمدی شول استقامتده بلیغ دینه که اول دین اسلامدر وجهکی تعدیل ایت
(من قبل ان یأتی یوم لامرله من الله) شول کون کلزدن اولکه اول
یوم قیامتدر انی هیچ کیمسه الله تعالیدن رده قادر اولمز و یا اول کونی الله تعالی
رد ایتمز کلکسنه اراده قدیمه سی اولدیغیچون (یومئذ یصدعون) اول
کون اولدیغنده ناس متفرقین اولورلر بر فرقه سی جنته و بر فرقه سی ناره
کیدر (من کفر فعليه کفره) بر کیمسه که کافر اوله کفر نک و بالی کندی
اوزره درکه اول نار مؤیده در (ومن عمل صالحا فلانفسهم یهدون) و اولکه
عمل صالح ایدر اول و صفلو کسه لر جنتده کنیدیلر ایچون منزل تسویه ایدرلر
(لیجزی الذین آمنوا و عملوا الصالحات من فضله) تا که الله تعالی ایمان

(واعمال)

واعمال صالحه یلینی جمع ایدنلره ثوابدن مستحق اولدقلری شیئی ایفاد نصکره
فضلندن انک اوزره زیاده ثواب دخی ویره (انه لا یحب الکافرین)
اول الله تعالی کافرلری سومز (ومن آیاته ان یرسل الریاح) اول الله
تعالینک قدرت و وحدانیتی دلائلندندر که رباح رحقی ارسال ایدر که
اول صبا و جنوب و شمال ریحلیدر اما که دبور ربح عذابدر (مبشرات)
تا که خلقتنه مطر نافعله تبشیر ایدر (ولیدیقکم من رحته) واکا تابع
رحمتندن سزه اذاقه ایدر که اول حصول خصبدر (ولتجری الفلک
بأمره) و ارسال رباحله امریه دریاده کبیر یورویه (ولتبتغوا من فضله)
و تجارت بجرله انک فضلندن طلب ایدر سز (ولعلکم تشکرون) و اول
ریاحدن حاصل اولان اشبو نعمتلر اوزره اکا شکر ایدر سز (ولقد اسلمنا
من قبلک رسلا الی قومهم فجاؤهم بالبینات فاتقمنا من الذین اجرموا)
یا محمد بزسندن اول رسوللر یمزی قوملرینه ارسال ایتدک اول رسوللر انلره
آیات واضحاتله کلچک انلر اول رسوللری تکذیب ایتدیلر اولیه اولسه
اول آیاتمزی تکذیب ایدنلره عذابله انتقام ایتدک (وکان حقا علینا
نصر المؤمنین) و بزم عهد مزه حق اولدیکه مؤمنلره نصرت ایدوز
(قال النبی صلی الله علیه وسلم مامن مسلم یرد عن عرض اخیه الا کان حقا
علی الله ان یرد عنه نار جهنم یوم القیامة ثم تلا هذه الآیة) پیغمبریمز
صلی الله علیه وسلم ایدر که بر مسلم قرنداشنک عرضندن بر مودینک اذاسنی
دفع ایدر الله تعالی یه فضل و کرمی مقتضاسنجه عهد اولور که
یوم قیامتده اندن نار جهنمی دفع ایدر اندنصکره (وکان حقا علینا نصر
المؤمنین) قول شریفن تلاوت ایتدی (الله الذی یرسل الریاح فتثیر
سحابا فیدسطه فی السماء کیف یشاء و یجعل کسفا فترى الودق یمخرج من
خلاله) الله تعالی ریاحی ارسال ایدوب انکله غیم رفع ایدر و کاهی انی
سماده متصل دیلدیکی کیفیتده بسط ایدر سائر و یا واقف مطبق و غیر
مطبق و دخی بونک غیر حالات اوزره اولدیغی حالده و کاهی انی سماده
قطع متفرقه قیلور کرک بسطی حالده و کرک تقریق حالده کوررسنکه
انک اراسندن یغمور چیقار (فاذا اصاب به من یشاء من عباده
اذا هم یستبشرون) چنانکه الله تعالی اول مطری عبادندن دیلدیکی
کسه لک اراضی و بلادلرینه ابر کوره کوررسنکه خصب بجیئنه

سوی نشورلر (وان كانوا من قبل ان ينزل عليهم من قبله لمبسين) اگرچه
انلره مطر نزولندن اوکدین مطرله تطاول عهد واستحکام یأسلمندن
آیسین اولمشلردی (فانظر الى آثار رحمة الله كيف يحيي الارض بعد
موتها ان ذلك لحى الموتى) الله تعالینک رحمتدن اولان مطره نظر ایتکه
ارضی یبسنندنصکره انکله نیچه احیا ایدر نبات واشجار وانواع اثمار
بتورر اکا قادر اولان رب تعالی قادر اولورکه انلری موتلندنصکره
یوم قیامتده دیرکوره (وهو على كل شيء قدير) اول الله تعالی هر شیئه
قادر دُر زیرا انک قدرتک جمیع کاشانه نسبتی علی السویه در (ولئن
ارسلنا ريحا فرأوه مصفرا لظلموا من بعده يكفرون) اگر بزریح ارسال
ایدوب زرعلرین افساد ایتسه حتی اول یشل ایکن انی صارر مش
کور سدر انک صارر مسندنصکره الله تعالی به نعمته کافر اولورلر *
اشبو آیات کریمه کفارک قلت ثبوت وعدم تدبر وسرعت تزلزل
وسوء رأی لرینی بیان ایدر والحال نظر سوی اقتضا ایدرکه انلردن مطر
محتبس اولدیغنده الله تعالی به توکل واکا التجا ایدرلر رحمتدن مأیوس
اولیدر وانلره مطر رحتی ایردیکنده شکره مبادرت وطاعته استدمات
ایدرلر استبشارده افراط ایتیدرلر وزرعلری صارر مغله هلاک اولدیغنده
بلايه صبر ایدرلر نعمته کفران اولیدرلر (فانك لاتسمع الموت) یا محمد
سن دعوتکی ایشدیره من سن شول کفاره کیم انلر موتی کیدر
(ولاتسمع الصم الدعاء اذا اولوا مدبرين) ودخی اصم لره ده ایشدیره من سنکه
انلر دعوتکی سماعتدن تصامم ایدرلر چنانکه مکذبین اولدقلری
حالده حقندن اعراض ایدرلر (وما انت بهادی العمی عن ضلالتهم)
وسن شول آیتلریمزدن بصیرتلی اعمالری ضلالتلرندن ایمان وطاعته
هدایت ایدر دکلسن بلکه الله تعالی عبادندن دیلدیکی کسه لری اکا توفیق
ایدر سکا واجب اولان انجق دعوت وابلادر (ان تسمع الامن يؤمن
بآياتنا فهم مسلمون) سن اسماع ایتز سن الا انلره کیم بزم آیتلریمزه
ایمان کتوروب ایمانلرنده مخلصلردر زیرا که ایمانلری آیتلریمزک الفاظی
تلقیسنه ومعانیسی تدبر نه داعیدر (الله الذی خلقکم من ضعف ثم جعل
من بعد ضعف قوّة ثم جعل من بعد قوّة ضعفا وشيبة) اول الله تعالی سزى
ابتداده ضعفا خلق ایتدی ضعفی اساس امرکز قیلدی (خلق الانسان

(ضعيفا)

ضعيفا) قول شریفی دلاتیله ویاخود سزى اصل ضعفدن خلق
ایتدیکه اول نطفه در ویا اول ضعفله مراد حال طفولیتدن حال احتلامه
دکدر واول طفولیت ضعفکز دزنصکره کهولتکزه دکین سزى قوّة شباب
قیلدی واول شباب قوتندنصکره سزى ضعه شیوخت وهرم قیلدی
(يخلق ما يشاء) وذات وصوردن ویاخود ضعف وقوّة وشباب
وشبهه دن اول دیلدیکن خلق ایدر (وهو العليم القدير) اول سزى اشبو
احوال مختلفه ده تردیدی غیره امکانه بيله علم وقدرته صانع کامل
ایدیکنه دیلدر (ويوم تقوم الساعة يقسم المجرمون ما لبثوا غير ساعة)
قیامت قائم اولدیغی کونده مشرکون یمین ایدرکه دنیاده ویا قبورده
ویا دنیانک فناسیله بعث وانقطاع عذابلری بیننده بر ساعتدن غیرى
لبث ایتدیلر اول مدت لبثلرین آخرته کی مدت عذابلرینه اضافله
ویاخود نسیانله استقلال ایدرلر حدیثده کلدیکه (ما بين فناء الدنيا والبعث
اربعون) دنیانک فناسیله بعثک ما بین قرق دکودر * ایدى اول قرق
ساعات وایام واعوامک هر برینی محتملدر (کذلك كانوا يؤفکون)
صدقندن اشبو صرف کبی انلر دنیاده حقندن صرف اولنورلردی وانلر انده
کذب ایدرلر بعث یوقدر دیو دنیاده کذب ایتدکلری کبی ویاخود
الله تعالی انلری افضاح اراده ایدوب اهل جمعه متبین اولان شیئی
کذبله یمین ایدرلر (وقال الذين اتوا العلم والایمان لقد لبثتم فی کتاب الله
الى يوم البعث فهذا يوم البعث ولكنکم کنتم لا تعلمون) ملائکه
وانسندن علم وایمان ویریلنلر انلری تکذیب ایدوب دیه لره که الله تعالینک
قضاء ویا علم ویا لوح ویا قرآننده ذکر ایتدیکی اوزره یوم بعثه دکین
لبث ایتدیکز اشبو وقت ایسه یوم بعثدرکه سزى انی انکار ایدر دیکز
لکن سزى نظرده تقریطکز سبیلله انک حق ایدوکن بیلزدیکز (فیومئذ
لا ينفع الذين ظلموا معذرتهم ولاهم يستعجبون) اوله اولسه اول کونده
شرك وعصیانله نفسلرینه ظلم ایدلره اعتذارلری نفع ایتز وانلردن
توبه وطاعته رب تعالی بی ارضالری طلب اولنمز (ولقد ضربنا للناس
فی هذا القرآن من کل مثل) اشبو قرآنده بزناسه هر صفت وقصه عجیبه دن
وصف وبیان ایتدک یوم قیامتده مبعوثینک صفت وقصه لرین وانلر نه
دیرلر وانلره نه دینور ومعذرت واستعتاب منتفی اولور ویاخود بز انلره بیان

ایتدک هر مثلدنکه انلری توحید و بعث و صدق رسوله ارشاد ایدر
 (ولئن جئتہم بآیة لیقولن الذین کفروا ان انتم الامبطلون) اگر سن انلره
 آیات قرآندن برآیتله کلسک انلردن کافر اولنلر فرط عناد و قساوت
 قلوبلرندن رسول الله صلی الله علیه وسلم و مؤمنلره دیلرکه سزدکل
 الاکاذبلر سز (کذلک یطبع الله علی قلوب الذین لایعلمون) اشبو طبع
 کبی الله تعالی طبع ایدر شول کسهلرک قلوبنه کیم توحیدی بیلزلر
 و رسوللری تصدیق ایتلر بلکه اعتقاد ایتدکاری خرافات اوزره اصرار
 ایدرلر زیرا که جهل مرکب حق ادرا کدن منع ایدر و محقق تکذیبین ایجاب
 ایدر (فاصبر ان وعد الله حق) انلرک اذالریته صبرایت که الله تعالی نیک
 نصرتله و دینیکی جیع ادیان اوزره اظهارله و عدی حقدلر لایب آتی انجاز
 واکا وفا ایدر (ولایستخفک الذین لایوقنون) یا محمد سنی خفت و قلقله
 تحمیل ایتسون انلرک تکذیب و ایدالریکه انلر بعث و حسابی ایقان
 ایتلرلر و یاخود حلاوت کلام و اظهار تملقلریله عقلکی سلب ایدوب سنی
 مخدوع ایتسونلر شول وجهله کیم قنکده مؤمنلره تعظیم اظهار ایدلر
 زیرا که ضالین وهم مضلیندرلر انلردن حذر ایت که انلر مکر وقتنه
 اصحابیدرلر

سورة لقمان وهی اربع و ثلاثون آية مكية

بسم الله الرحمن الرحيم

(الم تلك آيات الكتاب الحكيم) اشبو قرآن آیتلریدر حلال و حرام
 و احکامله محکمدر (هدی و رجة للمحسنين) هدی و رجعت اولدیغی
 حالده شول کسهلر ایچونکه نیت خالصه ایللر عمللرین حسن ایدرلر
 (الذین یقیمون الصلوة) شونلرکه نمازی اتمام ارکانله و قننده قبلورلر
 (ویؤتون الزکاة) و زکاتی ویرلر (وهم بالآخرة هم یوقنون)
 و انلر بعث و جزانک وقوعنه ایقان ایدرلر (اولئک علی هدی من ربهم)
 انلر ربلی جل شانهدن توفیق اوزره درلر (واولئک هم المفلحون) و انلر
 اعلاى مقاصدلرینه فائزلدر عقیده حق ایللر عمل صالحی جمع
 ایتدکاریچون (ومن الناس من یشتري لهو الحدیث) بعض ناس لهو حدیث
 اشترا ایدر اول هر شئدر که کشتی بی مایعیندن اشغال ایده شول احادیث
 کبی که اصلی اولیه و اساطیرکه انده اعتبار بولنیه و مضاحک و فضول

(کلام)

کلام کبی * دینلدیکه اشبو آیت نضر بن الحارث شائنده نازل اولوبدر که
 اول اعاجم اخبارنی اشترا ایدوب قریشه انی تحدیث ایدردی محمد سزه
 عاد و ثمود حدیث تحدیث ایدر سزه بن سزه اسفندیار ورسم حدیث
 تحدیث ایدرین انلر انک اول حدیث استملاح ایدوب قرآن استماعنی
 ترک ایدرلر دی (قال النبی علیه السلام لایحل تعلیم المغنیات ولا بیعهن
 واثمانهن حرام) پیغمبریمز صلی الله علیه وسلم ایدر حلال اولمز که
 جاریه لره غنا تعلیم ایدیللر و یا مغنیه بیع اولنه ثمنلری حرامدر * دینلدیکه
 آیتک معناسی غناء و مز امیر و معازفی قرآن اوزره اختیاردر * ابن مسعود
 رضی الله عنه اشبو آیتدن سؤال اولند قده یمین ایدوب دیدیکه اول غنادر
 * دینلدیکه غناء قلبده تفیق بتورر و اول رقیه زنادر و یا اول هرلهو
 ولعبدلر (لیضل عن سبیل الله بغير علم) تاکه ناسی انکله دین اسلامه
 دخولدن و یا قراءت قرآندن صد ایده اول اشترا ایتدیکی شئک حالی
 و یا تجارتنی بیلکسزین شول حیثیتدنکه لهوی قرآنه استبدال ایتدی
 (ویخذها هزوا) و تاکه آیات الهی سخره اتخاذا ایده (اولئک لهم
 عذاب مهین) ایددی اول و صفلو کسه لره عذاب مهین اولور حق اوزره
 باطلی استیثارله حقه اهانتلریچون (واذا تلی علیه آیاتنا ولی مستکبرا
 کأن لم یسمعها کأن فی اذنیه و قرا فبشره بعذاب الیم) چانکه اکا آیتلریمز
 تلاوت اولنسه تکبر ایدوب آیتلریمزه و محمد ایماندن اعراض ایدر اول
 امرده انک حالی شول کسهلرک حالنه بکزر که ایشیدر کن ایشترلنه
 کأنه قولاغنده صمم واردر * ایددی اکا عذاب مؤملله تبشیر ایت
 (ان الذین آمنوا و عملوا الصالحات لهم جنات النعیم) شونلر که ایمان
 و اعمال صالحه بیننی جمع ایتدیلر آخرته انلره جنات نعیم مأوی اولور
 (خالدين فیها) انده دائمین اولدقلری حالده (وعد الله حقاً) اشبو وعد
 الله تعالی نیک وعد حقیدر (وهو العزيز الحكيم) اول برعیزدر که
 وعد و وعیدنی انجازدن انی برشی عاجز ایتز حکیمدر ایشتر الا انیکه
 حکمتی انی استدما ایدر (خلق السموات بغير عمد ترونها) الله تعالی
 سمواتی کوردیککزه هیئتده سوارینسز خلق ایتدی نه دروننده دعاه سی
 وارکه انی رفع ایده و نه فوقنده علاقه سی وارکه انی امساک ایده بلکه
 اول ایکسندن دخی خالی اولوب الله تعالی قدرتیله انی امساک ایتدی

(والقی فی الارض رواسی ان تمید بکم) وارض اوزره جبال مرتفعه
 وضع ایتدی تاکه اول ارض سزکله میل واضطراب ایتیه (وبث فیها
 من کل دابة) واند هر دابه دن بث ایتدی (وانزلنا من السماء ماء
 فأنبتنا فیها من کل زوج کریم) وسمادن یغفور ایندیروب ارضده نبات
 کثیر المنفعه نک هر صنفندن بتوردک (هذا خلق الله فأرونی ماذا
 خلق الذین من دونه) اشبو ذکر اولسان اشیاء الله تعالینک مخلوقیدر
 یا مشرکین بکا کوسترک که آلهه کز نه خلق ایتدی حتی که الله تعالی به
 مشارکته مستحق اولدیلر (بل الظالمون فی ضلال مبین) بلکه مشرککار
 ضلال ظاهرده درکه هیچ برناظره اول خفی اولز (ولقد آتینا لقمان
 الحکمة) بزلقمانه عقل وعلم وعمل وامورده اصابت ویردک * دینلدیکه
 اول لقمان بن باعور بن باخور بن تارخدر که اول ایوب علیه السلام
 اخت ویاخاله سی اوغلی آزر اولادندندر لقمان علیه السلام معمر اولوب
 حتی داود علیه السلامه ایرشدی واندن اخذ علم ایتدی وبعث اولمز دن اول
 فتوی ویرردی * جمهور دیدیلر که اول حکیم ایدی نبی دکل ایدی
 عرف علماده حکمت نفس انسانییه بی استکمالدر وعلوم نظریه بی اقتباس
 ونفسک قدر طاقتنجه افعال فاضله اوزره ملکه تامه اکثسابیدر ولقمان
 علیه السلام حکمتندندر که اول داود علیه السلامه بر نیچه آی
 صاحب اولدی داود علیه السلام درع دوزردی لقمان اکا اول نه شی
 ایدیکن سؤال ایتدی اتمام ایدیکک آرقه سنه کیوب دیدیکه نه کوچکک
 حرب لباسی اولورسن اول حینده لقمان دیدیکه صمت حکمتدر انک فاعلی
 قلیلدر برکون داود علیه السلام اکا یالقمان نیچه صبا حلدک دیدی اول
 ایتدیکه بنم غیرک یدنده * داود علیه السلام تفکر ایدوب اندن صعقه
 ایتدی بروقتده لقمان علیه السلامه امر اولندیکه برقیون بوغزلیوب اندن
 ایکی اطیب مضغه کتوره نم دیوب انک لسان وقلبن کتوردی بعده وقت
 آخرده امر اولندیکه ینه برقیون بوغزلیوب اندن ایکی اخبث مضغه بی
 کتوره نم دیوب ینه لسان وقلبن کتوردی انک حکمتندن سؤال
 اولندقدده دیدیکه اشبو ایکی مضغه اطیب شیدر قچانکه طیب اوله واخبث
 شیدر قچانکه خبیث اوله دینلدیکه لقمان علیه السلام نبوته حکمت
 بیننده تخیر اولنوب اول حکمتی اختیار ایتدی * روایت اولندیکه

(اول)

اول بر نصف نهارده ناثم ایکن اکا بر ندا کلدیکه یالقمان استرمیدک که
 الله تعالی سنی ارضده خلیفه ایدوب ناس بیننده حق اوزره حکم ایده سن
 اول ندایه جوابده دیدیکه اکا ریم بنی تخیر ایدرسه عافیتی قبول ایدوب
 بلای قبول ایتزین واکر اکا امر ایدرسه سمع واطاعت ایدرین زیر ایلورمکه
 اوزریمه الزام اولنیجق اعانت و عصمت اولنورین والحال حاکم منازلک
 اشد واکدرنده اولوب انی ظلت قایلوبدر اعانت اولنورسه حریدرکه
 اندن نجات بوله اکا حکمنده خطا ایدرسه جنت یولن یتورر وکشینک
 دنیاده ذلیل اولمی شریف اولسندن خیرلیدر اول کسه که دنیایی
 آخرت اوزره اختیار ایده دنیایی فوت ایدر وآخرته ایرمز ملائکه
 انک حسن منطقته تعجب ایتدیلر بوندنصکره بر نومه سنده حکمت
 ویرلدی او یانیجق حکمتدن سویلر اولدی بعده داود علیه السلامه
 ندا اولنوب خلافت عرض اولندقدده قبول ایتدی یوخسه لقمان کی
 شروط ذکر ایتدی اول اجلدن مره بعد اخری خطیه به دوشوب
 الله تعالی کلینسن عفو ایتدی ولقمانی وزیر ایدندی (ان اشکر الله)
 بز اکا دیدک که الله تعالی به شکر ایت انک اوزره که سکا حکمت ویردی
 (ومن یشکر قائما یشکر لنفسه) اول کسه که شکر ایده نفسیچون شکر ایدر
 زیرا که نفعی اکا عاودرکه نعمتی انکله دائم اولور واول نعمتک مزیدینه
 مستحق اولور (ومن کفر فان الله غنی جید) واولکه الله تعالینک
 نعمتینه کافر اوله اول جل شأنه خلقت شکر ندن غنیدر وجد اکا
 حقیقدر اگرچه جد اولنمزسده ویا اول محموددر جیج مخلوقاتی لسان
 حاله اکا جدی نطق ایدر (واذقان لقمان لابنه وهو یعظه) ذکر ایت
 شول وقتی که لقمان اوغلی انعمه ویا اشکر ویا مائانه وعظ ایدر اولدیغی
 حالده دیدیکه (یا بنی لا تشرک بالله ان الشرک لظلم عظیم) ای او غلجغم
 الله تعالی به اشراک ایتکل که اول ظلم عظیمدر شول حیثیتد که
 جیج اشیانک خالقیه هر شیئدن عاجز بیننی تسویهدر * دینلدیکه
 لقمان علیه السلام اول اوغلی وانا سی مشرکار ایدیلر لقمان علیه
 السلام وعظ ایدرک ایکیسنی دخی اسلامه کتوردی (ووصینا الانسان
 بوالدیه) بز انسانه وصیت ایتدک که والدینه بر واحسان ایده (جلته
 امه وهنای علی وهن) اکا والده می حامل اولدی حالبوکه حل

و ثقلي از ديدايه ضعف اوزره ضعفي زياده اولدى (وفصاله في عامين)
 انك مدت فطامى ايكي پيل تمامنده در * اشبو دليلدر كه مدت رضاعن
 اقصاصى ايكي پيل اوله واند نصكره حرمت ارضاع ثابت اوليه اشبو
 شافعى مذهبيدر (ان اشكرلى ولو الديك) انسانه و صيقر اولدر كه
 بكا ووالدينكه شكر ايده سن (الى المصير) مرجعك بكادر شكر وكفر
 اوزره سنى محاسبه ايدر ين دينلديكه بر كسه كيم صلوات خيس ادا سنه
 مداومت ايده الله تعالى به شكر ايدر واولكه صلوات خيس ادا بارنده
 والدينه دعا ايده انلره شكر ايدر (وان جاهدك على ان تشرك بى
 ما ليس لك به علم فلا تطعهما) و اكر والدينك جهد ايدر لرسه كه سن بكا
 اشراك ايده سن انى كه اول هيچ بر شئ دكلدر اول امرده انلره اطاعت
 ايتكل (وصاحبهما في الدنيا معروفا) وانلره دنيا ده صحاب معروفله
 صحبت ايت كه انى شرع ارتضاء وكرم اقتضاء ايدر بر واصله وحسن عشرت كي
 (واتبع سبيل من انا ب الى) ودينده توحيد و اخلاصه بنم طاعتم طريقه
 اقبال ايده نه اتباع ايت كه اول پيغمبر يمز صلى الله عليه وسلم واصحابيدر
 (ثم الى مرجعكم فاننكم بما كنتم تعملون) سنك ووالدينك مرجعى
 بكا در سكا ايمانك وانلره كفرلى اوزره جزاء ايدر ين * اشبو ايكي آيت
 سعد بن ابى وقاص رضى الله عنه و اناسى شانده نازل اولوبدر وقصه سى
 سورة عنكبوتده يكو بدر لقمان عليه السلامه اوغلى ديديكه اكر بن
 خطيئه يي هيچ كسه نك كور مديكى مكانده ايشلم الله تعالى انى
 بيلورمى لقمان ديديكه (يا بنى انها ان تك مثقال حبة من خردل فتكن
 في صخرة او في السموات او في الارض يأت بها الله ان الله لطيف خبير)
 اى او غلجغم اكر ايشلديك خطيئه وكرك حسنه خردل دانه سى قدر وزنى
 اولديغندن ماعدا بر موضع اخفى واحرزده اولسه جوف صخره ده كه
 اول صوده اوله وياتحت ارضه كي صخره ده كيم انده اعمال كفار يازيلودر
 ويا عالم علويده ويا عالم سفليده اولسه يوم قيامته الله تعالى انى كتوروب
 حاملنه جزاسين ايدر زيرا انك علمى هر خفى به ايرر كنهنى ومكاننى بيلور
 واندن بر شئ فوت اولز بعض كتبه ايدر اشبو كلمه يي لقمان تكلم ايديجك
 هيبتندن مراره سى منشق اولوب تسليم روح ايلدى (يا بنى اقم الصلاة)
 اى او غلجغم نمازى اتمام اركانه ادا ايت كه نفسى تكميل ايده سن

(وأمر)

(وأمر بالمعروف وانه عن المنكر) وناسه خيرله امر ايت وانلرى شردن
 نهى ايت كه غيرى تكميل ايده سن (واصبر على ما اصابك) وسكا ايريشن
 شدائده سيما امر ونهيك صددنده ايكن صبر ايت (ان ذلك من عزم
 الامور) اشبو اوامر مذكوره الله تعالىنك ايجاب والزام ايتديكى عزائمندر
 (ولا تصعر خدك للناس) ناسه تكبر ايدوب سكا سويلدكلرنده يوزيكى
 انلردن دوندرمكل ويا خود فقرايى تحقير ايتكل بلكه فقير و غنى ايله
 معاشرتكى على السوية تحسين ايلكل (ولا تمش في الارض مرحا) وير يوزنده
 فخرله ويا بطر اجلچيون يوريمكل (ان الله لا يحب كل مختال فخور)
 زيرا كه الله تعالى هر اختيال وفخر ايدنلرى سومز (واقصد في مشيك)
 يوريمكله وسط اختيار ايدوب نه اختيال ونه اسراع ايلكل بلكه سكينه
 ووقار اوزره يورى كل (واغضض من صوتك) محل خطابده صوتكى
 خفض ايدوب جهر ايتكل مكر كه ارهاب عدو ايجون اوله (ان انكر
 الاصوات لصوت الحمير) زيرا كه اصواتك او حش واقبحى چار صوتيدر كه
 اولى زفير و آخرى شهيقدر والحال بونك ايكي سى دخى اهل نار صوتيدر
 * دينلديكه هر شيك صياحى تسبيحدر الا جارك دكل * وهب ايدر لقمان
 عليه السلام حكمتدن اون ايكي باب سويلديكه ناس انى كلام وقضايالرينه
 ادخال ايتديلر (ألم تروا ان الله سخر لكم ما في السموات وما في الارض)
 كورمز ميسن كه الله تعالى سزه سمواتده اولان شمس وقر ونجوم وسحاب
 وغير اشيايى تسخير ايتدى منافعكز تحصيلنه اسباب قيلغله وارضده اولان
 بحار وانهار ومعادن ودواب وسائر اشيايى دخى تسخير ايتدى واسطه
 ايله ويا واسطه سز انتفاعه تمكينله (واسبع عليكم نعمه ظاهرة وباطنة)
 وسزه نعم محسوسه سنى ومعقوله سنى بيلدكلر يكرى وبيلدكلر يكرى
 افضال واسباب ايتدى ونعمت هر شيكدر كه انكله احسان ونفع
 قصد اولنه وعالمك كليسى نعمتدر غيره نفع ايجون يوخسه الله تعالى
 منافعه احتياجن غنيدر ونعم ظاهره حسن صورت وامتداد قامت
 وتسوية اعضادر ويا خود بصر وسمع ولسان وسائر جوارح ظاهره در
 ونعم باطنه معرفتدر وهر شيكدر كه دليل ايله بيلنه ويا اصلا بيلنوب
 انكله انتفاع اولنه انسانك بدنده نيچه اشيا واردر كه اول بيلنر

لث (٢١)

و بیلیمکه دخی چاره اولمز سر و قلب و عقل و روح کبی * دینلیدیکه نعم ظاهره
دنسادن اعراضدر و نعم باطنه الله تعالی به توکل و وثوقدر (ومن الناس
من يجادل في الله بغير علم ولا هدى ولا كتاب منير) ناسک بعضی الله تعالی
توحید و صفاتنده دلیلدن مستفاد علمسز و رسوله راجع هداسز و الله
تعالینک انزال ایتدیکی کتاب منیرسز تقلیدله جدال ایدر (واذا قيل لهم
اتبعوا ما انزل الله قالوا بل نتبع ما وجدنا عليه آباءنا) چنان مکه کافرلرینه
الله تعالی انزال ایتدیکی قرآنه اتباع ایدک دینلسه دیرلرکه آباءمزی صدندنه
بولدیغمز دینه اتباع ایدرز الله تعالی انلره دیرکه (اولو کان الشیطان یدعوهم
الی عذاب السعیر) آباءلرینه اتباع ایدرلرمی اگرچه شیطان انلری تقلید
و یا اشراکت مآلی جهنم عذابنه دعوت ایدر سده (ومن یسلم وجهه الی الله
وهو محسن فقد استمسک بالعروة الوثقی) برکسه که ذاتنی الله تعالی ایچون
خالص ایده امرنی اکا تقویض و جمیع شرشرین اکا اقباله حالبوکه علمنده
محسندر شول انقطاعی مأمون جبل متیندن اوئق عروه بی اعتصام ایدرکه
اول (لا اله الا الله) قول شریفیدر (والی الله عاقبة الامور) جمیع امورک
عاقبتی الله تعالی به رجوع ایدر (ومن کفر فلا یحزنک کفره) اول کسه که
کافراوله کفری سنی محزون ایتسون که اول سکا نه دنیاده ونه آخرنده ضرر
ایدر (الینامرجههم فننبتهم بما عملوا) یوم قیامتده رجوعلری بزه در
دنیاده ایشلد کاری کفر و معاصی بی بز انلره خبر ویرر و جزالین ایدرز
(ان الله علیم بذات الصدور) اول الله تعالی عبادنک صدورنده اولان
اشیایی بیلور انک حسبجه جزالین قیلور (نمتهم قلیلا ثم نضطرهم
الی عذاب غلیظ) بز انلری دنیاده زمان قلیل تمیعمز دنصکره عذاب
شدیده الجاء ایدرز که اندن انفکا که قادر اولمز (ولئن سألتم
من خلق السموات والارض لیقولن الله) اگر سن اهل مکه به سؤال
ایتسک که سموات و ارضی کیم خلق ایتدی دیه لرکه الله تعالی
زیرا که دلیلک وضوحیچون خلقی غیره اسناددن امتناع ایدر
(قل الحمد لله بل اکثرهم لا یعلمون) الله تعالی به جد ایت که انلری
معتقدلرینک بطلاننی ایجاب ایدر شیء اعترافنه الزام و الجاء ایتدی بلکه
انلرک اکثری ملزم اولدقلرین بیلمز (لله مافی السموات والارض)

(سموات)

سموات و ارضده اولان اشیانک جمعی الله تعالی خلق و ملکیدر اول
ایکسینده اندن غیری عبادته مستحق یوقدر (ان الله هو الغنی الحمید)
الله تعالی حامدینک جدندن غنیدر و حده اول مستحقدر (ولو ان
مافی الارض من شجرة اقلام) اگر بر یوزنده کی اشجار اقلام ایدلسه
(و البحر یمده من بعده سبعة ابحر مانقدت کلمات الله) حالبوکه بحر
محیط سمعیله یدی بحرله ممدود مداد اولسه اول اقلام و بو مداده
الله تعالی کلامی یازلسه اقلام و مداد و کتوب کلام الله دوکتبه
ایدی (ان الله عزیز حکیم) الله تعالی عزیزدر انی هیچ برشی عاجز
ایتز حکیدر علم و حکمتندن هیچ بر امر خارج اولمز * روایت اولندیکه
پیغمبر صلی الله علیه و سلم مدینه به هجرت ایدیک احبار یهود اکا
کلوب دیدلر که بزه خبر ایدیکه سن دیرمشنکه (وما اوتیتهم من العلم
الا قلیلا) سز علمدن از ویرلدیکز اول قوله بزیمی یوخسه قومکی
اراده ایتدک دیدیکه کلیمکی سزی و کک انلری اراده ایتدم دیدلر که
سکا نازل اولانده بیلدیکه بزه توراتده هر شیئک علمی ویرلوبدر دیدیکه
توراتده کی علوم علم الله اضافله قلیلدر بلکه سزه شول دکلو علم
ویرلوبدر که انکله عمل ایتسکز نفعلنوردیکز دیدلر که یا محمد نه درسین
شول قولکه کیم (ومن یؤت الحکمة فقد اوتی خیرا کثیرا) اول
کسه که حکمت ویرله خیر کثیر ویرلوبدر اوله اولسه علم قلیل ایله خیر
کثیر بیتی نیچه توفیق اولنور اکا جوابده (ولو ان مافی الارض) آیتی
نازل اولدی دینلیدیکه مشرکون محمدک کتوردیکی قرآن و غیری قریب
اولور که دوکتوب کسبله اول سبیدن بو آیت نازل اولدی (ما خلقکم
ولا بعثکم الا کنفس واحدة) الله تعالی به سزک کثرتکزله خلق وبعثکز
دکل الانفس واحده نک خلق وبعثی کبیدر انک قدرتنده قلیل و کثیر
مساویدر انی برشان شان آخردن اشغال ایتز بجه اشیانک وجودینه قدرت
ازلیه سیله ارادت واجبه سنک تعلق کفایت ایدر (ان الله سمیع بصیر)
الله تعالی هر مسموعی ایشدر و هر مبصری کورر انی اشیانک بعضنی
ادراکی بعض آخری ادراکدن اشغال ایتز خلق دخی انک کبیدر
(ألم تر ان الله یولج الیل فی النهار و یولج النهار فی الیل) کورمز میسنکه
الله تعالی کیمه بی کوندزه ادخال ایدوب کیمه بی استیدی دکلو زمانی

کوندوزده آرتورر و کوندزی کچیه ادخال ایدوب کوندزی اکسندیکی
 دکلو زمانی کچیده آرتورر (و سخر الشمس والقمر کل یجری الی اجل
 مسمی) شمس و قمری بنی آدمه تذلیل ایتدی ایکیسندن هر بری فلکده
 منتهای معلومه دکن جار اولور شمس سنه اخرینه دکن و یاخود یوم
 قیامتہ دکن (وان الله بما تعملون خبیر) الله تعالی اعمالکونک
 کنهنی بیلور (ذلک بان الله هو الحق) اشبو ذکر اولنان سعت علم
 و شمول قدرت و عجائب صنع شول سبیلہ درکه اول الله تعالی ذاتہ
 ثابت و جمیع جهاتدن و اجبدر و یاخود الهیتی ثابتدر (وان ما يدعون
 من دونه الباطل) والله تعالیدن غیری انلک الهه اتخاذ ایتدکاری
 حد ذاتہ معدوم الهیتی باطلدر (وان الله هو العلیّ الکبیر) والله تعالی
 هر شی اوزره متسلط و مرتقدر (ألم تر ان الفلک تجری فی البحر
 بنعمه الله لیریکم من آیاته) یا محمد بیلزمیسنکه الله تعالینک رحمت
 و احسانیلہ دریاده سفینهلر یورر تاکه سزه وحدانیتک بعض دلائل
 کوستره (ان فی ذلک لآیات لکل صبار شکور) اشونده آیتلر واردر
 هر کسده کیم آفاق و انفسده تفکرله نفسنی اتعاب مشاققه صبر ایده
 و نعمی بیلوب انی و یرن باری تعالی به شکره مداومت ایده زیرا که ایمان
 ایکی صنفدر بر صنفی صبر و بر صنفی شکردر (و اذا غشیهم موج کالظلل
 دعوا الله مخلصین له الدین) چان انلری ظله لر کبی موج قاپلسه الله تعالی به
 دینلرین اخلاص ایدر اولدقلری حالده دعاء و تضرع ایدرلر (فلما نجیهم
 الی البر) وقتاکه اول انلری یره ایرکوره (ففهم مقتصد) انلرک کین
 کوررسنکه طریق قصد اوزره مقیدر که اول توحیددر و یاخود
 انرجار ایلہ منزجر اولدیغندن ظلم و کفرده متوسطدر (وما یجحد بایاتنا
 الا کل ختار کفور) بزم آیتلریمنی انکار ایتز الا اولکه نقض عهدله
 غدر ایدر و اکا اولان احسانی ستر ایدر (یا ایها الناس اتقوا) یا ناس
 ربکز جل شانہ به مخالفتدن صافنک (و اخشوا یوما لا یجزی والد
 عن ولده ولا مولود هو جاز عن والده شیئا) شول کوندن قورقک که
 اول یوم قیامتدر انده والد ولدندن برشی قضا ایتز و ولد دخی والدندن
 برشی قضا ایتز یعنی برینک اوزرنده کی دین و یا عذابی اول بری بوکلمز *
 دینلریکه اشبو حکم کفارہ مخصوصدر یوخسه مؤمنلر بر برلرینه نفع

(ایدیسرلر)

ایدیسرلردر زیرا که (الحقنا بهم ذریتهم) دیو سوره طوره اول بیان
 بیورلدی (ان وعد الله حق) الله تعالینک ثواب و عقابله وعدی حقدر انده
 خلف اولمز (فلا تغرنکم الحیاة الدنیا) سنزی دنیانک زینتی اکا اطمئنان ایدوب
 آخرت عملن ترکله سنزی مغرور ایتسون (ولا یغرنکم بالله الغرور) و شیطان
 غرار سنزی الله تعالی ایلہ مغرور ایتسون معصیتہ تمادی ایدوب الله تعالیدن
 مغفرت تمنی ایتکزله (ان الله عنده علم الساعة) الله تعالینک عندنده درکه
 یوم قیامت نوقته اوله جغن بیلور * روایت اولندیکه حارث بن عمرو
 پیغمبریمز صلی الله علیه و سلمه کلوب دیدیکه بکا خبر و یرکه قیامت نوقت
 اولور و یره اکین اکشن یغور نوقت یغار و خاتونم حاملدر قارنده کی
 ارکک و یادیشیدر و بو کونده ایشلدیکمی بیلورین ایرته نه ایشلرین
 و مولدیمی بیلورم اما نه یرده اولورم اول سبیدن بوآیت نازل اولدی
 (و یزل الغیث) و دینلریکی وقتده یغور یاغیدر (و یعلم ما فی الارحام)
 و ارحامده اولان ذکر و یائنا میدر تام و یا ناقصیدر بیلور (و ماتدری نفس
 ماذا تکسب غدا) و کشی بیلزکه ایرته خیر و شردن نه ایشلر کاهی
 ایرته برشی ایشلکه عزیمت ایتشیکن اول وقتده انک غیر یسین ایشلر
 (و ماتدری نفس بأی ارض تموت) و کشی بیلزکه نه یرده اولور نوقته
 اولور ایدیکنی بیلدیکی کبی * روایت اولندیکه ملک الموت سلیمان
 علیه السلامه اوغرایوب جلساسندن بررجله ادامه نظر ایتدی رجل
 سلیمان علیه السلامه بوکیمدر دیو سؤال ایدوب اول اکا ملک الموتدر
 دیدی رجل ایتدی کأنه اول بنی مراد ایدر ریحه امرایت که بنی کتوروب
 دیار هنده براغه سلیمان علیه السلام دخی انجلین ایتدی بعده اول
 رجلاک امرندن ملک الموته سؤال اولندقدہ ملک الموت دیدیکه اکا ادامه
 نظرم انک امرینه تعجبیدن ایدی شول سبیدن که اول وقتده انی هنده
 قبض ایتکه امر اولمشیدم اول ایسه سنک یانکده ایدی بعده انی اول وقتدن
 زمان مقدرده هنده بولوب قبض ایتدم * دینلریکه انسانه کسب و عاقبتندن
 اخص شی یوقدر اول ایکیسی معرفتنه طریق اولمحق اندن ماعدانک
 معرفتنه طریق ابعده اولور (ان الله علیم خبیر) الله تعالی جمیع اشیایی
 ظواهر و بواطن بیلور

سورة السجدة وهى ثلاثون آية مكية

بسم الله الرحمن الرحيم

(الم) اشبو سورة وياقرآن (تنزيل الكتاب لاريب فيه من رب العالمين)
 كتاب منزلذر ريب يوقدر كه اول رب العالميندندر (ام يقولون
 افتراه) اكا ايمان كتوررلرمى يوخسه انى محمد اختلاق ايتدى ديرلرمى
 (بل هو الحق من ربك لتذر قوما ما اتهم من نذير من قبلك لعلهم يهتدون)
 بلکه اول قرآن حق ربك تعاليدن منزل ايتدى ثابتدر تا كه انكه بر قومى
 انذار ايدى سنكه سندن اول انلره نذير كليبدر كه اول قومله مراد عربدر
 تا كه انذار كله اهتدا ايدى (الله الذى خلق السموات والارض
 وما بينهما فى ستة ايام) كه اول رب العالمين الله جل شانه در كه سموات
 وارض وايكيسى اراسنده كنى اشيائى آلتى كونده خلق ايتدى تا كه انكه
 عبادينه امورده تائى وتبتي تعليم ايدى اكرچه انى لحظة واحده ده خلقه
 قادر ايتدى تكيم تفصيلى سورة اعرافده يكدى (ثم استوى على العرش)
 بعده انك امرى عرش اوزره مستوى ومستولى اولدى (مالكم من دونه
 من ولى ولا شفيع) الله تعاليدن غيرى سزه نصرت ويا سزچكون شفاعت
 ايدر يوقدر چنانكه انك رضا سين تجاوز ايدى سز ويا خود سزك اندن
 غيرى ولى وشفيعكز يوقدر بلکه مصالحكزى تولى ايدن ومواطن نصرتده
 سزه نصرت ايدن اولدر اول سزى مخذول ايدى بچك هيچ ولى ونصريكز
 قائلز (أفلا تتذكرون) انك مواظبله متعظ اولزميسز كه انى توحيد
 ايدى سز (يدبر الامر من السماء الى الارض) اول الله تعالى امر دنيايى
 ملائكه وسائر اسباب سماويه ايله تدبير ايدر كه انك آثارى ارضه نزول
 ايدر (ثم يعرج اليه) بعده اول اكا صعود ايدوب علمنده ثابت اولور
 موجود اولديغى حالده (فى يوم كان مقداره الف سنة مما تعدون) بر كونده كه
 انك مقدارى ايام دنيادن يك ييلجه در بشيوز ييل نزولى وبشيوز ييل صعود ايدر
 زيرا كه سما وارضك ما بينى بشيوز ييللق مسيره در اكر بنى آدمك برى سيرله
 انى قطع ايدر اولسه بشيوز ييلده نزول وبشيوز ييلده صعود ايدر
 لكن ملك اول نزول وعروجى بر كونده تحصيل ايدر و بو مشكل اولمز
 شول يومده كيم مقدارى الهى يك ييلجه در زيرا انكه مراد عرش

(وياسدرة)

وياسدرة المنتهى ايله ارض سفلى ما بينيدر تكيم انك بيانى سورة
 معارجده كاور (ذلك عالم الغيب والشهادة العزيز الرحيم) اشبو
 امور مذكوردهك فاعلى اول الله تعاليدر كه خلقك غائب وحاضرين
 بيلور امرينه خاليدر تدبيرنده عبادينه رحيمدر (الذى احسن كل شئ
 خلقه) كه اول هر خلق ايتدى شئى احسان وحكمتى مقتضاسنجه احكام
 واتقان ايتدى ويا بيلديكه هر شئى نيجه خلق ايدر ويا حيواناتدن هر صنفى
 بر صورتده خلق ايتديكه سائر اصنافى اول صورتده خلق ايتدى ايتدى
 هر حيوان خلقته كامل وحسندر واعضاسندن هر عضو معاشنه
 صالح اولور شئله مقدردر (وبدا خلق الانسان من طين) آدم عليه
 السلامك خلقنى طيندن بدأ ايلدى (ثم جعل نسله من سلاله من ماء مهين)
 بعده انك ذريت نطفه دن ماء ضعيفدن يعنى منيدن قيلدى (ثم سواه
 ونفخ فيه من روحه) بعده انك اعضائى لائق اولديغى وجه اوزره
 تصويرله تقويم ايدوب اول الله تعالى به علمى مخصوص شيدن اكا نفخ
 ايتديكه اول روحدر (وجعل لكم السمع والابصار والافئدة) وسزده
 ايشتمك وكورمك وبيلك ايجون سمع وبصر وفؤاد خلق ايتدى تا كه هر برينى
 انك طاعتده استعمال ايدى سز (قليل ما تشكرون) بو نعمتلك ربسه
 سز شكر قليل ايدر سز (وقالوا أئذا ضللتنا فى الارض أنالفى خلق جديد)
 يعنى انكار ايدنلر ديدنلر كه چقان بزموتله تراب اولوب يرده غائب اولهوز
 بزبعث اولنور خلقتمز تجديد ايديلورمى قائل ابى بن خلف ايكن انلرك
 جيعنه اسنادى اول قوله رضالرى ايجوندر (بل هم بلفاء ربهم كافرون)
 بلکه اندن مودنصكره بعثله الله تعالينك لقاسنه كافرلدر (قل
 يتوفيكم ملك الموت الذى وكل بكم) ديكل كه سزك ارواحكز قبضنه
 توكيل اولنان ملك الموت ارواحكزى استيفاء ايدر حتى كه اندن هيچ برينى
 آليقومز (ثم الى ربكم ترجعون) بعده حساب وجزا ايجون اكار جوع
 ايدر سز (ولو ترى اذ المجرمون ناكسوا رؤسهم عند ربهم) يا محمد اكر
 كورسيدك شول وقتن كه مشركلر يوم قيامته رب تعالى عندنده حيا
 ونجلىت وندامتن باشلرين اكش اولدقلى حالده ديهلر كه (ربنا ابصرنا
 وسمعنا فارجعنا لعلنا نصالحا انا موقنون) ياربنا بزه عصيانمز مقابله سنده
 وعد ايتديك عذابى كوردك ورسولاريك صدقنى سندن ايشتمك

بزی کیر و دنیا به کوندر کل که انده عمل صالح ایشلیه وز زیراکه
 بز انکار ایتدیگمز بعث و قیامتک هر برینی مشاهده ایتمزله حقیقتنه
 یقن ایتدک لکن اول قولری انلره جدا نفع ایتیه (ولو شئنا لاتیناکل
 نفس هدیها) اگر دیلسه وز هر نفسه ایمان و عمل صالحی توفیق ایدردک
 (ولکن حق القول منی لاملآن جهنم من الجنة والناس اجمعین)
 لکن قضائم ثابت و وعیدم سابق اولدیکه جن و انسک کفار یله جهنمی
 طولاندرم (فذوقوا بما نسیتم لقاء يومکم هذا) و یوم قیامتده بز انلره
 دیرزکه سز عذاب ذوق ایدک اشبو یومک لقاسنی و انکیچون استعدادی
 ترککز و شهواته اتباعله عاقبتکز تذکردن ذهلکز سبیلله (انانسیناکم)
 اول ترک و ذهلکز جزا ایچون بز دخی سزی جهنمده ترک ایتدک
 (وذوقوا عذاب الخلد بما کنتم تعملون) و انده عذاب دائمی ذوق ایدک
 کفر و معاصی سبیلله کیم انی دنیاده ایشلردیکز (انما یؤمن باياتنا الذين
 اذا ذکروا بها خرّوا سجدا) بز آیتلری سزی تصدیق ایتز الا انلر که
 اول آیاتله و عظم اولدقلرنده الله تعالی نیک عذاب خوفندن سجده به
 واردر (وسجّوا بحمد ربهم) والوهیته لائق اولمین صفاتدن انی
 تنزیه ایدرلر انلر اسلام توفیقنه شا کر و حامد اولدقلری حالد (وهم
 لا یتکبرون) و الحال اکا ایمان و اطاعتدن استکبار ایتزلر (تجافی
 جنوبهم عن المضاجع) جنبلری فراشلرندن بعید و مرتفع اولور
 (یدعون ربهم خوفا وطمعا) رب تعالی به دعا ایدرلر سخطندن خوف
 و رحمت طمع ایدر اولدقلری حالد * بو آیتک تفسیری پیغمبریمز صلی الله
 علیه وسلمدن روایت اولندیکه انلر که مراد عبدک جوف لیلده طوروب
 تهجد قیلسیدر پیغمبریمز علیه السلامدن روایت اولندیکه یقن یوم قیامتده
 الله تعالی اولین و آخرین جمع ایده بر منادی ندا ایده بر صوتله کیم
 خلائک کلیسی انی ایشیده اشبو کونده کرم الهی به اولی نه طائفه
 ایدیکن اهل جمع بیلیردر بعده بر ندا کله کیم طورسون شول قومکه
 کیچه ایچنده جنبلرین فراشلرندن بعید ایدرلر دیکه نافله نماز قیلرلر
 اولیه اولسه اهل محشردن بر طائفه طورهرلر و الحال انلر قلیل اوله
 بعده بر نداه آخر کله کیم طورسون شول قومکه سراده و ضراده
 الله تعالی به حد ایدرلر دی اولیه اولسه بر قوم آخرین طورهرلر و الحال

(انلر)

انلر دخی قلیل اوله اندن اول ایکی قوم جنته سوق اولنلر و بعده سائر
 ناسک حسابلری کوریلر * دینلدیکه اشبو آیت صحابه دن بر طائفه
 شاننده نازل اولوبدرکه انلر مغربدن عشا به دکین نافله نماز قیلورلر دی
 (و مما رزقناهم یثقیون) و بز انلره و یردیگمز مالدن وجوه خیره انفاق
 ایدرلر (فلا تعلم نفس ما اخفی لهم من قرّة اعین) هیچ بر نفس نه ملک
 مقرب و نه نبی مرسل بیتلر که انلر ایچون نه اخفا اولنوبدر اندنکه انکله
 کوزلرشن اولور (قال النبی علیه السلام یقول الله تعالی اعددت لعبادی
 الصالحین ما لا عین رأت ولا اذن سمعت ولا خطر علی قلب بشر به
 ما اطلعت علیه اقرؤا ان شئتم فلا تعلم نفس ما اخفی لهم من قرّة اعین)
 پیغمبریمز صلی الله علیه وسلم ایدر الله تعالی دیدیکه بن عباد صالحینم
 ایچون اعداد ایتیشم شول کراماتی که انی کوزلر کورمدک و قولاقلر
 ایشتمک و هیچ بر بشر قلبنه خطور ایتدکدر اکا شهادت ایدر دیلر سکز
 (فلا تعلم نفس ما اخفی لهم) آیتن قراءت ایدک (جزاء بما کانوا یعملون)
 تاکه اول انلرک ایشلرکری اعمال صالحیه جزاء اوله (أفمن کان مؤمنا
 کمن کان فاسقا لا یستون) ایمانی اولان کشی ایماندن خارج اولان کیمیدر
 شرف و مشوبته ایکیسی مساوی اولمز بعده ایکیسی بیننده تفاوتی
 تبیین ایچون پیورلدیکه (اما الذين آمنوا و عملوا الصالحات فلهم
 جنات المأوی) اما شونلر که ایمانلرینه اعمال صالحه تقرین ایتدیلر انلر ایچون
 جنات مأوی اولور که اول مؤمنلره قرارگاهدر (نزلما کانوا یعملون)
 اول انلره اعماللری سبیلله نزل اولدیغی حالد (واما الذين فسقوا
 فأوهم النار) اما شونلر که ایماندن خروجله فسق ایتدیلر انلر قرارگاهی
 جهنمدر (کما ارادوا ان یخرجوا منها اعیدوا فیها) هر بار که انلر
 جهنمدن چیقماق قصدین ایتسه لر زبانیله انلری آتشدن مقامعله اوروب
 جهنمک قعرینه ابر کوردرلر (وقیل لهم ذوقوا عذاب النار الذی
 کنتم به تکذبون) و انلره دینور که ذوق ایدک شول جهنم عذابنکه
 سز انی دنیاده تکذیب ایدردیکز (ولنذیقنهم من العذاب الادنی)
 بز انلره عذاب اقریدن اذاقه ایدرلر که اول قتل و اسر و جذب و سائر
 دنیاده ایریشن مختلردر (دون العذاب الاکبر) که اول آخرت عذابندن
 دوندر * دینلدیکه عذاب ادنی ایله مراد عذاب قبرد و عذاب اکبر ایله

مراد عذاب ناردرد و یا خود معنی بز انلره عذاب دنیایی اذاقه ایدرز
عذاب آخرته وصولرندن اول (لعلهم يرجعون) تا که انلرک باقیسی
کفردن توبه ایدوب ایمانه رجوع ایدلر (ومن اظلم ممن ذكر بآيات ربه
ثم اعرض عنها انا من المجرمين منتقمون) شول کسه دن اظلم کیدر که
رب تعالینک آیتلریله وعظ اولندیغند نصکره اندن اعراض ایده یوخسه
انده تفکر ایتیه بز مشرکاردن انتقام ایدرز (ولقد آتينا موسى الكتاب
فلا تكن في مريه من لقائه) بز موسایه کتاب ویردک سکا ویردیکمز کی
ایمدی انک کتابی لقائندن شکده اولغل و یا خود سن موسایه لقائکده
شک ایتکل (وجعلناه هدی لبني اسرائيل) واول موسایه ویردیکمز
کتابی بنو اسرائیلهدایت قیلدق (وجعلنا منهم ائمة يهدون بامرنا
لما صبروا) واول بنو اسرائیلدن ائمه قیلدقکه ناسی اول کتابده کی
احکامه بزم امر و یا توفیقمزله دعوت ایدلر وقتا که طاعتمه و یا دنیادن
صبر ایتدیلر (وكانوا باياتنا يوقنون) بزم آیتلریمزله نظرده امعانلریچون
انی ایقان ایدرلردی (ان ربك هو يفصل بينهم يوم القيامة فيما كانوا
فيه يختلفون) ربك جل شانیه یوم قیامتده امر دیندن اختلاف ایتدکری
شیئده حق باطلدن تمیز ایدر (اولم يهد لهم كم اهلكنا من قبلهم من القرون
يمشون في مساكنهم) الله تعالی اهل مکه یه محمدی بعث ایدوب
اول انلره تعریف ایتدیمیکه انلردن اول قرونندن ثمود و عاد و غیره
نیچه قرونن بز هلاک ایتدک که تجارت و مسافرتلرنده انلرک مسکنلرینه
مرور ایدوب اکا نظر ایدرلر (ان في ذلك لايات أفلا يسمعون)
اشبونده عبرتله واردر تدبر و اتعاظ اسماعیلله استماع ایتلرلمیکه متعظ اوله
(اولم يروا انا نسوق الماء الى الارض الجز فخرج به زرعاً تأكل منه
انعامهم وانفسهم أفلا يبصرون) کورمزلمیکه بز سحابله و یا انهارله
مائی سوق ایدرز شول ارضه کیم انک نباتی مطر انعدامیلله منقطع
وزائل اولوبدر واول ماء سیبیلله اندن زرع چیقاررز کیم انک تن
و اوراقنی انعاملری اکل ایدر وحبوب و فواکهنی کنیدیلر اکل ایدر
انی کورمزلمیکه انکله رب تعالینک کمال قدرت و فضلنه استدلال ایدوب
وحدانیتنه ایمان کتورهلر (ويقولون متى هذا الفتح ان كنتم صادقين)
کافرله مؤمنلره دیدیلر که قیامت نوقتن اولور که سزکله بزم بیئمز فصل

(اولنه)

اولنه بزه خبر ویرک وعد کزده صادقلر ایسه کز (قل يوم الفتح
لا يفتح الذين كفروا ايمانهم ولا هم ينظرون) انلره دیکل که یوم فتحده
کافرله ایمانلری نفع ایتمز دینلدیکه اول یومله مراد یوم قیامتدر که
انده مسلمین ایچون کفره اوزره نصرت اولنور وینلری فصل اولنور
و یا خود مراد یوم بدردر و یا یوم فتح مکهدر واول کافرله مراد بدرده
و مکهده قتل اولنلردر * ایمدی انلرک حال قتله کی ایمانلری نفع
ایتمز وانلره امهال دخی ویرلر که توبه ایدلر وقتا که تکذیب واستهزا
طریق اوزره اول یومک استعجالن اراده ایتدیلر دینلدیکه (فأعرض عنهم)
انلردن اعراض ایت یوخسه انلرک تکذیبنه مبالات ایتکل * دینلدیکه اشبو
سیف آیتله منسوخدر (وانتظروا انهم منتظرون) وانلر اوزره وعدم
مقتضاسیجیه نصرتمه منتظر اولغل که انلر هلاککه منتظرلردر و الحال سن
احقسنکه انلرک هلاکنه منتظر اوله سن و ملائکه دخی اکا منتظرلردر *
روایت اولندیکه پیغمبریمز صلی الله علیه وسلم اشبو سوریهی و سورده
ملکی او قومینجه یا تمزدی

سورة الاحزاب وهی ثلاث وسبعون آية مدنية

بسم الله الرحمن الرحيم

(يا ايها النبي اتق الله) الله سبحانه وتعالى پیغمبریمز صلی الله علیه وسلمی
تعظیم و تقوانک شاننی تفخیم ایچون اکا انکله امر ایلدی وانکله مراد
تقوی اوزره ثباته اکا امردر تا که اول انی مناهیدن منع ایده (ولا تطع
الکافرين والمنافقين) رأی و مشورتده کافرله و منافقله اطاعت
ایتکل بلکه انلردن حذار ایت (ان الله كان علیما حکیم) الله تعالی
مصلح و مفاسده علیم امر و نهینده حکیم اولدی * روایت اولندیکه
ابوسقیان اهل شرکدن بعض اتباعیلله پیغمبریمز علیه السلامدن
استیمان ایدوب مدینه یه قدوم ایتدیلر و منافقلرک رئیس عبد الله
بن ابی یه نزول ایتدیلر بعده پیغمبریمز علیه السلامه کلوب دیدیلر که
سن بزم آلهمزک ذکرنی ترک ایدوب بلکه انلرک عابدلرینه شفاعتی
اولور دیکل بز دخی سنک ربک ذکرنی ترک ایدلم اول سیدن بوآیت
نازل اولدی (واتبع ما یوحی الیک من ربک) وربکدن سکا وحی اولنان

قرآنه اتباع ایت یو خسه کافر و منافق را باینه دکل (ان الله کان بما تعملون خبیرا) الله تعالی سنک اعمالکزه خیر اولدیکه اعمالکزی اصلاح ایدر شیئی و حی ایدوب کفره نک قوی استماعندن اغنا ایتدی (و توکل علی الله و کفی بالله وکیلا) هر امرکی الله تعالی نک تدبیرینه تفویض ایت اول هر امریکه وکیل اولغه کفایت ایدر (ما جعل الله لرجل من قلبین فی جوفه) الله تعالی هیچ بر کسه یه جوفنده ایکی قلبی جمع ایتدی * روایت اولندیکه کفار دیدیلر که محمد ایکی قلبی وارد بری بزمه و بری اصحابیلر در * و بر قولده سبب نزولی ابو معمر بن اسد الفهریدر که عرب بیننده اولان وقائع و اخبار دن ایشیتدیکن حفظ ایدوب بنم ایکی قلبم وارد رانک بریله محمدک فهم ایتدیکندن اکثر فهم ایدرم دیردی یوم بدرده مشرکین ایله منهزم اولیجق کوردیلر که ایکی نعلنک بری ایاغنده و برینی الینه آلمش کیدردی نیچون بویله ایدرسن دینلدکده دیدیکه اونتمش بن انک ایکسین دخی ایاغنده ظن ایتشم اول کونده بیلدیلر که ایکی قلبم وار دیدیکنده کذب ایدر مش زیرا ایکی قلبی اولسه ننده کی نعلینی اونتمزدی (وما جعل ازواجکم الا فی تظاهرون منهن امهاتکم) و ازواج کزدن مظاهره ایتدیککز نسائی سزه امهات قیلدی * وظهار اولدر که کشی زوجه سنه سن بکا انامک ظهیری کبیسن دیه و یاخود سن بکا انامک بطنی کبی یعنی فرجی کبی حرامسن دیه ایمدی الله تعالی نسائکزه بوقولی دیمکزه انلری سزه امهات قیلدی لکن اول بر قول منکر در که انکله اوزر یکزه کفارت واجب اولور کیفیتی سوره مجادله ده کلور ان شاء الله تعالی (وما جعل ادعیاءکم ابناکم) و اوغل ایدندیکز کسه لری الله تعالی سزه اوغل ایتدی * اشبو نکلر تبنی نسخ اولندی زمان جاهلیته برکسه یه چکان برولدک عقل و کیاست و ظرافتی خوش کسه انی اوغل ایدینوب ناس انی اول کسه نک اوغلیدر دیرلردی و اول ولد صلب کبی وارث اولوردی و پیغمبریمز صلی الله علیه وسلم بعثتندن اول زید بن حارثه بی اعتنا قند نصکره اوغل ایدنشدی وقتا که پیغمبریمز صلی الله علیه وسلم زینب بنت جحشی تزوج ایتدی حالبو که اول اندن اول مذکور زیدک تحت نکاحنده ایدی منافق لر دیدیلر که محمد اوغلنک مرأستی تزوج ایتدی و الحال اول نامی اندن

(نهی)

نهی ایدردی اول سبیدن بو حکم نازل اولوب تبنی نسخ اولندی (ذلکم قولکم بافوا همکم) اشبو ذکر اولسان افوا همکزه قولکزدن یو خسه اعیانده حقیقتی یوقدر (والله یقول الحق و هو یهدی السبیل) الله تعالی انی دیر که ظاهر و باطنده حق اوله و اول خلقی سبیل حقه هدایت ایده (ادعوه لم لا یأتهم هو اقسط عند الله) ایمدی تبنی ایتدیککز کسه لری نسب جهنندن اولان آبارینه نسبت ایدک که اول عند الله اعدلدر (فان لم تعلموا آباءهم فاحوانکم فی الدین و موالیکم) اگر انلرک آبارین بیلز سکز ایمدی انلر سنک دینده اخوانکز و اولیا کزدن اشبو بنم قرنداشمدر و دوستمدر دیکز (ولیس عیکم جناح فیما اخطأتم به و لکن ما تمهدت قلوبکم) اشبو اشیایی نهیدن صکره خطائیه و یا اندن صکره نسیانله و یا سبق لسانله ایشلمکزه سزه و بال یوقدر بلکه و بال انده در که عدله ایده سز * دینلدیکه اگر اول معروف النسب ایه انی او غلم دیمسینه اندن نسب ثابت اولمز و اگر عبدی ایه آزاد اولور اشبو ابو حنیفه عندنده در اما که غیره عندنده انکله نه آزاد اولور و نه نسب ثابت اولور (و کان الله عفورا رحیما) الله تعالی غفور و رحیم اولدیکه مخطی بی عفو ایدر و اگر حامدی توبه ایدرسه (النبی اولی بالمؤمنین من انفسهم) محمد صلی الله علیه وسلم مؤمنلره جمیع امور لرنده نفس لرندن اولی در زیرا اول انلره امر ایتمز و انلردن راضی اولمز الا اکا که انلرک انده صلاح و نجاتی اولور اما که نفس انک خلافتی ملاسدر او یله اولسه مؤمنلره واجب اولور که پیغمبریمز علیه السلام انلره نفس لرندن احب و امری اوزر لرینه انقد و اسکا شفقتلری اتم اوله * روایت اولدیکه پیغمبریمز صلی الله علیه وسلم تبوک غزاسنه کیدر اولدیغنده ناسه خروج ایدک دیو امر ایدیجک انلرک بعضی آباء و امهاتمزدن استیذان ایدلم دیدکرنده بو آیت نازل اولدی (و ازواجهم امهاتهم) و انک ازواجی تحریمده و استحقاق تعظیمده مؤمنلرک امهاتی منزلته تنزیل اولنمشلر در اما که انک ماعداسنده اجنبیات کیدر لر اول اجلدن عائشه رضی الله عنها دیردیکه بن نسائک امهاتی دکاز بلکه رجالات امهاتیمز (و اولوا الارحام بعضهم اولی ببعض فی کتاب الله من المؤمنین و المهاجرین) قرابت صاحب لری تورانده بعضی بعضنه اولی در لوح محفوظده و یا محمد صلی الله علیه وسلم نازل اولانده

ويا الله تعالى نيك فرض ايتديکنده شول مؤمنلردنکه حق دينله ومهاجرلردنکه حق هجرتله توارث ايدهلر (الا ان تفعلوا الى اوليائکم معروفًا) مکرکه مؤمنين ومهاجريندن موالات ايتديککزر کسهلره دينده ولايت اجليچون ثلث ويا اندن اقل وصيت ايدهلر زيرا که اجانبه وصيت مباحدر اما که ورثه يه وصيت جائز اولمز (کان ذلك في الكتاب مسطورًا) اشبو ايکی آيتده ذکر اولنان لوحده وياقر آنده وياتور آنده ثابت اولدی (واذ اخذنا من النبيين ميثاقهم) ذکر ايت شول وقتی که بز نبيندن اخذ عهد ايتدک که امثلهينه رسالتی تبليغ وانلری دين قيمه دعوت ايدهلر (ومنک ومن نوح و ابراهيم وموسى وعيسى ابن مريم) على الخصوص ارباب شرايعک مشاهيرى سندن و نوح و ابراهيم و موسى و عيسادن اول عهدى اخذ ايتدک (واخذنا منهم ميثاقًا غليظًا) وانلردن ميثاق جليل الشان اخذ ايتدک که اول شول عهد قديمدر که نوح عليه السلام و اندنصکره کان انبياء على الخصوص خاتم الانبياء محمد صلى الله عليه وسلم انک اوزره بعث اولنديلر وياخود اول تحمیل اولندقلرى شيئي وفاقه يمين بالله ايتديلر (ليسأل الصادقين عن صدقهم) الله تعالى اشبو اشياي ايشلدى تاکه انبيايه رسالتی تبليغلرندن يوم قيامته سؤال ايدهلر وانکله مراد اول انبيائک ارسال اولنوب انلری تکذيت ايدن اقوامی تبکيتدر وياخود مؤمنلره الله عمللرندن سؤال ايدهلر وياخود صادقله قلملرينک صدقندن سؤال ايدهلر که لسانلريه تقرير ايدهلر (واعذ للكافرين عذابا اليما) وكافرله عذاب مؤلم اعداد ايتدى (يا ايها الذين آمنوا اذكروا نعمة الله عليكم) يا مؤمنلر الله تعالى نيك يوم احزابده که اول يوم خندقدر سزدن اعدا کزى رفع ايتمى نعمتن ذکر ايدک (اذ جاء تکم جنود) شول وقتکه قریش و غطفان و يهود قريظه و نضيردن اون بيک دکلو کافر مدينه يه پيغمبريمز عليه السلام و مؤمنيله قتال ايچون کلوب غلبه نام موضعه نزول ايتديلر پيغمبريمز عليه السلام ايله اولان مسلمون اوچبيک مقدارى کشيديلر * روايت اولنديکه پيغمبريمز عليه السلام انلرک اقبالان ايشيديجک مدينه نيك جورده سنه خندق قازوب مسلمين ايله خندقک ايچ يوزنده طوردى کفار ايسه طشره طوروب برآى اولغه قريش زمانده ايکی فرقه برى برلرينه اوق و طاش آتمدن غيرى وجهله

(جنك)

جنك ايتديلر (فأرسلنا عليهم ريحا) اويله اولسه بز اول کافرلر اوزره برصووق کيجه ده صبا يلنى کوندردک حتى که انلری اوشستدى و يوزلرينه طپراق صاوروب آتشرينى سوندردى و خيمه لرينى ييقوب دابه لرينى برى برينه قاتدى (وجنودالم تروها) ودخى اول کافرلر اوزره ملائکه دن بيک ملک کوندردک که انلر اول ملائکه يي کورمز لردى بلکه صوتلرين ايشيديرلردیکه عسکرک جوانبنده طوروب تکبير ايدرلردى اول حالتده طليحه بن خويلد الاسدى نام کافر سائرلرينه ندا ايدوب ديدیکه آگاه اولک که محمد سزه سحره باشلدى شمدنکيرو طوروب نيلرسن باشکزه چاره استرسکز بورادن قاچوب کيدر سنز اويله اولسه قتال ايتدين صنديلر اين المقر ديو کيرولرينه دونديلر (وکان الله بما تعملون بصيرا) الله تعالى سنرک خندق قازمکزه وياخود مشرک لرک تحزب و محاربه سنه بصير اولدى (اذ جاءکم من فوقکم ومن اسفل منکم) ذکر ايدک شول وقتی که بنو غطفان وادينک اعلا سندن قبل مشرقدن و قریش ايسه وادينک اسفلندن قبل مغربدن کلديلر جله واحد اولوب محمدى ارادن کيدر لم ديديلر (واذ زاغت الابصار وبلغت القلوب الحناجر) حتى که مسلمون کافر لرک کثرت عدد وعددن خوف ايدوب کوزلری مستواى نظردن خيرت و شخوصه ميل ايتدى و قلملری منتهای حلقومه ايردى (وتظنون بالله الظنونا) ويا مؤمنلر الله تعالى يه ظنون مختلفه ايتديکز اما که منافقون ظن ايتديلر که مسلمون استيصال اولته و مخلصون ايسه ظن ايتديلر که ابتلا لردن صکره انلره نصرت اولته (هنالك ابتلى المؤمنون وزلزلوا زلزالا شديدا) اشبو محله مؤمنلر اختبار اولنوب مخلص منافقون وثابت مترزلدن ممتاز اولدى وشدت فزعدن زياده منزعج اولديلر (واذ يقول المنافقون والذين في قلوبهم مرض ما وعدنا الله ورسوله الا غرورا) شول وقتکه منافق لر و قلملرنده ضعف اعتقاد اولنلر ديديلر که الله تعالى ورسولى بزه ظفر واعلاء ديندن وعد ايتمز الا وعد باطل ايدر * دينديکه اشبو قولک قائل معتب بن قشير ايدى احزابى کوردیکنده ديدیکه بزه محمد کسرى و قيصر کنوزنى وفارس و روم قحنى وعد ايدر والحال بریمز قادر اولمکه خوفندن تبرزايد * ايمدى بودکل الا وعد غروردر (واذ قالت طائفة منهم يا اهل يثرب

لامقام لكم فارجعوا) منافقردن اوس بن قیظی واصحابی دیدیلرکه
یا اهل مدینه اشبو محل سزه قرارگاه دکدر ویا مقام اقامت دکدر هاربین
اولوب منازلکزه رجوع ایدک ویاخود دین محمدده سزه مقام یوقدر
شرکه رجوع ایدوب محمدی ترک ایدک که سالم اوله سز ویاخود سزه
مدینه ده مقام یوقدر * ایددی کفره رجوع ایدک که انده سزه امکان
اوله ویترب اسم ارضدر که مدینه انک ناحیه سنده واقع اولوبدر
(و یستأذن فریق منهم النبی یقولون ان بیوتنا عورة) انلردن برفریقکه
اول بنو سلمه وبنو حارثه در پیغمبریمز علیه السلامدن رجوعه استئذان
ایدوب دیدیلرکه بیوتمز حصینه دکدر عدو و سارقدن قورقیلور (وماهی
بعورة ان یریدون الا فرارا) حالبوکه بیوتلری حصینه در استئذانه
مرادلری دکل الاقتالدن فراردر (ولو دخلت علیهم من اقطارها
ثم سئلوا القتنة لا توها و ماتلبثوا بها الا سیرا) اگر احزاب اول منافقین
اول مدینه نک ویا بیوتلرینک نواحی سندن دخول ایتسهلر بعده اول
منافقین شرک ورده ومقاتله مسلمینه دعوت اولنسلر احزابک دعوتنه
اجابت وفعالرینه موافقت ایدلردی واول احزابه اجابتدن مدینه ده
لبث یسیر انجق سؤال وجواب دکو زمان توقف ایدلردی ویاخود معنی
انلر ارتدادلرندن صکره مدینه ده زمان قلیل لبث ایدوب رسول الله
نصرتدن فرارلریچون عذاب اولنه لردی (ولقد كانوا عاهدوا الله
من قبل لایولون الادبار) بنوحارثه خندق غزاسندن اول پیغمبریمز
علیه السلام واساطیلله الله تعالی به عهد ایتدیلرکه عدویه قتال ایدلر
یوخسه منهزمین اولوب فرار ایتیلر * روایت اولندیکه یوم احدده
بنوحارثه بنوسله ایله قصد ایتدیلرکه من بعد انک مثلی فعله عودت ایتیلر
ویاخود انلر برقوم ایدیلرکه بدر غزاسنه حاضر اولمامشلردی بعده اهل
بدره ویریلن کرامات وفضیلتی کورچیک دیدیلرکه الله تعالی بزی بر قتاله
دخی احضار ایدرسه قتال ایدلم اولیه اولسه الله تعالی انلره
احزابی سوق ایتدی (وکان عهد الله مسئولا) الله تعالی نک
عهدی یوم قیامتده وفاسیله سؤال وانک اوزره مجازات اولور (قل
لن ینفعکم الفرار ان فررتم من الموت او القتل) یا محمد انلره دیکل که سزه
فرار نفع ایدر دکدر اگر موت ویاقتلدن فرار ایدرسکز زیرا که لابد

هر شخصه قضاء ازلی سبق وانک اوزره قلم الهینک ثبوتی مقتضاسنجه بر وقت
معینه کیفیت مقدره اوزره ایریسردر (واذا لا تمتعون الا قلیلا) زعکز
اوزره سزه فرار نفع ایتدیکی تقدیرجه تأخیرله تمتیع اولنسه کز اول تمتیع
سزه زمان قلیل اولور (قل من ذا الذی یعصمکم من الله ان اراد بکم
سوء او اراد بکم رحمة) دیکل که الله تعالی نک قضا سندن کیم منع ایدر اگر
اول سزه سوء اراده ایدرسه ویا سزه کیم سوء ایر کورر اگر اول سزه خیر
اراده ایدرسه (ولایجدون لهم من دون الله ولیا ولا نصیرا) وانلر
کندیلر ایچون الله تعالی دن غیری نفع ایر کورر ولی وانلردن ضرر کیدرر
نصیر بولزلر (قد یعلم الله المعوقین منکم والقائلین لاخوانهم هلم الینا)
الله تعالی بیلور سزدن انلریکه ناسی رسول الله علیه السلامدن تعویق
ایدر که انلر منافقردن ودخی انلر که مدینه ساکنلرندن اخوانلرینه
دیرلر که بزم یانمز کلک محمد واصحابی ترک ایدک انلر آز کسه در انک
رعایت خاطر ایچون کتدیگری نیچون هلا که براغورسز (ولایأتون
البأس الا قلیلا) پس بو اجلدن انلر قتاله آز کلورلردی ویا مؤمنلره
حقیقوب آز قتال ایدرلردی ویا تعلل ایدوب کیرو مدینه به دوزلردی
(اشحۃ علیکم) انلر مسلمینه ظفری ویا معاونتی ویا فی سبیل الله نفقه بی
و یا غنیمتی بخل ایدر اولدقلری حالده (فاذا جاء الخوف رأیتهم ینظرون
الیک تدور اعینهم کالذی یغشی علیه من الموت) چن عدودن
خوف ایرسه انلری کوررسنکه سکا نظر ایدرلر کوزلری احد اقلرنده
دور ایدر شول کسه نک کوزلری کبی که سكرات موتدن مغشی علیه اوله
بو حالت انلره خوف وحذر وسکا لواذدن اوله زیرا که موته قریب
کسه نک عقلی کیدر وکوزلری یوملقدن قالور (فاذا ذهب الخوف سلقوکم
بالسنة حداد) چنانکه عدو خوفی کیدوب غنائم جمع ایدیلر کوررسنکه
السنة سلیطه ایله سزه اذاء ایدرلر ویاخود غنیمتک قسمتی عندنده سزک
شانکرده السنه لرین بسط ایدرلر بز سزکه قتاله حاضر اولمامزلره عدویه
غالب اولدیکز قعتمده بزه نصیبی توفیر ایلکز دیو اوزر بکزه اجتر ایدرلر
(اشحۃ علی الخیر) مال و غنیمته حرصلرندن قسمت عندنده مؤمنلره بخل
ایدر اولدقلری حالده (اولئک لم یؤمنوا فأحبط الله اعمالهم) ایددی
انلر اخلاص اوزره ایمانه کلیوبدر اول اجلدن الله تعالی انلرک اعمالی

ابطال ايتدی (وكان ذلك على الله يسيرا) اشبو ابطال عمل الله تعالى به
 آسان اولدی (يحبسون الاحزاب لم يذهبوا) منافقلىر خوف وجنلرندن
 ظن ايتديلر كه احزاب منهزم اوليه لر حالبوكه انلر منهزم اولديلر اول ظنله
 منافقين داخل مدينه به قاچديلر (وان يأت الاحزاب يودوا الوانهم بادون
 في الاعراب) اكر احزاب ايكنجى كره كلسه اول منافقلىرى ايدى لرديكه
 انلر مدينه دن بادييه چيتمش اولوب اعراب پيننده بولنه لردي (يسألون
 عن انباءكم) مدينه جانبدن كلنلره سزك اخبار وما جرا كزى سؤال
 ايدى لردي (ولو كانوا فيكم ماقاتلوا الا قليلا) اكر اول ايكنجى كرده
 سزك ارا كز ده بولنوب مدينه به رجوع ايتش اولسه لر حالبوكه قتال
 واقع اولسه تعبيردن خوفله وريا ايله آز قتال ايدى لردي (لقد كان لكم
 في رسول الله اسوة حسنة) سزچون رسول الله عليه السلامك نفسنده
 قدوه صالحه واردر حقندركه اكا اقتدا اولنه حربده ثبات وشداشه
 مقاسات كبي زيرا اول قتالده سزه مواسات ايتدى شول حيثيتدكه
 احد غزا سنده يوزى ياره لندى وربا عيه سى قيرلدى وعى قتل اولندى
 ورنجه اذا ايله متاذى اولدى * ايمدى سزه دخی حق اولور كه انك ستيله
 استنان ايدى سز (لن كان يرجو الله) رسول الله عليه السلامك قدوه
 اولسى اول كسه ايجوندر كه الله تعالىنك ثوابن رجا وحسابندن
 خوف ايله (واليوم الآخر) ويوم بعثدن دخی خوف ايله كه اول
 اعماله جزا كونيدر (وذكر الله كثيرا) جميع اوقات واحوالنده
 لسان وقلبله الهى ذكر كثير ايدى * ايمدى رسول الله صلى الله عليه وسلمى
 قدوه ايدىن كسنه بو او صافله متصف اولور (ولما رأى المؤمنون
 الاحزاب قالوا هذا ما وعدنا الله ورسوله) وقتا كه مؤمنلر احزابى
 كورديلر اشبو بزه الله تعالىنك سورة بقره ده (ام حسبتم ان تدخلوا الجنة
 ولما يأتكم مثل الذين خلوا من قبلكم) آيتله وعد ايتديكيدر ودخی
 رسولى عليه السلامك (سيشتد الامر باجتماع الاحزاب عليكم والعاقبة
 لكم عليهم) سزك اوزر يكزه احزاب اجتماعيله امر مشد اوليسر در
 لكن عاقبتده سزچون انلر اوزره نصرت ايريسر در ديو وعد ايتديكيدر
 (وصدق الله ورسوله) الله تعالى وسولى خبرينك صدق ظاهر اولدى
 وياخود الله تعالى ورسولى نصرت وثوابده صدق ايتدى بلادده صدق

(ايتسى)

ايتسى كى (وما زادهم الا ايمانا وتسليما) احزابك انلره كلمى
 الله تعالى به ووعيدينه تصديقلىرىن وقضا وقدرينه تسليملىرىن
 آرتوردى (من المؤمنين رجال صدقوا ما عاهدوا الله عليه) مؤمنلردن
 رجال واردر كه الله تعالى به ايتدكرى عهدده قيام ووفاء ايتديلر كه
 اول كفار قتالنده پيغمبريمز عليه السلامه بيله ثبات واعلاء دين ايجون
 قتالده در (فهم من قضى نحبه) انلرك بعضى ندرنه وفاء ايتدى
 قتال ايدوب حتى كه شهيد اولدى جزه ومصعب بن عمير وانس
 ابن النضر كى (ومنهم من ينتظر) وانلرك بعضى ايسه شهادته منتظر
 اولور عثمان وطلحه كى (وما بدلوا تبديلا) عهدلىرىنى تبديلدن
 برشيئه تبديل ايتديلر * روايت اولنديكه انس بن النضر رضى الله
 عنه بدر غزاسنه حاضر اولمامشدى پيغمبريمز عليه السلامه كلوب
 ديديكه يارسول الله سنك مشر كينله اول قتالكه بن حاضر اولدم
 من بعد اكر الله تعالى بنى مشركين قتالده حاضر ايدرسه الله تعالى سزه بنم
 صنعمى كوستره چون احد غزاسى اولوب مسلمينه انكشاف ايردى انس
 ابن النضر رضى الله عنه تقدم ايدوب انى سعد بن معاذ استقبال ايتدى
 انس اكا ديديكه ياسعد والله احد جانبدن جنت فوقوسن شم ايدىورم
 سعد ايتدى يارسول الله انك قتالده ايتدى جده واهتمامه بنم استطاعتم
 اولدى انده سكساندن زياده ضربه سيف وطمعنه رخ ورميه سهمدن
 اثر بولندى ومع ذلك مشركون اكا زياده مشله ايتش اولديغندن
 انى اختندن غيرى كسه بيلدى * انس بن مالك رضى الله عنه ايدر ظن
 ايدرينكه بوآيت انك واشباهى مؤمنلر حقنده نازل اولوبدر * حباب
 ابن الارت رضى الله عنهن مرويدر ديديكه رسول الله صلى الله عليه
 وسلم ايله الله تعالىنك رضاسن طلب ايدوب هجرت ايتدك انك وعد كريمى
 مقتضاسنجه مرجو من اولان اجر دن بعضمز هيچ برشى اكل ايتدى
 انلرك برى مصعب بن عمير ايديكه احد غزاسنده قتل اولند قدده
 تكفين اولنه جق برنمره سندن غيرى برشيئ بولندى انى باشى اوزره
 قود يغمزده اياقلىرى آچيلوردى اياقلىرى اوزره قود يغمزده باشى آچيلوردى
 پيغمبريمز عليه السلام بزه ديديكه ايمدى انكه باشند طرفى اورتوب
 اياغى اوزره اذخرى قوكز جابر بن عبدالله رضى الله عنه ايدر پيغمبريمز

عليه السلام طلحة بن عبد الله رضي الله عنه به نظر ايدوب ديديكه
بركسه كه شول نجبي قضا ايتش رجلى كورمك ديليه اشبو كا نظر ايتسون
روايت اولنديكه احد غزاسنده اول رسول الله صلى الله عليه وسلمى حراست
ايتكدن يدى شلا اولمشدى (ليجزى الله الصادقين بصدقهم)
تاكه الله تعالى شول عهدلرینه وفايله صدق ايدن صادقله صدقلىنك
جzasن ايدنه (وبعذب المنافقين ان شاء او يتوب عليهم) و تاكه منافقوله
ديلرسه عذاب ايدنه اكر توبه ايتزلرسه ويا انلره توبه يي توفيق ايدنه
(ان الله كان عفورا رحيم) كفر و نفاقدن توبه ايدنه الله تعالى غفور
ورحيم اولدى (ورد الله الذين كفروا بغيظهم لم ينالوا خيرا) الله تعالى
احزاب كفره يي غيظى ملتبسین اولد قلى حالده مرادلرینه ظفر بولمدين
رد ايلدى (وكفى الله المؤمنين القتال) الله تعالى مؤمنله ريح و ملائكه ايله
قتاله كافى اولدى (وكان الله قويا عزيزا) الله تعالى اراده ايتديكى شيتك
احداشه قوى و هر شيتك اوزره غالب اولدى * روايت اولنديكه احزاب
منهزم اولديغى كچه نك صبا خنده پيغمبريمز صلى الله عليه وسلمه جبريل
عليه السلام كلوب ديديكه سن سلاحكى چيقارميسن و الحال ملائكه
سلاحلر يي چيقارمديلر الله تعالى سكا و اصحابنه امر ايدر كه بنى قريظه يه
كیده سز بنم دخى قصدم انلره در ناسه تاذين ايت كه ايكندى نمازين بنى
قريظه ده قيلمونلر اويله اولسه كيدوب انلرى يكرمى بر ويا يكرمى بش كون
محاصره ايتديلر حتى كه بنو قريظه اندن مجهود اولديلر پيغمبريمز
عليه السلام انلره ديديكه بنم حكيمه نزول ايدر ميسز انلر ايسه اندن
ابا ايدوب سعد بن معاذ حكيمه رضا ويرديلر اويله اولسه سعد رضي الله
عنه حكم ايتديكه مقاتله لرى قتل و ذرارى و نسالرى سبي اولنه و اموالارى
مسلين بينده قسمت ايديله پيغمبريمز عليه السلام تكبير ايدوب ديديكه
يا سعد الله تعالىنك حكيمه حكم ايتدك بعده انلرى استنزال ايدوب
التبوز ويا اكثر مقاتله لرى قتل و ذرارى و نسادن يديوز دكلو كسه يي
اسير ايتديلر اشبو سببدن نازل اولديكه (و انزل الذين ظاهروهم
من اهل الكتاب من صياصيمهم) والله تعالى اول احزابه اعانت ايدن اهل
كتابدن بنو قريظه يي حصونلرندن انزال ايتدى (وقذف في قلوبهم الرعب)
وانلرك قلوبنه مسلميندن خوف القا ايتدى (فريقا يقتلون) انلردن

(بر فريقي)

بر فريقي قتل ايدرسز كه اول انلرك رجاليدر (و تأسرون فريقا) و بر فريقي
ايسه اسير ايدرسز كه اول انلرك نسا و ذراريسيدر (واورثكم ارضهم
و ديارهم و اموالهم و ارضالم تطوها) والله تعالى سزه انلرك مزارع
و حصون و نقود و مواشى و اثاثلر يي ايراث ايتدى * روايت اولنديكه
پيغمبريمز صلى الله عليه وسلم انلرك عقاراتنى مهاجرينه ويردى انصاردن
بعضى اول امرده سويليجك سز منزللريكزده سز اكا احتياجكز
يوقدر ديدى عمر رضي الله عنه ديديكه يارسول الله يوم بدردهكى كبي
بونديخى تخميس ايتزميسن ديديكه ايتزم * زيرا بو بكا طعمه قيلنوبدر
ودخى شول ارضى ايراث ايتديكه سز اكا اياق باصمديكز فارس و روم
وياخير وياهر ارضكه يوم قيامته دكين فتح اولنور (و كان الله على
كل شى قديرا) الله تعالى هر شيتنه قادر اولدى (يا ايها النبي قل لازواجك
ان كنتم تردن الحياة الدنيا وزينتها فتعالين امتعن واسرحكن سراحا
جيلا وان كنتم تردن الله ورسوله والدار الآخرة فان الله اعد للחסنات
منكن اجرا عظيما) روايت اولنديكه پيغمبريمز صلى الله عليه وسلمدن
نسائى ثياب زينه وزياده نفقه طلب ايديجك اشبو ايكي آيت نازل اولديكه
يا محمد زوجاتكه ديكل كه اكر دنيانك سعه و نعمن وزينه و زخارفن مراد
ايدرسكز كلك سزه دنيادن بعض شيتله تمتيع ايدوب بعده سوء قصدنسز
وبدعه و ضرارنسز احسانله سزى تطبيق ايديم و اكر الله تعالىنك
ورسولنك رضاسنى و دار آخرتى مراد ايدرسكز الله تعالى سزدن
اكا ورسولنه اطاعت ايدنلره جنتده اجر عظيم اعداد ايدوبدر كه انك
عندنده دنيا وزينتى استحقاق اولنور * روايت اولنديكه اولوقته
پيغمبريمز عليه السلامك تحت نكاحنده طقوز خاتونى وار ايديكه انلرك
بشى قريشدن ايديكه اول عائشه بنت ابى بكر و حفصه بنت عمر و ام
حبيبه بنت ابى سفيان و ام سلمه بنت ابى اميه و سوده بنت زمعه ايدى *
ودردى ايسه قريشك غريدين ايديكه اول زينب بنت جحش الاسديه و ميمونه
بنت الحارث الهلاليه و صفيه بنت حيى بن اخطب الخيريه و جوهرية
بنت الحارث المصطلقيه ايدى رضوان الله تعالى عليهن اجمعين * وقتاكه
اشبو آية تخيير نازل اولدى پيغمبريمز صلى الله عليه وسلمه احب نسائى
عائشه رضي الله عنها ايدى اكا انى تلاوت ايدوب تخييرده انكله بدأ ايلدى

اول آيتديکه الله تعالى بي ورسولني ودار آخرتي اختيار ايدرين سارئي دخی
اکا متابعيت ايتديلر اول فعلاري عندالله مشكور اولديغندن انلر اوزره
قصر اولندي (لايحل لك النساء من بعد) يا محمد بونسا ئيکدنصکره
سکا نساء حلال اولمز دینلدی * تکیم بوسوره ده انک زیاده بیانی کاور
(یا نساء النبی من یأت منکن بفاحشة مبینة یضاعف لہا العذاب ضعفین)
یا پیغمبرم محمد علیہ السلامک خاتونلری سزدن اولکه پیغمبرک ذرعنی
تضییق وقلبی تحزین ایدر نشوز و سوء خلقدن معصیه ظاهره ایله کله
انلرک غیره اولان عذابک ایکی مثیلله عذاب اولنور * زیرا که سار نسادن
قبیح اولان شیء انلردن اقبح اولور شول اجلدنکه ذنبک زیاده قبحی
مذنبک فضل و نعمتی زیاده سنه تابع اولور * پس بوسیدین حرک حدی
عبدک حدی اوزره مضاعف قیلندی و انبیا غیرک عتاب اولندیغنی شیئله
عتاب اولندی (وکان ذلک علی الله یسیرا) اشبو فعل الله تعالی به آسان
اولدیکه زوجات نبی اولمری عذابلری تضعیفنی منع ایتمز اولدی (ومن یقت
منکن لله ورسوله و تعمل صالحا نؤتها اجرها مرتین واعتدنا لہا رزقا
کریمًا) و سزدن اولکه الله تعالینک ورسولنک امرینه اطاعت ایدوب
واعمال صالحیه مداومت ایدم بز اکا غیره ویردیکنمز اجرک ایکی مثلی
ویررز برینی طاعتی اوزره و برینی ایسه قناعت و حسن معاشرتله پیغمبریمز
علیه السلامک رضاسن طلبی اوزره و یریلوب جنتده اول اجری اوزره
زائد رزق کریم اعداد ایدرز (یا نساء النبی لسنن کاحد من النساء
ان اتقین) یا پیغمبرم خاتونلری اگر سز معاصیدن صاقنور والله تعالی به
ورسولنه اطاعت قیلور سکز بنم عندمده قدرکز سار نساء صالحات قدری
کی اولمز بلکه سز بکا اکرم و ثوابده اعظم اولور سز (فلا تخضعن
بالقول فیطمع الذی فی قلبه مرض) ایمدی رجاله جوابده کلامکزی
تلمین و صوتکزی ترقیق ایتمکز * زیرا ایدر سکز قلمبنده فجور و شهوت
ونفاق اولان طمع ایدر ایمدی نسیایه مندوبدرکه اجانبه سویلدیکنده
قطع اطماع ایچون مقالہ سنده غلظت ایدم (وقلن قولا معروفًا)
وقول معروف دیکز که انی دین ایجاب ایدم تصریح و بیانله لکن
حضور عنسز (و قرن فی بیوتکن) و بیوتکزده قرار ایدک (ولا تبرجن
تبرج الجاهلیة الاولى) و یوریدیکنکزده صالئمکز جاهلیة قدیمه

(زمانده)

زمانده کی نسا ئک صالئمسی کی * دینلدیکه اول زمان آدم و نوح مابیندر
و یاشول زماندرکه اندم ابراهیم علیہ السلام طوغدی اول زمانده برمرآه
اولؤدن درع کیوب یولک اورتہ سنده یورر وانکله کندوی رجاله عرض
ایدردی و جاهلیة اخرى عیسی و محمد علیهما السلام مابیندر * دینلدیکه
جاهلیة اولی جاهلیة کفردر که اسلامدن اول ایدی و جاهلیة اخرى ایسه
اسلامده کی جاهلیة فسوقدر (واقن الصلاة و آتین الزکاة و اطعن الله
ورسوله) و صلوات خسی ادا ایدک و مالکز اولدقدہ زکاتنی و یرک
الله تعالینک ورسولنک امر و نهینه اطاعت ایدک (انما یرید الله لیذهب
عنکم الرجس اهل البيت و یطهرکم تطهیرا) یا اهل بیت الله تعالی دیلر که
سزدن کیدره هر ذنبی که عرضکزی تدنیس ایدر وار جاسله تلوثدن سزی
تطهیر ایدم و اهل بیتله مراد بومحمد نساء نبی اولمسندن حدیث دلالتله
علی و فاطمه و حسن و حسین و غیرینک دخی اهل بیتدن اولسنی منافی اولمز
(واذ کرن مایلی فی بیوتکن من آیات الله و الحکمة) ذکر ایدک شول
بیوتکزده تلاوت اولنور کتابیکه آیات و حکمت بیدنی جامعدر اشبونکله
مراد انلره اولان انعامی تذکیردرکه انلری بیت نبوتہ اهل قیلدی و آثار
وحیدن مشاهده ایتدکری انوارله ایمانلری قویه و طاعتہ حرصلرینه
سبب قیلدی (ان الله کان لطیفًا خبیرًا) الله تعالی لطیف و خبیر اولدی
یلور و تدبیر ایدر انیکه دینه صالح اولور و انیکه نبوتہ صالح اولور
و انیکه اهل بیتدن اولمغه صالح اولور * روایت اولدیکه پیغمبریمز
صلی الله علیه وسلمک ازواجی رضی الله تعالی عنهن دیدیلر که
یا رسول الله قرآنده الله تعالی رجالی خیرله ذکر ایدوب نساء خیر
اولدیغندن ذکر ایتمامشدر برروایتده ازواج نبی علیہ السلام
شانلرنده ذکر اولسان آیات کریمه نازل اولیحق نساء مؤمنین دیدیلر که
بزم شانزده هیچ برشی نازل اولیوبدر اول سبیدن نازل اولدیکه
(ان المسلمین و المسلمات) رجال و نسادن انلر که سلمه داخل اولوب
الله تعالینک حکمنه انقیاد ایدرلر (و المؤمنین و المؤمنات) رجال و نسادن
انلر که تصدیق اولئمسی واجب هرشی تصدیق ایدرلر (و القانتین
و القانتات) رجال و نسادن انلر که طاعتہ مداومت ایدرلر
(و الصادقین و الصادقات) رجال و نسادن انلر که قول و عملده صدق

ایدرلر (والصابرين والصابرات) رجال ونسادن انلرکه طاعاتی ایشلرکه
ومعاصیدن صافتمغه صبر ایدرلر (والخاشعين والخاشعات) رجال ونسادن
انلرکه قلب وجوارح لایله لله تواضع ایدرلر (والتصدقین والمتصدقات)
رجال ونسادن انلرکه ماللرینک زکاتن ویررلر ونوافلی بخل ایتزلر *
دینلرکه برکسه کیم هر هفته ده بردرهم تصدق ایده اول متصدقیندن
اولور (والصائین والصائمات) رجال ونسادن شونلر که صوم
مفروضی ادا ایدرلر * دینلرکه برکسه کیم هر آیده ایام بیض صومنه
مداومت ایده اول صائمیندن اولور (والحافظین فروجهن والحافظات)
رجال ونسادن انلرکه فرج لایله حرامدن صافنورلر (والذاکرین الله کثیرا
والذاکرات) رجال ونسادن انلرکه قلب ولسانله الله تعالی بی ذکر
کثیر ایدرلر * دینلرکه برکسه کیم علم نافعه وتلاوت قرآنه ویا دعا یه
اشتغال وصلوات خسی اتمام آرکان وسنتله ادا یه مواظبت ایده اول الله
تعالی یه ذکر کثیر ایدنلر دن اولور (اعد الله لهم مغفرة واجرا عظیما)
رجال ونسادن اشبو خصالی تدرع ایدنلر ایچون اقتراف ایتدکری
صغائر نرینه مغفرت وطاعتلری اوزره اجر عظیم اعداد ایتدی
(وما کان لمؤمن ولا مؤمنة اذا قضی الله ورسوله امرا ان یکون لهم
الخیره من امرهم) هیچ بر مؤمن ومؤمنه یه صحیح اولمز که الله تعالی
ورسولی برامری قضا ایتدیکنده انلر امر لردن دیلدکری شیئی اختیار
ایدهلر بلکه اوزر لرینه واجب اولور که اختیار لرینی الله تعالی ورسولنک
اختیارینه تبع قیلهلر (ومن بعض الله ورسوله فقد ضل ضلالا مبینا)
اول مکسه که الله تعالی ورسولنک اختیارینه مخالفت ایده شول صوابدن
انحرافی ظاهر ضلالته ایرر * روایت اولندیکه اشبو آیت زینب بنت
جحش الاسدیله قرنداشی عبد الله بن جحش شاننده نازل اولوبدرکه
انلری امیمه بنت عبد المطلب اولوب پیغمبریمز صلی الله تعالی علیه وسلمک
عهه سیدر * وقتا که پیغمبریمز علیه السلام زینب رضی الله عنهای
زید بن حارثه ایچون خطبه ایتدی حالبو که پیغمبریمز علیه السلام
زید رضی الله عنهی زمان جاهلیته سوق عکاظده اشترا واعتاق وتبئی
ایتمشدی زینب وکک قرنداشی اندن اباء ایتدیلر اول سبیدن بوآیت
نازل اولیچق زینب وکک قرنداشی اکا رضا ویردیلر او یله اولسه

(پیغمبریمز)

پیغمبریمز علیه السلام انی زیده انکاح ایدوب زید قبلندن اکا مهر
ایچون التمش درهم وخجار وملحفه ودرع وازار واللی مدطعام واولوز
صاع تمر کوندردی برمدت زینب زیدک تحت نکاحنده قالدی * روایت
اولندیکه بوندنصکره پیغمبریمز صلی الله علیه وسلم برکون بعض
حاجتییچون زید رضی الله عنه یه کلدی انده زینب رضی الله عنهای کوردیکه
اول درع وخجارله طورردی حالبو که اول بیضاء جیلله اولوب نساء
قربشک اتمندن ایدی انک حسنی پیغمبریمز صلی الله علیه وسلمی اعجاب
وقلبی اکا میل ایدوب سبحان الله مقلب القلوب دیدی اندن چیقوب
کتدی بعده زید کلوب زینب اکا پیغمبریمز علیه السلامک مجی
ومقاله سنی ذکر ایتدی زید رضی الله عنه پیغمبریمز علیه السلامک انکله
مرادین تظنن ایدوب اول حینده قلبنه زینبدن ککراحت کلدی
پیغمبریمز علیه السلامه کلوب دیدیکه یارسول الله دیلرینکه زینبدن
مفارقت ایدم دیدیکه سکا نولدی انی نیچون استمز اولدک اول دیدی
یارسول الله انک خیرندن غیری برشین کورمدم الابو که شریفله اوزریمه
تعظم ولسانیه بکا اذا ایدر پیغمبریمز علیه السلام زیده دیدیکه
زوجه کی امساک وشاننده الله تعالیدن خوف ایت بوندنصکره زید انی
تطریق ایتدی اول امرده نازل اولدیکه (واذ تقول للذی انعم الله علیه
وانعمت علیه امساک علیک زوجک واتق الله) یا محمد ذکر ایت شول
وقتیکه الله تعالی اسلامی وسکا انک عتقی توفیقله اکا انعام وسکا توفیق
اولسان شیلله انعام ایتدیکک زید بن حارثه یه دیدککه زوجه ک زینبی
امساک ایت والله تعالیدن قورقوب ضرار ایلله وتکبرنی تعلل ایلله تطریق
ایتمکل (وتخفی فی نفسک ما الله مبدیه) ونفسکده اخفا ایدرسن انیکه
الله تعالی اظهار ایدیسردرکه اول زید انی تطریق ایدرسه سن نکاحلیه سن
(وتخشی الناس والله احق ان تخشیه) وناسک انکله سنی تعیرندن
خوف ایدرسن والخال انده خوف اولنور شیء وار ایسه خوف اولتمغه
الله تعالی احقدر * اشبو عتاب یالکز انی اخفاسی اوزره دکدر زیرا که
اول حسندر بلکه عتاب ناسک مقاله سی خوفیه اضمارینه منافی شیئی
اظهارینه در زیرا بونک امثالنده اولی صامت اولق ویا اول امری
الله تعالی یه تفویض ایتک ایدی * عائشه رضی الله عنها ایدر اکر

پیغمبریز علیه السلام اکا نازل اولاندن برشی کتم ایدر اولسه بوآیتی کتم
ایدردی علی بن حسین رضی الله عنه ایدر الله تعالی اکا بیلدرمشدیکه اول انک
ازواجندن اولسر ایدیکنی وزید انی تطلیق ایدیسرایدیکنی وقتاکه زید اکا
کلوب بن انی تطلیق مراد ایدرم دیدیکنده اول اکا زوجه کی امساک ایت
دیدیکی اوزره الله تعالی اکا عتاب ایتدی یعنی نیچون انی دیدک حالبوکه بن
سکا اول سنک ازواجکدن اولسر ایدیکن بیلدرمشدم و پیغمبریز علیه السلام
ایسه استخیا ایتدیکه زیده شول سنک تحت نکاحکده اولان زینب
بنم ازواجندن اولسر در دیه اول اجلدن انی اخفا ایلسه اشبو قول حسن
مرضیدر حال انبیایه البق واولی در اگرچه قول آخر دخی حال انبیایه
قدح ویرمز ایسه ده که اول انک محبتنی ویا زید انی تطلیق ایدر سه نکاحنی
اراده سین اخفا ایتشدی زیرا که عبد بونک کبی اشیانک قلبه وقوعی
اوزره لوم اولمز مادامکه انده مأثم قصد اولمیه * زیرا که ود و میل نفس
طبع بشر دندر وقتاکه زید انی تطلیق ایدوب عدتی منقضیه اولدی
پیغمبریز صلی الله علیه وسلم زیده دیدیکه سن بکا سارندن او تقسن
ایمدی زینبه واروب انی بکا خطبه ایت زید ایدر اولیه اولسه واروب
انی خیرین یوغورر بولدم ظهرم اکا دوندیروب دیدمکه یازینب سکا
بشارت اولسونکه رسول الله صلی الله علیه وسلم سنی نکاح خلق دبلر
سن نه دیرسن سونوب دیدیکه ربم جل شانہ ایلہ مؤامره ایتینجه برشی
ایدر دکان اندن مصلاسنه واروب نمازه طوردی اولیه اولسه پیغمبریز
علیه السلامه نازل اولدیکه (فلما قضی زید منها وطرا زوجناکها)
وقتاکه زید اندن حاجتن اتمام ایتدی بز سکا انی تزویج ایتدک عقد
واسطه سنسز * پس بواجلدن زینب رضی الله عنها سائر ازواج نبی اوزه
افتخار ایدوب دیردیکه سنک انکاحکزه اولیا کز تولی ایدوب بنم انکاحه
الله تعالی تولی ایتدی دینلدیکه زینب رضی الله عنها پیغمبریز علیه
السلامه دیردیکه بن سکا اوج خصلتله ادلال ایدرینکه نسائک هیچ
بری انکله ادلاله چاره لری یوقدر بنم جدم و سنک جدک بردر و بنی سکا
الله تعالی انکاح ایتدی وسفیرم جبریل علیه السلامدر روایت اولندیکه
پیغمبریز علیه السلام اکا عقدنسنز واستئذانسز داخل اولدی و پیغمبریز
علیه السلام انکچون ایتدیکی ولیه بی نسائندن هیچ بریچون انی ایتدی

(لکیلا)

(لکیلا یكون علی المؤمنین حرج فی ازواج ادعیائهم اذا قضوا منهن وطرا)
تاکه مؤمنله اوغل ایدندکاری کیمسنه لک زوجه لرینی تزوجه حرج اولیه
قچانکه اول اوغل ایدیلنر اول زوجه لرندن قضاء وطر ایده لر ایددی
بودیلدرکه پیغمبریز علیه السلام حکمی وامتک حکمی واحد اوله مادامکه
دلیلله اکا مختص شی اولیه وکشی اوغل ایدندیکنی کیمسنه نک زوجه سنی
تزویج حلال اوله صلبی اوغلنک زوجه سنی دکل (وکان امر الله مفعولا)
الله تعالینک تکوینن اراده ایتدیکنی امر لابد مکون اولور حالبوکه زینبی
پیغمبریز علیه السلام تزویج ایتسنی قضا ایتشدی (ما کان علی النبی من حرج
فیما فرض الله له) الله تعالینک پیغمبریز علیه السلام ایچون ایجاب و قیمت
ایدیکنده اوزرینه حرج قیلدی (سنة الله فی الذین خلوا من قبل) الله تعالی
سندن اوکدین بکن انبیایه باب نکاحده حرج ومؤاخذه سز اباحه
وتوسیعی سنت ایتدیکه انلرک نسائی سندن اکثر ایدی داود علیه السلام
کبی که یوز مرأه سی و اوچیوز سریه سی وار ایدی وسلیمان علیه السلام
کبی که اوچیوز مرأه سی ویدیوز سریه سی وار ایدی (وکان امر الله
قدرا مقدورا) الله تعالینک امری قضاء مقضی و حکم مبتوت اولدی
(الذین یبلغون رسالات الله ویخشونه ولا یخشون احدا الا الله) که انلر الله
تعالینک رسالاتنی ناسه ایرکوررلر واندن خوف ایدرلر انک غیری هیچ
کیمسه دن خوف ایتزلر (وکنی بالله حسیبا) الله تعالی مخاوف دفعنه ویا صغیره
ویا کبیره بی محاسبه کفی اولدی اولیه اولیه اولسه لایق دکلدرکه انک غیری دن
خوف ایدیله (ما کان محمد ابا احد من رجالکم) محمد علیه السلام سنک
رجالکزدن هیچ کیمسه نک باباسی اولدیکه انکله سزدن بر رجل بیننده حرمة
مصاهره ثابت اوله و تبنی ایتدیکنی کیمسه نک زوجه سی افتراق وانقضاء
عدتدنصکره نکاحی حلال اولیه زیرا که تبنی ایتدیکنی کیمسه یه اول حقیقتده
بابا اولسنی ایجاب ایتمز و بونک عمومنی انک طاهر وقاسم و ابراهیم بابا اولسن نقض
ایتمز زیرا که رجال حدینه ایرمشلردر ایرمش اولسه لر دخی انلرک رجالندن
دکلر ایدی (ولکن رسول الله) لکن اول الله تعالینک رسولی اولدی و هر
رسول ایسه امتک باباسیدر اما که مطلق دکل بلکه شول حیثیتدنکه اول انلره
شفیق ناصحدر اوزرلرینه انی توقیر واکا اطاعتلری واجبدر زید ایسه انلرک

بريد (وخاتم النبیین) وپیغمبر لک آخری اولدی اول اجلدن انک او غلاری
معمر اولدی بلر معمور اولسه لر پیغمبر اولی سرلردی انک بو وصفنه آخر زمانده
عیسی علیه السلامک نزولی قدح ویرمزیرا که اول نزول ایتدکننده پیغمبریمز
صلی الله علیه وسلمک دین وشریعتی اوزره اولی سردر و نمازی انجیلین
کعبه یه قلیسر در و یاخود اول بنفسه انبیای ختم ایلدی که اندنصر کرده
کیمسه یه نبوت ویرلز عیسی علیه السلامه ایسه پیغمبریمز علیه السلامدن
او کدین نبوت ویرلشدی (وکان الله بكل شیء علیم) الله تعالی هر شیئه
علیم اولدی ختم نبوت ته نه کیمسه لایق ایدیکن بیلور (یا ایها الذین آمنوا
اذکرو الله ذکر اکثیرا) یا مؤمنر الله تعالی یه لایق ضرور ثنا ایله هر حالده
ذکر دائم ایدک ابن عباس رضی الله تعالی عنهما ایدر عبادی اوزره هر فرض
ایتدیکی فریضه یه بر حد معلوم قیلوب بعده عذر حالنده اهلنی معذور
ایتدی الا ذکر ی دکل بلکه انکی چون نهایت و هیچ بر عذرله انی ترکه غایت
قیلدی مادامکه مکلف مغلوب العقل اولیه بلکه جیع احوالده اکا مداومت
امر ایلدی دیدیکه (فاذکرو الله قیاما و قعودا و علی جنوبکم) طورر
واو تورر و یا ترکن الله تعالی یی ذکر ایدک و دخی دیدیکه (اذکرو الله
ذکر اکثیرا) الله تعالی یی لیل و نهارده برده و بجرده صحت و سقمده
سرت و علانیه ده ذکر ایدک * دینلیدی که ذکر کثیر اولدر که انی ابدان و نومیه
(و سبحوه بکرة و اصیلا) و انی نهارک اولنده و آخرنده تسبیح ایدک اول
ایکی وقت ملائکه نک حضورینه وقت اولدیغی چون ذکرده تخصیص
ایتدی * دینلیدی که بکرة ایله مراد صلاة صبحدر و اصیلا مراد صلاة
ظهر و عشا یندر * دینلیدی که یعنی (سبحان الله و الحمد لله و لا اله الا الله
والله اکبر و لا حول و لا قوۃ الا بالله) دیکر تسبیح عمده اولدیغی چون
اخوانندن دخی انکه تعبیر اولندی * دینلیدی که ذکر کثیرله مراد
اشبو کلماتدر که انی طاهر و محدث و جنب دیر (هو الذی یصلی
علیکم و ملائکته) اول الله تعالی و ملائکه سی سزه صلاة ایدر
ایمدی الله تعالی نک مؤمنلره صلاتی رحیدر و ملائکه نک
انلره صلاتی استغفار یدر دینلیدی که الله تعالی نک عبیدنه صلاتی
انک ذکر جیلنی عبادی بینده اشاعه سیدر (ایخرجکم من الظلمات

(الی النور)

الی النور) تا که سزی کفر و معصیت ظلماتدن ایمان و طاعات نورینه اخراج
ایده (وکان بالمؤمنین رحمیا) اول الله تعالی مؤمنلره رحیم اولدی حتی که
صلاح امر و رفعت قدرلرینی اعتنا ایدوب انلرک شاننده ملائکه مقربینی
استعمال ایتدی (تحتهم يوم یلقونه سلام) الله تعالی نک مؤمنلره تحتی
سلامدر شول کونده که موتله و یا قبردن خروجله و یا جنته دخولله اکا ملاقی
اولورلر و یاخود جیع آفاتدن انلری سالم قیلور و یاخود ملک الموت ملاقی
اولدقلرنده اول انلره سلام و یرر * دینلیدی که ملک الموت مؤمنک روحنی
قبضه کلدیکنده رب تعالی دن اکا سلام ایرکورر و یا قبردن چیققلرنده
ملائکه انلره سلام ایدوب جنت و کرامتله تبشیر ایدرلر (واعدلهم اجرا
کریمیا) و انلر ایچون اجر کریم اعداد ایتدی که اول جنتدر (یا ایها النبی
انا ارسلناک شاهدا) یا محمد بزنی بعث ایتدی کمز اقوامه تصدیق و تکذیب لینه
ورسوللرک رسالتی تبلیغ لینه شاهد کوندردک (و مبشرا و نذیرا) و مؤمنلره
جنتله تبشیر و مکذبلره نار ایله تحذیر ایدسن (وداعیا الی الله باذنه) والله
تعالی نک تبشیر یله انک توحید و طاعتنه دعوت ایدسن (وسراجا منیرا)
ودینده سننکه اهتدا ایچون ناسه سنی سراج منیر کوندردک که ظلمات
جهالتدن سننکه استضاء و نور کدن انوار بصائر اقتباس ایدرلر (وبشرا المؤمنین
بان لهم من الله فضلا کبیرا) و مؤمنلره تبشیر ایتکه الله تعالی دن انلر ایچون
سائر امتلر اوزره و یا اعمال صالحه لری اوزره فضل کبیر واردر (ولا تطع
الکافرین و المنافقین و دع اذیهم) و صدندن اولدیغک دعوت اوزره
ثابت اولوب شریعتکه مخالف امورده کافرله و منافقله اطاعت
ایتمکل و اذالرینه صبر ایدوب تاسکا امر اولمیجه مجازاتی ترک ایلکل
(وتوکل علی الله) والله تعالی یه توکل ایتکه اول سنکی چون انلردن
انتقامه کفایت ایدر (وکفی بالله وکیلا) جیع احوالده امر که الله تعالی
سکا وکیل یتر امور یکی اکا تفویض ایت غیریه دکل (یا ایها الذین
آمنوا اذا نکتتم المؤمنات ثم طلقتموهن من قبل ان یمسوهن فالحکم علیهن
من عدۃ تعتدونها فتموهن و سرحوهن سراجا جیلا) یا مؤمنلر قحان
مؤمنه لری نکاحلنوبده بعده انلری جعاع ایتزدن او کدین انلری تطلیق
ایسه کز ایمدی سزیکون اول مطلقدر اوزره عدت یوقدر که انک عددنی

استيفاء ايدملر اويله اولسه انلره متعه ويرك اكر انلر ايچون صداق تسميه
ايتامشسكز اكر ايتامشسكز اول مسمانك نصفي واجب اولور يوخسه متعه
دكل وانلره اضرارنسز سييلاريني تخليه ايدك اشبو دليلدر كه نكاحدن
اول اولان طلاق واقع اوليه زيرا كه الله تعالى طلاق نكاح اوزره ترتيب
ايتدى حتى اكر برمرأه اجنبيه سنى نكاحلنديغمده بدن طالقسن ديسه
وياخود هرمرأه كه نكاحلندم اول بدن طالقدر ديسه طلاق واقع اولز *
اشبو على وابن عباس وجابر ومعاذ وعائشه قوليدر تابعين وغيردين جماعت
كثيره وشافعى واكثر علماء اكا ذاهبلردر * ابن مسعود رضى الله عنهدن
مرويدر كه طلاق واقع اولور اول ابراهيم النخعي وائمة حنفيه قوليدر ربيعه
ومالك واوزاعى ايدر اكر برمرأه تعين ايدرسه واقع اولور تعميم ايدرسه
واقع اولز * عكرمه ابن عباسدن روايت ايدر ديمشكه ابن مسعود اوزره
اول قول افترادر ديمش اولديغى تقدير اوزره طالمدن زله در زيرا كه
الله تعالى مؤمناتى نكاحلنديغكز دنصكره تطبيق ايدرسكز ديدى يوخسه
تطبيق ايدوب صكره نكاحلنورسكز ديمدى جابر رضى الله عنه ايدر (قال
النبي عليه السلام لا طلاق قبل النكاح) پيغمبريمز صلى الله عليه وسلم ديديكه
نكاحدن اول اولان طلاق واقع اولز (يا ايها النبي انا احللنا لك ازواجك
اللاتى آتيت اجورهن) يا محمد سكا حلال ايتدك شول ازواجكى كه انلره
مهرلريني ويردك وياحين عقدده تقدير ايتدك زيرا كه اول ترك تسميه دن
افضلدر اكرچه آنسز اولان عقد دخی جائز ايسه ده (وما ملكت يمينك مما افاء
الله عليك) وكذلك سكا حلال ايتدك هر جاريه يي كه كفاردن سبي ايله الله
تعالى انى سكا في ايتديكندن يمينك اكا مالك اولدى صفيه وجوريه كبي
(وبنات عمك وبنات عماتك وبنات خالك وبنات خالاتك اللاتي هاجرن
معك) وكذلك سكا حلال ايلدك بنات عمكى وبنات عماتكى وبنات خالكى
وبنات خالاتكى كه سنكله بيله مدينه يه هجر ايتديلر زيرا كه هجرت ايتميرك
نكاحى اكا حلال دكل ايدى مكه قهندنصكره نكاحده هجرت شرطى
نسوخ اولندى (وامرأة مؤمنة ان وهبت نفسها للنبي) وكذلك
سكا حلال ايتدك شول مرأه مؤمنه يي كه نفسنى سكا هبه ايده مهر طلب
ايتيه يعنى اكر بو حال واقع اولورسه بعضيلر ديديكه اول واقع اولوبدر

(لكن)

لكن اول واهبهك ذاتنده اختلاف اولنوب ديلديكه اول ميمونه بنت
الحارثه ويازينب بنت خزيمة الانصارية ويا ام شريك بنت جابر وياخويله
بنت حكيم ايدى (ان اراد النبي ان يستنكحها) اكر نبى عليه السلام
انك نكاحن مراد ايدرسه زيرا اول نفسنى هبه ايتسى حلى ايجاب
ايتز مادامكه اول انك نكاحن اراده ايتيه زيرا كه انك اراده سى قبول
مجراسنه جاريه در (خالصة لك من دون المؤمنين) مرأهك نفسنى
هبه ايتسيه مهرنسز حلال اولق سكا مختص خصلت قلندى يوخسه
اول مؤمنلره حلال قلندى (قد علمنا ما فرضنا عليهم فى ازواجهم
وما ملكت ايمانهم) مؤمنلر اوزره نسالى حقنده شرائط عقددن
ووجوب قسمدن ووطئه مهر وجوبندن اكرچه تسميه اولنديسه ده
ودردن اكثرى جمعك تحريمندن ويميلرى مالك اولديغى اماده توسيع
امردن ايجاب ايتديكمزى بيلشز (لكيلا يكون عليك حرج) يا محمد ذكر
اولنان خصالى سنكچون خالص ايتدك مؤمنلره تعميم ايتدك تاكه سكا ضيق
اوليه (وكان الله غفورا رحيم) الله تعالى شول تحوزى عسير اولان
شئى مغفرت ايدر ومظان حرجده توسعه ايله رجعت ايدر (ترجى من تشاء
منهن وتؤوى اليك من تشاء) نساككدن ديلديكى تأخير ومضاجعه سنى
ترك ايدرسن وديلديككى كندوكه ضم ومضاجعه ايدرسن ويا انلردن
ديلديككى تطبيق وديلديككى امساك ايدرسن * اشبو آيتك معناسنده
وسبب نزولنده مفسرون اختلاف ايتديلر اشهر اقاويل اولدر كه نساى
بيننده قسم واجب ايدى بو آيت نازل اوليحق اول اندن ساقط اولوب نساى
امرند اختيار اكا تفويض اولندى * ديلديكه امهات مؤمنينك نساكك
بعضى پيغمبريمز عليه السلامدن زياده نفقه طلب ايديجك اول انلرى
برأى هجر ايدوب حتى كه تخيير آيتى نازل اولدى امر الهى اولديكه انلرى
دنيا و آخرت بيننده تخيير ايده دنيايى اختيار ايدندن مفارقت ايده
والله تعالى ورسولن اختيار ايدنى امساك ايده شول شرط اوزره كيم امهات
مؤمنين اولوب ابدانكاح اولتميلر وديلديكيله مضاجعه ايده وديلديكندن
مضاجعه يي ترك ايده اويله اولسه اكا رضا ويرديلر يارسول الله مالكد
ونفسكده بزم شاتمزد ايشلكل انيكه ديلرسن بزه تحت نكاحكده اولق
شرف يتر غيريسن نيلرز ديديلر بناء عليه نساككدن عائشه رضى الله عنها

وحفصه وزینب وجویریہ ایچون دیلدیکنده قسم ایدردی (ومن ابتغیت من عزلت فلا جناح علیک) وشول مرأه که انی قسمندن عزل ایتشیکن کیرو انی کندو که ایوانی طلب ایدهن سکا انده خرج یوقدر (ذلک ادنی ان تقر اعینهن ولا یحزنن ویرضین بما آتیتهن کلهن) یا محمد اشبو تخیر که نسائک صحتده مشیتکه تفویض اولمشدر انلرک قره عیوننه وقلة حزننه وحسن رضاسنه اقربدر تقرب وارچاه وعزل وایواء دن قنغیسن انلره اعطا ایدرسن ایت انده کایسنک حکمی مساویدر بوندنصکره بیلرین تسویه ایدرسک انی سندن فضل بولورلر واکر بعضیلرین ترجیح ایدرسک انی الله تعالیکن حکمیله بیلورلر (والله یعلم مافی قلوبکم) الله تعالی قلوبکرده اولان احسان واساءتی بیلور ایددی سز احسانه چالشک (وکان الله علیما حلیم) الله تعالی صدورده اولانی بیلور عقوبته عجله ایتز حلم ایدرا ایددی لائق واحقدر که اندن قورقله (لا یحللک النساء من بعد) یا محمد سکا اشبو طقوز نساء کدنصکره نساء حلال اولز که سن انلری تخیر ایتدیکنده سنی اختیار ایتدیلر ویاخود طقوز اوزره زیاده حلال اولز زیرا انک حقنده طقوز بزم حقمرده درت کبیدر ویاخود بوکوندنصکره سکا مرأه نکاحی حلال اولز حتی اگر انلرک بری وفات ایتسه مرأه اخری تزوجی اکا حلال اولزدی (ولا ان تبدل بهن من ازواج ولو اعجبک حسنهن) وکذلک سکا حلال اولز که اشبو ازواجکدن برینی تطلیق ایدوب یرینه مرأه اخری نکاحلنه سن اگرچه اول مرأه اخرانک حسنی سنی اعجاب ایدرسده ویاخود سکا حلال قیلنسان اجناس اربعه دنصکره اجناس آخردن اولان نسائک نکاحی ویا اول اجناس آخره تبدیلی حلال اولز (الا مملکت یمینک) مکرکه سربیه لردن اولکه یمینک مالک اوله اول سکا حلال اولور (وکان الله علی کل شیء رقیبا) الله تعالی هرشیئه حفیظ اولدی ایددی سز امر اولنانی رعایت وحدودی تخطیدن نفسکزی حراست ایدک * اشبو آیتده دلالت وارد که نکاحی مراد اولنان مرأیه نظر جائز اوله (قال النبی علیه السلام اذا خطب احدکم المرأة فان استطاع ان ینظر الی ما یدعوه الی نکاحها فلیفعل) پیغمبریمز صلی الله تعالی علیه وسلم ایدر لجن بریکز بر مرأیه نکاحلنق دیلیه استطاعتی اولورسه که انک نکاحنه داعی

اولان شیئه نظر ایده (یا ایها الذین آمنوا لا تدخلوا بیوت النبی الا ان یؤذن لکم الی طعام) یا مؤمنلر نبی الله صلی الله علیه وسلمک بیوته کیرمکر مکر شول وقتده که طعامه دعوت اولنه سز (غیر ناظرین اناه) طعامک ادراکی وقتنه منتظر اولمدیغکرز حالده * ابن عباس رضی الله عنهما ایدر اشبو آیت ناسدن برجاعت شاننده نازل اولوبدر که انلر رسول الله علیه السلامک طعامی وقتن کوزده دوب طعامدن اول انک بیتنه کیرلردی طعام ایریشجه انده اوتورلردی ویدکارندن صکره کیتزلر انده قالورلردی پیغمبریمز علیه السلام ایسه اندن متأذی اولوردی اول اجلدن بوآیت نزولیه اندن نهی اولندیلر (ولکن اذا دعیتم فادخلوا فاذا طعتم فانثشروا) لکن دعوت اولندیغکرده کیرک طعامی یچک طاغیلک (ولامستأنسین لحديث) ودخی بری برلرکیزک ویا اهل بیتک حدیثله استئناس ایچون دخی کیرمکر واندن مکث ایتکر (ان ذلکم کان یؤذی النبی فلیستحی منکم والله لا یستحی من الحق) سزک اکلدنصکره انده مکشکر نبی الله علیه السلامه اداء ایدر زیرا که اکا واهلنه منزلی تضییق ایدرسز اول ایسه سز چیقک دیمکه استخیا ایدر والحال الله تعالی سزدن حیا ایدوب حق وصوابی سز تعریفدن امتناع ایتز سز چیمغه امرله تأدیبی ترک ایتز (واذا سألتموهن متاعا فاسئلهن من وراء حجاب) وچنانکه ازواج نبی علیه السلامدن بر حاجت سؤال ایدر اولسه کر انی پرده آردندن سؤال ایلکر * اشبو حکم نزولدنصکره اجانبدن هیچ کسه یه جائز اولمدیکه نساء نبیه نقابله ونقابسز نظر ایلیه (ذلکم اطهر لقلوبکم وقلوبهن) ایددی نساء ندیدن حاجتکزی وراء حجابدن طلب ایتکر سزک قلوبکزی وانلرک قلوبنی خواطر شیطانیه دن اطهردر (وما کان لکم ان تؤذوا رسول الله) وسز جائز اولز که رسول الله علیه السلامی اشیادن برشیئه اذا ایده سز (ولا ان تنکحوا ازواجه من بعده ابدا) وکذلک سز جائز اولز که رسول الله علیه السلامک موتدنصکره انک ازواجنی نکاحلنه سز (ان ذلکم کان عند الله عظیما) رسول الله علیه السلامه اذا وازواجنی انکاح الله تعالی عندنده ذنب عظیم اولدی اشبونده الله تعالیدن رسول الله صلی الله علیه وسلمک حیات ومماتده حرمتنی ایجاب دلالت وارد

(ان تبدوا شيئا او تخفوه فان الله كان بكل شيء عليا) اكر سز رسول الله عليه السلامه اذا ايدر شي اظهار ويا صدور كزده اسرار ايد سز الله تعالى هر شيئه عليم اولدى * وقتا كه آيت حجاب نازل اولدى آباء و ابناء واقارب ديدلر كه بز دخي اجانب كي وراء حجاب نمي سويلش سز اول سببدن نازل اولديكه (لا جناح عليهن في آباتهن ولا اباتهن ولا اخوانهن ولا ابناء اخوانهن ولا ابناء اخواتهن) نساء نبى و نساء مؤمنين اوزره و بال يوقدر كه آباء و ابناء و اخوه و ابناء اخوه و ابناء اخواتهن ترك ايدلر (ولا نسائهن ولا ما ملكت ايمانهن) وكذلك نساء مسلماتن و ملكارنده كي عبيد و اماء دن بر قوله خاصة اماء دن احتجابي ترك ايدلر سورة نوره ذكرى پكمشدر بو محله عم و خال ذكر اولمدي زيرا اول ايكي سى والد و والده منزلنده در و يا خود اول ايكي سندن احتجاب تركي مكروه اولدى شول خوفله كيم اوغلرينه انلرى وصف ايدلر (و اتقين الله) احتجابدن امر اولنديغ كزده مخالفاتن الله تعالىدن خوف ايدك (ان الله كان على كل شيء شهيدا) الله تعالى سر و علن و حجابك ظاهر و باطنندن هر شيئه رقيبدر اكا هيچ خافيه خفي اولمز (ان الله و ملائكته يصلون على النبي) الله تعالى و ملائكه سى نبى اللهه صلاة ايدر (يا ايها الذين آمنوا صلوا عليه وسلموا تسليما) يا مؤمنلر ايمدى سز دخي اكا صلاة و سلام ايدك * دينلديكه صلاة الله تعالىدن رحمت و ملائكه دن استغفار و مؤمنلردن دعادر دينلديكه الله تعالىدن اكا صلاتي ملائكه عندنده ثابدر و ملائكه نك صلاتي اكا دعا ليدر پيغمبريمز صلى الله عليه وسلمه سؤال اولنديكه يا رسول الله سكا نيچه صلاة ايدرز ايتدى ديكزكه (اللهم صل على محمد و على آل محمد) و دخي ديديكه (صلوا على فان الصلاة على زكاة لكم) بكا صلاة ايدك كه بكا صلاتك سز چكون زكاتدر و دخي ديديكه (اولى الناس بي يوم القيامة اكثرهم على صلاة) يوم قيامتده بكا ناسك اولى سى بكا صلاتي اكثر اولانك زدر و دخي ديديكه (من صلى على واحدة صلى الله عليه عشرين) بر كسه كه بكا بر صلاة ايد الله تعالى اكا اون صلاة ايدر و دخي ديديكه (من صلى على صلاة صلت عليه الملائكة ما صلى على فليقل العبد

(من)

من ذلك اوليكتر) بر كسه كه بكا صلاة ايد بكا اول صلاة ايتديكه ملائكه اكا صلاة ايدر ايمدى عبد ديلرسه انى اقلال ويا اكثار ايتسون و دخي ديديكه (ان الله ملائكة سياحين فى الارض يبلغوننى عن امتى السلام) الله تعالىنك ريوزنده سياحت ايدر ملائكه سى واردركه امتدن سلام اير كورلر علمانك بعضى ديديكه پيغمبريمز صلى الله عليه وسلمه صلاة واجب اولور هر باركه اول ذكر اولنه شول قول شريفى دلالتيله كيم (من ذكرت عنده فلم يصل على دخل النار) بر كسه كيم بن انك قنده ذكر اولنوب اول بكا صلاة ايتيه ناره كيرر و بعضيلر ديديكه اول هر مجلسده بر كره واجب اولور اكر انده ذكرى تكرار اولنور سه ده سجده تلاوت و تشميت طمس كي و بعضيلر ديديكه اكا صلاة عمرده بر كره واجب اولور و اما نمازده اكا صلاة ابوحنيفه عندنده شرط دكلدر شافعى عندنده شرطدر و پيغمبريمز صلى الله عليه وسلمك غيريه اكا تبعيته صلاة جائز اولور اما استقلاللا مكروه اولور زيرا اول عرفده رسل ذكرينه شعار قبلندى اول اجلدن محمد عز وجل دينلك مكروه اولدى اكر چه اول عزيز و جليل ايسه ده (ان الذين يؤذون الله و رسوله) شونلر كه الله تعالى ورسولى كراهت ايتديكى كفر و معاصى ارتكابلر انلره ايداء ايد * ابن عباس رضى الله عنهما ايدركه انلر يهود و نصارى و مشركوندر اما يهود ديدلر كه عزيز ابن الاهددر ويد الله مغلولدر و الله تعالى فقيردر و نصارى ديدلر كه مسيح ابن الاهددر و الله تعالى ثالث ثلاثه در و مشركون ديدلر كه ملائكه بنات الاهددر و اصنام اكا شركادر (قال النبي صلى الله عليه وسلم قال الله تعالى يؤذيني ابن آدم يسب الدهر و انا الدهر اقلب الليل و النهار) پيغمبريمز صلى الله عليه وسلم ايدر الله تعالى ديديكه ابن آدم دهري سبله بكا ايداء ايدركه بن دهمله متصفن ليل و نهاري تقليب ايدرين (قال النبي عليه السلام يقول الله تعالى و من اظلم من ذهب يخلق كخلقى فليخلقوا ذرة او ليخلقوا حبة او شعيرة) پيغمبريمز عليه السلام ايدر الله تعالى ديركه شول كسه دن اظلم نه كسه دركه بنم خلقم كي شي تصوير ايتيكه كبده ايمدى بنم كي بر ذره ويا بر حبه ويا بر شعيره خلق ايتسونلر بعضيلر ديديكه الله تعالى به ايداء ايله مراد اسماء و صفاتنده الحاد ايتلريد و يا خود انك اولياسنه ايداءدر (قال قال الله تعالى من عادى

لی ولیا فقد آذنته بالحرب وقال من اهان لی ولیا فقد رزنی بالمحاربة)
پیغمبریمز علیه السلام ایدر الله تعالی دیرکه برکسنه کیم بنم بر ولیه عداوت
ایده بن اکا حربیه ایدان ایدم واولکه بنم بر ولیه اهانته ایده اول
بنله محاربیه مبارزه ایدر وایده رسولله مراد انک وجهنی شیخ ورباعیه سنی
کسر ایتلیدر ویا اکا ساحر شاعر معلم مجنون دیملیدر (لعنهم الله
فی الدنيا والآخرة واعدلهم عذابا مهینا) الله تعالی انلری دنیاده وآخرته
رجتندن ابعاد وانلر ایچون عذاب مهین اعداد ایتدی (والذین یؤذون
المؤمنین والمؤمنات بغير ما اکتسبوا فقد احمقوا بهتانا واثما مبینا)
شونلرکه مؤمنلره و مؤمنلره اکتساب ایتدکاری جنایتی اسنادله ایدان
ایدلر ایمدی انلر بهتان واثم ظاهر تحمل ایدلر دینلرکه اشبو آیت
علی بن ابی طالب کرم الله وجهه شائنده نازل اولوبدرکه منافقلر
اکا ایدان ایدوب انی ناسه ایشتدیرلر دی ویا اهل افک شائنده درکه
قصه سی سوره نوره کچوبدر ویاخود شول زناه شائنده درکه شول
زندان کراحت ایدر نسانک اردینه دوشوب کیدرلر دی (یا ایها النبی
قل لا زاوجک وبناتک و نساء المؤمنین یدنین علیهن من جلا بیهن)
یانبی الله زوجاتکه وبناتکه و نساء مؤمنینه دیکل که حاجتلر ایچون
طشره چیقار اولدقلرنده یوزلر بنی ملحقه لریله اورتسونلر * روایت
اولندیکه زمان جاهلیته و اوائل اسلامده نساء درع و خمارله روز
ایدوب حرار امادن تمیز ایتلر دی اولیه اولسه کچه قضاء حاجته
چیققلرنده اهل شطاره انلره تعرض ایدرلر دی بزانی امادن اولسن
ظن ایتدک دیو حراره تعرضلرینه علت ایدرلر دی اول سبیدن بوآیت
نازل اولوب حرار امر اولندیلرکه یوزلرین وباشلرین سترله وارديه
وملاحف لبسلیله امادن تمیز ایدلر (ذلک ادنی ان یعرفن فلا یؤذین)
ایمدی بوفعل حرارک امادن تمیزینه اقر بدر اولیه اولسه اهل شطاره
تعرضندن امن اوزره اولوب ایدان قورتیلورلر (وکان الله غفورا
رحیما) الله تعالی ذنوب سالفه دن توبه ایدنه مغفرت ایدر وعبادینه
جزئیات مصالحلرین مراعاتله رجح ایدر (لئن لم ینته المنافقون والذین
فی قلوبهم مرض والمرجفون فی المدیة) اگر منافقلر نفاقلرندن وقلبلرنده
ضعف وقلت ثبات ویا فجور اولنلر دینه تزلزل ویا فجورلرندن ویا سرایای

(مسلمیندن)

مسلمیندن اخبار سوئله قلوب مسلمینی ارجاف ایدنلر اول فعللرندن منتهی
اولزلر سه * دینلرکه مرجفون برطائفه ایدیلرکه پیغمبریمز علیه السلام
بریره سرایا کوندلر سه انلر کذبله ناس بیننه ایقاع ایدرلر دیکه انلر قتل
ویامنهم اولدیلر ویا فلان جانبندن اوزریکزه عدو کلیور دیرلر دی ویاخود
مؤمنلر شائنده فاحشه شیوعن استیوب دیرلر دی (لنغریبک بهم
ثم لا یجاورونک فیها الا قلیلا) ایمدی اگر اول اوچ خصالندن منتهی
اولزلر سه سکا امر ایدرکه انلره اساءت ایرکور ویا مدینه دن جلایه مضطر
قیلور افاعبلر انلره ایشلیه سن حتی که اندنصکره مدینه یه سکا آز زمان
مجاورت ایدلر (ملعونین انما تلقوا اخذوا وقتلوا تقیلا) انلر سکا
مجاورت ایتلر الا ملعونین اولدقلری حالده قنده بولنورلر سه اخذ و قتل
اولنسونلر (سنة الله فی الذین خلوا من قبل) الله تعالی انک اشبو
ستیدرکه اتم ماضیه ده انی سنت ایتدیکه اول انبیایه نفاق ایدنلرک
وارجافله و هنلرینه سعی ایدنلرک قنده بولنورلر سه قتل اولنلریدر
(ولن تجد لسنة الله تبذیرا) الله تعالی انک سنتی تبدیل و تغییر ایدر
بولرسن (یسألك الناس عن الساعة) یا محمد مشرکین سکا استهزاء
وتعنتله ساعتک وقت قیامندن سؤال ایدلر ویاخود یهود امتحان یله سکا
اندن سؤال ایدلر زیرا که توراته و سائر کتبه انک وقتی کتم اولنمشدر
(قل انما علما عند الله) انلره دیکل که ساعتک علمی الله تعالی یه مختصدر
ملک ونیدن هیچ احدی انی بیلدر میوبدر (وما یدریک لعل الساعة
تکون قریبا) نه بیلورسن بلکه ساعت قریب اوله (ان الله لعن
الکافرین واعدلهم سعیرا) الله تعالی مکه کافرلرینه بدرده قتلله عذاب
ایتمسبله یله آخرته نار شیدیه الا یقاد اعداد ایتدی (خالدین فیها ابدان
لا یجحدون ولایا ولا نصیرا) اول ناردی ابدان تلخید اولندقلری حالده برولی ونه
نصیر بولیدلر که انلری حفظ و عذابلرین دفع ایدر (یوم تقلب وجوههم
فی النار) شول کونده که انلر ناردی برجهتدن برجهته ویا بر حالدن برحاله
صرف اولندلر یعنی نار انلری کاهی اعلاسنه ایرکوره و کاهی اسفلنه ایندره
(یقولون یالیتنا اطعنا الله واطعنا الرسولا) تابع ومتبوع دیلر که تولیدی
بز الله تعالی یه ورسولنه اطاعت ایتمش اولیدق که بو کونده
اشبو عذابی کورمیدک (وقالوا ربنا انا اطعنا سادتنا وکبراءنا فاضلونا

(السبيل) اتباع ديدلر كه ياربنا بز دنيا ده كفر وعصيانده سادات وكبرامزه اطاعت ايدوب انلر بزه كفري تلقين وتزيين ايتملردي اوليله اولسه بزي طريق هدايتدن ايرغروب ضلالتله ايركورديلردي (ربنا آتھم ضعفين من العذاب والعنھم لعنا كبيرا) ياربنا ايمدي انلر بزه اولان عذابك ايكي مثليه عذاب ايتكه انلر ضال ومضل اولديلردي وانلر لعنك اشد واعظم ايت (يا ايھالذين آمنوا لا تكونوا كالذين آذوا موسى فبرأه الله مما قالوا وكان عند الله وجيھا) يامؤمنر موسى عليه السلامه ايداء ايدنلر كي اولمكز الله تعالى اتي انلرك مقولندن براءتن اظهار ايدوب عندنده اول قربت ووجاهت صاحبي اولدي * موسى عليه السلامك ايداء اولنديغي شيدده علماء اختلاف ايتديلر * ابو هريره رضی اللہ عنہ پیغمبریمز عليه السلامدن روايت ايدر ديمشكه موسى عليه السلام حي وستيركسنه ايدى جلدندن هيچ برشيئنى كسه يه كوسترمزدى اوليله اولسه بنى اسرائيلدن بر طائفه ديديلر كه انك بز دن تسترى دكل الاجلدنده برص ويا ادره ويا بر آفت اولديغيچوندر الله تعالى اتي انلرك مقاله سندن براءتن اراده ايدوب بركون غسل ايچون بر خالى مكانده ثيابن بر طاش اوزره قودى اغتسالدن فارغ اوليچق ثيابن آلمغه يونلدكده باذن الله طاش انك اثوابنى كوتوروب بنوا اسرائيلك اشرافي بيننه براقدي موسى عليه السلام ايسه عصائله اردنجه ثوبم ديو كيدرك عريان انلرك اراسنه واردى حتى كه بنوا اسرائيل انك جسدين احسن خلقتده ايديكن كورديلر اندن ثوبن كينوب عصاسيله طاشى بر قايچ ضربه اوردى حتى كه ضربه سندن طاشده بر قايچ يرده اثر ايتدى وبر قوم ديديلر كه بنوا اسرائيلك اكا ايداسى هارون عليه السلام تيهده وفات ايديجك اتي موسى قتل ايتدى ديديلر اوليله اولسه الله تعالى ملائكه يه امر ايلدى هارونك جنازه سيله بنوا اسرائيلك مجمعه اوغراديلر حتى كه موسانك اندن براءتن بيلديلر * بعضيلر ديديكه ايداء ايله مراد قارون بر زانيه مراد بى استيجار ايتديكه بنوا اسرائيلك اشرافي بيننده موسايه كندى ايله زنا ايتدى ديو افترا ايدده مرأه ايسه قارون بكاشو دكلو مال ويرديكه سكا افترا ايدم ديو اقرار ايلدى حتى كه انكله موسانك اندن براءتن بيلديلر * روايت اولنديكه پیغمبریمز صلى الله عليه وسلم بر غنيمتى قسمت ايتديكنده بر رجل ديديكه بو بر قسمندر كه انكله وجهه الله اراده اولنموبدر پیغمبریمز

(عليه)

عليه السلامه انك قولى خبر ويريلجك ياوزلنوب ديديكه الله تعالى موسايه رحمت ايتسونكه بوندن اكثر ايداء اولنوب صبر ايلدى (يا ايھالذين آمنوا اتقوا الله وقولوا قولا سديدا) يامؤمنر الله تعالىدن خوف ايدوب انك كراھت ايتديكى شيئ ارتكابدن حذر ايدك لسانكز حفظنه مراقب اولوب صدق ومستقيم كلام سويلكز (يصلح لكم اعمالكم) تاكه اول الله تعالى سزى اعمال صالحه يه توفيق ايدده ويا خود اعمالكزى قبول وانك اوزره ثباتله اصلاح ايدده (ويغفر لكم ذنوبكم) وقول وعملده استقامتكز سبيله ذنوبكزى مغفرت ايدده (ومن يطع الله ورسوله فقد فاز فوزا عظيما) اول كسه كه اول اوامر ونواهيده الله تعالى ورسولنه اطاعت ايدده انك عندنده غايت مطلوبنه نائل دنيا ده جيد وآخرته سعيد اولور (انا عرضنا الامانة على السموات والارض والجبال فأبين ان يحملنها واشفقن منها) بز امانتى سموات وارض وجباله عرض ايتدك كه اول طاعت وفرائضدر * ابن مسعود رضی اللہ عنہ ايدر اول امانتله مراد اداء صلاة وايتاء زكاة وصوم رمضان وحج بيت وصدق حديث وقضاء دين وايفاء كيل وميران وحفظ ودائعدر * دينلديكه اول فرائض وحدود ديندر ويا خود اوامر ونواهيدير ويا خود صوم وجنابتدن غسل وشرائعدن خفي اولاندر ويا خود فرج واذن وعين ويد ورجلدر اول اجرام عظام مستفهمات اولدقلىر حالده ديديلر كه انده بزه نه شيء واردر * دينلديكه اكر اتي تحملمده احسان ايدرسه كز ثوابله جزا اولنورسز واكر عصيان ايدرسه كز عقاب اولنورسز اوليله اولسه اتي تحملمدن اباء ايتديلر واول امانتى ادادن عاجز اولدقلىرنده انلر عقاب ايرشمى خوفن ايتديلر ديديلر كه ياربنا بز سنك امر كه مستخرلز نه ثواب ونه عقاب ديلرز * بعض علماء ديديلر كه الله تعالى اشبو اجرامه امانتى عرض ايتديكنده عقل وفهم تركيب ايتدى حتى كه خطايى تعقل ايدوب منوال مذكور اوزره جواب ويرديلر بعضيلر ديديلر كه امانتك سموات وارضه عرض اولنمسييله مراد اول ايكيسنده كه مخلوقاته لاعلى التعيين ايدى دينلديكه اول تمثيلدر وآيتده اولان ممثل به مفروضدر يوخسه محقق دكلدر مفروضات ايسه ذهنده محققات كي تخيل اولنور يعنى حال تكليف صعوبتده وثقل تحملمده حال مفروضه يه تمثيل اولنمى * ايمدى اول امانت اشبو

اجرام عظام جامده به عرض اولنسه جاديتلرله اول تكليفك عظمي
و متحملك ثقلی اچليچون اني تحملدن ابا و اشفاق ايده لردي (و جملها الانسان
انه كان ظلوما جهولا) انسان اني ضعف بنيه و رخاوت قوتيله اني تحمل
ايتدي بوندنصكره اول كسه كه اكا قائم و حقوقى رعائنه مداوم اولدى
دنيا و آخرت خيريني تحصيل و تكميل ايتدي * دينديكه الله تعالى آدم
عليه السلامه دينديكه بن امانتى سموات و ارض و جباله عرض ايدوب
تحمله طاقت كتورمديلر سن اني شروطينه اخذ و تحمل ايدرميسن دينديكه
يارب انده كي شروط ندر دينديكه احسان ايدرسك ثواب بولورسن
اساءت ايدرسك عقاب اولنورسن اويله اولسه آدم عليه السلام اني متحمل
اولدى الله تعالى ايتدي چون سن اني متحمل اولدك بن سكا اعانت ايدرين
بصركه حجاب قيلوربن سكا حلال اوليان شيئه نظر مراد ايتديككده اول
حجابي بصرك اوزره صاليوركه اني كورميه سن ولسانكه دخي حليينكي
غلف قيلورم چنان حلال اوليان شيئي سويلكدن خوف ايده سن اول حليينه
اني بر كيت كه اني سويليه سن و فرجكه دخي لباسي پرده قيلورم حرامه
قصده ايتديككده اول لباسي كشف ايتكل كه حرامه تعرض ايتيه سن
* روايت اولنديكه امانت مذكوره صخره ملقاة شككنده قيلنوب سموات
وارض و جبال اني حله دعوت اولندقد بز اني حله طاقت كتوره مرز
ديو اكا قريب اولمديلر آدم عليه السلام دعوت اولنمدين اول صخره قته
واروب تحريك ايتدي اكر بوني حله تكليف اولنسم تحمل ايدردم
ديدي * دينديكه ايمدي اني تحمل ايت اويله اولسه اني ديزرينه دكين
قالدرديغندنصكره كيرو اينديروب يره قودى و دينديكه والله اكر ديلسم
بوندن دخي زياده قالديرردم دينديكه قالدرغل اولدخي نعم ديوب
حقونه دكين اني قالديرديغندنصكره كيرو يره قودى و دينديكه
والله اكر ديلسم بونك اوزره دخي زياده قالديرردم دينديكه ايمدي
قالدرغل نعم ديوب حتى كه اني عاتقنه قالدردي يره قومق مراد
ايتديككده الله تعالى قبلندن بيورلديكه اول امانت من بعد سنك
و اولادكك عنقرنده قالوبدر يوم قيامته اكا احسان و اساء تكرر اوزره
جزا اولنورسن اول اجلدن انسان ظلوم و جهول اولوبدر * دينديكه

(يعنى)

يعنى نفسنه ظلوم و امر الله و متحمل اولديغى امانته جهول اولدى
و يا خود ربنه عصيانله ظلوم ترك امانته اولان عقابى بيسا مكه
جهول اولدى * دينديكه امانته مراد عقل و تكليفدر و امانتى اجرام
مذكوره به عرضله مراد اول امانتك انلك استعدادنه اضافتله اعتباريدر
وانلك اباسيله مراد اكا ابا طبعيدر كه اول عدم لياقت و عدم استعداددر
وانسانك حلييله مراد اكا قابليت و استعداديدر و ظلوم و جهول اولمسي قوت
غضبيه و شهويه نك اكا غالب اولمسيدر اشبو معنى اوزره انك حله علت
اولمسي حسن اولور زيرا كه عقلك فوائدنر كه اول ايكي قوته مهمين و رقيب
اولوب تعدى و مجاوزة حددن اول ايكي سنى حافظ اوله و تكليفدن
معظم مقصود اول قوتى تعديل و سور تلرين كسر در (ليعذب الله
المنافقين والمنافقات والمشركين والمشركات ويتوب الله على المؤمنين
والمؤمنات) الله تعالى اول امانتى جنس انسانه عرض ايلدى تا كه
اول امانته خيانت ايدوب وفا ايتين منافقين و منافقاته و مشركين
و مشركاته تعذيب ايده و مؤمنين و مؤمناته اول امانته و قاريله ايمانلري
ظاهر اولوب بعض طاعاته تقصيرلري حاصل اولدقده رحمت و مغفرتله
انلره عودت ايده * اشبو وعدده توبه ذكريله اشعار بيورلديكه انلر
جبلتلر نده ظلوم و جهول اولمري انلري فرطادن خالى ايتيه * ايمدي
عرض امانته انلك شقاوتى و بونلك سعادتى ظاهر اولدى (وكان الله
غفورا رحيم) الله تعالى هر تائبه غفور اولوب فرط فرطاتلرندن
تجاوز ايدوب و رحيم اولوب طاعتلري اوزره فوزله اثابه ايدر كريمدر
و رحيمدر

سورة سبأ وهى اربع وخسين آية مكية

بسم الله الرحمن الرحيم

(الحمد لله الذى له ما فى السموات وما فى الارض) حمد اول الله تعالى
ايچون ثابتدر كه سموات و ارضده اولان اشياء انك خلق و ملكيدر دنيا
حمد انك كمال قدرته و تمام نعمته در زيرا كه سماده و ارضده كي اشيا
اهلرينه نعمتدر اويله اولسه اوزرلرينه واجب اولور كه اني انعام
ايدن رب تعالى به حمد و ثنا ايده لر (وله الحمد فى الآخرة) آخرته
دخي حمد انك كمال قدرته و تمام نعمته در و نعم آخرته كه ثوابدر اكر چه

انك اوزره جد واجب دكدر تعبد اولديغچون * لكن اهل ايمانك سرورينه تته در انلك انكله التذاذي متعطشك ماء باردله التذاذي كبدر (وهو الحكيم الخبير) اول الله تعالى دنيا و آخرت امورنى احكام ايدر و بواطن اشياي بيلور (يعلم مايلج في الارض) ارضه داخل اولانى بيلور ماء غيث و حيوان و نبات و اشجار و اجار و اموات و كنوز كبي (وما يخرج منها) و ارضدن خروج ايدنى دخی بيلور ماء عيون و دواب و نبات و اشجار و اجار و جواهر ارض و بعث عندنده اموات كبي (وما ينزل من السماء) و دخی سماندن نزول ايدنى بيلور مطر و ثلج و برد و صاعقه و رزقه كى برکت و مقادير و ملائكه كبي (وما يعرج فيها) و دخی سمايه عروج ايدنى دخی بيلور ملائكه و اعمال عباد و انجره و ادخنه كبي (وهو الرحيم الغفور) اول الله تعالى غفور و رحيمدر انلره كيم نعمتلى شكرنده تقصير ايدرلر مع هذا انك نعمتلى كثير ايكن (وقال الذين كفروا لا تأتينا الساعة) كافرلر بعثى انكار و استهزاء طريقى اوزره ديديلر كه بزه قيامت كلز (قل بلى و ربى لآتيناكم عالم الغيب) ديكل كه ربم عالم الغيب جل شانه حقيچون قيامت البته سزه كليسردر (لا يعزب عنه مثقال ذرة في السموات ولا في الارض) اول الله تعالى بدن ذره وزنى دكلوشى كه اول نمله صغيره و يا شعاعده كورينور شيندر منفصل و باين اولمز بلكه اكا ظاهردر (ولا اصغر من ذلك ولا اكبر الا في كتاب مبين) ذره دن اصغر و كرك اكبر هر نه وار ايسه الا لوح محفوظه مسطوردر (ليجزى الذين آمنوا و عملوا الصالحات اولئك لهم مغفرة و رزق كريم) ايمدى اول قيامتك كلمسى انكچوندر كه مؤمن اولوب اعمال صالحه ايشلينلره الله تعالى جزاء خير ايدى اوليله اولسه انلر ايجون مغفرت و رزق كريم اولور كه اول جنتدر (والذين سعوا في آياتنا معاجزين اولئك لهم عذاب من رجز اليم) و شو نلر كه بزم آيتلر يمز ابطالنه و ناسى اندن تنفيره سعى ايدرلر ناسى اكا ايماندن تثبيط ايدر اولد قلى حالده * ايمدى انلر ايجون سوء عذابدن عذاب مؤلم اولور (ويرى الذين اتوا العلم الذين انزل اليك من ربك هو الحق و يهدى الى صراط العزيز الحميد) و تا كه صحابه دن و ياتابعيندن و مسلمين اهل كتابدن علم و يريلنلر بيله لركه ربك جل شانهدن سكا انزال اولنان قرآن حقدرد اول عزيز منقسم فعالنده محمود رب تعالينك

(صراطنه)

صراطنه هدايت ايدر كه اول توحيد و لباس تقوا ايله تدرعدر (وقال الذين كفروا هل ندلكم على رجل ينبئكم اذا مزقكم كل ممزق انكم لنفى خلق جديد) بعثى انكار ايدن كافرلر برى برلرينه سخرية و تجاهل طريقى اوزره ديديلر كه سزه بر رجل يعنى محمد صلى الله عليه وسلمى دلالت ايدى لمى كه اول سزه اعجب اعجاب تحديت ايدر كه سرك اجساد كز چور يوب طاغليغندن و طيراق اولديغندنصكره سز خلق جديدله انشاء اولنور سز (أفترى على الله كذبا ام به جنة) بيلز كه اول الله تعالى به كذبى اختلاق ايدر و يا انده جنون اولوب انى توهم ايلر و لسانى سويلر (بل الذين لا يؤمنون بالآخرة في العذاب والضلال البعيد) بلكه بعثك حقيقتن تصديق ايتينلر عذابه و هدادن بعيد ضلاله مؤدى اولور شينه و اقلردر (أفلم يروا الى ما بين ايديهم و ما خلفهم من السماء و الارض) انلر اوكلرينه و اردلرينه نظر ايتنلر ميكه قنده اولسه لر سماء و ارض انلرى احاطه ايتشدر اندن خروجه قادر اولزلر بزم عذابمزدن خوف ايتنلر (ان نشأ نخسف بهم الارض او نسقط عليهم كسفا من السماء) اكر ديلسه وز بزم آياتمه بينات ظهورندنصكره تكذيبلر ايجون انلرى قارون كبي يره پكورردك و يا اصحاب ايكه كبي اوزرلرينه سماندن نار قطعهرلى ياغديرردق (ان في ذلك لآية لكل عبد منيب) ايمدى سماء و ارضه نظر ايدوب اول ايكيسنده كى عجائب فكرنده عبرت و دلالت واردر هر عيده كه رب تعالى به راجع اولور و انك امرنده چوق تأمل قيلور (ولقد آتينا داود منا فضلا) و بز داوده بزم قبلزدن سائر انبيا و ياسائر ناس اوزره فضل و يردككه انده نبوت و كتاب و ملك و صوت حسن و تليين حديد مندرج اولور (يا جبال اوتى معه) ديدككه يا جبال داودك تسبيح و يا نوحه سنه انكله بيله ترجيع ايدك ديتلديكه داود عليه السلام تسبيح ايتديككده كنديله بيله جبالك تسبيح ايشيدر و معناسنى بيلوردى تنكيم موسى عليه السلام شجره دن ندايى ايشيدوب معناسنى بيلسى كبي (والطير) و طيره ديدككه سز دخی داودك تسبيح و نوحه سنه انكله بيله ترجيع ايدك اوليله اولسه قوشلر دخی انك تسبيح و يا نوحه سنه انكله اصواتلريله ترجيع ايدرلردى (وألنا له الحديد) و بز اكا تيورى شمع كبي ينده تليين ايتدك حتى كه

انی تلینده ناره و مطرقه به محتاج اولمزدی بلکه یدیه انی دیلدیکی کبی
تصرف ایدردی و یا اکا ویریلن شدت قوتندن تیمور یدنده لین اولوردی
دیلدیکه داود علیه السلام بنو اسرائیله ملک اولیحق تبدیل شکله ناس
بیشده کزردی بریلدیکی کسه به راست کسه والیکز داودی نیچه بیلور
ونه خصالده ایشیدرسز دیو سوال ایدردی ناس دخی اکاخیرله ثناء ایدرلردی
اوله اولسه الله تعالی اکا آدمی صورتده بر ملک کوندردی عادتق اوزره
اول ملکدن کنینک حالن سوال ایتدکه ملک دیکه داود نه کوچک کسه
ایدی کنینک و عیالینک معیشتی بیت المالدن اولمسیدی اوله اولسه داود
علیه السلام الله تعالیدن دیلدیکه اکا بر سبب تسبیب ایده کیم انکله بیت
المالدن استغنا ایده اندن تقوت و عیالی اطعام ایده اوله اولسه الله تعالی اکا
حدیدی تلین و درع صنعت تعلیم ایتدی حتی که هر درعی درت بیک درهمه
بع ایدوب اندن یرو عیالین یدر و قرا و مساکینه و یرردی دیلدیکه
اول هر کونده بر درع دوزوب التی بیک درهمه بع ایدردی ایکی بیکنی
نفسنه و عیالنه اتفاق ایدوب درت بیکنی بنو اسرائیل فقراسنه تصدق
ایدردی * پیغمبریمز علیه السلام ایدر داود علیه السلام کسب یدندن اکل
ایدردی (ان اعمل سابعات) بز داوده امر ایتدکه در علر دوزکل که
اول کنکیش و اوزون اولوب یرده سورینه درعی اول ایجاد ایدن داود
علیه السلام ایدی (وقدر فی السرد) و در علری نسجده تقدیر ایت یعنی
انک مسمارلرین دقاق ایتکل که قلق و یرمیه غلاظ دخی ایتکل که خرق ایتبه
بلکه انده قصد و قدر حاجه بی رعایت ایلکل (واعملوا صالحا) و یا داود
و آل داود عمل صالح ایشلکز (انی بما تعملون بصیر) بن سزک اعمالکزه
بصیرین انک اوزره سزه جزا قیلورین (ولسلیمان الريح غدوها شهر
ورواحها شهر) بز سلیمان علیه السلامه ریجی تسخیر ایتدکه انک
غدانده جری بر آیلق مسافه ایدی عشیده دخی اولقدر ایدی اوله
اولسه بر کونده ایکی آیلق مسافه کیدردی (وأسلنا له عین القطر)
و بز اکا نحاس مذاب عینی اساله ایتدکه اوله اولسه صونک پیکارندن
قینایوب چیقیمی کبی اولدخی معدندن قینایوب چیقاردی
دیلدیکه اول هر آیده اوچ کون جاری اولوردی و اول عین یمن دیارنده

(ایدی)

ایدی ناسک الی الآن انتفاعی سلیمان علیه السلامه اساله اولنان نحاسله در
(ومن الجن من يعمل بین یدیه باذن ربه) و بز جندن بر طائفه بی سلیمان ایچون
تسخیر ایتدکه رب تعالینک امریه انلرک هربری اکا اطاعت ایدرلردی
(ومن یزغ منهم عن امرنا نذقه من عذاب السعیر) اول جنیلردن اولکه
بزم اکا امر ایتدیکمز طاعت سلیمان عدول ایده بز اکا آخرت عذابندن
اذاقه ایدرز * دیلدیکه اول جنیلر اوزره مسلط بر ملک الله آتشدن
سوطله طورردی سلیمان علیه السلامک امرندن عدول ایدنی اول سوطله
اوروب احراق ایدردی (يعملون له ما يشاء من محاريب) اول جنیلر
سلیمان علیه السلام ایچون قصور حصینه و مساکن شریفه و مساجدندن
دیلدیکی شیئی دوزرلردی اول جله دن بری بیت المقدسدرکه داود علیه
السلام انی بر راجل قامتی دکاو رفع ایتدیکند نصکره سلیمان علیه السلام
انی اتمام ایتدی (وتمثال) و دخی انکچون زجاج و نحاس و صفر و رخامدن
انبیاء و ملائکه و عباد صالحین صورتلرین دوزرلردیکه ناس انلری
کور دکرنده انلرک کبی عبادته راغب اوله لر زیرا که انلرک شرعنده تصویر
صور جائز ایدی حرمتی شرع مجدددر * روایت اولندیکه جنیلر سلیمان
علیه السلامک کرسیسی اسفلنده ایکی اسد و فوقنده ایکی نسر دوزمشردی
کرسی به صعود مراد ایتدیکنده اول ایکی اسد انکچون ذراعلرین بسط
ایدرلردی و کرسی اوزره اوتوردیغنده اول ایکی نسر قنادلرین آچوب
اکا کولکه ایدرلردی (وجفان کالجواب) و دخی انکچون بیوک حوضلر
کبی صفهلر دوزرلردی دیلدیکه انک هربری صفه سنه اکل ایچون بیک
رجل اوتورردی (وقدور راسیات) و دخی انکچون قدرلر دوزرلردیکه
قائمهلر اوزره ثابتلر ایدی بیوکلیکندن مکاتلرندن ایرلر و ایندیرلرزدی انلره
زردبانلرله چیقیلوردی (اعملوا آل داود شکرا) و دیکه که یا آل داود اول
الله تعالینک نعمتلرینه شاکرین اولدیغکز حالده اکا اطاعت ایتدکه
(وقلیل من عبادی الشکور) عبادمدن آذرکه قلب و لسان و جوارحله
اکثر اوقاتنی اداء شکره صرف ایده زیرا که الله تعالینک شکره توفیق
بر نعمتدرکه شکر آخر مستدعی اولور اوله اولسه اکانهایت اولر اول اجلدن
دیلدیکه شکور اولدرکه شکردن عجزنی بيله (فلما قضینا علیه الموت

مادلهم على موته الادابة الارض تأكل منسأته) وقتا که بز سلیمانہ موتی
 قضا ایتدک انک موتنی آله ویاجنیلره بیلدرمدی الارضه بیلدردیکه انک
 عصاسنی یمکله قیریلوب سلیمان علیه السلام اکاطیانمشکن دوشدی * روایت
 اولندیکه سلیمان علیه السلام بیت المقدسه کیروب بریل ایکی ییل برآی ایکی آی
 اندن اقل واکثرنده عبادته مشغول اولوردی طعام وشرابی اکا اول ارایه
 کتوریلوردی وقتا که وفات ایده جکی کرده اکا کیردی هر صبحان
 محرابنده برشجره بتش بولوردی و سلیمان علیه السلام اکا اسمنی ومنفعتنی
 سؤال ایدردی سؤال ایدوب غرس ایچون اولانی چیقاروب آخر موضعه
 غرس ایتدیرردی ومنفعتن یازاردی حتی که خروب اغاجی بتدی سن نیچون
 بتوبسن دیدکده دیدیکه مسجدکی تخریب ایچون سلیمان علیه السلام
 انک جوابن تأمل ایدوب قلبیه دیدیکه بن حیاته ایکن الله تعالی بو مسجدی
 خراب ایدر دکدر امدی بونم موتم زمانی ایرشدیکه بووجهله بکا
 بیلدرلدی اندن اول خروبه بی چیقاروب آخر موضعه دیکدیردی والله
 تعالی یه مناجات ایدوب دیدیکه الهی بنم موتنی جن طائفه سندن کیرلکل
 تا که انس جنک غیبی بیلز ایدیکنی بیلر لیرا که جن ايسه بز غیبدن
 بعض اشیا بی بیلورز دیوانسی آلدادیرلردی چون سلیمان علیه السلام
 موتک جنه مستور اولسن دیدی زیرا که بیت المقدس بناسی هنوز تمام
 اولماشدی جن انک موتنی بیلامکله عملده جهده ایلره لیر اتمامنه دکین
 انی ترک ایتیه لیر اویله اولسه جنه امر ایلدیکه کندینک اوزره قیوسن
 صرچه دن بریت بنا ایدر انلردخی حرصله انی بنا ایتدیلر سلیمان علیه
 السلام انک ایچنده عصاسنه اتکاء ایدوب نمازده قائم ایکن روحی قبض
 اولندی ماشاء الله اول حال اوزره قالب کسه انک موتنی بیلدی جن انک
 حیاته کی منوال اوزره اعمال شاقه بی اشلوب انی حیاته ظن ایتدیلر
 وانک ناسه خروجدن احتیاسنی انکار ایتدیلر زیرا که اطاله صلاته
 اعتیادنی بیلدیلر حتی که ارضه انک عصاسنه کیردی یوب اویمسبیه
 انی قیردی و سلیمان علیه السلام یه دوشدی انکله اول عملده اولان
 جن وشیاطین انک موتن بیلوب سونشدیلر بعده اول بیت ناس آچوب ایچرو
 کیردیلر وقت موتنی بیلک ایچون بر ارضه بی عصاسنه کیردردیلر بعده
 انک برکونه بر کچه ده عصادن یدیکی اوزره حساب ایدوب سلیمان علیه
 السلام وفاتدنبرو بریل کامل اولمش بیلدیلر اویله اولسه ارضه نکل اول

(فعلی)

فعلی جنه مشکور اولوب من بعد اول خشب جوفنده ایکن اکا ماء وطین
 کتورر اولدیلر (فلما خرت تبنت الجن ان لو كانوا يعلمون الغیب مال بشوا
 فی العذاب المهین) وقتا که سلیمان علیه السلام یه دوشدی جنه امر
 ملتبس ایکن بیلدیلر که اگر انلر زعمرنجه غیبی بیلور اولسه لیر سلیمان علیه
 السلام موتنی واقع اولدیغی حینده بیلوب انک موتندنصرکه بریل تا اول
 یه دوشنجه تسخیرنده عذاب شدیدده قالمزلردی ویاخود جنک امری انسه
 ظاهر اولدیکه انلر غیبی بیلزلر ایش * اهل تاریخ ایدر سلیمان علیه السلام
 الی اوج ییل معمر اولدی اون اوج یاشنده ایکن ملک اولدی ملوکتندن
 درت ییل کچیکک بیت مقدس بناسنه ابتدا ایتدی (لقد کان لسبأ فی مسکنهم
 آیه) سبأ بن یشجب بن یعرب بن قحطان اولاد ایچون مسکنلرنده صانع
 مختارک وجودینه وامور عجیبه دن دیلدیکی شیئه قدرته علامت ودلالت
 واردر * روایت اولندیکه بر رجل پیغمبریمز صلی الله علیه وسلمه دیدیکه
 یارسول الله سبأ رجل ویا مرأه ویا رضمیدر دیدیکه اول عربدن بر رجل
 اولوب اون اولادی وار ایدی التیسبیه تیامن ودردیله تشاؤم ایدردی
 اما تیامن ایتدیکی کنده واشعرون وازد ومذحج وانمار وحیر ایدی
 واما تشاؤم ایتدیکی عامله وجذام ولحم وغسان ایدی * دینلدیکه انلرک
 مسکنلرینه مأرب دینوردی انکله صنعایدنی اوج کونلک مسیره در
 (جنتان عن یمین وشمال) اول آیت انلرک ایکی بلوک باغ وبوستانلریدر که
 بر بلوکی بلده لرینک صاغنده وبر بلوکی صولنده ایدی ویاخود انلردن
 هر بر رجلک مسکنی صاغنده بر باغی وصولنده بر باغی واریدی (کلوا
 من رزق ربکم واشکروا له) انلره بعث اولنان پیغمبرلری دیدیکه ربکر
 جل شانہ نکل سزه ویردیکی باغلیکر میوه سندن یوب اکا شکر ایلکر *
 دینلدیکه انلردن بر مرأه مکتلنی باشنه آلوب ایکی باغنک ایچندن
 کیدردی انی هیچ بر میوه یه دکدین مکتلی انواع میوه ایله دوکیلنه
 قدر طولردی (بلده طيبة ورب غفور) اشبو رزقکر اولدیغی بلده
 طیه در وانکله سزی رزقلندیرن وسزه شکرله امر ایلن رب تعالیدر که
 اکا شکر ایدنک فرطانتی مغفرت ایدر * دینلدیکه سبأ بر بلده
 طیه ایدیکم انده سباع یوغیدی واندن بعوضه وذباب وبرغوث
 واقرب وحیه یوغیدی حتی بر رجلک ثابنده قل وار ایکن انلرک بلده سنه

اوغراسه انك طيب هو اسندن جله سی اولوردی * وهب ایدر الله تعالی
سبأ اهلته اوج پیغمبر کوندردی انلری الله تعالی به دعوت وانلره
تذکیر نعمت ایتدیلر (فَأَعْرَضُوا) انلر ایسه شکردن اعراض ایتدیلر
(فَأَرْسَلْنَا عَلَيْهِمْ سَيْلَ الْعَرْمِ) اولیه اولسه بز انلر اوزره سیل عرم ارسال
ایتدک که اول بر سیلدر که اکا طاقت کتورلمز ویا خود مطر شدید در
ویا خود کوسبتک دینور حیواندر که انلرک سدرلینی تخریب ایتدی * ابن
عباس رضی الله عنهما وغیری ایدر اهل سبأ وادیلرینک صوی اوزره
دو کشور لر دی بلقیس اول ممالکه اولدیغنده سبأ اهاالیسنه امر ایلدی
انده صخره وقارله ایکی جبل اراسنه سدن ایدوب بری برینک فوقنده اوج قپو
ایتدیردی واول سدک جانب اسفلنده بربرکه عظیمه ایتدیردی بغمور یاغدیغنده
عن وادیلرینک سیلی کلوب اول سده ایرکوردی صویه احتیاج
اولدقلرنده ابتدا فوقنده کی قپوی آچوب برکه به آقیدر لر دی وبرکه دن
صوی آلور لر دی اول دو کند کده اور تاده کی قپوی بعده اشاغیده کی
قپوی آچار لر دی بومنوال اوزره اول سدک صوی انلره بریلدن بریله
وسعت اوزره وفاء ایدردی وقتا که پیغمبر لرینه عصیان ونعمة الله کفران
ایتدیلر الله تعالی انلره کوسبتک نام حیوانی تسلط ایتدی حتی که سدی
اسفلندن دلوب سدک صوی باغ وبوستانلرین تخریب ایتدی * وهب
ایدر انلر علم وکها تکرنده بولدیلر که سدرلینی قاره تخریب ایدبسر در
اولیه اولسه سدک هر ایکی طاشی اراسنه برهره قودیلر وقتا که سدک
خرابی وقتی ایردی برپوک کوسبتک اول هرهره اوزره هجوم ایدوب
سددن برارالغه کیردی وسدک ایچین اویوب سیل کیره جک دلکار
ایتدی حالبو که اهل سبآنک اندن خبری اولدی سیل کلچک اول ارا لقره
کیردی سدی یقوب خرابه ایرکوردی مسکنلرین وبلتلرین قوم باصوب
کندیلر طاغلدیلر حتی که حالاری عرب بیننده مثل وعبرت اولوب
سویلدیلر اهل تاریخ سبآنک بووقعه می عیسی علیه السلام ایله
محمد صلی الله علیه وسلم بعثتی بیننده واقع اولوبدر دیدیلر (وَبَدَّلْنَاهُمْ
بِجَنَّتِهِمْ جَنَّتِينَ ذَوَاتِی اَکْلِ خُطِّ وَاثِلٍ وَشِئٍ مِنْ سَدْرِ قَلِيلٍ) وانلرک اول
ایکی صنف هلاک اولان بوستانلرینه بدل ایکی صنف آخر بوستانلر
ویردک که انلرک اشجار واثاری خط واثل وسددن شی قلیل ایدی

اما خط هرنبدر که اول مرارتدن طم اخذ ایده اکل می ممکن اولیه
ویا اراک وثمریدر ویا هر شجردد که انک شوکی اولیه اما اثل شجر
طرفادر ویا طرفایه بکزر بر شجردد الابوکه طرفادن اعظمدر اما سدر
شجر نبقد که غسل ید ایچون انتفاع اولنور بوستانلرده دیکلور لکن
اشبو سددن مراد اول دکلدلر بلکه سدر بریدر که انکله نه انتفاع
اولنور ونه ورق برشیته صالح اولور (ذَلِكْ جَزِينَاهُمْ بِمَا كَفَرُوا) اشبو
فعل که انلره ایشلندی نعمته کفرانلری ویا انلره بعث اولنان پیغمبرلری
تکذیلری سبیلله ایدیکه بز انلره جزا ایتدک (وَهَلْ نَجَازِی الْاِلْكَفُورِ)
اشبو فعلزله بز جزا ایتدک الا اکا که کفرایده ویا کفرده بلیغ اوله (وَجَعَلْنَا
بَيْنَهُمْ وَبَيْنَ الْقَرْیَ الَّتِیْ بَارَكْنَا فِيْهَا قَرْیَ ظَاهِرَةً) وانلره شول اهاالیسنه
توسعه ایله برکت قیلدیغیز قری بیننه که اول قرای شامدر قرای متواصله
قیلدقکه قریه اولی دن قریه ثانیه کورینوردی اهل سبآنک تجارتی یمندن
شامه ایدی برقریه ده یاتسه لر قریه اخراده قیلوله ایدر لر دی حتی که سبادن
شامه وارنجه زاد کوتورمکه احتیاج اولمزلردی * دینلدیکه سبادن شامه
وارنجه درت بیک یدیوز قریه بری برینه متصله ایدی (وَقَدَّرْنَا
فِيْهَا السَّيْرَ) واول قری بیننده سیرلرین بز تقدیر ایلدک برحیثله کیم
عادی برقریده قیلوله ایدر وراج دخی قریه اخراده بیتوت ایدردی
سبادن شامه وارنجه هر کونده ایکی کره ذات میاه واشجارلی قریه لره
ایریشور لر دی (سَيَّرْنَا فِيْهَا لَيَالٍ وَاَيَّامًا آمِنِينَ) وبز انلره دیدک که لیل
ونهاردن دیلدیکز وقتده اول قراده جوع وعطش وسباعدن آمین
اولدیغکز حالد سیر ایدک اختلاف اوقاتله انده سزه امن مختلف اولمز
(فَقَالُوا رَبَّنَا بَاعِدْ بَيْنَ اَسْفَارِنَا) انلر ایسه کثرت نعمتلی سبیلله بطر
وطغیان ایدوب عافیه صبر ایده مدیلر یاربنا بزمه اسفارمز بیننی بعید قیل دیو
استدیلر تا که انده رکوب رواجل وتزود ازوادله فقراء اوزره تناول
ایدلر الله تعالی اول حاجتلرین روا ایدوب قرای متوسطه بی تخریب ایتدی
(وَظَلَمُوا اَنْفُسَهُمْ) نعمه اللهی انکار وشکرنی ترک اوزره اصرارله نفسلرینه
ظلم ایتدیلر (فَجَعَلْنَاهُمْ اَحَادِیْثَ) اولیه اولسه بز انلری انلردن صکره
کلنلره احادیث قیلدقکه انلری تحدث واحواللرینه تعجب ایده لر
(وَمَزَقْنَاهُمْ كُلَّ مَذْقٍ) وانلری غایت مرتبه ده تفریق ایتدک حتی که

انلردن غسان شامه و انمار يثر به و جذام تها ميه و ازد عما نه لاحق اولدى
 (ان فى ذلك لايات لكل صبار شكور) اشو ذكر اولناده معاصيدن صبر
 ونعم الله شكر ايدنلره آيتلر واردر (ولقد صدق عليهم ابليس ظنه)
 ابليس انلرك شانه ظنى تحقيق ايتديكه اول انلرك كبرى و اكا اتباعلر ايدر
 شول قوله كيم (فبعزتك لاغوينهم اجمعين ولا تجد اكثرهم شاكرين)
 يارب عزتك حقيچون انلرك جيعن اغوا ايدم و دخی انلرك اكثرنى شكر
 ايدر بولمده سن ديدى ايمدى ابليسك ظنى يا اهل سبايه ايدى شول حينده كه
 انلرك شهواته انهما كن كوردى و يا بنى آدمه ايدى شول حينده كه
 انلرى آدم عليه السلامك ضعف عزمن كوردى و يا انلرده تركيب اولنان
 شهوت و غضبى كوردى و يا ملائكه تك انلر شانده (اتجعل فيها من يفسد
 فيها) ياربنا ريوزنده خليفه ايدر ميسن اول كسه يى كه انده فساد ايدر
 ديدكلرين ايشدى اويله اولسه بن انلرى اضلال و اغوا ايدر ين ديو تحقيق
 ايدى (فاتبعوه الا فرقا من المؤمنين) اول ابليسسه فريق مؤمنينك
 غيرى ناسك جيعى اتباع ايتديلر و يا خود فرق مؤمنيندن برفريق عصيانده
 اكا اتباع ايتديلر كه انلر مخلصوندر (وما كان له عليهم من سلطان
 الا نعلم من يؤمن بالاخرة ممن هو منها فى شك) ابليسك انلر اوزره
 و سوسه و استغوا ايله تسلط و استيلاسى اولمى الا انكچونكه آخرته
 ايمانى اولانه علمز تعلق ايدى بر تعلقله كيم انك اوزره جزاء ترتيب ايدر
 و يا خود مؤمن شاكدن تميز ايدى و يا خود ايمانه كه اولكه انكچون ايمان
 تقدير اولنوبدر و شكه ايره اولكه انكچون ضلالت تقدير اولنوبدر
 (وربك على كل شى حفيظ) ربك جل شانده هر شيشه مكون و كاشه
 رقيبدر (قل ادعوا الذين زعمتم من دون الله) يا محمد مشركينه ديكل كه
 الله تعالىدن غيرى اصنام و ملائكه دن آلهه زعم ايدوب عبادت
 ايتدكلريكزه دعا ايدك كه سزه ايريشن شدائى كيدر و يا حوايجكزى
 سزه ايركوره (لا يملكون مثقال ذرة فى السموات ولا فى الارض) بلكه
 اول آلهه زعم ايتدكلريكزه نه سموات و نه ارضده خير و شردن ذره
 آغرنجه بر شيشه مالك دكلردر (وما لهم فيها من شرك) اول آلهه كز
 اچون نه سماءه و نه ارضده خلقده و نه ملكده الله تعالى ايله
 شركتلى يوقدر (وما له منهم من ظهير) والله تعالىنك آلهه كردن

(هج)

هيج بر معنى يوقدر كه سموات و ارض امورى تدبيرنده امانت ايدى بلكه
 انلر هر شيشدن عاجزلر ربوبيته صالح دكلردر (ولا تنفع الشفاعة عنده
 الا لمن اذن له) الله تعالى عنده شفاعت نفع ايتز مكر انكچونكه
 شفاعتچيلىكه اذن و يريله و يا انكچون شفاعت ايدمكه اذن و يريله
 (حتى اذا فرغ عن قلوبهم) حتى چانكه شافعرك و مشفوع له لك
 قلوبندن فرغ كشف و زائل اوله بركه ايله كيم شفاعته اذن اطلاقده
 رب العزه جل شانده انى سويليه حالبوكه اندن اول شفعا شفاعته اذن
 اولمى توقع و انتظارنده ايديلر و مشفوع له اولنلر ايسه كنديلر اچون
 شفاعت اولمغه شافعله اذن و يريلورمى و يا اذن و يرلمز مى ديو خوفده
 ايديلر شفاعته اذن ايسه زمان بعيددن صكره ده اولور و قناكه شفاعته اذن
 اوله سوينشوب برى برلرينه سؤال ايدلر (قالوا ماذا قال ربكم قالوا الحق)
 ديهلر كه ربكز جل شانده شفاعت حقنده نه ديدى ديهلر كه قول حق ديديكه
 اول مؤمنلر اچون شفاعته شافعينه انلر * ديدليكه چان قلوب كفاردن
 موت و يا قيامت عنده فرغ منكشف اوله اوزرلرينه اقامت حجت اچون
 ملائكه انلره ديهلر كه ربكز جل شانده دنيا نه ديدى ديهلر كه قول حق
 ديدى ديو اعتراف ايدلر شول وقتده كه انلره اول اعتراف نفع ايتيه
 (وهو العلى الكبير) اول الله تعالى علو كبير صاحبيدر اول كونده ملائكه
 و انبيادن هيج كيمسه اچون انك اذنم شفاعته اذن و رخصت اولمز
 (قل من يرزقكم من السموات والارض قل لله وانا او اياكم لعلى هدى
 اوفى ضلال مبين) يا محمد ديكل كه سمواتن مطر و ارضدن نباته سزى كيم
 رزقندردر اكر سكوت و يا جوابده الزام خوفيله تلغم ايدرلر سه انلر قلوبيله
 اكا مقررلدر سن ديكل كه الله تعالى رزقندردر بلكه الله تعالى بى رزق
 و قدرته توحيد ايدى رز و سز كه شول ادناى مراتبه نازل جادى اكا
 اشراك ايدر سز بزمى يوخسه سز مى هدى اوزره در يوخسه ضلال ميبنددر
 ايمدى بيلك كه بز يقينا هدايت اوزره وز زيراكه رازقك وحدانيت
 بيلورز و سز ايسه يقينا ضلاله منغمسلر سز زيراكه سز غيرى اكا اشرك
 ايدوب انك وحدانيت بيلز سز (قل لا تسئلون عما جرمنا ولا نسأل عما نعملون)
 ديكل كه بزم اكتساب ايتديكمز صغار و زلاتنكه مؤمن اندن خالى اولمز

سز اندن سوال اولمز سز و سزك ايشلد يککز کفر و کباردن بز سوال اولمز
بلکه هر کيسه خير و شردن عمليله جزالنور * دينلد يکه اشو آيت سيف آينيله
منسو خدر (قل يجمع بينا ربنا ثم يفتح بينا بالحق) ديکل که ريمز جل شانه
يوم قيامته بزى و سزى جمع ايدر بعده بزمله سزك بينى عدله قضا ايدر
محقينى جنة و مبطلينى ناره ادخاله (وهو الفتح العيم) اول الله تعالى حاکم
عدلدر خلق بينده قضا سزك حکمت بيلور (قل ارونى الذين الحقتم به شركاء)
ديکل که بکا کوسزك کيم آلهه كزى نه صفتله الله تعالى به عبادته استحقاقده
اشراك ايدر سز (كلا بل هو الله العزيز الحكيم) حاشا که آلهه كز اكا
شركاء اوله بلکه عبادته مستحق اول الله تعالى ايدر که غلبه و کمال قدرت
و حکمتله موصوفدر (وما ارسلناك الا كافة للناس) يا محمد بز سنى عامه ناسه
ارسال ايتدک (بشيرا و نذيرا) طاعت اهلنه بشير و مخالفت اهلنه نذير
اولديغک حالده (ولكن اکثر الناس لا يعلمون) لکن ناسک اکثرى رسالتى
تصديق ايتزلز و جنت و نارك حقيقت بيلزلز (ويقولون متى هذا الوعد
ان كنتم صادقين) مشرک فرط جهالتلرندن تبشير و انذار ايتديککز قيامت
نوقت اولور اکر قولکزده صادقلرندن ايسه كز بزه خبر و یرک (قل لكم
ميعاد يوم لا تستأخرون عنه ساعة ولا تستقدمون) ديکل که الله تعالى
عذابكزى برکون اير کورمک ديلسه اير کورر لکن انکيچون لوح محفوظده
مکتوب يوم موعود و اردر که اول يوم موت و يا يوم بعثدر اندن نه بر ساعت
تاخير و نه تقديم اولنور سز (وقال الذين كفروا لن نؤمن بهذا القرآن
ولا بالذي بين يديه) كفارمکه ديديلر که بزه قرآنه و نه اندن اول اين توراته
وانجيله تصديق ايدرز * روايت اولنديکه كفارمکه اهل کتابه پيغمبر عز
عليه السلامدن سوال ايدوب اهل کتاب انلره بز انک صفتن کتابلر يمزده بولمشر
ديو خبر و یردکارنده ياوزلنوب کتابلرک جيغمه کافر اولدیلر (ولو ترى
اذ الظالمون موقوفون عند ربهم يرجع بعضهم الى بعض القول) اکر کورسیدک
شول وقتیکه ظالمرب تعالى عندنده موضع محاسبه ده محبوس اولوب متجاوزين
اولدقلى حالده برى برلرینه قولله مراجعت ايدلر (يقول الذين استضعفوا
للذين استكبروا لولا انتم لكاننا مؤمنين) اتباع رؤسا لرينه ديلر که اکر سزك
اضلالكز و ايمانندن بزى صتکز اولمسيدي رسول الله عليه السلامه اتباعله

(بز دخی)

بز دخی مؤمنلر اولوردق (قال الذين استكبروا للذين استضعفوا انحن
صعدناكم عن الهدى بعد اذ جاءكم بل كنتم مجرمين) رؤسا اتباعلرينه
ديلر که بز سزى ايمانندن صد ايتدکى سزه هدى کلدیکندن صکره
بلکه سز کندیکز مجرمين اولديکز شول حيثيتدکه هدادن اعراض
ايدوب انک اوزره تقليدى ايشار ايتديکز (وقال الذين استضعفوا للذين
استكبروا بل مكر الليل والنهار اذ تأمرونا ان نكفر بالله ونجعل له اندادا)
اتباع رؤسا به ديلر که بز ايمانندن صدمزه ليل و نهارده بزى شرکه
دعوتکز احتيالى اولديکه سز بزه امر ايدرديکز که الله تعالى به
کافر اوله وزو آلهه مزى اكا شرکاء قيلهوز (واسرؤا الندامة لما رآوا
العذاب) ايکى فريقدن هر برى صاحبندن تعبير خوفيله ضلال و اضلال
اوزره ندامتى اسرار ايدو شول وقتکه عذابى کوردر (وجعلنا
الاغلال فى اعناق الذين كفروا) كفارك رؤساء و اتباعى بيونلرينه يوم
قيامته آتشدن اغلال قيلورز (هل يحزون الا ما كانوا يعملون)
انلر جز اولمزلا الا انک اوزره که کفر و معاصيدن انى دنياده ايشلد يلردى
(وما ارسلنا فى قرية من نذير الا قال مترفوها انا بما ارسلتم به كافرون)
بز هيچ برقریه اهلنه انذار ايجون برسول کوندرمک الا انلرک رؤساء متعبنى
اول رسوللرينه ديديلر که بز سزك ارسال اولنديگکز شيه کافرلر (وقالوا
نحن اکثر اموالا و اولادا و ما نحن بمعذبين) زخارف دنيا ايله افتخار ايدن
کافرلر مؤمنلرک فقراسنه ديديلر که اموال و اولادده بزا کترز يوم قيامته
بز عذاب اولمزلا زيرا که بز الله تعالى عندنده دنياده کى احوالز قيسله
آخرتده دخی مکرم اولورز اويله اولسه عذابله اهانت اولمزلا (قل ان ربى
يبسط الرزق لمن يشاء ويقدر) ديکل که ريم جل شانه رزق نيچه ديلسه
قسمت ايدر کاهى عاصيه توسيع و مطيعه تضيق ايدر و کاهى عکس
اوزره ايدر آخرت ثوابى اكا قياس اولمز نه رزق بسطى کرامته
ونه تضيقى اهانت دلالت ايدر (ولكن اکثر الناس لا يعلمون) لکن
ناسک اکثرى حال اول منوال اوزره ايدوکن بيلزلز بلکه اموال و اولادک
کترن شرف و کرامت ظن ايدرلر حالبوکه اول اکثرى استدراج ايجون
اولور (وما اموالکم ولا اولادکم بالتي تقر بکم عندنا زلفى) سزى نه اموالکز
ونه اولادیکز بزه تقريب ايدر دکدر (الا من آمن وعمل صالحا)

مکر اول کسه نکه که مؤمن اولوب عمل صالح ایشلیه انک اموال واولادی انی بزه تقریب ایدر شول حیثیتله که مالی سبیل خیراته اتفاق ایدر واولادینه خیر تعلیم ایدوب صلاح اوزره تربیه ایدر (فاولئک لهم جزاء الضعف بما عملوا) ایدی انلر ایچون حسنا تیری مضاعف قیلنور بر حسنه اونه ویدیوزده مالایحصایه دکین تضعیف اولنور (وهم فی الغرفات آمنون) وانلر جنت غره لرنده مکارهدن امینلردر (والذین یسعون فی آیاتنا معاجزین اولئک فی العذاب محضرون) وشونلرکه بزم آیتلریمزه ایماندن ناسی منعه سعی ایدرلر اندن بر ارایه جمع اولوب اندن منفک اولملر (قل ان ربی یبسط الرزق لمن یشاء من عباده ویقدرله) دیکل که ربم جل شانه عبادندن دیلدیکن ابتلا ایچون رزقنی کاهی توسیع وکاهی تضییق ایدر (وما انفقتم من شیء فهو یخلفه) اول شیئکه انی سبیل طاعته اتفاق ایدر سز الله تعالی انک عوضن یادنیاده ویرر ویا آخرته ایر کورر (وهو خیر الرازقین) اول رازقلرک خیرلوسیدر زیرا که غیر رزق ابصالنده واسطه در یوخسه حقیقتده رازق الله تعالی نیک غیری دکلدر (قال النبی صلی الله علیه وسلم ان الله تعالی قال أنفق أنفق علیک) پیغمبریمز علیه السلام ایدر الله تعالی دیرکه بنم رضام یولنه اتفاق آیت که سکا انک اضعا فنی اتفاق ایدم دنیاده و آخرته (قال النبی علیه السلام مامن یوم یصبح العباد فیہ الا وملکان یزنان فیقول احدهما اللهم أعط منفقاً خلفاً ویقول الآخر اللهم اعط ممسکاً تلفاً) پیغمبریمز علیه السلام ایدر هیچ برکون یوقدر که عباد انک صباحنه ایرر الا ایکی ملک نزول ایدوب بری دیرکه الهی طاعتک یولنه اتفاق ایدنه خلف ویر و آخری امسالک ایدنه تلف ویر دیو دما ایدر (قال النبی علیه السلام کل معروف صدقة وکل ما انفق الرجل علی نفسه واهله کتب له صدقة وما وقی به الرجل عرضه کتب له بها صدقة وما انفق المؤمن نفقة فعلی الله خلفها الا ما کان من نفقة فی بنیان اوفی معصیه الله) پیغمبریمز صلی الله علیه وسلم ایدر هر معروف صدقه در وهر شیئکه رجل مؤمن انی نفسنه واهلنه اتفاق ایدر اول انکچون صدقه یازیلور واول شیئکه مؤمن انی اتفاق ایله عرضنی جایب ایدر شاعره وایکی دلایلره ویریلن کبی اولدخی انکچون صدقه یازیلور وهر نفقه که مؤمن انی سبیل مباحه اتفاق ایدر انک خلفی الله تعالی نیک

عهده سنده در مکر اولکه قدر کفایه دن زیاده بنیانه ویاخود معصیته اتفاق اولنه اکا خلف اولمز * دینلدیکه چقان بریکز یدنده رزقندن برشی اوله انی انفاقده اعتدال ایتسون یوخسه (وما انفقتم من شیء فهو یخلفه) آیتن تأول ایله اسراف ایتسون زیرا که رزق ازلدن مقسومدر احتمالدر که رزق قلیل اوله انفاقده توسع ایدر سز اکا ضیق واقع اولور اوله اولسه آیتک معناسی اول شیئکه اتفاق ایدر سز رزق مقسومکزدن اکا خلف اولور (ویوم یحشرهم جمیعاً ثم یقول للملائکة أهؤلاء ایاکم کانوا یعبدون) کفارک رؤساء واتباعلرین یوم قیامتده جمیعاً حشر ایدوب ملائکه به دیرز که اشونلر دنیاده سزهمی عبادت ایدرلردی ملائکه به اشبو خطابله مراد مشرکینی تقریع و تبکیت و ککندیلر ایچون انلردن توقع ایتدکری شفاعتدن اقناط اولور وشرکادن ملائکه بی تخصیصه سبب زیرا که خطابه صالح شرکارک اشرافیدر (قالوا سبحانک انت ولینا من دونهم بل کانوا یعبدون الجن اکثرهم بهم مؤمنون) ملائکه دیلر که یاربنا بزمی شرکدن تنزیه ایدرز موالات ایتدی کمز سنسن یوخسه مشرکینله بزم موالاتمز یوقدر بزانلرک بزه عبادته راضی دکلر ایدک بلکه انلر سنک غیری عبادته شیاطینه اطاعتلریله کانه انلره عبادت ایدرلردی (فالیوم لا یملک بعضکم لبعض نفعا ولا ضرراً) الله تعالی انلره دیه که اشبو کونده بری بریکز ایچون شفاعتله نفعه ویا عذابله ضرره مالک اولمز سز بلکه امرک کلیسی الله تعالی به مختصدر واول دار ایسه دار جزادر و مجازی یالکز اولدر (ونقول للذین ظلموا ذوقوا عذاب النار الی کنتم بها تکذبون) ودنیاده شرک وعصیانله نفسلرینه ظلم ایدنلره دیرز که نار عذابنی ذوق ایدک که سز انک حقیقتن تکذیب ایدر دیکز بعده انلرک سوء فعالاری بیان یورلدیکه (واذا تتلی علیهم آیاتنا بینات قالوا ما هذا الا رجل یرید ان یصدکم عما کان یعبد آباؤکم) چقان انلره بزم آیات واضحه من تلاوت اولنسه محمد علیه السلامه اشارت ایدوب دیرلر که بودکل الا برر جلدلر که آباءنکر عبادت ایدم کلدیکی اصنام عبادتدن سز صداجتک دیرلر تا که انک ابداع ایتدیکی دینه اتباع ایدم سز (وقالوا ما هذا الا افک مفتری) ودخی دیرلر که اول قرآن دیدیکی کلام دکل الا کذب مختلقدر یعنی زعلرینه مطابق اولمدیچون کذبدر

والله تعالى به اضافتله افترا در (وقال الذين كفروا للحق لما جاءهم ان هذا الاسحر مبين) امر نبوته ويا اسلامه ويا قرآنه كافر اولنر اول انلره كديكنده ديدلر كه بود كل الاسحر ظاهر در (وما آتينا هم من كتب يد رسونها) والحال بز انلره كتبدن برشي ورمشد كه اني قراءتله شركت بطلان بيله ردی (وما ارسلنا اليهم قبلك من نذير) وسندن اول بز انلره پيغمبر كوندرم كه شركدن انلري عذابله انذار ايدیدی اويله اولسه انلره شبهه نوجهدن عارض اولدی زیرا كه مخاطب عرب مشركريدر حالبو كه انلره محمد عليه السلامدن غيری پيغمبر بعث اولغيوبدر (وكذب الذين من قبلهم) والحال انلردن اول پكن امم وقرون پيغمبرلريني انلرك كبي تكذيب ايتديلردی (وما بلغوا معشار ما آتينا هم) ومع ذلك اهل مكه بزم اول امم وقرونه ويرديكمز قوت وطول عمر وكثرت مالك عشرينه ايرمديلر ويا اول امم شول اهل مكه به ويرديكمز بينات وهدانك عشرينه ايرمديلر (فكذبوا رسلي فكيف كان نكير) بنم رسوللري مي تكذيب ايتديلر واول حينده انلره انكارم ايروب هلاك اولديلر ايمدی اهل مكه دخي انلره ايريشن مصيبت مثلي ايرشمسندن حذر ايتسونلر (قل انما اعظكم بواحدة ان تقوموا لله مثنى وفرادى) مكه كافرلر يه ديكل كه سزي برخصلت واحده به ارشاد ايد يكه اول ايكيشر ايكيشر وبرر برر خالصا لوجه الله مرء وتقليد دن اعراض ايدر اولديغكز حالده امره انتصاب ايد سز زيرا كه ازدحام خاطره تشويش ويرر (ثم تفكروا ما بصاحبكم من جنة) بعده محمد عليه السلامك وكتوردیكي قرآنك شانده تفكر ايد سز كه انك حقيقتن بيله سز كه صاحبكز محمدده جنوندن اثر يوقدر بلكه اول عقلده ناسك اكليدر وقول وفعلده ناسك اصدقدر (ان هو الا نذير لكم بين يدي عذاب شديد) اول دكل الا عذاب شديد او كندن كلش سزي اندن انذار ايديجيدر كه اول عذاب نارددر (قل ما سألنكم من اجر فهو لكم) ديكل كه تبليغ رسالت اوزره سزدن اجر سؤال ايتامشن اجر كز سزك اولسون بكا اول مقابله ده هيچ برشيئكز كر كز (ان اجرى الا على الله) بلكه بنم اجر م الله تعالىنك وعد كريمه متعلقدر (وهو على كل شئ شهيد) اول هر شيئه مطلعدر بنم صدقي وخلص نيتي يلور (قل ان ربي يقذف بالحق) ديكل كه ربم جل شان

(عبادندن)

عبادندن ديلديكي كسيه حقي القا ايدر ويا حقي اظهار واقطار آفاده رمي ايدوب اول اندن اسلامي اظهار وافشايه وعد اولور (علام الغيوب) كه اول سماده وارضده قول وفعلدن هر خفي بي يلور (قل جاء الحق) ديكل كه اسلام كلدی (وما يبدى الباطل وما يعبد) باطل كيدوب زاهق اولديكه اول شركدر اندن شئ قالمديكه ظاهر اوله ويا عودت ايد * ديتلديكه باطلدن مراد ابليس ويا صمندر يعنى اول نه برشي انشاء ويا برشيئك فناسندنصكره اماده به قادر اولور (قل ان ضللت فانما اضل على نفسي) اكر بن حقدن ضال اولورسم ضلالك وبالي تقسمه اولور سزه دكل (وان اهتديت فبما يوحي الى ربي) واكر حقه اهتدا ايدرسم اول ربم جل شانك فضل ووحيله اهتدا ايدرين (انه سميع قريب) اول هر ضال ومهتدينك قول وفعللرين ادراك ايدر ندكو خفي ايسه ده (ولورى اذ فرعوا فلا فوت) اكر سن كورسك بعث ويا قيام ساعت ويا موت ويا نار عندنده كه انلر فرع ايدلر امر فظيع كورردك انلر الله تعالىنك عذابندن هرب ويا تحصلنه فوت اولزلر (واخذوا من مكان قريب) وانلر مكان قريبدن ظهر ارضدن بطننه ويا موقعدن ناره اخذ اولنورلر وبالجملة انلر هر قنده اولسه ل الله تعالىنك امر وارا دق انلره قريبدن اندن فوت اولزلر (وقالوا آمنابه وانى لهم التناوش من مكان بعيد) وانلره عذاب حلولى عندنده ديه ل كه بعثه ويا محمد ايمان كتوردك والحال انلره قنده اولور كه مكان بعيددن سهولتله ايماني تناول ايدلر زيرا اول حين تكليفده ايكن ممكن ايدى والحال اول انلردن بعيد اولدى اشبو انلرك ايمانله استخلاصده حاللريني تميلدر والحال اول انلردن فوت وبعيد اولدى استحاله ده شول كيسه نك حالنه بكر كه برشي تناوليجون برغلوه مسافه به يديني متله اخذنى قصد ايد اول ايسه محالدر اكر دنيا ده ايمان انلره قريب ايكن اني قصد ايتسه ل ممكن ايدى آخرتده ايسه اول حد امكاندن متجاوز اولوبدر (وقد كفروا به من قبل) حالبو كه اندن او كدين آوان تكليفده محمد ويا عذابه كافر ايدلر (ويقذفون بالغيب من مكان بعيد) ودياده مقاله رينك صدق وحقيقتن بيلكسزين مجرد ظنله محمد شاعر ساحر كاهندر ديو سويلرلردى ويا خود بعث وجات وناز يوقدر ديو خبر

ویرلردی (وحیل بینهم و بین مایشتهون) انلرکه اشتها ایتدکاری توبه و ایمان و دنیا به رجوع بیننده حائل قیلنه (کافعل بأشیاعهم من قبل) تنکیم انلردن اوکدین ائم ماضیه ده انلرک نظراسی کفریه ایدلدی (انهم کانوا فی شک مریب) زیرا که انلر دنیا ده بعثدن وانلره نزول عذابدن ریه ایقاع ایدر شکده ایدیلر

سورة الملائكة وهي خمس واربعون آية مكية

بسم الله الرحمن الرحيم

(الحمد لله فاطر السموات والارض) حمد اول الله تعالى به مختصدرکه سموات وارضی مثال سابقنمزل خلق وابداع ایتدی (جاعل الملائكة رسلا) که اول ملائکه بی کیندیله عبادندن انبیاء وصالحن بیننه وسائط قیلور که انک رسالاتنی دخی الهام ورؤیای صادق ایلله انلره تبلیغ ایدلر ویاخود انکله خلقی بیننه وسائطدرکه انک آثار صنعنی انلره ایصال ایدلر (اولی الجنة مثنی وثلاث ورباع) که انلر ایکیشرواوچر ودردر قناد صاحبیلر یعنی انلرک قنادلری مراتبه تفاوتلری حسبجه متعدده ومتفاوته در انکله نزول وعروج ایدلر توکیل اولندقلری شیء جانبیه سرعتله کیدلر امر اولندقلری منوال اوزره انده تصرف ایدلر واشبو اعداده مراد انک اوزره حصردکلدرکه زیاده بی منافی اوله زیرا پیغمبریمز صلی الله علیه وسلمدن مرویدرکه لیلہ معراجده بن جبریل علیه السلاهی کوردمکه التیوز قنادی وارایدی دیدی (یزید فی الخلق مایشاء) الله تعالى مقتضای مشیتی ومؤدای حکمتی اوزره انلرک خلقنده زیاده ایدر یوخسه ذاتلری استدما ایدر امر ایچون دکل اشبو آیت صورده وکرك معانیده اولور زیاده به متناوله در ملاحظت وجه وحسن صوت وخصافت عقل وسماحت نفس کبی (ان الله على كل شیء قدير) الله تعالى هر شیئه قادردرکه انی وصف احاطه ایتز (ما یفتح الله للناس من رحمة فلا یمسک لها) الله تعالى رجندن بر شیئکه نعمت وامن وعلم ونبوت کبی انی ناسه فتح ایده انی امساک ایدر اولمز (وما یمسک فلا مرسل له من بعده) واول شیئکه الله تعالى انی امساک ایده انک امسا کنندنصکره انی ارسال ایدر اولمز اشبونده

(اشعار)

اشعار واردرکه رحمتی غصینه سبقت ایده (وهو العزيز الحكيم) الله تعالى هر شیئک اوزره غالبدر اکا هیچ احد منازع اولمز هر فعلی علم واثقانه در وقتاکه الله تعالى ملک وملکوتک موجودی اولوب اول ایکیننده متصرف علی الاطلاق کندی ایدیکن تبیین ایتدی انعامنه شکرله ناسه امر ایدوب دیدیکه (یا ایها الناس اذکروا نعمة الله علیکم) یا اهل مکه الله تعالینک سزیه ویردیکی نعمتک حقنی بیلوب منعمنه اطاعتله اول نعمتی حفظ ایدک که اول سزیه حرمننده اسکان ایدوب جمیع طامک عداوتندن سزیه حمایت ایتدی بعده انده غیرک مدخلی اولوب مشارکته استحقاقن انکارله دیدیکه (هل من خالق غیر الله یرزقکم من السماء والارض لاله الا هو فانی تؤفکون) الله تعالیدن غیری هیچ بر خالق وارمیدرکه سزیه سمدان مطر ایلله وارضدن نباتله زرقلندیره * ایدمی بیلک که خلق ورزقده اندن غیری الهکزیوقدر اولله اولسه توحیددن کفره نیچه منصرف اولور سز (وان یکذبوک فقد کذبت رسل من قبلک) اگر مشرکرسنی تکذیب ایدر لسه سندن اوکدین یکن رسوللر دخی تکذیب اولندیلریدی ایدمی تکذیب اولنمغه صبرده انلری اسوه ایدین (والی الله ترجع الامور) جمیع امورک عواقبی الله تعالی به رجوع ایدر انلره تکذیلرینک و سکا صبرکک جزاسن ایدر (یا ایها الناس ان وعد الله حق) یا اهل مکه الله تعالینک حشر و جزائله وعدی حقددر انده خلف اولمز (فلا تغرنکم الحیاة الدنیا) ایدمی حیاة دنیا ایلله تمتعک آخرت طلبندن سزیه اذهال ایتسون (ولا یغرنکم بالله الغرور) وسزیه شیطان معصیتیه میل واصرارکزله الله تعالینک مغفرتن تمنی ایدک دیو الدامسون اول اگرچه ممکندر لیکن اول توقعله ذنب ارتکابی سم تناولنه بکزرکه طبیعتی انی دفع ایتمی توقعیله (ان الشیطان لکم عدو فاتخذوه عدوا) سزیه شیطان عداوت عامه قدیمه ایلله عدودر * ایدمی عقائد وافعالکزده انی عدواتخاذ ایدوب مجامع احوالکزده اندن حذر اوزره اولک (انما یدعو حزبه لیكونوا من اصحاب السعیر) اول اتباعنی اتباع هوایه و دنیا به رگونه دعوت ایدرکه اهل ناردن اولملر (الذین کفروا لهم عذاب شدید) شونلرکه کافر اولدیلر انلر ایچون عذاب شدید واردر (والذین آمنوا وعملوا الصالحات لهم مغفرة واجر کبیر)

وشونلرکه مؤمن اولوب اعمال صالحه ايشلدیلر انلره مغفرت واجر کبیر واردر (أفن زين له سوء عمله فرآه حسنا) شول کسه که اکا سوء عملی تزین اولنه وهم وهواسی عقلنه غالب اولمغله حتی که رأی منعکس اولوب باطلی حق و قبیحی حسن کوره شول اکا سوء عملی تزین اولنمیان کبیدر که اکا توفیق الهی ایشوب حتی بیله اعمالنک حسن قچدن تمیز ایده (فان الله يضل من يشاء ويهدي من يشاء) الله تعالی دیلدیکن ضلالتنه آلیقور و دیلدیکن هدایتیه ایرکورر (فلا تذهب نفسك عليهم حسرات) ایدمی انلرک یمینه و تکذیب اوزره اصرارینه اغتمام واعتماد ایتکل (ان الله عليم بما يصنعون) الله تعالی انلرک سوء صنیعنه علیمدر یوم قیامتده جزالرین ایدر (والله الذي ارسل الرياح فتنن سحابة فستقاه الى بلد ميت فاحييناه الارض بعد موتها) الله تعالی ایدر که ریاحی ارسال ایدوب مطر انزالیچون سحاب تهییج ایدر و اول سحابی بر بلد میتیه سوق ایدرز و اول سحابدن نازل اولان مطر ایله اول بلدک ارضنی یسله موتدنصکره انده یشیل اوتلر بترمکه انی احیا ایدرز (كذلك النشور) ایدمی شول سزک قبوردن خروجک بزه عمرنسنز اوتلرک یردن خروجی کبیدر * روایت اولندیکه یوم قیامتده الله تعالی عرشک اتندن رجالات منیمی کبی بر ماء ارسال ایدوب انکله خلقتک اجسادنی یردن بتورر (من كان يريد العزة فلله العزة جميعا) اول کسه که عزت کیمک ایدیکن بیلک مراد ایده بیلسونکه عزتک جیبی الله تعالی نکدر و یا اولکه عزت مراد ایده الله تعالی یه اطاعتله تعزز ایتسون عزتک جیبی انکدر اکا اطاعتله انی اندن استسون (اليه يصعد الكلم الطيب والعمل الصالح يرفعه) کلم طیب الله تعالی یه صعود ایدر * دینلدیکه اول کشینک (لا اله الا الله) دیمسیدر و یاخود (سبحان الله والحمد لله ولا اله الا الله والله اكبر) دیمسیدر ابن مسعود ایدر بر عبدکه (سبحان الله والحمد لله ولا اله الا الله والله اكبر وتبارك الله) دیه بر ملک انی تحت جناحنه آلوب صعود ایدر ملائکه دن هر جاعتیه که اوغرایه الا انلر انک قائلیچون استغفار ایدر حتی انی الله تعالی درگاهنه ایرکورر دینلدیکه کلم طیبله مراد مطلق ذکر اللهدر و عمل صالح اول کلم طیبی رفع ایدر * حسن وقتاده ایدر کیم کلم طیب ذکر اللهدر و عمل صالح اداء فرائضدر اولکه ذکر الله

(ایدوب)

ایدوب فرائضی ادا ایتیه انک کلامی عملنه رد اولنور ایمان نه تمنی ونه تحلی ایله در بلکه اول قلوبده توقیر اولنور شیئدر انی اعمال تصدیق ایدر اولکه قول حسن سویلوب عمل ایتیه الله تعالی اکا اول قولنی رد ایدر اولکه قول حسن سویلوب عمل صالح ایشلیه اول عمل انی رفع ایدر حدیثده کلدیکه (لا يقبل الله قولا الا بعمل ولا قولا ولا عملا الا بنية) الله تعالی عملسنز قولی قبول ایتز و نیتسنز قول و عملی دخی قبول ایتز و یا عمل صالحه مراد الله خالص اولان عملدر یعنی اقوال و افعالدن هر خیرک قبولنه سبب اخلاصدر شول دلیلله کیم سورة کهفک آخرنده (فليعمل عملا صالحا ولا يشرك بعبادة ربه احدا) دیو شرک و ریائی عمل صالحه نقیض ایتدی (والذين يمكرون السيئات لهم عذاب شديد ومكر اولئك هو يبور) شونلرکه مکررات سیئاتی ایشلرلر که اول قریشک دار الندوه ده پیغمبریمز صلی الله علیه وسلمه مکر ایتد کلریدر و اوچ خصلتک برنده رأیلرینک تداوریدر که اول انی حبس و یاقتل و یا اجلا لریدر * ایدمی انلر ایچون عذاب شدید واردر و اول کافرلرک مکری فاسد اولور نافذ اولمز زیرا که امور مقدره در متغیر اولمز (والله خلقكم من تراب ثم من نطفة ثم جعلكم ازواجا) الله تعالی اصلکز آدمی ترابدن بعده ذریه سنی نطفه دن خلق ایتدی بعده سزی ذکران و اناث ایتدی (وما تحمل من انثى ولا تضع الا بعلمه) و بر انثی برولدی حامل اولسی و وضع ایتسی دکل الا انک عملی ملابسیتله در (وما يعمر من معمر ولا ينقص من عمره الا في كتاب) هیچ برطویل العمرک عمری طویل اولمز و معمرک عمرندن غیر ایچون نقص اولمز و یا عمری منقوصک عمرندن نقص اولمز الا اول علم اللهده و یا لوحده ثابتدر * دینلدیکه عمر واحدده اوچ اسباب مختلفه ایله زیاده و نقصان اولمق لوح محفوظده ثابتدر مثلاً زید حج ایدر سه عمری التمش ییل اوله حج ایتز سه قرق ییل اوله دیو یازلش اوله و یاخود نقصانله مراد عمرندن مرور ایدن زمان اوله اوله اولسه صحیفه عمرینه هر کون عمرندن اول مرور ایدن زمان یازلمسی اوله * روایت اولندیکه عمر بن الخطاب رضی الله عنه محتضر اولدیغنده کعب الاحبار رضی الله عنه دیدیکه والله اکر عمر رب تعالی یه اجلنی تأخیر ایچون دما ایتسه تأخیر ایدر دی اکا دینلدیکه اول نیچه نمکندر حالبوکه الله تعالی (فاذا جاء اجلهم لا يستأخرون

ساعة ولا يستقدمون) چنان انلرك اجلى كله نه تقدم ونه تأخر ايدر
 ديمشدر ديديكه اول حكم اجل حاضر اولديغنده در اما كه اندن اول
 زياده ونقصان اولمى جائز اولور ديوب اشبو صددنده اولديغمز آيتله
 استدلال ايتدى (ان ذلك على الله يسير) اشبو اعمارى زياده وناقص
 ايتك الله تعالى به آساندر (وما يستوى البحران هذا عذب فرات سائغ
 شرابه وهذا ملح اجاج) بحر عذبله بحر مالخ ايكيسى برابر اولمزانك برى عذب
 طيب اولوب حلقه سهولتله كيدر واول برى ايسه مالخ اولوب ملوحتندن
 حلقى احراق ايدر اشبو مؤمنله كافره مثلددر (ومن كل تأكلون لحما طريا)
 اول ايكى بحرك هر برندن لحم طرى پرسزكه اول سمكدر (وتستخرجون
 حلية تلبسونها) و بحر مالخن حليه چيقاروب انى لبس ايدر سزكه اول
 لؤلؤ و مرجاندر (وترى الفلك فيه مواخر) واول ايكى بحرك هر برنده
 سفاينك يور يمسيه مائك شقى وار كوررسن (لتبتغوا من فضله) تاكه
 الله تعالىنك رزقندن طلب ايده سز (ولعلكم تشكرون) و تاكه انك
 نعمتيرنه شكر ايده سز (يولج الليل فى النهار ويولج النهار فى الليل)
 الله تعالى كچه يي كوندزه ادخال ايدوب كوندزى اوزون ايدر
 و كوندزى كچه به ادخال ايدوب كچه يي اوزون ايدر (وسخر الشمس
 والقمر كل بحرى لاجل مسمى) و شمس و قمرى بنى آدمه تسخير ايتدى هر برى
 دورى مدتته و يامنتهاسنه و ياقيامته دككين فلكنده جارى اولور
 (ذلكم الله ربكم له الملك) اشبو اشياء بديعهنك فاعلى ربكز الله تعالىدركه
 سموات وارضك ملكى انكدر انى بيلوب توحيد ايدك و حاجاتكزى اندن
 ديله كزكه اول دعا كزه اجابت ايدر (والذين تدعون من دونه ما يملكون
 من قطمير) شول اصنامكه الله تعالىدن غيبرى انلره يلووار حاجتكز
 ديلرسز قطمير دكلوشى نفعه قادر اولزلر و قطمير شول قشر رقيقدركه
 نوات اوزره ملتفدر (ان تدعوهم لا يسمعوا دعاءكم) اكر سز اصنامه
 دعا ايتسه كز دعا كزى ايشتمزلر زيرا كه انلر جاد درلر (ولو سمعوا
 ما استجابوا لكم) ايشيدر اولدقلى تقدير اوزره دعا كزه اجابت
 ايتزلردى انقاعه قدرتلى اولديغچون (ويوم القيامة يدعون
 بشركم) ويوم قيامته سزك اول اصنام كنديلرين الله تعالى به
 اشرا ككز بطلانه اقرار ايدر لر و ياخود سز بزه عبادت ايتز بلكه

(شياطينه)

شياطينه عبادت ايدر ديكز ديرلر (ولا يثبتك مثل خبير) سكا اصنامك
 وعبدك سنك حالنى و ياخود دنيا و آخرت احوالى خبير اولان الله تعالى
 كبي هيچ احد خبر و يرمن (يا ايها الناس انتم الفقراء الى الله) ياناس
 الله تعالىنك فضلنه سز محتاجلرسز (والله هو الغنى الحميد) الله تعالى
 على الاطلاق خلقندن مستغنيدر سائر موجوداتى منعمدر حتى كه حد
 اولتمى اوزرلرينه حق اولدى (ان يشأ يذهبكم ويأت بخلق جديد)
 اول ديلرسه سزى كيدر وب سزدن بدل بر قوم آخرين كتورر كه اول
 سزدن اطوع اولور و ياخود سزك بيلديككز بر عالم آخر كتورر
 (وما ذلك على الله بعزيز) اشبو فعل الله تعالى به متعذر و يامتعسر دكلدر
 (ولا تزر وازرة وزر اخرى) هيچ بر نفس آئمه نفس اخرايك اثمنى حامله
 اولمز وسوره عنكبوتده (وليحملن اثقالهم واثقالا مع اثقالهم) قول شريفيله
 مراد ضالين مضليندر كه انلر ائقال اضلالرين ائقال ضلالريله بيله
 حاملين اوليسرلردر انك كليمى كنديلرك اوزاريدر يوخسه غيرك اوزارندن
 انده برشى يوقدر (وان تدع مثقلة الى حملها لا يحمل منه شئ) اكر نفس
 حاملة الاثقال بعض ائقالنك حمله نفس اخرايى دعوت ايتسه اندن
 برشى حمله اجابت ايدر اوليه نتكيم اول غيرك ائقالنى حل ايتديكى كبي
 (ولو كان ذا قربى) اكر اول دعوت اولنسان انك ذاقرايتى ايسه ده
 (انما تنذر الذين يخشون ربهم بالغيب واقاموا الصلاة) يا محمد سن انذار
 ايدرسن شول قوميكه رب تعالى يي كورممشلر ايكن انك عذابندن
 قورقرلر و صلاتى اتمام اركانه ادا ايدرلر (ومن تركى فانما يتركى لنفسه)
 اول كسه كه معاصى دنسندن تطهر ايده اول نفسچون تطهر ايدر
 (والى الله المصير) جله نك مصيرى الله تعالى به در هر نفسى فعلى اوزره
 مجازات ايدر (وما يستوى الاعمى والبصير) كافر و مؤمن و يا صنم
 الله تعالى به مساوى اولمز (ولا الظلمات ولا النور) و باطل و حق و كفر
 و ايمان دخی مساوى اولمز (ولا الظل ولا الحرور) و جنت و نار و يا سواد
 ليل و سموم نهار دخی مساوى اولمز (وما يستوى الاحياء ولا الاموات)
 و علما و جهال و يا اسلامه صدرلرين شرح ايدنلر شول كفرله قبلبرى قاسيلر
 مساوى اولمز (ان الله يسمع من يشاء) الله تعالى هدايتن ديلديكى كسه به
 سنك انذاركى اسماع ايدوب اسلامه كتورر و خذلانن ديلديكى كسه يي

کفرده آلبقور زیرا که هدایتله منتفعی و غیر منتفعی بیلور (وما انت بمسمع من فی القبور) یو خسه سن اندارکی اسماعه قادر اولمزن شول کافرله که کفر اوزره اصرارلرندن قبورده کی اموات کبی اولوب اندارک انلره نفع ایتزد (ان انت الانذیر) سن دکل الانذیر سن سکا واجب اولان اندارد یو خسه اسماع دکل (انا ارسلناک بالحق بشیرا ونذیرا) بز سنی قرآنله بشیر ونذیر ارسال ایتدک مؤمنلره جنتله تبشیر و کافرلی و منافق لری نار ایله تخویف ایدهن (وان من امة الا خلا فیها نذیر) هیچ بر عصرده بر امت اولدی الا انده اول امتی عذاب الاهدن تخویف ایدر بر نبی و یا عالم مضی ایتدی (وان یکذبوک فقد کذب الذین من قبلهم جاءتهم رسالهم بالبینات وبالزبر وبالکتاب المنیر) یا محمد اکر کفار قریش سنی تکذیب ایدرلر سه انلردن اول کچن اتمک کفار یدخی تکذیب ایتدیلردی رسوللرینی که انلره صحت نبوتلرینه شهادت ایدر معجزاتله ودخی صحفله ودخی تورات وانجیل کبی کتاب منیرله کلدیلر (ثم اخذت الذین کفروا فکیف کان نکیمر) بعده انلره کافر اولنلره عقاب ایتدم * ایمدی قریش کورسونلر که کفارله عقوبتم نیچه اولدی (ألم تر ان الله انزل من السماء ماء فاخرجنا به ثمرات مختلفا الوانها) یا محمد بیلزمیسنکه الله تعالی سعادن ماء انزال ایدوب انکله اشجاردن شول اجناس واصنافی مختلف میوه لر اخراج ایتدک (ومن الجبال جدد بیض وحر مختلف الوانها) و طاغردن طریقلر ایتدککه انک کیمی بیاض و کیمی قرمز شدت وضعفنده لونلری مختلفدر (وغرابیب سود) وانک کیمی شدید السواددر ککانه سوادی غراب لونه بکزیوبدر (ومن الناس والدواب والانعام مختلف الوانه كذلك) و ثمار و جبالک مختلف الالوان اولسی کبی ناس و دواب وانعام دندخی مختلفه الالوان ایتدک * ایمدی اول کسه که رب تعالینک آثار صنیعن ادراک ایدوب معتبر اوله خالقنی بیلور و اندن اکا خوف کاور تکیم اکا دلالت قیلور اشبو قولیکه ذکر اولنور (انما یخشى الله من عباده العلماء) الله تعالیدن قورقز الا انلر که انک صفات و افعالی بیلور اولکه انی اعلمدر اندن قورقوسی زیاده اولور (قال النبی صلی الله علیه وسلم انی اخشاکم لله و اتقاکم) پیغمبریمز علیه السلام اصحابنه خطاب ایدوب دیدیکه بن سزک

(جمله)

جمله کزدن زیاده الله تعالیدن خشیت و اتقاء ایدرین دیدی * دینلر دیکه کشی به خشیه الله علم یتروا غترار بالله جهل یترو (ان الله عزیز غفور) الله تعالی ملکنده عزیزدر اکا عصیانندن توبه ایدنه غفوردر (ان الذین یتلون کتاب الله) شونلر که تلاوت قرآنه مداومت و موجبله عمله ملازمت ایدرلر (واقاموا الصلاة) و صلوات مکتوبه بی مواقیتمده اتمام ارکانه ادا ایدرلر (وانفقوا مما رزقناهم سرا و علانیة) و ویردیکمز ماللرندن کیف ما اتفق طاعة الله اتفاق ایدرلر و یا خود اتفاق مسنونی سرده و مفروضی علانیه ده ایدرلر (یرجون تجارة لن تبور) و اول طاعتله ثواب تحصیلن رجا ایدرلر که اول بر تجارتدر که انک کسادی اولمز و خسرا نله اکا هلاک ایرمز (لیوفیهم اجورهم) تا که انی اتفاقله اعماللرین انلره توفیه ایده (ویزیدهم من فضله) و ثوابدن ماعدا الله تعالی انلر ایچون زیاده ایده انیکه کوزلر کورمدک و قولالقر ایشتمدکدر (انه غفور شکور) اول انلرک فرطاته غفور و طاعاتنه شکوردر (والذی اوحینا الیک من الکتاب هو الحق مصدقا لما بین یدی) اول شیتکه قرآندن سکا و حی ایتدک انی تقدم ایدن کتابلری تصدیق ایدر اولدیغی حالده اول حقدر (ان الله بعباده لخبیر بصیر) الله تعالی عبادنک بواطن احوالنه خبیر و ظواهر افعالنه بصیردر (ثم اورثنا الکتاب الذین اصطفینا من عبادنا) یا محمد قرآنی سکا و حیدنصکره عبادمزدن اصطفای ایتدیکمز کسه لره سندن توریته حکم ایتدک که انلر که مراد اشبو امتک علماسیدر و یا امتک جعییدر زیرا که الله تعالی انلری سائر ام اوزره اصطفای ایدوبدر و امة وسط قیلوب سائر ام اوزره شهاده اهل ایدوبدر (فنههم ظالم لنفسه) انلرک برصنقی نفسلرینه ظلم ایدیکیدر علمده تقصیرلری سیبیلله (ومنهم مقتصد) وانلرک برصنقی ايسه اغلب اوقاتده عمل خیر ایدرلر اکر چه اقلنده عمل سیئی ایدرلر سه ده (ومنهم سابق بالخیرات باذن الله) وانلرک برصنقی دخی الله تعالینک اذنیله خیراته سابقلردر عمللرینه تعلیم و ارشادی ضمله (ذلک هو الفضل الکبیر) اشبو توریث و یا اصطفای و یا سبق الله تعالیدن فضل کبیردر (قال النبی علیه السلام سابقنا سابق و مقتصدنا ناج و ظالمنا مغفورله) پیغمبریمز علیه السلام ایدر بزم سابقمز جنته

لث (۲۵)

سابقدر ومقتصد من نجات بولور وظالمزه مغفرت اولنور ابوالدرداء
رضی الله عنهدن مرویدر که پیغمبر میز صلی الله علیه وسلم ایشتمکه
اشبو آیتی اوقیوب دیدیکه اما سابق جنه حساب اولمدین کیرر ومقتصد
حساب یسیرله حساب اولنور ونفسنه ظالم مقامده حبس اولنوب اکا
هم دخولدنصکره جنه کیرر * حسن ایدر سابق حسنی سیئاتی اوزره
راجع اولاندر ومقتصد حسنی سیئاتی مساوی اولاندر وظالم سیئاتی
حسناته غالب اولاندر دینلیدیکه ظالم ظاهری باطنندن خیرلو اولاندر
ومقتصد ظاهر وباطنی مساوی اولاندر وسابق باطنی ظاهرندن خیرلو
اولاندر دینلیدیکه ظالم لسانیه توحید ایدوب فعلی قولنه موافق اولیاندر
ومقتصد لسانیه توحید وجوارحیه طاعت ایدندر وسابق لسانیه توحید
وجوارحیه اطاعت وعملی لله خالص ایدندر دینلیدیکه ظالم تلاوت
قرآن ایدندر ومقتصد تلاوت قرآن ایتسیله بیه معناسنی فهم ایدندر
وسابق تلاوت قرآن ایدوب موجیه عمل ایدندر * دینلیدیکه ظالم
اصحاب کبائردر ومقتصد اصحاب صغائردر وسابق کبائردر وصغائردر
خالیدر دینلیدیکه سابق طامدر ومقتصد متعلدر وظالم جاهلدر جعفر
صادق ایدر الله تعالی اشبو آتیه ظالمه بدشندن اشارت بپورلیدیکه
اکا تقرب بیه انک کریمیه اولور اگرچه ظالم ظلم ایدر سده اصطفا سنه
اثر ایتزدر ثانیاً مقتصدی ذکریه اشارت ایتدیکه انلر خوف ورجا
بیننده در سابقله ختم ایتدیکه هیچ کسه انک مکرنندن امین اولیه وکلیدی
جنتده در * ابو بکر الوراق ایدر اشبو آیت مقامات ناس اوزره مرتبدر
زیرا که عبد اوج خصلتک برندن خالی اولمز یا معصیت ویا غفلت ویا توبه در
چنانکه عصیان ایدر ظالمین حیرینه داخل اولور چنانکه توبه ایده
مقتصدین گروهنه داخل اولور چنانکه توبه سی صحیح اولوب کثرت عبادت
ومجاهده ایده عدد سابقنه لاحق اولور (جنات عدن یدخلونها
یحملون فیها من اساور من ذهب ولؤلؤا ولباسهم فیها حریر) اشبو امتدن
ذکر اولنان اصناف ثلاثه جنات عدنه کیرر لر واندن التوندن وانجودن سوارلر
ایله تحلی وتزین ایدر لر انلر که انده لباسی حریردر (وقالوا الحمد لله الذی اذهب
عنا الحزن) وجنته کیرر دکارنده ده لر که الله تعالی به جد اولسونکه معاشده

(وکرک)

وکرک معامله ده حزن ایجاب ایدر هرشیئی بزدن کیدردی اول حزن موت
وحزن نار وحزن سیئات وحزن رد طاعات وحزن زوال نعم وحزن تقلب
قلب وحزن قاقبه وحزن احوال یوم قیامت وغیری کبی (ان ربنا لغفور
شکور) ربمز جل شاننه مذنبینه غفور ومطیعینه شکوردر (الذی احلنا
دار المقامة من فضله) اول الله تعالی فضلندن بزنی دار اقامته انزال ایتدی
(لایمسنا فیها نصب ولا یمسنا فیها لغوب) که انده بزه تعب وکلال ایرمز
(والذین کفروا لهم نار جهنم لایقضى علیهم فیموتوا ولا یخفف عنهم
من عذابها) شونلر که کافر اولدیلر انلر ایچون نار جهنم واردر انلر اوزره
موت ثانی ایله حکم اولمز که هلاک اولوب استراحت ایده لر وانلردن اول نار
عذابی دخی تخفیف اولمز (کذلک نجزی کل کفور) اشبو جزاء کبی
جزاء ایدرز هرکسه یه که کفرده ویا نعمة الله کفرانده مبالغ اولور
(وهم بصطر خون فیها ربنا اخرجنا نعمل صالحا غیر الذی کننا نعمل) حالبوکه
انلر اول نارده فریاد ایدوب دیه لر که یاربنا بزنی بوناردن چیقاروب کیرو
دنیا یه رد ایتکه ایشلیو کلدیکمز کفر وعصیانک یرینه انده عمل صالح
ایشلیه وز (اولم نهمرکم مایتذکر فیه من تذکر) الله تعالی انلره دیه که
بزسزک اعمار یکیزی طویل ایتدکی شول دکاوکه انده مکلف تذکره
تمکن ایدردی دینلیدیکه اول بلوغدر ویا اون سکر سنده در ویا قرق
سنه در ویا التمش سنه در که انده ابن آدمک عذری کسیلور (قال النبی
علیه السلام أعذر الله الی امری اخرجله حتی بلغه ستین سنه) پیغمبر میز
صلی الله علیه وسلم ایدر الله تعالی عذر قومادی شول کسه یه کیم انک عمرنی
التمش بیه ایرکوره (قال النبی علیه السلام اعمار امتی مابین ستین
الی السبعین واقلمهم من یحوز ذلک) پیغمبر میز علیه السلام ایدر اتمک عمرلری
التمش بیل ایله یتمش بیل اراسنده در انلردن قتی آذر که عمری انی تجاوز ایده
(وجاءکم النذیر) وسززه نذیر دخی کلدیکه اول محمد علیه السلامدر
ویا قرآندر ویا شیبدر دینلیدیکه شیب موتک بریدیدر (فذوقوا فلظالمین
من نصیر) ایددی عذابی ذوق ایدک کافرلره نصرت ایدر یوقدر که
انلردن عذابی دفع ایده (ان الله عالم غیب السموات والارض) الله تعالی
سموات وارضده کی غیبی بیلور اولیه اولسه انلر که احوالندن اکا هیچ


شیء خفی اولمز انلر دنیایه رد اولنسه لر نهی اولندقلری شیئه عودت ایدیسر لر ایدیکنی بیلور (انه علیم بذات الصدور) زیرا که اول صدورده اولان مضمراتی بیلور عالمده کی هرغیبی بیلمی کی (هو الذی جعلکم خلائف فی الارض) الله تعالی سزی یر یوزنده بری بریکزه خلیفه قیلدی ویاسزی یکن امتلره خلائف قیلدیکه انلردن کوروب ایشدکاریکزه متعظ ومعتبر اوله سز ویاسزی ارضنده خلفاء قیلدیکه انده تصرفه مالک اولور سز انده کی منافعی سزه مباح قیلدیکه توحید وطاعتله اکا شکر ایده سز ویاخود دین اسلامی اقامتنه سزی خلفا قیلدی (فن کفر فعلیه کفره) اول کسه که کافر اوله کفرنک وبالی کندی اوزره در (ولایزید الکافرین کفرهم عند ربهم الامقتا ولا یزید الکافرین کفرهم الا خسارا) کافرله کفرلری رب تعالی عندنه اشد بغضی و آخرته خسارترین زیاده ایدر (قل ارایتم شرکاءکم الذین تدعون من دون الله ارونی ماذا خلقوا من الارض) یا محمد مشرکله دیکل که بکا خبر ویرک که الله تعالی دن غیری اشراک ایتدیکر اصنامکه انلره عبادت ایدرسز بکا کوسترک که ارضدن قنغی جزؤک خلقنه مستبد اولدیلر (ام لهم شرک فی السموات) یوخسه سموات خلقنده الله تعالی ایله بیله شرکتلری واردر که اول سبیدن الوهیده شرکت ذاتیه مستحق اولدیلر (ام آیتناهم کتابا فهم علی بینه منه) ویاخود بز انلره کتابی ویردک که انلر اول کتابدن اصناملری بزه شرکاء اتخاذا ایتدکارینه حجت اوزره درلر (بل ان یعد الظالمون بعضهم بعضا الاغورا) بلکه کافرلرک اسلافی اختلافلرینه ویارؤسامی اتباعلرینه وعدلری دکل الاغیردر که اول اصناملری عندالله انلر ایچون شفعا اولیسرلردر دنیا ده انلرک اول اصنامه عبادتلی سبیلله (ان الله یمسک السموات والارض ان تزولا) الله تعالی سموات وارضی قدرتیله اخذاید که زائل اولیه ویاخود اول ایکسن زائل اولمقدن منع ایدر (ولئن زالنا ان امسکهما من احد من بعده) اگر اول ایکسی مقررلندن زائل اولسه لر الله تعالی دنصکره ویاخود زواللرند نصکره اندن غیری هیچ احد امساک ایدر اولمز (انه کان حلیمًا غفورًا) اول الله تعالی حلم ومغفرتله متصف اولدی اول اجلدن

(کفارک)

کفارک عقوبتنه معاجل اولیوب توبه ایتدکارنده سیئاتلرندن تجاوز ایتدی (واقسموا بالله جهنم ايمانهم لئن جاءهم نذیر لیکونن اهدی من احدی الامم) محمد علیه السلام بعثدن اول اهل کتابک رسوللری تکیذینی قریش ایشدیکجک دیدیلر که الله تعالی یهود ونصارا یه لعنت ایده که رسوللری تکیذ ایتشلر والله اگر بزه رسول کسه یهود ونصاری وسائر امتلرک هدی واستقامتده افضلندن اهدی اولوردق (فلما جاءهم نذیر مازادهم الا نفورا) وقتاکه محمد علیه السلام انلره انذار ایچون رسول کلدی وانلرک حقدن تباعدین آرتوردی (استکبارا فی الارض ومکر السی) یر یوزنده استکبار ایدر وفعل قبیح ایشلر اولدقلری حالده (ولا یحیی المکر السی الا باهله) فعل قبیح ایسه حلول ایتز الاینه انک فاعلنه حلول ایدر اول فعل قبیحله مراد شرک اوزره ومحمد علیه السلامی قتل اوزره اجتماعلریدر اولیه اولسه یوم بدرده قتل اولندیلر (فهل یظنون الا سنة الاولین) انلر منتظر اولزلر الا الله تعالی نیک رسوللری تکیذ ایدنلر شانده ام سالفه یه ایتدیکی تعذیب سنتنه منتظر اولورلر (فلن تجد لسنة الله تبدیلا ولن تجد لسنة الله تحویلا) ایدمی سن الله تعالی نیک سنتنه تبدیل وتحویل بولمز سن اول تعذیبی غیری تعذیه تبدیل ویانی مکذیبندن غیرلره تحویل ایتز (اولم یسیروا فی الارض فینظروا کیف کان عاقبة الذین من قبلهم) کفار مکه تجارت وغیر حاجت ایچون شام ویمن وعراقه سیروسفر ایتلریمیکه انلردن اول یکن امدن رسوللری تکیذ ایدنلرک کندیلری هلاک اولدیغندن دیارلری نیک آثارینه نظر ایدلر اندن معتبر اولوب طریق هدایت کیده لر (وکانوا اشد منهم قوّة) حالبوکه اول ام کافره انلردن قوتده اشد ایدیلر (وما کان الله لیعجزه من شیء فی السموات ولا فی الارض) الله تعالی بی سموات وارضده برشیء اعجاز ایدر اولمیکه انک عذابندن هیچ احد هربه قادر اوله (انه کان علیمًا قديرًا) الله تعالی جمیع اشیای علیم وقدير اولدی (ولو یؤاخذ الله الناس بما کسبوا مآ ترک علی ظهورها من دابة) اگر الله تعالی ناسی ایشلدکاری معاصی سبیلله مؤاخذه ایتسه یر اوزره تحرک ایدر بر حیوان ترک ایتز جمله سن هلاک ایدردی نوح علیه السلام

طوفانده کی کبی که ائک سفینه سنده اولنلرک غیر یسن هلاک ایتدی (ولکن
 يؤخرهم الى اجل مسمى) لکن ائلری اجل مسمایه تأخیر ایدرکه
 اول یوم قیامتدر (فاذا جاء اجلهم فان الله كان بعباده
 بصیرا) بچان اجل موعودلری که الله تعالی
 عبادنک اعمالنه بصیردر جزالرین ایدر

تم الجلد الثالث ويليہ الجلد الرابع



قد طبع في المطبعة العثمانية

۱۳۰۷

فهرس جلد رابع من ترجمة تبيان



سورة يس	سورة الصافات	سورة ص
٢ صحيفه	١٨ صحيفه	٣٥ صحيفه
سورة الزمر	سورة المؤمن	سورة حم السجدة
٥٤ صحيفه	٧٠ صحيفه	٨٦ صحيفه
سورة الشورى	سورة الزخرف	سورة لدخان
٩٧ صحيفه	١٠٨ صحيفه	١٢٠ صحيفه
سورة الجاثية	سورة الاحقاف	سورة القتال
١٢٦ صحيفه	١٣٢٠ صحيفه	١٤٢ صحيفه
سورة الفتح	سورة الحجرات	سورة ق
١٤٩ صحيفه	١٥٩ صحيفه	١٦٧ صحيفه
سورة الذاريات	سورة الطور	سورة النجم
١٧٣ صحيفه	١٨٠ صحيفه	١٨٥ صحيفه
سورة القمر	سورة الرحمن	سورة الواقعة
١٩٣ صحيفه	١٩٨ صحيفه	٢٠٦ صحيفه
سورة الحديد	سورة المجادلة	سورة الحشر
٢١٣ صحيفه	٢٢٢ صحيفه	٢٣٠ صحيفه
سورة الممتحنة	سورة الصف	سورة الجمعة
٢٣٩ صحيفه	٢٤٤ صحيفه	٢٤٧ صحيفه
سورة المنافقين	سورة التغابن	سورة الطلاق
٢٥١ صحيفه	٢٥٣ صحيفه	٢٥٧ صحيفه
سورة التحريم	سورة الملك	سورة ن
٢٦٣ صحيفه	٢٦٨ صحيفه	٢٧٣ صحيفه


فهرس جلد رابع من ترجمة تبيان

سورة الحاقة	سورة المعارج	سورة نوح
٢٨٠ صحيفه	٢٨٤ صحيفه	٢٨٧ صحيفه
سورة الجن	سورة المزمل	سورة المدثر
٢٩٠ صحيفه	٢٩٤ صحيفه	٢٩٨ صحيفه
سورة القيامة	سورة الانسان	سورة المرسلات
٣٠٤ صحيفه	٣٠٧ صحيفه	٣١٢ صحيفه
سورة النبأ	سورة النازعات	سورة عبس
٣١٦ صحيفه	٣٢٠ صحيفه	٣٢٣ صحيفه
سورة التكوير	سورة الانفطار	سورة المطففين
٣٢٦ صحيفه	٣٢٨ صحيفه	٣٢٩ صحيفه
سورة الانشقاق	سورة البروج	سورة الطارق
٣٣٣ صحيفه	٣٣٥ صحيفه	٣٣٩ صحيفه
سورة الاعلى	سورة الفاشية	سورة الفجر
٣٤٠ صحيفه	٣٤٢ صحيفه	٣٤٤ صحيفه
سورة البلد	سورة الشمس	سورة الليل
٣٤٩ صحيفه	٣٥١ صحيفه	٣٥٢ صحيفه
سورة الضحى	سورة ألم نشرح	سورة التين
٣٥٤ صحيفه	٣٥٦ صحيفه	٣٥٨ صحيفه
سورة العلق	سورة القدر	سورة البينة
٣٥٩ صحيفه	٣٦١ صحيفه	٣٦٣ صحيفه
سورة الزلزلة	سورة العاديات	سورة القارعة
٣٦٤ صحيفه	٣٦٦ صحيفه	٣٦٧ صحيفه

فهرس جلد رابع من ترجمة تبيان

سورة التكاثر	سورة العصر	سورة الهمزة
صفحة ٣٦٧	صفحة ٣٦٨	صفحة ٣٦٩
سورة الفيل	سورة قريش	سورة الماعون
صفحة ٣٦٩	صفحة ٣٧١	صفحة ٣٧١
سورة الكوثر	سورة الكافرون	سورة النصر
صفحة ٣٧٢	صفحة ٣٧٣	صفحة ٣٧٤
سورة تبت	سورة الاخلاص	سورة الفلق
صفحة ٣٧٥	صفحة ٣٧٦	صفحة ٣٧٧
	سورة الناس	
	صفحة ٣٧٧	





الجلد الرابع

فِنْ تَرْجَمْتَنِيْ اِلَيْكَ

بِسْمِ اللّٰهِ الرَّحْمٰنِ الرَّحِيْمِ

(سورة يس وهى ثلاث وثمانون آية مكية) (بسم الله الرحمن الرحيم)

(يس) دینلدیکه اول قمردر ویا اول طی لغتنده یا انسان دیمکدر که انکله مراد محمد علیه السلامدر و یاخود یا سید البشر دیمکدر و یاخود فواتح سوردر که انکله اشبو سوره افتتاح اولوبدر (والقرآن الحكيم) قرآن حقچونکه اول ذو حکمتدر و یا کتب منزله نك جبعی اوزره حقله حکم ایدیمکدر (انک لمن المرسلین علی صراط مستقیم) یا محمد سن انبیاء مرسلیندن تو حید و امورده استقامت اوزره اولان صراط مستقیمدر (تنزیل العزیز الرحیم) قرآن الله تعالینک تنزیلیدر که انی تصدیق ایتماندن انتقام ایدر وانی تصدیق ایدوب موجبيله عمل ایدنه رحمت ایدر (لننذر قوما ما انذر آباؤهم) تا که انذار ایدنه سن بر قومیکه آباء و اقربالری انذار اولمادی مدت فترت تطاولچون رسوله احتیاجلری شدید اولمشدر زیرا که قریشه محمد علیه السلامدن اوکدین رسول کلیوبدر (فهم غافلون) اويله اولسه انلر ایمان ورشدن غافلدر (لقد حق القول علی اکثرهم فهم لا یؤمنون) انلر اکثری اوزره (لا ملان جهنم من الجنة والناس اجمعین) وعیدی واجب اولوبدر که انک ذکرى سوره (الم) السجده ده یکوبدر اويله اولسه علم اللهده انلر

(کفار)

کفاردر ایمانه کلور دکلدر (انا جعلنا فی اعناقهم اغلالا فهمی الی الاذقان فهم مقمحون) بز انلرک بیونلرینه اغلال قیلشز که اول انلرک اذقانه ایرمشدر اول اجلدن انلر باشلرین قالدیروب کوزلرین یومشدر در یعنی انلر حق جانبده التفات ایتزلر واکا بیونلرین اکزلر (وجعلنا من بین ایدیهם سدا ومن خلفهم سدا فاغشیناهم فهم لا یبصرون) بز انلرک اوکندن و آردندن طول املی و جنایات سابقه رندن غفلتی حائل قیلوب بصائرلرینه غشاء ایتدک اويله اولسه مطموره جهالتنده قلوب آیات و دلائله نظرندن منع اولندیلر * دینلدیکه اشبو ایکی آیت بنی مخزوم شاننده نازل اولوبدر که ابو جهل یمین ایتدیکه محمد علیه السلامی نماز قیلورکن کوردیکنده باشی طاشله باصدیره وقتاکه واروب انی نمازده بولدی طاشله الین قالدیر بحق طاش الینه یا پشوب الی بویننه بوکلمش قالدی اول حالت اوزره اصحابنه واروب ماجرای خبر و یردی انی انلر کوردیکند نصکره طاش الندن دوشدی هماندم بنو مخزومدن بر رجل طوروب اول طاشی آلدی بن بونکله واروب محمدی اولدیررین دیو کندی وانی نمازده بولدی الله تعالی انک بصرین اعمی ایدوب محمد علیه السلامک صوتنی ایشیدر ولکن کندوی کورمزدی اندن اصحابنه دونوب انلری دخی کورمدی دیدیلر که اکا واروب نه ایتدک دیدیکه انک صوتنی ایشیدوب کندوی کورمدم بمله انک ارا سنده فخل هیئتنده بر شیء حائل اولدی اگر قریب اولسم بنی اکل ایدردی (وسواء علیهم انذرتهم ام لم تنذرهم لا یؤمنون) انلرک عندنده مساویدر انلری کرکسه تخویف ایت و کرک ایتمه انلر سنی و قرآنی تصدیق ایتزلر زیرا که سابق علم اللهده انلر اوزره کلمه شقاوت حق اولوبدر (انما تنذر من اتبع الذکر وخشی الرحمن بالغیب) سن تخویف و انذار ایتز سن الا انلریکه قرآنه اتباع و موجبيله عمل ایدرلر والله تعالینک عقابی حلول واهوالی نزول ایتدین حلول و نزولندن خوف ایدرلر واکا اطاعت ایدرلر (فبشره بغفرة واجر کریم) ایددی اول وصفله متصف هر کسه بی دنیا ده مغفرتله و آخر تده جنتله تبشیر ایت (انا نحن ننجی الموتی) بز امواتی بعثله و یا جهالی هدایتله احیاء ایدرلر (ونکتب ما قدموا و آثارهم) بز انلرک خیر و شردن ایشلدکلری اعمالی یازارز و دخی انلرک آثار حسنه لرینی و آثار سیئه لرینی یازارز که اول تسنن ایتدکلری

خير و كرك شرك عمليدر كه انلره اقتدا ايله كنديلر دنصكره ايشلنه ايمدى
 اول مقتداره اتبا علريك انلره اقتدا ايله ايشلدكلى سنت حسنه دن
 انلره اولان اجر دكلو اجر و كرك سنت سيئه دن انلره اولان اوزار دكلو وزر
 اول مقتداره دخی اولور (قال النبي عليه السلام من سن في الاسلام
 سنة حسنة يعمل بها من بعده كان له اجرها ومثل اجر من عمل بها
 من غير ان ينقص من اجورهم شيئاً ومن سن في الاسلام سنة سيئة
 فعمل بها من بعده كان عليه وزرها ومثل وزر من عمل بها من غير ان ينقص
 من اوزارهم شيئاً) پيغمبر عز صلى الله عليه وسلم ايدر بر كسه كه
 اسلامده بر سنت حسنه احداث ايدوب من بعد انككه عمل اولنه انى
 احداث ايدن ايچون كنديك انككه عملى ثوابى واكاه متابعته انى عمل
 ايدنلر ثوابى مثلى يالكز اكا او لور اول تابعلرك ثوابدن بر شى نقص
 اولقمقسين و بر كسه كه اسلامده بر سنت سيئه احداث ايدوب من بعد انككه عمل
 اولنه انى احداث ايدن ايچون كنديك انككه عملى وبالى واكاه متابعته انى عمل
 ايدنلر وبالى مثلى يالكز اكا او لور اول تابعلرك وبالندن بر شى نقص اولقمقسين
 و بر قوم ديديلر كه آثارله مراد مساجده كتك ايچون اولان خطوه لردر
 انس رضى الله عنه ايدر بنو سلمه مسجد قربنه تحوّل مراد ايتدكارنده
 پيغمبر عز عليه السلام انلره ديديكه (يابنى سلمة ألا تحتسبون آثاركم) آگاه
 اولك كه خطوا تكزله اجر لنور سنز اويله اولسه مكانلرنده قرار ايدوب
 اندن تحوّل ترك ايتديلر قال النبي عليه السلام (اعظم الناس اجرا
 في الصلاة ابعدهم فأبعدهم ممشى) پيغمبر عز عليه السلام ايدر ناسك
 نمازده اجر اعظم اول كسه در كه مسجده ندكلو ايراغ اولوب بوريمسى
 اكثر اولورسه اجرى دخی اول اعتبارله اعظم و اكثر اولور (وكل شئ
 احصينه في امام مبین) هر شيكه بز انى حفظ وعد و بيان ايتدك اول لوح
 محفوظده در (واضرب هم مثلاً اصحاب القرية) يا محمد كفار مكه يه انطا كيه
 اهاليه سنك قصه سنى انلر حالنه مثل ذكر ايت (اذ جاءها المرسلون)
 كه اول انطا كيه اهلنه عيسى عليه السلام رسوللرى كلدى
 (اذ أرسلنا اليهم اثنين) بز انلره ايكي رسول كوندر دك كه انككه
 مراد عيسى عليه السلام رسوللرى يحيى و يونسدر بر قولده
 اول ايكيه سنك غيريدر (فكذبوهما فعرزنا بنات) اهل انطا كيه

(اول)

اول ايكيه سنك تكيذيب ايتديلر اويله اولسه اول رسوللرى رسول ثالث
 شمعونه تقويه ايتدك * علماء اخبار ايدر عيسى عليه السلام حواريوندن
 ايكي كسه يي انطا كيه اهلنه رسول كوندردى شهره قريب اوليحق
 حبيب التجارى كونديلر كه اول قيون كوندردى حبيب التجار انلره
 سنز نه حالو كسه لر سنز ديدكده انلر ديديلر كه عيسى عليه السلام
 رسوللرى يز كلشز كه بوشهر كه اهلنى او ثابن عبادتدن منع ايدوب رحمان
 عبادته دعوت ايدوز حبيب ديديكه صحت دعوا كزه علامتكز
 وارميدر ديديلر كه نعم الله تعالىك اذ نيله مريضه شفاء ايركوررز
 واكمه و ابرص علت كيدررز حبيب ديديكه بنم بر مريض او غلم وار زمان
 مديدنبر و اكا علاج ايدمدم وانلرى اكا كتوروب انى مسح ايتدكلى
 حينده اكا صحت ايردى حبيب انى كوريجك ايمانه كلدى اول خبر شهر
 ايچنده شايع اولوب انلر يديله چوق مريض عافيت بولدى حتى انلر
 امرى اول شهر ك ملكنه ايرديكه اول اصنامه عبادت ايدردى اول رسوللرى
 ياننه چاغروب سنز نه حالو كسه لر سنز بوشهر نه مصلحت كورمكه كلوبسنز
 ديديلر كه انكچون كلدك كه سنى شول ايشتمز و كورمز جادات عبادتدن شول
 ايشيدر و كورر خالق كائناات عبادته دعوت ايدرز ملك ايتدى بزم اشو
 آلهه مزدن غيرى الهمز وارميدر ديديلر كه واردر اولكه سنى والهكى
 ايجاد ايتدى اويله اولسه انلرى قندن چيقاروب حبسه كوندردى
 بعده عيسى عليه السلام حواريونك رئيسى شمعون نام رجلى انلر ائرنجه
 كوندردى متغير هيئنده واروب ملكك اصحابيله معاشره و مؤانسه ايتدى
 حتى كه انلر انى ملكه اير كوروب ملكه انيس و جليس اولدى بر كون
 اول ملكه ديديكه ايشتم سن ايكي رجل حبس ايتمشسن هيچ انلرى
 سويلتمكى جائز اولورسه انلرى كتورسكز تا كه سوزلرى ندر كورسيديك
 چون انلرى قتنه كتورديلر شمعون انلره ديديكه سنزى بو ارايه
 كيم كوندردى ديديلر كه اول الله تعالى كيم هر شيك اول خالقيدر خلقده
 وملكده شريكى يوقدر شمعون ايتدى ايمدى انى ايجاز اوزره وصف ايدك
 ديديلر كه اول ديدليكى ايشلر اراده ايتديكى وجه اوزره حكم ايدر
 ديديكه اكا علامتكز ندر ديديلر كه اول شيككه انى ملك تمنى ايدر ملك
 امر ايلدى ايكي كوزلرى مطموس بر غلام كتورديلر كه كوزلرى جبهه كى

اولشیدی اول ایکیسی الله تعالی به دعا ایدیجک کوزلری یری شق اولدی
 طیندن ایکی بندقه آلوب اول ایکی کوز یرینه قودقلری کبی کوز اولوب
 کوردی شمعون ملکه ایدی نولیدی سن دخی صمکه دعا ایتسیدک که
 بونک کبی ایتسه اول اکا شرف اولوردی ملک ایدی سندن کیزلو ایشم
 یوقدر بزم الهمز کورمز ایشتمز ونفع وضرر ایتدرد بعده ملک اول ایکی
 رسوله ایدی اکر الهکزمیتی احیایه قادر اولورسه اکا ایمان کتورملم
 اندن بر غلام کتوردیلر که اولیدی کوندنبرو فوت اولشیدی اول ایکیسی
 اکا دعا ایدیجک فی الحال طورى کلدی ویدیکه بن مشرک فوت
 اولدیغمدن آتشدن یدی وادی به کیردرلدم ایمدی سزی صدندنه
 اولدیغکز شرکدن تحذیر ایدرن ایمانه کلک که اول خوفدن قورتله
 سز و دینلیدیکه سماء قبولری آچیلوب انده بر شاب حسن الوجه
 کور دمکه اشبو اوچ کسه یعنی شمعون وایکی رسول ایچون شفاعت
 ایدر که اول عیسی علیه السلام ایدی وقتا که شمعون ملکه سوزینک
 تأثیرین تیقن ایدی حالی اکا خبر ویریجک اول ملک و انک اتباعندن
 برجاعت ایمانه کلدیلر و ایمانه کلینلر اوزره جبریل علیه السلام صحبه
 ایدوب دفعة جیعی هلاک اولدیلر (فقالوا انا الیکم مرسلون)
 اول اوچ رسول انطاکیه اهلنه دیدیلر که الله تعالی قبلندن بزم سزی ایمانه
 دعوت ایچون رسوللر ایمدی اکا ایمانه کلک (قالوا ما انتم الا بشر
 مثلنا) انلر رسوللره دیدیلر که سز دخی بزم کبی بشر سز بزم اوزریمزه
 مزیتکز یوقدر که ادما ایدیکز شیئه تخصص ایده سز (وما انزل الرحمن
 من شیء ان انتم الا تکذبون) الله تعالی بشر اوزره وحی ورسالتدن برشیء
 انزال ایتیبدر رسالت دعواسنده بلکه سز کذب ایدرسز (قالوا ربنا
 یعلم انا الیکم مرسلون) رسوللر دیدیلر که ربمز جل شانیه بیلور که بزم انک
 امریه عیسی علیه السلام سزی ایمانه دعوته رسوللری یز (وما علینا
 الا البلاغ المبین) بزه واجب اولان انجق تبلیغدر که اول صحته شهادت ایدر
 آیاتله مکشوف و ظاهر در (قالوا انا تطیرنا بکم لئن لم تنتهوا لنرجنکم
 ولیمسنکم منا عذاب الیم) اهل انطاکیه دیدیلر سزک سبیکزله بزدن مطر
 حبس اولندیغمدن سز که تشاؤم ایشتمز اکر بومقاله کزدن منتهی
 اولز سکز سزی طاشله قتل ایدرز و بزدن سزه عذاب الیم ایریشور

(قالوا)

(قالوا طائرکم معکم) رسوللر دیدیلر که سبب شؤمکز سز که بیله در که اول
 سوء عقائد و اعمالکزدرد (ان ذکرتم بل انتم قوم مسرفون) وعظ
 اولتمکزله می تشاؤم و یارجله وعد ایدرسز بلکه سز بر قوم سز که عادتکز
 عصیانله اسرافدر (وجاء من اقصى المدينة رجل یسعی) وقتا که اهل
 انطاکیه نک رسوللری قتلنه اراده لری خبری حبیب النجاره ایدر که اول
 محمد علیه السلام بعثتندن التیوز یل مقدم ایمانه کلشدی دینلیدی که اول
 بر غارده عبادت ایدردی اول خبری ایشیدیلجک چیقوب دینی اظهار
 ایدی دینلیدی که انک منزلی انطاکیه ابوابک باب اقصاصنده ایدی
 سکر درک قومنه کلدی (قال یا قوم اتبعوا المرسلین) دیدی که یا قوم اول
 رسوللرک دینه اتباع ایدک (اتبعوا من لا یسلکم اجرا وهم مهتدون)
 اتباع ایدک انلره کیم انذار و تبلیغ رساله لری اوزره سزدن اجر استمزلر
 والحال انلر دنیا و آخرت خیرینه دعوت ایدرلر لایق اولور که انلره
 اتباع ایده سز وقتا که حبیب انلره اول سوزی سویلدی دیدیلر که یوخسه
 سن بزم دینزه مخالفت ایدوب اول رسوللرک دینه می متابعت ایدرسن
 و بزم آلهه مزی ترک ایدوب انلرک الهه می عبادت ایتکی دیلرسن حبیب
 دیدی که (وما لی لا اعبد الذی فطرنی والیه ترجعون) بکا نولیدی که بنی
 خلق ایدن رب تعالی به عبادت ایتیزین والحال موتدنصکره اکا رجوع
 ایدرسز سوء اعمالکزک جزاسین انک عندنده بولورسز (اتخذ من دونه
 آلهة ان یردن الرحمن بضراً لاتغن عنی شفاعتهم شیئا ولا ینقذون) الله
 تعالیدن غیری اصنامی بن آلهه می اتخاذا ایدرن اکر الله تعالی بکا
 ضرر اراده ایتسه زعمکز اوزره اصنامکز شفاعتی بدن اول ضرری
 دفعه مفید اولمز وانلر بنی مکروهدن انقاذا ایتزلر (انی اذا فی ضلال مبین)
 اکر بن الله تعالیدن غیریه عبادت ایدرسم خسران ظاهرده اولورین
 زیرا که نفع وخیره و دفع ضرر قادر اولمیان شیء شول نفع و ضرر مقتدر
 خالق جل شانیه اشراک ضلال مبین ایدیکی هیچ بر عاقله خفی اولمز
 (انی آمنت برکم فاسمعون) بن ایمان کتوردم ربکز جل شانیه کیم
 سزی خلق ایلدی بنم ایمانی بدن ایشیدک وقتا که حبیبدن اشبو سوزلری
 ایشیدیلر دفعة جیعی قاقوب انی قتل ایتدیلر دینلیدی که انلر رمی حجاره ایدر
 اول ایه یارب قومی هدایت ایت دیوانی دعا ایدردی (قیل ادخل الجنة)

قتل اولنديغي حينه روحى جنته ايلتلوب اكا كير ديلدى سائر شهداء ارواحنه اولان كى (قال ياليت قومى يعلمون بما غفرلى ربى وجعلنى من المكرمين) حبيب اول حينه ديديكه نوليدى قومى ربم جل شانك بنى مغفرت ايتديكن ودخى اكرام اولنمشلردن قيلديغن بيله لردى تاكه انلكه كفردن توبه يه كلوب ايمان دخاله انك حالى مثلى اكتسابه رغبت ايدلردى وياخود انلر انك امرنده خطاء عظيم اوزره اولوب اول حق اوزره اولديغن بيله لردى وقتاكه انلر حبيبى قتل ايتديلر الله تعالى انلره غضب ايدوب عقوبتلىن تجليل ايتدى جبريل عليه السلام امر الهى ايله بركره صيحه ايدىجك دفعة جيعى هلاك اولديلر (وما نزلنا على قومك من بعده من جند من السماء) حبيبك قتلندنصكره قومى اوزره اهلا كچون سمان ملائكه انزال ايتدك بلكه ملك واحد صيحه سيله اكتفا ايتدك اشبونده انلرك اهلا كنى استحقاردر يوخسه يوم بدرده وخذقده يا محمد سكا ارسال ايتديكمز كى جند ملائكه انزال ايتدك زيراكه اول پيغمبريمز صلى الله عليه وسلمه تعظيم اچون ايدى (وما كنا منزلين) وحكمزده صحيج اولمديكه حبيبك قومى اهلا كنه ملائكه دن جند انزال ايدوز (ان كانت الا صيحة واحدة فاذا هم خامدون) حبيب قومى اخذمز ويا عقوبتمز انجق صيحة واحدة اولديكه جبريل عليه السلام صيحه سيدر كوراسه كه انلرك جيعى سوينش قور كى ميتلردر (يا حسرة على العباد ما ياتيهم من رسول الا كانوا به يستهزؤن) يوم قيامته كفاره دينوركه حسرت وندامت انلره كيم هر بار انلره رسول كلديكندنه انلر انى استهزاء ايدرلردى (الم يروا كم اهلكنا قبلهم من القرون انهم اليهم لا يرجعون) اهل مكه بيلديلمى انلردن اول قرون ماضيه دن نيچه قرون هلاك ايتدك انلرك هيچ برى كىرو دنيايه رجوع ايتزلر اهل مكه دخى انلردن عبرت آلزلى (وان كل لما جيع لدينا محضرون) خلائقك كليسى يوم قيامته بزم دركاهمه احضار اولنورلر (واية لهم الارض الميته احييناها واخرجنا منها حبا فمنه ياكلون) الله تعالىنك وحدانيت و قدرته انلره علامتدر كه ارض يابس يى مطر ايله احييا ايدوب اندن حبك انواعنى اخراج ايدرز سز اندن اكل ايدر سز (وجعلنا فيها جنات من نخيل واعناب) وارضه بزخول وعنبك انواعندن بستانلر قيلورز

(وفجرنا)

(وفجرنا فيها من العيون) ودخى ارضه بزعيونندن چيقار نهرلر اجرا ايدرز (لبا كوا من ثمره) تاكه انلر ذكر اولنان جناتك ثمرندن وياخود مائه حاصلى اولان ثمرندن اكل ايدرلر (وما علمته ايدهم) حالوكه انك خلقته يدرى عمل ايتيوبدر بلكه انى الله تعالىنك خلقيله معموله بولديلر * ديلديكه انلكه مراد عيون وانهاردر كه انده يد خلق عمل ايتيوبدر دجله و فرات ونيل مبارك كى وياخود اكل ايدرلر انيكه يدرى عمل ايتدى عصير و دبس كى (افلا يشكرون) الله تعالىنك نعمتلىنه شكر وانى توحيد ايتزلى اشبو شكر تركنه انكار حيثيئندنصكره شكره امردر (سبحان الذى خلق الأزواج كلها) اول الله تعالى كندويه لايق اولميان صفتدن منزله اولديكه اول اصناف مخلوقاتك كلنى خلق ايتدى (مما ثبت الارض) اول كرك ير بتورديكندن نبات وشجردر (ومن انفسهم) ونفسلردن وجوده كلان ذكر واثادر (ومما لا يعلمون) وانلرك بيلدكارندن اشياء عجيبه دركه الله تعالى اكا انلرى مطلع ايتيوبدر ومعرفته انلره طريق دخى قيليوبدر (واية لهم الليل نسلخ منه النهار) الله تعالىنك وحدانيت و قدرته انلر اچون علامت اخرى ليلدر كه بزاندن نهاري نزع ايدرز يعنى نهاري كيدرر ليلي كتوررز (فاذا هم مظلون) اويله اولسه انلر ظلمنه داخل اولورلر (والشمس تجري لمستقر لها) كونش هر كون منازلنده سير ايدوب حتى كه مستقرينه منتهى اولوب انى تجاوز ايتز زيرا انك اقصى منازللى ابعده مغاربدر بعده رجوع ايدر * ديلديكه اول هر سنه ده منازلنك اولندن اقصاسنه دكين سير ايدوب انده استقرار ايدر بعده منازلنك اولنه رجوع ايدر ديلديكه انك مستقرى صيفده سماده غايت ارتفاعيدر وشتاده نهايت هبوطيدر ديلديكه انك دورنده اوچيوز التمش مشرق ومغربى واردر هر كون بر مطلعندن طلوع ايدوب بر مغربده غروب ايدر بعده سنه آتيديه دكين اول مطلع ومغربيه عودت ايتز ابوذر رضى الله عنهدن مرويدر ايدر پيغمبريمز صلى الله عليه وسلم ايله اوتورردم شمس غروب ايتدى ديديكه يا اباذر بيلورميسنكه شمس قنده غروب ايدر ديدمكه الله تعالى ورسولى اعلمدر ديديكه اول غروب ايتديكندنه عرش التنه كيدر وانه سجده يه واروب طلوعه اذن ديلر اذن الهى ايله كىرو مطلعنه كيدر قريب اولوركه اول

اذن ديلوب اذن ويرليه بلكه كبرى مغربته دوندريله اول يكادن طلوع
ايت دينله اشبو حديث شريف مقتضاسنجه مستقرله مراد تحت عرش
اولور وياخود شول وقتدرکه انده استقرار ايدوب جري منقطع اولورکه
اول يوم قيامتدر (ذلك تقدير العزيز العليم) اشبو منوال اوزره شمسك
جري اول الله تعالىنك تقديريدرکه قدرتيه هر مقدوره غالبدر علمي هر معلومي
محيطدر (والقمر قدرناه منازل) بز قري ذا منازل تقدير ايتدکه که
اول يکرمي سکر منزلدر هر کچه قر اول منازل برينه نزول ايدر منتهای
منازله ايريشچک کيرو ادنای منزله عودت ايدر شهر اوتوز کون
اولديغنده قر ايکي کچه مستر اولور يکرمي طقوز اولورسه بر کچه مستر
اولور اشبو منازل ذکرندن يوجه سورة يونس اوائلنده سبق ايتدی
چنانکه قر جميع منازلنی قطع ایده اينجه اولور (حتى عاد كالعرجون
القديم) حتى اول معوج شمراخ کبی اولغه عودت ايدر * ديندیکه اول
نخله نك عذق يابس عتيقنه بکزر اولورکه اول زياده قورودينغنده اينجه لور
وصرارر ويای کبی بو کيلور قر دخي آی آخرنده انجلين اولور (لا الشمس
ينبغي لها ان تدرك القمر) شمسسه سهل اولمزه سیرده قره ايريشه زیرا که
شمس بطئ السیردرکه فلکن برسنده قطع ايدر وقر ايسه فلکن هر آید
قطع ايدر وياخود شمس قر فلکننده طلوع ايدر زیرا قرك فلکی شمس
فلکنك غريدر وياخود شمسك سلطانی نهارددر وقرک ايسه ليلدهدر
اويله اولسه شمس ليلده طلوع ايتز (ولا الليل سابق النهار) ولیل ايسه
نهاری سبق ايدر دکلددر بلكه حساب معلومه بری برینی تعاقب ايدر
هيچ بری وقتندن اول کلز وايکيسي اجتماع دخي ايتزمکر اول وقتده که
شمس مغربدن طلوع ايدوب قرله اجتماع ایده (وكل في فلك يسبحون)
وهر بری فلکننده سیر ايدر (وآية لهم اناجلنا ذريتهم في الفلك المشحون)
الله تعالىنك وحدانيت و قدرته علامت اخري اولدرکه انلك تجارتاه
بعث ايتدکاری اولادلرين ويا استحباب ايتدکاری صبيان ونسألرين
سفينة مملوده حل ايتدکه که انکه مراد نوح عليه السلام سفينه سيدر
يعني الله تعالى انده انلك آباء اقدمين جل ايتدی حالبوکه انلر
وذريه لری اول آبائك اصلا بنده ايدیلر (وخلقنا لهم من مثله مايركبون)
ودخي انلر ايچون سفينة نوح شكنده زور قلردن ويا دوه لردن خلق ايتدک

اكا ركوب ايدرلر (وان نشأ نغرقهم فلا صريخ لهم ولا هم ينقذون) اكر
ديلرسك انلری غرق ايدرز غرقه واقع اولدقلرنده انلره اغانه ايدر وموتدن
انقاذ ايدر اولمز (الارحة منا ومنا الى حين) لکن بزم انلره رحمتز وحياته
آجاللری انقضاسنه دكين انلره تمتيعز اجلچون غرق ايتمز (واذا قيل لهم
اتقوا ما بين ايديكم وما خلفكم لعلكم ترحون) چنان انلره ايلروكرده كلور
آخرت امرندن قورقوب عمل ايدك وآرديكزه قالور امر دنيايه اغترار ايتمكز
وياخود اتم سابقه ايريشن وقايعدن عبرت آلت وآخرنده اعداد اولنان
عذابدن صاقتك که رحمت اولنوب يوم قيامتده عذاب كورميه سز دينلسه
اندن اعراض ايدرلر (وما تأتيتهم من آية من آيات ربهم الا كانوا عنها
معرضين) هر بارکه ربيلری جل شانه آيتلردن انلره بر آيت كتورسك
الا انلر اندن اعراض ايدر اولديلر زیرا که انلر اكا اعتياد وانك اوزره
تمرن ايتشلردر (واذا قيل لهم اتقوا مما رزقكم الله) وچنان انلره الله
تعالىنك سزه ويرديکی اموالدين فقرايه انفاق ايدك دينلسه (قال الذين
كفروا للذين آمنوا أنطم من لو يشاء الله اطعمه) كافرلر مؤمنلره استهزاء
طريقی اوزره ديرکه بز شول كيمسه يه اطعام ايدر مير که الله تعالى
ديلسه انی اطعام ايدردي يعني اول انلری اطعامه قادر ايکن اطعام ايتچيچك
بز اكا احقايز * ايمدی بو قول واعتقاد انلك فرط جهالتلرننددر زیرا که
الله تعالىنك اطعامی اسبابله در جله دن بری اغنيايي فقراء اطعامه
حشيدر وانی انلره توفيقيدر (ان اتم الا في ضلال مبين) سز دكل الاخطاء
بينده سز که الله تعالىنك مشيئته مخالف شئ امر ايدرسز وجاژدر که
بو قول الله تعالىدن انلره جوابدر وياخود مؤمنلك انلره جوابنی حکايتدر
(ويقولون متى هذا الوعد ان كنتم صادقين) وديرلر که وعد ايتديککز
بعث نوقت اولور بزه خبر ويرك اكر قولكزده صادق ايسه كز (ما ينظرون
الا صيحة واحدة تأخذهم وهم يخصمون) الله تعالى جوابده انلره
ديدیکه انلر منظر اولملری دكل الا نفخة اولايه در که انلر تجارات
ومخاصماتلرنده ايکن اول انلری اخذ ايدر (فلا يستطيعون
توصية ولا الى اهلهم يرجعون) اويله اولسه امور دن بر شيئي
وصيته ويا اهلرينه رجوعه استطاعتلری اولمز که واروب حاللرينی

کوره لر بلکه اول حینده جیعی دفعة فوت اولورلر (ونفخ فی الصور فاذا هم من الاجداث الى ربهم ينسلون) بعده مابینده قرق ییل کچدکدنصرکه صوره نفخة بعث نفخ اولنوب ناس قبور دن طوروب ربلی جل شانه درکاهنه سرعتله کیده لر (قالوا یاویلنا من بعثنا من مرقدنا) دیه لرکه بزى اوینخو مزدن کیم او یاردی ویا اولدیغمز مرقدن کیم طورغردی (هذا ما وعد الرحمن وصدق المرسلون) مؤمنلر ویا ملکلر دیه لرکه اشبو شول یوم قیامتدرکه الله تعالی انی منزل کتابلرده وعد ایدوب مرسلون انی تبلیغه صدق ایتدیلدی دینلدیکه اشبو قول دخی کفار کدرکه اقرار ایدلر بر حینده که اول انلره نفع ایتیه (ان كانت الا صيحة واحدة فاذا هم جميع لدينا محضرون) اول نفخة اخیره دکل الا صيحة واحدة اولورکه انکله خلقت جیعی بزم درکاهمه حساب ایچون حاضر اولورلر (قالیوم لا نظلم نفس شیئا ولا تجزون الا ما كنتم تعملون) اشبو یوم قیامتده برهیچرکیمسه بر شیئه ظلم اولغمز سز الا انکله که خیر وشر دن دیاده انی ایشلمشدیکز دینور (ان اصحاب الجنة اليوم فی شغل فاکهون) اشبو کونده اهل جنت افتضاض ابکارده ویا سماعده ویا نعیم جنتده ویا بری برلرین زیارتده ویا الله تعالینک ضیافتنده ناعمل وفرحانلر در (هم وازواجهم فی ظلال) اهل جنت انده کندیلره حور عیندن ازواجلریله بیله ظلال اشجارده ویا ظل عرشده صفاده درلر (على الارائك متكئون) جمالده اریکه لر اوزره اتکاء ایدلرلر (لهم فیها فاکهة ولهم ما یدعون) جنتده انلر ایچون فاکه نك انواعی وهرتمنی واشتها ایتدکلری اولور (سلام قولنا من رب رحیم) وانلرک اعلاى مطلوب ومنتالری الله تعالینک انلره ملائکه واسطه سیله ویا واسطه سز سلامیدر * جابر رضی الله تعالی عنه ایدر پیغمبریمز صلی الله تعالی علیه وسلم دیدیکه اهل جنت نعلریله تنعمده ایکن اوزرلرینه بر نور سطوع ایده باشلرین قالدروب کوره لرکه رب تعالی فوقلرندن اشراق ایدر اولدیغی حالده انلره سلام ویره اول انلره نظر ایده وانلر اکا نظر ایدلر اکا نظر ایدر اولدقلرنجه نعیمدن بر شیئه التفات ایتیه لر حتی که اول انلردن احتجاب ایدوب نور و برکتی اوزرلرنده و دیارلرنده قاله (وامتازوا اليوم ایها المجرمون) یوم قیامتده الله تعالی قبلندن برمنادی ندا ایده که یا عاصیلر مؤمنین صالحیندن امتیاز ایدک بو کلام انلره شول

(حینده)

حینده دینورکه ناس محشرده مؤمن وکافر ومخلص ومنافق بری برلرینه مختلطلر ایکن مخلصون جنته ایلتلور وکافرون ناره سوریلور ویا خود معنی یا مجرملر هر خیردن عزالت ایدک ویا خود یا کافرلر ناره بری برلرکزدن متفرق اولک زیراکه هر کافرک ناره بری بری اولور انده یالکز حبس اولنور نه اول غیرى ونه غیرى انی کورر (الم اعهد الیکم یا بنی آدم ان لا تعبدوا الشیطان انه لکم عدو مبین) کفار و منافقین ناره کوندلر لدکلرند نصرکه دینورکه بن سزه قرآنده بیان ایتدیمیکه شیطان سزه بر عدوی ظاهر العداوه در اولیه اولسه اندن صاقنوب اکا اطاعت ایتکز (وان اعبدونی) وسزه امر ایلدیمکه بکا اطاعت ایدوب بنی توحید ایده سز (هذا صراط مستقیم) اشبو امری رعایتکز صراط مستقیمدر اکا سلوک ایدن جنته ایریشور (ولقد اضل منکم جبلا کثیرا أفلم تكونوا تعقلون) اول شیطان سزدن خلق کثیری اضلال ایتدی اکا اطاعتله سزدن اول کچن امتلره ایریشن هلاکی تعقل وتذکر ایتزدیکز که معتبر اولیدیکز وقتا که انلر جهنم قیوسنه قریب اوللر خزنه انلره دیه لرکه (هذه جهنم التي كنتم توعدون) اشبو اول جهنمدر که دیاده سز انکله وعد اولنوب تصدیق ایتدیکزدی (اصلوها اليوم بما كنتم تکفرون) اشبو کونده اکا کیرک دیاده الله تعالی به کفریکز سبیلله (اليوم نختم علی افواههم وتکلمنا ایدیهم وتشهد ارجلهم بما كانوا یکسبون) اشبو کونده بز انلرک آغزلرینی ختم ایدوب کل آمدن منع ایدرز والری شول ایشلدکلری اعمالی بزه خبرویرر ویا قلمی شهادت ایدر اکا که انی کسب ایتدیلدی اول جوارح اوزره آثار معاصی ظهوریله و افعاله دلالتیله ویا خود اول جوارحی الله تعالینک سویلتمسیله * انس رضی الله عنه ایدر پیغمبریمز صلی الله علیه وسلم قنده ایدک پیغمبریمز علیه السلام کولدی بیلور میسز که نیه کولدم دیدی دیدیلر که الله تعالی ورسولی عملدر دیدیکه عبدک رب تعالی به دعاسنه که یارب نقسم اوزره شاهدی نقصمدن اولسون دیلرین الله تعالی دیدیکه اشبو کونده اوزریکه نفسک و کرام کاتین شهود یتراویله اولسه آغزی مهرلنوب ارکانی سویلدیلمور حتی که انک اعمالی خبر ویردکلرند نصرکه کیرو سویلکه لسانی اطلاق اولنور لسانی سائر ارکانه عتاب ایدوب دیه که بن سزیکون مناضله به تعمد

ایتمشکن سن اعتراف کنزله کنیدی کنزی و بنی هلا که ایقاع ایتدی کنز (ولونشاء
لطمسنا علی اعینهم فاستبقوا الصراط فانی یبصرون) اگر بز دیلسه وز
انلرک اعین ظاهره لرینی کیدرردک بر حیثیله که انک جفن و شقی اولیه اول حال
اوزره طریقه مبادرت ایدرلردی فکیف که انی کورر اولسه لر و الحال
بز انلرک اعین لرینی کورمز ایتشز و یاخود معنی اگر دیلسه وز انلری هدادن
اضلال ایدوب عیمان ترک ایدردک اولیه اولسه اول حاله انلر طریق
نیچه کوررلردی و یاخود اگر دیلسه وز بز انلرک اعین ضلالترین فقاً ایدوب
عیندن انلری عیمان قیلوردق و بصرلرین ضلالندن هدایتسه تحویل
ایدوب رشدلرین کوررلردی فکیف که انلر کورر اوله لر بز انلره بوفعلی ایتیه وز
(ولونشاء لمسخناهم علی مکاتهم فاستطاعوا مضیاً ولا یرجعون)
واگر دیلسه وز بز انلری منزل لرنده ایکن جاداتدن بر شیئه تحویل ایدردک
و یاخود قرده و خنازیر قیلوردق اولیه اولسه ذهاب و رجوعه قادر
اولیه لرلردی (ومن نعمه تنکسه فی الخلق) اول کسه که بز انک عمرنی
طویل ایده وز خلقده انی تنکیس ایدرز ضعفنی آرتورر و بنیه و قواسنی
اکسلدرز (أفلا یعقلون) تعقل ایتزمیسز که اکا قادر اولان رب تعالی
طمس و مسخه دخی قادر اولور (وما علمناه الشعر) بز اکا شعر تعلیم
ایتدک اشبو کفار مکدنک محمد شاعر در و دیدیکی شاعر در دیو قول لرینی
رددر زیرا که اول مقفی و موزون دکدر و معناسی دخی شعر انک مقصودی
اولان تخیلات مرغبه و منفرد و انک امثالی دخی دکدر (وما ینبغی له)
واکا شعر سونلک دخی صحیح اولمز و اما اندن روایت اولنان (انا انبی
لا کذب انا ابن عبدالمطلب) قول شریفی شعر اربابی عننده شعر دکدر *
روایت اولندی که پیغمبریمز صلی الله علیه وسلم اشبو بیتی سو یلردی
(کفی بالاسلام والشیب للمرء ناهیا) ابو بکر رضی الله عنه دیدیکه
یارسول الله شاعرک دیدیکی (کفی الشیب والاسلام للمرء ناهیا) ابو بکر و یاعمر
دیدیکه شهادت ایدرینکه سن رسول الله سن زیرا که الله تعالی (وما علمناه
الشعر وما ینبغی له) دیمشدر عائشه رضی الله عنهایه دینلدی که پیغمبریمز
صلی الله علیه وسلم شعر دن بر شیئه هیچ تمثیل ایدرمیدی دیدیکه (ویأتیک
بالاخبار من لم تزود) قولیه ایدردی ینه عائشه رضی الله عنهایه
سؤال اولندی که پیغمبریمز علیه السلام شعر دن هیچ بر شیئه تمثیل

(ایدر)

ایدرمیدی دیدیکه اکا شعر ابغض حدیث ایدی ابوک اشبو بیتله کاهی
تمثیل ایدوب دیدیکه (ستبدی لک الایام ما کنت جاهلاً * ویأتیک بالاخبار
من لم تزود) ابوک که اول ویأتیک من لم تزود بالاخبار دیردی (ان هو
الاذکر وقرآن مبین) اکا وحی اولسان کلام دکل الاموعظه وقرآن در که
فرائض و حدود و احکامی بیان ایدر (لینذر من کان حیا) تا که اول قرآن
ویارسول الله انذار ایده هرکسه بی که عاقل فهم اوله زیرا که خافل میت
کبدر و یانی که الله تعالینک عننده مؤمن اوله زیرا که حیات ابدیه ایمانله در
(ویحق القول علی الکافرین) و تا که کفر اوزره اصرار ایدنله کلمه عذاب
واجب اوله (اولم یروا انا خلقناهم مماعلمت ایدینا انعاماً) انلره نظر اعتبارله
نظر ایتزلزمیکه بز انلر ایچون خلق ایتدک شول احداثه تولی ایتدی کمزدن
ابل و بقرو غنیکه بز دن غیری احداثک احداثه قادر دکدر (فهم لهما مالکون)
اول انعامی بزم انلره تملیکمزله تملک ایدرلر و یاخود اول انعامی انلره تسخیر
و انقیادمزله ضبط و تصرفه تمکن ایدرلر (وذللناهم ففها رکوبهم ومنها
یا کون) و بز اول انعامی انلره تذلیل ایتدک که اندن مرکوبلری اولور
وانک لحومندن اکل ایدرلر (ولهم فیها منافع و مشارب) وانلر ایچون
اول انعامده اصواف و اوبار و اشعارندن منافع و الباسندن مشارب قیلدق
(أفلا یشکرون) اشبو نعمتلی ربی جل شانه شکر ایتزلرمی زیرا که
انعامی خلق وانلره تذلیل ایتسه اشبو منافع مهمه تحصیلنه توسل انلره
نیچه ممکن اولوردی (واتخذوا من دون الله آلهة لعلهم ینصرون) الله
تعالیدن اشبو قدرت باهره و نعم ظاهره بی کوروب انک انده تفردنی
بیلدکارند نصکره عبادته انک غیری آلهه اتخاذ ایتدیلر شول رجائله کیم
اول آلهه لری انلره ایریشور شدائد دفعنه نصرت ایدرلر حالبو که امر عکس
اوزره در زیرا که (لا یستطیعون نصرهم وهم لهم جند محضرون)
اول آلهه انلره نصرته قادر اولزلر و الحال اول کفار آلهه لر ایچون
جنددر که انلری حفظ ایچون اعداد اولتمشدر و یاخود آلهه لری اثر نیجه
ناره احضار اولنورلدر (فلا یحزنک قولهم) ایمدی انلرک الله تعالی
حقنده الحاد و شرکری و یاسنک شانکده تکذیب و تهجینلری سکا حزن
و یرمسون (انا نعلم ما یسرون وما یعلنون) بز انلرک اصرار و ککرک

اعلان ايتدكاري شيئي بيلورز انك اوزره جزالرين ايدرز (اولم يرالانسان انا خلقناه من نقطة فاذا هو خصيم مبين) انسان بدأ خلقني تأمل ايدوب بيلزميكه بز آني منيدن خلق ايتشكن كوررسنكه اول بين الخصومه در انك اول ماء منيدن خلقنه قادر اولان باري تعالى بعثه دخی قادر اولور روايت اولنديكه ابی بن خلف پیغمبریمز صلی الله علیه وسلم الله النده برچوریمش مك كتوروب اليه انی اوفقلديغندنصكره ديديكه اعتقاد ايدرميسنكه اشبو مك بويله چوریمشكن الله تعالى انی احياء ايد پیغمبریمز علیه السلام ديديكه نعم و سنی دخی بعث ايدر و ناره ادخال ايدر اول سبیدن بوآيت وما بعدنكه آیات نازل اولدی (و ضرب لنا مثلا ونسی خلقه) و بزه برامر عجیبی مثل ضرب ايدوب احياء امواته قدرتمزی نفی ايتك ديلر كندينك عاجز اولديغی شيدن بزى دخی عاجز ظن ايدر و بزم انی خلقمزی اونودر حالوكه اول ككى احياءمزدن اغربدر (قال من يحيي العظام وهى رميم) و ديركه شول چوریمش مككلری كيم دير كتورر (قل يحييها الذي انشاها اول مرة) ديكل كه انی اول الله تعالى دير كورر كه اول مرده اول هيچ برشی دكل ايكن ايجاد ايتشدی (وهو بكل خلق عليم) اول الله تعالى مخلوقاتك تفصيلنى و كيفيت خلقنى بيلور اوليه اولسه اشخاص منفته نك اجزائى اصولنى و فصولنى و مواضعى و طريق تميزنى و نمط سابق اوزره برى برينه ضمنى و اعراض و قواسى اعاده سنى بيلور و يا انك مثلى احداثى بيلور (الذي جعل لكم من الشجر الاخضر نارا فاذا انتم منه توقدون) كه اول الله تعالى جل شانه دركه يشل اغاجدن آتش چيقارر مرخ و غفار كى كه ايكي سيدخی شول صوبى طاملر يشل اغاج ايكن بربرينه سحق اولنغله ايكي سندن آتش چيقارر حتى كه سزاندن آتش يقارسز حكما ديديلر كه عنابك غيرى هر يشل اغاجده آتش واردر ايمدى اول الله تعالى كه يشل اغاجدن آتش چيقارمغه قادر اولور سزى بعثه دخی قادر اولور (اوليس الذي خلق السموات والارض بقادر على ان يخلق مثلهم) اول الله تعالى كه سموات و ارضى كبر جرمى و عظم شانله خلق ايتدى قادر دكليدر كه اول ايكي سنده اضافتله صغر و حقارتده انلر مثلى خلق ايد (بلى وهو الخلاق العليم) ديكل كه بلى اول اكا قادر اولور اول كثير المخلوقات

والمعلوماتدر (انما امره اذا اراد شيئا ان يقول له كن فيكون) انك شانى قحان برشيئك حدوشن اراده ايد اكا تكون ايت ديمسيدر فى الحال اولدخی تكون ايدر * ديلنديكه اشبو كلامدن مجازدر كه ايجاد و اعدامده تعبير مجرد امريله شيئك سرعت تكونه تميلدر (فسبحان الذي بيده ملكوت كل شيء) اول الله تعالى منزهدر اندنكه اكا مثل ضرب ايدرلر جميع اشيايه مالك و قادردر (واليه ترجعون) موتكزدنصكره اكا رجوع ايدرسز خير و شردن اعمالكزله جزالنورسز (روى عن النبي صلى الله عليه وسلم ان لكل شيء قلبا و قلب القرآن يس من قرأها يريد بها وجه الله غفرله و اعطى من الاجر كما نما قرأ القرآن اثني وعشرين مرة و ايمامسلم قرى عنده اذا نزل به ملك الموت سورة يس نزل بكل حرف منها عشرة املاك يقومون بين يديه صفوفوا يصلون عليه ويستغفرون له ويشهدون غسله ويتبعون جنازته و يصلون عليه ويشهدون دفنه و ايمامسلم قرأ يس وهو فى سكرات الموت لم يقبض ملك الموت روحه حتى يحثيه رضوان بشربة من الجنة يشربها وهو على فراشه فيقبض روحه وهو ريان ويمكث فى قبره وهو ريان ولا يحتاج الى حوض من حياض الانبياء حتى يدخل الجنة وهو ريان) پیغمبریمز صلی الله علیه وسلمدن مرويدر كه هرشيئك قلبى وار و قرآنك قلبى يس سوره سيدر برکسه كه يس سوره سين لوجه الله اوقويه مغفرت اولنه و قرآنى يكرمى ايكى كره اوقو مشجه اجر و يريله برکسه كه اكا ملك الموتك نزولى عندنده يس اوقونه انك هر حرفى مقابله سنده اون ملك نزول ايدوب او كنده صفوف اولدقلى حالده طورهلر والله تعالىيدن انكچون رحمت و مغفرت ديليدر و غسلنه حاضر اولوب جنازه سيله بيله كيدلر و اوزرينه نمازين قيلوب دفنى حيننده قنده اولهلر و برمسلم كه سكرات موتى عندنده يس اوقويه ملك الموت انك روحنى قبض ايتيه حتى كه رضوان اكا جنتدن شراب كتوروب اكا ايجوره حالوكه اول فراشى اوزره ياتور اندن ملك الموت انك روحنى قبض ايدر اول حالتده و كرك قبرده مكشده ريان اولور و يوم قيامتده حياض انبيادن هيچ برينه احتياج اولمز حتى كه جنته دخولى ريان اولديغى حالده اولور

سورة الصافات وهى ثمان ومائة آية مكية

بسم الله الرحمن الرحيم

(والصفات صفات اجرات زجرا فالتاليات ذكرا) الله سبحانه وتعالى اقسام
ايتدى شول ملائكه ايله كيم مقام عبوديتده مراتبجه صافين اولوب انوار
الهيمة انلره فيض اولنور امر الله منتظريندرلر وانلر اجرام علويه وسفليه
امر اولندقلرى تدبيرله زجر وياخود ناسى الهام خير ايله معاصيدن
ويا شياطينى ناسه تعرضدن زجر ايدرلر وانلر الله تعالىنك آياتنى وجللايى
قدسنى انبياء واولياسنه تلاوت ايدرلر وياخود الله تعالى اقسام ايتدى
طوائف اجرامله كيم صفوف مرصوصه كى مرتبه در واروا حله كيم انى
مدبره در وجواهر قدسيه ايله كيم بحار قدسده مستغرقه در ليل ونهار
تسبيحدين انلره فتور كلز وياخود نفوس علما ايله اقسام ايتديكه انلر عبادتده
صف اولورلر حجج ونصايحله ناسى كفر وفسوقدن زجر ايدرلر الله تعالىنك
آيات وشرايعن تلاوت ايدرلر وياخود نفوس غزاته اقسام ايتديكه انلر
جهادده صف اولورلر خيل وياعدويى زجر ايدرلر ذكر الهى تلاوت
ايدرلر برحيثيله كيم مبارزة عدو آنلرى اندن اشغال ايتمز (ان الهكم
لواحد) الهكز جل شانته واحددر شريكى يوقدر (رب السموات
والارض وما بينهما ورب المشارق) كه سموات وارضك وايكيسى
اراسنده كى مخلوقاتك وشمس وياكواكب مشارقتك ريدر زيرا كه
شمسك سنه دن هر كونده بر مشرقى وهر بر مشرق مقابلنده بر مغربى
واردر (انا زينا السماء الدنيا بزينة الكواكب) بز سزه قريب اولان
سمايى ضوء كواكبيله تزئين ايتدك * دينلديكه كواكب سماده قناديل كى
معلقه در وياخود صناديق اوزره كى مسامير كى سماء اوزره مكوكبه در
(وحفظا من كل شيطان مارد) وبز اول سمايى شهابلرله حفظ
ايتدك هر شيطانديكه طاعتدن خارجدر (لا يسمعون الى الملا الا على)
بز سمايى شياطيندن حفظ ايتدك اويله اولسه ملا اعلايى استماع
ايتزلر ملا اعلا ايله مراد ملائكه نك كتبه ويا اشرفيدر سكونلرى
سموات علاده اولديغيجون علوله وصف اولنديلر (ويقذفون من كل
جانب دحورا) انلر آفاق سمادن هر جانبندن سهيله طرد وابعادلر يچون

(رمى)

رمى اولنورلر (ولهم عذاب واصب) ومع ذلك انلر ايجون آخرتده
عذاب دائم ويا شديد واردر (الا من خطف الخطفة فاتبعه شهاب
ثاقب) الاشياطين جاعتندن اولكه كلام ملائكه دن مسارقه
وجهى اوزره بركله اختلاس ايده اكا بر كوكب مضى لاحق اولور
انى قتل ويا احراق ايدر ويا اكا اندن جبل ايرر * روايت اولنديكه الله تعالى
چقان برشى قضاء ايتسه حله عرش وسماء سابعه اهلى تسبيح وتقديس
ايدوب ربكز جل شانته ديدى ديواندن سماء سادسه اهلى استخبار ايدوب
انلر دخى انلره خبر ويرر يومنوال اوزره خبر سماء دنياه ايرر شياطين اول
خبرى انلردن اختطاف ايدرلر اولكه انى وجهى اوزره كتورلر اول حقددر
لكن انده كذبله بر نيچه كلام دخى زياده ايدرلر * دينلديكه اشبو شهاب
رمى اولنمى زمان جاهليتده دخى ثابت ايدى الا بوكه پيغمبرى صلى الله
عليه وسلمك بعثتيله منعه تشديد اولندى اكر دينورسه كه شيطان ناردن
خلق اولمشيكن انى نار نيچه احراق ايدر دينور كه اول نار صرفدن دكلدر
انسان تراب خالصدن اولديغى كى ومع ذلك نار قويه نار ضعيفه اوزره
استيلاء ايتسه اهلاك ايدر (فاستفتهم اهم اشد خلقا ام من خلقنا) يا محمد
مكه مشركلرندن استخبار ايت كه خلقده انلرمى اشددر يوخسه ذكر
ايتديكمز ملائكه وسماء وارض وما بينهما ومشارق وكواكب وشهب
ثواقبى اشددر (انا خلقناهم من طين لازب) بز انلرك اصلى آدمى بر نوع
طيندن خلق ايتمزدر كه اول يده لاصق اولور ويا اول منتندر والحال
اندن خلق اولندقلرى بيلورلر اويله اولسه رسل ايله نيچه مجادله ايدرلر
وانلرى ضعفدن خلق ايدن رب تعالى به نيچه تكبر ايدرلر حالبو كه انلرى
اهلاك اكا يسير در (بل عجبناهم وبسخرنهم) بلكه سن يا محمد الله تعالىنك
قدرتنه وانلرى بعضى انكارلر يسه تعجب ايدر سن انلر ايسه تعجبكه وبعضى
تقرير كه سخره ايدرلر (واذا ذكروا لا يذكرون) چقان انلر
برشيثله وعظ اولنسهلر متعظ اولزلر وياخود انلره حشر ك صحنه دلالت
ايدر شى ذكر اولنسه انكله منتفع اولزلر بلا دتلى وقلت فهملر يچون
(واذا رأوا آية يستسخرون) وچقان انلر قائلك صدقنه دلالت ايدر
معجزه كورسهلر سخره ده مبالغه ايدرلر وياخود بعضى بعضندن
سخره ايتسن ديلرلر (وقالوا ان هذا الاسحر مبين) وديلر كه اشبو

کور دیککز دکل الا آشکاره سحر در (اندا متنا و کنا ترابا و عظاما
اشا لمبعوثون) و دخی دیرلر که بز میت اولوب تراب و عظام
اولدیغیز دنصکره ینه بعث اولنور می بز (أو أبأؤنا الاولون) بز دن او کدین
قوت اولان آباؤز دخی بعث اولنور لر می (قل نعم وانتم داخرون) یا محمد انلره
دیگل که سز و انلر بعث اولنور سز حابو که صاغر و نسر (فانما هی زجرة
واحدة فاذا هم ينظرون) قصه بعث و یا قیامت دکل الا صیحه واحده در که
اول نفخه ثانیه در انک و قوعی حینده خلیقک کلبسی مرقد لر دن
طوره کلهر کندیلره نه ایشلنور ایدیکنه منتظر اوله لر (وقالوا یا ویلنا
هذا یوم الدین) و دیدلر که ویل بزه کیم بو اول کوندر که اعمالزله
جزالنورز ملائکه و یا انلر بری برلرینه دیدلر که (هذا یوم الفصل الذی
کنتم به تکذبون) اشبو اول کوندر که خلایق بیتی فصل اولنور و یا محسن
ومسی بیتی فرق ایدیلور بعده الله تعالی قبلدن ملائکه به دینور که
(احشروا الذین ظلموا وازواجهم) ظلمه بی و اشباهلرینی اصنامه
عبادت ایدنلری بری برلرله و هر عمل سی اهلنی مثلی عملی اهلله و یا خود هر
کافری شیطاندن قرینله و یا خود زوجات کافره لرله حشر ایدک (وما کانوا
یعبدون من دون الله) و دخی الله تعالی نیک غیری اصنام و غیریکه دنیاده
اکا عبادت ایدرلر دی انلری دخی حشر ایدک (فاهدوهم الی صراط
الحجیم) انلری طریق ناره دلالت ایدک (وقفوهم انهم مسئولون) و انلری
موقفده حبس ایدک که انلر انده عقائد و اعماللر دن سوال اولنور لر (قال النبی
علیه السلام لا یزول قدما ابن آدم یوم القیامة حتی یسئل عن اربعة اشیاء
عن شبابه فیما ابلاه و عن عمره فیما افناه و عن ماله من این اکتسبه
وفیما انفق و عن علمه ماذا عمل به) پیغمبریمز صلی الله علیه و سلم ایدر
یوم قیامتده ابن آدمک قدمانی یرندن زائل اولز حتی اکادرت شیئدن
سؤال اولنور شبابتدیکه نه شیئده ابلاء ایتدی و عمرندنیکه نه حال اوزره
یکوردی و مالندنیکه قندن اکتساب ایدوب نه شیئده انفاق ایتدی
و علمندنیکه انکله نه عمل ایتدی (مالکم لاتناصرون) سز نه نوالدیکه
بری برلریکزه عذابدن تخلیصه نصرت ایتمز سز (بل هم الیوم مستسلمون)
بلکه انلر اول کونده منقاد و ذابلر و نصرتدن عاجزلردن (واقبل بعضهم
علی بعض یتساءلون) و رؤساء و یا اتباع و یا کافره و قرناء بری برلرینه

(تلاوم)

تلاوم و تخصم ایدلر (قالوا انکم کنتم تأتوننا عن الیمین) اتباع
رؤساءه دیرلر که سز بزه حلف جهنندن کلوب حق اوزره ایدیکیکزه
یمینکزه بز آلدانوب سز متابعیت ایتدک و یا خود بزه قوت و قهرکز جهنندن
کلوب بز دخی سزدن خوفز سبیلله سز متابعیت ایتدک (قالوا بل لم تکنوا
مؤمنین) رؤساء اتباعه دیرلر که سز ایمان اوزره دکلدیککزه بز سزی اندن
اضلال ایدلر و بلکه کفر کندی قبلکزدن ایدی (وما کان لنا علیکم
من سلطان بل کنتم قوما طساغین) بزم سزک اوزریکزه تسلطمز
یو غیدیکه اختیار و قوتکزی سلب ایدیک بلکه سز اختیارکزه ربکز
امرینه عصیان ایتدیکز ایدی (حق علینا قول ربنا انا لذائقون)
اولله اولسه رؤساء و اتباع جمعی دیرلر که ربمک کلمه عذابی اوزریمزه
واجب اولدی بز اول عذابی ذوق ایدرز (فاغوینا کم انا کننا غاویین)
بزم سزی طریق هدادن اضلال ایتدک زیرا که بز ضالین ایدک سزدخی
بزم کبی ضالانده اولمغی رغبت و اختیار ایتدیکز (فانهم یومئذ
فی العذاب مشترکون) اولله اولسه اول کونده رؤساء و اتباع عذابده
مشترکدر ضالانده مشترک اولدقلری کبی (انا کذلک نفعل
بالجرمین) اشبونک کبی فعلی بز مشرکینه ایدرز (انهم کانوا اذا قیل لهم
لا اله الا الله یستکبرون) زیرا که چنان انلره دنیاده لا اله الا الله دیکز
دینلسه اندن اعراض و یا اکا دعوت ایدنلر اوزره استکبار ایدرلر دی
(ویقولون انا لئارکوا آلهتنا لشاعر مجنون) و دیرلر دیکه بز اول شاعر
مجنون یعنی محمد صلی الله تعالی علیه و سلم اجلچون آلهده من اصنام عبادتن
ترک ایدر میز الله تعالی انلرک قولنی رد ایدوب دیدیکه (بل جاء بالحق
و صدق المرسلین) بلکه محمد قرآنله کلوب کندیدن اول چکن مرسلینی
تصدیق ایدوبدر (انکم لذائقوا العذاب الالیم) سز که کفرده رؤساء
و کرک اتباع سز عذاب الیمی ذوق ایدر سز (وما تجزون الا ما کنتم
تعملون) سز انکله جزا اولنمز سز الا دنیاده ایشلدیککزه کفر و اشراککزه
سبیلله (الا عباد الله المخلصین) لکن الله تعالی نیک عباد مخلصینی
انلر کبی دکلدر بلکه ثوابلری مضاعفدر (اولئک لهم رزق معلوم)
ایمدی انلر ایچون جنتده غدوه و عشیه دکلر زمانده اشتهای ایتدکلری
حینده رزق معروف مقدر اولور (فواکه) که اول فاکه لر در که

ثماردن تلذذ ایچون اکل اولنور یوخسه حفظ صحت ایچون دکل زیراکه
انلر جنتده غذائله حفظ صحتدن مستغیرلدر (وهم مکرمون فی جنات النعیم)
انلر جنات نعیمده ثوابله اکرام وانعام اولنورلر (علی سرر متقابلین)
انلر سریرلر اوزره بری برلرینه قارشو اوتورلر یوخسه بری برلرینک
قفارلرینه نظر ایتمزلر بلکه سریرلری انلره دور ایدوب بری برلرینه
قارشو ایدرلر (یطساف علیهم بکأس من معین) انلره طواف اولنور
بر اناه ایلکه انده شراب اولور خردنکه اول ارض جنتده جریان ایدر
صویک انهارده جریان کی (بیضاء لذة للشاربین) که اول خیر
سوددن زیاده بیاض اولوب انی شرب ایدلره طیه در (لا فیها
غول) اول خورده غائله یوقدر خیر دنیاده اولدیغی کی که احوال سکر
وذهاب عقل ووجع بطن وصداع وقی وبولدر (ولاهم عنها یزفون)
واول خیری شربدن سکران اولمزلر انکله عقلرینه خلل ایرمز (وعندهم
قاصرات الطرف) وانلرک عنده زوجات اولورکه ابصارلرین
ازواجلرینک غیریہ نظردن منع ایدیجیلدر بلکه ازواجلریله قناعت ایدوب
غیری اندن بدل اولدیغن استمزلر (عین) که اول زوجاتک کوزلری کوزل
ویوکدر (کأنهن بیض مکنون) کأنه اول زوجات پیاضلقده
دوه قوشی عرطه سنه بکزیوبدرکه انک بیاضنه ادنای صفت قاریشوبدرکه
اول ابدان لونلرینک احسنیدر (فاقبل بعضهم علی بعض یتساءلون)
اندن اول خیری شربلری حالنده بری برلرینه اقبال ایدوب تحادث
ایدیشهلر زیراکه اول عقله الذلذاتدر معارف وفضائلدن و دنیاده
یکن ماجرالرندن سویلشهلر (قال قائل منهم انی کان لی قرین)
حین مکالمده انلرک بریسی دیه که بنم دنیاده بعضی منکر بر صاحبم وار ایدی
دینلدیکه انلر ایکی شریک ایدیلر برینه فطروس دینور کافر ایدی
وبرینه یهوذا دینور مؤمن ایدی قصه لری سورة کهفده ذکر اولنوبدر
(یقول أأنک لمن المصدقین) یوخسه سن بعضی تصدیق ایدلردنمیسن
دیوبنی توبیخ ایدردی (أأنذا متنا وکنا ترابا وعظاما أأنذا لمدينون)
بز فوت اولوب تراب وعظام اولدیغیمزدنصکره بعث اولنوب محاسبه
ومجازات اولنورمیز دیردی (قال هل انتم مطمعون) الله تعالی
اهل جنته دیه که ویاخود اهل جنتدن اشبو ماجرامی ذکرند اولان

(مؤمن)

مؤمن انده کی جلساسنه دیه که اهل ناره نظر ایتمز میسرکه سزه اول بعضی
منکر صاحبی کوسترم انلر دیه لکه سن انی بزدن اعرفسن ایمدی
اکاسن نظر ایت * ابن عباس رضی الله عنه ایدر جنتده کوهلر واردرکه
اهل جنت اندن ناره نظر ایدرلر (فاطلع فرآه فی سواء الجحیم) اویله اولسه
اول کوهلرک برندن ناره نظر ایدوب وسطنده اول صاحبی کوره
(قال تالله ان کدت لتردین) واکا دیه که والله سن قریب اولدک که
بنی اغو اکله هلاک ایدیک (ولولا نعمة ربی لکننت من المحضرين)
اکر ربم جل شانک بکا هدایت وعصمتی اولسه بندخی ناره سنکله یله
محضریندن اولوردم بعده اول مؤمن جلساسنه دیه که (أفأنحن بمیتین
الاموتنا الاولی وما نحن بمعذین) یا اهل جنت بز دنیاده کی موتمزد نصکره
جنتده دخی میتین اولزمیز ونارده کفارله عذاب اولنلردن دکلیر دیو
نعم الهیه بی تحداث وانکله تلذذ ایدلر انلره دینلدیکه ایدا موته
دنیا دنصکره بونده موته اولمز * دینلدیکه بو خطاب اهل جنتدن
ملائکه یه اولور شول حینده که موت ذبح ایدیلور اویله اولسه اهل جنت
دیرلر که (ان هذا هو الفوز العظيم) اشبو زه ویریلن نعمت خلود وامن
نجات وافره در (لمثل هذا فلیعمل العاملون) اشبونک مثلنه نیل ایچون
واجب اولورکه عاملون عمل ایدلر یوخسه حظوظ دنیویه ایچون دکل که
اول مشویه الآلام سریعه الانصرامدر (أذلك خیر زلا) اهل جنت
ایچون اشبو مذکورک نزل اولسمی خیر لیدر (ام شجرة الزقوم) یوخسه
اهل نار ایچون شجرة زقومک نزل اولسمی که اول بر شجرة حیثه نک
ثمره سیدرکه مره کریمه الطعمدر اهل نارانی اشد کراهنله تناول ایدلر
(انا جعلناها فتنه للظالمین) بز اول شجرة زقومی کافرلر ایچون آخرنده
محضه عذاب ویا دنیاده انکله ابتلاء ایتدک زیرا که انلر انک نارده اولدیغن
ایشیدیک اول نارده نیچه اولور حالبوکه نار شجری احراق ایدر دیدیلر
بیلدیلر که اول نارده معیشت وانکله التذاذ ایدر حیوان خلقنه قادر
اولان رب تعالی اقدر در که نارده شجرة خلق ایدوب احراقدن انی
حفظ ایده (انها شجرة تخرج فی اصل الجحیم) اول بر شجرة در که منبتی قعر
جهنمه اغصانی انک در کاته مر تفعه در (طلعها کانه رؤس الشیاطین)
انک میوه سی نهایت قبحده کویاکه رؤس شیاطیندر * دینلدیکه

شیاطین بر نوع حیات هائله در که قبحه المنظر در (فانهم لا کاون منها
فالتون منها البطون) اهل نار اول شجره دن و یا طلعتدن یرلر انکله قارنلرین
طیوررلر یاشدت جوعلرندن و یا انک اکنه اجبار اولند قلرندن (ثم ان لهم
عليها لشوبا من حيم) اول شجره دن طوید قلدنصکره انلره عطش
غلبه ایدوب ماء حیمله مشوب غساق و یا صدید ایچوریه لکه اول انلرک
جو قلدن بقر سقلرین پاره لیه (ثم ان مرجعهم لالی الحيم) بوندنصکره
انلرک مصری جحیمدر و یا انک در کاته در زیر که زقوم و حیم نزلدر که ناره
دخولرنده اول انلره تقدیم اولنور * دینلدیکه حیم ناردن طشره ده در
دونهک صویه ایلدلسی کی انلر دخی حیمه ایلتلوب اندن ناره ادخال
اولنورلر (انهم القوا آباءهم ضالین فهم علی آثارهم یهرعون) شول
سبیدنکه انلر آباءلرینی طریق هدادن ضالین بولدیلر انلر دخی اول
آباءلرینک آثارینه اتباع و سرعت ایتدیلر یعنی ذکر اولنان شداده
استحقاقلرینه علت اضلالده آباءلرینه تقلیدلری اولمشدر (ولقد ضل
قبلهم اکثر الاولین) یا محمد قومک قریشدن اول پکن امم خالیدهک اکثری
طریق حقن ضلالته ایردیلر (ولقد ارسلنا فیهم منذرین) بز انلره
عواقبدن انذار ایدر انبیاء ارسال ایتدک سنی قومکه ارسال کی انلر ایه
اول انبیایی تکذیب ایتدیلر قومک سنی تکذیب ایتلری کی (فانظر
کیف کان عاقبة المنذرین) نظر ایتکه اول انذار اولنوب تکذیب ایدنلرک
عاقبتلری نیچه عذاب وهلاکه ایردی (الاعباد الله المخلصین)
الاعباد اللهدن شونلر که انبیانک انذاریه تنبه ایدوب دینلرین لله
خالص ایتدیلر انلر عذاب وهلاکدن قورتلدیلر (ولقد نادانا نوح فلنعم
المجیبون) نوح علیه السلام قومک ایماندن مأیوس اولیچق بزدن
انلر اوزره نصرت دیلیوب دعا ایتدی والله بزنه کوچک اجابت ایدیچی بز
انک دعاسنه اجابت ایتدک (ونجیناه واهله من الکرب العظیم) ونوحی
واهلنی غرقدن و قومی اذاسندن خلاص ایتدک (وجعلنا ذریته هم الباقین)
وانک ذریتن تناسله یوم قیامته دکن باقین ایتدک * روایت
اولندیکه نوح علیه السلامه سفینه یه کیرن بنی آدمدن نوح
علیه السلامک اوج اوغلیله زوجدلرندن غیرلری وفات ایدوب متاسل
اولدیلر (و ترکنا علیه فی الآخِرین) بز نوح ایچون اندنصکره کلن انبیاء

(وامده)

وامده ثناء حسن و ذکر جیل ابقاء ایتدک که اول یوم قیامته دکن منقطع
اولم (سلام علی نوح فی العالمین) اول نوح اوزره ملائکه وانس وجنده یوم
قیامته دکن سلام ثابتدر که انلر اکا سلام ایدرلر (انا کذلک نجزی المحسنین)
احسان ایدنلره بز نوحه ایتدیلمز کی جزاء حسن ایدرلر (انه من عبادنا
المؤمنین) اول بزم وحدانیتیزی تصدیق ایدر عبادمز دندر (ثم اغرقنا
الآخرین) بعده انک قومی کفارنی اغراق ایتدک (وان من شیعه
لا ابراهیم) دینک اصل ومنها جنده نوح علیه السلامه متابعت ایدنلرک
بری ابراهیم علیه السلامدر بعید اولم که ایکسینک شرعی فروعه
و یا غالبده متفق اوله * دینلدیکه نوح علیه السلامه ابراهیم علیه السلام
بیننده ایکی بیک التیوز قرق ییل یکمشدر و ایکسی بیننده هود علیه السلام
وصالح علیه السلامدن غیری رسول کلامشدر (اذ جاء ربه بقلب سليم)
که اول رب تعالی یه شرک وشکدن خالص قلبه کلدی (اذ قال لا یبه
وقومه ماذا تعبدون) که اول باباسنه وقومنه دیدیکه اشبو اصنام
نه شیتدر که سز اکا عبادت ایدر سز جالبو که اول عبادت اولنمغه صالح
دکلدر (ائتکما آلهة دون الله تریدون) اسوه کذب ایدر اولدیغکز حالده
الله تعالینک غیری عبادتیچون آلهدی اراده ایدر سز (فاظنکم
برب العالمین) عالمک ربیسی جل شانیه ظنکز ندر چانکه اکا ملاقی
اوله سز انک غیریه عبادتکز ایچون سزه عقابی و یا ترکی ایدر * ابن
عباس رضی الله عنهما ایدر ابراهیم علیه السلامک قومی علم نجومی
تعاطی ایدرلردی اولدخی انلره موافقت شکندنه اصناملرینه کید اراده
ایلدی تا که انلرک الوهیته عدم استحقاقنی جتنله انلره الزام ایده
مکر که انلرک عیدلری اوله جق کوندن بر کون مقدمه عادتلری ایدیکه
اصناملرینه واروب قربانلر ایدرلر و طعاملر پشوروب اصناملری اوکلرینه
قود قلدنصکره عید کاهلرینه کیدرلردی شول زعمله کیم اول طعامده
برکت اولوب رجوعلرنده انی یرلردی ابراهیم علیه السلامه دیدیلر که
سندخی ایرته بزمله عید کاهه کتمز میسین (فنظر نظرة فی النجوم) اولیه اولسه
ابراهیم علیه السلام نجومک مواقع واتصالاته و یا علم و یا کتابنه نظر
ایتدی (فقال انی سقیم) و دیدیکه بن سقیم انلره کندوی نجومله
استدلاندن سقیمه مشارف کوستردی تا که انی کندیلرله عید کاهلرینه

ایلمیدر وانلرک اغلب اسقامی طاعون ایدی سرائندن زیاده قورقرلردی
ویا خود مرادی سزک کفر کزدن سلیم القلم ویا خود اعتدال دن
خارج المزاجم بر خروجه کیم اندن خالی کسه قیلدر ویا خود موت
صدندیم دیمک ایدی (فتولوا عنه مدبرین) او یله اولسه سرائت
خوفیله اندن قاجوب عید کاهلرینه کتدیلر (فراغ الی آلهتهم فقال
ألانأ کون) بعده ابراهیم علیه السلام کیزلو انلرک اصناملرینه کیروب
استهزاء طریق اوزره او کزده کی طعاعی یمیز میسر یسکره دیدی (مالکم
لاتنطقون) سزه تولدی سوتلر سز که بکا جواب ویره سز (فراغ
علیهم ضربا بالیمین) اندن اصنامی اورمغه اقبال ایدی شول حلفی
سییله کیم تالله بن سزک اصنامکزی کسر ایدرین دیو حقیقه سوتلشدی
ویا خود اول فعلی یدیمنا سیله ویا قوتیله ایدی (فأقبلوا الیه یزفون)
وقتا که ابراهیم علیه السلام اصنامه اولان صنعینی خبر آلدیلر انی اخذ
ایچون سرعتله اکا کدیلر مکر انلرک بعضی ابراهیم علیه السلامی اصنامی
کسر ایدر کن کورمشدی اول ايسه سائرینه بیلدرمشدی جیجی
ابراهیم علیه السلامه دیدیلر که بزم اصنامیزی نیچون کسر ایتدک حالبو که
بز اکا عبادت ایدرز (قال أتعبدون ما تحتون) ابراهیم علیه السلام انلره
توبخ ایدوب دیدیکه شول الکزله حجاره وغیریدن دوزدیککز شیئه
عبادت می ایدرز (والله خلقکم وما تعملون) والحال سزی و دوزدیککز
شیئی که اکا عبادت ایدرز الله تعالی خلق ایدوبدر او یله اولسه روامیدر که
انی قویوب شول نفع وضری اولمیان شیئه عبادت ایدرسز اشبو دلیلدر که
افعال عباد الله تعالینک خلقی اوله (قالوا ابنوا له بنیانا فالقوه
فی الجیم) بری برلرینه دیدیلر که ابراهیم ایچون برحائط بنا ایدوب
ایچنه آتش یا قدیغکز دنصکره ابراهیمی انک ایچنه براغک او یله اولسه
طاشدن برحائط یا دیدیلر که سمایه طولی اوتوز ذراع و عرضی یکر می ذراع
ایدی وایچنی اودونله طول دیروب اکا آتش اوردیلر و ابراهیم علیه السلامی
اکا آتدیلر (فأرادوا به کیدا فجعلناهم الاسفلین) وقتا که انی آتسه
آتمغله شر قصد ایتدیلر بز انلرک شرلرینی ابطاله کندیلرین اذین قیلدق
شول وجهله کیم اول آتشی اکا برد و سلام ایدوب علوشانه انی برهان
ایتدک (وقال انی ذاهب الی ربی سیهدین) ابراهیم علیه السلام دیدیکه

(ربم)

ربم جل شأنه نک بکا امر ایتدیکی مکانه هجرت ایدرین ویا شول مکانه
کیم انک انده عبادتنه تجرد ایدرینکه اول حراندن شامه ایدی ربم بکا
انده دینه صالح شیئه هدایت ایدر (رب هب لی من الصالحین) یارب
صالحلردن بکا بولد هبه ایتکه دعوت و طاعته احانت وغربده بکا مؤانست
ایده (فبشرناه بغلام حلیم) بز اکا تبشیر ایتدک بر غلامله کیم صغرنده
علیم کبرنده حلیمدر زیرا که صبی حملله وصف اولنر (فلما بلغ معه السعی)
وقتا که اول غلام باباسی ابراهیم علیه السلامه اعمال ومهامه کتمکه صالح
اولدی یعنی یدی ویا اون اوج یاشنه ایردی (قال یابنی انی اری فی المنام
انی اذبحک فانظر ماذا تری) ابراهیم علیه السلام اکا دیدیکه یا او غلجیم
بن منامده کوردمکه سنی ذبح ایدرین نظر ایتکه رأیک ندر اول امر
حتم ایکن انده انکله مشاوره ایدی تا که نازل اولان بلاء اللهده انک
عندنده اولانی بیله جزع ایدرسه قدمن تثبیت ایده کندوی تسلیم
ایدرسه انک اوزره امنده اوله ونفسنی اکا توطین ایدوب اول اکا آسان
اوله وبلانک نزولندن اول انقیادله مشوبه اکتساب ایده * روایت
اولندیکه ابراهیم علیه السلام لیله تروییه ده کوردیکه بر قائل اکا
دیر که الله تعالی سکا امر ایدوبدر که او غلکی ذبح ایده سن ابراهیم علیه
السلام فکر ایتدیکه آیا کیم اول رؤیا الله تعالی ندیدر ویا شیطان ندیدر
کیجه اولیحق ینه انجیلین کوروب الله تعالیدن ایدیکنی بیلدی او چنجی کیجه
دخی انجیلین کور یحک انی ذبحه قصد ایلدی اول اجلدن اول ایام ثلاثه
تروییه وعرفه ونحر دیو تسمیه اولندی اظهر اولان بودر که اشبو
آیتده خطاب اولناله مراد اسماعیل علیه السلام اوله زیرا که هجرتک
اثرنده ابراهیم علیه السلامه اول هبه اولندی واسحاق علیه السلامه
بشارت اکا غلام بشارتی اوزره عطفله اول صکره ده ذکر اولندی
ودخی شول دلیلله کیم پیغمبر یمز صلی الله علیه وسلم ایدی بن ایکی ذبحک
او غلیم دیدیکه انک بری جدی اسماعیل علیه السلام ایدی وبری دخی
باباسی عبدالله بن عبد المطلب ایدی شول سبیدنکه عبد المطلب نذر ایتدیکه
اکر الله تعالی اکا زمزم حفرنی آسان ایدوب او غلری اون عدده
ایرسه انلرک برینی ذبح ایده وقتا که اول اکا آسان اولوب
او غلری اونه ایردی قنغیسین ذبحه قرعه ایتدکده قرعه عبدالله اوزره

چيقدی اويله اولسه عبد المطلب انكچون يوز دوه فدا ايتدی اول اجلدن
ديته يوز دوه ويرلك سنت اولدی و بوقصه مکه ده واقع اولوب فدا
کلان کبشک ايکی بونوزی کعبه ده معلق ایدی حتی که عبد الله بن زبیر
رضی الله عنه زمانده کعبه نك ياتمسيله اول بونوزلر دخي ياندی ودخی
اسحق عليه السلامه بشارت ایدی يعقوب عليه السلام ولادته مقارن
قيلندی اويله اولسه انك مرهق ايکن ذبحيله امر اولمسی اکا مناسب
اولز اما اولکه پيغمبر عز صلی الله عليه وسلمدن قنغی نسب اشرفدر ديو
سؤال اولندقدہ يوسف صديق الله بن يعقوب اسرائيل الله بن اسحاق ذبيح الله
ابن ابراهيم خليل الله در ديمسی روايتی ثابت دکلدن بلکه صحیح اولان
يوسف بن يعقوب بن اسحاق بن ابراهيم در ديمسيدر اول زوانلر اوينک
الحاقدر (قال يا ابت افعل ما تؤمر) اول ايتديکه ای بابا امر اولنديغک
شيئي ايشکل (سجدنی ان شاء الله من الصابرين) ان شاء الله بنی امر اولنديغک
ذبحه صبر ايدنلردن بولورسن وقتاکه ايکيسي امر الهي اقامته عزمت
ايتدير اول ابراهيم عليه السلامه ديدیکه ای بابا سکا اوچ شيله وصيت
ايدرين بری بودرکه ايکی الیمی باغله که اضطراره سکا اذاع ايتيم و بنی يوزم
اوزره ياتور غل که يوزيمه باقوب مرحت ايتيمه سن و کو ملکمی انامه
ايلتوب بندن اکا سلام ايت و ديکل که الله تعالینک امرينه صبر ايتسون
ابراهيم عليه السلام اکا ديدیکه ای اوغل الله تعالینک امرينه امثال
ايتيمکه سن بکانه کوچک عون اولورسن (فلما اسما) وقتاکيم ايکيسي
امر الله انقياد ايتدير ابراهيم عليه السلام اوغلنی ذبحه و اوغلی
کندویي تسليم ايتدی (وتله للجبین) وانی يعقوب يوزی اوزره يره
دوشردی و بچاغی انک قفاسی اوزره يورتدی باذن الله بچاغک يوزی
دونوب کسمسی کتدی اشبو حالت مناده بر صخره قننده اولدی (ونادياه
ان يا ابراهيم قد صدقت الرؤيا) بزاکا ندا ايتدک که يا ابراهيم رؤيا کی
تصديق ايتدک امر اولنديغک شيله عز مک و مقدمانی ايتانکه اويله اولسه
ايکيسي الله تعالینک انعامنه سوينوب شکر ايتدير شول سيبدنکه بلانک
حلولند نصکره دفع ايلدی وانلردن غيره توفيق ايتديکی شيئي انلره توفيق
ايتدی و طالينه فضلرینی اظهار ايتدی (انا كذلك نجزي المحسنين) احسان
ايدنلره بز بويله جزا ايدرز یعنی الله تعالینک طاعتنده احساننی سيبيله

(ولدنک)

ولدنک ذبحنی اندن عفو ايتدی (ان هذا لهو البلاء المبين) اشبو
اختبار ظاهر درکه انکه مخلص غيریدن متمساز اولور ويا بر مختدر که
بينه الصعوبه در (وفديناه بذبح عظيم) بزاکا اوغلنک يرينه ذبح ايتيمکه
جنتدن بر عظيم الجنة کبش ويا وعل فدا ايتدک * ديتديکه اول
کبش آدم عليه السلامک اوغلی هابيلک ايتديکی قربانی ایدی وقتاکه
ابراهيم عليه السلام انی ذبحه شروع ايتدی جبريل عليه السلام ديدیکه
(الله اکبر الله اکبر) ذبح اولندجق ولد ديدیکه (لا اله الا الله والله اکبر)
ابراهيم عليه السلام ديدیکه (الله اکبر والله الحمد) بعده بو ذکر بو امته
سنت اولدی * روايت اولنديکه اول کبش جره عننده قاچدی ابراهيم
عليه السلام اکا يدی طاش آتوب حتی که انی اخذ ايتدی اول فعل
اندنصکره سنت قالدی (وترکنا عليه في الآخريں سلام علی ابراهيم)
ابراهيم عليه السلام اوزره بز شاء حسن ابقا ايتدک که اول اندنصکره
کلان امتلر اکا سلام ايتسيدر (کذلك نجزي المحسنين) طاعتده احسان
ايدنلره بز بويله جزا ايدرز (انه من عبادنا المؤمنين) ابراهيم عليه السلام
بزم وحدانیت می تصديق ايدر عبادمزدندر (وبشرناه باسحاق نبيا
من الصالحين) بز ابراهيم عليه السلامه ولدنی ذبحله امر يمزدنصکره
اندن اسحاق نام ولدی وجوده کلمسيله تبشیر ايتدک که اول نبوتله مقضی
وصالحلردن اولمسيله مقدر اولديغی حالده * مفسريندن اولکی ذبيحی
اسماعيلدر دير اول قصه دنصکره ابراهيم عليه السلام طاعتنه جزا ايچون
اسحاقک وجوده کلمسيله تبشیر اولندی دير * واولکه ذبيحی اسحاقدر دير
ابراهيم عليه السلام اسحاقک نبوتيله تبشیر اولندی دير * اول قول اوزره
انک اسحاقله تبشیر اولمسی ايکی کره اولور بری حین ولادته وبری
حین نبوتده اولور (وبارکنا عليه وعلى اسحاق) بز ابراهيم اولادنده
واموالنده برکت قيلدق تکثيرله واسحاقه دخي برکت قيلدق صلبدن
بنو اسرائيل انبياسنی وانلرک غیری انبيادن ايوب وشعيب مثلنی اخراج
ايتدک وياخود ابراهيم واسحاقه دين و دنيا برکاتنی افاضه ايتدک
(ومن ذريتهما محسن وظالم لنفسه مبين) واول ايکيسنک ذريتندن بعضی
ايمان وطاعتله احسان ايديجيدر وبعضی ايسه کفر ومعاصيله
نفسنه ظلم ظاهر ايديجيدر (ولقد مننا على موسى وهارون)

بزموسی و هارونه نبوت و سائر منافع دینیه و دنیویه ایله انعام ایتدک
 (ونجیناهما وقومهما من الکرب العظیم) واول ایکیسنی وقوملری
 بنو اسرائیلی فرعونک تغلبندن ویا غرقدن نجات ویردک (ونصرناهم
 فکانوا هم الغالبین) واول ایکیسنه وبنی اسرائیله نصرت ایتدک
 حتی که فرعون وقومی اوزره غالبین اولدیلر (وآتیناهما الکتتاب
 المستبین) واول ایکیسنه بزم حلال و حرام احکامنی بیانده متناهی
 تورات نام کتابی ویردک (وهدیناهما الصراط المستقیم) واول ایکیسنی
 بزمحق وصوابه ایرکورر طریقه هدایت ایتدک (وترکنا علیهما فی الآخرین)
 واول ایکیسنه شاء حسن ترک ایلدک که انلردنصکره کلان املک مؤمنلری
 انی اقامت ایدرلرکه اول (سلام علی موسی و هارون) موسی و هارونه
 سلام اولسون دیرلر (انا کذلک نجزی المحسنین) طاعتنده احسان ایدنلره
 بزم بویه جزا ایدرز (انهم امن عبادنا المؤمنین) اول ایکیسنی بزم وحدانیتیزی
 تصدیق ایدن عبادمز دندر (وان الیاس لمن المرسلین) الیاس بن الیاسنیکه
 هارون علیه السلام سبطندن بنو اسرائیله بعث اولمش مرسللردندر
 دینلدیکه اول بنو اسرائیل انیاسندن ادریس نام نیدر ویاخود اول خضر
 علیه السلام صاحبی اولان الیاسدر خضر علیه السلام جزیره لرده والیاس
 علیه السلام بریه لرده اولور هریریل عرفه کونده عرفاتده بری برلینه ملاقات
 ایدرلر * روایت اولندیکه بعلبک ملکی برالتونندن صغنه عبادت ایدردیکه
 اکا بعل دینوردی طولی یکر می ویا اوتوز ذراع ایدی مکر اول ملکک مرأسی
 بر جارجنی قتل ایدوب بستاننی ظلمله آلمشدی الله تعالی اول ملکه غضب ایدوب
 الیاس علیه السلامی اکا رسول کونردی اول بستاننی اول مقتولک ورثه سنه
 رد ایتسون یوخسه انی هلاک ایدرین دیو اکا خبر ویرمه بیوردی (اذ قال
 لقومه ألا تتقون) اول قومنه دیدیکه الله تعالینک عذابندن قورقمیسز
 (أتدعون بعلا وتذرون احسن الخالقین) بعله عبادت ایدوب سزی خلق
 ایدن احسن خالقینی ترک ایدرمیسز (الله ربکم ورب آبائکم الاولین)
 که اول سزک واول یکن آبائکک ربیسیدر (فکذبوه فانهم لمحضرون)
 انلر ایسه الیاسی تکذیب ایتدیلر اولیه اولسه انلر واصناملری ناره احضار
 اولنورلردر (الاعباد الله المخلصین) الله تعالینک مؤمن قوللری ناره احضار
 اولنور دکلردر (وترکنا علیه فی الآخرین) و صکره کلان امتلرده

(اول)

اول الیاس اوزره شاء حسن ابقا ایتدک (سلام علی الیاسین) که اول الیاس
 واتباعی اوزره سلام اولسون دیملریدر * دینلدیکه ملک الیاس اوزره
 غضب شدید ایدوب قتلنه قصد ایلدی اولیه اولسه الیاس علیه السلام
 الله تعالی یه دعا ایتدی انلرک شرتندن انی خلاص ایده دعاسی مستجاب
 اولوب اول سمایه رفع ایلدی و ملک واتباعی قطله هلاک اولدیلر
 (انا کذلک نجزی المحسنین) طاعتنده احسان ایدنلره بزم بویه جزا ایدرز
 (انه من عبادنا المؤمنین) الیاس بزم وحدانیتیزی تصدیق ایدن
 عبادمز دندر (وان لوطا لمن المرسلین) لوط علیه السلام قومنه
 کوندرلمش رسوللریمز دندر انلر ایسه انی تکذیب ایدوب هلاک کن قصد
 ایدیجک رب تعالی یه یلواروب کندینک واهلنک انلرک شرتندن نجات
 دیلدی (اذنجیناه واهله اجمعین) بزم انی واهلنک جیعنی قومنه ایریشن
 عذابدن قورتار دق (الا عجوزا فی الغابین) الا انک مرأه سنی هلاک
 ایچون قلانلردن قیلدق (ثم دمرنا الآخرین) بعده ماعدالربنی هلاک
 ایتدک (وانکم لتمررون علیهم مصبحین) یا اهل مکه سز شامه مسافر تکرده
 انلرک منازلنه مصبحین اولدیغک زده اوغراسز (وباللیل) وکاهی اکا
 کچه ده اوغراسز (أفلا تعقلون) عقلیکز یوقیدر که انکله معتبر
 اوله سز (وان یونس لمن المرسلین) یونس قومنه کوندرلمش بزم
 رسوللریمز دندر * روایت اولندیکه یونس علیه السلام قومنه عذابه وعد
 ایتدیکندنصکره عذاب انلردن تأخر ایدیجک امر الهی اولمدین
 ارالنندن چیقوب بر دریا کنارینه کتدی (اذ ابق الی الفلک المشحون)
 اول قاقوب بو طلوکی یه بندی اولیه اولسه کی طوروب ایلرو کتدی
 ملاحین دیدیلرکه آرا مزده سیدندن اباق ایتش عبد واردر (فساهم
 فکان من المدحضین) اولیه اولسه کینک اهلی مقارعه ایتدیلر قرعه
 یونس علیه السلام اوزره واقع اولوب انکله مغلوبیندن اولدی نعم
 سیدندن اباق ایدن عبد بنم دیوب کندویی دریاه آتدی (فالتقمه الحوت
 وهو ملیم) هماندن انی بر بالی یوتدی حالبوکه اول نفسنه لوم ایدیجیدر
 (فلولا انه کان من المسبحین) اگر اول مدت عمرنده وبالق قارنده الله تعالی بی
 ذکر کثیر ایدر اولسه یعنی (لااله الا انت سبحانک انی کنت من الظالمین)
 دیر اولسه ویاخود مصلیندن اولسه (للبث فی بطنه الی یوم یبعثون)

اول بالق قارنده حی و یامیت اولدیغی حالده ناسک بعث اولنملری
کونه دکن انده لبث ایدوب قالوردی * اشبونده ذکرک اکشارینه
وتعظیم شاننه حث وارد دینلدیکه برکسه که الله تعالی به سراده اقبال
ایده ضراده اول انک الین آلور (فبذناه بالعرء) اول بالغک قارنده
برکوندن آز ویاوچ کون ویایدی کون ویایکرمی کون ویاقرق کون
لبثند نصکده بزانی شول شجر ونبندن خالی مکانه ساحله ویافضایه القا ایتدک
روایت اولندیکه اول بالق کینک یانجه باشی طشره چیقارر یورردی
یونس علیه السلام ایسه انک قارنده تنفس وتسبیح ایدردی بره ایردکلرنده
بالق دخی انی قوصدی (وهو سقیم) والحال یونس علیه السلام
علیل اولوب بدنی طفلك ولادتی حیثنده کی هیئتنده ضعیف وبی مجال
ایدی (وانبتنا علیه شجرة من یقطین) ویز انک اوزره مظله انبات ایتدک
برشجر دنکه وجه ارض اوزره منبسط اولور ساقی اوزره قائم اولمز اکثرن
قولنده اول دباء ایدی اوراقیله انی ذبابدن تغطیه ایتدی * زیرا که
دباء اوزره ذباب واقع اولمز وانکله مراد دباء ایدوکنه دلالت ایدرکه
پیغمبریمز صلی الله علیه وسلمه سز قباغی سورمیسز دینلدیکنده نعم سورینکه
اول قرداشم یونسک شجره سیدر دیدی * وبرقوله اول انجیر اغاجیدر
ویاموز درکه ورقیله انی تغطیه واغصانیله استظلال وثماریله افطار ایتدی
روایت اولندیکه یونس علیه السلام اول شجره ایله کولکه لنور وبروعله
هردام کلوب اکا سودین امزردی حتی لمی شدت وشعری بتوب بدنی
قوتلندی بعده بروقتده اویویوب اویاندیغنده کور سه که اول شجره
قوریمش اکا قتی محزون اولدی وکونشدن اذی کوردی اکا آغلیوب
طوررکن الله تعالی اکا جبریل علیه السلامی کوندردی دیدیکه
برشجره نک قورید یغنه محزون اولورسن یوز بیکدن زیاده امتک هلاکن
اراده ایتدک که محزون اولزسن حالبوکه انلر توبه وایمانه کلدیلر
(وأرسلناه الی مائة الف اویزیدون) بزانی بالق یوتزدن اول نینوی
اهلندن یوز بیک ویازیادهیه ارسال ایتدیکمز کی انی بالق یوتدیغند نصکرده
کیرو انلره ویاغیریلره ارسال ایتدک چقان ناظر انلره نظر ایتسه دیرکه
اول یوزبیک ویا اکثردر * روایت اولندیکه انلر اسلامه کلوب یونسدن
کیرو انلره رجوعن دیلدیلر اول ایسه رجوع ایتدی * زیرا که بر پیغمبر

برمکاندن هجرت ایتسه اقامتیچون کیرو اول مکانه رجوع ایتزدی
(فأمنوا فتنعناهم الی حین) اویله اولسه انی تصدیق ایتدیلر ویا انک
محضرنده اکا ایمانلرین تجدید ایتدیلر بز دخی انلری اجل مسماری
تمامنه دکن تمسح ایتدک اشبو قصه نک بعضی سورة یونسده یکمشد
(فاستفتحهم أربک البنات ولهم البنون) یا محمد اهل مکدن توبیح وجهی
اوزره استخبار ایتکه ربک جل شاننه ایچون ایکی جنسک اوضعی اولان بناتی
وارفعی اولان بنونی کندیلر ایچونمی قیلورلر حالبوکه اشبو حکمده کندیلرین
رب تعالی اوزره تفضیل واردرکه سلیم العقل اولان انی قبول ایتز
(ام خلقنا الملائكة انا واهم شاهدون) یوخسه بز ملائکه بی انامی
خلق ایتدک حالبوکه انلر انده حاضر میدیلرکه اول قوله جرأت ایدرلر
(ألا انهم من افکم ليقولون ولد الله وانهم لکاذبون) آکاه اولک که
انلر کذبیلندن ملائکه بی بنات الله زعیله الله تعالینک ولدی واردر دیدیلر
والحال انلر اول قوللرنده کاذبلردر ومع ذلك انده الله تعالی بی حاشا
تجسیم ایدرلر زیرا که ولادت اجسامه مختصه در * ودخی الله تعالینک
اکرم خلقی انات قیلقدده استهانه شیدیه واردرکه انلرک بر ادناسنه سنده
انوثت وار دینلسه انی قائله غیظندن کندویی پاره لردی (أصطفى البنات
علی البنین) یوخسه الله تعالی بناتی بنون اوزره اختیارمی ایلدی
(مالکم کیف تحکمون) سزه نولدیکه عقل قبول ایتدیکی شیئی نیچه
حکم ایدر سز * ایمدی اول حکم فاسددن ارتداع ایتدک که اول جوردر
(أفلاتذکرون) تذکر ایتزمیسز که الله تعالی اندن منزهدر
(ام لکم سلطان مبین) یوخسه ملائکه بنات الله ایدوکنه سمدان
سزه نازل اولمش حجت واضحه کرمی واردر (فأتوا بکتابکم ان کنتم صادقین)
ایمدی سزه نازل اولان کتابکزی کتورک اگر دعوا کرده صادق ایه کز
(وجعلوا بینہ وبين الجنة نسبا) مکه مشرکری الله تعالی ایله ملائکه دن
جن دینور بر حی بنشده نسبت جامعه قیلدیلر که ابلیس انلر دندر
دینلدیکه الله تعالی جن ایله مصاهره ایدوب اندن ملائکه حاصل
اولدی دیدیلر وبرقوله الله تعالی وشیطان ایکی قرداشدر دیدیلر
الله تعالی انلرک اقاویل باطله سندن منزهدر (ولقد علمت الجنة انهم
لحضرون) حالبوکه کفره نک بناتله وصف ایتدکاری ملائکه ویا خود

انس و جن پیدیلر که کفره اول مقاله لری سبیلله ناره حاضر اولوب عذاب اولیسرلردر (سبحان الله عما یصفون) الله تعالی انلرک انی ولدله وصف ایتسندن منزله اولدی (الاعباد الله المخلصین) لکن الله تعالی نیک شرکدن مبرا اولان عبادی ناردن ناجیلردر (فانکم وما تعبدون ما انتم علیه بفاتنین) یا اهل مکه سز و معبودلر یکر ناسی الله تعالی به اعتقادلرینی اغوا کرله افساد ایدر دکلر سز (الامن هو صال الجحیم) مکر انی افساد ایدر سز که الله تعالی نیک سابق علمده اهل ناردن اولوب لابد اکا دخول ایدر سز بعده الله تعالی ملائکه نیک عبده لری رد ایچون اکا عبودیتیه اعترافلرینی حکایت ایدوب دیدیکه (وما منا الا له مقام معلوم) بز که معشر ملائکه یز بزدن هیچ احد یوقدر الا انک معرفت و عبادتده و تدبیر عالمده امر الله انتهاده مقام معلومی وارد و یا خود اول سماءه مقام معلومی وارد و انده عبادت ایدر اذن الهی سز انی تجاوزده قادر اولمز (وانا نحن الصافون) و بز اداء طاعتده و منازل خدمتده ایاق اوزره صف صف طوررز (وانا نحن المسبحون) و بز الله تعالی بی جلالتیه لایق اولمین شیئدن تنزیه ایدرز * یعنی جبریل علیه السلام پیغمبریمز صلی الله علیه وسلم خبر و یردی دیدیکه بز الله تعالی به صلاة و تسبیحله عبادت ایدرز یوخسه کفارک زعم ایتدیکی کبی بز معبودین دکلر * دینلر که اشبو کلام پیغمبریمز علیه السلام و مؤمنلر لساندن حکایت بیورلمشدر یعنی جنتده و یا یوم قیامتده الله تعالی درگاهنده بز مقام معلوممز وارد بز انکچون نمازده صف صف اولورز وانی هر سوءدن تنزیه ایدرز (وان کانوا لیقولون لو ان عندنا ذکر من الاولین لکننا عباد الله المخلصین) اگرچه مکه کافرلری دیرلر که اگر ائم سالفه به نازل اولان کتابلردن بزه دخی بر کتاب اولسه الله عبادتن خالص ایدر انک عبادی اولوردق یوخسه انلر کبی اکا مخالفت ایتزدک (فکفروا به فسوف یعلمون) چون انلر قرآن کلدیکه اول اشراف اذکاردر اکا کافر اولدیلر * اولیه اولسه کفر و تکذیبلر نیک عاقبت دنیاده و آخرتده بلیسرلردر (ولقد سبقت کلننا لعبادنا المرسلین) بز مرسلین عبادمز و عدمز سبقت ایتدیکه اول (کتب الله لاغلبین انا ورسلی) قولمزد (انهم لهم المنصورون وان جندنا لهم الغالبون) که انلر نصرت اولنورلردر * و مؤمنلر که بز

(جندمزد)

جندمزد دنیاده حجت و آخرتده عزتله کفار اوزره غالبلردر اگرچه بعض احیسانده منهزم اولورلر سده (فتول عنهم حتی حین) ایدمی انلردن اعراض ایت سکا انلر اوزره نصرتمز موعده نه دکن که اول یوم بدردر و یا یوم قحدر (و أبصرهم فسوف یبصرون) انلر ایریشه جک مصائبی انلر کوسترکل سنکچون قضا ایتدی که تأیید و نصرت و ثوابی انلر آخرتده کوریسرلردر * اولیه اولسه کفار دیدیلر که یا محمد اول مصائبی و عذابی نه وقتده کوررز نازل اولدیکه (أفبعد اننا یستعجلون) انلر بزم عذابمز نزولنه استعجالمی ایدرلر (فاذا نزل بساحتهم فساء صباح المنذرين) چقان بزم عذابمز انلرک فناسته نزول ایتسه انذار اولن انلرک صباحی نه چرکین صباح اولور * روایت اولندیکه پیغمبریمز صلی الله علیه وسلم خیر قربته نزول ایدیکه دیدیکه الله اکبر خیر خراب اولدی زیر چقان بز بر قومک فناسته نزول ایتسه وز که انلر انذار اولنمشردی انلرک صباحی نه چرکین صباح اولور (وتول عنهم حتی حین) انلردن اعراض ایت موعودمز ظهورینه دکن (و أبصر فسوف یبصرون) یا محمد شول ذکرری احاطه ایتمز انواع مسرتی سز کورر و انواع مساعتی انلر کوریسرلردر (سبحان ربک رب العزة عما یصفون) ربک رب العزة جل شانه مشرکونک انک شانده اکا لایق اولمیان و صفلردن منزله اولدی (وسلام علی المرسلین) و سلام مرسلین اوزره اولسونکه انلر الله تعالی نیک رسالاتنی امتلرینه تبلیغ ایتدیلر (والحمد لله رب العالمین) عالملرک ربیبی الله تعالی به حمد اولسونکه اول مرسلینه و اتباعلرینه نعم و حسن عاقبه افاضه ایتدی * حضرت علی رضی الله عنه ایدر برکسه که یوم قیامتده اجرده مکمال اوفی ایله کیل اولنمین دیلیه مجلسنده آخر کلامی سبحان ربک رب العزة عما یصفون دن آخر سوره به دک اولسون

سورة ص وهی ثمان وثمانون آیه مکیه

بسم الله الرحمن الرحيم

(ص) دینلر که اول قسدر و یا اسم سوره در و یا صمد اسمک و یا صادق الوعد و صفنک مفتاحیدر و یا خود مصادقن امردر که اول معارضه معنسانده در یعنی یا محمد عملکی قرآنه عرض ایت او امریله عمل و نواهیسندن

اجتناب ايت (والقرآن ذی الذکر) قرآن حقیقونکه اول عظمه
و یا شرف و یا شهرت صاحبدر و یا خود دینده احتیاج اولسان عقائد
و شرائع و مواعید ذکرینک محیدر (بل الذین کفروا فی عزة و شقاق)
حال کفارک دیدیکی منوال اوزره دکادر بلکه کفار حقندن استکبارده
والله تعالی به و رسولنه مخالفتده در (کم اهلکنا من قبلهم من قرن فنادوا
ولات حین مناص) اهل مکهدن اول ام خالیهدن بر نیچه امتی بز عذاب
ایله هلاک ایتدک که انلر ایسه عذابک نزولی حینده اندن تخلص ایچون
استغاثه ایتدیلر انلره دیندیکه اشبو وقت خلاص و فرار وقتی دکادر
(و عجبا ان جاءهم منذر منهم) اول کفار کندیلردن انلره رسول کلدیکنه
تعجب ایتدیلر (وقال الکافرون هذا ساحر کذاب) و دیدیلر که اشبو رسالت
دعواسین ایدن محمد اظهار ایتدیکی معجزه ده ساحر والله تعالی به اسنادله
دیدیکی مقالاتده کذابدر (اجعل الالهة الیها واحدا) شول سبیدنکه
انلرک انخاز ایتدکاری آلهلر ایچون الوهیتی ابطال ایدوب جیعن اله
واحد ایچون قیلدی (ان هذا شیء عجاب) انک بوقولی عجمده بلیغدر که
شول آباغز اتفاق ایتدیکی و بزم مشاهده من اولان امرک خلافیدر که
واحدک علم و قدرتی اشیاء کثیره به نیچه وفا ایدر * روایت اولندیکه
عمر رضی الله عنه اسلامه کلچک قریشه اول زیاده مشقت و ردی
ابوطالبه و اروپ دیدیلر که سن بزم شیخز و کبیر مز سن کور یور میسن
که محمد تابع اولنلر نه ایتدیلر سکا کلدک که بزمه قرن داشت اوغلی
بینی فصل اید سن او یله اولسه ابوطالب پیغمبر میز صلی الله علیه و سلمی
قته چاغروب دیدیکه اشبو قومک سندن حاجتلی بودر که آلهلری
ذکرنی ترک اید سن نه سن انلره ونه انلر سکا اذا اید پیغمبر میز صلی الله
علیه و سلم دیدیکه اگر بن سنرک حاجتکزه اجابت ایتسم سز دخی بنم
بر حاجتیه اجابت ایدر میدیکز * دیدیلر که نعم اجابت ایدلم اگرچه اون
حاجت ایسه ده دیدیکه ایدمی لاله الا الله دیکز هماندم طوروب کندیلر
و حکایت یوریلان جوابی ایتدیلر (وانطلق الملاء منهم ان امشوا و اصبروا
علی آلهتکم) پیغمبر میز صلی الله علیه و سلم انلری اول جوابله تبکیت
ایدیچک ابوطالبک مجلسندن اشراف قریش کتدیلر و الحال بری برلرینه
دیدیلر که انک سوزی سزه نفع ایتز طوروب کبدک آلهکز عبادته

(صبر)

صبر ایدوب اکا ملازمت ایدک (ان هذا شیء یراد) اشبو امر ریب زماندن
برشیددر که بزم اکا ابتلا من اراده اولمشدر انی دفعه چاره یوقدر (ما سمعنا
بهذا فی الملة الاخرة ان هذا الاختلاق) بز محمدک قولنی آباغز ایرشیدی
ملتده و یا ملت عیساده ایشتمدک که اول ملتکزک آخریدر زیرا که نصاری
انی ثالث ثلاثه در دیرلر * ایدمی محمدک قولی کذبدر کندیلر کندیلر
سویلیوبدر (انزل علیه الذکر من بیننا) اشراف ورؤ ساهز بیننده
اول شرف نبوت و نزول کتابله اختصاصه سبب ندر حالبوکه اول انلرک مثلی
و یا شرف و ریاستده انلردن دوندر * اشبو دلیلدر که انلرک مبدأ تکذیبی حسدر
و حطام دنیوی به نظرلری مقصور اولدیغیدر (بل هم فی شک من ذکرى)
بلکه انلر قرآن و وحیدن شکده درلر تقلیده میلاری و دلیلدن اعراضلر ایچون
ومع ذلك اشبو ساحر کذابدر و یا انک قولی اختلاقدر دیملری زعملرینه
دخی ثابت دکادر (بل لما یذوقوا عذاب) بلکه انلر هنوز بنم عذابمی
ذوق ایتیبدر ذوق ایتدکرنده شکری زائل اولوب تصدیقه مضطربن
اولدقلرنده تصدیق ایدرلر حالبوکه اول تصدیق انلره برشیئی مفید اولز
(ام عندهم خزائن رجة ربک العزیز الوهاب) یوخسه ربک جل شانک
خزائن رحقی انلرک یدنده و یا تصرفنده میدر که انی دیلدکرنیه و یرلر
والله تعالینک دیلدیکندن کیده ره لر و نبوتی دیلدکاری صنادیلردن برینه
ایرکوره لر حالبوکه نبوت الله تعالیدن عطیه در عبادندن دیلدیکنه
انکله تفضل ایدر اکا مانع یوقدر عزیزدر که اکا هیچ احد غالب اولز
و هابدر که دیلدیکی شیئی دیلدیکی کسه به باغشدر (ام لهم ملک السموات
والارض وما بینهما) و یوخسه سموات و ارض و ما بینهمانک ملکی
انلرکیدر که اول خزائن رحمتدن جزؤ یسیردر حالبوکه انلرک اول عالم
جسمانی امرنده مدخلی یوقدر اگر مدخلاری و ارایسه (فلیرتقوا فی الاسباب)
معارجیه صعود ایتسونلر که اندن هرشیئه ایروب اکا استیلاء ایدلر و عالم امرنی
تدیرلریله و حی استصواب ایتدکاری کسه به انزال ایدلر (جند ما هنالك
مهزوم من الاحزاب) اشبو قولی دینلر کفاردن رسوللر اوزره تحزب ایدن
برجند قلیل مهزوم و عن قریب مکسوردر انلرک مقالاتنه مبالات ایتکل
زیر ابن سنک ناصرکم * اشبو قول شریفک تأویلی یوم بدرده ظاهر اولدی بعده
پیغمبر میز صلی الله علیه و سلمی تسلیمه ایچون رسل اوزره تحزب ایدنلرک

بعضن ذکر ایدوب دیدیکه (کذبت قبلهم قوم نوح وعاد) قریشدن اول
نوح قومی و هوود قومیکه عا در رسولارین تکذیب ایدوب اول رسولار
دخی انلرک اذاسنه صبر ایتدیلر ایمدی یا محمد سندخی اول اخوانک انبیای
اسوه ایدین (و فرعون ذوالاوتاد) و فرعون دخی رسولی تکذیب ایتدیکه
اول بر ملک صاحبی ایدیکه ثباتده اوتادله مطنب کیدی و یاخود اول درت
ساریه نصب ایتشدی تعذیب دیلدیکی کسه بی ایکی الین و ایکی ایاغن
هر برین اول ساریه لک برینه مد ایدوب اوزرینه اوتاد ضرب ایدردی
بعده موتنه دکن انی انده ترک ایدردی (و ثمود و قوم لوط و اصحاب
الایکه) و صالح قومی ثمود و لوط قومی و شعیب قومی و اصحاب الایکه
دخی رسولارین تکذیب ایتدیلر (اولئک الاحزاب) ایمدی انلر احزاب
ایدیلرکه رسولاری اوزره تحزب ایتشردی (ان کل الاکذب الرسل فحق
عقاب) اول اقوامک هر بری رسولارین تکذیب ایدوب اول اجلدن
بنم عقابم انلره واجب اولدی (و ماینظر هؤلاء الا صیحة واحدة مالها
من فواق) یا محمد کفار مکهنک انتظاری دکل الا صیحة واحدة درکه اول
نفخة اولی در وقتی ایردیکنده فواق ناهه دکلو زمان تأخیر اولمز (وقالوا
ربنا عجل لنا قطننا قبل یوم الحساب) کفار استهزاء طریق اوزره دیدیلرکه یاربنا
بزه یوم قیامتدن اول وعد ایتدیکت عذابدن نصیمزی و یاخود صحیفه
اعمالزی تعجیل ایتکه کوره وز (اصبر علی ما یقولون) ایمدی یا محمد انلرک
اذاسنه صبر ایتکه بن سنک ناصرکم (واذکر عبدنا داود ذا الاید) ذکر ایت
عبدمن داودیکه عبادتده اول قوت صاحبی ایدی پیغمبریمز صلی الله علیه
وسلم ایدر نوافل صوم و صلاتده الله تعالی به احب اولان داود علیه
السلامک صوم و صلاتدرکه اول برکون صائم و برکون مفطر اولوردی
و کجه نك نصفن او بور و ثلثن تهجد قیلور و سدس اخیرنی دخی او بوردی
دینلدیکه یعنی انلره داود علیه السلام قصه سنی ذکر ایت انک عند الله
علو شانی و عظام نعم و کراماتله منزلت و مکانی وار ایکن بر صغیره بی
ارتکابیه منزلتدن تنزیل اولندی و ملائکه انی تمیل و تعریضله تو بیخ
ایتدی حتی انکله مصیبتن تظن ایدوب رب تعالی به استغفار و انابت ایتدی
اوله اولسه کفر و طغیان اهلنه ظنک ندر و یاخود انک قصه سنی تذکیر ایدوب
نفسکی زللدن صیانت ایت اول عنان نفسکی ادنی اهل مال ایله اکا ایریشن

(معاتبه)

معاتبه سکا دخی ایرشمیه (انه ابوتاب) که اول هر کراحت اولنور شیدن
توبه ایله الله تعالی نك مر ضاتنه رجا عدر (انا سخرنا الجبال معه
یسبحن بالعشی والاشراق) بز طاغری تسخیر ایتدک که غداة و عشیده
انکله بیه تسبیح ایدرلردی تکیم تفسیری سورة اقترایده یکدی امهانی
رضی الله عنها ایدر پیغمبریمز صلی الله علیه وسلم صلاة ضحایی قیلوب
اشبو صلاة اشراقدر * ابن عباس رضی الله عنهما ایدر بن صلاة ضحایی
بو آیتدن بیلدم (والطیر محشورة) و قوشلری دخی تسخیر ایتدک که
هر جانندن انلر اکا حشر اولوردی (کل له اوتاب) طاغیر و قوشلر
هر بری داودله بیه الله تعالی نی تسبیح ایدرلردی (و شددنا ملکه)
بز اکا ملکنی عدل و یا حفظ و حراسته قوی ایتدک که هر کجه ده انی اوتوز
اوچ بیک رجل بکاردی و یاخود هیبت و نصرت و کثرت جنودله قوی
ایتدک اول قلوب ناسه وضع اولنشیددی * روایت اولندیکه بر غلام
بر رجلاک عندنده کی بقره بی ادما ایدوب رجل اکا بر لطمه اوردی و مع
ذلت اول غلام بقره بی دخی اثباته قادر اولمدی داود علیه السلامه
وحی الهی کلدیکه اول مدعی علیه رجلی بر لطمه اوردی یغیچون قتل ایده
بنو اسر ایل انی ایشیدیمک جزع ایتدیلر بر رجلی بر لطمه اوردی یغیچون
قتل ایدر میسن دیدیلر داود علیه السلام دیدیکه بویه امر اولندم چون رجل
قتل اولنه جفنی تحقیق ایتدیکی کی دیدیکه یا نبی الله سن صادقسن بن انک
باباسنی ناحق بره قتل ایتدیکمدن قتل اولنغه مستحق اولمشن * اوله اولسه
داود علیه السلام انی قتل ایدیمک قلوب ناسه اندن هیبت ایدردی و اول
بقره بی آلوب غلامه و یردی (و آتیناه الحکمة و فصل الخطاب) و بز اکا
نبوت و یا کمال علم و اتقان عمل و یردک و دخی فصل خصام و یردک که حق
باطلدن تمیز ایدردی و یا کلام ملخصکه اول التباسمنر مخاطبی مقصوده
تنبيه ایدردی * اما بعد لفظنه فصل خطاب دینلدی زیرا که اول مقصودی
ماسبقدن فصل ایدر دینلدیکه اول بر خطاب قصد در که انده
نه اختصار محل و نه اشباع محل اوله (وهل ایتک نبأ الخصم اذ تسوروا
الحراب) یا محمد سکا داود علیه السلام عهد نده و اقع خصومک اکا
تحاکمی قصه سی کلدیمیکه انی استماعله معتبر اوله سن شول وقتکه انلر
داود علیه السلامک غره سی سورینه تصعد ایتدیلر * قصه سی اولدر که

بر وقتده داود عليه السلام آبائی ابراهيم واسحاق و يعقوب عليهم السلام منزلتن تمنی ايدوب رب تعاليدن ديلديکه انلری امتحان ايتديکی کبی انی دخی امتحان ایده وانلرک کبی فضلندن اکا دخی احسان ایده اویله اولسه الله تعالی اکا وحی ايتديکه ايمدی فلان آیت فلانجی کونده سنی ابتلا ایدرم متنبه اولغل چون اول وقت موعود ايردی محرابنه کيروب قپوسنی بر کتدی وصلاة وزبور تلاوته اشتغال ايتدی اول حالتده شیطان التوندن بر کوکچین صورتنه تمثل ايتديکه انده هرلون حسن بولنوردی کلوب داود عليه السلام ایکی ایاغی اراسنه یوریدی داود عليه السلام الین اوزانديکه انی طوته و بنو اسرائیله انی کوستره اول ایسه اول ارادن اوچوب اکا قریب بر مکانه قوندی داود عليه السلام انی طوتمق استديکه اول انک اوکنجه کیدرک حتی که بر کوه یه قوندی داود عليه السلام دخی اول کوه یه چیقديکه انک قنده کیدر ایدیکن کوره صیدینه بر کسه کوندره اول کوه دن کورسه که بر مرأه بر بوستانده برکه کنارنده یونور و یا اول کندينک سطحی اوزرنده یونوب طوررکه اول حسن و جالده غایت کالده ایدی انک حسنی داود عليه السلامه تعجب ايردردی ضمیرنده اول انک حلالی اولسنه رغبت و یردیکه اکا تشامع بنت شامع دینوردی زوجنه اوریا بن حنایا دینوردی داود عليه السلام ابن اختی ایوب بن صوريا ايله بلقاء غزاسنده ایدی اویله اولسه داود عليه السلام اول ایوبه نامه کوندرديکه اول اوریا بن تابوت اوکنجه فلان عدویه کوندره و تابوت اوکنجه کیدنه ایسه حلال دکلدیکه ایدینه دونه تاکه الله تعالی انک یديله اول عدونک قحن ویره ویاخود انی شهادته اير کوره ایوب دخی انی اول عدویه کوندر یجک الله تعالی انک یديله انی فتح ایدوب ایوب داود عليه السلامه خبر و یردی بعده داود عليه السلام ینه ایوبه نامه کوندرديکه اوریا بن او لکیدن اشد عدویه کوندره باذن الله اولدخی فتح اولوب اوچنجی دفعه کوندرلديکی عدوده قتل اولندی * اول مرأه سی عدتی انقضاسنده داود عليه السلام تزوج ایدوب سلیمان عليه السلام اندن وجوده کلدی * بعضیلر انبیای اشبونک کبی عملدن تنزیه ایدوب اشبو نقلی انکار ایتدیلر حتی علی کرم الله و جهه دن روایت اولنديکه بر کسه کیم داود عليه السلام قصه سنی قصاص روایت ايتديکی منوال

(اوزره)

اوزره تحدیث ایده بن اکا یوز التمش جلده اوررین دیدی * دینلديکه اول صحیح اولدیغی تقدیر اوزره ظن اولنورکه داود عليه السلام انک مخطوبه سن خطبه ایده ویا انی زوجه سندن فراغن دیله مش اوله تکیم انصار مهاجرینه مواساة ایچون بومعنا ی ایتدیلردی وقتاکه داود عليه السلام اوریانک متروکه سنه داخل اولدی چوق زمان یکمیدن الله تعالی اکا انسان صورتنده ایکی ملک کوندردی داود عليه السلام ایسه زمانن اوچه قسمت ایتشیدی برکون عبادته و برکون حکومته و برکون نسا ايله معاشرته اشتغال ایدردی ملکک اکا کلمسی عبادتی کونده ایدی وقتاکه انلر داود عليه السلامه کیرمک دیلدیلر حارسلر انلری اندن منع ايتدی اویله اولسه انلر دیواری آشوب داود عليه السلام نماز قیلورکن آنسزین اوکنده اوتوردیلر دینلديکه اول ایکی ملک جبرائیل و میکائیل علیهما السلام ایدی (اذ دخلوا علی داود ففزع منهم) شول وقتنکه ملائکه اکا داخل اولوب اول انلردن فرع ايتدی (قالوا لا تخف خصمان بغی بعضنا علی بعض) دیلدیلرکه بزدن خوف ایتکل زیراکه بز خوف اولنور کسه لر دکلرزل بلکه بز ایکی خصم بعض بعضه بغی ایتسی تقدیر اوزره کلشزکه سن یثغزی فصل ایده سن (فاحکم بیننا بالحق ولا تشطط) ايمدی ایکیز بیننی عدله قضایت یوخسه جور ایتکل (واهدنا لی سواء الصراط) و بزى اعدل طریقه ارشادایت * داود عليه السلام انلره دیدیکه بینکزده کی خصومتی سویلکز انلرک بریسی دیدیکه (ان هذا اخي له تسع وتسعون نجمة ولی نجمة واحدة) اشبو بنم دین و طریق قرنداشمدن انک طقسان طقوز شاتی وار بنم ایسه انجق بر شاتم وار و کاهی عرب نجه یی مرأه دن کنایه ایدر کنایه و تمثیل ایسه تعریضه سوق اولنور شیئده مقصوده ابلغدر (فقال اکفلینها) بکا دیدیکه اول بر شاتکی بکا تملیک ایتکه اولدخی بنم کفالتده اوله یعنی اول بر زوجه کی تطبیق ایتکه انی بن تزوج ایدم (وعزنی فی الخطاب) و قولده بکا غلبه ايتدی زیرا تکلمده بدن افصح و محاربه ده بدن ابطش ایدی (قال لقد ظلمك بسؤال نجبتك الی نعاچه) داود عليه السلام اکا دیدیکه اگر حال دیدیکت منوال اوزره ایسه اول کندی شیاهنه ضم ایچون سنک

بر شانتكى سندن سوال ايله سكا ظلم ايتشدر * ديتديكه داود عليه السلامك
اكا بو جوابى اول ملك آخرك اول خصمى قولنى تصديقندنصكرده
ايدى (وان كثيرا من الخلقاء ايبغى بعضهم على بعض) شركان
كشركه مالدينى برى برلرينك مالنه خلط ايتشدر انلك بعضى بعضنه
ظلم ايدر (الا الذين آمنوا وعملوا الصالحات) الا ايمان واعمال صالحه يي
جمع ايدن شركا برى برلرينه ظلم ايتزلر (وقليل ما هم) اول وصفلو
كسهلر ايسه قلدلدر وقتاكه داود عليه السلام اول ايكيسى بىنى اشبو
منوال اوزره قضا ايتدى ايكيسى برى برلرينه باقشوب كولدكردنصكره
سمايه صعود ايتديلر (وظن داود انما قتناه) اويله اولسه داود
عليه السلام بيلوب تيقن ايتديكه بز انى اول ايكى ملكه اختبار وخطاسنه
تنبه ايتدك (فاستغفر ربه) داود عليه السلام رب تعالىدن اول
خطاسنك مغفرتن ديلدى (وخر راكعا واناب) وانكچون
ركوعدنصكره سجود ايتدى وجيع مخالفادن توبه ايله اكا رجوع ايتدى
(فغفرنا له ذلك) اويله اولسه بز انك مغفرتن ديلديكى خطاسنى مغفرت
ايتدك (وان له عندنا لى وحسن مآب) وانكچون عند مزده
يوم قيامته قربت ومكانت وحسن مرجع واردر * ابن عباس وكعب
ووهب ايدر وقتاكه اول ايكى ملك داود عليه السلامه داخل اولوب اول
نفسى اوزره قضا ايتدى اول ملكك خلق اولندقلرى صورتلرينه
تحول ايدوب عروج ايتديلر داود عليه السلام انككه كندى عتاب
اولنديغن بيلوب فى الحال سجديه واردى قرق كون سجده دن باشنى
قالدرمدى مكره قضاء حاجت ضروريه وصلوات مكتوبه اداسچون
قالديروب اندن ينه سجديه وارردى واول مدته اكل وشرب ايتيوب آغلدى
حتى باشنك حولنده اوتلر بىدى * وهب ايدر اول حالته الله تعالى قبلندن
برندا كلديكه ياد اود سنى مغفرت ايتدم ديديكه يارب بنى نيچه مغفرت ايدر سن
حالبوكه سن كسهيه ظلم ايتزسن * بيورلديكه ايمدى اوريانك قبرينه واروب
اندن خللاق ديله چون داود عليه السلام انجلين ايتدى ديديكه يا اوريا
بن سنى قتله عرض ايتككه قتل اولندك بكا انى حلال ايت اوريان جواب
كلديكه سن بنم جنته دخوله سبب اولدك بندن يكا اول سكا حلال
اولسون وحى الهى كلديكه ياد اود اول فعلاك انك زوجه سنى تزوج ايجون

(ايدوكنى)

ايدوكنى بيلدرمك لازمدر بيلورسنكه بن حكم عدلم مبهم استحللكه
انك خصوصتمندن قورتلزسن * چون داود عليه السلام ينه انك قبرينه
واروب انى بيلدردى قبردن اكا جواب كلدى * اويله اولسه قبر عننده
طوروب چوق آغلدى يارب اكر بوبنى عفو ايتزسه حالم نيچه اولور *
بيورلديكه يا داود يوم قيامته اوريايه بن شول كوزلر كورمذك وقولاقلر
ايشتمذك ثوابلر ويروب اشبو سكا عېدم داود دهكى حقدن تجاوز ايجوندر
ديو بيلدررين اولدخى صفاي خاطرله اكا راضى اولور حتى كه اول ثوابى
بولور (يا داود انا جعلناك خليفة فى الارض) ياد اود بز سنى ريوزنده
سندن اول پكن انبيايه حليفه ايتدك كه بزم امر مزله امور عبادى تدبير
ايدسنى (فاحكم بين الناس بالحق) ناس بيشنده عدله حكم ايلدك (ولا تتبع
الهموى فى ضلالت عن سبيل الله) يوخسه هواى نفسه اتباع ايتدك كه اول سنى
دين الھدن چيقاروب عدله حكم ايتدرمز (ان الذين يضلون عن سبيل الله
لهم عذاب شديد) شونلكه دين الھدن چيقارلر انلر ايجون عذاب شديد
واردر (بما نسوا يوم الحساب) شول سبيله كه يوم قيامتى اونودوب
عملى ترك ايتديلر (وما خلقنا السماء والارض وما بينهما باطلا) سماء وارض
وما بينهما يي بز باطل خلق ايتدك كه انده حكمت وغرض صحيح اوليه
ويا انى خلقدن عابئين ولاعبين اوله وز بلكه انى خلقدن حق ايجوندر كه
اول وحدانيتمزه دليلك مقتضاسيدر (ذلك ظن الذين كفروا) اشبو
ذكر اولنان اشيائك خلقى باطل اولق كفارك مظنونيدر (فويل للذين
كفروا من النار) ايمدى ويل كافرله كيم اشبو ظنلرى سبيله ناره مستحق
اولديلر زيراكه اول ظنلرى بعث وحسابى وثواب وعقابى انكاره
مؤدى اولدى (ام نجعل الذين آمنوا وعملوا الصالحات كالمفسدين
فى الارض) شول ايمان وصلاحه متصفلى ثوابده شول ريوزنده شرك
وكفرله فساد ايدنلر كيمى قيلورز (ام نجعل المتقين كالفجار) ومؤمنلك
بجوردن صاقتانلرينى بجزور ايدنلر كيمى قيلورز يعنى مستوين اولوب
ثواب وعقاب ايله جزاء اولتميلر ايمدى كفارك زعمى اوزره بعث وجزاء
باطل اولسه صالح وفاسدك ومتقى وفاجرلك حالى عند الله مساوى
اولوردى اولكه ايكيسنك بىنى تسويه ايدن سفيه اولور يوخسه حكيم

وعليم اولمزل الله تعالى ايسه اندن منزهدر (كتاب انزلناه اليك) قرآن
بركتابدرکه بز آنى سکا جبريل ايله انزال ايتدک (مبارک) که اول کنيرالخير
دائم البرکه در اکا که انى ايشيدوب تصديق ايدو و اوقوب موجبيله عمل
ايدو و انى حضور قلبه تفکر ايدو (ليدروا آياته وليتذکر اولوا الالباب)
تا که معانيسنى تدبر ايدوب تاويلات صحيحه دن اوامر و نواهي سنى فهم
و آداب و شرايعنى حفظ ايدو و عقول سليمه صاحبلى انکله متعظ
اوله لر * ديندیکه اولوا الالباب انلردرکه هر قشردن لبابى اخذ و ظاهر
حديثدن سري طلب ايدر لر (ووهنا لداود سليمان نعم العبد انه اواب)
بز داوده سليمانى ويردک اول سليمان نه کوچک عبد اولور که اول الله تعالى به
توبه ايله رجاعدو و ياخود هر وقتده ذکر و تسبیح رجاعدو (اذ عرض
عليه بالعشى الصافات الجياد) چانکه اول سليمان ظاهر دنصکرده خيلدن
صافات جياد عرض اولندى صافن خيلدن مراد اولدر که يد و يارجلنک
برطرفنى اوجنى دیکوب اوج قائمى سى اوزره طوره که اول خيلده صفات
محموده دندر عراب خلصک غيبرده اولمى نادر در و جياد که جواد
وياجودک جمعيدر اولدر که جرينده سريع اوله و يارکضده جواد اوله *
کلبى ايدر سليمان عليه السلام دمشق و يانصيبين اهلى اوزره غزا ايدوب
انلردن بيک فرسه نائل اولدى * مقاتل ايدر باباسى داود عليه السلام دن
بيک فرسه نائل اولدى * عکرمه حسندن روايت ايدر که اول دريادن
چيتمش قناتلو آتلى ايدى سليمان عليه السلام صلاة ظهري ادا ايتدکدن
صکره کرسى اوزره اوتوروب اول آتلى اکا عرض اولندى طقوز
يوزى عرض اولنجق صلاة عصره متنبه اولدى شمسه نظر ايدوب
کورسه که اول غروب ايدوبدر صلاتک و يا اول وقتده کى وردنک
فوتنه زياده مقم اولدى (فقال انى احببت حب الخير عن ذکر ربى حتى
توارت بالحجاب) و ديدیکه بن ريم جل شاننه نك ذکرندن خيل محبتنه اشتغال
ايدوب حتى که شمس غروب ايتدى (ردوها على فطفق مسحاً بالسوق
والاعناق) ايدى اول عرض اولنان آتلى کيرو رد ايدک ديو امر ايلدى
ردايديلچک سليمان عليه السلام سيفله اول آتلى ساقلىرى و عنقلىرى
ضرب و قطع ايتدى و ياخود اکل ايچون تصديق قصدى اوزره ذبح

(ايتدى)

ايتدى و ساقلىرى قطع ايتمى اول وقتده اول فمک اباحتى و دخی دنياه
استهانتي ايچون ايدى اگر چه زه حرام ايسه ده * روايت اولنديکه اول عرض
اولنان طقوز يوز آتک جيعن اول منوال اوزره قتل ايتدى و اکا عرض
اولنمان يوز آت قتل اولنمى قالدی دنياه کى آتلى جيعى اول يوز آتدن
متناسل اولوبدر * على رضى الله عنهدن مرويدر که ردوها على نك معناسى
سليمان عليه السلام الله تعالىنک امريله شمسه مؤکل اولان ملائکه يه ديدیکه
بکا شمسى کيروه دوندرک انلردن دخی انى دوندرديلر حتى که صلاة عصرى
وقتده ادا ايتدى زيرا که اکا اول آتلى عرض اولنمى عدويه جهاد ايچون
ايدى يوخسه حب دنيا ايچون دکل * حسن ايدر وقتاکه سليمان عليه
السلام اول خيولى قتل ايتدى الله تعالى اندن خير لوى و سرعتلوى يعنى
ريحى اکا بدل ايتدى (ولقد فتنا سليمان) بز سليمانى ملکنى سلبه اختبار ايتدک
(وألقينا على كرسية جسد) وانک کرسى اوزره بر جسد القا ايتدک که
انکله مراد شول بندر که اکل و شرب ايتز اوله (ثم انا ب) بعده اولينه
ملکنه رجوع ايتدى * وهب بن منبه ايدر سليمان عليه السلام جزائر
بجردن جزيره صيدونه غزا ايدوب ملکنى قتل ايتدکدنصکره جراده نام
قزىنى اخذ و تزوج ايتدیکه حسن و جالده مثلى کورلش دکليدى سائر
نساندن زياده اکا محبت ايتدى ابوککه باباسنه حزنندن کوزينک ياشى
دکزدى * سليمان عليه السلام دن ديلدیکه شياطينه باباسى صورنى انک
اولديغى دارده تصوير ايتديره شول رجائله کيم انکله تسليه بولوب حزننه
بر مقدار سکون ايره شياطين دخی بر مرتبه تصوير ايتدکلى صورتى اکا تشبيه
ايتديلر که کويا اول انک باباسنک عييدر ابوککه روحى يوقدر چون قزى
جراده اول صورتى کوردى باباسى کيدىکى ثياب مثلى اکا کيدردى سليمان
عليه السلام انک قنندن کيدىچک لالا و جواريسيله اول صورت قنه کلوب
باباسى زماننده کى عادتى اوزره اتباعيله اکا سجده قيلوردى بو حالدن
سليمان عليه السلام خبرى اولدى * حتى که قرق کون جراده اول فعلى
اوزره مستمره اولدى و سليمان عليه السلام وزيرى آصف بن برخيار جل
صديق اولوب سليمان عليه السلام بيوتندن ديلدیکنه انک حضورنده
و غيبتنده کيرردى اهالى بوتک احوالرينى بيلورو کورردى چون جراده نك

فعلى اكا خبر ويرد يلى سليمان عليه السلامه واروب ديديكه ديلرينكه اذنكه
مومدن اول بر مقامه طورم وناسه نيجه بيلدكارين بيلديرم سليمان عليه
السلام اكا اذن ويردى وناسى انك قتنه ديردى * اويله اولسه آصف
يكن انديانك بر نيجه لرين اولدقلى صفات حيده ايله وصف و ذكر ايلدى
حتى كه سليمان عليه السلام ذكرينه كليجك ديديكه يانبي الله صغرك حالنده
نه احلم ونه اورع ونه افضل ايدك وامر كده نه احكم ومكاره دن نه ابعده
ايدك ديوب اندن كلامنى قطع ايتدى سليمان عليه السلام آصفى دارينه
چاغروب ديديكه سبب ندر كه يكن اندياني هر حالرينى خيرله ذكر ايدوب
بنم ذكرينه كليجك صغرمده كى احواله ثنا ايتدك دى نصكره كبرمده كى احوالى
ذكر دن سكوت ايتدك ديديكه يانبي الله بن سكا نيجه ثنا ايدر ين حالبو كه
دار كده مرأه نك هوا سنده قرق كوندنبرو الله تعالىنك غيريه عبادت
اولنور * هماندم سليمان عليه السلام دارينه كيردى اول جراده نك
دوزدرديكى صورتى قيردى وجراده يه وانك اتباعنه زياده عتاب ايتدى
و كندى صحرايه كيدوب اول سببدن الله تعالى يه يلو واروب آغلدى ندامله
ذل وخضوع اظهار ايلدى چون كيجه ايريشيچك دارينه كلدى مكر انك
امينه دينور برام و لى وار ايدى لقان قضاء حاجته كيدر ويانساسندن
برينه اصابت ايدر اولسه خاتمن انك عندنده وضع ايدوب تطهير
ايتديكند نصكره انى اندن آلوردى بوخسه اول خاتمنى طاهر اولدن
مس ايتزدى زيرا انك ملكى اول خاتمه ايدى بروقتده اول قضاء حاجته
كيدوب عادتى اوزره خاتمنى امينه يه ويردى اول حينه صاحبا البحر
صخر نام شيطان اكا سليمان صورتده كلوب خاتمنى امينه دن آلدى وسليمانك
سريرى اوزره پكوب اوتوردى سليمان عليه السلامك تحت ملو كتنده
اولان مخلوقات جمله اكا انقياد ايتديلر * بعده سليمان عليه السلام
قضاء حاجتن چيقوب خاتمنى امينه دن استيچك امينه اكا سن كيمس ديدى
اول ديديكه سليمان بن داودم امينه ديديكه كذب ايدر سن سليمان كلوب
بندن خاتمن آلدى وكيدوب سرير ملكنه جلوس ايتدى حتى كه خلق
انك قتنه جمع اولدى * سليمان عليه السلامك نساسندن غيرى هر شيئده
اول صخر حكمن تفيد ايتدى اويله اولسه سليمان عليه السلام كندويه شوم
خطيئه ايرديكنى بيلدى دريا كنارينه كيدوب بالتعجيله خدمتكار اولدى

(انلرك)

انلرك صيد ايتديكى بالقرين بازاره ايلتوردى انلرخى اكا هر كون ايكيشر
بالق ويرلردى برينى صاتوب اتمك الور برينى ايسه پشوروب یردى
بو مصيبت اكا دارنده صورته عبادت اولنديغى مدتجه قرق كون مستر
اولدى اول مدت تمام اوليحق صخر مجلسندن اوچوب كندى ودرياه
اوغرايوب انك خاتمن درياه براقدى اول حينه باذن الله انى بر بالق
يوتدى چون بالتعجيلر سليمان عليه السلامه اول كيجه عادتلى اوزره
ايكى بالق اجرت ويرديلر برينى اتمك آلق ايچون صاتوب و آخرينى
آتشده پشورمك ايچون قارنى ياردقده خاتمنى اليه كيردى فى الحال
طاقنوب الله تعالى يه شكر سجده يه واردى ملكى كا كان عودت ايتدى
وشياطينه امر ايلدى حتى كه صخرى بولوب قتنه كتورديلر بر بولوك
طاشى اويدروب صخرى ايچنه قودى و بر آخر طاشله انى قيايوب
جديد و رصاص ايله احكام ايتدك نصكره درياه آتدردى *
ايمدى اول صخرانك ايچنده حى اولوب محبوسدر * پيغمبريم
صلى الله عليه وسلم مروي حديث مرفوعده ايدر سليمان
عليه السلام ديديكه والله اشبو كيجه تمش نسامى طواف ايدمكه
هر برندن بر ولد فارس كله كيم فى سبيل الله جهاد ايدلر
لكن ان شاء الله ديمدى اويله اولسه انلوك جيغنه طوافندن انجق
برى حامل اولوب اندن برشق رجل وجوده كلدى والله اكر اول ان شاء الله
ديمش اولسه انلرك هر برندن بر فارس وجوده كلوب فى سبيل الله جهاد
ايدلردى * ايمدى سليمان عليه السلامك مفتون اولمى ان شاء الله
قولنى تركى ايدى وكرسى اوزره القاء اولنان اول شق رجل ايدى * روايت
اولنديكه سليمان عليه السلامك برولدى اولوب شياطيندن اكا ضرر
خوفيله انى صحاب اوزره قويوب انى انده بسلتدى الله تعالى اكا اول
سببدن عتاب ايدوب اول ولدى ميت اولديغى حالده انك كرسيسى اوزره القاء
ايتدى * ديلديكه سليمان عليه السلامك بر ابني اولوب قتنده ايكن
عزرايل عليه السلام سليمان عليه السلامى زيارته كلدى ابن اندن قورقوب
لوفى متغير اولدى سليمان عليه السلام ريحه امر ايلدى حتى كه اول
ابنى ريح كتوردى مكر كه انك اجلى كلشدى ريحك اوزرنده ايكن قبض
اولنوب سليمان عليه السلامك كرسيسى اوزره ميت القاء اولدى * اويله

اولسه سليمان عليه السلام اول ابني شانده الله تعالى به عدم توکلی
خطاسنه متنبه اولوب ندامت و طاعتله اکا رجوع ایتدی (قال رب
اغفر لی و هب لی ملکاً لا ینبغی لاحد من بعدی) سليمان عليه السلام
دیدیکه یارب مغفرت و بکا بر ملک باغشلغل که اول بند نصرکه هیچ کسه به
اولیه تاکه اول بکا معجزه و نبوته آیت اوله زیرا که کثرت دنیا عبدي
الله تعالی بدن اشغال ایدر زیرا که سیاست ملک قیامی حقوق الله
قیامی ایله اجتماعی مقدور بشر دکلدر (انک انت الوهاب) سن بروهاب
کریم الشانسنکه ملکی سؤال ایدنه ده ایمانه ده و یررسن * اولیه اولسه
انک بودعوتنه اجابته ریح و شیاطین تسخیری ملکنه ضم و زیاده قلندی
(فسخرنا له الریح تجری بامرہ رخاء حیث اصاب) بز اکا ریخی تذلیل
ایتدک که لینه طیبه اولدیغی حالده انک دیدیکی مکانه جاری اولور
(والشیاطین کل بناء و غواص) و دخی اکا شیاطینی تذلیل ایتدک که
انلردن بر طائفه بناء اولوب انکچون اینه عجبیه بناء ایدرلردی و بر طائفه
ایسه غواص اولوب بحر دن لالی چیقارلردی (وآخرین مقرنین
فی الاصفاد) و آخرین ایسه مرده اولدیغندن زنجیرلرده بری برلرینه
تقرین اولمشلردر که انکله ناسدن شر و فسادلری کف اولنه (هذا
عطاؤنا فامنن اوأمسک بغير حساب) یاسلیمان اشبو سکا و یردیگمز ملک
و بسطه و تسلط بزم عطا مژدر اندن دیدیکی که و یر و دیدیکی کدن منع
ایت بزم عطا مژ کثیردر هیچ احدآئی احصا و حساب قادر دکلدر (وانله
عندنا لزلانی و حسن ماآب) و اکا اشبو دنیا ده و یریلن ملک عظیمه بيله
آخترده دخی قربت و حسن مرجع یعنی جنت واردر (واذکر عبدنا
ایوب) یا محمد عبدمن ایوبی ذکر ایت که اول انواع محن و بلا یاه صبر ایلدی
تکیم سليمان عليه السلام و فور نعم و آلايه شکر ایلدی تاکه صابرون
و شاکرون انلری اسوه ایدیلر (اذنادی ربه انی مسنی الشیطان بنصب
و عذاب) که اول رب تعالی به دعا ایدوب دیدیکه شیطان بکا عنا و بلا
و هلاک مال و اولاده اصابت ایتدی ایوب علیه السلام قولنده ادبه
رعایت ایدوب مسی شیطان به نسبت ایتدی حالبو که هر شیء الله تعالی
عندندن ایدیکن بلوردی زیرا که اول اکا سبب اولوبدر که ایوبک کثرت
اموال و اولادیه کمال عبادته حسد ایدوب یارب بنی انک اوزره تسلط ایت

(دیشیدی)

دیشدی تکیم انک قصه سی سورة اقترده بکمشدر ایوب علیه السلام
کندیدن بلاسی کشیفچون دعا سنه اجابته دینلدیکه (ارکض برجلک)
ایاغکله بری اورغل اور یحیق اول موضعدن صو قینادی و اکا دینلدیکه
(هذا مغتسل بارد و شراب) اشبو صو سنگچوندرکه اندن اغتسال
و شرب ایده سن * دینلدیکه اول ایاغن یره اور مسیله ایکی پیکار چیقدی
بری حار و بری بارد ایدی اول حار دن اغتسال ایدوب بدندن انکله آلام
ظاهره سی زائل اولدی و اول بارد دن ایچوب انکله آلام باطنه سی
زائل اولدی (ووهبنا له اهله و مثلهم معهم) بز ایوبه هبه ایتدک اهل
و اولادنی تفرقلرند نصرکه انلری اکا جمعوله و یا موتلرند نصرکه احیامزله
وانلرله بيله انلر مثلنی دخی هبه ایتدک حتی که عددده اولکیدن اولدقلرینک
ضعفی دکلر اولدیلر (رحمة منا و ذکرى لاولی الالباب) تاکه اول بز دن
اکا رحمت و عقول کامله صاحب لرینه تذکیر و موعظه اوله کیم انلره یریشن
مصائبده صبر و الله تعالی به التجا ایله فرحه انتظار ایدلر (وخذ بيدک
ضعفنا فاضرب به و لا تمسک) و دخی ایوبه دینلدیکه الیکه حشیش و غیر
نباتدن بر حزمه صغیره آلوب انکله مرأه کی ضرب ایتکه یمینکده حانت
اولیه سن * روایت اولندیکه انک زوجه سنه لیا بنت یعقوب و یا خود
رحه بنت افرائیم بن یوسف دینوزدی ایوب علیه السلام انی بر حاجته
کوندروب بطؤ ایدیچک یمین ایتشیدیکه اگر بلا سندن عافیت بولور سه
اکا یوز ضربه اوره اولیه اولسه الله تعالی اکا اول یمیندن تحله به اول
اهون شئی سبیل ایتدی مرأه نک حسن خدمتی و ایوبک اندن حسن رضای
اولدیچچون یوز عددنی مشتمل حشیشله بر کره اور مغله ایکیسنه بيله امری
تیسیر ایتدی (انا وجدناه صابرا) بز ایوبی نفسنه و اهلنه و مالنه یریشن
بلا یاه صبر ایدر بولدق انک شیطاندن الله تعالی به شکایتی صبرینه خلل
و یرمز زیرا که اکا جزع دینلر بلکه اول تمنی عافیت و طلب شفا در مع هذا
انی دیمسی دینده کندویه و یا قومنه قنه یرشکم خوفله ایدی (نعم العبد
انه اواب) ایوب نه کوچکک عبد اولور که اول کلیمته الله تعالی به اقبال
ایتشدی (واذکر عبادنا ابراهیم و اسحاق و یعقوب اولی الایدی و الابصار)
یا محمد عبادمن ابراهیم و اسحاق و یعقوبک دخی بلا یاه صبر لرینی ذکر ایتکه
انلر طاعتده قوت و دینده بصیرت صاحب لریدر و یا خود اعمال جلیله و علوم

(٤) بع

شریفه صاحبزید اعمالدن ایدی ایله و معارفدن ابصار ایله تعبیر اولندی
 زیرا که اعماله مباشرت اکثریا ایدی ایله در و معارفک اقوی مبادیسی
 ابصارله در * اشبوونده بطنه و جهاله تعریض وارد که انلر زمنی و عیان
 کبیر (انا اخلصناهم بخالصة ذکری الدار) بز انلری خالصین قیلدق
 برخصلتله کیم اول شو بدن خالصه در که انلرک دائمآ آخرتی تذکیرلر یدر کیم
 طاعتده خلوصلری اول سببله در (وانهم عندنا لمن المصطفین الاخیار)
 و انلر بزم عندمزمده خیرده امثاللری اوزره اختیار اولمشلردر (واذکر اسمعیل
 والیسع وذا الکفل) یا محمد قومکه ذکر ایت اسمعیل بن ابراهیم علیهما
 السلامیکه صادق الوعد ایدی والیسع بن اخطوبی که الیاس علیه السلام
 انی بنو اسرائیل اوزره خلیفه ایدوب بعده اکا نبوت ویرلدی وذا الکفلی که
 اول الیسع علیه السلامک ابن عمیدر ویا خود بشر بن ایوبدر و انک نبوت
 و لقبده اختلاف اولندی * دینلدیکه بنو اسرائیلدن یوز نبی قتلدن اکا
 فرار ایدوب انلری کفل و حایینه آلدی ویا خود اول بر رجل صالحک
 عملنه کفیل اولدیکه اول هرکونده یوز رکعت نماز قیلوردی (وکل
 من الاخیار) انلرک هربری اختیاردن ایدیلر (هذا ذکر) اشبو احوال
 انبیادن ذکر اولنسان انلره شرفدر ویا خود قرآندن برنوعدر بعده انلر
 و امثالریچون اعداد اولنسان کرامات اخروییه ذکرینه شروع اولنوب
 بیورلدیکه (وان للمتقین حسن مآب) متقیلر ایچون حسن مرجع
 وارد (جنات عدن) که اول خلد و اقامت جنتلریدر (مفتحة لهم
 الابواب) انلر ایچون اول جنتلره قبولر آچیلور که اکا کیره لر (متکئین
 فیها) انده اریکه لره اتکاء ایدر اولدقملری حالده (یدعون فیها
 بفسا کهة کثیرة وشراب) انده انلر فاکهه وشرابک انواعندن طلب
 ایدرلر (وعندهم قاصرات الطرف اتراب) و انلرک عندنده زوجهلرندن
 غیری حورالر وارد که نظرلرین ازواجلری اوزره قصر ایتشلردر هربری
 اوتوز اوچر یاشنده سنده مساویلردر بری برلرینه مؤاخات اوزره اولوب
 ارالنده تباعض و تغایر ایتزلر و اول متقیلره دینور که (هذا ماتوعدون
 لیوم الحساب) اشبو کرامات مذکوره یوم حساب اچلیچون دنیاده سزه
 وعد اولنساندر (ان هذا لرزقنا ماله من نفاد) اشبو بزم رزقذر که
 انی متقیلر ایچون اعداد ایتشزدر اکا فناء و انقطاع یوقدر (هذا) حال

(اشبو)

اشبو منوال اوزره در (وان للطاغین لشر مآب) کافرلر ایچون آخرتده
 شر مرجع وارد (جهنم یصلونها) که اول جهنمدر که انلر اکا کیرلر
 (فیئس المهاد) اول نه چرکین موضع قرار اولور (هذا فلیذوقوه
 حیم و غساق) اشبو عذاب انلر ایچوندر انی ذوق ایتسونلر که اول ماء
 حاردر که حری نهایته ایدر و اهل ناردن سیلان ایدن صدیددر *
 ابن عباس رضی الله عنهما ایدر غساق شول زمهریردر که بر دیله انلری
 احراق ایدر نار حر یله احراق ایتدیکی کبی (وآخر من شکله ازواج)
 و انلر ایچون عذاب اول مثلندن عذاب آخر وارد یعنی انلر عذاب الیمدن
 انواع مختلفه ایله تعذیب اولنورلر (هذا فوج مقتحم معکم) خزنة نار
 کفارک رؤسائنه ناره داخل اولدقنلرند و اتباعنه اشارت ایدوب دیه لر که
 اشبونلر سزکه بیلر ناره داخل جاعتدر که کفرده دنیاده سزه مقارنلر
 ایدیلر ایمدی عذایده دخی اشبوونده مقارنلر سز او یله اولسه رؤساء
 اتباعلرینه بد دعا ایدوب دیه لر که (لامر حبایهم انهم صالوا النار) انلره
 عیشلرند و حب وسعه اولسونکه ناره استحقاقله داخلدر (قالوا بل انتم
 لامر حبایکم) اتباع رؤسایه دیه لر که بلکه سز اول بد دعایه بزدن
 احق سز (انتم قدمتموه لنا) اول دین کفره بزدن اول دخول ایتشدیکز
 ویا کفری بزه تسنین ایتدی کزدی ویا عمل سوئله عذابه بزی تقدم ایدوب
 بز سزه متابعت ایتدک (فیئس القرار) نار نه چرکین قرارگاه اولور
 (قالوا ربنا من قدم لنا هذا فزده عذابا ضعفا فی النار) یعنی طاغین
 دار جحیمه دخول ایتدکرنده اتباع رؤساء حقنده بد دعا ایدوب دیسه لر
 کر کدر که یاربنا بزی اغوا ایتدکله بزم ایچون عذابی یا خود جهنمه دخولی
 تقدیم ایلینلره یعنی بزم معذب اولقلمیزه یا خود جهنمه دخولزه سبب اولنلره
 عذابی مضاعف ایله نار جهنم ایچره (وقالوا مالنا لانری رجالا کنا نعدهم
 من الاشرار) او یله اولسه اتباع دیه لر که بزه تولدیکه ناردن کورمرز
 شول رجالیکم بز انلری دنیاده شراردن عد ایدردک که انکله مرادلری
 فقراء مسلمین اوله (أتخذناهم سخریا ام زاعغناهم الابصار) که بز انلری
 سخره ایدینوردک یوخسه کوزلریمز انلردن میل ایتشمیدر اول اچلدن
 انلری کورمرز * ویا خود انلر ناردن میدر لکن بزم کوزمزدن احتجاب

ایتملردر (ان ذلک لخلق تخاصم اهل النار) اشبو ذکر اولنان مکلمات
یوم قیامتده وقوعی واجبدر که اهل نازک تخاصمیدر (قل انما انا منذر)
یا محمد مکہ مشرکاربیه دیکل که بن سزه الله تعالیدن رسولن انک عذابله
سنزی تخویف ایدرین ایدمی آئی توحید ایدک که عذابندن قورتلہ سز
(وامن الله الا الله الواحد القهار) الله تعالیدن غیرى اله یوقدر که
اول وحدانیت وذاتنده شرکت وکثرتی قبول ایتمزدر الوهیتله هرشیئہ
قاهر در (رب السموات والارض وما بینهما) سموات وارض وما بینهما انک
ربدر جیعین اول خلق ایدو بدر امرلری عاقبت ینہ اکا عائد اولور
(العزیز الغفار) که اول کافرله نعمتله غالبدر دیلدیکی کسه نک دیلدیکی
کناهلرین مغفرت ایدر (قل هو نبأ عظیم انتم عنه معرضون) یا محمد
دیکل که قرآن بر خبر عظیمدر رب تعالیدن نازل اولوبدر سنزی انکله
انذار ایدرین سز ايسه بنم صدقه انکله استدلالی ترک ایدرسز حالبوکه
عاقل انک مثلنی ترک ایتمز مکر اولکه شدید الغفله اوله (ماکان لی من علم
باللأعلى اذ یختصمون) ملأ اعلايه بنم علم یوقدر شول وقتکه
انلر اختصاص ایدرلر زیرا که ملائکته نک تقاول وماجرالردن کتب
متقدمده وارد اولدیغی اوزره سما عنسز وکتاب مطالعه سز اخبار
تصور اولمز الاوحیله اولور (ان یوحى الى الانما انا نذیر مبین) بکا وحی
اولمندی الا انکچونکه بن خلقی مخالفاتدن انذار ایدوب اوامر ونواهی بی
انلره اظهار ایدم (اذ قال ربک للملائکة انی خالق بشرا من طین)
شول وقتده کی اختصاصمکه ربک جل شانہ ملائکته دیدیکه بن طیندن
بشر خلق ایدرین که انکله مراد آدم علیه السلامدر (فاذا سوتیه ونفخت
فیه من روحی فقعوا له ساجدين) چنانکه بن انک خلقی تمام ایدوب روح
نفخيله انی احیا ایدم ملائکته تکرمة وتبجیل وجهی اوزره اکا سجدهیه
واردیلر (فسجد الملائکة کلهم اجمعون) اکا سجودله امر اولنان
ملائکته نک جیعیی اکا سجود ایتدیلر (الا ابلیس استکبر وکان من
الکافرين) لکن ابلیس سجوددن تعظم ایدوب امر الهییه استنکار
ومطاوعدن استکبار ایتسبیلہ کافرلردن اولدی ویاخود اول علم الالهده
کافرلردن ایدی (قال یا ابلیس ما منعک ان تسجد لما خلقت بیدي) الله

(تعالی)

تعالی اکا دیدیکه یا ابلیس سنی نه منع ایدمی واسطه سز خلق ایتدیکم
شیئہ سجود ایده سن (استکبرت ام کنت من العالمین) یوخسه
استحقاق سز تکبرمی ایتدک ویاخود عالیردن اولوب تفوقه مستحق اولدک
ویا الآن استکبار ایدوب من بعد مستکبریندن اولمقدن زائل اولمز میسن
(قال اناخیر منه خلقتنی من نار وخلقته من طین) ابلیس دیدیکه بن اندن
خیرلویمکه بنی ناردن وانی طیندن خلق ایتدک اولیه اولسه کندمدن دون
شیئہ نیچه سجده ایدرین زیرانار طینه غلبه واکل ایدر * ابلیس قولنک فساد
وبطلانی ايسه سورة اعرافده یکدی (قال فاخرج منها فانک رجیم)
الله تعالی اکا دیدیکه جنت ویاسمادن ویاصورت ملکیتدن چیغفل که
سن رحمتدن ومحل کرامتدن طرد اولنوبسن (وان علیک لعنتی
الی یوم الدین) ویوم جزایه دکن لعنتم اوزریکه در (قال رب فانظرنی
الی یوم یبعثون) ابلیس دیدیکه ایدمی یارب یوم بعثه دکن بکا امهال ایت
(قال فانک من المنظرین الی یوم الوقت المعلوم) الله تعالی دیدیکه ایدمی
سن شول وقتہ دکن امهال اولنانلردنسن اول عندالله معلومدر انی تقدم
ویا تأخر ایتمز * دینلدیکه اول وقتله مراد اولدرکه انده نفخه اولی
واقع اولور ویومله مراد اولدرکه وقت نفخه انک اجزائندن برجزءدر
(قال فبعزتک لاغویهم اجمعین الا عبداک منهم المخلصین) ابلیس دیدیکه
یارب سلطان قهرک حقیچون انلرک جیعینه اغوامی ایرکورهین الا انلردن
شول عبادیکی دکل که طاعتکچون انلری اخلاص و ضلالتدن عصمت
ایدوبسن (قال فالحق والحق اقول) الله تعالی دیدیکه بن حق احقاق
ایدوب حق دیرین که (لأملأن جهنم منک ومن تبعک منهم اجمعین)
یا ابلیس سننک جنسکدن وناسدن سکا تابع اولاندن متبوعین وتابعین
جیعکزله جهنمی طولدررین (قل ما سألتکم علیه من اجر) یا محمد انلره دیکل که
قرآن ویا تبلیغ وحی اوزره سزدن اجر استمزی (وما انا من المتکلفین)
تلقاء نفسمدن بر شیء تقول ایدنلردن دکلن (ان هو الا ذکر للعالمین)
اول قرآن دکل الاجن وانسه موعظه در (ولتعلن نبأ بعد حین)
اول قرآنک وعد ووعیدین ویا انک صدقن موتدنصکرده ویا یوم قیامتده
ویا اسلام ظهورنده یلورسز

سورة الزمر وهى سبعون آية مكية

بسم الله الرحمن الرحيم

(تنزيل الكتاب من الله العزيز الحكيم) جبرائيل عليه السلام قرأنى تنزيل
الله تعالى عندئذ ندر كه اول انى تصديق ايمانه منتقم امرنده حكيمدر (انا انزلنا
اليك الكتاب بالحق) يا محمد بزسكا قرأنى انزال ايتدك اول حق ملتبس اولديغى
حالده (فاعبد الله مخلصا له الدين) ايمدى الله تعالى به عبادت ايتكل انكچون
دينى شرك وريادن تمحيض ايدر اولديغك حالده (الا الله الدين الخالص)
آكاه اولكه الله تعالى ايجون اولان شول ديندر كه هوا وشكندن وشائبة
كدردن خالص اوله زيرا كه اول صفات الوهيدة واسرار وضمائره اطلاعه
متفرددر (والذين اتخذوا من دونه اولياء ما نعبدهم الا ليقربونا الى الله
زلفى) شونلر كه ملائكه واصنامى ويا عيسى وعزيرى عبادت ايجون آلهه
اتخاذ ايتديلر ديديلر كه بزم انلره عبادت ايتمز دكل الا انكچوندر كه الله تعالى به
شفاعتلرله بزى تقريب ايدلر (ان الله يحكم بينهم فيما هم فيه مختلفون)
الله تعالى يوم قيامته كفره ايله معبودلرى بىنى دىن امرندن كافرين بىنى
دىن امرندن اختلاف ايتدكازى شئده حكم ايدر محق جنته مبطلى ناره ادخاله
(ان الله لا يهدي من هو كاذب كفار) اول كفره ومعبودلرله دينور كه
شول وقتكه انلر اول معبودلرندن شفاعت رجا ايدوب انلر ايسه اول
كفره به لعنت ايدلر الله تعالى حقه اهتدائى توفيق ايتز اول كسه به كه
آلهلرين الله تعالى به تقريب ايدر ديو كذب ايدر والله تعالىنك غيريه
عبادته كفر ايدر (لو اراد الله ان يتخذ ولدا لاصطفى مما يخلق ما يشاء)
اكر الله تعالى كفره نك زعم ايتديكى اوزره ولد اتخاذه ايله ايتسه
مخلو قاتندن ديلديكى شئى اختيار ايديدى (سبحانه هو الله الواحد
القهار) الله تعالى ايسه اندن منزهدر واحددر شريكى يوقدر جميع
خالقنه كبريا وعظمتله قهر ايديجيدر (خلق السموات والارض بالحق)
سموات وارضى امر حق ايجون خلق ايتدى يوخسه باطل ايجون دكل
(يكور الليل على النهار ويكور النهار على الليل) بيلدن اكسلدوب نهاره
آرتورر ونهاردن اكسلدوب ليله آرتورر (وسخر الشمس والقمر كل بحرى
لاجل مسمى) ومصالح عباد ايجون شمس وقرى تسخير ايتدى
هر برى انتهاى دورينه ويا خود انقطاع حركته دكين جارى اولور

(الاهو)

(الاهو العزيز الغفار) آكاه اولك كه اول هر ممكنه قادر وهر شئيه غالبدر
ودخى خلقنه غفاردر عقوبته عجله ايتز (خلقكم من نفس واحدة ثم
جعل منها زوجها) اول سزى نفس واحده دن يعنى آدمدن خلق ايتدى
بعده اول نفس واحده دن زوجى يعنى حوايى انك ضلعندن خلق ايتدى
اشبونده انك وحدانيت وقدرته اوج آيت واردر كه اول آدم عليه السلام
اب وامسز خلق اولمسيدر بعده اول ايكيسندن خلق لايمصى انشعايدر
(وانزل لكم من الانعام ثمانية ازواج) وسز بكون ابل وبقر وغنم
ومعزذن ذكر واثنى سكر صنف احداث ايتدى (يخلقكم فى بطون
امهاتكم خلقا من بعد خلق فى ظلمات ثلاث) الله تعالى سزى امهاتكز
بطوننده ظلمت بطنده وظلمت رجده وظلمت مشيمده خلقدن خلق آخره
تحويل ايتدى شول وجهله كيم اول نطفه بعده علق بعده عظام بعده اول
عظامه لحم كيوردى بعده خلق سوى يعنى طفل ايتدى (ذلكم الله ربكم
له الملك لا اله الا هو) اشبو اشياي خلق ايدن ربكز الله جل شانه در كه
سموات وارض وما بينهما ملكى آنكددر عبادته مستحق اندن غيرى
معبود يوقدر (فانى تصرفون) انك عبادتندن غيرك عبادته نيچه
صرف اولور سز حالبو كه اول هر شئك خالق اولوب هر حالده اكا
احتياجكز وانك سزه عدم احتياجك بيلور سز (ان تكفروا فان الله غنى
عنكم) اكر سز اكا كافر اولور سه كز اول سزك ايمان وعبادت كزدن غنيدر
(ولا يرضى لعباده الكفر) وعبادينه رجندن كفرلرله راضى اولمز زيرا
اول انلرى عذاب وهلا كه ايقاع ايدر (وان تشكروا يرضه لكم) واكر
اكا ايمان وعبادت ايدرسه كز انكه سزذن راضى اولور زيرا كه اول سزك
فوز وفلاح كزه سبيدر يوخسه ايمان كزدن اكا منفعت عائد اولور دكلدر
(ولا تزر وازرة وزر اخرى) يوم قيامته هيچ بر كسه بر آخرك ذنبيله
مؤاخذه اولمز (ثم الى ربكم مرجعكم فينبئكم بما كنتم تعملون) اشبو
ديادن رحلتكز دنصكره آخرته مصير كز ربكز جل شانه به در اول انده
سزه خير وشردن دنياده ايشلد يككزى خبر ويرر ومستحق اولديغكز جزاى
اير كورر (انه عليم بذات الصدور) اول صدور كزده خفى اولان شئى
بيلور اعمال كزدن هيچ خافيه اكا خفى اولمز (واذا مس الانسان ضرر
دعا ربه منيبا اليه) چنان كافر جسده ويا ولد ويا مالندن بر شدت ايرسه

اصنامندن اعراض ايدوب انك دفعنده الله تعالى به مقبل اولديغي حالده
 اكا دعا ايدر (ثم اذا خوله نعمة منه نسي ما كان يدعوا اليه من قبل)
 بعده اول شدندن بدل اكا عافيت وپرسه وز اندن اوكدن اول شدتك
 دفعيچون اكا دعا ايتديكن اونودر (وجعل الله اندادا ليضل عن سبيله)
 وانكچون امثال وشركاء قيلور تاكه غيري دين اسلامدن صدايده
 (قل تمتع بكفرك قليلا انك من اصحاب النار) يا محمد كافره ديكل كه آرزمان
 كفر كه دنيا ده معيشت ايتكه سن اهل ناردنس (ام من هو قانت)
 كافر مي خير ليدر يوخسه وظائف طاعاته قائمي وياخود الله تعالى به
 مطيع اولان اكا مطيع اوليان كيميدر (آنا الليل ساجدا وقائما) كچه نك
 ساعاتده صلاتده ساجد وقائم اولديغي حالده (يحذر الآخرة ويرجو رحمة
 ربه) كه اول آخرت عذابندن قورقوب ورب تعالينك رحمت ومغفرتك
 رجا ايلر * ديتديكه اشبو آيت ابوبكر ويا عمر ويا عثمان ويا سلمان ويا هر مؤمن
 قانت شاتده نازل اولوبدر (قل يستوي الذي يعلمون والذين لا يعلمون)
 ديكل كه عالمونه جاهلون برابر اولديغي كي قانتونه عاصون دخي
 برابر اولمز (انما يتذكر اولوا الالباب) اشبو بيانات امثاليه متعظ
 ومعتبر اولمز الا انلر كه بنم صنع وقدرتمده فهوم واذهان صاحب ليدر
 (قل يا عباد الذين آمنوا اتقوا ربكم) يا محمد مؤمن اولان عبادمه
 ديكل كه جميع اموريك زده الله تعالى به مخالفاتدن صاقنوب
 توحيدى اوزره ثابت اولك (للذين احسنوا في هذه الدنيا حسنة)
 دار دنيا ده طاعاته احسان ايدنلره آخرتمده مثوبة حسنه واردر وياخود
 احسان ايدنلره دنيا ده حسنه واردر كه اول صحت وعافيتدر (وارض
 الله واسعة) الله تعالينك ارضى واسعه در اول كسه به كه وطننده
 اكا توفير احسان متعبر اوله اول اكا متيسر اولان مكانه هجرت ايتسون
 (انما يوفي الصابرون اجرهم بغير حساب) احتمال بلاء ومهاجرت
 اوطانله مشاق طاعته صبر ايدنلره اجرلى حسابسز توفيه اولنور يعنى
 حاسبلرك حسابى اكا اهتدا ايتز حديثه كلدبكه يوم قيامتمده صلاة
 وصدقه وحج اهاليسچون ميزانلر قوريلوب اجرلى توفيه اولنور اما كه
 اهل بلاء اچون ميزان قورلمز بلكه انلر اوزره اجر حسابسز صب اولنور
 حتى كه دنيا ده عافيتده اولنلر تمنى ايدهلر كه نوليدى اجسادلر يمز مقاريضله

(دنيا ده)

دنياه قطع اولنش اوليدى شول سبيدنيكه اهل بلانك نائل اولديغي
 فضائل وكراماتى كوره لردى (قل انى امرت ان اعبد الله مخلصا
 له الدين) ديكل كه بن امر اولندمكه الله تعالى به عبادت ايدم عبادتم
 يالكز انكچون ايدر اولديغم حالده (وامرت لان اكون اول المسلمين)
 وامر اولندمكه مسلمينك اولى اولم (قل انى اخاف ان عصيت ربى عذاب
 يوم عظيم) ديكل كه اكر بن شرك وياريا ايله ربمه عصيان ايدرسم قورقورنيكه
 بكا يوم قيامتمده عذابى ايريشه (قل الله اعبد مخلصا له دينى) ديكل كه
 بن الله تعالى به عبادت ايدرين توحيدى شرك وريادن خالص ايدر اولديغم
 حالده ايدى اخلاصده بكا اقتدا ايدك اكر بكا اقتدا ايتزسه كز
 (فاعبدوا ماشئتم من دونه) الله تعاليدن غيرى ديتديك كزه عبادت ايدك
 (قل ان الخاسرين الذين خسروا انفسهم واهليهم يوم القيامة)
 ديكل كه خسروانده كاملين انلر در كه فوات جنت ودخول نارله يوم قيامتمده
 نفسلرينه زيان ايدرلر واهلارينه دخي زيان ايدرلر شول سبيدنيكه ايمانه كمش
 اولسه لر حنده واصل اوله جقلرى حور وولداندن محروم اولورلر
 (الا ذلك هو الخسران المبين) آكه اولك كه اشبو خسروان غايت
 فضاحتده خسروان ظاهر در (لهم من فوقهم ظلل من النار ومن
 تحتهم ظلل) انلرك فوقنده نار ودخاندن اطباق وسرادقات وتحتلرندن
 كذلك ناردن فراش ومهاد واردر (ذلك يخوف الله به عباده)
 اشبو ذكر اولنان شول عذابدر كه الله تعالى انككه عبادنى تخويف
 ايدر كه اكا ايقيع ايدر شيئدن اجتناب ايدلر (يا عباد فاتقون) يابنم
 مؤمن قوللرم بندن قورقوب سخطم ايجاب ايدر شيئه تعرض ايتكز
 (والذين اجتنبوا الطاغوت ان يعبدوها) شونلر كه اوئانه عبادندن
 امتناع ايدوب اندن بعيد اولديلر (وانا بوا الى الله) والله تعالينك
 عبادتمه رجوع ايتديلر (لهم البشرى) انلر اچون موته احتضار لرنده
 وبعث اولندقلرنده ملائكه لسانيله جنته دخوله بشارت واردر
 (فبشر عباد الذين يستمعون القول فيتبعون احسنه) يا محمد تبشير
 ايت شول عبادمه كيم قرآندن عزائم ورخص ايتسهلر امر
 اولندقلرينك احسنيله عمل ايدرلر انلر دينده نقاد اولوب حسنه احسن
 يدينى تميز ايدرلر چقان انلره واجب ومنسوب اعتراض ايتسه واجبي اختيار

ایدرلر قصاص و عفو اعتراض ایتمسه عفو اختیار ایدرلر و بالجملة ایکی شیء مأمورک قنغیسی آخردن افضل ایسه اول افضلی ایشار ایدرلر (اولئک الذین هداهم الله) ایمدی انلر شول قومدرکه الله تعالی انلری عزائم اخذنه توفیق ایتمدی (واولئک هم اولوا الالباب) انلر عقول کامله صاحبیرلر که وهم وعاده منازعه سندن سلیمدرلر (أفمن حق علیه کلمة العذاب أفانت تنقذ من فی النار) کفار دن اول کسه که اوزرینه شقاوت و کلمه عذاب واجب اوله سن انک مالک امر میسن یو خسه ناره مستحققری اندن انقاذا ایدرمیسن حالبوکه سن اکا قادر دکلسن (لکن الذین اتقوا ربهم لهم غرف من فوقها غرف مبنیة تجری من تحتها الانهار) لکن شونلر که رب تعالی بی توحید ایدوب امرینه اطاعت ایدرلر انلر ایچون جنتده بری برلرینک اوزرینه بنا اولتمش غرفلر واردر که انک فوقانیه و تحتانییه سی تختندن علو و سفلینده تقاوتنسز نهرلر جاری اولور (وعد الله لا یخلف الله المیعاد) الله تعالی قرآنده انی وعد اکیدله وعد ایتمدی اول ایسه وعدینه خلف ایتمز * ابوسعید الخدری رضی الله عنه پیغمبریمز صلی الله علیه وسلمدن روایت ایدر دیدیکه اهل جنت بری برلرینه غرفات اهلنی کوسترلر تکیم دنیا ده سن مشرق و یا مغرب افقنده غابر کواکب دری بری برلر یکه کوستریشور سنزینلرنده تفاضل اولدیغیچون دیدیلر که یار رسول الله اول منازل انبیا در اکا انلردن غیری کیملر نائل اولور دیدیکه والله اعتمدن اول کسنلر که الله تعالی به ایمان کتوروب مرسلینی تصدیق ایتمیلر (ألم تر ان الله انزل من السماء ماء فسلکه ینابع فی الارض) یا محمد بیلدیکه الله تعالی سحابدن یغموری ایندروب یرده کی عیون و مجاری به ادخال ایدر ایمدی یرده کی صولرک جبعی سماندن اینوبدر (ثم ینخرج به زرقا مختلفا الوانه) بعده انکه یردن اکینلر چیقار در که انک اصنافی مختلفدر یعنی بر و شعیر و غیریدر و یاخود کیفیاتیکه اخضر و احمر و غیریدر (ثم یهیج فتراه مصفرا) بعده جفافی تمام اولوب یسندن انی صرارمش اوله کوررسن (ثم یجعله حطاما) بعده انی فثات منکسر قیلور (ان فی ذلک لذکری لا ولی الا لالباب) اشبو مذکور ده عقول کامله صاحبیرینه تذکیر واردر که انی تدبیر و تسویه به و حالدن حاله تحویله قادر برصانع حکیمدن لابدر و اول حیاتک مثیلدر که اکا اغترار

(ایدلز)

ایدلز (أفمن شرح الله صدره للإسلام فهو علی نور من ربه) اول کسه که الله تعالی انک قلبی توحید قبولنه توسیع ایده اول رب تعالیدن معرفت و حقه اهتدا اوزره در * پیغمبریمز صلی الله علیه وسلمدن مرویدر دیدیکه چقان نور قلبه داخل اولسه اول قلبه انشراح و انفساح اولور دینلر دیکه انک علامتی ندر دیدیکه دار خلوده انابت ایدر و دار غروردن تباعد ایدر و موتک نزولندن اول موت ایچون حاضرلنور (فویل للقاسیة قلوبهم من ذکر الله اولئک فی ضلال مبین) عذاب شدید اول کسه لره کیم الله تعالینک ذکرنی سماعدن قلبیرینه قسوت و بیوست ایره زیرا که کفار قرآنی و کبرک انذارنی ایشتمدکلرنده کفرلرین و ذکر اللهدن اعراضلرین آرتورلر * دینلر دیکه چقان بر نفس خبیثه الجوهر اولسه ذکر الهی ایشتمی قلوبنک قسوه و کدورتن آرتور طیبه الجوهرک لینه و صفاسین آرترمسی کبی و شمس کبی که شمعی ایدر و ملحی طوکدرر ایمدی اول و صفلو کسه لر برضلالده در که فسادی ظاهر در اشبو آیتک سبب نزولی علی و حزه ودخی ابولهب و ولیدر * روایت اولندیکه اصحاب رضی الله عنهم بر وقتده ملول اولوب یار رسول الله بزه تحدیث ایت دیدکلرنده نازل اولدیکه (الله نزل احسن الحدیث) الله تعالی سنزه حدیثک احسن انزال ایتمدی (کتابا متشابها) بر کتابیکه حسن و نظم و صحت و حکمه بعضی بعضنه بکزر یو خسه مختلف اولوب بعضی بعضنی نقض ایتمز و یاخود اعجازده و توافق نظمه و صحت معناده و منافع عامه به دلالتده بعضی بعضنه متشابهدر (مثانی) اول ایکیشر ایکیشردر وعدو و عید امر و نهی ناسخ و منسوخ ثواب و عقاب امثال و قصصدر و تکریرک فائده سی اولدر که نفوس و عظم و نصیحتدن انفر اشیادر * ایمدی مادامکه اول اکا تکرار اولنیه انده رسوخ بولز (تقشعرت منه جلود الذین یخشون ربهم) اول کتابی و آیات و عیدنی استماعدن رب تعالیدن خائفلرک قلوبی دتر و جلودی صقیلور (ثم تلین جلودهم و قلوبهم الی ذکر الله) بعده انلرک جلود و قلوبی الله تعالینک رحمت و مغفرتی ذکرینه اطمینان و سکون ایدر (ذلک هدی الله یهدی به من یشاء) اشبو احسن حدیث الله تعالینک سبب توفیقیدر انکه دیلدیکه کسه بی دین اسلامه هدایت ایدر (ومن یضلل الله فانه من هاد) اول کسه که الله تعالی انی مخذول ایده انی هدایت ایدر اولز

(أفمن يتقى بوجهه سوء العذاب يوم القيامة) اول كسه كه قيامته
 كندوي سوء عذابدن يوزيله قورويه شول كسه كيميدركه عذابدن امن
 اوزره اوله * روايت اولنديكه يوم قيامته كفارك اللرى بونلرينه تيمورلنوب
 باشلرى اشاغه جهنمه براغيلورلر اوليه اولسه آتشي يوزلردن غيرى
 برشيئه دفعه قادر اولزلر (وقيل للظالمين ذوقوا ما كنتم تكسبون)
 كفر وعصيانله نفسلرينه ظلم ايدنلره دينوركه اول كسب ايتديكلكزك
 جزاسنى ذوق ايدك (كذب الذين من قبلهم فأتاهم العذاب من حيث
 لا يشعرون) اهل مكه دن اول كچن كفار رسوللرينى تكذيب ايتديلر انلره
 عذاب برجهتدن كديكه شدت غفلتلرندن انلره اول جهتدن عذاب كلمن
 توههم ايتزلردى (فأذا فهم الله الخزي في الحياة الدنيا وللعذاب الآخرة
 اكبر لو كانوا يعلمون) الله تعالى انلره حيات دنيايه ذلى اذاقه ايتديكه
 اول مسخ وخسف و قتل وسى واجلاء وامثاليدر وانلر ايچون اعداد
 اولنان آخرت عذابى ايسه شديد ودائم اولديغيجون اندن اكبردر اكر علم
 ونظر اهلندن ايسه لاني بيلورلر وانندن عبرت آلورلر (ولقد ضربنا للناس
 في هذا القرآن من كل مثل لعلمهم يتذكرون) اشبو قرآنده بزناس ايچون
 امر دينده احتياج اولور هر مثلدن ضرب ايتدك تاكه انكله متعظ اوله ل
 (قرأنا عربيا غير ذى عوج لعلمهم يتقون) اول قرآنى عربى اولديغى حالده
 كه انده اختلاف وتناقض يوقدر تاكه انكله شركدن اتقاء ايدهلر
 (ضرب الله مثلا رجلا فيه شركاء متشاكسون ورجلا سلما لرجل هل يستويان
 مثلا) الله تعالى مثل ضرب ايلدى مشرك ايچون شول رجلى كه انك
 آلههسى اولوب اول رجلايه شركاء اوله لر سوء اخلاقلرندن انده تنازع ايدهلر
 برينك اكا امر ايتديكى شيئدن انى آخرى نهى ايدهلر وموحد ايچون شول
 رجلى كه اول رجل واحد ايچون خالص اولوب هيچ احد اكا نزاع ايتيه
 ايمدى ايكيى وصفده مساوى اولمز زيرا كافر شول عبده بكزركه
 انك مواليى اولان اول انك آلهه سيدركه آنده مشتركلردر وقت واحده
 انلرك هر برينه برحاجت عارض اولوب اكا امر ايتدكلرندن اول عباد متخير
 اولوركه مواليىنك قنغيسين ارضا ايدهلر ومؤمن ايسه شول عبده بكزركه
 انك مواليى واحد اولوب انك خدمته قائم اوله خدمتيله انى ارضاده
 متخير اوليه (الحمد لله) جدك كايسى الله تعالى به مختصدر حقيقتده انده

اكا غير مشارك اولمز زيرا كه منع بالذات ومالك مطلق اولدر
 (بل اكثرهم لا يعلمون) بلكه كفارك كايسى بيلزلر كه رب واحده عبادت
 خير ليدر اندنكه غيرى اكا تشريك ايدهلر (انك ميت وانهم ميتون) يا محمد
 سكا وكرك انلره موت ايريسردر كليكز موت صددنده وموتى عدادنده سز
 وقتا كه كفار مكه محمد موته تر بص ايدهلر ديديلر اشبو آيت نازل اولدى
 (ثم انكم يوم القيامة عند ربكم تختصمون) بعده يوم قيامته ربكز
 جل شانه عندنده اختصاص ايدر سز يا محمد سن كفار اوزره احتجاج ايدر سنكه
 تو حيدده سن حق اوزره اولوب تشريكده انلر باطل اوزره ايديلر
 وسن ارشاد وتبليغه اجتهاد ايدوب انلر ايسه تكذيب وعنادده لج ايتديلر
 دينلديكه انكله مراد اختصاص عامدر ناس برى برلرينه خصوصت
 ايدرلر شول امورده كه دنيايه تعدى وتجاوز ايتشلردى * پيغمبريمز
 صلى الله عليه وسلم ايدر بر كسه كه عندنده بر مسلك عرض وياملندن حقى اوله
 اشبو دنيايه انى اكا ادا ويا استحلالله ذمتن تبرئه ايتسون شول كوزدن
 اول كه انده درهم ودينار اوليه بلكه اول حق صاحبي حقى مقابله سنده
 انك اعمال صالحه سنندن آلوب اكر عمل صالحى وارايسه واكر عمل صالحى
 يوغيسه اول حق صاحبنك سيئاتندن اكا يوكنور وناره كوندريلور
 (فن اظلم ممن كذب على الله) شول كسه دن اظلم كيمدر كه الله تعالى به
 ولد وشريك اضافتيله كذب ايدهلر (وكذب بالصدق اذ جاءه) واكا قرآن
 كديكنده توقف وتفكر سز انى تكذيب ايدهلر (أليس في جهنم مثوى
 للكاافرين) اكا كافر اولنلر ايچون جهنمه منزل يوقيدر ايمدى
 اول انلره مجازات يتر (والذى جاء بالصدق وصدق به اولئك هم المتقون)
 اولكه قرآنله كديكه اول محمد عليه السلامدر واولكه قرآنى
 تصديق ايتدى بو وصفلو كسه لر شرك وعصياندن اتقاء ايدنلردر
 (لهم ما يشاؤون عند ربهم) انلر ايچون رب تعالى عندنده جنتده
 ديلد كارى هر شئ واردلر (ذلك جزاء المحسنين) اشبو طاعتلرندن
 احسان ايدنلرك جزاسيدلر (ليكفر الله عنهم اسوء الذى عملوا) تاكه
 الله تعالى انلردن اسوء اعماللرينى تكفير ايدهلر اوليه اولسه انلردن دونلرى
 تكفير اولى اولور (ويجزىهم اجرهم باحسن الذى كانوا يعملون)
 وانلره محاسن اعماللرى ثوابنى احاسننه كوره ويرر تاكه فرط

اخلاص لرحمته اجر لری زیاده وعظیم اوله ومساوی اعماله اینسه
جزا اولمز لر (أليس الله بكاف عبده) الله تعالی عبده یعنی محمد علیه
السلامه کافی دکلیدر وقتا که کفار قریش دید بکره یا محمد
بزم آلهه مزه طعنیدن زائل اولمز سن صاقتکه انلردن سکا سوء ابرشیمه
اوله اولسه بوايت نزوليله هر ذی شرک شرعی دفعده الله تعالی عبده
کفایت ایدر دینلدی (ويخوفونك بالذين من دونه) یا محمد مشرکون
سنی الله تعالی دن غیری عبادت ایتدکاری آلهه لریله تخویف ایدر لر
(ومن يضل الله فاله من هاد) اول کسه که الله تعالی انی هدایت ایتیه اکا
هدایت ایدر اولمز (ومن يهدي الله فاله من مضل) اولکه الله تعالی انی
هدایت ایده انی اندن منع ایدر اولمز (أليس الله بعز يز ذی انتقام) الله تعالی
ملکنده غالب منیع واعدا سنه انتقام ایدر دکلیدر (ولئن سألتهم من خلق
السموات والارض ليقولن الله) اکر سن مشرکینه سموات وارضی کیم خلق
ایتدی دیو سؤال ایتسک دیکر که الله تعالی خلق ایتدی خالقیتده تفردینه
برهانک وضوحیچون (قل أفرأيتم ما تدعون من دون الله ان ارادني الله
بضر هل هن كاشفات ضرره) یا محمد مشرکینه دیکل که شول آلهه کز که
الله تعالی دن غیری اکا عبادت ایدر سنز بکا خبر ویرک که اکر الله تعالی
بکا ضرر اراده ایتسه آلهه کز اول ضررک کشفنه قادر اولور لر می (او ارادني
بر حة هل هن ممسكات رحته) و یا خود الله تعالی بکا نفع اراده ایتسه
آلهه کز اول نفعی بدن امسا که قادر اولور لر می (قل حسبى الله) دیکل که
بکا خیر اصابته و بدن شر دفعنه الله تعالی کافیدر (عليه يتوكل
المتوكلون) توکل ایدنلر الله تعالی یه توکل ایدر زیرا که امورک کلیسی اندن
صدور ایدر ایدیکن بیلور لر (قل يا قوم اعملوا على مكانتكم انى عامل)
دیکل که یا قوم قوت و طاقتکزه اولدیغجه بنم هلا که عمل ایدک بندخی سزک
هلا کزه عمل ایدرین (فسوف تعلمون من يأتيه عذاب يخزيه ويحل عليه
عذاب مقيم) زمان قریده بیلور سز که الله تعالی نیک عذابى کیمه کلوب
هلاک ایدر وعذاب دائم کیمه نزول ایدر (انا انزلنا عليك الكتاب للناس
بالحق) یا محمد بز سکا قرآنی حق ملتبس اولدیغی حالده ناس اجلچیون
انزال ایتدک زیرا که اول انلرک معاش ومعادنده مناسط مصالحلر ایدر
(فن اهتدى فلنفسه) اول کسه که اهتدا ایده نفسنه نفع ایدر (ومن

(ضل)

ضل قائما يضل عليها) اولکه هدایتدن اعراض ایده انک و بالی کندی
نفسنه ایرر انی تخطی ایتز (وما انت عليهم بوكيل) سن انلر اوزره
توکیل اولمذک که انلری هدایت جبر ایده سن بلکه سن انجق بلاغه مأمور سن
حالبوکه سن تبلیغ ایتدک (الله يتوفى الانفس حين موتها والتي لم تمت
في منامها) الله تعالی ارواحی ابدانن قبض ایدر ارواحک انده تعلق
وتصرفن ظاهرده و باطنده قطعله که اول موت عنندنه در و یا خود انی
انجق ظاهرده قطع ایدر یوخسه باطنده دکاکه اول نوم عنندنه در دینلدی که
هر انسانک ایکی نفسی واردر بری نفس حیاتدر که موت عنندنه مفارق
اولور وانک زواليله نفس زائل اولور * و بری ایتسه نفس تمیز در که اول
نوم عنندنه مفارق اولور اول اجلدن کورر سنکه نومی حالنده نفس ایدر
دینلدی که هر انسانک نفسی و روحی واردر نفسی نومی عنندنه کیدر روحی
قالور * علی رضی الله عنه ایدر نوم عنندنه روح چیقار شعاعی جسده
قالور انک سبيله در که رؤیا کورر چکانکه اویانه لحظه دن اسرع زمانده
روح جسده ایرر (فيمسك التي قضى عليها الموت ويرسل الاخرى الى
اجل مسمى) اول قبض اولنان ارواحدن شول اوزرینه موت قضا اولنان
روحی امساک ایدوب جسده رد ایتز و شول اوزرینه موت قضا اولنمیان
روحی جسده ارسال ایدر تا که موتی و قتی ایرشجه بو حال اوزره کیدر *
دینلدی که احیاء و امواتک ارواحی منامده بری برلرینه بولیشور لر والله
تعالینک دینلدیکی وجه اوزره سولیشور لر رجوع ایدر اولدقنرند الله تعالی
امواتک ارواحی امساک ایدر و احیاءک ارواحی ارسال ایدوب حتی که
اجسادلرینه ایرر (ان في ذلك لآيات لقوم يتفكرون) اشبو روحی
امساک و ارسالده الله تعالی نیک کمال و قدرت و حکمتنه و شمول رجتنه آیتلر
واردر شول قومه کیم ارواحک ابدانه تعلق کیتیتند و موت عنندنه
ارواحک اجسادن بالکلیه مفارقند و اجسادک فنا سیه ارواح فانی
اولمیبوب باقی اولسنده و اکا سعادت و شقاوت اعتراسنده و آجالی
انقضاسنه دکن حینا بعد حین انک ارسال اولنمی حکمتنده تفکر
ایدر لر (ام اتخذوا من دون الله شفعاء) یوخسه انلر الله تعالی نیک
اذنسر آلهه لرینی شفعاء می اتخا ایدر لر (قل أولو كانوا لا يملكون شيئا
ولا يعقلون) دیکل که آلهه لری انلره شفاعتی ایدر اکر چه انلر کوریلن

صفات اوزره جادات اولوب برشيئه قادر دكلر و برشيء بيلزرسه ده ينه
انلري شفعا مي اتخا ايدرلر (قل لله الشفاعة جميعا) ديكل كه شفاعتك
كليسي الله تعالىك اذنه متوقدر انك اذنسز هيچ احد شفاعته مالك اولمز
وبعد الاذن مشركين ايچون شفاعت اولمز (له ملك السموات والارض)
سموات وارضك ملكي جميعا انكدر دنياده كي اعمالكزي اول احصاء ايدر
(ثم اليه ترجعون) بعده آخرته اكا رجوع ايدر سز انده سزه جزا كزي ايدر
ايمدي دنياده و آخرته ملك انك اوليحق شول دنياده و آخرته مقبول
و مرضيسي اولين شئيئن نجه شفاعت ومدد اميدلنورلر (واذا ذكر الله
وحده اشمأزت قلوب الذين لا يؤمنون بالآخرة) چان الله تعالىك وحدانيتي
ذكر اولنسه شول آخرته ايمانلري اولينلرك قلوب بي اندن نفور ايدر
(واذا ذكر الذين من دونه اذاهم يستبشرون) چانكه الله تعالىك غيري
آلهلري ذكر اولنسه قلوبلري سرورله طولوب بشره و جهلريه انبساط كاور
(قل اللهم فاطر السموات والارض عالم الغيب والشهادة انت تحكم بين
عبادك فيما كانوا فيه يختلفون) يا محمد وقتا كه سن انلرك كفرنده متخير اولوب
عناد و شدت شكيمه زنده عاجز اوله سن الله تعالى به التجا ايدوب ديكل كه
يا الهى كه سن سموات وارض خلق ايدوب سن احوال و امورك كيزلو و آشكاره
سن بيلور سن عبادك اختلاف ايتدكاري شئيئه بمله انلرك بيني فصله
قادر اولور سين (ولو ان للذين ظلموا مني الارض جميعا ومثله معه لاقدوا به
من سوء العذاب يوم القيامة) اكر ر يوزنده اولان اشيانك جيجي
وانكله بيله انك مثلي كافرلرك اولسه يوم قيامته سوء عذابدن خلاص
ايچون اني فدا ايدلردى حالبوكه اول انلردن قبول اوليه (وبدالهم
من الله ما لم يكونوا يحتسبون) و دنياده شول حسب انلري اولمديغي
عذاب اول وقتده انلره نازل و ظاهر اوله (وبدالهم سيئات ما كسبوا)
وكسب ايتدكاري اعمال سيئه لري انلره ظاهر اوله شول حينده كه صحايف
اعماللري انلره ارض اولنه (وحق بهم ما كانوا به يستهزؤن) وانلري
احاطه ايدل اول شئيك جزاسي كه اني استهزاء ايدرلري (فاذا مس الانسان
ضره دعانا) چان جنس انسان ضره ايرسه انك كشفچون بزه دعا
ايدر (ثم اذا خولنا نعمه منا قال انما اوتيته على علم) بعده تفضل
ايدوب اكا نعمت و برسك ديركه اول بكا وجوه كسي بيلديكمدن ويرلدي

(بل)

(بل هي فتنة) بلكه اول نعمت اكا امتحاندر كه انكله شكران ويا كفران
نعمت ايديكى كندويه ظاهر اوله (ولكن اكثرهم لا يعلمون) الا بوكه
انلرك اكثرى اني بيلزلر (قد قالها الذين من قبلهم) انلردن اول پكنلر
اول مقاله بي ديمشلردى (فاغنى عنهم ما كانوا يكسبون) انلرك
متناع دنيادن كسب ايتدكاري عذابلري دفعنه برشيء مفيد اولمدي
(فاصابهم سيئات ما كسبوا) اوله اولسه انلره كسب ايتدكاري اعمال
سيئه لرنيك جزاسي ايردى (والذين ظلموا من هؤلاء سيصيبهم سيئات
ما كسبوا) اشبو مشركيندن عتوله نفسلريه ظلم ايدلنره ودخي كسب
ايتدكاري اعمال سيئه لرنيك جزاسي ايرسردر انلره ايرديكي كبي
(وما هم بمحجزين) حالبوكه انلر عذاب الاهدن فوت اولور دكلرلردر
زيرا كه مرجعلري الله تعالى به در اكا بناء رؤسالى بدرده قتل
اولندي ويدى ييل قط چكديلر (اولم يعلموا ان الله يسط الرزق لمن يشاء
ويقدر) بيلديلر ميكه الله تعالى رزقي ديلديكي كسه به بسط ايدر
وديلديكندن قبض ايدر شول حيثيئدنه انلره يدى ييل قط
چكدر ديكند نصكره يدى ييل دخي انلره سمعت ورفاهيت ايردردي
(ان في ذلك لآيات لقوم يؤمنون) اشبو بسط و تضيقده حوادثك كليسي
الله تعالىدن ايديكنه مؤمن اولنلره علامت و ارذر (قل يا عبادي الذين
اسرفوا على انفسهم) يا محمد مؤمنلره بنم لسائمله ديكل كه يا عبادم كه
معاصيده اسرافله نفسلري اوزره جنايته افراط ايتديلر (لا تقنطوا من
رحمة الله) الله تعالىك مغفرتدن و توبه ايدرسكز توبه كزي قبولندن
مأيوس اولمكز (ان الله يغفر الذنوب جميعا) الله تعالى ذنوبك جيجي مغفرت
ايدر اكر چه اول ذنوب كبا ايسه ده * ديلديكه اكر چه توبه سز ايسه ده
زيرا كه توبه ايله تقييد خلاف ظاهر در شول دليلله كيم (ان الله لا يغفر
ان يشرك به ويغفر ما دون ذلك لمن يشاء) الله تعالى ديلديكنيك شركدن
ماعد ذنوبي مغفرتن اطلاق ايتدى (انه هو الغفور الرحيم) زيرا كه اول
رحمت و مغفرتده بليغدر * ابن عباس رضى الله عنهما ايدر پيغمبر عز صلى الله
تعالى عليه وسلم جزه رضى الله عنهم قاتلي و حشبي اسلامه دعوت ايچون خبر
كوندر دكده ديديكه سن بنى دينكه نجه دعوت ايدرسن حالبوكه زعمكده
بركسه كه قتل و يازنا و ياشرك ايدل (يضاعف لهم العذاب) اكا عذاب مضاعف

بع . (٥)

قيلنور دیرسن بن ایسه اول ذنوبك كلیسنی ایتشم اویله اولسه نازل اولدیکه
 (الامن تاب وامن وعمل عملا صالحا فاولئك یبدل الله سیئاتهم حسنات)
 که اول سورة فرقانده یکدی وحشی دیدیکه اشبو شرط شدیددر قورقارینکه
 انی اقامته قادر اولیم انك غیرسی اولسه اکا بناء نازل اولدیکه (ان الله
 لا یغفر ان یشرک به ویغفر ما دون ذلك لمن یشاء) که اول سورة نسا در
 وحشی دیدیکه نه یلورین بلکه مغفرتی اراده اولنان قومدن اولیم اویله
 اولسه اشبو صدندن اولدیغیز (یا عبادی الذین اسرفوا علی انفسهم)
 آیتی نازل اولیق وحشی اکا مطمئن اولوب اسلامه کلدی مسلمون دیدیلرکه
 یارسلو الله اشبو حکم وحشی به خاصمیدر یوخسه سائر مسلمینه دخی عاممیدر
 دیدیکه بلکه جمیع مسلمینه عامدر (وانیبوا الی ربکم واسئلوا له من قبل
 ان یأتیکم العذاب ثم لا تنصرون) ذنبدن تائبین اولدیغیز حالده ربکز
 الله تعالی به رجوع ایدوب عملی انك وجه کریمچون خالص ایدک سزه
 عذاب کلزدن اول زیرا که اول کلدکدنصکره اندن منع اولنرسز ایددی آیت
 سابقه دلالت ایتز که هرکسه به توبه سز و سبق تعذیبسز مغفرت حاصل اوله
 تا که توبه دن وعملده اخلاصدن استغنا اولنه (واتبعوا احسن ما انزل
 الیکم من ربکم) ربکز جل شانهدن سزه انزال اولنان شیئک احسننه اتباع
 ایدک که اول مأمور به در منهی عنه دکلدر و یا عزائمدر رخص دکل
 و یا ناسخدر منسوخ دکل و یا نجات و سلامته ایصالده اقرب اولانه اتباع ایدک
 انابت و طاعته مواظبه کبی (من قبل ان یأتیکم العذاب بغتة وانتم لاتشعرون)
 شول وقتدن اولکجه فجأة سزه عذاب کله حالبوکه امور دنیا به اشتغالکز
 و آخرته عدم ایمانکز سببیله انک مجبئنه شعورکز اولیه کیم تدارک ایدنه سز
 (ان تقول نفس یا حسرتا علی ما فرطت فی جنب الله) ایددی طاعته
 مبادرت ایدک نفس قاصره نك دیمسی کرا هتله کیم حسرت و ندامت بکا که
 الله تعالی به طاعتده تقصیر ایتشن (وان کنت لمن الساخرین) اگرچه
 بن الله تعالینک دین و کتاب و رسولنی و مؤمنینی استهزاء ایدنلردن ایدم یعنی
 طاعة الاهی تضییعه اکتفا ایتیموب حتی که اهل طاعتی سخره ایددی
 (او تقول لو ان الله هدانی لکننت من المتقین) و یا خود دیه که اگر الله تعالی
 بنی حقه ارشادله هدایت ایتسه شرک و معاصیدن اتقاء ایدنلردن اولوردم
 (او تقول حین تری العذاب لو ان لی کررة فاکون من المحسنین) و یا خود

(دیه که)

دیه که يوم قیامتده عذابی کوردیکنده اگر بنم برکره دخی دنیا به رجوعم
 اولسه عقیده وعملده احسان ایدنلردن اولوردم (بلی قد جئتک آتقی
 فکذبت بها واستکبرت و کنت من الکافرین) الله تعالی دیه که بلی سکا بنم
 آیاتم کلشیدی سن ایسه انی تکذیب ایدوب قبولدن امتناعکله کافرلردن
 اولمشیدک (ویوم القيامة ترى الذین کذبوا علی الله وجوههم مسودة)
 يوم قیامتده الله تعالی به کذب و افترا ایدنلری یوزلری قرارمش کوررسن
 (الیس فی جهنم مثوی للمتکبرین) ایمان و طاعتدن تکبر ایدنلره جهنمده
 مقام یوقیدر واردر (وینجی الله الذین اتقوا بمفازتهم) الله تعالی شرک
 و معاصیدن انتقام ایدنلری انجا ایدر شول طریقله کیم اول انلری فوز و نجاته
 مؤدی اولور (لایمسهم السوء ولا هم یحزنون) انلره مکروه ایرشمز و دنیا دن
 فوت ایتدکری اشیایه حزن چکمز (الله خالق کل شیء) الله تعالی خیر
 و شر ایمان و کفردن هر شیئک خالقیدر (وهو علی کل شیء وکیل)
 اول هر شیئی حفیظدر تصرفنه تولی ایدر (له مقالید السموات والارض)
 سموات و ارضک مفتاحی انکدر * دینلدیکه سمواتک مفتاحی مطردر انواعیله
 و ارضک مفتاحی نباتدر انواعیله عثمان رضی الله عنه پیغمبریمز صلی الله تعالی
 علیه وسلمه مقالیددن سؤال ایتدکده دیدیکه انک تفسیری (لا اله الا الله
 والله اکبر و سبحان الله و بحمده و استغفر الله و لا حول و لا قوة الا بالله
 هو الاول و الآخر و الظاهر و الباطن بیده الخیر یحیی و یمیت وهو علی کل
 شیء قدير) یعنی اشبو کلماته الله تعالی توحید و تمجید اولنورکه اول سموات
 و ارض خیرنک مفتاحیدر برکسه که انی تکلم ایدنه اکا اصابت ایدر
 (والذین کفروا بآیات الله اولئک هم الخاسرون) شونرکه الله تعالینک
 دلائل قدرته و سموات و ارض امرنده استدامتنه و یا خود انک توحید
 و تمجیدی کلماتنه کافر اولدیلر * ایددی انلر رحمت و ثوابدن خاسرلردر
 (قل أفغیر الله تأمرونی اعبد ایهما الجاهلون) دیکل که اشبو دلائل
 و مواعیددنصکره ای جاهلار بکا امر ایدرمیسز که الله تعالینک غیریه
 عبادت ایدم (ولقد اوحی الیک والی الذین من قبلك ان اشرکت لیحبطن
 عملک و لتکونن من الخاسرین) یا محمد سکا و سندن اول پکن رسوللره
 وحی اولندیکه علی سبیل القرض سن اشراک ایتسک عملک حبط اولوب
 خاسرلردن اولورسن اشبو خطاب اگرچه پیغمبریمز علیه السلامه در

لكن مراد امتيدر (بل الله فاعبد وكن من الشاكرين) بلكه يالكز
الله تعالى به عبادت ايت وانك سكا ايتديكي انعامنه شكر ايدنلردن اولغل
(وما قدره الله حق قدره) انلر نفسلرندة الله تعالىنك عظمتن حق تعظيمله
تقدير ايتديلر شول حيثيدنكه اكا لابق اولين شيئي اكا شريك قيلديلر
(والارض جميعا قبضته يوم القيامة والسموات مطويات بيمينه) والحال
ارضون سبعمك جيعي وياخود ارضك ظاهره وخابره سي يوم قيامته
انك مقبوضه سيدر يعني ملك وتصرفنده در نيچه ديلرسه مزاجسز
سهولته تصرف ايدر يعني اول ارض عظمتيله انك قدرته نسبت اولنسه
قبضة واحده مثابه سنده در كذلك سموات دخي انك قدرتيله مجموعاتدر
اشبو آيت انك عظمتنه وانك قدرته اضافته ذكر اولنان اجرام عظامك
حقارته تنبيهدر (سبحانه وتعالى عما يشركون) ايمدي قدرت وعظمتي
بو مرتبه اولان حضرت باري جل شانه مشركونك اشرا كندن منز
وعالي اولدي (ونفخ في الصور فصعق من في السموات ومن في الارض)
اول مره كه صوره نفخ اولنه سموات وارض وما بينهما حياته اولان
مخلوقاتك جيعي ميت ويا مغشى عليه اولور (الامن شاء الله) الا انلر كه
الله تعالى انلر بكاسن ديليه * ديلديكه انلر جبر ايل واسرافيل وميكائيل
و ملك الموتدر وياخود جنت و نارده اولان حور و ولدان وزبانيه در
ويا حله عرشدن تكيم ذكرى سورة نملده كچمشدر * ديلديكه اول استثناء
اولنسانله مراد انجق الله تعالىنك ذاتيدر (ثم نفخ فيه اخرى فاذا هم
قيام ينظرون) بعده اول صوره ايكنجي كره نفخ اولنه كوريله كيم
خلائق قبرلندن طورملر كنديلره نه فعل ايديلور ايديكنه منتظر اوله لر
ويا احوال قيامته نظر ايدلر كه سما نيچه تغير وارض نيچه تبديل
اولنور وداعي انلري نه شينه دعوت قيلور و اقربانك بري برلندن شفقتي
كيدر و خصمادن انلره نوجهله خصومت ايرر (واشرقت الارض
بنور ربها) وارض محشر رب تعالىنك عدلي نوريله منور اوله وياخود
برنور ايله كيم اجسام مضيئه توسطنسر انده خلق اولنه (ووضع الكتاب)
وصحائف اعمال عمالك يدلينه ويريله ويا لوح محفوظله اول صحائف
مقابله ايديله (وجي بالنبيين والشهداء) ويغمبرلر وملائكه ومؤمنيندن
شهداء كتوريله كيم رسوللرچون شهادت ايدلر كه انلر امت محمددر

(وياخود)

وياخود كراما كاتيبين ملكا ريدر وياخود في سبيل الله مقتوللردر (وقضى
بينهم بالحق وهم لا يظلمون) وعباد بيننده ظالمين ومظلومين رسل وام
يدني عدله قضا اولنه انلر ظلم اولمز لر نه ثوابلرينك نقصيله ونه عذابلرينك
زياده سيله (ووفيت كل نفس ما عملت) وهر نفس خير وشردن عملنك
جزاسي توفيه اولنه (وهو اعلم بما يفعلون) اول الله تعالى انلر افعاله
اعلمدر شهدانك شهادته احتياج اولمز بلكه اشهادي عملاري اوزره حجت
تا كيد ايجونددر (وسيق الذين كفروا الى جهنم زمرا) وكافرلر ضلالت
وشرارتده تفاوت اقداملري حسبنيجه فوج فوج بعضي بعضنك اثرنده جهنمه
سوق اولنه (حتى اذا جاؤوها فتحوا ابوابها) حتى چنانكه اكايره لر يدي قپوسي
انلر ايجون آجيله (وقال لهم خزنتها ألم يأتكم رسل منكم يتلون عليكم آيات
ربكم وينذرونكم لقاء يومكم هذا) انك خازنلري يعني زبانيه انلره ديه لر كه
كنددي جنسكزدن سزه رسوللر كلدميمكه ربكز جل شانهنك آيتلريني
سزه تلاوت ايدر وبو كونه لقبا كزله سزي تخويف ايدر (قالوا بلى
ولكن حقت كلمة العذاب على الكافرين) كافرلر ديه لر كه بلي بزه رسوللر
كلديلردى تلاوت آيات وانذار ايتديلردى الابوكه علم اللهده اوزر يمه
كلمه عذاب واجب اولديكه (لأملأن جهنم من الجنة والناس اجمعين)
قوليدر (قيل ادخلوا ابواب جهنم خالدين فيها فبئس مثوى المتكبرين)
اول كافرله ديلديكه ايمدي ضلالتده مراتبكر حسبنيجه ابواب جهنمه
دخول ايدك انده دائمين اولديغكر خالده اول جهنم ايمانندن تكبر ايدنلره
نه چركين منزل اولور (وسيق الذين اتقوا ربهم الى الجنة زمرا)
ورب تعالىدن قورقوب شرك ومعاصيدن اتقا ايدنلر شرف وعلو طبقه ده
مراتبلي حسبنيجه راكبين اولدقلى خالده فوج فوج بعضي بعضنك
اثرنده جنه سوق اولنلر (حتى اذا جاؤوها وفتحوا ابوابها) حتى چنانكه انلر
اكا كدلر حالبوكه انلر كلزدن اول انك قپولري انلر ايجون آجيله (وقال
لهم خزنتها سلام عليكم طبتم فادخلوها خالدين) جنتك خازنلري انلره
ديه لر كه اوزر يكره سلامت اولوب من بعد مكروه ايرمسون ذنوبدن طاهر
اولديكزددي وياخود جنت سزه كوچك مقام اولدي ايمدي اكا كيروب
انده خالدين اولك چنانكه اكا كيرلر انلر ايجون اعداد اولنان كراماتي
كورلر فرح وسرور ايدلر (وقالوا الحمد لله الذي صدقنا وعده)

الله تعالی به جد اولسونکه رسولاری لسانیه اولان وعدنی بزه انجامز ایتدی
 (واورثنا الارض نبوء من الجنة حيث نشاء) وجنتدن اشبو قرار ایتدیکمز
 مکانی بزه وارثک مورثه اولان تمکنی کبی تمکین وتملیک ایتدی اندن دینلدیکمز
 واشتها ایتدیکمز مکانه نزول ایده وز دیرلر اشبونده اشارت واردرکه جنتدن
 هر مؤمنه ویریلن حاجتدن زیاده اوله یوخسه هیچ کسه آخرک منزلنه
 نزولله دکل * دینلدیکه جنته اولامت محمد کیروب دینلکاری منازله
 نزولارند نصکره سائر امم کیره لر (فتم اجر العاملين) مؤمن اولوب عمل صالح
 ایشلینلره جنت نه کوچک اجر اولور (وترى الملائكة حافين من حول العرش)
 ملائکه بی کوره سنکه حول عرشى احاطه ایدوب طواف ایدرلر (یسبحون
 بحمدهم) رب تعالینک جندنی ملتبسین اولدقلى حالده انی تنزیه و تقدیس
 ایدرلر اشبونده اشعار واردرکه علونیک منتهای درجاتی واعلی لذائذی
 حق تعالینک صفاته استغراق اوله (وقضى بينهم بالحق) وخلق بیی حقه
 قضا اولنه بعضی ناره و بعضی جنته ادخال اولتمقله و یاملائکه بیی قضا اولنه
 تقاضلاری حسبجه (وقيل الحمد لله رب العالمين) بینلری حقه قضا اولنلر
 الله تعالی به جد ایدرلر

سورة المؤمن وهى خمس وثمانون آية مكية

بسم الله الرحمن الرحيم

(حم) ابن عباس رضی الله عنهما ایدر حم الله تعالینک اسم اعظمیدر
 عکرمه اندن روایت ایدرکه الروحون الرحمن اسمندن حروف مقطعه در
 عطاء خراسانی ایدرکه انک حاثی الله تعالینک حلیم جیدجی حکیم
 حنان اسمائیک افتتاحیدر وانک میمی ملک مجید منان اسمائیک افتتاحیدر
 (تنزيل الكتاب من الله العزيز العليم) قرآنک تنزیلی اول الله تعالیدندرکه
 سلطانتده عزیز و عبادتک مصالح و اعمالده علیمدر (خافر الذنب) مؤمن
 تابیک ذنبی مغفرت ایدر (وقابل التوب) توبه ده اخلاص ایدنه
 توبه سن قبول ایدر (شديد العقاب) اکا شرک و کفر ایدنه عقابی
 شدیددر (ذی الطول) موحدین عاملینه فضل و انعام واسع
 صاحبیدر (لااله الا هو) که اندن غیرى اله یوقدر اویله اولسه انک
 عبادتته اقبال کلی واجب اولور (اليه المصير) آخرتده جمیع خلقتک

(رجوعی)

رجوعی اکادر مطیع وعاصیه اعمالرینک جزاسن ایدر (مايحادل
 في آيات الله الا الذين كفروا) آیات اللهده طعن و ادحاض حقه جدال
 ایتز مکر انلرکه کافر اولدیلر اما اول کسه که انک عقدنی حل و حقایقنی
 استنباط و اهل زیغک مطاعن قطع ایچون جدال ایده اول اعظم
 طاعتدندر (فلا يغرك تغلبهم في البلاد) ایدمی یا محمد سنی انلرک
 دنیاده امهال اولملری و بلادده تجارت مراجه ایله تغلبلری مغرور
 ایتسون زیرا که انلر زمان قریده اخذ اولنلرلدر انلردن اول کچنلرک
 اخذ اولملری کبی (كذبت قبلهم قوم نوح والا حزاب من بعدهم)
 انلردن اول نوح قومی نوحی و انلر دینکره عاد و ثمود کبی رسولاری اوزره
 تحزب ایدنلر رسولارینی تکذیب ایتدیلر (وهت كل امة برسولهم ليأخذوه)
 و هرامت کافره رسولارینه قصد ایتدیلر که اسر و قتل و تعذیله
 اخذ ایدرلر (وجادلوا بالباطل ليدحضوا به الحق) وشول حقیقتی
 اولیان شیثله جدال ایتدیلرکه انکله حق ازاله ایدرلر (فاخذتهم
 فكيف كان عقاب) انلری اهلاکله اخذ ایتدم کورسونلرکه بنم عقاب
 نیچه اولدی زیرا اول هالکینک دیارلرینه اوغرایوب آثارلر بیی کوررلر
 (وكذلك حقت كلمة ربك على الذين كفروا انهم اصحاب النار)
 امم مکذبه به کلمه عذاب واجب اولدیغی کبی سنک قومکدن دخی کافر
 اولنلره واجب اولدیکه انلر اهل ناردلر (الذين يحملون العرش ومن حوله)
 شول ملائکه که عرشى کوترلر و دخی انلرکه انک حولنده اولوب انی
 طواف ایدرلر انلره کروپیون دینور ملائکه نك ساداتیدر * ابن عباس
 رضی الله عنهما ایدر حله عرشدن برینک کعبندن اسفل قدمنه دکن
 بشیوز ییلاق یولدر * دینلدیکه انلرک ارجلی ارض سفلاده ورؤسلری
 عرشى خرق ایدوبدر خاشعلردر طرفلرین رفع ایتزلر خوفلری سماء سابعه
 اهلندن اشددر اشبو منوال اوزره هر سماء اهلنک خوفی انک اسفلنده کی
 سماء اهلنک خوفندن اشددر پیغمبریمز صلی الله علیه وسلم ایدر حله
 عرشدن هر برینک قولاغی یومشاغندن اوموزنه دکن یدیوز ییلاق
 مسیره در * دینلدیکه حله عرش و حولنده کی ملائکه دن هر برینک
 دردر وجهی واردرکه اول وجه ثور و وجه اسد و وجه نسر و وجه
 انسندر و هر برینک دردر قنادی وار ایکیسنی یوزینه طوتار که

عرشه نظرله صعه ايميه وانك ايكسيله دخی پرواز ايدر (يسبحون بحمدهم) رب تعالى بی جدنی ملابس اولدقلری حالدہ تسبیح ایدرلر * دینلدیکه حله عرش سکزد در دینک تسبیحی (سبحانک اللهم وبحمدک لک الحمد علی حکمک بعد علمک) در دینک دخی (سبحانک اللهم وبحمدک لک الحمد علی عفوک بعد قدرتک) در کانه بنی آدمک ذنوبن کوررلر وهب بن منبه ایدر حول عرشده یتش بیک ملک واردر که عرشی طواف ایدرلر بر صف اقبال ایتسه صف آخر ادبار ایدر انلرک بعضی تهلیل و بعضی تکبیر ایدر وانلرک وراشته یتش بیک صف دخی واردر که قائمدر انلرک تکبیر و تهلیلن ایشدکده رفع صوتله دیولر که (سبحانک اللهم وبحمدک ما اعظمک وما اجلک انت الله لا اله غیرک انت الاکبر الخلق کلهم لک راجعون) وانلرک وراشته یوز بیک صف واردر که یمینلرینی یسارلری اوزره قومشدر هر برینک بر ذکر مخصوصی واردر والله تعالی حول عرشده کی ملائکه دن بر نیچه حجابله احتجاب ایتشددر نار و ظلت و نور و در ایض و یاقوت اجر و زبرجد اخضر و ثلج و ماء و بردن هر برندن و دخی انک غیری اشیادنکه انی الله تعالیدن غیری احد بیلز هر برندن یتشر حجابله احتجاب ایتشددر (و یؤمنون به) وانک فردانیت و وحدانیتنه تصدیق ایدرلر (و یتستغفرون للذین آمنوا) و مؤمنلر ایچون استغفار ایدرلر یعنی الله تعالیدن دیولر که مؤمنلری توبه یه جل ایده و مغفرتن ایجاب ایدر شیئی انلره الهام ایده و دیولر که (ربنا وسعت کل شیء رجة و علما) یاربنا رحمت و علمک هر شیئه واسع اولدی اعمال و احوالارین بیلور وانلری رحمت و مغفرتنه قادر اولورسن (فاغفر للذین تابوا و اتبعوا سبیلک و فهم عذاب الجحیم) ایمدی مغفرت ایت انلریکه شرک و معاصیدن صاقنوب عمل صالحله سکار جوع و سبیل حقه اتباع ایدرلر وانلری عذاب جحیمدن حفظ ایت (ربنا و ادخلهم جنات عدن التي وعدتهم) و دخی انلری ادخال ایت جنات عدنه کیم انی انلره رسوللرک لسانبله وعد ایتشدک (ومن صلح من آبائهم و ازواجهم و ذریاتهم) وانلرک سرورنی اتمام ایچون انلر که بسله آباء و ازواج و ذریاتلرندن سنی توحید ایدنلری دخی اکا ادخال ایت * سعید ابن جبیر ایدر مؤمن جنته داخل اولیحق دیه که فنی بابام و انام و وولدم و خاتونم دینله که انلر سنک کبی عمل ایتماشلردی دیه که بن انلر ایچون عمل

(ایتمشدم)

ایتمشدم اولیه اولسه انلر دخی جنته ادخال اولنه (انک انت العزيز الحکیم) زیرا که ملککده عزیز و امرکده حکیمسن (وقهم السيئات) وانلری عقوباتدن و یاخود جزاء سیئاتدن حفظ ایت و یادنیاده انلری معاصیدن حفظ ایت (ومن تق السيئات يومئذ فقد رجته) اولکه دنیاده سیئاتدن سن انی حفظ ایده سن آخرتده سن اکا رجعت ایدرسن کانه مسببی سؤلارندنصکره سبین دخی طلب ایتدیلر (وذلك هو الفوز العظيم) یاربنا سنک انلری عقوباتدن حفظک و یا انلره رجعتک نجات و افره در (ان الذین کفروا ینسادون لمقت الله اکبر من مقتکم انفسکم اذ تدعون الی الایمان فتکفرون) شونلر که دنیاده کافر ایدیلر یوم قیامتده اعمال خبیثه لرینک جزاسن کور یحک نفسلرینه لوم و مقت ایده لر انلره دینله که الله تعالینک سزه مقتی سنرک اماره بالسوء اولان نفسلریکزه ایتدیکنر مقتدن اشددر زیرا که سز دنیاده انک رسوللری لسانبله ایمانه دعوت اولندیغکزده انی انکار ایدوب کفر اوزره ثابت اولوردیکز (قالوا ربنا امنا اثنتین و احببتنا اثنتین) دیه لر که یاربنا سن بزی ایکی کره اماته و ایکی کره احیا ایتدک یعنی بزی آباءمز اصلا بنده اموات خلق ایتدک بعده آجالز انقضاسنده بزی ینه اموات ایتدک و امهاتمز ارحامنده بزه روح نفخیله بزی احیا ایتدک بعده موتزدنصکره بعث ایچون ینه احیا ایتدک * دینلدیکه اماته اولی اجل انقضاسنده کیدر و اماته ثانیه ایتسه قبرده سؤل ایچون اولان احیادنصکره کیدر و ایکی احیانک بری قبرده کی احیادر و بری بعثدر زیرا که مقصود شول اکثرات ایتوب غفلت ایتدکلری شیئی کوردکلرندنصکره اعترافلریدر (فاعترفنا بذنوبنا) اولیه اولسه بز ذنوبمه اعتراف ایتدک زیرا که ذنوبی اعترافلری دنیایه اغترار و بعثه انکارلرندن ایدی (فهل الی خروج من سبیل) ایمدی بزه برچاره وارمیدر که ناردن چیقوب کیر و دنیایه کیده وز و انده طاعت یولنه سلوک ایده وز انلره دینله کیم (ذلکم بانه اذا دعی الله وحده کفرتم) اشبو عذاب و خلود سزه شول سبیله در که سزه لا اله الا الله دیکز دینلسه انک وحدانیتنه کافر اولوردیکز (وان یشرک به تؤمنوا) و اگر الله تعالی یه اشراک اولنسه انی تصدیق ایدردیکز (فالحکم لله العلی الکبیر) ایمدی حکم اول الله تعالینکدر که عبادته مستحقدر سزه عذاب سرمدله حکم ایتدی اول شرک اولتمقدن

رفیع و عالی در و قدرة قاهره ايله کبردر خلقنده حکمی انفاذ ایدر (هو الذی یریکم آیاته) اول الله تعالى سزه و حدایتنه و سائر بیلمنی واجب اولور عجائب مقدوراتنه دلالت ایدر آیاتن کوستر (و ینزل لکم من السماء رزقا) و سزه سمان سبب رزقکز مطری و غیرینی انزال ایدر که انکله معاشکز منتظم اوله (وما یتذکر الا من ینیب) عقولده مرکوز کبی اولان آیاتله متعظ اولمز مکر اولکه اکا اقبال ايله انکاردن رجوع ایده (فادعوا الله مخلصین له الدین ولو کره الکافرون) ایدمی عبادتکزی الله تعالى به ایدک دینکزی شرکدن اخلاص ایدر اولدیغکز حالدله اگرچه کافرلندن کراحت ایدر لر سه ده (رفیع الدرجات ذوالعرش) که اول درجات کالی رفیعدر انک غیریده کال ظاهر اولمز و عالم جسمانیکنک اصلی اولان عرش انک قبضة قدرتنده در صحیح اولمز که غیری اکا اشراک ایدیه و یا خود مراتب مخلوقاتی اول رفع ایدیحیدر و یا خود مصاعد ملائکه بی عرشه و یا سمواته و یا درجات ثوابی رفع ایدیحیدر (یلقی الروح من امره علی من یشاء من عباده) اول و حیمله جبریل علیه السلامی عبادندن دلدیکی کسه به انزال ایدر (لینذر يوم التلاق) تاکه اول عبد انذار ایده شول یومله کیم انده اهل سماء و اهل ارض و یا خالق و مخلوق و یا ظالم و مظلوم و یا عابد و معبود و یا مرء و عملی التقا ایدر که اول یوم قیامتدر (یوم هم بارزون) شول یومده که قبورلرندن خارجلدر و یا ظاهرلدر انلری برشی ستر اتمز و یا نفوسلری ظاهرده در غواشی ابدان اکا حجاب اولمز و یا اعماللری و یا سرائرلری ظاهرده در (لایخفی علی الله منهم شیء) انلرک اعیان و اعمال و احوالندن الله تعالى به برشی خفی اولمز و الله تعالى اول یومده خلقک فناسندنصکره دیه که (لن الملائک اليوم) اشبو کونده ملک کیمکدر حالبوکه اکا جواب و برر اولیه اوله اولسه ینه کندی جواب و یروب دیه که (لله الواحد القهار) اول وحدایتله موصوف الله تعالینکدر خلقی اماته ايله قهر ایدیحیدر (اليوم تجزی کل نفس بما کسبت) اشبو کونده هر نفس دنیاده خیر و شرندن کسب ایتدیکیلر جزا لنور (لا ظلم اليوم) اشبو کونده نقص ثواب و یا زیاده عقابله هیچ کسه به ظلم اولمز (ان الله سریع الحساب) الله تعالى حسابده سریعدر زیرا انی برشان شان آخردن اشغال اتمز اولیه اولسه خلائقه

(مستحق)

مستحق اولدقلری شیئی سرعتله ایر کورر (و انذرهم يوم الآزفة) یا محمد مشرکلری یوم قیامتله انذار ایتکه اول انلرک دخول ناره مشارفدرینک و قتیدر (اذ القلوب لدی الحناجر) که انده قلوب اما کنندن مرتفع اولوب خنجره لرینه ملتصق اولور نه مکانسه عودت ایدر و نه آغزلرندن چیقوب کیدر (کاظمین) مغومین خوف و حزنه ممتلین اولدقلری حالده (ماللظالمین من حیم و لاشفیع بطاع) ظالملر ایچون قریب مشفق و یا شفیع مشفع اولمز زیرا که شفاعت ایدنلر الله تعالینک اولیاسیدر انلر ایه سومزلر الا انیکه الله تعالینک دوستی اوله یوخسه اکا عدو اولنلری دکل (یعلم خائفة الاعین و ماتخفی الصدور) اول کوزلرک خائنین یلور که اول ناهجرمه اولان نظره ثانیه و اکا استراق نظر در ودخی صدورک اخفا ایتدیکن یلور (والله یقضى بالحق) الله تعالى عدله حکم ایدر زیرا که اول علی الاطلاق مالک حاکمدر هرشی انک خلقیدر (والذین یدعون من دونه لایقضون بشیء) شونلر که الله تعالینک غیرینی به عبادت ایدرلر عجزلری و عدم عقللریچون برشیثله حکم ایتزلر (ان الله هو السميع البصیر) الله تعالى انلرک اقوالنی ایشیدر و اعماللرینی کورر (اولم یسیروا فی الارض الارض فینظروا کیف کان عاقبة الذین کانوا من قبلهم) اهل مکه یریوزنده سیروسفر ایتزلر میکه انلردن اول رسوللرینی نکذیب ایدن امتلرک حال و ماللرینی تفکر ایدوب معتبر اوله لر (کانوا هم اشد منهم قوت و آثارا فی الارض) که انلر قوت و قدرت و تمکینه اهل مکه دن اشد و اعمارده اکثر و قصور و منازلده احصن ایدیلر (فأخذهم الله بذنوبهم) الله تعالى انلری ذنوبلری سببیه عقاب ایتدی (وما کان لهم من الله من واق) حالبوکه انلری انک عقابندن منع ایدر مانع اولمدی (ذلک بانهم کانت تأتیهم رسلهم بالبینات فکفروا فأخذهم الله) اشبو اخذ شول سببیه در که انلره رسوللری معجزات و یا احکام واضحیه ايله کلدیکنده انلر اکا کافر اولورلردی اولیه اولسه الله تعالى انلری هلاک استیصالله مؤاخذه ایتدی (انه قوی شدید العقاب) اول قوی متمکندر نه دیلر سه آتی ایدر اکا کافر اولنلره عقابی شدید در (ولقد ارسلنا موسی بایاتنا و سلطان مبین الی فرعون وهامان وقارون فقالوا ساحر کذاب) بزموسی بی معجزات و حجت قاهره ظاهره ايله فرعون و هامان و قارونه

ارسال ايتدك انلر ايسه انى تصديق ايتيوب ساحر و كذابدر
ديدير (فلما جاءهم بالحق من عندنا قالوا اقتلوا ابناء الذين آمنوا
معه واستحبوا نساءهم) وقتا كه موسى بزم عندمزدن رسالتله
فرعون وقومنه كدى ديدلر كه انكله بيله ايمانه كلنرك انلارى قتلنه
هودت ايدك تشكيم مقدا اول فعلى انلره ايدر ديكز تا كه موسايه مظاهرتى
ترك ايدلر واثلر بى احيا ايدك (وما كيد الكافرين الا فى ضلال) والحال
كافرلك مكر و احتيالى دكل الا ضياعدهدر (وقال فرعون ذرونى اقتل
موسى) فرعون قومنه ديديكه بنى حالمه قوكر كه موسى بى قتل ايدم انلر
ايسه انى موسى بى قتلدن كف ايدوب ديرلر ديكه اول سنك خوف
ايتديكك دكلدر بلكه اول ساحر در اكر انى قتل ايدر سك ناس سنى انكله
مجتله معارضه دن عاجز ظن ايدوب انى تعلل ايتدى ديرلر مع هذا اول
اهون شئده سفاك ايدى (وليدع ربه) اول ربه دعا ايدوب كورسنگه
اول انى بنى منع ايدلر بيلورمى (انى اخاف ان يبدل دينكم) زيرا
قورقريكه اكر بن انى قتل ايتزم صددنده اولديغكز دينكزى تغيير ايدلر
(وان يظهر فى الارض الفساد) وياخود دينكزى بالكلية تغيير
ايدلر مديكى تقدير اوزره ارض مصرده تحارب و تهاجر دن فساد اظهاريله
دين و دنيا كزه خلل اير كوره (وقال موسى انى عدت ربى وربكم من كل
متكبر لا يؤمن بيوم الحساب) وقتا كه موسى عليه السلام فرعونك تهديدنى
ايشندى ديديكه بن الله تعالى به استعاذه ايتدمكه اول بنم ربه وسرك
ربكزدر هر متكبر دنكه يوم حسابك حقيقتى تصديق ايتزم (وقال رجل
مؤمن من آل فرعون يكتنم ايمانه) آل فرعون دن رجل مؤمنكه فرعونك ابن
عمى اولوب اسمى خرييل ايدى فرعون وقومندن ايماننى كيرلردى ديديكه (اتقتلون
رجلا ان يقول ربى الله) شول رجلى ظلما قتل ايدر ميسر كه اول ربه
يالكر الله تعالى دير ديه (وقد جاءكم بالبينات من ربكم) حالبو كه اول سزه
ربكزدر معجزات و دلائل ايله كدى (وان يك كاذبا فعليه كذبه) اكر اول
كاذب ايسه كذبك وبالى كندى اوزره در انى دفعده قتله احتياج اولمز
(وان يك صادقا يصبكم بعض الذى يعدكم) و اكر اول قولنده صادق
ايسه عذاب دنيا دن سزه ايعاد ايتديكى اصابت ايدر (ان الله لا يهدي
من هو مسرف كذاب) الله تعالى بيناتنه هدايت ايتزم اول كسه به كه فعلنده

(حدى)

حدى تجاوز ايدر و كذبى نفسه حادت ايدر (يا قوم لكم الملك اليوم ظاهرين
فى الارض) يا قوم اشبو ارض مصرده غالبين اولديغكز حالده اشبو
زمانده ملك سزكدر (فن ينصرنا من بأس الله ان جاءنا) اكر انى قتل
ايدر سه كز الله تعالىنك بزه عذابى كديكنده اندن بى كيم خلاص ايدلر بيلور
(قال فرعون ما اريكم الا ما ارى وما اهديكم الا سبيل الرشاد) فرعون
ديديكه سزه رأى و نصيحت ايدر بن انيكه كنديمه ايدر بن اول موسانك
قتل اولنمسير و انكله سزى طريق فلاحه دعوت ايدر بن (وقال الذى
آمن يا قوم انى اخاف عليكم مثل يوم الاحزاب) اول رجل مؤمن انلره
ديديكه يا قوم موسايى تكذيب و اسكا تعرضكزدر قورقريكه ايم
ماضييه ايريشن وقائع مثلى سزه دخى ايريشه (مثل دأب قوم نوح وعاد
و ثمود والذين من بعدهم) قوم نوح وعاد و انلر دنصكره كن ايم كافر نك
رسوللر بى تكذيبلى عادى مثلنك جزاسى سزه دخى ايريشه (وما الله
يريد ظلما للعباد) الله تعالى عبادنه ظلم اراده ايتزم و ظالمى انتقام ايتدم
تخليه ايتزم (و يا قوم انى اخاف عليكم يوم التناد) يا قوم سز شولكونك
عذابندن قورقك كه اول يوم قيامتدر انده ناس برى برلرينه ندا ايدر
اصحاب جنت و اصحاب نار سورة اعرافده حكايه اولديغى كى تنادى
ايديشورلر و موتك ذبحى حينده و اهل جنته و اهل ناره مكانكزدره خالدلر سز
ديو ندا اولنورلر (يوم تولون مدبرين ما لكم من الله من عاصم) شول
كونده كه موقفدن ناره منصرفين اولديغكز حالده كيدر سز و ياخود نارك
زفيرى سزه لاحق اولديغنده ناردن هاربين اولديغكز حالده كيرو كزه
دور سز ايمدى اول حالده الله تعالىنك عذابندن سزى قوتارر يوقدر
(ومن يضلل الله فاله من هاد) اول كسه كه الله تعالى انى هدايت ايتيه
هيچ احد اكهدايته قادر اولمز (واقد جاءكم يوسف من قبل بالبينات)
يوسف بن يعقوب سزه موسادن اول معجزاتله كديكه اول انك سورة
يوسفده حكايه بيوريلن (و ارباب متفرقون خير ام الله الواحد القهار)
قوليدر اوليله اولسه يوسفك و موسانك فرعونى بر اولور و ياخود آباءك
احوالى اولاده نسبت اولوب اول يوسفله مراد انك سبطى يوسف بن ابراهيم
ابن يوسف بن يعقوب اوله (فازلتم فى شك مما جاءكم به حتى اذا هلك قلتم
لن نبعث الله من بعده رسولا) انك سزه كتورديكى ديدن شكده اولمقدن

زائل اولديكز حتى اول وفات ايديك ديديكز كه الله تعالى اندنصكره رسول
بعث ايمز انك رسالتني تكذبلر ينه اندنصكره كنلرك دخي رسالتلر يني
تكذبلر يني ضم ايتديلر وياخود انك رسالتنده شك ايله اندنصكره رسول
بعث اولمز ديو جزم ايتديلر (كذلك يضل الله من هو مسرف مرتاب) اشبو
ضلال كبي الله تعالى عصيانده مخذول ايدر اول كسنه يني كه مشرك بينات
شهادت ايتديكي شينده شا كدر (الذين يجادلون في آيات الله بغير سلطان
اتاهم) شونلر كه آيات اللهده جدال ايدر لر انلره كلش برهانسر بلكه
تقليدله وياشبهه باطله ايله (كبر مقتا عند الله وعند الذين آمنوا) ايمدي
اولوجهله جدالري الله تعالى عندنده ومؤمنلر عندنده مقت اولمسي عظيم
اولدي (كذلك يطبع الله على كل قلب متكبر جبار) اشبو مقت اولسان
جدال مثلني الله تعالى هر قلب متكبر جبار اوزره ختم ايدر (وقال فرعون
ياها مان ابن لي صرحا لعلي ابلغ الاسباب اسباب السموات فأطلع الى اله
موسى واني لاظنه كاذبا) فرعون وزيرى هامانه ديديكه بنهچون برقصر
عالى بنا ايتكه اندن سموك طرق و ابوانته ايريشم سمان سمايه صعو دله
موسانك الهنه مطلع اولم زيرا بن موسايي ظن ايدر مكه رسالت دعوا سنده
كاذب اوله (وكذلك زين لفرعون سوء عمله) وفرعونه سوء قولى تزيين
اولنديغي كبي سوء عملى دخي تزيين اولندي (وصد عن السبيل) واول
سبيل هدادن صرف اولندي (وما كيد فرعون الا في تباب) فرعونك مكري
دكل الاخساردهدر (وقال الذى آمن يا قوم اتبعون اهدكم سبيل الرشاد)
ينه اول رجل مؤمن ديديكه يا قوم بكا اتباع ايدك بن سزى بر سبيله دلالت
ايديكه اكا سلوك ايدن مقصودينه ايرر (يا قوم انما هذه الحياة الدنيا
متاع وان الآخرة هي دار القرار) يا قوم اشبو دار دنيا بر تمتع يسيردر
زوالى سر يعدر و آخرت ايسه دار اقامتدر زوالى يوقدر (من عمل سيئة
فلا يجزى الا مثلها) اول كسه كه بر سيئه ايشليه انك مثليه جزا اولنور
(ومن عمل صالحا من ذكر او انثى وهو مؤمن فاؤلئك يدخلون الجنة
يرزقون فيها بغير حساب) وذكر واثادن اول مؤمنكه عمل صالح
ايشليه ايمدي اول و صفلو كسه لر جنته ادخال اولنوب انده تقدير
وموازنه سز ثواب ايله جزا اولنورلر (ويا قوم مالي ادعوكم الى النجاة
وتدعونني الى النار) ويا قوم بكا خبر ورك بونه حالدر كه بن سزى الله

(تعالى)

تعالى يه ايمانله ناردن نجاته دعوت ايدر بن وسز ايسه بنى شركه
دعوت ايدر سز كه اول نارى موجب اولور (تدعونني لا كفر بالله واشرك به
ماليس لي به علم) سز بنى دعوت ايدر سز كه الله تعالى يه كافر اولم
وشول ربوبيتن بيلديكم شينى اشراك ايدم زيرا كه الوهيته برهاندن
لايددر واني اعتقاد ايقانله صحيح اولور (وانا ادعوكم الى العزيز الغفار)
بن ايسه سزى اول الله تعالى يه دعوت ايدر ينيكه اول صفات الوهيتي
مستجمعدر كه اول كال قدرت و غلبه و مجازاته تمكن و تعذيب و غفرانه
قدرت صاحبيدر (لاجرم انما تدعونني اليه ليس له دعوة في الدنيا
ولا في الآخرة) واجب وحق اولديكه شول بنى عبادتنه دعوت ايتديكز
آلهه كزك دنياده و آخرتده هيچ كيمسه يني عبادتنه دعوتى يوقدر زيرا كه
جاداتدر الوهيته اقتضا ايدر شينى انده معدومدر ويا انك دعوت مستجابه سى
يوقدر (وان مردنا الى الله) ومرجمز موتله الله تعالى يه در
(وان المسرفين هم اصحاب النار) ضلالت و طغيانده اسراف ايدنلر
اصحاب ناردن كه انده مخلدلدر (فستذكرون ما اقول لكم) عذابى
معانيه كز عندنده بنم سزه ديديكم نصيحتى ذكر ايديسر سز حالبو كه اول
ذكر يكر سزه نفع ايمز (وافوض امرى الى الله) بن كندى امرى الله
تعالى يه تفويض ايدم اول بنى هر سوء دن عصمت ايدر (ان الله بصير بالعباد)
الله تعالى عبادنه بصيردر اعماللرين بيلور اكا كوره جزالرين قيلور * اول
بو قولى شول حينده ديديكه اول انلري اسلامه وترك عبادت اصنامه دعوت
ايديك انلر انى قتله قصد ايتديلر اول انلردن فرار ايدوب فرعون انى
طلبهچون بر نيچه كيمسه لر كوندردى (فوقه الله سيئات ما مكروا) الله تعالى
ايسه انى حفظ ايدوب اراده ايتدكلى ضرورى اندن دفع ايلدى حتى كه
موسى عليه السلامه بيله نجات بولدى (وحاق بال فرعون سوء العذاب)
وفرعونه وقومنه عذاب نازل اولديكه اول دنياده غرق و آخرتده ناردن
(النار يعرضون عليها غدوا وعشيا) اول سوء عذاب ناردن كه صباحده
واخشامده انلر اكا عرض اولنور * ابن مسعود رضى الله عنه ايدر آل فرعون
ارواحى سياه قوشلر اجوافنده در هر كون ايكي كره صباحده واخشامده ناره
عرض اولنور يا آل فرعون اشبو سزك ماوا كزدر دينور بو حالت يوم قيامته

دکین انلره مستمر اولور * دینلدیکه هر کافر ک روحی دخی دنیا طور دجه صباحده
واخشامده ناره عرض اولنور * ابن عمر رضی الله عنهما پیغمبر میز صلی الله
علیه وسلمدن روایت ایدر دیکه چقان بریکز وفات ایده اکر اهل جنت ایه
جنتدن واکر اهل نار ایه ناردن صباحده واخشامده طور اخی اکا
عرض اولنور یوم قیامتده الله تعالی سنی اکا کوندر یسر در دینور (ویوم
تقوم الساعة أدخلوا آل فرعون أشد العذاب) یوم قیامتده انلره یا آل فرعون
اشد عذابه کیرک دینور یا خود ملائکه یه آل فرعون اشد عذابه کیردرک دیو
امر اولنور * ابن عباس رضی الله عنهما ایدر انکله مراد الوان عذابدر که
غرق اولند قلدنبر وده کی عذاب اولد قلدنن غیری اشد عذابدر (واذبحوا جون
فی النار فيقول الضعفاء للذين استكبروا انا كنا لكم تبعاً فهل انتم مغنون عنا
نصيبتنا من النار) یا محمد قوم که ذکر ایت شول وقتی که اهل ناردن تخاصم
ایدوب ضعفاری شول ایماندن تکبر ایدن رؤسارینه دیه لر که بز دنیا ده
سزه تابعلر ایدک دیندن بزه امر ایتدی که کزه اطاعت ایدر دیک شول صد دنده
اولدیغمز عذاب ناردن بر جزئی بزدن دفع ایدر مدیکز (قال الذين استكبروا
انا كل فيها ان الله قد حكم بين العباد) اول رؤسا ضعفایه دیه لر که بز وسر
ذنوبدن حصه لیمز دکاو ناردن معذب لرز بز سزندن عذاب دفعنه نیچه قادر
اولورز اکر بزم قدر تمز اولسه انی کندی بزدن دفع ایدر دیک الله تعالی عبادی
بیننده حکم ایتدی که اهل جنت جنته واهل نار ناره کیره انک حکمی ایه
رد ایدر یوقدر (وقال الذين في النار لخزنة جهنم ادعوا ربکم یخفف عنا
یوما من العذاب) ناردن اولان کافرلر جهنمک خازنلرینه دیه لر که ربکز
جل شانیه بزم ایچون شفاعت ایدک که برکون دکاو زمان بزندن عذاب
تخفیف ایده (قالوا أولم تک تأتیکم رسلکم بالبینات قالوا بلی قالوا فادعوا
ومادعاه الکافرین الا فی ضلال) خازنلر انلره دیه لر که سزه رسوللر بکز
دلائل واضحه ایلر کلوب جهنم عذاب ایدر ایدیکن سزه خبر ویرمدیلر می
کافرلر دیه لر که بلی خبر ویردیلدی خازنلر انلره دیه لر که ایددی سز
کندی بکز اکا دما ایدک زیرا که کافرلر ایچون شفاعت ایدر دکالرز
حالبو که کافرلرک دعاسی ضلالده در اجابت اولمز (انا لننصر رسلنا والذین
آمنوا فی الحیاة الدنیا ویوم یقوم الاشهاد) بز رسوللریمزه ومؤمنلره

(نصرت)

نصرت ایدرز اعدالری اوزره دنیا ده جنت وظفر وانتقامله ودخی
یوم قیامتده کی حفظه ملکاری رسوللری ایچون امتلرینه تبلیغله وکفار اوزره
رسوللرینی تکذیبله شهادت ایدرلر * دینلدیکه اشهادله مراد قیامتده
ملائکه وانبیاء ومؤمنیندن ناس اوزره شهادت ایدرلر در والله تعالینک
اشبو نصرت موعوده سی منتقض اولمز اعدانک بعض احیاندن انلره
غلبه سیه که اول امتحان طریق اوزره اولور زیرا که عبرت عواقبدر
بلکه انلر جنتله مخالفلری اوزره منصورلر در * وکاهی انلره اعدالری
قهرله نصرت ایدر وکاهی انلر قتل اولند قلدننصکره اعدالرندن
انتقام ایدر یحیی علیه السلامه نصرتی کبی که انی قتل ایتدک لریچون
انک یرینه یتیم بیک کشی بی قتله انتقام ایتدی (یوم لا ینفع الظالمین
معذرتهم) که اول کونده کافرلره اعتذارلری نفع ایتز زیرا که قبول اولمز
اگرچه اولوقتده کفردن توبه ایدرلر سده ده (ولهم اللعنة) وانلر
رجتدن بعید اولور (ولهم سوء الدار) وانلره جهنمده شدت عذاب اولور
(ولقد آتینا موسی الهدی) بز موسایه معجزات وصحف وشرایعدن دینده
انکله اهتدا اولنور شی ویردک (واورثنا بنی اسرائیل الکتاب هدی
وذكری لاولی الالباب) وموسا دنصکره توراتی بز بنو اسرائیل اراث
ایتدک عقول سلیمه صاحب لینه که اول هدایه وتذکره ویا هادی ومذکر
اولدیغی حالده (فاصبر ان وعد الله حق) یا محمد مشرکینک اذاسنه
صبر ایتکه الله تعالینک نصرله وعدی حقددر اول وعدنه خلف ایتز
(واستغفر لذنبک) ودینک امرنه اقبال ایت واولایی ترکه اولان
فرطانک تدارک ایت واعدانک امرینه اهتمام ایت الله تعالی دن مغفرت
طلبیله کیم اول سنک نصرتکه وامرک اظهارنه کافیدر (وسبح
بحمد ربک بالعشی والابکار) الله تعالی یه عشی وایکارده جدیدی
متلبس اولدیغک حالده نمازه مداومت ایت * دینلدیکه انکله
مراد صلوات خسدر ویاخود صلاة عصر صلاة فجردر ویاخود
نهارک اولنده وآخرنده (سبحان الله وبحمده) دیمکدر (ان الذین
یحادلون فی آیات الله بغير سلطان اتاهم) شونلر که الله تعالینک
آیتلرنده جدال ایدرلر انلره کلمش برهان اولقسزین * دینلدیکه اول آیاتله
مراد قرآندر مشرکین شاتنده نازل اولدیغی تقدیر اوزره * ویاخود

بع (۶)

دجالدر شول سیدنکه یهود دیدلرکه یا محمد بزم صاحبز سن دکلسن بلکه
دجال مسیح بن داود درکه آخر زمانده خروج ایدر سلطنتی بر و بجره ایر
انکله بیله فهرل سیرایدوب کیدر ملکی اول بزه رد ایدر (ان فی صدورهم
الا کبر ما هم بالغیه) انلرک صدورنده دکل الاحق اوزره تکبر و تفکر
و تعلمدن تعظمدر و یا خود اراده ریاستدر و یانبوت و ملک انلرک اولمق تمنیسیدر
ایمدی انلرک اول قبلرنده کی کبره و اصل اولور دکلردر (فاستعذ بالله)
ایمدی یا محمد دجالک فتنه سندن الله تعالی به استعاده ایت (انه هو السميع البصیر)
که اول انلرک اقوالنی ایشیدر و صدرلرنده کی کبری کورر (خالق السموات
والارض اکبر من خلق الناس) سمواتک و ارضک خلقی ناسک خلقندن
اکبردر ایمدی اول الله تعالی که اول ایکیسن عظیمیله اصلنسر ابتاده
خلقه قادر اولدی انسانی ایکنجی کره اصلندن اعادهیه قدرتی اظهر اولور
(ولکن اکثر الناس لا یعلمون) لکن ناسک اکثری کفاردر انی بیلرلر زیراکه
فرط غفلتندن و هو الرینه اتباعلندن تأمل ایتلر (وما یستوی الاعی
والبصیر و الذین آمنوا و عملوا الصالحات و لا المسی) غافل و مستبصر و کذلک
محسن و مسمی مساوی اولمز * اولیه اولسه لایق اولدیکه انلر ایچون بروقت
قبلنه کیم انده تفاوتلری ظاهر اوله که اول بمئذ نصر کرده در (قلیلا
ما تذکرون) اشبو حالی آز کسه لر در که تذکر ایدر (ان الساعة لآتیه
لا ریب فیها) قیامت کلیسر در کلمسند مؤمنلر عندنده ریب یوقدر انک
جواز نه دلالت و اضحه و وقوعنه اجاع رسل اولدیغیچون (ولکن اکثر الناس
لا یؤمنون) لکن ناسک اکثری انی تصدیق ایتلر نظرلری ظاهر محسوسه
مقصود اولدیغیچون (وقال ربکم ادعونی استجب لکم) ربکز جل شانه
سزه دیر که یالکز بکا عبادت ایدک که سزی ثوابلندرم و یا خود بکا دعا
ایدک که سزه اجابت ایدم (قال النبی علیه السلام من لم یدع الله غضب الله
علیه) پیغمبریمز صلی الله علیه و سلم ایدر برکسه که الله تعالی به دعا
ایتمیه الله تعالی اکا غضب ایدر * و یا خود حاجتکزی بدن دیلکز که سزه
انی ویرم اگر مقدر ایه و اگر مقدر دکلسه انی آخرته ادخار ایدوب اندن
افضلی آخرتده سزه ایرکورم (ان الذین یستکبرون عن عبادتی سید خلون
جهنم داخرین) شونلر که بکا عبادت و یا دما دن استکبار ایدرلر
صاغرین اولدقلری حالده جهنمه کربسر لر در (الله الذی

(جمل)

جعل لکم اللیل لتسکنوا فیہ و النهار مبصر) الله تعالی کیجهی سزیکون
خلق ایتدیکه انده استراحت ایده سز و کوندزی خلق ایتدیکه رزق
طلبنه سزه مضی اوله (ان الله لذو فضل علی الناس و لکن اکثر الناس
لا یشکرون) الله تعالی کیجه و کوندزی خلق ایتسبیله ناسه فضل ایدیکه در اکا
هیچ فضل موازی اولمز لکن ناسک اکثری منعمی جهلاریچون و مواقع نعمی
اغفالریچون اکا شکر ایتلر (ذلکم الله ربکم) اشبو الوهیت و ربوبیتی
اقتضا ایدر افعاله مخصوص الله تعالی ربکزدر (خالق کل شیء) که اول
هر شئیک خالقیدر (لا اله الا هو) اندن غیری اله یوقدر (فانی تؤفکون)
اولیه اولسه انک عبادتدن غیرک عبادتته نیجه منصرف اولنورسز (کذلک
یؤفک الذین کانوا بآیات الله یحججون) یا اهل مکه سزک حقندن صرف
اولنمکز کبی آیات الهی تأمل ایتوب حق انکار ایدنلر دخی اندن
صرف اولنور (الله الذی جعل لکم الارض قرارا و السماء بناء) الله تعالی
ارضی سزه قرارگاه و سمایی فوقکزده سقف مرفوع قیلدی (وصورکم
فأحسن صورکم) و سزی تصویر و صورتلریکزی حسن ایتدیکه سزی
منتصب القامه بادی البشره متناسب الاعضاء قیلدی یدیکزله اکل و شرب
ایدر سز و انواع صنعتلر ایشلر سز و نیجه کالاتی اکتساب ایدر سز (ورزقکم
من الطیبات) و حلال و یا مستلذاتدن سزی رزقلندر دیکه اول دوابک
رزق کبی دکلدر (ذلکم الله ربکم) اشبو اشیا بی خلق ایدن ربکز الله
تعالیدر (فتبارک الله رب العالمین) اولکه انی توحید ایدر دیسون اول الله
تعالی به جد اولسونکه عالمک مالک و صانعیدر (هو الحی لا اله الا هو
فادعوه مخلصین له الدین الحمد لله رب العالمین) اول ذات بیچون حیاة
ذاتیه ایله متفرد و متوحد در عبادته لایق و مستحق بر ذات یوقدر انجق
اول واردر چون بویه در ای مؤمنین اول ذات بمثاله عبادت ایدک طاعات
و عباداتی شرک و ریادن اخلاص ایدیچی اولدیغکز حالده الحمد لله رب العالمین
دیچی اولدیغکز حالده (قل انی نهیت ان اعبد الذین تدعون من دون الله
لما جاء فی البینات من ربی) یا محمد مشرکینه دیکل که بن نهی اولنیمکه الله
تعالیدن غیری عبادت ایتدیککز اصنامه عبادت ایدم ربم جل شانه دن بکا
ادله عقلبه دن ماعدا آیات و معجزات کلچک (وامرت ان اسلم رب العالمین)

وامر اولندمكه رب العالمينه انقياد و طاعتى انكچون خالص ايدم (هو الذى خلقكم من تراب ثم من نطفة ثم من علقه ثم يخرجكم طفلا) اول الله تعالى اصلكمزى ترابدن وسزى نطفه دن خلق ايتدى بعده اول نطفه يى دم غليظ منجمد قيلدى بعده سزى امهاتكز بطونندن اطفال چيقارر (ثم لتبلغوا اشدكم) يعنى بوندنصكره بارى تعالى سزى دنياه ابقاء ايلر تاكيم قوت وعقلده كالكره ايره سز (ثم لتكونوا شيوخا) بعده سزى ابقاء ايدر كه پيرلر اوله سز (ومنكم من يتوفى من قبل) وسزك بعضكز كال قوته ويا پيرلكه ايرمدن توفى ايديلور (ولتبلغوا اجلا مسمى) واول سزه بوفعللى ايدر تاكه اجل مسمايه ايره سزكه اول وقت موت ويا يوم قيامتدر (ولعلكم تعقلون) وبونلكه انك وحدانيتن تعقل ايدم سز و ايمانك كه سز (هو الذى يحيى ويميت) اول الله تعالى ارحامده جنينى ديرلدر بعده اجللرى انقضاسنده اولدرر (فاذا قضى امرا فاما يقول له كن فيكون) چن برشيئك ايجادنى اراده ايدم وجوده كل ديمسيله موجود اولور يوخسه انى ايجادده عده وكلفه يه احتياج اولمز (ألم تر الى الذين يجادلون فى آيات الله انى بصرفون) يا محمد بنم اعلامله بيلدىكى شونلر كه قرآن عظيم حقنده الله تعاليدن دكلدر ديو جدال ايدرلر انى تصديقندن نيچه صرف اولنورديلر (الذين كذبوا بالكتاب وبما ارسلنا به رسلا فسوف يعلمون) شونلر كه قرآنى وكتب سماويه جنسى ودخى سائر رسوللر يمه وحى وشرابعدن ارسال ايتديكمزى تكذيب ايتديلر تكذيبك جزاسن بوليسرلدر (اذا الاغلال فى اعناقهم والسلاسل) شول وقتنكه اللرى بيونلرينه تيمورلنور وياقلاينه زنجيرلر اوريلور (يسحبون فى الحديد) شول حرى نهايه ايرمش صوده سوريديلور (ثم فى النار يسجرون) بعده ناردن احراق اولنوب حتى كه وقود نار قيلنورلر انلكه مراد انواع عذابه تعذيب اولنورلر برندن برينه نقل ايديلورلر (ثم قيل لهم انما كنتم تشركون من دون الله قالوا ضلوا عن سبيل لم نكن ندعوا من قبل شيئا) وانلره ناردن احراق اولندقلرندنصكره دينور كه قنى شول اوئانكه انى الله تعالى يه اشراك ايدرديكز * ديه لركه انلر بزذن غائب اولديلر بز انلردن توقع ايتديكمزى بولدىق بلكه بزه متبين اولديكه انلره عبادتمزله برشيئه عبادت ايدر دكلشز زيرا كه انلر بر معتبه شىء دكلر

(يمش)

ايمش (كذلك يضل الله الكافرين) آلهه لر ينك انلردن ضلالى كى الله تعالى كافرلى آخرتده كنديلره نفع ايدر شيئه هدايت ايتز (ذلكم بما كنتم تفرحون فى الارض بغير الحق وبما كنتم تفرحون) اشبو صددنده اولديغكز عذاب سزه شول سبيله دركه دنياه شرك و طغيانكزله اصنامه عبادت ايدر وفرحده توسع ايدر ديكز بعده انلره دينوركه (ادخلوا ابواب جهنم خالدين فيها فيئس مثوى المتكبرين) جهنمك سزه قسمت اولمش دركاته ضلالنده مراتبكز حسبنجه كيرك انده خلودله مقدرين اولديغكز حالده اشبو حقدن تكبر ايدنلره جهنم نه چركين قرارگاه اولور (فاصبر ان وعد الله حق) يا محمد كفارك اذا سنه صبر ايتكه الله تعالىنك كفارى هلاكه وعدى حقدنر لابد اولور (فاما نرينك بعض الذى نعدهم او نتوفينك فالىنا يرجعون) اكر بز يا محمد انلر ايتچون وعد ايتديكمز عذابك بعضنى كه اول قتل واسردر حياتكده سكا كوستررسهوز فيها واكرسن انى كورمدن سنى توفى ايدم وز انلرك رجوعى بزه در آخرتده انلره اشد عذاب ايدرز (ولقد ارسلنا رسلا من قبلك منهم من قصصنا عليك ومنهم من لم نقصص عليك) يا محمد سندن اول بز رسوللر كوندردك انلرك بعضنى سكا خبر ويردك وبعضنى ايسه سكا خبر ويرمدك * زيرا ديتلديكه انيسانك عددى يوز يكرمى درت بيكدر انلردن خبر ويريلن اشخاص معدوده در (وما كان لرسول ان يأتى بآية الا باذن الله) هيچ بررسولاك قدرتى اولديكه معجزاتدن برشىء كتوره مادامكه الله تعالىنك اكا اذنى اوليه زيراكه معجزات عطاياي الهيه در حكمتى مقتضاسنجه انلرك بيننده قسمت ايدوبدر يوخسه انلر ايتچون اختيار يوقدركه مقترحك طلبيله انى اظهار ايدلر (فاذا جاء امر الله قضى بالحق وخسر هنالك المبطلون) چنانكه الله تعالىنك دنياه و آخرتده عذابه امرى كه رسوللره مكذبين بيننده محقى انجاء ومبطلى تعذيله قضا اولنور واقترح آياتله عناد ايدنلر خسارته ايرلر (الله الذى جعل لكم الانعام لتركبوا منها ومنها تأكلون) الله تعالى سزچون انعامى خلق ايتديكه اول ابل وبقر وغنمدر تاكه انك بعضنه ركوب ايدم سز وبعضنى اكل ايدم سز (ولكم فيها منافع) وسزچون اول انعامده البان واوبار وجلودنده منافع واردر (ولتبلغوا عليها حاجة فى صدوركم) تاكه صدور كزده كى

حاجتكزه انك ظهورينه ركوب وسفرله ايره سز (وعليها وعلى الفلك
تحمّلون) و برده ابله و بحرده سفينه لره جل اولنور سز (ويريكم آياته)
الله تعالى سزه كال قدرته و فرط رحته دلالت ايدر آيات عجيبة سين كوستر
(فای آيات الله تنكرون) انك آيتلندن قنغی آيتن انكار ایده بیلور سز
(أفلم یسیروا فی الارض فینظروا کیف کان عاقبة الذین من قبلهم)
انلر یروزنده مسافرت ایتزلر میکه انلردن اول رسوللرین تکذیب ایدنلرک
ما قیتی نیچه اولدیغنه اعتبارله نظر ایدلر (کانوا اکثر منهم واشد قوّة
و آثارا فی الارض) که انلر سنک قومکدن عددده اکثر و قوتده اشد
و یروزنده مبانی قصور و مصانعه اعظم ایدیلر (فما اغنی عنهم ما كانوا
یکسبون) انلره عذاب کلچک دنیا ده کسب ایتدکاری آثارلری انلره نفع
ایتدی (فلما جاءتهم رسلهم بالبینات فرحوا بما عندهم من العلم) وقتا که انلره
رسوللری معجزات و یا آیات و احضاله کلدی رسوللرینک علمنی استحقار ایدوب
کندیلرک عقائد زائغه و شبه داحضه لرینه سوندیلر رسوللرینک علمنه کولشوب
استهزاء ایتدیلر (و حاق بهم ما كانوا به يستهزؤن) و انلره نازل اولدی اول شیئکه
انی استهزاء ایدرلردی * و جائزدرکه اول سونینک رسوللرک اوله شول
وجهدنکه کفارک تمادی جهل و سوء عاقبتلرین کوردیلر کندیلره و یریلان
علمه سونوب الله تعالی به شکر ایتدیلر و کافرلره ایه جهل و استهزاء لرینک
جزاسی ایردی (فلما رأوا بأسنا قالوا آمنا بالله وحده و کفرنا بما کنابه
مشرکین) وقتا که انلر دنیا ده بزم شدت عذابمزی کوردیلر یالکز الله تعالی به
ایمان کتوروب اکا اشراک ایتدی کمز اصنامه کافر اولدق دیدیلر (فلم یکن
ینفعهم ایمانهم لما رأوا بأسنا) بزم عذابمزی کوردکلرنده کی ایمانلری ایه
انلره نفع ایتدی صحیح اولدی (سنة الله التي قد خلقت فی عباده) الله تعالی
سنت ایتدی اشبو سنتی که اول انک عبادنده ماضی و مستر اولدی که اول عذابک
نزولی جیننده کفارله ایمانلری نفع ایتدیلر (و خسرها لک الکافرون)
نزول عذاب جیننده کافرلرک خسراتی تبین ایتدی

سورة حم السجدة وهی اربع وخسون آية مكية

بسم الله الرحمن الرحيم

(حم تنزیل من الرحمن الرحیم) یا محمد حم حقیچون قرآن عظیم شول

(رحمن)

رحمن و رحیم ایله مسمی الله تعالی بدن انزال اولمشدر (کتاب فصلت آیاته)
برکت ایدر که لفظ و معنی اعتبارله آیاتی تمیز اولندی و یاخود فواصل
و معانی اختلافله بعضی بعضندن فصل اولندی و یاخود حق و باطل
بینی فصل اولندی (قرآنا عربیا لقوم یعلمون) قراءت و فهمی آسان
عربی لسانده قرآن اولدیغی حالده شول قوم ایچونکه عربیه بیلورلر
و یا علم و نظر اهلیدرلر (بشیرا و نذیرا) اول قرآن انی تصدیق ایدنلری
جنتله تبشیر ایدر و اکا مخالفت و انکار ایدنلری نارله تخويف ایدر
اولدیغی حالده (فأعرض اکثرهم فهم لا یسمعون) اهل مکه نک اکثری
انی تأمل و قبولدن اعراض ایتدی ایددی انلر انی تأمل و طاعت سمعیله
ایستملر (وقالوا قلوبنا فی اکنه مما تدعونا الیه و فی آذاننا و قرومن بیننا
و بینک حجاب فاعمل اننا عاملون) مکه مشرکلری دیدیلر که یا محمد
شول بزی اکا دعوت ایتدی کک توحیددن قلوبمزه اغطیه و اردر انی فهم
ایتمرز و آذانمزه ثقل و اردر انی ایستمرز و بزمه سنک بینکده حجاب و اردر
انی فهم ایچون سکا و اصل اولمز ایددی سن کندی دینک اوزره عمل ایت
و بزدخی کندی دینم اوزره عمل ایدلم و یاخود سن بزم امریمز ابطالنه
عمل ایت بزدخی سنک دینک ابطالنه عمل ایدرز (قل انما انا بشر مثکم
یوحی الیّ انما الهکم اله واحد فاستقیموا الیه و استغفروه) یا محمد سن انلره
دیگل که بشریتده بندخی سزک ککیمیم الابو که بکا و حی کلدیکه سزی
دعوت ایدم الهکز اله واحد ایدوکن بیلدرم ایددی عقائد و اعمالکزده
اخلاصله استقامت ایدک و سوء عقیده و عملدن اکا استغفار ایدک (وویل
للمشرکین الذین لا یؤتون الزکوة) ویل شونلره کیم توحیدله نفسلرینی
شرکدن تطهیر ایتزلر و یاخود زکاتک و جوبنه اقرار و اعتقاد ایتزلر
و یاخود طاعته انفاق و تصدق ایتزلر و یا اعماللرین تزکبه ایتزلر (وهم
بالآخرة هم کافرون) حالبوکه انلر طلب دنیا به استغراقلندن آخرتی
منکرلردر (ان الذین آمنوا و عملوا الصالحات لهم اجر غیر ممنون)
شونلر که ایمانلرینه اعمال صالحه تقرین ایتدیلر انلر ایچون ضعف
و مرضلری حالنده اجرلری کسلز و اکسدلر بلکه قوت و صحتلری حالنده
شول ایشلیو کلدکلری اعماللرینک اجری کما کان و یریلور (قال النبی
علیه السلام ان العبد اذا کان علی طریقه حسنة من العادة ثم مرض

قبل للملك الموكل به اكتب له مثل عمله اذا كان طليقا حتى اطلقه او اكفيه الى)
 پیغمبر میز صلی الله علیه وسلم ایدر یقان بر عبد عبادتدن بر طریق
 حسنه یه اعتیاد ایسه بعده مریض اولوب اول معتادی اولدیغی عبادتک
 بعضنی ویا کلنی اقامتدن عاجز اولسه انک کاتب اعمالنه دینورکه عافیتده
 ایکن ایشلیو کلدیکی اعمال صالحه سنی کا کان یازغل تاشول وقته دکنکه
 انی عافیه ایردیرم ویا روحنی قبض ایدوب درکاهمه کتورم (قل انکم
 لتکفرون بالذی خلق الارض فی یومین) یا محمد انله دیکل که سز کافر
 اولور میسز اول الله تعالی یه که ارضی ایکی کون دکلو زمانده خلق
 ایلدیکه اول یوم احد ایله اثیندر * دینلدیکه ارضله مراد اجرام
 بسیطه دن جهت سفله اولان شیئر وایکی کونده خلق اولمسیله
 مراد انکچون بر اصل مشترک خلق اولنوب بعده اول صور ایدلمسیله
 انواع اولسیدر وانلرک اکا کفریله مراد ذات و صفاتده الحاد لریدر
 (وتجعلون له اندادا) وانکچون عبادتده شرکاء قیلور سز و الحال
 صحیح اولزکه هیچ شیء اکا شریک اوله (ذلک رب العالمین) ارضی
 ایکی کون دکلو زمانده خلق ایدن ممکناتدن جمیع موجودک خالق
 ومریسیدر (وجعل فیها رواسی من فوقها) واول ارضک
 فوقنده جبال مرتفعه قیلدی تاکه وجوه استبصاردن انده اولان
 اشیاء نظاره ظاهر اوله و انده اولان منافع طلابه معروضه اوله (وبارک
 فیها) وانک خیرنی کثیر ایتدی انده نبات و حیواندن انواع خلق
 ایتسیله (وقدر فیها اقواتها) اول ارضده اناس و بهایمدن اهلنک
 ارزاقنی تقدیر ایتدی هر بلده بر نوع رزق خلق ایتدیکه اول انک
 احراسنده اولیه تاکه بری برلرندن تجارتله معیشت ایدر (فی اربعة ایام)
 خلق ارضی و تقدیر ارزاقی درت کون دکلو زمانده تمام ایتدی
 اولیه اولسه تقدیر ارزاق ایکی کونده یوم ثلاثا ایله یوم اربعاده اولدی
 (سواء للسائلین) مدت اول درتده انحصار بولدی خلق ارض و تقدیر
 اقوات امرندن سؤال ایدنلره جوابده (ثم استوی الى السماء) بعده
 سمایی خلقه قصد ایتدی (وهی دخان) حالبوکه اول دخان هیئتده
 بخار ایدی ایمی سمایی اول بخاردن خلق ایلدی * روایت اولندیکه
 ارض و سمائنک خلقندن اول عرش صو اوزره ایدی الله تعالی اول صویه

(حرارت)

حرارت القاء ایدوب اندن بخار پیدا اولدی بعده اول صویه ریح القاء ایدوب
 اندن زبد پیدا اولدی اول زبددن ارضی واول بخاردن سمایی خلق
 ایتدی (فقال لها وللارض انی انا طوعا او کرها قالتا انینا طاعین) اندن سما
 وارضه دیدیکه ایکزدن ارادتم بودرکه سما اهلچون مقر و اهل ارض
 ایچون سقف اوله وارض ایسه اهلچون مقر و مهاده اوله اشبو ارادتمه
 اختیارله می ویا اضطرارله می انقیاد ایدر سز * ایکسی دخی دیدیلر که
 اختیار مزله انقیاد ایتدک * روایت اولندیکه الله تعالی سمایه دیدیکه
 شمس وقر و نجومکی اخراج ایت وارضه دیدیکه سندنخی نبات و ثمارکی
 اخراج ایت اکر طوعا انی ایدر سز فیهایوخسه سزی اکا کرها الجا ایدرین *
 دیدیلر که یاربنا انی طوعا ایدر انکله مراد کمال قدرتن و مراد انک
 وقوعی و جوبنی اظهار ایدی یوخسه انلرک طوع و کرهنی اثبات دکل
 (فقضین سبع سموات فی یومین) سموات سبعی ایکی کون مقیدارنده یوم
 خیسله یوم جمعه ده آخر ساعتده تمام ایدوب خلقلرندن فارغ اولدی
 (واوحی فی کل سماء امرها) وهر سما اهلنه امر ونهیندن دیلدیکن
 وحی ایتدی ویا خود ملائکه و نیرات خلقی مثلی اموردن تدبیر ایتدیکی
 اشیایی هر سمایه وحی ایتدی (وزینا السماء الدنيا بمصابیح) وسماء
 دنیایی مصابیح کواکبله تزین ایتدک زیرا کواکبک سبعة سیاره دن
 ماعداسی اکرچه سماء سابعه ده مرکوزه در لکن جمعی سماء دنیاده
 کورلدیکچون کانه انده در دینلدی (وحفظا) و بز اول سماء دنیایی
 استراق سمع ایدن شیطیندن حفظ ایتدک (ذلک تقدیر العزیز العلیم) اشبو
 ذکر اولنان صنایع عجیبه قدرت و علمده بالغ الله تعالینک تقدیر ایدر
 (فان اعرضوا فقل انذرتکم صاعقه مثل صاعقه عاد و ثمود) اکر کفار مکه
 اشبو پیانندنصکره بکا ایماندن اعراض ایدر لر سه انله دیکل که
 سزی تحذیر ایدرین شول شدید الوقع عذابله کیم سزه صاعقه
 کبی ایریشه عاد و ثموده ایریشن صاعقه کبی (اذ جاءتهم الرسل
 من بین یدیهم ومن خلفهم) که انله رسوللری هود و صالح جمیع
 جوانلرندن کلوب هر جهتدن انله اجتهاد ایتدی ویا خود زمان ماضی
 جهتدنکه انده کفار ایریشن عذابدن انذارله و مستقبل جهتدن انلر ایچون
 آخرتده اعداد اولنان عذاب ناردن تحذیرله کلوب دیدیلر که (ان لاتعبدوا

الا الله (الله تعالیدن غیری به عبادت ایتمز (قالوا لو شاء ربنا لانزل ملائكة فانا بما ارسلتم به كفرون) انلر رسوللرینه دیدیلر دیکه اکر رب تعالی بزم هدایتی دیلسه بزه رسالتله ملائکه کوندرردی یوخسه آدمی دکل اولله اولسه زعمکز اوزره سزک ارسال اولندیگنر شیئه کافرلر (فاما عا د فاستکبروا فی الارض بغیر الحق) اما عا د قومی ر یوزنده ناس اوزره استحقاق سز تعظم ایتدیلر (وقالوا من اشد منا قوة) قوت وشو کتلیرینه اغترار ایدوب قوتده بزدن اشد کیمدر دیدیلر شول حینده که رسوللری انلره عذاب نزولله تخویف ایتدیلر یعنی بزه عذاب کلدیکنده قوتله دفع ایدرز دیدیلر (اولم یروا ان الله الذی خلقهم هو اشد منهم قوة) انلر بلدیلمیکه انلری خلق وقوی ایدن اوزرلرینه عذاب کوندرن الله تعالی قوت وقدرته انلردن اشددر زیرا که اول قادر بالذاتدر غیرک قادر اولدیغی شیئه قویدر (وکانوا بآیاتنا یحجدون) بزم آیتلریمزی حق ایدوکن بیلورکن انکار ایدرلردی (فارسلنا علیهم ریحاً صرصراً فی ایام نحسات) بز انلر اوزره ریح بارده ارسال ایتدک که شدت برد ایله هلاک ایدردیکه اول ایام مشؤمهده ایدی * دینلر دیکه اول ایام شباطک آخرنده براربعادن براربعایه دکین ایدی امم کافره دن هر قومه که عذاب نازل اولدی الا اول یوم اربعاده ایدی (لذیقهم عذاب الخزی فی الحیاة الدنیا ولعذاب الآخرة اخزی وهم لا ینصرون) تاکه بز انلره دنیاده ذل وهوان عذاب اذاقه ایتدیررز انلرک آخرته کی عذاب ایسه دنیاده کی عذابلرندن اشددر حالبوکه انلر دنیاده و آخرته عذاب الله دن منع اولنملر (واما ثمود فهذیناهم فاستجبوا العمی علی الهدی فاخذتهم صاعقة العذاب الهون بما کانوا یکسبون) اما ثمود قومیکه بز انلره هدی وضلال طریقنی بیان ایتدک انلر ایسه هدی اوزره ضلالی اختیار ایتدیلر اول اجلدن انلری صاعقه عذاب هون اخذ ایدوب هلاک ایتدی شول سببله کیم دنیاده کفر ومعاصیدن انی کسب ایتدیلردی (ونجینا الذین آمنوا وکانوا یتقون) صالح علیه السلام ایله بیلله ایمانه کلانلری اول صاعقه دن انجا ایتدک که انلر بزم عذابمزدن قورقارلردی (ویوم یحشر اعداء الله الی النار فهم یوزعون) ذکر ایت شول کونیکه انده اعداء الله مشرکون و منافقون ناره جمع ایدیلور انلرک اولی حبس اولنورکه آخرلری انلره ایریشه تاکه

(تفرق)

تفرق ایتدیلر اشبو اهل نارك کثیر اولسندن عبارتدر (حتی اذا ما جاؤها شهد علیهم سمعهم و ابصارهم وجلودهم بما کانوا یعملون) حتی چقسانکه انلر ناره حاضر اوله لر شول لسانلرله کتم ایتدکلری کفر ومعاصی به جوارحلری شهادت ایلیدلر قولاقلری ایشتدیکن و کوزلری کوردیکن و فرجلری ایشلیدیکنی تقریر ایلید و یا خود اول جوار حده الله تعالی شول اقتراف ایتدکلری معاصینک آثارین اظهار ایلید حتی که لسان حالله انی سویلید (وقالوا لجلودهم لم شهدتم علينا) کفار جوارحلرینه دیلر که نیچون بزم اوزریمزه شهادت ایتدیکنر حالبوکه بز سزدن عذابی دفع ایچون اقتراف ایتدیکنر معاصی بی کتم ایتشدیک (قالوا انطقنا الله الذی انطق کل شیء) دیلر که بزى الله تعالی سویلیدیکه اول هر چی اولان شیئی سویلدر و یا لسان حالله عامه موجوداتی سویلدر (وهو خلقکم اول مرة) که اول سزى اول مرده دنیاده خلق ایتشدیدی (والیه ترجعون) آخرته اکا رجوع ایدرسز (وما کنتم تستترون ان یشهد علیکم سمعکم ولا ابصارکم ولا جلودکم) سز فواحش ارتکابی عننده فضاحت خوفله دنیاده ناسدن استتار ایدردیکنر هیچ ظن ایتزدیکنر که اعضا کز اوزریمزه شهادت اید تاکه اندن استتار ایدیدیکنر (ولکن ظننتم ان الله لا یعلم کثیراً مما تعملون) لکن ظن ایدردیکنر که اعمالکز کثیرنی الله تعالی بیلید اول اجلدن اقتراف معاصی به جرأت ایدردیکنر (وذلكم ظنکم الذی ظننتم بربکم ایدیکم فاصبحتم من الخاسرین) الله تعالی به اشبو سوء ظنکزدرکه سزى اهلاک ایدوب مغبونلردن اولدیکنر (فان یصبروا فالتار مثنوی لهم) اکر یوم قیامته انلر آلهلری اوزره صبر ایدرلرسه مأوالری ناردر (وان یستعجبوا فاهم من المعبین) واکر عمللرینی اصلاح ایچون دنیاه رجوع طلب ایدرلرسه رجوعه اجابت اولنملر (وقبضنا لهم قرناء فزینوا لهم ما بین ایدیم وما خلفهم) وقتاکه انلر کفر اوزره دنیاده تصمیم ایتدیلر اوزرلرینه شیطین تسلیط والزام ایتدک که حب دنیایی و اتباع هوایی تزین ایدلر و آخرته بعث و حساب یوقدر دیوب اکا کفر و انکاره کیدلر (وحق علیهم القول فی امم قدخلت من قبلهم من الجن والانس انهم کانوا خاسرین) و اوزرلرینه کلمه عذاب واجب اولدی شول امم جلّه سندنکه مکّه کافرلرندن اوکدین جن وانس دن هلاک اولوب

یکم شدی ایمدی انلرک جیعی عقوبت ابدیه ایله خاسرین ایدیلر (وقال الذین کفروا لاتسمعوا لهذا القرآن والغوا فيه لعلکم تغلبون) کافرلر دیدیلر که اشبو قرآن قراءته انصصات ایتکز بلکه کلام غیره مفهوم و کثرت هذیان و رفع اصواتله اکا معارضه ایدک تاکه قارئک قراءته غالب اولوب انی اسکات ایدسز (فلنذیقن الذین کفروا عذابا شديدا ولنجزينهم اسوء الذي كانوا يعملون) تاکه بز اول قولى سويلينله و يا عامه کافرله عذاب شديد اذاقه ایدوز و اعمال سيئه لرینک اسويله جزا لندیره وز (ذلك جزاء اعداء الله النار) اشبو اذاقه عذاب و یا خود اسوء اعمالله جزاء اعداء الله جزا سیدر که اول نارد (لهم فيها دار الخلد) انلر ایچون اول نارد دار اقامت وارد (جزاء بما كانوا باياتنا ينجحون) تاکه بز ایتلریمزه انکار لرینه و یا ابد لغوا ایتدکارینه جزاء اوله (وقال الذین کفروا ربنا انا اللذین اضلانا من الجن والانس نجعلهما تحت اقدامنا لیکونا من الاسفلین) کافرلر دیدیلر که یاربنا جن و انس شیطانلرندن بزى ضلالت و عصیانله حل ایدلری کوسر کل که انلری یاغز التنده چکنمکه نارد درک اسفله ایرکوره وز (ان الذین قالوا ربنا الله ثم استقاموا) شونلر که ربمز الله تعالیدر دیوب انک ربوبیتنه اعتراف و وحدانیتنه اقرار لرند نصکره عملده استقامت ایتدیلر سرده و جهرده اخلاصله و الله تعالینک غیریدن خوف و رجایی ترکله (تنزل علیهم الملائكة) انلره موت عندنده و قبره کیردکارنده و قبردن چیققدقلرنده بشارتله ملائکه نزول ایدرلر و دیرلر که (الاتخافوا ولا تحزنوا) تقدم ایده جکر آخرت امورینه خوف ایتکز و تخلیف ایتدیکزه محزون اولمکز (و ابشروا بالجنة التي كنتم توعدون) و سزه بشارت اولسون شول جنتکه دنیاده رسوللر لسانیه وعد اولمشدیکز (نحن اولیاءکم فی الحیاة الدنیا و فی الآخرة) و اول ملائکه دیرلر که بز سزک انصار و احبابکز دنیاده سزه حق الهام و خیره سزی تحمیل ایدرلر و آخرته سزدن مفارق اولمز (ولکم فیها ما تشتهی انفسکم) و سزیکون آخرته لذائذن نفسلریکز اشتها ایتدیکی وارد (ولکم فیها ما تآمنون) و دخی سزیکون انده طلب ایتدیککز وارد (نزل من غفور رحیم) اول غفور رحیم سزه رزق مهیا اولدیغی خالده * اشبونده اشعار وارد که انلرک تمنی ایتدکاری شول بالارینه خطور

(ایمین)

ایمین اشبادن ویریلنه نسبتله ضیفه نزل کبیر (ومن احسن قولا ممن دعی الى الله وعمل صالحا وقال اننی من المسلمین) قولده شول کسینه دن احسن کیدر که الله تعالینک دعوتنه اجابتند نصکره اول اجابت ایتدیکی شیئه ناسی دعوت ایدو و اجابتنده عمل صالح ایدو و اسلامی دین و مذهب اتخاذا ایدوب بن مسلمیندم دیو انکله تفاخر ایدو * دینلدیکه اشبو آیت صفات مذکوریه مستجمع حقنده عامه در * دینلدیکه پیغمبریمز صلی الله علیه وسلم و یا خود مؤذنین حقنده نازل اولوبدر (ولا تستوی الحسنة ولا السيئة) حسنه و سیئه جزاده حسن عاقبتده برابر اولمز * دینلدیکه یعنی غضب عندنده صبر و جهل عندنده علم و اساءت عندنده عفو ضدی کبی دکدر (ادفع بالتي هي احسن) سکا سیئه اعتراض ایتدکده انی اندن احسن شیئه یعنی حسنه ایله دفع ایت یعنی غضبی صبرله و جهلی علمله و اساءتی عفو له دفع ایت (فاذا الذي بينك وبينه عداوة كأنه ولي حميم) اگر سن بو فعلی ایدرسک شول رجل که سنکله انک بیننده عداوت اوله سکا ولی شفیق کبی اولور (وما یلقیها الا الذین صبروا) اشبو خصلت حسنه که اساءتی احسان ایله مقابله ایتکدر ویرلر الا آنلره که صبرله نفسلرین انتقامدن منع ایدرلر (وما یلقیها الا ذو حظ عظیم) اول خصلت حسنه ویرلر مکر اولکله خیر و کمال نفسدن حظ عظیم صا حیدر * دینلدیکه اول حظ عظیمه مراد جنتدر یعنی اول ویرلر الا اکا که انکچون جنت واجب اولوبدر (واما ینزعنک من الشیطان نزغ فاستعذ بالله) اگر سنی شیطاندن برنازغ و سوسه سیله سکا و صیت اولنان اساءتی احسانله دفعدن صرف ایدرسه انک شرندن الله تعالی به استعاذه ایت که اول سنی اندن عصمت ایدو (انه هو السميع العليم) اول سنک استعاذه کی ایشیدر و نیتکی بیلور (ومن آیاته الیل والنهار والشمس والقمر) اول الله تعالینک وحدانیتنه علامتدن لیل و نهار و شمس و قمر در ایمدی انی ربکز دن بیلک (لا تسجدوا للشمس ولا للقمر) شمس و قمر عبادت ایتکز زیرا ایکسیدخی سزک کبی مخلوقدر (واسجدوا لله الذی خلقهن) بلکه اول الله تعالی به عبادت ایدک که اول درت شیئی اول خلق ایتدی (ان کنتم ایاه تعبدون) اگر اکا عبادت ایدرسکز (فان استکبروا) اگر مشرکون امثالدن تعظم ایدرلر سه

(فَالَّذِينَ عِنْدَ رَبِّكَ يُسَبِّحُونَ لَهُ بِاللَّيْلِ وَالنَّهَارِ وَهُمْ لَا يَسْأَمُونَ) شول ملائكه كه ربكز جل شانہ عندند در لیل و نهارده علی الدوام انی تسبیح و تقدیس ایدر لر اندن فاتر و ملول اولزلر * ابو حنیفه عندند سجده اشبو محله در زیرا كه معنائك تمامی انده در اما كه شافعی عندند آیت اولی ده در سجود امری اكا مقترن اولدیغیچون (ومن آیاته انك ترى الارض خاشعة) اول الله تعالینك وحدانیتنه علامتندركه ارضی كورر سنكه یابسه در نباتی یوقدر (فاذا انزلنا عليها الماء اهتزت وربت) چنانكه اول ارض یابسه نك اوزره یغمور یاغدیره وز اول ارض تر خرف ایدر و نبات ایچون یشللانوب آرتر (ان الذين احياها لحيي الموتى) اول الله تعالی كه ارضی یاغور ایله دیر كورر یوم قیامتده موتایی دخی دیر كورر (انه على كل شيء قدير) زیرا كه اول احیاء و اماتهدن هر شیء قاددر (ان الذين يلحدون في آياتنا لا يخفون علينا) شونلر كه بزم آیتلریز امرنده طعن و تحریفله و تأویل باطلله و یا الغالبه استقامتدن میل ایدر لر انلر بزدن کیرلنزلر بلکه بز انلره اول فعللریك جزاسن ایدرز (أفنبليقي في النار خير ام من يأتي آمنا يوم القيامة) شول كسه می خیر ایدر كه یوم قیامتده ناره بر اغیله و یا اول كسه می كه اول كو نك مخاو فندن امین اولدیغی حالده كله (اعملوا ما شئتم انه بما تعملون بصير) ایمدی خیر و شردن دیلدیككزی ایشلکز اول سنك اعمالكزی كورر اكا كوره جزا كزی ایر كورر (ان الذين كفروا بالذکر لما جاءهم) شونلر كه انلره قرآن كلدیكنده اكا كافر اولدیلر انلر كفرلریك جزاسن كورر لر (وانه لكتاب عزيز) حالبو كه اول كتاب كثیر النفع عديم النظیر در اختلاف و تناقضدن محمیدر (لا يأتیه الباطل من بین یدیه ولا من خلفه) جهاتك هیچ برندن و یا انده اولان اخبار ماضیه و امور آتیهدن اكا باطل تطرق ایتمز حتی كه مبطلین تأویلات فاسده ایله اكا تعرض ایتمز كلرنده علمادن بر قومی انلر اقاویل بطلانی اظهاره تعیین ایدر * اویله اولسه اكا تعریفله انك اعجازی زیاده اولور (تنزيل من حکیم حید) زیرا كه اول امرنده حکیم فعلنده محموددن منزلدر (ما یقال لك الا ما قد قبل للرسول من قبلک) یا محمد قومك كفاری سكا دیمزلر الاسندن اول چکن رسوللره قوملریك كفاری دیدكاری مثلی دیر * و یا خود الله تعالی سكا دیمز الا

(انی)

انی كه سندن اول چکن رسوللره دیمشیدی (ان ربك لذو مغفرة وذو عقاب الیم) ربك جل شانہ اولیاسنه مغفرت واعداسنه عقاب ایدیمیدر (ولو جعلناه قرآنا انجیالقالوا لولا فصلت آياته انجی وعربی) اكر بز سكا انزال ایدیمكز كتابی لغت عربیه نك غیری اوزره قیلسمیدق دیلر ديكه نولیدی انك آیاتی بزم فهم ایدم چكمز لسانله بیان اولمش اولیدی كلام انجی و مخاطب عربیدر دیو انكله تكذیلری اشد اولیدی (قل هو للذين آمنوا هدى وشفاء) دیکل كه اول قرآن مؤمنلره هدادر و صدرلرنده اولان شك و شبهه شفا در (والذين لا يؤمنون في آذانهم وقر وهو عليهم عى) و شونلر كه قرآنی تصدیق ایتمزلر اول انلر ك آذانه ثقلدر ومع ذلك اول انلره عمارد زیرا كه انلر انی ایشیدوب قبول ایتمزلر و كوروب فهم ایتمزلر (اولئك ينادون من مكان بعيد) ایمدی انلر انی ایشتمزلر و فهم ایتمز لكده شول كسه یه بکزرلر كه مكان بعیددن چغیرلسی سیبیلله كلامی ایشتمیه و فهم ایتیه (ولقد آتينا موسى الكتاب فاختلف فيه) بزموسایه توراتی ویردك تصدیق و تكذیبله انده اختلاف اولندی قرآنده اختلاف اولندیغی كبی (اولولا كلمة سبقت من ربك لقضى بينهم) اكر ربك جل شانہ دن قرآنی تكذیب ایدنلره تأخیر عذابله كله سبقت ایتیمیدی بیلرنده مكذبینه استیصال قضا اولنه ایدی اندن اول چكملره قضا اولندیغی كبی (وانهم لفي شك منه مريب) حالبو كه یهود و قومكدن ایمانه ككشلی توراتدن و یا قرآندن شكده درلر (من عمل صالحا فلنفسه ومن اساء فعليها) اول كسسه كه عمل صالح ایشلیه ثوابی كندویه در و اولكه عمل سیئ ایدم و بالی كذاك كندویه در (وما ربك بظلام للعبيد) ربك جل شانہ عبیدنه ظلم ایدر دككدر ذنبسز كسه یه عذاب ایتمز (اليه يرد علم الساعة) قیامتدن سؤال اولندقه انك علمی اكاردا اولنور * زیرا انك نوقته اوله جفنی اندن غیری احد بیلز (وما تخرج من ثمرات من اكمامها وما تحمل من انثى ولا تضع الا بعلمه) و شماردن اولكه اوعیه سندن چیقار و انشادن اولكه بر ولدی حامل اولور و یا وضع ایدر الا انك علمنه مقرون اولدیغی حالده اولور یعنی انك رحیده نوصف اوزره خلق اولدیغی و هر زمان و مكانده نوصف اوزره بولندیغن واجل و رزق و عاقبت بیلور (ويوم يناديهم اين شركائي قالوا

اَذْنًاكَ مَا مَنَا مِنْ شَهِيدٍ) يَوْمَ قِيَامَتِهِ رَبُّكَ جَلَّ شَانُهُ كَفَارُهُ دِيرَكَ قُنَى
مَعْبُودِ لِيَكُنْ اَنْلَرِي بَكَا شَرَكَا زَعَمَ ايدِر دِيكُز اَنْلَر دِيه لَرَكِه يَار بِنَا بَز سَكَا
اَعْلَامِ اَيْدِيكَ كِه سَكَا مَعَادِل وَمَشَارِكْ اَوْلَدِيغْنَه بَز دِن هِيچ اَحْد شَهَادَتِ ايدِر
يَوْ قَدَر زِيرَا كِه بَز اَنْلَر دِن تَبَرِي اَيْتَشُر شَوْل وَقْتَدَه كِه حَال بَزَم زَعَم
اَيْتَدِيكُمَز مَنَوَال اَوْزَرَه دَكَل اَيْدِيكُن بِيئَشُر (وَضَلَّ عَنْهُمْ مَا كَانُوا
يَدْعُونَ مِنْ قَبْلِ وَظَنُوا مَا لَهُمْ مِنْ مَحِيصٍ) وَاَوَّل كُونْدَه اَنْلَر دِن غَائِب
اَوَّلَه شَوْل مَعْبُود لَرِيكِه دَنِيَادَه اَكَا عِبَادَتِ ايدِر لَر دِي وَتَيَقَن اَيْدِه لَرَكِه
اَنْلَرَه نَار دِن فَرَارَه چَارَه يَوْ قَدَر (لَا يَسْأَلُ الْاِنْسَانُ مِنْ دَعَاءِ الْخَيْرِ)
كَافِر جَسَد نَدَه عَافِيَتِ وَرَزَقْتَدَه وَسَعَتِ طَلْبِنْدِن مَلُول اَوْلَز (وَإِنْ مَسَّهُ الشَّرُّ
فَيُؤْسِقُنُوهُ) وَاَكْرَا كَا شَدَتِ وَضَيْقِ اِيْرَسَه اَللّهُ تَعَالِيكَ فَضْل وَرَجْتَدِن
اَمِيدِن قَطْعِ ايدِر حَتَّى كِه اَنْدَه يَأْسِ اَثَرِي ظَاهِر اَوْلُور (وَلَنْ اَذْقَنَاهُ
رَحْمَةً مِّنْ اَعْدَائِهِمْ اَوْ رَحْمَةً مِّنَّا اَوْ رَحْمَةً مِّنْ رَبِّكَ) وَاَكْرَبَز اَكَا شَدَتِ
اَصَابَتْدِن نَصْرَه سَعَتِ وَعَافِيَتِ اِيْر كُور سَه وَز دِيرَكِه بَن بُو كَا فَضْل وَعَمَلْلَه
مُسْتَحَقِ اَوْلَشْن وَيَاخُود بُو بَكَا دَائِمْدِر (وَمَا اِظْنُ السَّاعَةِ قَائِمَةٌ) وَظَن
اَيْتَزِيكِه قِيَامَتِ اَوَّلَه (وَلَنْ رَجَعْتَ اِلَى رَبِّيْ اِنْ اِلَى عِنْدِهِ لِلْحِسْبَى) دِيرَكِه
اَكْر قِيَامَتِ اَوْلُوب رِيْمَه رَجُوعَم تَقْدِيرِي اَوْزَرَه بَن اِيچُون اَنْك عِنْدِنْدَه
كِرَامَتْدِن حَالَتِ حَسَنِي اَوْلُور شَوْل اَعْتِقَادْلَه كِيَم نَعَم دَنِيَادِن اَوْلَكِه اَكَا
اَصَابَتِ ايدِر آخِرْتَدَه اَوْل اَنْدِن مَنَفَكْ اَوْلِيَه (فَلَنَنْبِئَنَّ الَّذِينَ كَفَرُوا بِمَا عَمِلُوا)
بَز كَافِرْلَه حَقِيقَتِ اَعْمَالْلَرِيْن خَبَر وَيَرَز وَانْدَه اَعْتِقَادِ اَيْتَدِ كَلَرِيْنك
عَكْسِن كُوسْتَرَز (وَلَنَذِيقَنَّهُمْ مِنْ عَذَابٍ غَلِيظٍ) وَبَز اَنْلَرَه عَذَابِ غَلِيظْدِن
اِذَاقَه ايدِر زَكِه اَنْدِن اَنْفَكَا كِه اَمَكَا نَلَرِي اَوْلَز (وَإِذَا اَنْعَمْنَا عَلَى الْاِنْسَانِ
اَعْرَضَ وَنَأَى بِجَانِبِهِ) چَاَن بَز اَنْسَانَه اَنْعَامِ اَيْتَسَه وَز بَزَه شُكْر وَطَاعَتْدِن
اَعْرَاضِ اَيْدُوب تَكْبَرِ وَاسْتِغْنَاْلَه كِنْدُوي بَزَه دَعَادِن صَرْفِ وَتَبَعِيدِ ايدِر
(وَإِذَا مَسَّهُ الشَّرُّ فَنَدُوْا دَعَاءَ عَرِيضٍ) وَاَكْرَا كَا شَدَتِ وَفَقْرِ اِيْرَسَه اَوْل دَعَايِ
طَوِيلِ وَكَثِيرِ ايدِر اَوْلُور (قُلْ اَرَأَيْتُمْ اِنْ كَانَ مِنْ عِنْدِ اَللّهِ ثُمَّ كَفَرْتُمْ بِهِ
مِنْ اَضَلِّ اَمِّنْ هُوَ فِي شَقَاقٍ بَعِيدٍ) دِيكَل كِه بَكَا خَبَر وَيَرَكِه اَكْر قُرْآنِ اَللّهِ
تَعَالَى عِنْدِنْدِن اِيكُن تَأَمَّلِ صَحِيحِ اَيْتَدِيْن عَنَادَا اَكَا كَافِر اَوْل سَكَز دَنِيَادَه
وَيَا يَوْمَ قِيَامَتَدَه سَزَه عَذَابِ نَازِلِ اَوْلَدِيغْنَدَه سَزَدِن اَضَل كِيَم اَوْلُورَكِه
سَز حَقْدِن خِلَافِ بَعِيدَدَه سَز (سَنُرِيْهِمْ آيَاتِنَا فِي الْاَفَاقِ) بَز اَنْلَرَه قَدَر تَمَزَه

(دلالت)

دَلَالَتِ ايدِر عَلَامَتْلَرِيْمَزِي اَفَاقِ اَرْضَدَه كُوسْتَرَز كِه مُحَمَّد عَلَيْهِ السَّلَام اَنْلَرَه
حَوَادِثِ آتِيَه وَآثَارِ نَوَازِلِ مَاضِيَه دِن خَبَر وَيَرْدِي وَاَكَا وَخِلْفَاسَنَه خَارِقِ
عَادَه وَجَهِي اَوْزَرَه مِمَّا لَكِ شَرْقِ وَغَرْبِه قَتَحِ وَظَفَرِيْن تَبَسِيْرِ اَيْتَدِي
(وَفِيْ اَنْفُسِهِمْ) وَدَخِيْ نَفْسْلَرِنْدَه كُوسْتَرَز بَدَلْنَرِنْدَه كِي صَنَائِعِ عَجِيْبَه كِه اَنْك
كَمَلِ قَدَر تَسَه دَلَالَتِ ايدِر (حَتَّى يَتَبَيَّنَ لَهِمْ اَنْهَ الْحَقُّ) تَا كِه اَنْلَرَه قُرْآنِ
وَيَا رَسُولِ وَيَا تَوْحِيدِ حَقِ اَيْدِيكِي مَتَبَيَّنِ اَوَّلَه (أَوَلَمْ يَكْفِ بِرَبِّكَ اَنْهَ عَلَى
كُلِّ شَيْءٍ شَهِيدٌ) يَا مُحَمَّد سَكَا رَبُّكَ كَفَايَتِ اَيْتَزِيكِه اَوَّلِ هَر شَيْئَه شَهِيدْدِر
آيَاتِ مَوْعُودَه اَظْهَارِيْلَه اَمْرِكِي تَحْقِيْقِ ايدِر سَاثَرِ اَشْيَايِ مَوْعُودَه يِي تَحْقِيْقِ
اَيْتَدِيكِي كِي وَيَاخُودِ اَنْسَانِي مَعَاصِيْدِن مَنَعَه رَبُّكَ تَعَالِيْكَ هَر شَيْئَه مَطْلَعِ
اَوْلُوب اَكَا هِيچ بَر شَيْءِ خَفِيْ اَوْلَدِيغِي كَفَايَتِ اَيْتَزِي (أَلَا اَنَّهُمْ فِيْ مَرِيْبَةٍ مِنْ
لِقَاءِ رَبِّهِمْ) آكَاهِ اَوْلَغَل كِه اَنْلَر رَبِّ تَعَالَى يَه لَقَار نَدِن شَكْدَه دَر *
زِيرَا كِه اَنْلَر بَعَثِ وَجَزَائِي اَنْكَارِ ايدِر لَر (أَلَا اَنْهَ بِكُلِّ شَيْءٍ مُّحِيطٌ) آكَاهِ اَوْلَغَل كِه
اَللّهُ تَعَالَى عِلْمِ وَقَدَر تَلَه هَر شَيْئَه مُّحِيطْدِر

سورة الشورى وهى ثلاث وخسون آية مكية

بسم الله الرحمن الرحيم

(حَمْدُ عَسَقِ) اَللّهُ تَعَالِيْكَ حِلْمِ وَمَجْدِ وَعِلْمِ وَسَنَاءِ وَقَدَرْتِي حَقِيقُون *
اِبْنِ عَبَّاسِ رَضِيَ اَللّهُ عَنْهُمَا ايدِر هِيچ بِرِصَاحِبِ كِتَابِ نَبِيْ يَوْ قَدَر كِه
اَلَا اَكَا حَمْدُ عَسَقِ وَحِيْ اَوْلُوبْدِر اَوْلِ اَجَلْدِن دِيْنَلْدِيكِه (كَذَلِكَ يُوْحِي
اِلَيْكَ وَالِىَ الَّذِينَ مِنْ قَبْلِكَ اَللّهُ الْعَزِيْزُ الْحَكِيْمُ) اَشْبُو سُوْرَه دَه كِي مَعَانِيْ مَثَلْنِي
سَكَا وَسَنْدِن اَوَّلِ رَسَالْلَرَه وَحِيْ اَيْدِيكَ اَوْلِ اَللّهُ تَعَالَى كِه وَحِيْنِيْ تَصْدِيْقِ
اَيْتَمِيْلَرَه اَنْتَقَامْلَه غَالِبْدِر خَلْقِ وَاَمَاتَه وَبَعَثِ وَجَزَاءِ اَمْرِنْدَه حَكِيْمْدِر (لَهُ مَا فِى السَّمَوَاتِ
وَمَا فِى الْاَرْضِ) سَمَوَاتِ وَارْضِ وَايكِيْسِنْدَه اَوْلَانِ اَشْيَانِكْ كَلِيْسِي اَنْك خَلْقِ
وَمَلِكِيْدِر (وَهُوَ الْعَلِىُّ الْعَظِيْمُ) اَوْلِ شَرِيْكَ وَوَلَدْدِن مَنَزَه وَعَالِيْدِر وَذَاتِ
وَصِفَاتَدَه عَظِيْمْدِر خَلْقِ اَوْزَرَه قَدَرْتِ وَحَكْمَدَه اَنْدِن اَعْظَمِ يَوْ قَدَر
(تَكَادُ السَّمَوَاتُ يَتْفَطَّرْنَ مِنْ فَوْقِهِنَّ) قَرِيْبِ اَوْلُور كِه سَمَوَاتِ اَللّهُ تَعَالِيْكَ
عَظِيْمْتْدِن وَيَا اِنِّىْ وَلَدِ اَنْخَازِ اَيْتَدِي دِيْمَسْنَدِن اَرْضِيْن سَبْعَكْ فَوْقْدِن
مَنْشَقِ اَوَّلَه (وَالْمَلَائِكَةُ يَسْجُدُونَ بِحَمْدِ رَبِّهِمْ) سَمَوَاتِ سَبْعَدَه وَحَوْلِ عَرَشَدَه
اَوْلَانِ مَلَائِكَه وَحِلْهٗ عَرَشِ رَبْلَرِي جَلَّ شَانُهُنْكَ عِبَادَتْدَه دَائِمِ اَوْلُوب

بع (۷)

عظمتنه خضو عله اکا جد ايدرلر (ويستغفرون لمن في الارض)
 ويرپوزنده اولان مؤمنلر ايچون استغفار ايدرلر (الا ان الله هو الغفور الرحيم)
 آگاه اولك كه الله تعالى انلك ذنوبن مغفرت ايدر و آخرتده ثوابلرين
 اير كورمكله رحمت ايدر (والذين اتخذوا من دونه اولياء) شونلر كه
 الله تعالىدن غيري شركاء اتخاذا ايدوب اكاه عبادت ايدرلر (الله حفيظ
 عليهم) الله تعالى انلك اعمال واحوالنه رقيبدر و جزالرين ايدر
 (وما انت عليهم بوكيل) يوخسه سن انلر اوزره موكل ويا انلك امري
 سكا موكل دكلدر (وكذلك اوحينا اليك قرآنا عربيا) اشبو ذكر
 اولان كبي سكا قرآن عربي وحى ايتدك (لتنذر ام القرى ومن حولها)
 تا كه اول قرآنله مكه اهلى وانك حولنده كل ارض اهلى ائدار ايدنه سن
 (وتنذريوم الجمع لاريب فيه) ويوم قيامتله ائدار ايدنه سنكه انك اولمسنده
 و خلايق انده موققه جمع اولمسنده ريب يوقدر وانده خلايق موققه جمع
 اولدقلرند نصكره ايكي فرقه اولورلر (فريق في الجنة وفريق في السعير)
 بر فرقه سي مؤمنلردر جنتده اولورلر و بر فرقه سي كافرلردر ناردده اولورلر
 (ولو شاء الله لجمعهم امة واحدة) اكر الله تعالى ديلسه انلري هدايت
 وياضلا لئدن دين واحد اوزره قيلوردى (ولكن يدخل من يشاء في رحته)
 لكن الله تعالى ديلديكي كسه بي هدايتله و طاعته حمله جنته ادخال ايدر
 (والظالمون ما لهم من ولي ولا نصير) اول كونده كافرلره صديق اولز كه
 انلر ايچون شفاعت ايدنه و ناصر دخی اولز كه انلردن عذابى منع ايدنه
 (ام اتخذوا من دونه اولياء) يوخسه انلر آلهه لر بى الله تعالىدن غيري
 اولياى اتخاذا ايدلر (فالله هو الولي) اكر انلر بحق اولياء اراده ايدرلر سه
 الله تعالى بحق وليدر (وهو يحيى الموتى) اول يوم قيامتده موتاي ديركورر
 (وهو على كل شيء قدير) واول هر شيئه قادر در (وما اختلافتم فيه
 من شيء فحكمه الى الله) دين و دنيا امورندن بر شيئهده كه سز كفارله
 اختلاف ايدنه سز انك حكيمى الله تعالى به مفوضدر محق مبطلدن اثابه
 و معاتبه ايله تميز ايدر * ديلديكه متشابه تاويلندن اختلاف ايتديكيز
 شيئهده كتاب اللهدن محكمه رجوع ايدك (ذلكم الله ربى) اشبو مختلفين
 باندده الله تعالىدر كه بنم ريمدر (عليه توكلت واليه انيب) مجامع امورمده
 اكاه توكل ايتدم و معضلاتده اكاه رجوع ايدرلر (فاطر السموات والارض)

(كه)

كه اول سموات وارضك خالقيدر (جعل لكم من انفسكم ازواجا) اول
 سز ايچون كندى جنسكردن نساء خلق ايتدى (ومن الانعام ازواجا)
 وكذلك انعام ايچون كندى جنسكردن ازواج خلق ايتدى وياخود
 انعامدن سز ايچون اصناف ويا ذكور واناث خلق ايتدى (يذروكم فيه)
 اول تدبيرده ناس و انعامدن هر ريكرى تكثير ايدر (ليس كمثله شيء) انك
 مثلى شيء يوقدر كه اكاه مزاج و مناسبات اوله (وهو السميع البصير) اول
 هر شيئي سميع و بصيردر (له مقاليد السموات والارض) سموات وارضك
 مطر و نبات خزائنى انكدر (يسط الرزق لمن يشاء ويقدر) اول رزقى وفق
 مشيتى اوزره ديلديكي كسه به كاهى بسط و كاهى قبض ايدر (انه بكل
 شيء عليم) اول عبده توسيع و تضيق و غيردن خير اولانى يلور
 (شرع لكم من الدين ما وصى به نوحا والذى اوحينا اليك وما وصينا به
 ابراهيم وموسى وعيسى) الله تعالى سزه دين اسلامدن بر شرعه بي بيان
 ايتديكه اول رسل كسار بيننده مشركه در اتى نوح عليه السلامه
 طوفاندر نصكره امر ايتدى و دخی انيكه يا محمد سكا وحى ايتدك و انيكه
 ابراهيم وموسى وعيسايه امر ايتدك اول بودر كه (ان اقيموا الدين
 ولا تفرقوا فيه) دينى اقامت ايدنه سز كه اول تصديق واجب اولانه ايمان
 واحكام اللهده اطاعتدر يوخسه انده تفرق و اختلاف ايتده سز كه اول
 اصلدر اما كه فروع شرع اتمك اختلاف احوالى حسبجه اولديغى مختلف
 اولور (كبر على المشركين ما تدعوهم اليه) مشركلره عظيم اولدى
 توحيدكه سز انلري اكاه دعوت ايدر سز (الله ينجي اليه من يشاء ويهدي
 اليه من ينيب) الله تعالى توحيدنه ديلديكي كسه بي اختيار ايدر و ارشاد
 و توفيقيله اكاه هدايت ايدر انيكه اكاه اقبال ايدر (وما تفرقوا الا من بعد
 ماجاءهم العلم بغيا بينهم) ام سالفه ويا اهل كتاب تفرق ايتديلر الا اول تفريقك
 ضلال ايدو كنى بلدكارند نصكره رسول كنديلرندن اولميوب عربدن اولديغنه
 حسد ايدوب اكاه التفات ايتديلر (ولولا كلمة سبقت من ربك الى اجل مسمى
 لقضى بينهم) اكر ربك جل شانهدن اشبو اتمك كفارينه آخر اعمارلرينه
 ويا يوم قيامتده عذابلري تاخيرينه كله حقه سبقت ايتمى اولميدى مؤمنينه
 كافرين بيننده مبطلين استيصاله قضا اولنوردى (وان الذين اورثوا الكتاب
 من بعدهم لفي شك منه مريب) شونلر كه اندياد نصكره انلره ويرلان كتابه وارث

قلندیلر ویا اهل کتاب که محمد علیه السلام عهدنه ایردیلر ویا مشرکونکه اهل کتابدنصکره قرآنه وارث قلندیلر اول قرآندن ویا ویرلدکاری کتابدن شکده درلر اول انلری ریه ادخال ایدوبدر کاهو حقه انی بیلزلر ویا حق ایمانه اکا ایمانه کلزلر (فلذلک فادع واستقم کما امرت ولا تتبع اهواءهم) ایمدی انبیاک توحیددن راضی اولدقلری شیئه خلقی دعوت ایت ودعوتده امر اولندیغک منوال اوزره استقامت ایت یوخسه مبطلینک هوالرینه اتباع ایتکل (وقل آمنتم بما انزل الله من کتاب) والله تعالینک انزال ایتدیکی کتابلردن جیعنه ایمان کتوردم دیکل یوخسه کفار کی بعضنی تصدیق وبعضنی تکذیب ایتکل (وامرت لاعدل بینکم) وامر اولندمکه شرایع وحکوماتی تبلیغده بینکرزده عدل ایدم ایمدی ایمان مذکور کال قوت نظریه و عدل ایسه کال قوت عقلیه اشارتدر (الله ربنا وربکم) الله تعالی بزم وسزک خالق ومتولی اموریدر (لنا اعمالنا ولکم اعمالکم) بزم اعمالز بزه وسزک اعمالکز سزه عائددر هرکسه کندی عملیه جزالنور * اشبو مساله قتاله امردن اول ایدی اشبو دلیلدرکه برکسه برمنگری کوروب ویا ایشیدوب انکار ایتدکه قبول اولنسه اکا اندن زیاده برشی واجب اولیه بلکه کندی مذهب حفظ ایدوب غیرنی ترک ایلده (لا حجة بیننا و بینکم) بزمه سزک بینکرزده محاجه مز یوقدر زیرا که حق ظاهر اولوب محاجه به مجال وخلافه بادی عناددن غیرنی برشی قلموبدر (الله یجمع بیننا والیه المصیر) الله تعالی یوم قیامده بزمه سزی جمع ایدوب سزدن انتقام ایدر جیعهمزک رجوعی اکادر (والذین یحاجون فی الله من بعد ما استجب له حجتهم داحضة عند ربهم وعليهم غضب ولهم عذاب شدید) شونلرکه الله تعالینک وحدانیتده محاجه ایدرلر محمد علیه السلام دعوتیه اکا اطاعت اولندیغدنصکره ایمدی انلرک رب تعالی عننده جتلی زائله وباطله در یوم قیامتده اوزرلرینه غضب اولور حتی قبول ایتدکاریچون وعذاب شدید اولور دنیاده ایشلدکاری اعمال قبیحه ایچون (الله الذی انزل الکتاب بالحق والمیزان) الله تعالی قرآنی انزال ایتدی اول حتی ملتبس اولوب باطلدن بعید اولدیغی حالد ویاخود عقائد واحکامدن انزال حق اولور شیئی ملتبس اولدیغی حالد ودرخی شول شرعی انزال

(ایتدیکه)

ایتدیکه انکله ناس بیننده حقوق موازنه وتسویه اولنور (وما یدریک لعل الساعة قریب) الله تعالی سکا بیلدرمدی بلکه قیامت قریب اولوبدر ایمدی کتابه اتباع وشرعه عمل وعدله مواظبت ایت یوم قیامت کلزدن اول انده اعمال وزن اولنور وجزاسی ایر کوریلور (یستعمل بها الذین لا یؤمنون بها) یوم قیامتک مجیئنی تصدیق ایتینلر استهزاء طریق اوزره انی استعمل ایدرلر (والذین آمنوا مشفقون منها ویعلمون انها الحق) اما انی تصدیق ایدنلر انک احوال وشداثندن خوف ایدرلر وانک حق ایدیکن بیلورلر (الا ان الذین یمارون فی الساعة لفی ضلال بعید) آگاه اولک که قیامتک مجیئده جدال ایدنلر حقندن بعید ضلالده درلر زیرا که بعث غائباتک محسوساته اشبهیدر ایمدی انی تجویزه اهتدا ایتین انک وراسنده کی اموره اهتدادن ابعدر (الله لطیف بعباده) الله تعالی عبادنه بر ایدیمیدر بروجهله کیم اکا افهام ایرشمز عیلمی ستر ایدر کانه انی کورمیوبدر وکناهلرین مغفرت ایدر کانه انی بیلوبدر (برزق من یشاء) دیلدیکی کسه به حکمتی مقتضاسنجه اصناف بردن دیلدیکی شیئی دیلدیکی وقتده ویرر (وهو القوی العزیز) اول الله تعالینک قدرتی باهره درکه خلقتک جیعنه رزقلرین ایرکورر منیعدر که اکا هیچ احد غالب اولمز (من کان یرید حرث الآخرة نزله فی حرثه) برکسه که عملیه آخرت ثوابن دیلده یزانک علی ثوابن آرتوررز بر عملنه اون انک مثلنی ایشلمش دکلو ثواب ویررز تایدی یوزه وانک فوقه دکن آرتوررز (ومن کان یرید حرث الدنیا نؤته منها وماله فی الآخرة من نصیب) واول کسه که عملیه دنیا ثوابن دیلده یزانک دنیا دن یادن قسمت ایتدیکمز شیئی ویررز حالبوکه آخرتده انکیچون نصیب اولمز زیرا که اعمالک صحتی نیاتله در هرکشی به عملندن انحق نیت ایتدیکی حاصل اولور (ام لهم شرکاء شرعوا لهم من الدین مالم یأذن به الله) مشرکک آلهه لریمی واردر که دین اسلامدن غیرنی الله تعالینک اذن ویرمدیکی دینی انلر ایچون وضع ایدلر که اول شرک وانکار بعث ودنیا ایچون عملدر (اولا کلمة الفصل لقضی بینهم) اشبو امتک کفارندن تأخیر عذابله کلمه حکم سابق اولسه بیلرنده عذابله قضا اولنوردی (وان الظالمین لهم عذاب الیم) والحال مشرکله آخرتده عذاب الیم واردر (تری الظالمین مشفقین مما کسبوا

وهو واقع بهم) یوقیامتده مشرکاری دنیاده کسب ایتدکاری قبایحدن
خوف ایدر کورر سن و الحال کسبلرینک جزاسی انلره نزول ایدیسردر
(والذین آمنوا و عملوا الصالحات فی روضات الجنات) شونلر که مؤمنلر
اولوب عمل صالح ایشلدیلر انلر آخرتده جناتک بستانلرنده در (لهم
مايشاؤون عند ربهم) انلر ایچون رب تعالی عندنده کراماتندن اشتها
ایتدکاری ثابتدر (ذلك هو الفضل الكبير) اشبو ثواب مؤمنلره فضل
کبردر که اکا نسبتله دنیاده غیریلره ویریلن حقیر اولور (ذلك الذي
يشر الله عباده الذين آمنوا و عملوا الصالحات) اشبو مذکور نعيم جنتدن
اول شیددر که الله تعالی انی عمل صالح ایدن عباد مؤمنینه تبشیر ایدر
(قل لا اسألكم عليه اجرا الا المودة فی القربى) دیکل که سزه تبلیغ
و بشارت اوزره سزدرن اجر استمیزین مکر که سزه قرابت ایلچون بکا
مودت ایده سز و یا بنم قرابتده مودت ایده سز * اشبو آیت نازل اولیحق
دیدیلر که یارسول الله شول اوزریمزه مودتی واجب اولور قرابتک کیملردر
دیدیکه * علی وفاطمه وایکی اوغلی حسن و حسیندر رضی الله عنهم
اجمعین * دینلدیکه قربی ایله مراد الله تعالی به تقر بدر یعنی الله تعالی بی
ورسولانی سوه سز که طاعت و عمل صالحله سزی رحمتده تقریب ایده
(ومن یقترب حسنة نزدله فیها حسنة) برکسه که طاعت اکتساب ایده
خصوصا که اول محمده محبتله بز انک طاعتنده مضاعفه ثوابله حسن
آرتوررز (ان الله غفور شکور) الله تعالی کناهدن توبه ایدنه غفوردر
واکا اطاعت ایدنه توفیه ثواب و تفضله مشکوردر (ام یقولون افتری
علی الله کذبا) مشرکون دیرلرمیکه محمد علیه السلام دعوی نبوتله
و یافقرآن الله تعالیبندر دیمکله اکا کذب ایتدی (فان یشأ الله یختم علی
قلبك) اگر الله تعالی خذلانکی دیلسه قلبک اوزره ختم ایدر دیکه
اکا افترایه جرات ایدیدک * و یاخود اگر اول دیلسه قلبک اوزره صبری
ختم ایدر دیکه اذالری سکا مشقت و یرمیدی (و یحیوالله الباطل و یحق
الحق بکلماته) الله تعالیبک عادت کریمه سندندر که قرآن و یا قضا سبیلله
باطلی محو و حق اثبات ایده ایمدی اگر اول افترا اولسه انک عادت مقتضاسنجه
انی محو ایدردی (انه علیم بذات الصدور) اول قلوبده مضمحل اولانی بیلور
هرکسه به عملک جزاسن ایرکورر (وهو الذي یقبل التوبة عن عباده) الله

(تعالی)

تعالی عبادنک توبه سنی قبول ایدر توبه ایتدکاری شیدندن تجاوزله *
علی رضی الله عنه ایدر توبه التي معنایی مشتملدر که اول ذنوب ماضیه به
ندامتدر و تضییع ایتدیکی فرائضی اعاده در و حقوق مظالمی اصحابنه رددر
و نفسنه طاعتی الزامدر واکا مرارت طاعتی اذاقه در و هر ضحکندن
بدل بکادر (و یعفو عن السيئات) و دینلدیکی کسه نك سیئاتن صغیر
و کبیرنی عفو ایدر (و یعلم ما تفعلون) خیر و شردن ایشلدکارین بیلور
بعده حکمتی مقتضاسنجه دینلدیکنه جزاء ایدر و یا تجاوز ایدر (و یستجیب
الذین آمنوا و عملوا الصالحات) مؤمن اولوب اعمال صالحله ایشلینلرک
دعایینه اجابت و یا طاعتلری اوزره اثبات ایدر * و یا انلر الله طاعته اجابت
ایدر چنانکه اکا دعوت اولندلر (و یزیدهم من فضله) و انلره فضلندن
زیاده ایدر انک اوزره که سؤال ایتدیلر و یا مستحق اولدیلر و یا اکا اجابت
ایتدیلردی (والکافرون لهم عذاب شدید) و کافرله عذاب شدید
وارددر که اول دائم و لا ینقطعدر (ولو بسط الله الرزق لعباده لبغوا
فی الارض) اگر الله تعالی عبادنه رزقی توسیع ایتسه یر یوزنده
تکبر و بطرله افساد ایده لردی و یاخود بری برلرینه استیلاء و استعلاء
وجهی اوزره بغی ایده لردی (ولکن ینزل بقدر ما یشاء) لکن
انلره ارزاقدن مشیئت مقتضا ایتدیکی دکلو انزال ایدر (انه بعباده
خبیر بصیر) اول عبادندن هر برینه صالح اولانی بیلور و صلاح
و فساددن عمللرینی کورر شانلرینه مناسی انلره ویرر * روایت اولندیکه
اهل صفة غنائمی ایتدکارنده بوآیت نازل اولدی (وهو الذي ینزل
الغيث من بعدما قنطوا و ینشر رحته) اول الله تعالی یغموری عبادنه
ایندیرر اندن مأیوس اولدقلرندن نصیره و سهل و جبل و نبات
و حیواندن هر شیئه رحمتی نشر ایدر (وهو الولی الحمید) اول الله تعالی
احسان و نشر رحمتله عبادنه تولی ایدر هر صفتنده محموددر (ومن آیاته
خلق السموات و الارض و ما بینهما من دابة) الله تعالیبک وحدانیتی
علاماتندن سموات و ارضک و اول ایکیسنده نشر ایتدیکی کائناتک خلقیدر
(وهو علی جمیعهم اذا یشاء قدير) اول دینلدیکی وقتده انلری بعد الامانه
احیاء و جمعه قادر اولور (وما اصابکم من مصیبة فیما کسبت ایدیکم و یعفو
عن کثیر) بر مصیبتکه سزه انفس و اموالکزه ایریشور کسب ایتدیکیکزر

معاصی سبيله در لکن الله تعالى انك كثيرى عفو ايدر (قال النبي عليه السلام ما اصابكم من مرض او عقوبة او بلاء في الدنيا فيما كسبت ايديكم والله عز وجل اكرم من ان يثني عليه العقوبة في الآخرة وما عفا الله عنه في الدنيا فالله احلم من ان يعود بعد عفو) پیغمبر میز صلی الله علیه وسلم ايدر دنیاده که سزه مرض ویا عقوبت ویا بلاء ایریشور اول سزک کسب ایتدیکنز معاصی سبيله در الله تعالى اکر مدر که اول معاصی اوزره آخرته عقوبتی تکرار ایتز واول شیتکه الله تعالى انی دنیاده عفو ايدر حلیمدر که عفوندنصکره آخرته اکا عودت ایتز عکرمه ايدر نکبت که قلیل ویا کثیر عبده ایریشور الا اول بر ذنب سبيله در الله تعالى انی اول ایریشن نکبت سبيله مغفرت ايدر واکر اول ایریشن نکبت تکثیر ذنب سبيله دکل ایسه انکله در جاتی رفع اول نور که آنسز اکا ایریشور دکلیدی (ومانتم بمعجزین فی الارض) یر یوزنده سز شول اوزر یکره قضاء اول نان مصائبدن قورتیلور دکلسز (و مالکم من دون الله من ولی ولا نصیر) وسزی اول مصائبدن حراست ايدر ویا انی سزندن دفع ايدر الله تعالیدن غیرى ولی ونصیر یکر اولز (ومن آیاته الجوار فی البحر کالاعلام) الله تعالینک وحدانیتی علامتندن بری دریاده یورر طاغیر کبی کیلدر (ان یشأ یسکن الریح فیظللن روا کد علی ظهره) اکر الله تعالى دیسه اول کیلری یوریدن ریخی تسکین ایدوب کیلدر یا یوزنده یوریمکدن قالیدی (ان فی ذلک لآیات لکل صبار شکور) اشبونده الله تعالینک آیاته نظر و آلائتی تفکر اوزره نفسنی حبس ایدن ایچون ویا هر مؤمن کامل ایچون انک وحدانیتنه دلالت ايدر آیتلر واردر زیرا که ایمانک بر نصفی صبردر و بر نصفی شکردر ایکسن جمع ایدن مؤمن کامل اولور (او یوقهن بما کسبوا و یعف عن کثیر) ویا الله تعالى دیسه انلرک کسب ایتدیکی شرک و معاصی سبيله شول رکوب ایتدکاری کیلرین اغراق ایدوب انلر انک ایچنده بولنغله هلاک اولور لردی لکن الله تعالى انلرک ذنبلرینک کثیرین عفو ايدر انک اوزره عقاب ایتز (و یعلم الذین یجادلون فی آیاتنا مالهم من محیص) تا که بزم آیتلر میزی تکذیبه جدال ایدنلر بیله لکه عذابمزدن انلره مهر بوقدر (فما اوتیتهم من شیء فتاع الحیاة الدنیا) اموال دنیادن بر شیتکه ویرلدیکز اول حیات دنیا زینتیدر مدت حیاتنکردن انکله تمتع ايدر سز (وما عند الله خیر وابقی

(للذین)

للذین آمنوا وعلی ربهم یتوکلون) وثواب آخرتدن اول شیتکه الله تعالى عندنده در اول حطام دنیادن خیر لیدر و دائمدر شونلر ایچونکه الله تعالى به ایمان کتوروب هر امرلرین اکاتفویض ایدرلر (والذین یجتنبون کبار الاثم و الفواحش) ودخی شونلر ایچونکه کبائر ائمدنکه اول شرک ونفاق وریاء امثالیدر وفواحشدر که اول دنیاده حد و آخرته عذاب ایجاب ايدر ذنوبدر اندن صاقنورلر (و اذا ما غضبوههم یغفرون) که انلر بر کسه به غضب ایتسدر حلم وکظم غیظ و تجاوز ایدرلر (والذین استجابوا لربهم) وشونلر که رب تعالی به دعوت اولندقلری ایمان و امر ونهیده اطاعت ایدرلر (و اقاموا الصلاة) وصلوات خسی موافقتنده ادا ایدرلر (و امرهم شوری بینهم) و امرلری بینلرنده مشورتله در یوخسه رأیلرنده انفراد ایتلر بوحالت ایسه انلرک فرط تدبر و امورده کمال تیقظلرندن ناشیدر (و مما رزقناهم یتفقون) و بزم انلره ویردیکنز مالدن سبیل خیره اتفاق ایدرلر (والذین اذا اصابهم البغی هم یتصرون) وشونلر که انلره فسادی مؤدی ظلم ایرسه ظالملرندن انتقام ایدرلر امر اولندقلری حد اوزره اعتداسز * روایت اولندیکه انلر بر قومدر که استدلالدن کراحت ایدرلر و قدرتلری حالنده عفوی سورلر (و جزاء سیئة سیئة مثلها) ظالمدن صدور ایدن مظلمه نك عقوبتی اول ظالمه مظلمه سنك مثلی عقوبتدر (فن عفا واصلح فأجره علی الله) اما اول کسه که ظلمه سندن تجاوز و کندیله خصمی بین عفوله اصلاح ایده انک اجری الله تعالینک عهده سنده در * روایت اولندیکه یوم قیامتده بر منادی ندا ایده که هر کسه که اجری الله تعالینک عهده سنده در طورسون اولیه اولسه ظالم عفو ایدنلر طوروب جنته کیدرلر (انه لا یحب الظالمین) الله تعالى سیئه ایله مبتدیلری و انتقامده متجاوزلری سومز (ولمن انتصر بعد ظلمه فأولئک ما علیهم من سبیل) اول کسه کم ظلم اولندیغندنصکره ظالمندن اقتصاص ایده اول اقتصاص ایدنلر اوزره معاتبه و معاقبه به طریق بوقدر (انما السبیل علی الذین یظلمون الناس و یبغون فی الارض بغیر الحق اولئک لهم عذاب الیم) معاتبه و معاقبه به طریق شونلر اوزره در که ناسه اضرارله بدأ ایدرلر وانلر اوزره تجبرله مستحق اولندقلری شیئی طلب ایدرلر ایدمی آخرته انلره عذاب وجیع واردر (ولمن صبر و غفر ان ذلک لمن عزم الامور)

اول كسه كه ظالمك اذاسنه صبر ايدوب انى عفو ايدو اول فعل معروفات
امورنده الله تعالى انى ندب طريق اوزره امر ايدوبدر * ديلديكه اول مندوبدر
لكن بعض احوالده امر منعكس اولوب عفو ك تركى مندوب اولور چنانكه
ماده اذائك قطعنه احتياج اوله (ومن يضل الله فاله من ولى من بعده)
اول كسه كه الله تعالى انى مخذول ايدو انك خذلانندنصكره اكا بر ناصر
اولمكه انى انك عذابندن قورتره (وترى الظالمين لما راوا العذاب يقولون
هل الى مرد من سبيل) يوم قيامتده ظالملى كوره سنكه عذابى كوردكارنده
ديهل كه دنيايه رجوعه هيچ چاره وارميدر (وتريهم يعرضون عليها
حاشعين من الذل ينظرون من طرف خفي) سن اولكونده ظالملى
كوره سنكه ناره عرض اولنهل انلره لاحق اولان ذلذن خاضعين اولدقلى
حالده طرف خفى ايله ناره نظر ايدو ل قتلده احضار اولنان كسنه نك سيفه
نظر ايتسى كى (وقال الذين آمنوا ان الخاسرين الذين خسروا انفسهم
واهلهم يوم القيامة) يوم قيامتده ظلم اولنان مؤمنلر ديهل كه خاسرين
اول كسه لدر كه دنيايه غيره ظلملى سبيله كنديلرين عذاب مخلده عرض
ايتديلر وجنتده كى حور و ولدان و سائر كراماتدن محروم ايتديلر كه
اول ثوابلى مظلومينه ويرلوب كنديلر اول مظلومين يرينه ناره كيرديلر
الله تعالى مؤمنلر اول مقاله سنى تصديق ايدوب ديديكه (الا ان الظالمين
فى عذاب مقيم) آگاه اولك كه ظالملر عذاب مقيدده (وما كان لهم
من اولياء ينصرونهم من دون الله) يوم قيامتده ظالملر ايچون اولياء اولمكه
انلر الله تعالىنك عذابندن قورتره (ومن يضل الله فاله من سبيل)
اول كسه كه الله تعالى انى مخذول ايدو هدايته اكا چاره يوقدر (استجبوا
لربكم من قبل ان ياتى يوم لامرته من الله مالكم من ملجأ يومئذ وما لكم
من نكير) ربكز جل شانده ايمان و اطاعتله اجابت ايدك شول كون
كلزدن اولكده الله تعالىدن انى رده امكان اولم و اولكونده سز چكون
بر ملجأ دخى اولمكه اندن قاچوب اكا التجا ايدو سز و اقتراف ايتديككز
اعمال خبيثه يي انكار ايدو سز زيرا كه اول صحائف اعمالكزده مدوندر
والسنه وجوارحكز انى ايشلديككزه شاهدر (فان اعرضوا فاهلناك
عليهم حفيظا ان عليك الا البلاغ) اكر انلر ايمان و طاعتدن اعراض
ايدو لسه يا محمد بز سنى انلر اوزره رقيب و يا محافظ و يا محاسب كوندرمك

(سكا)

سكا واجب اولان انجق تبليغ رسالتدر غيرى ذكل (وانا اذا ادقنا الانسان
من ارجة فرح بها) چنان بز برانسانه صحت و غنا و اندن رحمت اذاقه ايتسه وز
اكا سوينورلر (وان تصبهم سيئة بما قدمت ايديهم فان الانسان كفور)
اكر انلره تقديم ايتدكلى معاصى سبيله بر مصيبت ايرسه اول و يريلن نعمتلى
كليتله اونودر اول مصيبتن ذكر ايدوب سبيلن تأمل ايتز انى عظيم كورر
اشبو خصلت اكرچه مجرمينه مختصدر لكن انى جنس انسانه اسناد دخى
جائز اولور انلر ك جيعى انده مندرج اولديغچون (لله ملك السموات
والارض) سموات و ارضك ملكى الله تعالىنكدر نعمت و بليه يي كه
نيجه ديلر سه عبادى بيننده قسمت ايدر (يخلق ما يشاء) صورت و صفتدن
ديلديكى شئى خلق ايدر (يهب لمن يشاء اناثا و يهب لمن يشاء الذكور)
ديلديكى كسه يه اولاد اناث و يرر لوط عليه السلام كى و ديلديكنه اولاد
ذكور و يرر ابراهيم عليه السلام كى (اويزو جهنم ذكرانا و اناثا و يجعل
من يشاء عقيما) و ياخود ديلديكنه اولادك ذكور و اناثى جمع ايدر
يغمبريمز صلى الله تعالى عليه وسلم كى و ديلديكنى دخى و لدى اولم
قيلور يحيى و عيسى عليهما السلام كى (انه عليم قدير) الله تعالى
عبادنه صالح اولانى بيلور و انى تكوينه قادر اولور (وما كان
لبشر ان يكلمه الله الا وحيا) هيچ بر بشر ايچون صحيح اولديكه الله تعالى
اكا تكلم ايدو الا كلام خفى ايله كيم اول شرع ايله ادراك اولنور كه اول
قلبه الهام و يارؤيادر ابراهيم عليه السلامه ذبح امرنده و موسى
عليه السلامك اناسنه تابوت امرنده واقع اولديغى كى (او من وراء حجاب)
وياخود الله تعالى اكا وراء حجابدن تكلم ايدو موسى عليه السلام كى كه
الله تعالى اكا شجره دن تكلم ايتديكنى ايشندي ذاتنى كورمدى
(او يرسل رسولا فيوحى باذنه ما يشاء) و ياخود الله تعالى ملائكه دن
جبريل عليه السلام و يا غيرى عبادندن ديلديكى كسه يه رسول كوندرر كه
اول ملك الله تعالىنك ديلديكى شئى اذيله كوندرلديكى عبده القا ايدر
وياخود الله تعالى انبيادن برينى بر قومه رسول كوندرر بعده ملك
الله تعالىنك و حينى اول رسوله اير كورر (انه على حكيم) الله تعالى مخلوقين
صفتندن عاليدر هر فعلى حكمت اقتضا سنجهدر * اويله اولسه انك
عبده تكلمى كاهى واسطه ايله و كاهى واسطه سز و كاهى آشكاره و كاهى

وراء حجابدن اولور (و كذلك اوحينا اليك روحا من امرنا) يا محمد سائر
مرسلينه وحى ايتديكمز كى سكا دخى امرينزله وياقرآنله جبريل عليه السلامى
ارسال ايتدك (ما كنت تدري ما الكتاب ولا الايمان) حالبوكه سكا
وحى اولتمزدن اول قرآن و ايمان شرعينك نه ايتديكى بيلور دكل ايتدك
يوخسه ايمان عقلى دكل زيراكه انبيائك كليسى وحيدن اول عقل
واستدلال طريق اوزره مؤمنين موحدن ايدلر * روايت اولنديكه
پيغمبريمز صلى الله عليه وسلم وحيدن اول الله تعالى بي توحيد ايدر واصنامه
بغض ايدر وحج وعمره ايدر و ابراهيم عليه السلام شريعتنه اتباع
ايدردى (ولكن جعلناه نورا نهدي به من نشاء من عبادنا) لكن بزاول
قرآنى ويا ايمانى نور قيلدق كه عبادمزدن ديلديكمزى انى قبول و اكا
نظره توفيقمزه هدايت ايدرز (وانك لتهدى الى صراط مستقيم)
وسن يا محمد قرآنله خلقى دين اسلامه دعوت ايدرسن (صراط الله الذى له
ما فى السموات وما فى الارض) شول دينه كه سموات وارض وما فيهما نك
خالق و مالكى اولان الله جل شانك مختار ايدر (ألا الى الله تصير الامور)
آگاه اولك كه يوم قيامته خلافتك عواقب امورى الله سبحانه و تعالى به
رجوع ايدر

سورة الزخرف وهى تسع وثمانون آية مكية

بسم الله الرحمن الرحيم

(حم والكتاب المبين) حم وشول كتاب حقيقونكه طريق هدايى طريق
ضلالسدن آردى وامتك دياتدن احتياجى اولديغى شينى بيان ايتدى
(انا جعلناه قرآنا عربيا لعلكم تعقلون) بز اول كتابى قرآن عربى قيلدق
تاكه معانيسنى فهم ايده سنز (وانه فى ام الكتاب لديننا لعلى حكيم) واول
قرآن لوح محفوظه دركه كتب سماويه نك اصليدر بزم عندمزدن
تغيردن محفوظ اولديغى حالده شانى رفيعدر حكمت بالغه صاحبيدر
ويا محكمدر غير آنى نسخ ايتز (أفطر عنكم الذكر صفحا ان كنتم
قوما مسرفين) يا اهل مكه بز سنز قوم مشركين اولديغىز ايچون سنزى
اهمالمى ايدرز بر وجهله كيم سنزه امر ونهى ايتكدن اعراض ايدموز قرآنى
سزدن صرف وازاله ايليهوز ايمدى بز انى ايدر دكلز زيرا اكر انى اوائل
امتك رديله رفع ايتسه امت هلاك اولوب كيدردى لكن الله تعالى

(انتره)

انتره رجندن كفر و عنادلرينه نظر ايتيوب يكرمى بيل والى ماشاء الله
زمانه دكين انى تكرير واعاده دن خالى اولدى (وكم ارسلنا من نبي
فى الاولين) يا محمد سنز قومكه ارسالز كى ام اولينه چوق نبي ارسال ايتدك
(وما يأتهم من نبي الا كانوا به يستهزؤن) هربار كه انتره بر نبي كلسه انتر
اول نيلرين استهزاء ايدرلردى (فاهلكنا اشده منهم بطشا ومضى مثل
الاولين) انلك بطشده اشد اولانك بز هلاك ايتدك ام اولينك هلاكلى
قصصى ايسه قرآنده مواضع متعدده ده كچدى (ولئن سألتهم من خلق
السموات والارض ليقولن خلقهن العزيز العليم) اكر مشركينه سؤال
ايتسك كه سموات وارضى كيم خلق ايتدى ديهلر كه اول الله تعالى كه عزت
وعمله موصوفدر يته بوند نصركه انى قويوب غيره عبادت ايدرلر وفرط
جهالتلرندن بعثه قدرتن انكار ايدرلر (الذى جعل لكم الارض مهدا)
كه اول سنزه ريوزنى مهد قيلديكه انده قرار ايده سنز (وجعل لكم فيها
سبلا لعلكم تهتدون) وسز چكون انده يوللر ايتدى تا كه اسفار كزده
حوايچكزه سهولتله كيدوب صانعك حكمتنه نظر ايده سنز (والذى نزل من السماء
ماء بقدر فانشرنا به بلدة ميتا) كه اول سمان سنزه يغمور اينديرر
شول دكلو كه سنزه نفع ايده ضرر ايتيه اوليله اولسه انكله نباتدن خالى
بلده بي نباتله احياء ايدرز (كذلك تخرجون) بلدة ميته بي احياء
كى سنزى قبوريكز دن احياء ايدوب چيقساريلور سنز (والذى خلق
الازواج كلها) كه اول الله تعالى اصناف مخلوقاتى يراتدى (وجعل
لكم من الفلك والانعام ما تر كبون) وسز چكون سفائن وانعامدن
يراتدى انيكه بز وبجوده اكار كوب ايدوب حوايچكزه كيدرسن (لستوا
على ظهوره ثم تذكروا نعمه ربكم اذا استويتم عليه) تاكه اول مركوبك
ظهورنده ثابت اولوب ربكز جل شانك نعمتن قلوبكزله ذكر ايده سنز
(وتقولوا سبحان الذى سخر لنا هذا وما كنا له مقرنين وانا الى ربنا لمنقلبون)
وديه سنز كه الله تعالى بي تنزيه ايدرز هر شيتدنكه اكا لائق اولمز كه اول
بومركوبى بزه ذليل ايتدى حالبو كه بز انى ضبط ايدر دكلدك وبز ربكز جل
شانك به رجوع ايدرز * روايت اولنديكه پيغمبريمز صلى الله تعالى عليه وسلم
ياغن اوزنكى به قوديقنده بسم الله ديردى و دابه سى اوزره اوتورديقنده
(الحمد لله على كل حال سبحان الذى سخر لنا هذا وما كنا له مقرنين وانا

الى ربنا لنقلبون) دیردی (وجعلوا له من عباده جزءا ان الانسان لکفور مبین) مشرکون الله تعالینک سموات وارض خالق ایدیکنه اعترافلرند نصکره اکا عبادنک بعضنی اشراک ایدرلر کافرلر رب تعالینک نعمترینه کفراندر زیرا که اکا ولد نسبتی فرط جهل وانک شان عظیمی تحقیرلرندن ناشیدر (ام اتخذ مما یخلق بنات واصفا کم بالبنین) یو خسه ربکز جل شانه مخلوقاتندن بنات اتخاذا یدوب سزکچون بنوعی اختیار ایتدی یعنی انکچون ولد نسبتیه قناعت ایتوب حتی که مخلوقاتندن کندیله اقبض اشیا اولان بناتی انکچون اختیار ایتدیله (واذا بشر احدکم بما ضرب للرحن مثلا ظل وجهه مسودا وهو کظیم) والحال انلرک بری تبشیر اولسه شول شیئه کیم انی الله تعالی به مثل قیلشدی اکا اعترا ایدن کدردن یوزی مسود اولور ومع ذلک قلبی کر بله مملودر * ایدی اوصافدن کندیله ایچون راضی اولدق لری وصفی الله تعالی به نیچه راضی اولورلر (او من ینشأ فی الخلیة وهو فی الخصام غیر مبین) الله تعالی به نیچه نسبت اولنور بنات که زینتده تربیه اولنور اول حین مجادله ده نقصان عقل وضعف رأیدن ادعا ایتدیکی شیئی تقریر ایدر دکدر زیرا که مرأه چنان حجتی تکلم مراد ایتسه غالبده حجتی کندی اوزره منقلب اولور * اشبو آیتده اشارت واردر که زینت و تعمده تربیه اولنمق صفات مذمومه دن اوله زیرا که اول نساء صفاتنددر رجله لایق اولور که اندن اجتناب وحذر ایده (وجعلوا الملائكة الذین هم عباد الرحمن اناثا) ومشرکون الله تعالینک اکرم واکمل عبادی اولان ملائکه بی شول رأیده انقص وصفده اخس اولان اناث قیلرله انلری استخفاف واحتقار ایدرلر (أشهدوا خلقهم) الله تعالی ملائکه بی خلق ایتدیکنده انلر حاضر میدیلر که انلرک اناث ایدیکنی مشاهده ایتدیله زیرا اول مشاهده ایله بیلنور (ستکتب شهادتهم ویسئلون) انلرک ملائکه اوزره شهادت لری یازیلور و یوم قیامتده اندن سؤال اولنورلر (وقالوا لو شاء الرحمن ما عبدناهم) ودخی دیرلر که اگر الله تعالی بزم ملائکه به عدم عبادتمزی دیلسه بز انلره عبادت ایتزدک وانلره عبادتمز اوزره عقوبتمزی تعجیل ایتدیکی بزم اول فعلزه راضی اولدیغیچوندر (مالهم بذلک من علم) انلرک اول قوللرینه علم لری یوقدر زیرا اگر الله تعالینک اول فعللرینه رضاسی اولسه انلری علمله وصف

(ایدر)

ایدرو انک اوزره انلری مدح ایدردی (انهم الا یخرسون) بلکه انلر اول قولی ظن و تخمینله دیرلر کرکسه واقعیه مطابق و یا مخالف اولسون مبالات ایتزلر (ام آتیناهم کتابا من قبله فهم به مستمسکون) یو خسه بز انلره قرآندن اول کتابی ویردک که اندن الله تعالینک غیریه عبادتی تجویز ایتش اوله وز انلر ایتسه انی احتیاج ایدوب موجبیه عمل ایده (بل قالوا انا وجدنا آباءنا علی امة وانا علی آثارهم مهتدون) بلکه انلرک اول افعالنه حجت عقلیه و یا نقلیه دن هیچ بر شیتلری اولیوب دیرلر که بز آباءمزی اشبو صیددنده اولدیغمز دین و ملت اوزره بولدیغمز دن بز دخی انلرک آثارینه کتمشزلر (وکذلک ما ارسلنا من قبلک فی قریة من نذیر الا قال مترفوها انا وجدنا آباءنا علی امة وانا علی آثارهم مقتدون) یا محمد قومکدن صادر اشبو ذکر اولنان قول کبی سندن اول هر اهل قریه که انذار ایچون بز انلره رسول کوندردک الا انلرک جباریه سی رسوللرینه دیدیلر که بز آباءمزی بودین وطریقت اوزره بولدق بز دخی انلرک آثارینه اتباع ایتشز * اشبو نده دلالت واردر که انک کبی امورده تقلید ضلال قدیم اوله وانلرک تقدیمی سند معتبر اولیه و تقلیدده جباریه لربنی تخصیصده اشعار واردر که تنع و حب بطاله انسانی نظردن تقلیده صرف ایدر (قال اولو جئکم باهدی ما وجدتم علیه آباءکم قالوا انا بما ارسلتم به کافرون) یا محمد انلره دیکل که سز آباءکزه اتباع ایدر میسز اگرچه بن سزه آباءکزدینندن اصوب و ارشدین کتور رسیده اهل مککه نک جباریه سی اکا دیدیلر که سنک وسندن اول رسالت دعواسیله یکنلرک کتور دیکنه کافرلر ز اگرچه اول بزم دینزدن اصوب و ارشد ایتسه ده اولیه اولسه عنادله دین حقه نظری و انده تفکری ترک و رسولی اقناط ایتدیله (فانتقمنا منهم) اکا بناء بز دخی انلردن عذابمزی استئصاله انتقام ایتدک (فانظر کیف کان عاقبة المکذبین) نظرایت که رسوللرین تکذیب ایدنلرک عاقبتی نیچه اولدی ایدی یا محمد سندن دخی قومک سنی تکذیب لرینه اکثر ایتیکل (واذ قال ابراهیم لابیہ وقومه اننی براء مما تعبدون) یا محمد ذکر ایت شول وقتی که ابراهیم علیه السلام باباسنه وقومنه دیدیکه بن سزک عبادتکزدن و معبودکزدن بریش (الا الذی فطرنی فانه سیهدین) الامعبودم الله تعالینک عبادتندن بری دکانکه اول بنی خلق ایتدی حالده

وما آتاه اول بنی هدایت اوزره ثابت ایدیسردر که اول کلمه توحید در
 (وجعلها کلمة باقية في عقبه لعلهم يرجعون) ابراهیم علیه السلام و یا الله
 تعالی کلمه توحیدی ابرهیم نصکره ذرینده باقیه قیلدی اویله اولسه انلرده
 ایدا الله تعالی بی توحید ایدر و توحیده دعوت قیلور اولدی تاکه انلردن
 اشراک ایدنلر توحید ایدنلرک دعوتیله شرکدن رجوع ایدلر (بل تمتعت
 هؤلاء وآباءهم حتى جاءهم الحق ورسول مبين) بلکه قریشدن محمد علیه السلام
 معاصر لرینی و آباء لرینی عمر و نعمتله تمتع ایتدک اکا اغترارله شهواته انهماک
 ایتدیلر حتی انلره قرآن و یا دعوت توحید کلدی و یا معجزاته رسالتی ظاهر
 و یا حج و آیاته توحیدی مبین رسول کلدی (ولما جاءهم الحق قالوا هذا
 سحر وانا به کافرون) وقتاکه انلره غفلتدن تنبیه ایدر قرآن کلدی
 دیدیلر که بو سحر درو بزا کافر لر (وقالوا لولا نزل هذا القرآن علی رجل
 من القریتین عظیم) و دیدیلر که نو لیدی اشبو قرآن شول مال و جاهله عظیم
 مکهدن ولید بن المغیره و یا طائفدن عروه بن مسعوده نزول ایتش اولسیدی
 زیرا که رسالت بر منصب عظیمدر رجل عظیمه لایق اولور بیلدیلر که رسالت
 بر رتبه روحانیه در که فضائل و کالات قدسیه ایله متحلی عظیم النفس کیمسه بی
 استقامت ایدر یوخسه زخارف دنیا ایله مزخرفی دکل (أهم یقسمون رحمت
 ربک) ربک جل شاننه نک نعمتدن اولان نبوت و رسالتی انلری قسمت
 ایدر و یا خود مفاتیح رحمت انلرک یدنده میدر که رسالتی دیلدکری کیمسه یه
 ویره لر بلکه جمیع امور بزم یدیمزده در عبادمزدن دیلدیکمز کیمسه بی رسالتزه
 اختیار ایدرز (نحن قسمنا بینهم معیشتهم فی الحیاة الدنیا) حیاة دنیاده حلال
 و یا حرامدن معیشتلریکه رحمت صغرا در بیلنلنده انی بز قسمت ایتش دنیاده
 اول انلرک خاصه امور لری ایکن تدبیری انلره تفویض ایتدیکمز دندن
 عاجزلدر اویله اولسه رسالت امرنک تدبیری انلره قندن حاصل اولور که
 اول رحمت کبری اولوب مراتب انسیه نک اعلاسی اولدیغندن ماعدا انلره
 تفویض اولمش اوله (ورفعنا بعضهم فوق بعض درجات لیخذ بعضهم
 بعضا سخریا) بز دنیاده ناسک بعضی غنا و فقرله حریت و رقله بعض آخر
 فوقنده درجات متفاوته ایله تفضیل ایتدک تاکه حوائج لرندن بعض
 آخری استعمالله بیلنلنده تآلف و تضام اوله و انکله عالم انتظام بوله

یوخسه اول تفضیل غنیک کالچون و یا فقیرک نقصانچون دکل (و رحمة
 ربک خیر مما یجمعون) ربک الله تعالینک رحمتی که نبوت و تواعیدر انلر
 جمع ایتدیکی حطام دنیادن خیر لیدر (ولولا ان یتکون الناس امة واحدة)
 اگر ناسک کلیسی کفره رغبت ایتدی اولماسه کفاری سعت و تنعمده
 کوردکارنده (جعلنا لمن یتکفر بالرحن لیبوتهم سقفا من فضة و معارج علیها
 یظهرون) الله تعالی یه کافر اولنلرک بیوته کشدن سقفلر و انک سطوحنه
 صعود ایچون کشدن درجه لر قیلوردق (ولیبوتهم ابوابا و سررا علیها
 یتکئون) و بیوتلریچون ککذک کشدن قیلور و سریر لر قیلوردقکه
 اول سریر لر اوزره اوتورده لر و اویویه لر (وزخرفا) و مع ذلک انلر ایچون
 هر شیئدن زینت قیلوردق و یا اول اشیانک بعضی دخی التوندن قیلوردق
 (وان کل ذلک لما متاع الحیاة الدنیا) بومذکورک کلیسی دکل الاحیاء دنیا
 متاعیدر که بقاسی یوقدر (والآخرة عند ربک للمتقین) جنت ایسه ربک
 جل شاننه عندنده شرک و معاصیدن صاقنلر ایچوندر * ایمدی بودیلدر که
 عظیم اول کسه در که آخرتده عظیم اوله یوخسه دنیاده دکل اگر دینورسه که
 سمه تمم نیچون مسلمین ایچون قیلندی تاکه ناس اسلامه رغبت
 ایدلردی * دینور که زیرا اول آخرتده انلر ایچون اوله حق کراماته
 اضافتله تمتع قیلدر و مع ذلک غالب حالده اول اکا مخلددر انده اولان
 آفادن ماعدا که اندن آز کسه تخلص ایدر (ومن یعش عن ذکر الرحمن
 نقیض له شیطانا فهو له قرین) برکسه که محسوساته فرط اشتغال
 و شهواته انهما کنندن الله تعالی بی ذکردن تعامی و یا اعراض ایده
 عقابندن خوف و ثوابن رجا ایتیه بز اکا بر شیطان ضم و تسلیط ایدرز که
 دنیاده اول شیطان اکا قریندر اندن آیرلز اکا ضلالتی ترغیب ایدر و یا خود
 ناردن ایکسی برزنجیره اوریلور (وانهم لیصدونهم عن السبیل و یحسبون
 انهم مهتدون) شیاطین انلری طریق هدادن منع ایدر و مع ذلک انلر
 کندیلرین طریق مستقیم اوزره ظن ایدر لر (حتی اذا جاءنا قال یالیت یلنی
 و بینک بعد المشرقین فبئس القرین) حتی چنانکه اول معرض شیاطین
 ایله یوم قیامتده بزم درکا همزه که شیطاننه دیه که نو لیدی ایکیمزک
 یلنی مشرق و مغرب ارا سنجه بعید اولیدی سن بکا نه مبؤس صاحب
 و قرین اولورسن (ولن ینفعکم الیوم اذ ظلمت انکم فی العذاب مشترکون)

وانلره دینورکه اشبو کونده سزه ندم ویا اعتذار ویا تمیکز نفع ایدردکدر
 زیرا که سز دنیاده کندیکزه ظلم ایتدیکزدی ایدی سز شیطانکرله
 عذابده مشترککلر سز تکیم عذابکزک سبینه دنیاده مشترکار
 ایدیکز (أفانت تسمع الصم أو تهدي العمی ومن كان في ضلال مبين)
 یا محمد شول کسه که قلبی اصم اوله سن اکا حق افهامه ویا حقندن تعامی
 ایده سن انی هدایت واولکه علم اللهه ظاهر الضلاله اولدیغندن اکا کلمه
 عذاب واجب اوله سن انی ارشاده قادرمی اولور سن اشبونده اشعار
 وارد که انلرک صمم وعمارینه موجب ضلالت ظاهرهیه تمکنلری اوله
 (فاما نذهب بک فانهمم متقمنون) اگر بز قومک کفارینه عذابمزی سکا
 کوسترمدین سنی قبض ایدرسه وز بز انلره سند نصکره دنیاده ویا آخرتده انتقام
 ایدرز (اوزینک الذی وعدناهم فانا علیهم مقتدرون) ویا خود انلره وعد
 ایتدیکمز عذابی سکا کوسترمک دیلرسه وز بز انلری هلا که قادرز بزه هیچ
 شی مانع اولز (فاستمسک بالذی اوحی الیک انک علی صراط مستقیم)
 ایدی آیات وشرایعدن سکا وحی اولنان شیئی اخذ وواجبیه عمل ایت که
 سن طریق مستقیمده سن (وانه لذرکاک ولقومک وسوف تسئلون) اول
 قرآن سکا وقومکه شرفدر زیرا که عرب لغتی اوزره نازل اولوبدر یوم قیامتده
 اول شرفک شکرندن ویا انک حقنه قیامدن سؤال اولنور سز (واسئل
 من ارسلنا من قبلك من رسلنا اجهلنا من دون الرحمن آلهة یعبدون) یا محمد
 سندن اول کچن رسوللریمزک ائم وعلماء دینلرندن سؤال ایتکه انلره هیچ
 بر رسول کدییمکه امتی الله تعالینک غیری یه دعوت ایده اشبو نکه مراد
 انبیانک توحید اوزره اجماعنی استشهاددر وتوحیدک بدعت دکل ایدیکنه
 استدلالدر که اول انی ابتداع ایتسیله مشرکین ایچون تکذیب و معاداتلرینه
 علت اوله (ولقد ارسلنا موسی بآیاتنا الی فرعون وملائه فقال انی رسول
 رب العالمین) بز موسای معجزاتمزله فرعونه وقومک اشرافنه کوندروب
 اول انلره دیدیکه بن عالمک خالق رب تعالینک سزه رسولین (فلما جاءهم
 بآیاتنا اذاهم منها یضحکون) موسی علیه السلام بز معجزاتمزله انلره
 واردیغنده انک حقیقتن تأمل ایتکسزین اکا کولشیدیلر (وما نریهم
 من آیه الاهی اکبر من اختها) هر معجزه که بز انلره کوستردک الا اول اندن
 اول کوستر دیکمز معجزه دن اعجازده اکبر ایدی انلر ایه انک هیچ برینی

(تصدیق)

تصدیق ایتزدیلر (واخذناهم بالعذاب لعلهم يرجعون) اولیه اولسه
 بز انلری سنین وطوفان وجراد مثلی عذابله مؤاخذه ایتدک تکیم سورة
 اعرافده ذکر اولندی بوجه اوزره کیم کفرهک رجوعلری رجا اولنور
 (وقالوا یا ایه الساحر ادع لنا ربک بما عهد عندک اننا لمنتدون) وقتا که موسی
 علیه السلام انلره عذابله کلدی شدت شکیمه وفرط حاقنلرندن علم سحری
 استعظام ایدوب دیدیلر که ای حاذق عالم کامل ویا اولکه سحرله بزه غلبه ایدی
 اوزریمزدن اشبو عذابی دفع ایچون ربکه دعا ایت انک شول عهدیه که اول
 سنک عندکده در اهتدا ایدندن انکله عذابی کشف ایدرسن تا که بز سنی
 تصدیق وربکی توحید ایدرز (فلما کشفنا عنهم العذاب اذا هم ینکثون)
 وقتا که موسانک دعا سبیله بز انلردن عذابی کشف ایتدک اول حینده
 عهدلری نقض ایتدیلر (ونادی فرعون فی قومه قال یا قوم ألیس لی ملک
 مصر وهذه الانهار تجری من تحتی أفلا تبصرون) فرعون کندیبی
 ویا منادیسی قومی بیننده ویا جمعیلمرنده عذاب کشفندنصکره ایمانه کللری
 خوفیلله دیدیکه یا قوم مصرک ملوکتی بنم دکلیدر کورمز میسز که نیلک
 نهرلریکه اول نهر ملک ونهر طولون ونهر قیس ونهر دمیطادر قصرم
 اتندن ویا اولکدن باغلیمه وبوستانلریمه جاری اولور اولیه اولسه بنم عظمتی
 وموسی اوزره فضلی کوروب بیلک (ام انا خیر من هذا الذی هو مهین
 ولایکادینین) اشبو مملکت وبسطه ایل بن خیرلویم اشبونندن یعنی
 موسادنکه مهانه وقلته موصوف اولدیغیچون ریاسته استعدادی اولز
 ولساننده لثغه اولدیغندن کلامنی افصاح ایده بیلز ایدی بوخصاله اول
 ریاسته و سیادته نیچه صالح اولور که ناس اکا اقتداء ایدلر (فلولا التی علیه
 اسورة من ذهب) اول دعواسنده صادق اولسه ربیسی عنندن اکا
 مقالید ملک القاء اولنوردیکه اول التونندن سوارلردر زیرا که انلر بررجلی
 سیادته اختیار ایتسملر بلکلرینه التونندن سوارلر و بویننه التونندن طوق
 کبورلردی اول انلرک سیادته علامت اولوردی (اوجاء معه الملائکة
 مقترنین) ویا انکله بیله ملائکه مقرونین اولدیغی حالده کلوب اکا اعانت
 ونبوت دعواسنده انی تصدیق ایدلردی (فاستخف قومه فأطاعوه انهم
 کانوا قوما فاسقین) فرعون کندویه مطاوعتن سرعتله قومندن طلب
 ویا اول انلرک عقللرین استخفاف ایدوب وانلر دخی اکا اطاعت ایتدیلر

ونقض عهده انزل الله تعالى ورسوله عصيان ايتديلر (فلما آسفونا انتقمنا منهم فاغرقناهم اجمعين) وقتا كه فرعون وقوى عناد وعصيانده افراطله بزى اغضاب ايتديلر انزلدن انتقام ايدوب جيعنى درياه اغراقله هلاك ايتدك (فجعلناهم سلفا ومثلا للآخرين) وانلرى صكره كلان كفاره قدوه قيلدقكه انلرك عقابى مثلنه استحقاقده انلره اقتدا ايدلر وقصه عجيبه اولوب امثال كى سويلنلر (ولما ضرب ابن مريم مثلا اذا قومك منه يصدون) وقتا كه عيسى ابن مريم مثل ضرب اولندى قومك كفارى اكسونديلر * قصه سى اولدر كه سورة انبياده مشر كينه (انكم وماتعبدون من دون الله حصب جهنم) سز والله تعاليدن غيرى معبودلر يكر جهنم وقوديدر دينلدى * ابن الزبعرى ديديكه راضى اولدقكه آلهه مز عيسى وعزير وملائكه ايله بيله اوله زيرا كه انلر دخى الله تعاليدن غيرى عبادت اولمشلردر اويله اولسه كفار مكه اك سوينشديلر واستهزاء طريق اوزره اك كولشديلر وانكله محمد عليه السلام ملازم اولدى ظن ايتديلر (وقالوا آلهتنا خير ام هو) ومحمد عليه السلامه ديديلر كه عندكده بزم آلهه مزى خير ليدر يوخسه عيسامى چون عيسى ناردل اولور آلهه مز دخى انكله بيله انده اولسونلر وياخود آلهه مز اولان ملائكه مى خير ليدر يوخسه عيسامى چون عيسى عبادت اولنوب ابن الله اولمق جائز اولمق بزم آلهه مز اك اولى در وياخود آلهه مزى خير ليدر يوخسه محمدى اول خيرلى ايسه اك عبادت ايدوب آلهه مزى ترك ايدلر (ماضربوه لك الاجدلا) اشبو مثلى سكا ضرب ايتلرى دكل الاجدل وخصومت ايجوندلر يوخسه حقى باطلدن تميز ايجون دكل (بل هم قوم خصمون) بلكه انلر بر قومدر كه خصومتده شديدلر در دأبرى لاجدر (ان هو الا عبد انعمنا عليه) عيسى دكل الابر عبد مروبدر كه بز اك نبوت انعام ايتدك (وجعلناه مثلا لبنى اسرائيل) وانى بنى اسرائيله عبرت ودليل قيلدقكه باباسز انسان ايجادنه الله تعالينك قادر ايديكينه انى مثل ايدلر (ولونشاء لجعلنا منكم ملائكة فى الارض يخلفون) يارجال اك ديلسه وز سزدن ملائكه اولادكتورردك وياسزدن بدل ملائكه كتورردك كه يريوزنده سزه خلف اوله لردى يعنى عيسانك حالى اك رچه عجيبه در لكن الله تعالى اندن اعجب شينه قادردر وملائكه سزك كى ذوات ممكنه

(اولديغى)

اولديغى حيثيتدن توليدله خلق اولنمى محتمل اولور ابداعله خلق اولنمى جائز اولديغى كى اويله اولسه انلر ايجون الوهيته استحقاق والله تعالى به انتساب قندن حاصل اولور (وانه لعلم للساعة) وعيسانك حدوثى ويا نزولى اشراط ساعتندر كه انكله ساعتك قربى يلنور وياخود انك موتاي احياسى الله تعالينك بعته قادر ايديكينه دليل اولور * حديثده كلديكه عيسى عليه السلام ارض مقدسه ده افيق نام دينور ثنيه اوزره نزول ايدر انده حربه اولوب انكله دجالى قتل ايدر بعده ناس صباح نمازنده ايكن بيت المقدسه كلور امام تأخر ايدوب عيسى عليه السلام تقدم ايدر وشرع محمدى اوزره انلره نمازده امامت ايدوب قيلور بعده خنازبرى قتل وصلبى كسر وبيعه وكنيسه لرى تخريب ايدر ونصارانك اسلامه كلينلرين اولدر (فلا تمترن بها واتبعون هذا صراط مستقيم) ايمدى ساعتده شك ايتكز ونم سزى اك دعوت ايتديكم هدى ويا شرع ويا رسوله اتباع ايدك كه اول صراط مستقيدر اك سلوك ايدن مقصودنه اير (ولا يصدنكم الشيطان انه لكم عدو مبين) شيطان سزى اك سلوكدن منع ايتسون اول سزه عداوتى ظاهر عدودر (ولما جاء عيسى بالبينات قال قد جئتكم بالحكمة ولا بين لكم بعض الذى تختلفون فيه فاتقوا الله واطيعون) وقتا كه عيسى عليه السلام معجزات ويا آيات انجيل ويا شريعته كلدى ديديكه ياقوم بن سزه انجيل ويا شريعته كلشن تا كه امر دينده اختلاف ايتديكز شيتك بعضنى سزه بيان ايدم * ايمدى الله تعاليدن سزه تبليغ ايتديكم شيتده اندن قورقوب بكا اطاعت ايدك (ان الله هو ربى وربكم فاعبدوه هذا صراط مستقيم) الله تعالى بنم وسزك جيعمرك ريدر انى توحيد ايدوب اك عبادت ايدك كه اول صراط مستقيدر (فاختلف الاحزاب من بينهم) عيسانك شول انلره نبوتله بعث اولنديغى نصارى بيلندن جماعت متفرقه كه نسطوريه ويعقوبيه وملكانيه در انك امرنده اختلاف ايتديلر تكيم سورة مريمده كچدى وياخود يهودله نصارى بيلنده كه يهودانى ولدزنادر نصارى ايسه ابن اللهدر ديديلر (فويل للذين ظلموا من عذاب يوم اليم) يوم قيامتك عذاب اليمندن ويل اول كسه لره كيم عيسى امرنده افتر ايله نفسلرينه ظلم ايتديلر (هل ينظرون الا الساعة ان تأتيم بغتة وهم لا يشعرون) كافرلك انتظارى دكل الا

يوم قيامته در كه اكا انكار ايدرلر امور دنيايه اشتغاللرندن غافلين اولدقلى حالده چقان اول انلره كلور (الاخلاء يومئذ بعضهم لبعض عدواً الا المتقين) يوم قيامته اصدقاء سوء برى برلرینه عدودر صداقتلى سبب عذاب اولديغيجون الامتقيلرك برى برلرینه صداقتلى فى الله اولديغيجون ابدالآباد باقيه در (يا عباد لا خوف عليكم اليوم ولا انتم تحزنون) الله تعالى متقيله ديه كه يابنم خواص عبادم اشبو كونده سزه عذابدن خوف يوقدر و دنيايه ايشلدريككز ذنوبكز مغفوردر اكا حزن چكيمه سز (الذين آمنوا باياتنا وكانوا مسلمين) كه انلر بزم آيتلر بزمى تصديق ايدوب طاعتقرده مخلصلر ايديلر (ادخلوا الجنة انتم وازواجكم تحبون) ايمدى سز و اهل ايمانندن اولان خاتونلر يكز جنتيه كيرك يوزلر يكز ده آثار سرور ظاهر و يا حسن هبئله مزين و يا اكرام بليغله مكرم اولديغكز حالده (يطاف عليهم بصحاف من ذهب و اكواب) انلر انده التوندن قصعه لرده طعمامله و عروه سز اناء لرده شرابه طواف اولنورلر (وفيها ما تشتهيه الانفس وتلد الاعين و انتم فيها خالدون) و اول جنتيه نفسلرك اشتها و كوزلرك مشاهده سيله التذاذ ايتديككز اشياء وار و مع ذلك سز انده نعيمه دائم سز و هر نعيمكه زائل اوله اول كلفه حفظ و خوف زوالى موجبدر و ثنائى حالده تحسرى مستعقبر (و تلك الجنة التى اورثتموها بما كنتم تعملون) اشبو جنت سزه دنيايه كى اعمال حسنه كز سبيله ملككزه ادخال اولندى ميراثك وارث ملكنه دخولى كى (لكم فيها فاكهة كثيرة منها تأكلون) سز چكون جنتيه فاكهة كثيره واردر ديلديككز و قنده انندن اكل ايدر سز (ان المجرمين فى عذاب جهنم خالدون) كافرلر كه اجرامده كاملردر جهنم عذابنده دائمدر (لا يفترونهم وهم فيه مبلسون) طرفه عين دكلو زمان انلردن عذاب تخفيف اولمز و مع ذلك انلر انده عذابدن نجاته آيسلردر (وما ظلمناهم ولكن كانوا هم الظالمين) برانلره ذنبسز عذابه ظلم ايتمز بلكه انلر كنديلره ايمانندن استكبارله ظلم ايتديلر (ونادوا يا مالک ليقض علينا ربك قال انكم ماكثون) اهل نار شدت عذابلرندن خازن جهنم اولان مالكه ديه لر كه رب تعالىدن بزم ايجون ديله كل بزمى اماته ايله قضايده مالک انلره قرق ييل و يايك ييلدنصكره جوابده سز عذابده دائم سز ديه (لقد جئناكم بالحق ولكن اكثرتم لالحق كارهون) الله

(تعالى)

تعالى قبلندن انلره دينله كه بزم سزه دنيايه رسوللر بزم لسائيله قرآن و توحيد ايندر دك سزك اكثر يكز ايسه اكا اتباعده اتعاب نفس و اذاي جوارح اولديغندن انندن كراحت ايتديكز (ام ابرموا امرا فانما مبرمون) مشركون دخی حق تكذيب وردده برامرا احكام ايتديلر سزه بزم دخی انلره مجازانده امر بزم احكام ايدر ز اشبونده اشعار واردر كه بو حلتلى كراحتلرندن عذابلى اسوه اوله (ام يحسبون انا لانسمع سرهم و نجوهم بلى و رسلنا لديهم يكتبون) يو خسه ظن ايدرلر ميكه قبلرینه خطور ايدن شيى و تناجيلر بى ايشتمهوز بلى بزم آنى ايشدرز و مع ذلك حفظه من انلره ملازمين اولوب اسرار و اعلانلر بزم يازرلر (قل ان كان للرحمن ولد فانا اول العابدين) يا محمد انلره ديكل كه الله تعالىنك فرضا ولدى اولسه سز دن اول اكا بن عبادت ايدر دم و بوندن لازم كلز كه انك ولدى اولوب اكا عبادت صحيح اوله محال كاهى محالى مستلزم اولور بلكه انكله مراد ابلغ و جوه اوزره ايكيسندى نفيدر (سبحان رب السموات و الارض رب العرش عما يصفون) الله تعالى كه سموات و ارض و عرشك ربدر مشركينك اتى ولد ايله و صفندن منزله اولدى زيرا كه بواجسام عظام اصول ذات استمرار اولديغيجون سائر اجسام انك مثلى توليده و صفندن اول تبرى ايديجك انك مبدع و خالق تبريسنه ظنك ندر (فذرهم يخوضوا ويلعبوا حتى يلاقوا يومهم الذى يوعدون) ايمدى انلرى ترك ايتكه باطللرينه اشتغال و دنيايلره لعب ايتسونلر تاكه وعد اولندقلى يوم قيامته ملاقى اوله لر بو آيت دلالت ايدر كه انلرك اول قولى جهل و اتباع هوى اوله و اول انلرك قلوبى اوزره طبع اولوب آخرتده معذب اوله لر (وهو الذى فى السماء اله و فى الارض اله و هو الحكيم العليم) كه اول سماده و ارضده عبادت اولنمغه مستحق الهدر امرنده حكيم خلقنه عليدر (وتبارك الذى له ملك السموات و الارض و ما بينهما) اول الله تعالى مشركينك مقالات باطله سندن تعظم و تعالى ايتديكه سموات و ارضك و ايكيسى بيننده كى مخلوقاتك ملكى آنكدر (وعنده علم الساعة) قيامتك قائم اوله جق ساعتك علمى انك عننده در (واليه ترجعون) كه خلق انده اكا رجوع ايدرلر (ولا يملك الذين يدعون من دونه الشفاعة الا من شهد بالحق وهم يعملون) مشركونك الله تعالىدن غيرى معبودلر كه انلرى كنديلر ايجون

عند الله شفعا زعم ايدرلديكه اول ملائكه وعيسى وعزيردر شفاعته
 قادر اولزلر مكر شول كسهلر ايجونكه الله تعالىنك وحدانيته شهادت
 ايدلر بصيرت واخلاصله حقيقتن بيلور اولدقلى حالده (ولئن سألتهم
 من خلقهم ليقولن الله فاني يؤفكون) اكرسن اول عابدره وكرك معبودله
 سزى كيم خلق ايتدى ديو سوال ايتسك الله تعالى خلق ايتدى ديو اعتراف
 ايدلردى انك فرط ظهورندن انده انلره مكابره متعذر اولوردى اويله
 اولسه انك عبادتدن غيرك عبادته نيجه منصرف اولورلر (وقيله
 يارب ان هؤلاء قوم لا يؤمنون فاصفح عنهم وقل سلام فسوف يعلمون)
 محمد عليه السلام قومندن شكائيله اولان شول قولى حقيچونكه يارب
 اشبونلر بر قومدر كه ايمانه گلزلر اويله اولسه انلردن اعراض ايدوب
 شرلرندن تسلم ايجون انلره سلامتلا ايتكه انلر عن قريب عاقبتلرين بليسرلردر

سورة الدخان وهى تسع وخسون آية مكية

بسم الله الرحمن الرحيم

(حم والكتاب المبين) يا محمد حى وقيوم حقيچون وحق وباطل بينى
 فارق قرآن حقيچون (انا انزلناه فى ليلة مباركة) بز اول قرآنلى ليله قدرده
 ويا ليله برانده جلة لوح محفوظدن سماء دنيايه انزال ايتدك بعده يكرمى ييل
 ويا اكثر زمانده متفرقا محمد عليه السلامه انزال اولندى ايمدى اول ليله نك
 بركتى انكچوندر زيرا كه قرآنك نزولى منافع دينيه وديويه سبيدر ويا
 اول ليله ده ملائكه ورجت نزولى ودعوتك اجابتى ونعم قسمتى واقضيه نك
 فصلى اولديچوندر (انا كنا منذرين) اول قرآنله بز كفارى انذار ايدلر
 (فيها يفرق كل امر حكيم) اول ليله ده سنة آتيدن اول ليله ده دكين
 لوح محفوظده وقوعيله محكوم خير وشر واجل ورزق وسائر امور كاثة
 اندن استنساخ اولنوب هرامر كتابى اوزرينه موكل ملائكه يه تسليم
 اولنور (امرا من عندنا) هرامرك حكمتز مقتضاسنجه بز عندمزدن حاصل
 اولديغى حالده (انا كنا مرسلين) بز خلقه رسوللر وياخود اول ليله ده
 ملائكه كوندر (رحمة من ربك) ربك جل شانده دن مؤمنلره رحمت
 اولديغى حالده (انه هو السميع العليم) كه اول عبادك اقوالنى ايشيدر
 واحوالنى بيلور * ديتلديكه نسخة ارزاق ميكائيله ونسخة حروب وزلازل

(وكسوف)

وكسوف وخسوف وصواعق جبرائيل عليه السلامه ونسخة مصائب
 عزرائيل عليه السلامه ونسخة اعمال سماء دنيا صاحبي اسرافيله ويريلور
 عليهم الصلاة والسلام (رب السموات والارض وما بينهما ان كنتم
 موقنين) كه اول سموات وارض وما بينهما ربك ربيسيدر واكر الله تعالىنك
 وحدانيته موقنلر ايسه كز (لا اله الا هو يحيى ويميت ربكم ورب
 آبائكم الاولين) كه اندن غيرى معبود بالحق يوقدر خلق دير كورر اجللرى
 انقضاسنده اولديرر كه اول سرك وآباء اولينكزك خالق ورازقيدر (بل هم
 فى شك يلبون) بلكه قرآن وقيام ساعتدن شكده اولوب سنى
 استهزاء ايدرلر (فارتقب يوم تأتى السماء بدخان مبين) مشركين ايجون
 منتظر اولغل شول كونه كيم سماء دخاله كله * ديتلديكه انكله مراد
 يوم شدت مجاعدهر كه جايغ ضعف بصيرندن انكله سماء بيننده دخان
 هيتنده كورر وياخود قحط ييلنده قلت امطار وكثرت غباردن سماء مظلم
 اولور وياخود عرب شرغالبه دخان ديو تسميه ايدر وياخود اشراط ساعتدن
 معدود دخاندر * روايت اولنديكه پيغمبر صلي الله تعالى عليه وسلم ديديكه
 قيامتك اول علامتى دخاندر ونزول عيسادر وقعرعدن اينندن نار خروچيدر
 ناسى محشره سوق ايدر * ديتلديكه يارسول الله اول دخان نه شيددر پيغمبر
 عليه السلام بو آيتى اوقيوب ديديكه اول دخان مشرق ومغرب اراسن
 طولدورب قرق كون مكث ايدم مؤمنه اندن زكام هيتنده ايدم وكافر
 سكران كى اولوب دخان منخرلرندن وقولاقلرندن وديرنندن چيقه وياخود
 مراد يوم قيامت اولوب دخان ايكي معنائى محتمل اوله (يغشى الناس هذا
 عذاب اليم) اول دخان ناسى احاطه ايدوب ديهلر كه اشبو عذاب اليمدر
 (ربنا اكشف عنا العذاب اننا مؤمنون) يارب بز دن بو عذابى كشف ايتكه بزايمانه
 كلهوز (انى لهم الذكرى وقد جاءهم رسول مبين) اشبو حالته تذكر انلره قندن
 حاصل اولور حالبوكه انلره رسول محمد عليه السلام كلديكه تذكرى
 ايجابده آيات ومعجزاتدن دخاندر اعظم شئى قبين ايتدى (ثم تولوا عنه
 وقالوا معلم مجنون) انلر ايسه اندن اعراض ايدوب ديديلر كه اول قرآنلى
 معلمر جبير ويسار نام غلام اعجمى انى تعليم ايدوبدر ويا اول مجنوندر
 قولنه اعتبار يوقدر (انا كاشفوا العذاب قليلا انكم عائدون) يا اهل مكة
 بز سزدن عذابى كشف قليل ويا زمان قليل كشف ايدرر كه اول بقيه

اعمار لرنده در ویا یوم بدره دکر سزایسه اول کشف عقبنده لبث ایتموب
ینه شرککزه عودت ایدرسز اکا بناء پیغمبریز صلی الله علیه وسلم
دعاسیله قریشدن قحط دفع اولدیغی عقبنده کفرلرینه عودت ایدوب
یوم بدره انتقام اولندیلر واکر دخانه اشراط ساعتدن اولان شیء
مراد اولور سه اول دخان کلدیکنده کفار دعایه مشغول اولوب الله تعالی
انی انلردن قرق کوندنصکره کشف ایدوب انک عقبنده انلرینه کفره
عودت ایدلر (یوم نبطش البطشة الكبرى انانتمقون) ذکر ایت شول
کونیکه اول یوم بدردر ویا یوم قیامتدر بطشه کبرای مشرکینه باطشه
قیلورز ویا ملائکه بی انلره بطشه تحمیل ایدرز که اول صولته تناولدر
ایمدی اول کونده بز انلردن انتقام ایدرز (ولقد قتنا قبلهم قوم فرعون
وجاههم رسول کریم) قریشدن اول فرعون قومنی بز امهال وکثرت
امواله امتحان ایتدک وانلره بر رسول کلدیکه اول موسی علیه السلامدر
الله تعالی عندنده ویا مؤمنلره ویا نفسنده کریمدر (ان ادوا الی عبادالله
انی لکم رسول امین) دیدیکه الله تعالی انک اهل ایمان قوللرین بخله
کوند کل ویا خود یا عبادالله ایمان و قبول دعوتدن حق الهی بکا
ادا ایدک که بن سزه الله تعالی دن رسول ووحینه امین صدقه معجزات
دلالت ایتدیکیچون (وان لاتعلوا علی الله انی آتیکم بسلطان مبین)
والله تعالی انک وحینه ورسولنه استهانته تکبر ایتکز که بن سزه یدوعصا
مثلی برهان واضحه کلشن (وانی عذت بری وربکم ان ترجون)
وبن الله تعالیه التجا وتوکل ایتشنکه بنی ضرب ویا شمله اذاء ویا طاش ایله
قتل ایدسز (وان لم تؤمنوا لی فاعترلون) واکر بنی تصدیق ایتسکز
بنی حاله قوکز بکا خیرکز ایرشمز سه شریکز دخی ایرشمسون (فدعا ربه
ان هؤلاء قوم مجرمون) وقتاکه انلر ایمانه کلدیلر موسی علیه السلام انلره
بد دعا ایدوب یارب اشبونلر بر قوم مشرکیندر بکا اطاعت ایتزلر دیدی
(فاسر بعبادی لیلا انکم متبعون) الله تعالی موسایه دیدیکه چون حال
دیدیکل منوال اوزره در عبادم بنواسرائیله کیجه مصردن چیغوب
کتکه فرعون وجنود وسزک چیقدیغکزی بیلدکلرنده آردکزه دوشوب
کیدرلر (واترک البحر رهوا انهم جند مغفون) وبحری قومکله
یکدی یکدی نصکر هیئت اوزره انی ساکن ویا طریق یابسن آلیقو غل یوخسه

(اول)

اول ملتئم اولسون ایچون تکرار عصا کله اورمغل زیر فرعون وجنودی
اکا کیروب غرق اولیسرلدر (کم ترکوا من جنات وعبود وزروع ومقام
کریم ونعمة کانوا فیها فاکهین) چون فرعون وجنودی اول بحره
غرق اولدیلر مصرده بوستانلر ونهرلر واکینلر ومحافل مزینه و منازل
حسنه دن اشیاء کثیره آلیقودیلر وتنعمدنکه انده متنعمین ایدیلر (کذلک
واورثاها قوما آخرین) انلری ذکر اولسان اموال ونعمدن اخراجز
کبی بزانی بنواسرائیله ویا انلرک غیری قومه ایراث ایتدک که زیر
بنواسرائیل اندنصکره مصره عودت ایتدیلر (فما بکت علیهم السماء
والارض) سماء وارض انلرک هلاکنه اکثراث ایتدی وجودلرینه اعتداد
ایتدیکی کبی * زیرا که مؤمنک موتنه قرق صباح سماء وارض ومصلاسی
ومحل عبادتی ومصعد عملی ومهبط رزقی بکاء ایدر (وما کانوا منظرین)
انلره عذاب کلدیکنده وقت آخره امهال اولندیلر (ولقد نجینابی
اسرائیل من العذاب المہین من فرعون انه کان عالیاً من المسرفین)
بنواسرائیلی بز عذاب شدید ویا عذاب هواندن قور تردککه اول انلرک
ابنائی قتل ایدردی عذاب فرعوندنکه اول تکبر ایدوب عتو وشرارنده
اسراف ایدلردن ایدی (ولقد اخترناهم علی علم علی العالمین)
بز بنواسرائیلی زمانلرینک عالمینی اوزره اختیار ایتدک بعض احوالده انلرک
اکا احقاء ایدیکنی بیلدیکمزدنصکره انلردن چوق انبیاء کتوردک
(وآتیناهم من الآيات مافیہ بلاء مبین) وبز انلره فلق بحر وتظلیل غمام
وانزال من وسلوی مثلی آیاتدن ویردک که انده نعمت جلیله ویا اختبار ظاهر ایدی
(ان هؤلاء ليقولون ان هی الاموتنا الاولى وما نحن بمنشرين) وقتاکه
مکه نک کفارنه سز امانه اولنور بعده حساب وجزاء ایچون احیاء
اولنور سز موتہ متقدمه کزدنصکره احیاء اولندیلر کبی دینلده
دیدیلر که موتہ دکل الاموتہ اولیدر که تقدم ایدر یوخسه اول موتہ دنصکره
حیات یوقدر وبز موتزدنصکره بعث اولنورز (فأتوا باآبائنا ان کنتم
صادقین) اکر موتزدنصکره بعث اولنور دیو قولکزده صادقلر ایسکز
بزم فوت اولان آباءمزی دیرلرک (أهم خیرام قوم تبع والذین من قبلهم
اهلکناهم انهم کانوا مجرمین) قوت ومنعهده کفار مکهمی اشددر
یوخسه قوم تبعی وانلردن اول یکن عادو ثمود مثلی کفارمی ایمدی بز قوم

تبعی و كرك انلردن اول يكن كفارى هلاك ايتدك زيراكه انلر قوم حاصين وكافرين ايديلر * دينلديكه تبع مؤمن ايدى اماكه قومی كفار ايديلر اول اجلدن الله تعالى انلری ذم ايدوب تبعی ذم ايتدی * پیغمبریمز صلی الله علیه وسلمدن مرویدر دیدیکه بیلزمکه تبع پیغمبریمیدی و یا دگیلیدی عائشه رضی الله تعالى عنها دیدیکه تبعی سب ایتدکزه اول بر رجل صالحدر (و ما خلقنا السموات والارض وما بينهما لاعین) سموات وارضی وایکیسی بیننده کی کاشانی بز لعب ایدر اولدیغی حالده خلق ایتدک بلکه مصالح دینی و دنیویه ایچون خلق ایتدکزه عبادیمز انکه وحدانیتمزه استدلال ایدلر و انده کی منافع و مراقبه ضرورت و مراقبین دفع ایدلر (ما خلقناهما الا بالحق ولكن اكثرهم لا یعلمون) بلکه اول ایکیسن سبب حقه خلق ایتدک که ایمان و طاعت و یا بعث و جزایه اول دلیل اوله لکن خلقك اكثری قلت نظر لرندن انی بیلزلر (ان یوم الفصل میقاتهم اجمعین) یوم قیامت انلرک جیعنه میقاتدر که انده حق باطلدن و محق مبطلدن جزائله فصل اولنور و یا خود کشتی اقربا و احبابسندن آریلور (یوم لا یغنی مولی عن مولی شیئا ولا هم ینصرون) که اول کونده هیچ برولی قرابت و یا غیریدر و اینه شفاعت و یا دفع عذابدن هیچ برشیئی نفع ایتز و نازل اولان عذابدن منع اولنمز (الامن رحم الله انه هو العزیز الرحیم) مکر که الله تعالینک رحمت ایتدیکی مؤمنلردن اوله * ایددی اول و صفلو کسه ایچون شفاعت ایدیلور و شفاعت قبول اولور زيراكه الله تعالى عزیزدر تعذیب اراده ایتدیکنه نصرت اولنمز رحیمدر رحمت اراده ایتدیکی کسه دن رحمتی منع اولنمز (ان شجرة الزقوم طعام الاثیم) شجرة زقوم که سورة صافانده ذکر اولنمشد کثیر الاثم کسه لرك ناردده طعامیدر (کالمهل بغلی فی البطون کغلی الحمیم) صفر مذاب و یا دردی زیت کی بطونده حیمک غلیانی کی غلیسان ایدر (خذوه فاعتلوه الی سواء الحمیم) اندن زبانییه دینور که انی اخذ ایدوب جهنمک اورتاسنه سوریکز (ثم صبوا فوق رأسه من عذاب الحمیم) بعده انک باشنه عذاب حیمدن دوککز (ذق انک انت العزیز الکرم) بعده زبانییه اکا استهزاء وجهی اوزره دیرلر که اشبو عذابی ذوق ایتکه زيرا سن دنیا ده زعمکده قومک قنده عزیز و کریم ایدک

(روایت)

روایت اولندیکه ابو جهل دیدیکه بن بو وادینک اعز و اکرمین زبانییه دخی اکا اول قولی استخفاف و تو بیخ طریق اوزره دیدلر (ان هذا ما کنتم به تمترون) اشبو شول عذابدر که انک حقیقتنده سنز دنیا ده شک ایدر دیکز (ان المتقین فی مقام امین) شرک و معاصیدن صاقنانلر آخرتده بر موضع اقامتده در که صاحبی آفت و انتقالدن امیندر (فی جنات و عیون) ما کل و مشارب استلذاذ اولنور بوستانلرده و بیکارلرده در (یلبسون من سندس و استبرق متقابلین) که انلر حریرک رقیق و غلیظندن لبس ایدرلر سریرلری انلرله بیلله دور ایدر اولدیغیچون بری برلرینه قارشو اوتورلر (كذلك وزوجناهم بحور عین) ذکر اولنان کراماتله انلره اکرام ایتدیکمز کی حور عینی انلره قرین ایتدکله دخی اکرام ایدرز (یدعون فیها بكل فاکهة آمنین) انلر جنتده فوا کهدن اشتها ایتدک لری شیتک احضارنی طلب و امر ایدرلر یوخسه اندن بر شیتله تخصص ایتزلر انقطاع و مضرتدن و یا موت و مجا و فدن آمین اولدق لری حالده (لا یدوقون فیها الموت الا الموتة الاولى) انلر انده موتی ذوق ایتزلر موته اولیدن غیریکه انی دنیا ده و صکره ده ذوق ایتدیلردی (و وقیهم عذاب الحمیم) والله تعالى انلردن عذاب جحیمی صرف ایدر (فضلا من ربك) اشبو ذکر اولنان کراماتک جبعی الله تعالیدن انلره عطا و فضل وجهی اوزره اولدیغی حالده (ذلك هو الفوز العظيم) اشبو مذکور انلره فوز عظیمدر که مکارهدن قورتیلوب مطالبه ایریشورلردر (فانما یسرناه بلسانک لعلهم یتذکرون) بز سکا قرآنی کندی لسانکده انزالله آسان ایتدک تا که سن انی قومکه قراءت ایتدککده فهم ایدوب انکه متعظ اوللر (فارتقب انهم مرتقبون) اگر انلر انکه متعظ اولنمزله اوزرلرینه حلول ایدر عذابلرینه منتظر اولغلر که انلر سنک موتکه و یا داتره سوئکه منتظرلردر * پیغمبریمز صلی الله تعالى علیه وسلم ایدر بر کسه که کیچده سورة دخانی اوقیه صباحه دکین یتش بیک ملک انکیچون استغفار ایده ینه پیغمبریمز صلی الله تعالى علیه وسلم ایدر بر کسه که جعه کیچده سنده سورة دخانی اوقیه جیع کناهلری مغفور اولدیغی حالده صباحه ایریشور

سورة الجاثية وهى سبع وثلاثون آية مكية

بسم الله الرحمن الرحيم

(حم تنزيل الكتاب من الله العزيز الحكيم) يا محمد حم حقيقون اشبو قرآنك
سكا تنزيلي اول الله تعالى يدركه عزت وحكمته موصوفه (ان فى السموات
والارض لايات للمؤمنين) سموات وارضك خلقته وايكسند اولان
اصناف مخلوقاته الله تعالى بك وحدانيته وكال قدرته مؤمنرا يحون
علامتر واردر (وفى خلقكم وما يث من دابة آيات لقوم يوقنون)
وسرك خلقكزده حالن حاله تحويلكزده ودواب مختلفه نك يروزينه
انتشارنده بعته موقن قومه علامتر واردر (واختلاف الليل والنهار)
كچه وكوندرك برى كيدوب برى كلسنده برينك سوادى وبرينك
بياضنده (وما انزل الله من السماء من رزق فاحي به الارض
بعد موتها) والله تعالى بك سعادن يغمور ايندروب انكله ارضى
ييسند نصكره انواع نباته احياسنده (وتصريف الرياح) وريحلك
بعضى رحمت وبعضى عذاب اولسند و جهات مختلفه دن هوبنده
(آيات لقوم يعقلون) علامتر واردر شول قوم ايجونكه الله
تعالى بك وحدانيت وقدرتن تفهم ايدوب انى تصديق وامرته اطاعت
قصد ايدرلر (تلك آيات الله تلوها عليك بالحق) اشبو آيتلر الله تعالى بك
وحدانيتنه دلائلدر كه حق ملتبسسه اولديغى حالده بز انى سكا تلاوت
ايدرلر (فبأى حديث بعد الله وآياته يؤمنون) الله تعالى بك حديثى قرآن
وآيات مذكوره سند نصكره قنغى حديث وآياته تصديق ايدرلر (ويل
لكل افاك ائيم) ويل هر كذاب وكثير الاثام كسديه اولسون (يسمع
آيات الله تتلى عليه ثم يصتر مستكبرا كأن لم يسمعه فبشره بعذاب اليم)
كه اول اكا تلاوت اولنان آياتى ايشديكند نصكره انى ايشتمدك كبي اكا
ايمانن استكبار ايدر اولديغى حالده كبرى اوزره اقامته اصرار ايدر
ايمدى اول وصفلو كسديه عذاب وجيع ايله تبشير ايت (واذا علم من آياتنا
شيئا اتخذها هزوا) چان اكا آيتلر مز دن بر شى اير يشوب انى آيتلر مز دن
ايدو كنى بيلديكند انك كنى استهزايه مبادرت ايدر يوخسه انجق ايشديكنى
استهزاء ايله اقتصار ايتز (اولئك لهم عذاب مهين) ايمدى اول وصفلو

(كسده لره)

كسده لره آخرته اهانت اولنور عذاب واردر (من ورائهم جهنم)
نار جهنم ايسه اوكرنده در زيرا اكا متوجهلدر ويا اردلرنده در زيرا كه
آجاللرند نصكره در (ولا يغنى عنهم ما كسبوا شيئا ولا ما اتخذوا
من دون الله اولياء) واموال واولاددن كسب ايتدكرى والله تعالى بدن
غيرى اولياء اتخا ايتدكرى عذاب الله بدن هيج بر شى انلردن دفع ايتز
(ولهم عذاب عظيم) ومع ذلك آخرته انلره تحمل ايده مدكرى عذاب
عظيم واردر (هذا هدى) اشبو قرآن سبب هدايتدر (والذين كفروا
بآيات ربهم لهم عذاب من رجز اليم) شونلر كه رب تعالى بك آياتى قرآنه كافر
اولديلر انلر ايجون آخرته عذاب وجيعدن اشد عذاب واردر (الله الذى
سخر لكم البحر) الله تعالى سزه بحرى تسخير ايتدى املس السطح قيلمغه
اكا تخلص ايدن شى فوقه كتورر وجوفه غوصه امكان ويرر ايتكله
(لتجرى الفلك فيه بامره) تاكه الله تعالى بك تسخيريله انك فوقده
سز اكا راكب ايكن يوريه سز (ولتبتغوا من فضله) وتاكه الله تعالى بك
فضلندن تجارت وغوص وصيد وغيريله طلب ايده سز (ولعلكم تشكرون)
وبونعمتله شكر ايده سز (وسخر لكم ما فى السموات وما فى الارض جميعا منه)
وسموات وارضه كى اشيا بك جيعنى اندن سزه رحمت اولديغى حالده صلاح
ومنفعتكز ايجون سزه تسخير ايتدى (ان فى ذلك لايات لقوم يتفكرون)
اشبو مذكوره الله تعالى بك وحدانيت وقدرته علامتر واردر شول قوم
ايجونكه انك صانعنده تفكر ايدرلر (قل للذين آمنوا يغفروا للذين لا يرجون
ايام الله ليحزى قوما بما كانوا يكسبون) يا محمد مؤمنلره ديكل كه عفو
وصفح ايتسونلر شول كسده لره كه الله تعالى بك اعداسنه اولان وقائعى
توقع ايتزلر وياخود شول اياحى تأمل ايتزلر كه الله تعالى انى مؤمنلره نصر
وثواب ايجون توقيت ايدوبدر تاكه الله تعالى مؤمنلره وكافرلره دنياه كسب
ايتدكرى خيرك وشرك جزاسن انده ايده * دينلديكه آيت قتاله اشبو آيت
نسخ اولندى (من عمل صالحا فلنفسه ومن اساء فعليه) ثم الى ربكم
ترجعون (بركسه كه عمل صالح ايده ثوابى كندويه در واولكه عمل سي
ايده وبالى كندويه در بعده جيعكز رب تعالى به رجوع ايدر سز اعمالكزك
جزاسين ايدر (ولقد آتينا بنى اسرائيل الكتاب والحكم والنبوة) بنو
اسراييله بز تورات وحكمت نظريه وعمله ويافضل خصوصات ونبوت

ویردک که انلردن اولان کثرت انبیاء غیریلده اولمدی (و رزقناهم من الطیبات) و حلالدن انلره ویردک من و سلوی و فرعون و قومک اموال و دیاری کبی (و فضلناهم علی العالمین) و انلری زمانلرینک عالمینی اوزره تفضیل ایتدک غیریلده ویرمدیکمز اشیایی انلره ویردک (و آتیناهم بینهات من الامر) و دین امرندن بز انلره ادله ویردک و یاخود محمد علیه السلام مبعثه و انک امرندن تبیین اولنان اشیایه علم ویردک (فاختلفوا الا من بعد ما جاءهم العلم بغیابینهم) انلر ایسه اول امرده اختلاف ایتدیلر الاحقیقت حاله علم حاصل اولدیغند نصکره بیلنلرنده حدوث ایدن حسد و عداوت سببیه (ان ربک یقضی بینهم یوم القیامة فیما کانوا فیه یختلفون) ربک جل شانہ انلرک اختلاف ایتدکلری شیئده یوم قیامتده بیلنلر بنی مؤاخذه و مجازاته قضا ایدر. (ثم جعلناک علی شریعة من الامر فاتبعها) یا محمد انلردن نصکره بز سنی امر دیندن بر طریقه اوزره قیلدق ایمدی سن اکا اتباع ایتکه اول حججه ثابته در (ولا تتبع اهواء الذین لا یعلمون) یو خسه شهواته متابعت ایدن جهالت آراشه دکل زیرا که انلر توحیدی بیلنلر که انلر رؤساء قریشدر کیم پیغمبریمز صلی الله تعالی علیه وسلمه آباءک دیننه اتباع ایت دیمشلردی (انهم ان یغفوا عنک من الله شیئا) زیرا که سن انلرک هوارینه اتباع ایدر سبک الله تعالیینک عذابندن بر شیئی سندن منعه قادر اولمز (وان الظالمین بعضهم اولیاء بعض) مشرکون دین باطللرنده بری بر لرینک اولیا بیدر ایمدی هوارینه اتباع ایله انلره موالات ایتکل (والله ولی المتقین) الله تعالی شرک و عصیانندن اتقاء ایدنلرک و لیسیدر ایمدی تقوی و اتباع شریعتله اکا موالات ایت (هذا بصائر للناس وهدی ورحمة لقوم یوقنون) اشبو قرآن ناسه بیاندکه انکله وجه فلاحی کوررلر و ضلالدن هدی و الله تعالیدن نعمتدر شول قوم ایچونکه یقین طلب ایدرلر (ام حسب الذین اجترحوا السیئات ان نجعلهم کالذین آمنوا و عملوا الصالحات سواء محیاهم و مماتهم ساء ما یحکمون) ظن ایدرمی شول کسه لکه دنیاده اعمال سیئه کسب ایتدیلر آخرتده بز انلری اعمال صالحه ایشلین مؤمنلر کبی قیلدهوز بهجه و کرامتده مؤمنلر و کافرلر حیاتده و مماتده مساوی اوله لر حیاتده رزق و صحتده مستوی اولدقلری کبی مماتلرند نصکره دخی کرامتده و یاترک مؤاخذه ده مستوی اوله لر ایمدی حال انلرک ظن ایتدکلری منوال اوزره

(دکدر)

دکدر زیرا که حیاتده مؤمنلر طاعتده قیامتده در کافرلر ایسه شرک و معاصی ارتکابنده در و مماتده مؤمنلر الله تعالیینک رحمت و ثوابنه ایررلر کافرلر ایسه اندن مأیوسین اولوب عذاب اولمغه کیدرلر اولیه اولسه ایکی صنف حیات و مماتده نیچه مساوی اولور نه شیئ سببدر که انلر انی حکم ایدرلر (و خلق الله السموات و الارض بالحق) الله تعالی سموات و ارضی حقله خلق ایتدیکه اول عدل اقتضاء ایدر تاکه مظلوم ایچون ظالمدن انتصار ایده و مسی ایله محسن بیننی فصل ایده حیاتده اولمزه مماتدن نصکرده اوله (و لتجزی کل نفس بما کسبت) و تاکه هر نفس خیر و شرندن کسب ایتدیکه جزا اولنه (وهم لا یظلمون) انلر نقص ثواب و یا تضعیف عذابه ظلم اولمز لر اگرچه الله تعالی انی ایتسه ظلم ایتش اولمزدی زیرا که جمیع کائنات انک خلق و ملکیدر ظلم اولمسی غیرک فعلنه نسبتله در (أفرایت من اتخذ الهه هوا) نظر ایدر میسن شول کسنه نک حالته کیم هواسنی آلهه ایدینوب نفسنک بکنندیکی شیئی معبود ایدینه نیکم عربک مشرکلری طاشه و التونه و کومشه طیارلردی ققان اول طاپدقلری شیئدن احسننی بولسه لر اولکیسن قیروب صکره کتی معبود ایدینورلردی (و اضله الله علی علم) و الله تعالی انی طریق هدادن مخذول ایده انک عاقبت امری نار ایدو کتی بیلورکن (و ختم علی سمعه و قلبه و جعل علی بصره غشاوة) و انک سمعی و قلبی اوزره حاجز قیلوب مواعظه مبالات و آیاتی تفکر ایتیه و بصری اوزره غشاوه ایدوب عین استبصار و اعتبارله نظر ایتز ایلیه (فن یهده من بعد الله) بر عیدکه الله تعالی انی مخذول ایده طریق هدایتیه انی کیم ارشاد ایده بیلور (أفلا تذکرون) انکله اتعاض ایتز میسر (وقالوا ما هی الا حیاتنا الدنیا نموت و نحیی و ما یهلکنا الا الدهر) وبعثی انکار ایدنلرک بعضیلری دیرلر که حیات و یا حال دکل الاشول صددنده اولدیغمز حیات دنیادر نطفه و ما قبلنده ایکن اموات ایدک اندن نصکرده احیاء اولورز و یاخود کندیلکمز دن اموات اولوب اولادمز بقاسیله حیات بولورز و یاخود کیمز اولور و کیمز دیریلورز و یاخود بزه دنیاده موت و حیات ایرر انک وراسنده حیات یوقدر و احتمال اولور که انکله مرادلری تناسخ اوله که اول اکثر یا عبده اوئان اعتقادیدر بزى اماته ایدن

بع (۹)

دكل الامضى ايام و ليل و انقضاء آجالدر كه اول اصلده بقاء عالمدر
 (و مالهم بذلك من علم) انلك حوادثى حركت افلاكه و متعلقاته
 استقلال اوزره نسبتلرنده و يابعى انكارلرنده و يا ايكيسن بيله اعتقادلرنده
 برهان قطعى ايله علملى يوقدر (انهم الا يظنون) بلكه انى ظنله ديرلر
 يوخسه تحقيله دكل (و اذا تلى عليهم آياتنا بينات ما كان جنتهم
 الا ان قالوا اشوا باآثنا ان كنتم صادقين) چنان انلره آيتلر يمز تلاوت
 اولنسه اول انلك معتقداتى بطلاننى ايضاح ايدر انلك معارضديه
 متشبثلى اولمز الا اولكه اكر بزم مومزدنصكره حياتمزله اخبار كزده
 صادق ايسكز وفات ايدن آباءمى احياء ايدك ديرلر (قل الله يحييكم
 ثم يميتكم ثم يجمعكم الى يوم القيامة لاريب فيه) يا محمد سن انلره ديكل كه
 الله تعالى ديركه سزى دنياده ديركورر و آجالكز انقضاسنده اولديرر
 بعده نفخة ثانيده بعلله اولين و آخريتكزى يوم قيامت ايچون محشره جمع
 ايدر كه انده ريب يوقدر زيرا كه انلرى ابداعه قادر اولان رب تعالى اعاده يه
 دخی قادر اولور و مع ذلك حكمت اقتضاء ايتديكه مجازات ايچون جمع
 ايديله شول كونده كه آيات دلالتيله وقوعنده شك اوليه (ولكن
 اكثر الناس لا يعلمون) لكن ناسك اكثرى قلت تفكر لرى و محسوساته
 قصور نظرلر ايچون انى بيلزلر (والله ملك السموات والارض) سموات
 وارضك ملكى الله تعالى يه مختصدر كه اول ايكيسنده امرى منازع
 و معارضسز نافذ اولور (و يوم تقوم الساعة يومئذ يخسر المبطلون)
 يوم قيامت اولديغنده كافركلر خسراتى ظاهر اولور كه جيعى ناره كوندريلور
 (و ترى كل امة جائية) اول كونده كوررسن هرامت مجتمعه در و ياديرلى
 اوزره چوكوبدر شول مخاصمك حاكم او كنده جلسه سى كبيكه حاكمك
 قضا سنده منتظر اوله * سلمان فارسى ايدر يوم قيامتده بر ساعت
 اولور كه مقدارده اون بيلجه اولور انده ناس ديزلى اوزره چوكش حشر
 اولور حتى اول ساعتده ابراهيم عليه السلام رب تعالى يه يارب تقسم
 ديرلر ديو نياز ايديسر در (كل امة تدعى الى كتابها اليوم تجزون ما كنتم
 تعملون) انده هرامت صحيفه اعمالنه چاغريلوب اشبو كونده دنياده
 ايشلدريكز خير و شرله جزا لنورسز دينور (هذا كتابنا ينطق عليكم
 بالحق انا كنا نستنسخ ما كنتم تعملون) اشبو صحائف اعمالكز بزم امرمزله

(كراما)

كراما كاتين يازديغى كتابمزدركه زياده و نقصانسنز اعمالكزى ذكر ايدر
 دنياده بز اول ملائكه مزه ايشلدريكز خير و شر اعمالكزى يازدرمشدق
 (فاما الذين آمنوا و عملوا الصالحات فيدخلهم ربهم في رحمته ذلك هو الفوز
 المبين) اما شونلر كه مؤمن اولوب اعمال صالحه ايشلديلر رب تعالى
 انلرى جنتنه ادخال ايدر اشبو امر ايسه انلره فوز ظاهر در (و اما الذين
 كفروا اظلم تكن آياتى تلى عليكم فاستكبرتم و كنتم قوما مجرمين) اما
 شونلر كه كافر اولديلر انلره دينور كه دنياده سزى رسوللر يمز كلوب آيتلر يمز
 تلاوت اولنمى سز ايسه اكا ايمانندن استكبار ايدوب قوم مجرمين
 اولديكزدى (و اذا قيل ان وعد الله حق و الساعة لاريب فيها قلتم ما ندرى
 ما الساعة ان نظن الاظنا و ما نحن بمستيقنين) چنانكه الله تعالى نيك
 سزى وعدى واقعدر انده خلف اولمز و قيامتك وقوعنده شك يوقدر
 دينلره سز ديرديكز كه بز قيامتك نه ايدوكنى بيلزلر بلكه بزانى حديث نفس
 و توهم ظن ايدر دك يوخسه انك امكانه يقينى يوغدى (و بدلهم سيئات
 ما عملوا و حاق بهم كانوا به يستهزؤن) و انلره اعمال سيئه لر ينك قبحى
 ظاهر اولوب وخامت عاقبتن كوره لر و استهزاء ايتدكلرينك جزاسى
 انلره نازل اوله (و قيل اليوم ننسيكم كما ننسيتم لقاء يومكم هذا) و انلره
 دينور كه اشبو كونده بز سزى عذابده ترك ايدرز منسى شيك ترك اولنمى
 كى تنكيم سز اشبو كونه لقائكز ايچون واجب اولان عملى ترك ايتديكزدى
 (و ماؤاكم النار و ما لكم من ناصرين) قرار كاهكز جهنمدر سزى نصرت
 ايدر اوليا كز يوقدر كه سزى اندن تخلص ايدى (ذلكم بانكم اتخذتم
 آيات الله هزوا و غرتكم الحياة الدنيا) اشبو عذاب سزى شول سبيله در كه
 آيات اللهك حقيقتن تفكر ايتديككز دى ماعدا انى استهزاء ايدرديكز
 و حيات دنيا سزى آلايوب اندن غيرى حيات اولمز ظن ايتديكز (قال يوم
 لا يخرجون منها و لا هم يستعتبون) ايمدى بو كونده و من بعد ايدا جهنمدر
 چيقارلزلر رب تعالى بى ارضايله دخی طلب اولنزلر زيرا كه اعتذار
 و توبه نك وقتى فوت اولوبدر (قل لله الحمد رب السموات و رب الارض
 رب العالمين) اوليه اولسه مؤمنلر اول وقتده ديرلر كه جيع محامد
 و آثار جد و ثنا الله تعالى يه مختصدر كه اول سموات و ارضك بلكه جيع
 عالمينك ريدر (وله الكبرياء فى السموات و الارض و هو العزيز الحكيم)

سموات وارضده كبرياء انكدر كه آثارى انده ظاهر اولدى ملكنده اول
عزيز وامرنده حكيمدر ايمدى جد وتكبير واطاعتى اكا ايدك
سورة الاحقاف وهى خمس وثلاثون آية مكية

بسم الله الرحمن الرحيم

(حم تنزيل الكتاب من الله العزيز الحكيم) يا محمد حم حقيقون اشوقرآنك
تنزيلي اول الله تعالىدندر كه هر شيك اوزره اول غالبدر تقدير
وقضاسنده حكيمدر (ما خلقنا السموات والارض وما بينهما الا بالحق
واجل مسمى) بزسموات وارض وما بينهماى حقه ملتبس خلق ايتك
حكمت ومعدلت انى اقتضاء ايدر واجل مسمى تقديريله جميع اشيا اكا
منتهى اولور كه اول يوم قيامتدر (والذين كفروا عما اندروا معرضون)
شونلر كه كافر اولديلر اندار اولندقلى يوم قيامت اهوالنندن معرضلردر
نه انده تفكر ونه انك حلولنه استعداد ايدرلر (قل أرأيتم ما تدعون
من دون الله) ديكل كه بكا خبر ورك كه الله تعالىدين غيرى آله كه انلره
عبادت ايدرلر (ارونى ماذا خلقوا من الارض) بكا كوسترك كه
ارضده نه شئي خلق ايتديلر الله تعالىنك خلق ايتديكى كى (ام لهم شرك
فى السموات) يوخسه سموات خلقنده الله تعالى به مشار كتلىرى واردر
(اشونى بكتاب من قبل هذا) ايمدى بوقرآندن اول منزل بكا بركتاب
كتورك كه اول قولكز صحنه شهادت ايده (اوانارة من علم) وياخود
علوم اوليندن سزده موجود بقيه كتورك كه انده آلهلريكرك عبادته
استحقاقنه دلالت ويا انكله امر ايدر شئ وارميدر (ان كنتم صادقين)
اكر دعوا كزده صادقلى ايسكز (ومن اضل ممن يدعو من دون الله من
لا يستجيب له الى يوم القيامة) مشركرده شول كسه دن اضل وارميدر كه
اول سميع مجيب قادر خير الله تعالى به عبادتى ترك ايدوب ابدانلرك
دعاليته اجابته قادر دكل شئ عبادت ايدرلر (وهم عن دعائهم غافلون)
حالبو كه اول آلهلرى انلرك دعاسندن غافلردر زيرا كه اول آله اتخاذا
ايتدكارى اشياء ياجاداندر ويا كندى حالرينه مشغول عبادمزندنر
(واذا حشر الناس كانوا لهم اعداء وكانوا بعبادتهم كافرين) چنانكه
كافرلر حشر اولهلهر معبودلرى انلره اعداء اولوب انلرك عبادتن انكار

(ايدلر)

ايدلر (واذا تلى عليهم آياتنا بينات قال الذين كفروا للحق لما جاءهم
هذا سحر مبين) چنان انلره بزم آيات واضحات ويا مينا تمز قرآن تلاوت
اولنسه اول قرآن انلره كلديكنده اكا كافر اولنلر ديديلر كه بوسحر ظاهر در
(ام يقولون افتراء قل ان افتريته فلا تملكونلى من الله شيئا) يوخسه انلر
محمد قرآنى كنديلكندن اختلاق ايتدى ديرلر ايمدى سن انلره ديكل كه
بن انى اختلاق ايتمش اولسم الله تعالى بكا عقوبتى تعجيل ايتديكنده اول
عقوبتن برشى دفعنه سز قادر اولمى سز اوليه اولسه بن اكا نيجه جرأت
ايدوب سز دن پرنفع جلى ويا ضرر دفعى توقعسز كنديمى عقابه
تعريض ايدرلر (هو اعلم بما تفيضون فيه) اول الله تعالى اعلدر
اكا كه قرآن شانده قدحه اشتغال ايدرلر (كفى به شهيدا بينى وبينكم)
اول الله تعالى بنله سزك ارا كزده شاهد يتر كه اول بنم صدقه وقرآنى
تبليغه وسزك انى تكذيب وانكار يكره شهادت ايدر (وهو الغفور
الرحيم) اول الله تعالى توبه ايدنه غفور اطاعت ايدنه رحيمدر وياخود
غفور رحيمدر كه انك كلامى ورسولنى تكذيبكز مقابله سنده سزده دنيايه
عقوبتن تعجيل ايتدى (قل ما كنت بدعا من الرسل) ديكل كه بن
رسوللردن شول رسول دكلنكه مرسلينك ناسى دعوت ايتديكى شئيئه
بن سزى دعوت ايدم ويا مقترحاتدن برشيئه قادر اولمكه انلر اكا قادر اولميدر
(وما ادرى ما يفعل بى ولا بكم) بيلزى كه دنيايه و آخرته بكا وكرك
سزده نه ايشلنور زيرا كه بن غيبى بيلزى * بو آيت نازل اوليحق مشركون
سوينوب ديديلر كه بزم امريز ومحمدك امرى عندالله واحددر انك بزم
اوزر يمز مزيت وفضلى يوقدر اكر اول مقالاتنى كنديلكندن ابتداء
ايتمش اولماسه ريبسى اكا نه ايشليه جكنى خبر ويردى اوليه اولسه نازل
اولديكه (ليغفر لك الله ما تقدم من ذنبك وما تأخر) صحابه ديديلر كه
يا رسول الله سكا ايشلنه جكى بيلدك اما كه بزه نه ايشلنور نازل اولديكه
(ليدخل المؤمنين والمؤمنات جنات) ودخى (وبشر المؤمنين بأن لهم
من الله فضلا كبيرا) الله تعالى اشبو آيات وامثاليه محمد عليه السلامه
ومؤمنلره ايشلنه جكى بيلديردى * ديلديكه وما نحن فيها آيتك نزولى انك
غفران ذنبى خبر ويرلزدن اول ايدى غفران ذنب ايسه عام حديدهده
خبر ويرلدى (ان اتبع الا ما يوحى الى) بن بكا وحي اولنسان قرآنه

اتباع ايدوب كند يلكمدين بر شيئي ابتداء ايتمين (وما انا الا نذير مبين)
 وبن دكل الانامى الله تعالىك عقابندن شواهد مبينه ومعجزات
 مصدقه ايله انذار ايديجي بن (قل ارايتم ان كان من عند الله وكفرتم به)
 يا محمد ديكل ككه بكا خبر ويرك اكر قرآن الله تعالى عندندن
 نازل اولوب سز ايسه اكا كافر اولسكز (وشهد شاهد من بنى اسرائيله
 على مثله) وبنو اسرائيلدن شاهد كه اول عبدالله بن سلام وياموسى
 عليه السلام اول قرآن مثلى تورانده اولديغنه شهادت ايتسه (فآمن
 واستكبرتم) اول شاهد قرآنى وحى جنسندن اولوب حقه مطابق
 كورديكى ايجون اكا ايمان كتوروب سز ايسه ايمانندن استكبار ايتسكز
 ناسك اضل واطلى اولمز ميسز (ان الله لايهدى القوم الظالمين)
 الله تعالى ايسه ظالمز هدايت ايتز (وقال الذين كفروا للذين آمنوا
 لو كان خيرا ما سبقونا اليه) كافر لر مؤمنلره ديديلر كه اكر ايمان ويا محمدك
 كتورديكى دين خيرلى اولسه انى تصديق ايدنلر انده بزي سبقت ايتزلردى
 زيرا كه انلرك اكثرى فقراء وموالى ورعاندر (واذلم بهتدوا به فسيقولون
 هذا افك قديم) چون اول قرآنله اهل ايمان كى اهتداء ايتديلر ديرلر كه اشو
 قرآن محمدن صادر كذب قديمدر (ومن قبله كتاب موسى اماما ورحمة)
 قرآنندن اول موسانك كتابى تورات انزال اولمشديكه ناسه امام
 اولوب اكا اقتداء ايدملر وانى تصديق ايدنلره عذابندن قورتر رحمت اوله
 (وهذا كتاب مصدق لسانا عربيا لينذر الذين ظلموا وبشرى للحسنين)
 وبو قرآن ايسه لسان عربى اوزره اولديغى حالده موسانك كتابى
 تصديق ايدر تاسكه الله تعالى ويارسولى اول قرآنله شول نفسلرينه
 ظلم ايدن اساءت اهلنى نارله انذار ايده و ايمان وطاعتله احسان اهلنى
 جنتله تبشير ايده (ان الذين قالوا ربنا الله ثم استقاموا فلا خوف عليهم
 ولا هم يحزنون) شونلر كه ربمزالله تعاليدر ديوب الوهيت ووحدانيتنه
 اقرار ايتديلر ككه اول خلاصه علمدر بعده امور دينيه ده استقامت
 ايتديلر كه اول منتهى علمدر انلره مكروه لحوقك خوفى ومحبوب فواتك
 خوفى يوقدر (اولئك اصحاب الجنة خالدين فيها جزاء بما كانوا يعملون)
 ايمدى انلر اصحاب جنتدر انده دائمين اولدقلى حالده تاسكه فضائل
 علميه وعمليه دن اكتساب ايتدكلرينه جزاء اوله (ووصينا الانسان

(بوالديه)

بوالديه احسانا) بز انسانه امر ايتدك كه والدينه احسان ايده (جلته امه
 كرها ووضعت كرها) انى والدهسى مشقتله حامل اولوب مشقتله وضع ايتدى
 (وجله وفصاله ثلاثون شهرا) ولدك والدهسى قارنده مدت حلى
 ورضاعدن فطامى اوتوز ايدر اشبونده دلالت واردر كه مدت حلك
 اقلى التى آى اوله ومدت رضاعتك اكثرى يكرمى درت آى اوله تنكيم
 سورة بقره ده (والوالدات يرضعن اولادهن حولين كاملين)
 قول شريفى انى تصريح ايدر * ابن عباسدن روايت اولنديكه چقان
 مرأه ولدنى قارنده طقوز آى كوتوسه اول ولدنى يكرمى بر آى امززر
 واكر ولدنى قارنده التى آى كوتورسه انى يكرمى درت آى امززر *
 ديتلديكه اقل حلى واكثر رضاعى بيانله اول ايكيسى منضبط اولوب
 نسب ورضاعتك حكى اكا مرتبط اولور (حتى اذا بلغ اشده) حتى كه
 نهايت قوت وضايت شاب واستوانه ايريشه كه اول اون سكز ياشندن
 قرق ياشنه دكدر (وبلغ اربعين سنة) وعمرى قرق ياشنه ايريشه *
 ديتلديكه هرنبى قرق ياشندنصكره بعث اولندى * على رضى الله عنه ايدر
 اشو آيت ابو بكر الصديق رضى الله عنه وباباسى ابو جحافه واناسى ام الخير
 حقه نازل اولوبدر كه انك ابوبنى ايكيسى بيله اسلامه كلديلر مهاجريندن
 هيچ كسه يه اول خصلت جمع اولدى ابو بكر رضى الله عنه اول ايكيسنه
 احسانله وصيت اولندى پيغمبرمى صلى الله تعالى عليه وسلم يكرمى بر ياشنده
 وابو بكر رضى الله عنه اون سكز ياشنده ايكن تجارتله معا شامه كتديلر
 پيغمبرمى صلى الله تعالى عليه وسلم قرق ياشنه ايرديكنده رسالتله مبعوث اولوب
 ابو بكر الصديق رضى الله عنه انى تصديق ايتدى (قال رب اوزعنى
 ان اشكر نعمتك التى انعمت على وعلى والدى) ديديكه يارب بكا الهام
 ايتكه بكا ووالدينه انعام ايتديكت هدايت واسلام نعمته شكر ايدم
 (وان اعمل صالحا ترضاه) واعمال صالحه دن بر نوعى ايشليكه انكله بندن
 راضى اوله سن الله تعالى انك اول دعاسنه اجابتله مؤمنلردن فى الله تعذيب
 اولنور طقوز كسه بى اشتراء واعتاق ايتدى وخيردن هر نه شيئي اراده ايتديسه
 اكا توفيق اولندى ودخى ديديكه (واصلح لى فى ذرىتي) يارب صلاحى
 ذريتمه سارى قيلول انى انلرده راسخ ايت اول دعاسى دخى اجابت
 اولنوب اوغلى عبدالرحمن وعبدالرحمانك اوغلى ابو عتيق جيعى پيغمبرمى

صلى الله تعالى عليه وسلم صحبته مشرف اولدیلر (انی تبت الیک وانی من المسلمین) یارب سنک راضی اولدیغک هر شیئدن توبه ایله سکا توجه ایتدم و دینی سنکچون خالص ایدنلردن (اولئک الذین تقبل عنهم احسن ما عملوا و تجاوز عن سيئاتهم فی اصحاب الجنة وعد الصدق الذی کانوا یوعدون) ایمدی صفات مذکوره ایله متصفلرک اعمال صالحه لرینی بز قبول ایدوب انک اوزره انلری ثوابلندیررز و اعمال سیئه لرندن توبه ایتلریله تجاوز ایدرز اهل جنت عدادنده مثابین اولدقلری حالدله الله تعالی نیک وعد صدقیله که انلر انی دنیاده وعد اولندیلردی (والذی قال لوالدیه اف لکما) شول کافرکه ابوانی انی ایمانه وبعثه اقراره دعوت ایتدکلرنده اول انلره تضجیر ایدوب کراحت اظهاریله دیرکه (اتعداننی ان اخرج وقد خلت القرون من قبلی) سز بکا وعد ایدر میسز که بن موتمدنصکره دیریلوب قبرمدن چیقاریلر حالبوکه بندن اول فوت اولنلردن هیچ برکسه دیرلیوبدر (وهما يستغيثان الله ويلك آمن ان وعد الله حق فيقول ما هذا الا اساطير الاولين) اول اکیسی ایسه اندن الله تعالی یه استغائه ایدرلر ویاخود انی ایمانه دوندر مسین دیرلر واکا دیرلرکه ویل سکا که ایمانه کلوب بعثی تصدیق ایت انی انکار ایدن کافرله الله تعالی نیک عذابله و عیدی حقدلر اول ایسه انلره دیرکه سزک بوقولکزدکل الا اولئک اباطیلیدر که انی یازمشسکزدلر (اولئک الذین حق علیهم القول فی ام قد خلت من قبلهم من الجن والانس انهم کانوا خاسرین) ایمدی بوصفتلو کسه لر اهل ناردن اولملریله اوزرلرینه کلمه الهیه واجب اولوبدر جن و انس کفارندن انلردن اول کچن امتلرله بیله آخرتده عقاب اولنور اولدقلرندن خاسرلردلر (ولکل درجات مما عملوا) مؤمنلردن وکافرلردن هر فریق ایچون خیر وشردن ایشلدکلری شیئی جزاسنده درجه لری واردلر ومؤمنلرک درجاتی جنتده اعلایه ارتقاعله وکافرلرک درجاتی نارک اسفلنه نزولله در (ولیوفیهم اعمالهم وهم لا یظلمون) تا که الله تعالی مؤمن وکافرندن هر فریقده ثواب و عقابدن اعماللرینک جزاسین ایرکوره انلر نقص ثواب ویا مزید عقابله ظلم اولنلر (ویوم یعرض الذین کفروا علی النار) یوم قیامتده کافرلر ناره عرض اولنوب اکا نظر ایدلر وانلره دیتله که (اذهبتم طیباتکم فی حیاتکم الدنیا واستمتعتم بها فالیوم

(تجزون)

تجزون عذاب الهون بما كنتم تستکبرون فی الارض بغير الحق وبما كنتم تقسقون) سز حیات دنیا کزده حسناتکز ثوابنی افشاء ایدوب انکله استمتاع ایتدیکز اشبوكون ایچون اندن سزه برشی قالمیوبدر ایمدی بوکونده عذاب هوانله جزالنور سز شول سیدنکه یریوزنده استکبار باطل و طاعتدن خروج ایدر دیکز وقتا که الله تعالی کافرلری دنیاده تمعلریله توبیخ ایتدی پیغمبریمز صلی الله تعالی علیه وسلم و صحابه رضی الله عنهم و صالحون آخرت ثوابنی رجائله دنیا لذاتندن اجتنابی اختیار ایتدیلر * عمر بن الخطاب رضی الله عنه ایدر پیغمبریمز صلی الله تعالی علیه وسلم قنه واردلر کوردمکه اول رمال وحصیر اوزره اضطجاعتندن جنب شریفته رمال اثر ایتشدی دیدمکه یارسول الله دعا ایتکه الله تعالی امتکه وسعت ویره فارس وروم اهل یسنه و یردیکی کبی ومع ذلك انلر الله تعالی یه عبادت ایتلر پیغمبریمز علیه السلام دیدیکه انلر بر قومدرکه حیات دنیاده طیبانلری تعجیل اولنوبدر * عائشه رضی الله عنها ایدر آل محمد علیه السلام ایکی کون متوالیا آرپه اتمکیله قارنلرین طیورمدیلر حتی که پیغمبریمز صلی الله تعالی علیه وسلم دنیادن رحلت ایلدی * عائشه رضی الله عنها ایدر اوزریمزدن برآی کچر دیکه منزله آتش یانیمبوب صویله وخرما ایله کفافلنوردق الابوکه بعض احیانه انصارک نسائی بزه سود ویروب انی ایچردک * ابن عباس رضی الله عنهما ایدر برنیچه کچه کچردی پیغمبریمز صلی الله تعالی علیه وسلم اهل بیتی اکل ایده جک شی بوله مدقلرندن آج یاتورلردی اکثر یدکلری آرپه اتمکی ایدی ابوهریره رضی الله عنه ایدر اصحاب صفه دن یتش کسه کوردمکه انلردن هیچ برینک ردائی یوغدی بلکه کیمینک انجق ازاری ویاخود بیونلرینه باغلو کسارلی وارایدیکه اول کیمینک ساقنه وکیمینک کعبنه ایریشوردی عبدالرحمن بن عوف رضی الله عنه ایدر بزه دنیا بسط اولندیغی دکلر بسط اولندی حالبوکه بز قورقرزکه اول بزه حسناتمز اوله که دنیاده بزه تعجیل ایدیلر اندن آغلدی جابر بن عبدالله ایدر عمر بن الخطاب بنم یدمده معلق لحم کوروب یاجابر بوندلر دیدی دیدمکه نفسم انی اشتهاه ایتدیکندن اشتهاه ایلدم دیدیکه یاجابر هر اشتهاه ایتدیکلک الورمیسن قورقمیسنکه یوم قیامتده اشبو آتله عتاب اولنه سن (واذکر اخا عاد اذ اندر قومده بالاحقاف) یامحمد

مكه اهلنه عاد قومك نسبا قريش هود عليه السلامي ذكر ايتكه
 اول قومي احقافله انذار ايتديكه انلر يئنده شجر دینور موضعهده
 بحر اوزره مشرف رمال يئنده ساكن اولورلردی وحقهكه
 احقافك مغر ديدر رمل مستطیل مرتفعه در كه انده انحناء اوله
 (وقد خلت النذر من بين يديه ومن خلفه) حالبو كه هوددن اولده
 و صكرهده رسوللر كچدی انلر ايسه اول مكانده ايدیلر هود عليه السلام
 واول رسوللرك هر بری انلره ديدیلر كه (الاتعبدوا الا الله اني اخاف عليكم
 عذاب يوم عظيم) الله تعالينك غيری به عبادت ايتكز قورقريكه
 شرككز سيبيله سزه يوم هائل عذابى ايريشه (قالوا اجئتنا لتأفكنا
 عن آلهتنا فأتنا بما تعدنا ان كنت من الصادقين) هود عليه السلامه
 قومی ديدیلر كه سن بزى آلهه مزه عبادتن صرف ايتكه مى كلك ايدى
 شرك اوزره بزه عذابدن وعد ايتديكك شئی كتوركلك اكر وعدكه
 صادقردن ايسك (قال انما العلم عند الله وابلغكم ما ارسلت به ولكنى
 اريكم قوما تجهلون) هود عليه السلام ديديكه سرك عذابكز وقتنه
 علم ومدخل يوقدر كه انى استجبال ايدم بلكه انك علمى الله تعالى عندنده در
 اول وقت مقدرده سزه ايريشور بن ايسه سزه ارسال اولنديغم شئی
 ايركوردم رسوله واجب اولان انحق تبليغدر لكن بن سزى كوررينكه
 رسوللرك كوندرمى تبليغ وانذار ايچون ايتديكى بيلز سز (فلما رأوه
 عارضاً مستقبل اوديتهم قالوا هذا عارض ممطرنا) وقتا كه انلر عذابى
 افق سماده عارض محاب كوردیلر كه اول واديلرينه متوجهه ايدى
 ديدیلر كه بوسحاب بزه يغمورله كلوبدر كه انكله اكينلر يئى صواررز
 هود عليه السلام انلره ديديكه (بل هو ما استعجلتم به ريح فيها عذاب اليم)
 بلكه اول سزه استجبال ايتديككز عذابدر اول بر ريحدر كه انده عذاب
 اليم واردر (تدمر كل شئ بامر ربها) اول ريح الله تعالينك امريله
 انلرك نفوس و اموالندن هر شئی هلاك ايدر (فاصبحوا لايرى الامساكنهم)
 اويله اولسه اول ريح كلوب انلرى هلاك ايتدى بر حيثيله كه انلرك
 بلادنه وارلسه مسكنلرندن غيرى بر شئ كورلزدى (كذلك نجزي
 القوم المجرمين) اشبو جزاء وعقاب كى بز مشركلره جزاء ايدرز * روايت
 اولنديكه هود عليه السلام اول ريحى حس ايديجك مؤمنلره انلردن

(ايريلوب)

ايريلوب بر حظيره يه كيردى واحقاف ايسه كفره نك اوزرينه دوشوب
 يدى كيجه وسكز كون انك التنده قالدیلر بعه ريح رمالى اوزرلردن
 آچوب جيفه لر يئى دريايه براقدى (ولقد مكناهم فيما ان مكناكم فيه)
 بزهود قومنه قوت ابدان وطول عمر و مال كثير و يروب انلرى انده تمكين
 ايتدك سزه انى ويرمدك ونه سزى انده تمكين ايتدك (وجعلنا لهم سمعاً
 وابصاراً وافئدة) وانلره سمع وابصار وافئده قیلدككه مواعطى ايشيده لر
 ودلائله نظر ايدلر والله تعالينك صنعنى تفكر ايدلر (فما اغنى عنهم سمعهم
 ولا ابصارهم ولا افئدتهم من شئ) انلر ايسه نه مواعظه قولاق طوتديلر
 ونه دلائله نظر ايتديلر ونه صنع الله تفكر ايتديلر اويله اولسه سمع
 وابصار وافئده دن هيچ برى انلره شئی مفيد اولدى (اذ كانوا يحجدون
 بآيات الله وحق بهم ما كانوا به يستهزؤن) زيرا كه انلر الله تعالينك
 دلائل وحدانيتنه انكار ايدرلردى اويله اولسه انلره نازل اولدى عذابدن
 اول شئیكه انى استهزاء ايدرلردى (ولقد اهلكنا ما حولكم من القرى
 وصرفنا الآيات لعلهم يرجعون) يا اهل مكه سزدن اول حولكزده اولان
 حجر ثمودده ارض سدوم وانك غيرى قرى اهاليسنى هلاك ايتدك وانلره
 ايتلر يئى تكريرله تبیین ايتدك تا كه كفرلرندن رجوع ايدلر انلر ايسه
 رجوع ايتيجك اهلاكه انلره جزاء ايتدك (فلولا نصرهم الذين اتخذوا
 من دون الله قربانا آلهة بل ضلوا عنهم وذلك افكهم وما كانوا يفترون)
 نيچون انلرى هلاك كدن قور تارمدى شول آلهلر يكه انلره عبادتله الله تعالى به
 تقرب ايدرلردى شول حيثيله كه انلر الله تعالى عندنده شفعامزدر
 ديرلردى بلكه عذاب نزولنده آلهلر لرى انلردن غائب اولوب انلره نفع
 ايتديلر اشبو قول انلرك افك وكذبلى اثر ايدر انلرى الله تعالى به تشريكه
 افتزالريدر (واذ صرفنا اليك نقرا من الجن يستمعون القرآن) يا محمد ذكر
 ايت شول وقتى كه يئنده نصيبين جنندن يدى وياطقوز دكلو كسه لرى
 سكا اماله ايتدك كه سنك قرآن او قودينكى ايشيده لر (فلما حضروه
 قالوا انصتوا فلما قضى ولوا الى قومهم منذرين) وقتا كه انلر قرآنه ويارسوله
 قريب اولديلر برى برلرينه صامت اولك كه انى استماع ايدلم ديدیلر
 انك قراءتدن فراغ ايديليجك قوملرينه رجوع ايتديلر اول ايشند كلريله
 انلرى انذار ايدر اولدقلى حالد * روايت اولنديكه پيغمبر يئى

صلى الله تعالى عليه وسلم طاشدن رجوعنده وادى النخله نام موضعده
تهجدى سورة رجحان قرآنيله قبلوركن اول جنيلر اكا انده راست كلديلر
(قالوا يا قومنا انا سمعنا كتابا انزل من بعد موسى مصدقا لما بين يديه يهدى
الى الحق والى طريق مستقيم) بعده قوملرينه رجوعلرنده ديدلر كه
بز بر كتاب الهى ايشدك كه اكا قرآن دينور موسادنصكره نازل اولوبدر كه
اول اندن اول نازل اولان توراته موافقدر عقائد حقه هدايت وطريق
مستقيم دلالت ايدر (يا قومنا اجيئوا داعى وآمنوا به يغفر لكم من ذنوبكم
ويجركم من عذاب اليم) يا قوم الله تعالىنك وحدانيتنى تصديق و طاعتنه
دعوت ايدر رسول الله محمد عليه السلامه اجابت وقولنى تصديق ايدك كه
الله تعالى بعض ذنوبكزى مغفرت ايده كه اول خالص حق اللهده در
زيرا كه ايمانله مظالم مغفرت اولمز وكفار ايجون اعداد اولنان نارك
عذاب اليمدن اجاره ايده (ومن لا يحب داعى الله فليس بمعجز فى الارض
وليس له من دونه اولياء اولئك فى ضلال مبين) بر كسه كه اول طاعته
دعوت ايدر رسوله اجابت ايتيه ر يوزنده الله تعالىنى اعجاز ايدر دكلدر كه
اندن قاچوب عذابندن قورتله وانصارى اولمز كه انى عذاب اللهدن منع
ايده ايمدى انلر ضلال ظاهرده در كه شانى ذكر اولسان كى داعى به
اجابندن اعراض ايتديلر * ابن عباس رضى الله عنهما ايدر وقتا كه اول
جنيلر قوملرينه كيدوب انى خبر وريدلر جندن تيمش رجل اجابت
ايدوب انلرله بيله كيرو پيغمبر يمز عليه السلامه كلديلر اكا بطحاده ملاقات
ايدوب اول انلره قرآن او قودى امر ونهى ايتدى * اشبو دليلدر كه
پيغمبر يمز صلى الله تعالى عليه وسلم انسه مبعوث اولديغى كى جنه دخى
مبعوث اوله جنك مؤمنلرى حكمنده علماء اختلاف ايتديلر بر قوم ديدلر كه
ثوابلرى انجق ناردن نجاتدر كه اول ابو حنيفه قوليدر ليث ايدر ثوابلرى
ناردن اجاره لرنند نصكره بهائم كى تراب اولمريدلر * و بر قوم آخرين
ديدلر كه انلر دخى انس كى احسانلرله مثاب واساءتله معاقب اولورلر كه
مالك وابولبللى اكا ذاهيدر نقاش تفسيرنده بر حديثده ايدر جنلر جنشه
كيروب انده تسبيح الهام اولنورلر وانككه انده بنى آدمه و يريلان نعيم جنتك
غناسين بولورلر عمر بن عبد العزيز ديديكه جنك مؤمنلرى جنتك حولنده
ربض ورحابه ده در يوخسه جنتده اولمز (اولم يروا ان الله الذى

(خلق)

خلق السموات والارض ولم يعى بخلقهن بقادر على ان يحيى الموتى)
اهل مكه تفكر واعتبار ايتز لميكه الله تعالى سموات وارضى خلق ايدوب
اندن اكا تعب ايرمدى زيرا كه قدرتى واجبه در ابد الابد اول نه اكسيلور
ونه اكسيلور ايمدى اول قادر اولزميكه موتايى دير كوره (بلى انه على كل
شىء قدير) بلى اول هر شئنه قادر در (ويوم يعرض الذين كفروا على النار
أليس هذا بالحق قالوا بلى وربنا قال فذوقوا العذاب بما كنتم تكفرون)
كافرلر ناره كيدرلد كلرنده انلره دينور كه اشبونك عذابى حق دكليدر
سز ايسه انى تكذيب ايدر ديكز كافرلر ديهلر كه بلى والله اول حق ايمش
ديو اقرار ايدلر * بر وقنده كه اقرارلرى انلره نفع ايتيه الله تعالى ديه كه
ايمدى انك عذابى ذوق ايدك كه دنياهه انى انكار ايدر ديكز (فاصبر
كما صبر اولوا العزم من الرسل) يا محمد مكه كافرلرينك اذا وتكذبنه صبر
ايت شول رسوللردن جد وثبات اربابنك صبر ايتيمى كى كه زيرا سن
انلرلر برسن * اولوا العزم اصحاب شرائعدر كه انى تأسيس وتقريره
اجتهاد وانك مشاقى تحملنه صبر ايدرلر دى بعضيلر ديديكه انبيانك
كليسى اولوا العزمدر يونس عليه السلامدن غيريلى زيرا كه پيغمبر يمز
صلى الله عليه وسلم (ولا تكن كصاحب الحوت) ديو اكا اتباعدن
نهى اولندى و بر قوم ديدلر كه انلر نجباء رسلدر كه سورة انعامده
مذكور اون سكرز پيغمبردر كه ذكر لرنند نصكره (اولئك الذين هدى الله
فبهدىهم اقتده) انلر الله تعالىنك هدايت ايتديكى رسوللريدلر ايمدى
يا محمد سن دخى انلر هدايته اقتداء ايت ديو امر اولمشدر * ديدلريكه
الله تعالىنك بلاسنه صبر ايدن انبياء نوح عليه السلامدر كه قومك اذاسنه
صبر ايدر دى انلر انى بايلنجه دو كرلردى و ابراهيم عليه السلامدر كه
آتشه يانمغه و اوغلنى بوغازلمغه صبر ايتدى و اول اوغل ايسه
بوغازلمغه صبر ايتدى ويعقوب عليه السلامدر كه اوغلنك
ايتديكنه وكوزى كورمز لكنه صبر ايتدى ويوسف عليه السلامدر كه
قيويه وزندانه قولمغه صبر ايتدى وايوب عليه السلامدر كه
ضر و بلايه صبر ايتدى و داود عليه السلامدر كه خطيشه مى
اوزره قرق كون آغلدى وموسى عليه السلامدر كه قومك اذاسنه صبر
ايتدى وعيسى عليه السلامدر كه ققره صبر ايدوب طاشى طاش اوزره

قومدى عائشه رضى الله عنها ديدىكه پيغمبرمى عليه السلام ديدىكه
يا عائشه دنيا محمد وآل محمد لائق اولمز الله تعالى اولوا العزم رسوللره
دنيا نك مكروهنه ومحبوبنه صبردن غيريله راضى اولوب (فصبر كما صبر
اولوا العزم من الرسل) ديو انلره ايتدىكى تكلبى بكا دى ايتدى ايمدى
والله بن انك طاعتندن مفارقت ايتىزى بلكه انلر كى صبر واجتهاد
ايدىزى (ولا تستعجل لهم) قومك كفارى عذابنه استعجال ايتكل لابل
وقتنده اول انلره نازل اوليسردر (كانهم يوم يرون ما يوعدون لم يلبثوا
الاساعة من نهار) شول كون كافرلر انده وعد اولندقلى عذابى كورلر
دنياه وبرزخده طول لبثلى كانه نهاردن بر ساعت ايدى ظن ايدلر
زيرا كه زمان ماضى نك كو طويل اولسه اولدق كيدر (بلاغ) اشبو
قرآن رسول عليه السلامك الله تعالىدن ناسه تبليغدر اول انلره انذار
وموعظه يترو ياخود اشبو بعث اجل مبلوغ اليه در چكانكه اول اجل ايرشه
(فهل يهلك الا القوم الفاسقون) انده هلاك اولمز الا انلر كه طاعتندن خروج
ايدلر

سورة القتال وهى ثمان وثلاثون آية مدنية

بسم الله الرحمن الرحيم

(الذين كفروا وصتوا عن سبيل الله اضل اعمالهم) شونلر كه اسلامه
دخولدن واسلام طريقنه سلوكدن امتناع ايدوب ناسى اندن منع ايتدى
يوم بدرده رسول الله صلى الله عليه وسلم ايله محاربه به كلان مشركى
اطعام ايدنلر كى ويا شياطين قريش كى ويا اهل كتابدن مصرين كى
ايمدى انلر اعماللرىن كفرله محيطه ومغموره قيلدلىر يعنى صله رحم وفك
اسارى وحفظ جوار مثلى عمللرىنى يتوردلر سودك صوده يتمسى كى
وياخود الله تعالى رسولنه نصر وديننى سائر اديان اوزره اظهارله
انلرك رسول الله كيدلرىنى وسيدلندن صدرلرىنى ابطال ايتدى (والذين
آمنوا وعملوا الصالحات وآمنوا بما نزل على محمد وهو الحق من ربهم كفر
عنهم سيئاتهم واصلح بهم) شونلر كه مؤمن اولوب اعمال صالحه ايشلدلر
ومحمد عليه السلامه تنزيل اولنسان قرآننى تصديق ايتدلىر كه اول قرآن
رب تعالىدن منزل ايدىكى حقدر يوخسه مفترى وباطل دكلدر بيلدلىر الله

(تعالى)

تعالى ايمان وعمل صالحلى سبيله سيئه لرىنى ستر ايدوب دين وديناده
توفيق وتأييده حاللرىنى اصلاح ايتدى (ذلك بان الذين كفروا اتبعوا الباطل
وان الذين آمنوا اتبعوا الحق من ربهم) كافرلر اعمالك اضلالى ومؤمنلر
سيئاتك تكفيرى شول سبيله در كه كافرلر شيطانه وشهوات نفسلرىنه
ومؤمنلر رب تعالىدن منزل قرآنه اتباع ايتدلىر (كذلك يضرب الله للناس
امثالهم) اشبو بيان كى الله تعالى ناسك ايكى فريقتنه صفت اعماللرىنى تبين
ايدركه اتباع باطللى عمل كفاره واضلالى خيثلرىنه مثل قيلور واتباع
حقى عمل مؤمنينه وتكفير سيئاتى فوزلرىنه مثل قيلور (فاذا لقيتم الذين
كفروا فضرب الرقاب) چكانكه محاربه ده كفاره ملاقات ايدسز
يونلرىنى اورك (حتى اذا اتخنمواهم فسدوا الوثاق) حتى چكانكه
قتللرىنى اكشارله انلره قهر واغلاظ ايدسز انلرى اسير ايدوب اللرىنى
اردلرىنه بعلكز كه سزه ضرر ايركورمىلر (فاثما منا بعد واما فداء) اول
اسردنصكره ديلرسكز انلره اطلاقله من ايدك وياخود ماللرىله نفسلرىنى
كندلره ويرك ايمدى اشبو ايكى امرده مخيرسز قنغيسىنى ديلرسكز انى ايدك
(حتى تضع الحرب اوزارها) تا كه محاربين حربك آلات واثقالنى وضع
ايدوب اهل حرب شرك وعصيانلرىن ترك ايلدلىر احكام اسلاميه انلرده
جارى اولوب مشركينك شوكتى زواليله ويا عيسى عليه السلامك نزوليله
حربه مجاللى قاليه (ذلك ولو يشاء الله لانتصر منهم) امر بودر ويا اشبو
دينلنى ايدك والحال الله تعالى ديلسه انلره استئصاله انتقام ايدردى
(ولكن ليلو بعضكم بعض) لكن اول قتاله سزه امر ايتدى تا كه
مؤمنلرى كافرلر ايله ابتلا ايدوب انلرى جهاد ايتدكلىرچون ثواب عظيمى
استيجاب ايدلر وكافرلرى مؤمنلر ايله ابتلا ايدوب مؤمنلرك بديله بعض
عذابلىر تعجيل اولندىغندن بعضيلرى كفردن ارتداع ايدلر (والذين قتلوا
فى سبيل الله فلن يضل اعمالهم) شونلر كه جهاد ايدوب سبيل اللهده
قتل اولندلر الله تعالى انلرك اعمالى ثوابى ضايع ايتىز (سيدهم ويصلح
بالهم) اول انلرى ثوابه هدايت ايدر وياهدى اوزره تثبيت ايدر وايام
حياتلرىدن ماللرىنى عصمتله اصلاح ايدر (ويدخلهم الجنة عرفاهم)
وانلرى شول جنته قويار كه اول انى دنياه انلره تعريف ايتشدى حتى كه
اكامشتاق اولوب اكالايق عمله اشتغال ايدلر وياخود اول انى انلره تبين ايدلر

شول حیثیتله که انلرک هر بری انده منزلتی بیلله کانه خلق اولاندنبرو
انده ساکن کبی تردد سزانی بوله و یا خود انلرک هر برنه آرو بر جنت ویره
و یا خود انی انلر ایچون رواج طیبه ایلله تطیب ایده (یا ایها الذین آمنوا
ان تنصروا الله ينصركم ويثبت اقدامكم) یا مؤمنلر اگر سز الله تعالینک
دیننه و رسولنه نصرت ایدرسکز اولدخی اعداکز اوزره سز نه نصرت
ایدر و حقوق اسلامیه قیامده و کفارله قتالده اقدامکزی ثابت ایدر
(والذین كفروا فتعسا لهم و اضل اعمالهم) شونلر که کافر اولدیلر
الله تعالی انلری خبیث و هلاک و عملرینی ابطال ایدر (ذلک بأنهم کرهوا
ما انزل الله فاحبط اعمالهم) اشبو ذکر اولنان مصیبت انلره ایرر شول سببله که
الله تعالینک انزال ایتدیکی قرآندن کراحت ایتدیلر انده توحید و هوالرینه
مخالف تکالیف اولدیغیچون اولله اولسه اول انلرک اعمالنی ابطال ایتدی
(أفلم یسیروا فی الارض فینظروا کیف کان عاقبة الذین من قبلهم دمر الله
علیهم و للکافرین امثالها) کافرلر یر یوزنده مسافرت ایتزلمیکه انلردن
اول پکن کافرلرک عاقبتلری نیچه اولدیغن عین قبله کورده الله تعالی
انلره هلاک ایر کوردی قریشه و امتکک کافرلرینه انلرک عاقبتی
و هلاکهم سی امثالی واردر (ذلک بان الله مولى الذین آمنوا و ان الکافرین
لامولى لهم) اشبو ذکر اولندیغی اوزره مؤمنلره نصر و کافرلره قهر
اولسی شول سببدنبر که الله تعالی مؤمنلرک اعدالری اوزره ناصریدر
کافرلرک ایسه ناصری یوقدر که انلردن عذابى منع ایده (ان الله یدخل الذین
آمنوا و عملوا الصالحات جنات تجرى من تحتها الانهار) الله تعالی
مؤمن اولوب اعمال صالحه ایشلینلری شول جنتلره ادخال ایدر که
انک اشجارى التندن نهرلر جاری اولور (والذین کفروا یتمتعون و یأکلون
کأنما کمل الانعام و النار مثوی لهم) اما شونلر که کافر اولدیلر انلردن دنیا متاعیلله
نفعلنورلر و انعام کبی عاقبتندن غفلتله و اکا حرصله اکل ایدرلر و الحال
منزل و مأوالری ناردر (و کاین من قریه هی اشد قوۃ من قریتک التى
اخرجتک اهلکناهم فلا ناصر لهم) نیچه قریه اهل الیسی که بز انلری
انواع عذابله هلاک ایتدک حالبو که انلر قوت و منعمده سنک قریه ک
مکه اهل یسندن اشد و اکثر ایدیلر که سنی اندن چیقاردیلردی ایددی انلری
عذابزدن منع ایدر ناصرلری اولدی (أفمن کان علی بینة من ربه

(کن)

کن زین له سوء عمله و اتبعوا اهواءهم) شول کسسه که رب تعالیدن حجت
واضحده اوزره اوله شول کسسه کیمیدر که شرک و معاصی عملی اکاتزین اولنوب
حسن کوره و هوالرینه اتبعاع ایدلر (مثل الجنة التى وعد المتقون)
شول جنتک صفتی که شرک و عصیانندن انی اتقاء ایدنلره اول وعد اولندی
(فیها انهار من ماء غیر آسن) انده صوایر مقلری واردر که ریج و طعمی
متغیر اولمیوبدر (وانهار من لبن لم یغیر طعمه) ودخی آند سود ایر مقلری
واردر که طعمنه جوضه و شیء آخرله تغیر ایرمیوبدر (وانهار من خمر
لذة للشاربین) ودخی خمر ایر مقلری واردر که انی شرب ایدنلره لذتدهدر
انده زائحه کریهه و سکر و خمار غائله لرندن هیچ بری یوقدر (وانهار
من عسل مصفى) ودخی انده عسل ایر مقلری واردر که اکاشمع و فضلات
نحل و غیرى قارشیمیوبدر (ولهم فیها من کل الثمرات) انده انلر ایچون انده
میوملرک هر صنفندن واردر (ومغفرة من ربهم) و بو ذکر اولنان اشیائله
بیلله رب تعالینک انلردن رضاسی و انلره مغفرتی واردر برکسه که بونک کبی
نعم و کراماتده اوله (کن هو خالد فی النار و سقوا ماء حبیما فقطع امعاهم)
شول کسه کیمیدر که نار عذابنده مخلد اوله و اسی صوایر لملکه قارنده
بغر صقلری پاره لنه (ومنهم من یستمع الیک حتی اذا خرجوا من عندک
قالوا للذین اتوا العلم ماذا قال آنفا) یا محمد من اقلرک بعضی مجلسکه
حاضر اولوب کلامکی استماع ایدرلر سنک قنکدن چیقدرلرنده صحابه نک
علماسنه استهزاء و یا استعلام طریق اوزره دیرلر که اشبو ساعتده محمد ندیدی
دیو سوال ایدرلر زیرا که تهاونلرندن اکا القاء سمع ایتمیشلردی (اولئک الذین
طبع الله علی قلوبهم و اتبعوا اهواءهم) ایددی انلر شول قومدر که نفاقلر ایچون
الله تعالی قلوبلری اوزره طبع ایتدی کفرلرینه اتبعاع ایتدیلر اولله اولسه
انلر من بعد ایمانه کلزلر (والذین اهتدوا زادهم هدی و آتیهم تقواهم)
شونلر که حسن استماعله اهتداء ایتدیلر الله تعالی توفیق و الهامیلله هدالرینی
زیاده ایدوب اتقاء ایددهجک شیئی انلره بیان ایتدی و یاتقوا لرینه اعانت
و یاتقوا لرینک جزاسنی اعطا ایتدی (فهل ینظرون الا الساعة ان تأتیهم
بغیة فقد جاء اشراطها) کفار قریشک انتظاری دکل الا قیامتده در که اول
انلره آکمزین کله حالبو که انک علامتی کلدیکه محمد علیه السلامک بعثتی
و قریک انشقاقی و غیریدر (فانی لهم اذا جاءتهم ذکریهم) انلره تذکر

بع (۱۰)

واتعاض وتوبه قندين اولور چان انلره قيامت كله (فاعلم انه لا اله الا الله) يا محمد چنانكه مؤمنك سعادتن و كافرك شقاوتن بيله سن صد دنده اولديغك علم وحدانيت اوزره ونفسك احوال و افعالي اصلاح و تكميلي اوزره ثابت اولغل (واستغفر لذنبك) و امتكه سنت اولسون ايچون ذنبك مغفرتن ديله كل اكر چه انك مقدم ومؤخرى سندن مغفور ايسه ده (وللمؤمنين والمؤمنات) ودخى اهل ايمانك رجال ونسائي مغفرت ذنوبن دخى ديلكل الله تعالىنك بوامته اكر ايدركه رسول اكر منه انلك ذنوبچون استغفاره امر ايلدى اول ايسه شفيع مجابدر (والله يعلم متقلبكم ومثوايكم) الله تعالى سرك دنياهه كي متقلبكزي بيلور كه اول مراحلكزدر لايدي قطع ايدرسز وعقباده كي مثوا كزي دخى بيلور كه اول دار اقامتكزدر يعنى جيع احوال كزي اول بيلور اكا هيچ برشي خفي اولمز (ويقول الذين آمنوا لولا نزلت سورة) مؤمنلر ديديلر كه نوليدى جهاد امرنده بر سوره نازل اوليدى (فاذا نزلت سورة محكمة وذكر فيها القتال رأيت الذين في قلوبهم مرض ينظرون اليك نظر المغشى عليه من الموت فاولى لهم) چنانكه بر سوره محكمه نازل اولوب انده قتاله امر اولنسلر مؤمنلر اكا سوينورلر اما كه قبلرنده نفاق اولنلري كوررسنكه موتدن خوف وجبنلري سبيله سكا بانش كي نظر ايدلر انلره كراهت ايتدكاري شي قريب اوله و ياخود مال امرلري مكروهلري اوله (طاعة وقول معروف) انلره قرآندن نازل اولانه طاعتي و قرآن حقنده و محمد صلى الله عليه وسلم شائنده قول مرضيلري انلر ايچون ثواب جهتندن خير ليدر اندنكه اتى انكار واستهزاء ايدلر (فاذا عزم الامر) چنانكه قتال امرى واجب اولوب وقتي كله اندن كراهت و قوللرنده كذب ايدلر (فلو صدقوا الله لكان خيرا لهم) اكر انلك حرصلري زعملرنده و يا ايمانلرنده الله تعالى به صدق ايتسلر اول صدق انلره خير لويدي نفاق و كراهت و كذبندكه ايدلر (فهل عسيتم ان توليتم ان تفسدوا في الارض وتقطعوا ارحامكم) يا اهل مكه سزدن توقع اولنور ميكه سز امور ناسه تولى و تأمر ايدوب و يا اسلامدن اعراض و تولى ايدوب ريوزنده معاصي ايله افساد ايدسز جاهليتده ايتديكز كي قطع ارحام ايدسز يعنى دينده ضعف و دنيايه حرصلريچون احقادركه انلك

(حالي)

حالي بيلن انلردن امور مذكوره بي توقع ايدو (اولئك الذين لعنهم الله فاصمهم واعمى ابصارهم) ايمدى اول صفتلو كيمسلى الله تعالى رجندن طرد ايدوب كلام حق ايشتمز وطريق حق كورمز ايتدى (أفلا يتدبرون القرآن ام على قلوب اقفالها) انلر قرآنى استماع ايتلر ميكه مواعظ وزواجرنى بيلوب ايمانه كله لر شرك وعصيانى ترك ايدلر بوخسه قبللري اوزره اغظيه مي واردركه اكا فكر ايرمز و امر منكشف اولمز انكله مراد منافقين و اعداء دين قلوبيدر (ان الذين ارتدوا على ادبارهم من بعد ما تبين لهم الهدى الشيطان سول لهم واملى لهم) شونلر كه دلائل واضحه و معجزات ظاهره ايله انلره هدى متبين اولديغندن صكره سركا كفره رجوع ايدلر شيطان انلره كباير ذنوب اقترافنى آسان ايدر و انلره عمرلرينك طويل اولسنى تخيل ايدوب عقوبتن امهال ايدر (ذلك بانهم قالوا للذين كرهوا ما نزل الله سنطبعكم في بعض الامر والله يعلم اسرارهم) اشبو اختلاط و خذلان شول سبيله دركه اول كفره رجوع ايدنلر الله تعالىنك تنزيل ايتديكي شيئندن كراهت ايدن مشركينه ديرلر كه بعض امور يكرده و يا بزه امر ايتديكزده سزه اطاعت ايدلم محمد عليه السلامك عدوانته تعاون و جهاددن قعود و ناسى اندن تثبيط كي و الحال امور مذكوره بي بيلنلرنده اسرار ايتدكاريني الله تعالى بيلور (فكيف اذا توفتهم الملائكة يضربون وجوههم و ادبارهم) انلك حالي نيجه اولور چنانكه ملائكه انلك ارواحنى قبض ايدركن تيوردن چومقلر ايله يوزلرينى و ارقه لر ينى اورلر (ذلك بانهم اتبعوا ما استخط الله و كرهوا رضوانه فاحبط اعمالهم) منوال مذكور اوزره ارواحلرينك قبض اولنسى شول سبيله دركه انلر الله تعالىنك سخط ايتديكي شيئه اتباع ايتديلر كه اول كفر و كتمان نعمت رسول و عصيان امر در وانك راضى اولديغى شيئندن كراهت ايتديلر كه اول ايمان و جهاد و سائر طاعاتر اويله اولسه الله تعالى انلك اعمالى ثوابنى حبط و ابطال ايتدى (ام حسب الذين في قلوبهم مرض ان لن يخرج الله اضغانهم) ظن ايدلر لمي شول منافقلر كه قبلرنده مرض واردر الله تعالى انلك عداوتن محمد عليه السلامه و مؤمنلره ابراز ايتيه (ولونشاء لا ربنا كهم فلعرفتهم بسماهم ولتعرفنهم في لحن القول والله يعلم اعمالكم) اكر ديلسه وز اول منافقلري سكا تعريف ايدردك كه علامات

خبيثه ليله انلری بيليدك * ايمدی سن انلری محاوره کلاملرنده بيلور سنکه
انلر سنک وکرك مؤمنلرک امرنی تهجين واستهزاييله تميز ايدرسن * بو آيت
کريمه نزولندنصکره پيغمبريمز صلی الله تعالی علیه وسلم منافقلى تکملرندن
بيلور اولدی اول الله تعالی اعمالکزی بيلور قصدکر حسبجه جزاکزی
قيلور ﴿ وانبولونکم حتى نعلم المجاهدين منکم والصابرين ونبلو اخبارکم ﴾
بز سنه مختبر معامله سن ايدرز جهاد وسائر تکالیف شاقه امريله تاکه سزدن
مجاهدلى وصابرلى تميز ايدروز ويا ايمانلرنده ومؤمنينله موالاتلرنده
صدقلى وکذب اخبارنى اظهار ايدروز ويا ناس بيننده اعمالکزک حسن
وقبحى اخبارنى آشکاره ايدروز ﴿ ان الذين كفروا وصدوا عن سبيل الله
وشاقوا الرسول من بعد ما بين لهم الهدى لن يضروا الله شيئا وسيجزي الله بهم ﴾
شونلرکه کافر اولوب ناسى دين اسلامدن صرف ايتديلر وانلره هدى
ظهورندنصکره رسول الله مخالفت ايتديلر انلر الله تعالی به کفر وصدلريله
ويارسول الله مشافه لرينه انک ملکنندن برشيئي نقص ايتزلر حالبوکه انکله
اعمال حسنه لرينک ثوابنى ابطال ايدرلر ﴿ يا ايها الذين آمنوا اطيعوا الله واطيعوا
الرسول ولا تبطلوا اعمالکم ﴾ يامؤمنلر الله تعالی به ورسولنه اطاعت ايدک
يوخسه اعمالکزی کفر ونفاق وعجب ورياو من واذى ويا انک امثالى خصال
سيئه ايله ابطال ايتکز * ابو العاليه ايدر پيغمبريمز صلی الله تعالی علیه وسلم
اصحابک اعتقادلى انک اوزره ايدیکه اخلاصله ذنب ضرر ايتيه شرکه عمل
نفع ايتديکى کي بو آيت نازل اولچق کبارله اعماللرينک حبط اولتمسى خوفن
ايدر اولديلر ﴿ ان الذين كفروا وصدوا عن سبيل الله ثم ماتوا وهم كفار فلن
يعقر الله لهم ﴾ شونلرکه کافر اولوب ناسى دين اسلامدن صرف ايتدکارندن
صکره کفار اولدقلى حالده فوت اولديلر الله تعالی انلری مغفرت ايتز اشبو
آيت اگرچه اصحاب قليب شائنده نازل اولوبدر لکن حکمی هر کفر اوزره
فوت اولانه عامدر ومفهومی دلالت ايدرکه کفرک غيرى ذنوبک مغفرتى جائز
اوله شول کيمسه ايجونکه موتى کفر اوزره اوليه ﴿ فلا تهنوا وتدعوا الى السلم
وانتم الاعلون والله معکم ولن يترکم اعمالکم ﴾ کفار ه ضعف اظهار ايتکز
وابتدا انلردن صلح طلب ايتکز بلکه انلرکه حرب ايدک حتى که اسلامه
کادر وياجزيه ويرمى التزام ايدلر حالبوکه عاقبت امرده سنر غالبلسنر

(اگرچه)

اگرچه بعض اوقاتده انلرسنزه غالب اولورلر سنده الله تعالی ناصرکزدن
عون ونصرتى سنرکه در اعمالکز ثوابندن برشيئي نقص ايتز
﴿ انما الحیوة الدنيا لعب ولهو وان تؤمنوا وتلقوا يؤتکم اجرکم ولا يسألکم
اموالکم ﴾ حیات دنياه دکل الابطال وغرور شيندر اگر سنر مؤمن اولوب
فواحشندن صاقفورسکز الله تعالی سنره ايمان وتقواکز ثوابن ويرر
ومع ذلک سنره ثواب وير مکچون اموالکز استمز بلکه ايمان وطاعتله امر ايدرکه
انک اوزره جنتى ثواب ويره وياخود الله تعالی ورسولى صدقاتده سزدن
اموالکزک کلنى طلب ايتز بلکه جزء يسير اوزره اقتصار ايدرکه اول ربع
عشر وعشردر ﴿ ان يسألکموها فيحلفکم تبتلوا ويخرج اضغانکم ﴾
اگر اول سزدن اموالکزک جيعن طلب ايدوب سنرى اجهاد ايتسه
اکا بخل ايدوب ويرمزديکز الله تعالی ويا بخل سنرک بغض وعداوتکزی
اخراج ايدر شونلرکه مالکزی آلوب کيدرلر ﴿ ها انتم هؤلاء تدعون لتنفقوا
في سبيل الله ﴾ بيلک که اى مخاطبون سنر بر قومسنرکه الله تعالی نیک
سييلنده اموالکزی انفاقه دعوت اولنورسنر اول کرکسه زکاة وياسائر
انواع خيراتدر ﴿ فیکم من يخل ومن يخل فانما يخل عن نفسه ﴾
اويله اولسه اول انفاقدن کيمکز بخل وامتناع ايدر اول کسه که اندن بخل
وامتناع ايدله اول نفسندن انفاق ثوابنى منع ايدر ﴿ والله الغنى وانتم الفقراء ﴾
الله تعالی سنرک انفاقکزدن غنيدر سنر ايسه الله تعالی عندنده کى
ثواب ومغفرت ورجته محتاجلر سنر امثال ايدرسکز ثوابى کنديکزه در
امتناع ايدرسکز وبالى اوزريکزه در ﴿ وان تولوا يستبدل قوما غيرکم
ثم لا يکونوا امثالکم ﴾ واکر سنرک امر وطاعتندن اعراض ايدرسکز سنرى
اهلاک ايدوب يريکزه قوم آخرينى کتورررکه انلر سزدن خيرلى اوله
يوخسه توليدده وایماندن زهدده سنرک کي اوليه که انلر اهل فرس
ويا انصار ويا اهل يمن ويا ملائکه در

سورة الفتح وهى تسع وعشرون آية مدنية

بسم الله الرحمن الرحيم

﴿ انا فتحنا لک فتحا مبینا ﴾ یا محمد بز سکا کله سى بيلده مکيه دخولى
قضاء ايتدک وياخود صلح حدیبیه قضا ايتدک که اول فتحه سبب اولدى

(لیغفر لك الله ما تقدم من ذنبك وما تأخر) تا كه الله تعالى زمان جاهلیتده
تقدم ایدن و بوائت كریمه نزولنه دكین تأخر ایدن تفریطکی مغفرت ایده
اشبو مغفرتی قححه علت قیلدی شول حیثیتدنگه انی جهاد كفاره و اعلاء
دین ایچون سعبیه و ازاحه شرکه و تکمیل نفوس ناقصیه و ایدی ظلمدن
ضعفه بی تخلیصه سبیدر (و یتیم نعمته عليك) و اعلاء دین ایله و نبوتکه
ملکی ضم ایله سکا نعمتی اتمام ایده (و بهدیک صراطا مستقیما) و تبلیغ
رسالتده و مراسم ریاستی اقامتده صراط مستقیمه سنی هدایت ایده
(و ینصرك الله نصرا عزیزا) و الله تعالى اسلامی اظهارله اعدای دین
اوزره سکا نصرت ایدر بر حیثیتله كه اندنصكره ده ضعف و ذل اولیه
(هو الذی انزل السکینه فی قلوب المؤمنین لیزدادوا ایمانا مع ایمانهم)
اول الله تعالى مؤمنلرک قلوبنه سکینه انزال ایتدیكه اوزرلرینه وارد اولان
شدائد عندنده مضطرب اولیوب ثابت اولر الله تعالى یه و یوم آخرته
ایمانلریله بیله شرائعه دخی ایمانلری زیاده اوله * ابن عباس رضی الله تعالى
عنهما ایدر الله تعالى رسولنی کلمه شهادتله ناسه کوندروب انلر انی تصدیق
ایدیچك انلره صلاتی بعده زکاتی بعده صومی بعده حجی بعده جهادی
زیاده ایتکله دینلرینی اكمال ایتدی هر باركه انلر بر شیئله امر اولنوب
تصدیق ایتدکرنده انکله ایمانلر آرتوردیلر (و الله جنود السموات
والارض) سموات و ارض و مافیهماده اولان ملائکه و جن و انس و غیرها
الله تعالی نك جنودیدر حکمتی مقتضاسنجه بعضنی بعضی اوزره تسلیط ایدر
اكر دیننه نصرتی سزك غیرله ایتك دیلسه ایدردی (و كان الله علیها
حکیم) الله تعالى خلقك مصالحنه علیم تقدیر و تدبیرنده حکیم اولدی
(لیدخل المؤمنین و المؤمنات جنات تجری من تحتها الانهار خالدين فیها)
تاكه اهل ایمانك رجال و نسائی ذکر اولناندن الله تعالی نك نعمتلرین
بیلوب شکر ایتدکرنده اول انلری جنتلره ادخال ایده کیم اشجاری التندن
نهرلر جاری اوله اندن دائمین اولدقلری حالده (و یکفر عنهم سیئاتهم)
و سیئاتلرینی ستر ایدوب هیچ کسه یه اظهار ایتیه (و كان ذلک عندالله
فوزا عظیما) اشبو ذکر اولنان ادخال جنات و تکفیر سیئات الله تعالى
عندنده فوز عظیم اولدی زیراكه جلب نفعده و دفع ضررده منتهای
مطلوبدر (و یعذب المنافقین و المنافقات و المشرکین و المشرکات الظانین

(بالله)

(بالله ظن السوء) یا محمد فتح و مغفرتی الله تعالی نك سکا انکچو ندرکه مدینه
اهلندن منافق و منافقه لره و مکه اهلندن مشرک و مشرکه لره عذاب
ایده كه انلر الله تعالى رسولنه و مؤمنلره نصرت ایتز دیو سوء ظن ایدیلردر
(علیهم دائرة السوء) مؤمنلره ظن و تربص ایتدکرنك دائره سی اوزرلرینه
اولوب انلری تخطی ایتسون (و غضب الله علیهم و لعنهم و اعدلهم جهنم
و ساءت مصیرا) و الله تعالى انلره دنیاده غضب و لعنت ایده و انلر ایچون
آخرته جهنم عذابی اعداد ایده اول جهنم نه چرکین قرارگاه اولور
(و الله جنود السموات و الارض و كان الله عزیزا حکیم) سموات و ارضك
ملك و سلطنت و غلبه سی الله تعالی نكدر اول اعداسنه انتقامله غالب
و صنعنده حکیم اولدی (انا ارسلناك شاهدا و مبشرا و نذیرا) یا محمد بز سنی
کوندردك كه مؤمنلرک ایمانه و کافرلرک کفر نه شاهد اوله سن مؤمنلره جنتله
تبشیر و کفاری ناردن تحذیر ایده سن (لتؤمنوا بالله و رسوله) تا كه الله
تعالی نك و حدایتنه و رسولنك نبوتنه تصدیق ایده سز (و تعزروه
و توقروه) و دیننه و رسولنه تقوایه و اكا خشوعله تعظیم ایده سز
(و تسجوه بكرة و اصیلا) و صباحده و اخشامده دوام اوزره انی تنزیه
و تصدیق ایده سز (ان الذین یبایعونك انما یبایعون الله) شونلرکه
حدیبیهده تحت شجرهده سندن بیعت رضوان ایتدیلر کا نه انلر الله تعالی دن
بیعت ایتشلردر زیراكه بیعتله اصل مقصود اولدر (ید الله فوق ایدیهم)
الله تعالی نك نصرتله یدی انلرک طاعتله اولان یدلری فوقنده در
(فن نکث فانما نکث علی نفسه) اول کسه كه عهد و بیعتنی نقض ایده
اول نقضنك و بالی ینه کندویه عودت ایدر (و من اوفی بما عاهد علیه الله
فسیؤتیه اجرا عظیما) و اولکله الله تعالی یه اولان عهد و بیعتنه
وفا ایده نقض ایتیه بز اكا اجر عظیم و یررز که اول جنتدر
(سبقول لك المخلفون من الاعراب شغلنا اموالنا و اهلونا فاستغفرلنا) وقتاكه
پیغمبریمز صلی الله تعالى علیه و سلم عام حدیبیهده عمره ایچون مدینه دن مکه یه
کتمك دیلدی قریش انکله حرب به مباشرت و یا انی ببت شریف زیارتدن
صدمه مبادرت ایتلری عذرله عمره ایچون محرم اولوب بیله سنجه هدی
سوق ایتدیكه ناس انك مرادی حرب دکل ایدیکنی بیله لر اویله اولسه
مدینه اطرافنده مقیم اعراب و یا اهل بوادی یه امر ایتدیكه انلر انکله

بيله كیده لر اعرابدن اكثرى انك امرينه اتباعدن تشاقل ايدوب
تخلفلرينه شغلا اعتلال ايتدیلر اول سبیدن نازل اولديکه اعرابدن
بر طائفه که سکا اتباعدن امتناع ايدوب ديرلر که بزى اموال و عيالز سنکه
کتمکدن اشغال ايتدی زیرا کسه مز يوقدر که انلرک امورينه قيام ایده
الله تعالى انلری اعتذارلرنده تکذيب ايدوب ديدیکه (يقولون بالسنتهم
ماليس في قلوبهم) انلر قلوبلرنده اولين شئي لسانلريله اظهار ايدرلر
يوخسه سنک انلر ايجون استغفار ايتدیکه و يا ايتدیکه مبالات
ايتزلر (قل فن يملك لكم من الله شيئا ان اراد بكم ضرا او اراد بكم نفعاً
بل كان الله بما تعملون خبيراً) يا محمد انلره دیکل که الله تعالينک مشيئت
وقضاسندن سزى کيم منع ایده بيلور اول کرکسه سزه ضرر ديلسون قتل
ويا هزيمت و يا اهل و ماله خلل و يا تخلفده عقوبت کبی و يا خود سزه
نفع ديلسون اشبو مذکوراتک اضدادی کبی بلکه الله تعالى سزک اعمالکزه
خير اولدی تخلف و قصدیکزی بيلوز (بل ظننتم ان لن ينقلب الرسول
و المؤمنون الى اهلهم ابدا و زين ذلك في قلوبكم و ظننتم ظن السوء
و كنتم قوما بوراً) بلکه ظن ايتدیکز که رسول اللهی و مؤمنلری
مشرکون استئصال ايدوب من بعد حديديه دن مدينه يه اهلرينه رجوع
ايتدیلر اول تخلف قلوبکزه شيطان واسطه سيله تزيين اولندی و ظن
سوئی تحسين ايدوب فساد عقیده و سوء نيتکزه عند الله قوم هالکين
اولدیکز (ومن لم يؤمن بالله ورسوله فانا اعتدنا للكافرين سعيراً) شول
کسه که سر و علانيه ده الله تعالى يه ورسوله ايمان کتورميه اول کافر در
بز ايسه کافرلر ايجون نار سعير تهيه ايتمشز (ولله ملك السموات و الارض
يعفر لمن يشاء و يعذب من يشاء و كان الله غفوراً رحيماً) سموات و ارض
و ما بينهما نك ملكى الله تعالينکدر ديلر سه انده تدبير ايدر ديلديکنى ذنب
کبير اوزره مغفرت ايدر و ديلديکنى ذنب صغير اوزره عذاب ايدر زیرا که
اکا هيچ شئ واجب اولمز توبه ايدنه اول ازله و ابده غفور واکا اطاعت
ايدنه رحيم اولدی (سيقول المخلفون اذا انطلقتم الى معانم لتأخذوها ذرونا
تبعكم يريدون ان يتدلوا كلام الله) حديبيه دن تخلف ايدنلر مؤمنلره
ديدیلر که چنانکه حديبيه دن دو نوب خيبر معانمه کیده سزى بزى
ترك ايدک که سز که خيبر اهلنه قتاله کیده لم حالبوکه مؤمنلر

(حديبيه)

حديبيه دن رجوعلرنده الله تعالى انلره وعد ايتديکه اهل مکه غنائمندن
عوض خاصة خيبر غنائمى انلره ويريله زیرا که حديبيه دن صلح اوزره
منصرف اولدقنلر اهل مکه دن برشيئه نازل اولما مشرودی اول مخلفين
اراده ايتديلر که الله تعالينک اهل حديبيه اولان وعدنى تغيير ایده لر
(قل ان تبعونا كذلك قال الله من قبل) يا محمد انلره دیکل که سزى بزمه
خيبره کتمز سزى زیرا که سزک خيبره کتمکه تهيشکزدن اول الله تعالى بکا اشبو
ديدیکم کبی دیدی يعنى خيبر غنيمتى حديبيه يه حاضر اولنلر کدر انلرک
غیري يه اندن نصيب يوقدر (فسيقولون بل تحسدونا بل كانوا لايقههون
الا قليلاً) مؤمنلره حديبيه دن تخلف ايدنلر ديدیلر که الله تعالى بزى سز که
خيبره کتمکدن منع ايتيودلر بلکه سزى بزم غنائمه سزه مشارکت ايتدیکمه
حسد ايدرسز بلکه انلر دينى فهم ايتزلر آز کسه لر در که انى فهم ايدر اوله که
انلر مخلصوندر (قل للمخلفين من الاعراب ستدعون الى قوم اولى بأس شديد
تقاتلونهم اويسلون) يا محمد حديبيه دن تخلف ايدن اعرابه دیکل که سزى
بر قومله قتاله دعوت اولنور سز که انلر بأس شديد صاحبليدر که انلر بنى
حنيفه و غيريدر پيغمبر يمز عليه السلام دن صکره مرتد اولديلر و يا مشرکوندر که
انلره قتال ايدرسز حتى که اسلامه کله لريوخسه انلر دن جزیه اخذکر جائز اولمز
(فان تطيعوا يؤتكم الله اجرا حسناً) ايمدی شول حديبيه دن تخلف ايدنلر
اکر سز اول حربده اخلاصله حسن قتال ايدرسکز الله تعالى سزه دنياده
غنيمت و آخرتده جنت ويرر (وان تولوا كما توليتم من قبل يعذبكم عذاباً ايماً)
واکر اول حربدن اعراض ايدرسکز اندن اول حديبيه يه دعوت
اولنديگزه کی اعراضکز کبی الله تعالى سزه عذاب اليمه تعذيب ايدر
اشبو آيت نزول ايديجک جهاددن عاجز و ضعيفلر ديدیلر که بزم حالز نيچه
اولور که قتاله دعوت اولنديگزدن خروجه استطاعتز اولميجق عذاب
اولنورز * نازل اولديکه (ليس على الاعمى حرج ولا على الاعرج
حرج ولا على المريض حرج) اعمى و اعرج و مريض اوزرينه وبال
يوقدر که جهاددن تخلف ایده لر (ومن يطع الله ورسوله يدخله جنات
تجري من تحتها الانهار و من يتول يعذبه عذاباً ايماً) اول کسه که
سر و علانيه ده الله تعالى يه ورسوله اطاعت ایده اول انى شول جنتلره

ادخال ايدركه آنك التذن ايرمقلر آقار واولكه الله تعالىنك طاعتندن اعراض ايدى اول انى عذاب اليله تعذيب ايدر (لقد رضى الله عن المؤمنين اذ يبايعونك تحت الشجرة) الله تعالى راضى اولدى شول مؤمنلردنكه سنكله حديبيه ده نزول ايتديلر كه انلر بىك اوچيوز ويا بىك بشيوز كمسه ايدىلر شول وقتن كه سن سمره ويا سدره التنده اوتورر كن سندن بيعت ايتديلر شوندىنصكره كه عثمان رضى الله عنه ي اهل مكه يه رسول كوندرمشديكه بيت الله ييغمبريمز عليه السلامه طواف ايجون تخليه ايدىلر بعده اهل مكه عثمان رضى الله عنه ي قتل ايتديلر ديو ايشيديلچىك ييغمبريمز عليه السلام اول بيله سنجه اولان اصحاب ايله مبايعت ايتديكه قريشله محاربه ايدىلر موت خوفيله انلردن فرار ايتدىلر بعده ييغمبريمز عليه السلام ديديكه عثمان الله تعالىنك ورسولنك حاجتنده در واينكى الينك برينى اول برى اوزره قويوب بو عثمانك بيعتدر ديدى (فعلم ما فى قلوبهم فأنزل السكينة عليهم وأثابهم فتحا قريبا) الله تعالى اول مبايعت ايدىن مؤمنلر قىلبرنده كى صدق ووفايي بيلوب اول صلح سبيله قىلبرينه طمانينه وسكون انزال ايتدى واول حديبيه دن رجوعلى عقبنده خيبرى فتح ايتدى (ومغانم كثيرة يأخذونها) وانلرى خيبردن آلدقلى مغانم كثيره ايله اثابه ايتدى زيراككه خيبرك يهودلرى اموال كثيره وعقار واشجار اصحابى ايدىلر ييغمبريمز عليه السلام انلرك جيعنى حديبيه اهلنه قسمت ايتدى (وكان الله عزيزا حكيما) الله تعالى غالب وحكمينى مراعى اولدى (وعدكم الله مغانم كثيرة تأخذونها) الله تعالى سزه مغانم كثيره وعد ايتديكه مؤمنلر ييغمبريمز عليه السلام زماننده واندنصكره ده يوم قيامته دكين كفاردن اخذ واغتنام ايدرلر (فجعل لكم هذه) اول جله دن خيبر مغانمى تعجيل ايتدى (وكف ايدى الناس عنكم) وسزدن اهل خيبر ايدىنى وحليفلى بنوا اسد وبنوا غطفان ايدىنى بر قولده قريش ايدىنى كف ايتدى * روايت اولنديكه ييغمبريمز عليه السلام خيبره كيدوب اهلنى محاصره ايدىچىك اسد وغطفان قبائلى قصد ايتدىلر كه مدينه ده كى عيال وذرارى مسلمينى غارت ايدىلر لكن الله تعالى قىلبرينه رعب القاسيله انلرى اندن كف ايتدى (ولتكون آية للمؤمنين ويهديكم صراطا مستقيما) تاكه اول كف

(ويا)

ويا غنيت مؤمنلره امارت اوله كه انكله عند الله كندىلرك منزلت ومرتبه لرى اولديغن بيلهلر وحديبيه دن رجوعلى حبينده خيبرك فتحيله ييغمبريمز صلى الله عليه وسلم وعدنده صدق ايدىكن يقين ايدىلر وسزى دين اسلام اوزره ثابت ايدوب انك فضل ورحمتنه توكل ايدى سزكه مسلمون سكر بىك كمسه اولوب اهل خيبر تيش بىك ايكى مسلمينى انلر اوزره غالب ايتدى (واخرى لم تقدرُوا عليها قد أحاط الله بها وكان الله على كل شيء قديرا) الله تعالى سزه مغانم اخرى وعد ايتديكه اول هوازن ويا فارس مغانميدركه هنوزاكا مالك اولوب سز الله تعالى اكا استيلاء ايدوبدر انى سزك غيريدىن منع ايدوب سزه فتح ايدىسدر الله تعالى هرشيئك اوزره قدير اولدى زيرا كه قدرتى ذاتيه در بر شيئه مختص اولوب سائرندن تمتع دكلدر (ولو قاتلكم الذين كفروا أولوا الأديبار ثم لا يجدون وليا ولا نصيرا) اكر يوم حديبيه ده مكه نك كفارى سزكه قتال ايدوب صلح اولمسدر ويا اسد وغطفان اهل خيبره معاونت ايجون سزكه قتال ايتسدر منهزمين اولدقلى حالده انصراف ايدوب من بعد انلره نفع ايدر بر قريب وهزيمتدن منع ايدر بزه ناصر بولمىلردى (سنة الله التى قد خلت من قبل ولن نجد لسنة الله تبديلا) يا محمد سندن اول كچن امترك رسوللرينه الله تعالىنك سنة موعوده سيدركه انلرى اعدالرى اوزره غالب ايدى الله تعالىنك سنتنه ايسه تغير بولمىسن (وهو الذى كف ايدىهم عنكم وايدىكم عنهم بطن مكة من بعد ان اظفركم عليهم وكان الله بما تعملون بصيرا) اول الله تعالى مكه مشركلرينك يديلىنى سزدن وسزك يديلىكى انلردن كف ايتدى سزه انلر اوزره نصرت ايتديكندنصكره الله تعالى سزك اعمالكزه بصير اولدى * قصه سى اولدر كه عكرمه ابن ابو جهل بشيوز كشييله حديبيه يه خروج ايدوب ييغمبريمز صلى الله تعالى عليه وسلم خالد بن الوليدى مسلميندن بر مقدار چند ايله اوزرلرينه كوندردى حتى كه اول كفارى صيوب مكه نك حيطانه قويدقلىدندنصكره كيرو دوندىلر * دينديكه اشبو قصه يوم فتحده ايدى * پس بواجلدن دينديكه مكه نك فتحى عنوة اولوبدر (هم الذين كفروا وصدّوكم عن المسجد الحرام والهدى معكوفاً ان يبلغ محله) انلر شول كافرلدر كه سزى مسجد حرامه دخولدن وبيت شريفى طوافدن وهديكزى محلهده نخردن

منع ايتديلر که اول حاج ايجون منى و معتمر ايجون صفادر ايمدى
 پيغمبريمز صلى الله عليه وسلم يتش هدى سوق ايتشدى منع اوليحق جيعنى
 حديدیه ده نحر ايتدى زیرا که محصرک منحرى حصر اولديغى محلدركه
 شافعى اکا ذاهيدر و بعضيلرى ديدیکه حديدیه نك بعضى حرمدندر
 اوليه اولسه پيغمبريمز صلى الله تعالى عليه وسلم هداياسنى حرمده نحر ايتشد
 تکيم ابوحنيفه انک نحرى حرمده اولسى شرطدر ديدى اگرچه اول
 نحر ايجون معهود دکلسه ده (واولا رجال مؤمنون و نساء مؤمنات
 لم تعلموهم ان تطؤهم فتصيبکم منهم معرة بغير علم) اگر مکده مشرکينه
 مختلط رجال و نساء جاعتى اولسه که سز انلرى بيلزسز و مشرکيندن
 تمير ايتزسز غفلتله سز انلرى اهلاککز سبيله اوزريکزد ديت و کفارت
 وجوبى وانلر اوزره تأسف و تعبير کفار وقوعى وانلردن بحثده تقصيرله
 اثم مثلى مکروه اصابتى اولسه الله تعالى سزک ايدیکزى انلردن کف ايتزدى
 (ليدخل الله فى رحته من يشاء) الله تعالى سزک ايدیکزى اهل مکهدن
 کف ايتدیکه انده کى مؤمنلرى صيانت ايده وانلردن ديلديکنه زياده خيرى
 الهام ايدوب ويا انده کى مشرککردن ديلديکنه اسلامى توفيق ايدوب جنه
 ادخال ايده (لوتزيلوا لعذابنا الذين كفروا منهم عذابا اليما) اگر مؤمنلر
 کفاردن تمير ايتسهلر انلردن کفارى بزقتل و سبيله تعذيب ايدردک
 (اذ جعل الذين كفروا فى قلوبهم الحمية حمية الجاهلية) ذکر ايت شول
 وقتیکه مکه نك کفارى قلمبرنده انقه قيلدیلر که اول حق اذعاندن
 منع ايدر حية جاهليه در شول حيثيله کيم پيغمبريمز عليه السلام
 حديدیه به نزولنده ديدیلر که محمد بزم آباء و اخوانمى قتلندنصکره کلديکه
 منازلزه دخول ايده والله بزاني مکيه ادخال ايتز تا که محمد واصحابى بزه
 رغبايته دخوله رينه سويتيلر (فانزل الله سکينته على رسوله وعلى المؤمنين)
 اوليه اولسه الله تعالى رسولنه و مؤمنلره ثبات و وقار انزال ايدوب کفارك
 قلوبنه داخل اولان حية جاهليه انلره داخل اولدى * روايت اولنديکه
 وقتا که کفار انقه ايدوب انلرى بيه دخولدن منع ايديجک پيغمبريمز عليه
 السلام و مؤمنلر قصد ايتديلر که انلر که قتال ايدلر اوليه اولسه کفاره
 انلردن خوف کلوب پيغمبريمز عليه السلامدن ديلدیلر که اوسنه کيرو
 مدينه کيدلر شول شرطله کيم سنه آتیه ده قریش انلر ايجون

(مکه)

مکه بى اوج کون تخليه ايدلر پيغمبريمز عليه السلام اکا راضى اوليحق
 انک اوزره اندن عهدنامه استديلر پيغمبريمز صلى الله تعالى عليه وسلم على
 رضى الله عنه به (بسم الله الرحمن الرحيم) يازغل ديدى انلر ديدیلر که
 بز انى بيلز بلکه (باسمک اللهم) يازغل بعده ديدیکه اشبو رسول اللهک
 اهل مکه ايله اولان صلحنامه سيدر ديدیلر که اگر بزسنتک رسول الله
 ايدیکى بيلسيدک سنى بيته دخولدن صد ايتز و سنکه قتال ايتزدک بلکه
 يازغل که اشبو محمد بن عبد اللهک اهل مکه ايله اولان صلحنامه سيدر
 پيغمبريمز صلى الله تعالى عليه وسلم ديدیکه استدکاری منوال اوزره يازغل
 مؤمنلر قصد ايتديلر که اندن امتناع ايدوب انلر اوزره هجوم ايدلر الله تعالى
 اوزرلر ينه سکينه انزال ايدوب حتى که توفى و تحمل ايتديلر (والزمهم کلمة
 التقوى و كانوا احق بها و اهلها) وانلره کلمة تقواى الزام ايتدى يعنى کلمة
 شهادت و يا بسملة شريفه بى و يا محمد رسول الله ديمکى و يا عهد اوزره وفاء
 و ثباتى اختيار ايتدى و اول کلمة تقوايه غيريدن احق و اهل اولديلر
 (وکان الله بكل شىء علما) الله تعالى هر شئيته علیم اولدى اوليه اولسه
 هر شئيک اهلنى بيلور اکا انى آسان قيلور (لقد صدق الله رسوله الرؤيا
 بالحق) پيغمبريمز صلى الله تعالى عليه وسلم منامنده کوردیکه اول واصحابى
 مکيه امن اوزره محلقين و مقصرين کيرديلر اول رؤياى اصحابه حکايت
 ايديجک تأويلى اول ييلده اولقى توقعيله سوينشديلر تأخير ايديجک بعضيلرى
 ديدیکه والله باشمى نه حلق و نه تقصير ايتدک و نه بيتى کوردک اول سيدن
 اشبو آيت نازل اولدى يعنى الله تعالى رسولنه منامنده کوستردیکى رؤياى
 حقى ملتبس اولديغى حالده تحقيق ايتدى اول انک کوردیکى لابد وقت
 مقدرده که اول عام قابلدلر ظهور ايديسر در (لتدخلن المسجد الحرام
 ان شاء الله آمنين محلقين رؤسکم و مقصرين لانخافون) والله يامؤمنلر که حک
 ييلده سز مسجد حرامه کيررسز اگر الله تعالينک مشيئتى اولورسه * وعد
 کريمک مشيئته تعليقده عبادنه انى تعليم وانلرک بعضى اکا موت ياغيه
 علتيله کيرمز ايدیکى اشعار و ياخود ملک رؤيانک مقاله سنى حکايت و ياخود
 پيغمبريمز عليه السلامک اصحابه اولان قولنى رعايت واردر بعضکز باشنى
 تراش ايدر و بعضکز ايسه صاچنى قرقر عدودن امن اوزره اولوب انلردن

خوفكز اولديغي حالده (فعل ما لم تعلموا فجعل من دون ذلك فتحا قريبا) الله تعالىك اني تأخيرنده كي حكمتندن سزك بيلديككزي بيلوب مسجد حرامه دخولكزدن اول سزه صلح حديديه ي ويافتح خيبري تيسير ايتدي تاكه موعودك حصوله دكين مؤمنلك قلوبى انككه استراحت ايد (هو الذي ارسل رسوله بالهدى ودين الحق ليظهره على الدين كله) اول الله تعالى رسولى محمد عليه السلامي توحيدله ودين اسلامه كوندرديكه اول دين اسلامي سائر اديان اوزره حق اولانك نسلخله وباطل اولانك فسادنى اظهارله وياخود مؤمنلى اول دين باطللك اهلى اوزره تسليطله زيراكه اسلامدن غيرى دين اهلى مسلمون قهر ايدوبدر (وكفى بالله شهيدا محمد رسول الله) الله تعالى شاهديتكه محمدانك رسوليدرا كچه كفار مكه اكا شهادت ايتزلرسده زيراكه بز سنك رسول الله ايديككى بيلرز ديدلر (والذين معه اشداء على الكفار) محمد رسول اللهدر وانككه اولان مؤمنلر كفار اوزره شديدلدر انلره محبت ايتزلر دينلرته مخالف اولنلره غلظت ايدرلر (رحاء بينهم) برى برلرته مرحمت ومحبتلولدر (تراهم ركعا سجدا) سن انلرى را كعلر وساجدلر كوررسن زيراكه اكثر اوقاتده نمازه مشغوللدر (يلتغون فضلا من الله ورضوانا) الله تعالىدن آخرتده ثوابن ورضاسن طلب ايدرلر (سيماهم في وجوههم من اثر السجود) علامتلى سجود اثرندن يوزلرنده ثابته دركه اول كثر صلاوة وسهر ليلدن نورلتسيدر ويا علتسز يوزلرينك صرار مسيدر ومسلمونك طباعى انلرى قبول ايتسيدر (ذلك مثلهم في التورية) اشبو مذكورات انلك توراتده صفتيدر (ومثلهم في الانجيل كزرع اخرج شطاها فآزره فاستغلظ فاستوى على سوقه) اما انلك انجيلده كي صفتى شول زرعه بكزر كه فراخ وسنبلى اخراج ايدو اكا تقويه واعانه ايدو رقيق ايكن غليظ اوله اندن ساقى اوزره طوغريلوب طوره (يعجب الزراع) كثافت وقوت وغلظت وحسن منظريله زراعلرى اعجاب ايدو الله تعالى انى صحابه يه مثل ضرب ايلدى انلر اوائل اسلامده قليل ايكن كثر بولديلر وانككه مستحكم اولدولرند نصكره رفعت بولديلر حتى كه اول او صافله رسول الله صلى الله تعالى عليه وسلمه حالاريني بكندرديلر (ليغيظ بهم الكفار) الله تعالى انلرى اشبو صفاتله وصف ايلدى تاكه انككه كفارى اويكلندره (وعدا الله الذين

(آمنوا)

آمنوا وعملوا الصالحات منهم مغفرة واجرا عظيما) الله تعالى پيغمبريمز صلى الله تعالى عليه وسلمك اصحابندن مؤمن اولوب اعمال صالحه ايشلينلره مغفرت وجنت وعد ايتدي

سورة الحجرات وهى ثمانى عشرة آية مدنية

بسم الله الرحمن الرحيم

(يا ايها الذين آمنوا لا تقدموا بين يدي الله ورسوله) يامؤمنلر هيچ برامرده الله تعالىك ورسولك امرنده تقدم ايتكز يعنى چقان برشيئله امر اولنديككزده انى وقت مأموردن اول ايشلكز جابر رضى الله عنه ايدر اول يوم الضحاده ذبح حقنده دركه برجاعت پيغمبريمز صلى الله تعالى عليه وسلم صلاوة عيدي ادا ايتدن اضحيه لريني ذبح ايتدكلرنده اعاده ايله امر ايلدى برآه رضى الله عنهدن مرويدر كه پيغمبريمز صلى الله تعالى عليه وسلم يوم نحرده خطبه سنده ديديككه اشبو كونده بزم اول عملز صلاوة عيدي ادا در اندن رجوعمзде اضحيه لر يمزى ذبحدر اول كسه كه اشبو امر اولنديغي منوال اوزره ايدو منتزه اصابت ايدر واولكه بز صلاوة عيدي ادا ايتدن ذبح ايدو اول اهليچون لحم تعجيل ايتشدر يوخسه نسلدن اول برشيئده دكلدر عائشه رضى الله عنها ايدر اشبو آيت يوم شكده صومدن نهى حقنده در يعنى پيغمبريمز صلى الله تعالى عليه وسلم رمضان صومنه شروع ايتدن سز اكا شروع ايتكز اكليله ايدر يعنى كتاب وسنتك خلافتى سويلكز ودخى الله تعالىك ورسولك كلامى سويلنوركن آخر كلامى سويلكز وهرشيئده شرعه متابعت ايدك وقياسى نص اوزره تقديم ايتكز (واتقوا الله ان الله سميع عليم) تقديمده ومخالفت حكمده الله تعالىدن قورقكز كه اول اقوالككزي ايشيدر وافعالككزي بيلور (يا ايها الذين آمنوا لا ترفعوا اصواتكم فوق صوت النبي) يامؤمنلر پيغمبريمز صلى الله تعالى عليه وسلمه سويلديككزده صوتككزي انك صوتى اوزره رفع ايتكز (ولا تجهروا له بالقول كجهر بعضهم لبعض) وينكزده دائر جهرله پيغمبريمز عليه السلامه تكلمده جهر ايتكز بلكه اكا تعظيم ايجون صوتككزي خفض ايدك واكا اسم وكنيه سيله خطاب ايتكز برى برلريكزه خطابكز كي اشبو آتله علماء استدلال ايتديلر انك قبرى قنده وحديثى اوقونديغنده رفع صوتدن منع اولنه زيراكه

اکا نمائنده کی حرمت حیاته کی حرمت کبدر (ان تحبط اعمالکم وانتم لاتشعرون) اعمالکے حبط اولیٰ کراہتیلہ حالبوکہ انک حبط اولدیغنه شعوریکز اولمز زیرا کہ صوتی جهر ورفعه استخفاف وارد اکر اکا قصد اهانت وعدم مبالات منضم اولور سه کفری مؤدی اولور * روایت اولندیکه ثابت بن قیسک اذندہ وقر اولدیغندن جهوری الصوت ایدی بوآیت نازل اولیحق پیغمبریمز علیه السلامدن تخلف ایدی پیغمبریمز علیه السلام دخی انی چاغروب بزه نیچون کلز اولدک دیدیکنده دیدیکه یارسول الله چون سکا بوآیت نازل اولدی بن ایسه جهوری الصوت قورقرینکه علم حبط اوله واهل ناردن اولم پیغمبریمز علیه السلام ایدی دیلمیسنکه حیاتهکده حید و نمائنده شهید اولوب جنه کیره سن دیدیکه الله تعالینک ورسولنک بشارتنه راضیم شمدنکیرو عرم اولدقه صوتی صوتک فوقه رفع یتیم اوله اولسه مسیله حربنده شهید اولدی * دینلدیکه بوآیتدنصکره ابو بکر و عمر رضی الله عنهما پیغمبریمز صلی الله علیه وسلمه تکلملرنده اسرار ایدر اولدیلر (ان الذین یغضون اصواتهم عند رسول الله اولئک الذین امتحن الله قلوبهم للتقوی لهم مغفرة واجر عظیم) شونلرکه رسول الله قنده ادبه رعایت ایدوب صوتلرین خفض ایدرلر انلر شول قومدرکه الله تعالی قلبلرینی تقوی ایچون اختیار وخالص ایدوبدر انلر ایچون مغفرت ذنوب وجنتده ثواب جزیل اولور (ان الذین ینادونک من وراء الحجرات اکثرهم لایعقلون) یا محمد شونلرکه نسائک جراتی وراسندن سکا ندا ایدرلر * دینلدیکه ندای ایدن عینة بن حصین و اقرع بن حابس ایدیکه بنو تمیمدن یتیم رجال ایله پیغمبریمز صلی الله تعالی علیه وسلمه وفدکلدیلر حالبوکه اول وقت ظهیره ده راقد ایدی یا محمد طشره چیق دیوندا ایتدیلر انلرک اکثری حرمت نبوتی تعقل ایتزلر زیرا که عقل حسن ادب و مراعات حشمت اقتضاء ایدر لاسیما اول منصبده اولان کسه یه اوله اول نداء منکر انلرک جبعنه اسناد اولندی زیرا که اکا جبعی راضی اولدیلر ویا منادی یه امر ایتدیلر ویا اول منادی انلرک اراسته ایدی (ولو انهم صبروا حتی تخرج الیهم لکان خیرا لهم والله غفور رحیم) اکر انلر سنک خروجکه دکن صبر وانتظارده ثابت اولسه لر اول انلره استجمالدن خیرلی ایدی زیرا که انده حفظ ادب وتعظیم رسول حاصل اولوردیکه

اول ثناء وثوابی ایجاب ومسئولی اسعاف ایدردی الله تعالی غفور رحیمدرکه اول اساءت ادب ایدن وترك تعظیم ایدنلره نصیح وتقریع اوزره اقتصار ایدی بوآیتک سبب نزولنده دینلدیکه پیغمبریمز علیه السلام بنی العیر نام قبیلہ یه سریه کوندردی انلر سریه نک کلدیکن بیلچک عباللرین براغوب قاچدیلر اوله اولسه سریه اول عالی سبی ایدوب پیغمبریمز علیه السلامه کتوردیلر بعده بنو العیردن بر جاعت اول سبی اولنان عباللرین اشتراء ایچون کلدکارنده وراه ججراتدن پیغمبریمز علیه السلامه غلظتله ندا ایدوب اویورکن انی اویاردیلر طشره چیقدیغنده اکا عباللری امرنده سویلدیلر پیغمبریمز علیه السلام انلرک برینی حکم ایدیچک اول حکم دیدیکه عیالمزک نصفنی بزه باغشله ونصف آخرینی بزه بیع ایله پیغمبریمز علیه السلام دخی انجلین ایدی اول سبیدن بوآیت کریمه نازل اولدی یعنی اکر ندا ایتیبوب صبر ایتیش اولسه لر انلره خیرلی ایدی انلرک هیچ برندن فدا آلمسزین جبعینی آزاد ایدیسردی (یا ایها الذین آمنوا ان جاءکم فاسق نبیا فتنیوا ان تصیبوا قوما بجهالة فتصبخوا علی ما فعلنم نادمین) یا مؤمنلر اکر سزه بر فاسق خبر کذبله کلورسه اول خبرک کیفیت امرندن تعرف وتفحص ایدک عجله ایتکز شول کراہتله کیم بر قومک حاللرین بیلدین قتل و قتاله انلره اصابت ایدوب بعده اول فعلکزه نادمین اوله سز * روایت اولندیکه پیغمبریمز صلی الله علیه وسلم ولید بن عقبه بی اخذ زکات ایچون بنو المصطلق نام قومه کوندردی مکر اول ولیدله انلر پیننده عداوت وار ایدی انی ایشدکارنده اکا قارشو کلدیلر ولید ایسه انلرک کندوی قتلنه کلور ظن ایدوب کیرو دوندی وپیغمبریمز علیه السلامه دیدیکه انلر مرتد اولشلر بکا زکاتی ویرمدیلر اکا بناء پیغمبریمز علیه السلام انلره غزاقصدین ایدیچک بوآیت نازل اولدی * دینلدیکه پیغمبریمز علیه السلام ولیددنصکره انلره خالد بن الولیدی کوندردی اکر انلرده ایمانلرینه دلالت ایدر شیئی کور رسک زکاتلرین آلوب کل والا انلره کفارہ ایدیلن فعلی ایشله چون خالد انلره واردی اخشام ویتسو اذانن انلرده اوقونور ایشیدیچک زکاتلرین آلوب پیغمبریمز علیه السلامه کلدی وحسن حاللرین اکا خبر ویردی انکله ولیدک خطاسی ظاهر اولدی اشبو دلیلدکه فاسقک خبری رد اولنه ومخبرده عدالت شرط اوله اول کرک راوی ویا شاهد ویا مفتی

اولسون وواحد عدلت خبری مقبول اوله (واعلموا ان فيكم رسول الله
لو يطيعكم في كثير من الامر لعنتم) بلك رسول الله سرك ارا كرده در
ایمدی اكا وامرنه موافقتله تعظیم ایدك اكر اول سرك خبر ویردیکكز
ویا اختیار ایتدیکكز امورك کثیرنده سزه اطاعت ایتسه اثم وهلاکه
ایردیکكز زیرا انلرك بعضیلری جهد ایتدیلرکه فاسق قولیله عمل اولنوب
پیغمبریمز علیه السلام انلری بنو المصطلق ایله قتاله کوندره (ولكن الله
حبيب اليكم الايمان وزينه في قلوبكم) لكن الله تعالى سزه ایمانی
تحیب ایدوب قلوبكزده انی آیات واضحه وبراهین قاطعه ایله تزین ایتدی
(وكره اليكم الكفر والفسوق والعصيان) واول الله تعالى سزه
كفر وفسوق وعصيانی تبغیض ایتدی (اولئك هم الراشدون) ایدمی
بوصفتلو كسهر طریق سوايه اصابت ایدیجلردر (فضلا من الله ونعمة
والله عليم حكيم) اشبو تحیب و تبغیض الله تعالیدن سزه فضل ونعمت
اولدی الله تعالى مؤمنلرك احوالنه وینلرنده کی تقاضله عليم وانلره
توفیقله انعام وافضالنده حکیمدر (وان طائفتان من المؤمنين اقتتلوا
فاصلحوا بينهما) اكر مؤمنلردن ایکی طائفه بر برلیله قتال ایتسه لر
اول ایکی طائفه نك بیننی نصلحه وحكم الله دعوتله اصلاح ایدك اشبو
دلیدرکه اهل عدله اهل بغی بیننی اصلاح واجب اوله (فان بغت احديهما
على الاخرى فقاتلوا التي تبغي حتى تفي الى امر الله) اكر اول ایکی
طائفه نك بری طائفه اخری اوزره تعدی ایدرسه اول تعدی ایدن طائفه
قتال ایدك تاكه الله تعالیك امرنه رجوع ایدلر (فان فاءت فأصلحوا
بينهما بالعدل واقسطوا ان الله يحب المقسطين) اكر اول بغی ایدن
طائفه بغیدن رجوع ایدرلرسه بینلرینی الله تعالیك حکمی مقتضاستجه
اصلاح ایدك وجیع اموركزده عدل ایدك الله تعالى عدل ایدنلری سور
اشبو آیت پیغمبریمز علیه السلام زماننده اوسله خزرج بیننده حادث
قتال شاننده نازل اولوبدر اشبونده دلالت واردرکه باغی مؤمن اوله
وباغی حربدن فارغ اولورسه ترك ایدله واوزرینه بغی اولنان كشییه
اجانت واجب اوله لكن نصیح وصلحه سعیدنصكره (انما المؤمنون اخوة)
مؤمنلر بری برلرینه قرنداشلردر زیرا جیعی اصل واحده منتسبلردرکه
اول ایماندرکه کیم حیات ایدییهی موجبدر (فأصلحوا بين اخويكم

(ایمدی)

ایمدی ایکی قرنداشكز بیننی اصلاح ایدك ایکی به تخصیصه علت
زیرا که شقاقك اقل وقوعی ایکی كشی بینندهدر (واتقوا الله لعلكم ترحون)
الله تعالیدن قورقوب حکمنه مخالفت ایتكزکه رحمت اولنه سز
(يا ايها الذين آمنوا لا يسخر قوم من قوم عسى ان يكونوا خيرا منهم
ولا نساء من نساء عسى ان يكن خيرا منهن) يا اهل ايمان جاعتي رجال
ونسادن بری برلریکزی سخره ایتسون زیرا کاهی اولورکه سخره اولنان
عندالله سخره ایدندن خیرلی اولور (ولا تلذوا انفسكم) وبری برلریکزی
تعیب ایتكز زیرا که مؤمنلرك کلیسی نفس واحده کیدر ویاخود
کندیکزه عیب ویرر شیئی ایشلکز زیرا انی ایشلین کندویی تعیب ایدر
(ولا تنازعوا بالالقاء ببس الاسم الفسوق بعد الايمان) وبری برلریکزی
لقب فسوقله چاغر مکزکه اول مؤمنلره نه چرکین اسم اولورکه ایمانه
دخولله اشتهارلرندنصكره فسقله ذکر اولندلر * روایت اولندیکه اشبو آیت
صفیه بنت حبی شاننده نازل اولوبدرکه اول پیغمبریمز صلی الله علیه وسلم
دیدیکه یارسول الله نسائك بکا یهودی قزی یهودیه دیو تعبیر ایدرلر
پیغمبریمز علیه السلام اكا ایتدی سن انلره دیكل که بابام هارون وعمم موسی
وزوجم محمد رسول اللهدر * دینلرکه اشبو آیت ابو مالاك شاننده
نازل اولوبدرکه اول عبدالله بن السملایه یاوزلنوب یا اعرابی دیدی عبدالله
ایسه اكا یهودی دیدی پیغمبریمز علیه السلام ایکسین دخی هجر ایدوب
توبه لری ظهورنه دكین قنه کلمکدن منع ایتدی (ومن لم يتب
فاولئك هم الظالمون) اول کسه که اشبو مناهیدن توبه ایتیه اول وصفلو
کسه لر ظالمردر عصیان طاعت موضعنه وضع ونفسلرین عذابه عرض
ایتدکاریچون (يا ايها الذين آمنوا اجتنبوا كثيرا من الظن ان بعض
الظن اثم) یا مؤمنلر کندیكزدن ظنك کثیرنی ابعاد ایدك تحقیق
ایتكز زیرا که ظنك بعضی بعضیسنده صاحبی انکله عقوبته مستحق
اولور اول بعض ایسه کثیردر زیرا که مؤمنلره سوء ظندر * دینلرکه
اكر مؤمن صلاحله موسوم ایسه اكا سوء ظنده احتیاط اولنور واکر
فاجر ایسه انده ظاهر اولان مثلی ظن اولنه اما که صلحایه وعلمایه
حسن ظن ایتك مندوبدر * دینلرکه ظن ایکی نوعدر برنوعی
اثمدرکه اول ظن اولنوب تکلم ایدله وبرنوعی ایسه اثم دکلدرکه اول ظن

اولنوب تکلم ایدیه اول اجلدن ظنک بعضی ائمدر دینلدی یوخسه جیعی دکل (ولا تجسسوا) عورات مسلمیندن بحث وتبع ایتکز پیغمبریمز صلی الله علیه وسلم ایدر مسلمونه قنه اولمکز وامورلرندن مستور اولان اشیایی تتبع ایتکز زیرا برکسه که مسلمونک عوراتنی تتبع ایده الله تعالی دخی انک عوراتنی تتبع ایدر اول کسه که الله تعالی انک عوراتنی تتبع ایده انی رسوای ایدر اگرچه رحلتک ویا بیتک جو فنده ایسه ده (ولا یفتب بعضکم بعضا) وبری بریکزی ظهر غیبنده سوئله ذکر ایتکز پیغمبریمز صلی الله علیه وسلم غیبتدن سوئل اولندوقده دیدیکه اول مسلم قرنداشکی کراحت ایتدیکی شیئه ذکر کدر اگر اول ذکر ایتدیکنک شیئه انده موجود ایسه انی غیبت ایتشسن واکر اول شیئه انده مفقود ایسه اکا بهتان ایتشسن * روایت اولندیکه پیغمبریمز علیه السلام غزاویاسفر ایدر اولسه هر بررجل محتاجی ایکی موسر کسه یه ضم ایدردیکه انلره خدمت ایده ومنزله تقدم ایدوب طعام وشراب وسائر حوائج لرین تهیئه ایده اولیه اولسه پیغمبریمز علیه السلام بعض اسفارنده سلمان رضی الله عنه یی ایکی رجله ضم ایدوب منزله تقدم ایتدیکنده اکا نوم غلبه ایدوب برشیئه تهیئه سنه قادر اولدیغی اجلدن اول ایکیمی انی اسامه یه کوندردیلر اسامه بنم عندمده مأ کولدن برشیئه قالدی دیدی بعده انی صحابه دن برنیچه کسه یه کوندردیلر هیچ برنده برشیئه بولمچق دیدیلر که اگر بزسنی برصوی چوق قیویه کوندرسک صوی باتوب صوسنر کلیدک اندن ایکیمی طوروب اسامه عننده برشیئه وارمیدی دیوتجسسسه اشتغاللرند نصکره پیغمبریمز صلی الله علیه وسلم قنه واردیلر پیغمبریمز علیه السلام انلره ایتدی سبب ندرکه اغز کزده لحم اثرین کوررم دیدیلر که والله یارسول الله اشبو کونده بزلمدن برشیئه اکل ایتامشز پیغمبریمز علیه السلام ایتدی بلکه سلمان واسامه لحمی اکل ایتدیکز اول سبیدن بوآیت نازل اولدی (أیحب احدکم ان یأکل لحم اخیه میتا فکرها تموه) سزدن بریکز سورمیکه برمسلم قرنداشنک لحمی اکل ایده اول قرنداشی ویالحمی میت اولدیغی حالده اول سزه عرض اولنسه اندن کراحت ایدردیکز * ایمدی تنکیم انک لحمی میت ایکن اکلدن کراحت ایدر سز انک غیبتی حالده انی سوئله ذکر کدن دخی کراحت ایدک پیغمبریمز صلی الله علیه وسلم ایدر لیله معراجده برقومه اوغرادمکه انلرک باقردن طرقلری

(وار)

وار یوزلرین انکله طرملر لر جبریل علیه السلامه بولر نه حالو کسه لر دریدیم دیدیکه ناسی غیبت ایدنلر وعرضلرین یقنلر در میمون ایدر بروقتده منامده اوکله برزنجی میته سی قونیلوب لمجندن اکل ایله دینلدی دیدمکه انی نه سبیدن اکل ایدم دینلدیکه فلان عننده اولان غیبت سیبیله دیدمکه والله بن اول مجلسده خیر وشردن برشیئه تکلم ایتامشم دینلدیکه لکن اکاراضی اولوب استماع ایتدک اولیه اولسه میمون من بعد نه غیبت سویلر ونه غیبتی دکاردی (واتقوا الله ان الله توأب رحیم) الله تعالیدن قورقوب غیبتدن توبه ایدک که اول تائبک توبه سنی قبول ایدر رجتنه ایردیرر (یاایها الناس انا خلقناکم من ذکر واثی وجعلناکم شعوبا وقبائل لتعارفوا) یاناس بزسزک جیعیکزی آدم وحوادن ویاب وامن خلق ایتدک جیعیکز انده مساویسنز اولیه اولسه نسیله تفاخرک وجهی یوقدر وسزی شعوب وقبائل قیلدقکه بری برلریکزی بیله سنز وحقی ویره سنز یوخسه انکله فخرلیمه سنز * معلوم اوله که شعب جمع عظیمدر که اصل واحده منتسبلر در اول قبائلی جمع ایدر وقبیله عماری وعمار و بطونی و بطن افخادی وفخذ فصائلی جمع ایدر ایمدی خزیمه شعبدر وکنانه قبیلدر وقریش عماره در وقصی بطندر وهاشم فخذدر وعباس فصیلدر * دینلدیکه شعوب بطون عجددر وقبائل ایسه بطون عربدر (ان اکرمکم عندالله اتقاکم) الله تعالی عننده زیاده کرامتلیکز تقوایی زیاده اولانکزدن زیرا که تقوا ایله نفوس کال بولور واشخاص متفاضل اولور اولکه شرف اراده ایده انی تقواده اراده ایتسون * پیغمبریمز صلی الله تعالی علیه وسلم ایدر برکسنه که انی ناسک اکرمی اولمق مسرور ایده الله تعالیدن خوف وخشیت اوزره اولسون * پیغمبریمز علیه السلام دیدیکه ناس ایکی صنفدر برصنی مؤمن تقی اولوب الله تعالی عننده کریمدر وبرصنی ایسه فاجر شقی اولوب الله تعالی عننده مهاندنر (ان الله علیم خبیر) الله تعالی تقواده سزک مراتبکزی بیلور احوالکزه خبر داردنر (قالت الاعراب آمنا قل لم تؤمنوا) بنو اسد اعرابندن برطائفه برخط بیلده مدینه یه کلوب بزایمانه کلدک دیو اسلام اظهار ایتدیلر * وپیغمبریمز علیه السلام امتنان وجهی اوزره بزسکا ائقال وعیاله کلشنر وبنو فلان کبی سنکله قتال ایتامشز حالبو که انکله صدقه مراد ایدر لر بزطوعا ایمانه کلشنر دیو غنیمندن سائر

مسلمينه ويريلندن اكثر ويرلمسين استرلردى ايمدى يا محمد سن انلره ديكل كه
سنز ايمانه كلديكز زيرا كه ايمان تصديقدر كه ثقه و طمانينه قلبه اولور
اول ايسه سزه حاصل اوليوبدر اكر حاصل اولمش اولسه اسلامكزى وترك
مقاتله كزى رسول الله امتنان ايتزديكز تشكيم آخر سورة اكا دلالت ايدر
(ولكن قولوا اسلمنا ولما يدخل الايمان في قلوبكم) بلکه اموال وعيالمزه
واولاد مزه ضرر ايرمك خوفيله اسلامه داخل اولدق ديكز زيرا كه
اسلام انقياد وسلمه دخول و اظهار شهادتين وترك محاربه در حالبو كه
حب ايمان قلوبكزه داخل اوليوبدر قلوبكز السنه كزه موافقت ايتيوبدر
(وان تطيعوا الله ورسوله لا يلتكم من اعمالكم شيئا) اكر الله تعالى به
ورسولنه اخلاص ايدوب وترك نفاقله اطاعت ايتسكز الله تعالى اعمالكز
اجورندن برشى نقض ايتزدى (ان الله غفور رحيم) الله تعالى مطيعلرك
قصورك مغفرت ايدر وانلره فضليله رحمت ايدر (انما المؤمنون الذين آمنوا
بالله ورسوله ثم لم يرتابوا وجاهدوا باموالهم وانفسهم في سبيل الله
اولئك هم الصادقون) ايمانده كامل شول كسه لر در كه الله تعالىنك
وحدانيتنه ورسولينك رسالتنه تصديق ايدوب انده شك ايتديلر
والله تعالىنك سبيلنده ماللريله ونفسلريله جهاد ايتديلر ايمدى اول وصفلو
كسه لر ايمان اداسنده صادق لر در آيت مذكوره نزولند نصكره
اول اعراب پيغمبر يمز صلى الله عليه وسلمه كلوب سر و علانيه ده ايمانلرنده
صادق لر ايديكنه يمين بالله ايتديلر بيورلديكه (قل آتعلون الله بدينكم
والله يعلم ما في السموات وما في الارض والله بكل شئ عليم) يا محمد سن
انلره ديكل كه صد دنده اولديغكز دينى الله تعالى به مى خبر ويرر سز حالبو كه
اول سموات وارضده كي مخلوقاتك اسرارنى پيلور اول هر شئي علميدر
اكا هيچ برشى خفى اولمز (يمنون عليك ان اسلموا قل لا تمنوا على اسلامكم
بل الله يمن عليكم ان هداكم للايمان ان كنتم صادقين) انلر سكا اسلاملرين
منت عدايدر لر انلره ديكل كه اسلامكزى بكانت عد ايتكز بلکه الله تعالى
سزه امتنان ايدر كه زعمكز اوزره سزه ايمان توفيق ايتدى اكر ايمان
اداسنده صادق لر ايسه كز الله تعالىنك منتى سزه در يوخسه سزك اكا دكلدر
(ان الله يعلم غيب السموات والارض والله بصير بما تعملون) الله تعالى سموات
وارضده غائب هر شئي پيلور سرده و علانيه ده ايشلديكزى كورر

سورة ق وهى اربعون آية مكية

بسم الله الرحمن الرحيم

(ق) معناسنده اختلاف اولنديكه اول قسمدر ويا اسم سورة در
ويا قدیر وقادر وقاهر وقريب وقابض اسملرينك مقتاحيدر ويا خود
شول جبل مشهورك اسميدر كه اول ارضى احاطه ايدوبدر
يشل زمرددن خلق اولنمشدر سمانك بشللكى اندندر سماء انك اوزره
قبه اولوب اكنافى اكا ايريشوبدر * دينلديكه اول وراه حجابده در كه
شمس انك وراستنده برسنه مسيره دن غائب اولور دينلديكه انك معناسى
امر قضاء اولندى (والقرآن المجيد) قرآن حقيچونكه اول مجد وشرف
صاحبيدر ويا اول مجدله موصوف الله تعالىنك كلاميدر ويا اولكه انك
معناسن بيلوب احكامنه امثال ايدم مجد اولنور (بل عجبوا ان جاءهم
منذر منهم فقال الكافرون هذا شئ عجب) بلکه انلر تعجب ايتديلر كه
كنديلرك جنسندن برى انلرى انذار ايدم اوليه اولسه ديديلرك الله تعالىنك
محمدى رسالتنه اختياري برشى عجيبدر (انذا متا وكنا ترابا ذلك رجع
بعيد) بز ميت و تراب اولديغمز دن نصكره كيرو حياتنه رجوع ايدر مير ايمدى
اول رجوع وهم واعاده امكاندن بعيددر (قد علمنا ماتنقص الارض منهم)
الله تعالى ايدر كه بز انلرك اجسادندن ارضك اكل ايتديكن پيلورز ويا بز
انلرك فوت اولانن وديياده قلانن پيلورز هيچ برشيئك علمى بز دن خفى
اولمز (وعندنا كتاب حفيظ) والحال بزم عندم زده بر كتاب وارد كه جميع
اشيائى حافظدر (بل كذبوا بالحق لما جاءهم فهم في امر مريج) بلکه
انلر معجزاتله ثابت نبوت وياني ويا قرآن انلره كلديكنده تكذيب ايتديلر بلکه
انلر امر مختلطده در يعنى پيغمبر يمز صلى الله عليه وسلم حقه كيمي ساحر
وكيمي شاعر در وكيمي مجنون وكيمي معلدر ديدى (أفلم ينظروا الى
السماء فوقهم كيف بنيناها وزيناها ومالها من فروج) كافر لر الله
تعالىنك قدرتندن فوقلرنده سمايه نظر ايتزلرميكه بز انى عماد سز رفع
ايدوب كواكبيله نيچه تزئين ايتدك حالبو كه انده شقوق وخلل يوقدر
هر عبيدن سليمه در (والارض مددناها والقينا فيها رواسى وانبتنا
فيها من كل زوج بهيج) وارضى بز بسط ايتدك واول ارض اوزره

جبال ثوابت القاء ايتدك وانه اصناف نباتاتدن بتوردك كه حسنى بهجت ويرر
 (تبصرة و ذكرى لكل عبد منيب) الله تعالى اشبو اشياى خلق ايتديكه
 انك بدائع صنعنى تفكر ايدوب توحيد وطاعته رجوع ايدر هر عبده تبصره
 وموعظه اوله (ونزلنا من السماء ماء مباركا فانبتنا به جنات وحب الحصيد)
 وبز سمان شول منافعى كثيره ماء ايندروب انكله اشجار واثمار وبر وشعير
 وسائر بچيلور حبوب بتوردك (والنخل باسقات لها طلع نضيد) ودخى نخل
 طوال ويا مستويه بتوردك انك ثمر كثير ويا طلع متراكبى واردر (رزقا
 للعباد) تاكه اشياء مذكوره عباده رزق اولوب انكله تعيش ايدلر
 (واحيينا به بلدة ميتا) واول ماء ايله شول نماسز بلدة جديبه ي احياء ايتدك
 (كذلك الخروج) ايمدى اول احياء كى يوم قيامتده سزى قبور دن
 چيقاررز * زوايت اولنديكه يوم قيامتده ريوزنده حياتده كسه قاليوب
 ارض خاليه ميته اولديغنده الله تعالى قرق كون منى رجال كى سمان
 يغمور ياغدروب يره كيردره انكله موتاك لحوم وعروق وعظامن بتوره
 بعده دير كوروب ريوزنه چيقاره (كذبت قبلهم قوم نوح واصحاب الرس
 واثمود وعاد وفرعون واخوان لوط واصحاب الايكة وقوم تبع) يا محمد
 مكه نك كفارندن اول اقوام ككثيره رسوللر ينى تكذيب ايتديلر كه
 اول جله دن قوم نوح واصحاب رسدر كه يمامه يه قريب بربر عندنده مقيم
 برجاعت ايدى وصالح عليه السلام قومى ثمود وهود عليه السلام
 قومى عاد وفرعون وقومى قبط ولوط عليه السلام قومى وشعيب عليه
 السلام قومندن اصحاب ايكه وقوم تبع كه ذكرى سورة حجرده
 وسورة دخانده يكدى (كل كذب الرسل فحق وعيد) انلك هر برى
 ويا انلردن برجاعت ويا جيعى رسوللر ينى تكذيب ايتديلر ايله اولسه انلره
 عذابم واجب اولدى ايمدى سندنخى يا محمد اول رسوللر كى قومك اذى
 وتكذيبه صبر ايلكل (أفعيينا بالخلق الاول بل هم فى لبس من خلق
 جديد) بز اول مرده خلقدن عاجزى اولدككه ثانى مرده اعاده دن
 عاجز اوله وز يعنى اول لاشى ايكن وجوده كتوروب احياء ايتديكمز كى
 انلرى بعد الاماته احياءه دخى قادر اولورز انلر بزم خلق اوله قدرتمزى انكار
 ايتزلر بلكه انلر خلق مستأنفده خلط وشبهه ايدرلر (ولقد خلقنا
 الانسان ونعلم ما توسوس به نفسه ونحن اقرب اليه من حبل الوريد)

هر انسانى بز خلق ايتدك قلبه خطور ايدنى بيلورز بزم انسانى علمز شاه
 طمرينك اكا اولان قربندن زياده در زيراكه انسانك ابعاض واجزائى
 بعضى بعضنه حجاب اولور اماكه بزم علمزه هيچ برشى حجاب اولز
 (اذ يلقى المتلقين عن اليمين وعن الشمال قعيد) اول الله تعالى انسانك
 هر حاله علمى هر قريبدن اقربدر شول حينده كه انك صاغنده وصولنده
 قاعد ايكي كاتب ملكريكه انك خير وشر اعمالنى يازارلر اشبونده ايدان
 واردر كه اول الله تعالى كاتب ملكرينك استخفاظندن غنيدر زيراكه اول
 انلردن اعلمدر وانلره خفى اولان شينه اول مطلعدر لكن حكمتى مقتضاسنجه
 انلك يازمسنده عبدى معصيتدن تبسيط اولور واعمالك اعتبار وضبطنده
 جزاى تايد اولور ويوم قيامتده حجت الزامنى تا كيد ايدر اولور (مايلفظ
 من قول الا ليه رقيب عتيد) بر قولكه انسان انى تلفظ ايدر الا انك
 عندنده حاضر ايكي ملك واردر كه ثواب وكره عقاب ايحاب ايدر قول
 وفعلى برى خير لوسن برى شر لوسن يازار * حديثه كلديكه عبدك حسناتن
 يازان ملك سيئاتن يازان ملك اوزره اميندر عبد حسنه ايشلسه حسناتن
 يازان فى الحال انى اون حسنه يازار اماكه عبد سيئه ايشلسه سيئاتن يازان
 ملكى اول حسناتن يازان ملك يدى ساعته دكين تاخير ايتديرر شول
 رجائله كيم اول سيئه ايشلين عبد تسبيح ويا استغفار ايدو وانكله اول سيئه
 محو اولوب كيده (وجاءت سكرة الموت بالحق ذلك ما كنت منه تحيد)
 يا انسان سكا موتك غمزه وشدتى كلديكه اول انسانى غشى وعقلى اوزره
 غلبه ايدر برحاله كيم انكله رسوللر خبر ويرديكنك حقيقتى ايرر حتى كه
 سعادت وشقاوتدن مال امرينى آشكاره كورر اول موتدر كه اندن ميل وهرب
 ايدر اولدك (ونفخ فى الصور ذلك يوم الوعيد) وموتدنصكره صوره نفخه
 بعث اولنه كه كفارك انده عذابلرينك تحقيق كونيدر (وجاءت كل نفس معها
 سائق وشهيد) اول كونده هر نفسك بيله سنجه ايكي ملك اولور برى انى سوق
 ايدر وبريسى انك علمنه شهادت ايدر ويا خود بر ملك اشبو ايكي وصفى جمع
 ايدر ويا خود سائق انك كاتب سيئاتى وشهيد ايسه انك كاتب حسناتيدر ويا خود
 سائق نفسى ويا قريبنيدر وشهيد ايسه انك جوارح ويا اعماليدر (لقد كنت
 فى غفلة من هذا) كافرا هو ال قيامتى كورديكنده اكا دينور كه سن بو كوندن دنيا ده

غفلتده ايدك رب تعالى بي ورسولني تصديق ايتزدك (فكشفنا عنك
غطاءك فبصرک اليوم حدید) الان سندن امور آخرته حاجب غطاکی
کشف ايتدك اشبو کونده بصرک نافذدر دنياسده انکار ايتديکي بونده
کوررسن وياخود خطاب پيغمبريمز صلى الله عليه وسلمه يعني يا محمد سن
امور دياتندن غفلتده ايدك وحی و تعليم قرآنله سندن غطاء غفلتي کيدرديک
اويله اولسه ناسک کورمداکاري بي کوررسن و بيلداکاري بي بيلورسن (وقال
قرينه هذا مالدی عتيد) هر انسان اوزره موکل ملک ديه که اشبو بنم
عندمده مکتوب و حاضر اولاندر ويا کافرك قريني شيطان ديه که اشبو بنم
عندمده و ملکهده حاضر در اغواء و اضلالله اولکه جهنم ايجون اني
تهيه ايتشن (ألقيا في جهنم کل کفار عتيد) الله تعالى سائق و شهيد
ويا خزنة ناردن ايکي ملکه ويا برملکه ديه که جهنمه براغک هر کافر يکه
الله تعالىنک و خدايتن انکار ايدوب حقندن اعراض ايدر (مناع
للخير معتد مريب) مالنک زکاتني و برمز وغيره ظلم ايدر والله تعالىدن
ودين اسلامده شک ايدر (الذي جعل مع الله الها آخر) که اول
الله تعالى به الهه آخري اشراک ايدر (فألقياه في العذاب الشديد) ايمدی
ايکيکز اني ناردده عذاب شديد القاء ايدك (قال قرينه ربنا ما طغيته ولكن
كان في ضلال بعيد) کافر قريني شيطان حقنده ديه که يارب بنی بواضلال
ايتشدی شيطان ديه که يارب بن اني اضلال ايتدم زيرا بنم اکا قوتيم
يوغیدی بلکه اول کندی برضلاله دوشديکه اول اني حق و ايمانندن بعيد
ايتدی (قال لا تختصموا لدي وقد قدمت اليكم بالوعيد) الله تعالى کافر
و شيطانه ديه که بنم عندمده اختصاص ايتکز زيرا که بن سزه کتابلرمده
ورسوللرم لسانده طغيان اوزره و عيدي تقديم ايتشيدم (ما يبدل القول
لدي وما انا بظلام لاعبيد) بنم ثواب ويا عقابله اولان وعدمه خلف اولمز
و بن عيده ظلم ايدر دکل ذنبسز هيچ کسه به عذاب ايتزم (يوم نقول
لجهنم هل امتلأت و تقول هل من مزيد) ذکر ايت شول کونیکه جهنمه
ديه وزکه جن وانسندن سکا القاء اولنانله طولديکی جهنم ديه که يارب دخي
زياده وارميدر که القاء ايدرسک اکا وسم اولور * پيغمبريمز صلى الله عليه وسلم
ايدرجن وانسندن کفاري جهنمه فوج فوج براغدر جهنم ايسه انلره غيظندن
زياده طلبندن زائل اوليه حتی رب العزه اکا قدمن وضع ايدوب عزتک

(حقيچون)

حقيچون يارب کفايت ايدر ديه اويله اولسه بعضي بعضنه ازواء ايده
اما که جنتده خالی مکان قالوب الله تعالى برنوع خلق ايجادندنصکره انلري
انده اسکان ايده (وازلفت الجنة للمتقين غير بعيد) و جنت متقيله تقريب
اولنوب اول انلره بعيد اوليه دخوللرندن اول اسکا نظر ايدلر انلره
دينله کيم (هذا ما توعدون لكل اواب حفيظ) اشبو کوردیککز جنت
شول السنة رسل ايله وعد اولناندر هرکسه به کيم الله تعالى به رجوع
ايدوب حدوديني رعايت ايتش اوله (من خشى الرحمن بالغيب وجاء
بقلب منيب) که اول الله تعالى بي کورممشکن اندن قور قوب امرينه
اطاعت ايده ويا خلوتنده کسه کور مزکن الله تعالى به قلب خالصله
اطاعت ايده ذکر اولنان او صافله موصوف کسه لره دينور که (ادخلوها
بسلام ذلك يوم الخلود) هر مخوفدن سالم اولديغکز حالده ويا الله تعالى انلره
ويا انلر بری برلرينه سلام ويرر اولدقلى حالده جنته کيرک اشبو دخول
سزه يوم دائمدر سزه اندن خروج يوقدر (لهم ما يشاؤون فيها ولدنيا
مزيد) انلر ايجون اول جنتده تمنی ايتدکاري واردر ومع ذلك اندن
زياده شول بالرينه خطور ايتدک و کوزلر کورمداک و قولالقر ايتشدک انلر
ايجون کرامات واردر دينلديکه انکله مراد الله تعالىنک جمال با کالني
کورمکدر (وکم اهلکنا قبلهم من قرن هم اشد منهم بطشا فنقبوا في البلاد
هل من محيص) اهل مکهدن اول بزقرون کسیره اهلک ايتشنر که انلر
قوتده اهل مکهدن اشد ايديلر موتدن حذر ايله خرق و تصرف ايتديلر
و حجری نقب ايدوب محفوظ اولمق ايجون بيت ايتديلر الله تعالىدن ويا موتدن
ملجأ بولديلر می ويا اهل مکهدن اسفارلرنده بلاد قرون ماضيه به اوغراديلور
انلر هيچ کسه بي الله تعالىنک عذاب واهلا کندن قور تلمش کورديلر ميکه
کنديلر ايجون دخي انک مثلي توقع ايدلر (ان في ذلك لذكری
لمن کان له قلب او السمع و هو شهيد) اشبو سوره ده ذکر اولنانده
تذکر و موعظه واردر اول کسه به که حقايقده تفکر ايدر قلب واعی
صاحبی اوله وياخود سمعني انک مواعظي استماعنه القاء ايده حالبوکه ذهني
حاضر اولوب معانيسني فهم ايدر ويا صدقنه شاهددر که ظواهلر يله متعظ
وزواجريله منزجر اوله (ولقد خلقنا السموات والارض وما بينهما
في ستة ايام) سموات وارض وما بينهما بي بزالتی کونده خلق ايتدک روايت

اولنديکه يهودلر پیغمبر یمز صلی الله علیه وسلم کلوب دیدیلر که بزه خبر ویرکه
اشبو الی کونده الله تعالی نه اشیایی خلق ایتدی دیدیکه یوم احدایله یوم
اثینده ارضی خلق ایتدی و یوم ثلاثه جبالی و یوم اربعه مداین و انهار
واقواتی خلق ایتدی و یوم خیسده یوم جمعه نك اوج ساعتیه ذکین سموات
وملائکته بی خلق ایتدی و اول اوج ساعتک اولکیسینده آجالی
وایکنجیسینده آفتی و اوچنجیسینده آدمی خلق ایتدی دیدیلر که صدق ایتدک
اگر اتمام ایدرسک دیدیکه اتمامی ندر دیدیلر که یوم سبتیه استراحت
ایدوب عرش اوزره استلقاء ایتدی اویله اولسه انلرک اول قولنی رد ایچون
(و مامسنا من لغوب) حالبوکه انده بزه تعب و اعیادن برشی اصابت ایتدی
دیو پورلدی زیرا که استراحت ایدر اول کسه که اکاتعب و عی ایرر
الله تعالی ایسه مخلوقین صفاتندن منزهدر (فاصبر علی ما یقولون) ایمدی
یا محمد مشرکینک بعضی انکارلرینه صبر ایت اول الله تعالی که اعیاسر
کاشانک خلقنه قادر اولدی قادر اولور که انلری امانه دنصکره یوم قیامتده
احیاء ایدوب انلردن انتقام ایده و یاخود یهودک کفر و تشبیهنه صبر ایت
(و سبح بحمد ربک) و ربک جل شانہ نك سکا انعام ایتدیکی اصابت
حق و سائر نعمتی اوزره حامد اولدیغک حالده انی عجزدن و تشبیهی
ایجاب ایدر شیئدن تنزیه ایت (قبل طلوع الشمس و قبل الغروب)
شمسک طلوعندن اول صلاة فجری و شمسک غروبندن اول صلاة ظهری
و عصری ادا ایت (ومن الليل فسبحه) و کجه نك بعضنده مغرب و عشایی
ادا ایت (و ادبار السجود) و صلاة مفروضه اعقابنده نوافل مسنونہ بی
ادا ایت و یاخود عشادنصکره صلاة وتری ادا ایت * دینلديکه (ومن الليل)
ایله مراد مغرب و عشا و تهجد در دینلديکه (ادبار السجود) ایله مراد
صلاة مغرب دنصکره قلنور ایکی رکعت سنندر و یاخود صلوات مکتوبه اردنجه
تسبیح ایدلسیدر پیغمبر یمز صلی الله علیه وسلم ایدر برکسه که هر صلوات
مکتوبه اردنجه اوتوز اوج کره (سبحان الله) و اوتوز اوج کره (الحمد لله)
و اوتوز اوج کره (الله اکبر) دیه بعده برکره (لا اله الا الله و حده لا شریک له
له الملك وله الحمد وهو علی کل شیء قدير) دیه الله تعالی جیع خطالرینی یارلغیه
اگرچه دریانک کوبوی دکلو ایسه ده ابوهریره رضی الله عنه ایدر صحابه نك
فقراسی پیغمبر یمز صلی الله علیه وسلم دیدیلر که یارسول الله اهل دثور

(دثرلی)

دثرلی سبیلده درجات رفیعده و نعيم مقیمده نائل اولدیلر زیرا که بزم کبی
نماز قیلورلر و بزم کبی جهاد ایدرلر و مع ذلک بزم قادر اولدیلر بزم فضول
اموالرینی انفاق ایدرلر دیدیکه سزه بر عمل خبر ویره یکه انکله سزدن
اول یکن کسه لره ایره سز و سزدنصکره کلنلری کجه سز ایشلدیلر کز عمل
ثوابن بولمیه مکر اولکه سزک عملکز مثلن ایشلیه ایمدی هر صلاة
مکتوبه اردنجه اوتوز اوج کره تسبیح و تحمید و تکبیر ایدک (واستمع
یوم ینادی المناد من مکان قریب) یا محمد احوال قیامتدن سکا خبر
ویریلنه القاء سمع ایت شول کونکه انده اسرافیل و یا جبرائیل علیهما السلام
مکان قریب دنکه اول صخره بیت المقدسدر اول سمایه سائر ارضدن
اون سکر میل اقریدر ندا ایدوب دیه که ای عظام بالیه و لحوم مفرقه
و شعور مفرقه الله تعالی سزه امر ایدر که فصل قضاء ایچون اجتماع ایده سز
اویله اولسه اول ندایی جیع خلق علی السویه ایشیدوب امر الهییه انقیاد
ایدلر (یوم یسمعون الصیحة بالحق ذلک یوم الخروج) شول
کونده که نفخة ثانیه بی بعثله ایشیدلر اشبو قبوردن خروج کونیدر (انانحن
نحی و نمیت و الینا المصیر) بز دنیاده ناسی احیاء و امانه ایدرز آخرتده جزا
ایچون مرجعلری بزه در (یوم تشق الارض عنهم سراعا ذلک حشر
علینا یسیر) اول کونده ارض یاریلوب ناس قبرلندن مسرعین
اولدقلری حالده خروج ایدلر اشبو بعث و جعدر که اول بزه آساندر اول
ایسه آسان اولمز الا اکا که لذاته عالم قادر اولوب انی هیچ برشان شان
آخردن اشغال ایتییه (نحن اعلم بما یقولون) یا محمد کفار مکه نك سنی
تکذیبده دیدکلرینی بز بیلورز (وما انت علیهم بحسار) سن انلرک
اوزره مسلط دکلسنکه انلری اسلامه جبر ایده سن بلکه سن انجق داعی
و مذکر سن (فذكر بالقرآن من یخاف وعید) ایمدی قرآنله وعظ و تذکر
ایت هر کسه یه کیم بنم دنیاده و آخرتده کی عذابدن خوف ایده

سورة الذاریات وهی ستون آیه مکیه

بسم الله الرحمن الرحيم

(والذاریات ذروا) شول ریاح حقیچونکه تراب و غیر اشیایی صاورر
(فالحاملات وقرا) و سحابلر حقیچونکه امطاری کوتورر و یاریاح که سحابی

کو تورر ویا نساء که بطن پرندۀ اولاد لرین کتورر لر (فالجاریات بسرا)
و سفینه لر که دریاده سهولتله یورر (فالقسمات امرا) و ملائکه که
امطار و ارزاق و سایر اموری تقسیم ایدر * الله تعالی اشبو اشیاء ایلله اقسام
ایتدی زیرا که هر بری انک کمال صنع و قدرته دلالت ایدر (انما توعدون
لصادق) سزک وعد اولندیغکز ثواب و عقابک و قوعی حقدر (وان الدین
لواقع) و حساب و جزاء واقعدر (و السماء ذات الحبک) سماء حقیقونکه
اول طرائق محسوسه صاحبیدر که اول مسیر کوا کبدر ویا طرائق معقوله لیدر که
اکا نظار سلوک ایدوب اندن معارفه توصل ایدر لر (انکم لفی قول
مختلف) یا اهل مکۀ سز بزه رسولز ویا قرآن حقنده قول متناقضه سز که
رسولی شاعر و ساحر و کاهن و قرآنی شعر و سحر و کهانۀ دیر سز
بو حالت ایسه حیرت شدیده و جهالت غلیظه دن ناشیدر (یؤفک عنه
من افک) اول رسول ویا قرآندن صرف اولنور اول کسه که علم الالهده
هدایتدن مصروف اوله (قتل الخراصون) قول مختلف اصحابدن کذابینه
لعنت اولسون (الذین هم فی غمره ساهون) که انلر آخرت امرندن
جهلده در کندیلرله مراد اولان ایمان و طاعتدن غافلدر (یسئلون
ایان یوم الدین) دیر لر که یوم جزانک و قوعی نوقتهدر (یوم هم علی النار
یفتنون) شول کونده اولور که انلر نارده احراق اولنور و انلره دینور که
(ذوقوا فنکم هذا الذی کنتم به تستعجلون) تکذیبکزر جزاسنی ذوق ایدک
اشبو شول عذابدر که سزانی دنیاده استعجال ایدر دیکز (ان المتقین فی جنات
و عیون) الله تعالی دن قورقوب مخالفتدن صافسانلر آخرته جنت
بستانلرنده و پیکارلرده اولور (آخذین ما آتاهم ربهم) رب لری جل شانۀ نک
انلره ویردیکی ثوابی سرورله قبول ایدر لر زیرا که اول غایت جودنده در
انده رد اولنور شیء یوقدر (انهم کانوا قبل ذلک محسنین) زیرا که انلر اندن
اول دنیاده عملارین کوچک ایدر لر دی (کانوا قلیلا من الابل ما بهجمعون)
انلر کچمهده او یودق لری قلیل ایدی اکثرینی ذکر و صلاته پچور لر دی
(وبالاسحار هم یستغفرون) و انلر قلت نوم و کثرت تهجد لریله بیله
سحر وقتنه ایردکارنده استغفار مشغول اولور لر دی کانه اول کچمه لرینی
جرائمه پچور لر دی * دینلدی که یار سو الله انده نیچه استغفار ایدیلور
دیدیکه (اللهم اغفر لنا وارحمنا و تب علینا انک انت التواب الرحیم)

(وفی)

(وفی اموالهم حق للسائل والمحروم) و انلرک ماللرنده طالب نفع ایچون
و متعفف ایچون نصیب واردر که انی الله تعالی به تقرب و ناسه اشفاق
ایچون نفسلری اوزره ایجاب و الزام ایدر لر (وفی الارض آیات للموقنین)
طریق هدایه سالك موحد ایچون ارضده الله تعالی نک وحدانیتنه
علامات و دلائل واردر که عیون باصره ایلله بحسار و انهارینه و جبال
و اشجارینه و کیفیات و خواص و منافعه اختلاف اجزاسنه نظر ایدنلر
صانعک وجود و علم و قدرت و ارادت و فرط رحمت یلور و انکله ایمانلرنده
یقینلری زیاده اولور (وفی انفسکم) ودخی کندیکزده کذلک الله تعالی نک
وحدانیتنه علامات و دلائل واردر زیرا عالمده برشیء یوقدر الا انسانده
انک نظیری واردر که اول دلائله انک غناسن ویرر و مع ذلک بر نیچه
هیئات نافعۀ و مناظر بهیه و ترکیبات عجیبه و افعال غریبه به تمکنده
و صنایع مختلفه بی استنباطده و کالات متنوعه بی استجماعده متفرددر
(أفلا تبصرون) نظر اعتبارله نظر ایتزمیسز که صنعندن صانعه
استدلال ایده سز انکله موتکزدن صکره کیر و احیایه قدرتمزی تیقن ایده سز
(وفی السماء رزقکم و ما توعدون) رزقکزه سبب اولان یغور و وعد
اولندیغکز ثواب سماءدر * زیرا که جنت سماء سابعه نک فوقده
و عرشک تحتده در و یا خود اعمال و اعمالک ثوابی سماءه تقدیر اولمشدر
(فو رب السماء و الارض انه لحق مثل ما انکم تنطقون) سماء و ارضک
ربی جل شانۀ نک حقیچون ذکر اولنان آیات و رزق و وعد حقدر انده
رب یوقدر تکیم سز کندی لسانکزله نطق ایدوب غیرک لسانیلله نطقه
قادر اولمز سز کذلک هر بریکز قسمت اولنان رزقنی اکل ایدر غیرک رزقنی اکلنه
قادر اولمز سز (هل اتیک حدیث ضیف ابراهیم المکرمین) یا محمد سکا ابراهیم
علیه السلام اضیافتک حدیثی کلدیمیکه انلر اون ایکی ملک و یا اوج ملک
ایدیکه انلر جبرائیل و میکائیل و اسرافیل علیهم السلام ایدیلر انلر الله تعالی
عندنده و یا ابراهیم علیه السلام عندنده کرامتلور ایدیلر که انلره ابراهیم علیه
السلام و زوجه سی خدمت ایتدیلر که (اذ دخلوا علیه فقالوا سلاما قال
سلام قوم منکرون) شول وقتن که انلر ابراهیم علیه السلامه داخل
اولوب سلام ویردیلر ابراهیم علیه السلام دخی رد سلام ایدوب نفسنده
دیدیکه بونلر بزم بیلمدیکمز کشیلدر زیرا که اذنسز داخل اولدیلر

(فراغ الى اهله فجاء بجعل سمین) انلرك خبرنسر اهلنه واروب برسمز بوزاغو
بریانله كلدی ایددی مضیفك آدابنددرکه قرایه مبادرت ایده تا که ضیف
انی کف ایتیه ویا اول طعامه منتظر اولیه (فقربه الیههم قال ألا تأکلون)
ابراهیم علیه السلام اول بریانی اوکارینه قودیکه اکل ایده لر انلر
ایسه اکل ایتدیلر ابراهیم علیه السلام انلره اکل ایتزمیسر دیدی
(فأوجس منهم خيفة قالوا لا تخف) ابراهیم علیه السلام انلرك اکلدن
اعراضن کوریکچک انلردن خوفی اضمار ایتدی ویا نفسنه واقع اولدیکه انلر
ملائکه اولوب عذاب ایچون کلش اوله لر دیدیلر که بزدن خوف ایتمکل
بز الله تعالینک رسولاری بز بعده جبرائیل علیه السلام اول بریانی
قنادهله مسح ایدیچک فی الحال حیات بولوب اناسنک یاننه کتدی
(وبشروه بغلام عليم) ابراهیم علیه السلامه اسحاق علیه السلام
نام اوغلنک وجوده کلمسيله تبشیر ایتدیلر که اول بالغ اولدیغنده
علمده کامل اولور (فأقبلت امرأته فی صرّة فصکت وجهها وقالت
عجوز عقيم) مکر ابراهیم علیه السلامک زوجہ سی ساره برزایه ده
طوروب انلره نظر ایدردی تبشیرلرین ایشیدیکچک ولوله ایتدی و تعجبنده
نساء عادی اوزره یوزینه لطمه اوره رق بیتنه اقبال ایتدی بن برعجوز
عقیم ایکن شمدنصکره طوغریم دیدی (قالوا کذلک قال ربک انه
هو الحکیم العليم) اول ملائکه دیدیلر که اشبو بز تبشیریمز کی ربک
جل شانه دیدیکه سنک بر ولدک اولور امرنده حکیمدر کبرک حالنده
ولدک اولمسيله حکم ایدر علیمدرکه خلقنک سربنی وولدنک وقتنی بیلور
(قال فما خطبکم ایها المرسلون) ابراهیم علیه السلام انلرك ملائکه اولدیغنی
بیلچک انلره دیدیکه ای مرسلر شانکزندر نه امر ایچون کلوبسنز زیرا انلرك
مجتمعین کلری دکل الا برامر عظیم ایچوندر (قالوا انا ارسلنا الی قوم مجرمین)
دیدیلر که بز برقوم مجرمینه کوندرلشنز که انلر قوم لوطدر (لنرسل
علیهم حجارة من طین) تا که بز انلر اوزره بالیچقدن دوزیلوب آتشد
پشرلش حجاره ارسال ایده وز (مسومة عند ربک للسرفین) که اول
ربک جل شانه عننده شول فجورده حدی تجاوز ایدنلر ایچون حجاره نلک
هر بری شول انکله هلاکی مقدر شخصک اسميله علامتلو اولدیغنی حالده

(فاخرجنا)

فاخرجنا من کان فیها من المؤمنین) واول قوم لوط قراسنده ساکن
مؤمنلری انلرك اراسندن چیقاردق (فا وجدنا فیها غیر بیت من المسلمین)
انده ایسه مسلمیندن بریت اهلندن غیری کسه بولمق که انلر لوط علیه
السلامک اهل بیتی اون اوچ کسه ایدیلر * بودیلدرکه ایمان واسلام
واحد اوله ویاخود انلر اول ایکی وصفی جمع ایتش اوله لر انک ایکیسی شیء
واحد دکلدر دین قولی اوزره (وترکنا فیها آية للذین یخافون العذاب
الالیم) قوم لوطک قراسی موضعنده علامت وعبرت ترک ایتدک که اول
انلرك اوزرلرینه ارسال اولسان اعمار مسومهدر ویا ماء اسود منتدر
شول کسهلره که الله تعالینک عذاب الیمندن خوف ایدرلر (وفی موسی
اذ أرسلناه الی فرعون بسلطان مبین) موسی علیه السلامک شان
وخبرنده کذلک انده ایسه عبرت ترک ایتدک که بزانی فرعونیه یدوعصاکی
حجت واضحه ایله ارسال ایتدک (فتولی برکنه وقال ساحر اومجنون)
فرعون ایسه جمیع جنودیه ایماندن اعراض ایدوب دیدیکه اول ساحر
ویا مجنوندر (فاخذناه وجنوده فنبذناهم فی الیم وهوملیم) بزاول فرعونی
وجنودینی اخذ ایدوب جمیعنی دریاه غرق ایتدک حالبوکه اول دعوائی
ربوبیت و تکذیب رسولدن کندویه لوم اولنور شیئله کلوبدر
(وفی عاد اذ ارسلنا علیهم الريح العقيم) وهود علیه السلامک قومی
عادی اهلاکزه دخی آیت وعبرت ترک ایتدک که انلرك اوزره ریح عقیم
ارسال ایتدک انده نه خیر ونه برکت واردر زیرا اول ریح اهلاکدر
(مانذر من شیء انت علیه الاجعته کلریم) اول انلرك انفس وانعام
واموالارندن هر نه شیءه مرور ایتدیه انی ترک ایتوب شیء هالک بالی کی
قیلدی (وفی ثمود اذ قیل لهم تمتعوا حتی حین) وصالح علیه السلامک
قومی ثمودی دخی اهلاکزه آیت وعبرت ترک ایتدک که انلره صالح
علیه السلامک لسانیه دینلدیکه قحان ناقه ی ذبح ایتدیلر آجالکز اوچ
کون انقضاسنه دکین داریکزه معیشت ایدک (ففتوا عن امر ربهم
فاخذتهم الصاعقة وهم یظنون) انلر ایسه الله تعالینک امرینه
امثالدن استکبار ایتدیلر اکا بنساء اوچ کوندنصکره انلری عذاب اخذ
ایتدی حالبوکه انلر نهارین اول عذابه نظر ایدرلردی (فا استطاعوا
من قیام وماکانوا متصیرین) اول عذابک نزولی عننده نهوضه قادر

بع (۱۲)

اولیوب حتی هلاک اولدیلر واندن امتناع ایدر دخی اولدیلر (وقوم نوح من قبل انهم كانوا قوما فاسقین) اشبو ذکر اولسان اقوامدن اول نوح قومی بزاهلاک ایتدک که انلر کفر وعصیانله استقامتدن خارجین ایدیلر (والسماء بنیناها باید وانا لموسعون) بزسمایی قوت و قدرتمزله خلق ایتدک و بز قادرز که سماء وارض بینی توسیع ویا اول ایکیمی بیننده اولان خلغمزه رزقی توسیع ایده رز (والارض فرشناها فعم الماهدون) وارضی بزسر پگون بسط ایتدک که اوزرنده قرار ایده سز بز نه کوچک ماهدونز (ومن کل شیء خلقنا زوجین لعلکم تذکرون) هر شیئدن بزایکیشم نوع خلق ایتدک سماء وارض شمس وقرلیل ونهار بر و بحر سهل و جبال شتاء و صیف جن و انس ذکر واثی نور و ظلت ایمان و کفر سعادت و شقاوت حق و باطل حلو و مرکی تا که تذکرایدوب تعدد احوال ممکناتدن ایدیکنی بیله سز و واجب الذاتک تعدد و انقسامی قبول ایتز ایدیکنی تیقن ایده سز (فقرّوا الى الله انی لکم منه نذیر مبین) ایمدی الله تعالی به ایمان و توحیدله و طاعتله ملازمته عذابندن رجته قاچک که بن سزی انک شرک وعصیان اهلچون اعداد ایدیکی عذابندن معجزات ظاهره ایله تحذیر ایدرین (ولا تجعلوا مع الله الها آخر انی لکم منه نذیر مبین) الله تعالی به الوهیتده هیچ برشی اشراک ایتکز که اول اقرار اولنمی واجبک اعظیمدر که بن سزی اشراکدن آفاتنی بیان ایله تحذیر ایدرین (کذلک ما اتی الذین من قبلهم من رسول الا قالوا ساحر او مجنون) یا محمد کفار مکه سنی تکذیب ایدوب ساحر و مجنون دیو و صفیری کی اندن اول پکن امتلره هر بار که بر رسول کلسه انلر انی تکذیب ایدوب ساحر و جنونله وصف ایدرلردی (اتوا صوابه بل هم قوم طاغون) یوخسه انلرک اول پکنلری صکره کلنلرینه و صیتمی ایتدیلر حتی که جمعی اول قول اوزره اتفاق ایتدیلر بلکه اول قولی بری برلرینه و صیتله دکلدر ارالرنده زمان بعید اولدیغیچون بلکه انلری اول قول اوزره جمع ایدن طغیانده مشارکتلیدر (فتول عنهم فانت بلوم) ایمدی سن انلرکه مجادله دن اعراض ایت زیرا که سن انلری کرارا دعوتکدنصکره انلر کفرلری اوزره اصرار و عنادلرین

(آرتوردیلر)

آرتوردیلر اولیه اولسه تبلیغده جهدی بیلدنصکره انلرک اعراضی اوزره لوم اولنمزنسن (وذكر فان الذکری تنفع المؤمنین) و تذکیر و وعظی ترک ایتیموب ایلکل زیرا که اول نفع ایدر انلره که الله تعالی ایمان تقدیر ایتش اوله و یا مؤمن اوله اول انلرک بصیرتن آرتورر (وما خلقت الجن والانس الا ليعبدون) بن جن و انسی خلق ایتدکمه انلره بکا عبادت ایدک دیو امر ایتدم و عبادتمه انلری دعوت ایتدم و یا انکچونکه بنی بیلهلر * زیرا که اول انلری خلق ایتسه وجود و وحدانیتی بیلنمزدی و انکچونکه بکا خضوع و تذلل ایدلر ایمدی جن و انسدن هر مخلوق الله تعالینک قضا سنه خاضع و مشیتنه متذللدر هیچ بری ماخلق له سندن خروجه مالک اولمز * و یا انکچونکه بنی توحید ایدلر امامؤمن شدت و رخاده انی توحید ایدر اما کافر انحق شدت و بلاده توحید ایدر یوخسه نعمت و رخاده دکل (ما ارید منهم من رزق وما ارید ان یطعمون) بن انلردن دیزین که خلغمدن برینی و یا کندیلرینی ارزاق ایدلر و دخی دیزینکه خلغمدن برینی اطعام ایدلر الله تعالی اطعامی کندویه اسناد ایتدی زیرا که خلق انک عبالیدر اولکه برکسه نک عیالنی اطعام ایده انک کندویی اطعام ایتش کبیدر * اشبو آیتله مراد بیاندرکه الله تعالینک عبادیه شانی ساده نک عبیدیه اولان شانی کی دکلدر زیرا که ساده معاشلری تحصیلنده عیدلرندن استعانه ایدرلر اما که الله تعالی عالمیندن غنیدر (ان الله هو الرزاق ذو القوة المتین) الله تعالی خلقه رزق و یرمکه بلیغدر قوت و قدرتمده متیندر ایمدی امر اولدیغکز شیئه اشتغال ایدک که فوز و فلاحه ایره سز زیرا بن سزی انک تحصیلنده مانع شیئی تکلیف ایتزین (فان للذین ظلموا ذنوبا مثل ذنوب اصحابهم فلا یستعجلون) ایمدی شرک وعصیانله نفسلرینه ظلم ایدنلر ایچون عذابدن نصیب واردر انلردن اول هلاک اولان قوم نوح وعاد و ثموددن صاحبلرینک نصیبی کی ایمدی اول عذابه استعجال ایتسونلر که اول یوم قیامته تأخیر اولنوبدر (فویل للذین کفروا من یومهم الذین یوعدون) شدت عذاب و یاویل طموسی شول کافرله اولور که انکله وعید اولندیلرکه اول یادنیاده عذاب استئصال و یاخود یوم قیامته عذاب جهنمدر

سورة الطور وهى تسع واربعون آية مكية

بسم الله الرحمن الرحيم

(والطور) طور مدين ده طور سيناء نام جبلدر كه موسى عليه السلام انده الله تعالىنك كلامن ايشدى اول انكه اقسام ايتدى (وكتاب مسطور) ويازيلان كتاب حقيچونكه انكه مراد قرآندر وياحفظه نك يازديغير (في رق منشور) كه اول جلد مبسوطه يازيليدر (والبيت المعمور) وكعبه حقيچونكه اول حجاج ومجاورينه معموردر ويا انكه مراد سماء سابعده صراخ نام بيت شريفدر كه كعبه حيا لنده عرش خدا سنده در سماء انك حرمتى ارضده كعبه حرمتى كبيدر هر كونده اكا تمش بك ملك كلور ايچنده نماز قيلور بر كره اكا كيرن من بعد كيدوب اكا ايدا عودت ايتز ويا مراد قلب مؤمندر كه معروفه اخلاصله معموردر (والسقف المرفوع) عرش ويا سماء حقيچون (والبحر المسجور) بحر مملو ويا بحر محيط ويا بحر موقد حقيچون * روايت اولنديكه الله تعالى يوم قيامته بحارى نار قيلوب انكه جهنمى تسجير ايدر (ان عذاب ربك لواقع ماله من دافع) ربك جل شانك عذابى نازل وكاشدر انى دفع ايدر يوقدر چنانكه نزول ايده (يوم تمور السماء مورا) شول كونده كه سماء اهلنه دكر من دونمى كى دونه بر حيشيله كه اهلى خوفلرندن برى برلرینه قاريشه (وتسير الجبال سيرا) وطاعلر مكانلرندن زائل اولوب هباء مشور اوله (فويل يومئذ للمكذبين) اول كونده شدت عذاب اول كسملره در كه دنيا ده رسولارى تكذيب ايتديلر (الذين هم في خوض يلعبون) كه انلر رسولارى استهزاء ايله باطله اشتغال ايدر لردى (يوم يدعون الى نار جهنم دعا) اول كونده انلر لارى بيونلرینه تيمور لنور وناصيه لرى اياقلىرینه بغلنور وعنقله يوزلرى اوزره باشلرى آشاغه نار جهنم دفع ايديلور چنانكه جهنم قريب اوله لر انلره دينور كه (هذه النار التى كنتم بها تكذبون) اشبو اول نارد كه سز انى دنيا ده تكذيب ايدر ديكز (أفسح هذا ام انتم لاتبصرون) اشبو كورديككز عذاب سحر ميدر زيرا كه سز وحيه سحر ديديكز بوايسه انك مصداق اولد بغي حيشيدن دلالت ايدر شئى كورمز ديكز تكيم دنيا ده انك حقيقتنه دلالت ايدر شئى كورمز ديكز (اصلوها فاصبروا ولا تبصروا سواء عليكم انما تجزون

(ما)

ما كنتم تعملون) ايمدى اول ناره كيرك كركسه انك عذابنه صبر ايدك وكركسه صبرا تيكز ايكي حالت سزده مساويدر ايداسزده اندن نجات يوقدر كه اول دنيا ده ايشلديككز شرك وتكذيبكز جزاسيدر كه اكا ايريشور سز (ان المتقين في جنات ونعيم) دنيا ده شرك وعصيانندن صاقنوب الله تعالى امرينه اطاعت ايدنلر يوم قيامته بوستانلرده وانواع نعمله تنعمده در (فاكهين بما آتاهم ربهم) رب تعالىنك جنتده ويرديكى كرامته سوينوب انكه تلذذ ايدر اولدقلى حالده (ووقبهم ربهم عذاب الجحيم) ورب تعالى انلرى نار جحيمدن حفظ وانى انلردن دفع ايده وانلره دينله كه (كلوا واشربوا هنيئا بما كنتم تعملون) جنتك الوان طعام وشربندن اكل وشرب ايدك كه انك عاقبتى تخمه وسقم اولسندن امن اوزره اولديغكز حالده شول اعمال صالحه سبيله كيم انى دنيا ده ايشلديكزدي (متكئين على سرر مصفوفة) انلر برى برلرنيك يانسه ديزلمش سررلر اوزره اتكاء ايدر اولدقلى حالده (وزوجناهم بحور عين) وبز انلره حور عين ازواج قيلورز (والذين آمنوا واتبعهم ذريتهم بايمان ألحقنا بهم ذريتهم) شونلر كه دنيا ده مؤمنلر اولوب اولدلرى ايمانله انلره اتباع ايتديلر بز اول مؤمنلره اولدلرني جنته دخوله الحاق ايدرز اكر مؤمنلر اولدلرى صغار ايكن فوت اولديسه عملده آباءلرینه ايرمديلر سده تا كه اول آباء انكه قريب العين اوللر اما كه كيرلر آباءلرینه الحاق اولنمى كندى ايمانلريله اولور يوخسه آباءلرنيك ايمانيله دكل (وما ألتناهم من علمهم من شئ) اول آباءك اعمالندن بر شئى نقص ايترز اولدلرني انلره الحاق سبيله (كل امرئ بما كسب رهين) هر كسه الله تعالى عندنده عملنه مرهوندر اكر عملى صالح ايسه كندوبى رهنيتدن قور تارر واكر عملى شرك ايسه كندوبى رهنيتدن قور تارمز نارد آيقور (وأمددناهم بقا كهة ولحم مما يشتهون) وبز انلره اشتها ايتدكلى فاكهه ولحمى زياده ايدرز اكر چه انك طلبن تصریح ايتزلر سده (يتنازعون فيها كأسا لا لغو فيها ولا تأثيم) جنتده انلر ارالنده خركأسلرني تعاطى ايدرلر انى شربلرى حالده لغو حديث سويلزلر واثم ايجاب ايدر فعلى ايشلزلر (ويطوف عليهم غلمان لهم كأسهم) لؤلؤ مكنون) وانلره مخصوص ممالك كأس خورين دور ايدلر كانه بياض وصفاده هربرى صدفده مصون انجودر اكا ايدى ناس

مس ایتمویدر * پیغمبر میز صلی الله تعالی علیه وسلم ایدر اهل جنتک منزلته
 ادناسی اول کسه در که خدامندن برینه ندا ایتد که لبیک دیوا کا بیک خادم
 جواب ویره پیغمبر میز علیه السلامه دینلدی که اهل جنتک خادم لری بو وصفده
 اولیحق کندیلر نه صفتده اولور * دیدیکه مخدوملرک خادم لری اوزره
 فضلی قرک لیله بدرده سائر کوا کب اوزره فضلی کیدر (و اقبل بعضهم
 علی بعض یتساءلون) بری برلرینه اقبال ایدوب دنیا ده کی احوال و اعمال لرندن
 سؤال ایدیشه لر (قالوا انا کننا قبل فی اهلنا مشفقین) دیه لر که بز دنیا ده ایکن
 اهلر اراسته الله تعالی به عصیانندن و یا عاقبتز امرندن خوف ایدردک
 (فن الله علینا ووقینا عذاب السموم) الله تعالی بزه رجعت و توفیقه فضل
 ایتدی و بز عذاب ناردن حایت ایتدیکه اول مسامه سمومک نفوذی کی
 نافذه در (انا کننا من قبل ندعوه انه هو البر الرحیم) که بوندن اول بز دنیا ده
 اکا عبادت ایدوب ناردن وقایه دیلردک زیرا که اول محسن و کثیر الرحه در
 (فذكر فانت بنعمة ربك بكاهن ولا تجنون) یا محمد مشرکینه تذکیر اوزره
 ثابت اول یوخسه انلرک سکا ساحر و شاعر و کاهن و مجنون دیدک لرینه مبالات
 ایتکل زیرا که سن ربک جل شانہ نک سکا نبوتی انعامنه جدا ایدمچیسن یوخسه
 کاهن و مجنون معامله سنی ایتزسن (ام یقولون شاعر نتر بص به ریب المنون)
 بلکه انلر دیرلر که اول شاعر در دهرک حوادث و صروفنه تربص ایده لکه
 انی هلاک ایده انک غیری شعر انک هلاک اولسی کی (قل تربصوا فانی معکم
 من المتر بصین) انلره دیکل که ایمدی سز بنم هلاک که تربص ایدک که بندخی
 سزک اهلاک کز تر بص ایده رین اولیه اولسه یوم بدرده سیفله اهلاک
 اولندیلر (ام تأمرهم احلامهم بهذا ام هم قوم طاغون) یوخسه انلره
 عقل لری اشبو قول متناقضله می امر ایدر زیرا کاهن فطنت و دقت نظر
 صاحبیدر مجنون ایسه مغلوب العقلدر بلکه انلر عناده مصر و حدی
 متجاوزلر در (ام یقولون تقوله بل لا يؤمنون) یوخسه انلر محمد قرآنی
 تلقاء نفسندن اختلاق ایتدی دیرلر بلکه انلر کفر و عناد لرندن اشبو مطاعنله
 رمی ایدوب ایمانه کلزلر (فلیأتوا بحديث مثله ان كانوا صادقين) اگر انلر
 محمد قرآنی تلقاء نفسندن اختلاق ایتدی دیملرنده صادقین ایسه لر اول
 قرآن مثلی بر حدیث مخلق کتورسونلر (ام خلقوا من غیر شیء

(ام)

ام هم الخالقون) یوخسه انلر خالق و مقدر سز خلق و تقدیر اولندیلر
 و یا خود عبادت و مجازاتندن لاشیء ایچون خلق اولندیلر اول اجلدن
 الله تعالی به عبادت ایتزلر و یا خود انلر کندیلرین خلق ایتش
 اولد قلدن الله تعالی نک امری اوزر لرینه واجب اولما مشدر
 (ام خلقوا السموات والارض بل لا یوقنون) یوخسه سموات و ارضی
 انلرمی خلق ایتدیلر اول اجلدن انلرک خالقنه عبادت ایتزلر بلکه انلر
 ایقان ایتزلر که سزی و سموات و ارضی کیم خلق ایتدی دیو سوال اولنسه لر
 دیرلر که الله تعالی خلق ایتدی اگرانی ایقان ایتسه لر اکا عبادتندن
 اعراض ایتزلردی (ام عندهم خزائن ربک ام هم المصیطرون) یوخسه ربک
 جل شانہ نک خزائن رزق انلرک عندنده میدر حتی که نبوتی دیلد ک لری
 کسه به ویره و یا انک خزائن علمی انلرک عندنده میدر که حکمت اقتضاء
 ایتدی کی کسه بی الوهیته اختیار ایده لر یوخسه اشیا اوزره غالبلر میدر
 دیلد ک لری کیفیت اوزره تدبیر ایده لر (ام لهم سلم یستمعون فیہ فلیأت
 مستمعهم بسلطان مبین) یوخسه انلرک ارتقاء ایده جک زردبانلر می
 واردر که اکا صعود ایدوب ملائکه کلامی و یا علم غیبندن انلره وحی
 اولناتی ایشیدوب زمان مستقبیلده اوله حق اموری بیللر ایمدی مستعملی
 حجت و اضحه ایله کلسون که اول انک استماعنی تصدیق ایده (ام له البنا
 ولکم البنون) یوخسه زعمک اوزره کراحت ایتدی کز بنات الله تعالی نک
 اولوب سز یکون بنون اوله (ام تسألهم اجرا فهم من مغرم مثقلون)
 یوخسه یا محمد تبلیغ رسالت اوزره انلردن اجر می استدک انلر غرم
 الترامندن استتقال ایدوب سکا اتباعندن زهد ایتدیلر (ام عندهم الغیب
 فهم یکتبون) یوخسه لوح محفوظ انلرک عندنده میدر مغیباتی انندن
 یازینورلر و یا خود محمد علیه السلامه خبر و یردیکی بعث و جزانک زعملرنجه
 اصلی اولدیغن انندن بیلورلر (ام یریدون کیدا فالذین کفروا هم المکیدون)
 یوخسه انلر سنی اهلاک ایچون مکر ایتدی دیرلر که اول دار الندوه ده
 محمد علیه السلامه اولان مکرلریدر ایمدی کافرلر کیدلرنده مغلوبین
 اولدیلر و یا خود کیدلرینک و بالیله جزالندیلر که اول یوم بدرده قتل
 اولمیلریدر (ام لهم اله غیر الله سبحانه الله عما یشرکون) یوخسه
 انلرک الله تعالی دن غیری الهی و ارمیکه انک عذابندن حراست ایده الله تعالی

انلرك اشراكندن ويا اشراك ايتدكاري شيك شركتندن منز اولدى
 (وان يروا كسفا من السماء ساقطا يقولوا سحاب مركوم) اكر انلر
 سمان اوزر يمزه قطعه لر دو شمينجه ايمانه كلرز ديدكلرند نصكره اوزر لر يمه
 تعذيب ايچون سمان قطعه دوشد يكن كور سدر فرط طغيان
 وعنادلرندن ديه لر كه اشو برى برينك اوزره مترام سحابدر كه بزى ارواء
 ايچون اينوبدر ديوب ايمانه كلمه لردى (فذرهم حتى يلاقوا يومهم الذى فيه
 يصعقون) ايمدى انلرى ترك ايتكه طغيانلرند لعب و خوض ايدلر
 شول كونه دكين كه انده صعقه ايدرلر كه اول نفخه اولى عندنده در
 (يوم لا يغنى عنهم كيدهم شيئا ولا هم ينصرون) اول كونده كيدلرى انلره
 بر شئي مفيد اولمز و انده نازل اولان عذابدن منع اولمز لر (وان للذين ظلموا
 عذابا دون ذلك ولكن اكثرهم لا يعلمون) شرك وكفرله نفسلر يمه ظلم ايدلرله
 عذاب ناردن اول عذاب واردر كه اول عذاب قبرددر ويا دنيا ده مؤاخذه در
 يوم بدرده اولان قتل ويدى ييل قحط كى لكن انلرك اكثرى انى بيلزلر
 (واصبر لحكم ربك فانك باعيننا) ايمدى يا محمد ربك جل شانكه انلره
 امهاله حكمنه ويا انلرك تكذيب وايداسنه صبر ايت كه سن بزم رعایتزده سن
 كفارك سكا ايتديكنى كوررز (وسبح بحمد ربك حين تقوم) مجلسكدن
 قيامك حيننده (سبحانك اللهم وبحمدك) ديكل * دينلديكه اكر اول
 مجلس مجلس خير ايسه انكه احسان آتورر و اكر انك غيرى ايسه اكا
 كفارت اولور پيغمبر يمز عليه السلام ايدر بر كسه كه بر مجلسه جلوس ايدوب
 انده لفظى كشاد اوله اول مجلسدن قائم اولمزدن اول (سبحانك اللهم
 وبحمدك شهد ان لا اله الا انت استغفرك واتوب اليك) ديسه اول مجلسده
 صدور ايدن لفظاته كفارت اوله * دينلديكه نمازه طورديغنده
 (سبحانك اللهم وبحمدك وتبارك اسمك وتعالى جدك ولا اله غيرك)
 ديكل كه زيرا پيغمبر يمز صلى الله عليه وسلم نمازى انكه باشلاردى *
 دينلديكه انكه مراد كيجه دوشكدن قالقوب نمازه داخل اولنجه اولان
 ذكر اللهدر (ومن الليل فسبحه) وكيجه نك بعضنده الله تعالى به
 عبادت ايت كه اول نفسه اشق وريادن ابددر (وادبار النجوم) و آخر
 ليله نجومك ادبارى حيننده يعنى فرك طلوعنده صباحك ايكي ركعت
 سنتن ادا ايت

(سورة)

سورة النجم وهى ثلثان وستون آية مكية

بسم الله الرحمن الرحيم

(والنجم اذا هوى) نجم حقيقونكه اول ثريادر ويا سمانده كى نجومك
 كليسير چانكه غروب ايدى ويا يوم قيامتده منشر اوله ويا چانكه انكه
 شياطين رجم اولنه استراق سمع ايتدكلرند ويا نجمله مراد قرآندر كه چان
 نازل اوله ويا هر نباتدر كه ساقى اوله چانكه اول ارض اوزره سقوط ايدى ويا محمد
 عليه السلامدر چانكه ليله معراجده سمان نزول ايدى (ماضل صاحبكم
 وماغوى) صاحبكز محمد عليه السلام طريق مستقيمدر عدول ايتدى
 وباطل شئي اعتقاد ايتدى (وما ينطق عن الهوى) اول هواى نفسندن
 سويلز زيرا اول تكليف اولمشددر كه توحيدى اظهار وشركى دفع
 وشرعى نشر ايدى (ان هو الا وحى يوحى) انك دين امرنده ويا قرآنده
 سويلديكى دكل الا وحيدركه الله تعالىدن وحى اولوبدر (علمه
 شديد القوى) اكا انى بملك تعليم ايتدى قواسى شديددر كه اول جبريل
 عليه السلامدر خوارق ابتداءشه اول اكا واسطه در * روايت اولنديكه
 جبريل عليه السلام لوط قومك قراسنى قناديله ماء اسوددن قلع ايدوب
 سمايه رفعدن نصكره تقليب ايتدى وصالح عليه السلام قومنى بر كره
 صيحه سيله جيغنى هلاك ايتدى وابليس عيسى عليه السلامه سويلشوركن
 كورديكند قناديله بر كره نفخ ايدى چك هندستان نهايتنده بر طاغنه
 اير كوردى (ذو مرة فاستوى) كه اول عقل وراينده حصافت صاحبدر
 خلق اولنديغى صورت حقيقه سى اوزره استقامت ايتدى * دينلديكه
 انبيادن پيغمبر يمز صلى الله عليه وسلمدن غيرى كسه انى خلق اولنديغى
 صورته كورميو بدر اما كه پيغمبر يمز عليه السلام انى اول صورته ايكي
 دفعه كوردى برى سمانده وبرى ارضده و سائر اوقاتده آدميين صورته ده
 كوردى سائر انبيايه كلديكى كى بروقته پيغمبر يمز عليه السلام اكا دينديكه
 ديكرمه بكا خلق اولنديغى صورته كورينه سن مكر اول وقته
 پيغمبر يمز عليه السلام حرا طاغنده ايدى جبريل عليه السلام مشرقدن
 طلوع ايدوب افق سدايتدى پيغمبر يمز عليه السلام انى كورچك بايلوب
 دوشدى اوليه اولسه فى الحال عادى اوزره آدمى صورته تحول ايدوب

پیغمبر صلی الله علیه و سلمی کندویه ضم ایتدی (وهو بالافق الاعلی)
 حالوکه اول افق شمسده و یا سدره منتهاده ایدی (ثم دنی فتدلی)
 بعده اول پیغمبر صلی الله علیه و سلمه قریب اولوب تعلق ایتدی
 (فكان قاب قوسین او ادنی) حتی پیغمبر علیه السلامه انک قربی ایکی
 قوس دکلو و یا اندن اقرب اولدی (فآوحی الی عبده ما اوحی) جبریل
 علیه السلام اکا ایر کوردی انیکه الله تعالی وحی ایتدی (ما کذب
 القواد مارأی) پیغمبر صلی الله علیه و سلمه کوزی کوردیکن
 قلبی تکذیب ایتدی * دینلدیکه ضمائرک کلیسی الله تعالی به راجعدر
 اویله اولسه شدید القوی ایله معنی (هو الرزاق ذو القوة المتین) دن
 مفهومک مثیلدر و انک اکا دنوتی ترفع مکانیدر و تدلیسی انی شرایشله
 جناب قدسه جذیدر و انی طرفه العینده مکهدن قدسه جذبله و انک
 بصری الله تعالینک اکا حکایت ایتدیکنی تکذیب ایتدیکیدر زیرا که امور
 قدسیه اولقلب ایله ادراک اولنور بعده بصره نقل ایدیلور و یاخود انک
 فوادی کوردیکنی بن سنی بیلزین دیمدی اکر انی دیسه کاذب اولوردی زیرا
 اول انی بصریله کورمسی کبی قلبیله بیلوبدر * رؤیتک معناسنده
 مفسرون اختلاف ایتدیلر ابن عباس رضی الله عنه دیدیکه محمد
 صلی الله علیه و سلم الله تعالی بی فوادیله ایکی کره کوروبدر و بر جماعت
 دیدیلر که اول انی کوزیله ایکی کره کوروبدر که اول انس و حسن و عکرمه
 قولیدر ابن عباس رضی الله عنهما ایدر الله تعالی ابراهیم علیه السلامی
 خلئلله و موسی علیه السلامی کلامله و محمد صلی الله علیه و سلمی رؤیتله
 اصطفاء ایتدی (أفتمارونه علی ما یری) یا مشرکین محمد علیه السلامک
 کوردیکنده جدالمی ایدرسنر که انلر انک اسرائی و جبریل علیه السلامی
 مشاهده سنی انکار ایدرلردی (ولقد رآه نزلة اخری) محمد علیه السلام
 جبریل علیه السلامی صورت حقیقیه سنده رؤیت اخراده کوردی
 (عند سدره المنتهی) که اول رؤیت سدره منتهی عندنده ایدی چنانکه
 اول سماء سابعده اسراء ایتدی سدره منتهایله مراد شجره طوبی و یا شجره
 نبقدر که سماء سابعدنک فوقنده عرشک یمینده در انهار جنت انک
 اصلندن چیقار ملائکه اکا منتهی اولور انی تجاوز ایتزلر که انک نبی
 هجرد ستیلری کبی و پیراغی فیل قولقلری کبیدر و یاخود خلافتک علم

(واعمالی)

واعمالی انده منتهی اولور (عندها جنة المأوی) جنت مأوی انک
 عندندهدر که شهدانک و یا متقینک ارواحی و یا ملائکه انده قرار ایدرلر
 (اذ یغشی السدره ما یغشی) اول سدره بی تغطیه ایدر خلافتدن اولکه
 الله تعالینک عظمت و کبریاسنه دلالت ایدر * دینلدیکه التوندن کلبکار
 و یا قرغلهر مثالنده ملائکهدر ابوهریره رضی الله عنهدن مرویدر که انی
 غشی ایدن نور خلاقدر حب الاهدن ملائکه غربان مثالنده انی قاپلیوبدر
 اول شجر اوزره واقع اولورلر * حدیثده کلدیکه انک هر برورقه سنده
 قائم بر ملک واردر که الله تعالی بی تسبیح ایدر (مازع البصر و ما طغی)
 محمد علیه السلامک بصری کوردیکی شیئدن میل و تجاوز ایتدی
 بلکه متیقن اولدیغی حالده اثبات صحیحله اثبات ایتدی و یا اول رؤیتله
 امر اولندیغی عجائب رؤیتندن عدول و تجاوز ایتدی اویله اولسه
 کوردیکنی اخبارده کذب ایتز (لقد رأی من آیات ربه الکبری)
 و رسول الله اول لیلئه معراجده الله تعالینک آیات و عجائب ملکیه
 و ملکوتیه سندن عظماء و کبرای کوردی (أفرایتم اللات والعزى ومناة
 الثالثة الاخری) بکا خبر و یرک که الله تعالی به کافر اولوب لات و عزى
 و منات نام اصنامه عبادت ایدرسنر * دینلدیکه لات نام صنم طائفه ثقیفک
 و یا نخلده قریشک ایدی انی طواف ایدرلردی اول بر رجل صورتده ایدیکه
 سمنله سوبق لت ایدوب حجاجه یدرلردی * وعزى ایسه بر شجره
 ایدی غطفان اکا عبادت ایدرلردی * پیغمبر صلی الله علیه و سلم خالد
 ابن الولید رضی الله عنه بی اکا کوندردی حتی که انی کسیدی انک دینندن
 بر شیطانه چیقوب صاحبنی سور یوکتدی خالد اکا ایریشوب قتل ایتدی *
 و اما که منات بر صخره ایدیکه هذیل و خزاعه و یا ثقیف اکا عبادت
 ایدرلردی قربانلرین انک قنده ذبح ایدرلردی * دینلدیکه اصنامک
 کلیسی حجاره دن اولوب داخل کعبهده عبادت اولنوردی یعنی اشبو
 آلهه کرک بر شیئه قدرتی وارمیدر که الله تعالی بی قویوب انلره عبادت
 ایده سنر (أَلکم الذکر وله الانثی) یا مشرکارسر کندیکز ایچون بنون
 قیلوب الله تعالی به بنات اسناد ایدرسنر حالبوکه سنر بناتدن کراحت ایدرسنر
 کبی ایدر مشرکار دیرلردیکه اصنام و ملائکه حاشا بنات الاهدر
 بزم انلره عبادتسز تا که الله تعالی به بزم ایچون شفاعت ایدهلر (تلك اذا

قسمه ضیری) اشبو بر قسمندر که انده جور اولوبدر زیرا که استکاف
ایتدیکنز شیئی الله تعالی ایچون قیلورسز (ان هی الا اسماء سمیتوها
انتم و آبائکم) اول اصنام دکل الا اسماء در سز و آبائکز انلری آلهه دیو
اطلاق ایدوبسز حالبوکه الوهیت معناسندن انلرده برشی یوقدر
(ما انزل الله بها من سلطان) الله تعالی انلرک الوهیتنه سزه بر برهان
انزال ایتدیکه اکا تعلق ایده سز (ان یبعون الا الظن و ما تهوی الانفس)
بلکه انلرک اول اصنامه عبادت لرنده و آلهه دیو تسمیه لرنده توهم باطله
و نفس لرینک هواسنه اتباع ایتش لردر (ولقد جاءهم من ربهم الهدی)
حالبوکه رب تعالیدن انلره رسول و کتاب کلشدر انلر ایهه انی ترک ایتدیلر
(ام للانسان ما تمنی فله الآخرة والاولی) یوخسه انسان کافر ایچون
هر تمنی ایتدیکی اولور میکه اول آلهه لرندن شفاعت طمع لیدر ایدمی
اول طمع باطلدر بلکه دنیا و آخرت ایکیسی بیله الله تعالی نکدر
اول ایکیسندن دیلدیکی شیئی دیلدیکی کسهیه ویرر هیچ برشیله انک اوزره
تحکم ایدر یوقدر (و کم من ملک فی السموات لا تغنی شفاعتهم شیئا
الا من بعد ان یأذن الله لمن یشاء ویرضی) سمواتده نیچه ملک وارددر که
شفاعتلری هیچ برشیئی مفید اولمز الا شوندنصکره که الله تعالی اذن ویره
ملائکه دن اکا که شفاعت ایتسن دیلده ناسدن اول کسه ایچونکه
شفاعت اولنغه اهل اوله اوله اولسه اصنام عبده لر یچون نیچه
شفاعت ایدرلر (ان الذین لایؤمنون بالآخرة لیسمون الملائكة تسمیة
الانثی) شونلر که آخرته ایمان کتورمز لر ملائکه دن هر برینی بنت دیو
تسمیه ایدرلر (و ما لهم به من علم ان یبعون الا الظن وان الظن لا یغنی
من الحق شیئا) حالبوکه انلرک اول قولرینه یقین ویا جتلیری یوقدر
بلکه انلر ظن لرینه اتباع ایدرلر ظن ایهه حقدن برشیئی مفید اولمز زیرا که
حق شیئک حقیقتیدر که اول عملله ادراک اولنور و ظن ایهه معارف
حقیقیه ده معتبر اولمز بلکه ظنک معتبر اولمی عملیاتده در * و عملیاته
وصلت اولور شیئده در (فأعرض عن تولى عن ذکرنا ولم یرد
الا الحیاة الدنیا) ایدمی یا محمد اعراض ایت شول کسهیه دعوت
و شانته اهتمامدنه قرآنه ایمان و موجبیه عمل ایتیه و عملیه حیاة دنیا
منفعتن دیلده زیرا که دعوت انک عنادین و باطل اوزره اصرارین

(آرتورر)

آرتورر (ذلک مبلغهم من العلم) انلرک حیاة دنیایی اراده لری علمدن
غایت و صول لیدر انی تجاوز ایتزلر (ان ربک هو اعلم بمن ضل عن سبیله
وهو اعلم بمن اهتدی) رب تعالی اعلمدر شول کسهیه که طریق هدایتی
ترک ایده و انی که توحیدی تمسک ایدوب طریق هدایه کیده ایدمی انلری
دعوتده نفسکی اتعاب ایتکل سکا واجب اولان تبلیغدر سن ایهه انی ادا
ایتدک (والله ما فی السموات وما فی الارض) سماده وارضده اولان اشیا نک
جیمی الله تعالی نک خلق و ملکیدر ضالی مهتدین تمیز ایدوب هر فریقک
احوالی حفظ ایدر (لیجزی الذین اساؤا بما عملوا و یجزی الذین احسنوا
بالحسنی) تا که اساءت ایدنلره سوء عمل لرینک عقابن ایده و احسان ایدنلره
جنتله جزاء ایده (الذین یجتنبون کبائر الاثم و الفواحش الا اللیم) شونلر که
کبائر اثم دن و فواحش دن اجتناب ایدرلر * دینلدیکه کبائر اثم ذنوبدن
هر شیئدر که عتابی کبیر اوله فعلی اوزره وعید مترتب اوله و یا فاعلنه حد
واجب اوله و فواحش ایهه زنا و ناحق یره قتل کبی * دینلدیکه کبائر اثم
الله تعالی یه شرکدر و فواحش معاصیدر الا لمدن یعنی صغائر ذنوبدن
دکل که زیرا اول مغفوردر اگرچه صاحبی توبه ایتدیه ده اول هر ذنبدر که
احیانده ایشلنه لیکن اکا اعاده و اقامت اولنیه و یا اول زمان جاهلیته
ایشلندر الله تعالی انکله مؤاخذه ایتز * دینلدیکه لم ایکی وجه اوزره در
بری هر ذنبدر که الله تعالی انک اوزره دنیاده حد و آخرته عذاب
ذکر ایتش اولیه اول هر ذنبدر که صلواتله تکفیر اولنه کبائر و فواحش
مرتبه سنه ایرمیه و بری دخی شول ذنب عظیمدر که انی مرة بعد مرة المام
ایدوب اندن توبه ایده سعیدن المسیب ایدر اول هر شیئدر که قلبه خطور
ایدر * دینلدیکه لم شول نظره در که عمد سز واقع اوله اول مغفوردر و اگر
اعاده نظر ایدیلورسه اول لم دکلدر بلکه ذنبدر (ان ربک واسع المغفرة)
ربک جل شاننه نک رحمتی و اسعده در صغائرینی مغفرت ایدر انک که کبائر دن
اجتناب ایده و دخی دیلدیکی کسهیه لک ذنوبدن صغیر و کبیر مغفرت
ایدر مسیئله وعید و محسنلره و عددنصکره اشبو صفت کریمه بی اراده
جمله فوائدن بری اولدر که صاحب کبیره انک رحمتدن مأیوس اولمز
والله تعالی نک عهده سنه هیچ کسهیه عقاب ایتسنک و جوبی توهم اولنر

(هو اعلم بكم اذ انشأكم من الارض واذ اتمم اجنة في بطون امهاتكم)
 اول الله تعالى احوالكزه سزردن اعلمدر شول حيثندنكه ابتداء خلقكزي
 يعني آدمي ترابدن خلق ايتدي وسزي انالريكز قارننده جفيلر تصوير
 ايتدي (فلاتركوا انفسكم هو اعلم بمن اتقى) ايمدي كنديلريكزي زكاه
 عمل وزياده خيرله ويا معاصي وردائلدن طهارتله مدح ايتكز اول الله
 تعالى سزك تقيكزي وغير تقيكزي وسزي صلب آدمدن چيقارمزدن
 اول يلوبدر (أفرايت الذي تولى) كوردكي شول كسه بي كه حقه
 اتباعدن وانك اوزره ثباتدن اعراض ايتدي (واعطى قليلا واكدي)
 وشي قليل ويروب بعده بخل ايتدي اكثر مفسرين ديدلر كه سبب نزولي
 وليدين المغيره در كه پيغمبريمز صلى الله تعالى عليه وسلمه اتباع ايدردى
 بعض مشركين اني تعييز ايدوب ديديكه سن اشياخ ديني ترك وانلري
 تضليل ايتك ديديكه الله تعالىنك عذابدن قورقرين اول مشرك اكا
 ديديكه اكر سن بكا بعض مالكي ويررسك سندن عذابي تحمل ايدين
 اويله اولسه اول مرتد اولوب اول مشركه بعض مشروطن
 ويدرديكندنصكره باقيسنه بخل ايتدي (أعنده علم الغيب فهو يري)
 يوخسه علم غيب انك عندنده ميدركه صاحبي انك عذابن تحمل ايده جكني
 بيلدي (ام لم ينسأ بما في صحف موسى وابراهيم الذي وفي) اكا خبر
 ويرلمديمى اولكه موسايه نازل اولان تورائده ويا صحائفده كه اول اون
 صحيفه اولوب تورائدن اول اول اكا نازل اولمشدر وكذلك ابراهيم عليه
 السلامه نازل اولان اون صحيفه ده كه اول ابراهيم عليه السلامك التزام
 ايتديكي ويا امر اولنديغي شيئي اتمام ايتدي ويا الله تعالى به اولان عهدينه
 وفاده مبالغه ايتدي (الاتزر وازرة وزر اخرى) كه اول موسى
 وابراهيم صحفدرنده يازلمشديكه هيچ برنفس حامله نفس اخرايك جلمي
 حامل اولمز يعني هيچ بركنهاكار كسه برآخرك كنهايله مؤاخذه اولمز
 وبوكا مخالف اولمز شول حديث نبويكه بر كسنه كيم اسلامده بر سنت سيئه
 احداث ايده انكچون اول سنت سيئه نك وزري اولور واكاتباعتله يوم
 قيامته دكين اني ايشلينرك وزري دكلو دخي وزر اولور ديو پورلدي
 زيرا اول وبال اوزره سبب اولملري وزريدر (وان ليس للانسان
 الا ما سعى) وانسان اچون آخرته نفع ايتز الا اولكه اني اخلاصله

(ايشلمش)

ايشلمش اوله ويا اكا نيت ايتمش اوله * ابن عباس رضی الله عنهما ايدر
 اشبو آيت سورة طورده مذكور (ألحقنا بهم ذريتهم) قول شريفيله
 منسوخ الحكمدر زيرا كه ابنا آبائك صلاحيله جنته كير * عكرمه ايدر
 اشبو حكم ابراهيم وموسى قوملرينه مختص ايدى يوخسه بوامت اچون
 اعمال صالحه دن كنديلرك ايشلديكي وغيرك انلر اچون ايشلديكي اولور
 شول دليلله كيم برمرأه برصبي رفع ايدوب ديديكه يارسول الله بونكچون
 حج اولورمى ديديكه نم انكچون حج وسنكچون اجر اولور وبررجل پيغمبريمز
 صلى الله عليه وسلمه ديديكه بنم انام وفات ايدوبدر بن انكچون تصديق
 ايتسم اندن اكا اجر حاصل اولورمى ديديكه نم اولور (وان سعيه
 سوف يري) وانك خير وشردن على يوم قيامته ميراننده كوريلور
 (ثم يجزيه الجزاء الاوفى) بعده اول عبدك سعيي جزاء اوفى ايله جزاء
 اولنور (وان الى ربك المنتهى) وجيع خلافتك موئلرندنصكره انتهاه
 ورجوعلري الله تعالى به در اعمالرينك جزاسنى ايدر (وانه هو اضحك
 وابكي) اول الله تعالى انسانده ضحك وبكايه قوت خلق ايتدي ويا اول
 اهل جنتي جنتده اضحك واهل نارى نارده ابكا ايدر ويا ارضي نياتله
 اضحك وسمائي مطرله ابكا ايدر ويا اول انساني مسرور ومحزون ايدر
 زيرا كه سرور ضحكى وحزن بكايي جلب ايدر (وانه هو امانت واحيى)
 واول الله تعالى اني دنياهه امانه وآخرتده بعث اچون احياء ايدر انك
 غيرى امانه واحياهه قادر اولمز حتى قاتل بنيدي تقض ايدر واول حينده
 موت الله تعالىنك فعليه حاصل اولور (وانه خلق الزوجين الذكر
 والانثى من نطفة اذا تمنى) واول الله تعالى هر حيواندن ذكر وانشايي
 خلق ايتدي شول نطفه دنكه رحم انشايه دفع ايديلور ويا اندن ولد
 خلق ويا تقدير اولنور (وان عليه النشأة الاخرى) وانك وعدى
 مقتضاسنجه خلق امانه دنصكره بعث اچون احياء ايدر (وانه هو
 اغنى واقنى) واول ناسدن بر طائفه بي اموال ايله سائر دن غنى ايدر
 وبر طائفه بي ايسه خلقه محتاج ايدر (وانه هو رب الشعري) واول
 شعري نام كوكبي خلق ايتديكه اول جوزانك خلفنده درخزاعه اكا عبادت
 ايدرلردى ابتداء انلره اني سنت ايدن قریش اشرافدن ابوكبشه نام رجل
 ايدى نجوم سمائي عرضنه قطع ايدر شعري ايسه طولنه قطع ايدر ابوكبشه

نام رجل انكله سائر عربيه مخالفت ايتدى انلر اصنامه عبادت ايدر كن
اول شعرايه عبادتى اختيار ايتدى پيغمبريمز صلى الله عليه وسلم دينده
عربه مخالفت ايتديكيچون اكا ابن ابى كبشه ديو تسميه ايتديلر يعنى پيغمبريمز
صلى الله عليه وسلم عربيه مخالفتده اكرچه ابو كبشه يه موافقت ايتدى
لكن شعرايه عبادتى انكارنده اكا دخی مخالفت ايتدى (وانه اهلك
عادا الاولى) اول الله تعالى هود عليه السلامك قومى عاد اولاي ریح
صرصر ايله هلاك ايتدى وعاد اخري ايسه انلرك عقى ارمدر (و ثمود فالبقى)
وصالح عليه السلامك قومى ثمودى صيحه ايله هلاك ايدوب عاد و ثمود دن
هيچ برينى ابقاء ايتدى (وقوم نوح من قبل انهم كانوا هم اظلم واطغى)
ونوح عليه السلامك قومى عاد و ثمود دن اول غرقله هلاك ايتديكه انلر
ظلم و طغيانده اول ايكي فريقدن اكثر ايديلر زيراكه نوح عليه السلام انلرك
اراسنده طقوز يوز اللى ييل مكث ايدوب انلرى ايمانه دعوت ايتديكه انلر
اتى ضرب و اذاء ايدرلردى بايلوب افاقت بولديغنده يارب قومى مغفرت
ايت بيلدكلرندن ايدرلر ديو انلر ايجون الله تعالى يه اعتذار ايلردى كبارلرى
صغارلرينه اكا اذاء ايدك و تكذيب ايدك ديو وصيت ايدرلردى (والمؤتفة
اهوى) ولوط عليه السلامك قومك قراسنى جبريل عليه السلام قناديله
سمايه رفعدنصكره بامر الله اوستنى الته دوندروب يره براقدى
(فغشيها ماغشى) بعده سجيلدن حجاره ايله اتى غشى ايتدى (فباى آلاء
ربك تمارى) يا انسان اشبو مذكوراتى بيلدكدنصكره ربك جل شانك
نعمتلرندن قنغيسى انكار ايدرسن اشبو مذكوراتك بعضى نعم و بعضى نعم
ايكن جيعنه آلاء دينلدى زيراكه هيچ بر نعمت خالى دكل يامعبرينه عبرت
وموعظه در و يا خود انبياء و مؤمنينه اعدالرندن انتقامدر (هذا نذير
من النذر الاولى) اشبو قرآن اندارات متقدمه جنسنندن برانداردر
ويا خود اشبو رسول مندرين جنسنندن برنذر در (ازفت الآزفة ليس لها
من دون الله كاشفة) قربله موصوف قيامت قريب اولدى الله تعالى دن
غيرى انك كشفنه قادر احد يوقدر چآنكه اول واقع اوله لكن كشف
ايتمز و يا خود انك وقتى الله تعالى دن غيرى كشف ايدر يوقدر زيراكه اتى
هيچ كسه يه بيلدر ميوبدر (أفمن هذا الحديث تعجبون و تضحكون)
اشبو قرآنه انكارله تعجب و استهزاء ايله ضحك ايدرسن (ولا تبكون

(وانتم)

وانتم سامدون) و تقریطكزه تحزن ايدوب آغلنرسن ومع ذلك لهو ايدر
ويا اندن اعراض و يا اكا ايماندن استكبار و يا اتى استماعدن ناسى اشغال
ايجون تغنى ايدرسن (فاسجدوا لله واعبدوا) ايمدى الله تعالى يى
توحيد ايدوب اكا تواضع و خضوعله سجود ايدك و ياسجود تلاوت ايدك
ويا اخلاصله صلواتى ادا و عبادتكزى اخلاصله ايدك * زيد بن ثابت رضى
الله تعالى عنه ايدر پيغمبريمز صلى الله تعالى عليه وسلم دن و النجم سورة سين
او قودم سجده ايتدم اشبو دليلدر كه سجده تلاوة واجب اوليه عمر بن الخطاب
رضى الله تعالى عنه ايدر الله تعالى اوزر يمز سجده تلاوتى ايجاب ايتيوبدر
مكر كه اتى دليله وزكه اول امام شافعى و احمد قوليدر و بر قوم سجده تلاوتك
قارى و مستعنى اوزره وجوبنه ذاهب اولديلر كه اول امام ابو حنيفه قوليدر

سورة القمر وهى خمس وخمسون آية مكية

بسم الله الرحمن الرحيم

(اقتربت الساعة وانشق القمر) قيامتك قيامى اقتراب ايتديكه قر منشق
اولدى اول انك اقترابى علاماتنددر * روايت اولنديكه كفار مكه پيغمبريمز
صلى الله تعالى عليه وسلم دن صحت نبوته علامات استدلكرنده پارمغيله قره
اشارت ايدوب باذن الله ايكي شق اولدى حتى جبل حرا انك ايكي شق
اراسنده كورلدى (وان يروا آية يعرضوا ويقولوا سحر مستمر) اكر كفار
مكه محمد عليه السلامك صحت نبوته دلالت ايدر معجزه كورسه لر اتى تأمل
واكا ايماندن اعراض ايدوب اول سحر مستمر ديرلر (وكذبوا واتبعوا
اهواءهم وكل امر مستقر) اول رسولى و يا آيتى تكذيب ايدرلر و شيطانك
انلره تزيين ايتديكى اهوالرينه اتباع ايدرلر و هر امر برغايته منتهيدر خير
اهل خيره و شر اهل شره ايرر خير اهلنى جنته و شر اهلنى ناره ادخال ايدر
(ولقد جاءهم من الانباء ما فيه مزدر) حالبوكه انلره قرآنده قرون
خاليه و يا انباء آخره اخبارندن كلدى اول شيكه انده تعذيب و وعيددن
زجر ايدر واردر (حكمة بالغة فاغنى النذر) قرآن بر حكمت تامه درانده
خلل يوقدر ايمدى اكر اول حكمتى تصديق ايتزلرسه عذابك نزولى
حيننده انلره اندار ايدن رسوللرك نفعى اولمز (فتول عنهم) اوليه اولسه
انلره تبليغ و اوزرلرينه حجتى الزامدنصكره انلرى ترك ايت (يوم يدع

بع (۱۳)

الداع الى شئ نكر) ذكر ايت شول كونيكه اسرافيل عليه السلامك
 صخره بيت المقدس اوزره طوروب ناسي برشيئه دعوت ايدم كيم نفوس
 اني انكار ايدم لركه اول نارجهنم وياهاوال يوم قيامتدر (خشعا ابصارهم
 يخرجون من الاجداث كأنهم جراد منتشر) قبرلندن چيقه لر بصرلری
 هولدن خاشع وذلبل اولديغي حالده كوياكه انلر كثر وتمعوده واماكنه
 انتشارده چكركه لر در قنده كیده جكرين بلزلر (مطعين الى الداع)
 دعوت ايدن اسرافيل عليه السلامدن يكايه بيونلرين اوزادوب اكا نظر
 ايدر اولدقلى حالده سرعته كیده لر (يقول الكافرون هذا يوم عسر)
 كافرلر ديه لركه اشبو كون بزه نه صعب شديد اولور * دینلدیکه قبرلندن
 چيقه قلدن نصكره قرق پیل اياق اوزره طورغريله لر بعده حساب
 كوندريله لر (كذبت قبلهم قوم نوح فكذبوا عبدنا وقالوا مجنون وازجر)
 كفار مكه دن اول عبديز نوح عليه السلامی قومی تكذيب ايدوب انی
 مجنوندر ديديلر انواع اذيت ايله اول تبليغدن زجر اولندی (فدعا ربه انی
 مغلوب فانتصر) نوح عليه السلام رب تعالى به دعا ايدب ديديكه الهی
 قوم ار اسنده مقهورم بنمچون انلردن انتقام ايت (ففلقنا ابواب السماء
 بماء منهمر) ابواب سمائي شدت ايله دو كيلور يغمور ايله قتح ايتك (ونجونا
 الارض عيونا فالتقى الماء على امر قد قدر) وارضك كليسنى عيون منفجرة
 كبی هر محلدن ماء نبع ايدر قيلدق اويله اولسه ماء سماء وماء ارض بری برينه
 ملتقى اولدى بر حال اوزره كه الله تعالى انی ازله تقدير ايتشدی ويا بر امر
 اوزره كه انی اول تقدير ايتدیکه اول نوح عليه السلام قومك طوفانله
 هلا كيدر (وجلناه على ذات الواح ودر) و بز نوحی جل ايتك بر سفينه
 اوزره كه اول يصی تخته لر دن دوزيلوب مسمارلرله ميخلنوبدر (تجری
 باعیننا جزاء لمن كان كفر) اول بزم مراد مزده جاری اولور حفظمزله
 محفوظ اولديغي حالده تاكه اول فعلز كافرله انتقام اوله شول ذات ايجونكه
 اكا انكار اولنديكه اول نوح عليه السلامدر ويا الله تعالىدر (ولقد تركناها آية
 فهل من مدكر) بز اول سفينه یی جبل جودی اوزره دهر طويل ابقاء ايتك كه
 انكله اعتبار اول نور عبرت اوله اويله اولسه الله تعالىك قوم نوحه اولان صنيعيله
 معتبر كيمسه وارميدر كه انك صانعنه مؤمن و مطيع اوله * دینلدیکه اندن اول

(ناس)

ناس سفينه نه ايدوكنی بيلزلردی كوريجك انی نمونه ايدينوب سفينه لر
 دوزديلر واذن الهيله دريالره يوزدرديلر (فكيف كان عذابي ونذر) تأمل
 ايتكه بنم عذاب وانذارم نيچه اولدى شول كسه لره كيم رسولرم انلری
 انذار دند نصكره ايمانه كلدیلر (ولقد يسرنا القرآن للذكر فهل من مدكر)
 بز قرآنی تيسير وتهينه ايتك ادكار واتعاظ ايجون انده كی مواعظ وعبری
 تبين وتكريرله ويا حفظ ويا قراءتچون الفاطنی اختصارله ايمدی انكله
 اتعاظ ايدر وارميدر كه متعظ اولوب انی اذعان واتقان ايدم * دینلدیکه
 كتب منزلهك هيچ بری قرآندن غيری امدن هيچ كسه به اولندن آخري نه
 دكين حفظی ميسر اولموبدر (كذبت عاد فكيف كان عذابي ونذر)
 عاد قومی رسولاری هود عليه السلامی تكذيب ايتديلر ايمدی تأمل ايتكه
 انلره عذاب وانذارم نيچه واقع اولدى انی بولمديلر (انا ارسلنا عليهم
 ريحا صرصرا في يوم نحس مستمر) بز انلر اوزره ريح بارده شديدة الهبوب
 ارسال ايتك بر كونده كه شومی اوزرلرينه مستمر اولدى حتى اول انلرك
 صغار وكبارينی هلاك ايدوب هيچ برينی ابقاء ايتدیکه اول شهرك آخر
 اربعاسنده ايدی (تنزع الناس كأنهم اعجاز نخل منقعر) اول ريح
 انلری يرلندن قوپارر بعده باشلری اشاغه يره اورردی انكله باشلری
 ازيلوب بيونلری قيريلوردی اصول نخل كبی كه مغاره سندن قلع اولنوب
 ير اوزره دوشرلسی كبی (فكيف كان عذابي ونذر ولقد يسرنا القرآن
 للذكر فهل من مدكر كذبت ثمود بالنذر) ثمود قومی رسولاری صالح عليه
 السلامی تكذيب ايتديلر شول وقتكه اول انلره انذارات ومواعظه كلدی
 (فقالوا ابشرا منا واحدا نتبعه انا اذا لقي ضلال وسعر) ديديلر كه
 بز جنمزدن ويا جله مزدن اولوب اوزر يمه فضلی اوليان كسه به اتباعی
 ايدرز اتباع ايتديكمز تقدير اوزره هدايتدن خطاده وحقدن بعده اولورز
 (عالتی الذکر عليه من بيننا بل هو كذاب اشر) اكا وحيمی نازل اولدى
 حالبوكه ارامزده اول وحيه احق وارایدی بلكه اول قولنده كذابدر
 خلق اوزره متكبردر بطری انی ادعا ايله اوزر يمه ترفعه جل ايتدی
 (سيعلمون غدا من الكذاب الاشر) الله تعالى ديديكه اوزرلرينه عذاب
 نازل اولديغنده ويا يوم قيامتده بيلسرلردر كه قولنده كاذب اولوب
 بطری حقندن استكباره وطلب باطله جل ايدن صالحيدر يوخسه

انی تکذیب ایدنلر میدر بعده صالح علیه السلامدن دیلدیلر که انلره طاشدن بر ناقه چیقاره چون صالح علیه السلام الله تعالیدن انی دیلدی وحی اولندیکه (انا مرسلوا الناقة فتنة لهم فارتقبهم واصطبر) بز انلری اختیار ایچون دیلدکلری منوال اوزره طاشدن بر ناقه اخراج ویا بعث ایدرز ایمدی یا صالح انلرک هلاکنه منتظر اولوب صنیعلرینه نظر واذالرینه صبرایت (ونبئهم ان الماء قسمة بینهم کل شرب محتضر) وانلره خبر ویرکه ناقه ایله انلرک بینده ماء قسمت اولمشدر بر کون ناقه نلک و بر کون انلرکدر ماء دن هر نصیبه نوبتلیسی حاضر اولسون ناقه نلک نوبتنده اول مایه انلردن کسه کلسون وانلرک نوبتنده ناقه اکا کلسون (فنادوا صاحبهم فتعاطى فعقر) اویله اولسه انلر ناقه نلک قتلنه قصد ایدوب صاحبلی قدر بن سالفی اکا چاغردیلر قدر دخی الله سیف آلوب انلکه ناقه بی قتل ایتدی (فکیف کان عذابى ونذر) ایمدی یا صالح نظر ایتکه بنم انلری تعذیب وانذارم نه کیفیت اوزره اولور (انا ارسلنا علیهم صحیحة واحدة فکانوا کھشیم المحتظر) بز انلرک اوزره جبریل علیه السلامی کوندردک بر کره صحیحه ایتسبیله جیعن هلاک ایتدک اویله اولسه شول شجر یابس منکسر کی اولدیلر که صاحب حظیره انی جمع ایدوب ماشیه سنه حظیره قیلور ویا خود شول حشیش یابس کی که صاحب حظیره انی ماشیه سنه ذخیره اولسون ایچون جمع ایدر (ولقد یسرنا القرآن للذکر فهل من مدکر کذبت قوم لوط بالنذر) قوم لوط رسوللری لوط علیه السلامی تکذیب ایتدیلر (انا ارسلنا علیهم حاصبا الا آل لوط نجیناهم بسحر) بز انلرک اوزره بر ریج کوندردک که اول انلره حصباء یاغدردی الا آل لوطی بر سحر وقتنده هلاکدن خلاص ایتدک (نعمة من عندنا کذلک نجزی من شکر) بزم عندمزدن انلره انعام ایچون ایمان وطاعتله بزم نعمتلریمزه شکر ایدنه بز بویله جزاء ایدرز (ولقد انذرهم بطشتنا فتماروا بالنذر) حالبو که لوط علیه السلام انلری بزم بطشة عذابله تخویف ایتدی انلر ايسه لوط علیه السلامی انذارنده شک ایدوب تکذیب ایتدیلر (ولقد راودوه عن ضیفه فطمسنا اعینهم فذوقوا عذابى ونذر) انلر لوط علیه السلامدن دیلدیلر که اضیافنی انلره تسلیم ایده انلر ايسه ملائکه اولوب جله دن بری جبریل علیه السلام ایدی * روایت اولندیکه وقتا که قوم لوط لوط علیه

(السلام)

السلامک دارینه کلوب دخول ایچون بانه معالجه ایتدیلر اول ملائکه لوط علیه السلامه دیلدیلر که بز الله تعالینک رسوللری بز انلر بزه واصل اولور دکلردر قوغل کیرسونلر لوط علیه السلام انی بیلچک چکیلوب حتی که ملائکه نلک اوزرینه کیردیلر جبریل علیه السلام قناده انلرک کوزلرینی مسح ایدیلر کوزلرله یوزلری دوبدوز اولدی متحیرین اولوب چیقمغه قیوی بولدیلر حتی که لوط علیه السلام انلری دارندن طشره چیقاردی * الله تعالی ایدر بز انلره ديدک که ایمدی بنم عذابى وانذارى ذوق ایدک (ولقد صبحهم بكرة عذاب مستقر) برنهار معینک اولنده انلره بر عذاب ایردیکه مستقر اولوب انلری ناره تسلیم ایتدی (فذوقوا عذابى ونذر) وانلره دینلدیکه ایمدی بنم عذاب وانذارى ذوق ایدک (ولقد یسرنا القرآن للذکر فهل من مدکر) اشبو قول شریف ذکر اولسان هر قصده تکریر اولندی تا که انلکه هر رسولی تکذیب عذاب نزولنی مقتضی ایدوکی بیلنه وهر قصده نلک استماعی ادکار و اتعاطی مستدعی ایدوکی تأمل اولنه وتنبیه وایقاضی استئنا فله سهو وغفلتک غلبه سندن صاقله (ولقد جاء آل فرعون النذر) فرعون واتباعنه موسی وهارون وانلرک غیری رسوللریمز کلدی (کذبوا باياتنا کلها فآخذناهم اخذ عزيز مقتدر) انلر بزم موسایه ویردیکمز طقوز آیتلرک کلیمسنی تکذیب ایتدیلر اویله اولسه بز انلری عذابله اخذ ایتدک شول منتقم قادر اخذیله کیم انلک دیلدیلکی شیئی ایشلمکدن هیچ برشیء عاجز ایدر دکلدر (أسفارکم خیر من اولئکم ام لکم برآة فی الزبر) یامعشر عرب سزک کفار یکزمی اشد واقوادر قوم نوح وعاد وثمود وقوم لوط وآل فرعوندنکه انلره نعمت وعذابمز حلول ایتدی یوخسه کتب سماویه ده سزه نازلمی اولدی اول کسه که سزدن کافر اوله ام خالییه ایریشن عذابدن اول بری اوله (ام یقولون نحن جیع منتصر) یوخسه انلر دیرلریمیکه بز بر جاعتز که امریمز مجتهدر اعدادن امتناع ایدر مغلوب اولمز ویابری برلریمزه نصرت ایدرز (سیهزم الجمع ویولون الدبر) مشر کلرک جیعی حربده منهزم اولوب ورالرینه منصور اولیسرلر در الله تعالی اشبو وعد کریمک صدقنی یوم بدرده اظهار ایتدی (بل الساعة موعدهم والساعة ادهی وامر) بلکه یوم قیامت انلرک عذاب اصلیلرینک موعیدر دنیاده ایریشن ايسه

انك طلائعندندر و قیامت بر امر فظیعدر که انك دواسنه اهتداء اولنز و مذاق عذاب دنیادن امر در (ان المجرمین فی ضلال وسع) مشر کون دنیاده طریق حقدن بعدده و آخرتده قزغن آتشرده در (یوم یسحبون فی النار علی وجوههم ذوقوا مس سقر) شول کونده که جهنمه یوزلری اوزره سوریدیلوب نارك حر و المنی ذوق ایدك دینور (انا کل شیء خلقناه بقدر) هر شیئی بز مقدر و مقتضای حکمت اوزره مرتب و یاخود هر شیئی مقدر و اوحدده مکتوب خلق ایدك (وما امرنا الا واحدة کلمح بالبصر) هر شیئکه بز انك ایجادیتی اراده ایتسه وز انك حصولی کلمه واحده در یعنی کن دیمزد که انکله لمح بصردن اسرع زمانده و جوده کلور * ابن عباس رضی الله عنه ایدر یعنی بنم خلقمه قضاء لمح بصردن اسرعدر و یا محیی ساعته امر بزم سرعتده طرف بصر کیدر (ولقد اهلکنا اشیاعکم فهل من مدکر) یا اهل مکه کفر و تکذیبده امم سالفه دن اشیاعکزی هلاک ایدك انلرک حالندن اعتبار ایدر میسر که تکذیبی ترک ایدوب مؤمن اوله سز (وکل شیء فعلوه فی الزبر) خیر و شر دن هر شیئکه عباداتی ایشل کرام کاتبینک دیوانلرنده اول ثابتدر (وکل صغیر و کبیر مستطیر) و خلق و اعمال و آجالدن هر صغیر و کبیر لوح محفوظده مسطوردر (ان المتقین فی جنات و نهر) شرک و عصیان دن صاققان مؤمنلر آخرتده جنتلرده و ماء و لبن و خمر و غسل نهرلری عندنده در و یاخود ضیاء و وسعتده در و یا انهارده در که انده لیل یوقدر (فی مقعد صدق عند ملیک مقتدر) مسکن طیبده در که قلوب انی استحسان ایدوب و راضی اولور الله تعالی عندنده مقربین اولدقلری حالده که اول واسع الملك اولوب هر شیئکه قادر در و انلر اهل صدقه مختص مکانه در

سورة الرحمن وهی ثمان و سبعون آیه مکیه

بسم الله الرحمن الرحیم

(الرحمن علم القرآن) الله تعالی که رحمانیتله متصفدر محمد صلی الله تعالی علیه وسلم قرآنی تعلیم ایددی وقتا که مشر کون رحمان ندر بز اول اسمله مسمی رحمن الیمامه یعنی مسیله الکذابدن غیری بیلنز دیدیلر و یا قیاسانکه قرآنی محمد علیه السلامه بشر تعلیم ایدر دیدیلر

(بوآیت)

بوآیت نازل اولدی وقتا که اشبو سوره نعم دینویه و اخرویه نك تعدادی اوزره مقصوره اولدی انی رحمانله تصدیق ایددی و نعم دینیه نك اصل واجلی اولان شیئی تقدیم ایددیکه اول قرآنی انعام و تنزیل و تعلیمدر که اول اساس دین و منشأ شرع و اعظم وحی و اعز کتبدر زیرا که قرآن اعجازیه و خلاصه کتبی اشتهالیه کندوی مصدق و انلره مصداق اولمشدر (خلق الانسان علمه البیان) که اول آدم علیه السلامی خلق ایدوب اکا هر شیئک اسمنی و یا لغاتک کلیمنی تعلیم ایددیکه جیعنک افضلی عربدر و بعضیلر دیدیلر که انسانله مراد جیع ناسدر که انلره نطق و کتابت و فهم و افهام تعلیم ایددی حتی که سویلدیکنی و اکا سویلناتی بیلدی و یاخود هر قومه تکلم ایددکری و یا محمد علیه السلامی خلق ایدوب اکا احوال ماضیه و مستقبلی تعلیم ایددی (الشمس والقمر بحسبان) شمس و قمر بروج و منازلنده حساب معلوم مقدرله جاری اولور حتی که انکله امور کائنات سفلیه منشق اولور و فصول و اوقات اختلاف بولور و سنون و حساب بیلنور (والنجم والشجر يسجدان) نجوم سماء اشجار و ارض بکره و عشیده الله تعالی به سجده ایدرلر بر کیفیت اوزره که انی ینه الله تعالی بیلور و یاخود سجود لریله مراد الله تعالی نك انلره اراده ایددیکی شیئکه بالطبع انقیاد لریدر مکلفیندن ساجدک بالطبع انقیادی کبی * دینلدیکه نجم نباتدن اول شیئدر که ساق اوزره قائم اولیه یقطین کبی و شجر اولدر که ساق اوزره قائم اوله باذنجان کبی (والسماء رفعها) الله تعالی سمایی مرفوعة المحل خلق ایددیکه اول منشأ اقصیه و منزل احکام و محل ملائکه در (ووضع المیزان الاتطعوا فی المیزان) الله تعالی ناس بپننده عدلی وضع ایددی هر مستعده مستحقنی توفیر و هر حق صاحبیه حقنی توفیه ایله تاکه امر عالم انکله قیام و نظام بوله و یا انکله مراد مقادیر اشیاء بیلکه آلت اولان میزان و مکیال و غیریدر تاکه میرانده اعتدال و انصافی تجاوز ایتیه سز و یاخود معنی انلره دیکه میرانده جور ایتکز کر کسه اخذ و یا اعطاء ایدك (واقموا الوزن بالقسط ولا تخسروا المیزان) و ناس ایچون وزنی عدله تقویم ایدك و وزن اولنان شیئکه ناسک حقیدر نقص ایتکز (والارض وضعها للانام) الله تعالی یری خلق ایچون و یا هر ذی روح ایچون صو اوزره بسط ایددی (فیها فاکهة والنخل ذات الاکام) اولرده

تفكه اول نور اشيا نك انواعى واردر ودخى نخل كه اول ذات اوعيه در وياهر
شيمكه ليف وياسعف وغيريله غطالو در (والحب ذو العصف والريحان)
ودخى انده حبوباتدن حنطه وشعير وسائر تغذى اول نور اشيا واردر كه انك
ورق يابسى اولور ودخى شم اول نور نبات وار (فبأى آلاء ربكما تكذبان)
يانس وجن ربكز جل شانك قنغى نعمتلىنى تكذيب ايدرسز * روايت
اولنديكه پيغمبريمز صلى الله تعالى عليه وسلم سورة الرحمانى آخريته دكين
اصحابنه اوقيوب انلر ايسه سكوت ايتديلر ديديكه سبب ندر سزى ساكتين
كوررين بنانى جنيلره اوقديغمده اشبو آيتى تكرار ايتديكمجه ياربنا نعمتلىر كدن
هيچ برشيئى تكذيب ايتمز جديمز سكار ديور د جواب ايتديلر (خلق
الانسان من صلصال كالفخار) الله تعالى انسانى طين يابسدن خلق
ايتديكه اول صدا ويرردى * روايت اولنديكه الله تعالى آدم عليه السلامى
ترايدن خلق ايتديكه انى طين بعده جامسنون بعده صلصال قيلدى
(وخلق الجن من مارج من نار) وجنك باباسنى ويا ابليسى شول دخانى
يوق صافى ناردن خلق ايتدى (فبأى آلاء ربكما تكذبان) ربكز جل
شانك قنغى نعمتلىنى تكذيب ايدرسز اطوار خلق كزده سزه افاضه
ايتدى حتى كه سزى افضل مركبات و خلاصه كاشات قيلدى
(رب المشرقين ورب المغربين) كه اول الله تعالى مشرق صيف
ومشرق شتا ومغرب صيف ومغرب شتانك ربى وخالقيدر (فبأى آلاء
ربكما تكذبان) ربكز جل شانك قنغى نعمتلىنى تكذيب ايدرسز كه اول
سزه اعتدال هوا واختلاف فصولده حاصل اولان انواع نعم لا يحصى
فوائد خلقيله انعام ايتدى (مرج البحرين يلتقيان) الله تعالى بحر
مالحله بجرعذبي مزج ايتدى ايكيسى برى برينه متجاوز اولوب سطحلى
تماس ايدر وياخود بحر فارسله بحر روم ايكيسى برى برينه التقاء ايدر زيرا
اول ايكيسى بحر محيطدن منشق ايكى خليج منزله در بحر محيطده برى
برينه قاوشور (بينهما برزخ لا يبغيان) اول ايكيسى بيننده الله تعالىنك
قدر تندن ويا ارضدن حاجز واردر كه ايكيسندن هيچ برى آخر اوزره
ممازجه وابطال خاصيه ايله بغى ايتمز وياخود اول ايكيسى حدلىنى
تجاوز ايتزلر ايكيسى بينندهكى اشياى اغراقله (فبأى آلاء ربكما تكذبان
يخرج منهما اللؤلؤ والمرجان) اول ايكى بحردن درك كبارى وصغارى

(چيقار)

چيقار * ديتلديكه مرجانله مراد معروف اولان مرجاندر درك انجق
بحر مالحدن چيقمى صحيح اولديغى قول اوزره ايكيسندن چيقاردنلسنك
معناسى انك حصولى ملح وعذبك اجتماعدن اولور (فبأى آلاء ربكما
تكذبان وله الجوار المنشآت فى البحر كالأعلام) واول الله تعالىنك
امر وارادتيله دوزلش وياخشيلرى برى برينه رفع ايدلش يورر بيوك
سفينهلى واركه عظم وارتقاعده طاغلىر كيدر (فبأى آلاء ربكما تكذبان)
ربكز جل شانك قنغى نعمتلىنى انكار ايدرسز كه اول سزىكون
مواد سفاينى خلق ايدوب انى اخذه وكيفيت تركيه وبجوده اجرايه
ارشاد ايتدى براسبابله كيم انك خلق وجعنه اندن غيرى احد قادر اولمز
(كل من عليها فان ويبقى وجه ربك ذو الجلال والاكرام) ريوزندهكى
حيوانات ومركباتك جيعى فانيدر ربك جل شانك ذاتى باقيدركه
اول استغناء مطلق وفضل عام صاحيدر (فبأى آلاء ربكما تكذبان)
ربكز جل شانك قنغى نعمتلىنى انكار ايدرسز كه صدد فئاده اولان
لا يحصى اشياى رحمت وفضلندن ابقاء ايتدى وكلى افئادنصكره اعاده
وحيات ابدية ونعيم مقيم ايله انعام ايتدى (يسأله من فى السموات
والارض كل يوم هوفى شأن) اول الله تعالىدن سمواتده اولنلر اكا عبادته
قوت وارضده اولنلر رزق ومغفرت استرلر زيرا كه ذوات وصفاتلرنده
محتاجلردر اول الله تعالى هر وقتده قضاء سابقى اوزره احداث
اشخاص وتجديد احوال ايدر احياء واماته ايدر برقوى عزيز وبرقوى
ذليل ايدر خلقك كيمى مريض وكيمى صحيح ايدر داعى به اجابت وسأله
اعطا ايدر اهل ذنوبه مغفرت واهل طاعته رحمت ايدر وامور لا يحصى
ديلديكى كيفيت اوزره انى خلق وتحويل ايدر سفيان بن عيينه ايدر
دهرك كليسى الله تعالى عندنده كويا ايكى كوندن بركونى مدت ايام دنيادر
وبركونى ايسه يوم قيامتدر اما مدت دنيا نك شانى امر ونهى احياء واماته
منع وعطا در اما مدت يوم قيامت شانى جزاء وحساب ثواب وعقابدر
ديلديكه الله تعالىنك شانى كونه كچهده اوچ عسكر چيقارمقدر
برعسكرى اصلا بآبدن ارحام امهاته چيقارر وبرعسكرى ايسه ارحامدن
دنياه چيقارر وبرعسكرى ايسه دنيا دن قبوره كوندنر بعده جيعى
الله تعالىنك دركاهنه جمع اولور * ديتلديكه انكه مراد مقاديرى

مواقبتنه سو قدر و یا خود معنی هر کونده انک عبیدینه بر جدیدی واردر
 (فبأی آلاء ربکما تکذبان) ربکز جل شانہ نک قنغی نعمترین انکار
 ایدر سزکه اول عبادنک مسؤولی ویرر و ممکنی عدمدن انلر ایچون انی
 چیقارر (سنفرغ لکم ایہ الثقلان) یا انس و جن یوم قیامتده سزک
 حساب و جزا کز ایچون تجرد ایدر سز * انس و جن ثقلان دیو تسمیه
 اولندیلر ارض اوزره ثقلر ایچون ویا رآی و قدرلری رزانتیچون ویا تکلیفله
 ثقیل اولدقلر ایچون (فبأی آلاء ربکما تکذبان) ربکز جل شانہ نک قنغی
 نعمترین انکار ایدر سزکه اول سزی اعمالکزله جزالندیرر و حسناتکزله
 ثوابلندیرر (یا معشر الجن والانس ان استطعتم ان تغدوا من اقطار
 السموات والارض فانفذوا لاتنفذون الا بسلمطان) یا معشر جن و انس
 اگر سز الله تعالیدن و قضا سندن فارین اولدیغکز سموات و ارضک
 جوانبندن چیقماغه قادر اولور سکز چیقک و الحال اکا قادر اولور سز
 الاقوت و قهرله اول ایسه سز قندن حاصل اولور و یا خود سموات
 و ارضده اولان اشیای بیلکه قادر اولور سکز بیلک و الحال انی بیلر سز
 الا الله تعالیدن بینه ایله و یا خود یوم قیامتده انلره دینور که اگر سموات
 و ارضک اطرافندن یکمکه قادر اولور سکز یکک شول زعمله کیم انکله
 رب تعالی بی عاجز ایدوب کندیکزه قدرتن ایر کور میه سز ایدک حالوکه اکا
 قدرت ایر کور مک امر محالدر (فبأی آلاء ربکما تکذبان) الله تعالینک قنغی
 نعمترین انکار ایدر سزکه سز تنبیه و مخالفتدن تحذیر و اوزر یکزده قدرتی
 کالنده ایکن مساهله و عفو ایدر و یا خود مصاعد عقلیه و معارج نقلیه دن
 امور کثیره نصب ایتدیکه انکله سموات علانک فوقنه نفوذ ایده سز
 خبرده کلدیکه یوم قیامتده محشر اهلنی ملائکه و نار احاطه ایدوب
 (یا معشر الجن والانس) آیتده ذکر اولندیغی منوال اوزره ندا اولنورلر
 (یرسل علیکما شواظ من نار و نحاس فلا تنصران) یا کفار انس و جن
 یوم قیامتده باشلریکز اوزره ناردن لهب خالص و صفر مذاب دوکلور
 سز ایسه اول عذابدن امتناعه قادر اولور سز (فبأی آلاء ربکما تکذبان)
 ربکز جل شانہ نک قنغی نعمترین انکار ایدر سز زیرا که تهدید لطفدر
 و مطیع و عاصی بیننی جزاء و انتقامله تمیز عداد آلاء دندر (فاذا انشقت
 السماء فکانت ورده کالدهان) چنانکه بعدنصکره جهنمک حرندن

(سماء)

سماء مذشق اولوب ساعت واحده ده عصیر زیت کبی الوانله متلون اولوب
 ورده لوننده کی فرس کبی ربیعه ده اصفر و اول شتاده اجر و شدت شتاده
 اغبر اولور یعنی اول کونک هیبتندن اکا ایریشن حرّ جهنمله بیله دهن
 مذاب کبی دوکلور (فبأی آلاء ربکما تکذبان) ربکز حق تعالینک قنغی
 نعمترین انکار ایدر سزکه چنان اول سز اول کونک هیبت و عذابندن
 خوف و حزن ایر کور میه (فیومئذ لا یسئل عن ذنبه انس ولا جان)
 سمانک انشقاقی کونده انس و جانندن هر کسه عمل قیچندن سؤال اولمز
 زیرا که سیمالزندن بیلنورلر که اول سواد و جوه و زرقة عیوندر صالحلر
 سیماسندن بیلنمی کبی که اول غره و تحجیلدر * دیندیکه سؤال اولنماملرینه
 سبب تاکه بیلنمی انلر قبلندن اولیه زیرا که الله تعالی انلرک جمیع احوالی
 بیلوبدر و حفظه ملکری یازوبدر حتی ملائکه انلره فلان عملی ایشلدیکز می
 دیو سؤال ایتزلر بیلکه انلری سیمالزندن بیلورلر اکر دینور سه که
 اشبو آیتله سورده کج (فوربک لتسألنهم اجمعین عما کانوا یعملون)
 آیتی بیلنده توفیق نوجهله در دینور که یعنی الله تعالی انلره سز شونک
 و شونک کبی کنه ایتدیکز دیو سؤال ایتز زیرا که اول انلرک اعمالنه انلردن
 اعلدر بیلکه انلره سز شونک و شونک کبی کنه ایچون ایشلدیکز دیو سؤال
 اولنور * دیندیکه یوم قیامتده بعض مواطنده سؤال و بعضنده سؤال اولمز
 و یا خود قلبه صفا و یرر شیئدن سؤال اولمز بیلکه سؤال اولنملری تو بیخ و تقریع
 وجهی اوزره اولور و یا خود بر مجرمک ذنبندن مجرم آخر سؤال اولمز
 (فبأی آلاء ربکما تکذبان) ربکز جل شانہ نک اول کونده عباد مؤمنینه
 اولور آلائنک قنغیسن انکار ایدر سز (یعرف المجرمون بسمیهم فیؤخذ
 بالنواصی و الاقدام) اول کونده مجرمون سیمالری سواد و جوه و زرقة
 عیونلریله بیلوب صاحبلری و یاقلرندن اخذدنصکره ناره براغیلورلر
 و یا خود کاهی یاقلرندن اخذ اولنوب یوزلری اوزره سوریدیلوب ناره
 براغیلورلر (فبأی آلاء ربکما تکذبان) ربکز جل شانہ نک قنغی نعمترین
 انکار ایدر سزکه مؤمنلردن بونک کبی عذاب شدید دفع ایدر بعده انلره
 دینور که (هذه جهنم التي یکذب بها المجرمون) اشبو اول جهنمدر که
 مجرمون انی تکذیب ایدرلردی (یطوفون بینها و بین حیم آن) انلر
 انده شول حرارتی نهایتده ماء حار بیلنده سعی ایدرلر که اول انلر

اوزره دوکاور واندن ایچریلور * دینلدیکه انلر آجقدقلرنده زقوم
یدریلوب بوغازلرنده طورر و صوصادقلرنده جیم ایچریلوب انکله جو فلی
غلیان ایدر (فبأی آلاء ربکما تکذبان) ربکر جل شانہ نك قنغی نعمترین
انکار ایدرسز اکا ایمان و حقیقته اذمانکز سبیلہ سزی بو غصه دن
انجا ایتدی (ولن خاف مقام ربہ جنتان) شول کسه که یوم قیامته
حساب ایچون رب تعالینک حضورنده قیامدن خوف ایدوب اکا مخالفتی
ترک و اطاعتی التزام ایده انکچون ایکی جنت وارد بری خائف انسی
وبری خائف جنی ایچون زیرا که خطاب ایکی فریقہ در و یاخود انلردن
هر کسه یه ایکی جنت اولور بری عقیده سی و بری عملچون و یاخود
بری فعل طاعات و بری ترک مخالفات ایچون و یاخود انک بری عملنه ثواب اولور
و بری ایسه الله تعالیدن فضل اولور و یا انک بری روحانیه و بری جسمانیه در
(فبأی آلاء ربکما تکذبان ذواتا افنان) اول ایکی جنتده اشجار و ثماردن انواعی
وارد و یا انک اشجاری چوق بوداقلودر که میوه سی یینور و پیراغنک و فرتیله
کولکسه سی بسیط اولور (فبأی آلاء ربکما تکذبان) اول سزه بونک کی
نعمت و افره و راحت متکثره یی تقدیم ایتشکن سز انک قنغی نعمترین انکار
ایدرسز (فیہما عینان تجریان) اول ایکی جنتده ایکی پیکار وار که
برینه تسنیم و برینه سلسبیل دینور جاری اولور (فبأی آلاء ربکما تکذبان
فیہما من کل فاکهة زوجان) و اول ایکی جنتده هر فاکه دن ایکیشر
صنف وار بری عریف و بری معروفدر و یاخود بری رطب و بری یابسدر
ابن عباس رضی الله عنه ایدر دنیاده کی میوه لر طتلوسنک و آجیسنک
جنتده نظیری واردر ابوبکه جیعی طتلودر (فبأی آلاء ربکما تکذبان
متکئین علی فرش بطائہا من استبرق) اول خائفلر ناعمین اولدقلری
حالده شول فراشلر اوزره اتکاء ایدرلر که باطنلری دیباج اخضر غلیظدنر
اما که ظاہری دینلدیکه نور جامدنر * ابن عباس رضی الله عنه ایدر انک
بطائنی ذکر اولنوب ظواہری ترک اولنسی بریوزنده انک ظواہرین ییلور
کسنه اولدیغیچوندر (وجنا الجنین دان) و اول ایکی جنتک شماری
تساولی قریدر قائم و قاعد و نائم اکا ایریشور * دینلدیکه شجرک غصنی
مؤمنه قریب اولور حتی که اول نه حالتده بولنورسه الی انک میوه سنه
ایرر دینلدیکی دکلو تعب و عناسز اندن دیرر (فبأی آلاء ربکما تکذبان

(فیہن)

فیہن قاصرات الطرف لم یطمثهن انس قبلہم ولا جان) اول جنتک
اما کن وقصورنده نساء واردر که کوزلرینی زوجلری اوزره قصر ایتشلردر
انلرک انسیہ لرینه زوجلرندن غیری انسی و جنیه لرینه زوجلرندن غیری
جنی مس و جماع ایتماشدر * ابن زید ایدر انلرک هر بری زوجنه دیه که ربم
جل شانہ عزتی حقیچون جنتده بکا سندن احسن کورمشن الله تعالی یه حد
اولسونکه سنی بکا زوج و بنی سکا زوجہ ایتدی (فبأی آلاء ربکما تکذبان
کا نهن الیاقوت والمرجان) اول نساء حرة و جنه و بیاض بشره ده کویا که
هر بری یاقوت و مرجاندر * پیغمبریمز صلی الله علیه و سلم ایدر اهل جنتدن
مرأه نك بیاض ساقی و مخی حریردن یتش حله نك و راسندن کورینور
(فبأی آلاء ربکما تکذبان هل جزاء الا احسان الا احسان) عملده احسانک
جزاسی ثوابده احساندر (فبأی آلاء ربکما تکذبان ومن دونہما جنتان)
اول خائفین مقربین ایچون وعد اولنان ایکی جنتدن دون اصحاب
یمین ایچون دخی ایکی جنت واردر (فبأی آلاء ربکما تکذبان مدهامتان)
اول ایکی جنت شدت خضر تندن سواده مائلدر اشبونده اشعار
واردر که اصحاب یمینه مختص جنتلره غالب نبات و ریاحین اوله که
وجه ارض اوزره منبسطه در و خائفین مقربین جنتلرینه غالب اشجار
و فواکه اوله تا که ایکی صنف پیننده تفاوت اولدیغنه اول دلالت ایده
(فبأی آلاء ربکما تکذبان فیہما عینان نضاختان) و اول ایکی جنتده
صوبی فوران ایدر ایکی پیکار واردر (فبأی آلاء ربکما تکذبان فیہما
فاکهة ونخل ورمان) وینه اول ایکی جنتده فاکه و نخل و رمان
واردر نخلک ثمره سی فاکه و غذادر و رمانک ثمره سی فاکه و دودادر
ابن عباس رضی الله عنه ایدر نخل جنتک جذوعی زمرد اخضردر
و ورقی ذهب احردر و سعفی اهل جنتک کسوملری اندن دوزیلور و میوه سی
دستولر و یاقوغلر امثالنده در که اول سوددن آق و بالدن طتلو و قایمقدن
یومشقدر چکرکی یوقدر (فبأی آلاء ربکما تکذبان فیہن خیرات حسان)
ذکر اولنان جنتلرک دروننده دخی زوجات واردر که خویلری خوب
یوزلری محبوبدر (فبأی آلاء ربکما تکذبان حور مقصورات فی الخیام)
اول زوجات حورالردر که مجوف انجودن دوزلمش خیمه لده
مستوره لدر بصرلری زوجلرینه نظر اوزره مقصوره در و اول خیمه لرک

طول وعرضی بر فرسخدر هر بر خیمه نك التوندن در در بیک مصرای
وارد زایه سنده انك صاحبی اولان مؤمنك زوجاتی وارد در که
اخراده کی زوجاتی انی کور منزل مؤمن انلری طواف ایدر (فبأی آلاء
ربکما تکذبان لم یطمئنن انس قبلهم ولا جان) که اول حورالری
صاحبلری اولان مؤمنلردن اول انس و جندن هیچ کسه انی وطی
ایتموبدر (فبأی آلاء ربکما تکذبان متکئین علی رفرف خضرو عبقری حسان)
انلر سریرلر اوزره قونلش یشل و ساده لره انکا ایدرلر و عبقره منسوب
نفیس بساطلره جلوس ایدرلر عبقر بلاد جندن بریدر که اکا هرشی عجیب نسبت
اولنور (فبأی آلاء ربکما تکذبان تبارک اسم ربك ذی الجلال والا کرام)
ربك جل شانہ تعظم ایتدی اندنکه نعم و سائر اشیایی خلقنده اکا شریک
اوله که اول سمات محدثاتدن رفیع القدر در و عباد موحیدنه سیئه لرینی
عفوله و درجه لرینی رفع ایله اکرام ایدیکیدر * دینلدیکه اسمله مراد صفتدر
ویا خود اسم لفظی مقمدر عائشه رضی الله عنها ایدر پیغمبریمز صلی الله
علیه وسلم نماز دن فارغ او لدیغنده (اللهم انت السلام ومنك السلام
تبارکت یا ذا الجلال والا کرام) دیه جک دکلور زمان
اوتورردی

سورة الواقعة وهی ست و سبعون آية مكية

بسم الله الرحمن الرحيم

(اذا وقعت الواقعة ليس لوقعتها كاذبة) ذکر ایت شول وقتی که انده
قیامت قائم اوله و یا صحیحه قیامت نازل اوله که اول صحیحه اخیره در اول
واقع اولدیغنده انك مجیئنی تکذیب ایدر نفس اولمز (خافضة رافعة)
اول الله تعالینك اعداسنی خفض ایدر و او لیاسنی رفع ایدر و بر قومی ناره
خفض ایدر بر قومی جنته رفع ایدر و یا خود اجرامی مقارندن ازاله ایدر
کواکبی ره ایندیرر و جبال هوا ده یوریدر (اذا رجت الارض رجاً) چنانکه
ارض تحریک شدید ایدیلوب فوقنده کی بناء و جبال منهدم اوله (وبست
الجبال بسا فکانت هباء منبثاً) و جبال قیریلوب اوقاقلنه حتی که غبار منتشر
خفیف اوله (وکنتم ازواجاً ثلاثه) يوم قیامتده سز اوج
صنف اولور سز (فاصحاب المیمة ما اصحاب المیمة واصحاب المشیمة

(ما)

ما اصحاب المشیمة) اول اوج صنفک بری اصحاب میمه در که کتابلری یمینلرینه
و یریلور قومدر یریلور میسنکه انلر نه خیر و کرامته ایرر و بر صنفی اصحاب
مشیمة در که کتابلری شماللرینه و یریلور قومدر یریلور میسنکه انلر نه عذاب
واها ته ایرر و یا اصحاب منزله سنیه میامنله میونلردر و اصحاب منزله دنیه
شمالله مشؤملردر و یا اصحاب یمین سعدار طاعتلریله نفسلرینه میونلردر
و اصحاب شمال اشقیادر معصیتلریله نفسلرینه مشؤملردر * ابن عباس
رضی الله عنهما ایدر اصحاب یمین انلر در که آدم علیه السلام صلبندن
ذریقی اخراج اولندقدن انك یمیننده اولوب الله تعالی انلرک حقنده بونلر
جنتده در دیدیکیدر و اصحاب شمال انلر در که اول وقتده آدم علیه السلام
شمالنده اولوب الله تعالی انلرک حقنده بونلر نارده در دیدیکیدر
(والسابقون السابقون) و بر صنفی دخی سابقوندر که انلر حق ظهور ند نصکره
تردد و توانیسز ایمان و طاعتله سبقت ایتدیلر و یا خود فضائل و کالات
احاطه سنه و یا پیغمبریمز صلی الله علیه وسلم دعوتنه اجابته سبقت
ایتدیلر که انلر اهل ادیانہ تقدم و یا جنته سبقت ایتدیلر (اولئك المقربون
فی جنات النعیم) ایدر انلر جنات نعیمده درجات عالییه تقریب اولنمشلردر
(ثلة من الاولین وقلیل من الاخرین) اول سابقون آدم علیه السلامدن
محمد صلی الله علیه وسلمه دکن یکن امتلرده کثیردر و امت محمدده قلیلدر
(علی سرر موضونه) انلر شول سریرلر اوزره اوتورلر که التوله
منسوج اولوب در و یا قوتله مشبکدر (متکئین علیها متقابلین) اول سریرلر
اوزرنده بری برلرینه قارشو اتکاء ایدر اولدقلری حالده (یطوف علیهم
ولدان مخلدون) انلرک خدمتلرینه قائملردر شول ولدانکه سن واحدده
هیئت و طراوتده ابداء ابقاء اولنمشلردر (باکواب و اباریق و کأس من معین)
شول مستدیرة الافواه عرویه سز اقداحله و دخی عرویه لو اناء لر ایله
و کأسله کیم اول خمر جاریه ایله طولودر (لا یصدعون عنها
ولا یزفون) اول خردن خاریله باشلری اغریمز و عقللرینه خلل
ایرمز (وفا کهمة مما یخیرون) و کذلک اول ولدان انلرک اختیار
ایتدیکی فاکه نك الواندن انلره کتورلر (ولحم طیر مما یشتھون)
واشتها ایتدیکلری لحم طیرک مشویسی و مطبوخنندن انلره کتورلر
دینلدیکه چقان اهل جنتدن برینک قلبه اول خطور ایتسه اشتها

ایستدیک کیفیتده صحفه ایچنده اوکنده بولنور دیلدیکی قدر بیدکنصکره
 کا کان طائر اولدیغی حالده اوچوب کیدر (و حور عین کا مثال اللؤلؤ
 المکنون) وانلر ایچون جنتده حور عین اولور که صفاء و نقاده
 صدفده مستور انجو کی کورینور (جزاء بما کانوا یعملون) انلره
 بوکرامت اعمال حسنه لرینه جزاء قیلنور (لایسمعون فیها لغوا و لاتأثما
 الا قلیلا سلاما سلاما) انده کلام باطل و یانسیبت اثم ایشتمزلر بلکه
 ایشتمکلی بری برلرینه سلام اولور و یا ملائکه دن انلره سلام اولور
 (واصحاب الیمین ما اصحاب الیمین) یوم میثاقده بیلز سنکه آدم علیه السلامک
 یمینده اولنلره توحید و طاعتلری سببیه نه خیر و کرامت ایرر (فی سدر
 مخضود) انلر جنتده دیکنی یوق میوه سی چوق نبق اغاجلری التنده در
 (وطح منضود) و بری برینه مترکم موز اغاجلری و یا ام غیلانده درکه
 انک ازهار کثیره سی اولور رایحه سی طیبه در (وظل ممدود) وظل دائم
 منبسطه در (وماء مسکوب) و صوده درلر که قنده اولسه لر دیلدکلی
 کیفیت اوزره منسکب اولور (وفا کهه کثیره لامقطوعة ولا ممنوعة)
 وفا کهه کثیره ده درلر که هیچ بروقتده اول کسلز و تناولدن منع
 ایدلز (وفرش مرفوعة) و رفیعة القدر و یا مرتفعه فراشلر اوزره درلر *
 دینلدیکه فرشله مراد نساء در و ارتفاعلری اریکه لر اوزره اولدقلریدر
 (انا انشأناهن انشاء فجعلناهن ابکارا عربا اترا با لاصحاب الیمین) بز نساء
 دنیایی جنتده و لادتنسز انشاء جدیدله انشاء ایدرز دنیاده عجائز ایکن انده
 جور جنتدن افضل و احسن قیللر و مع ذلک انلری عذرء ایدوب
 زوجلری انلره قربان ایتدیکه ابکار بولنورلر زوجلرینه عاشقه لر در اوتوز
 اوچر یاشنده سنده زوجلرینه مساویلر در اشبو کرامات مذکوره
 مؤمنلردن اصحاب یمین ایچوندر که انلر سابقوندن دوندر (ثله من
 الاولین و ثله من الآخین) اصحاب یمین ائم سابقه و کرک بوامته ده
 کثیردرلر پیغمبریمز صلی الله علیه وسلم ایدر اهل جنت جنته کیردکارنده
 نوجوان اولوب یوزلرنده قیل اولز قیورق صاچلو سرمه لوکوز لو
 اوتوز اوچر یاشنده آدم علیه السلام خلقتنده بویلی التمشر
 ذراع یصیلقلری یدیشر ذراع اولور پیغمبریمز صلی الله علیه وسلم
 ایدر اهل جنتک ادناسی اول کسه درکه سکسان بیک خادمی و یتش ایکی

(زوجہ سی)

زوجہ سی اولور و حایبه و صنعها اراسنجه لؤلؤ و زبرجد و یا قوتدن
 انکچون برقبه قوریلور و مرأه سنک یناغنه نظر ایتدیکنده آینه
 مثالنده انده کندی صورتن کورر و انک اوزرنده کی ادنی لؤلؤ مشرق
 و مغرب اراسنه ضیا ویرر و انک اکنده یتش ثوب اولوب کورلمسی
 جیعنه ایرر حتی که ساقنک ایلکین کورر اهل جنتدن برکسه که صغیر
 و یا کبیردر وفات ایده جنته کیردیکنده اوتوز اوچ یاشنه رد اولنور
 اهل نار دخی انجیلندر * ابوهریره رضی الله عنه ایدر اهل جنتک منزلته
 ادناسی اول کسه درکه غداة ورواحده خدمتته اون بیک خادم قیام
 ایده هر بری برطریقہ ده اوله که اول انک صاحبنده اولیه (واصحاب
 الشمال ما اصحاب الشمال) یوم میثاقده آدم علیه السلامک شمالنده اولنلر
 بیلز میسنکه انلره یوم قیامتده شر و اهانتدن نه حالت ایرر (فی سموم و حیم)
 انلر حر ناردده درکه مسامه ایرر و حری نهایته ایرمش ماء ده در (وظل
 من یحموم) و دخان اسوددن کولکه ده در (لابارد ولا کریم) که اول
 سائر کولکه لر کی نه بارد و نه نافعدر * دینلدیکه ناریک کندی
 و اهلی و آنده کی اشیانک جیعی سیاهدر * دینلدیکه یحموم اسماء
 ناریک بریدر (انهم کانوا قبل ذلک مترفین) زیرا که انلر دنیاده ایکن شهواته
 منهمکین ایدیلر (وکانوا یصرون علی الحنث العظیم) که انلر اشراکه
 و بعضی انکاره مصرین ایدیلر (وکانوا یقولون أئذا متنا و کنا ترابا و عظاما
 أئنا لمبعوثون أو أبأؤنا الاولون) و دیرلر دیکه یقینکه بز فوت اولوب لحوم
 و عظامز تراب اوله آباء اقدمینز اولدیغی کی بعده بز و آبائز بعث اولنورمیز
 (قل ان الاولین و الآخین لمجموعون الی میقات یوم معلوم) یا محمد انلره
 دیکل که بنی آدمک اولین و آخرینی جمع اولنیردر شول کونه دکین که اول
 عند الله معلومدر (ثم انکم ایها الضالون المکذبون) بوندنصکره
 یا اهل مکه و اضرابی که حق یولندن آزمیشلر و بعضی تکذیب ایتشلر در
 (لا کون من شجر من زقوم) سز محشره وارد یغکزده شجر زقومدن بر سز
 (فالئون منها البطون) شدت جوعله اندن قارنلر بکزی طولدر سز
 (فشاربون علیه من الحیم) و غلبه عطشه زقوم اوزره ماء حمیدن ایچر سز
 (فشاربون شرب الهمیم) شول ابلیک ایچمسی کی که اول هیام علتته
 مبتلادر که اول استسقایه بکزر برداء در (هذا نزلهم یوم الدین) اشبو

بع (۱۴)

انلر ایچون اعداد اولنمش یوم جزاده کی رزق لیدر تأمل ایتکه نار جمیعجه
استقرار لرنده رزق لری نه اولور (نحن خلقناکم فلو لا تصدقون) یا کفار
بز سزی عدمدن وجوده کتوردک بعثه تصدیق ایتزمیسز که اگر نظر
صحیحله نظر ایتسه کز ابتداء خلقه قادر اولان رب تعالی اعاده یه قادر
ایدیکن بیلوردیکز (أفرأیتم ماتمنون) بکا خبر ویرک منی بی که انی ارحام
نسایه صب ایدرسز (ءاتم تخلقونه ام نحن الخالقون) اول منی بی
ارحامده بشر خلق ایدن سزمیسز یوخسه بز میر بلکه بز زرا که سزاندن
عاجز لرسز (نحن قدرنا بینکم الموت وما نحن بمسبوقین علی ان نبذل امثالکم
وننشکم فیما لا تعلمون) سزدن هر بریکزک موتنی وقت معینله کیمیکزی
صغری و کیمیکزی کبری حالنده اولسنی تقدیر ایتدک بز عاجز دکالرز که سزی
اهلاک ایدوب بریکزه بر اهل طاعت خلق کتوره وز و یا سزی انسان
صورتدن غیری قرده و خنازیر صورته تحویل ایده وز سزدن اول کچن
امتلك کافر لینه ایتدیکمز کبی (ولقد علمت النشأة الاولى فلو لا تذکرون)
حالبو که امهاتکز قارنده ایکن اولان نشأة اولای بیلورمیسز ایمدی اکا
قادر اولان رب تعالی نشأة اخرایه دخی قادر اولور زرا که انده صنع موادی
حاصل اولدیغیچون اشبونده قیاسک صحنه دلالت واردر ایمدی انکله
متعظ اولزمیسز ایمانه کله سز (أفرأیتم ما تحرثون) بکا خبر ویرک
شول حبه که انی ارضه القاء ایدرسز (ءاتم ترعونه ام نحن الزارعون)
انی انبات ایدن سزمیسز یوخسه بز میر بلکه بز سز برشیئه قادر
دکالرسز (لونشاء لعلنا حطاما فظلمت تفکھون) اگر دیلر سه وزانی
حبه سز تبین و یا انتفاع اولنر هشیم قیلوردق اولیه اولسه زر عکزه نازل
اولان حالته تعجب و یا اکا اولان نفقاتکزه ندامت ایدردیکز (انا لمغرمون
بل نحن محرومون) مع ذلک دیر سز که بز انفاق ایتدیکمز شیثک غرامتن
ملزملرز و یا رزقز هلاکیله بز دخی مهلکلرز بلکه زرعله طلب ایتدیکمز
زرعدن محروملرز (أفرأیتم الماء الذی تشربون) بکا خبر ویرک شول
طاتلو صوبی که سزانی ایچرسز (ءاتم انزلنوه من المزن ام نحن المنزلون)
اول صوبی بولندن سز می ایندیررسز یوخسه بز می بلکه قدر تمزله انی
بز ایندیررز (لونشاء جعلناہ اجاجا فلو لا تشکرون) اگر دیلر سه وز زانی
ایچی و طوزلی ایچلر ایدردک ایمدی بونک امثالی نعم ضروریه یه شکر ایتزمیسز

(أفرأیتم)

(أفرأیتم النار الذی تورون) بکا خبر ویرک شول آتشیکه زند و خشیدن
قد حله انی چیقار سز (ءاتم انشأتم شجرتها ام نحن المنشئون)
اول نار قدح اولنان شجره که مرخ و عفارد ر انی سز می انشاء ایدرسز
یوخسه بز می بلکه منفعت خلق ایچون انی بز خلق ایتمز (نحن جعلناها
تذکرة و متاعا للقیون) بز اول ناری نار جهنمدن نمونه و بلغه و منفعه
قیلدق شول کسه لر ایچونکه عمراندن خالی ارضه داخل اوله لر و یا انلر
ایچونکه بطون و مراودلری طعامدن خالی اوله یعنی اهل بوادی و اهل
اسفارک نار له انتفاعی مقیمک انکله اولان انتفاعدن اکثر در که کیمیده
انی ایقادیله کندیلردن سباعی قاچر لر یولارین یتور مشر ایتسه بولور لر
وصغو قدح انکله اصینور لر و آش و اتمکترین پشور لر و اول شجره
ناری جوالقلرنده ائوابلری اراسنده طاشر لر (فسبح باسم ربک العظیم)
ایمدی ربک جل شانہ نک اسم عظیمی تنزیه ایت هر شیتدنکه انک وحدایتنه
منکر و نعمتنه کافر اولانلر انی دیر (فلا اقسم بمواقع النجوم) نجومک
مساقطیله قسم ایدرین انده اثری زائل اولور و مؤثر نک وجودی بیلور
و یا انکله مراد نجوم قرآندر و مواقعی اوقات نزولیدر (وانه لقسم لو تعلمون
عظیم) قرآنله قسم بیلور سکز قسم عظیمدر زرا که انده مقسم بهک
عظم قدرت و کمال حکمت و فرط رحمتنه دلالت واردر و مقتضیات
رحمتندن بری بودر که عبادینی مهمل ترک ایتیه (انه لقرآن کریم)
اول مقسم به قرآندر که الله تعالی به کرامتلودر انده اولان تنزیه و تقدیس
و مواعظ و احکام کثر تیچون (فی کتاب مکنون) شول کتابده که
اول خلیقندن مصوندر که اول لوح محفوظدر (لایمسه الا المطهرون)
اول لوح محفوظه مطلع اولمز الا شول ملائکه که کدورات جسمانیهدن
مطهر لر در و یا قرآنی مس ایتز الا انلر که احداثدن مطهر لر در اولیه اولسه
جنب و حائض و محدثدن هیچ برینه مصحفی جل و مس جائز اولمز که
اول اکثر علماء قولیدر مالک و شافعی اکا ذاهبدر ابو حنیفه دیدیکه محدث
و جنبه مصحفی جل و مس جائز اولور (تنزیل من رب العالمین) اول قرآن
منزلدر اول الله تعالی دنکه خلایق خلق و تربیه ایتدی (أفبهذا الحدیث
انتم مدھنون) یوخسه اشبو قرآنه تکذیب و یا تهاونمی ایدرسز
تلاوتده متصلب و موجبیله عملده مخلص دکالرمیسز (ونجعلون

رزقكم انکم تکذبون) وقرآندن حظ و نصیبکزی انی تکذیب
ایتمیمی قیلور سز * دیندیکه کفار امطار اولنسه لر بو مطر بزه
فلان نجمک نویله در دیوب انی رزاقک غیری به نسبت ایدر لر دی
زید بن خالد الجهنی ایدر پیغمبریز صلی الله علیه و سلم حدیده ده ایکن
کجه یغهور یاغوب انک اثرنده صلاة صبحی ادا وانصرافندنصرکه ناسه
اقبال ایدوب دیدیکه بیلور میسرکه ربکز جل شانه نه دیر دیدیلر که الله تعالی
ورسولی اعلدر دیدی دیر که عبادمک کیمی بکا مؤمن و کو کبه کافر و کیمی
کو کبه مؤمن و بکا کافر اولور اما اولکه اشبو یغهور بزه الله تعالیکن فضل
ورحمتله در دیر اول بکا مؤمن اولوب کو کبه کافر در و اما اولکه بو یغهور
بزه فلان کو کبک نویله در دیر اول بکا کافر اولوب کو کبه مؤمن در (فلولا
اذا بلغت الحلقوم وانتم حينئذ تنظرون) چنان محتضرك روحی حلقومنه
ایریشه بشر ایه اکا نظر ایدوب بر نفع ایر کورمز سز نیچون روحی
جسدینه دوندر مز سز (ونحن اقرب اليه منكم ولكن لا تبصرون)
حالبوکه بز اول محتضره علم و قدرت جهندن سز دن اقربز لکن بزم اکا
قر بزمی سز ادراک ایتمز سز (فلولا ان كنتم غير مدينين ترجمونها ان كنتم
صادقين) اکر امر سزك دیدیککز منوال اوزره بعث و حساب و جزاء
اولمز دیدیککزده صادق لر ایه کز شول سززه عزیز کسه نك روحنی نیچون
کیرو دوندر مز سز چنانکه اول انک حلقومنه ایریشه چون اکا امکا نکز
یوقدر بیلک که امر یکز سز دن غیر نك یدنده در که اول الله تعالیدر اکا
ایمان کتورك (فاما ان كان من المقربين فروح وريحان وجنة نعيم) اکر
اول وفات ایدن سابقیندن ایه انکچون هر تعبیدن استراحه و یا حیات
طیبه دائمه واردر و یارزق دائم و یا عینی شم اولور شیء و یا ذات تنم واردر
(واما ان كان من اصحاب اليمين فسلام لك من اصحاب اليمين) واکر اول
وفات ایدن اصحاب یمیندن ایه اکا موتی عندنده و یا قبرده و یا صراط
اوزرنده اکا دینور که یا صاحب یمین اخوانك سکا سلام ایدر او یله اولسه
اول سلام اکا اهل جنت ایدیکنه بشارت اولور (واما ان كان من المكذبين
الضالين فنزل من جهيم وتصلية جهيم) واکر وفات ایدن بعضی تکذیب ایدر
صراط مستقیم قویوب طریق ضلاله کیدر اصحاب شمالدن ایه اکا
قبرنده نارك سموم و دخاندن ایریشور (ان هذا لهو حق اليقين) اشبو

(سوره ده)

سوره ده ویاوچ فریق شائنده ذکر اولسان حقیقت یقیندر که اول شکمز
علدر (فسبح باسم ربك العظيم) ایدمی ربك جل شانه بی عظمت شانه
لایق اولیان شیئدن (سبحان الله العظيم) دیمکه تنزیه ایت عقبه بن عامر
ایدر (فسبح باسم ربك العظيم) آیتی نازل اولدیغنده پیغمبریز صلی الله
علیه وسلم انی رکوع کزده دیکز دیدی (سبح اسم ربك الاعلی) آیتی نازل
اولدیغنده انی سجود کزده دیکز دیدی پیغمبریز صلی الله تعالی علیه وسلم
ایدر ایکی کله واردر که لسانده خفیف میرانده ثقیلدر الله تعالی به سوکاو در که
اول سبحان الله و بحمده سبحان الله العظيم ذکریدر پیغمبریز صلی الله تعالی
علیه وسلم ایدر برکسه که (سبحان الله العظيم و بحمده) دیه انکچون جنتده
برنخله غرس اولور * پیغمبریز صلی الله تعالی علیه وسلم ایدر برکسه که
هر کجه ده سوره واقعه بی اوقیه اکا فقر و فاقه و رنج شاقه ایرشیمه

سورة الحديد وهي تسع وعشرون آية مكية

بسم الله الرحمن الرحيم

(سبح لله ما فی السموات والارض وهو العزيز الحكيم) سموات وارضده
اولان مخلوقاتك کلیسی الله تعالی به تنزیه ایدمی هر شیئدنکه اول انک
ذات و صفاته لایق اولمز * دیندیکه شیئی انفاذه قدرتی کامله در امر
وفعلی حکمت مقتضاستجه در (له ملك السموات والارض یحیی ویمیت
وهو علی کل شیء قدير) سموات وارضك ملکی آنکدر دیلدیکی کیفیت
اوزره انده تصرف ایدر احیاء و اماته ایدر اول هر شیئه قادر اولور (هو
الاول والاخر) اول الله تعالی سائر موجودات اوزره سابقدر موجد
و محدث اولدیغی حیثیتدن و اول موجوداتك فنانسندنصرکه باقیدر و یا خود
اول اولدر که اسباب اندن ابتداء اولور * و آخردر که مسببات انده
نهایت بولور و یا خود خارجده اول و ذهنده آخردر (والظاهر والباطن)
کثرت دلائله وجودی ظاهر در و حقیقت ذاتی باطندر انک کهنه عقول
ایرمز و اول هر شیئه غالبدر و هر شیئك باطنه عالمدر (وهو بكل شیء علیم) اول
هر شیئه علیمدر عندنده ظاهر و خفی مساویدر (هو الذی خلق السموات
والارض فی ستة ايام ثم استوی علی العرش) الله تعالی سموات وارض
وما بینهمای الی کونده خلقندنصرکه عرش اوزره استیلاء ایدمی

(يعلم ما يلج في الارض وما يخرج منها وما ينزل من السماء وما يعرج فيها) اول
الله تعالى يبلور انيكه ارضه ولوج ايدر اموات وكنوز ومياه كبي ودخى
انيكه ارضدن خروج ايدر نبات واقوات وكنوز كبي ودخى انيكه سماندن
نزول ايدر مطر وثلج وبرد كبي ودخى انيكه سمايه صعود ايدر ملائكه
وارواح واعمال عباد كبي (وهو معكم انما كنتم) اول الله تعالى نك علم
وقدرتي سزكه در هيچ برحاله اول سزدن منفك اولز (والله بما تعملون
بصير) الله تعالى سزك خير وشر اعمالكزه بصير در يوم قيامته ثواب
وعقابتدن جزا كزي اير **كورر** (له ملك السموات والارض والى الله
ترجع الامور) سموات وارض وما بينهما نك خلق وملكى اكا مختصدر
جميع امورك عواقبي اكا رجوع ايدر (يولج الليل في النهار ويولج النهار
في الليل) الله تعالى ليلى نهاره ونهارى ليلاه ايلاج ايدر برين كتوروب
برين كيدر برين اكسلدوب برين آرتورر (وهو عليم بذات الصدور)
اول قلوبده اولان ايمان وكفرى بيلور (آمنوا بالله ورسوله وانفقوا مما
جعلكم مستخلفين فيه) الله تعالى ورسوله ايمان كتورك وانك سيديله
انفاق ايدك شول اموالدينكه انى تصرفده سزى استخلاف ايتديكه حقيقته
انك جميعى الله تعالى نكدر يوخسه سزك دكل (فالذين آمنوا منكم وانفقوا
لهم اجر كبير) سزدن شونلر كه الله تعالى به ورسوله ايمان كتوروب
سبيل طاعاته اموالدرندن انفاق ايدلر انلر ايچون جنتده اجر عظيم واردر
(ومالكم لاتؤمنون بالله) سزه نولديكه الله تعالى به ايمان كتورمز سز كفره
اصرار ايدر سز (والرسول يدعوكم لتؤمنوا ربكم) پيغمبريمز صلى الله
عليه وسلم ايسه سزى دعوت ايدر كه ربكز جل شاننه نك وحدانيتنه
تصديق ايدممز (وقد اخذ ميثاقكم) حالبو كه الله تعالى سزدن اخذ
ميثاق ايتدى شول حينده كه سزى صلب آدمدن قرنجه صورتده
اخراج ايدوب سزه عقل تركيند نصكره بن سزك ربكز دكليم ديديكنده
جميعكز بلى ياربنا ربمزن ديمشديكز (ان كنتم مؤمنين) اكر اول
اقراريكز اوزره صادق ايسه كز ايمان تركنده عذريكز قابليوبدر
وياخود الله تعالى بوندن اول نصب ادله وسزه نظره تمكين ايله ايمان
اوزره سزدن اخذ ميثاق ايتشدى اكر انى مصدقين ايسه كز اكا انقياد
ايدر سز (هو الذى ينزل على عبده آيات بينات ليخرجكم من الظلمات

(الى)

(الى النور) اول الله تعالى عبتى محمد عليه السلامه آيات واضحات
انزال ايدر كه سزى ظلمات كفردن نور ايمانه اخراج ايدر (وان الله بكم
لرؤف رحيم) اول الله تعالى سزه رافتلو ورحملودر كه رسولر وآنلر ليله
تنبيه ايتدى حجج عقليه دن نصب ايتديكيله اقتصار ايتدى (ومالكم
الاتفقوا في سبيل الله) سزه نولديكه كنديكزى رب تعالى نك رحمتنه
تقريب ايدر شيئه انفاق ايتز سز (ولله ميراث السموات والارض)
حالبو كه سموات وارضك ميراثى الله تعالى به مختصدر كه سزى اماته ايله
اموالكزى ترك ايتديككزده اندن غيرى وارثكز اولز اموالكزك جميعى
اكا واصل اولور وبالى اوزريكزه قالور ايتدى انفاق ايله آخرته سزه
ثوابى قالمسى اولى در اندنكه امساكه اوزريكزه وبالى قاله (لايستوى منكم
من انفق من قبل الفتح وقاتل اولئك اعظم درجة من الذين انفقوا من بعد
وقاتلوا) الله تعالى عندنده فضل وثوابده مساوى اولز اول كسه كه مكه
فتحندن او كدين انفاق وقاتل ايدلر شول كسه لره كيم فتحدن نصكره انفاق
وقاتل ايدلر اشبو آيت ابوبكر الصديق رضى الله عنه شانده نازل اولوبدر كه
ابتدا اول اسلامه كلدى وفي سبيل الله مالى اول انفاق ايتدى * ابن
مسعود رضى الله عنه ايدر اسلامى ابتدا سيفله اظهار ايدن پيغمبريمز
صلى الله تعالى عليه وسلم وابوبكر رضى الله عنه ايتدى ابن عمر ايدر پيغمبريمز
صلى الله تعالى عليه وسلم قنده ايدم ابوبكر عندنده ايتدى اكننه برعبا
كيمش كو كسنى خلال ايله ايلدر مشدى جبرائيل عليه السلام اول حينده
نازل اولوب ايتدى سبب ندر كه ابوبكرى بوهيئنده كوردم پيغمبريمز صلى الله
تعالى عليه وسلم ايتدى زيرا كه اول مالى فتحدن اول في سبيل الله انفاق
ايتدى جبريل عليه السلام ديديكه الله اكا سلام ايدوب دير كه فقرنده
بندن راضى مى يوخسه ساخطميدر چون پيغمبريمز صلى الله تعالى عليه
وسلم انى ابوبكره خبر ويردى ابوبكر ديديكه بن ريم جل شاننه سخطمى
ايدر دم بلكه اندن راضيم (وكلا وعد الله الحسنى) الله تعالى انلردن
ايكى فريقه دخى جنت وعد ايتدى ابوبكره فتحدن اول انفاق ايدنلر
جنتك افضل درجاتنده در (والله بما تعملون خبير) الله تعالى اعمالكزك
ظاهر وباطنه خبير در انك حسنجه جزا كز ايدر (من ذا الذى
يقرض الله قرضا حسنا فيضاعفه له) نه كسه در كه مالندن فقرايه

وطاعته انفاقده اخلاص و تحری اکرم مال و افضل جهات رعایت
ایتمیله الله تعالی دخی انک اجرینی مضاعف ایده (وله اجر کریم)
و اول اجور مضاعفه ایلله بیلله شول نفسنده کرم آخر دخی منضم اوله
لابق اولور که طلب اولنه اگرچه متضاعف اولزسه ده فکیف که
مضاعف اوله (یوم تری المؤمنین و المؤمنات یسعی نورهم بین ایدیهم
و بایمانهم) یوم قیامتده اهل ایمانک رجال و نسائی صراط اوزرنده
کوره سنکه نورلری اوکلرنده و صاعغرنده کیده که اول انلره موجب
نجات و دلیل طریق جنت اولور پیغمبریمز علیه السلامدن روایت
اولنور دیمشکه اول کونده مؤمنلردن کیمک نوری موضع قدمنده اوله
اندن زیاده ضیاء و یرمیه * ابن مسعود رضی الله عنه ایدر انده
هرکسه نک نوری اعنالی دکاو اولور کیمک نوری نخله کبی و کیمک رجل
قائم کبی ادنا حالونک نوری ابهامنده اولوب کاهی سوینور و کاهی
آیدنلنور بعضیلر دیدیکه نورلری انجق اوکلرنجه اولاندر صاعغرنده کی
صایف اعمالریدر (بشراکم الیوم جنات تجری من تحتها الانهار
خالدين فیها) ملائکه انلره دیه که اشبو کونده سزه بشارت اولسونکه
جنتلره کیررسز انک اغاچلری التندن نهرلر جاری اولور سز انده
دائمین اولدیغکز حالده (ذلک هو الفوز العظیم) ذکر اولندیغی اوزره
نور و یرلمکز و جنته کیرمکز فوز عظیمدر (یوم یقول المنافقون و المنافقات
للذین آمنوا انظرونا نقبیس من نورکم) اول کونده اهل نفاقک رجال
و نسائی مؤمنلره دیه لر که بزه منتظر اولک که سزک نورکزه بز دخی
ضیالنده لم (قیل ارجعوا و راءکم فالتمسوا نورا) اول منافقلره استهزاء
طریق اوزره دینور که دنیایه رجوع ایدک که معارف الهیه و اخلاق
فاضله تحصیل ایلله نور التماس ایده سز زیرا که نور اندن تولد ایدر و یاخود
موقفه رجوع ایدک که نور اندن اقتباس ایدیلور و یاخود دیلدیگکز
مکانه رجوع ایدک که نور آخر طلب ایده سز زیرا بزم نورمزه و اصل
اولغه سزه چاره یوقدر اویله اولسه منافقلر نور طلبچون رجوع ایده لر
برشی بولیمق مؤمنلره ایشمک ایچون کیرو صراطه کله لر (فضرب بینهم
بسورله باب باطنه فییه الرحمة و ظاهره من قبله العذاب) اول حالتده
مؤمنلره منافقلر بینتی تمیز ایچون اول ایکی فریق اراسنه بر دیوار چکیله که

(اول)

اول جنت ایلله جهنم اراسنده در انک بابی اولور باطننده رحمت اوله که اول
جنته ولی ایدر مؤمنلر اولدیغی جهتدر و اول بابک خارجنده عذاب
اوله که اول جهنمه ولی ایدر منافقلر اولدیغی جهتدر (ینادونهم ألم نکن
معکم قالوا بلی) منافقلر صراط اوزرنده دیوارک طشره سنده ظلمنده
قالیمق مؤمنلره ندا ایدوب دیه لر که دنیاده بززکله دکلی ایدک سزکله بیلله
عبادت ایتزیمدک مؤمنلر دیه لر که بلی ظاهرده سز بزه موافقت ایدر دیکز
(ولکنکم فتنتم انفسکم) لکن سز کندیگری نفاقله اهلاک ایتدیکز
(و تربصتم) و مؤمنلره حوادث و نکبات ایرمسنه منتظر اولور دیکز
(وارتبتکم) و دین اسلامده شک ایتدیکز (وغرتکم الامانی) و سزی
ابطیل و طول امل و انک امشالی احادیث کاذبه تغیر ایتدی
(حتی جاء امر الله) حتی که سزه الله تعالینک امری یعنی موت ایدر
(وغرتکم بالله الغرور) و سزی شیطان و یا دنیا الله تعالی ایلله الدادی
(قالیوم لا یؤخذ منکم فدیة ولا من الذین کفروا) اشبو کونده یا منافقین
سزندن و یا کفارندن فدیة اخذ اولنمز که عذابدن قورتلر سز (ما ویکم
النار هی مولیکم و بیئس المصیر) قرار کاهکز جهنمدر اول سزه اولی در
مولانک عبنده کی تصرفی کبی اول سزده تصرف ایدر اول نه مبؤس
مرجع اولور (ألم یأمن الذین آمنوا ان تخشع قلوبهم لذكر الله وما نزل
من الحق) مؤمنلره شول وقت کلدیمیکه الله تعالینک ذکرینه و قرآنه قلبلری
خشوع ایده * دینلدیگه مؤمنلرمکه ده ایکن قرآنی اوقویوب موجب عمل
ایدرلردی مع ذلک جذب و نقطده ایدیلر وقتاکه مدینه یه هجرت ایدوب
رزق و نعمته ایدیلر صدندن اولدقلری عملدن قورلندیلر اول سبیدن
بوآیت نازل اولدی (ولانکونوا کالذین اوتوا الکتاب من قبل فطال
عليهم الامد فقسست قلوبهم و کثیر منهم فاسقون) اشبو قرآندن اول کتاب
و یریلنلر کبی اولمکز کندیبلرله انبیاء بیننده زمان طویل اولیمق دنیایه
میل و مواعظدن اعراض و شهواته اتباعله قلبلرینه قسوت اروب
کتابلریله عمل ایدنلری قلیل اولدی کثیرلری دیندن چیقوب کتابلرنده
اولان شیئله عملی ترک ایتدیلر * دینلدیگه اشبو آیت شول قوم شاننده نازل
اولوبدر که مجرد لسانله مؤمن اولوب قلبلری اندن غافل اوله ابوالدرداء
ایدر خشوع نفاقدن الله تعالی یه استعاذه ایدک که اول جسد خاشع

کوریلوب قلبك اندن خالی اولمیدر (اعلموا ان الله يحیی الارض بعد موتها) بیلک که الله تعالی ارضی یدسله موتدنصکره مطرله احیاء ایدر کذلک قلوب قاسیه بی ذکر وتلاوتله احیاء وتلین ایدر حتی که قسوت وظلمدنصکره نورلنور (قدینالکم الايات لعلکم تعقلون) بزسه آیتلری تبیین ایتدک تا که عقلمده کاملین اوله سر (ان المصدقین والمصدقات واقروا الله قرضا حسنا يضاعف لهم ولهم اجر کریم) رجال ونسادن شونلر که الله تعالی ورسولنی تصدیق ویاخود مالارینی تصدیق ایدرلر ودخی طیبیت نفس وحسن نیتله مستحقینه تصدیق ایدوب الله تعالی یه اقراض ایدرلر انلر ایچون اول اقراضلرینک ثوابی اون امثالیه یدیبوزه ومالایحصایه دکن ایمان واخلاصلری حسبینجه مضاعف قیلنور ودخی اجر کریم ویریلور که اول جنتدر (والذین آمنوا بالله ورسله اولئک هم الصدیقون والشهداء عند ربهم لهم اجرهم ونورهم) شونلر که الله تعالی یه ورسولرینه ایمان کتوردیلر انلر عند الله صدیقین وشهداء منزلتمده در ویاخود صدقده مبالغلدر زرا که الله تعالی نک ورسوللرینک جمیع اخبارینی تصدیق ایتدیلر والله تعالی ورسوللری ایچون شهادتده ویاخود یوم قیامتده ام اوزره شهادته قائمدر ویاخود معنی رب تعالی عندنده شهداء که انبیاءدر ویاشونلر که فی سبیل الله قتل اولنلندر انلر ایچون صدیقین وشهدانک اجر ونوری مثلی اولور الا بو که تضعیفسر تا که تفاوت حاصل اوله ویاخود انلر ایچون اجر ونور موعود وارد (والذین کفروا وکذبوا باياتنا اولئک اصحاب الجحیم) شونلر که الله تعالی یه کافر اولوب آیتلری تکزیب ایتدیلر انلر اصحاب جحیمدر بونده دلالت وارد که نارد خلود کفار مخصوص اوله شول حیثیتدنکه ترکیب اختصاصی اشعار ایدر وصحبه ایه عرفده ملازمته دلالت ایدر (اعلموا انما الحیاة الدنیا لعب ولهو وزینة وتفاخر بینکم وتکاثر فی الاموال والاولاد) بیلک که حیاة دنیا دکل الالعیدر که اربابی انده کندیلرین اتعاب ایدرلر صبیانک ملاعبده کندیلرینی بی قائده اتعابلری کبی ولهو در که انکله کندیلرین مهم اولان اشیارلرندن اشغال ایدرلر وزینتدر که ملابس حسنه ومربک بهیه ومنازل رفیعه ایلر تیز ایدرلر وتفاخردر که بری برلرینه انسابلرینک مفاخرینی ذکر ایدرلر وتکاثردر که

(اموال)

امول واولادلرینک کثرتیه مباهات ایدرلر (کمثل غیث اعجب الکفار نیاته ثم یهیج فتراه مصفرا ثم یكون حطاما) شول مطر مثلدیر که اکینلر بتوره انک بتمی اکنجیلری ویانم الهیه بی انکار ایدیلری اعجاب ایده بعده قوریوب سن انی صرارمش کوره سن بعده اول قوریلغندن اواقلمه اش بونده دنیانک سرعت زوالته واربانک اندن قله منالنه تنبیه وارد (وفی الآخرة عذاب شدید) آخرتده عذاب شدید وارد اکا که دنیا وزینتیه افتخار وکفار کبی انی اختیار ایده (ومغفرة من الله ورضوان) وینه آخرتده الله تعالی دن مغفرت ورضوان وارد اکا که دنیا وزینت ترک ایدوب آخرتی اختیار ایده (وما الحیوة الدنیا الا متاع الغرور) عبتک حیات دنیا به اشتغاله آخرت طلبن ترک ایدنک مثلی شول زجاج وخزفدن دوزلمش متاع ایلر بنی آمک اغترارینه بکزر که اول تیز زمانده فنا بولور (سابقوا الی مغفرة من ربکم) ربکزر جل شانهنک مغفرتی اسبابنه مسابقت ایدک که اول توبه وطاعتدر (وجنة عرضها كعرض السماء والارض) ودخی شول جنته مسابقت ایدک که انک عرضی سموات وارض عرضجه در که اول بری برینه الصاق اولنسه ایددی عرضی بو دکلو اولیحق تأمل ایتکه طولی ندکلو اولور (اعدت للذین آمنوا بالله ورسله) که اول الله تعالی یه ورسوللرینه ایمان کتورنلر ایچون اعداد اولندی اش بونده دلالت وارد که جنت مخلوقه اوله واکا استحقاقه مجرد ایمان کفایت ایدر (ذلک فضل الله یؤتیه من یشاء) اشبو ثواب موعود الله تعالی نک فضلدر انی دیلدیکی کسه یه ایجابنسر ویرر (والله ذو الفضل العظیم) الله تعالی اکا اطاعت ایدنه فضل جزیل صاحبیدر ایددی بو ثوابله تفضیل اکا بعید اولز اگرچه قدری عظیم ایهده (ما اصاب من مصیبة فی الارض ولا فی انفسکم الا فی کتاب) برمصیبت که یریوزینه ایرر ققط مطر وقلت نبات ونقص ثمار وغلاء سعربکی ویا تفسلریکزه ایرر مرض ووجع وفقد ولد وخوف عدو وجوع کبی الا اول لوح محفوظده مکتوبه علم اللهده مثبتدر (من قبل ان نبرأها) بزیری ویا سزی خلق ایتزدن اول (ان ذلک علی الله یسر) انی لوحده اثبات الله تعالی یه آساندر (لکیلا تأسوا علی ما فاتکم ولا تفرحوا بما آتیکم) الله تعالی انی لوحده ثبت وکتب ایتدی تا که نعم دنیادن فوت اولانه

قضاء الله سخطه یرنمیه سز و انک سزه و یردیکنه تکبرله سونمیه سز بلکه
شکر ایلیمه سز زیرا اول کسه که هر شیئی مقدر ایدیکن بیلنه و یریلنه
سوی نور و نه و یریلیمه یرینور اول اجلدن دینلدیکه مؤمن کامل اول کسه درکه
فرحن شکرله مصیبتن صبرله یکوره (والله لا یحب کل محتال فخور)
الله تعالی سومز اول کسه بی که اکا و یریلن حطام دنیا ایلله تکبر و ناس
اوزره فخرلنه * جعفر صادق ایدر موقوفه نیچون یرینورسن اول سکافائی
ردایتز و موجوده نیچون سوی نورسن موت انی یدکده ترک ایتمز (الذین
یجملون ویأمرون الناس بالبخل ومن یقول فان الله هو الغنی الحمید) شونلرکه
ماللرینی مستحقینه اعطادن امتناع ایدرلر و مع ذلك اول فعل قبیحله ناسه
امر ایدرلر حالبوکه مالی مستحقینه انفاقدن اعراض ایده الله تعالی اندن
وانک انفاقدن غنیدر ذاتده محموددر انلرک اعراضی اکا ضرر ایتمز (لقد ارسلنا
رسلنا بالبینات) بز ملائکه و انبیادن رسوللریمزی حجج و معجزاته
املره کوندردک (وانزلنا معهم الکتاب والمیزان) وانلرکه کتاب و میزان
ایندرلرک تا که کتابله حق ظاهر و ثواب ممتاز اوله و میزانله حقوق تسویه ایدیلله
(لیقوم الناس بالقسط) و ناس عدلله قائم اوله لر * دینلدیکه انزال میزان
ایله مراد انک اسمائی انزال وانی اعدادله امردر و یا مراد میزانک عینی
انزالدرکه اول نوح علیه السلامه انزال اولنشدی و جائزدر که انکله مراد
عدل اوله (وانزلنا الحديد فيه بأس شدید) و حدیدی معادنندن اخراج
ایتدک که انده بأس شدید وارددرکه اندن آلات حرب اتخاذ اولنور و یا انده
جنه و سلاح وارددرکه بریله دفع و بریله ضرب اولنور ابن عمر رضی الله
عنه ایدر الله تعالی سمادن ارضه درت برکت انزال ایتدیکه اول حدید
و نار و ماء و ملحد * دینلدیکه آدم علیه السلام جنتدن بیلله سنجه درت شیئی
ایندرلرکه جیبی حدیددن ایدیکه اول ابره و مطقرقه و سندان و کلبداندر
(ومنافع للناس) و اول حدیدده ناسه منفعتلر وارددرکه هر صنعتک آلاتی
حدیددن دوزیلور (ولیعلم الله من ینصره و رسله بالغیب) و تا که انلر
الله تعالی دن و یا اول انلردن غائب ایکن اکا و رسوللرینه آلات حربی اعداء دین
اوزره جهادده استعمالله نصرت ایده فی ظهوره کتوره (ان الله قوی
عزیز) تحقیق الله عظیم الشان انبیا سنه نصرت اوزره قوی و قادردر
عزیز در مرادنده مغلوب اولمز (ولقد ارسلنا نوحا و ابراهیم وجعلنا

(فی)

فی ذریتهما النبوة والکتاب ففهم مهتد و کثیر منهم فاسقون) بز نوح
و ابراهیمی رسالتله قوملرینه کوندردک و اول ایکسینک ذریه لرنده نبوت
و کتاب قیلدق انلره کتابلر و حمیزله و یا علم خطی الهامزله اول ذریه دن
و یا قوملرندن بر طائفه موحد عامل بالکتاب اولدیلر لکن انلرک اکثری
فاسقین اولوب کتابلله عملی ترک ایتدیلر (ثم قفینا علی آثارهم برسلنا)
بعده انلرک اثرنجه رسوللریمزی برر برر اتباع ایتدک (وقفینا بعیسی ابن
مریم) و جلله دنصکره عیسی علیه السلامی انلره اتباع ایتدک (وآتیناه
الانجیل) و اکا انجیل نام کتابمزی و یردک (وجعلنا فی قلوب الذین
اتبعوه رأفة ورحمة) و اکا اتباع ایدن مؤمنلرک قلوبنده بری برلرینه
شفقت و مودت ایدر قیلدق (ورهبانیه ابتدعوها) و کذلک قبللرنده
رهبانیت قیلدق انی اختراع ایتدیلر که اول عبادت و ریاضتده مبالغه
و ناسدن انقطاعدر (ما کتبناها علیهم الا ابتغاء رضوان الله) بز انلرک
اوزره رهبانیتی فرض ایتدک بلکه انلر الله تعالی نیک رضا سن استیو
انی اختراع ایتدیلر و یا خود بز انلره انی فرض ایتدک بلکه انکچون
فرض ایتدک که انکله الله تعالی نیک رضا سن طلب ایده لر (فا رعوها
حق رعایتها) انلر دنصکره کلوب اول رهبانیتده انلره اقتدا ایدنلر
کال اوزره انی رعایت ایتدیلر بلکه تقصیر ایدوب اندن رجوع ایتدیلر
و ملو کلمری دیننه داخل اولوب انلردن قلیلون دین عیسی اوزره
ثابت اولدیلر * دینلدیکه عیسا دنصکره انلرک ملوکری انجیل و توراتی
تبدیل ایدوب علمالرینی قتله قصد ایتدیلر تا که اول علما انلره انکار ایتیلر
اوله اولسه اول علما قاجوب مغاره لره و صومعه لره کیردیلر اوزرلرینه
زمان متمد اولیحق دین عیسا دن رجوع ایدوب کیمی یهوده و کیمی
نصارایه و کیمی دین محمد متابع ایتدی (فآتینا الذین آمنوا بالله و آمنوا برسوله)
و کثیر منهم فاسقون) انلردن ایمان صحیحله ایمانه کلوب حقوق
رهبانیتی محافظه ایدنلره اجرلرینی و یردک حالبوکه انلرک کثیری ایمان
و رهبانیتدن خارجلردر (یا ایها الذین آمنوا اتقوا الله و آمنوا برسوله)
یا شونلرکه رسل متقده مینه ایمان کتوردیلر الله تعالی نیک نهی ایتدیکندن
صاقنوب امرینه اطاعت ایدک و رسولی محمد دخی ایمان کتورک (یؤتکم
کفلین من رحمته) تا که الله تعالی سزه ایکی نصیب و یره بری محمد علیه

السلامه ايمانكز وبری رسل متقدمينه ايمانكز ايجون بعيد اولزكه اسلاملى
 حرمته دين سابقلى اوزره ده مثاب اوله اكرچه منسوخ ايسه ده *
 ديلديكه اشبو خطاب پيغمبريمز صلى الله عليه وسلم زمانده كي نصارايه
 ايدى (ويجعل لكم نورا تمشون به) وسزچون صراط مظلم اوزره
 نور قبله كيم انكله يورويه سزوياهدى قبله كيم انكله جناب قدسه سلوك
 ايدى سز (ويغفر لكم) وذنوبكزى يارغيبه (والله غفور رحيم)
 الله تعالى ذنوبندن توبه ايدنلره غفور واکا اطاعت ايدنلره رحيم (ثلا
 يعلم اهل الكتاب الا يقدرّون على شئ من فضل الله) تاكه موسى وعيسايه
 مؤمن اولوب محمد عليه السلامه كافر اولان اهل كتاب بيله لر كه اكا ايمان
 كتور مدكجه موسى وعيسايه ايمانلى مفيد اولوب الله تعالىنك فضلندن
 برشيله نائل اولميه لر اول كفيلين نور ومغفرت ذنوبدر (وان الفضل بيد الله
 يؤتیه من يشاء) وبيله لر كه فضلك كليسى الله تعالىنك ينده در انى ديلديكى
 كسه يه ويرر هيچ احدا كا منازع ومعارض اولمز (والله ذو الفضل العظيم)
 الله تعالى عطاء جزيل صاحبيدر اندن انى منع ايدر يوقدر

سورة المجادلة وهى ثنتان وعشرون آية مدنية

بسم الله الرحمن الرحيم

(قد سمع الله قول التى تجادل فى زوجها وتشتكى الى الله والله يسمع
 تحاور كما ان الله سميع بصير) الله تعالى ايشدى شول مرأه نك كلامنى كه
 زوجى شانده يا محمد سنكله جدال ايدوب الله تعالى يه شكوى ايدر اول
 كر بدن انى تخليصن ديلر الله تعالى ايكيكزك كلامده مراجعتن ايشيدر
 اول جميع اقوالى واحوالى كورر * روايت اولنديكه خوله بنت ثعلبه
 پيغمبريمز عليه السلامه كلوب زوجى اوس بن الصامتدن خبر ويرديكه
 اول اكا ظاهر ايتدى پيغمبريمز صلى الله عليه وسلم ديديكه سن زوجكه
 حرام اولمش سن خوله ايسه اولاد صغار صاحبهسى اولديغندن اول
 حاله زياده مغتمه اولوب شاننى اصلاح امرنده الله تعالى يه يلواريجق
 اشبو سورة اولندن درت آيه دكين نازل اولدى (الذين يظاهرون
 منكم من نسائهم ماهن امهاتهم ان امهاتهم الا اللائى ولدنهم) سز دن
 شونلر كه زوجه لرينه ظاهر ايدى لر اول ظاهر ايتدكلى نساء حقيقتده

(امهاتلى)

امهاتلى دكلدر بلكه امهاتلى شول نسادركه انلى طوغرو بدر
 (وانهم ليقولون منكرا من القول وزورا) ايمدى ظاهر ايدنلر قول منكر
 وزور ديرلر زيراكه زوجه نك امه تشبيه اولنمى شرعه انكار اولنوب
 حقدن محرفدر (وان الله لعفو غفور) الله تعالى ظاهر دن ماسلفى عفو
 واکا كفارتله توبه ايدنى مغفرت ايديجيدر (والذين يظاهرون من نسائهم)
 شونلر كه زوجه لرينه ظاهر ايدرلر * صورتى اولدر كه رجل مرأه سنه
 ديه كه سن بكا انامك ظهري كيسن وياخود اناسى اعضاسندن شول اكا
 نظرى حرام اولور برعضوينه تشبيه ايدى * مثلا سن بكا انامك بطنى ويافخذى
 ويافرجى كيسن ديه انكله مظاهر اولور اما كه عضو آخرى تشبيه ايدرسه
 مظاهر اولمز * واما كه بكا انام كى ويا انامك روحى كيسن ديوب انكله
 اعزاز واکرام اراده ايدرسه مظاهر اولمز مادامكه ظاهر اراده ايتيه *
 واکر مرأه سنى جده سنه وياقربته اكا حرام اولور اخت وياعمه وياخاله
 كى بر مرأه يه تشبيه ايدرسه كذلك مظاهر اولور * واکر رضاعله اكا
 نكاحى حرام مرأه يه تشبيه ايدرسه اصح اقاويلده مظاهر اولور
 (ثم يعودون لما قالوا) بعده قولارينك تداركنه عودت ايدلر * شافعى
 عندنده ظاهر اولنان مرأه يه نكاحده امساكه شول دكلو زمانكه انده
 اكا اول مرأه نك مفارقتى ممكن اوله * وابو حنيفه عندنده اول مرأه استمتاعنى
 استباحه ايله اكرچه نظره شهوته ايسه ده ومالك عندنده جاعه عزمله
 وحسن عندنده جاعله * اويله اولسه ظهارك حكيمى اول مرأه نك وطئ
 زوجنه حرام اولمقدر مادامكه ظهارك كفارتن ايتيه وكفارت ايسه ذكر
 اولنان اقوال مختلفه اوزره عوددنصكره واجب اولور (فتحرير رقبة
 من قبل ان يمتسا) ايمدى ظاهرده مظاهر اوزره واجب اولان كفارت
 ظاهر ايدن زوجله ظاهر اولنان مرأه دن هر برى آخرله استمتاعدن اول
 اعتاق رقبة در اكر انك رقبه سى اولوب لكن خدمته محتاج اولسه ويارقبه
 بهاسنه قادر اولوب لكن انى كندينك وعيالنك ضرورات شرعيه سچون
 انفاقه محتاج اولسه انكيچون صيامه انتقال جائز اولور * مالك واوزاعى
 ايدر اكر اول رقبه وياثمن بولورسه اكا اعتاق لازم اولور اكرچه اكا محتاج
 ايسه ده * ابو حنيفه ايدر اكر رقبه نك عيبنى بولورسه اكا اعتاق واجب

اولور اكرچه اكا محتاج ايسده * اما رقبه نك ثمن بولوب لكن اكا محتاج
اولورسه انكچون صومه انتقال جائز اولور (ذلكم توعظون به) اشبو
كفارتله سز امر اولمشل سز تاكه ظاهر دن منزجر اوله سز (والله
بما تعملون خبير) الله تعالى سزك اعمالكزه خبيردر (فن لم يجد فصيام
شهرين متتابعين من قبل ان يتاسا) اول كيسه كه اعتاق اچون رقبه
بوليه اولكه حاضرده مالي اوليوب غائبده اوله اول رقبه بي بولور حكمنده در
ايمدى رقبه بولين مظاهر اوزره واجب اولان ايكي آي متابعا صومدر
ظهار ايدن زوجه ظاهر اولنان زوجه دن هر برى آخرله استماعدن
اول صائم اولمقدر واکر اول ايكي آي صومك اراسنده عذر سز افطار
ايدرسه اول صومي استيناف لازم اولور واکر عذرله افطار ايدرسه انده
اختلاف واردر واکر مظاهر اول ظاهر اولنان مرأه سنى كچه جاع
ايتسه شافعى عندنده انكله متابع منقطع اولماكه ابو حنيفه ومالك عندنده
منقطع اولور (فن لم يستطع فاطعام ستين مسكينا) اول مظاهر كه هرم
ويامرض وياشبق مفرط سبيله صومه استطاعتى اوليه انك اوزره واجب
اولور كه التمس مسكينى اطعام ايدر هر مسكينه بلدينك غالب طعامندن اوله *
شافعى عندنده بررمد طعام ويركه اول رطل بغداديله بررطل وثلث
رطلدر * و ابو حنيفه عندنده بررمد نصف صاع وغيريدن برصاع ويرر واکر
مظاهر ايكي آي صومه شرو عندنصكره اول صوم اراسنده ظاهر اولنان
مرأيه كچه جاع ايدرسه شافعى عندنده صومي استيناف واجب اولما
ابو حنيفه عندنده واجب اولور اول جاعى كرك عمد ايله ويانسيانله ايتسون *
دينديكه اكر مظاهر كفارتدن امتناع ايدرسه مرأيه جائز اولور كه انكله
قاضى يه مرأيه اوله وقاضى يه واجب اولور كه انى تكفير اوزره جبر ايد
امتناع ايدرسه موته دكين حبس ايد اطعامله كفارتده جاعدن اولده
وصكره ده فعلى جائز اولور اماكه اعتاق وياصومله كفارتده كفارتك جاع
اوزره تقديمى واجب اولور (ذلك لتؤمنوا بالله ورسوله) اشبو تعليم احكام
انكچوندر كه الله تعالى بي ورسولنى بيلوب شرايع اسلاميه بي قبول وافعال
جاهليتى ترك ايدسز (وتلك حدود الله وللکافرين عذاب اليم) اشبو مذكورات
الله تعالىنك فرائض واحكاميدر كه انى تعمدي جائز اولما انى قبول ايتيلره آخرته

(عذاب)

عذاب اليم واردر (ان الذين يحادون الله ورسوله كتبوا كتابا الذين
من قبلهم) شونلر كه الله تعالى يه ورسولنه معادات ايدرلر وحدود
شرعيه دن غيرى حدود وضع واختيار ايدرلر انلر اخزاء واهلاك اولنورلر
انلردن اول ائم ماضيه دن اخزاء واهلاك اولنلر كي (وقد انزلنا آيات
بينات وللکافرين عذاب مهين) حالبوكه بزا اول رسولك صدقه
وكتورديكينك صحنه دلالت ايدر آيات واضحه انزال ايتدك ايمدى بزم
آيتلر يمزى تصديق ايتيلره برنوع عذابمز واردر كه انلر غرور وكبرينى
كيدر (يوم يعثهم الله جميعا فينبئهم بما عملوا احصاء الله ونسوه
والله على كل شى شهيد) ذكر ايت شول كونيكه الله تعالى خلائقك جميعن
قبرلرندن بعث ايدوب خير وشردن عمللرينى اشهاد محضرنده انلره
حلالرينى تشهير وعذابلرينى تقدير اچون خبر ويرر هر شئى الله تعالى انلره
احصا ايدر والحال انلر انى اونودوبدر هر شئى الله تعالى بيلور اندن
هيچ برشى غائب اولما (ألم تر ان الله يعلم ما فى السموات وما فى الارض)
يا محمد بيلدكي كه الله تعالى سموات وارضده كي مخلوقاتك كلنى وجزئى
بيلور (مايكون من نجوى ثلاثة الا هو رابعهم) شول كلام سوء كه انى
اوج كسه ارالنده سرا سويلشورلر الا الله تعالى انلر اول سويلشديكى
بيلور (ولاخسة الا هو سادسهم) كذلك بر كلام سوء كه انى بش كسه
ارالنده سرا سويلشورلر الا الله تعالى انلر اول سويلشديكن دخي بيلور
(ولا ادنى من ذلك ولا اكثر الا هو معهم اينما كانوا) كلام سرتى
سويلشن كر كسه عدد مذكور دن اقل اولسون بر ويا ايكي كي ويا اكثر
اولسون التى وما فوق كي الا الله تعالى اكا طالدر هر قنده اولسه ارالنده
جارى اولانى بيلور زيرا انك اشيايى بيلسى قرب مكانله دكلدر كه اماكن
تفاوتيله اول دخي متفاوت اوله (ثم ينبئهم بما عملوا يوم القيامة) بعده
يوم قيامته الله تعالى انلرى تقضيج ومستحق اولدقلى جزاى تقرير اچون
ايشلدكلى اعمال سيئه يي انلره خبر ويرر (ان الله بكل شى عليم)
الله تعالى سر وعلايه دن هر شئيه عليدر زيرا كه على اقتضا ايدن
ذاتك كله نسبتى مساويدر * روايت اولنديكه يهود و منافقون بيلنلنده
تناجى ايدوب مؤمنلره نظر ايدرلر وكوزلريله تغامز ايدوب مؤمنلره ايهام
ايدرلرديكه تناسيلرى انلر مساءتندن اوله انكله اول مؤمنلره حزن

بع (۱۵)

ویرلردی شول توهمله کیم سرایایه کیدن اخوانمه آیا که قتل و یا هزیمتی
ایر مشدر دیو قلبرینه هم و حزن ایرردی حتی که انلرک اول فعلندن
مؤمنلر پیغمبریمز علیه السلامه شکایت ایتدیلر پیغمبریمز علیه السلام
انلری مؤمنلر سز تناجیدن نهی ایتدی انلر ایسه منتهی اولیبوب
تناجیلرینه عودت ایدیجک نازل اولدیکه (ألم تر الى الذين نهوا عن
النجوى ثم يعودون لما نهوا عنه ويتناجون بالاثم والعدوان ومعصيت
الرسول) نظر ایتزمیسن شول قومک فعللرینه کیم ارالرنده مؤمنلر سز
سرا سويلشمکدن نهی اولندقلرند نصکره اول نهی اولندقلری فعللرینه
عودت ایدرلر و اثم و مؤمنلره عدوان و رسول الله معصیت اولان شیئی
سرا سويلشورلر (واذا جاؤك حيوك بما لم يحيك به الله) و چقان سکا
کلسلر الله تعالی تک سکا تحیه ایتدیکی شیئه تحیه ایدرلر * روایت اولندیکه
یهود پیغمبریمز صلی الله تعالی علیه وسلم کلدکارنده سلام یرینه السام
علیک دیرلردی سام ایسه موتدر پیغمبریمز علیه السلام انلره رده
علیکم دیردی (ويقولون في انفسهم لولا يعذبنا الله بما نقول)
وارالرنده دیرلردیکه اگر محمد نبی اولسه بزم اشبو قولمز سبيله الله تعالی
بزه عذاب ایتزمیدی (حسبهم جهنم يصلونها فبئس المصير) انلرک
کافیسی عذاب ناردرکه انلر اول ناره داخل اولورلر اول نه مؤس
قرارگاه اولور (يا ايها الذين آمنوا اذا تناجيتم فلا تتناجوا بالاثم والعدوان
ومعصيت الرسول) یا مؤمنلر اراکرده تناجی ایتدیکزده اثم و عدوان
ومعصیت رسول ایله تناجی ایتکمز منافقلر ایتدیکی کبی (وتناجوا بالبر
والتقوى) بلکه مؤمنلره خیری متضمن شیئی ومعصیت رسولدن اتقایی
تناجی ایدک (واتقوا الله الذي اليه تحشرون) اول الله تعالی دن قورقک که
موتکزدن نصکره اکا حشر اولورسز وانک عندنده جزا کزی بولورسز
(انما النجوى من الشيطان ليحزن الذين آمنوا) اثم و عدوانله تناجی دکل
الاشیطانلندر زیرا که انی اول تزین ایدر و اتباعنی اکا تحمیل ایدر
تا که اول تناجی مؤمنلره حزن و یره شول توهمله کیم انلره نکبت اصابت
ایتمش اوله (وليس بضارهم شيئا الا باذن الله) حالبوکه تناجی و یا شیطان
مؤمنلره برشی ضرر ایدر دکلدر مکرکه انلره ضرر ایرمسنی الله تعالی
اراده ایدر (وعلى الله فليتوكل المؤمنون) ایمدی مؤمنلر الله تعالی به

(توکل)

توکل ایدوب انلرک تناجیسنه مبالات ایتسونلر (يا ايها الذين آمنوا
اذا قيل لكم تفسحوا في المجالس فافسحوا يفسح الله لكم) یا مؤمنلر چقان سزه
رسول الله و یا ذکر الله مجلسنده بزه یر و یرک دینله یر و یرسونکله اوتوره
الله تعالی سزک ایچون اول مقابله ده جنتده و یا قبرده و یا رزقه و یا بونک غیری
اشیاده وسعت و فسحت و یره (واذا قيل انشزوا فانشزوا) و چقان
سزه توسعه ایچون و یا امور دینی دن برامر ایچون قیام ایدک دینلسه
امرہ انقیاد ایدک تناقل ایتکمز (يرفع الله الذين آمنوا منكم) الله تعالی
سزدن ایمان و طاعت اهلنی دنیاده نصر و حسن ذکرله و آخرتده غرف
جنانده ایوالله رفع ایدر (والذين اوتوا العلم درجات) و مؤمنلردن
خاصة علمایی علم و عمل یلنی جمع ایتدکلیچون نیچه درجه انلردن ارفع
منازله رفع ایدر زیرا که علم علو درجه سیله اکا عملک اقترانی انک
مزید رفعتن اقتضا ایدر اول اجلدن مالک افعالنه اقتدا اولنور
غیرینک دکل (والله بما تعملون خبير) الله تعالی سزک اعمالکزه
خبیردر * دینلديکه الله تعالی مؤمن عالمی شول علمی اولیان مؤمن اوزره
جنتده یتش درجه فوقه رفع ایدر هراییکی درجه نك اراسی شول یوکرک آنک
یتش ییلده سکرلديکی مسافه دکلودر * ابن عباس رضی الله عنهما ایدر
سلیمان علیه السلام علم و مال و ملک یلنده تخیر اولندقدہ علمی اختیار ایتدی
انکله بیله مال و ملک دخی و یرلدی حدیثده کلدیکه عالمک باید اوزره
فضلی قرک لیله بدرده سائرکواکب اوزره فضلی کبیردر * ابن عمر رضی الله
عنه ایدر پیغمبریمز صلی الله تعالی علیه وسلم مسجد شریفنده ایکی مجلسه
اوغرادی اول ایکی مجلسدن برینک اهللی الله تعالی به دعا ایدرلردی
و مجلس آخرک اهللی ایسه امور دینی بی تعلم و تعلیم ایدرلردی بومجلس
اول دعا ایدنلرک مجلسندن افضلدر دیوب انلرک مجلسنه اوتوردی زیرا که
بن تعلیم ایچون کوندرلشن دیدی (يا ايها الذين آمنوا اذا ناجيتم الرسول
فقدموا بين يدي نجواكم صدقة ذلك خير لكم واطهر) یا مؤمنلر چقان
رسول اللهه مناجات ایدر اولسکز اندن اول فقرایه تصدیق ایدک اول فعلکمز
سزه خیر لودر نفسلریکزی ریدن و حب مالدن اطهردر * زیرا که انده
تعظیم رسول و انتفاع فقرا و سؤالده افراطدن نهی و مؤمنله منافق و محب
آخرتله محب دنیا یلنی تمیز واردر اشبو فعلک ندب و یا وجوب ایچون اولمسنده

اختلاف اولندی لکن مابعدنده کی (ء اشفقتم) آیتله منسوب و خدر اگرچه تلاوتده اول اکامتصل ایسه لکن نزولده متصل دکلدر * علی رضی الله عنه ایدر قرآنده بر آیت وارد که انکله بدن غیری برکسه عمل ایتمویدر بنم بر دینارم و ارایدی هر بار که پیغمبریمز صلی الله تعالی علیه وسلمه مناجات ایدر اولسم اندن بر درهم تصدق ایدرم تصدق ایدرک اول دینارک جیعنی اتفاق ایتدم انک وجوبیه قول غیریده قدحن ایجاب ایتمز زیرا احتمالدركه انک مدت بقاسنده اغنیایه مناجات وقوعی اولیه زیرا پیغمبریمز صلی الله علیه وسلمدن روایت اولندیکه انک حکمی انجق اون کون و بر قولده بر ساعت باقی اولمش اوله (فان لم تجدوا فان الله غفور رحيم) اگر تصدق ایده جک شی بولم سکز الله تعالی غفور رحیمدر که تصدقسن مناجاته سزه رخصت ویره * اشبو آیتک سبب نزولنده دینلدیکه ناس کثرت سؤال ایله پیغمبریمز علیه السلامی اسام ایدیچک امر اولندیلر که سؤال اولردن اول تصدق ایدر اولیه اولسه اندن منتهی اولدیلر فقرا سؤال و مناجاته قادر اولوب اغنیایه اندن چکلدیلر بعده نازل اولدیکه (ء اشفقتم ان تقدموا بین یدی نجویکم صدقات) یا اهل غناء رسول الله تناسجیکزدن اول صدقات تقدیمیه فقردن خوف ایدوب بخلی ایتدیکز و الحال اول فعل خیری ایتسکز اول سزه خیرلو ایدی (فاذلم تفعلوا و تاب الله علیکم) چون صدقه دن امر اولندیغکزی ایشلک سزه مشقت و یردیکی سبیدن ایشلدیکز الله تعالی انی سزدن تجاوز ایدوب ایشلامسنه سزه رخصت و یردی (فاقیموا الصلاة و آتوا الزکاة) ایمدی اوزریکزه فرض اولان صلاة و زکاتی ادا ایدک اول ایکیسنده و سائر طاعاتده تقریط ایتمکز که اول تناسجی رسولده صدقه تقدیمی امرینی اقامت ایتدیککز که کفارت اوله (واطيعوا الله ورسوله) والله تعالی ورسولنه اوامر و نواهیده اطاعت ایدک (والله خیر بما تعملون) الله تعالی سزک ظاهر و باطنده خیر و شرکزه خیردر (ألم تر الى الذين تولوا قوما غضب الله عليهم ما هم منکم ولا منهم و يحلفون علی الکذب و هم يعملون) یا محمد شونلره نظر ایتمز میسنکه الله تعالینک غضب ایتدیکی قومله موالات ایتدیلر * شول منافقین شانده نازل اولوبدر که یهود ایله موالات و مناصحه ایدرلر و اسرار مؤمنینی انلره ایر کورلردی * ایمدی

(اول)

اول منافقنله سزدن ونه یهود دندر و اسلام ادعاسی اوزره کذبله یمن ایدرلر حالبوکه یمنلرنده کاذبلر ایدوکن یلورلر * اشبو قید افاده ایتدیکه کذبلی عذله اولوب یمن غوس ایتمش کبی اوله لر (اعد الله لهم عذابا شديدا انهم ساء ما كانوا يعملون) الله تعالی انلره آخرتده عذاب شدید تهیته ایتدی زیرا که انلر سوء عمل اوزره تمرد و اصرار ایتدیلر (اتخذوا ایمانهم جنة فصعدوا عن سبيل الله فلهم عذاب مهين) انلر اظهار ایتدکری ایمانی دماء و اموالارینه و قایه ایتدیلر و اول یمنلریله ناسی اسلامه دخولدن و جهاددن صد ایتدیلر ایمدی انلره کفر و صدرلچون عذاب مهین واردر * دینلدیکه اولکیسی عذاب قبردن و بو ایسه عذاب آخرتدر (لن تغني عنهم اموالهم ولا اولادهم من شيئا اولئك اصحاب النار هم فيها خالدون) انلرک اموال و اولادلری الله تعالینک عذابندن برشی دفعنه مفید اولمز انلر اصحاب ناردر که انده دائمدر (يوم يبعثهم الله جیعا فيحلفون له كما يحلفون لكم و يحسبون انهم علی شیء الا انهم هم الکاذبون) يوم قیامتده الله تعالی انلرک جیعنی بعث ایدوب مسلملر دیو اکایمین ایدرلر تنکیم دنیاده بز سزدن دیو یمن ایدرلردی و ظن ایدرلر که کندیلر برشی مفید اوزره اوله لر که نفاق قلدیلرنده تمکن ایتدیکندن تخیل ایدرلر که ایمان کاذبلری کذب سزه ترویج ایدر آگاه اولک که انلر کذبده مبالغدردر که اسلام اظهاریلر سزه کذب ایتدکری کبی الله تعالی به دخی کذب ایدرلر (استخوذ عليهم الشیطان فانسبهم ذکر الله اولئک حزب الشیطان الا ان حزب الشیطان هم الخاسرون) شیطان انلر اوزره استیلاء ایدوب انلره الله تعالینک ذکرینی اونوتدردی حق انی قلوب و السنه لرله ذکر ایتمز اولدیلر ایمدی انلر شیطانک جنود و اتباعیدر آگاه اولک که شیطانک جنود و اتباعی يوم قیامتده زیان ایتشلردر که نعیم مؤبدی فوت ایدوب عذاب مخلده تعرض ایتدیلر (ان الذين یحادون الله ورسوله اولئک فی الازلین) شونلر که الله تعالی به ورسولنه معادات و امرلرینه مخالفت ایدرلر انلر الله تعالینک اذلال ایتدیکی قوم سیئه درکات نازک اسفلندهدر (کتب الله لاغلبنا و انا ورسلی ان الله قوی عزیز) الله تعالی لوحده یازدیکه بن ورسوللرم حجتله غالبلر الله تعالی انیاسنه نصرتی قویدر اراده ایتدیکی شیئده هیچ احد اکا غالب اولمز (لا تجد قوما یؤمنون بالله

(والیوم الآخر یوآدون من حاد الله ورسوله) الله تعالیٰ به و یوم آخرته ایمان کتورر قومه لایق اولز که الله تعالیٰ به ورسولنه معادات ایدن قومه موالات و موادت ایدهلر (ولو کانوا آباءهم و ابناءهم و اخوانهم و عشیرتهم) اگرچه اول اعداء الله انلره اقرب ناس ایسه ده * پس بو اجلدن ابو عبیده بن الجراح رضی الله عنه یوم احدده باباسی عبد اللهی قتل ایتدی و ابو بکر رضی الله عنه یوم بدرده اوغلی عبد اللهی بر ازه چاغردی و مصعب رضی الله عنه یوم احدده قرنداشی عبیدی قتل ایتدی و عمر رضی الله عنه یوم بدرده خالی عاص بن هشامی و علی و حزه و عبیده یوم بدرده عتبه و شیبیه بن ربیعہ بن وولید بن عتبه بنی قتل ایتدیلر (اولئک کتب فی قلوبهم الایمان و ایدهم بروح منه) ایمدی انلر شول قومدر که الله تعالیٰ قلبلرنده ایمانی اثبات ایتدی و کندی قبلندن نور قلبله و یا قرآنله و یا عدو اوزره نصرله و یا ایماندن روحله انلری تأید ایتدی (و یدخلهم جنات تجری من تحتها الانهار خالدين فیها) و آخرتده انلری جنتلره قویه که اشجاری آلتندن ارمقلر آقار اول جنتلره دائمین اولدقلری حالده (رضی الله عنهم و رضوا عنه) الله تعالیٰ انلردن ایمان و طاعتلریله راضی اولدی و انلر دخی اندن راضی اولدیلر جنتده انلر ایچون موعود ثوابله (اولئک حزب الله ألا ان حزب الله هم المفلحون) ایمدی انلر الله تعالینک دینده جنود و انصاریدر آگاه اولک که الله تعالینک جنودی دنیاده فوز و نجاته و آخرتده فضل و رجتنه نائل اولور عباد صالحیندر ان شاء الله تعالیٰ

سورة الحشر وهی اربع و عشرون آیه مدنیة

بسم الله الرحمن الرحیم

(سبح لله ما فی السموات و ما فی الارض و هو العزیز الحکیم) سموات و ارضده کی مخلوقاتک کلیمی الله تعالیٰ بی تنزیه ایدر اول ملکنده عزیز و امرنده حکیمدر * روایت اولندی که پیغمبریمز صلی الله علیه و سلم مدینهیه قدوم ایدیچک بنو النضیر انکله مصالحه ایتدیلر که انکله قتال ایتدیلر و انکله قتال ایدنلره اعانت ایتدیلر و قتا که یوم بدرده اول مشرکینه غالب اولدی تورانده نصرته منعوت پیغمبر بودر دیو تحققی ایتدیلر * بعده یوم احدده

(مسلمون)

مسلمون منهزم اولیچق پیغمبریمز علیه السلام ایله ایتدکاری عهدی صیدیلر کعب بن اشرف قرق را کبله مکهیه کیدوب ابو سفیانله مخالفت ایدشدیلر * اولیه اولسه پیغمبریمز علیه السلام کعبک رضاما قرنداشنه امریله حتی که اول کعبی غفلتی حالنده قتل ایتدی اول قتل اولیچق عقبنده پیغمبریمز علیه السلام عسا کر ایله اوزرلرینه واروب جلای وطن اوزره صلح اولدیلر اکثری شامه کیدوب بر طائفه سی خبیبره و حیرهیه لاحق اولدیلر اولیه اولسه انلرک شاندیه بو سوره (والله علی کل شیء قدیر) قولنه دکن نازل اولدی (هو الذی اخرج الذین کفروا من اهل الکتاب من دیارهم لا وّل الحشر) الله تعالیٰ بنی النضیری دیارلرندن اول حشره اخراج ایتدی زیرا پیغمبریمز صلی الله تعالیٰ علیه و سلمه دیدیلر که قنده خروج ایده لم دیدیکه ارض محشره * دینلدی که اول انلرک اول حشرلریدر و آخر حشرلری یوم قیامتدر (ما ظننتم ان یخرجوا) یا مؤمنلر سنر ظن ایتزدیکز که انلر دیارلرندن خروج ایدهلر زیرا که انلر قوتده و منعه لری کثرتده ایدیلر (وظنوا انهم مانعتهم حصونهم من الله) بنو النضیر ایسه ظن ایتدیلر که حصنلری انلری الله تعالینک عذابی اولان جلادن منع ایده (فاتیهم الله من حیث لم یحتسبوا) الله تعالینک عذابیکه انلرک قلوبنه القاء رعب و جلایه اضطراردر و یا خود مؤمنلره الله تعالینک نصری حسب انلری اولدیغی حیثیتدن ایرمشدی (وقذف فی قلوبهم الرعب) و قلبلرین خوف القاء ایتدی کعب بن اشرفک قتل اولنمسیله که اول قلبلرینه ضعف و قوتلرینی سلب ایتدی (یخرجون بیوتهم بایدیههم و ایدی المؤمنین) حتی که بیتلرینی کندی یدلریله و مؤمنلرک ایدریله تخریب ایتدیلر کندیلرک قصدی تا که انده مؤمنلر ساکن اولیه و استحسان ایتدکاری آلات انلره قالمیه و اما که مؤمنلرک قصدی اول بیتلرینک ظواهرین تخریب ایدرلر دیکه انلره انتقام و قتاله مجال اوله (فاعتبروا یا اولی الابصار) ایمدی الله تعالینک امرینه بصیرته نظر ایدنلر بنو النضیرک حاللریله متعظ اولوب الله تعالینک غیری بر شیئه اعتماد ایتسونلر (ولو لا ان کتب الله علیهم الجلاء لعذبهم فی الدنیا و لهم فی الآخرة عذاب النار) اگر الله تعالیٰ انلر اوزره دیارلرندن خروجی تقدیر ایتمش اولسه دنیاده انلره قتل و سیبله تعذیب ایدر دی انلر اگرچه عذاب دنیادن

نجات بولديلر لكن آخرته انلره عذاب نار واردر (ذلك بانهم شاقوا الله ورسوله ومن يشاق الله فان الله شديد العقاب) انلر دنياه جلاء و آخرته عذاب اصابتي شول سبيله دركه انلر الله تعالينك ورسولنك امرينه مخالفت ايدوب دين اسلامه راضي اولمديلر اول كسه كه الله تعالينك امرينه مخالفت ايده اول حالو كسه لره انك عقابي شديددر (ما قطعتم من لينة او تركتموها قائمة على اصولها فبأذن الله وليخزي الفاسقين) نخلدن قنغي لينه كه سزاني قطع ايدر سز ويا قطع ايتيوب اصلاري اوزره آلبقور سز اول الله تعالينك اذنيه در الله تعالي اني قطعه سزه اذن و يردى تا كه نقض عهدله اولان فسقلرى اوزره اخزا ايده * روايت اولنديكه پيغمبر عزم صلى الله تعالى عليه وسلم بنو النضيرك نخلاري قطعه امر ايديجك ديديلر كه يا محمد سن يز يوزنده فساد دن نهى ايدر دك شمدي ايسه نخلاري قطع و تحريق ايدر سن اول سببدن بو آيت نازل اولدى اشبو دليلدر كه كفارك دياريني هدم واشجاريني قطع جائز اوله تا كه انكله غيظلرى آرتوريله امام ابو الليث ايدر هر مجتهد مصيددر ديدلره اشبو آيت دليلدر زيرا كه الله تعالى ايكي فريقك دخی فعلندن راضي اولدى (وما افاء الله على رسوله منهم فإا او جفتم عليه من خيل ولا ركاب) بنو النضير وياسار كفره نك اموالندن شول شيتكه الله تعالى اني رسولنه رد ايتدى سز انك تحصيلنده خيل و يار كراب اجراسيله مشقت شديد كوره مديكر زيرا كه انلرك قراسى مدينه دن ايكي ميل دكلو مسافه ده ايدى حتى كه رسول الله دن غريسي اكا يباق كتديلر (ولكن الله يسلم رسوله على من يشاء) لكن الله تعالى رسوللرين جله دن محمد عليه السلامي كفاردن ديلديكي طائفه اوزره غلبه وقهرله و قلوبلرينه القاء رعبله تسليط ايدر (والله على كل شئ قدير) الله تعالى هر شيتنه قادردر كا هي وسائط ظاهره ايله وكا هي انك غريله تسليط ايدر * اويله اولسه الله تعالى بنو النضير اموالني خاصة پيغمبر عزم صلى الله عليه وسلمه تعيين ايتدى اولدخي اني مهاجرينه قسمت ايدوب انصاردن اوچ كشيدن غرييه و يرمدي (ما افاء الله على رسوله من اهل القرى فله وللرسول ولذی القربى واليتامى والمساكين وابن السبيل) اول شيتي كه الله تعالى اني رسولنه اهل قرادن رد ايتديكه انلر بنو قريظه و بنو النضير و اهل فذك و خيبر و عرينه در

(اول)

اول الله تعالى به ورسولنه وذوقرابهيه و يتاميه و مساكينه وابناء سبيله قسمت اولنور * في قسمتنده اختلاف اولندي ديلديكه ظاهر آيت مقتضاسنجه سهم الله كعبه و سائر مساجد عمارته صرف اولنور * ديلديكه مال في بش سهم قيلنور زيرا انده كي ذكر الله تعظيم ايجوندر و سهم رسول بر قوله امامه و بر قوله عساكره و ثغوره و بر قوله عساكر مسلمينه صرف اولنور مال فيك خسي مال غنيتك خسي كي قسمت اولنور و درت خسي ايسه مقاتله و مصالحه صرف اولنور (كيلا يكون دولة بين الاغنياء منكم) تا كه فقرانك حق اولان في اغنيا كز بيننده مداوله اوليه * تنكيم زمان جاهليتده اغنياء اني تدوال و بينلرنده دور ايدرلردى (وما آتاكم الرسول فخذوه وما نهايكم عنه فانتهوا) اول شيتكه فيئدن رسول الله عليه السلام اني سزه و يرويا اول شيتكه اني سزه امر ايدر اني اخذ ايدك كه اول سزه حلالدر ويا اني تمسك ايدك كه اكا اطاعتكز واجيدر و اول شيتكه رسول الله اني اخذدن و ايتانندن نهى ايده اندن امتناع ايدك (واتقوا الله ان الله شديد العقاب) الله تعاليدن قورقوب رسولنه مخالفتدن صاقتك كه اكا مخالفت ايدنه الله تعالينك عقابي شديددر (للفقراء المهاجرين الذين اخرجوا من ديارهم واموالهم يبتغون فضلا من الله ورضوانا وينصرون الله ورسوله اولئك هم الصادقون) بنو النضير دن اخذ اولنان في شول فقراء مهاجرينكدر كه ديار و امواللرندن چيقارلديلر كه انلر الله تعاليدن جنده رزق و دينده رضاسن طلب ايدر لر والله تعالى به ورسولنه نفسلرى و ماللريله نصرت ايدرلر ايمدى انلر ايمانلرنده صادقلر در (والذين تبوءوا الدار والايمان من قبلهم) وشونلر كه دار هجره و دار ايمان اولان مدينه ي رسول الله عليه السلامك واصحابك اكا هجرتدن اول مكان ايدنديلر كه انلر انصاردر و ياخود مدينه يي توطن ايدوب انده ايمانني اختيار ايتديلر و رسول الله عليه السلامك اكا قدومندن ايكي سنه مقدم انده مسجد بنا ايتديلر (يحبون من هاجر اليهم) مؤمنلر دن انلره هجرت ايدنلرى سورلر يوخسه انلرى كنديلر استقال ايتلر (ولا يجدون في صدورهم حاجة مما اوتوا) و مهاجرينه في وغيرى و يربلوب كنديلر برشي و يربلديكي سببدن صدرلرنده حرارت و حسد و غبطه بولزلر (ويؤثرون على انفسهم ولو كان بهم خصاصة) وانلر

مهاجرینی اموال و منازل را بیه نفسلری اوزره تقدیم ایدرلر حتی ایکی مرأسی اولان برندن یکوب مهاجرینک برینه تزویج ایتدی اگرچه اول نفسلری اوزره تقدیم و ایثار ایتدکلی شیشه کندیلر محتاج ایسه لرده * ابو هریره رضی الله عنه ایدر پیغمبریمز صلی الله علیه وسلم بر رجل ضیف کلوب پیغمبریمز علیه السلام نسا سینه خبر کوندر دیکه قشکرده مأ کولاتدن برشی وارمیدر دیدیلر که صودن غیری شی یوقدر او یله اولسه پیغمبریمز علیه السلام اصحابندن قنده اولنلره دیدیکه قشکر بیکسده ضیافت ایدر بر انصاری بن ایدرین دیوب انی اوینه ایلندی خاتونه دیدیکه طعامدن نه شیک وار اول دیدیکه صبیانمز قوتندن زیاده شیئمز یوقدر انصاری اکا دیدیکه طعامکی حاضر لیوب صبیانکی ایتوغل چانکه بن ضیفله اکله مباشرت ایدر اولم سن سراجی اصلاح ایدر شکنده اولوب سوندر کل * خاتون دخی انجلین ایتدی او یله اولسه انصاری قراکودم کندوی ضیفله بیه اکل ایدر شکنده ایهام ایدوب طعامک جیعن ضیف اکل ایتدی انلر اول کجه آچ یاندیلر * چون انصاری صباحی پیغمبریمز صلی الله تعالی علیه وسلم قنه واردی پیغمبریمز علیه السلام اکا دیدیکه سنک و اهلکک بو کجه ده ضیفکره ایتدیککز فعل جیلکزدن الله تعالی راضی اولوب بو آیتی انزال ایتدی * ابو هریره رضی الله عنه ایدر انصار پیغمبریمز علیه السلامه دیدیکه یارسول الله نخللری می زمه اخوانمز مهاجرین بننده قسمت ایتکل * پیغمبریمز علیه السلام دیدیکه انجلین ایتیزن بلکه انلر نخللری کزک مؤنن سزچکون التزام ایدوب حاصلنده سزه مشارکت ایتسونلر * انصار سمعا و طاعة دیوب انک اوزره عقد شرکت ایتدیلر ابن عباس رضی الله عنهما ایدر یوم النصیرده پیغمبریمز علیه السلام انصاره دیدیکه دیلر سکر مهاجرینله اموال و دیاریکزی قسمت ایدوب اشبو بنو النصیر غنیمته انلره مشارک اولک و یادیلر سکر اموال و دیاریکز کاکان کندیکزک اولوب اشبو غنیمته مداخله ایتکز * دیدیلر که یارسول الله اموال و دیاریکزی انلره مقاسمه ایده لم ومع ذلك اول غنیمته مداخله ایتیمه لم اول سبیدن بو آیت نازل اولدی (ومن یوق شیخ نفسه فاولئک هم المفلحون) اول کسه که نفسنک بخی منع اولنه حتی که نفسی اوزره حب مال و بغض اتفاق غالب ایکن اکا مخالفت ایده اول حالو کسه لره ثناء عاجل و ثواب

(آجلی)

آجلی فائز لدر (والذین جاؤا من بعدهم) شونلر که مهاجرین و انصار دینسکره کدیلر انلر تابعیندر که یوم قیامته دکن مؤمنلردن کلور (یقولون ربنا اغفر لنا ولاخواننا الذین سبقونا بالایمان ولا تجعل فی قلوبنا غلا للذین آمنوا ربنا انک رؤوف رحیم) دیرلر که یاربنا مغفرت ایت بزی و دینده اخوانمزیکه ایمانله بزی سبقت ایتدیلر و قلوبمزده مؤمنلره حقد قیلغل یاربنا سن رحمتلو و رافتلو سن روا در که دعا مزه اجابت ایده سن هر کسه که صحابه نک برینه قلبنده غل اوله جیعنه ترجم ایتیه اول کسه بو آیتله عنایت اولسانلردن دکلدر زیرا که اول الله تعالی مؤمنلری اوج منزلت اوزره ترتیب ایتدیکه اول مهاجرین و انصار و تابعیندر که اشبو اوج آیتده مذکور صفاتله موصوفلردر اولکله تابعیندن انده اول صفت اولیه اول اقسام مؤمنیندن خارج اولور (ألتم ترالی الذین نافقوا یقولون لاخوانهم الذین کفروا من اهل الکتاب) نظر ایدر میسن مدینه اهلندن شول منافقلره کیم اضممار ایتدکلینک خلافت اظهار ایدوب بنو قریظه و بنو النصیر یهودندن شول کفرده اخوت و صداقت و موالاتلری اولان اصحابلرینه دیرلر که (لئن اخرجتم لنخرجن معکم ولا نطیع فیکم احدا ابدا وان قوتلتم لننصرنکم) اگر سز مدینه دن چیقار یلور سکر بزدخی سزکله بیه چیقارز و سزکله قتال ایدنلره نه محمه و نه مسلمینه ابدا اطاعت ایتیز و اگر قتال اولنور سکر سزه اعانت ایدرز (والله یشهدانهم لکاذبون) الله تعالی شهادت ایدر که انلر کاذبلردر و عدلرینه وفا ایتیز (لئن اخرجوا لا ینخرجون معهم ولئن قوتلوا لا ینصرونهم ولئن نصروهم لیولن الادیبار ثم لا ینصرون) بنو النصیر دیارلرندن چیقارلسه لر اول منافقین انلره بیه چیقمز و قتال اولنسه لر منافقین انلره اعانت ایتیز و اول منافقین انلره اعانت ایتدیکی تقدیر اوزره منهزمین اولدقلری حالدیه رجوع ایدرلر بعده بنو النصیر نصرت اولنلر ناصرلری منهزم اولدیغی ایچون (لانتهم اشد رهبة فی صدورهم من الله) یا مؤمنلر منافقینک سرلرنده سزدن خوفلری جهلرنده کی الله تعالی دن اولان خوفلرندن اشددر (ذلک بانهم قوم لا یفقهون) انلرک سزدن خوفی شول سبیلدر که انلر الله تعالی نیک عظمتن بیلرلر که حق خوفله اندن خوف ایدرلر و انک خوف اولنغه حقیق ایدوکن بیلرلر (لا یقاتلونکم جیعا الا فی قری محصنة او من وراء جدر) اول

يهود مجتمعين اولوب سزكه قتاله مبادرت ايتزلر بلكه فرط خوفلرندن قتاللى شول دروب وخنادقده محصنه قريه لرده وياديوارلر آردندن اولور
 (بأسهم بينهم شديد) انلر برى برلريله قتال ايتسه لر قتاللى شديددر لكن سزكه قتاله طاقتلى يوقدر زيرا كه الله تعالى ايله ورسوليله محاربه ايدن شجاع ايسه جبان اولور عزيز ايسه ذليل اولور (تحسبهم جميعا وقلوبهم شتى) سن انلرلى امر واحد وياكله واحد اوزره مجتمعين متفقين ظن ايدرسن حالبوكه انلر قلوبى متفرقه در بينلرنده تواد يوقدر عقائدلى متفرقه و مقاصدلى مختلفه اولديغى ايچون (ذلك بانهم قوم لا يعقلون) انلر بو اختلافى شول سبيله در كه انلر صلاحلى اولان شئي بيلزلر زيرا كه قلوبلر نيك تشتى قوالر ينى ضعيف ايدوبدر (كمثل الذين من قبلهم قريبا ذاقوا وبال امرهم ولهم عذاب اليم) بنو النضيرك كفرده مثلى انلردن زمان قريسدن اول يكن اهل بدر ويا بنو قينقاع مثلى كبيدر انلر بنو النضيردن اول ديارلرندن اخراج اولنسدقلى صحيح ايسه ويا خود ايم ماضيه دن مهلكين مثلى كبيدر كه كفرلر نيك سوء عاقبت دنياده ذوق ايتديلر ومع ذلك انلره عذاب اليم دخی واردر (كمثل الشيطان اذ قال للانسان اكفر فلما كفر قال انى برى منك انى اخاف الله رب العالمين) منافقينك يهودى قتال اوزره اغراده مثلى شيطان مثليدر كه اول انساني كفر اوزره اغرا ايدر انسان دخی انك اغراسيله كافر اوليچق شيطان اندن تبرى ايدوب بن الله تعالىدن قورقارين دير شول اميدله كيم اكا اولان عذاب مشاركتندن قورتيله حالبوكه اول برامل باطلدر (فكان عاقبتهم في النار خالدن فيها وذلك جزاء الظالمين) اويله اولسه اول شيطان وانسانك عاقبتى نارده خلود اولور كه اول كفر ونفاقله نفسلرينه ظلم ايدنلر ك جزا سيدر * دينلديكه انسانله مراد ابو جهلدر كه يوم بدرده ابليس اكا ديديكه اشبوكونده ناسدن سزه غالب اولور يوقدر وبن سزك ناصريكزين وقتا كه قتال اولوب ابليس جبريل عليه السلامى رسول الله عليه السلامه بيله كوردى اندن قورقوب كفاردن تبرى ايتدى حتى كه منهزمين اولديلر * دينلديكه انسانله مراد برصيصا نام بر راهبدر كه ابليس وسوسه سيله برمرأه مجنونه يه زنا ايتديكه اول انك جنونه علاج ايچون كتورلمشيدى حلى ظاهر اوليچق اول انى قتل ودفن ايتدى تا كه ناس بيننده رسواى اوليه چون

(بر)

برصيصاى قصاص ايچون صلبه ايتديلر ابليس اكا كلوب بكا سجده ايتكه سنى قتلدن قورتاره يم ديدى برصيصا دخی اكا سجودله كافر اوليچق ابليس اكا بن الله تعالىدن قورقارين ديوب اندن تبرى ايتدى (يا ايها الذين آمنوا اتقوا الله ولتنظر نفس ما قدمت لغد) يامؤمنلر الله تعالىدن قورقوب اوامره اطاعت ونواهيدن تباعد ايدك هر نفس نظر ايتسونكه ايرته يوم قيامت ايچون اعمال صالحه دن نه تقديم ايدوبدر (واتقوا الله ان الله خير بما تعملون) واجبات اداسنده ومحارم تركنده الله تعالىدن قورقك كه اول الله تعالى اعمالكزه خيردر (ولا تكونوا كالذين نسوا الله فانساهم انفسهم اولئك هم الفاسقون) الله تعالىنك حقنى اونودانلر كى اولمكزه اولدخی انلره نفسلرينى اونوتدردى حتى كه نفسلرينه نفع ايدر شئي ايشمز وانى تخلص ايدر شئي ايشلز اولديلر * ويا خود يوم قيامته اهوالدن انلره انى كوستره كيم انكله نفسلرينى اونوده لر * ايمدى انلر فسوقده كامللردر (لا يستوى اصحاب النار واصحاب الجنة اصحاب الجنة هم الفائزون) شونلر كه نفسلرينى استهمال ايله ناره مستحق اولديلر وشونلر كه نفسلرينى استكمال ايله جنته استيهال ايتديلر ايكيى مساوى اولزلر زيرا كه دنياده وآخرته اصحاب جنت كرامته واصحاب نار مهاتمه در اصحاب جنت نعيم مقيم فائزلردر شافعى بو آيتله استدلال ايدوب كافر يرينه مسلم قتل اولنجه وكافر قهرله اموال مسلمينه مالك اوليه (لوانزلنا هذا القرآن على جبل لرأته خاشعا متصدعا من خشية الله) اكر جبلده تميز خلق اولنوب اوزرينه قرآن ازال اولنسه صلابت ورزانتيله الله تعالىنك عذابى خوفندن انى خاشع متصدع كوريدك شول حذرله كيم تعظيم قرآنده حق اللهى ادا ايتيه * ايمدى كافر ك قلبى قسوتده جبلك قسوتندن اشددر كه قرآنده كى مواعظ وعبرله متأثر اوليوب انى ايشتمك كى اندن اعراض ايدر (وتلك الامثال نضربها للناس لعلهم يتفكرون) اشبو امثالكه قرآنده ذكر اولندى بز انى ناسه تبسين ايدرز تاكه انلر تفكر ايدوب اتعاظ ايتدكلرندنصكره رب تعالى يه مخالفتى ترك ايدملر (هو الله الذى لا اله الا هو) اول الله تعالى معبود بالحقندر الوهيتده مشاركى يوقدر (عالم الغيب والشهادة) اول عالمدر جواهر قدسيه واحوالندن هر شئي كه حسدن غائب اوله واجرام

واعراضندن هر شیئی که حسده حاضر اوله و یا عالمدر هر شیئی که اول معدوم و کرم موجوددر و یا هر شیئی که اول سرده و علانیه در (هو الرحمن الرحیم) که اول جمیع خلقه عطوفدر رزققرین و یرر منع ایتز مؤمنلرک ذنوبنی مغفرت و رجعت ایدیدر (هو الله الذی لا اله الا هو) اول الله تعالی معبودیتده مشارکی یوقدر (الملك) ملکدر که هیچ بر شیئندن ملکی زائل اولمز (القدوس) هر نقص ایجاب ایدر شیئندن منزّه و تراختهده بدیدر (السلام) هر نقص و آفتدن سالمدر (المؤمن) اولیاسنه عذابندن امن و یریدر (المهین) هر شیء اوزره رقیب و حافظدر (العزيز) هر شیء اوزره غالبدر * دیلدیکی شیئندن انی هیچ بر شیء عاجز ایتز (الجبار) اراده ایتدیکی شیء اوزره خلقی جبر ایدر و یا حالربنی اصلاح ایدر (المتکبر) حاجت و ینقص ایجاب ایدر هر شیئندن تکبر ایدر (سبحان الله عما یشرکون) اول الله تعالی منزّه اولدی هر شیئدنکه کفار انی اکا اشراک ایدرلر (هو الله الخالق) اول الله تعالی مقتضای حکمتی اوزره اشیایی تقدیر ایدر (البارئ) اعیانی عدمدن وجوده کتورر و خلقت بعضی بعضندن اشکال مختلفه ایله تمیز ایدر (المصور) هر شیء بر صورت و یرر ارحامده کی اولاده صورت و یرمی کی که انکه بعضی آخردن ممتاز اولور (له الاسماء الحسنی) انکچون اسماء حسنی واردر که اول محاسن معانی به داله در ذکر سورته اعراف او اخرنده یکو بدر (یسبح له ما فی السموات والارض) سموات و ارضده کی مخلوقاتک کلیسی اول الله تعالی بی نقائصدن تنزیه ایدر (وهو العزيز الحكيم) که اول ملکنده عزیز امر و فعلنده حکیمدر * معقل بن یسار ایدر پیغمبریمز صلی الله علیه وسلم دیدیکه بر کسه که صباحده اوچ کره (أعوذ بالله السميع العليم من الشيطان الرجيم) دیوب سورته حشرک آخری اوچ آیتی اوقویه الله تعالی اکا یتش بیک ملک توکیل ایدوب اخشامه دکن انکچون استغفار ایده لر اول کونده وفات ایدر سه شهید اوله واکر انی اخشامده قراءت ایدر سه ذکر اولندیغی منوال اوزره صباحه دکن انکچون یتش بیک ملک استغفار ایده واکر اول کیجهده وفات ایدر سه کذلک شهید اوله

سورة الممتحنة وهی ثلاث عشرة آية مدنية

بسم الله الرحمن الرحيم

(یا ایها الذین آمنوا لاتخذوا عدوی وعدوکم اولیاء) یا مؤمنلر بنم عدو می و سزک عدو کزی اولیاء ایدنمکز بو آیت کریمه حاطب بن بلتعده شاتنده نازل اولوبدر که اول پیغمبریمز صلی الله علیه وسلمک اهل مکده غزا ایدر ایدو کن بیلچک انلره نامه یازدیکه اول پیغمبریمز علیه السلام اوزر یکره غزا قصیدین ایدوبدر غافل اولمکز وانی عبدالمطلبک مولاتی ساره نام مرأه ایله ارسال ایتدی * اوله اولسه جبریل علیه السلام انی پیغمبریمز علیه السلامه خبر و یریمکز پیغمبریمز علیه السلام علی و عمار و طلحه و زبیر و مقداد و ابامرث رضی الله عنهم نام جعاعتی اکا کوندروب دیدیکه روضه خاخره وارد یغزده انده بر مرأیه ملاقات ایدر سز که یسه سنجه حاطبک اهل مکده نامه سی واردر انی اندن آلوب کندویی صالیورک اگر امتناع ایدر سه بوینی اورک چون اول موضعده اکا ایریشوب نامه بی ایستدیلر انکار ایتدی علی رضی الله عنه اوزرینه سل سیف ایدیمکز نامه بی صاچی اراسندن چیقاروب و یردی چون نامه بی پیغمبریمز علیه السلامه کتوردیلر پیغمبریمز علیه السلام حاطبی چاغروب نیچون بویه ایتدک دیدی حاطب دیدیکه یارسول الله اسلامه کلیدنبرو کافر اولدم و سکا نصیحی ترک ایتدم لکن بن قریش اراسنده رجل غریب اولوب مکده اهلی حایت ایدر کسه یوقدر دیلدمکه انکه انلره نوع صداقت کوسترم و مع ذلک بلورمکه بنم نامه م انلره بر شیئی مفید اولمز پیغمبریمز علیه السلام انک قولانی تصدیق و عذرینی قبول ایتدی (تلقون الیهم بالموتة) نامه ایله و یا پیغمبریمز علیه السلام اخبارینی انلره اعلامه مودت القا ایدر سز (وقد کفروا بما جاءکم من الحق) حالبوکه انلر سزه کلان قرآنه و یارسوله کافر اولدیلر (ینخرجون الرسول وایاکم ان تؤمنوا بالله ربکم) ربکز جل شانیه ایمانکز سیبیلله رسول اللهی و سزی دیار کز مکهدن چیقاردیلر (ان کنتم خر جتم جهادا فی سبیلی و ابتغاء مرضاتی تسرون الیهم بالموتة وانا اعلم بما اخفیتم و ما اعلنتم) اگر دیار کزدن خروجکز بنم سبیلده جهاد و رضامی طلب ایچون ایه انلر بنم اعدائهم ایدو کن بلور کن نیچون انلره اسرار مودت

ایدر سز حال بو که بن اهل کفره سزک اسرار مودتکزی و اهل اسلامه اقرار
و توحیدیکزی بیلورم ایمدی اهل کفره نه مودت ونه انی اسرار ایدک
(ومن یفعله منکم فقد ضل سواء السبیل) بوندنصکره سزدن اول کسه که
کفره ایله موالات ایده طریق هدادن خطا ایدر (ان یتفقوکم یکونوا لکم
اعداء ویبسطوا الیکم ایدیهم والسننهم بالسوء وودوا لوتکفرون) اگر
انلر سزه ظفر بولسدر سزه عداوتلرین اظهار ایدرلردی ویدلرینی سزه
ضرب و قتلله ولسانلرینی سب و شتمله بسط ایدرلر و سزک دین اسلامدن
ارتدادکزی تمنی ایدرلر (لن تنفعکم ارحامکم ولا اولادکم یوم القیامة
یفصل بینکم) اگر انلر سزه عداوت ایتلر سزه قرابات و اولادکزی سزه
نفع ایتز که انلر ایلچون مشرکینه و رسول الله خیانت ایدر سز یوم قیامتده
الله تعالی سزکله اولادکزی بینن فصل ایدر سزی ایمانکزیلر جننه و انلری
کفرلریله ناره قور * او یله اولسه ایرته سزه نفعی اولمین قوم ایچون بوکونده
حق الهی نیچون رفض ایدر سز (والله بما تعملون بصیر) الله تعالی
اعمالکزیلر سزینی و علانیه سنی کورر هر برینک جزاسنی سزه ایرکورر
(قد کانت لکم اسوة حسنة فی ابراهیم والذین معه) ابراهیم علیه السلامده
وانکله اولان مؤمنلرده سزچون قدوه صالحه وارد ایدر انلر اقتدا
ایدک (اذ قالوا لقومهم انا برآء منکم و ما تعبدون من دون الله کفرنا بکم)
که انلر کفار دن قوملرینه دیدیلر که بز سزدن والله تعالیلر غیری
معبود اتخاذا ایتدیککزی اصنامدن بریلرلر و سزک دینکزه منکرلرلر (وبدا
بیننا و بینکم العداوة والبغضاء ابدا حتی تؤمنوا بالله وحده) و بزمله سزک
بینکزده عداوت و بغضا ظاهر اولوب سزدن مودتی قطع ایتدک تاشول
وقته دکن که الله تعالیلر وحدانیته ایمان کتوروب شرکی
ترک ایده سز او یله اولسه عداوت و بغضامن الفت و محبته منقلب اولور
(الا قول ابراهیم لابیہ لاستغفرن لک و ما املک لک من الله من شیء)
الا ابراهیم علیه السلامک شول قولنده سزچون قدوه یوقدر که اول باباسنه
دیدیکه بن سنکچون الله تعالیلر مغفرت دیلرین و الحال اگر ایمانه کلز سزک
عذاب اللهدن بر شیتی سندن دفعه مالک اولمزین ابراهیم علیه السلامک
انکچون استغفاری اندن نهی اولمزدن اول ایدی ویا اسلامه کلکده و عدی
اولدیغی ایچون ایدی * ایمدی یا مؤمنلر الله تعالی به التواء ایدوب دیکز که

(ربنا)

(ربنا علیک توکلنا و الیک انبنا و الیک المصیر) یا ربنا امریمزی سکا تقویض
ایتدک و سکا اطاعتله اقبال ایتدک و آخرتده مرجعمر سکا در (ربنا لا تجعلنا
فتنة للذین کفروا) یا ربنا بز کافرله قنه قملل انلری اوزریمزه تسلیطله
کندیلرین حق اوزره و بز باطل اوزره ظن ایدوب انلری بزمله مفتون
ایتمکل و یاخود بزه عذاب ایتمکل که انلر بز عذابده کور یجک بونلر حق
اولسدر عذاب اولمزلردی دیو بزه شماتت ایتدرمکل (واغفرلنا ربنا انک
انت العزیز الحکیم) و بز تقصیراتمزی مغفرت ایتکل که سن ملککده عزیز
امرکده حکیمسن (لقد کان لکم فیهم اسوة حسنة لمن کان یرجو الله
والیوم الآخر) یا مؤمنلر سزچون ابراهیم علیه السلام و اتباعی مؤمنلرده
قدوه حسنه وارد شول کسه ایچونکه الله تعالیلر جزیل ثوابن و جیل
حسابن رجا ایدر (ومن یتول فان الله هو الغنی الحمید) شول کسه که انی
قدوه ایدنمکدن اعراض ایده الله تعالی خلقندن و ایمانلرندن غنیدر فعلنده
و حکمنده حیددر (عسی الله ان یجعل بینکم و بین الذین عادیتم منهم مودة)
و قتا که الله تعالی مؤمنلره کفارده عداوت ایتمکله امر ایلدی مؤمنلر مشرکیندن
اقر بارینه عداوت و براتلرین اظهار ایتدیلر * الله تعالی بو آیتی اترال
ایدوب دیدیکه قریب اولدیکه سزکله مشرکیندن معادات ایتدیککزی
کسه لر بیننه مودت القاء ایده * او یله اولسه الله تعالیلر هدایتله انلرک
اکثری اسلامه کلوب معاداتلری موالات و مواخاته مبدل اولدی (والله
قدیر والله غفور رحیم) الله تعالی وعدینی انجازه قادر در معصیتدن
توبه ایدنه غفور اکا اطاعت ایدنه رحیدر (لاینهاکم الله عن الذین
لم یقاتلوکم فی الدین ولم یخرجوکم من دیارکم ان تبروهم و تقسطوا الیهم ان الله
یحب المقسطین) الله تعالی سزی نهی ایتز مشرکیندن شول ذی
قرا به لر یکزه بر و عدلدنکه انلر سزکله دینده قتال ایتدیلر و سزی دیارکزدن
چیقارمیدر الله تعالی هر امرده عدل ایدلری سور * روایت اولدیکه
قتیلر بنت عبد العزی مشرکه اولدیغی حالدده هدایا ایله قزی اسماء بنت ابی بکر
رضی الله عنه یه قدوم ایتدکده دخولدن منع ایدوب هدایاسنی رد ایدیکک آیت
مذکورده نازل اولدی (انما ینهاکم الله عن الذین قاتلوکم فی الدین و اخرجوکم
من دیارکم و ظاهروا علی اخرجکم ان تولوهم و من یتولهم فاولئک هم
الظالمون) الله تعالی سزی کفار دن شول قومی تولى و تودددن نهی

بع (۱۶)

ایدرکه دینده سزکه قتال ایدلر وسزی دیارکردن چیقاره لر وسزی
چیقارمغه اعانت ایدلر * ایمدی انلرکه اول وصفلو کفاره تولی وتودد
ایدلر موالاتی خلاف محلنه وضعله نفسلرینه ظلم ایدیجیلردر (یا ایها الذین
آمنوا اذا جاءکم المؤمنات مهاجرات فامتحنوهن الله اعلم بایمانهن)
یامؤمنلر چقان سزه دار الحربدن هجرتله شول لسانلرنده کله توحید
ظاهر اولور نساء کله سز انلری اختیار ایدک شول شیئله کیم انکله
ایمانده قلبلرینک لسانلرینه موافقتی اولدیغنه ظنکز غالب اوله استحلافله کیم
دار الحربدن خروجلری دکل الاسلامه رغبتله در یوخسه زوجندن کراهتله
ویا مسلمیندن بررجله عشقله ویا اعراض دنیویه دن برشیئله دکل الله تعالی
انلرک ایمانته سزدن اعلمدر زیرا که انلرک قلوبنده اولان شیئله انجق
اول مطلعدر غیری دکل (فان علمتموهن مؤمنات فلا ترجعوهن الی
الکفار لاهن حل لهن ولا هم یحلون لهن) اگر سز انلرک حلقنه ویاظهور
اماراتله مؤمنه اولدقلرینی بیلورسکز سز انلری کفاره رد ایتیمکز اگرچه
ازواجلرینه ایسه ده زیرا که اول نساء مؤمنات نه اول ازواج کفاره
ونه اول ازواج کفار انلره حلال اولز (وآتوهم ما انفقوا) واول ازواج
کفاره دفع ایدک شول مهوریکه اول نسیاه اتفاق ایتدیلردی * روایت
اولندیکه حدیده صلحنده مشرکون پیغمبریمز صلی الله علیه وسلم
دیدیلر که اهل مکّه دن اولکله پیغمبریمز علیه السلامه واره پیغمبریمز
علیه السلام انی انلره رد ایده وصحابه دن اولکله انلره واره انلرانی رد
ایتیملر وانک اوزره عهدنامه یازدیلر اول عهددنصکره سبیعه بنت الحارث
الاسلیه مسلمه اولدیغی حالده پیغمبریمز علیه السلامه کلدی انک اردنجه
زوجی صبیقی بن واهب المخزومی کافر اولدیغی حالده اول سبیعه یی
استیوکلدی یا محمد بکا زوجهمی ردایت زیرا که بزدن سکا کلانی بزه رد ایتیمکه
شرط ایدوبسن * اولیه اولسه اشبو آیت نازل اولوب پیغمبریمز علیه السلام
سبیعه یی منوال مشروح اوزره اختیاردنصکره اکارد ایتدی وصیفینک
سبیعه یه ویردیکی مهر ونفقده یی سبیعه دن آکوب کیرو صبیقی یه ویردی
وسبیعه یی عمر رضی الله عنیه تزویج ایتدی ومن بعد پیغمبریمز علیه السلام
اهل مکّه نکرچالندن اکا کلانی رد ایدر ونساستندن کلانی اختیاردنصکره
آیقوردی (ولاجنّاح علیکم ان تنکحوهن اذا آتیتموهن اجورهن)

(یامؤمنلر)

یامؤمنلر سزه حرج یوقدرکه اول دار حربدن سزه هجرت ایدن نسائی
نکاحلنه سز چقانکه انلره مهرلرین ویره سز اگرچه دار حربده انلرک
کفاردن زوجلری وار ایسه ده زیرا که اسلام انلرله اول زوجلری
بینی تفریق ایدوبدر ابوحنیفه بونکله استدلال ایتدیکه چقان زوج
وزوجه دن بری مهاجرت اسلام ویاعقد ذمتله دار حربدن چیقوب بری انده
حربی قالسه ایکسی بیننده فرقت واقع اولور ومهاجره یه عدت لازم اولز
ونکاحی مباح اولور مکرکه حامله اوله (ولاتمسکوا بعصم الکوافر)
نسائکزدن بری العیاذ بالله مرته اولوب دار الحربه لاحق اولسه اندن عصمت
زائل وزوجندن اول منقطع اولور * اولیه اولسه انک مؤمن زوجنه
جائز اولور که انک عدتی ایچنده اختنی واندن غیری درت نسائی تزویج ایده
یعنی سزک مکّه دن مدینه یه هجرتکزدنصکره مکّه ده شرک اوزره اقامت
ایدن نساکز نکاحنه رغبت ایتیمکز زیرا که انلرک عصمتی سزدن کسیلوبدر
(واسئلوا ما انفقتم) زوجاتکزه ویردیککزی انلری تزویج ایدندن ایسته کز
چقانکه ارتداد ایدوب مشرکینه لاحق اوله لر (ولیسئلوا ما انفقوا)
وزوجات مهاجراته مشرکیندن زوجلری مهردن انفاق ایتدکلرین
مؤمنلردن انلری تزویج ایدندن استسولر (ذلکم حکم الله بحکم بینکم والله
علیم حکیم) اشبو آیتده مذکورک جیبی الله تعالینک حکمیدر که بینکزده
حکم ایدر الله تعالی سزک احوالکزی بیلور سزه امرنده حکمتن اجرا
قیلور * آیت مذکوره نازل اولوب مؤمنلر الله تعالینک امرینه انقیاد ایدیچک
مشرکونه شول نسادن مهاجراته انفاق ایتدکلرین ادا ایتدیلر اما که
مشرکون الله تعالینک امرندن انقیاددن امتناع ایدوب مؤمنینه شول
ارتدادله لحوق ایدن نسیاه انفاق ایتدکلرین ادا ایتیمچک نازل اولدیکه
(وان فاتکم شیء من ازواجکم الی الکفار فعاقتهم فاتوا الذین ذهبت
ازواجهم مثل ما انفقوا) یامؤمنلر اگر ازواجکزدن برشی حقیر غیر
مفوض کفاره سبق وانفلات ایدرسه مرته اولدیغی حالده مهر مثلی اخذ
ایتیمیله بعده کفاره غزا ایدوب انلردن غنیمته نائل اولسکز ویانلره غالب
اولوب عاقبت سزک اولسه انلردن اموال اغننام ایتسکز ایمدی یامؤمنلر
سزدن شول ازواجی ارتدادله کفاره کیدنلره غنائمدن ویرک مهاجراتک
مهورندن ازواج کفاره ویردیککز مثلی ویرک لکن انی زوج کافره ادا

اِيْمَنْزِرْ (وَاقْوَا اللّٰهَ الَّذِيْ اٰتَمَّ بِهِ مُؤْمِنُوْنَ) وَاللّٰهُ تَعَالٰىدِنْ قُوْرَقُوْب
اَكَا عَصِيَانِ اِيْمَنْزِرْ كَه سِرْ اَكَا مُؤْمِنْسِرْ (يَا اَيُّهَا النَّبِيُّ اِذَا جَاكَ الْمُؤْمِنَاتُ
يَبَايَعْنَكَ) يَا نَبِيَّ اللّٰهِ قِيَانْ سَكَا مَكَّة نَكْ قَحْحِيْ كُوْنْدَه شُوْل اِيْمَانَه كِلَانْ
نَسَاء مَبَايَعَتْ اِيْدَه كَلَه لِرْ (عَلٰى اَنْ لَا يَشْرَكَنَ بِاللّٰهِ شَيْئًا) شُوْل شَرْطَلَه كِيْم
اللّٰهُ تَعَالٰى يَه بِرَشْيْ اَشْرَاكْ اِيْمِيْدَلِرْ (وَلَا يَسْرِقْنَ) وَهِيْجْ كَسَه نَكْ مَالْدِنْ
سَرْقَه اِيْمِيْدَلِرْ (وَلَا يَزْنِيْنَ) وَزَنَا اِيْمِيْدَلِرْ (وَلَا يَقْتُلْنَ اَوْلَادَهُنَّ) وَزَمَانْ
جَاهِلِيْتَدَه كِيْ كَبِيْ فَقَرْ خُوْفِيْلَه اَوْلَادِلِرِيْ قَتْلْ اِيْمِيْدَلِرْ بِعْنِيْ وَفَاتْ اِيْمْدِنْ
دِيْرِيْ قِيْرَلِرِيْ دَفِنْ اِيْمِيْدَلِرْ (وَلَا يَأْتِيْنَ بِبَهْتَانٍ يَفْتَرِيْنَه بَيْنَ اَيْدِيْهِنَّ
وَارْجُلِهِنَّ) وَبِرْ وَلَدِيْ التَّقَاطْ اِيْدُوْبْ زُوْجْنَه بُوْسَنْدَنْدِرْ دِيُوْنَسَبْتَلَه
بَهْتَانْ اِيْمِيْدَلِرْ (وَلَا يَعْصِيْنَكَ فِىْ مَعْرُوْفٍ) وَانْلَرَه اَمْرْ اِيْتِيْكَلْ اَمُوْر
مُحْسَنَدَه سَكَا مَخَالَفَتْ اِيْمِيْدَلِرْ (فَبَايَعْنَهُنَّ وَاسْتَغْفِرْلَهُنَّ اللّٰهُ اِنْ اللّٰهُ غَفُوْرٌ رَّحِيْمٌ)
اِيْمْدِيْ اَنْلَرْ اَشْيَاء مَذْكُوْرَه يِيْ التَّزَامْ اِيْتَدَكَدَه سَنْ اَنْلَرْ اِيْجُوْن اللّٰهُ تَعَالٰىدِنْ
ثَوَابْ جَزِيْلَه ضَامِنْ اَوْلَقْ اُوْزْرَه اَنْلَرْ اِيْلَه مَبَايَعَتْ اِيْتَكَلْ وَانْلَرْ اِيْجُوْن
اللّٰهُ تَعَالٰىدِنْ مَغْفِرَتْ دِيْلَه كَلْ اللّٰهُ تَعَالٰى اَكَا اِنَابَتْ اِيْدَنَه غَفُوْرٌ وَطَاعَتْ اَهْلَنَه
رَحِيْمٌ * عَائِشَه رَضِيَ اللّٰهُ عَنْهَا اِيْدِرْ يَغْمِيْرِيْمِزْ صَلَّى اللّٰهُ عَلَيْهِ وَسَلَّمَ نَسَاْلَه
مَبَايَعْتِيْ كَلَامَلَه اِيْدِيْ يُوْخْسَه اَنْكْ اِلَى هِيْجْ بِرْ اَجْنِيْبِيْهْ اَلَه دَكَا مَشْدِرْ
مَكْرْ شُوْل مَرَأَه نَكْ اَلَه كَه اِنِيْ مَلَكْ يَمِيْنْ وَيَامَلَكْ نَكَاحَلَه مَلَكِيْ اَوْلِيْدِيْ *
دِيْتَلْدِيْكَه يَغْمِيْرِيْمِزْ صَلَّى اللّٰهُ تَعَالٰى عَلَيْهِ وَسَلَّمَ اَجْنِيْبِيْهْ لَرْدِنْ هِيْجْ بِرْ مَرَأَه اِيْلَه
مَبَايَعَه حَالْنَدَه مَصَاحَفَه اِيْمِيُوْبَدِرْ (يَا اَيُّهَا الَّذِيْنَ اٰمَنُوْا لَا تَتَوَلَّوْا قَوْمًا غَضِبَ اللّٰهُ
عَلَيْهِمْ قَدْ يَأْكُلُوْنَ اَلْاٰخِرَةَ كَمَا يَأْكُلُوْنَ اَلْاَوَّلَةَ مِنْ اَصْحَابِ الْقُبُوْرِ) يَا مُؤْمِنْلِرْ
اللّٰهُ تَعَالٰىنَكْ غَضَبْ اِيْتِيْكِيْ قَوْمَلَه مَوَالَاتْ اِيْمَنْزِرْ كَه اَنْلَرْ رَامَه كَفَارْدِرْ
وَيَاخُوْدْ يَهُودْدِرْ * دِيْتَلْدِيْكَه اَشْبُوْآيْتْ مُسْلِيْنْدِنْ بِرْ جَاعَتْ شَانْدَه
نَازِلْ اَوْلُوْبَدِرْ كَه اَنْلَرْ يَهُودْدِنْ بِرْ طَائِفَه اِيْلَه مَوَاصِلَه اِيْدِرْلَرْدِيْكَه ثَمَارْلَرْدِنْ
نَازِلْ اَوْلَه لِرْ * اِيْمْدِيْ اَنْلَرْ اٰخِرْتَكْ خِيْرْ وَرَجَالِرِيْنْ قَطْعْ اِيْمَشْلَرْدِرْ نَتَكِيْمْ
كَفَارْ اَصْحَابْ قُبُوْرَكْ بَعَثْ اَوْلَمْلَرْدِنْ وَيَا ثَوَابْلَمْلَرْدِنْ وَيَا خِيْرْلَرْدِنْ
مَآيُوسْ اَوْلَدِلِرْ

سورة الصف وهى اربع عشرة آية مدينة

بسم الله الرحمن الرحيم

(سُبْحَ اللّٰهُ مَا فِى السَّمٰوٰتِ وَمَا فِى الْاَرْضِ وَهُوَ الْعَزِيْزُ الْحَكِيْمُ) اللّٰهُ تَعَالٰى يِيْ

(سَمَوَاتِ)

سَمَوَاتِ وَارْضَدَه اَوْلَانْ هَرْمَوْجُوْدْ تَنْزِيْهْ اِيْدِرْ هَرْ شَيْئْدَنْكَه اَنْكْ كَالْ
صِفَاتَه لَايَقْ اَوْلِيْهْ اَوْلْ مَلَكْنَدَه عَزِيْزْ اَمْرْنَدَه حَكِيْمْدِرْ (يَا اَيُّهَا الَّذِيْنَ اٰمَنُوْا
لَمْ تَقُوْلُوْنَ مَا لَا تَفْعَلُوْنَ) يَا مُؤْمِنْلِرْ اِيْمَلْدِيْكَزْ شَيْئِيْ نِيْجُوْنْ سُوْيَلِرْسِرْ *
سَبَبْ نَزُوْلْنَدَه دِيْدِيْلِرْ كَه مُؤْمِنُوْنْ دِيْدِيْلِرْ كَه اَكْرَ اللّٰهُ تَعَالٰى يَه اَحَبْ اَوْلَانْ
اَعْمَالِيْ بِيْلَسِيْتَدَكْ اِنِيْ اِيْشَلِرْ وَمَالَلِرْ يَمَزِيْ وَنَفْسَلِرْ يَمَزِيْ اَكَا بَذَلْ اِيْدِرْ دَكْ اَوْلِيْهْ
اَوْلَسَه (اِنَّ اللّٰهَ يَحِبُّ الَّذِيْنَ يُقَاتِلُوْنَ فِىْ سَبِيْلِهِ صَفًا) اَيْتِيْ نَازِلْ اَوْلُوْبْ اَحَدْ
غَزَا سِيْلَه اَخْتِبَارْ اَوْلَنْدَقْلَرْنَدَه اَرْدَلِرِيْهْ دُونُوْبْ قَاجَدِيْلِرْ اَوْلْ فَعْلَارِيْ اُوْزْرَه
نِيْجُوْنْ اِيْشَلِيْهْ جَكْكَزْ شَيْئِيْ سُوْيَلِرْسِرْ دِيُوْ عَتَابْ اَوْلَنْدِيْلِرْ * مُحَمَّدْ بِنْ كَعْبْ
اِيْدِرْ وَقْتَا كَه اللّٰهُ تَعَالٰى رَسُوْلْنَه شَهْدَاءْ بِدَرْكْ ثَوَابِيْ خَبِرْ وَيَرْدِيْ صَحَابَه دِيْدِيْلِرْ
مِنْ بَعْدْ اَكْرَ غَزَا يَه اِيْرِيْشُوْرْسَه وَزُوْ سَعْمَزِيْ قَتَالَدَه بَذَلْ اِيْدَه لَمْ چُوْنْ اَحَدْ
غَزَا سَنَه اِيْرَدِيْلِرْ اَوْلْ سُوْزَلِرِيْهْ وَفَا اِيْمِيْجَكْ اَشْبُوْ آيْتَلَه تَعْيِيْرْ اَوْلَنْدِيْلِرْ * ضَحَّاكْ
اِيْدِرْ اَشْبُوْ آيْتْ قَتَالْ اَمْرْنَدَه نَازِلْ اَوْلُوْبَدِرْ كَه قَتَالْ حَالْنَدَه اِيْمْدَكَلَرِيْ فَعْلِيْ اِيْتَدَكْ
دِيُوْ سُوْيَلْدَكَلَرِيْ اُوْزْرَه عَتَابْ اَوْلَنْدِيْلِرْ * اِبْنْ زَيْدْ اِيْدِرْ اَشْبُوْ آيْتْ مُنَاقِقِيْنْ
شَانْدَه نَازِلْ اَوْلُوْبَدِرْ كَه مُؤْمِنْلَرَه نَصْرَلَه وَعَدْلَرْدِنْ نَصْرَكَه اَكَا وَفَا
اِيْمْدِيْلِرْ (كَبْرَمَقْتَا عِنْدَ اللّٰهِ اَنْ تَقُوْلُوْا مَا لَا تَفْعَلُوْنَ) اِيْشَلِيْهْ جَكْكَزْ شَيْئِيْ سُوْيَلْدَكْ
اللّٰهُ تَعَالٰى عِنْدْنَدَه مَقْتْ اَوْلَمْفَه عَظِيْمْ اَوْلَدِيْ * پَسْ بُوْ اَجْلَدِنْ سَلَفَكْ
بَرِيْنَه بَزَه تَحْدِيْثْ اِيْتْ دِيْنَلَسَه دِيْرْدِيْكَه بَكَا اَمْرْ اِيْدِرْ مِيْسِرْ كَه اِيْشَلِيْهْ جَكْ
شَيْئِيْ سِرْهْ سُوْيَلِيْمْ وَانْكَلَه اللّٰهُ تَعَالٰىنَكْ مَقْتَنَه اسْتَعْجَالْ اِيْدَمْ (اِنَّ اللّٰهَ
يَحِبُّ الَّذِيْنَ يُقَاتِلُوْنَ فِىْ سَبِيْلِهِ صَفًا كَاُنْهُمْ بَنِيَانْ مَرْصُوْصٌ) اللّٰهُ تَعَالٰى
سُوْرْ شُوْلْ مُؤْمِنْلَرِيْكَه بَنِيَانْ مَرْصُوْصْ كَبِيْ اَنْكْ سَيِيْلْنَدَه صَفْ اَوْلُوْبْ
قَتَالْ اِيْدِرْلَرْ مَكَانْلَرْدِنْ زَائِلْ اَوْلَزَلِرْ (وَإِذْ قَالَ مُوْسٰى لِقَوْمِهِ يَا قَوْمِ
لِمَ تَقُوْلُوْنَ اِنِّىْ رَسُوْلُ اللّٰهِ اِلَيْكُمْ) ذَكْرْ اِيْتْ شُوْلْ وَقْتِيْ كَه
مُوْسٰى عَلَيْهِ السَّلَامْ بَنِيْ اِسْرَآئِيْلَه دِيْدِيْكَه يَاقُوْمْ نِيْجُوْنْ بَكَا اِذَا اِيْدِرْسِرْ يَعْْنِيْ
اَكَا دَبَه دَرْدِيُوْ اسْنَادْ وَتَعْيِيْلَه وَالحَالْ بِنْ سِرْهْ رَسُوْلُ اللّٰهِ اِيْدِيْكُمْ يِلُوْرْسِرْ اِنِيْ
بِيْلَكْزْ اِيْسَه تَعْظِيْمْ اَوْلَمَامِيْ وَبَنِيْ اِذَا دَنْ اَمْتَاعْ كَزِيْ اِيْجَابْ اِيْدِرْ (فَلَمَّا زَاغُوْا
اَزَاغَ اللّٰهُ قُلُوْبَهُمْ) وَقْتَا كَه اَنْلَرْ حَقْدِنْ عَدُوْلْ اِيْتَدِيْلِرْ اللّٰهُ تَعَالٰى دَخِيْ
اَنْلَرْ قُلُوْبِيْ حَقْقْ قَبُوْلْدِنْ وَصَوَابَه مِيْلْدِنْ صَرْفْ اِيْتَدِيْ (وَاللّٰهُ لَا يَهْدِيْ
الْقَوْمَ الْفَاسِقِيْنَ) اللّٰهُ تَعَالٰى قَوْمْ فَاسَقِيْنَه حَقْقْ يِلْدِيْرِرْ وَيَاجْنْتَه اِيْرْ كُوْرِرْ
خَصْلَتَه هِدَايْتْ اِيْمَزْ (وَإِذْ قَالَ عِيْسٰى ابْنُ مَرْيَمَ يَا بَنِيْ اِسْرَآئِيْلَ اِنِّىْ

رسول الله اليكم) ذكر ايت انيكه عيسى عليه السلام بنى اسرائيله
ديديكه بن سزه الله تعالىنك رسولن كه سزى اسلامه دعوت ايدم
(مصدقاً لما بين يدي من التوراة) كه بندن اول نازل اولان توراتى
تصديق ايدرين (ومبشرا برسول ياتى من بعدى اسمه اجد) و بندنصكره
كلور اجد نام رسول اللهله تبشير ايدرين يعنى دينم الله تعالىنك كتابريله و نبيليله
مصدقدر كتب مشهوره نك اولى توراتى ذكر ايلديكه انكله نبون حكم
ايدرلدى و مرسلينك خاتى محمد صلى الله عليه وسلمى ذكر ايلدى * خبرده
كلديكه حواريون عيسى عليه السلامه ديديلر كه ياروح الله بز دنصكره
امت كلور مى ديديكه نعم امت محمد كلور كه انلر علما و حكما و ابرار و اتقيا
او اور كا ئنه انلر فقهله انبياء در الله تعالىدن رزق يسيره راضى اولوب
الله تعالى دخى انلردن عمل يسيره راضى اولور (فلما جاءهم بالبينات قالوا هذا
سحر مبين) وقتا كه عيسى عليه السلام انلر احياء موتى و ابراء اكه و ابرص
كبى آيات واضحه ايله كلدى ديديلر كه اشبو سحر ظاهر در (ومن اظلم ممن
افترى على الله الكذب وهو يدعى الى الاسلام والله لا يهدى القوم الظالمين)
شول كسه دن اظلم كيدر كه حقيقتى ظاهر دنيا و آخرتى مقتضى
اسلامه دعوت اولند قدده اجابت موضعنده الله تعالىنك رسولنى تكذيب
و آياتنى سحر ديمسيله اكا افترايى وضع ايدده الله تعالى قوم ظالمينى فلا حلى
اوزره اولان شيه ارشاد ايتز (يريدون ليطغثوا نور الله بافواههم والله
متم نوره ولو كره الكافرون) انلر قصد ايدرلر كه الله تعالىنك دين و يا كتاب
ويا جنتى اقوال كاذبه لريله اطفاء ايدده لر حالو كه انى نشر و اعلاميله غايتنه
اير كوريجكدر اكرچه بهود و نصارى اندن كراحت ايدرلر سه ده
(هو الذى ارسل رسوله بالهدى و دين الحق ليظهره على الدين كله
ولو كره المشركون) اول الله تعالى رسولى محمد عليه السلامى قرآن و دين
اسلامه كوندرديكه انى جميع اديان اوزره قهرله غالب ايدده اكرچه
مشركار اندن كراحت ايدرلر سه ده زيرا كه انده محض توحيد و ابطال
شرك وارد در * دينلديكه آخر زمانده ناس يامسلم و يامسلمينه ذمه اولور
(يا ايها الذين آمنوا اهل ادلكم على تجارة تنجيكم من عذاب اليم) يامؤمنلر
سزه بر تجارت دلالت ايديميكه اول سزى عذاب اليمدن انجاء ايدده
(تؤمنون بالله ورسوله و تجاهدون فى سبيل الله باموالكم و انفسكم ذلكم

(خير)

خير لکم ان كنتم تعلمون) ايمدى الله تعالى به و رسولنه ايمان كتورك
والله تعالىنك سبيلنده ماللر يكرز و نفسلر يكرزله جهاد ايدك اشبو مذكور
سزه خير ليدر بيلور سكرز (يغفر لکم ذنوبكم و يدخلكم جنات تجري
من تحتها الانهار و مساكن طيبة فى جنات عدن ذلك الفوز العظيم)
تاكه اول الله تعالى ذنوبكزى يارغيه و سزى شول جنتلره قويه
كيم اغاجلرى التندن اير مقلر آقار و دخى اقامت و خلود جنتلرنده
شول منازل قويه كيم اول مسك و غنبرله و ياخود حورو غلمانله و بايقاء و لقاء
ايله طيبه در اشبو مذكور ظفر و افردر (واخرى تحبونها نصر من الله
وقتح قريب) اشبو ذكر اولنان ثواب آجلدن ماعدا عاجلده نعمت
محبوبه اولور كه اول الله تعالىدن سزه اعدا كز اوزره نصر در و زمان
قريده مكه و فارس و يارومك ققيدر (وبشر المؤمنين) يامحمد مؤمنلره
تبشير ايت انيكه آجلده و يا عاجلده انلره وعد ايتشن (يا ايها الذين آمنوا
كونوا انصار الله) يامؤمنلر الله تعالىنك اعداسى اوزره سيفله اعوانى
اولك (كافال عيسى ابن مريم للحواريين من انصارى الى الله قال الحواريون
نحن انصار الله) تنكيم عيسى عليه السلام اصحاب حوارينه ديديكه
دين اسلامى اعلاده بكا اعوان كيملر اولور حواريون ديديلر كه اول امره
بز سكا اعوانز (فآمنت طائفة من بنى اسرائيل و كفرت طائفة) اويله
اولسه بنى اسرائيلدن بر طائفه عيسايه ايمان كتوروب اول الله تعالىنك
عبد و رسوليدر انى سمايه رفع ايتدى ديديلر و بر طائفه ايسه كافر اولوب
حاشا اول الله تعالىنك ابن و شر يكيدير ديديلر بعده اول ايكي طائفه مؤمنه
و كافره برى بر لريله قتال ايتديلر (فايدنا الذين آمنوا على عدوهم
فاصبحوا ظاهرين) اويله اولسه بز اول طائفه مؤمنه به عدولرى طائفه
كافره اوزره حجت و حربله تقويه و نصرت ايتدك حتى كه اول مؤمنه انلر اوزره
غالب اولديلر

سورة الجمعة و هى احدى عشرة آية مدنية

بسم الله الرحمن الرحيم

(يسبح لله ما فى السموات وما فى الارض الملك القدوس العزيز الحكيم)
الله تعالى بنى سموات وارضده اولان هر موجود تنزيه ايدراول بر ملكدر كه

هر شيءك مالكيدر ملكندن زائل اولمز ولد و شريك و هر عيبدن منزهدر
 ملكنده عزيزدر امرنده حكيدر (هو الذي بعث في الاميين رسولا منهم)
 اول الله تعالى امت اميه به يعنى عربيه كيم انلر غالبده كتابت و قراتى بيلزلردر
 انلرك جله سندن كنديلر مثلى بر احمى پي رسول كوندردى (يتلو عليهم آياته)
 كه اول رسول انلرك كيم احمى اولوب انلردن قراءت و تعلم سبق
 ايتامشيكن الله تعالىنك آياتنى انلره تلاوت ايدر (ويزكيهم) وانلرى
 عقائد و اعمالك خباثتندن تطهير ايدر (ويعلمهم الكتاب والحكمة)
 ويا انلره قرآن و شريعت و يامنقول و معقولدن معالم دين تعليم ايدر انك
 اندن غيرى معجزه سى اولسه اكا اول كفايت ايديدى (وان كانوا من قبل
 لفي ضلال مبين) اگرچه انلر اندن اول شرك و خبت و جهالتدن ضلال
 ظاهرده ايديلر (و آخرين منهم لما يلحقوا بهم) و دخی اول رسولى قوم
 امينه بعث ايتديكى كيم قوم آخرينه دخی بعث ايتديكه انلر هنوز اول امينه
 لاحق اوليوبدر بلكه من بعد لاحق اوليسردر كه انلر صحابه دنصكره
 يوم قيامته دكين كلور مؤمنلردر زيرا انك دعوت و تعليمى جميع ناسه عام
 اولور (وهو العزيز الحكيم) اول الله تعالى رسول مذكورى اشبو خارق
 عاده امره تمكيننده عزيز و انى اختيار و تعليمده حكيدر (ذلك فضل الله
 يؤتيه من يشاء) اشبو فضلكه رسول الله عليه السلام انكله اقرانندن
 ممتاز اولدى الله تعالىنك اكا فضليدر كه انى ديلديكى كسه به ويرر
 (والله ذو الفضل العظيم) الله تعالى فضل عظيم صاحبيدر كه اكا نسبتله
 نعم دنيا و نعم آخرت استحقار اولنور (مثل الذين حملوا التوراة ثم لم يحملوها
 كمثل الحمار يحمل اسفارا) شول قومك مثليكه انلر يهود در توراتى تعلم
 و موجبيله عمل ايتكه تكليف اولندقلر ندنصكره انكله عمل ايتديلر
 و ايجنده كى آياتله تفعلنديلر انلر شول حار مثليدر كه انلر علم كتابلرين
 كوتوروب جلدده تعب كورر حالبوكه اندن بر شى منتفع اولمز (بئس مثل
 القوم الذين كذبوا بآيات الله) شول قومك مثلى نه مبؤس اولور كه
 الله تعالىنك رسولى محمد صلى الله تعالى عليه وسلمك صدق و نبوته دلالت ايدر
 آياتنى تكذيب ايتديلر (والله لا يهدي القوم الظالمين) الله تعالى شول
 انك آياتنى و انبياسنى تكذيب ايدن ظالمره هدايت ايتمز (قل يا ايها الذين
 هادوا ان زعمتم انكم اولياء الله من دون الناس فتمنوا الموت ان كنتم صادقين)

(يا)

يا محمد يهود طائفه سنه ديكل كه اكر زعم ايدر سكر كه سز سائر امدن ممتاز
 الله تعالىنك اولياسى و احبابى ايسه كز اندن موتى تمنى ايدك اكر زعمكرده
 صادق ايسه كز زيرا كه اكا وصول موتله اولور (ولا تمنونه ابدا بما قدمت
 ايديهم والله عليم بالظالمين) حالبوكه انلر ابدا موتى تمنى ايدر دكلردر شول
 تقديم ايتديكى كيم وعصيانلرى سبيله الله تعالى ظالمرك حالنه علميدر
 و اعماللرى اوزره جزالرين ايدر (قل ان الموت الذى تفرون منه فانه ملاقيكم
 ثم تردون الى عالم الغيب والشهادة فينبئكم بما كنتم تعملون) يا محمد يهوده
 ديكل كه شول موتدنكه انى تمنيدن امتناع ايدر سز شول خوفله كيم اصابت
 ايتديكى تقديرجه اعمال سيئه لرى اوزره جزا اولنه جقلاين بيلورلر
 ايمدى موت سز ملاقى اولور اندن خلاصه مجالكز يوقدر بعده الله تعالى به
 رد اولنور سز كه اول غيبده و شهادتده اولان اشبيانك جميعن بيلور
 اوليه اولسه دنياده ايشلديكىكز اعمالك جميعن بيلور و خبر ويرر (يا ايها الذين
 آمنوا اذا نودى للصلاة من يوم الجمعة فاسعوا الى ذكر الله وذروا
 البيع ذلكم خير لکم ان كنتم تعلمون) يامؤمنلر چقان جمعه كوننده صلاة
 ايجون اذان اوقته الله تعالىنك ذكرينه يعنى خطبه استماعنه و بر قوله
 صلاة جمعه اداسنه سكينه و وقارله كيدك و معامله بى ترك ايدك كه
 الله تعالىنك ذكرى معامله دن خير ليدر اكر علم اهلندن ايسه كز زيرا كه آخرت
 نفعى خير و باقادر اول كونك جمعه ديو تسميه اولمسنه سبب زيرا الله تعالى
 اول كونده آدمك خلقتنى جمع ايتدى و يا اول كونده اشيا خلقتدن فارغ
 اولدى انده مخلوقات جمع اولدى و يا انده ناس صلاة ايجون جمع اولديلر *
 روايت اولنديكه پيغمبرى صلى الله عليه وسلم مدينه قديمه ايتديكندن
 ابتدا قبايه نزول ايدوب جمعه به دكين انده اقامت ايتدى بعده مدينه به
 داخل اولوب بنو سالم بن عوف دارنده ناس ايله جمعه نمازين قيلدى
 و آيتده كى سعييله مراد قلب و نيت و خشوعله و سكونت و وقار ايله سعيدر
 يوخسه سرعت مشيله دكل اما جمعه كوننده سائر معاملاتك حرام اولسى
 ديلديكه اذان ثانى عندنده در بر قوله امامك خروجى عندنده در بر قوله
 شمس زائل اولديغنده در بيع و شرا حرام اولور * معلوم اوله كه صلات
 جمعه فروض اعياننددر اول كسه به واجب اولور كه انده عقل و بلوغ
 و حریت و ذكورت و اقامت اولوب عذرى اوليه * ايمدى اشبو شروطك

وجوديله انى ترك اينسه وعيده مستحق اولور ايمدى صبي ومجنونه جمعه واجب اولور بدينه نقصانلرچون اماكه نسايه بالاتفاق واجب اولور اكثر علماء ديديلر كه عبيد اوزره جمعه واجب اولور وكذلك اكثر من عندده مسافره دخي واجب اولور * امام نخعي وزهري ايدر عبد ومسافرندي ايشته لر اوزرلرينه جمعه واجب اولور هر كسه كه اكا حضور جمعه واجب دكليكن حاضر اولوب امامله جمعه بي قيلسه اندن فرض ظهر ساقط اولور (فاذا قضيت الصلاة فانتشروا في الارض وابتغوا من فضل الله) چنان جمعه نمازي ادا اولنه تجارت وحوايچكزي تصرف ايچون ريوزينه منتشر اولك والله تعالىنك فضلندن طلب ايدك عبادته وچنارزه يه واخ في الله زيارته كتمكله (واذكروا الله كثيرا) وجيع احوالكزده الله تعالى بي چوق ذكر ايدك يوخسه ذكر يكر ايچون صلاتي تخصيص ايتكز (لعلكم تفلكون) تاكه دنيا و آخرت خيرينه نائل اوله سر (واذا راوا تجارة اولهوا انفضوا اليها وتركوك قائما) چنان انلر تجارت ولهو كورسه لر سني خطبه ده قائم آليقويوب اول تجارت ويالهو كيدرلر (قل ما عند الله خير من الله ومن التجارة والله خير الرازقين) انلره ديكل كه الله تعالى عندده كي ثواب لهو وتجارندن سزه خير ليدر الله تعالى رازقكز خير ليسيدر ايمدى اكا توكل ايدوب رزقي اندن طلب ايدك * سبب نزولنده ديلديكه بر خط ييلنده بر جمعه كونده پيغمبر صلي الله تعالى عليه وسلم خطبه ده ايكن دحية النكبي رضي الله عنك قافله سي بغدادي وارپه ايله كلوب اني اعلام ايچون عادتلي اوزره طبل اوردقزنده اني ايشيديجك پيغمبر صلي الله تعالى عليه منبرده آليقويوب اكا سكر دشديلر پيغمبر صلي الله تعالى عليه السلام ايله انجق اون ايكي كشي قالدی * معلوم اوله كه صلاة جمعه ده خطبه فرضدر واجب اولور كه قائم ايكن او قنه و خطبه ده اقل مرتبه الله تعالى يه جد و پيغمبر صلي الله تعالى عليه وسلم و تقوا ايله وصيت اوله واولكي خطبه ده قرآندن برآيت او قنه و ايكنجيسنده مؤمنلره دعا اولنه اشبو بش خصالت بري ترك اولنسه شافعي عندده جمعه صحيح اولور اما ابو حنيفة عندده اكر بر تحميده و تسبيحه و يا تكبيره اينسه خطبه مقامنه قائم اولور

(وسورة)

سورة المنافقين وهي احدى عشرة آية مدنية

بسم الله الرحمن الرحيم

(اذا جاءك المنافقون قالوا نشهد انك لرسول الله والله يعلم انك لرسوله والله يشهد ان المنافقين لكاذبون) يا محمد چنان مدينه منافقزندن سكا كلوب لسانلريه قلبلرينه مخالف شهادت ايدرلر كه سن الله تعالىنك رسوليسن والله تعالى بيلور كه سن انك رسوليسن ديه لر ايمدى الله تعالى شهادت ايدرلر كه انلر قوللرنده كاذبلردر قلبلريه لسانلري بيلنده موطنه اولمديچون وشهادتكه موطنه دن خالي اوله حقيقتده شهادت اولور ايمدى شهادت تسميه لرنده كاذبلردر وياز عملرنده كاذبلردر زيراكه خبرلري مخبر عنه حالنك خلافي اوزره ايدوكنه اعتقاد ايتملردر (اتخذوا ايمانهم جنة فصدوا عن سبيل الله انهم ساء ما كانوا يعملون) انلر حلف كاذبلرين ويا اشبو شهادت لرين تو كيدده حلف مجراسنه جاريدر قتل وسيدن وقايه اتخا ايدرلر وانكله ناسي ايمان وجهاددن صد ايدرلر اول نه مبؤس شيدركه اني ايشلرل شول حيثيتدنكه كفري ابطان ايدوب ايماني اظهار ايتديلر (ذلك بانهم آمنوا ثم كفروا فطبع على قلوبهم فهم لا يفقهون) انلرك ذكر اولنسان سوء اعمال شول سبيله دركه انلر لسانله ايمان اظهارند نصكره كفري اسرار ايتديلر ويا خود آيتي كورد كلرنده ايمان ككوروب شيطانلرنندن شبهه ايشيديجك كافر اولديلر حتى قلبلري كفرله ختم اولنوب انلر حقيقت ايماني بيلر و اكا رغبه ايتز اولديلر (واذا رأيتهم تعجبك اجسامهم وان يقولوا تسمع لقولهم) چنان سن اول منافقزلي ككورسك جسملرينك ضخامت و صباحتي سني اعجاب ايدر اكر سويلسه لر انلرك كلامني دكلرسن فصاحتلري وكلاملرينك حلاوتيجون * روايت اولنديكه عبدالله ابن ابي منافقك اكا برندن ايدى جسيم وفصيخ اولوب كندى مثلي قومله پيغمبر صلي الله تعالى عليه وسلم مجلسنه كلوردى كلامي انك قنده دكلنوردى (كانهم خشب مسندة) كا نه انلر ديواره طيانش اشباح بلا ارواحدر ويا انلر شول جوفي فاسد اخشاب مثليدر كه هيچ بر شيئه صالح دكلدر يعني انلر شول ايمانندن خالي باطنلري فاسددر (يحسبون كل صيحة عليهم)

ظن ايدرلر كه هر صبحه اوزرلرینه واقعدر (هم العدو فاحذرهم) انلر
عداوتده سكا كاملردر انلردن حذر اوزره اولوب سرتيكي انلره افشا
ایتمكل (قاتلهم الله انی يؤفكون) الله تعالى انلری اهلاك ایده حقندن
نیچه صرف اولنورلر (واذقيل لهم تعالوا يستغفر لكم رسول الله لووا
رؤسهم ورايتهم يصدون وهم مستكبرون) اكر انلره كلك رسول الله
سزچكون استغفار ایتسون دینلسه باشلرین اكوب استغفاردن اعراض
ايدرلر حالبوكه اعتذاردن استكبار ایدیچیلردر (سواء علیهم استغفرت لهم
ام لم تستغفر لهم لن يغفر الله لهم ان الله لا یهدی القوم الفاسقین) انلره
مساویدر كر كسه انلر اچون استغفار ایت و كركسه استغفار ایتیه
الله تعالى انلری مغفرت ایدر دكلدر زیرا كه مظنة اصلاحدن خارجلری
الله تعالى هدايت ایتز (هم الذين يقولون لا تنفقوا علی من عند رسول الله
حتى یفرضوا) اول منافقلر انصاره دیدیلر كه رسول الله عندنده اولان
فقراء مهاجرینه انفاق ایتكز كه طاغیلوب كیدهلر * روایت اولندیكه
پیغمبریمز صلی الله علیه وسلم اصحابله برغزایه كیدر كن مریسع نام برمانه
نزول ایتدی انده براعرا بی برانصاریله چكشوب برخشبه ایلله اول انصارینك
باشنی یاردی انصارى عبدالله بن ابی نام منافقه كیدوب اعرا بیدن شكایت
ایتدی ابن ابی انصاردن قومنه دیديكه رسول الله عندنده اولنلره انفاق
ایتمكز كه قتمدن طاغیلوب كیدهلر مدینهیه رجوع ایتدیکمزمده بزم اعزم
مدینهدن اذلیری اخراج ایدر انك اعزله مرادی ابن ابی كندی ایدی واذله
مرادی رسول الله ایدی چون الله تعالى انك اول قولنی اشبو آیت انزالیلله
خبر ووردی * عمر رضی الله عنه دیديكه یارسول الله بكا اذن ویركه اول
منافقك بیونن اورهیم پیغمبریمز علیه السلام ایتدی انی انجمه شمعی ناس
رسول الله اصحابنی اولدرمكه باشلدی دیوتحدث ایتلرینی مقتضی اولور
(ولله خزائن السموات والارض ولكن المنافقین لا یفقهون) حالبوكه
سموات وارضده رزق مفاتیحی الله تعالینك یدنده در جیعنك رازقی
اولدر لكن اول منافقلر انی بیلزلر (یقولون لننرجعنا الی المدینة
لیخرجن الاعز منها الاذل) اول منافقلر دیرلر كه چقان مدینهیه
رجوع ایدهوز مدینهدن اعز اها لیسى اذلنی چیقارلر (والله العزة

(ولرسوله)

ولرسوله وللمؤمنین ولكن المنافقین لا یعلمون) حالبوكه عزت الله تعالینكدر
قهرله وغیر اوزره غلبه ایلله ودخی رسولنك دیننی اظهار ایلله ودخی مؤمنلر
كفره اوزره نصرت اولنلریله لكن منافقلر انی بیلزلر (یا ایها الذین آمنوا
لا تلهمكم اموالكم ولا اولادكم عن ذكر الله) یامؤمنلر اموال واولادیکزك
تدبیر واهتمامی سزی ذكر اللهدن اشغال ایتسون اول كر كسه صلوات
و یاسائر عباداتدر كه الله تعالى بی تذکیر ایدر (ومن یفعل ذلك فاولئك
هم الخاسرون) اول كسه كه ذكر الهی قویوب اموال واولادله مشغول اوله
اول وصفلو كسه لر مغبونلردر زیرا كه عظیم باقی بی حقیر فانییه تبدیل
ایتملردر (وانفقوا مما رزقناكم ایمدی سزه ویردیکمز رزقندن طاعة الله
انفاق ایدك تا كه آخر تكزه ذخر اوله) (من قبل ان یأتی احدكم الموت
فیقول رب لولا اخرتنی الی اجل قریب فاصدق واكن من الصالحین)
سزدن بریکزه موتك دلا ئلی كلز دن اولكده اول كلچك امهالدن یأس
كلور اول حینده دیه كه یارب آزمانه دكین بنم موتمی تأخیر ایتسیدك مالك
زكاتنی اخراج ایدوب تقریطانمی تداركله صالحلردن اولسیدم
(ولن يؤخر الله نفسا اذا جاء اجلها والله خبیر بما تعملون) حالبوكه الله تعالى
هیچ بر نفس موتنی تأخیر ایدر دكلدر چچانكه عمری آخره ایریشه الله
تعالی خیر وشر دن اعمالكزه خبیردر اكا كوره جزا كزی ایدر الله
تعالی بیلدر ديكه موتك وقتی ایردیکنده تأخیره مجال اولز وواجبك تركی
اوزره جزا اولنور * ایمدی مؤمنه لایق اولور كه اجلی حلول ایتزدن اول
واجبات عهدسندن چیقوب لقاء الله مستعد اوله * ابن عباس رضی الله
عنهما ایدر سلطان موتك نزولندن اول تصدق ایدك اول نزول اید بچك
نه توبه قبول اولور ونه عمل نفع ایدر * دینلديكه اشبو آیت کریمه مانع
زكاة شاننده نازل اولوبدر حسن ایدر هر كسه كه زكاتن ویرمش وجهه
وارمش اولیه الا اول وقتده رجعه بی دیلر

سورة التغابن وهی ثمان عشرة آية مكية

بسم الله الرحمن الرحيم

(یسبح الله ما فی السموات وما فی الارض) سموات وارضده اولان مخلوقاتك
كلیسى الله تعالینك كمال واستغنائیه دلا لیتله انی تنزیه و تقدیس ایدر

(له الملك وله الحمد) ملكك كلیسی اكا مختصدر زیرا که اول ابداع اید و بدر
و جدك و لییدر که زیرا هر نعمتی اول انعام اید و بدر (و هو علی
کل شیء قدير) توفیق و حذلاندن خلقنده دیلدیکی شیئه قادر در
(هو الذی خلقکم فنکم کافر و منکم مؤمن) اول الله تعالی سزی نفس
و احده دن خلق ایلدی کیمیکز حیاتنده کافر مما تنده مؤمندر و کیمیکز
ایسه حیاتنده مؤمن مما تنده کافر در بو باده جله قول بودر که الله
تعالی کافری خلق ایتدی کفرانك فعل و کسیدر و مؤمنی دخی خلق ایتدی
ایمان انك فعل و کسیدر اویله اولسه ایکی فریقندن هر برینك کسبی
وارد و کسب و اختیار الله تعالیك تقدیر و مشیتله در * ایمدی مؤمن
خلق اولند یغند نصکره ایمانی اختیار ایدر زیرا که الله تعالی اندن انی
اراده ایدر وانی انك اوزره تقدیر ایدو بدر وانی بیلو بدر و کافر دخی کذلک
خلق اولند یغند نصکره کفری اختیار ایدر زیرا که الله تعالی اندن انی اراده
و اوزرینه انی تقدیر ایدو بدر وانی بیلور اشبو اهل سنتك طریقیدر
هر کسه که اکسلوک ایدیه حقه اصابت ایدر و جبر و قدر دن سالم اولور
(والله بما تعملون بصیر) الله تعالی سزدن صدور ایدن کفر و ایمانی
بیلور اگرچه انك عملنده ایکیسیدخی مقدر ایسه ده (خلق السموات
والارض بالحق و صورکم فاحسن صورکم و الیه المصیر) الله تعالی سموات
و ارضی حکمت بالغه اوزره خلق ایتدی و سزی تصویر و صور تریکزی
حسن ایتدی اوصاف کائناتك صفوه سیله تزیین و خصائص مبدعاتك
خلاصه سیله تخصیص ایتدی و مع ذلك جمیع کائناته سزی نمونه ایتدی
عاقبة الامر ده رجوعکز اکادر سرائرکزی احسان ایدک که ظواهرکز
عذابله مسخ و لنیه (یعلم ما فی السموات و الارض و یعلم ما تسرون
و ما تعلنون و الله علیم بذات الصدور) الله تعالی سموات و ارضده اولان
اشیانك جلی و خفیه سنی بیلور و کذلک سزك اسرار و کرکسه اعلان
ایتدی ککزی بیلور اول الله تعالی ضمائر قلوبه علیمدر (ألم یأتکم نبأ الذین
کفروا من قبل فذاقوا وبال امرهم و لهم عذاب الیم) یا کفار مکه سزدن
اول پکن امتلك خبری سزه کلدیمیکه انلر دنیاده اعمال سیئه لرینك
حقوبتن ذوق ایتدیلر و مع ذلك آخرتده انلره عذاب و جمیع دخی اولور
(ذلك بانه کانت تأتیهم رسلم بالبینات فقالوا أبشر بهدونا فکفروا

(و تولوا)

و تولوا و استغنی الله و الله غنی حمید) ذکر اولنان و بال و عذابك نزولی انلره
شول سبیلدر که رسولاری انلره امر و نهی و حجج و اضحه ایلر کلور انلر ایسه
اکا انکاری تعجب ایدوب بزم کبی بر آدمی آبا تمز دینندن غیر دینه بزنی ارشادمی
ایدر دیرلردی اویله اولسه اول رسولره و کتور دکاری بیناته کافرین
اولوب ایماندن اعراض ایدرلردی حالبو که الله تعالی هر شیئندن فکیفکه انلرک
ایمان و طاعتندن غنا اظهار ایلدی اول انلرک و غیرک ایمان و طاعتندن
غنیدر هر فعلنده جدا و لمتشدر (زعم الذین کفروا ان لن یبعثوا قل بلی و ربی
لتبعثن ثم لتنبؤن بما عملتم و ذلك علی الله یسیر) مکه کافرلری زعم ایتدیلر که
یوم قیامتده انلر بعث اولتمیلر یا محمد سن انلره دیکل که بلی ربم حقیچون بعث
اولنور سز و دنیاده ایشلدیککز اعمال سزه خبر و یریلوب انك اوزره
جزالریکزی کورر سز اشبو بعث و جزا الله تعالی به آساندر (فأمنوا بالله
و رسوله و النور الذی انزلنا و الله بما تعملون خبیر) ایمدی الله تعالی به و رسولی
محمد علیه السلامه و اکا انزال ایتدی کمر قرآنه ایمان کتورک که اول سزی
ظلمت جهلندن چیقاروب نور علمه ایر کورر الله تعالی سزك اعمالکزه خبیردر
جزا کزی ایدر (یوم یجمعکم لیوم الجمع ذلك يوم التغابن) ذکر ایدک شول
کونیکه الله تعالی سزی قبوریکزدن بعث ایدر شول کون ایچونکه اندن
خلائق و ملائکه و انس و جن و غیری جمع ایدیلور اول تغابن حقیقی کونیدر که
کافرك ایمانی ترکله و مؤمنك احسانده تقصیر یله مغبون اولدیغیدر * پیغمبریمز
صلی الله علیه و سلم ایدر هر عبدکه جنته کیرر الا اول اکا ناردکی مقعدی
کوستریلور که اساءت ایتش اولسه اکا کیرردی تا که انکله شکری زیاده
اوله و هر عبدکه ناره کیرر الا اکا جنتده کی مقعدی کوستریلور که احسان
ایتش اولسه اکا کیرردی تا که انکله مغبونیتی زیاده اوله (ومن یؤمن بالله
و یعمل صالحا یکفر عنه سیئاته و یدخله جنتا تجری من تحتها الانهار خالدين
فیها ابدا ذلك الفوز العظيم) هر کیمسه که الله تعالیه ایمان کتوروب عمل صالح
ایشلیه الله تعالی انك سیئاتن یار لغیوب جنتلره قویه که انك اغاچلری التندن
ایر مقلر آقه انده دائمین اولدقلری حالد اشبو ذکر اولنان کرامات فوز
عظیمدر که دفع مضار و جلب منافی جامعدر (والذین کفروا و کذبوا
بآیاتنا اولئک اصحاب النار خالدين فیها و بئس المصیر) شونلر که الله
تعالی به کافر اولوب آیتلری تکیذب ایتدیلر انلر اصحاب ناردر انده دائمین

اولد قلى حالد اول نه مبؤس قرارگاه اولور (ما اصاب من مصيبة الا باذن الله) بر مصيبت كه بنى آدمه ايريشور اول الله تعالىنك تقدير واراديله در (ومن يؤمن بالله يهد قلبه والله بكل شئ عليم) بر كيمسه كه الله تعالى به ايمان كتوره اول انك قلبنى ايمان اوزره ثابت ايد و مصيبتك حلولى عندنده اكا (ان الله وانا اليه راجعون) ديمكه توفيق ايد الله تعالى هر شئيّه حتى قلوبه واحواله علمدر (واطيعوا الله واطيعوا الرسول) الله تعالى به اطاعت ايدك قضاسنه رضائله ورسولنه اطاعت ايدك سزّه امر ايتديكنه صبرله (فان توليتم فانما على رسولنا البلاغ المبين) اكر الله تعالى به ورسولنه اطاعتدن اعراض ايدر سكر رسولنه واجب اولان انجق تبليغدر اول ايسه انى ادا ايتدى (الله لا اله الا هو) الله تعالىدن غيرى ضرر و نفع ايصالنه قادر اله يوقدر (وعلى الله فليتوكل المؤمنون) ايمدى مؤمنلر امر لرينى تفويض ايدر لرسه الله تعالى به تفويض ايتسونلر زيرا كه انلك توكل ايله ايمانى انى اقتضا ايدر (يا ايها الذين آمنوا ان من ازواجكم واولادكم عدوا لكم فاحذروهم) يامؤمنلر ازواج واولاديكزك بعضى سزّه عدودر سزى طاعتدن اشغال ايدر و يادين امرنده سزّه خصومت ايدر ايمدى انلردن حذر ايدك خائله لرندن امين اولمكز (وان تعفوا و تصفحوا و تغفروا فان الله غفور رحيم) اكر ترك معاقبه ايله انلرى عفو و ترك توببخله انلردن اعراض و تمهيد معذره و اخفاؤه مغفرت ايدر سكر الله تعالى غفور رحيمدر سزكه معامله كز مثيله معامله ايدر ومع ذلك سزندن فضلنى منع ايتز * روايت اولنديكه مكده بر قوم اسلامه كلوب مدينه به كتمك مراد ايتدكرنده ازواج واولادلى انلره صاريلوب سز بزي بونده اضاعه ايدر ميسز ديو آغلشديلر * اويله اولسه اندن قلبلرينه رقت كلوب بر مدت كتمكى ترك ايتديلر بعده مدينه به واروب اول واران اصحابى دينده فقيه اولمش كورديلر اكا بناء ازواج واولادلرينه عتاب قصدين ايتيچك اشبو آتله عفو و صفح يولنه تسليك اولنديلر بعده دين حقنى محافظه ايجون انلره ميلندن تحذير وجهى اوزره بيورلديكه (انما اموالكم واولادكم فتنة والله عنده اجر عظيم) اموال واولاديكز سزّه بليه دركه انلره اشتغال كز سزى الله تعالىنك ذكر و طاعتدن قلوبكزى قطع ايدر حالبوكه الله تعالىنك محبت و طاعتنى اموال واولاد محبتى اوزره

(ايشار)

ايشار ايدنلر ايجون الله تعالى عندنده اجر عظيم واردر پيغمبر يمز صلى الله عليه وسلمدن مرويدر كه يوم قيامته بعض كسندلر كتوريلوب اشبونك حسنانى عيالى اكل ايدوبدر دينله (فاتقوا الله ما استطعتم) الله تعالىنك تقواسنده جهد و طاقتكزى بذل ايدك (واسمعوا) امر اولنديكز اشياى سماع قبوله استماع ايدك (واطيعوا) والله تعالى به ورسولنه اطاعت ايدك (وانفقوا خيرا لانفسكم) و كنديكز ايجون خالصا لوجه الله اموال كزندن انفاق ايدك (ومن يوق شح نفسه فاولئك هم المفلحون) اول كسندكه شح نفسندن عصمت اولنه اول و صفلو كسندلر جنته ايرنلدر (ان تقرضوا الله قرضا حسنا يضاعفه لكم ويغفر لكم والله شكور حلیم) اكر سز اموال كزى امر اولنديكز شئيّه اخلاص و طيب قلبه صرف ايدر سكر الله تعالى سزچكون انك اجرينى مضاعف قيلور برينه اون مثلى ويديوز ولا يحصايه دكين ويرر و اول انفاق بر كتنه سزى مغفرت دخی ايدر اول الله تعالى شكوردر كه سزندن قلبلى قبول ايدوب اجر جزيل ويرر رحيمدر مسيئتك عقوبتنه عجله ايتز (عالم الغيب والشهادة العزيز الحكيم) ملك وملكوتى بيلور ملكنده غالب و فعلنده حكيمدر

سورة الطلاق وهى اثنتا عشرة آية مدنية

بسم الله الرحمن الرحيم

(يا ايها النبى) يانبى الله ديونداىي تخصيص بعده حكمه خطابى تعميم ايتدى زيرا كه اول امتك اماميدر اكا ندا انلره ندا كيدير و يانكچونكه كلام انكله در حكم ايسه اكا وامته عام اولور (اذا طلقتم النساء فطلقوهن لعدتهن) چقان نساكزى تطلق مراد ايتسكز عدتلى وقتنده تطلق ايدك كه اول ابتداء طهورده در كه انكله ابتداء اعتداد ايدر كه اول شول طهردر كه انده ججاج اولنش اوليه اول مرأه كرسه حامل ويا حائلدر كه اول طلاق سزيدر اما حائض و نفساىي تطلق طلاق بدعيدر * پيغمبر يمز صلى الله تعالى عليه وسلمدن روايت اولنديكه اول عربن الخطاب رضى الله عنه به ديديكه او غلث عبدالله امر ايتكه مرأه سنه مراجعت ايدكه اولانى حيض حالنده تطلق ايتشدى مراجعتدن صكره انى امساك ايتسون حتى كه تظهر ايدكه بعده حائض اولوب

بع (۱۷)

تطهر ایدہ اندنصکرہ تطلیق ویا امساك ایتسون اشبو شول عدتدر که
 الله تعالى انکله امر ایدوبدر ومراجعته حکم دلالت ایدر که طلاق
 بدعی دخی واقع اوله * معلوم اوله که حیض ویا نفاس حالنده تطلیق
 بدعتدر وکذلک شول طهرده که انی انده جاع ایتش اوله
 اما طلاق سنی اولدر که رجل انی تطلیق ایدہ برطهرده که اول انده جاع
 اولتمیه اشبو شول مرأه حقنده در که اکا عدت اقرالله لازم اوله اما چنان مدخول
 بها اولیان مرأه حیضی حالنده تطلیق ایتسه ویا خود حیض کورمدک
 صغیره بی ویا ایتسه بی جاع ندنصکره تطلیق ایتسه ویا مرأه حاملی جاع ندنصکره
 ویا رؤیت دم حالنده تطلیق ایدہ که اول نه طلاق بدعی ونه طلاق سنی
 اولور اما خلع که حیض حالنده اوله ویا طهرده که انده جاع اولنه بدعی اولز
 زیرا که پیغمبر یمز علیه السلام ثابت بن قیسه زوجہ سین خلعہ اذن ویردی
 اول مرأه نک حالی بیلکسزین اگر اول جیع احوالده جائز اولسه
 اول تصرف حالک لزومک بیلدیرردی اگر برکسه مرأه سنی حیضی حالنده
 ویا طهرنده که انده جاع اولنه تطلیق ایتسه الله تعالى به ماضی اولور
 اگر چه انکله طلاق واقع اولور سه ده زیرا که پیغمبر یمز صلی الله علیه وسلم
 ابن عمره مراجعتہ امر ایلدی بعض علماء عندنده طلاقات بیننی جعده
 بدعت اولز حتی برکسه مرأه سنی طهری حالنده طلاقات ثلاثه ایلہ
 تطلیق ایتسه طلاق بدعی اولز اول شافعی واحد قولیدر اما که مالک
 و ابو حنیفه عندنده اول بدعی بدر (واحصوا المدة) مرأه نک اقرائنی
 عدو حفظ ایدک تا که انکله زمان رجعتی بیلہ سز ونفقه وسکنانک امرینی
 مراعات ایدہ سز (واتقوا الله ربکم) ربک الله تعالیدن قورقوب انلره
 تطویل عده واضرار ایتکز (لاتخرجوهن من بيوتهن) انلری اخراج
 ایتکز شول بیتلرندنکه وقت فراقده انده ساکنه ایدیلر تا که عدتلی ایدہ
 منقضیه اوله (ولا يخرجن) واول نساء مطلقات دخی اول بیتلرندن
 چیمسونلر (الا ان یأتین بفاحشة مبينة) مکر که زوجی اوزره تسلط
 ایدہ اوله اولسه انلرک اندن اخراجی حلال اولور زیرا که انک حقنی اسقاطده
 نشوز کبدر ویا خودزنا ایدہ ایدمی اوزرینه حد اقامتیچون اخراج اولنوب
 بعده کیر واول منزله رد اولنور * دینلدیکه انک انقضاء عدتدن اول منزلندن
 خروجی فاحشه در (وتلك حدود الله ومن يتعد حدود الله فقد ظلم نفسه)

(اشبو)

اشبو احکام مذکورہ الله تعالینک حدودیدر برکسه که انک حدودین تجاوز
 ایدہ اول نفسنه ظلم ایدر عقابه تعریضله (لاتدری لعل الله يحدث بعد
 ذلك امرا) بیلز سنکله الله تعالی اندنصکره برامر مرغوب فیه احداث
 ایدہ که اول زوجک اکا ویا ولیدنه محبتی اچلیچون تطلیقه نادم اولوب
 برطلقه ویا ایکی طلقه دنصکره اکا مراجعتہ رغبت ایدہ اول اجلدن
 مستحب اولور که طلقاتی تفریق ایدہ زیرا که طلقاتی دفعه
 ایتقاع ایدرسه من بعد اکا مراجعت ممکن اولز (فاذا بلغن اجلهن
 فامسکوهن بمعروف او فارقوهن بمعروف) چان اول تطلیق اولنان نساء
 عدتلیرنک انقضاسی قریب اوله سز مخیرسز دیلرسکز نکاح جدید
 ویا رجعه واحسانله انلری امساك ایدک ویا ابقاء حق وابقاء ضرارله
 انلری ترک ایدک (وأشهدوا ذوی عدل منکم) رجعه ویا فرقتکز اوزره
 سزدن ایکی عدلی اشهاد ایدک تا که انکله ربه دن تبری ایدیلہ وتنازع
 کسیلہ (واقیموا الشهادة لله) سز اول شهادتکزی لله اقامت ایدک
 یوخسه مشهودله ویا مشهود علیهایه نظر ایتکز (ذلکم یوعظ به
 من کان یؤمن بالله والیوم الآخر) اشبو الله شهادت اقامتیلہ متعظ اولور
 اول کسه که الله تعالی به ویوم آخره ایمان کتورر (ومن یتق الله
 یجعل له مخرجاً ویرزقه من حیث یرتقب) اول کسه که الله تعالیدن
 قورقوب مناهیدن و مرأه بی حیضی حالنده تطلیقندن ویا معتده بی
 اضرارندن ومسکندن اخراجندن وحدود الهی تعالیدن وکتمان
 شهادتندن و اقامت شهادت اوزره جعل توقعنندن اجتناب ایدہ
 الله تعالی اکا مضائق وغمومدن مخرج قیلور وخطرینه خطور
 ایتدیکی جهنمدن فرج وخلف ویرر ویا خود اشبو وعد عامه متقینه
 اوله الله تعالی انلری دنیا و آخرت مضارندن قورتره وحسب انلری
 اولمدیغی حیثیتندن دنیا و آخرت خیرینی انلره ایرکوره پیغمبر یمز صلی الله
 تعالی علیه وسلمدن مرویدر که بن برآیت بیلورینکه ناس اگر انی اخذ ایتسه لر
 اول انلره کفایت ایدیدی وبوآیتی اوقودی * روایت اولندیکه سالم بن
 عوف بن مالک الاشجعی عدویه اسیر اولوب باباسی پیغمبر یمز علیه السلامه
 شکایت ایتدکه الله تعالیدن قورقوب (لاحول ولا قوة الا بالله) ذکرینی
 اکثار ایت دیدی چون عوف اکا مداومت ایتدی بروقتده کورسه که اوغلی

سالم اكسزین چیه كلدی یانده یوز دوه و برسوری قیون و متاع كتوردیکه
انی عدونك غفلتی حالنده اكا نائل اولدی وانك شانده دخی بوآیت نازل
اولدیکه (ومن يتوكل على الله فهو حسبه) برکسه که رزقی امرنده
واکا ایریشن نوائب دفعنده الله تعالی به اعتماد ایده اول اكا کافی اولوب
غیری به احتیاج ایتمز (ان الله بالغ امره) الله تعالی امرینی انفاذ و قضاسی
خلقنده امضا ایدیکیدر (قد جعل الله لكل شیء قدرا) الله تعالی شدت
ورخادن هرشیء ایچون اجل و نهایت قیلدی اول نهانی تقدم و نه اندن تأخر
ایدر (واللای یئسن من المحیض من نسائکم ان ارتبتم فعدتهن ثلاثة اشهر
واللای لم یحضن) نسا کردن شونلر که حیضدن کسلدیلر اکر انلرک
عدتله شک ایدر سکر * ایمدی انلرک عدتی و کرک اصلحیض کورم دکارینک
عدتی اوچ آیدر (واولات الاحمال اجلهن ان یضعن حملهن) شول نسا که
اولات جل اوله کرکسه انلر مطلقات اولسونلر و یازوجلری وفات ایتمش
اولسونلر انلرک انقضاء عدتی جلارین وضع ایتملریدر علی و ابن عباس ایدر
زوجی وفات ایدن حاملک عدتی ایکی عدتک قنغیسی ابعده ایسه اولدر *
ایمدی عدت وفات تمام اولدن اول طوغرمزه وفات عدته قاتلنور و اکر
وفات عدتی تمام اولوب اول طوغرمزه اول طوغورنجه قاتلنور
(ومن یتق الله یجعل له من امره یسرا) برکسه که الله تعالیدن قورقوب
احکام و حقوق رعایت ایده اول اكا دنیا و آخرت امرینی آسان ایده
(ذلک امر الله انزلہ الیکم) اشبو مذکور الله تعالینک امر و حکمیدر
پیغمبریمز صلی الله علیه وسلم واسطه سبیلہ انی قرآنده سزه انزال ایتدی
(ومن یتق الله یکفر عنه سیئاته ویعظم له اجرا) برکسه که الله تعالیدن
قورقوب انک اوامر و احکامیلہ عمل ایده اول انک سیئاتنی تکفیر
ایدر و اجرینی تضعیفله عظیم ایدر (اسکنوهن من حیث سکنتم
من وجدکم) اول تطلیق ایتدیککر نسا ئی عدتلری تمامنه دکین اسکان
ایدک شول مکانده کیم اكا وسع و طاقتکر اولور (ولا تضاروهن لتضیقوا
علیهن) وانلره سکناده اذا ایتمکر که انلره تضیقکرله اندن خروجه الجاء
ایده سز (وان کن اولات جل فأنفقوا علیهن حتی یضعن حملهن) و اکر
تطلیق ایتدیککر نسا ذوات جل ایسه لر جلارین وضع ایدنجیه دکین سز

(انلره)

انلره اتفاق ایدک * معلوم اوله که معتده رجعیه عدته اولدیغجه زوج
اوزره نفقه و سکناسی واجب اولور و سکنایله مراد مؤنت مسکندر اکر
شول دارکه مرأه انک ایچنده تطلیق اولمشدر زوجک ملکی ایسه زوج
اوزره واجب اولور که اول اندن چیقوب انی اول مطلقه به عدتی انقضاسنه
دکین ترک ایده و اکر اول دار اكا عاریه اولوب معیرا کارجوع ایسه زوج
اوزره واجب اولور که بردار کرالیوب مطلقه سنی انده اسکان ایده و اکر
معتده خلعه و یا طلاقات ثلاثه ایله و یا لعانله باینه ایسه اکثر علما عندنده
انکچون سکنی لازم اولور کرکسه حامل و یا حائل اولسون * ابن عباس ایدر
انکچون سکنی لازم اولمز مکر حامل اوله که اول شعبی و حسن قولیدر و اما
اكا نفقه لزومنده علماء اختلاف ایتدیلر بر قوم ذاهب اولدیلر که انکچون
نفقه یوقدر مکر که حامل اوله اول شافعی و احمد قولیدر و برجاعت ایسه
هر حالده انکچون نفقه بی ایجاب ایتدیلر اول ابن مسعوددن مرویدر
نخعی و ثوری و ابوحنیفه قولیدر اما معتده که شبهه و طئدن و یا عیب ایله
فسخ نکاحدن و یا خیار عتقدن اولانده سکنی و نفقه یوقدر اکر چه حامل
ایسه ده اما معتده که زوجک و فائیدن اوله اکثر علما عندنده انکچون نفقه
یوقدر اول کرکسه حامل و یا حائل اولسون * علی ایدر اکر حامل ایسه
تا وضعنه دکین ترکه دن اكا نفقه و یریلور که اول شریح و نخعی و ثوری
قولیدر و انکچون سکنی لزومنده شافعی انک قولی وارد بری بودر که
انکچون سکنی اولیه بلکه دیلدیککی مکانده ساکن اوله که اول علی و ابن عباس
و عایشه قولیدر عطاء و حسن و ابوحنیفه اكا ذاهبلردر قول ثانی اولدر که
انکچون سکنی اوله که اول عمر و عثمان و ابن مسعود و ابن عمر قولیدر مالک
و ثوری و احمد و اسحق اكا ذاهبلردر (فان ارضعن لکم فأتوهن اجورهن)
اگر تطلیق ایتدیککر نسا اولادکرزی ارضاع ایسه لر انی کرکسه کندیلر
طوغرمش و یا انلرک غیری نسا کرطوغرمش اولسون ایمدی انلره ارضاعلری
اجرتن و یرک زیرا که نفقه اولاد اب اوزره در اجرت رضاعه نفقه دندر
(وأتوا بینکم بمعروف) و ارضاع و اجرده بری برلریکره جبیلله امرایدک
(وان تعاسرتم فسترضع له اخری) اکر رضاع امرنده تضایق ایدر سکر یعنی
اب اجرت رضاعی و یرمکدن و ام ایسه ولدینی ارضاعدن امتناع ایدر سه
ایمدی اول ولدی مرأه اخری ارضاع ایدر یوخسه انی ام ارضاعه اکر اه اولمز

(لینفق ذوسعة من سعة) مطلقه له ومرضعه غنا صاحبی اولان رجل غنا ویسری مقدارنجه اتفاق ایسون (ومن قدر علیه رزقه فلینفق بما آناه الله) شول کسه که رزقی تضییق اولنه الله تعالینک اکا ویردیکی مالدن قدر و مقدارنجه اتفاق ایسون (لا یکلف الله نفسا الا ما آناها) الله تعالی هیچ برنفسه نفقه امرنده تکلیف ایتمز الا اول دکلو که مالدن اکا ویرو بدر (سیجعل الله بعد عمر یسرا) الله تعالی عمر دنصکره عاجله ویا آجله یسر قیلسر در اشبونده فقراء ازواجه تیسیرله وعد واردر اگر مقدورینی اتفاق ایدرسه (وکأین من قرية عنت عن امر ربها ورسله فحاسبناها حسابا شديدا وعذبناها عذابا نكرا) چوق قریه اهلی رب تعالینک ورسوللرینک امرندن عتو و عنادله اعراض ایبدیلر بز انلره دنیاده جوع و قحط و سیف و سائر بلائله تعذیب ایتمک آخرته ایسه بز انلره استقصا و مناقشه ایله حساب ایده رز (فذاقت وبال امرها وكان عاقبة امرها خسرا) اوله اولسه انلر کفر و عصیانلرینک عقوبتن دنیاده ذوق ایبدیلر و عاقبت امرده هلاکه ایردیله (اعد الله لهم عذابا شديدا) الله تعالی انلر ایچون عذاب شدید تهییه ایتمدی (فاتقوا الله يا اولی الابواب الذین آمنوا قد انزل الله الیکم ذکرا رسولا) ایمدی الله تعالیدن قورقوب امر و نهینه اطاعت ایتمک ای عقول کامله صاحبلیکه الله تعالی یه ورسولنه ایمان کتوردیلر اول الله تعالی سزه قرآنی انزال ورسولنی ارسال ایتمدی (یتلو علیکم آیات الله مبینات) که اول رسولی سزه الله تعالینک آیات قرآنی سنی تلاوت ایدرکه اول و اضحات الاحکامدر (لیخرج الذین آمنوا و عملوا الصالحات من الظلمات الی النور) تا که مؤمن اولوب عمل صالح ایشیلرلی ظلمت کفر دن نور ایمانه ویا ظلمت جهل دن نور علمه ویا شکدن یقینه اخراج ایده (ومن یؤمن بالله و یعمل صالحا یدخله جنات تجری من تحتها الانهار خالدين فیها ابدا) برکسه که ایمان اوزره ثابت اولوب فرائض و سننی ادا ایده اول الله تعالی انی شول جنتلره قورکه اغاچلری التندن ایرمقلر آقار انده خالدين اولدقلری حالده (قد احسن الله له رزقا) الله تعالی اکا جنتده ثواب عظیم احسان ایده (الله الذی خلق سبع سموات و من الارض مثلهن) الله تعالی یدی سمواتی و عددده اول دکلو یدی ارضی خلق ایتمدی * دینلدیکه هرایکی ارضک اراسی و هر بر ارضک قالنلغی بشر

(بوز)

بوز یلق مسافه در تکیم هرایکی سماتک اراسی و هر بر سماتک قالنلغی اول دکلو در (یتنزل الامر بینهن) الله تعالینک امر و قضاسی هر سماء و هر ارض بیننده جاری و حکمی نافذ اولور * ایمدی جبریل علیه السلام سماء سابعه دن ارض سفلیه دکین نزول ایدوب هر برنده الله تعالینک امر و حکمی تفیذ ایدر هر سماده و هر ارضده الله تعالینک خالق و امر و قضاسی واردر (تعلموا ان الله على کل شیء قدير وان الله قد احاط بکل شیء علما) تا که یاناس نور عقله بیله سزکه الله تعالی هر شیئه قادر در وانک علمی هر شیئی احاطه ایدوبدر اکا هیچ شیء خفی اولمز

سورة التحريم وهی اثنتا عشرة آية مدنية

بسم الله الرحمن الرحيم

(يا ايها النبي لم تحرم ما حلال الله لك تبغى مرضاة ازواجك والله غفور رحيم) یانی الله الله تعالینک سکا حلال ایتمدیکی شیئی نیچون کنیدیکه حرام ایدرسنکه انکله زوجاتک رضاسین دیلرسن و الحال هیچ کسه یه جائز اولمز که الله تعالینک حلال ایتمدیکنی حرام ایده اول ذنبدن توبه ایده غفور در انک اوزره عقاب ایتمز رحیمدر * سبب نزولنده دینلدیکه پیغمبریمز صلی الله تعالی علیه وسلم زوجاتندن سوده رضی الله عنها قتنده غسل شربتی ایچدیکندنصکره عائشه رضی الله عنهایه واردی اول اکا دیدیکه یارسول الله اغز کرده رایحه بولورین بعده حفصه رضی الله عنهایه واروب اولدخی اکا عائشه دیدیکن دیدی پیغمبریمز صلی الله علیه وسلم ایسه رایحه منکره دن کراحت ایدردی * دیدیکه ایمدی اول سوده قتنده غسل شربتی ایچدیکندن اولمشدر والله شمدنکرو انی ایچمین دیو یمین ایتمدی بر روایتده پیغمبریمز صلی الله تعالی علیه وسلم جاریه سی ماریه القبطیه یه حفصه نك بیننده قربان ایتمدی حفصه ایسه غائبه ایدی وقتا که حفصه اکا خبردار اولدی زیاده تألمندن آغلدی پیغمبریمز علیه السلام اکا دیدیکه اول بنم جاریه مدر الله تعالی انک و طئنی حلال ایدوبدر آغله و نسائمندن آنی کسه یه خبر و یرمه کل * سنک رعایت خاطرک ایچون شمدنکرو اول بکا حرام اولسون دیدی اول تحریم اندن زله ایدی (قد فرض الله لکم تحلة ایمانکم) الله تعالی سزه ایمانکزی کفارتله ویا مشیة الله تعالیه تحلیلی مشروع قیلدی (والله مولاکم و هو العليم الحکیم) الله تعالی سزدن ناصرکز و متولی او موریکزدر

اول سزده اولان شئي بيلور افعال و احكامنده حکمتن اجرا قيلور (واذ امر النبي الى بعض ازواجه حديثا) شول وقتکه پيغمبر عز صلي الله عليه وسلم نساينک بعضنه يعني حفصه يه بر حديث اسرار ايتديکه اول ماريه بي کندويه تحريمي حفصه يه بيلدر ديکندنصکره آني کسه يه خبر ويرمکل ديدى و ياخود کنديدنصکره خلافت ابو بکر و عمرک اوليسردر ديو اسرار ايتدى (فلما نبأت به و اظهره الله عليه عرف بعضه و اعرض عن بعض) وقتا که حفصه اول حديثي عائشه رضی الله عنها يه خبر ويردى و الله تعالى انک اول افشاسنى جبريل عليه السلام توسطيله پيغمبر عز صلي الله عليه وسلم بيلدردى پيغمبر عز عليه السلام دخی انک بعضنى حفصه يه تعريفندنصکره نيچون بنم سريمى حفظ ايتدک ديدى و بعضنى ايسه تعريفندن اعراض ايتدى اما انک تعريف ايتديكى ماريه بي کندويه حرام ايتسیدی و اعراض ايتديكى امر خلافتي افشاسیدی و ياخود تعريفله مراد اکا اول فعلنک جزاسن ايتديکيدى شول وجهله کيم انى تطبيق ايتدى عمر رضی الله عنه انى ايشيديجک قتي محزون اولوب اگر آل خطابده خيرا و لسه پيغمبر عز صلي الله عليه وسلم بنم قزيمي تطبيق ايتزدى ديدى اوليله اولسه جبريل عليه السلام کلوب پيغمبر عز عليه السلامه امر ايتديکه حفصه يه مراجعت ايد * دینلديکه پيغمبر عز عليه السلام حفصه بي تطبيق ايتدى بلکه تطبيق قصد ايديجک جبريل عليه السلام کلوب ديدیکه انى تطبيق ايتمکل که اول صوامه و قوامه در و اول جنتده سنک نساکندندر اوليله اولسه انى تطبيق ايتدى (فلما تبأها به قالت من انبأك هذا قال نبأني العليم الخبير) وقتا که پيغمبر عز عليه السلام حفصه يه افشاسندن اکا اظهار اولناني خبر ويردى حفصه پيغمبر عز عليه السلامه ديدیکه بنم افشائی سکا کيم خبر ويردى پيغمبر عز عليه السلام ايتدى اول الله تعالى که هر شئي بيلور و هر سري ايشيدر (ان توبا الى الله فقد صغت قلوبكما) يا عائشه و يا حفصه اگر سز پيغمبر عز عليه السلامه کراهت ويرر فعلکزدن توبه ايدرسکز توبه کز قبول اولور زيرا که سزدن توبه ايجاب ايدر شئي صدور ايدوبدر که اول مخالصة رسولدن قلبريکزک ميليدر که اول انک محبت ايتديكى شيئه محبت و کراهت ايتديكى شيئن کراهتي ايدى (وان تظاهرا عليه فان الله هو مولاه) اگر سز ايکيز رسول الله اوزره اکا کراهت ويرر شيئه

(تعاون)

تعاون و تظاهر ايدرسکز بيلوک که الله تعالى انک ولى و ناصريدر (و جبريل و صالح المؤمنين و الملائكة بعد ذلك ظهير) و کر و بيونک رئيسي جبريل عليه السلام انک قريندر و مؤمنلرک صلحاسى انک اعوان و اتباعيدر بوندنصکره ملائکه کثرتيله انک ظهرا سيدر (عسى ربه ان طلقن ان يبدله ازواج خيرا منك) اگر رسول الله سزى عصيانکز سبييله تطبيق ايدرسه قريب اولور که انک ربى جل شانہ ريکزه سزدن خير لو نساى اکا زوجات ايد (مسلمات) که انلر دين اسلامه و احكامنده مقرر لدر (مؤمنات) دينلرنده مخلصه لدر (قانتات) مصليه لدر و يا طاعته مواظبه لدر (ثابتات) ذنوبدن توبه ايديجيلدر (عابدات) متعبده لدر و يا امر رسوله متذلل لدر (سائحات) صائمه لدر و يا مهاجره لدر (ثيبات و ابكارا) انلر ثيبه لدر و بکر لدر (يا ايها الذين آمنوا قوا انفسكم و اهليكم نارا) يامؤمنلر کنديکيزى و اهليلريکيزى ناردن صافنک الله تعالىنک امرينه امثال و نهيندن اجتنابه و اهليلريکزه نصح و تأديله (و قودها الناس و الحجاره) که انک طوتشدره جغى ناس و کبريت طاشلريد * دینلديکه طاش آنک و قودى اولسى ناس اکا کيرمزدن اولدر (عليها ملائكة غلاظ شداد) اول نار اوزره مسلط زبانيه دينور ملائکه وارد که اقوالده غلاظ و افعالده شدادرلر و يا خلقده غلاظ و خلقده شدادر و يا افعالده اقويادر که انلرک برى دفعه واحده ده يتش بک کسه بي ناره القا ايدر انلرک قلوبنده رحمت خلق اولنوبدر (لا يعصون الله ما امرهم و يفعلون ما يؤمرون) الله تعالىنک امر ايتديکنه عصيان ايتزلر و امر اولندقلرى شيئي تأخيرنسر ادا ايدرلر (يا ايها الذين كفروا لا تعتذروا اليوم انما تجزون ما كنتم تعملون) يا کافرلر اشبو کونده يعنى يوم قيامته اعتذار ايتمکز * ناره دخوللرنده اعتذار ايديجک عذريکز قبول اولز دينور اشبو يوم جزادر دنياده ايشلديکز شرك و عصيانله جزالنور سز (يا ايها الذين آمنوا توبوا الى الله توبة نصوحا) يامؤمنلر الله تعالى به ذنوبکزدن توبه ايدک بر توبه ايله کيم اول صاحبنه نصح ايدر که اول موته دكين ذنوبه عودى ترکدر * دینلديکه اول عبدک ماضى به ندامتى و من بعد عدم عوده عنايتيدر * دینلديکه اول درت شيئي جامعدر لسانله استغفار و ابدانله اقلاع و جنانله ترك عودى اضمار و اخوان سوئي مهاجره در (عسى ربکم ان يکفر عنکم سيئاتکم

ویدخلکم جنات تجری من تحتها الانهار) تا که ربکز جل شانہ سزک
سیئاتکزی تکفیرایده وسزی جنتره قویه کیم اغاچلری التندن ایرمقلر آقار
(یوم لا ینحزی الله النبی والذین آمنوا معه) شول کونده که الله تعالی انده
پیغمبریمز حضرت محمد صلی الله علیه وسلم واکا ایمان کتورن مؤمنلری ناره
ادخاله اخزایتمز (نورهم یسعی بین یدیهم وایمانهم) اول مؤمنلرک نوری
اوکارنجه وصاغلرنجه صراط اوزره یورر (یقولون ربنا اتمم لنا نورنا)
منافقلرک نوری سوندیکن کوردکارنده کندیلرک نوری دخی سیونمسنی
بشریت عادتی اوزره خوف ایدوب اگرچه ایمانلری سیبیلہ کندیلره
امنی اعتقاد ایدرلر سه ده دیلرکه یاربنا نوریمزی سونمکدن حفظ
ایله کل ویاخود اعماللری حسنجه نورلریک تفاوتن کوریمچک
الله تعالی دن انک اتمان دیلیه لر (واغفر لنا) وذنوب ماضیه مزی
مغفرت ایتکل (انک علی کل شیء قدير) که زیراسن هرشیئه اتمام نوره
ومغفرت ذنوبه وغیری یه قادرسن (یا ایها النبی جاهد الکفار والمنافقین
واغلظ علیهم) یا نبی الله کافرلره سیقله ومنافقلره جتله وایکی صنفه
دخی غلظت وخشونت استعمالبله جهادایت (وماؤیهم جهنم وبئس المصیر)
انلرک ماواسی جهنمدر اول نه چرکین قرارگاه اولور (ضرب الله
مثلا للذین کفروا امرأة نوح وامرأة لوط) الله تعالی کافرلره نوح علیه السلامک
زوجه سی واهله بی ولوط علیه السلامک زوجه سی واهله بی مثل
ضرب ایدرکه انلر کفرلریله معاقب اولورلر یوخسه کندیلریله نبی
ومؤمنین بیلنده کی نسیبه نلر نفعی اولمز اول ایکی مرأیه زوجلری
نوح ولوطک نفعی اولدیغی کی (کانتا تحت عبیدین من عبادنا صالحین
(فخاتناهما) اول ایکی مرأه بزم ایکی صالح قوللریمک تحت نکاحنده
ایدیلر اول ایکسی نوح ولوطه نفاقله خیانت ایتدیلر نوح علیه السلامی
مرأه سی مجنوندر دیو افتر ایدردی ولوط علیه السلامک مرأه سی ایسه
قومنه لوط علیه السلامه کلان اضیافنی دلالت ایدردی ضیف اکا
کیجه کلسه آتش یقاردی کوندز کلسه دخان توتدردی (فلم یغنیا عنهما
من الله شیئا) اول ایکی مرأیه زوجلریک صلاح ونبوتی الله تعالی نلک
عذابندن برشی غنا ویرمدی (وقیل ادخلا النار مع الداخلین) اول
ایکی مرأیه موتلری عندنده ویا یوم قیامتده دینورکه کفره دن ناره داخل

(اولنلرله)

اولنلرله سز دخی داخل اولوک زیرا کفره ایله انبیاء بیلنلرنده وصلت اولمز
(وضرب الله مثلا للذین آمنوا امرأة فرعون) الله تعالی مؤمنلره
فرعونک زوجه سی آسیه رضی الله عنهای مثل ضرب ایدرکه انلره
کافرلرک وصلتی ضرر ویرمکده خالاری آسیه نلک حاله بکزرکه عندالله
منزله رفیعہ صاحبه سی ایکن اعداء الهک اشدی نکاحنده ایدی موسی
علیه السلام سحره یه غالب اولیمچک آسیه ایمانه کلشدی بعده فرعونه انک
ایمانی متبیین اولدیغنده انک ایکی الن وایکی ایغن میخلیوب کونشه قودی
وبردکرمن طاشنی کوکسی اوزره بصدردی اولوجهله اکا عذاب ایتدی
انلر اندن منصرف اولدقلرنده ملأئکه اکا کولکه اولورلردی (اذ قالت
رب ابن لی عندک بیتا فی الجنة ونجنی من فرعون وعمله ونجنی من القوم الظالمین)
اول حالته آسیه الله تعالی یه دعا ایدوب دیدیکه یارب بنم ایچون جتنده
رحمتک قربنده ویا درجات مقربینک اعلاسنده بر بیت بنا لیت وبنی
اول فرعونک نفس خبیثه سندن وعمل سیئندن وظلمدن وانکله اولنلرک شمتاه
وتعیرلرندن خلاص ایت اولیه اولسه الله تعالی دعاسنه اجابت ایدوب
حجابی اندن کشف ایتدیکند نصکره جتنده درجات رفیعده بیتنی کوستردی
روایت اولندیکه فرعونک امریله بر صخره عظیمه کتوردیلرکه انکله
اتی آزدیره لر آسیه ایسه اول حینده بودعایی ایدیچک الله تعالی اکا
جتنده دره دن یابلاش بیتنی کوستروب صخره بدنه ایرمدن روحنی قبض
ایتدی صخره نلک جسدینه وقوعی روحسز ایکن ایدی * دینلریکه اول
عذاب اولنورکن جتنده کی بیتن کوروب سرورندن کولردی قومی
ایسه اکا جنون عارض اولدی دیو سویلرلردی (ومریم ابنة عمران التي
احصنت فرجها فنفخنا فيه من روحنا وصدقت بكلمات ربها وكتبه
وكانت من القانتین) ودخی الله تعالی ارامل مؤمناته مریم رضی الله
عنهای مثل ضرب ایتدیکه اول فرجی رجالدن احصان ایدوب بزاتک
فرجنه خلق ایتدیکمز ارواحدن روح عیسایی نفخ ایتدک اول ربی جل
شانه نلک صحف منزله سنه ویا انبیایه وحی ایتدیکی اشیا به ویا لوح محفوظه
یازیلا نه ویا ازال اولنان کتابلره تصدیق ایتدی ودخی طاعته مواظبت ایدن
قومدن اولدی * پیغمبریمز صلی الله علیه وسلم ایدر رجالدن خلق
کثیر کاله ایردی اما که نسادن انجق درت مرأه کاله ایروبدرکه اول فرعونک

زوجه سی آسیه بنت مزاحم و مریم بنت عمران و خدیجه بنت خویلد و فاطمه بنت محمد صلی الله علیه و سلمدر رضی الله عنهم

سورة الملك وهی ثلاثون آیه مکیه

بسم الله الرحمن الرحيم

(تبارک الذی بیده الملك) محدثی صفاتندن تعالی و تعاضم ابتدی اول الله تعالی که جمیع امورک تصرفی انک قبضه قدرتند در اولیه اولسه هر مؤمنه لایق اولور که انک وحدانیت تصدیق ایده و هر حالده اکا توکل ایده (وهو علی کل شیء قدیر) اول نفع و ضرر عز و ذلدن هر شیئه قادر در (الذی خلق الموت والحیاة) اول دنیاده موتی و آخرتده حیاتی و یا ایکیسن بیلده دنیاده خلق ابتدی * دینلدیکه انکله مراد انسانک موت و حیاتیدر الله تعالی دنیایی دار حیاة و دار فنا قیلدی و آخرتی ایدسه دار بقا و دار جزا قیلدی و موتی تقدیم ابتدی زیرا که اول قهره اقریدر و یا اقدمدر زیرا اشیاک جمعی ابتداده موت حکمنده ایدی نطفه و تراب و امثالی کبی بعده حیاة اعترأ ابتدی * ابن عباس رضی الله عنهما ایدر الله تعالی موتی کیش املح صورتند خلق ابتدی اول هر نه شیئه اوغرایوب اول شیء انک فحوسن بولدیسه الا اکا موت ایردی * و حیاتی فرس بقاء صورتند خلق ابتدیکه اکا جبریل علیه السلام و انبیاء رکوب ایدر لردی هر نه شیئه اوغرایوب اول انک فحوسن بولدیسه اکا حیاة ایردی ایدمی معنی ای مکلفر الله تعالی سزک موتکزی و حیاتکزی خلق ابتدی (لیبلو کم) که سزه تکلفله مدت حیاتکزده موتکزه دکن سزکله مخبر معامله سن ایدوب از لده سزدن صدور ایده جک اشیا بی بیلدیکن ایجادله سزه دخی بیلدیره کیم (ایکم احسن عملا) عملده قنغیکز اصوب و اخلاصدر و یا عقلده احسندر و یا محارم اللهده اورعدر و یا طاعته اسرعدر و یا دنیاده از هدر (وهو العزيز الغفور) الله تعالی غالبدر که احسن عملدن اعراض ایدنه انتقام ایدر و اعراضدن توبه ایدنه مغفرت ایدر (الذی خلق سبع سموات طباقا) که اول یدی سمایی بری برینک فوقنده قبه مثالنده طبقات متباینه مثالنده خلق ابتدی (ما تری فی خلق الرحمن من تفاوت) الله تعالی انک خلقنده سن تباین و اختلاف کور مزسن بلکه بعضی بعضنه مناسبتدر

(خلل)

خلل و نقصانی یوقدر (فارجع البصر هل تری من فطور) ایدمی بصریکی کیروسمایه رد ایتکه سکا خبر و یریلانک صحت معاینه ایلده سن اگرچه سن اکا امرار نظر ایدوبسن ایدمی مره آخری دخی نظر ایتکه انده شقوق و صدوع کوره بیلور میسن (ثم ارجع البصر کرتین یقلب الیک البصر خاسئا وهو حسیر) ایدمی بصریکی سمایه ردکده بر کره ایلده قناعت ایتکل بلکه کرة بعد کرة رد ایت شاید انده برخلل کوره بیلده سن زیرا که انسان برشیئه بر کره نظرایله عیبی کوره مز مادامکه نظرین تکرار ایتیه حالبوکه سن اکا ندکو تکریر نظر ایتسک انده خلل بولیوب بصریکی اصابت مطلوبدن بعید کنیدیکه دوندرسن مع ذلك بصرك طول معاوده و کثرت مراجعه دن کلیدر (ولقد زینا السماء الدنيا بمصابیح) دنیاه قریب اولان سمایی بز کچدهده سراجلرک اضافتی کبی ضیا و یرر کواکبله تزین ایتدک کواکبک بعضی انک فوقنده کی سمواتده مرکوزه اولسنه مانع یوقدر زیرا که تزین انده اظهارله در (وجعلناها رجوما للشیاطین) و کواکبه زینندن ماعدا انی شیاطینه رجوم قیلدی چنانکه استراق سمعه قصد ایدر * دینلدیکه شیاطینه آتیلان شهابدر که نجمدن منفصل اولور قبسک ناردن انفصالی کبی یوخسه نجم مکاندن زائل اولز (واعتدنا لهم عذاب السعیر) اول شیاطینه دنیاده شهابله احراق اولغرنندن ماعدا آخرتده عذاب سعیر دخی تهیئه ایتدک * دینلدیکه الله تعالی نجومی اوچ خصلت ایچون خلق ایدوبدر که اول سمایه زینت و شیاطینه رجوم و بر و بحر ظلماتده اهتدایه علامتدر (وللذین کفروا برهم عذاب جهنم و بئس المصیر) شیاطین و غیریدن رب تعالی یه کافر اولنر ایچون جهنم عذابی واردر که اول نه چرکین قرارگاه اولور (اذا القوا فيها سمعوا لها شهيقا وهی تقور) چنان انلر اول جهنم القاولنلر اول جهنمدن جار صوتی کبی صوت منکر ایشیدلر حالبوکه اول جهنم غلیان ایده مرجلده ماء کثیرک غلیانی کبی (تکاد تمیز من الغیظ) جهنم کفار غیظندن قریب اوله که متفرق اوله و جازدر که مراد زبانیه انلر غیظی اوله (کما الی فیها فوج سألهم خزنتها ألم یأتکم نذیر) هر بار که کفار دن جهنم بر جاعت براغیله خزنه انلر توبیح و جهی اوزره سؤال ایده کیم اشبو عذابدن تخویف ایدر سزه

دنياده رسول كلديمي (قالوا بلى قد جاءنا نذير فكذبنا وقلنا ما نزل الله من شيء ان انتم الا في ضلال كبير) ديهلر بلى بزه تخويف ايدر رسول كلشدي بزايسه اكا الله تعالى هيج بر شيء ازال ايتيويدير سز ضلال كبيرده سزديوانلري تكذيب ايتدك (وقالوا لو كنا نسمع او نعقل ما كنا في اصحاب السعير) ودخي ديهلر كه اكر بزر رسولارك كلامن ايشيدوب بحث و تقنيشسز قبول ايتسيدك و حكم و معانيسنده مستبصرين كي تفكر ايتسيدك اهل نار عدادندن اولمزدق (فاعترفوا بذنبهم فسحقا لاصحاب السعير) اويله اولسه ذنبلرينه اعتراف ايدلر بر حينده كه اعترافلري كنديلره نفع ايتيه الله تعالىنك رحمتدن بعيد اهل ناردر (ان الذين يخشون ربهم بالغيب لهم مغفرة واجر كبير) شونلر كه رب تعالىني كورممشلر اول انلره غائب ايكن عذابندن قورقوب امريله عمل و نهيندن اجتناب ايدرلر انلر ايچون كناهلرينه مغفرت و جنتده اجر كبير واردر كه اكا نسبتله لذاند دنيا صغير اولور (واسرّوا قولكم او اجهروا به انه عليم بذات الصدور) محمد عليه السلام شائنده كر كسه قولكزي اسرار و كر كسه اجهار ايتدك اول الله تعالى قلوبكزده اولان خير و شري بيلور * ابن عباس رضي الله عنهما ايدر مشركارك پيغمبريمز صلى الله عليه وسلم شائنده سويلدكاري كلام مكروهى جبريل عليه السلام اكا خبر ويرردى انلر ايسه برى برلرينه سرله سو بلسورلر كه محمدك الهى ايشتميه اول سيبندن بو آيت نازل اولدى (الا يعلم من خلق وهو اللطيف الخبير) سر و جهري بيلزمي اول الله تعالى كه انى و سائر اشيايى حكمتى مقتضاسنجه خلق ايتدى حالبو كه انك علمى لطيفدر خلقندن صدور ايتدك ظاهر نه و باطننه ايرر خلقنك احوال واقوالنى بيلور (هو الذى جعل لكم الارض ذلولا فامشوا في مناكبها وكلوا من رزقه واليه النشور) اول الله تعالى سزه ارضي لينه قيلديكه انده سلوك سزه آسان اوله ايمدى انك اطراف و جوانبنده يور و يكرز و انده الله تعالىنك رزقندن التماس ايدوب اكل ايديكز مرجعكز اكادر سزه انعام ايتديكي رزقك شكرندن سؤال ايدر (ءامنتم من في السماء ان يخسف بكم الارض فاذا هي تمور) عصيان ايتديككز تقدير اوزره اشبو عالمك تدبير نه موكل سماده ساكن ملائكهكز ويا امر و قضاسى سماده اولان الله تعالىنك عقابندن امندهمى اولور سكز قارونه اولان صنيعى كبي سزى

(دخی)

دخي يره پكوره حالبو كه اول حالتده ارض تحرك ايدر انلر اسفله كيدر ارض ايسه فوقلرينه ايرر (ام امنتم من في السماء ان يرسل عليكم حاصبا فستعلمون كيف نذير) و يا خود سماده امر و قضاسى اولان الله تعالىنك عقابندن امندهمى اولور سز كه لوط قومنه ايتديكي كبي اوزر يكرزه حصبا يا غدره بنم كيفيت انذاريمى بيلور سز چنانكه منذور به اولان شيى كوره سز شول حينده كه انى بيلديككز سزه نفع ايتيه (ولقد كذب الذين من قبلهم فكيف كان نكير) ام ماضيه دن انلردن اولده رسولاريني تكذيب ايتديلدري تأمل ايتكه بنم انلره انكار و عقوبتم نه كيفيت اوزره اولدى (اولم يروا الى الطير فوقهم صافات و يقبضن) انلر طيوره نظر ايتزلر مكيه فوقلرنده جو سماده قنادرين كاهى بسط و كاهى قبض ايدر خلق ايتدك (ما يسكهن الا الرحمن) اول طيورى جو سماده الله تعالىدن غيرى احد امساك ايتز (انه بكل شيء بصير) اول هر شيى بيلور كه نيچه خلق ايدر و نيچه تدبير ايدر (امن هذا الذى هو جند لكم ينصركم من دون الرحمن ان الكافرون الا في غرور) الله تعالى اكر عذابنى سزه ارسال ايتسه انى منع ايدر بولنور ميكه انك عذابندن سزى قور تاره ايمدى كافلر شيطانندن خداعدهدر معتمدلري شيى باطلدر (امن هذا الذى يرزقكم ان امساك رزقه بل لجوا في عتو و نفور) الله تعالى اكر سز دن مطرى امساك ايتسه كيمدر كه انى سزه و يرمكه قادر اوله بلكه كافلر تكبر و عنادده و حقدن نفور و شرارده تمادى ايدرلر (افن يمشى مكبا على وجهه اهدى امن يمشى سويا على صراط مستقيم) دينده شول كسه مى ارشد و اصوبدر كه قلبنك عمى و ظلمتى و طريقنك خشونتى سبيله هرانده يوزى اوزره دوشهرك يورويه يوخسه شول كسه ميكه بصر و نور قلبى سبيله سورچك و دوشمكدن سالم اولديغى حالده صراط مستقيم اوزره طوغرى يورويه ايمدى اول يوزى اوزره دوشهرك يوروين كافلر كه اول حالتده جهنمه سور بيلور و صراط مستقيم اوزره طوغرى يوروين مؤمندر كه اول حالتده جنته كوندر بيلور (قل هو الذى انشاكم وجعل لكم السمع والابصار والافئدة قليلا ما تشكرون) يا محمد ديكل كه اول الله تعالى سزى يراتدى و سزه سمع و ابصار و افئده و برديكه سمعه مواعظى ايشيده سز و ابصار له رب تعالىنك صنائعن كوره سز و افئده ايله حقى بيلوب

انك سزه انعام ايتديكي اسباب هدايته ومعرفته شكر ايدنه سز جالبو كه
اعضاء مذكوره بي خلق اولنديغي شئيده استعماله سز اكا از شكر
ايدرسز (قل هو الذي ذرأكم في الارض واليه تحشرون) ديكل كه
الله تعالى سزى خلق وكثير ايتدى موتكز دنصكره حساب وجزا ايچون
اكا حشر اولنورسز (ويقولون متى هذا الوعد ان كنتم صادقين)
كافر لر محمد عليه السلامه ومؤمنلره ديرلر كه وعد ايتديكز بعث نوقت
ظاهر اولور بزه خبر ورك اكر قولكزده صادق ايسكز (قل انما العلم
عند الله وانما انا نذير مبين) ديكل كه انك على الله تعالى عندنه در اكا اندن
غيرى احد مطلع دكلدر بن انجق نذيرينكه الله تعالىنك عذابن ايجاب
ايدر اشيادن تحذير ايدرينكه فهم ايتديكز لسائله سزه انى تفهيم ايدم
(فلما رآوه زلفة سيئت وجوه الذين كفرو وقيل هذا الذي كنتم به تدعون)
وقتا كه انلر وعدى قريب كورلر انى تصديق ايتينلر يوزلر قبح اوله
وانلره دينله كه اشيو شول عذاب موعود در كه سز انى دنياده طلب
واستعمال ايدر ديكلر ويابعث يوقدر ديو آدما ايدر ديكلر (قل أرأيتم
ان اهلكنى الله ومن معى او رحمتا فن يحير الكافرين من عذاب اليم)
ديكل كه بكا خبر ورك اكر الله تعالى بنى وبنمله اولان مؤمنلر امانه ايتسه
ويا آجالزى تأخيرله بزه رحمت ايتسه كافرلر عذاب اليمدن كيم قورتارر
ويا الله تعالى به مؤمنلر اولوب اكا عبادت وضراعت ايدركن معصيت
ايتديكزده انك عذابندن امن اوزره اولنمز سز ايسه اكا كافرلر ايكن انك
عذابندن نيچه امن اوزره اولورسز ايمدى بزكر كسه اولورزو يا قالورز
انلر عذابندن قورتارر يوقدر (قل هو الرحمن آمنابه وعليه توكلنا فستعلمون
من هو فى ضلال مبين) ديكل كه اول الله تعالى رجائيله موصو قدر جله
نعمتلك موليسيدر بن سزى اكا دعوت ايدرين بزا اكا ايمان كتور مشر
وامور يمزى اكا تفويض ايتشز ايرته انك عذابن كورديكزده ضلال ميبنده
كيم ايدوكن بيلور سز (قل أرأيتم ان اصبح ماؤكم غورا فن يأتكم بماء معين)
ديكل كسه بكا خبر ورك كه اكر صويكز يره باتوب كتسه برحيتيله كه
اكا دلاء اير محبوب وصوله قدرتكز يتسه كيمدر كه سزه برصوكتوره كيم
جارى وظاهر اوله (قال النبي صلى الله تعالى عليه وسلم ان سورة من كتاب الله
تعالى ماهى الا ثلاثون آية شفعت لرجل يوم القيامة فاخرجه من النار
وادخلته الجنة وهى سورة تبارك) پيغمبر يمز صلى الله تعالى عليه وسلم ايدر

(قرآنده)

قرآنده بر سورة واردر كه اول اوتوز آيتدر اول تبارك سوره سيدر يوم قيامته
انك شفاعتيله بر رجل ناردن اخراج اولنوب جننه ادخال اولنه

سورة ن وهى ثنن وخسون آية مكية

بسم الله الرحمن الرحيم

(ن) انك معناسنده مفسرين اختلاف ايتديلر * ابن عباس رضى الله عنهما
ايدر (ن) شول بالقدر كه ير انك ارقه سنده در * دينلديكه الله تعالىنك اول مخلوق
قلمدر امريله قيامته دكين اوله جق كائاتى يازدى بعده نونى خلق ايدوب یرى
انك ارقه سى اوزره بسط ايتدى اول تحرك ايديجك ير صالندى اوليله اولسه
اوزرينه طاغلر قونوب انكله یرك حرکتى زائل اولدى * روايت اولنديكه
الله تعالى یدى قات یرلر یر ايتديغندنصكره عرش التندن بر ملك كوندردى
حتى كه اول ملك یدى قات یرلر اموزى اوزره آلوب برالينى مشرقدن
وبرالينى مغربدن چيقارديغندنصكره طوتدى جالبو كه ايكي اياغى التنه قرارگاه
يوعيدى اوليله اولسه الله تعالى فردوسدن براوكوز ايندرديكه انك قرق بيك
بوينوزى وقرق بيك قائمه سى وار ايدى اول ملك ايكي اياغن اول او كوزك
سناحى اوزره قودى لكن اول ملكك ايكي اياغى انده قرار ايتيجك فردوسك
اعلاى درجه سندن الله تعالى بریشل صخره ايندروب اول او كوزك سناميله
قولاغى اراسنه قوديكه اول صخره نك غلظى بشيوز يلاق مسافه ايدى ملك
ايكي اياغن اول صخره نك اوزره قويچق قرار ايتدى اول او كوز بوينوزلرين
یرك اطرافندن چيقاردى وانك ايكي منخرى بحرده در هر كونده ايكي كره
تنفس ايدر تنفس ايتديكننده بحر ياييلور رد نفس ايتسه انكله بحر چكيلور
لكن اول او كوزك قوائمه قرارگاه يوعيدى اوليله اولسه الله تعالى بر صخره
یر ايتديكه یدى قات كوكلر ویرلر غلظنجه ايدى او كوزك قوائمى انك اوزره
قرار ايتديكه اول سورة لقمانده ذكر اولنان صخره در لكن اول صخره به قرارگاه
يوعيدى اوليله اولسه الله تعالى براولو بالق یر ادوب صخره یرى انك ارقه سى
اوزره قودى اول بالق بحر اوزره وبحريل اوزره ويل ايسه قدره اوزره در
كعب الاحبار ايدر ابليس شول ظهرنده ارض اولان حوتك قلبنه
القا ايتدى بيلورميسنكه ظهرنده ندكلو امم ودواب وشجر وجبال واردر
اكر سلكنوب انلر ظهركدن دوشورسك نيچه راحت اولوردك حوت

بع (۱۸)

دخی انی قصد ایدیک الله تعالی بر دابه خلق ایدوب حوتک منخرندن دماغنه
ایردی حوت اندن فریاد ایدوب الله تعالی به استغاثه ایدیک انی انک دماغندن
چیقاردی حوت اکا واول حوته نظر ایدر حتی که حوت اولکی کبی بر قصد
سوء ایدر سه اول ینه انک منخرینه کیره انی اول قصدندن دوندنه بعضیلر
دیدیکه (ن) رجن اسمک آخر حرفیدر ویا انکله مراد دوایدر ویا قسمدر که
الله تعالی انکله اقسام ایتدی ویا فاتحه سوره سیدر ویا نور ویا ناصر اسمک
اقتاحیدر ویا الله تعالی مؤمنره نصر تیله اقسام ایدوبدر (والقلم وما یسطرون)
وقلم حقیچونکه اول نور دندر طولی سماء وارض اراستجه در انکله مراد
لوح محفوظی یازان قلمدر ویا مطلق قلمدر انکله یازیلور کثرت فوایدیچون
انکله اقسام اولندی ودخی اول شیء حقیچونکه کتبه انی لوحه یازارلر
ویا مراد اصحاب قلمدر ویا حفظه در (ما انت بنعمة ربک بمجنون) یا محمد سن
ربک جل شانہ نک سکا ویردیکی نبوت و حکمت وعصمت و سائر نعمته
مجنون دکلسن وقتا که جبریل علیه السلام پیغمبریمز علیه السلامه کلوب
قرآن و صلاة تعلیم ایتدی کفار مکه دیدیلر که محمده جنون عارض اولدی
اول سبیدن بوآیت نزول ایتدی یعنی یا محمد سن الله تعالی نک رسولین اعدانک
دیدیکی کبی دکلسن (وانک لاجرا غیر ممنون) یا محمد قومک افترا سنه صبرک
سبیلله سنگچون اجر لایق قطع واردر ویا انده اوزریکه ناسک منتی یوقدر
زیرا که الله تعالی انی سکا واسطه سز ویروبدر (وانک لعلی خلق عظیم)
یا محمد سن شول خلق اوزره سنکه الله تعالی سکا انی قرآنده تخلقه امر ایتدی
دینلدیکه انک خلقی سوره اعراف آخرنده ذکر اولسان (خذ العفو
وأمر بالعرف واعرض عن الجاهلین) آیتده کی خصال حیده در *
دینلدیکه انکله مراد آداب قرآنیه در * روایت اولندیکه پیغمبریمز
صلی الله علیه وسلم خلقندن عائشه رضی الله عنهایه سؤال اولندقدنه
دیدیکه انک خلقی قرآن ایدی پیغمبریمز علیه السلام دیدیکه الله تعالی
بنی مکارم اخلاقی اتمامله بعث ایدوبدر پیغمبریمز علیه السلام ایدر
مؤمن حسن خلقی سبیلله کیجه قائم وکوندز صائم درجه سنه ایرر (فستبصر
ویبصرون بأیکم المقتون) یا محمد یوم قیامتده کرک سن وکرکسه اهل مکه
کوره سز مجنون قنغیکز در چنانکه انلره عذاب نازل اوله (ان ربک هو اعلم بمن

(ضل)

(ضل عن سبيله وهو اعلم بالمهتدين) ربک جل شانہ اعلمدر اکا که انک سبیلندن
آزیدیلر حقیقتده مجانین انلدر و دخی اکا که دین مستقیمه اهتدا اولندیلر انلر
کال عقلله فائزدر (فلا تطع المکذبین) ایددی اهل مکه مشرک لرینه اطاعت
ایتمکل که انلر قرآنی مکذبلر در (وتواوتدھن فیدھنون) انلر تمنی ایدرلر که
سن انلره مدارات ایدوب انلر دخی سکا مدارات ایدرلر سن انلری شر کردن
نهی ترکه تلاین ایدر سن ویا خود بعض احبسانده شرکده انلره توافق
ایده سن انلر دخی ترک طعنه سکا تلاین ایدرلر (ولا تطع کل خلاف مہین)
اطاعت ایتمکل هر کسه یه که حقدنه وباطلده چوق یمین ایدر طاعتده
ضعیف و معصیتده قوی اولور (هماز مشاء بنیم) اول نامی تغییر ایدر
وافساد وجهی اوزره بر قومک کلامی قوم آخره نقل ایدر (مناع للخیر
معتدائیم) نامی ایمان و اتفاق و عمل صالحدن منع ایدر و ظلم ایدوب حتی
تجاوز ایدر و چوق کناه ایشلر (عتل بعد ذلک زنیم) غلیظ القلب اولوب
باطلله خصومتده شدت ایدر ذکر اولسان اوصافله بیلله اول بر قومه
ملصقدر که اول انلردن دکلدز * دینلدیکه اول ولیدین مغیره در که مغیره
انی اون سکنز یلندن صکرده ادعا ایتدی ویا خود اول اخنس بن شریقدر که
اصلی ثقیفدن عدادی زهره ده در (ان کان ذامال وبنین) اول مال واولاد
صاحبی می اولدیفیچون اکا اطاعت ایدر سن (اذا تبلی علیه آیاتنا قال
اساطیر الاولین) چقان اکا بزم آیتلریمز تلاوت اولنسه مال وبنونله فرط
غروندن اشبو اولینک اکا ذیب وابطیلیدر دیواکا ویریلن مال وبنون
نعمته کفرله مجازات ایدر (سنسمه علی الخراطوم) بزانی بورنی اوزره کی
ایله علامتلندیررز ویا خود یوم قیامتده یوزین سیاه ایدرز (انابلونا هم
کابلونا اصحاب الجنة) بز اهل مکه کی خط وجوعله اختبار ایتدک شول
بوستان صاحبیلرینی اختباریمز کی * روایت اولندیکه اول بوستان یمنده
صنعادن ایکی فرسخ مسافده ایدی بر رجل صالح ایدی صرامی وقتنده
فقرا بی چاغردی اولکه میوه دن منجاندن طشره دوشه ویا روز کار
دوشوره ویا نخله اتنه دوشه نیلان بساطدن اراق کیده فقرا یه ویرردی
بووجهله اندن فقرا یه شیء کثیر حاصل اولوردی اول رجل صالح وفات
ایدیک اوج اوغلی اول بوستانه وارث اولدیلر دیدیلر که اگر بزبابا عادتینی
اجرا ایدر سه وزبزه ضیق اولور دیواندن امتناع ایتدیلر (اذا اقموا لیصر منها

مصحفین) ارالنده یمن ایدشدیلر که اول بوستانلرینک میوه وسائر غلاتنی صباح وقتنده فقرانک خبرلری یوغیکن دیوشره لر (ولا یستنون) لکن ان شاء الله دیمدیلر (فطاف علیها طائف من ربک وهم نائمون) اویله اولسه انلر اویورکن کیجه ایچنده اول بستانه رب تعالی قبلندن برنار محرقه ایرشدی (فاصبحت کالصمیم) حتی که اول لیل مظلم اسودکی اولدی ویاندن خیر کیدن کبی برشی قالمش اولدی (فتنادوا مصحفین) صباحن بری برلین چاغردیلر (ان اغدوا علی حرثکم ان کنتم صارمین) دیدیلر که ارکندن بوستانمز حاصلن دیوشرمکه کیده لم اگر فقرا کلدن اتی دیوشرمک مراد ایدرسکز (فانطلقواوهم یتخافتون ان لایدخلنها الیوم علیکم مسکین) چون ارکندن بوستانه کتدیلر والحاصل بری برلینه کلام خفی ایله دیرلردیکه فقرادن هیچ برینی بوستانه کیرمکه مجال ویرمکز (وغدوا علی حردقادرین) وفقرایی بوستاندن منع اوزره اکا کتدیلر زعملرنده اکا قادرین اولدقاری حالده (فلما رأوا هاقالوا انالضالون) وقتا که بوستانلرین یانمش کوردیلر بوستانمز یولنی یا ککشر دیدیلر بعده تأمل ایدوب اول یانمش مکان بوستانلرینک مکانی ایدیکن بیلدیلر (بل نحن محرومون) بلکه بزاتک خیر ونفعندن محروملرز شول سببله که فقرایی اندن منعه قصد ایتدک وان شاء الله دیمدک دیدیلر (قال اوسطهم ألم اقل لکم لولا تسبحون) انلرک اعدل واعقل وافضلی دیدیکه بن سزه دیمدیمکه اول بوستانک حاصلن دیوشرمکه عزم ایتدیککزدده ان شاء الله دیسیدیکز ویاخود سبحان الله دیوب انک سزه ویردیکي نعمته شکر ایتسیدیکز ویاخود اول نیت خبیثه کزه استغفار ایتسیدیکز (قالوا سبحان ربنا انا کننا ظالمین) ربمز جل شانہ منزهدر که فعلنده ظالم اوله بلکه بز فقرایی اندن منعز ایله کندیمزه ظلم ایتیمز دیو ظلملرینه اعتراف ایتدیلر (فأقبل بعضهم علی بعض یتلاومون) اویله اولسه فقرا حقنی منعلری اوزره بری برلینه لوم ایتمکه باشلدیلر زیرا انلرک کیمی اکا اشارت ایتدی وکیمی ایسه اتی استصواب ایتدی وکیمی ایسه اکا راضی اولوب سکوت ایتدی وکیمی ایسه اکا انکار ایتدی (قالوا یاویلنا انا کننا طاغین) جیجی دیدیلر که ویل بزه کیم حدود اللهده استقامتی تجاوز ایتیمز الله تعالینک ویردیکي نعمتک شکرینی ترکله وبابامزک فعل جیلندن اعراض ایله طغیان ایتیمز (عسی ربنا ان یدلنا

(خیرا)

خیرا منها انا الی ربنا راغبون) امیددر که توبه مز وخطامزه اعترافز سببله ربمز جل شانہ بزه اول بوستانمزدن خیرلوی اکا بدل ایده * ابن مسعود رضی الله تعالی عنه ایدر بکا خبر ایدیکه انلرک صدق واخلاصلری سببله الله تعالی انلره بر بوستان ویردیکه اولکیدن خیرلو ایدی بر صلعم اوزمنی بر قاطر کوتورردی (کذلک العذاب ولعذاب الآخرة اکبر لو کانوا یعلمون) بزم امر مزه مخالفت ایدنلره دنیاده عذابمز بویله در حالبو که فعل سوءدن توبه ایتیلره آخرتده عذابمز بوندن اعظمدر اگر بیلورلر سه عذابی مؤدی اولان اشیادن صاقنورلر قتادهیه اشبو ذکر اولسان بوستان صاحبلری اهل جنت ویا اهل نار دنمیدر دیو سؤال اولندقدده دیدیکه اول علم غیبندر الله تعالینک غیری اتی احد بیلز (ان للیتقین عند ربهم جنات النعیم) متقیلر ایچون آخرتده ویاجوار قدسده جنتلر واردر که انده تنعم خالصدن غیری یوقدر (أفجعل المسلمین کالمجرمین) وقتا که مشرککر ا کر حال محمدک دیدیکي منوال اوزره موتمز دنصکره بعث اولنورسه وز دنیاده فضل وشر ف اوزره اولدیغمز کبی آخرتده دخی حالده مسلمیندن احسن اولورز دیدیلر الله تعالی انلرک اول قولنی انکار ایدوب دیدیکه بز آخرتده مسلمینی مجرمین کیمی قیلورز (مالکم کیف تحکمون) سزه جهالتدن نه حالت ایدیکه اتی حکم ایدرسز حالبو که اول اختلاف فکر واعوجاج رأیدن ناشیدر (ام لکم کتاب فیه تدرسون) یوخسه سزه سمادن کتابی نازل اولدیکه انده ادما ایتدیککز شیئی دراست ایدرسز (ان لکم فیه لما تخیرون) که اول کتابده اختیار ایتدیککز شیئی سزچون اولسی یازلمش اوله (ام لکم ایمان علینا بالغة الی یوم القيامة ان لکم لما تحکمون) یوخسه سزچون اوزریمزه عهد وثیقه می واردر که اول قیامته دکن ثابتدر وفاسی اول کونده اولور حتی نفسکز ایچون قضا ایتدیککز شیئی سزه اول کونده ایریشه (سلهم ابهم بذلک زعیم) انلره سؤال ایتکه قنغیسی بو حکمه کفیل اولوب احتجاجه دور بشور (ام لهم شرکاء فلیأ توا بشر کائهم ان کانوا صادقین) یوخسه زعملنجه الله تعالینک شرکاسیمی واردر بو امرده انلره کفیل اولور ویاخود بر قولده انلره مشارکت ایدوب بونلر دخی انلرک مذهبیه کیدرلر دعوالرنده صادقین ایسه لر اتی خبر ویرسونلر (یوم یکشف عن ساق) ذکر ایت شول کونیکه

انده حساب و جزا ایچون امر مشند اولور (ویدعون الی السجود فلا یستطیعون) ورب تعالیٰ به سجود ایچون دعوت اولوب اكا قادر اولمه لر زیرا اول کونده ارقه لری و بلاری تیمور کبی برک اولوب اکیله (خاشعة ابصار هم ترهقهم ذلة) اول سجوده قادر اولمیلرک کوزلری ندامت و حسرتدن خاشعه اولدیغی حالده کندیلرین ذلت و حقارت قابله (وقد کانوا یدعون الی السجود وهم سالمون) حالبوکه انلر دنیاده اصحاء ایکن اذان و اقامتله صلوات مکتوبه به دعوت اولوب اكا اجابت ایتمزلدی * دینلدیکه اشبو آیت جماعتدن تخلف ایتملر شاندن نازل اولوبدر * ابو موسی ایدر پیغمبریمز صلی الله تعالی علیه وسلمدن ایشتدمکه یوم قیامتده هر قومه دنیاده عبادت ایتدیکی شیء تمثیل اولوب اكا کیده لر اهل توحید قالوب منتظر اوله لر انلره دینله که سزدن غیری ناس کتدیلر سز نه شیء منتظرلر سز دیه لرکه بزم ربمز واردر کورمدک دنیاده بزا کا عبادت ایدردک اكا منتظرلر دینله که اگر سزانی کورسکز بیلورمیدکز دیه لرکه بیلوردک زیرا که انک شیه و نظیری یوقدر اوله اولسه الله تعالی انلردن حجابی کشف ایدوب کور یچک سجده به واردلر شول دنیاده ریا و سمعه ایله سجده ایدنلرک بلاری صغری کبی بوینوزی کبی بوکیلوب سجده به مجالاری اولمه (فذرنی ومن یکذب بهذا الحدیث سنستدرجهم من حیث لا یعلمون) یا محمد قلبی اشغال ایتکل شول قومه کیم قرآنی تکذیب ایدرلر بن انلردن انتقامه قادرم سن کندی حالکه مشغول اول بن انلری امهال ایله و ازدیاد نعمتله عذابمه قریب ایدرینکه انک استدراج ایدوکنه حسب انلری اولمه بلکه زعملرنده انکله کندیلرین مؤمنلر اوزره مفضل ظن ایده لر (واملی لهم ان کیدی متین) بن انلره امهال ایدرینکه کناهلری زیاده اوله احسانم سببیه بنم مکرم قویدر بر شیءله دفع اولمز ایدمی انسانه صحتله عمرک مدید اولمی الله تعالی دن احسان و افضالدرکه شکر و طاعتی ایجاب ایدر چنانکه انک مقابله سنده معصیت احداث ایدوب استغفار ی اونوده لر و شکر ی ترک ایدوب کفری اختیار ایده لر عذابه مستحق اولوب اول نعمت انلره استدراج اولوب (ام تسألهم اجر افهم من مغرم مثقلون) یوخسه تبلیغ رسالت اوزره سن انلردن جمعی طلب ایلدک که انک اداسی انلره ثقیل اولدیغیچون ایمانه اجابتدن امتناع ایتدیلر (ام عندهم الغیب فهم یکتبون)

(یوخسه)

یوخسه انلرک عندنده علم غیب و یا علم و حی و ار در اول دیدکلرین و یا حکم ایلدکلرین اندن یازرلر (فاصبر لحکم ربک) یا محمد ربک جل شانک حکمنه صبرایتکه انک انلره امهالی و اوزرلرینه سکا نصرتک تأخیریدر (ولا تکن کصاحب الحوت) یوخسه مجله ده و قومکه غضبه صاحب الحوت یونس کبی اولمغل که اول قومه ایمانه کلدکلر یچون غضب ایتدیکندن حزنی طویل اولدی (اذنادی وهو مکظوم) که اول بطن حوته غمه مملو اولدیغی حالده رب تعالیٰ به دعا ایتدی * ایدمی اندن صدور ایدن ضجرت سندنخی صدور ایتسونکه انک بلا سیله سندی مبتلی اولمه سن (لولا ان تدارکة نعمة من ربه لنبذ بالعرء وهو مذموم) اگر رب تعالی دن اکتوبه به توفیق و قبول نعمتی ایرشمسه اول بطن حوتدن برارضه براغیلوردیکه انده شجر و ماء اولمیدی حالبوکه اول ذنبه مذموم و ملومدر (فاجتبه ربه فجعله من الصالحین) لکن رب تعالی ناکا رحمت و کرامتی ایرشوب اكا وحی ردله اجتباء ایتدی و یا خود اول و قعه دن اول اول نبی دکلیدی دینلان قولک صحتی اوزره انی نبوتله اصطفاء ایدوب عصمتله صلاحده کاملردن ایتدی (وان یکاد الذین کفروا لیرلقونک با بصارهم لما سمعوا الذکر ویقولون انه لمجنون) قریب اولورکه قرآنه کافر اولنلر اصابت عینله سنی مکانکدن ازاله ایده لر چنانکه سنی قرآن اوقور ایشیده لر وناسی سندن تغیر ایچون سکا جنون اسناد ایدرلر (وما هو الا ذکر للعالمین) حالبوکه اول قرآن دکل الاعالمره موعظه در * روایت اولندیکه کفار دیلدیلرکه پیغمبریمز صلی الله علیه وسلمه عین سولله نظر ایده لر مکر عریده بر رجل واردیکه ایکی اوچ کون برشیء اکل ایتز بعده خیامنک بر جانن قالدروب قته اوغرایان دوه و یا قیونه نظر ایدر هیچ بونک کبی دوه و یا قیون کورمدم دیدیکی کبی براز یرکتدین انلرک بر قاجی دوشوب یقلوردی کفار اول رجلی بولوب پیغمبریمز صلی الله تعالی علیه وسلمه انک سوء نظرن دیلدیلر حتی که اكا انی ایتدیلر لکن الله تعالی پیغمبریمز علیه السلامی انک عینی اصابتدن حمایت ایدوب بو آیتی انزال ایتدی (قال النبی علیه السلام لو کان شیء یسبق القضاء لسبقته العین) پیغمبریمز صلی الله تعالی علیه وسلم ایدر اگر قضاء الهی سبق ایدر شیء اولسه عین سبق ایدیدی و حدیثده کلدیکه (ان العین تدخل الرجل القبر والجل القدر) عین مشؤمه الله تعالی ناک

اذنيله بر مرتبه مؤثره در كه انسانى قبره قور ودوهى چوملكه قور * حسن
رضى الله تعالى عنه ايدر عين اصابتنه دوا در كه (وان يكاد الذين كفروا)
آيتى آخريه دكين مصابه اوقونه

سورة الحاقة وهى ثلثان وخسون آية مكية

بسم الله الرحمن الرحيم

(الحاقة) شول ساعت ويا حالتكه وقوعى حق اولور ويا شول ساعتكه
انده بر نيچه امورك حقيقتى بيلنور ويا انده حساب و جزادن حواق امور
واقع اولور (مالحاقة) حاقه نه شيدر (وما ادريك مالحاقة) حاقه نك
ماهيتن سكا نه شى بيلدردى زيرا اول هيچ كسه نك درايتى اكا ايرمكن
اعظمدر (كذبت ثمود وعاد بالقارعة) قوم ثمود وقوم عاد يوم قيامتى
تكذيب ايتديلر كه اول خلقك قلوبنى افزاع وانفطار سماء ودك ارض
ونسف جبال وطمس نجوم و سائر مخاوفله قرع ايدر (فاما ثمود فاهلكوا
بالطاغية) اما قوم ثمود اهلاك اولنديلر برواقعه ايله كيم شدته حدى
تجاوز ايدوبدر كه اول صيحه ويا رجفه در ويا طغيانلرى سبيله كيم اول
قارعه يي تكذيبلر (واما عاد فاهلكوا برح صرصر عاتية) واما
قوم عاد اهلاك اولنديلر بر ريحله كيم انك صوتى ويا بردى شديد اولوب
ريح خازنلرينك امريته مخالفندن كيل ووزنسر خروج ايتدى ضبطه
استطاعت ايده مديلر ويا اول ريح قوم عاد اوزره تجاوز ايدوب ردينه
قادر اولديلر (سخرها عليهم سبع ليال وثمانية ايام حسوما) الله تعالى
اول ريحى يدي كچه وسكز كون على الدوام قوم عاد اوزره تسليط
ايتدى (فترى القوم فيها صرعى كأنهم اعجاز نخل خاوية) اكر سن
انلرك قنده حاضر اولوب ريحك شدت هوبنده ويا اول ليالى ويا امده
انلرى موتى كوريدك كانه يردن منقلعه وساقطه اصول نخلدر (فهل
ترى لهم من باقية) هيچ انلردن نفس باقيه ويا باقيه كوررميسن * ديتلديكه
اول ايامى عرب ايام عجوز ديو تسميه ايدرلر شانك آخرنده برد وريحك
شدتى اياميدر انك عجوز ديتلسنه سبب قوم عاددن بر عجوز اول ايامده
بر سربه كيريك ريح اكا دخى اروب عذاب نزولندن سكزنجى
كونده انى دخى هلاك ايتديكندنصكره عذاب منقطع اولدى (وجاء

(فرعون)

فرعون و من قبله والمؤتفكات بالحاطة) فرعون واندن اول بكن
امتسر ويا فرعونك جنودى واتباعى ومؤتفكات اهليكه قوم لوطدر
افعال ذوات خطايه كديلر (فعصوا رسول ربهم فاخذهم اخذة رابية)
انلردن هرامت رب تعالىدن كلان رسوله عصيان ايتديلر اويله اولسه
اول انلرى اخذ ايتدى بر عقوبته كيم شدتى زياده ايتدى عمللرينك قبحى
شديد اولديغى كى (انا لما طغى الماء حملناكم فى الجارية) وقتناكه
نوح عليه السلام طوفانده ماء خازنلرينك اوزره طغيان ايتدى بز سرك
آبائكزى ميه اوزره نوحك سفينه سنده كوتوردك حالوكه سز اول آبائكز
اصلا بنده ايديكز (لنجعلها لكم تذكرة وتعيها اذن واعية) تاكه اول
فعلزى كه مؤمنلرى انجاسز وكافرلرى اهلاكزدر سزه عبرت وكمال قدرتمزه
دلالت قيله وز تاكه انى حفظ ايده هراذنكه شانى شول حفظى واجب
اولان شى حفظ اوله انى تذكر واشاعه وتفكر وموجى اوزره عمله
(فاذا نفخ فى الصور نفخة واحدة) چنانكه صورته نفخة اولى نفخ اولنده كه
انك عندنده عالم خراب اولور (وجلت الارض والجبال فكدت اذكة
واحدة) وارض وجبال اوزرنده اشياؤه مكلنندن قلع ورفع اولنوب
برى برينه اورلغله كليسى هبا قيلنه ويا ايكيسى بسط ايديلوب ارض واحده
مستويه قيلنه (فيومئذ وقعت الواقعة) اويله اولسه اول حينده
قيامت دخى قائم اوله (وانشقت السماء فهى يومئذ واهية والملاك على
ارجائها) وملائكه سمائك جوانبنده اولديغى حالده سماء منشق اوله
مع ذلك اول ضعيفه متمزقه در اول حال اوزره قاله لرتاشول وقته دكين كه
انلر رب تعالىنك امريله نزول ايدوب ارضى احاطه ايدلر (ويحمل
عرش ربك فوقهم يومئذ ثمانية) واول كونده سمائك انشقاقيله شول
جوانبنده كى ملائك فوقنده ويا خود رؤس خلائقك فوقنده رب تعالىنك
عرشنى سكز ملك كوتوره * روايت اولنديكه حله عرش اشبو كونده
درتدر يوم قيامته درت ايله دخى تايد اولنوب سكز قيلنور * ديتلديكه
انلكه مراد سكز صنف ملائكه در كه عددلرين الله تعالىدن غيرى
احد بيلز (يومئذ تعرضون لا تخفى منكم خافية) اول كونده سز حساب
وقصاص ايچون الله تعالى به عرض اولنور سز اعمالكزدرن هيچ بر مستوره
اكا خفى اولمز (فاما من اوتى كتابه بينه فيقول هاؤم اقرؤا كتابه)

اما اول كسه كه كتاب اعمالی صاغنه ویریه اكا سرورندن بر جاعته خطاب ایدوب كلك كتابی اوقویك ديه (انی ظننت انی ملاق حسابیه) بن دنیاده تیقن ایتشدمكه بن يوم قیامتده حساب اولیسیرین (فهو فی عیثه راضیه) ایدی اول عیش مرضیده در (فی جنة عالیة) شول جنتده كه در جاتی مرتفعه در و یاخود بناری وقصرلری و اغاچلری مرتفعه در (قطوفها دانیة) كه انك ثماری قریبه در قائم وقاعد اكا ایریشور (كلوا واشربوا هنیئا بما اسلفتم فی الايام الخالیة) وانلره دینوركه اول جنتك ثمار و شرابندن اكل و شرب ایدك داء و المسز حلال و طیب اولدیغی حالده شول دنیاده یکن ایامده ایشلدیككز اعمال صالحه سیبیله و یاخود ایام صیامكزده لوجه الله اكل و شربی ترككز سیبیله (واما من اوتی كتابه بشماله) اما اول كسه كه كتابی وراء ظهرندن ویریه (فیقول یالیتنی لم اوت كتابیه) ديه كه نولیدی بكا كتابم ویرلمیدی (ولم ادر ما حسابیه) و حسابم نه شیء ایدیكن بیلمیدم (یا لیتها كانت القاضیه) نولیدی شول موت كه بن اكا ایرمشدم بنم امرمی قطع ایتش اولوب من بعد بعث اولنمیدم و یا نولیدی حیات دنیا بكا موت اولوب حی خلق اولنمیدم (ما اغنی عنی مالیه) مالم بكا نه شیء مفید اولدی و یا مالم بكا برشیئی مفید اولدی (هلك عنی سلطانیة) ملكم وناس اوزره قوت و حجتله تسلطم زائل اولدی (خذوه فغلوه) الله تعالی نارخازنلرینه ديه كه انی اخذ ایدوب ایکی اللرینی بویننه تیمورلكز (ثم الجحیم صلوه) بعده انی نار جحیمه ادخال ایلکز (ثم فی سلسلة ذرعهها سبعون ذراعا فاسلکوه) بعده انی برزنجیره اورك كه طولی یتش ذراعدر اول انك دبرندن قونوب منخرندن چیقاریله (انه كان لا یؤمن بالله العظیم) زیرا كه اول الله تعالی یه ایمان كثورمزدی (ولا یحض علی طعام المسکین) دنیاده اول فقیره طعام ویرمزدی و غیره اكا تحریض ایتزدی ایدی اكا تحریضك تركی بومشابه ده اولیحق انك فعلنی ترك ایدن نه مرتبه ده اولور * اشبو دلیلدر كه كفار فروعله ده مكلف اوله لر اشبو ایکی امری ذكرله تخصیصده اشارت واردركه اقبح عقائد كفر بالله اوله و اشنع ردائل بخل و قسوت قلب اوله (فلیس له الیوم هاهنا جیم) ایدی اول كوندنه انكچون بر قریب اولز كه انی عذابندن حایت ایده (ولا طعام الا من غسلین) و طعامی دكل الاغسلیندر كه اول اهل نار

(قروحنك)

قروحنك غساله سی وجسدلرینك عروق و صدیدیدر * دینلدیكه اول بر شجردر انی اهل نار اكل ایدر (لایأكله الا الخاطئون) انی اكل ایتز الا انلركه قرآنه كفرله خاطئدر (فلا اقمم بما تبصرون و ما لاتبصرون) قسم ایدرین هرشیئله كیم اجسام و اشباحندن سز انی كورر سز ودخی هرشیئله كیم ارواح و غیریدن سز انی كورمز سز و بالجمله اقسامده هر موجودی احاطه ایدی زیر كه موجودات ایدیدن خالی دكل یا كورینور و یا كورنمزد (انه لقول رسول كرم) اول قرآن الله تعالیدن تبلیغ ایدر بر رسولك قولیدركه اول الله تعالی عندنده كرمیدركه انكله مراد محمد صلی الله تعالی علیه و سلم و یا جبریل علیه السلامدر (وما هو بقول شاعر قلیلا ماتوا منون) اول قرآن شاعر قولی دكلدر كه فرط فسادكزدن سز انی تصدیق ایدر سز حالبوكه انك صدق ظاهر اولویدر (ولا بقول كاهن قلیلا ماتد كرون) و اول عراف كاذب قولی دخی دكلدر كه سز انی تذكر ایدر سز زیرا كه قرآنك شعره عدم مشابهنی ظاهر در انی انكار ایتز مكر كه معاند اوله اما كه كهانت انك خلافتی ملاسدر كه احوال رسولی و معانی قرآنی تذكره موقوفدر كه اول طریق كهنه یه منافیهدر (تنزیل من رب العالمین) بلكه اول مخلوقانك ربی جل شانهنك جبریل علیه السلام لسانیه تنزیلیدر (ولو تقول علينا بعض الاقاویل) اكر محمد علیه السلام ذات نفسندن بعض اقوالی اختلاق ایدوب بزه اسناد ایتسه (لاخذنا منه بالیمین) بزا انی اذلال ایچون یمینله و یا قوت قهرله اخذ ایدردك (ثم لقطعنا منه الوتین) بعده بزانك نیاط قلبنی قطع ایدردك عنقنی ضربله * اشبو حال اوزره قطع اهلاکی تصویردر كه انی ملوك غضب ایتدكری كیمسه لره ایدرلر * دینلدیكه و تین بر عرقدركه ظهرده جاری اولوب قلبه متصل اولور اول كسیلچك صاحبی فوت اولور (فامنكم من احد عنه حاجزین) سزدن بر كیمسه یوقدر كه محمد علیه السلامدن عقوبتمزی منع ایده یعنی محمد علیه السلام سزچون كذبی تكلف ایدر دكلدر زیرا بیلور كه انی تكلف ایدرسه بزا اكا عقاب ایدرز بعده اندن عقابمزی دفع ایدر احد بولنمز (وانه لتذكرة للنفین) و اول قرآن متقیله موعظه در كه انكله تفعلنورلر (وانا لنعلم ان منكم مكذبین) یا ناس بزیلورز كه سزدن قرآنه مصدقین اولدیغی كبی مكذبین دخی واردركه تكذیبلی اوزره جزا ایدرز (وانه

لحسرة على الكافرين) واول قرآن كافرله حسرتدر چنانكه يوم قيامته
انى تصديق ايندله ويريلن ثوابي كورهلر (وانه لحق اليقين) واول
قرآن يقينك حقيقت ومحضيدركه انى تكلم ايند كذبه تمكين اولمز
(فسبح باسم ربك العظيم) ايمدى رب تعالينك اسم عظيمى تسبيح ايتكه
انككه انك اوزره تقوله رضادن انى تنزيه وسكاوحى ايتديكى شىء اوزره
اكا شكر ايدنه سن

سورة المعارج وهى اربع واربعون آية مكية

بسم الله الرحمن الرحيم

(سأل سائل بعذاب واقع) يوم قيامته نزول ايدنه جك عذابى برداعى
استدما ايتديكه اول نضر بن الحارثدر ويا ابو جهلددر وياخود پيغمبريمز
صلى الله تعالى عليه وسلمدر كفاره عذاب نزولنى استعجال ايتدى (للكافرين
ليس له دافع) كه اول عذاب كافرله مختصدر انلردن انى دفع ايدريوقدر
(من الله ذى المعارج) اول عذاب انلره الله تعاليندر اكا ارادتى تعلق
ايتديكيچون كه اول مصاعد صاحبيدر كه كلم طيب وعمل صالح اكا صعود
ايدر ويا اكا مؤمنلر سلوكارنده ترقى ايدرلر وياخود مراد مراتب ملائكه
وياسمواتدر كه ملائكه اكا عروج ايدر (تعرج الملائكة والروح اليه في يوم
كان مقداره خمسين الف سنة) ارض سابعه نك اسفلندن منتهاي
امره دكين ملائكه وجبريل ويا روح ميت صعود ايدر دينلديكه يعنى سدره
المنتهايه وياعرشه دكين شول كونده كه انك مقدارى دنيا ييلارندن الى بيك
ييلجهدر * دينلديكه اكر بنى آدم دنيا دن عرشه يوريوكيدر اولسه اكا
الى بيك ييلده ايرردى * دينلديكه انككه مراد يوم قيامتدر كه طولى
الى بيك ييلجه اولور ابو سعيد الخدرى رضى الله تعالى عنه ايدر پيغمبريمز
عليه السلامه بو آيت ذكر اولنوب يا رسول الله يوم قيامت عجب طويل
اولور دينلده ديديكه اول الله تعالى حقيقچونكه نفسم انك ينده در اول
كون مؤمنه دنيا در صلاة مكتوبه بي اداسندن اخف اولور * دينلديكه
انك معناسى اكر اول كونده عبادك حسابى الله تعالينك غيرى به توليه اولسه
الى بيك ييلده انجق اندن فارغ اوليدى لكن الله تعالى انى ايام دنيا دن
نصف يوم دكلو زمانده اندن فارغ اوله كلبي ايدر يعنى اول حسابيه ملائكه

(وانس)

وانس وجن توليه اولنسه لر الى بيك ييلده اندن فارغ اولنلردى لكن
بن نهاردن برساعتده اول امردن فارغ اولورين * دينلديكه اول يوم
قيامتدر كه انده الى موطن اولوب هر برنده بيكريل حبس اولنور (فاصبر
صبرا جيلا) ايمدى يا محمد انلرك عذاب سؤاليه اولان استهزاء واذالينه
صبر ايت بر صبرله كيم اكا استعجال واضطراب قلب شوب ايتمه (انهم يرونه
بعيدا ونراه قريبا) انلر بعثى انكارلردن عذابى ويايوم قيامتى امكاندن
بعيد كورلر اماكه بزاتى امكانه وياوقوعه قريب كوررز (يوم تكون السماء
كالهل) اول كونده سماء زيت درديسى كبي ويا اريمش كوش كبي اولور
(وتكون الجبال كالعهن) وجبال ايسه درلو الواتله بويانمش صوف
كبي اولور چنانكه طاغيلوب هوايه كيده (ولايسئل جيم جيم) اول
كونده هيچ بر قريب قريبنه حالندن سؤال ايتمز زيراكه هر برى كندى
حاله مشغول اولور (يبصرونهم) اقربا برى برلرين كوره لر يوم قيامته
انس وجندن هر مخلوق صاحبك نصب عيني اولور اوليه اولسه كشتى
انده اب واخ وذاقرا به لرين كورر لكن نفسلرينه اشتغاللردن برى برلرينه
سؤال وتكلمدن امتناع ايدرلر * ابن عباس رضى الله عنهما ايدر
نهاردن برساعتده برى برلريله تعارف ايدرلر بعده تعارفلى كيدر *
دينلديكه انده مؤمن بياض وجهيله وكافرلر سواد وجهيله بيلنور (يود المجرم
لو يفتدى من عذاب يومئذ بنيه وصاحبه واخيه وفصيلته التى تؤويه
ومن فى الارض جميعا ثم نجيه) كافرلر يوم قيامتك عذابن كوردكارنده
تمنى ايدنه لر كيم نوليدى اوغلارين وخاتونن وقرنداشن وعشيرتن كه نسبده
وشدائد عندنده انلر انى كندويه ضم ايدرلر وير يوزنده اولان انس وجن
وخلائقتك جميعن فدا ايديدى تك كندوبى اول عذابدن قورتاريندى
(كلا انها لظى) ايمدى انك تمنى ايتديكى كبي اولمز اول نار يالكودر
(نزاعة للشوى) كه اول انك رأسى واطراف جلدنى اجساددن قلع ايدر
بعده اول قلع اولنان ينه اولكى هيئته كرارا ومرارا عودت ايدر اول
حالت ايدا اندن زائل اولمز (تدعو من ادبر وتولى) نار كندويه دعوت ايدنه
اول كسه بي كه ايمانندن ادبار وطاعتدن تولى ايدوبدر يا كافر ويا منافق بكا
كل ديه كلكارنده انلرى طائر ك دانه ديو شرمى كبي ديوشره (وجع
فاوى) كه اول مالى جمع ايدوب وعايه قومشدى و اكا حرصله وطول

امل اليه انده كي حق اللهى منع ايتشيدى (ان الانسان خلق هلوعا)
 انسان حرصده شديد وصبرده قليل خلق اولندى (اذامسه الشر جزوعا)
 چقان اكا ضرر ايريشسه جزعده اكاثر ايدر (واذا مسه الخير منوعا)
 وچقان اكا خير وسعت ايريشسه انى امسا كده مبالغه ايدر اشبو اوصاف
 ثلاثه احوال مقدره ويا محققه در زيرا كه انسان اول طبائع اوزره مجبولدر
 (الا المصلين) الا جنس انساندن شونلر دكلركه اهل صلاتدرلر
 (الذين هم على صلاتهم دائمون) كه انلر صلاته مداوملردر اوقاتن
 رعايت ايدرلر انلرى اندن هيچ برشان اشغال ايتمز (والذين في اموالهم
 حق معلوم للسائل والمحروم) كه انلرك مالارنده زكات وصدقات موظفدن
 حق معلوم واردر شول فقير ايچونكه سؤال ايدر ودخى اولكه سؤال
 ايتديكندن غنى ظن اولنوب اندن محروم قيلنور (والذين يصدقون
 بيوم الدين) ويوم جزايه اعماللريله تصديق ايدرلر كه مشوبه اخرويه يه
 طمعله نفسلرين اتعاب وماللرين صرف ايدرلر (والذين هم من عذاب
 ربهم مشفقون) وشونلر كه رب تعالينك عذابندن خوف ايدرلر
 (ان عذاب ربهم غير مأمون) زيرا هيچ كسه يه لايق اولمركه انك عذابندن
 امن اوزره اوله اكرچه طاعتده مبالغه ايدرسده (والذين هم لفروجهم
 حافظون الا على ازواجهم او ما ملكت ايماهم فانهم غير ملومين) وشونلر كه
 فرجلريني زوجهلرينك ومالك اولدقلى جاريه لرينك غيريدن حفظ
 ايدرلر اما كه زوجهلرينه وجاريه لرينه اتيانده لوم اولنملر چقانكه ايتانلرى
 مائى مشروعه اوله كه اول انلره حلالدر (فن ابتغى وراء ذلك فاولئك
 هم العادون) اول كسه كه اشبو مذكورك ورائن طلب ايده اول وصفلو
 كسلر حلالدن حرامه متجاوزلردر (والذين هم لاماناتهم وعهدهم راعون)
 وشونلر كه اموال واسرا دن اتمان اولدقلى شيئه رعايت ايدرلر وحق تعالى
 وكرك عباد جهنده اولان معاهدهلرينه وفا ايدرلر (والذين هم بشهاداتهم
 قائمون) وشونلر كه شهادتلرينه حقله قائم اولورلر يوخسه تغير وكتم
 ايتملر (والذين هم على صلاتهم يحافظون) وشونلر كه نمازلرينه حفظ
 اركان وتكميل سننله اوقات مستحبه سنده ادايه مداومت ايدرلر
 (اولئك في جنات مكرمون) ايمدى اشبو صفات اهلى كسلر جنترلده الله تعالىدن
 تحف وهدايا اليه مكرملردر (فيا الذين كفروا قلبك مضطرب) كافرله

(نولديكه)

نولديكه حولكده اوتوروب سندن يكا يه نظر عداوتله نظر ايدرلر يوخسه
 سندن ايشندكلى كلامله انتفاعى مراد ايتملر (عن اليمين وعن الشمال
 عزين) سنك يمينكده وشمالكده بلوك بلوك اوتورلر (ايطمع كل امرئ
 منهم ان يدخل جنة نعيم) انلرك هربرى طمع ايدرميكه مؤمنلر كى جنت
 نعيمه كيرلر (كلا) ايمدى حال انلرك زعم ايتديكى منوال اوزره دكلدر
 (انا خلقناهم مما يعلمون) بز انلرى بيلدكلى شيئدن خلق ايتدككه اول
 نطفه قذره در كيم عالم قدسه مناسب اولمركه اول كسه كه ايمان وطاعتله
 استكمال واخلاق ملكيه اليه تخلق ايتمه اكا دخوله مستعد اولمركه وياخود
 سز بيلديكلكز شئ اجليچون خلق اولنوب سز اول علم وعمل اليه نفسى
 تكميلدر اولكه انى تكميل ايتمه اول كامللر منازلنه نائل اولمركه (فلا اقسم
 برب المشارق والمغارب انا لقادرون على ان نبدل خيرا منهم وما نحن
 بمسبوقين) ايمدى بن مشارق ومغارب ربي جل شاناه يه اقسام ايدرلر كه
 بز قادرز كه انلرى اهلاك ايدوب انلردن افضل خلق انلره خلف قبله وز
 وياخود محمده انلردن خيرلوي يعنى انصارى ويره وز حالبو كه بز اراده ايتديكلمز
 شئ ايشلكدن عاجز ومغلوب دكلرمز (فذرهم يخوضوا ويلعبوا حتى يلاقوا
 يومهم الذى يوعدون) ايمدى مكذبينى ترك ايتكه باطللرينه مشغول اولوب
 دنيا لرنده لعب ايتسونلر تا كه عذابله وعد اولندقلى كونه ملاقات ايدرلر
 (يوم نخرجون من الاجداث سراعا كما نهم الى نصب يوفضون) قبوردن چيقملر
 داعى يه ويا محشره سرعت ايدر اولدقلى حالده اول كونده كانه شول
 عبادتچون نصب اولنش شيئه سرعت ايديشورلر كه اكا عبادت ايدرلر تكميم
 دنيا ده انجملين ايدرلر دى (خاشعة ابصارهم ترهقهم ذلة) انلرك ندامت وحسرتدن
 كوزلرى خاشعه اولديغى حالده ذل وحقارت انلرى قاپليه (ذلك اليوم الذى كانوا
 يوعدون) ودينله اشبو شول كوندركه انده عذاب اولنمغه دنيا ده وعد اولنديلر دى

سورة نوح وهى سبع اوثمان وعشرون آية مكية

بسم الله الرحمن الرحيم

(انا ارسلنا نوحا الى قومه ان انذر قومك من قبل ان ياتيهم عذاب اليم)
 بز نوح عليه السلامى قومنه ارسال ايدوب ديدك كه يانوح قومكى نارله
 تخويف ايتكه الله تعالى يه ايمان كتوروب اكا بر شئ اشراك ايتمه لر انلره
 طوفان وغرق عذابى كمردن اول (قال يا قوم انى لكم نذير مبين) اول انلره

دیدیکه بن سزه نذرین اندازی سزیدیکه کز لسانله تعریف ایدرین (ان اعبدوا الله واتقوه واطيعون) که الله تعالی نیک و حدانیتنه اقرار ایدوب اکا عصیاندن صفاقنک وسزه امر ایتدیکمه اطاعت ایدک (یغفرلکم من ذنوبکم) تا که بعض ذنوبکزی مغفرت ایده که اول سبق ایدندر که اسلام انی جب ایدر (ویؤخرکم الی اجل مسمى ان اجل الله اذا جاء لا یؤخر لوکنتم تعلمون) وسزی صحت ووسعت رزقله اجل مسمايه تأخیر ایده که اول ایمان و طاعت شرطیله سزچگون تقدیر اولنان اجلاک اقصا سیدر زیرا چنان الله تعالی نیک سزی تعذیبی وقتی ایریشه تأخیر اولنزا کرانی بیلورسکز ایمانه کلورسز (قال رب انی دعوت قومی لیلا ونهارا فلم یزد هم دعائی الا فرارا) نوح علیه السلام دیدیکه یارب بن قوممی لیل ونهارده علی الدوام ایمانه دعوت ایتدم بنم دعوتهم ایسه انلرک فرارین آرتوردی (وانی کما دعوتهم لتغفر لهم جعلوا اصابعهم فی آذانهم واستغشوا ثیابهم واصروا واستکبروا استکبارا) هر بار که بن انلری ایمانه دعوت ایتدمسه که سن انلری مغفرت ایدم سن بارمقلین قولاقلرینه طوتدیلر که دعوتمی ایشتمیهلر و ثوبلریله باشلرک بوریدیلر که دعوتمی ایشتمد کلرندن بشقه یوزیمی دخی کورمیهلر و کفر وعصیانلری اوزره اصرار ایدوب بکا اتباعدن استکبار ایتدیلر (ثم انی دعوتهم جهارا ثم انی اعلنت لهم واسررت لهم اسراراً) بعده بن انلری علانیه ده ایمانه دعوت ایتدم بعده اعلای صوتله دعوت ایتدم وبربرر چاغروب انلره سرده سویلدم (فقلت استغفروا ربکم انه کان عفارا) و دیدیکه کفردن توبه ایدوب ربکز جل شانده دن مغفرت دیدیکز زیرا که اول شرک ومعاصیدن توبه ایدنه مغفرتی بلیغدر * روایت اولندیکه نوح علیه السلامی قومی تکذیب ایدیچک الله تعالی انلردن یغموری حبس ایتدی و قرق ییل نسالرین عقیم ایتدی حتی که اموال و مواشیلری اهلاک اولوب کتدی اول بلیه اوزر لرندن دفع اولسون ایچون انلره استغفارله امر ایتدی عمر رضی الله تعالی عنه بو آیتی استدلال ایله استسقا ده استغفار اوزره زیاده ایتزدی (یرسل السماء علیکم مدرارا) تا که اول سزه یغموره احتیاج اولدیغکز جه ایندره (ویمدکم باموال و بنین) وسزه کثرت اموال و اولاد ایله امداد ایده (ویجعل لکم جنات ویجعل لکم انهارا) وسزه میوه لی بوستانلر و یره و اول بوستانلره ایرمقلر آقیده (مالکم لا ترجون لله وقارا) سزه نولدیکه الله تعالی به ایمانه

(کندیدکز)

کندیدکز ایچون دار ثوابده تعظیم تأمل ایتزسز و یاخود الله تعالی نیک عظمتن اعتقاد ایتزسز که اکا مخالفتدن خوف ایده سز (وقد خلقکم اطوارا) حالبوکه اول سزی حالدن حاله تحویل اوزره خلق ایتدیکه اول نطفه بعده علقه بعده مضغه حتی که خلقتکزی تمام ایتدی یعنی سزه نولدیکه اول الله تعالی به ایمان کتورمزسز و الحال سزک بو حالکز ایمان ایجاب ایدر (ألَمْ تروا کیف خلق الله سبع سموات طباقاً) کورمز میسز که الله تعالی یدی سماپی نیچه بری برینک فوقنده طبقه لر ایتدی (وجعل القمر فیهن نورا) و قری سماء دنیاده ایکن انی انده وسائر سمواتده نور قیلدی (وجعل الشمس سراجاً) و کونشی ضیادار چراغ قیلدیکه انکله اشیاء کوریلور الله تعالی انی چراغه تمثیل ایتدی زیرا اول وجه ارضدن ظلمت لیلی کیدرر چراغک اطرافنده کی ظلمتی کیدرمسی کی (والله أنبتکم من الارض نباتاً) الله تعالی سزی تراب ارضدن خلق ایتدیکه آدمی اندن وسزی آدمدن خلق ایتدی (ثم یعبدکم فیها ویخرجکم اخراجاً) و موتکزدن صکره سزی کیرو ارضه دوندر و یوم قیامتده سزی ارضدن چیقارر (والله جعل لکم الارض بساطاً لتسلكوا منها سبلاً فجاجاً) الله تعالی سزچگون ارضی مبسوطة قیلدیکه اوزرنده ثقلب ایده سز تا که اندن طرق واسعه اخذ ایدوب حاجتکزه کیده سز (قال نوح رب انهم عصونی واتبعوا من لم یزده ماله وولده الا خسار) نوح علیه السلام دیدیکه یارب قوم توحیدله امرمه بکا عصیان ایتدیلر فقراری شول کسه لره اتباع ایتدیلر که مال و ولدلری آخرنده انلرک خسارتن آرتوردیکه انلر اغنیاء ورؤسالریدر (ومکروا مکراً کباراً) وغایتده کبیر مکر ایتدیلر که الله تعالی به افترا و رسولنی تکذیبدر و یاخود رؤسالرینک اتباعلرین نوحه ایماندن منعلری و قتلنه تحریشلیدر (وقالوا لاتدرن آلهتکم) ورؤساء اتباعلرینه دیدیلر که آلهکزه عبادتی ترک ایتکز (ولاتدرن ودا ولاسواما ولا یغوث و یعوق و نسر) خصوصاً که ودا و سواع و یغوث و یعوق و نسر نام بش آلهکز عبادتن ترک ایتکز اشبونلر قوم صالحین اسمائی ایدی آدم و نوح بنشده یکمشلردی وفات ایتدکلرند اتباعلری تبرکا انلرک صورتلرین تصویر ایتدیلر بعده مرور ازمانله انلری معبود ایتدیلر بعده اول صورتلر عربیه انتقال ایتدی و تکلیک و سواع همدانک و یغوث مدجک

(۱۹)

بع

ويعوق مرادك ونسر جبرك ایدی (وقد اضلوا كثيرا ولا تزد الظالمين الا ضلالا) اشبو اصنام ویا رؤساء ناسدن کثیری اضلال ایتدیلر ایددی یارب ظالمک هلاکنی ارتورغل (مما خطیئاتهم اغرقوا فادخلوا نارا) انلر خطیئه لری اجلندن طوفانله غرق اولنوب عقبنده ناره ادخال اولندیلرکه انکله مراد عذاب قبر ویا عذاب آخرتدر (فلم یجدوا لهم من دون الله انصارا) اویله اولسه انلر کندیلر ایچون اعوان بولمیلرکه عذاب اللهدن انلری منع ایدلر (وقال نوح رب لا تذر علی الارض من الکافرین دیارا) نوح علیه السلام دیدیکه یارب یر یوزنده کافرلردن دور ایدر کلور کیدر برکسه ترک ایتکل (انک ان تذرهم یضلوا عبادک ولا یلدوا الا فاجرا کفارا) یارب اگر سن انلری ترک ایدرسک عبادکی توحیددن کفره دوندرلر وانلردن وجوده کلن اولاد فاجر وکفرده بلیغ اولورلر * روایت اولندیکه نوح قومندن برر جل اوغلنک الن آلوب ونوح علیه السلامک قنه کلوب ونوحی کوستروب دیردی اشبو قوجهدن صاقغل که کذاذر بابام دخی اشبو منوال اوزره بنی اندن صاقندر مشدی اویله اولسه کفر و طغیان اوزره بیوکلی کیدر کوچکلی انلرک یرین طوتردی * دینلدیکه نوح علیه السلام بوقولی شول حینده دیدیکه الله تعالی انلرک رجالی اصلاندن ونسائی ارحامندن هر مؤمنی چیقاردی وعذاب نزولندن قرق یسل اول ارحام نسائی عقیم ایدوب اصلاب رجالی قورتدی ونوحه خبر ویردیکه انلر ایمانه کلزلر ومؤمن اولاد دخی طوغرملر اویله اولسه نوح علیه السلام دخی انلرک هلاکنه دما ایدوب انک دماسیله جیعی هلاک اولدیلر اول وقتده ارالنده هیچ صبی یوغیدی (رب اغفر لی ولوالدی) یارب بنی مغفرت ایت وبابام ملک بن متوشلخی واتام شخایت انوشی (ولمن دخل بیتی مؤمنا) وهرکسه بنی که مؤمن اولدیغی حالده بنم منزله ویا مسجدمه ویا سفینهده دخول ایده (والمؤمنین والمؤمنات) ودخی یوم قیامته دکین ایمانه کلور رجال ونسائی (ولا تزد الظالمین الاتبارا) وظالمک هلاک ودمارین زیاده ایلکل الله تعالی دخی اکا اجابت ایدوب انلری هلاک ایتدی

سورة الجن وهي ثمان وعشرون آية مكية

بسم الله الرحمن الرحيم

(قل اوحی الی انه استمع نفر من الجن) یا محمد دیکل که رب تعالیدن بکا و حی

(اولندیکه)

اولندیکه نصیبین جنندن طقوز ویا یدی کسه بدن قرآن اوقودیغ استماع ایتدیلر شول حینده که رسول الله صلی الله علیه وسلم تهماده بطن نخلهیه داخل اولوب اصحابیله صباح نمازین قیلورکن ذکر اولنان جنیلر اکا اوغرایوب اوقودیغن دکلدیلر اشبودر که بزمله سماء خبری پیننه حائل اولوبدر دیدیلر حالبوکه قرآن نزولندن اول سماء خبرین استماعندن منع اولنزلردی اندن قوملرینه رجوع ایتدیلر (فقالوا انا سمعنا قرآنا عجبا یهدی الی الرشدا فامناه ولن نشرک ربنا احدا) دیدیلر که بزبر قرآن بدیع ایشندک که حسن نظمیده ورقت معناسنده کلام ناسه مباندر اول حق وصوابه هدایت ایدر اویله اولسه بزاول قرآنی تصدیق ایتدک من بعد رب تعالی به خلقندن برشی اشراک ایتیز زیرا انک وحدانیته دلائل قاطعه ناطقه در (وانه تعالی جد ربنا ما اتخذ صاحبة ولا ولدا) ودخی تصدیق ایتدک رب تعالینک جلال و قدرتی محدثاندن تنزه وارتفاع ایتدی شول حیثیتدیکه کفارک زعم ایتدیکی کبی صاحبه وولد اتخاذا ایتدی (وانه کان یقول سفیهنا علی الله شیططا) ویزم سفیهمز ابلیس ویا مرده جن الله تعالی به صاحبه وولد نسبتیله کذب وافترا ایدرلر (وانا ظننا ان لن نقول الانس والجن علی الله کذبا) وبزظن ایدرز که انس وجندن هیچ احد الله تعالی به کذب وافترا ایدر اولیه (وانه کان رجال من الانس یعوذون برجال من الجن فزادوهم رهقا) الله تعالی ایدرکه انسدن بعض رجال جنندن بعض رجاله استعاذه ایتلریله اول جنک کبر وعتون ارتورلردی * روایت اولندیکه زمان جاهلیته عربدن بر رجل مسافرت ایدوب کیجه برارض قفرده قالسه اشبو وادینک جنیلری سفهایسک شرتندن سیدلرینه صغورین دیردی انکله اول کیجه انلرک امن وجوارنده اولوردی حالبوکه انسیلرک اول قوللرین ایشد کلرنده انس اوزره استکبار واقنخار ایدرلردی واستعاذه اولندقلرچون اضلا لارین آرتورلردی (وانهم ظنوا کما ظنتم ان لن یبعث الله احدا) الله تعالی کفارک خطاب ایدوب دیدیکه جنیلر دخی سنرک کبی ظن ایتدیلر که الله تعالی هیچ کسه بی موتند نصکره بعث ایتیه اویله اولسه سنرک کبی انلر دخی کافر اولدیلر (وانا لمسننا السماء فوجدناها ملئت حرسا شديدا وشهبا) ینه اول جنیلر دیدیلر که بز سماء دنیا به استراق سمع ایچون بلوغ طلب ایتدی کمزده بزانی ملائکه دن قوی حارسلر و ناردن متولد شهابلرله مملو حراست اولنور

بولدق (وانا كنا نقعد منها مقاعد للسمع فن يستمع الان يجده شهابا رصدا)
محمد عليه السلام بعثتدن اول بز سماندن حراس وشهبندن خاليه
مقاعده ملائكه نك مقالاتنى استماع ايچون اوتورردق شمدى ايسه مقاعدك
كليسى حراسله طولوبدر جنيلردن اولكه انلردن استماع قصدن ايد
كنديچون راصد شهاب بولور (وانا لاندرى اشراريد بن فى الارض
ام اراد بهم ربههم رشدا) بيلرز كه سمانك استراق سمعدن حراست اولئسيه
ارض اهلنه شرمى اراده اولندى يوخسه رب تعالى انلره خيرى اراده
ايتدى (وانا منا الصالحون و منادون ذلك كنا طرئق قددا) و بزدن قوم
واردر كه مؤمنون ابرارد و بر قوم دخی انلردن دوندر فرق متفرقه اولمشز
قدريه و مرجئه و رافضيه و مجسمه و غيرى كى (وانا ظننا ان لن نعجز الله
فى الارض ولن نعجزه هربا) و بز يلوب تيقتن ايتدك كه بر يوزنده قنده اولسه وز
الله تعالى بزه اراده ايتديكى امرى انفاذدن و اول بزى طلب ايتسه هر برى
انك امرى ادرا كندن عاجز ايتز (وانا لما سمعنا الهدى آمنا به فن يؤمن بربه
فلا يخاف بخسا ولا رهقا) بز محمد عليه السلام او قودينغى قرآنى
ايشيديجك اكا ايمان كتوردك اول كسه كه رب تعالىنك وحدانيتنه ايمان
كتوره اول خوف ايتز كه عملنك اجرندن نقص ايديله و يا عملنك جزاسى
كيدريله زيرا اول حقى نقص و يا ظلمى ارهاق ايتدى زيرا كه قرآنك حقى
اندن اجتنابدر (وانا منا المسلمون و منا القاسطون) و بزدن بر قوم مسلم
و موحدلردر و بر قوم ايسه توحيددن عدول ايديجيلردر (فن اسلم فاولئك
تحرّوا رشدا) اول كسه كه توحيدده اخلاص ايدى اول حالو كسه لرشد عظيم
طلب ايتديلر كه اول انلرى دار الثوابه ايركورر (واما القاسطون فكانوا
لجهنم حطبيا) اما انلر كه توحيد وطريق حقدن عدول ايتديلر انلر جهنمه
وقود اولديلر اشبو محله جنك كلامى تمام اولدى (وان لو استقاموا على
الطريقة لاسقيناهم ماء غدقا) ودخى بكا و حى اولنديكه اكر جن و يا انس
ويا ايكيلى بيله طريقه اسلام و توحيد اوزره استقامت ايتسه لر بز انلره مال
كثير و برر وعيش واسع اوزره انلرى دنيايه تعيش ايتديرردك (لنفثهم فيه)
تا كه انلرى اختبار ايدى وز كه اكا نيچه شكر ايدرلر * دينديكه انك معناسى اكر
انلر كفرلى اوزره اقامت ايتسه لر بز انلره مال كثير و برر و وسعت ايركورردك
تا كه انكه مفتون اولوب كفرلى اوزره عذاب ايدى وز (ومن يعرض عن

(ذكر)

ذكر بيه يسلكه عذابا صعدا) اول كسه كه رب تعالىنك عبادت و يا موعظه
ويا وحيدندن اعراض ايدى اول انى عذاب شاقه تسليك ايدر كه انك اكا
طاقتى اولز (وان المساجد لله فلا تدعوا مع الله احدا) و مساجد الله تعالى به
مختصه درانده انك غيرى به عبادت ايتكز * دينديكه مساجدله مراد ارضك
كليسىدر كه اول پيغمبر يمز صلى الله عليه وسلم مسجد قلوبدر و يا مسجد
حرامدر كه مساجدك قبله سيدر و يا مواضع سجود در و يا اعضاء موجود در كه
اول جبهه و ايكى يد و ايكى ركه و ايكى قدمدر (وانه لما قام عبد الله يدعوه
كادوا يكونون عليه لبدا) وقتا كه حضرت محمد صلى الله عليه وسلم عبد الله در
بطن نخله ده نمازه طوردى جنيلر انك عبادتن كوروب قراءتن ايشند كلردن
حرص و عجله ايله اوزرينه ازدحام ايتديلر قريب اولديلر كه جاعت ملتندن
اولدر و يا انس و جن قريب اولديلر كه شر كلرينه مخالف اولان انك امرينى
ابطال ايدى لر لكن الله تعالى اكا اعداسى اوزره نصرت ايدوب حتى كه انى
اتمام ايتدى (قل انما ادعوربى ولا اشرك به احدا) يا محمد كفار مكه به
ديكل كه بن انجق رب تعالى به عبادت ايدوب هيچ احدى اكا اشراك ايتزين
(قل انى لا املك لكم ضررا ولا رشدا) ديكل كه بن مالك دكلن كه سزه خذلان
ويا هدايت ايركورم زيدا اكا مالك دكل الا الله تعالىدر (قل انى لن يحيرنى
من الله احدون اجد من دونه ملتحدا) ديكل كه اكر بن الله تعالى به عصيان
ايدرسم بنى انك عذابندن قورتر احد اولز و بن اندن غيرى ملتجى بولزم
(الا بلاغ من الله و رسالاته) ضرر و نفعدن بنم يدمده برشى يوقدر مكر كه الله
تعالىدن تبليغ خبر اوله و يا خود الله تعالىدن زياده و نقصانسز تبليغ رسالت
اوله (ومن يعص الله و رسوله فان له نارا جهنم خالدين فيها ابدا) اول كسه كه
قرآن و توحيد امرنده الله تعالى به و رسوله عصيان ايدى انكچون نار جهنم
واردر انك اهلى اندم خالدين اولدقلى حالده ابدا اندن چيتمزلر (حتى اذا
راوا ما يوعدون فسيعلون من اضعف ناصرا و اقل عددا) حتى چسانكه
وعد اولندقلى دنيايه كوره لر وقع بدر كى و يا آخرنده كوره لر عذاب
نزولنده بيلسرلردر كه ناصرده اضعف و عددده اقل انلر ميدر يوخسه
مؤمنلرمى اشبو آيت نازل اولدى شول وقتن كه مشركلر پيغمبر يمز صلى الله
تعالى عليه وسلم مؤمنلردن انصارينى استضعاف و عددلرينى استقلال
ايتديلر و برى برلرله پيغمبر يمز عليه السلام اوزره عداوته تظاهره امهال

اولند قلرين كورديلر (قل ان ادرى اقريب ماتو عدون ام يجعل له ربى امدا) وقتا كه مشر كر پيغمبر عز عليه السلامه شول بزه وعدايتديك عذاب نوقت كاور بزه خبر ويرديد كلرنده بيورلديكه يا محمد سن انلره ديكل كه سزه عذاب نزول ايديسر ايدوكن بيلورم لكن نوقتده اوله جغن بيلزمكه اول قريبيدر يوخسه ربم جل شانه اني تاخير ايديسر ميدر (عالم الغيب فلا يظهر على غيبه احدا) اول الله تعالى غيبي بيلور علمي كندويه مخلص اولان غيبه هيچ احدى مطلع ايتز (الا من ارتضى من رسول) مكر كه رسولدن اختيار ايتديكي كسه يه ملك واسطه سيله غيبدن ديلديكي شيئي بيلديره تاكه اول انك نبوتنه معجزه اوله (فانه يسلك من بين يديه ومن خلفه رصدا) اويله اولسه الله تعالى اول رسولنك اوكنجه وارديجه ملائكه يوريدر كه اني شياطيندن حراست ايده لر تاكه قرآن اكا وحي اولنديغنده شياطين اني ايشتميه لر رسولك اني ناسه اخبارندن اول شياطين اني ناسه افشا ايتمه لر يوخسه انديانك سائر ناسدن امتيازي اولمزدى (ليعلم ان قد بلغوا رسالات ربهم) تاكه نبي موحى اليه بيله لر كه جبريل ايله ووحى ايله اكانازل اولان ملائكه رب تعالينك رسالاتنى زياده ونقصانسز كال اوزره كوندرلدكاري انديايه اير كورديلر وياخود وجودده الله تعالينك علمي اكا تعلق ايده * روايت اولندى هر نبي كه بعث اولندى الا اكا ملائكه مقارن اولديكه شياطين ملك صورتنه تشبيله اول نبي يي تغيردن حفظ ايده لر (واحاط بما لديهم) والله تعالى اول رسوللر عندنده اولان شيئي وجودده بيلدى اكرچه اكا هيچ برشي خفي دكل ايسه ده (واحصى كل شئ عددا) وخلق ايتديكي اشيايى احصا ايدوب عددن بيلدى انك علمندن هيچ برشي خفي اولمدي حتى مثاقيل ذره ايسه ده

سورة المزمل وهى عشرون آية مكية

بسم الله الرحمن الرحيم

(يا ايها المزمل) يا شول نبيكه ثيابه تلفف ايدر انكله مراد پيغمبر عز صلى الله تعالى عليه وسلمدر كه اول ابتداء وحيدة دهشتدن برمدته ووحى ايله انس ايدنجيه دكين ووحى كلكده ثيابه بورينوردى ويا عايشه رضى الله تعالى عنهانك اوزرينه اورتولى مرطك بقيه سنده بورلمش نماز قيلوردى اول فعلنى تحسين وجهى اوزره انكله خطاب اولندى وياخود اول كسيلان

(حالتى)

حالتى اولديغندن اني تهجين ايچون انكله خطاب اولندى (قم الليل الا قليلا) كچه ده نافله نمازه قائم اول ويا اكا مداومت ايت * دينديكه قيام ليل ابتداء اكا فرض ايدى الا ليلدن قليلى دكل (نصفه وانقص منه قليلا) نصف ليلدن اقلي قائم اول ويا ليلك نصفندن ثلثه دكين نقص ايت (اوزد عليه) ويا نصف اوزره ثلثانه دكين زياده ايت يعنى سن بخير سن ديلرسك ليلك نصفنى كاملا قائم اول ويا نصفندن ثلث اخيره دكين نقصله ويا نصفندن ثلثانه دكين قائم اول (ورتل القرآن ترتيلا) وقرآنى تبين حروف ووقار اوزره اوقو بر حيثيله كه سامع انك حروفن عده امكانى اوله (اناسلنى عليك قولا ثقيل) يا محمد اوزريكه قول ثقيل القايدر كه اول قرآندر انده تكاليف شافه واردر كه مكافيه ثقيدر خصوصاً پيغمبر عز صلى الله تعالى عليه وسلمه كيم اني تحمل وامتنه تحمیل ايدر ويا اول رزانت لفظى ومتانت معنا سيچون رصيندر ويا اني تأملده تصفيه سز وتجديد نظره افتقار ايچون ثقيدر ويا اول ميرانده ثقيدر ويا كفاره وفجاره ثقيدر ويا انك تلقينى ثقيدر * عائشه رضى الله عنها ايدر پيغمبر عز صلى الله تعالى عليه وسلمى كوردم اكا ووحى نازل اولديغنده مبارك آلندن ترلر دو كردى مع هذا بردك شدتى وقتنده ايدى (ان ناشئة الليل هى اشد وطأ واقوم قيلا) كچه نك شول ساعتكه نفس انده نومدنصكره مضجعندن عبادته قيام ايدر مصلى يه اول كوندز ساعتندن كلفه ده ويا ثبات قيامده ويا قلب ولسان مواطئه سنده ويا خضوع واخلاص موافقتنده اشددر وقراءته اصوب وقوله اصحدر زيرا كه اصوات انده ساكن اولور وبالجمله كچه ده اولان عبادت نشاطه اشد واخلاصه اتم وبركتى اكثر وثوابى ابلغدر (ان لك فى النهار سبحا طويلا) نهاده سنك حوايج واشغالكه تصرف وتقبلك واقبال وادبارك واردر ايمدى تهجده ملازم اولغل كه مناجات حق فراغ قلبى استدما ايدر (واذكر اسم ربك) وكچه ده وكوندزده ربك جل شانه نك ذكرينه مداومت ايت وذكر الله ايسه متساولدر هر شيئه كيم اول اني تذكر ايده تسبيح وتهليل وتحميد وصلاة وقراءت ودراستدن هر قنغيسى ايسه (وتبذل اليه تبتيلا) وعبادتله الله تعالى يه انقطاع ايت وانك غيريدن نفسكى تجريد ايت (رب المشرق والمغرب لا اله الا هو فاتخذه وكيلا) مشرق ومغرب ربى اول الله تعاليدر كه اندن غيرى اله يوقدر ايمدى جميع اموريكه اني وكيل

اتخاذ ایت (واصبر علی ما یقولون) و مشرکری تکذیب و اذا سنه صبر
 ایت (واهجروهم هجرا جمیلا) و اعتزال حسنله انلردن اعتزال ایت
 انلره مدارات ایت مکافاتی ترکله و امر لربنی الله تعالی به تفویضله (و ذرنی
 و المکذبین) سنی تکذیب ایدلرک امرینی بکا تفویض ایتکه بن انلره
 مکافی اولورین (اولی النعمة) که انلر غنا و تنعم صاحب لیدر که اول سبب
 غفلت لیدر انکله مراد صنایید قریشدر (و مهلهم قلیلا) و انلره
 آز زمان مهلت ویر اکا بناء چوق زمان یکمدن بدرده قتل اولندیلر
 (ان لدینا انکالا و جمیما و طعاما ذاغصة و عذابا الیما) بزم عندمزدده
 آخرتده انلر ایچون تهیته اولمش قیود ثقال و نار محرقه و طعامکه بوغازه
 ایلشوب قالور و عذابکه صاحبنه الم ویرر اولور (یوم ترجف الارض
 و الجبال و کانت الجبال کثیرا مهیلا) شول کونده که انده ارض و جبال
 تحرک و تنزل ایدر و جبال ایسه آقار قوم اولور (انا اسئلنا الیکم رسولا
 شاهدا علیکم) یا اهل مکه بن سزه محمد علیه السلامی رسول کوندردم
 یوم قیامتده بنم توحیدمه دعوتده اجابت و سزک امتناعکزه شهادت ایده
 (کا ارسلنا الی فرعون رسولا) تنکیم موسی علیه السلامی فرعونیه رسول
 کوندردمشدک (فعصی فرعون الرسول فأخذناه اخذا و بیلا) فرعون ایسه
 اول رسوله عصیان ایدیلک بزانی اخذ شدیدله اخذ یعنی غرقله اهلاک ایتدک
 (فکیف تقون ان کفرتم یوما یجعل الولدان شیبیا) اگر کفر اوزره قالور سکر
 کندیکزی عذابدن نیچه قورتررسز شول کونده که هیبت و شدتدن اول
 صبیانی بیاض صاچلو ایدر (السماء منفطربه کان وعدہ مفعولا) که اول
 کونک هولندن سماء منشق اولور اول کونک کلمسنه الله تعالینک و عدی
 مفعول اولدی (ان هذه تذکرة فن شاء اتخذ الی ربه سیلا) اشبو آیات
 مخوفه ناسه موعظه در اول کسه که انکله متعظ اوله سبیل تقوایه سلو کله
 الله تعالی به تقرب ایدر (ان ربک یعلم انک تقوم ادنی من ثلثی اللیل و نصفه
 و ثلثه) یا محمد ربک جل شانہ بیلور که سن کیجه نیک ثلثانندن اقلی و کاهی
 نصفنی و یا ثلثنی قائم اولورسن و یا خود ثلثانندن اقلنی و کاهی نصفندن
 و کاهی ثلثندن اقلنی قائم اولورسن (وطائفة من الذین معک) و اصحابکدن
 بر جاعت دخی سنکله بیله قائم اولدیغن بیلور (والله یقدر اللیل و النهار)
 الله تعالی لیل و نهارک ساعاتنی احصاء ایدر و اول ایکیسندن قیام ایچون

(مفروضی)

مفروضی غیر مفروضدن تمیز ایدرسز ایسه اکا قادر دکلرسز (علم
 ان لن تحصوه) الله تعالی بیلور که کیجه دن اوزر یکزه قیامی فرض
 اولانک فرض اولمسانندن تمیز ایده مزسز زیرا که یقین اوزره انک اوقاتنی
 احصایه قادر دکلرسز مکر که جمیع لیلی قائم اوله سز اول ایسه سزه
 مشقت ویرر (فتاب علیکم) اوله اولسه رب تعالی سزه ترک قیامده
 ترخیصله و انده اثم و تبعه بی رفعله عفو و عودت ایتدی * دینلدیکه تخیر
 مذکور اوزره تهجد فرض ایدی اول انلره عسیر اولیحق اشبونکله اول
 انلردن نسخ اولندی بعده صلوات خجسته تهجدک و جوبی نسخ اولندی
 لکن پیغمبریمز صلی الله علیه وسلمدن دکل (فاقرؤا ماتیسر من القرآن)
 ایددی صلاة لیلدن سزه متیسر اولان دکل و قیلک صلاتدن قراءتله تعبیر
 اولندی سائر ارکانله تعبیر اولمشی کی * دینلدیکه یعنی صلاتده قرآندن
 سزه متیسر اولانی اوقوکر * حسن دیدیکه یعنی صلاة مغربده و صلاة
 عشاءده قس بن ابی حازم ایدر بن بصره ده ابن عباسک خلفنده نماز
 قیلدم اولکی رکعتده فاتحه و سورة بقره نیک آیتن اوقودی و ایکنجی
 رکعتده فاتحه و انک ایکنجی آیتن اوقودی منصرف اولدیغنده اول فعلنه
 (فاقرؤا ماتیسر) آیتن دلیل اقامت ایتدی * انس بن مالک رضی الله عنه
 ایدر بن پیغمبریمز صلی الله تعالی علیه وسلمدن ایشتمکه دیر بر کسه کیم
 کیجه ده و کوندزده الی آیت اوقویه اول غافلردن یازلمز و اگر یوز آیت
 اوقورسه قاتلردن یازیلور و اگر ایکوز آیت اوقورسه یوم قیامتده قرآن
 اکا محاجه ایتز و اگر بشیوز آیت اوقورسه آنکچون اجر دن
 قنطار یازیلور * ابن عمر رضی الله عنهما ایدر پیغمبریمز صلی الله علیه
 وسلم بکادیدیکه قرآنی هر آیده بر کره اوقوغل دیدمکه یا رسول الله بن کندمده
 قوت بولورین یعنی اندن اکثر اوقومغه دخی قادرین دیدیکه یکرمی کونده
 بر کره اوقوغل دیدمکه اندن اکثر دخی قادرم دیدیکه ایددی هفته ده
 بر کره اوقوغل انک اوزره زیاده ایتکل (علم ان سیکون منکم مرضی)
 الله تعالی بیلدیکه سزدن بعضیکز خسته اولمسیله قیام لیلدن عاجز
 اولیسر لدر اول اجلدن ترک قیامه سزه رخصت ویردی ایددی
 قیام لیلک تعذرینه اول سبب بیان ایتدیکه انک بری اشبو مذکوردر
 (و آخرون یضربون فی الارض یتغون من فضل الله) ایکنجی
 سبب اولدر که بر قوم آخرون یر یوزنده مسافرت ایدوب تجارت

ويا تحصيل علمه الله تعالىك فضلندن رجا ايدرلر (وآخرون يقاتلون في سبيل الله) او چنجي سبب اولدر كه سزدن قوم آخرين الله تعالىك سييلنده قتال ايدرلر (فاقروا ما تيسر منه) ايمدى صلاة ليلدن سزه تيسير اولنان دكلو قيلك لكن اوزريكزه وجوب طريقي اوزره دكل (واقموا الصلاة) واوزريكزه فرض اولان نمازي قيلك (وآتوا الزكاة) واوزريكزه واجب اولان زكاتي وريك (واقضوا الله قرضا حسنا) وزكاتدن غيري اموالكزدن سييل خيراتنه نيت خالصه ايله اتفاق ايدك (وما تقدموا لانفسكم من خير نجدوه عند الله هو خيرا واعظم اجرا) اعمال صالحه دن اول شيتكه نفس وياماله متعلق اولور طيب نفسله آخرتكزه تقديم ايدر سز والله تعالى عندنده سزاني شول موتركز حالنده وصيته تاخير ايتديككز شيتدن ويامتاع دنيادن خيرلو واجرلو و ثوابي اعظم بولور سز (واستغفروا الله ان الله غفور رحيم) الله تعالىدن ذنوبككز معفرتن ديككز اول توبه ايدنه غفور و اكا اطاعت ايدنه رحيمدر * پيغمبر يمز صلى الله عليه وسلم بر وقته اصحابنه ديديكه قنغيكزه كندى وارثي مالندن احبدر ديديلر كه هر بريمزه كندى مالى وارثك مالندن احبدر ديدى بلكه ديديكككز خلافى اوزره سز زيرا كندى مالكز تقديم ايتديكككزدر وارثكز مالى تاخير ايتديككزدر

سورة المدثر وهى ست وخسون آية مكية

بسم الله الرحمن الرحيم

(يا ايها المدثر) سبب نزولنده پيغمبر يمز صلى الله تعالى عليه وسلمدن مرويدر ديديكه مكه قربنده حراء نام جبلده ايدم بر ندا ككلى يمين وشماله نظر ايدوب بر شيتي كوردمم فوقه نظر ايديجك كوردمكه اول بكاندا ايدن ملكدر سماء وارض بيننده هواده ككسى اوزره اوتورر اندن رعب ايدوب اهل خديجهيه ككدم ديدمكه بنى تدثير ايدك يعنى دثارله بنى بوريكز كه اول ثوب اورتيلور لحاف مثلى ثيابدر اويله اولسه جبريل عليه السلام كلوب خطاب مذكورله بكاندا ايتدى * ديلديكه اول قريشندن زياده متاذى اوليجق كلوب بر ثوبه بورندى ويا اول ثوبه بورنش اويوركن بوآيتله خطاب اولندى * ديلديكه مدثرله مراد اولكه

(نبوتله)

نبوتله ويا كالات نفسانيه ايله تدثر ايدن ويا اختفا ايدن ديمك اوله زيرا كه اول حراده اختفا ايدر كيدى (قم فأنذر) مضجعكدن طوروب عزم وجدله كفارى عذاب اللهله تخويف ايت اكر انلري توحيدده دعوتكدنصكره ايمانه كلزلر سه (وربك فكبر) وربك جل شاننه يي كبريايله وصف ايت وياصلاقي تكبيرله افتتاح ايت وياربك جل شاننه يي عبده اوئان ديد كارندن تعظيم ايت * روايت اولنديكه بوآيت كريمه نازل اوليجق تكبير ايدوب وحى ايديكينه ايقان ايتدى زيرا كه شيطان انكله امر ايتز اشبوننده دلالت واردر كه قيامله امر دن مقصود رب تعالى يي شرك وتشبيهدن تكبيردر زيرا كه اول واجب اولان صانعي بيلكدر واثك وجودنى بيلدكد نصكره واجب اولان انى تزيهدر (وثيابك فطهر) ثيابك نجاستدن تطهير ايت زيرا كه صلاتده تطهير واجبدر و صلاتك غيريده مستحبدر كه انى غسله و نجاستدن حفظله در ذينوى تقصير كبي شول خوفله كيم نجاسته سورنميه ويا نفسكى اخلاق ذميمه دن تطهير ايت اويله اولسه اول قوت عليه يي استكماله امر اولور قوت نظريه يي و اكا دعوتى استكماله امر دنصكره ويا خود دثار نبوتى تطهير ايت هر شيتدنكه انى تدنيس ايدر حقد وضجر وقلت صبر كبي (والرجز فاهجر) عذابى هجر ايت اكا مؤدى اولور اشيائك هجرى اوزره ثباتله (ولا تمنن تستكثر) مالكى كسه يه وير مكل كه اندن ا كثرى اندن طلب ايدم سن اشبو فعل پيغمبر يمز صلى الله عليه وسلمه حرام ايدى لكن انك غيرى يه اول جائز اولور ويا الله تعالى يه عبادتكى استكشارله امتنان ايتكل (ولربك فاصبر) وربك جل شاننه ك وجهيچون مشاق تكا ليفه واذى مشركينه صبر ايت (فاذا نقر فى الناقور فذلك يومئذ يوم عسير على الكافرين غير يسير) چسانكه صور نفخ اولنه اول كافرله شديد كوندر انلره آسان اولمى مرجو دكلدر (ذرني ومن خلقت وحيدا) امر ينى بكا تقوىض ايت شول كسه نك كه بن انى يالكز خلق ايتشن بن اكا انتقامه كفايت ايدر بن كه اول وليدن المغيره در (وجعلته مالا ممدودا) وبن اكا مال كثير مبسوط ويا نمايله ممدود زروع وضروع وتجارات كبي اموال ويردم * ديلديكه انك طقوز بك مثقال كوشى وار ايدى وطائف بيشده بر بوستانى اولوب يازده وقيشده ميوه سى كسلزدى ومكه وطائف بيننده ابل و خيل و غنم و عبيد و جواريسى وار ايدى

(و بنین شهودا) و اوغلار ویردمکه انکله بيله مکده حاضرین اولوب
لقاليله تمتع ایدر انک اول نعمتله استغنا ایدوب طلب معاش ایچون سفره
احتیاج اولمز و خدمتکارلری کثیر اولدیغی سببدن اوغلارین مصالحنه
ارساله دخی احتیاجی اولزدی * دینلدیکه انک اون ویا اکثر اوغلاری
وار ایدی اوچی اسلامه کلدیکه انلره خالد و عماره و هشام دینوردی
(و مهدت له تمهیدا) و بن انک عمرنی و جاهنی بسط ایتدم حتی اول ریاست
و تقدیمه استحقاقله ریحانه قریش و وحید دیو تلقیب اولنوردی (ثم یطمع
ان ازید) بوند نصکره اول طمع ایدرکه اول ویریلن اوزره اکا زیاده ایدم
(کلا) حالبوکه من بعد بن اکا زیاده ایدر دکلن اولیه اولسه بو آیت
زولند نصکره مال و اولادی نقصانده اولوب حتی جمعی هلاک اولدیلر
(انه کان لا یأتینا عنیدنا) زیرا اول ولید بزم آتلیزمه معاند و مکذب ایدی
(سأرهقه صعودا) بن اکا ناردده عذابدن برنوع مشقت تکلیف ایدرینکه
انده راحت اولیه * دینلدیکه صعود ناردده بر جلددرکه باشنه یتیش ییلده
چیقلور بعده آتلوب اسفلنه ایر کوریلور * اشبو آیتک تفسیرنده
پیغمبریمز علیه السلامدن روایت اولندیکه صعود ناردده بر جلددرکه
کافر اکا صعودده تکلیف اولنور بر آن نفسه مهلت ویرلمز زبانیه انی
اوکنندن تیمور زنجیرله چکرلر و آردندن تیمور چومقلره اوروب سوررلر
قرق ییلده انک اعلاسنه ایردیکنده اسفلنه دوشیریلور بو منوال اوزره
اکا امان ویرلمز عذاب ایدیلور (انه فکر و قدر) اول ولید محمد صلی الله
علیه وسلم قرآنی قرائتن ایشیدیک اکا طعن ایچون فکره واردی
و نفسنده او صاف شیعهدن بعض اقوال حاضرلدی (فقتل کیف قدر)
اکا لعنت اولسونکه کور انی نیچه تقدیر ایتدی ویا اول امرده ممکنک
اقصا سنه ایروب قتله الله انی نیچه تقدیر ایتدی دینلکه مستحق اولدی
روایت اولندیکه ولید پیغمبریمز صلی الله علیه وسلم اوغرا دی حالبوکه
اول حم السجده سوره سن او قوردی بعده قومنه واروب دیدیکه الان محمددن
بر کلام ایشندمکه اول انس و جن کلانندن دکلدر انده حلاوت
و طلاوت وارددر اعلاسی مثر و اسفلی مغددر کورینورکه اول عالی اوله
انک اوزره استعلاء ایدر اولیه قریش انی ایشیدیک دیدیلرکه ولید جنون
ایده یور انک قرداشی اوغلی ابو جهل دیدیکه انی اول اعتقاددن

(دوندرمکه)

دوندرمکه بن یترین دیوب ولیدک قتنه واردی واکا ماجرای سو یلدی
ولید انلره دیدیکه اکر محمدی مجنون زعم ایدر سکر انک هیچ صرع اولدیغن
کور دیکزمی واکر انی کاهن دیر سکر انی هیچ نکهن ایدر کوردیکزمی واکر
انی شاعر دیر سکر هیچ شعر تعاطی ایدر کوردیکزمی واکر انی کذابدر دیر سکر
هیچ بر شیئده کذب ایتدیکنه مطلع اولدیکزمی جمعی دیدیلرکه بو حالادن
هیچ برین بزاند کورمدک واندن کذب ایشتمک ولید ایتدی ایمدی بیلک که
محمد دکل الا ساحر در کورمز میسر که اول رجلاه اهل و اولاد و موالیسی
بننی تقریب ایدر اولیه اولسه انک اول قولنی تحسین ایتدیلر و طاغیلوب
کتدیلر (ثم قتل کیف قدر) اکا تکرار تکرار هر حالده لعنت اولسونکه
انی نیچه تقدیر ایتدی (ثم نظر) بعده قرآنی ابطال ایدر شیئ تدبیر ایتدی
و یا قومنک یوزلرینه نظر ایتدی (ثم عبس و بسر) بعده یوزین بورشدردی
شول سببدنکه قرآنه طعن ایدر جک برشی بولوب نه دیه جکک بیلدی
و یا خود پیغمبریمز صلی الله تعالی علیه وسلم یوزینه کراهه شدیدیه ایله
یوزین بورشدردی و تقبضده زیاده ایتدی (ثم ادبر واستکبر) بعده حقدن
و یار سولدن اعراض ایدوب اتباعدن استکبار ایتدی (فقال ان هذا الاسحر
یؤثر) و دیدیکه محمدک قولی دکل الاسحر در که سحره دن روایت
و تعلم اولنور اشبو کله ولیدک بالنه خطور ایتدیک کبی تلبیس نطقه
استحجال ایتدی بعده تفکر ایدوب دیدیکه (ان هذا الا قول البشر)
بو قرآن دکل الا قول بشر در یوخسه الله تعالیدن وحی دکلدر الله تعالی
دیدیکه (سأصلیه سقر) بن انی نارسقره ادخال ایدرین (وما ادراک ما سقر)
نار سقر نه ایدیکن سکا نه یلدردی (لاتقی ولا تذر) اول هیچ بر شیئ
ابقاء ایتز الا انی هلاک ایدر بعده اولکی هیئنه عودت ایدر و اعاده
اولند قلمنده ترک ایتز حتی که افنا ایدر هر شیئک فتور و ملالی اولور
الا نارك دکل (لواحة للبشر) اول نار سقر جلدک ظاهرینی احراق
ایدر (علیها تسعة عشر) اول نار اوزره مسلط اون طقوز ملک
وارددر که نارك خازنلریدر رئیسلی مالکدر اما که زبانیه نک
عد دین الله تعالیدن غیری احد ییلز * دینلدیکه انلر کوزلری
برق خاطف کبیدر نابری قلعه لرکیدر آغزلندن آتش یالکتری
چیقار انلردن برینک ایکی اموزی اره سی بر یلق مسافه در

برینک کفنه ربیعہ ومضر قبیلہ لرندہ کی نہ دکلو ناس صغار انلرک قلو بدن
رحمت نزع اولنوبدر انلرک بریسی یتش یک کشی بی دفعه آلوب ناردن
دیلدیکی مکانہ برافعه قادر اولور اول ملائکہ نک عددی اون طقوز اولسنک
حکمتی اولدرکہ نفوس بشریہ نک نظر وعملہ اختلالی اون ایکی قوای
حیوانیہ ویدی طبیعیہ سبیلہ در ویاخود جهنمک درکاتی یدیدر انک التیسی
اصناف کفار ایچوندرکہ هر صنفک عذاب اولنسی اعتقاد وقرار وعملی
ترک ایتدکلمری ایچوندر انواع عذابدن حالرینه مناسب نوعله تعذیب
اولنورلر وهر نوع عذابہ برملک ویا ملائکہ دن بر صنف تولی ایدر اول
درکاتک بری ایسه اشبو امتک عصا شدن عملی ترک ایدنلر ایچون حالرینه
مناسب عذابدن برنوعله تعذیب اولنورلر واول نوعه برملک ویاخود
ملائکہ دن بر صنف تولی ایدر ویاخود ساعات لیل ونهارک جیعی یگرمی
درتدر انک بشی صلوات مکتوبہ یه صرف اولیحق باقی اون طقوز قالور
اشبو آیت نازل اولیحق ابوجهل قریشہ دیدیکہ محمد خبر ویرکہ خزنه نار
اون طقوز اوله سز ایسه هر بریکز شجیعلر سز عاجز میسرکه سزدن هر اون
کشی اول خزنه نک برینی بطش ایدہ ابو الاسود بن کندرہ الجمحی ایتدیکہ
بن انلرک اون یدیسنه کفایت ایدرین اوننی ظہرمہ ویدیسن بطمہ آلورین
ایکیسنک تدارکن سزایدک واول دیدیکہ صراط اوزرہ بن اوککزجه کیدرین
اول خزنه نک اوننی صاغ اوموزیمہ وطقوزین صول اوموزیمہ آلورین
جنه کیدرز اولیلہ اولسه نازل اولدیکہ (وما جعلنا اصحاب النار الا ملائکہ)
نارده کفار تعذیبہ مسلط اعوانی بز ملائکہ قلدق تا کہ معذبین جنسہ
مخالف اولملریلہ انلرہ رقت ایتیدلر وانلرہ راحت ویرمیدلر (وما جعلنا عدتہم
الا فتنة للذين كفروا) وانلرک عددن اون طقوز قیلدق اول کفارہ فتنہ
اولہ کہ انلر انی استقلال واستهزا یلہ واول عدد قلیل جنّ وانسک اکثرنی
تعذیبہ وفا یتمن استبعادلہ مفتون اولہلر (لیستیقن الذين اتوا الکتاب)
تا کہ اهل کتاب محمدک نبوتہ وقرآنک صدقہ یقین اکتساب ایدہلر
شول سبیدنکہ انی کتابلرینہ موافق کورہلر (ویزداد الذين آمنوا ایمانا)
وتا کہ مؤمنلرک اکا ایمانلہ واهل کتابک انی تصدیقلہ ایمان اوزرہ
ایمانلری زیادہ اولہ (ولایرتاب الذين اتوا الکتاب والمؤمنون)
وتا کہ اهل کتاب ومؤمنلر اندہ شک ایتیدلر اشبونکہ استیقانی تأکید

(ابتدی)

ایتدی زیرا کہ اثبات یقین ونفی ربب انلرک سکون نفسله وصف اولنسنہ
اوکد وابلغدر (وليقول الذين في قلوبهم مرض والکافرون) وتا کہ
هجرة نصکرہ زمان مستقبلہ مدینہ اهلندن قبلرندہ شک ونفاق
اولنلر ومکہ اهلندن مشرکالر دیہ لرک (ماذا اراد الله بهذا مثلا)
الله تعالی مثل استغرابی کبی عدد مستغربی ایرادلہ نہ شی ارادہ ایتدی *
دینلدیکہ وقتا کہ انلر استغراب ایتدیلر ظن ایتدیلر کیم اول مثل مضروب
اولہ (کذلک یضلّ الله من یشاء ویهدی من یشاء) اشبو ذکر اولنلر
عدد مخصوص منکرلرینہ اولان اضلال وهدی کبی الله تعالی کافرلری
اضلال ومؤمنلری هدایت ایدر (وما یعلم جنود ربک الا هو) ربک
جل شانہ نک اهل ناری تعذیب ایچون خلق ایتدیکی ملائکہ نک عددین
الله تعالی دن غیری احد بیلز انلردن اول اون طقوز خزنه ورؤسادر
هر برینک ملائکہ دن اعوان وجنودی واردرکہ الله تعالی دن غیری
احد انی احصایہ قادر اولمز (وما هی الا ذکرى للبشر) اونار دکل
الاناسہ تذکرہ وموعظه در (کلا) منکردرکہ اشبو ذکر اولنلر
آیات کفارہ تذکرہ اولہ زیرا کہ فرط عنادلرندن انکله متذکر ومتعظ
اولمز (والقمر) قر حقیچون (واللیل اذا دبر) وکیچہ حقیچونکہ
ذهابہ تولی ایدہ (والصبح اذا سفر) وصبح حقیچون چآنکہ اضاءت
ایدہ (انها لاحدی الکبر) اول ناربلایای عظامک بریدر * دینلدیکہ
یعنی درکات نارک بریدر درکات ایسه یدیدر جهنم ولظی وحطمہ وسعیر
وسقر وجحیم وهاویہ در (نذیرا للبشر) ناسہ انذار اولدیغی حالده
(لن شاء منکم ان یتقدم او یتأخر) شول کسہ ایچونکہ خیرہ سبقت
ویانندن تخلف ایدہ (کل نفس بما کسبت رهینة الا اصحاب الیمین)
هر نفس کافرہ عمل سیئی سبیلہ نارده محبوسہ در الا اصحاب یمین دکل
زیرا انلر نارده ذنوبلریلہ محبوسہ دکلردر بلکه الله تعالی انلری مغفرت
ایدر اصحاب یمینده مفسرون اختلاف ایتدیلر * دینلدیکہ انکله مراد
اطفال مسلمیندر ویا ملائکہ در ویا اهل جنتدر کہ یوم میثاقده آدم
علیه السلامک یمینده ایدیلر ویا کتابلری صاغرلرینہ ویریلندر ویا نفسلرینہ
یمینلوردر ویا مسلمون مخلصوندر ویاخود معنی هر نفس کسب ایتدیکی خیر
وشرلہ مأخوذہ در الا اول کسہ کہ اعتمادی الله تعالی نک فضلہ در

اول مأخوذه دکلدر اما اولکه اعتمادی کسبنه در اول مأخوذه در
 (فی جنات يتساءلون عن المجرمين ما سلككم في سقر) اول اصحاب یمین
 جنتلرده مشرکینه سؤال ایده لکه سزی نه شیء نار سقره ادخال ایتدی
 (قالوا لم نك من المصلين) ديه لکه بزصلوات مکتوبه بی اد ایدنلر دن
 دکل ایدک (ولم نك نطم المسكين) ومسکینه ویرلسی واجب اولان شیئی
 اطعام ایتدک اشبو دلیدرکه کفار فروعله مخاطب اوله ل (وکننا نخوض مع
 الخائضين) وباطله شروع ایدنلره موافقت ایدردک (وکننا نکذب
 بوم الدين) ویوم قیامتک اولسنی تکذیب ایدردک (حتى انا البقيين)
 حتی که بزه موت ومقدماتی ایردی (فا تفهم شفاعة الشافعين)
 یوم قیامتده انلره ملائکه وانبیاء وصالحینک شفاعتی نفع ایتز اگرچه
 جمعی انلر ایچون شفاعت ایدرلر سده (فالهم عن التذكرة معرضين)
 انلره نولدیکه مواعظدن اعراض ایدرلر (کانهم جرم مستغفرة فرت من
 قسورة) کانه اول کفار قرآن استماعدن نفور واعراضده شدت
 خوفدن قاچق دیلر جارلره بکزرکه اسددن قاچدلر (بل یرید کل امرئ
 منهم ان يؤتی صحفا منشرة) بلکه انلرک هربری دیلرکه اکا صحیفه ل
 ویرله کیم اول مکشوفه اولوب انده جرم وتوبه وناردن امنلری یازیلو اوله
 (کلا) انلرک اشبو اراده ایتدکلری اولمز (بل لا يخافون الآخرة)
 بلکه انلر آخرتدن خوف ایتزلر زیراکه اکا ایمانلری یوقدر (کلا انه
 تذكرة فمن شاء ذكره) حقا که اول قرآن موعظه بلیغه اولوب
 خلقه کافیه در اول کسه که انکه اتعاظ ایتک دلیله اول اکا وعظ ایدر
 (وما یذکرون الا ان يشاء الله) حالبوکه انکه متعظ اولزلر الا انلرکه الله تعالی
 انلرک قرآنله اتعاظن دلیله (هو اهل التقوى) اول الله تعالی اهلدرکه
 اکا مخالفتدن حذر اولنه (واهل المغفرة) واهلدرکه عبادنی یارلغیه

سورة القيامة وهي تسع وثلاثون آية مكية

بسم الله الرحمن الرحيم

(لا اقسم بيوم القيامة) یوم قیامتله قسم ایدرین (ولا اقسم
 بالنفس اللوامة) ودخی شول نفسله کیم اول یوم قیامتده کندیوی
 لوم ایدر شول دنیاده تقواده ایتدیکی تقصیر اوزره ویا اول هر دایم

(کندیوی)

کندیوی لوم ایدر اگرچه اول طاعتده اجتهاد ایدر سده ویا اول نفس
 مطمئنه درکه نفس اماره بی لوم ایدر ویا اول جنس نفس درکه پیغمبریمز
 صلی الله علیه وسلم ایدر هیچ بر نفس یوقدرکه اول کرکسه بزه ویا فاجره در
 الا اول یوم قیامتده کندیوی لوم ایدر سدر خیر عملن ایشلر دیسه نیچون
 زیاده ایتدم دیر واکر شر عملن ایشلر دیسه نیچون انده تقصیر ایتدم دیر
 (أحسب الانسان ان لن نجوع عظامه) شول بعثی انکار ایدن انسان
 ظن ایدر میکه بزاتک عظامن موتدنصکره جمع ایتیه وز * روایت اولندیکه
 عدی بن ابی ریععه دیدیکه یاحمد یوم قیامتدن بکا تحدیث ایتکه اول نوقنده
 اولور وامری نیچه در پیغمبریمز علیه السلام اکا انی خبر ویریمک
 دیدیکه اگر بن اول کونی کور سده یاحمد بن سنی تصدیق ایدر دکلن هیچ
 اولور میکه الله تعالی عظامی جمع ایده اول سبیدن بوآیت نازل اولدی
 (بلی قادرین علی ان نسوی بنانه) بلی بزقادرزکه انک اناملی عظامن
 چوریدیکدنصکره اعاده وبری برینه تألیف ایده وز ایددی اول عظام
 صغر ولطافتیله اعاده اولنیچق کبارنک اعاده سی فوتمی اولور
 (بل یرید الانسان لیفجر امامه) انسان بیلز دکلدرکه رب تعالی
 انک عظامی جمعنه قادر اوله لکن دیلرکه حیاتده اولدیغیجه عصیانده
 مستمر اوله یوخسه اندن انتزاع وتوبه ایتیه ویا ذنبی تقدیم وتوبه بی تأخیر
 ایلیه توبه وعملی تسویف ایدرک حتی که شر احوال واسوء اعمال اوزره
 وفات ایده ویا خود طول امله دیه کیم بن شو دکلو عمر سورم و دنیاده
 شونک کبی اشیایه ایرم ومع ذلك موتی ذکر ایتیه ویا موتدنصکره ایلروده اولوب
 بعث وحسابی انکار ایلیه (یسأل ایا ن یوم القيامة) اول استهزاء طریق اوزره
 سؤال ایدرکه قیامت نوقنده اولور الله تعالی ایدرکه (فاذا برق البصر)
 اول شول وقتده اولور که بصر شاخص اولوب طرف ایتیه شول کوردیکی
 عجائبنکه دنیاده انی تکذیب ایدردی ویا جهنم کورلدیکنده کافرلرک
 کوزلری یلابور ویا فزع ومنتخیر اولور (وخسف القمر) وقرک ضیاسی
 کیدوب قراکو اولور (وجمع الشمس والقمر) وشمس وقر جمع ایدیلوب
 مغربدن طلوع ایتدیریلور ویا ضیالری کیدر ذهابنده بینلری تسویه
 ایدیلور ویا ایکسی جمع ایدیلوب بحره براغیلور (يقول الانسان
 يومئذ اين المفر) شول بعثی انکار ایدن کافردرکه اشبو کونده زویه

بع (۲۰)

قاچوب کیدرز (کلا لاوزر) اول کونده ایسه الله تعالیٰ نیک عذابندن
 تحصن ایده جک ملجا و مکان اولز (الی ربک یومئذ المستقر) بلکه اول
 کونده خلا ثقت مستقری الله تعالیٰ به در غیری به استقراره قادر اولزلر دیلدیکن
 جنه و دیلدیکن ناره قورنده انک غیرچون حکم اولز (ینبأ الانسان
 یومئذ بما قدم و آخر) اول کونده هر انسان موتدن اول ایشلدیکی
 خیر و شر عملندن و موتدنصکره ایشلنور سنت حسنه و سیئه سندن خبر
 و بریلور و یا معصیتدن تقدیم و طاعتدن تأخیر ایتدیکندن و یا طاعتدن
 تقدیم و حق الهدن تأخیر و ضایع ایتدیکندن و یا عملنک اولندن
 و آخرندن و یا اول عمرنده تقدیم و آخر عمرنده تأخیر ایتدیکندن و یا مالندن
 نفسچون تقدیم و ورثه سیچون تخلیف ایتدیکندن سؤال اولنور
 (بل الانسان علی نفسه بصيرة) بلکه انسان جوارحنک اعمالنه
 شاهددر یوم قیامتده فعل و قولی اوزره شهادت ایدوب حساب و جزاء
 اولنور (ولو انی معاذیرہ) اگرچه تخلص ایچون هر معذرتی
 سویلرسده اندن قبول اولز و یا عمل سیئی ایشلدیکنده اگرچه ستوری ارحا
 و ابوابی برکتش ايسهده جوارحی انک اوزره شهادت ایدر (لا تحرك به
 لسانک لتعجل به) یا محمد سکا قرآن وحی تمام اولدن انی اخذ ایچون عجله
 اوزره لسانکی تحریک ایتمه شول خوفله کیم لفظ قرآندن برشی انفلات ایده
 (ان علینا جمعه و قرآنه) بزم عهده مزه درکه اول قرآنی صدرکده جمع
 و قراءتن لسانکده اثبات ایده وز (فاذا قرآنه فاتبع قرآنه) چان بزسکا
 قرآنی جبریل لسانیه قراءت ایده وز انی استماع و تکرار ایلکه اول
 ذهنکده رسوخ بوله (ثم ان علینا بیانہ) بعده انک معا نیسندن سکا
 مشکل اولانی تبیین بزم عهده مزه در اولیه اولسه جبریل علیه السلام
 اکا وحیله کلدکده باشن اکوب دکوردی اول کتدیکنده انی او قوردی
 اشبو دیلدرکه بیانک وقت خطابدن تأخیری جائز اوله و عجله مذمومه اوله
 اگرچه اهم امور و اصل دینده ايسهده فکیف که غیریده اوله (کلا) ایددی
 اول حالنده عجله ایتمه تائی اوزره اول (بل تحبون العاجلة و تذرون الآخرة)
 بلکه یابنی آدم سنز عجله بی ترک ایتمز سنز زیرا که عجله دن خلق اولنمشسنز
 اول اجلدن عاجله بی سورسنز و انکچون عمل ایدرسنز و آخرته اهتممی
 و انکچون عملی ترک ایدرسنز (وجوه یومئذ ناضرة الی ربها ناظرة) یوم

(قیامتده)

قیامتده وجوه اولور که مسروره و حسنه و مضیئه اولوب رب تعالیٰ به
 آشکاره حسابسنز نظر ایدیبیدر (ووجوه یومئذ باسرة تظن ان یفعل
 بها فاقرة) وجوه دخی اولور که اول کونده عابسه و مسوده در انک اربابی
 توقع ایدر که انلره داهیة عظیمه ایدر که فقاری کسرایدر (کلا) ایددی
 حب عاجله و ترک آخره دن ارتداع ایدک موته مستعد اولک (اذ بلغت التراقي
 و قيل من راق) چنانکه روح اعالیٰ صدره ایشسه انده حاضر اولنره
 هیچ کسه وارمیدر که اکا رقیه ایدر دینله و یا مالک الموت دیه کیم بوروحله
 ملائکه رحمت و ملائکه عذابدن قنغیز صعود ایدر (وظن انه الفراق)
 اول مختضر تیقن ایده کیم اکا نازل اولان دنیا و محابنک فراقیدر (والتفت
 الساق بالساق) و ساقی ساقنه ملتوی تحریکه قدرتی کسله و یافراق دنیا
 شدتی خوف آخرت شدته اولاشه (الی ربک یومئذ المساق) اولیه اولسه
 عبادک مرجعی الله تعالیٰ به در هر عبد انک ثوابنه و یا عقابنه سوق اولنور
 (فلا صدق و لا صلی) اول تصدیق واجب اولان شیئی تصدیق ایتدی
 و یا مالنک زکاتنی و یرمدی و اوزرینه فرض اولان نمازی قیلدی (ولکن
 کذب و تولى) بلکه اول قرآنی تکذیب و ایماندن اعراض ایتدی (ثم ذهب
 الی اهله یطی) بعده مشیه سنده نبخترو اختیال ایدرک اهلنه کتدی (اولی لك
 قالی) اول الله تعالیٰ بکا کراحت ایتدیکی شیئی قریب ایده (ثم اولی لك
 قالی) اول حالتی سکا تکرار تکرار ایده (أحسب الانسان ان یترك سدى)
 قرآن وبعثی انکار ایدن کشی ظن ایدر که مهمل ترك اولنوب تکلیف و جزا
 اولنمیه (ألم یتك نطفة من منی یمنی) اول منیدن برنطفه دکلیدیکه رجه اراقه
 اولندی (ثم کان علقة فخلق فسوی) بعده اول منی علقه اولوب الله تعالیٰ
 اندن انسانی خلق و اعضایی تعدیل و یا انی معتدل القامه ایتدی (فجعل
 منه الزوجین الذکر و الانثی) اول منیدن ایکی صنف یعنی ذکر و انثی خلق
 ایتدی (ألیس ذلک بقادر علی ان یمشی الموتی) اشبو و اشباهه قادر اولان
 رب تعالیٰ یوم قیامتده موتابی احبایه قادر اولزمی بلی اول اکا قادر اولور

سورة الانسان وهي ثمان وعشرون آية مكية

بسم الله الرحمن الرحيم

(هل اتی علی الانسان حین من الدهر لم یکن شیئا مذکورا) آدم علیه السلام

اوزره زمان ممتد غير محدود دن قرق ييل زمان كچديكه اكا روح نفخ اولمزدن
اول مكه وطائف اراسنده بالچقندن دوزلمش بر جسد ايديكه شي منسي اولوب
انسانيتله مذكور دكل ايدى ويا انسانله مراد بنو آدمدر كه اصلا ب رجال
وارحام نساء بيلمندن اول نطفه ايديلر (انا خلقنا الانسان من نطفة امشاج
نبتليه فجعلناه سميعا بصيرا) بز بنى آدمى ماء رجلاه ماء مرأه دن مختلط نطفه دن
ويانطفه اوزره عارض الوانديكه ماء رجل كه ابيض و ماء مرأه كه اصفردر
ايكي سي مختلط اولديغندن اخضر اولور ويا اطواردن خلق ايتدك كه نطفه
اولان علقه بعده مضغه حتى خلقتي تمامنه دكين طور دن طوره تحول ايدر
امر ونهي له انك اختبا رين ديلى اولديغمز حالده انى ايشيدر و كورر قيلدقكه
آيات استماعنه و دلائل مشاهده سنه ممكن اوله (انا هديناه السبيل اما شاكر
واما كفورا) بز اول انسانه نصب دلائل و انزال آياته هدايت و ضلالت
يولنى تبين ايتدك يا شاكر اولوب ايمانه كله ويا كفور اولوب ضلالتده قاله
(انا اعتدنا للكافرين سلاسل و اغلالا و سعيرا) بز كافرلر ايچون تهيه ايتدك
سلاسل كه انكه يديلى و اغلال كه بيونلرينه اور يلى و وسعير كه انده
ياندريلى و (ان الابرار يشربون من كأس كان مزاجها كفورا) شول
مؤمنلر كه ايمانلرنده صادقلر رب تعالى به مطيعلر در آخرتده كأسدن شراب
ايچرلر كه مزاجي كافور اولور * دينديكه شرابلرينه كافور مزج اولور
و مسكه ختم ايديلور ويا اول شراب پياضده و طيب ريحده و برودنده كافور
كيدر ويا كافور جنتده برصو پيكارنك اسميدر كه رايحه و پياضلقده كافوره
بكر يوبدر (عينا يشرب بها عباد الله يفجرونها تفجيرا) اول كافور
بر پيكاردر كه الله تعالىنك عباد مختصيني كأسدن شرابي اول ماء كافورله
مزوج ايچرلر اول پيكاري ديلدكلري مكانه سهولتله آقيدرلر (يوفون
بالنذر) انلر كرامات مذكوره به ايريشورلر شول سبيله كه انلر دنيا ده
نذرلرينه وفا ايدرلر دى چنانكه طاعته نذر ايدلر معصيته دكل (ويخافون
يوما كان شره مستطيرا) و قورقرلردى يوم قيامتدنكه شدائى فاشي و ممتد
اولدى (ويطعمون الطعام على حبه مسكينا ويتما و اسيرا) وانلر طعام اطعام
ايدرلردى اول طعامك قلتي ويا انلرك اكا حاجت و شهوتي ويا الله تعالى
محبتنه اكا رغبتى اولديغى حالده مسكينه كه مالى اوليه و يتيمه كه باباسى

(اوليه)

اوليه واسيره كه انى مسلمون دارحر بدن سبي ايد * روايت اولنديكه
پيغمبرمى صلى الله تعالى عليه وسلم دار حربدن اسيركتور يلوب انى بعض
مسلمينه ويرر و اكا احسان ايدك ديو بيورردى ويا انكه مراد اسير
مؤمندر اوليه اولسه انده مملوك و دخی مسجون داخل اولور زيرا حديثه
(غريمك اسيرك فاحسن الى اسيرك) غريمك اسيركدر ايدى اول اسيريكه
احسان ايت ديو بيورلدى * دينديكه اشبوايت على بن ابى طالب رضى الله
تعالى عنه شاننده نازل اولوبدر كه اول بر يهودى به شعيردن برشيئه عمل
ايدوب اول شعيرى قبضند نصكره بر ثلثنى طحن و خبر ايدوب اهل و عياليله
انى اكل صددنده ايكن بر مسكين كلوب انى اكا ويرديلر كنديلر صاعلر ايكن
اندن برشى طامندن آچ ياتديلر ايرته ينه صائم اولوب اول شعيرك بر ثلث
دخی طحن و خبردن نصكره افطارلرى وقتنده بر يتيم كلوب اتفاقله اندن دخی
برشى اكل ايتدن انى اكا ويرديلر ايرتسى ينه صائم اولوب اول باقى ثلثى
دخی طحن و خبردن نصكره افطارلرى وقتنده مشركيندن بر اسير كلوب سؤال
ايديجك انى دخی اكا ويرديلر كنديلر كذاك آچ قالديلر اشبودليدر كه اسيره
طعام حسن اولوب انكه ثواب رجا ايديله اكرچه اول اسير مشركلردن
ايسه ده (انما نطعمكم لوجه الله لا نريد منكم جزاء ولا شكورا) لسان حال
ويا لسان مقالله فقرايه ديرلر كه بز سزه اشبونى لوجه الله اطعام ايدر
يوخسه انك اوزره دنيا ده سزدن مكافات ويا شكر اراده ايتمز تا كه انكه
من توهمن و مكافات توقعن كيدر كه اول اجرى تقيص ايدر * پس بواجلدن
عائشه رضى الله تعالى عنها فقرايه صدقه كوندرسه رسولنه اول فقرا سكا
بنمى چون نه سويلدى ديو سؤال ايدردى اكر دما ايتدى ديرسه اولدخى اكا
انك مثليه دما ايدردى تا كه صدقه سنك ثوابي كندى چون عند الله خالص قاله
(انا نخاف من ربنا يوما عبوسا قطيرا) زيرا بز قورقرز ربمك عذابندن
شولكونده كه انك هول وشدندن يوزلر عبوس اولور بر كفيته كه ابدانده
انبساط اولمز (فوقاهم الله شر ذلالت اليوم) اوليه اولسه الله تعالى انلرى اول
كونك شردن صاقليله و تحفظلرى سبيله حفظ ايليه (ولقاهم الله نضرة و سرورا)
وانلرك يوزلرينه بشاشت و قلبلرينه سرور ويره (وجزاهم بما صبروا جنة
وحريرا) وانلره اداء واجبات و اجتناب محرمات و ايشار امواله صبرلرى سبيله

جزاء ايدر شول جنتله کیم اکا کیررلر ولباس حریرله کیم انی کینورلر
 (متکئین فیها علی الارائک لایرون فیها شمساً ولا زمهریرا) اول جنتده
 سریرلر اوزره ناعمین اولدقلری حالده اوتوره لر هوا اعتدالده اولوب
 انلره الم ویرر حرارت ویاذا ایدر برودت کورمز لر بلکه انک هواسی بذاته
 مضیئدر انده شمس وقره احتیاج اولمز لر (ودانیة علیهم ظلالها وذلت
 قطوفها تذیلاً) اول جنت اشجارنک ظلالی انلره قریب اولدیغی حالده
 ثماری انلره تسخیر و تقریب ایدیلور بروجله کیم قیام وعود واضطجاع
 حالده اکا ایریلور (ویطاف علیهم بآتیه من فضة واکواب کانت قواریرا
 قواریر من فضة قدروها تقدیوا) وانلر انده طواف اولنورلر کومشدن آیه
 وکیرانله کیم اول زجاجه دن دوزیلوبدر شول کیرانکه زجاجه نک صفا
 وشفافیه کومشک بیاض ولیننی جامع خلق اولنوبدرکه انلر انی نفسلرنده
 تقدیر ایدوب اولدخی انلره تمنی ایتدکاری مقادیر و اشکالده کلور و یا ساقیلر
 انی شاربینک دأبلی مقدارنجه ایدرلر (ویسقون فیها کأسا کان مزاجها
 زنجیلاً) ودخی انلر جنتده شول زنجیل جنتله ممزوج شرابدن سقی
 ایدیلورلر که اول دنیا زنجیلنه بکزه مزلدغه و احتراق اولمز * دینلدیکه اول
 جنتده بریکارد که انده زنجیل طعمی بولنور مقربون اندن صرف ایچرلر سائر
 اهل جنت مزج ایدرلر (عینا فیها تسمى سلسیلاً) اول جنتده بریکار دخی
 وارد که سلسیل دینور منقاده در اهل جنت انی دیلدکاری مکانه صرف
 ایدرلر اصل عرشدن نبعان ایدوب جنت عدندن سائر جنتلره جریان ایدر اهل
 جنتک شرابی برد کافور و طعم زنجیل وریح مسکده در (ویطوف علیهم ولدان
 مخلدون) و اهل جنتی طواف ایدر شول ولدانکه سن واحده اولوب متغیر
 اولمز لاندده دائر در موت کورمز لر (اذا رأیتهم حسبتهم لؤلؤاً منثوراً) چقان انلری
 کورسک صفاء الوانده و شعاعلری بری برلرینه انعکاسده و مجالسلرینه انباشده
 ظن ایدر سنکه انجولدر بساط اوزره صاچلوبدر (واذا رأیتهم رأیت نعیماً
 وملکاً کبیراً) چقان جنتده بصریکی هر قنده ایقاع ایتسک انده وصفه کلز نعیم
 و ملک واسع کورر سن * دینلدیکه اهل جنتک منزله ادناسی اول کیمسه اولور که
 بیک یللق مسافیه دکین نظر ایدر انک اقربن کوردیکی کبی ابعدن دخی کورر
 (علیهم ثیاب سندس خضر واستبرق) انلر اکنلرینه حریرک رقیقندن

(و غلیظندن)

و غلیظندن ثوبلر کیهلر (وحلوا اساور من فضة) و کومشدن سوارلر
 کیوریلرلر تنکیم موضع آخرده التوندن سوارلر کیوریلرلر دینلدی *
 اشبو دیلدر که اهل جنتک حلیه لری عملرینک اختلافیه مختلف اوله تاکه
 یبله اولان عملرینه متفاوت جزاء اوله التوله کومش بیلنده تفاوت کبی
 وجارزدر که کومشدن سوار خادمک اوله والتوندن سوار مخدومک اوله
 (وسقیهم ربهم شراباً طهوراً) ورب تعالی انلره برنوع شراب ایچوره کیم
 اول اقداردن طاهر اوله خیر دنیا کبی انی ایدی وارجل تدنيس ایتش اولیه
 ویا اول شراب بول کبی نجس اولیه بلکه اول بدنلره رشع اولوب رایحه سی
 مسک کبی اوله * دینلدیکه اهل جنته طعام کتوریلوب یبلر آخرنده
 شراب طهور ایچوریلرلر انکله یدکاری مسکدن اطیب رایحه لو رشع
 اولوب بطنلری اندن آرینه و شهوتلری کا کان عودت ایده * دینلدیکه
 اشبو شراب نوع آخردر که ذکر سبب ایدن ایکی نوع شرابک فوقنده در
 اول اجلدن سبب الله تعالی یه اسناد ایدیلوب طهوریتله وصف اولندی
 زیرا که اول شار بنی لذات حسیه یه میلدن و ماسوای حقه رکوندن تطهیر
 ایدوب انک لقاسیله متلذذ و بقاسیله باقی اولدیغی حالده جلال باکمال
 مطالعه سنه تجرید ایدر اول صدیقین درجاتنک منتها سیدر اول اجلدن ابرار
 ثوابی انکله ختم ایتدی (ان هذا کان لکم جزاء وکان سعیکم مشکوراً)
 اشبو ذکر اولنان نعیم اعمالکزه ثواب قیلنور و دنیاده ایشلدیکلر اعمال مقبول
 و مرضی اولور (انا نحن نزلنا علیک القرآن تنزیلاً) یا محمد بزسکا قرآنی مفرق
 و منجم تنزیل ایتدک بر حکمت ایچونکه اول انی اقتضا ایتدی (فاصبر لحکم
 ربک) ربک جل شاننه نک حکمنه صبر ایتکه اول سکا حکمنندن صادر
 اولوبدرا یمدی اوزریکه اولسونکه بشارت و انذارله تبلیغ رساله و کفارک
 اذاسنه تحمل و سکا اعداک اوزره نصرتمز تأخری ایچون تضجری ترک
 ایده سک (ولاتطع منهم آثماً او کفوراً) اول کفاردن هر کسمه یه اطاعت
 ایتکل که اول اثم ارتکاب ایدوب سنی اکا دعوت ایده و کفرده عالی اولوب
 سنی اکا دعوت ایده * اشبونده دلالت وارد که اثم و کفر اولمیان شیئده
 آثم و کفور مطاوعت مخذور اولیه * روایت اولندیکه عتبه بن ربیع
 وولید بن مغیره پیغمبریمز صلی الله تعالی علیه وسلم دیدیلر که اشبو
 ایشلدیکلر صنیعی نساء و ماله نیل ایچون ایدر سک اندن رجوع ایت *

عنه ايتدي اكر اندن رجوع ايدرسك سبكا قزيمي مهرسز ويرهيم وليد
ديديكه بن سكا استديكك دكلو مال ويرهيم اوليله اولسه بو آيت انزاليله اول
ايكيسنه اطاعتدن نهى اولندي (واذكر اسم ربك بكرة واصيلا) ربك
جل شانك ذكرنه مداومت ايت وياخود بكرة ده صباح نمازينه واصيله
اوليله وايكندى نمازينه مداومت ايت (ومن الليل فاسجدله) وكيجهدك
بعضنده اخشام ويتسو نمازنى ادا ايت (وسجد ليلا طويلا) وفرض
نماز نندنصكره كيجهد ده زمان طويل الله تعالىنك رضا سچون ثلثان
ويا نصفن ويا ثلثن نافله نمازله انى ذكر وتسبيح ايت * اشبو حكم يغمبر عز
صلى الله تعالى عليه وسلم واجب واصحابنه مستحب ايدى (ان هؤلاء
يحبون العاجلة ويذرون وراءهم يوما ثقيلا) مكه نك كافرلى دار دنيايي
سورلر ويوم شديدى. ورالرينه ترك ايدوب انكچون اهتمام ايتزلر حقيقتن
تصديق ايدوب انده نفع ايدر على ايشلرلر كه اول يوم قيسامندر (نحن
خلقناهم وشددنا أسرهم وإذا شئنا بدلنا أمثالهم تبديلا) بز انلرى خلق
ايتك ومفاصلار ينك اعصابله ربطنى احكام ايتك اكر ديرسك انلرى
هلاك ايدوب خلقتده وشدت اسرده انلك امثالنى انلره بدل قبلوردق
ويا انلك يرينه بر اهل طاعت خلقى كتورردك (ان هذه تذكرة فمن شاء
اتخذ الى ربه سبيلا) اشبو سورة موعظه در هر كس به كه انكله متعظ
اولقى دبليله الله تعالى به تقرب ايدر (وما تشاؤون الا ان يشاء الله ان الله كان
علما حكيم) والحال سز انكله اتعاضى مشيت ايتسز مكره الله تعالى
سزك مشيتكزى مشيت ايدله الله تعالى هر كس نهك اهليتنى نه شيئه ايدوكنى
يلور و حكمتى مقتضا سنجه مشيت ايدر (يدخل من يشاء فى رحته) اول
الله تعالى ديلديكى كس بهى هدايت وتوفيقيله اسلامه وياجنه قويار
(والظالمين أعداءهم عذابا أليما) وكافرلر ايچون آخرتده عذاب وجميع دائم
اعداد وتهيه ايتدى

سورة المرسلات وهي خسون آية مكية

بسم الله الرحمن الرحيم

(و المرسلات عرفا فالعاصفات عصفا والناشرات نشرا فالفارقات فرقا
فاللقيات ذكرا) الله تعالى ملائكه دن طوائفه اقسام ايتديكه انلرى ارسال

(ايدوب)

ايدوب متتابعة انلره امر ايلدى اوليله اولسه امر نه امثالده عصف رياح
كبي عصف وشرائعى ارضده نشر ايتديلر وياخود جهله موتى اولان
نفوسى علمدن وحى اولندقلرى شيئه نشر ايدوب حقله باطل بينى فرق
ايتكلر نندنصكره انبيايه ذكر القا ايتديلر تا كه محقينه عذر ومبطلينه نذر اوله
وياخود آيات قرآنله اقسام ايتديكه اول هر عرفله محمد عليه السلامه ارسال
اولندي حتى كه اول هر كتب واديانى نسخ ايله عصف وآثار هدى
و حكمتى شرق وغربه نشر وحق وباطل بينى فرق نندنصكره عالمن بيننده
ذكر حقى القاء ايتدى * وياخود نفوس كامله ايله اقسام ايتديكه اول ابدانه
استكمال ايچون ارسال اولندي اوليله اولسه ماسواى حق عصف ايدوب
حقك اثرى جميع اعضايه نشر اولدى حتى انكله حق بذاته وباطل بنفسه
بينى فرق اولوب اول نفوس الله تعالىنك وجهندن غيرى هالك كورديلر
اوليله اولسه انلر ذكر القاء اولنديلر بر حيثيله كه قلوب والسنه لرنده ذكر
اللهدن غيرى شئ اولدى * وياخود رياح عذابله اقسام ايتديكه اول
ارسال اولنوب عصف ايتدى ورياح رحمت ايسه جوده سخاى نشر
ايدوب فرق ايلدى حتى كه اول ذكره سبب القاء ايدلدى زيرا كه عاقل
چقان انك هبوب وآثارنى مشاهده ايدله الله تعالىنى ذكر ايدوب كال قدرتنى
تذكر ايدر (عذرا اونذرا) محقبنى اعذار ومبطلينى انذار ايچون
(انما توعدون لواقع) ايمدى يا كفار مكه مجبى ساعته وعد اولمكز كائن
ونازلدر (فاذا النجوم طمست) اول وعد واقع اولور شول وقتده كه نجوم محق اولنه
ويا نورى كيدريله (واذا السماء فرجت) وسما منشق اوله (واذا الجبال
نسفت) وجبال مكانلرندن قلع اولنوب ارضله برابر ايديله (واذا الرسل
اقتت) ورسوللر جمع ايديله ل شول وقت ايچونكه امتلرى اوزره شهادته
انده حاضر اوللر (لاى يوم اجلت) دينوركه انلر قنغى كون ايچون
تأخير اولنديلر (ليوم الفصل) شول كون ايچونكه انده خلايق بينى فصل
اولنور (وما ادريك ما يوم الفصل) والحال انك كنهنى قندن بيلوبسن
انك مثلن ايسه كورمشن (ويل يومئذ للمذيبين) اول كونده شدت
عذاب شول كس لره دركه بعضى انكار ايتديلر (ألم نهلك الاولين) يا كفار
مكه سزندن اول انبيايى تكذيب ايدنلرى هلاك ايتدىكى (ثم تبعهم
الآخريين) وتكذيبده نظيرلرندن آخرده كلنلرى اهلا كده انلره اتباع

ایدرز * تکیم قوم نوح و عاد و ثمودی اهلا کزدنصکره قوم شعیب و قوم لوطی
 اهلا کده انلره اتباع ایتدک (کذلک تفعل بالجرمین) انبیایی تکذیب ایدنلره
 اولان فعلیز کبی جرم ایدنلره ایدرز (ویل یومئذ للمکذبین) اول کونده
 شدت عذاب شول کسه لره در کیم دنیاده الله تعالینک آیتلرینی و انبیاسنی
 تکذیب ایتدیلر (ألم نخلقکم من ماء مهین) بز سزی نطفه قدره ذلیله دن
 خلق ایتدکی (جعلناه فی قرار مکین) بعده بزانی موضع قرار محروز
 و محفوظده قیلد فکه اول رحدر (الی قدر معلوم) وقتدن مقدار معلومه
 دکن که انی الله تعالی ولادت ایچون تقدیر ایدوبدر (قدرنا فنعیم القادرون)
 بز اکا قادر اولدق و یا بزانی تقدیر ایتدک بز اکا کمال قدرته قادرلر
 (ویل یومئذ للمکذبین) ویل اول کسه لره که بز اکا و یا اعادهیه قدرتمزی تکذیب
 ایدلر (ألم نجعل الارض کفایتا احیاء و امواتا) بز ارضی بنی آدم ایچون
 احیالینه ظهرنی و امواتلرینه بطنی و عا قیلدقی و یا خود احیاء ایلره مراد
 هر شیئدر که یردن بتر و امواتله مراد هر شیئدر که بتر بلکه یرده بتر
 (وجعلناه فیها رواسی شامخات) و اول ارضده بز جبال طوال ثوابت
 قیلدق (واسقینا کم ماء فراتا) و بز سزه سماء و ارضدن طائلو صولر
 ایچوردک (ویل یومئذ للمکذبین) اول کونده ویل اول کسه لره در
 کیم اشبو نعم امثالنی تکذیب ایدرلر (انطلقوا الی ما کنتم به تکذبون)
 و انلره دینور که شول دنیاده تکذیب ایتدیکرکز عذابه کیدک (انطلقوا الی
 ظل ذی ثلاث شعب) کیدک جهنمک دخانی ظلنه کیم اول اوچ شعبه لودر
 دینلدیکه جهنمدن آتشدن برلسان چیقوب منشعب اولور نوری مؤمنلره
 و دخانی منافقره و لهب صافیزی کافرلره ایریشور انک اوچه انحصارینه
 سبب زیرا که نفسک انوار قدسه نیلدن حجابی حس و خیال و وهمدر
 و یا خود اشبو عذابه مؤدی اولان اوچ شیئدر که بری قوت و اهمه در که
 دماغه حاله در و بری قوت غضبیه در که عین قلبده در و بری قوت شهویه در که
 یسار قلبده در اول اجلسدن دینلدیکه اندن بر شعبه کافرک فوقنده
 و بر شعبه یمینده و بر شعبه یسارنده اولور (لا ظلیل و لا یغنی من الهم)
 اول بر ظلمدر که اول کونک حرندن بر شیئی مزیل اولز و نازک لهبندن
 بر شیئی دفع ایتز (انها ترمی بشرر کالقصر) اول نار شراره لر رمی ایدر که
 هر بری عظمه بناء عظیم و یا شجره عظیمه کبدر (کأنه جالالة صفر)

(کانه)

کانه ناردن جیبع شرار صاری دوه لردر زیرا که شراره ده ناربت
 اولدیغیچون اصفر اولور * دینلدیکه اول اسوددر زیرا که ابلک سوادی
 صفرته مائلدر (ویل یومئذ للمکذبین) ویل انلره کیم انی تکذیب
 ایدلر (هذا یوم لا ینطقون) و انلره دینور که اشبو شول کوندر که بعض
 مواضعده سوتلزلر زیرا که دهشت و حیرت انلری احاطه ایدر (ولا یؤذن
 لهم فیعتذرون) و انلره اذن اولز که اعتذار ایدلر (ویل یومئذ للمکذبین)
 ویل انلره کیم انی دنیاده تکذیب ایدوب تصدیق ایتزلر (هذا
 یوم الفصل جمعنا کم و الاولین) و دخی انلره دینور که اشبو شول کوندر که
 محق و مبطل یلنی فصل ایدیلور اشبو امتک و کرکسه یکن امتلرک بعضی
 تکذیب ایدنلرین جمع ایدرز (فان کان لکم کید فکیدون) اکر
 کندیکزدن بنم عذابم دفعنه چاره کز و ارایسه ایدوب کندیکزی قورتارک *
 اشبو انلرک دنیاده مؤمنلره ایتدکری کیداوزره انلری تقریع و عجزلرین اظهاردر
 (ویل یومئذ للمکذبین) ویل اول کونده مکذبلره کیم عذابدن تخلصه
 چاره لری اولز (ان المتقین فی ظلال و عیون و فوا که ممایشتهون) شول
 عصیانندن صاقناتلر جنتده دائما ظلال اشجارده و عیون مائه و اشتها
 ایتدکری فوا که اکلیله تنعمده درلر (کلوا و اشربوا هنثا بما کنتم تعملون)
 و انلره انده دینور که جنتک طعام و شرابندن اکل و شرب ایدک اول
 سزه اذاسر سائغ اولدیغی حالده دنیاده ایشلدیکرکز اعمال صالحه سیبله
 (انا کذلک نجزی المحسنین) مؤمنین صالحینه بز بویه جزا ایدرز (ویل
 یومئذ للمکذبین) ویل اول کونده تکذیب ایدنلره کیم انلره عذاب
 محلد و خصوصلرینه ثواب مؤبد اولندی (کلوا و تمتعوا قلیلا انکم مجرمومون)
 الله تعالی مکه کافرلرینه دیدیکه دنیاده بهایم کبی زمان یسیرده تکذیبکر
 و عدم ایمانکرله اکل و شرب و تتم ایدک که سز شرک و عصیانکرله
 مجرملرسز (ویل یومئذ للمکذبین) ویل تکذیب ایدنلره کیم نفسلرینی
 تتم قلیل ایچون عذاب دائمه تعریض ایتدیلر (واذا قیل لهم ارکعوا
 لایرکعوا) یحان الله تعالی انلره نماز قیلوک دیسه نماز قیلزردی اشبو
 ثقیف شائنده نازل اولوبدر که بز نمازده انحاء یعنی رکوع ایترز زیرا که
 اول بزه مذلتدر دیردیلر پیغمبریمز صلی الله تعالی علیه و سلم دیدیکه شول
 نمازده خیر یوقدر که انده رکوع و سجود اولیه * و یا خود انلره قبول

وحیه و اتباع دینه تواضع ایدک دینسه استکبار لرندن انی قبول ایتزلر *
 اشبو دلیدر که کفار فروعله مخاطبن اولر (ویل یومئذ للکذبین)
 ویل انلره کیم انی تکذیب ایتدیلر (فبأی حدیث بعده یؤمنون)
 قرآن کتب سماویه بیلنده آیت مبصره و معجزه باهره در که حجج واضحه
 و معانی شریفه یی مشتملدر انی تصدیق ایتحکک کتب سماویه نک قنغیسن
 تصدیق ایدرلر

سورة النبأ وهی اربعون آیه مکیه

بسم الله الرحمن الرحیم

(عم یساءلون) اهل مکه بری برلینه بعثدن سؤال ایدرلر و یاخود
 اهل مکه پیغمبریز صلی الله تعالی علیه وسلم و مؤمنلره استهزاء طریق
 اوزره اندن سؤال ایدرلر و یاخود مؤمنلر و کافرلر اندن سؤال ایدرلر مؤمنلر
 ازدیاد علم ایچون و کافرلر استهزا ایچون (عن النبأ العظیم) نبأ عظیمدن
 سؤال ایدرلر که اول بعثدر (الذی هم فیه مختلفون) که اول بعثده مؤمنلر
 اقرارله و کافرلر انکارله اختلاف ایدرلر (کلا سيعلمون ثم کلا سيعلمون)
 ایمدی انلر انی موتلری عندنده معاینه ایله و یوم قیامتده مشاهده ایله بیلیرلر در
 (ألم نجعل الارض مهادا) بز ارضی ناسه سیر و سکون فراش مبسوط
 قیلدقی (والجبال اوتادا) و جبالی ارض اوزره اوتاد قیلدقی که انکله ارض
 تثبت و استقرار ایده (و خلقناکم ازواجاً) و سزی ذکر و انثی خلق
 ایتدک (وجعلنا نومکم سباتاً) و نومکزی قوای حیوانیه کزه راحت قیلدق
 (وجعلنا الیل لباساً) و کجه یی سزچون غطا قیلدقه که اختفا اراده ایدن
 کشی انک ظلمتیه استتار ایده (وجعلنا النهار معاشاً) و کوندزی سزچون
 وقت معاش قیلدقه که انده تعیش ایده جک شیئی تحصیل ایچون تقلب
 ایده سز (وبیننا فوقکم سبعاً شداداً) و فوقکزه یدی سموات قویه
 محکمه قیلدقه که مرور ازمان انده اثر ایتز (وجعلنا سراجاً وهاجاً)
 و سمواتده سراج متلالی و قاد و یا حرارتده بالغ قیلدقه که اول شمسدر
 (وانزلنا من المعصرات ماء ثجاجاً) و سحابلردن بز ماء سیال انزال ایتدک که
 اندن ارضه سیلان ایدر * دینلدی که مطر سمادن سحابه نازل اولور بعده
 ریاخ اربعه اول سحابی صیقوب اندن مطری یره ارسال ایدر (نخرج به

(حبا)

حبا و نباتا و جنات الفافا) تا که اول مائه بز ناسه قوت اولور بغدادی وارپه
 امثالی حبوباتی و دوابه علف اولور صمان و اوتلق امثالی نباتاتی اخراج
 ایده وز و بوستانلر که اشجاری بری برلینه التفاف ایدوبدر (ان یوم
 الفصل کان میقاتاً) یوم قیامت الله تعالی نک علم و حکمتده خلایق بینتی
 فصل ایدوب ثواب و عقابله جزایه معاد قیلندی و یاخود دنیانک نهایتنه
 حد قیلندی (یوم ینفخ فی الصور فتأتون افواجا) که اول کونده صور نفخ
 اولنوب قبور کزدن محشره فوج فوج جاعات مختلفه کلور سز * دینلدی که
 اشبو امتدن عصات قبرلردن اون صنف حشر اولیرلر در تماملر قرده
 صورتده و حرام خوارلر خنازیر صورتده و ربا اکل ایدنلر باشلری
 اشاغه یوزلری اوزه سورودیلور و حکمه جور ایدنلر کوز سزلر
 و عمللرینه عجب ایدنلر صاغرلر و دلسزلر و قوللری عمللرینه مخالف عاملر
 دللری کوکسلرینه صارقوب آغرلردن ایریکلر آقار و دللرینی چیرلر
 و قومشورینه اذا ایدنلر اللری و یاقلری کیشلر و ناسی سلطانیه غز ایدنلر
 آتشدن بوداقلره اصلشلر و شهواته تبعیتله حق الهی منع ایدنلر جیفه دن
 چرکین رایحه لولر و کبرایله صالسانلر قطراندن شول دریلرینه ملاصق
 جبهر کیشلر حشر اولور * روایت اولندی که معاذ رضی الله تعالی عنه
 بوآیتک تفسیرنده پیغمبریز صلی الله تعالی علیه وسلم سؤال ایتدکده دیدی که
 یوم قیامتده بنم اتم اون ایکی صنف حشر اولور * صنف اول قبرلردن
 قارنلری یسلانلر و عقربلرله طلو حشر اولور که انلر مالارینک زکاتک
 و یرمینلر در که توبه ایتدین وفات ایدنلر در * و صنف ثانی خنازیر صورتده
 حشر اولور که انلر نمازه تهان اولوب توبه ایتدین وفات ایدنلر در
 و صنف ثالث آغرلردن قان کلور حشر اولور که انلر بیلمنده کذب ایدوب
 توبه ایتدین وفات ایدنلر در * و صنف رابع اللری و یاقلری کسک حشر
 اولور که انلر قومشورینه اذا ایدر اولوب توبه ایتدین وفات ایدنلر در
 و صنف خامس جیفه دن چرکین رایحه لولر حشر اولور که الله تعالی دن
 قورقیوب سرده کناه ایدوب توبه ایتدین وفات ایدنلر در * و صنف سادس
 دللری کسک حشر اولور که انلر کذب و شهادت زور ایدوب توبه ایتدین
 وفات ایدنلر در * و صنف سابع دلسز حشر اولور که انلر شهادتی کتم ایدوب
 توبه ایتدین وفات ایدنلر در * و صنف ثامن فرجلردن قبح و صدید سیلان

ایدر حشر اولور که انلر زنا ایدوب توبه ایتدین وفات ایدنلردر * و صنف
تاسع قارنلری آتشله طولو حشر اولور که ظلمه یتیم مالن یوب توبه ایتدین
وفات ایدنلردر * و صنف عاشر یوزلری قرارمش کوزلری کوکرمش
دیشلری اوکوز بونوزی کبی سیورلمش دوداقلری قارنلرینه صارقش
وقارنلری ایسه اویلقلری اوزره دوشمش حشر اولور که انلر شرب خمر
ایدوب توبه ایتدین وفات ایدنلردر * و صنف حادی عشر اجذم و ابرص
حشر اولور که انلر والدینلرینه عاق اولوب توبه ایتدین وفات ایدنلردر
و صنف ثانی عشر یوزلری نوری آیک اون دردی کبی حشر اولور که
صراطی شمشک کبی پکرلر انلر دنیاده اعمال صالحه ایشیلنلر و صلوات
خجسی وقتنده جاعتله ادایه مداومت ایدوب کنهالرینه تابین اولدقلری
حالده وفات ایدنلردر * (وقتحت السماء فکانت ابوابا) و سماء یاریلوب
ملائکه یه نزول ایچون انده قبولر اوله و یاخود کثرت شقوقدن یولار اوله
کیم انی برشی سد ایتیه (وسیرت الجبال فکانت سرابا) و طاغیر هواده
هبا کبی یوریدیلوب بعده سراب کبی اوله یعنی طاغیر صورتنده کورینوب
لکن اجزاسی تفتت و انباشدن حقیقتی قالمیه (ان جهنم کانت مرصادا
لاطاعین ما بآ) جهنم طریق و عمر اولدی جننه یول یوقدر الا جهنمه
اوغرا نغله و یا جهنم بر محلدر که خزنه نار انده کفاری بکیر که انلری نار
قویه لر خزنه جنت انده مؤمنلری بکیر که اوغرا دقلرنده انلری اول محلدن
سهولتله پکروب جننه قویه لر ایددی جهنم تکبر ایدنلره مرجع اولدی
(لابثین فیها احقابا) اول ناردده دهور متابعه ما ککین اولدقلری
حالده * اشبو آتده کفارک ناردن خروجنه دلالت ایدر شی یوقدر
زیرا حقب سکسان بیک و یا یتش بیک ییل ایدوکی صحیح اولدیغی تقدیر اوزره
ینه اول احقابک تنه یسن اقتضاء ایتمز زیرا جائزدر که مراد احقاب مترادفه
اوله حقبک بری تمام اولدیغنده حقب اخر اکا تابع اوله (لایندوقون
فیها بردا ولا شرابا) اول ناردده انلر انک حرنه نفع ایدر برد و یا راحت و یر
نوم ذوق ایتمز و تلذذله ایچلور شراب دخی ایچمز (الاحمیا و غساقا)
بلکه حرری نهایتده ماء و اهل ناریک صدیدنندن سیلان ایدر ماء ایچرلر
(جزاء وفاقا) تا که اول انلرک اعمالنه موافق جزاء اوله زیرا شرکدن اعظم
جرم اولدیغی کبی ناردن اعظم عذاب دخی اولمز اوله اولسه جزاء عمله

(موافق)

موافق اولور (انهم کانوا لایرجون حسابا) زیرا انلر حساب اولنلرندن
خوف ایتمزلدی شول سبب نکه بعثد ایمانلری یوغیدی (و کذبوا یا یاتنا
کذبا) و بزم آیتلر یمزی تکذیب ایدرلدی (وکل شی احصیناه کتبا)
اعمالدن هر شیئی بز کتبتله لوح محفوظه اثبات ایتدک انلر اونودرلر سده
بز اونوتمز (فذوقوا فلن نذیکم الا عذابا) و انلره دینور که اشبو عذابی
ذوق ایتدک که بز عذابکزی آرتوررز (ان المتقین مفازا) متقیلر ایچون
موضع فوز یعنی جنت و یاناردن نجات واردر (حدائق واعنابا) انده
بوستانلر واردر که درلو اشجار مثمره ایله علی الخصوص اوزم اصمه لر یله
معمورد (وکوا کب اترابا) و جاریه لر و ارکه مملری یومریلوب سنده
مستویه لر در (وکا سا دهاقا) و شرابه مملو و یا متابع کاسلر واردر
(لایسمعون فیها لغوا ولا کذابا) اول شرابی ایچرکن قول باطل
و یا کذب ایشمز (جزاء من ربک عطاء حسابا) تا که ربک جل شانهدن
وعدی مقتضاسیجه ثواب اولان عملارندن کثیر عطا اوله (رب السموات
والارض و ما بینهما الرحمن) که اول سموات و ارض و ما بینهمانک
خالقیدر دنیاده کافه خلقه رزق و یرمکه رحمت ایدیدر (لایملکون
منه خطابا) اول الله تعالی یه شفاعتله خطابه قادر اولمز مکر که ینه انک
اذنیه اوله یعنی اهل سموات و اهل ارض یدرنده ثواب و عقاب امرنده
الله تعالی دن بر حکم یوقدر که انده زیاده و نقصانله تصرف ایدر مکر
انک انلره اذنیه اوله (یوم یقوم الروح و الملائکه صفا) یوم قیامتده
روح و ملائکه صف اولوب طورهلر * مفسرون روحده اختلاف ایشدیلر
تکیم سورده اسراده تفصیلی یکدی یوم قیامتده روح یالکز بر صف
اولور و سائر ملائکه جمعی بر صف اولور و یا انکه مراد جبریل علیه
السلامدر (لایتکلمون الا من اذن له الرحمن و قال صوابا) اول کونده
خلا ثقت کلیسی کر کسه اهل سموات و اهل ارضک معرفت و طاعتده
الله تعالی یه اقرب و اشر فلری و کر کسه انلرک غیریلری انک عذابندن خوف
ایدوب شفاعتله تکلم ایتمز مکر اولکه الله تعالی اکا شفاعته اذن و یره
ودنیاده اول (لا اله الا الله) دیوب مقتضاسیله عمل ایتش اوله (ذلک
الیوم الحق فن شاء اتخذ الی ربه ما بآ) اشبو یوم قیامتک وقوی ثابتدر
اولکه انک ثوابنه نائل اولمق دلیله ایمان و طاعتله اکا مرجع اتخا ایدر

(انا انذرناكم عذابا قريبا) بز سزى عذاب قريبله تخويف ايدرزكه اول يوم قيامتدر (يوم ينظر المرء ما قدمت يداه) اول كونده كشي خير و شردن تقديم ايتديكى على كورر مؤمن عمل و حساب يسيرنه و كافر عمل و حساب عسيرنه نظر ايدر (ويقول الكافر ياليتنى كنت ترابا) و كافر ديركه نو ليدى دنيا ده تراب او لوب خلق و تسكيف او لنميدم و بو كونك حسابن كور ميديم * مقاتل ايدر يوم قيامتده الله تعالى و حوش و هوام و طيورى جمع ايدوب خصوصتيرين فصل ايدو بو نوزلیدن بو نوز سزك حقن آليويه بعده امريله جييعن تراب ايدو كافر اتى كور يچك نو ليدى دنيا ده خنزير صورتنده اولوب بو كونده تراب او ليدم ديه * دينلديكه كافرله مراد ابليسدر كه آدم عليه السلامك ترابدن خلق اولنديغنه تعيب ايدوب كندينك نازدن خلق اولنديغنه افتخار ايتشيدى يوم قيامتده آدم عليه السلامه و مؤمنلره ايريشن كرامات و رحمتى و ابليس كندويه و اولادنه ايريشن محنت و شدت كور يچك نو ليدى بندخى بونلر كى ترابدن خلق اولمش اوليدم ديوتنى و نياز ايليه

سورة النازعات وهى ست واربعون آية مكية

بسم الله الرحمن الرحيم

(و النازعات غرقا و الناشطات نشطا و السابحات سبحا فالسابحات سبحا فالدبرات امرا) الله تعالى اقسام ايتدى ملائكة موت صفاتيله كيم انلر ارواح كفارى ابدانلرندن نزعه اغراقله نزع ايدرلر و يا اول ملائكة اجساده غرق اولمش نفوسى نزع ايدرلر و ارواح مؤمنينى رفق و نشاطله اخراج ايدرلر و اتى اخراجده غواصك سبحى كى سبحات ايدرلر چنانكه اعماق بچردن برشيئى اخراج ايدرلر اوليه اولسه ارواح كفارله ناره و ارواح مؤمنينله جنته سبقت ايدرلر بعده اول كفارك عقابى و مؤمنينك ثوابى امرنى تدبير ايدرلر كفاره آلام مؤمنلره لذات اعداديله و يا خود ايكي اولكيلرله مراد ملائكة موت اولوب باقياتله مراده ملائكة دن طوائف اوله كه مضيلرنده سرعت و امر اولندقلرى شيئه سبقت ايدوب امرى تدبير ايدرلر و يا خود مراد صفات نجوم اوله كه مشرقدن مغربه نزع اولنور نزعه غرقله فلكن قطع ايدوب حتى كه اقصى مغربه منحنى اولغله و بر بچردن

(برج)

برج آخره نشاطله خروج ايدر و فلكنده سبحات ايدوب سيزده بعضى بعضى سبقت ايدر حر كنده برى برندن اسرع اولديغچون اوليه اولسه اول نجومه عائد اولان امرى تدبير ايدرلر اختلاف فصول و تقدير ازمنه و ظهور مواقيت عبادات كى وقتا كه نجومك مشرقدن مغربه حر كى قسريه و بر جدن برج حركتى ملائكة اولديغچون اوليكى به نزع و ايكنجى به نشط تسميه اولندى و يا خود مراد صفات نفوس فاضله اوله شول حالده كه ابدانن مفارقت ايدو زيرا اندن نزع شديدله چيقوب عالم ملكوته نشط ايدر و انده سبحاتله حظائر قدسه سبقت ايدر شرف و قوتچون مدبر ابدان اولور و يا خود مراد نفوس فاضله عالم سلوكنده شهواتدن انتزاع ايدوب عالم قدسه ناشط اولور مراتب ارتقاده سبحاتله كالانه سبقت ايدر حتى كه مكملاتدن اولور و يا خود مراد غزائك انفس و يدلر ايدر كه قوسلرى اغراق سهامله نزع ايدوب سهامى رميه ناشط اولور و بر و بچرده سبحاتله حرب عدويه سبقت ايدوب انك امرنى تدبير ايدرلر و يا خود مراد صفات خيللر ايدر كه اول عنانلرنده نزع ايدوب دار اسلامدن دار كفره خروج ايدر و جرينده سبحاتله عدويه سبقت ايدوب ظفر امرنى تدبير ايدر يعنى اشبو اشياء حقيچون سزالته بعث اولنور سز (يوم ترجف الراجفة) شول كونده كه اجرام ساكنه نفخة اولى و قوعيله تزلزل و تحرك ايدوب خلقك كليسنه اندن موت ايرر (تتبعها الرادفة) كه اكا نفخة ثانيه مرادف اولوب انكله جميع خلق حيات بولور لكن اول ايكي نفخة اراسنده قرق ييل مرور ايدر (قلوب يومئذ واجفة) اول كونده قلوب خافقه و مضطربة و اما كيندن زائله در (ابصارها خاشعة) اول قلوب صاحبلىريك بصيرلى كوريلن اهلانندن ذليله در (يقولون ائنا لمرءودون فى الحافرة) اول قلوب و ابصار صاحبلى دنيا ده استهزاء و بعضى انكار طريق اوزره ديرلر ديكه بز مومنز دنصكره ينه اوليكى حالته يعنى حياته رد اولنور مير (ائذا كنا عظاما نخرة) بز چوريمش ككلر اولديغمز دنصكره بعث اولنور مير (قالوا تلك اذا كرة خاسرة) ايمدى مومنز دنصكره كير و حياتمز صحيح اولمى تقديرى اوزره بز اتى تكذيبلره مومنز دنصكره اصابت ايديله رجعتز ذات خسران اولور ديرلر (فاتماهى زجرة واحدة فاذا هم بالساهرة) ايمدى سز الله تعالى به صعب ظن ايتكز اول نفخة اخيره دكل الاصيحة واحدة در انك

بع (٢١)

عقبنده خلائق بطن ارضده اموات ایکن یراوزره احیا اولنورلر (هل آتیک
 حدیث موسی) یا محمد سکا موسی علیه السلامک خبری کلدیمیکه انکله
 قومک تکذیبینه و اذاسنه صبر ایدیه سن (اذنادیه ربه بالوادی المقدس طوی)
 شول وقتکه رب تعالی اکا طوی نام وادیده ندا ایتدی (اذهب الی فرعون
 انه طغی) دیدیکه یاموسی فرعونه وارکه اول استکبار ایدوب الله تعالی به
 کافر اولوبدر (فقل هل لک الی ان تزکی) اکا دیکل که میلک وارمیدر کیم
 الله تعالینک وحدانیتنه اقرارله شرکدن تطهر ایدوب براهینله معرفته
 واصل اوله سن (وأهدیک الی ربک فتخشی) وسنی انک معرفته ارشاد
 ایدوب اداء واجبات و ترک محرماتله اندن خشیت ایدیه سن (فاره الآیه)
 الکبری) اویله اولسه موسی علیه السلام اکا عصا ویدیضایی صدقته
 علامت کوستردی (فکذب وعصى) اویله اولسه موسایی تکذیب ایدوب
 الله تعالی به عصیان ایتدی (ثم ادبر یسعی) وطاعتدن ادبار ایدوب
 امری ابطالنه سعی ایتدی (فخسر فنادی) سحره و جنودنی جمع ایدوب
 کندی و یا منادی ندا ایتدی (فقال انار بکم الاعلی) و دیدیکه بن سزک
 رب اعلا کزین بنم فوقده رب یوقدر * دینلدیکه یعنی اصنام ربلردر فرعون
 ایسه اول اصنامک وانلرک ربیدر (فاخذہ الله نکال الآخرة والاولی)
 اویله اولسه الله تعالی انی دنیاده غرق و آخرتده حرقله عذاب ایتدی
 (ان فی ذلک لعبرة لمن یخشی) فرعون و قومنک اهلاکنده عبرت واردر
 اول کسه به کیم شانی الله تعالیدن خوف اوله بعده بعثی انکار ایدلره خطاب
 ایدوب دیدیکه (ما أنتم اشد خلقا ام السماء) خلق اولتمتده سزعی
 اصعبسز یو خسه سمایی اگرچه الله تعالینک قدرتنده ایکیسی مساویدر
 (بناها) الله تعالی اول سمایی بنا ایتدی (رفع سمکها فسواها) اول
 سماتک سقفنی رفع ایدوب انی عیبسز مستویه قیلدی و یاخود انی کواکب
 و تداویردن کمالی تمام اولور شیتله تمیم ایتدی (واغطش لیلها و اخرج
 ضحیها) و انک کیمجه سن قرا کو ایدوب کونشک نورنی ابراز ایتدی
 (والارض بعد ذلک دحیها) الله تعالی سمایی خلقتدنضکره ارضی بسط
 ایدوب سکننا ایچون تمهید ایتدی (اخرج منها ماءها و مرعبها) اول
 ارضدن عیوننی تفجیرله مائنی و دواب و انعامی ایچون نباتنی اخراج ایتدی
 (والجبال ارسبها) و طاغری ارض اوزره اثبات ایتدیکه ساکن اولوب

(اضطراب)

اضطراب ایتبه (متاعا لکم ولانعامکم) تا که انکله سزی و مواشیکزی
 تمتیع ایدیه وز (فاذا جاءت الطامة الكبرى) چنانکه داهیه کبری کله که
 اول سائر داهیه لره غالب اولور که اول یوم قیامت و یا فسخه ثانیه و یا شول
 ساعتدر که انده اهل جنت جنته و اهل نار ناره کیرر (یوم یذکر الانسان
 ماسعی) شول کونده که انسان دنیاده خیر و شردن ایشلیوب فرط غفلت
 و یا طول مدتدن اونوتدیغی اعمالنی صحیفه سنده مدون کورمکله تذکر ایدر
 (وبرزت الجحیم لمن یری) و نار اظهار ایدیه هر رائی به بر حیثیله کیم
 انی کورمک کسه قالمیه (فاما من طغی و آثر الحیوة الدنیا فان الجحیم هی
 المأوی) اما اول کسه کیم طغیان ایدوب حتی که کافر اوله و شهواته اتباعله
 حیاة دنیایی آخرت اوزره اختیار ایدیه ایمدی نار جحیم اکا قرار کاهدر
 (واما من خاف مقام ربه ونهى النفس عن الهوى فان الجنة هی المأوی)
 اما اول کسه که مبدأ و معادی بیلوب یوم قیامتده الله تعالینک در کاهنده
 قیامتدن خوف ایدیه و نفس انی مهلکه ایدیکن بیلوب اشتها ایتدیکی محرماتدن
 نهی ایدیه جنت اکا قرار کاهدر (یسئلونک عن الساعة ایاں مرسیها)
 اهل مکله سکا سؤال ایدرلر قیامتدنکه اول نوقت ظاهر و ثابت اولور
 (فیم انت من ذکرها) سن انلره انی ذکردن و وقتنی تبییندن بر شیتده
 دکلسن زیرا انلره انی ذکرک انلرک ضلالن آرتورر انک وقتی ایسه الله تعالینک
 استیشار ایتدیکی علوم مغیبه دندر (الی ربک منتهاها) انک نوقتده
 اولسنک منتهای علمی الله تعالی به عائد اولور من بعدانی سؤالدن منتهی اولغل
 (انما انت منذر من یخشیها) یا محمد سن دکل الا انک قیامتدن خوف
 ایدنلری تخویف ایدیجیسنکه تخویفک انلره نفع ایدر (کانهم یوم یرونها
 لم یلبثوا الا عشیة اوضحیها) کفار یوم قیامتی کور دکرنده کویاکه
 دنیاده و یا قبورده مدت مکثلری بر کونک عشیه سی و یا ضحیسی دکلو
 زمان قلیل ظن ایدرلر

سورة عبس وهی احدى واربعون آية مكية

بسم الله الرحمن الرحيم

(عبس و تولى ان جاءه الاغی) روایت اولندیکه عبد الله بن ام مکتوم
 پیغمبر عز صلی الله تعالی علیه وسلمه کلوب صنایید قریش ایسه انک قننده

ایدی انلری اسلامه دعوت ایدردی عبد الله ایسه اعمی اولدیغندن
پیغمبریمز علیه السلام انلر ایله تشاغلن بیلوب دیدیکه الله تعالی نیک سکا
تعلیم ایتدیکندن بکا تعلیم ایت دیو قولنی تکرار ایلدی پیغمبریمز علیه السلام
کلامی قطع اولندیغنه کراحت ایدوب اندن اعراض ایتدی اول سببدن
اشبو آیت نازل اولدی اکا بناء پیغمبریمز صلی الله علیه وسلم اکا اکرام
ایدردی وانی کوردیکنده مرحبا یا عبدالله ربم جل شانہ سنکچون بکا
عتاب ایتدی دیو اکا سویلردی ایکی دفعه ده غزایه کتدیکنده مدینه یه
انی خلیفه ایتدی یعنی محمد صلی الله علیه وسلم ابن ام مکتوم نام اعمی
اکا کلدیکنده یوزین بورتردی و صنادید قریشه اقبال ایدوب اندن یوزین
دوندردی (وما یدریک لعله یزکی) سکا نه شیء بیلدر دیکه اول سنک
علمکله منتفع اولیه بلکه عمل صالحه و سندن تعلیم ایتدیکی شیئله ذنوبندن
ارینه (اویدکر قنعه الذکری) و یا قرآنله متعظ اولوب وعظک اکا نفع
ایده (اما من استغنی فانت له تصدی) اما اولکه نفس و مالیه استغنا
ایدوب اسلام و وعظکدن تکبر ایده سن اکا اقباله تعرض ایدرسن یعنی
سنک کی عظیم الشانه لایق اولمکه غنی یه اول معامله یی ایده سن *
دینلیدیکه بو آیت کریمه نزولندنصکره پیغمبریمز صلی الله علیه وسلم هیچ
بر فقیرک یوزینه کراحتله نظر ایتمز و غنی یه اقباله تعرض ایتزدی (وما علیک
ان لا یزکی) و الحال سکا باس یوقدرکه اول اسلامه تطهر ایتدیکنده انک
اسلامنه حرصک سنی فقیردن اعراضه بعث ایده زیرا سکا واجب اولان
انجق تبلیغدر غیری دکل (واما من جاءک یسعی و هو یخشی فانت عنه
تلهی) اما اولکه طالب خیر اولوب سکا سرعتله کلور ومع ذلك الله
تعالیدن خوف ایدر سن ایسه اندن تغافل ایدرسن (کلا) ایددی
من بعد انک کی فعلدن منتهی اول (انها تذکرة) اول قرآن موعظه در
(فن شاء ذکره) عباد الاهدن اولکه دیلر انی حفظ ایدر وانکله متعظ
اولور و یا خود الله تعالی نیک دیلدیکی کسه انی فهم ایدر انکله متعظ اولور
(فی صحف مکرمة) اول قرآن صحیفه لرده مثبته درکه عند الله مجله
و معظمه در (مرفوعة مطهرة) که اول سماء سابعده مرفوعة القدر
اولوب ایدی شیطا طیندن منزله در (بایدی سفره کرام بررة) شول کاتبلر
ایدیه کیم عند الله انلر کریملر امرینه مطیعلردر (قتل الانسان ما اکفره)

(کافره)

کافره لعنت اولسونکه کفرنده عجب شدید اولور * دینلیدیکه اول عتبه
ابن ابی لهبدر اشبو اکا اشنع دعواتله بد دعادر و کفرانده افراطنه تعجبدر
(من ای شیء خلقه) مع هذا یلورکه الله تعالی انی نه شیتدن خلق ایدوبدر
(من نطفة خلقه فقدره) انی نطفه دن خلق ایدوب بعده اعضاء و اشکال دن
اکا صالح اولان شیئی تهیئه ایتدی و یا انی اناسی قارنده طور دن طوره
تحویلله آخرده احياء ایتدی (ثم السبیل یسره) بعده اکا اناسی قارندن خروجی
آسان ایتدی و یا اکا خیر و شر طریقنی تذلیل ایتدی اشبو معنی ایما ایدرکه
دنیا طریق اولوب مقصد انک غیری اوله (ثم اماته فاقبره) بعده انی اماته
واقبار ایتدی اماته واقباری نعمدن عد ایتدی زیرا که اماته فی الجملة حیاة
ابدیه یه و لذات خالصیه و صلندر و قبرده انک ستر اولمسنده اکا مکرمه
واردرکه بهایم کی یوزنده براغیلور ایتدی (ثم اذا شاء انشره) بعده انی
اقباردنصکره دیلدیکی و قنده بعث ایچون آنی انشار ایدر (کلا) امر اول
کافرک دیلدیکی کی دکلدر و یا خود حقاکه (لما یقض ما امره) اول رب
تعالی نیک امر ایتدیکن قضا و فرض ایتدیکن ادا ایتدی (فلینظر الانسان الى
طعامه) انسان طعامنه نظر ایتسونکه رب تعالی نیچه تقدیر و تدبیر ایدوب
حیاتنه سبب قیلدی و یا انک مدخلنه و مخرجنه نظر ایتسون (انا صببنا الماء صبا)
که بز یغموری سمدن یره دو کدررز (ثم شققنا الارض شقا) بعده نبات و شجرله
یری شق ایدرز (فانبتنا فیها حبا و عنباً) و انده بغدادی و اریه مثلی حبوب
و باغلرده اوزم بتوررز (و قضبا و زیتونا و نخلا و حدائق غلبا) و قنای و کراث
مثلی بقولکه اصلندن قویاریلور و زیتون و خرما اغاچلری و بوستانلر
بتوررز که اشجار کثیره و کبیره اولور (و فاکهة و ابا) و الوان فاکه کلا
و مرعی بتوررز که انی ناس زراعت ایتوبدر (متاعکم و لانعامکم) تاکه
اشیاء مذکور دنک بعضی سزه طعام و بعضی دوا بکره علف اوله (فاذا جاءت
الصاخة) چانکه نفخة ثانیه کله که اول شدتدن قریب اوله کیم اسماعه صم
ایر کوره (یوم یفر المرء من اخیه و امه و ابیه و صاحبته و بنیه) اول کونده کشی
قرداشندن و انا و باباسندن و زوجه و ابناسندن فرار ایده تاکه حق لنده
تقصیر یچون انی مطالبه ایتیلر (لیکل امری منهم یومئذ شان یغنیه) اول
کونده انلردن هر کسه نیک برشانی اولور که اهتمامده اول اکا کفایت

ایده (و جوه يومئذ مسفرة ضاحكة مستبشرة) اول كونده يوزلر اولور كه مضیئه و مشرقه در و نائل اولدیغی كرامته مجبه و فرحه در (و جوه يومئذ علیها غبرة ترهقها فترة) و اول كونده يوزلر اولور كه اوزرلرینه غبار و كدوره بورر و سواد و ظلمه دورر (اولئك هم الكفرة الفجرة) ايمدی اول اوصافلو كسه لر فاجرلر در اول اجلدن سواد و جهله غبره انلر جمع اولور

سورة التکویر وهی تسع وعشرون آية مكية

بسم الله الرحمن الرحيم

(اذا الشمس كورت) چكانكه كونش مظلم اوله و یا ضوئی كیده و یا دوريله پیغمبریمز صلی الله تعالی علیه وسلم ایدر برکسه كه عین قبله يوم قیامته نظر ایتك دیلده اشبو اذا الشمس كورت سوره سنی تدبرله اوقیه * ابن عباس رضی الله تعالی عنهما ایدر يوم قیامتده الله تعالی شمس و قر و نجومی تكویر ایدوب بحره القاء ایده بعده ریح دبوری اكا بعث ایدوب حتی كه انی طوتش دیروب نار ایده (واذا النجوم انكدرت) و چكانكه یلدزلر یره دوشه دینلدیكه اول كونده یلدزلر یغمور كی یا غوب یره صاچله (واذا الجبال سیرت) و طاغلر یر یوزندن كیدریلوب هبا قیلنه (واذا العشار عطلت) و شول ناقله لر كه جلالی اون آیه ایریشه كه اول عربك انفس مالاریكن اول كونك اهوالنندن راعیسنز مهمل ترك اولنه (واذا الوحوش حشرت) و وحوش هر جانبندن جمع ایدیه و یا قصاص ایچون بعث ایدیه و یا اماته ایدیه (واذا البحار سجرت) و دریالر قزدریله و یا برینه ایدیلوب بحر واحد قیلنه و یا صولری قوریدیلوب بر قطره قالمیه * ابی بن كعب ایدر يوم قیامتدن اول اون ایکی آیت ظهور ایدیسردر كه اول ناس سووقده معاملاتده مشغوللر ایكن كوره لر كه كونشك ضوئی كیده و یلدزلر دوکیله و طاغلر چالقنوب یره برابر اوله و انس و جن و وحوش و طيور و دواب فزعندن بر برینه قاریشه و حامل ناقله لر معطل قاله و دریالر قزدریله انلر اول حالده ایكن یرلر تایدنجی یره دكین و كوكلر تایدنجی كو كه دكین برکزین یاریله اول حالده بر ریح كلوب انلرک جیعن اماته ایده * ابن عباس رضی الله عنهما ایدر اشبو ذكر اولنان سورده احوال قیامتدن اون ایکی خصصتک

(التيسی)

التيسی دنياده اشبو مذکوردر و التيسی ايسه من بعد آخرته ذكر اولنه جقدر (واذا النفوس زوجت) بعث عندنده ارواح اجسادہ قرین قیلنور و یا نفوس مؤمنین حوره و نفوس کافرین شیطانیه قرین قیلنور و یا صالح صالحه و طالح طالحه قرین قیلنور (واذا الموءدة سئلت بائى ذنب قتلت) شول دیری ایکن دفن اولنان بناتک قاتلنی تبکیت ایچون نه ذنبه قتل اولندك دیو سؤال اولنور زیرا كه عرب زمان جاهلیته فقر و عار خوفیه بناتلرین دیری دفن ایدرلردی (واذا الصحف نشرت) و اعمال دفتلری آچیلور حالبو كه موت عندنده دورلشدی (واذا السماء كشطت) سماء اما كنندن ازاله و نزع اولنور جلدك ذبیحه دن تزع اولنمی كی (واذا الجحیم سعرت) و جهنم الله تعالیك اعدا سیچون قزدریلور (واذا الجنة ازلفت) و الله تعالیك اولیاسنه جنت تقریب اولنور (علمت نفس ما احضرت) اول حالته هر نفس خیر و شردن نه احضار ایتدیكن یلور (فلا أقسم بالخنس الجوار الكنس) اقسام ایدرین شول کواكب رواجله کیم کوندزده اختفا و کیچده ظهور ایدر سماءه جاری اولور شمسك ضوئی تحتنده كزلنور اول نجوم سیاره خسه در کیم اكا زحل و مشتری و مریخ و زهره و عطارد دینور (واللیل اذا عسعس و الصبح اذا تنفس) و لیلله کیم ظلامی اقبال ایده و صبحله کیم فجرک طلوعیله ضوئی مرتفع اوله (انه لقول رسول کریم) اول قرآن رسول کریم جبریل علیه السلام قولیدر كه الله تعالیدن كتور بدر (ذی قوّة) اول قوت صاحبیدر انك قوتندندر كه قوم لوط قراسنی ماء اسوددن قلع ایدوب قنادی اوزره سماءه رفعدن فصكره التی اوستنه دوندردی و ارض مقدسه ده بعض عقبای اوزره ابلیسی عیسی علیه السلامه سویلشور کوردیکنده قنادیله بر کره نفخ ایدوب هندده اقصابی جبيله ایردردی و قوم ثموده بر کره صحیه سیله جیعنی هلاک ایتدی و طرفه العیندن اسرع زمانده سمدن ارضه هبوط و ارضندن سماءه صعود ایدر (عند ذی العرش مکین) عرش عظیم صاحبی رب تعالی عندنده منزلت و مکانت رفیعہ صاحبیدر (مطاع ثم امین) سماءه ملائکه اكا اطاعت ایدر كه لیلله معراجده ابواب سمواتی اكا فتح ایتدیلر و خزنة جنت اكا جنتک ابوابی كذلك فتح ایتدیلر و رساله و وحي تبلیغه الله تعالیك امینیدر (وما صاحبکم

مجنون) صاحبكز محمدكه قرآنله سزى ايمانه دعوت ايدر سزك زعم
ايتديككز ككى مجنون دكلدر (ولقد رآه بالافق المبين) محمد عليه
السلام جبريل عليه السلامى صورت اصليه سى اوزره جانب شرقدن
افق اعلاده كوردى (وما هو على الغيب بضنين) اول محمد عليه
السلامه الله تعالىنك وحينى تبليغه بخيل دكلدر كه اكا وحى اولناندن بر شئى
كتم ايد ويا مئتم دكلدر كه وحيدن بر شئى نقص ايد ويا انك اوزره زياده
ايد (وما هو بقول شيطان) واول قرآن شول استراق سمع ايدن
شيطان مردود مطرودك قولى دكلدر (فان تذهبون) اويله اولسه
قرآنى قويوب نه طريقه كيدر سز حالبو كه انده صدورده اولان جهل
وعمايه شفا واردر (ان هو الا ذكر للعالمين) اول قرآن دكل الانس
وجنه موعظه در (لمن شاء منكم ان يستقيم) سزدن اول كسه يه كيم
دين حقه دخول واتباعله استقامت ايتك دليله (وما تشاؤون الا ان
يشاء الله رب العالمين) سز استقامتى ديلز سز مكره عالمك ربى الله
جل شاناه فضل وتوفيقله سزك استقامتكز دليله زيرا امورك كليسى انك
مشيئيله در

سورة الانفطار وهى تسع عشرة آية مكية

بسم الله الرحمن الرحيم

(اذا السماء انفطرت) چنانكه سماء الله تعالىنك خوفيله منشق اوله
(واذا الكواكب انتثرت) وبلدزليره دو كيلوب داغيله (واذا البحار فجرت)
ودريال برى برلر يه آقيديله آجى دريالر طتلورلر يه قارشيه وارلرندن
برزخ كيدوب جييعى متحد اوله (واذا القبور بعثرت) وقبورك
تراى قلب اولنوب موتى طشره چيقاريله (علمت نفس ما قدمت واخرت)
اول وقتده هر نفس تقديم ايتديكى عمل وكرك صدقه يى وتأخير ايتديكى
سنت وكرك تركنى بيلور (يا ايها الانسان ما غرتك بربك الكريم) يا انسان
سنى نه شئ آلدادى حتى كه عصيان وكفران ايتك اول ربك كريمه كيم
تائبك ذنوبندن تجاوز ايدر كريمك كرمه اغترار ايسه كفران نعمتدرو محض كرم
اقتضا ايتك كه ظالمى اهمال ايد وموالى ايله معادى ومطيعله عاصى بينى تسويه
ايد فكيفكه اكا صفت قهرو انتقام دخی منضم اوله ايمدى كثر كرمى طاعته
جدى استدعا ايدر يوخسه انك كرمه اغترارله عصيانه انهماكى دكل (الذى

(خلقتك)

(خلقتك) كه اول سنى نطفه دن خلق ايتدى (فسويك فعدلك) اول سنى معتدل
القامه قيلولب اعضاى تسويه وسنده عقلى تركيب ولسانكى سويلتدى
(فى اى صورة ماشاء ربك) قنغى صورته ديلديسه حسنه ويا قبيحه
طويله ويا قصيره در سنى تركيب ايتدى (كلا) ايمدى الله تعالىنك
كرمه اغترار ايتك (بل تكذبون بالدين) بلكه اكا اغتراره سبب اصلى الله
تعالى يه وبعمه ايمانكز اولميوب حساب وجزايه مكذبين ايتكز (وان عليكم
الحافظين كراما كاتبين) حالبو كه اعمالكز اوزره ملائكه دن عند الله
كرام كاتبلر واردر اعمالكزى يازارلر (يعلمون ما تفعلون) خير وشر دن
ايشلدريكزى بيلورلر (ان الابرار لفي نعيم) صالحلر جنتده نعيمده در (وان
الفجار لفي جحيم) وفاجرلر نار جحيمده در (يصلونها يوم الدين) كه انلر اول
ناره يوم جزاده كيرلر (وما هم عنها بغائبين) انلر اول ناردن غائب اولزلر
وابدا انده قرار ايدوب چيقمازلر (وما ادرىك ما يوم الدين ثم ما ادرىك
ما يوم الدين) يوم جزا نه عظيم الشان ايتديكى سكا بيلدردى سن انى
كور مينجه نه ايتديكى بيلور دكلسن يوخسه اول درايه ايله ادراك اولنكز
(يوم لا تملك نفس لنفس شيئا والا امر يومئذ الله) اول كونده نفس كافره
منفعتدن هيچ برشيئه مالك اولمز زيرا اول كونده قهر وغلبه ايله حكم نافذ
الله جل شاناه يه راجع ومختصدر

سورة المطففين وهى ست و ثلاثون آية مكية وقيل مدنية

بسم الله الرحمن الرحيم

(ويل للمطففين) ويل شونلره كيم كيل ووزنده نقص ايدرلر * ابن عباس
رضى الله عنهما ايدر ييغيمر يمز صلى الله تعالى عليه وسلم مدينه يه قدومنده اهل
مدينه كيلمده ناسك اخبثى ايديلر بو آيت نازل اوليحق احسنى اولديلر
حديثده كلديكه بش خصلت سيئته يه بش بليه جزا اولور بر قومكه نقص
عهد ايدلر الله تعالى انلره عدولرين تسليط ايدر وبر قومكه الله تعالى
انزال ايتديككز غييره حكم ايدلر انلرده فقر منتشر اولور وبر قومكه انلرده
فاحشه ظاهر اوله انلرده موت منتشر اولور وبر قومكه كيلى نقص ايدلر
انلر قحطله اخذ اولنورلر وبر قومكه زكاتى منع ايدلر انلردن يغمور حبس
اولنور (الذين اذا كاتلوا على الناس يستوفون واذا كالوهم او وزنوهم

يخسرون) ايمدی مطففين انلردر که ناسدن حقربنی اکتیال ايدر
اولسه لکال اوزره آلورلر و چان ناس ايچون کيل ويا وزن ايدر اولسه ل
نقص ايدرلر (الايظن اولئك انهم مبعوثون ليوم عظيم) اول فعلی ايدنلر
استيقان ايتزلر ميکه انلر يوم عظيم ايچون بعث اولنلر ايمدی انک وقوعن
ظن ايدن کشی انک امثالی قبایحه تجاسر ايتز فکيفکه انی تيقن ايده
(يوم يقوم الناس لرب العالمين) شول کونده که ناس قبرلرندن الله تعالينک
امر و جزاسيچون قيام ايدلر * دينلديکه ناسک اول کونده قیامی بشيوز
ييل دکلو اولور لکن اول قيام مؤمنه زوال شمس دکلو اولور و کافری عرق
الجام ايدوب ديه که راضی اولدم اگر چه بن ناره کوندريلور سنده * مقدار
رضی الله عنه ايدر پیغمبریمز صلی الله تعالی علیه وسلمدن ایشدم دير که
يوم قيامت اولديغنده کونش ناسه بر ميل ويا ايکی ميل دکلو قریب اولوب انک
حرندن تريلدر کيملرينک تری اوکجه سنده و کيملرک ديزلرينه و کيملرک اندن
يوقارويه ايريشه حتی کيملرک تری اغزنه ايريشوب اکا لجام کبی اوله
(کلا) ايمدی اول کيل و وزنده نقصدن و بعث و حساب غفلتدن ارتداع
ايدک (ان کتاب الفجار لفي سجين) فاجرلرک اعمالی يازيلان کتاب سجينده در که
اول انس و جنندن فاجرلرک اعمالی جامع کتابدر * دينلديکه سجين ارض
سابعه اسفلدر که ارواح کفار انده در پیغمبریمز صلی الله تعالی علیه وسلم ايدر
سجين یدی ارضک اسفلدر و عليون ايسه يدنجی سماءه عرشک التنده در
کعب الاحبار رضی الله عنهدن مرويدر که فاجرک روحی سماءه اصعاد
اولنوب سماء انی قبول ايتيچک ارضه اهباط ايديلور اولدخی ايتيچک
يدنجی ارضک التنه کوندريلور حتی که اول سجينه ايردريلور که ابليسک
جنودی موضعيدر و ياخود سجين شول صخره در که ارض سابعه نك
آلنده در يشلدر سمانک يشلاکی اندنر فجارک کتابی اول صخره آلتنه قونور
ابليسک سلطنتی انده نهايت بولور (وما ادريک ما سجين) سجينک نه
ايدیکنی سکا نه بيلدردی (کتاب مرقوم) اول بر دفتر در که انده يازيلور
شوروردن اولکه فجار انی ايشلر و اولکه عاقبتده انلر اکا ایرر (ويل
يومئذ للکذابين) اول کونده ويل اول کسه لره درکيم دنياده حتی
تکذيب ايتدیلردی (الذين يکذبون بيوم الدين) که انلر يوم جزای
تکذيب ايدرلر (وما يکذب به الاکل معتدثيم) انی تکذيب ايتز الاول

(کسه که)

کيمسه که ظلمده حدی متجاوز اولوب رب تعالی به عاصيدر که اول وليد
ابن المغیره واصحابيدر (اذا تلى عليه آياتنا قال اساطير الاولين) چان اکابزم
قرآنمز تلاوت اولنسه انی متقدمينک احاديث کاذبه سيدر دير اويله اولسه
شواهد نقل اکا نفع ايتز دلایل عقل نفع ايتديکی کبی (کلا) ايمدی بوقولدن
ارتداع ايدک (بل ران علی قلوبهم ما كانوا يکسبون) بلکه اعمال خيسته دن
کسب ايتدکری شیء انلرک قلوبنه غالب اولوب انکله حق و باطل بيننی
تميزدن قلبری اعمی اولدی زیرا که کثرت افعال حصول ملکاته سيدر *
پیغمبریمز صلی الله تعالی علیه وسلم ايدر چان بر عبد ذنب ايده قلبنده بر نکته
سوداء حاصل اولور ذنبی آرتوردیغجه انک سوادین آرتورر حتی که سوادى
تدریجله انک جميع قلبن بورور (کلا) ايمدی ذنب کسبندن ارتداع ايدک که
اول قلوبکز اوزره غالب اوليه (انهم عن ربهم يومئذ لمحجوبون) اول کافرلر
يوم قيامتده رب تعاليدن محجوبلردر انی کورمز لر ويا انک رجندن ويا قربندن
ممنوعلردر مؤمنلر انک خلافيدر * حسن ايدر اگر زاهدلر و عابدلر سز رب
تعالی بی کورمز سز دينلسه شدت هم و غلرندن دنياده ايکن جان ويره لردی
مالک بوآيتدن سؤال اولندوقده ديدیکه الله تعالی اعداسندن احتجاب ايدوب
انلر انی کورميه لر و اولياسنه تجلی ايدوب حتی که انلر انی کوره لر شافعی ايدر
بوآيت دليلدر که الله تعالی بی آخرتده اولياسی کوره لر (ثم انهم لصالو الجحيم)
کافرلر الله تعالی بی کورم دکلرندن ماعدا ناره ادخال اولنورلر (ثم يقال
هذا الذى كنتم به تکذبون) بعده انلره زبانيه لر ديرلر که اشول شول عذابدر که
سز انی دنياده تکذيب ايدرديکز (کلا) ايمدی تکذيبدن ارتداع ايدک
(ان کتاب الابرار لفي عليين) صالحلرک اعمالی يازيلان کتاب عليينده در که
اول سماء سابعه ده عرشک آلتنده در * دينلديکه اول يشل زبرجددن بر لوحدر
تحت عرشده معلقدر صالحلرک اعمالی انده يازيليدر و ياخود اول عرشک
قائمة يماسيدر و يا جنتدر و ياسدره متهاذر (وما ادريک ما عليون)
عليون نه شیء ايدیکنی سکا نه بيلدردی (کتاب مرقوم يشهده المقربون)
اول بر دفتر که انده صالحلرک اعمالی يازيليدر اکا مقربون حاضر اولوب انی
حفظ ايدرلر و ياخود يوم قيامتده اکا يازيلانی مقربون مشاهده ايدر
(ان الابرار لفي نعيم) صالحلر جنتده تنعمده در (على الارائك ينظرون)

انلر حمالده سریرلر اوزره اوتوروب الله تعالینک و یردیکل کرامات و نعمته و کافرلره ایریشن عذاب و نقیمته نظر ایدرلر (تعرف فی وجوههم نصره النعم) تنعمده اولدقلرینک بهجت و بریقن یوزلرنده کورر و یلورسن (یسعون من رحیق مختوم) انلره شراب خالصدن ایچر یلورکه انک انائی مختومدر ختمی ابراردن غیری احدفک ایتز (ختامه مسک) اول شراب انائیک ختامی مسکدر (وفی ذلک فلیتنافس المتنافسون) ایمدی راغبیلر انک کبی ثوابه رغبت ایتسونلر (ومزاجه من تسنیم) اول شرابک مزجی تسنیمدر تسنیم ایسه بر شرابدرکه علودن اهل مجنتک غرف و منازللرینه منصب اولور بعده انصبابی کسیلور * دینلدیکه تسنیم هواده جاری اولور اهل جنک انالرینه طولنجه منصب اولور اندن کسیلور * دینلدیکه اول اشرف شرابدر مقربون انی صرف ایچرلر اماکه سائر اهل جنت ایچون مزج ایدیلور (عینا یشر به المقربون) اول تسنیم برعیندرکه مقربون انی صرف ایچرلر زیرا که دنیاده الله تعالیدن غیری شغلری یوغیدی (ان الذین اجرموا کانوا من الذین آمنوا یضحکون) رؤساء قریشدن شونلرکه اشراک ایتدیلر مؤمنلرک فقراسنی استهزاء ایدرلردی (واذا مروا بهم یغامزون) چقان اول فقرايه اوغراسلر انلره طعن ایدرلر و یاخود کوزلریله و قاشلریله بری برلرینه اشارت ایدرلر (واذا انقلبوا الی اهلهم انقلبوا فکهمین) و اهل و منزللرینه رجوعلرنده صدندن اولدقلری حالته فرحین و معجبین رجوع ایدرلر (واذا رأوهم قالوا ان هؤلاء لضالون) و مؤمنلری کوردکارنده محمد علیه السلامی تصدیق ایتدکلر ایچون انلری ضلالتنه نسبت ایدرلر (وما ارسلوا علیهم حافظین) الله تعالی ایدر حالبوکه اول مشرکار اول مؤمنلر اوزره حافظ ارسال اولتدیلرکه اعماللرینی حفظ ایدلر و یارشده و ضلاللرینه شهادت ایدلر (فالیوم الذین آمنوا من الکفار یضحکون) شول کونده که مؤمنلر جنته کیره لکافرلری استهزاء ایدلر (علی الاراکل یظرون) درو یاقوتدن سریرلر اوزرنده انلرک ناردده عذاب اولندقلرینه نظر ایدلر (هل ثوب الکفار ما کانوا یفعلون) اول کونده کافرلر جزاء اولنور استهزاء وسیئه لرله کیم انی دنیاده ایشلدیلردی * ابو صالح ایدر ناردده کفاره قبولر آچیلوب چیقک دینله قبولری آچیق کور یچک سکر دیشوب

اکا کیده ل و اردقلرنده قبولر قیانه جنتدن مؤمنلر انلره نظر ایدلر زبانیه نک انلره اول منوال اوزره ایتدکلری جزایه کولیشله ل * کعب ایدر جنتدن ناره ناظره پنچرلر و اردرکه چقان بر مؤمن جنتدن ناردده برعدوسنی کورمک دیلیه اول پنچره لک برینه وارر و اندن انک عذاب اولندیقنه نظر قیلور و اکا کولوب سونور

سورة الانشقاق وهي خمس وعشرون آية مكية

بسم الله الرحمن الرحيم

(اذا السماء انشقت) چقانکه سماء رب تعالینک هیبتدن منشق اوله * دینلدیکه مجرهدن شق اولیسردر (واذنت لربها وحقت) و اول سماء رب تعالینک امرنی ایشسیدوب اکا انقیاد ایده و حق اولدیکه اول انی استماع و اکا انقیاد ایده (واذا الارض مدت) و ارض بسط اولنوب سعتنده زیاده قبلنه (والقت ما فیها وتخلت) و اول ارض ایچنده اولان موتی و کنوزی طشره براغوب تخیل ایده (واذنت لربها وحقت) و اول ارض رب تعالینک امرنه اجابت ایده و الحال اکا واجب اولدیکه ربه اجابت ایده (یاایها الانسان انک کادح الی ربک کدحا فلاقیه) یا انسان سن ربک جل شاننه نک جزاسنه لقا که دکن عملده سعی قوی ایله سعی ایدرسن ایمدی لابد اکا ملاقات ایدیسرسن (فامامن اوتی کتابه یمینه فسوف یحاسب حسابا یسیرا) اول کسه که کتاب اعمالی یمینه و یریه که اول مؤمندر سهولتله حساب اولنور حسابنده مناقشه اولتز (وینقلب الی اهلہ مسرورا) و مؤمنلردن عشرینه و یا مؤمنلر فریقنه و یا جنتده کی حور دن اهلنه و کندویه و یریلن کراماته مسرور اولدیغی حالده رجوع ایدر (وامامن اوتی کتابه و رآء ظهره) اما اول کسه که کتاب اعمالی و رآء ظهرنده شمالنه و یریه که اول کافر در یمینی بوینه تیمورلنوب شمالی و رآء ظهرنه دوندوریلوب اندن کتابی و یریه چقان انده کی اعمال سیئه بی کوره (فسوف یدعو ثورا) و اثوراه دیو کندویه هلاکی تمنی ایده (و یصلی سعیرا) و نار و قوده براغیله (انه کان فی اهلہ مسرورا) زیرا اول دنیاده عشیرتی بیننده آخرتدن فارغ اولدیغی حالده مال و جاه ایله مسرور ایدی (انه ظن ان لن یحور بلی ان ربه کان به بصیرا) اول ظن

ایدر دیکه موتد نصکره الله تعالی به رجوع ایتمیدی ایدی حال انک ظن
ایتمیدی منوال اوزره دکدر بلکه اول بعث اولوب اکا رجوع ایدیسردر
زیرا که رب تعالی انی خلقی کوندن بعثی کونه دکن انک احوال و اعمالنه
عالم اولوب لابد اکا فعلنک جزاسن ایدیسردر (فلا اقسم بالشفق)
اقسام ایدرین شول حرته کیم شمسک غروبند نصکره افق مغربده
کوریلور و یا شول بیاضه کیم اول حرتک عقبنده کاورکه انک سقوطیله عامه
ققها عندنده وقت عشاء داخل اولور (واللیل وما وسق) ودخی لیل
وهر شبیه کیم دواب وغیرین لیل انی جمع وستر ایدر (والقمر اذا تسق)
ودخی قره کیم اول مستوی اولوب نوری تمام اوله که اول ایام بیضدر
(لترکبن طبقا عن طبق) یا انسان سن حالدن حاله تحویل اولنور سنکه
انک صکره کیمی هول وشدنده اولکینه مطابق اولور و یا خود
الله تعالی به قربت ورفعتده درجه دن درجه به ورتبه دن رتبه به صعود
ایدرسن و یا خود مواقف قیامتده حالدن حاله منقلب اولورسن و یا خود نطفه
ایکن موت بعده حیاة بعده موت بعده حیاة ایررسن و یا خود رضيع
بعده فطیم بعده غلام بعده شاب بعده شیخ اولورسن و یا خود تدریج
سزدن اول پکن امتلرک سئلرینه و بدعتلرینه تبعیت ایدرسن
(فألهم لا یؤمنون) انلره تولدیکه یوم قیامتہ ایمان کتورمز لر
(واذا قرئ علیهم القرآن لایسجدون) چقان انلره قرآن او قنسه
خضوع ایتمز لر و یا انک تلاوته سجود ایتمز لر * روایت اولندیکه پیغمبریمز
صلی الله علیه وسلم (واسجدوا قرب) او قونجیق اول و یا ننده اولان
مؤمنلر سجده به واردیلر قریش ایسه انلرک باشی او جنده طوروب
تصفیق ایدرلردی اول سبیدن بوآیت نازل اولدی * امام ابوحنیفه
بوآیتله سجودک وجوبنه ذاهب اولدی زیرا انی ایشیدوب سجده ایتمین
ذم اولندی * ابوهریره رضی الله عنهدن مرویدر که اول بوآیتده سجده
ایدوب دیدیکه والله بن بوآیتده سجده ایتمدم الا اندنصکره که پیغمبریمز
صلی الله علیه وسلم انده سجده ایدر کوردم (بل الذین کفروا یکذبون)
بلکه کافرلر قرآنی تکذیب ایدرلر (والله اعلم بما یوعون) حالوکه
الله تعالی انلرک کفر وعداوتدن صدرلرنده اضممار ایتمدیکن بیلور
(فبشرهم بعذاب الیم) ایدی انلره عذاب وجیع دائمه تبشیر ایت

(الا الذین)

(الا الذین آمنوا وعملوا الصالحات لهم اجر غیر ممنون) لکن انلردن
شول کسهلر که الله تعالی به ورسولنه ایمان کتوروب اداء فرائض و سننله
اعمال صالحه ایشیلر ل انلره ثواب دائم واردر که مرض وهرم وعذرله
فوت ایتمدکاری اعمالک ثوابی کسلر یازیلور

سورة البروج وهی ثمان وعشرون آية مكية

بسم الله الرحمن الرحيم

(والسما ذات البروج) سما حقیقونکه اول اون ایکی برجلیدر کوا کبدن
سبعة سیاره اکا نزول ایدر ومع ذلك اول بروجده نجوم ثوابت دخی واردر
و یا خود انکله مراد قمرک منازلیدر و یا کواکبک عظماسیدر و یا ابواب سمادرکه
نوازل اندن خروج ایدر (والیوم الموعود) و مجیدله وعد اولنان یوم قیامت
حقیقون (وشاهد ومشهود) یوم جمعه ایله یوم عرفه حقیقون و یا خود
انکله مراد یوم جمعه و یوم نحر اوله و یا خود یوم ترویه ایله یوم عرفه اوله
و یا محمد علیه السلام ایله یوم قیامت اوله و یا محمد علیه السلام ایله الله تعالی اوله
و یا آدم علیه السلام ایله یوم قیامت اوله و یا انسانله یوم قیامت اوله و یا بنی آدم
اوزره شهادت ایدرملکه یوم قیامت اوله و یا حفظه ایله بنی آدم اوله
و یا آدم ذریته یوم قیامت اوله و یا الله تعالی و یوم قیامت اوله و یا شبو امتله
سائر امم اوله و یا الله تعالی و بنی آدم اوله و یا اعضای بنی آدمله بنی آدم اوله
و یا انبیا ایله محمد علیه السلام اوله (قتل اصحاب الاخدود) اصحاب
اخدوده لعنت اولندی * پیغمبریمز صلی الله تعالی علیه وسلمدن مروی حدیث
مرفوعدر که ملوک ماضیه دن برملکت بر ساحری و ارایدی اول ساحر
پیر اولجیق ملک اکا بر غلام ضم ایتمدیکه اندن سحر او کمرنه مکر اول
غلامک یولی اوزره بر راهب و ارایدی غلامک قلبی اکا میل ایدی
کونلرده بر کون غلام ساحره کیدر کن یولی اوزره بر یولک ییلانه راست کلدیکه
اول ناسی یولدن مروره مانع اولشدی غلام الینه بر طاش الوب دیدیکه
آلهی راهب اکر سکا ساحردن خیرلو ایسه بو طاشله اشبو ییلانی اولدر مکی
بکا آسان ایت اندن اول طاشی ییلانه آتوب اولدر دی بعده اول غلام اکه
و ابرصی دماسیله کیدرر اولدی بر نیچه دردلری کذلک دماسیله کیدرر دی
مکر ملکت بر جلیسی و ارایدی اعی اولدی غلام دماسیله انک عماسین

کیدردی ملک اول جلیسنه عماکی کیم کیدردی دیو سوال ایتدکده رب تعالی کیدردی دیو جواب ویردکده ملک اکا یاوزلوب تعذیله اکا غلامی بیلدردی بعده غلامه تعذیب ایدوب اول دخی راهبی بیلدردی اویله اولسه ملک راهبی منشارله ابکی شق ایتدی بعده غلامی بر یوکسک طاغک باشنه کوندر دیکه اندن اشاغه آتله غلام دعا ایدوب طاغ سلکندی انی کتورنلر جله سی هلاک اولوب غلام قور تلدی بعده اول غلامی بر جاعتله دریاه کوندر دیکه انی اغراق ایدملر کمی به بنجک غلام دعا ایدوب کمی انلر ایله منقلب اولدی انلر غرق اولوب غلام صو اوزره یورویه رک طشره به چیقدی غلام ملکه واروب دیدیکه سن بنم قتلہ چاره ایدمه سن مکرکه نامی جمع ایدوب بنی صلب ایدوب و تیر کشیدن براوق آلوب باسم رب الغلام دیوب اول اوقی بکا آتہ سن ملک انجیلین ایتدی اوق غلامک صدغه ایریچک غلام تسلیم روح ایتدی ناس انی کوریچک دفعه جیعی غلامک ربه ایمان کتوردک دیدیلر ملکه اتباعی دیدیلر که شول حذر ایتدیکلر ورطه به دوشدک اویله اولسه ملک انلر ایچون امر ایدوب خندقلر قازدیلر و ایچلرینه آتش یاندر دیلر و اول ایمانه کلنلری اول آتش قتنه کتوردیلر کفره رجوع ایدنلری صالیور دیلر ایمان اوزره ثابت اولنلری اول آتسه آتدیلر حتی بر مرأه بی کتوردیلر که بیلسنجه بر صبی وارییدی مرأه آتسه آتقدن تأخر ایدیچک صبی اکا ای انا سن حق اوزره سن ناره صبر ایلکل دیدی اویله اولسه مرأه صبی ایله کندویی اول آتسه بر اقدی * مقاتل ایدر اخادید اوچ یرده واقع اولوبدر بری نجرانده وبری شامده وبری فارسده اولدی اما شامده کی به بطایوس و فارسده کی به بخت نصر تعهد ایتدی بویکیسی شانده قرآن نازل اولدی بلکه قرآنک نزولی اول نجرانده کی اخدود شانده اولوبدر * روایت اولندیکه بر رجل مسلم وار ایدی انجیل اوقوردی کندویی برکسه به بر عمل ایچون ایجار ایتدی اول انک قتنده تعهد ایتدیکی عملی ایشلر و هم انجیلدن قراءت ایلردی مکر مستأجرک بر قزی وارییدی کورسه که اول اجیر انجیلدن اوقودچه اندن نور ظاهر اولوردی قرانی باباسنه خبر و یروب حتی که باباسی دخی اول نوری کوردی اجیره اول نورک سبیدن سوال ایتدیکنده اول دین اسلام نوریدر دیدی اویله اولسه اول مستأجر وانک غیری رجال و نسادن سکسان یدی کسه اسلامه

(کلیدلر)

کلیدلر بو وقعه عیسی علیه السلامک سمایه رفعدنصکره ایدی نجرانده حیر ملو کندن یوسف ذونواس نام بر ملک انی ایشیدیچک انلر ایچون بر خندق قازدروب ایچنه آتش یاندردی و انلره دین عیسایان رجوعی تکلیف ایتدی رجوع ایدنلری صالیوروب دین عیسی اوزره ثابت اولنلری اکا یاندردی حتی بر مرأه صیسیله اکا کتوریلوب حکایت اولندیغی اوزره دین اسلامده ثابت اولدقلرنده ایکیسی اول آتسه براغلدی (النار ذات الوقود) اول اخدود بر ناردر که ناسله ایقاد اولنوبدر ربیع ابن انس ایدر اول ناره القاء اولسان مؤمنلری نارمس ایتزدن اول الله تعالی روحلرینی قبض ایتدی و ناره چیقوب اول اخدود کنارنده اولان کفاری یاندردی (اذهم علیها قعود) که اول ملک و اصحابی اخدود قتنده اوتوروب مؤمنلرک عذاب اولندیغنه نظر ایدرلردی (وهم علی ما یفعلون بالمؤمنین شهود) و انلر مؤمنلره ایتدکلری ظلمه ملکلری عندنده بری برلیچون امرده تقصیر ایتامشدر دیو شهادت ایدرلردی و یاخود یوم قیامتده انلرک اول افعالی اوزره السنه و ایدیلری شهادت ایدیسردر (وما نقيموا منهم الا ان يؤمنوا بالله العزيز الحميد) اول مؤمنلردن هیچ برشی انکار ایتدیلر الا انیکه الله تعالی به ایمان کتوردکلرینه که اول عزیزدر عقابندن قور قیلور حمید در ثوابی رجا اولنور (الذی له ملک السموات والارض والله علی کل شیء شهید) که اول الله تعالی سموات وارضک ملکی انکدر هر شیئی کورر انلرک فعلنی بیلور یوم قیامتده جزالین قیلور (ان الذین قتلوا المؤمنین والمؤمنات ثم لم يتوبوا فلهم عذاب جهنم ولهم عذاب الحریق) شونلر که مؤمنون و مؤمناتی احراقله تعذیلرندنصکره توبه ایتدن فوت اولدیلر کفرلری سیبیله نار جهنم و احراقلری سیبیله انلرک تعذیلندن اشد عذاب واردر * دینلرکه عذاب حریقله مراد اول اخدود در که نارك اصحاب اخدود اوزره منقلب اولوب انلری احراقیدر (ان الذین آمنوا وعملوا الصالحات لهم جنات تجری من تحتها الانهار ذلک الفوز الکبیر) شونلر که الله تعالی به ورسولنه ایمانله عمل صالح ایشلدیلر انلر ایچون جنتلر واردر که اشجاری آکندن ایرمقلر آقار اشبو فوز کبیر در که دنیا و مافیها انک جنبنده صغیر اولور (ان بطش ربک لشدید) ربک جل شانہ انک اخدی مضاعفدر (انه هو

(۲۲)

بع

بیدی و یعید) الله تعالى خلق عدمدن وجوده کتورر وموتلرند نصکره
یوم قیامتده انلری احياء واعاده ایدر و یا خود دنیا ده کفره بی بطشله ابداء
ایدر وینه آخرتده انی اعاده ایدر (وهو الغفور الودود) اول تائبی
مغفرت ایدر واکا اطاعت ایدنه سور (ذوالعرش المجید) اول عرشک
خالقیدر ذات وصفاتده مجیددر واجب الوجود تام القدرتدر ویا اول
عرش مجید وعلو وعظم صاحبیدر (فعال لما یرید) اول ابداء واعاده
احزان واهانتدن دیلدیکن ایشلر اکا کنديک وغیرینک افعالنندن مرادی
ممتنع اولمز (هل اتیک حدیث الجنود فرعون وثمود) یا محمد سکا فرعون
و ثمود قوملرینک قصه لری خبری کلدیکه موسی و صالح علیهما السلامی
تکذیلرله نیچه اهلاک اولندیلر ایمدی انکله متسلی اولوب قومک سنی
تکذیلرینه صبر ایلر واول ایکی قومه ایریشن مصائب مثیلله مصاب
اولمندن تحذیر ایلر (بل الذین کفروا فی تکذیب) بلکه سکا وقرآنه کافر
اولنلر بر تکذیبده در که اندن تحاشی ایتزلر ایمدی انلرک حالی یکن ائم مکذبه نک
حالندن اعجبدر که انلرک قصه لرین ایشدر و آثار هلاک لرین کوررلر ایکن
انلردن اشد وجه اوزره تکذیب ایدرلر (والله من ورائهم محیط) الله تعالى
علم و قدرتیله انلری مشتملدر قنده اولسه لر اندن انلری عصمت ایدر یوقدر
(بل هو قرآن مجید) بلکه انلرک تکذیب ایتدکاری برحق کتاب منیفدر که
هر نازل اولان کتب سماویه دن اول شریفدر نظم و معناده اول وحیددر
و یا اول رب مجیدک قرآنیدر (فی لوح محفوظ) بر لو حده ثابتدر که تحریف
و یا استراق شیطیندن محفوظدر * روایت اولندیکه الله تعالى لوح محفوظی
دره بیضادن خلق ایتدی ایکی دفته سی یاقوت جرادندر عرشک یمینده در
الله تعالى اکا هر کونده اوچ یوز التمش کره نظر ایدر احياء واماته ایدر خلقت
کیم عزیز و کیم ذلیل ایدر دیلدیکي کبی ایدر تا که خلق بیلر که عندنده
هر شیء مقدردر * مرویدر که الله تعالینک لوح حنده یوز اون بش شریعت
موجوددر الله تعالى ایدر هر مؤمنکه اول شریعتلرک بریلر بکا ملاقات ایده
بن انی جنته قورین * دینلدیکه لوح محفوظک طولی سماء وارض بیننجه
وعرضی مشرق و مغرب ارا سنجدر ایکی حافه سی در و یا قوتدن قلمی نوردر
اصلی بر ملکک حجرنده در

(سورة)

سورة الطارق وهی سبع عشرة آية مكية

بسم الله الرحمن الرحيم

(والسماء والطارق) سماء وطارق حقیچون طارق کیچه ایچنده ظاهر
اولور کو کبدر * روایت اولندیکه ابو طالب بر کیچه پیغمبر یمز صلی الله
تعالی علیه وسلم قنده ایدی کور سه که سمان بر نجم منخط اولوب
اول حوالی نور ایلر طولدی ابو طالب اندن فزع ایدوب یا محمد بونه شیئدر دیدی
پیغمبر یمز علیه السلام ایتدی نجمدر که رمی اولندی الله تعالینک
آیتلرندن بر آیتدر اول سبیدن بو آیت نازل اولدی (وما ادريک
ما الطارق النجم الثاقب) طارقت نه شیء ایدوکن سکا نه بیلدردی
ایمدی اول بر ضیالو نجمدر که ظلامی ویا افلاکی ضیاسیله ثقب ایدوب
انده نافذ اولور که اول زحلدر (ان کل نفس لما علیها حافظ) هیچ بر نفس
یوقدر الا انک اوزره مسلط ملک واردر که انک اعمالی حفظ ایدر
(فلینظر الانسان مم خلق) ایمدی انسان نظر ایتسونک نه شیئدن
خلق اولندی (خلق من ماء دافق) بر ماء دن خلق اولندیکه
اول رحم امه صب اولنوبدر (یخرج من بین الصلب والترائب)
که اول رجلک صلبیله مرأمتک عظام صدری اراسندن چیقار که انکله
مراد ماء رجل ایلر ماء مرأه در زیراکه ولد اول ایکیسندن حاصل اولور
(انه علی رجعه لقادر) اول الله تعالى انی اماته نصکره بعثه قادر اولور
ماء دافقدن خلقه قادر اولد یغی کبی (یوم تبلی السرائر) شول
کونده که قلوبده مضمحل اولان عقائد و نیات ظاهر اولور ویا فرائض
اعمال ظاهره اولور صوم و صلاة و وضوء و اغتسال کبی که اول الله تعالى
ایلر عبد بپنده سراردر حتی بر عبد اشبو عباداتی ادا ایتامشکن
ادا ایتدم دیسه انی الله تعالیدن غیری احد بیلمز ایمدی یوم قیامتده
انی ادا ایدن ایتمندن اظهار اولنور * ابن عمر ایدر الله تعالى یوم قیامتده
هر سری اظهار ایدر سر حسن صاحبک یوزنده زین اولور
و سر قبیح ایسه صاحبک یوزنده شین اولور (قاله من قوة
ولاناصر) اولیله اولسه بعثی انکار ایدنه کنیدین عذابی دفع ایدر قوتی
و یا ناصری اولمز (والسماء ذات الرجع) سماء حقیچونکله اول هر دورده

حر کته ابتدا ایتدیکی موضع رجوع ایدر و یاخود وقت وقت یغورله رجوع ایدر و یاخود سحاب مائی بحار دن الور دنیلن قول اوزره وقت وقت اول مائی اخذ ایچون ارضه رجوع ایدر (والارض ذات الصدع) و ارض حقیچونکه اول نبات و اشجار و عیون ایچون منشق اولور تاکه اول بنی آدمه قوت اوله (انه لقول فصل وما هو بالهزل) اول قرآن بر قول جدد که حق و باطل بیننی فصل ایدر یو خسه قول هزل دکدر (انهم یکیدون کیدا و اکید کیدا) اهل مکه قرآنی ابطال و نورنی اطفاء ایچون کید ایدرلر بندخی انلره استدراج و حسابانلری اولمیدیغی حیثیتدن انتقامله انلره کیدیمی مقابل قیلورین (فهل الکافرین امهلم رویدا) ایدر کافرله صبرله و هلاکله استجالی ترکله امهال یسیرایت زیرا که عمر دنیا ندکلو طویل اولسه آخرتک عمر دائمه نسبتله اقل قیلدر

سورة الاعلى وهى تسع عشرة آية مكية

بسم الله الرحمن الرحيم

(سبح اسم ربك الاعلى) رب اعلانک اسمنی تنزیه ایت شول معانیدنکه اکا صالح اولمز که اول قهر و اقتدار ايله مالیدر و یاخود سجود کرده سبحان ربی الاعلى دیکز وقتا که (فسبح باسم ربك العظيم) آیتی نازل اولدی پیغمبریمز علیه السلام انی رکوع کرده دیکز دیدی (سبح اسم ربك الاعلى) آیتی نازل اولیچق انی سجود کرده دیکز دیدی حالبوکه اندن اول رکوعده اللهم لك ركعت وسجودده اللهم لك سجدت دینوردی (الذى خلق فسوى) که اول هر شیئی خلق ایدوب خلقنی تسویه ایتدی شول کمالی حاصل اولور شیئی انده قیلغله (والذى قدر فهدى) که اول اشیانک اجناس و انواع اشخاص و مقادیر صفات و افعال و آجالنی تقدیر ایدوب هر برینى طبع و اختیار یله افعالنه توجیه ایتدی مبول و الهامات تقدیر و خلقیله و نصب دلائل و انزال آیات ايله * مجاهد ایدر انسانه خیر و شر و سعادت و شقاوت طریقنی و انعامه مراتعی هدایت ایتدی * دینلديکه اشیاده منافع خلق ایدوب استخراجی طریقن انسانه هدایت ایتدی و رحمة مدت جنینی تقدیر ایدوب اکار جدن دنیا به خروجی هدایت ایتدی و بنی آدمه سعادت و شقاوتی تقدیر ایدوب بعده

(ایکی)

ایکی فریقندن هر برینک اوزرینه تقدیر اولنان سبيله سلوکی تیسیر ایتدی (والذى اخرج المرعى ليجعله غطاء احوى) و اعشایى و دوابک مراعاتنی یردن بتوروب خضر تندنصکره یابس و اسود قیلدی (سنقرئك فلا تنسى) بزسکا قرآنی جبریل قراءتیله تعلیم ایده رز و یاخود قرائتی الهامله سنی قاری قیلورز من بعد انی اونوتمزسن حالبوکه سن امیسن تاکه اول سکا آیت اخری اوله مع ذلك سنك امور مستقبله دن اخبارک و دیدیکک کبی واقع اولسی آیاتدن ایدی (الامشاء الله) مکر انیکه الله تعالی قرآندن تلاوتن نسخله اوتمکی دیلیم * دینلديکه انکله مراد قلت و ندرت اوزره اولاندر زیرا روایت اولندیکه پیغمبریمز صلی الله علیه وسلم بر نمازده قراءتندن برآیتی اسقاط ایتدی * ابی بن کعب انی نسخ اولندی ظن ایدوب سؤال ایتدکه پیغمبریمز علیه السلام دیدیکه انی اونوتمشن (انه يعلم الجهر وما يخفى) الله تعالی احوالکزدن آشکاره و کیرلوی بیلور و یاخود جبریل علیه السلامه بیله جهرکی و نسیان خوفیله اکا داعی اولان شیئی بیلور ایدر ابقاء و انشاء دن صلاحک اولان شیئی بیلور (ونیسرك للیسرى) بزسنى و حی حفظنده طریقه یسرائی اعداد ایدرز (فذكر ان نفعك الذکری) ایدر ناسه قرآنله و عطا ایت اول انلره کرکسه نفع ایتسون و یا ایتسون (سیدکر من یخشی) اول قرآنله متعظ اولور اول کسه که الله تعالی دن خوف ایدر قلبی انی بیلوب اکا ایمان کتور مسیله (وینجبها الاشقی) اول قرآن مواعظندن تجنب ایتزالا کافرکه هر عاصیدن اشقادرو یا کافرلرک زیاده شقیسیدر دینلديکه اول ولید بن المغیره و اتباعیدر (الذى یصلی النار الکبرى) که اول نار جهنمه داخل اولور که اول نار نار دنیانک یتمش جزئدن بر جزء در و یاخود اول نار جهنمدن درک اسفله داخل اولور (ثم لا يموت فيها ولا یحیی) بعده اول نارده اکا موت ایرمز که عذابندن استراحت ایده و حیاته دخی اولمز که اول اکا نفع ایده (قد افلح من تزکی) فلاح بولدی اول کسه که کفر و معصیتدن تطهر ایتدی و یا اولکه عملی زاکى اولدی و یا صلات ایچون تطهر ایتدی و یا مالنک زکاتن ادا ایتدی (وذكر اسم ربه فصلی) و قلب ولسانیله رب تعالینک اسمنی ذکر ایدوب نماز قیلدی و جائزدر که ذکرله مراد تکبیره تحریمه اوله * دینلديکه اشبو ایکی آیتک معناسی فلاح بولدی اول کسه که صدقه فطری ادا ایدوب مصلايه تکبیر ایدرک کتدی

و یا تکبیرات عیدی اقامت ایدوب صلاة عیدی اتمام ایتدی و یارب تعالینک ذکر یله تکبیره تحریمه بی ایدوب صلوات مفروضه بی اوقاتنده ادا ایتدی (بل تؤثرون الحیاة الدنیا) بلکه سز حیاة دنیایی و عملنی آخرت عملی اوزره اختیار ایدرسز آخرتده سزنی اسعاد ایدر شیئه اشتغال ایتزسز (والآخرة خیر وابقی) حالبوکه آخرت خیر لو در که نعمی بالذات ملذوذ در غوایلدن خالصدر و دائمدر انقطاعی یوقدر (ان هذا فی الصحف الاولى صحف ابراهیم و موسی) اشبو قد افلح دنصکره ذکر اولنان درت آیت قرآندن اول انزال اولنان صحیفه لردن ابراهیم و موسایه نازل اولان صحیفه لرده ثابتدر که اول امر دیانتی جامع اولوب کتب منزله نک خلاصه سیدر

سورة الغاشية وهي ست وعشرون آية مكية

بسم الله الرحمن الرحيم

(هل اتاك حديث الغاشية) یا محمد سکا یوم قیامت خبری کلدیکه انک شدائد و احوالی هر شیئی غشی ایدر (وجوه یومئذ خاشعة) اول کونده یوزلر اولور که ذلیلدر (عاملة ناصبة) که انلر دین اسلامک غیری دین باطل اوزره دنیاده عمل ایدر زحمت و مشقت چکرلردی عبده او ثان و کفار اهل کتاب کبی ایمدی الله تعالی انلرک ضلالتده کی اجتهادنی قبول ایتز بلکه انلری ناره ادخال ایدر و یادنیا ده معاصی عملن ایدرلر آخرتده ناره نصیبین چکرلر و یادنیا ده الله عمل ایتدکار یچون ناردده سلاسل و اغلال معالجه سیله اعمال و انصاب اولنورلر و یاناردده یوزلری اوزره سوریدیلورلر (تصلی ناراحامیه) انلر برناره داخل اولورلر که حری کالنده در (تسقی من عین آتیه) و برعیندن ایچریلورلر که اناتک حری نهایته ایدر و بدر * دینلدیکه اکر اندن برقطره دنیا طاغری اوزره قونلسه ایریدیدی (لیس لهم طعام الا من ضریع) انلرک طعامی دکل الا ضریعدر که اول هره نک اظفاری کبی براوتدر آجی و یابسدر تازه ایکن اکا شبرق دینور قوریدیفنده اکا دابه قریب اولمز ایمدی آخرتده برشجره ناریه در که ضریعه بکزر بوآیت نازل اولیحق مشرکون دیدیلر که بزم دوه لریمز ضریعه سمرر و قرآنی تکذیب ایتدیلر اولیه اولسه نازل اولدیکه (لا یسمن ولا یغنی من جوع)

(اول)

اول ضریع نه سمرر و نه آجلغی کیدرر (وجوه یومئذ ناعمة) اول کونده یوزلر اولور که متمعه وذات بهجه در (لسعیمها راضیه) که اول دنیاده الله تعالینک طاعتنه اجتهاد و معصیتدن اجتنابه اولان فعللرینک ثوابه راضیدرلر (فی جنسة عالية) جنتده درجات مرتفعه ده درلر (لا تسمع فیها لاغیه) انلر انده کله لغو و یاغوا ایدر نفس ایشتمزلر زیرا اهل جنتک کلامی ذکر و حکمدر (فیها عین جاریة) انده پیکارلر وارددر که صوینک جریانی کسلز (فیها سرر مرفوعة) انده سریرلر وارددر که الواحی التوندن اولوب زبرجدودر و یا قوتله مرصعدر اهلی اولمینه اول مرتفعه در اهلی اکا جلوس ایدر اولسه اکا تواضع ایدر جلوس ایدیچکینه ارتفاع ایدر (واکواب موضوعة) و انده عروه سز مدور برداقلر وارددر که اوکلرینه قونوب شرب ایچون تهیه اولمشدر (ونمارق مصفوفة) و انده بری برینک یانه قونلش یصدقدر وارددر که اوطور دقندرلر اکا طیانورلر (وزرابی مشوثة) و انده فاخر بساطلر وارددر که مؤمنلر انلرک اوزرینه اوتورلر و قناکه الله تعالی اشبو سوره ده جنتک اشیا نندن بر جله بی وصف ایلدی کفار اکا تعجب و تکذیب ایتدیلر الله تعالی انلره عجائب صنعندن بر جله بی دخی ذکر ایدوب دیدیکه (أفلا ینظرون الی الابل کیف خلقت) انلر نظر اعتبارله دوهیه نظر ایتزلر میکه اول نیچه خلق اولندیکه خالقنک کمال قدرت و حسن تدبیرنه دلالت ایدر شول حیثیتدنکه بلاد بعیدهیه ائقال کتورر و اول عظیم ایکن جل ایچون یره چوکوب بعده ینه قالقار وانی یدنه یدیلور بویینی اوزونددر که اوقارله نهوضه اول اکا عون اولور و هر نابقی رعی ایدر و اون کوندن زیاده صوسزلغه صبر ایدر تاکه اکا براری و مفاوز قطعی آسان اوله انده اولان سائر منافعه بیه الله تعالی ذکرده دوه بی تخصیص ایتدی زیرا که عرب اندن اعظم دابه کور میوبدر اگرچه فیل اندن اعظم ایسه لکن عرب دیارنده اول قلیل اولدیغیچون انلردن انی کورمش آذر * دینلدیکه الله تعالی جنت سریرلرینک ارتفاعن ذکر ایدیچک کفار دیدیلر که اکا نیچه صعود ایدیلور اولیه اولسه اشبو آیتله دنیاده انلره مثال کوسترلدی (والی السماء کیف رفعت) و سمایه نظر ایتزلر میکه آتنده عمادلری یوغیکن نیچه رفع اولندی (والی الجبال کیف نصبت)

وطاغله نظر ايتزلزميکه ارض اوزره نيچه اوتاد قيلنديکه ارض ميل واضطراب ايتيه (والی الارض كيف سطحت) وارضه نظر ايتزلزميکه نيچه بسط اولندی تا که انده سير واستقرار آسان اوله يعني انلر بسائط ومرتباتدن انواع مخلوقاتنه نظر ايتزلزميکه الله تعالينک کمال قدرتی عندلرنده متحق اولوب بعثه اقتدارنی انکار ايتيه لر اول اجلدن امر معادی اکا تعقيب ايتدی وانک اوزره تذکيره امری ترتيب ايدوب ديدیکه (فذكر انما انت مذكر) يا محمد سن انلره وعظايت و آخرت عذابيله انلری تخويف ايت اکر نظر وتذکر ايتزلرسه اکا مهموم اولغل سن دکل الا مذكر سن سکا واجب اولان انجق تبليغدر (لست عليهم بمصيطر) يوخسه سن انلرک اوزره مسلط دکلسنکه انلری تقليب وایمان اوزره اکراه ایده سن (الامن تولى وكفر) لکن انلردن اول کسه که ایماندن اعراض وکفر اوزره اصرار ایده انک امری الله تعالی به مختصدر (فيعذبه الله العذاب الاكبر) اول انی آخرتده عذاب اکبرله تعذيب ايدرکه اول عذاب نار دائمدر (ان الينا اياهم) انلرک موتدنصکره رجوعلری بزه در (ثم ان علينا حسابهم) بعده محشرده اعمال خبيثه لرینک حسابی بزم عهده مزه در تکيم اول حکمتز مقتضاسيدر

سورة الفجر وهی ثلاثون آية مكية

بسم الله الرحمن الرحيم

(والفجر) فجر حقیچونکه انکله مراد صبحک انفجاريدر ويا صلاة فجردر ويا محرمک اول کوننک فجريدرکه اندن سنه منفجر اولور ويا ذی الحجه نك اول کوننک فجريدر که زیرالیاى عشر اکا تقرین اولندی (ولیل عشر) ولیلای عشر حقیچونکه انکله مراد عشر ذی الحجه در اول اجلدن والفجر فجر عرفه ويا فجر نحرله تفسیر اولندی ويا رمضانک عشر اوليدر ويا عشر آخريدر ويا محرمک عشر اوليدر که آخری يوم عاشورا در (والشفع والوتر) ودخی شفیع ووتر حقیچون * دینلديکه شفیع خلقتک کليسيدر کيم (ومن كل شئ خلقنا زوجين) هر شئيئنن ايكيشر صنف خلق ايتدک که اول کفر وایمان هدايت وضلالت سعادت وشقاوت لیل

(ونهار)

ونهار سماء وارض بر وبحر شمس وقر وحن وانسدر ووتر ايسه (قل هو الله احد) مصداقجه الله تعاليدر ويا خود خلقتک کليسی شفیع ووتردر ويا خود شفیع ووترله مراد صلواتدرکه بعضی شفیع وبعضی ووتردر ويا خود شفیعله مراد صلاة فجر اولوب وترله صلاة مغرب اوله ويا خود شفیع ايام وليالی اولوب وتر يوم قيامت اوله که انک لیلی يوقدر ويا خود شفیع درجات جنات اوله که اول سکزدر وتر ايسه درکات نار اوله که اول يديدر ويا خود شفیع اوصاف مخلوقينک تضاديدر که اول عز وذل قدرت وعجز قوت وضعف علم وجهل بصر وعمادر وتر ايسه الله تعالی صفاتک انفراديدر که اول عز بلا ذل قدرت بلا عجز قوت بلا ضعف علم بلا جهل حیات بلا موتدر (والليل اذا يسر) وکيچه حقیچونکه اول يقينان سير وذهاب ایده ويا محیی واقبال ایده (هل في ذلك قسم لذي حجر) اشبو ذکر اولنان قسمده ويا مقسم به ده عقل صاحبنه مقنع ومكتفي واردر که صاحبن حلال اولميان شئيئنن حجر ايدر (ألم تر كيف فعل ربك بعاد) يا محمد سکا خبر ويرلديمیکه ربک جل شانہ عاد قومنه نيچه عقاب ايتديکه اول عاد بن عوض بن ارم ابن سام بن نوح عليه السلامدرکه هود عليه السلامک قوميدر ابلری اسميله تسميه اولنمشلردر (ارم ذات العماد) ارمکه انلر سبط ارم ويا اهل ارمدر اکر بلدهلری اسمی ارم ايدیکی صحیح ايسه ذات العماد که اول بناء رفیع ويا قدود طوال ويا رفعت وثبات صاحبه سيدر * دینلديکه عادک ايکی اوغلی وارايدی برينه شداد وبرينه شديد دينوردی ايكيسیده قاهر ملکر ایدی بعده شديد فوت اولوب انک ملکی دخی شدادک اولدی ارضک معموره مالک اولوب ملوک ارض اکا انقياد ايتديلر طقوز يوزيل معمر اولدی بروقتده جنتک ذکرنی ايشيدوب بندخی انک مثلنی بنا ايدهرم ديوعدن صحرالرينک برنده اوچيوز يبلده برجنت بنا ايتديکه قصرلری التون وکومشدن واسطوانه لری زبرجد ويا قوتدن ایدی وانده اصناف اشجار ديكوب اکا نهرلر آقتدی واسمى ارم تسميه ايتدی (التي لم يخلق مثلها في البلاد) که انک مثلی بلادده بنا اولمدي وقتا که بناسندن فارغ اولديلر شداد وزرا وامراسيله اکا دخوليچون کتديلر برکون برکيجه لک مسافه مابين قالدیغنده سمادن برصيحه ايريشوب دفعة جيعی هلاک اولديلر (وعمود الذين جابوا الصخر بالواد) وربک جل شانہ نك عمود قومنه ايتديکی عقابی دخی سکا

خبر ویرلیمیکه انار وادی القراده طاشدن طاغری اویوب ایچنی بیوت
ایندیلر * دینلیمیکه طاغری اول اویان ثمود قومیدیکه انار بک یدییوز
مدینه بنا ایتدیلر که جمعی طاشدن ایدی (فرعون ذی الاوتاد)
و فرعون ایتدیکه عقاب دخی سکا خبر ویرلیمیکه اول کثرت جنود
ومضارب خیام ایچون اکا ذوالاوتاد دینلیدی ویاخود اول ناسی اوتادله
تعذیب ایدردی * روایت اولندیکه فرعونک برجاریه سی واریدی قزینک
ماشطه سی ایدی خازنی خربلک تحت نکاحنده ایدی واول خربیل
مؤمن اولوب یوزیل ایمانی فرعوندن کیرلیدی بروقتده اول ماشطه
فرعون قزینک باشی طرار ایکن الندن طراق یره دوشدی لعنت اکا که الله
تعالی یره کافر اولور دیدی فرعونک قزی اکا بنم بابامدن غیری سنک الهک
وارمیدر دیدی ماشطه دیدیکه بنم الهم و بابانک الهی وسموات وارضک
الهی واحد در الوهیتده شریکی یوقدر هماندم قز طوروب آغلیه رق
فرعون واریدی و ماشطه نک قولنی اکا خبر ویردی فرعون انی
کتوروب سؤال ایتدکده ینه اولکی قولنه موافق اکا دخی جواب
ویردی اویله اولسه فرعون انی درت جانبندن یره مخلادی و ییلا نلر
وعقربلر کتوروب اکا صوقدردی اگر الله کافر اولزسک بومنوال اوزره
اتکی آی سکا عذاب ایدرم دیدی ماشطه دیدیکه اگر یتش آیه دکین دخی
عذاب ایدرسک بن الله تعالی یره کافر اولزین مکر ماشطه نک ایکی قزی
واریدی انک قارشوسنه کتوردیلر بیوکنی آغزی ایچنه و کوچکنی ممد سی
اوزرنده بوغلدیلر اول کوچکن بوغلغه کتوردکارنده ماشطه جزع
ایدیچک اول قز سویلیوب دیدیکه ای انا صبر ایت بنم ایچون جزع ایتنه
الله تعالی سنکچون جنتده بریت بنا ایدوبدرسن انک رحمت وکرامتنه
ایریشورسن اندن اول قزی بوغلدیلر عقبیچ اول ماشطه دخی جان ووروب
جنته واصل اولدی بعده فرعون خربلی استدی وانک طلبنه ایکی رجل
کوندردی واروب انی برطاغده بولدیله که انده نماز قیلوردی واکا وحوشدن
اوج صف اولوب اویوب طورردی انلر آتی کور یچک کیرویه دوندیلر خربیل
دیدیکه الهی سکا معلومدرکه یوز یلدنبرو ایمانی کیرلدم هیچ کسه یره
ظاهر اولدی ایمدی اشبو ایکی رجلمدن هر قنغیسی بنم حامی کیرلیه انی دین
حقه هدایت ایدوب دنیاده و آخرته حاجتن ویر واکر اظهار حال ایده

(دنیاده)

دنیاده عقوبتن تعجیل ایتدیکندن ماعدا آخرته مأوا سی نار ایله دیدی
اندن اول ایکیسی دونوب فرعون و ایدیلر بری قصه یی فرعون خبر ویردی
اول بری ایسه ایمانه کلمشدی بن بونک دیدیکندن برشی کورمدم دیدی
اویله اولسه فرعون خربلک حالی کتم ایدنه زیاده عطار ایتدی وانی
فاش ایدنی قتل و صلب ایتدی بعده آسیه بنت مزاحم رضی الله تعالی عنها
ماشطه یره اولان جزای کور یچک نفسنده دیدیکه بکا نیچه وسعت واردرکه
بن مسله اولوب اول کافر ایکن انک بویه فعل شنیعه صبر ایدم فرعون ایچرویه
کلیچک آسیه اکا دیدیکه یافرعون سن خلقت شرور و خباثتده اشدیسن
ماشطه یی نیچون بیکناه قتل ایتدک فرعون ایتدی یوخسه ماشطه یره
عارض اولان جنون سکاده می عارض اولدی آسیه ایتدی بنده جنون
یوقدر بنم الهم و سنک الهک وسموات وارضک الهی بردر شریکی یوقدر
اویله اولسه فرعون امر ایلدی حتی که سوره تحریم آخرنده ذکر اولندیغی
منوال اوزره انی دخی قتل ایتدی (الذین طغوا فی البلاد) که اول عاد
و ثمود و فرعون بلادده طغیان و تجبر ایتدیلر (فاکثروا فیها الفساد) که
انده کفر و ظلمه فسادلرین آرتوردیلر (فصب علیهم ربک سوط عذاب)
انلر اوزره الله تعالی انواع عذابدن صبارسال ایتدی (انربک لبالمصاد)
ربک جل شانه مرصادده در عصاتی عقاب ایچون انده مرقدر اعمال
عباددن برشی انک علمندن فوت اولز (فاما الانسان اذا ما ابتلاه ربه فاكرمه
ونعمه فيقول ربی اكرمن) اما انسانکه همی دنیا ولذاتیدر رب تعالی جل
شانه انی غنا و یسرله اختبار ایدوب اکا مال و وسعت و یرسه دیرکه ربم
بکا و یردیکله بنی تفضیل ایتدی (واما اذا ما ابتلاه فقدر علیه رزقه فيقول
ربی اهانن) اما اول کسه که رب تعالی انی فقر و تقیرله اختبار ایدوب رزقی
تضییق ایده قصور نظر و سوء فکرندن دیرکه ربم بکا اهانت ایتدی
(کلا) حال انسانک زعم ایتدیک منوال اوزره دکدر انی غنا ایله اختبارم
کرامتیچون و فقرله اختبارم اهانتیچون دکدر بلکه اکرام معرفت و طاعته
توفیقمله در و اهانت من معرفتی نزع ایدوب طریق هدایتدن اضلالمله در
کاهی تقصیر کرامه دارینه مؤدی اولور و کاهی توسعه حب دنیایه
مفضی اولور (بل لا تکرمون الیتیم) بلکه انلر فعلی قوللرندن اسوء در
وماله تهالکیرینه ادلدر زیراکه انلر یتیمه نفقه و کسوه ایله اکرام ایتلر

(ولا تحاضون على طعام المسكين) واهل ربني ومسكيني اطعامه قندر منزل
 (وتاكلون التراث الاكلما) وميراثي حلال و حرام بيني جعله اكل ايدرلر
 زیرا که انلر نساء و صبیانی توریت ایتزلر بلکه انلرک انصبائی اکل ایدرلر دی
 و یا خود مورث میراثی حلال و حرامدن جمع ایتدیکنی بیسلورکن اکل
 ایدرلر (و تحبون المال حبا جا) و مالہ شره و حرص ایدوب حب
 کثیرله محبت ایدرلر (کلا) امر بویه اولق لایق دکلدر انلر یتیم و مسکیندن
 امر اولندقرین ایشلزلر (اذا دکت الارض دکا دکا) چنانکه ارض
 تکرار و تکرار تزلزل ایدوب ظهرنده اولان جبل و بنا و شجر کسر اولمسیله
 مستویه و یا خود هباء منبث اوله (وجاء ربک والملك صفافا) وربک
 جل شأنه نك آیات قدرتی و آثار قهری ظاهر اوله و ملائکه منازل
 و مراتبلی حسبجه صنف صنف کلهلر (وجيء يومئذ بجهنم) و جهنمه
 یتیم بیک زمام اوریلوب هر زمامه یتیم بیک ملک یا شوب زفیر و تغیطله
 محشره کتوریله (يومئذ يتذكر الانسان و انى له الذكرى) اول حالتده
 انسان کافر متعظ اولور حالبوکه اکا اتعاظک منفعتی قندن اولور (يقول
 يالتيقني قدّمت لحياي) کافر دیرکه نولیدی اشبو آخرتده کی حیاتم ایچون
 بن خیر و عمل صالح تقدیم ایتیم اولدم (فيومئذ لا يعذب عذابه احد
 و لا يوثق و ثاقه احد) اوله اولسه يوم قیامتده الله تعالینک عذاب
 و وثاقه انک غیری تولى ایتز زیرا که جمیع امور اکا مختصدر و یا خود
 الله تعالی کافره اول کونده کی شدت عذابی کی و سلاسل و اغلال ايله
 وثاقی کی دنیاده هیچ کسه کسه یه عذابه قادر اولیه (یا ایتهما النفس
 المطمئنة) دنیاده عمل صالح اوزره اولان موتایه بعث عندنده اکرام
 و جهی اوزره دینورکه یا نفس آمنه کیم ایمانه شک خلط ایتوبدر و یا خود
 الله تعالینک قضاسنه راضیهدر و یا انک عذابدن آمنهدر و یا انک ذکر یله
 مطمئنهدر (ارجعی الی ربک راضیه مرضیه) ربک جل شأنه نك جنتده
 سنکچون اعداد ایتدیکی ثوابه رجوع ایت ربکدن راضیه و عندنده
 مرضیه اولدیغک حالده (فادخلی فی عبادی) صالح قوللم زمره سنه
 داخل اول (و ادخلی جنتی) و انلرله بيله جنته کیر * عبدالله بن عمر
 ایدر چقان بر عبد مؤمن وفات ایدر اوله الله تعالی اکا جنتدن تحفهلر ايله
 ایکی ملک کوندر و اکا دینورکه یا نفس مطمئنه روح و ریحانه چیق ربک

(جل شأنه)

جل شأنه سندن راضیدر اوله اولسه اول روح مسکدن اطیب رایحه اولدیغی
 حالده جسدندن چیقار ارجاء سماده اولان ملائکه بری برلینه دیرلر که
 یردن بر روح طیبه کلور اوغرا دیغی قپو اکا اچیلور ملک اکا صلاة ایدر
 حتی که درگاه حقه واروب اکا سجده ایدر اندن میکائیله دینورکه بونی ارواح
 مؤمنینه ایردر بعده قبری یتیم ذراع توسیع ایدیلور اکر قراندن بیلوب
 عمل ایتدیکی شیء وار ایسه نوری اکا کفایت ایدر و انده عروس کی
 راحتده اولور که انی احب اهلی او یارر * دینلرکه اکا رجوع ایت
 دینلمی دنیادن خروجی عندنده اولور و جنته کیر دینلمی يوم قیامتده
 اولور * دینلرکه بعث عندنده هر روحه جسدنه کیر و رجوع ایت
 دینور * علمادن اهل اشارت ایدر یعنی ای نفسکه دنیاده مطمئنه سن
 انی ترکله الله تعالی یه رجوع ایت اکا رجوع ایسه آخرته سلوکدر *
 سعید بن جبیر رضی الله تعالی عنه ایدر ابن عباس رضی الله تعالی عنهما
 طائفده وفات ایدوب جنازه سنه حاضر اولدم بر طائر کلوب انک نعشنه
 کیردی بعده اندن چیقدیغی کورلیدی دفن اولنجیق سفیر قبری اوزره
 غائبدن تلاوت اولندیکه (یا ایتهما النفس المطمئنة) حتی که سوره یی اتمام ایتدی

سورة البلد وهی عشرون آیه مکیه

بسم الله الرحمن الرحيم

(لا اقسم بهذا البلد و انت حل بهذا البلد) الله تعالی بلد حرامله اقسام
 ایدوب رسولنه دیدیکه سن بو بلدهد حلالسن انده قتل و غیریدن
 دینلرکی ایشلکل حرمتک عظیم اولدیغیچون تنکیم مشرکار سنی اول
 بلدکدن اخراجکی استحلل ایتدیلر سکا شدت عداوتلریچون مع ذلك
 انک صیدنی و قطع شجرنی استحلل ایتزلردی ایمدی اول انده سکا حلال
 قیلندی انک غیریده حلال اولدیغی کی پیغمبریمز صلی الله تعالی علیه وسلم
 مکه نك قحی کونده قتال و قتلی الله تعالی حلال ایتدی بناء علیه ابن
 حنظلنک قتلنه امر ایتدی حالبوکه اول کعبه نك استارنه تعلق ایتشدی و دخی
 مقیس بن صبابه یی و غیریلری بيله قتل ایتدی ایمدی بر قومک دمائی
 حلال و بر قومک ایسه حرام ایتدی هر کیم که ابوسفیانک دارنه داخل
 اوله اول امانده اولسون دیدی بعده دیدیکه الله تعالی سموات و ارضی

خلق ايدلدينبرومكه يي حرام ايتدى بندن اولده و صكره ده اول هيچ كسه يه
 حلال اوليويدير الامكه نك قحى كونده نهاردن بر ساعتده بكا حلال
 قيلندي بعده يوم قيامته دكين الله تعالىنك حرميله اول حرامدر (ووالد
 و ما ولد) و آدم و ذريته اقسام ايدر ين (لقد خلقنا الانسان في كبد)
 بز انساني شدت و مشقته خلق ايتدك اول مصائب دنيا و شدائد آخرتدن
 زائل اولمزه انك مبدئي ظلمت رحم و مضيقيدر و منتهاسي موت و مابعديدر
 اول رسول الله تسليه در كه قريشدن متاذي اولوردى (ايجسب
 ان لن يقدر عليه احد) انسان قوى ظن ايدرميكه الله تعالى اندن
 انتقامه قادر اولميه (يقول اهلك ما لا لبدا) انتقام وقتنده يوم قيامته
 اول ديه كه سمعه و مفاخرت ايجون و ياخود رسول الله معادات ايجون
 مال كثير اتفاق ايتشيدم اشبو وقتنده اول بكا نفع ايتدى (ايجسب
 ان لم يره احد) ظن ايدرميكه الله تعالى انى كورميه اعمال سيئه سى اوزره
 اكا عقاب ايتكه (ألم نجعل له عينين و لسانا و شفقتين) بز انكچون خلق
 ايتدكى ايكي كوزكه انكه كورر و لسانكه ضميرنده كي شئي بيلدرر و ايكي
 شفه كيم انكه اغزيني ستر ايدر و نطق و اكل و شرب و غيريه انكه
 استعانت ايدر (و هديناه النجدين) و بز اكا خير و شر طريقن ادله
 و اضحه ايله تبين ايتدك ارضدن شئ مرتفعك وضوحى كبي (فلا
 اقبحم العقبة) اول انسان قوى مالى رسول اللهك عداوته اتفاقندن
 بدل يوم قيامت عقبه سن كچمكه نفع ايدر شيئه اتفاق ايتسيديكه اول
 جهنمك اوزره ممدود جسردر قليچدن كسكين اندن عبور ايتز مكر اول
 مؤمنكه خفيف الظهر اوله (و ما ادريك ما العقبة) عقبه نك نه شئ
 ايديكن و اول نه شيئه كيلور ايديكن سكا نه شئ بيلدردى (فك رقبة)
 ايمدى اول رقبة يي اعتاق و اطلاقدر (او اطعام في يوم ذى مسغبة يتيما
 ذا مقربة او مسكينا ذا مقربة) و يوم مجاعده ده طعام اطعاميدر بر يتيمه كيم
 سكا قرابتى اوله و يامسكينه كيم فقر و ضرندن ترابه ملاصق اوله (ثم كان
 من الذين آمنوا) و مع ذلك اشبوفك و اطعامى ايدن مؤمنلردن اوله
 زيرا قرباتك نفعى اولق صاحبه ايمان مقارنيله مشروطدر (و تواصوا
 بالصبر و تواصوا بالمرجة) و برى برلر يه طاعة الله صبرله و ناسه مرحمتله
 وصيه ايدرلر (اولئك اصحاب الميمنة) ايمدى انلر يمين و يايمين صاحبليدر

(والذين)

(والذين كفروا باياتنا هم اصحاب المشمة) شونلر كه كتاب و جنتدن حق اوزره
 دليل نصب ايتديكمز شيئه و ياقرآنه كافر اولديلر ايمدى انلر شمال و ياشوم
 صاحبليدر (عليهم نار مؤصدة) اوزرلر يه نار مطبقة واردر *
 دينلديكه كفار ناره ادخال اولندقلرنده اوزرلر يه ابواب جهنم قيمانور
 تاكه من بعد اندن نه غم خروج ايدر و نه اكا روح دخول ايدر كه انده
 نوع راحت بولميدر

سورة الشمس وهى خمس عشرة آية مكية

بسم الله الرحمن الرحيم

(والشمس وضحيتها) شمس وضوء و حرى حقيچون (والقمر اذا تلبها)
 وقر حقيچونكه طلوعى شمسك غروبنه قريب اوله كه اول شهرك نصف
 اولنده دركه شمس غروب ايتديكبنده قر انك عقبنده اضاءت و نورله اكا
 خلف اولور (والنهار اذا جليها) و نهار حقيچونكه ارتفاعيله شمسى
 و ياظلمتى و يادنياني و يارضى تجليه ايدى (والليل اذا يغشيها) و ليل
 حقيچونكه ظلميله شمسى و يا آفاقى و يارضى تغطيه ايدى (والسماء وما بينها)
 و سماواتى بنا ايدن الله تعالى حقيچون (والارض وما تحيها) و ارض
 و انى بسط ايدن الله تعالى حقيچون (ونفس وما سواها) جن و انسدن
 هر نفس و انى تسويه و تعديل ايدن حقيچون (فآلهما فجورا و تقويها)
 كه اول نفسه خير و شرى تبين و طاعت و معصيتى تعليم و يا اكا فجور
 و تقوايى الزام و يامؤمنده تقوايى و كافرده فجورى خلق ايتدى (قد
 افلح من زكيا) فوز و سعاده ايردى اولكه الله تعالى انى اصلاح و ذنوبدن
 تطهير و طاعته توفيق ايتدى (وقدخاب من دسيا) خيت و خسارته
 ايردى اول كسه كه انى الله تعالى خذلان و فسادده ترك ايتدى و ياخود
 معنى فلاح بولدى اول كسه كه نفسنى تزكيه و اصلاح ايدوب طاعته
 تحمیل ايتدى و خائب اولدى اول كسه كه نفسنى اهلاک و اضلال ايدوب
 معصيته تحمیل ايتدى (كذبت ثمود بطغويها) ثمود قومى طغيان
 و عداوتلرى سبيله رسوللر ينى تكذيب ايتديلر (اذ انبعث اشقيها) شول
 وقتكه انلر غايته شقيسى اولان قدار بن سالف و يا اشقيالردن برجاعت
 ناقه نك عقربه سرعت و مبادرت ايتديلر (فقال لهم رسول الله ناقة الله

وسقياها) الله تعالى نيك رسولی صالح علیه السلام انلره دیدیکه ناکه بی
عقدن وماءدن شربنه تعرضدن حذر ایدک (فکذبوه فمقروها)
انلر ايسه صالح علیه السلامی تکذیب ایدوب ناکه بی عقر ایتدیلر (فدمدم
عليهم ربهم بذنبهم فسويها) الله تعالى انلرک اوزرینه ذنبلری سبیلله
عذابى اطباق ایدوب اول حالتی جیعنه تسویه ایتدی صغیر وکیردن
هیچ بری انک عذابندن خلاص اولدی (ولایخاف عقبيها) حالبوکه
الله تعالى نمودک هلاکی عاقبتندن وتبعه سندن خوف ایتز

سورة الليل وهى احدى وعشرون آية مكية

بسم الله الرحمن الرحيم

(والليل اذا يغشى) لیل حقیقونکه اول ظلامیلله شمسى ویا نهاری
ویاهر موارات ایتدیكى شیئی قاپلیله (والنهار اذا تجلى) ونهار حقیقونکه
ظلمت لیلک زوالیلله ظاهر ویاطلوع شمسله متبین اوله (وماخلق الذکر
والانثی) واول الله تعالى حقیقونکه هر توالدی اولان نوعدن ذکر
واثائی ویآدم وحوایى خلق ایتدی (ان سعيکم لشتی) سزک دنیاده
عملکز مختلفدر بعضکز جنت ایچون وبعضکز نار ایچون عمل ایدر * پیغمبریمز
صلی الله تعالى علیه وسلم ایدر جیع ناس ایکیدن خالی دکل یانفسنی طاعته
استعمالله عذاب اللهدن قورتر ویائی مخالفته ارسالله ناردده احتیاسه
سبب اولور (فاما من اعطى واتقى) اما اول کسه که مالندن حق الهی
ادا ایده وشرک وعصیانندن صاقتنه (وصدق بالحسنى) وکلمه حسنایى که
اول (لااله الا الله) کلمه سیدر ویاجنتی تصدیق ایده ویالله اتفاق
مقابله سنده خلقی اولور ایدیکنه الله تعالى نیک وعدنه ایقان ایده (فسنيسره
لليسرى) بز اکا طریقه یسرایى یعنی یسر وراحتنه مؤدی خصلتی توفیق
وتیسیر ایدرز (واما من بخل واستغنى) اما اولکه مالنی طاعته انقاقدن
بخل ایده ولذات دنیا ایله ثواب اللهدن استغنا ایده (وکذب بالحسنى)
وکلمه حسنایى ویاجنتی تکذیب ایده (فسنيسره للعسرى) بز اکا طریقه
عسرایى یعنی عسر وشدته مؤدی اولور خصلتی تیسیر ایدرز (وما يغنى
عنه ماله اذا تردى) حالبوکه اکا بخل ایتدیكى مال نفع ایتز چنانکه اول
هلاکه ویاحفره قبره ویاقعر جهنمه واقع اوله * پیغمبریمز صلی الله تعالى

(عليه)

عليه وسلم ایدر بنوآدمدن هرکسه نیک جنت ویاناردن مکانی ازلدن تقدیر
اولتمشدر بر رجل دیدیکه اوله اولسه امریمز تقدیره حواله ایدوب عملی
ترک ایده لممی پیغمبریمز علیه السلام دیدیکه عملی ترک ایتکز عمل ایدک
هرکسه اکا تیسیر اولسان عملک سکا نیچون خلق اولنوبدر اهل شقایه
شقا عملی واهل سعادت سعادته عملی تیسیر اولنور بعده (فاما من اعطى)
دن (العسرى) یه دکن تلاوت ایتدی اشبو آیاتک سبب نزولنده *
دینلیدیکه انصاردن بررچلاک برنخله سی اولوب مکر انک فقیر برقومشوسی
وار ایدی اول نخله سی میوه سندن اول فقیرک دارنه دوشدکده صبیانی
انی آلوب برلردی نخله صاحبنه ویرمزردی نخله صاحبی انلردن پیغمبریمز
علیه السلامه شکایت ایدیچک پیغمبریمز علیه السلام دیدیکه اول نخله کی
بکا ویر سکا انک یرینه جنتده برنخله ویرینه اول ايسه اکا راضی اولدی
بعده ابوالدحداح نام صحابی ملاقی اولوب کندیکن برحاططیلله اول نخله یه
صاحبندن اشترا ایدوب ایددی یارسول الله اول نخله بی بنخله جنتده کی
نخله یه دکشرمیسن دیدی دکشدم دیوب انی اول صبیانی اولان انصارى یه
ویردی اوله اولسه ابوالدحداحله اول صاحب نخله شاننده اشبو
آیت نازل اولدی (ان علينا للهدى) بزم عهدمزددرکه طریق هدایى
طریق ضلالدن تبیین ایدهوز (وان لنا للآخرة والاولی) وآخرت
ودنیا بزم ایچونددرکه اول ایکیسنک ثوابندن دیلدیکمز کسه یه دیلدیکمز
شیئی ویررز (فانذرتکم نارا تلظى) یا اهل مکه سزى قرآنله تخويف
ایدرین برناردنکه اهلی اوزره التهاب واشتعال ایدر (لا یصلیها الا
الاشقی الذی کذب وتولى) اول ناره داخل اولمز مکر شول کافرکه حق
تکذیب ایدوب طاعتندن اعراض ایده (وسیجنیها الاتقی الذی یؤتی
ماله یتزکی) واول ناردن تباعد ایدر اول کسه که شرک ومعاصیدن
صاقنور مالنی سبیل خیراته ویررکه عندالله زاکى اوله (ومالاحد عنده
من نعمة تجزى) حالبوکه اول اتقانک عندنده هیچ کسه نیک نعمتی یوقدرکه
ویردکیلله اول نعمته مجازات قصدین ایده (الابتغاء وجه ربه الاعلی)
بلکه ویرمسی دکل الارب تعالینک وجه کریمن طلب ایچوندر یوخسه
نعمت مکافات ایچون دکل (ولسوف یرضی) یوم قیامتده اول اتقی اکا ویریلان
ثوابه راضی اولیسردر جیع مفسرین قولنده اشبو (وسیجنیها) دن

(۲۳)

بع

سوره آخرینه دکن اولان آیات کریمه ابوبکر الصدیق رضی الله تعالی عنه شاننده نازل اولوبدرکه اول ممالیکدن مشرکین یدلرنده اذا اولنور کور یحک اشترایدوب اعتناق ایدردی جله دن بلال بن ابی رباح رضی الله تعالی عنه امیه بن خلف یدنده ایدی اسلامنده صادق اولدیغی سبیدن انی امیه هرکون اوله وقتنده بطحاء مکّه یه چیقاروب آرقه سی اوزره یاتوروب وبر یوک طاشی کوکسی اوزره قویوب کیدردی محمدک دیندن رجوع ایتزسک موتکه دکن سکا بووجهله عذاب ایدرین دیردی ابوبکر رضی الله تعالی عنه انی اول حالده کور یحک امیه یه دیدیکه بوضعیفه نیچون بویه عذاب ایدرسن بنم اندن کوچلو وقتولو برسیاه غلام وار سنک دینکده در سنک بوغلامکه انی دکیشهلم اولدخی نعم دیوب بلالی اندن آلدیغی کبی آزاد ایتدی وبلال دن غیری هجرتدن اول التیسن دخی آلوب مشرکین ایدندن قورتردی انک بری عامر بن فهیره ایدی بدر واحد غزالرنده حاضر اولوب بئر معونه ده شهید اولدی وبری زبیره ایدی آزاد اولدیغی حینده بصرینه عمی اصابت ایتدی قریش دیدیلرکه انک بصرنی لات وعزی کیدردی زبیره ایتدی والله لات وعزی نفع وضره قادر دکدر سنز کذب ایدرسن اوله اولسه الله تعالی اکا بصرنی رد ایتدی وایکسیدخی نهديه وقزی ایدی سیده لری انلری طحن ایچون کوندروب بن سزی والله ایدا آزاد ایتزم دیدی انلری دخی ابوبکر الصدیق رضی الله تعالی عنه آلوب آزاد ایتدی وبری دخی بنومولدن برجاریه ایدی عذاب اولنوردی انی دخی الوب آزاد ایتدی وبری دخی ام عیس ایدی انی دخی آلوب آزاد ایتدی

سورة الضحی وهی احدى عشرة آية مكية

بسم الله الرحمن الرحيم

(والضحی) ضحی حقیچونکه اول ارتفاع شمس وقتیدر انکله تخصیصه سبب زیرا که انده نهارقوی اولور والله تعالی انده موسی علیه السلامه سویلیوبدر وسحره سجده یه واروبدر ویا انکله مراد نهاریک کیدر (واللیل اذا سجی) ولیل حقیچونکه ظلامی اقبال ایدوب هرشیئی انکله تعطیه ایده ویا ظلامی سکون واستقرار ایدوب من بعد ازدیادی

(کسله)

کسله (ماودعک ربک وماقلی) یا محمد ربک جل شانہ سنی ترک ایتدی وسکا بغض ایتدی * روایت اولندیکه پیغمبریمز صلی الله تعالی علیه وسلم مشتکی اولوب ایکی اوج کیجه قیامه قادر اولدی ابولهک زوجہ سی کلوب دیدیکه ظن ایدر ینکه یا محمد سنی ربک ترک ایتش اوله زیرا ایکی اوج کیجه دنبرو انک سکا قریب اولدیغی کورمزین اول اجلدن بو اوج آیت نازل اولدی * مفسرون ایدر یهود پیغمبریمز صلی الله تعالی علیه وسلم ذوالقرنین واصحاب کهف وروحدن سؤال ایتدکرنده انی ایرته خبرویرهیم دیوب لکن ان شاء الله دیمدیکچون اون ایکی ویا اون بش ویا قرق کون اندن وحی محتبس اولدی ویا خود وحیک احتباسنه سبب بیتنده جروکلب وار ایدی اوله اولسه مشرکون دیدیلرکه محمدی ربیبی ترک ایتدی (وللاخرة خیرلک من الاولى) یا محمد آخرت سکا دنیادن خیرلودر زیرا که آخرت باقیه در شوائدن خالصه در دنیا ایسه فایده در مضارله مشوبه در وقتا که الله تعالی اکا دنیاده وحی وکرامتله زائل اولمز ایدیکنی تبیین ایتدی آخرته اندن اجل واعلائی وعد ایتدی ویا خود یا محمد امرک نهایی بدایتدن خیرلودرکه رفعت وکماله تصاعدن زائل اولمزسن (ولسوف یعطیک ربک فترضی) ربک جل شانہ سکا برمرته عطاء جزیل ایدیسردرکه سن اکا راضی اولورسن اما دنیاده کمال نفس وظهور امر واعلاء دین کبی وآخرته حوض وشفاعت وشهادت کبی بعده اکا ابتداء نشئه سنده ویردیکی بعض نعمی مالد فضلنه مترقب اولسون ایچون ذکر ایدوب دیدیکه (ألم یجداک یتیمافاوی) یا محمد ربک جل شانہ آناک واناک موتدنصکره سنی یتیم صغیر فقیر بولدی حالبوکه سکا مال ومأوی ترک ایتامشردی اوله اولسه عک ابو طالبه ضم ایدوب انی سکا مأوی وتریتکه متعهد ومؤتکه کافی قیلدی (ووجدک ضالافهدی) وسنی حکمت وشرایع واحکامدن خالی بولوب وحی والهام وتوفیقه سکا هدایت ایتدی (ووجدک عائلافاغنی) وسنی فقیر بولوب خدیجه نك ماليله بعده غنائمه سنی غنی ایتدی ویاسنی ویردیکی رزقه راضی ایتدی پیغمبریمز صلی الله تعالی علیه وسلم ایدر غنا دنیا متاعنک کثرتله دکدر بلکه غنا قلبک غناسیدر وینه پیغمبریمز علیه السلام ایدر فوز وفلاح بولدی اولکسه که رزقی کفاف اوله والله تعالینک

ویردیدی رزقه قانع اوله (فاما الیتیم فلا تقهر) یتیمی تحقیر ایتمکل ویا اکا قهر ایدوب ضعیفچون مالنی المغل پیغمبریمز علیه السلام ایدر بیوت مسلمیندن خیر لو بیت اولدرکه انده یتیم اولوب اکا احسان ایدبله وشر بیت اولدرکه انده یتیم اولوب اکا اساءت اولنه وایکی پارمغن ضم و اشارت ایدوب دیدیکه بن وکافل یتیم جنتده بیله یز (واما السائل فلا تنهر) وسائلی قیو کدن زجر ایتمه که بذل یسیرله وکله طیبه ایله رد ایلکل ابراهیم ابن ادهم ایدر سائللر آخرت بریدیدر قیو کزه کلدکده کانه دیر که آخرته برشی کوندر ریمسز که انده انی اهللریکزه ایرکوره لم * دینلیدیکه سائلله مراد طالب علمدر (واما بنعمة ربك فحدث) وربك جل شانہ نك نعمتی تحدیث ایت یعنی قرآنی ناسه تبلیغ ایت ونبوتکی تحدیث ایت ویا اشو سورده ذکر اولنان نعمتله شکر ایت پیغمبریمز علیه السلام ایدر اول کسه که معروفک قلیلنه شکر ایتیه کثیرنه دخی شکر ایتز واولکه ناسه شکر ایتیه الله تعالی به دخی شکر ایتز والله تعالینک نعمتی تحدیث شکر در وانی تحدیثک ترکی کفر در * ابن عباس رضی الله تعالی عنهما ایدر بن ابی بن کعبدن او قودم اول ایدر بن رسول الله صلی الله تعالی علیه وسلمدن او قودم والضحی سورده سنی تمام ایتدیکنده بکا امر ایتدیکه تکبیر ایدم تا قرآنک تمامنه دکین هر سورده آخرنده انی ایدم واکا سبب اولدرکه اشو سورده اولنده ذکر اولنان سبیلله پیغمبریمز علیه السلامدن وحی محتبس اولیحق مشرکون دیدیلر که محمدی ربیسی هجر و ترک ایتدی اولیه اولسه پیغمبریمز علیه السلام اکا زیاده مفهوم و محزون اولدی بعده والضحی سورده سی نازل اولیحق اکا سرورندن تکبیر ایدوب من بعد انی امتنه سنت ایتدی

سورة الم نشرح وهی ثمان آیات مکیة

بسم الله الرحمن الرحيم

(الم نشرح لك صدرك) بزسنك صدرکی توسیع ایتدکی حتی که مناجات حقّه ودعوت خلقه قابل اولدی ویا خود اکا ایداع ایتدیکمز علم وحکم ایچون توسیع ایدوب جهل ضیقنی اندن کیدردک ویا خود قلبکی وحی تلقی به تیسیر ایتدک حالبوکه اندن اول اول سکا مشقتلو ایدی * دینلیدیکه انکله مراد روایت اولناندرکه جبریل علیه السلام انی صباوتی حالنده

(ویا معراج)

و یا معراج قبیلنده انک قلبنی استخراج وغسلدن صکره انی ایمان وعمله طولدردی (ووضعتنا عنك وزرك الذي انقض ظهرك) وسندن حظ ایتدک شول فرط سالتکی که قبل البعثه اول سندن صدور یله ظهر که ثقیل اولوب انی انقاض ایتدی ویا انیکه قومک ضلالن کوروب ارشاد لرندن عاجز اولدک ویا انلری ایمانه دعوتکده اصرار واذاده تعدیلرین کوردک (ورفعتنا لك ذکرك) و ذکر یکی رفع ایتدک شول وجهله کیم بن ذکر اولندیغده سندخی بئله ذکر اولنورسن یعنی اذان واقامت وتشهد وخطبه ده حتی که برکسه الله تعالی به عبادت ایدوب هر شیئده انی تصدیق ایتسه الابوکه محمدک رسول الله ایدیکنه شهادت ایتیه انک هیچ بری اکا نفع ایتز بلکه کافر اولور * ضحاک ایدر یعنی انک ذکر نسز صلاة وخطبه سی جائز اولز (فان مع العسر يسرا) یا محمد صدقنده اولدیغک ضیق صدر ومنتقض ظهر اولور وزر ووقومکدن کوردیکک ضلال واذا امثالی شدائله بیله شرح صدر ووضیع وزر واهدایه توفیق واردر (ان مع العسر يسرا) وعد مذکوری تا کید ورجائی تعظیم ایچون تکرار اولندی * اشو آیت نازل اولیحق پیغمبریمز صلی الله تعالی علیه وسلم ایتدی سزه بشارت اولسونکه سزه یسر کلدی برعسر ایسه ایکی یسره غالب اولز * ابن مسعود رضی الله تعالی عنه ایدر اکر عسر بر حیره ده اولسه یسر انی استیوب اوزرینه داخل اولوردی * دینلیدیکه عسرك ایکیسی بیله معرفه اولدیغچون معناده واحدر ویسرك ایکیسی بیله نکره اولدیغچون لفظ ومعناده ایکیدر * دینلیدیکه اول ایکی یسرك بری پیغمبریمز علیه السلام زماننده مسلمینه تیسیر اولنان فتو حدر وبری دخی خلفا زماننده تیسیر اولنان فتو حدر و جائزدر که مراد یسر دنیا یله یسر آخرت اوله * دینلیدیکه اول پیغمبریمز صلی الله تعالی علیه وسلمی تسلیله در عسرله مراد اهل مکه نك انی مکهدن اخراجیدر ویسر اول انک مدینه به دخولی وایمانده اصحابنک تکثیریدر ویسر ثانی مکه نك قحی کوننده انک واصحابنک عز ونصرله اکا دخولیدر (فاذا فرغت فانصب) صلاة مکتوبه دن فراغکده رب تعالی به دیکلوب مسئولکه رغبت ایتکه انی سکا ویره ویا جهاددن فراغکده سی عذابدن انجا ایدر شیئده کندوبی اتعاب ایت ویا نشهددن فراغکده دنیا وآخرتک ایچون دعا به منتصب اولغل ویا تبلیغ رسالتدن فراغکده کندک

و مؤمنان ایچون استغفار ایت (والی ربک فارغب) وربک جل شانہ دن جمیع احوالکده حاجتک دیلکلی غیریدن دکل زیراکه یالکز اولانی روایه قادر اولور و یاخود ناردن رهبت و جنته رغبت ایدر اولدیغک حالدہ اللہ تعالیٰ به تضرع ایت

سورة التين وهي ثمان آيات مكية

بسم الله الرحمن الرحيم

(والتين والزيتون) تین و الزیتون حقیچون ثمار بیننده اشبو ایکسی ذکر ایلہ تخصیص اولندی زیرا که تین فاکهه طیه در فضلاتی اولمز و غداء لطیف سریع الهضمدر و دواء کثیر النفعدر که اول طبیعتی تلین و بلغمی تحلیل و کلیه لری تطهیر و مثانه ده کی رملی کیدرر و کبد و طحالت سده سنی فتح ایدر و بدنی سمین ایدر حدیثه کلدیکه تین بواسیری قطع ایدر و تقریس علتسه نفع ایدر اما که زیتون فاکهه و ادام و دوا در و دهنی کثیر المنافعدر مع هذا بریده بترکه انده دهنیدن اثر اولمز * دینلدیکه اول ایکسی ایلہ مراد ایکی جبلدر بری جبل تیندر که دمشق انک اوزرنده در و بری جبل زیتوندر بیت المقدس انک اوزرنده در زیرا اول ایکسی ارض مقدسه دندر تین و زیتون منبتدر و یاخود مراد مسجد دمشقله مسجد بیت المقدسدر و یاخود تین مسجد اصحاب کهدر و زیتون مسجد ایلیدر (و طور سینین) و جبل طور حقیچونکه موسی علیه السلام انک اوزرنده رب تعالیٰ به مناجات ایتدیکه انک موضعنه سینین و کذلک سینادخی دینور (وهذا البلد الامین) و اشبو بلد حقیچونکه اکا داخل اولان امنده اولور اول مکه شهریدر (لقد خلقنا الانسان في احسن تقويم) بزانتصاب قامت و حسن صورت و خواص کائنات و نظائر سائر ممکناتی استجماعله انسانی احسن تعدیلده خلق ایتدک حالبوکه انک غیری هر حیوان یوزی اوزره منکب خلق اولنوبدر (ثم رددناه اسفل سافلين) بعده بزانی حسن وقوت و کمال شبابتد نصکره احوال سافلینک اسفلنه ردايتدک که اول ضعف و هرم وارذل عمردر حتی صبی کبی اولمده فهم ایتمز اولور و یا کفر و فجور ایچون موتد نصکره ناره ردايدرز معنای اول اوزره مراد اولور که عقلری زائل اولوب عملری کسیلور انلر ایچون

(حسنه)

حسنه یازلقدن قالور (الا الذين آمنوا وعملوا الصالحات فلهم اجر غير ممنون) لکن شونلر که مؤمن اولوب عمل صالح ایشلدیلر انلر اردل عمره رد اولمز و یا ناره ادخال اولمز لر * دینلدیکه قرآنی اوقیوب موجبیه عمل ایدن کشتی اردل عمره رد اولمز ایمدی انلرک قوتلری کتدکده عقلینه ضعف ایردکده اجرلری کسلز بلکه کما کان حال شبابلرنده و کمال قوتلرنده ایشلیو کلدکاری اعمال صالحه نک اجری موتلرینه دکن یازیلور اول انلره عملسز اجر اولور (فما یکذبک بعد بالدين) یا محمد اشبو دلائلد نصکره دلالت و یانطقله یوم جزایی اخبارکده سنی نه شیء تکذیب ایدر و یاخود یا انسان الله تعالی سنی احسن تقویمده خلق ایدوب کمال استوایه ایر کوردیکند نصکره سنی اردل عمره ردنی بیلور کن یوم جزایی انکار و تکذیبه سنی نه شیء تحمیل ایدر (أليس الله باحكم الحاكمين) ذکر اولنان خلق ورده قادر اولان الله تعالی صنع و تدبیرده اعدل حاکمین دکلیدر خلقدن هر برینه اهل اولدیغی شیئله حکم ایدر احوال مذکوریه به قدرتی کبی اعاده به دخی قدرتی ایرر پیغمبریمز صلی الله تعالی علیه وسلم ایدر برکسه که والتین و الزیتون سوره سین اوقیوب آخرینه ایریشه (بلی وانا علی ذلک من الشاهدين) دیسون

سورة العلق وهي تسع عشرة آية مكية

بسم الله الرحمن الرحيم

(اقرأ باسم ربك الذي خلق) یا محمد قرآنی ربک جل شانہ نک اسمیلہ افتتاح و یا انکله استعانت ایدر اولدیغک حالدہ اوقوغل که اول هرشیئی خلق ایتدی * اکثر مفسرین ایدر قرآندن اول نازل اولان اشبو سوره در مالم یعلم قولنه ایرنجه * عائشه رضی الله تعالی عنها ایدر پیغمبریمز صلی الله تعالی علیه وسلم اول وحی اولنان رؤیای صالحه ایدی منامنده هر نه کورسه فلق صبح کبی ظاهر اولوردی بعده خلوته رغبت ایدوب جبل حراده مغاره ده ماشاء الله زمان کچه و کوندز عبادته مشغول اولدی حتی که اکا برملک کلوب اقرأ یعنی اوقوغل دیدی اول دیدیکه بن اوقومق یلزم نه اوقویان پیغمبریمز صلی الله علیه وسلم ایدر اندن ملک بنی قتی صدقدی بعده بنه بکا اوقو دیو تکرار ایلدی بنینه اولکی جوابی ویرچک اول بنی تکرار

صدقی بوموال اوزره اوج دفعه وقوعند نصرکه دیدیکه اقرأ باسم ربك الاعلى حتى که مالم یعلم قولنه ایردی اولیه اولسه دتریه ربك خدیجه رضی الله تعالی عنها قنه کلوب بنی اورتیکز دیو اورتندی بعده قصه بنی خدیجه خبر و یروب نفسم اوزره قورقارم دیدی خدیجه ایتدی والله اول سنی اخذ ایتز زیرا که سن صله رجم ایدر و ضیفکه ضیافت ایدر و سائر خصال حیده بنی ایدرسن بعده خدیجه انی ابن عمی ورقه بن نوفله ایلته دیکه اول زمان جاهلیتده نصرانیت اوزره اولوب انجیلدن لغت عربیه ایلله ماشاء الله نیچه اشیاء یاز نمشدی شیخ کبیر اعمی ایدی پیغمبر یمز صلی الله علیه وسلمک ماجراسن اکا ذکر ایدیچک ورقه دیدیکه اشبو ذکر ایتدیچک شول ناموسدر که الله تعالی انی موسی علیه السلامه دخی انزال ایتشدی اکا حیاته قالدورسم سکا نصرت ایدردم زیرا که قومک سنی ارالردن چیقار یسر در نیکیم سندن اول بو حالته ایرن رجالی قوملری ارالردن چیقار مشلردی بعده برقاج ایامدن صکره ورقه فوت اولدی و پیغمبر یمز صلی الله تعالی علیه وسلمدن وحی کسلدی اندن اکا زیاده حزن ایردی بر مرتبه ده که بر نیچه کوره یوکسک طاغیرک باشنه چیقادی که کندوی اندن آشاعه براغه اول حالته جبریل علیه السلام اکا ظاهر اولوب یا محمد سن الله تعالی نیک حق رسول یسن دیوتسلیمه ایدوب کندوی اندن آشاعه براقدن منع ایدردی حتی که من بعد و حیک نزولی واستقرار یله قریر العین اولدی (خلق الانسان من علق) انسانی علقه لردن خلق ایتدی وقتا که اول واجبات معرفه الله اولدی اول نازل اولان انک وجودینه وفرط قدرته و کمال حکمتنه دلالت ایدر شی اولدی (اقرأ وربک الاکرم) یا محمد قرآنی اوقوغل که ربک تعالی کرمده هر کریم اوزره زاندد که غرضسنز انعام ایدر و خوفسنز حلم ایدر (الذی علم بالقلم) که اول قلمله خط و کتابت تعلیم ایتدی (علم الانسان مالم یعلم) اول انسانه بیلدیکنی بیلدردی شول وجهله کیم انده قوی خلق ایتدیکندن صکره اکا نصب دلائل و انزال آیات ایتدی (کلا ان الانسان لیطغی ان رآه استغنی) حقا که نعمة الله کافر اولان انسان حدی تجاوز و دینه استکبار ایدر چنانکه کندوی غنی کوره دینلیدیکه یعنی لباس و طعام و غیریده منزلندن منزله اخرايه ارتفاع ایدر * دینلیدیکه اشبو آیت ابو جهل شانده نازل اولوبدر که اول چقان برماله اصابت ایتسه ثیاب

(ومرکب)

ومرکب و طعامن آرتورردی (ان الی ربک الرجعی) حالبوکه یا انسان رجوعک رب تعالی یدر ایدمی طغیانک عاقبتدن خذر ایت (أرأیت الذی ینهی عبدا اذا صلی) کوررمیسن شول کیمسه بنی که عباد اللهدن برعبدی صلاتدن نهی ایدر اشبو آیت ابو جهل شانده نازل اولوبدر که اول دیدیکه اکا محمدی سجد ایدر کوررسم بوینو اوزره چکندم چون اول عزمله اکا واردی اردنه چکلمکه باشلدی اکا نیچون بویه ایدرسن دینلیدیکه دیدیکه بنمله محمد بیننده آتشدن خندق و احوال واجحه کورر بن پیغمبر یمز صلی الله تعالی علیه وسلم دیدیکه اکا اول بکا قریب اولسه ملائکه انی پاره پاره ایدردی (أرأیت ان کان علی الهدی او امر بالتقوی) بکا خبر ویرشول کیمسه دن که اکا مصلی دین حق اوزره اولسه و یا خود ناسه ایمان و عمل صالحه امر ایتسه (أرأیت ان کذب وتولی) بکا خبر ویرکه اول صلاتدن نهی ایدن دینی تکذیب و ایمادن اعراض ایتسه (الم یعلم بان الله یری) اول نهی ایدنی نیتز میکه الله تعالی انک صلاتدن نهی و سائر افعال قبیحه سنی کورر (کلا) ایدمی اول نهی ایدن اول فعل سینندن ارتداع ایتسون (لئن لم ینته لفسعا بالناسیه) اکا اندن منتهی اولمزه بز انک ناصیه سن قهر و شدتله اخذ ایدرز (ناصیه کاذبة خاطئة) که اول ناصیه صاحبی کذب و خطائله متصفدر وقتا که ابو جهل پیغمبر یمز صلی الله تعالی علیه وسلمی صلاتدن نهی ایتدی پیغمبر یمز صلی الله تعالی علیه وسلم انی زجر و نهر ایتدی ابو جهل پیغمبر یمز علیه السلامه دیدیکه والله سنک اوزریکه اشبو وادی بنی خیل جرد و رجال مردله طولدر ایم الله تعالی دیدیکه (فلیدع نادیه سندع الزبانية) ایدمی اول قوم و عشرتن چاغروب انزلله استنصار ایتسون بز دخی زبانیلری چاغرز انی ناره سوریه لر (کلا لا تطعه واسجد واقترب) ایدمی یا محمد تثبت ایدوب انک صلاتدن نهینه اطاعت ایتکل بلکه طاعت اوزره ثابت اول سجوده مداومت ایدوب اعمال صالحه ایلله الله تعالی به تقرب ایت پیغمبر یمز صلی الله تعالی علیه وسلم ایدر عبدک رب تعالی به زیاده قریب اولمسی ساجد اولدیغنده در

سورة القدر وهی خمس آیات مختلف فیها

بسم الله الرحمن الرحيم

(انا انزلناه فی لیلة القدر) بز قرآنی لیلته قدرده لوح محفوظدن سماء دنیا به

بیت عزته انزال آیتدک بعده جبریل علیه السلام انی یکریمی ویا کریمی اوج
 یلمده ازمان متفرقه ده پیغمبریمز صلی الله تعالی علیه وسلم انزال آیتدی
 (وما أدبرک مالیلة القدر) سکا لیلہ قدرک غایت فضلنی نه شیء یلدردی اول
 لیلہ قدرله تسمیه اولندی زیرا الله تعالی اول لیلہ ده برسنه دن سنه مقبله به
 دکین واقع اولور اجل و رزق و موت و سایر امور و احکامله سموات و ارض
 خلق اولمزدن اول تقدیر اولنان مقادیری موافقته سوق و تنفیذ ایدر *
 دینلدیکه اول شهر رمضانده در بعضیلر دیدیکه اول لیالی سنه نك برنده در
 حتی برکسنه مرأه سنك طلاق و یا عبدنك عتقنی لیلہ قدره تعلیق ایتسه
 یمین آیتدیکی حیندن برسنه تمام اولمجنجه اول طلاق و عتق واقع اولمزا شبو
 قول ابن مسعود رضی الله تعالی عنهدن مرویدر دیمشکه برکیمسه برسنه نك
 لیالیسنی قائم اوله اول لیلہ قدره اصابت ایدر ابن عمر انی ایشیدیکجک دیدیکه
 الله تعالی ابو عبد الرحمانه رحمت ایده اول لیلہ قدرک شهر رمضانده ایدیکن
 بیلور لکن اول قولیلہ مرادی ناسک اکا اتکلندن منع ایدی اکثر و انی
 رمضانك عشر اخیری اور تاسنده در دیدیلرکه الله تعالی انی اخفاء آیتدی
 تا که ادراک طمعیله لیالی رمضانك جبعنده عبادته اجتهاد ایدوب ثوابلرین
 کثیر ایده (لیلہ القدر خیر من الف شهر) لیلہ قدرده قیام و عبادت خیرلودر
 بیک آی قیام و عبادتدنگه انده لیلہ قدر اولیه * ابن عباس رضی الله تعالی
 عنهما ایدر پیغمبریمز صلی الله تعالی علیه وسلم بنو اسرائیلدن بررجل ذکر
 اولندیکه اول بیک آی فی سبیل الله جهاده سلاحن اموزندن ایندرمدی
 پیغمبریمز صلی الله تعالی علیه وسلم انک اول عملن بکنوب امتی ایچون انک
 مثلنی الله تعالی دن تمنی آیتدی و دیدیکه یارب امتکم عمرلرین قصیر و عمللرین قلیل
 آیتدک اولیه اولسه الله تعالی بو امته لیلہ قدری و یردیکه انلرک اول لیلہ
 شریفه ده کی عبادتلری اول اسرائیلینک اول مدته اولان جهادندن خیرلودر *
 سعید بن المسیب ایدر برکیمسه که بریلدن بریله دکین اخشام ویتسو نمازین
 جاعتله قیله لیلہ قدردن نصیبین اخذ ایدر عائشه رضی الله تعالی عنها پیغمبریمز
 صلی الله تعالی علیه وسلم دیدیکه اکربن لیلہ قدره ایرشسم نه دعا ایده یم آیتدی
 دیکل که * اللهم انک عفو کریم تحب العفو فاعف عنی (تنزل الملائکة
 والروح فیها باذن ربهم من کل امر) اول لیلہ قدرده الله تعالی نك اذیله

(ملائکة)

ملائکة وروح اول سندهه تقدیر اولنان هر خیر و برکت امریچون ارضه
 و یا سماء دنیایه نزول ایدرلر و یا مؤمنلره تقرب ایدرلر (سلام هی حتی مطلع
 الفجر) لیلہ قدرده الله تعالی سلامتدن غیری شیء تقدیر ایتمز حالبوکه انک
 غیریده سلامتی و بلائی دخی تقدیر ایدر و یا خود اول لیلہ قدرده دکل
 الاسلامدر زیرا انده ملائکة مؤمنلره سلامی چوق ایدرلر ایددی لیلہ قدرده
 ملائکة نك مؤمنلره سلامی غروب شمسدن طلوع فجره دکر

سورة البینة وهی ثمان آیات مختلف فیها

بسم الله الرحمن الرحيم

(لم یکن الذین کفروا من اهل الکتاب والمشرکین منفکین حتی یا تبهم
 البینة) یهود و نصارا دن و عبده اوئاندن اولان طوائف کفر و شرکرندن
 زائل اولمدیلر حتی که الله تعالی دن انلره حق و باطل بیننی فرق ایدر رسول الله
 و یا قرآن کلدی زیرا که پیغمبریمز صلی الله تعالی علیه وسلم بعثتندن
 اول دیرلر دیکه بز صد دنده اولدیغمز دیندن زائل اولمزر تا شول و قته
 دکین که تورات و انجیلده وعد اولنان پیغمبر که که اول محمد علیه السلامدر
 چون اول پیغمبر کلدی ایکی طائفه دن برنیچهلر اول و عدلرینه وفا ایدوب
 ایمانه کلدیلر و برنیچهلر ايسه اول قوللرندن رجوع ایدوب کفرلری اوزره
 اصرار آیتدیلر (رسول من الله یتلو صحفا مطهرة فیها کتب قیمه) که اول
 الله تعالی دن بر رسولدر که تلاوت ایدر شول قرطیس مضمونی که اول
 باطلدن منزهدر انده احکام مستقیمه واردر که انده اعوجاج یوقدر زیرا که
 اول صواب و صلاحه ارشاد ایدر (وما تفرق الذین اتوا الکتاب الا
 من بعد ما جاءتهم البینة) یهود و نصاری دینلرنده و یا محمد علیه السلام
 شاندن و یا قرآن حقنده اختلاف آیتدیلر الا انلره بینه کلدیکند نصکره که اول
 محمد علیه السلام و یا قرآندر و یا خود معنی هالکین و معذبین اولمدیلر الا رسال
 رسول و انزال کتبله اوزرلرینه حجت قائم اولدیغند نصکره (وما
 امروا الا لیعبدوا الله مخلصین له الدین حنفاء) حالبوکه انلر کتابلرنده امر
 اولمدیلر که انجق الله تعالی به عبادت ایدلر عبادتی انکیچون خالص
 ایدوب عقائد زائعه دن اعتقاد حقه مائلین اولدقلری حالده (و یشیوا
 الصلاة و یؤتوا الزکاة) و صلوات مفروضه فی اوقاتنده ادا ایدلر و زکاتی

محلنه وضع ایدله انلر کتابلرنده اشبو خصاله امر اولمشلر ایکن انی تحریف و عصیان ایتدیلر (وذلك دين القيمة) اشبو امر اولنان اشیاء کتب منزله نك جیعنده مستقیمدر (ان الذين كفروا من اهل الكتاب والمشرکین فی نار جهنم خالدین فیها اولئک هم شر البریة) اهل کتابدن انلر که کافر اولدیلر و انلرک غیریکه الله تعالی به اشراک ایتدیلر یوم قیامتده انلر نار جهنمده در کفرده تفاوتلری حسبجه مستحق اولدقلری نوع عذابده دائمین اولدقلری حالده ایددی انلر عند الله شر خلیقه در (ان الذين آمنوا وعملوا الصالحات اولئک هم خیر البریة) شونلر که الله تعالی به ورسولنه مؤمنین و عملده صالحین اولدیلر ایددی انلر عند الله خیر خلیقه در (جزاؤهم عند ربهم جنات عدن تجری من تحتها الانهار خالدین فیها ابدا) رب تعالی عندنده جزالری جنتلر در که اغاجلری التندن نهرلر جاری اولور انده نعیم و مشتهلرنده دائمین اولدقلری حالده (رضی الله عنهم ورضوا عنه) الله تعالی انلردن طاعتلری سبیلله راضی اوله و انلر دخی الله تعالی دن ویردیکی ثواب سبیلله راضین اوله (ذلك لمن خشی ربه) اشبو ذکر اولنان جزاء و رضوان هر کسه ایچوندر که یوم قیامتده درگاه حقهده سؤال و حسابدن خوف ایدوب امرنه اطاعت و اکا عصیاندن اجتناب ایده

سورة الزلزلة وهی تسع آیات مختلف فیها

بسم الله الرحمن الرحيم

(اذا زلزلت الارض زلزالها) چنانکه ارض قیام ساعت ایچون شدتله تحریک ایدیله پیغمبریمز صلی الله علیه وسلم قیامت نوقت اولور دیو سؤال اولندقدده بیان اولندیکه چنان نفخة اولی و یانفخة ثانیه عندنده ارض شدتله تحریک ایدیله (واخرجت الارض اثقالها) وارض جو فنده اولان کنوز و امواتی طشره چیقاره (وقال الانسان مالها) انسان کافرلر دیه لر کیم بو ارضه نولدیکه تحریک ایدر جو فنده اولان اشیایی طشره براغور زیرا که اول بعثی تصدیق ایتلردی اما مؤمن دیر که اشبو الله تعالینک و عد ایتدیکیدر مرسلون انی امتلرینه اخبارلرنده تصدیق ایتدیلردی (یومئذ تحدث اخبارها) اول کونده ارض الله تعالینک

(انطایقه)

انطایقه خبر ویرر خیر و شردن انی که اوزرنده ایشلشلردی (بان ربک اوحی لها) شول سبیلله کیم الله تعالی ارضه اوزرنده ایشلن اشیایی خبر ویرمن الهام ایده (یومئذ یصدر الناس اثباتا لیروا اعمالهم) اول کونده ناس ثواب و عقابدن اعماللرینک جزاسن کورسونلر ایچون موقف حسابدن مراتبلری حسبجه فرقه فرقه رجوع ایدله مؤمنلرک یوزلری بیاض آمین اولدقلری حالده جانب یمینی اخذ ایدوب کرامتله جنته کیده لر و کافرلرک یوزلری سیاه فزعین اولدقلری حالده جانب شمالی اخذ ایدوب آهاتله ناره کیده لر (فن یعمل مثقال ذرة خیرا یره و من یعمل مثقال ذرة شر یره) فریق سعاددن اول کسه که نمله صغیره دکلو خیر ایشلش اوله آخرتدن انک ثوابن کورر و فریق اشقیادن اول کسه که نمله صغیره دکلو شر ایشلش اوله آخرتده انک عقابن کورر * دینلدیکه کافره خیرینک ثوابی دنیاده تعجیل اولنوب فوت اولدیغنده عند الله ذره دکلو خیری قالمز و مؤمنه شرتنک عقابی دنیاده تعجیل اولنوب فوت اولدیغنده ذره دکلو شرتی اولمز * ابن عباس رضی الله عنهما ایدر مؤمن و کافردن هرکسه یوم قیامتده شول دنیاده ایشلیدیکی خیر و شرتی کورر مؤمنک شرتی یارلغور خیرنه ثواب ویریلور و کافرنک خیری رد اولنوب شرتی اوزره عقاب ایدیلور * مقاتل ایدر اشبو ایکی آیت ایکی رجل شانده نازل اولوبدر که انک برینه سائل کلدیکنده اکا برتمره و برجوزه و برکسره مثلنی ویرمکی استقلال ایدوب ویرمزدی بو برشی دکلددر اجر ایه شول شیئی ویرمکه اولور که (ویطعمون الطعام علی حبه) مصداقجه بزم اکا رغبت و محبت اوله شیئ قلیله ایه بزم رغبت و محبت یوقدر دیردی ورجل آخر ایه کذب و غیبت و نظره مثلی ذنوبی تهاون ایدوب ایشلکدن تحاشی ایتزدی شول سبیلله کیم الله تعالی کبار اوزره وعد ایدوب دیردی اوله اولسه الله تعالی اشبو ایکی آیتی انزالله خیرک قلیلنه ترغیب ایتدیکه ویره لر شول رجاله کیم عند الله کثیر اوله و ذنبک یسیرندن تحذیر ایتدی شول خوفله کیم اصرارله اول کبیر اوله زیرا که یوم قیامتده ذنب صغیر صاحبک کوزینه جبالدن کبیر کورینور و جمیع محاسنی ایه کوزینه هر شیدن یسیر کورینور * مرویدر که عائشه رضی الله عنها برغبه بی تصدق ایدوب بونده مثاقل کثیره وارد دیر ایدی پیغمبریمز صلی الله تعالی علیه وسلم ازواجنه دیدیکه سزدن بریکز همجوارنه

تصدق واحسانده شىء يسرى تحقير ايتسون اكرچه برقيون اياغى
ايسهده ورسون پيغمبريمز صلى الله عليه وسلم ايدر سورة اذازلزلت
قراعتى نصف قرآن قراءتلك تضعيفسز ثوابه عدیل اولور * وسورة
اخلاص قراعتى ثلث قرآن وسورة كافرون قراعتى ربع قرآن قراءتلك
تضعيفسز ثوابه عدیل اولور

سورة العاديات وهى احدى عشرة آية مختلف فيها

بسم الله الرحمن الرحيم

(والعاديات ضحبا) غزاتك خيل حقيقونكه اول عدو ايتديكند
جوفلرنده صوت اولور ويا حجه كى ابل حقيقونكه عرفه دن مزدلفه
ومزدلفه دن منابه مد اعناق ايدر (فالمریات قدحا) وشول خيل
حقيقونكه طاشلو يرد بوروديكند حافيله آتش چيقارر (فالغیرات
صبحا) وشول خيل حقيقونكه صبح وقتنده كافر غارتنه كيدر (فأثرن به
نقعا) كه انلر يوريدكلى مكاندن غبار اثاره ايدر (فوسطن به جمعا)
اول غبار ايله اعدا جاعتك اراسنه كيرر واحتمال اولور كه اشبو قسم
شول نفوسه اوله كيم كاللى اثرنه عاديه در افكار لريله انوار معارفى موريه در
وهوى وعادات اوزره مغيره در چكانكم انلره انوار قدسك مبدئى ظاهر اوله
وانكله شوق اثاره ايدوب جوع عليندن بر جمعك وسطنده بولنورلر
(ان الانسان لربه لکنود) انسان الله تعالىك نعمتيرنه كفوردر ويارب
تعالى به عاصيدر ويا مصائبى عد ايدوب نعمتى اونودر ويا قليل الخيردر
ويا اساعتدن خصلت واحده ايله احساندن خصال كثيره يي اونودر (وانه
على ذلك لشهيد) وانسان كنديتك كنود ايديكنه شاهددر اوزرنده
اثرى ظاهر اولسيله ويا انك كنود ايديكنه الله تعالى شاهددر (وانه لخب
الخير لشديد) وانسان مال محبته شديد وجعنه حريصدر والله تعالىك
طاعتنده ونعمتى شكرنده ضعيفدر (أفلا يعلم اذا بعث ما فى القبور)
انسان بيلزمى شول وقتيكه قبورده كى موتى بعث اولنه (وحصل ما فى
الصدور) وصدورده اولان خير وشر تميز وباراز اوله (ان ربهم بهم
يومئذ لخبير) رب تعالى انلرك اعلان وكرك اسرار ايتديكى حالته
عليدر يوم قيامته اكا كوره هر كسديه جزاسن ايدر

(سورة)

سورة القارعة وهى عشرة آيات مكية

بسم الله الرحمن الرحيم

(القارعة مالمقارعة وماادريك مالمقارعة) شول ساعت كه انك
اهواليله قلوب فزع اولنور اول نه شيددر انى سكا نه بيلدرديكه اول يوم
قيامتدر انك كنهه سنك علمك يوقدر (يوم يكون الناس كالفراش المبثوث)
اول حالت شول كونده دركه ناس كثرث وذات وانتشار واضطرابه جراد
منتشرة كى برى برلرینه مختلط اولور (وتكون الجبال كالعهن المنفوش)
وطاغلر اجزاسى تفرقتنه آتلىش پنه مثالنده هوا يوزنده طيران ايدر
(فاما من ثقلت موازينه فهو فى عيشة راضية) اول كسه كه حسانتك
ميرانى ثقيل اوله اول جنتده برعشده دركه صاحبي اكا راضى اولور
(واما من خفت موازينه فاهه هاوية) اما اول كسه كه حسانتك ميرانى
خفيف اوله اعتبار اولنور حسنه سى اولماغله وياسيتاتى حسانتنه غالب اولغله
انك مأوا سى نار هاويه در (وماادريك ماهيه نار حامية) هاويه نك ماهيتن
سكانه شىء بيلدردى ايدى اول برنارد دركه حرى نهايتده در

سورة التكاثر وهى ثمان آيات مختلف فيها

بسم الله الرحمن الرحيم

(الهيكم التكاثر حتى زرتم المقابر) كثرته مباهاات سزى اشغال ايتدى حتى كه احيا كر
عدد ينى استيعاب نصره مقبره رجوع ايتديكر كه امواتكر كثريله مباهاات
ايدسز * روايت اولنديكه بنو عبد منافله بنو سهم تفاخر ايدوب بنو عبد
مناف كثرته انلره غالب اولدیلر بنو سهم ديدیلر كه جاهليتده قتال بزى افتاء
ايدوبدر احيا مزله بيله امواتمى دخی عد ايدلم اوليله اولسه بنو سهم
انلره غالب اولدیلر ويا خود سزى اموال واولادله تكاثر اشغال ايدوب
كنديكزه اهم اولان آخرت ايچون سعي قيوب اعمار يكرى دنيا طلبنده
تضييعله موت وقبره ايرديكر (كلا سوف تعلمون ثم كلا سوف تعلمون)
امر كثرته مباهااتده دكلدر زيرا عاقله لايق اولور كه جيع همتى ومعظم سعي
دنيا ايچون اوليه زيرا انك عاقبتى وبال وحسرتدر رأيكرك خطاسنى بيلورسز
چكانكه سزه موت نازل اولوب قبره كيره سزى واندنصكرده چكانكه بعث
اولنده سزى (كلا لو تعلمون علم اليقين) حقا كه اكر مباهااتكرك عاقبتى

علم یقینله بیلدیکز شول استیقان ایتدیکز شیئی بیلدیکز کبی اول
سنی انک غیریدن اشغال ایدردی (لترون الجحیم) والله سنی ناری
بعیددن کوزیکز له کوررسن (ثم لترونها عین یقین) بعده انی عین
یقینله کوررسن زیرا که علم مشاهده مراتب یقینک اعلا سیدر (ثم لتسئلن
یومئذ عن النعم) بعده اول کونده سؤال اول نورسن هر نعمتیکه اول سنی
اشغال ایدی ویا هر نعمتک صغیر و کبیر ندیکه سنی انی الله تعالی انعام ایدی
انک شکرنی ادا ایتدیکز میدی * دینلدیکه اشبو حکم کفار مخصو صدر که
کفار مکه دنیاده خیر و نعمته ایدیلر یوم قیامتده انک شکرندن سؤال اول نورلر
حالبو که انلرب نعمی قویوب انک غیریه عبادت ایدرلردی اولیه اولسه اول
شکری ترکری اوزره تعذیب اولورلر * ابن عباس رضی الله عنهما ایدر ابدان
وابصار واسماعک صحتی نعمدر عباد آتی نه شیئده استعمال ایتدکرندن سؤال
اول نورلر * پیغمبریمز صلی الله تعالی علیه وسلم ایدر صحت و فراغ ایکی نعمتدر که
ناسک کشری انده مغبولدر * دینلدیکه پیغمبریمز صلی الله علیه وسلم
بعثتی و عبدک اسلامه توفیق اولتمی و شرابعک خفتی و قرآنک تیسیری نعمدر

سورة العصر وهی ثلاث آیات مکية

بسم الله الرحمن الرحيم

(والعصر) رب العصر حقیچون * دینلدیکه عصرله مراد صلاة
عصردر که اول صلاة و سطا در ویا عصر نبوتدر ویا دهردر که اعاجیبی
مشمولدر ویا لیل و نهاردر که اکا عصران دینور ویا نهارک آخر ساعتدر
(ان الانسان لفي خسر) جنس انسان مساعیلرند و عمرلرینی مطالبلرینه
صرفده خسرانده در (الاالذین آمنوا وعملوا الصالحات) الاشونلر
خسرانده دکدر که مؤمن اولوب اعمال صالحه ایشلدیلر زیرا که انلر دنیایی
ویروب آخرتی صلاتون آلدیلر انکله حیاة ابدیه و سعادت سرمدیه
ایردیلر (وتواصوا بالحق) واعتقاد و عملدن انکاری جائز اولمیان اشیایی
بری برلرینه وصیت ایتدیلر (وتواصوا بالصبر) ودخی فرائض اداسنه
و اوامر اقامتنه صبرله وصیت ایتدیلر * دینلدیکه یعنی انسان چقان معمر
اولوب هر مه ارسه اول نقصده اولور مکر شونلر اولمز که ایمان و عمل
صالح اوزره اوله لر انلر ایچون شباب و صحتلرند اشلو کدکاری محاسن

(اعمالرینک)

اعمالرینک اجوری منقطع اولمز علی الدوام اجری یازیلور

سورة الهمزة وهی تسع آیات مکية

بسم الله الرحمن الرحيم

(ویل لکل همزة لمزة) شدت عذاب هر کس به که آخری اردنده کراحت
ایتدیکي شیئله ذکر ایده که اول همزه در ودخی اولکه آخری کراحت ایتدیکي
شیئله یوزنده ذکر ایده که اول لمزه در * ابن عباس رضی الله عنهما ایدر
ایکیسی بر معناده در که انلر تماملردر که احبه بی بری برلرندن آیدرلر
وعیددن بریئلر ایچون عیب طلب ایدر * دینلدیکه همزه انلردر که لحوم
ناسی اکل ایدرلر ولمزه انلردر که ناسه طعن ایدرلر (الذی جمع مالا وعدده)
که اول مال دنیایی جمع ایدوب حوادث دهر ایچون اعداد ایدر یوخسه
الله تعالینک سبیلنه اتفاق ایتز (یحسب ان ماله اخلده) ظن ایدر که
اول جمع ایتدیکي مال انی دنیاده اخلاص ایدوب اندن موتی منع ایده (کلا)
اول ظن باطلدر اندن ارتداع ایتسون (لیبذن فی الخطیة) والله اول
طبقات ناردن نار حطمه به براغیلور (وماادریک ما الخطیة) حطمه نک
ماهین سکا نه شیئی بیلدردی (نار الله الموقدة) اول حطمه الله تعالینک
ایقاد و تسعیر اولمش ناریدر (التي تطلع علی الافئدة) که نار اول لحم
وجلدی اکل ایدوب حتی که فؤادلرینه ایرر (انها علیهم مؤصدة)
اول نارک قیولری کفار اوزره برکدیلور (فی عدم ممددة) انلر تیموردن
عمودلره بغلورلر که اول ممدوده و مطوله در

سورة الفیل وهی خمس آیات مکية

بسم الله الرحمن الرحيم

(ألم ترکیف فعل ربک باصحاب الفیل) یا محمد ربک جل شانک فعلنی
تواتر اخبارله ایشیدوب اصحاب فیلله اولان صدیعی آثارینی کورمدکی
(ألم یجعل کیدهم فی تضلیل) انلرک کعبه بی تعطیل و تخریبه قصد
ایتدکاری کیدی انلری اهلاکله تضییع و ابطال ایتدیمی (وارسل
علیهم طیرا ابابیل) که انلرک اوزره ابابیل قوشندن جاعات کشره کوندردی
(ترمیهن بحجارة من سجيل) که اول قوشلرک هر بری انلره حجاره

بع (۲۴)

آردیکه اول بالجددن دوزلمش آتشد پيشور لمکه طاش ایدلمشیدی
 ﴿فجعلهم كعصف مأكول﴾ حتی که الله تعالی انلری اول طریقله ورق
 زرع کبی قیلدیکه اکا کوه ایرمش اوله * روایت اولندیکه اشبو وقع
 پیغمبریمز صلی الله تعالی علیه وسلمک ولادت ییلنده واقع اولدی قصه سی
 اولدرکه ملک حبشه اصحمة النجاشی قبلندن یمن دیارنه ملک اولان ابرهه
 ابن الصباح الاشرم صنعاده قلیس دینور برکنیسه بنا ایتدیکه ناسی
 کعبه مکرمه نك زیارت وطوافدن اکا صرف ایده من بعد ناس کعبه مکرمه
 زیارتن ترک ایدوب اکا کیدملر چون انک اول عزیمتن کنانه دن برر جل ایشندی
 اول کنیسه خدامنک غفلتی حالنده کیجه اکا کیردی ومحرابنده قضاء
 حاجت ایدوب نجاستی دیوارلرینه سوردی چون اول حالت ابرهه یه خبر
 ویریلوب انی کوردی یمن ایتدیکه کعبه یی هدم ایده اولیه اولسه جیشی
 جمع ایتدی ونجاشینک محمود دینور بر فیل عظیمی وار ایدی جیشه انی
 مقدم ایدوب کتدی حتی مکة مکرمه قربنده بر موضعه نزول ایتدی مکر
 اول وقتده عبد المطلب سید قریش وصاحب غیر مکة مکرمه ایدی برقاطره
 بنوب ابرهه یه واردی مکر انک سهلده ناسه طعام یدروب وطاقلرده
 وحوش وطيوری طویورر دیو خصال جیده سنی ابرهه ایشتمشیدی اکا
 اکرام ایدوب یانه اجلاس ایتدی وبزدن حاجتک ندر دیو ترجانله سوال
 ایتدی عبد المطلب دیدیکه دوهلمدن ایکیوز دکاو دوهی جیشک غارت
 ایشدر حاجتم اولدرکه امرکه اول دوهلم بکار دایدیل ابرهه ایتدی بن
 سنی عجب کوردمکه بن سزک دینکر رکنی اولان کعبه یی تخریبه کلشیکن بدن
 انی دلیوب دوهلریکی دیرسن عبد المطلب دیدیکه دوهلمک صاحبی بنم
 انکچون سندن انی طلب ایدرین کعبه مکرمه صاحبی ابرودر دیرسه
 سزی اندن منع ایدر اولیه اولسه ابرهه جیشنه امر ایلدی عبد المطلبک
 دوهلمدن الدقرینی اکارد ایتدیلر اندن عبد المطلب کیرو مکة مکرمه یه کلدی
 وقومنه امر ایلدی طاغله کیدوب طاغلدیلر وکندی بیت شریفه کلدی
 وقیوسی حلقه سنه یاپشوب دیدیکه آلهی سکا معلومدرکه اشبو بیتک
 هدمنه عدو کلو بدر ارادت کریمه ک نه ایه امر سنکدر انی ایشله دیوب اندن
 دونوب قومنه کتدی بوند نصکره ابرهه جیشی ابله اوکارنجه فیلی یدوب
 کعبه جاننه کتدیلر وقتا که حرم شریفه دخوله عزم ایتدیلر فیل چوکوب

(ایلو)

ایلو وکتدی معول ابله باشنه ندکاو اوردیلر سه برندن برخطوه ایرلمدی قچانکه
 انی کعبه دن غیری جانبه دوندرسه لر سرعتله اول جانبه کیدردی انلر اکا
 مشغول ایکن کورسده لرکه دریادن قرنغج هیئتنده قوشلر پیدا اولدی هربری
 نخوددن کوچک و مرجکدن بیوک اوچر طاش برین منقارنده وایکین
 ایکی ایاغنده طوتردی حتی که هواده ابرهه قومنک باشلری برابرینه کلوب
 طور دیلر واول طاشلری انلرک اوزره صالیو بر دیلر اول طاشدن کیمه
 اصابت ایتدیه هلاک اولدی وبرنجهلری ایه یوله دوشوب کتدیلر انلر
 دخی یولده ومنزلده دوشرک جیعی هلاک ایردیلر وابرهنک ایه جسدنده
 بردا پیدا اولوب اناملن برر برر دوشردی حتی که اول وجه اوزره عذابله
 صنعایه ایردی صدری یاریلوب جانن جهنمه صالیو یردی وفیل ایه هیچ
 برضرر سز قورتلدی

سورة قريش وهي اربع آيات مكية

بسم الله الرحمن الرحيم

﴿لايلاف قريش ايلافهم رحلة الشتاء والصيف﴾ يا محمد ربك تعالی
 اصحاب فیلی هلاک ایتدی تا که قریش حرمده بیت شریف جوارنده
 الفت واقامت ایدلر ویا الله تعالی انک قریشه نعمتلی لایحصار سائر
 نعمتلی چون اکا عبادت ایتلر سه شتاده یمنه وصیفده شامه رحلتله
 الفتلی ایلچون اکا عبادت ایتسونلر هیچ کسه انلره سولله تعرض
 ایتز بلکه حرم الله سکا ندر دیو تکریم ایدرلر ﴿فلیعبدوا رب هذا البيت﴾
 ایمدی کعبه نك ربی جل شانیه عبادت ایتسونلر ایکی رحله یه ایلقلری
 ایلچون شتا وصیف مؤتلینه کافی اولدی ﴿الذی اطعمهم من جوع﴾
 که انلری قحطله اصابت ایدن جوعدن اشباع ایتدی ﴿وآمنهم من خوف﴾
 وانلری اصحاب فیل خوفدن ویاخود قحط بلد وسارلرنده غارتدن ویا جذام
 علتندن امن اوزره قیلدی

سورة الماعون وهي سبع آيات مختلف فيها

بسم الله الرحمن الرحيم

﴿أرأيت الذي يكذب بالدين﴾ يا محمد بیلمدکی شول کسه یی یوم قیامتده

جزای تکیذ ایدر (فذلک الذی یدع الیتیم) ایدی اول شول کسه درکه
یتیمی حقندن دفع ایدر ویا اکا قهر ایدر * دینلدیکه انکله مراد ابوجلهدرکه
اول بریتیمه وصی ایدی عریان اکا کلوب کندی مالندن سؤال ایتدکده
انی عنقله دفع ایدی ویا ابوسفیاندرکه برجزور نحر ایدوب بریتیم اندن
لحم سؤال ایتدیکنده عصاسیله انی اوردی ویا ولید بن المغیره ویا برمنافق
بخیلدر (ولایحض علی طعام المسکین) ومسکینی اطعامه نه کندی رغبت
ایدر ونه غیرى اول فعله ترغیب ایدر الله تعالی منع معروفی وایذاء ضعیفی
یوم جزای تکیذیه علامت قیلدی یعنی اکبر انک جزایه ایمانی ووعیده
ایقانی اولسه الله تعالی انک عقابندن قورقوب معصیتیه اقدام ایتزدی
(فویل للمصلین الذین هم عن صلاتهم ساهون) شدت عذاب شول
مصلیه کیم صلاتلندن غافلدر وقتلین اضاعه ایدرلر ویا ناس محضرنده
صلاتی ادا ایدرلر تنهالرنده انی ترک ایدرلر (الذین هم یراؤن) که انلر
عبادتلرنده ریا ایدرلر یعنی عبادتی ناس انلری صلاحله ذکر ایتسون ایچون
ایدرلر یوخسه الله تعالی دن ثواب رجا ایچون ویا عقاب خو فیچون دکل
(ویمنعون الماعون) وزکاتی اهلندن منع ایدرلر * دینلدیکه ماعون
هرشیدرکه انی ناس بیلنلرنده تعاطی ایدرلر باطله وقوغه وتجره وصحن
وصو وآتش واوللق کبی * دینلدیکه ماعونی ضرورتله استعاره ایدندن
منعی حرام اولور اما که ضرورتسز انی استعاره ایدندن منعی حرام اولور
لکن قبیح اولور ایدی یتیمی دفع وقهر ضعف دیندن اولوب ذم وتوبیخی
ایجاب ایدیچک شول عماد دین اولان صلاتدن سهو وکفردن شعبه اولان
ریا و قنطره اسلام اولان زکاتک منعی ذم وتوبیخه احق واولی اولور

سورة الکوثر وهی ثلاث آیات مکیة

بسم الله الرحمن الرحيم

(انا اعطیناک الکوثر) یا محمد بز سکا علم وعمل وشرف داریندن خیر کثیر
ویردک * پیغمبریمز صلی الله علیه وسلمدن روایت اولندیکه کوثر جنتده
برنهردرکه ربم جل شانه بکا انی وعد ایدوبدر انده خیر کثیر وارددر عسلدن
احلی ولبسندن ابض وثلجندن ابردوزبدن الیندر اول نهرک ایکی طرفی
زبرجددر آتیهلری کومشدندر اندن برکزه ایچن من بعد صوصامن

(دینلدیکه)

دینلدیکه اول جنتده برحوضدر ویا انکله مراد قرآندر (فصل لربک
وانحر) الله تعالی نیک وجه کریمچون صلاته مداومت ایت انک انعامنه
شا کر اولدیغک حالده زیرا که صلاة شکرت اقسامنی جامعدر وبدنه
نحر ایدوب محتاجلره تصدق ایت که اول اموال عربک خیاریدر *
دینلدیکه یعنی صلاة عیدی ادا ایدوب اضحیه بی نحر ایت (ان شائک
هو الا بتر) قومکدن اول کسه که سکا بغض ایدر اول ذبیاده وآخرته
هر خیردن منقطعدر انک عصبیتی یوقدر اندن نسل ویا حسن ذکر قالمز
اما که سن انک کبی دکلسن ذریکت وحسن صیتک وآثار فضلک یوم قیامتیه
دکین قالور ومع ذلک آخرته ویریه جک کرامتک وصفه کلز

سورة الکافرون وهی ست آیات مکیة

بسم الله الرحمن الرحيم

روایت اولندیکه قریشدن برجاعت پیغمبریمز صلی الله تعالی علیه وسلمه
دیدیلر که یا محمد سن بزم دینره اتباع ایت بز دخی سنک دینکه اتباع ایدلم
هر امریمزه سنی تشریک ایدلم برسنه سن بزم آلهه مزه عبادت ایدوب
برسنه دخی بز سنک آلهکه عبادت ایدلم تا که کتور دیکک دین خیرایسه
انده سکا مشارکت ایدوب اندن حظمز آلمش اوله وز واکر بزم صدندنه
اولدیغمز دین خیرایسه سن دخی انده بزه مشارکت ایدوب اندن حظکی
آلمش اوله سن پیغمبریمز صلی الله تعالی علیه وسلم ایدی العیاذ بالله تعالی
ربم جل شانه به غیرى اشراک ایدم اول سبیدن بوسوره نازل اولدیکه
(قل یا ایها الکافرون) یا محمد انلره دیکل که یا کافرلر علم الالهده ایمانه کلور
دکلر سنز (لاعبدم ما تعبدون) زمان مستقبلده عبادت ایتزین اصنامه
کیم الان سنز اکا عبادت ایدر سنز (ولانتم عابدون ما عبد) والان
بنم عبادت ایتدی کیم الله تعالی به زمان مستقبلده سنز عبادت ایدر دکلر سنز
(ولانا عابد ما عبدتم) حالبو که بن سنزک عبادت ایتدی ککز شیئه زمان
جاهلیته عبادت ایتزدیم ایدی نه احتمالدر که زمان اسلامده بن اکا
عبادت ایدم زیرا که بن انک مضرتن بیلورم (ولانتم عابدون ما عبد)
وسنر زمان جاهلیته جهلکزدن وقلت عقلکزدن الان بنم عبادت
ایتدی کیم عبادت ایتزدیکز ایدی بن نه باطله عبادت ایدرم ونه سنز

حقه عبادت ايدرسز وياخود نه بن سزك عبادت ايتديكز كبي عبادت ايدرم ونه سز بنم عبادتم كبي عبادت ايدرسز (لكم دينكم ولي دين) بن سزه ريم جل شاندهك رسالتن ايركوروب اوزريكزه حجتى اقامت ايدم بنم اوزريمه واجب دكلدر كه سزى دين اسلامه اجبار ايدم وبن سزك دينكزه ابتدا رجوع ايدردكلم ايمدى شر ككز اوزره ثابت اولك وبن منتظر مكه رب تعالى سزك شانكزده نه امر ايدم موجيله عمل ايدم وبنديخي دينم اوزره ثابتم اندن غيري به تجاوز ايتزمكه اول صراط مستقيدر * دينلديكه اشبو سورة آيت قتاله منسوخدر بعضيلر اشبو دينى حساب وجزاء ودعا وعبادته تفسير ايتشدر * دينلديكه چقان بر كسه بر منكره انكار ايدوب قولى قبول اولسه اكا واجب اولور كه اشبو آيت دلالتيله مذهبي اوزره ثابت اولوب منكرى مذهبي اوزره ترك ايدم

سورة النصر وهى ثلاث آيات مدنية

بسم الله الرحمن الرحيم

(اذ جاء نصر الله والفتح) يا محمد چقانهك الله تعالىنك سكا عداوت ايدنلر اوزره نصرتى ومكه نك وسائر بلاد كفرنك فتحى ايريشه (ورأيت الناس يدخلون في دين الله افواجا) وناسى كوره سنكه فوج فوج دين الله كيرهلر اهل مكه وطائف ويمن وهوازن وسائر قبائل عرب كبي (فسبح بحمد ربك) نه سنك ونه بر كسه نك خاطرينه خطور ايتن شيتك تيسير نه ربك جل شانده حامد اولديغك حالده تعجب ايت ويا انك نعمتلىنه حامد اولديغك حالده نماز قيل * روايت اولنديكه پيغمبريمز صلى الله تعالى عليه وسلم مكه به داخل اولديغنده كه به به كوروب سكر ركعت نماز قيلدى وياخود انى ظلمه نك قول فاسدنن تنزيه ايت صدق وعدنه حامد اولديغك حالده وياخود اكا صفات جلاليله ثنا ايت صفات اكرامنه حامد اولديغك حالده (واستغفره) ونفسكى هضم وعملكى استقصار وغيره التفاتله سندن صدور ايدن فرطاتكى استدراك ايتچون اندن استغفار ايت پس بواجلدن پيغمبريمز صلى الله تعالى عليه وسلمدن روايت اولندى ديمشكه بن هر كونده وكجهده يوز كره استغفار ايدرين وياخود امتك ايتچون استغفار ايت

(انه)

(انه كان توابا) اول الله تعالى مكلفينى خلق ايدلدينبرو استغفار ايدنلرك توبه لر بنى قبول ايتمكه مستمر اولدى اكثر ون ديدلركه اشبو سورة مكه مكرمه فتحندن اول نازل اولوبدر واند پيغمبريمز صلى الله عليه وسلمك موته اشارت وار دركه پيغمبريمز صلى الله عليه وسلم انى او قو يحق عباس آغلادى پيغمبريمز صلى الله عليه وسلم اكا ياعم نيه آغلسن ديدى عباس ديديكه زيرا انكه موتك مجيئه اشارت اولندك پيغمبريمز صلى الله عليه وسلم ايتدى حال ديديكك منوال اوزره در اويله اولسه بوند نصكره عباس كولر كورلدى * دينلديكه بو قولك قائلى ابن عباس ايدى اول اجلدن پيغمبريمز صلى الله تعالى عليه وسلم انك شانده اشبو غلامه علم كثير ويريلوبدر ديردى و بوكا سورة التوديع دينلدى

سورة تبت وهى خمس آيات مكية

بسم الله الرحمن الرحيم

(تبت يدا ابي لهب وتب) ابولهب هلاكه مؤدى خسارته ايردى الله تعالى انى هلاك ايدم وقتاكه پيغمبريمز صلى الله عليه وسلم (وانذر عشيرتك الاقربين) سكا اقرب عشيرتكي انذار ايت ديو امر اولندى اقرار بن جمع ايدوب انذار ايتدكه ابولهب اكا يا محمد هلكه وخسارته ايره سنكه بزى بونكچونمى چاگردك ديدى اول سببدن بو آيت نازل اولدى (ما اغنى عنه ماله وما كسب) وقتاكه پيغمبريمز صلى الله تعالى عليه وسلم اقرار بن دينه دعوت ايتدى ابولهب ديديكه اكر قرداشم او غلنك ديديكى حق اولور سه بن مال واولادى فدا ايدوب انك ديديكى عذابدن قورتلورم نازل اولديكه اكا هلاك ايرديكنده مال واولادى انى اندن تخليصه مفيد اولمز اكا بناء او غلى عتبه يي شام يولنده كيدر كن قافله اورته سندن برارسلان قاپوت كوتوردى و ابو لهب ايسه بدر وقعه سندن برقاج كون صكرده عده دينور برنوع جرحك خروجيله هلاك اولوب ميتة سى اوچ كون قالوب دفن اولندى حتى كه رايحه كريهه سندن يانته وارلموب آخر امرده بعض سودانى استيجارله دفن ايتدرديلر اويله اولسه آيت كريمه غيبدن اخبار اولوب حالنه مطابق ظاهر اولدى (سيصلى ناراً ذات لهب) اول ابولهب آخرته نار جهنم داخل اوليسردر كه اول نار التهاب واشتعال ايدر

(وامراته) ودخی اول ناره انک مرأه سی ام جیل که ابو سفیانک قز
قزنداشیدر انکه بیه داخل اولی سردر (حالة الخطب) که اول نار جهنم
ایچون خطب حواله سیدر زیر اول پیغمبر یمز صلی الله تعالی علیه وسلم معاداته
اوزاری تحمل ایدردی و یازو جنی پیغمبر یمز صلی الله تعالی علیه وسلم ایدیه
تحمل ایدردی و یانما اولدیغندن نار خصوصتی ایتاد ایدردی و یاشوک
سعدان حزمه سن کیجه کتوروب پیغمبر یمز صلی الله تعالی علیه وسلم یولی
اوزره طاغردی (فی جیدها جبل من مسد) که انک بوینده قتی بوککش
ایپ واردز تکیم او طون طاشینلر انی ایدر * اشبو آیت انک حالنی تحسین
و تحقیر و زوجنی اغضاب ایچون ایدی و یاخود نار جهنمه کی حالنی بیاندکه
انده ارقسندده جهنم حطبندن حزمه زقوم و ضریع و بوینده ناردن زنجیر
اولی سردر * روایت اولندیکه بروقنده اول حزمه سنی بر دیوار اوزره قویوب
لیفدن این کو کسی اوزره قتی بغلدی اول حینده جبریل علیه السلام دیوارک
اردینه کلوب انی چکمه سیله اول بوغلدی

سورة الاخلاص وهی اربع آیات مختلف فیها

بسم الله الرحمن الرحيم

(قل هو الله احد) وقتنا که مشرکون پیغمبر یمز صلی الله تعالی علیه وسلم
دیدیلر که یا محمد ربکی بزه وصف ایتکه سن بزی اکا دعوت ایدر سن اول
سبیدن اشبو سورة نازل اولدی یعنی انره دیکل که الله تعالی واحددر بالذات
اجزادن منفرددر زیر اول جسم و یا مرکب دکدر (الله الصمد) که اول
سیددر حوا یجده اکا قصد اول نور جمیع صفاتنده اول کاملدر انواع سوددک
جمیعی انده کامل اولویدر و غایبده مقصود مصائبده اول مستغادر خلقت
فنا سندنصکره اول باقیدر انک فوقنده احد یوقدر جمیع عیوبدن اول
منزهدر اکا آفات اعترا اتمز (لم یلد ولم یولد) انک ولدی اولدیکه اکا
وارث اوله زیر انک بجانی یوقدر اول معینه و یا اکا خلف اولور احده
محتاج دکدر حاجت و فنا اکا تمتع اولدیغیچون وانک والدی دخی اولدیکه
اول اندن ملکه وارث اولمش اوله زیر اکه اول هیچ بر شیئه محتاج
اولدی و اکا عدم دخی سبق ایتدی بلکه اول واحد قدیمدر (ولم یکن له
کفو احد) و هیچ احد اکا کفو و مماثل اولدی اول الوهیت و حکم

(وتدبرنده)

وتدبرنده شریکی یوقدر کمال وحدانیتله موصوفدر اشبو سورة شریفه
کمال قصر یله معاوف الهیهنک جمیعن مشتمل اولدیغیچون حدیثده انک
قراقی ثلث قرآنه عدیل اولور دینلدی زیرا که مقاصد قرآنیه عقائد و احکام
و قصص بیاننه محصوره در و اولکه انی کل قرآنه عدیلدر دیدی قرآندن
مقصود بالذات اولان شیئی اعتبار ایتدی * روایت اولندیکه پیغمبر یمز
صلی الله علیه وسلم برکسه یی سورة اخلاص او قور ایشیدوب دیدیکه
واجب اولدی دینلدیکه یار رسول الله اکا واجب اولان نه شیدر دیدیکه جنت

سورة الفلق وهی خمس آیات مختلف فیها

بسم الله الرحمن الرحيم

(قل اعوذ برب الفلق) یا محمد دیکل که بن صبحک ربی جل شانیه
استعاذه ایدر مکه انکه لیلک وحشتن کیدردی و یا فلق جهنمه بر قیو
درکه اول آچلدیغنده انک شدت حرنندن اهل نار فریاد ایدیشورلر (من شر
ما خلق) هر شیئی شر تندنکه رب تعالی انی خلق ایتدی (ومن شر غاسق
اذا وقب) و قر شر تندنکه منخسف اولوب سیاه اوله و یا لیل شر تندنکه ظلامی
هر شیئه داخل اوله زیرا انده مضار کثیره دفعی عسیر اولور و یا ثریا که سقوط
ایده زیر انک سقوطنده امراض کثیره اولور و طلوعنده مرتفع اولور
دینلدی (ومن شر النفاثات فی العقد) و نساء سواحر و یا نفوس رجال
شر تندنکه انلر خیوط عقده لرینه رقیه ایتدکنرندنصکره اکا نفث ایدر
(ومن شر حاسد اذا حسد) و حاسد شر تندنکه حسدین اظهار ایدوب
مقتضاسیله عمل ایده زیرا که اندن اول حسدک ضرری محسوده
عودت اتمز بلکه انحق حاسدک کندویه مختص اولور که انک سرورینه
یرینور

سورة الناس وهی ست آیات مختلف فیها

بسم الله الرحمن الرحيم

(قل اعوذ برب الناس) یا محمد دیکل که بن استعاذه ایدرین اول الله
تعالی یه کیم ناسک رازقیدر (ملک الناس) اول انلرک خالق و مالکیدر
انلر اوزره دینلدیکن ایشلر و حکم ایلر انک حکمنی ردایدر یوقدر (اله الناس)

اول انترك آلهيدر هيچ احدك انده اكا مشار كتي يوقدر (من شر الوسواس
الخناس) شول شيطان شر نندنكه اول موسو سدر وعادتي تاخر در چنانكه
انسان رب تعالى بي ذكر ايد (الذي يوسوس في صدور الناس
من الجنة والناس) كه اول صدور ناسده كلام خفيه تحديث ايدر حتى كه فهم
قلبه واصل اولوب انكه خلق طريق حقن اضلال ايدر اول صدور ناسده
كلام خفيه سما عنسز تحديث ايدن جندن اولديغي كي انسدن دخی اولور
وياخود اول شيطان وسوسه سيله جنى اضلال ايتديكي كي انسى دخی
اضلال ايدر * ابن عباس رضى الله عنهما ايدر پيغمبريمز صلى الله عليه
وسلمه يهوددن بر غلام خدمت ايدردي يهودك اكا الحاحيله پيغمبريمز
صلى الله عليه وسلمك مبارك باشي قيلندن مشط اراسنده قالمشدي انى آلوب
لبيد بن الا عصم نام يهودى يه ويردى اول ايسه اول قبله اون بر عقده ايله
سحر ايتديكند نصكره بر قيويه براغوب اوزرينه طاشله باصدر دى
اول سببدن پيغمبريمز صلى الله عليه وسلم خسته اوليحق اشبو ايكي
قل اعوذ سوره لريله جبريل عليه السلام كلوب موضع سحرى اكا خبر
ويردى اويله اولسه پيغمبريمز صلى الله عليه وسلم اكا على رضى الله عنه بي
كوندردى انى كتور يچك اوزرينه اشبو ايكي سوره بي كه اون بر آتدر
اوقودى هر بر آيتى اوقودجه اول اون بر عقده نك برى چوزلدى
وانكه پيغمبريمز صلى الله عليه وسلم بدن لطيفلرند خفت وصحت بولدى
پيغمبريمز صلى الله عليه وسلم ايدر بكا ايكي سوره يعنى معوذتين نازل
اولديكه تعويذ انده مثلى نازل اوليوبدر ايمدى اول ايكي سوره بي
قراءتك عند الله سائر معوذاتله تعوذكدن احب وارضادر * عائشه
رضى الله عنها ايدر پيغمبريمز صلى الله عليه وسلمك چقان بروجعى
اولسه اشبو ايكي سوره بي اوقيوب اليه اوفورردى واول
وجعى اولان عضوينه انى سورردى وجعى مشد
اولديغنده آتى بن اوقيوب اول عضوينه
انك البنى يمن وبر كتي رجائيله
بن سورردم

تم طبع تفسير القرآن * المسمى بترجمة تبيان * للعالم المحقق * والفاضل
المدقق * المولى (محمد تفسيرى) اسكنه الله تعالى فى جنات تحتها الانهار
تجرى * بالاعتناء فى تصحيحه * والاحتراز عن تحريفه * بما تبلغ اليه طاقة
الانسان * فى يمن عصر حضرة سلطاننا الاعظم * ومولينا المفخم *
ناصر الشريعة القويمة * سالك الطريقة المستقيمة * المولع الى الخيرات
والمبرات * الراغب الى نهاية مراتب الاحسانات * الا وهو السلطان
السلطان الغازى * **عبد الحميد** * خان * طول الله عمره بالعافية الدائمة
بلا ملال * وايد ملكه وسلطنته بلا خلل ولا زوال * وكان ذلك
فى المطبعة العثمانية * فى دار الخلافة العلية * حفظهما الله تعالى
عن الآفات والبليّة * لخمسة عشر ليال بقين من ربيع الآخرة * سنة سبع
وثلاثمائة بعد الالف من الهجرة الفاخرة * صلى الله وسلم على صاحبها
الرسول الامين * وعلى آله وصحبه الاكرمين

نور عثمانيه امام اولى	فاتح جامع شريفى درس عام	بايزيد جامع شريفى درس عام
ريزه لى حافظ احمد	مجير نرندن استانبولى	مجير نرندن استانبولى السيد
افندى المصحح	محمد امين افندى المصحح	حافظ محمد اسعد افندى
كذا	فى المطبعة العثمانية	رئيس المصححين
		فى المطبعة العثمانية

نوشهرى مصطفى افندى	حفيد نافذ پاشا السيد
المصحح	شكر الله عصمت افندى
كذا	المصحح
	كذا

طبع فى المطبعة النفيسة العثمانية * لازال شرفها الى يوم القيامة *



